


Tuhun saá ña najándacoo Jesucristo nu̯ yo:

El Nuevo Testamento en el mixteco de

Silacayoapan



New Testament in Mixtec, Silacayoapan (MX:mks:Mixtec,  
Silacayoapan)

# **Tuhun saá ña najáandacoo Jesucristo nu yo: El Nuevo Testamento en el mixteco de Silacayoapan**

## **New Testament in Mixtec, Silacayoapan (MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Mixtec, Silacayoapan

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files dated 29 Jan 2022

7f2d3ecf-6d15-55a5-9081-6e970474df2f

## Contents

San Mateo . . . . .	1
San Marcos . . . . .	56
San Lucas . . . . .	89
San Juan . . . . .	150
Hechos . . . . .	194
Romanos . . . . .	249
1 Corintios . . . . .	271
2 Corintios . . . . .	293
Gálatas . . . . .	307
Efesios . . . . .	315
Filipenses . . . . .	323
Colosenses . . . . .	328
1 Tesalonicenses . . . . .	333
2 Tesalonicenses . . . . .	338
1 Timoteo . . . . .	341
2 Timoteo . . . . .	347
Tito . . . . .	352
Filemón . . . . .	355
Hebreos . . . . .	357
Santiago . . . . .	373
1 Pedro . . . . .	379
2 Pedro . . . . .	386
1 Juan . . . . .	390
2 Juan . . . . .	396
3 Juan . . . . .	397
San Judas . . . . .	398
Apocalipsis . . . . .	400

## Tuhun vaha naca hyi Mateo saha ña naja Jesucristo

*Chichi naquixi Jesucristo  
(Lc. 3:23-38)*

<sup>1</sup> Ña yóho cúu quivi na nasacuu tásáhnú jícó Jesucristo, mé a naquixi chichi David xihín chichi Abraham:

<sup>2</sup> Abraham nasacuu tátá Isaac ta Isaac nasacuu tátá Jacob ta Jacob nasacuu tátá Judá xihín java ga ñani da. <sup>3</sup> Judá nasacuu tátá Fares xihín Zara ta náná ndívi da yóho nasananí ña Tamar. Ta Fares nasacuu tátá Esrom ta Esrom nasacuu tátá Aram. <sup>4</sup> Ta Aram nasacuu tátá Aminadab ta Aminadab nasacuu tátá Naasón ta Naasón nasacuu tátá Salmón. <sup>5</sup> Ta Salmón nasacuu tátá Booz, da cúu jahyi ña naní Rahab. Booz nasacuu tátá Obed ta Obed yóho nasacuu da jahyi ña naní Rut cán. Ta mé Obed yóho nasacuu tátá Isaí. <sup>6</sup> Ta Isaí nasacuu tátá rey David ta rey David yóho nasacuu tátá Salomón, da cúu jahyi ña nasacuu ñájíhí Urías nu cuítí cán.

<sup>7</sup> Ta Salomón nasacuu tátá Roboam ta Roboam nasacuu tátá Abías ta Abías yóho nasacuu tátá Asa. <sup>8</sup> Ta Asa nasacuu tátá Josafat ta Josafat nasacuu tátá Joram ta Joram nasacuu tátá Uzías. <sup>9</sup> Ta Uzías nasacuu tátá Jotam ta Jotam nasacuu tátá Acáz ta Acáz nasacuu tátá Ezequías. <sup>10</sup> Ta Ezequías nasacuu tátá Manasés ta Manasés nasacuu tátá Amón ta Amón nasacuu tátá Josías. <sup>11</sup> Ta Josías nasacuu tátá Jeconías xihín java ga ñani da. Ta nasacuu da tiempo tá natiin soldado na Israel já nasandaca ñahá da na cán ñuu Babilonia.

<sup>12</sup> Ta tá nasanduu na Israel ñuu Babilonia cán já nacacu Salatiel ta tátá Salatiel nasacuu Jeconías. Ta Salatiel nasacuu tátá Zorobabel. <sup>13</sup> Ta Zorobabel nasacuu tátá Abiud ta Abiud nasacuu tátá Eliaquim ta Eliaquim nasacuu tátá Azor. <sup>14</sup> Ta Azor nasacuu tátá Sadoc ta Sadoc nasacuu tátá Aquim ta Aquim nasacuu tátá Eliud. <sup>15</sup> Ta Eliud nasacuu tátá Eleazar ta Eleazar nasacuu tátá Matán ta Matán nasacuu tátá

Jacob. <sup>16</sup> Ta Jacob nasacuu tátá José, da nasacuu yí María. Ta María cúu ña nasacuu náná Jesucristo, mé a nachindahá Ndióxi cacomí a cuéntá saha ñayivi.

<sup>17</sup> Ña cán quéa janda tá nacasahá cácu jahyi Abraham janda quiahva naxinu coo a quivi nacasahá cácu jahyi David já nayaha uxu comi generación. Ta tá quiahva nacasahá cácu jahyi David janda quiahva natiin na Babilonia na Israel já ñéhe ñahá na cuahan na nayaha inga uxu comi generación. Ta nayaha inga uxu comi generación nani nasanduu na Israel ñuu Babilonia janda quiahva naxinu coo quivi nacacu Jesús, mé a nachindahá Ndióxi cacomí a cuéntá saha ñayivi.

*Tá nacacu Jesús  
(Lc. 2:1-7)*

<sup>18</sup> Joho nasahiin tá nacacu Jesucristo: Mé María, ña cacuu náná Jesús cán sa nasahan ña tuhun ña ña tandaha ña xihín José. Joo tá camaní coo da xihín ña já nacandaa ini da ña ñuhu jahyi ña. Ta ña yóho nasacuu a ña naja inima yí Ndióxi. <sup>19</sup> Ta José, da cacuu yí María cán cúu dá da cáca ndinuhu ña ndaa. Ta naca han da ña nasahiin ña xihín inga dataa joo coo naxeen da cahan núu da saha ña nuú ñayivi. Saha ña cán quéa nasacu ini da jandacoo jehé da ña. <sup>20</sup> Ta nani cáhvi ini da saha ña caja da anda jávi naquixi in sani nu dá ta nandaca náha in táto Ndióxi nu dá. Ta tañu mé sani cán naca han xihín dá. Já nacachi a já:

—José, da naquixi chichi David, a cáyihví tohún tandahún xihín María jan jáchi naja inima yí Ndióxi ña ñuhu jahyi ña. <sup>21</sup> Ta tá sa nacacu jahyi María já chican ndó quivi á ná cananí a Jesús jáchi jaca a ñayivi nuú cuachi tá ná candeé ini na mé a —nacachi a.

<sup>22</sup> Tóco ndihi ña yóho nayaha ña ná xinu coo nuú tuhun Ndióxi ña naca hyi in profeta sanahá ndivaha cán ta já nacachi da cán já:

<sup>23</sup> Vaxi quivi cañuhu jahyi in ña tacú, ña a ñaha coo ta xihín.

Ta tá sa nacacu jahyi ña cán já cacu na quivi á cananí a Emanuel.

Ta tuhun yóho cúní cachi a: in Ndióxi xoho.

<sup>24</sup> Ta tá nandicaxí ini José já naja da tá in nacachi táto Ndióxi cán xihín dá. Ta

já natandaha dá xihin María. <sup>25</sup> Joo coo nasahiin da xihin ña tá quiahva íin in dataa xihin ñájíhí da janda quiahva cacu jahyi María. Ta tá nacacu a cán já nasacu José quivi á cananí a Jesús.

## 2

### *Tá naxito nihni na ndichí Jesús*

<sup>1</sup> Ta nacacu Jesús in ñuu naní Belén ña ndacaan estado Judea. Ta mé tiempo cán nasacomí rey Herodes cuénta sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúu ná na jácuaha xihin quimi ta naquixi na chí nu cána candii. <sup>2</sup> Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá íin da loho nacacu viti jan, da cacuu rey nuú na Israel. Jáchi naxini nde naqueta quimi nuú nde ta xihin rí yóho sa nacandaa ini nde ña sa nacacu da. Ta viti vaxi nde yóho caja cáhnu nde da —nacachi na ndichí cán ndaca tuhún na.

<sup>3</sup> Ta tá naxini johu rey Herodes ña yóho já nacasáhá da ndíhi ndivaha ini da ta quiahva já nacasáhá ndíhi ini tóco ndíhi ñayivi ñuu Jerusalén cán. <sup>4</sup> Sahá ña cán quéa nacana rey Herodes cán tóco ndíhi na sacuaaha nuú jutu xihin na jánaha ley Moisés cán. Ta já nandaca tuhún da na saha ndá ñuu cúu nu cáchí tuhun Ndióxi cacu da nasahan Ndióxi tuhun a chindahá a cacomí a cuénta sahá ñayivi. <sup>5</sup> Já nacachi na cán já xihin dá:

—Ñuu Belén, ña ndacaan estado Judea cán cúu nuú cáchí tuhun Ndióxi cacu da jáchi quiahva já nacahyi in profeta sanahá tá nacachi da já:

<sup>6</sup> Vatí ñuu Belén, ña ndacaan estado Judea, cúu á in ñuu loho ndivaha tañu ñuu náhnu cán joo íin sahá a, jáchi tañu ñayivi ñuu cán ndindita in da cacomí cuénta sahá na Israel, na cúu cuénta Ndióxi, já nacahyi in profeta sanahá.

<sup>7</sup> Tá nandíhi já nacana xóo rey Herodes na ndichí cán ta já nandaca tuhún da na cán saha ndá quivi nanaha quimi cán mé rí nu ná. <sup>8</sup> Anda já nachindahá da na ñuu Belén. Já nacachi da já xihin ná:

—Cuáhán ndo ñuu Belén cán ta ndaca tuhún vaha ndó ndaja cáa sahá taa loho nacacu jan. Ta tá sa nandiñehe ndó a já quixi ndó caxi tuhun ndó xihin i já ná cahun ri yehe va caja cáhnu i ña —nacachi Herodes xihin na.

<sup>9</sup> Ta xihin ña yóho naquee na ndichí cuahan tucu na. Ta quimi, rí naxini na nu cuítí cán já ndaca tucu rí na cuahan na. Ta tá naxinu rí chí nuú íin mé a loho cán anda já nasacandichi rí. <sup>10</sup> Ta cáji ndivaha ini na tá xini na mé quimi cán. <sup>11</sup> Tá nandíhi já naquihvi na ini vehe já naxini na mé a loho cán xihin María, náná a. Ta já nacaxítí na nu á ta já nacaja cáhnu na ña. Ta tá nandíhi já nasuná na yuhú sató ñehe na ta já najoco na jiuhun cuáan nuú a xihin jusa vaha xihin in ña támi sahan naní mirra nu mé a loho cán. <sup>12</sup> Tá nandíhi já naquixi in sani nu ná ta xihin mé sani cán nacachi Ndióxi xihin ná ña ná a ndicó coo na chí nu íin rey Herodes. Sahá ña cán quéa nandijama na íchi cuánuhu ná ñuu na.

### *Tá ñehe na Jesús cuahan na Egipto*

<sup>13</sup> Ta tá sa naquee na ndichí cán cuahan na já naquixi in sani nuú José ta nandaca náha in táto Ndióxi nu dá. Já cáchí a já xihin dá:

—Cuándacoún ndiquehe ña loho jan xihin María, náná a ta cunún cahun xihin ná chí ñundáhyi nación Egipto. Ta cán coún xihin ná janda quiahva ná caxi tuhun i xuhun. Jáchi caca nuu Herodes ndinducú da ña loho jan ña cahní ñahá da —nacachi táto Ndióxi cán xihin José.

<sup>14</sup> Anda já nandaco José já naquee da Jesús xihin María, náná a já naqueta ñuu na cuahan na chí Egipto. <sup>15</sup> Ta cán nasanduu na janda quiahva naxíhi Herodes. Tóco ndíhi ña yóho nayaha já ná xinu coo nuú tuhun nacachi Ndióxi sanahá tá nacahyi in profeta já: “Nasahin jahyi i nación Egipto ta nacana i da ná ndicó coo da”, cáchí tuhun Ndióxi.

### *Tá nasahnda Herodes chuun ña ná cahní na na valí*

<sup>16</sup> Ta ndaja coo naxini Herodes cán ña najándahvi na ndichí cán da sahá ña coo naxinu ga na nu dá. Ña cán quéa a juú quiahva naxojo ini da. Ta chí nasahnda da

chuun ña ná cahní ndihi na taa valí, na ivi cuia chí ninu, mé na ndúu ñuu Belén xihín ñuu válí cátañan xihín á. Jáchí sa ñacaxi tuhun na ndichí cán xihín dá ña ñaxini na mé quimi anda tátuhun ivi cuia. <sup>17</sup> Ta tá nandíhi ñaxihí na valí yóho já ñaxinu coo nuú tuhun ñacahyí profeta Jeremías sanahá ndivaha tá ñacahyí da já:

<sup>18</sup> Ñuu Ramá jandá joho ndáhví tácu cáyuhú cóhó ñañáha sácu ñá.

Ta ñá sácu yóho cúu ñá Raquel. Sácu ñá sahá jahyi ñá.

Ta co cúní ñá ndico ini ñá jáchí ñaxihí jahyi ñá, cáchí tuhun Ndióxi.

<sup>19</sup> Joo tá sa ñaxihí Herodes já ñaquixi tucu sani nuú José nu ín da nación Egipto cán. Ta nandaca náha in tátō Ndióxi nu dá já cáchí a já xihín dá:

<sup>20</sup> —Cuándacoún ta ndiquehe Jesús xihín María, náná a ta cuahán ndicó coo xihín ná chí ñundáhyi Israel. Jáchí sa ñaxihí va na ndúcú cahní ña loho jan —cáchí tátō Ndióxi.

<sup>21</sup> Anda já nandicoo José ta ñéhe da Jesús xihín María, náná a cuahan na ndicó coo na chí ñundáhyi Israel. <sup>22</sup> Joo tá ñañehe da tuhun ña nandicojo Arquelao chuun cacuu da rey nu Herodes, tátá da já ñayihví José cuhun da chí estado Judea. Ta sahá ña sa ñacaxi tuhun tátō Ndióxi tañu sani nu dá sahá ña cán quéa nandijama da íchi ta cuahan da chí estado Galilea. <sup>23</sup> Ta ñaxinu coo na in ñuu naní Nazaret nuú ñasanduu na. Ta xihín ña yóho ñaxinu coo nuú tuhun ñacahyí na profeta sanahá ña cacuu Jesús da ñuu Nazaret.

### 3

*Tá ñacasahá Juan, da jácandúta ñayivi cáhan ndojó da yucú íchí cán*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Mé tiempo cán Juan, da jácandúta ñayivi ñaxinu da yucú íchí cuéntá estado Judea cán. Ta ñacasahá jánaha da ñayivi. <sup>2</sup> Já cáchí da já xihín ná:

—Xíní ñúhú jándacoo ndó ña núu cája ndó ta ndicó coo ini ndó nu Ndióxi jáchí sa ñacayati quivi cacomí Ndióxi cuéntá sahá ñayivi —cáchí da xihín ná.

<sup>3</sup> Mé Juan yóho cúu dá da ñacahan profeta Isaías saha tá ñacahyí da já:

Vaxi quivi tá cahan cóhó in da tañu yucú íchí ta cachi da já xihín ñayivi:

“Caja tiañva ndó íchi nuú quixi xitoho í, ta cuná ndó in íchi ndacú nu mé á ña ná ndihvi a ínima ndo”, cáchí tuhun Ndióxi.

<sup>4</sup> Ta jáhma ñasandixi Juan yóho ñasacuu a ña ñacavaha na xihín íji camello ta ñasandico in ní jáhndá tóco da. Ta ñaxixi da tica xihín ñuñu yucú. <sup>5</sup> Ta ñaqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán ñasaa na nu Juan taa joho na nu cahan da. <sup>6</sup> Ta tá ñañama na cuachi na nu Ndióxi já najácandúta Juan na ini yuta Jordán.

<sup>7</sup> Joo tá ñaxini Juan ña janda joho xínu coo cuahá na fariseo xihín na saduceo nu dá ña ná jácandúta da na já ñacasahá xójo ndivaha ini da ta já ñacachi da já xihín ná:

—Mé ndó cúu ndó tátuhun coo jáchí cúu ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi.

<sup>8</sup> Xíní ñúhú caja ndó ña vaha já ná cuni ñayivi ña mé a ndaa táhyi najándicoo ndó ña núu ñasacaja ndó jihna. <sup>9</sup> Ta a cáhán ndo ña jácacu Ndióxi ndohó sahá ña cúu ndó na ñaquixi chichi Abraham. Jáchí coo saha toho ña jan nu Ndióxi tá co jándacoo ndó cuachi ndó. Jáchí mé a ndaa ná cahan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. <sup>10</sup> Mé ndó cúu ndó tátuhun in yító, dó sa ñatiin na hacha cuahan na cahnda na. Ta tóco ndihi yító, dó co sahan cuhi vaha nuu, tahnda do ta quee dó nu ñúhu cayi do. Quiahva já caja ri Ndióxi xihín ndó tá co cúní ndó ndicó coo ini ndó nu mé á. <sup>11</sup> Mé a ndaa cája ndúta i ndohó xihín ticuú ta xihín ña yóho náha ña nandicó coo ini ndó nu Ndióxi. Joo vaxi inga da ta da cán cúu da jándicutú ínima ndo xihín ínima yii Ndióxi ta ña cán cacuu a tátuhun ñúhu cáyi. Ta da cán ín cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa da. <sup>12</sup> Mé da vaxi cán caxi da ñayivi vaha tañu ñayivi quini. Cúu á tátuhun in dataa tá jáxixi da trigo xihín pala já ná quee xehe á já cacu vaha da ña. Ta xehe ñacana cán

cuhun a cayi a xihin ñuhu ita ña a ndáhva toho —cáchi Juan xihín na cán.

### *Tá nacandúta Jesús*

*(Mr. 1:9-11; Lc. 3:21-22)*

<sup>13</sup> Naquee Jesús chí estado Galilea cuahan yuta Jordán nu ndácaan Juan jácandúta dá ñayivi ña ná jácandúta da mé á. <sup>14</sup> Joo nu cuítí coo naxeen toho Juan jácandúta dá Jesús. Ña cán quéa nacachi da já xihín Jesús:

—Yóhó cúu da ndítahan jácandúta yehé. Ta cáa johó vasún yóho ña ná jácandúta i yohó —nacachi Juan cán xihín Jesús.

<sup>15</sup> Já nanducú nehe Jesús tuhun nu dá já nacachi a já xihin dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —nacachi a.

Xihín ña yóho nacandúsa Juan ta chí najácandúta dá Jesús. <sup>16</sup> Ta tá nandihí nacandúta Jesús já naqueta ini ticuñi cán. Anda já nanuna indivi ta naxini Jesús nanuu ínima yii Ndióxi jatá ta nasacaa tá quiahva cáa in ndijata. <sup>17</sup> Tá nandihí já naxini johó a cáhan in a indivi ta já cáchi a cán já:

—Yóhó cúun jahyi maní i ta cáji ndivaha ini i xuhun —nacachi a.

## 4

### *Xíto ndojó tiñáhá sacuaḥa Jesús*

*(Mr. 1:12-13; Lc. 4:1-13)*

<sup>1</sup> Tá nandihí já ndáca ínima yii Ndióxi Jesús cuahan chí yucú íchí nuú co ndúu ñayivi já ná coto ndojó tiñáhá sacuaḥa mé á.

<sup>2</sup> Ta cán nasahin a tixi ivi jícó quivi. Nuú ta ndiví coo naxixi a ta tá nandihí já naxinu joco nu á. <sup>3</sup> Já nacayati tiñáhá sacuaḥa nuú Jesús ña coto ndojó ñahá ri já nacachi rí já xihin á:

—Tá ta jivi ndusa jahyi Ndióxi cúun cahnda chuun ña ná nduu yuu yóho pan —nacachi rí cán xihín Jesús.

<sup>4</sup> Anda já nacachi Jesús já xihin rí:

—Já cáchi tuhun Ndióxi: “A juú pan cuítí cuxu ñayivi já catacu na, vaha. Xíní ñuhú ri a caja na ña sáhdá tuhun Ndióxi nu ná

já quéa cuu catacu na nu Ndióxi” —nacachi Jesús xihin rí.

<sup>5</sup> Tá nandihí já ndáca tiñáhá sacuaḥa cán Jesús cuahan xihin rí ñuu Jerusalén, ña yii cán ta já najándaa rí a nu jícó jini veñuhu cáhnu ndácaan cán. <sup>6</sup> Ta já nacachi rí já xihin á:

—Tá ta jivi ndusa jahyi Ndióxi cúun jácana mún chí ninu jáchi já cáchi tuhun Ndióxi: Cahnda Ndióxi chuun nu tátó mé á ña ná candaa na yohó.

Ta ndinehe ndáha na yohó,

já quéa ná a ndicuehe sahun tá ná cachi-hin sahun xihin yuu, já cáchi tuhun Ndióxi —nacachi rí xihín Jesús.

<sup>7</sup> Ta já nanducú nehe Jesús tuhun nu rí já nacachi a já xihin rí:

—Cáchi tucu tuhun Ndióxi já: “A coto ndojó tohún Ndióxi, xitohún” —nacachi Jesús xihin ri.

<sup>8</sup> Ta tá nandihí já ndáca tucu tiñáhá sacuaḥa cán Jesús nasahan xihin rí in jini yucu jícó ndivaha. Ta já nanaha rí ndaja táhan ñuu ndúu ñuyiví nu á ta najánaḥa rí tóco ndihi ña náhnu ndúu cán nu á. <sup>9</sup> Ta já nacachi tucu rí já xihin Jesús:

—Tóco ndihi ña yóho quiahva i nuun tá ná caxitún nuú i caja cáhnún yehé —nacachi rí quini cán xihín Jesús.

<sup>10</sup> Anda já nacachi Jesús já xihin rí:

—Satanás, cuahán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —nacachi Jesús xihin rí cán.

<sup>11</sup> Tá nandihí já nacaxoo tiñáhá sacuaḥa cán cuahan ri. Ta já naxinu java tátó Ndióxi chindeé na Jesús.

### *Tá nacasáhá cáxi tuhun Jesús tuhun Ndióxi nuú na estado Galilea*

*(Mr. 1:14-15; Lc. 4:14-15)*

<sup>12</sup> Tá nanehé Jesús tuhun ña nachicaan na Juan, da jácandúta ñayivi vecaa já naquee a cán cuahan chí estado Galilea.

<sup>13</sup> Joo coo nacandoo a ñuu Nazaret chí naquee a cuahan coo a chí ñuu Capernaum ña ndácaan yuhú tañuhú, dó ndácaan ñundáhyi cuénta na naquixi chichi Zabulón xihin na naquixi chichi Neftalí. <sup>14</sup> Tóco ndihi ña yóho nayaha ña ná xinu coo nuú

tuhun načahyí profeta Isaías sanahá tá načahyí da já:

15 Ñayivi ndúu ñundáhyi Zabulón xihín na ndúu ñundáhyi Neftalí, ña ñúhu inga xoo yuta Jordán yati yuhú tañuhú,

ta jári na ndúu Galilea, mé estado nu ndúu ñayivi, na co cúu chichi Israel,

16 mé na cán nasanduu na nuú naá ndivaha ta viti naxini na in ñaha yehe ndivaha.

Jándiyehé á nu ná ña ná a quívi na, joo catacu na anda ama cáa quívi nu in Ndióxi, načahyí Isaías sanahá.

17 Ta chí mé tiempo já načasáhá Jesús cáhan ndojó a nuú ñayivi ta já cáchi a já xihín ná:

—Xíní ñúhú jándacoo ndó cuachi cája ndó ta ndicó coo ini ndó nu Ndióxi jáchi sa načayati quívi cacomí a cuéntá sahá ñayivi —naçachi Jesús.

*Tá cána Jesús comí da tává tiyacá ña ná caca tuun da xihín á*

*(Mr. 1:16-20; Lc. 5:1-11)*

18 Tá xíca Jesús cuahan yuhú tañuhú Galilea, nandinehé a ivi taa, da cúu ñani. In da naní Simón ta cáhan na Pedro xihín dá. Ta da inga cán naní da Andrés. Ndívi da yóho cúu dá da tává tiyacá ta ñúhu na jácana na ñunu ná ini tañuhú cán. 19 Já naçachi a já xihín ndívi da:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndo ñayivi tañu cuachi —cáchi a.

20 Ta chí ivi laá najándacoo da ñunu da ta nandico da Jesús.

21 Ta nani xíca Jesús cuahan chága chí nuú já naxini a inga ivi tucu taa, da cúu ñani. In da naní Jacobo ta inga da naní Juan, da cúu jahyi Zebedeo. Ta ndívi mé da yóho ñúhu da ini barco da xihín tátá da ndája vaha da ñunu dá. Ta načana Jesús ndívi da yóho. 22 Ta chí ivi laá najándacoo da barco da xihín tátá da ta načasáhá xíca tuun da xihín Jesús.

*Jánaha Jesús nuú cuahá ndivaha ñayivi*  
*(Lc. 6:17-19)*

23 Níi cúu estado Galilea naxica nuu Jesús cáhan tuhun vaha nuú ñayivi ini veñuhu

in in ñuu cán. Cáxi tuhun a nu ná ña sa nandindaa quívi cacomí Ndióxi cuéntá sahá ñayivi ñuyívi. Ta nandaja vaha Jesús na quíhvi tá nuú cuehe ndóho na. 24 Ta níi cúu ñundáhyi cuéntá Siria nandicuítu nuu tuhun sahá ña cája Jesús. Sahá ña cán quéa néhe na na quíhvi, na ndóho tá nuú cuehe vaxi na nu á ña ná ndaja vaha mé á na ta néhe na na ñúhu ínima quini ini xínu na nu á ta ndijáa na xihí yihí xihín na quíhvi saha néhe na vaxi na nuú Jesús. Ta nandaja vaha mé á na.

25 Ta cuahá ndivaha ñayivi ndíco na Jesús. Cúu ná na naquixi estado Galilea xihín na ndúu uxu ñuu cuéntá Decápolis xihín na ñuu Jerusalén xihín na estado Judea xihín na naquixi ñundáhyi chí xoo oriente nu ndácaan yuta Jordán cán.

## 5

*Tá cáhan ndojó Jesús jini yúcu*  
*(Lc. 6:20-23)*

1 Tá naxini Jesús ña ndíco cuahá ndivaha ñayivi mé á já nandaa jini yúcu ta já nasacoo a cán. Ta načayati na xíca tuun xihín á nu á. 2 Ta já načasáhá jánaha nu tóco ndihi na ndúu cán já naçachi a já xihín ná:

3 —Tahví naçuu ñayivi tá ndícuni na xíní ñúhú na ña chindeé Ndióxi na jáchi na cán cúu na cacomí Ndióxi cuéntá saha.

4 Tahví naçuu na ndúu cuéha jáchi na cán cúu na quiahva Ndióxi tuhun ndéé ini.

5 Tahví naçuu na co ndíñehe jícó mé jáchi na cán cúu na ñehe táhvi ndiquehe na ña nasahan Ndióxi tuhun a quiahva nu ná.

6 Tahví naçuu na xíca ini caja ña cúní Ndióxi. Na cán cúu na caja Ndióxi ña ná xínu nuú ña cúu ini na.

7 Tahví naçuu na cándahví ini sahá ñayivi jáchi na cán cacuu na cándahví ri ini Ndióxi saha.

8 Tahví naçuu na co ndácaan quini ínima jáchi na cán cúu na cuni Ndióxi.

9 Tahví naçuu na ndíhi ini ña ná coo vaha na xihín ñayivi jáchi na cán cúu na cáchi Ndióxi cúu ná jahyi mé á.

10 Tahví naçuu na ndóho ini sahá ña cája na ña sáhdá Ndióxi nu ná caja na jáchi na cán cúu na cacomí Ndióxi cuéntá saha.



11 'Tahví nacuu ndó tá cánahá ñayivi xihín ndó ta cája xíxi na xihín ndó sahá ña cándeé ini ndó yehe. Ta tahví nacuu ndó tá jácojo na cuachi jíquí jata ndó sahá ña cándeé ini ndó yehe.

12 'Xíní ñúhú cajii ndivaha ini ndó ta coo vaha ini ndó jáchi ndiquehe ndó in ña vaha ndivaha caja Ndióxi indiví. Xíní ñúhú ndicuhun ini ndó ña quiahva já nacaja xíxi na xihín na profeta, na nasanduu sanahá.

*Cúu yó tátuhun ñúhu jándiyehé nuú ñayivi ñuyíví*

*(Mr. 9:50; Lc. 14:34-35)*

13 'Mé ndó cúu ndó tátuhun ñii yívi na. Sa xíni ndó ña cája ñii ña ná ndihaji ñaha xíxi ndó. Ta quiahva já cája ndó xihín ñayivi ñuyíví. Joo tá ná ndihi ña ohva ñii cán a cúu ga ndicó coo a cahohva tucu a sahá ña cán queá jándá cuíta va íchi cuani nihni ñayivi ña jáchi coo chuun toho a.

14 'Jári mé ndó cúu ndó tátuhun ñúhu jándiyehé nuú ñayivi ndúu ñuyíví. Ta mé ñúhu cán cúu á tátuhun in ñuu cánúu jata in yucú jíco ta a cúu toho ndácaan jehé a. 15 Jáchi coo chíñúhu ná in lámpara ta tá nu ndíhi já chíjehé na ña tíxi in sató. Ña cája na xihín á queá chínúu jíco na ña já ná jándiyehé a nu tóco ndihi na ndúu vehe. 16 Quiahva já xíní ñúhú ndihi ini ndó caja vaha ndó ña ná cacuu ndó tátuhun in ñúhu cáyi nuú ñayivi. Jáchi tá ná cuni na ña vaha cája ndó já queá cuu caja cáhnu na Ndióxi, tátá yo, ña íin indiví.

*Jánaħa Jesús saħa ley Moisés*

17 'A juú caħán ndó ña naquixi i ñuyíví yóho ña cacu xóo i ña nasahnda ley Moisés xihín ña najánaħa na profeta, vaha. Co váxi toho i cacu xóo i ña. Vaxi i nu ndó jáxinu coo i tóco ndihi ña cáchi mé ley já ná naħa i nu ndó ndía cúu ndusa ña. 18 Mé a ndaa ná caħan i xihín ndó ña a ndíhi saħa mé ley nani íin indiví xihín ñuyíví yóho. Ni in túhún toho tuhun, a ndíhi saħa jánda quiahva ná yaħa tóco ndihi ña ndítahan yaħa. 19 Sahá ña cán queá ndá na coo cúní caja ña sáħndá ley Moisés vatí cúu á ña loho ndivaha ta ni coo cúní na jánaħa na ñayivi ña ná caja na ña cáchi a já queá cacuu na in na coo cuaha saħa taħu na cacomí Ndióxi cuéntá

saha. Joo na cája ña cáchi mé ley ta jánaħa na ñayivi ña ná caja na ña, mé na cán cacuu na na cáhnu ndivaha taħu na cacomí Ndióxi cuéntá saħa. 20 Mé a ndaa ná caħan i xihín ndó ña tá ná caja cuití va ndó tá quiahva cája na jánaħa ley Moisés xihín na fariseo já queá a cuú ndihvi ndó nuú cacomí Ndióxi cuéntá sahá ñayivi.

*Jánaħa Jesús ña co ndítahan cojo ini ñayivi (Lc. 12:57-59)*

21 'Mé ndó sa xíni ndó ña nacachi Moisés xihín tásáħnu jíco ndó sanahá tá nacachi da já: "A cáhni ndó ndii jáchi ndá na ná caħni ndii tandaa quívi caja víi jutixia saħa ná." 22 Joo yehe cáchi i xihín ndó viti ña ndá na ná caja cuehe xihín ñani táhan na tandaa quívi caja víi jutixia saħa ná. Ta jári na cánahá xihín ñani táhan na, á cáchi na cúu ná ñayivi tachí já vaxi quívi tá candichí na nu juéxe cáhnu ta cuu cuhun na indayá saħa.

23 'Sahá ña cán queá tá ta ñéhe ndó in ñaha cuahan ndó joco ndó nu náa Ndióxi ta nani cuahan ndó cán ndicuhun ini ndó ña íin in ñani táhan ndó ta coo cúní táhan vaha na xihín ndó 24 já queá mé jan yati nu náa ndítahan jándacoo tóo ndó ña ñéhe ndó joco ndó jan. Ta ndítahan quee ndó cuhun ndó ndique táhan máni ndó xihín ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

25 'Tá sácú in na saħa ndó cuhun ndó vecaa ta cúní na candaca na ndohó cuhun ndó nu juéxe, xíní ñúhú nducú ndó ndá quiahva ndique táhan máni ndó xihín ná nani núná nu ndó caja ndó ña. Já queá ná a ndíquiahva na cán ndohó ndáħa juéxe jáchi cuu ndiquiahva juéxe cán ndohó ndáħa na policia ta chicaan na ndohó vecaa. 26 Mé a ndaa cáchi i xihín ndó ña cañuhu ndó cán jánda quiahva ná chahvi ndó tóco ndihi jjuhún yíca ndó.

*Jánaħa Jesús saħa cuachi cája in datqa tá cúní da coo da xihín in ña coo cúu ñájíhi da*

27 'Mé ndó sa xíni ndó ña nasahnda ley Moisés chuun sanahá ta já nacachi a já: "Coto a cóo ndó xihín ñájíhi á yíi ñani táhan ndó." 28 Joo yehe cáchi i xihín ndó viti ña ndá da sándeħé in ñáñáħa ta cáhvi núu ini

da xihin ñá já quéa cómi tá cómi da cuachi nu Ndióxi jáchi cúu á tátuhun sa íin da xihin ñá.

<sup>29</sup> 'Ña cán quéa cáchi i xihin ndó ña tá nduchú núu cuáha ndó quéa jándacava ndohó nuú cuachi, tavá ndó ña jácana xícá ndó ña ná cuhun a jáchi vaha chága ña ná ndihi sahá in nduchú núu ndó a juú ga ña ná cuhun in ní yiquí cuñu ndó ini indayá.

<sup>30</sup> Ta tá ndahá cuáha ndó quéa caja ña ná ndacava ndó nuú cuachi, chituhun ndó ña ta jácana xícá ndó ña ná cuhun a jáchi vaha chága ná ndihi saha ndaha ndo a juú ga ña ná cuhun ní yiquí cuñu ndó ini indayá.

*Jánaha Jesús ña co ndítahan nuú dataa jándacoo da ñájíhí da*

*(Mt. 19:9; Mr. 10:11-12; Lc. 16:18)*

<sup>31</sup> Ta mé ndó sa xini ndó ña nasahnda ley Moisés chuun sanahá já cáchi a já: “Ndá da cuni jándacoo ñájíhí da ndítahan cavaha da in tutu quiahva da nu ña ta sa íin vaha va cuu jándacoo da ña.” <sup>32</sup> Joo yehe cáchi i xihin ndo viti ña ni in túhún toho ta co ndítahan jándacoo da ñájíhí da. Jáchi ndá da jándacoo ñájíhí da cája da ña ná caja ñá cuachi tá ná tandaha tucu ñá. Jári da tandaha xihin ñá cómi ri da cuachi nu Ndióxi. Joo tá ná candaa ini da ña íin ñájíhí da xihín inga dataa já quéa cuu ndusa jándacoo da ña.

*Jánaha Jesús ña ndítahan caja na tá sahan na tuhun na nuú ñayivi*

<sup>33</sup> 'Mé ndó sa xini ndó ña nasahnda ley Moisés chuun sanahá já cáchi a já: “Xini ñúhú jáxinu coo ndó tóco ndihi ña nasahan ndó tuhun ndó caja ndó tá tává ndo quivi Ndióxi.” <sup>34</sup> Joo yehe cáchi i xihin ndo viti ña ná quiahva ndó tuhun ndó nuú ñayivi joo a tává ndó quivi ni in ñaha. A tává ndó quivi indivi jáchi indivi cúu nu íin coo Ndióxi. <sup>35</sup> Ta ni a tává ndo quivi ñundáhyi jáchi ñundáhyi cúu nu sáni mé á ta ni a tává ndo quivi ñuu Jerusalén jáchi cúu á ñuu naçaxi Ndióxi, mé á cúu á rey cáhnu ndivaha. <sup>36</sup> Ta ni a tává ndó quivi yiquí jini ndó tá sahan ndó tuhun ndó nuú ñayivi jáchi co ndéé ndó ndaja yaa ndó á ndaja tuún ndó ni in túhún ijí jini ndo. <sup>37</sup> Tá sahan ndó tuhun ndó nuú ñayivi xini ñúhú cachi ndó: “Ajan, caja i ña.” Á tá coo xini ñúhú

cachi ndó: “Uhun, a cuú caja i ña.” Jáchi tá cachi ndó inga tuhun já caja ndó ña cuni ña quini.

*Jánaha Jesús ña ndítahan caja cáhnu ini saha táhan ñayivi*

*(Lc. 6:29-30)*

<sup>38</sup> 'Mé ndó sa xini ndó ña nasahnda ley Moisés chuun sanahá já cáchi a já: “Tá quiahva cája ñayivi xuhun quiahva já caja ri yóhó va xihin ná. Ta tá ná cani in da nduchú núu já quéa ndítahan cani mún nduchú núu da. Tá ná tavá da nuhún já ndítahan nuun tavá ri yóhó va nuhú da”, cáchi ley Moisés. <sup>39</sup> Joo yehe cáchi i xihin ndo viti: A cája ihvi ndó xihín ñayivi, na cája núu xihin ndo. Ta ndá na ná cani in xoo sajóho ndó, cata ñee ndó inga xoo sajóho ndó nu ná ña ná cani na a. <sup>40</sup> Ta tá cuni in na candaca na ndohó cuhun ndó nu juéxe sahá ña cuni na candaa na cotó ndo já quéa quiahva ndó ña nu ná ta janda cotó ndéé ndo quiahva ndó nu ná. <sup>41</sup> Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xini ñúhú cojo ndó ña anda ivi kilometro cuhun ndo. <sup>42</sup> Ta ndá na ná caça in ñaha nu ndó quiahva ndó ña nu ná. Ta ndá na xica too ñaha nu ndó, quiahva too ndó ña nu ná.

*Xini ñúhú quihvi ini na co cuni mi*

*(Lc. 6:27-28, 32-36)*

<sup>43</sup> 'Mé ndó sa xini ndo ña nasahnda ley Moisés chuun sanahá já cáchi a já: “Quihvi ini ndó na xini táhan vaha xihin ndó ta candají ndó na co cuni táhan xihin ndo”, cáchi ley Moisés. <sup>44</sup> Joo yehe cáchi i xihin ndo viti: Ndítahan quihvi ini ndó na co cuni táhan xihin ndó. Ta cahan vaha ndó xihín na canahá xihin ndó. Ta caja vaha ndó xihín na candají ndohó. Ta caça tahvi ndó nu Ndióxi sahá na cája xixi xihin ndo. <sup>45</sup> Jáchi xihín ña yóho náha ña cúu ndó jahyi Ndióxi, tátá yo, mé á íin indivi. Ta mé á cája ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá na co cája vaha. <sup>46</sup> A cáhán ndo ña caja Ndióxi cuahá ñamaní xihin ndo tá quihvi ini cuití ndó na quihvi ini ndohó va jáchi janda ñayivi quini, na jataca jiuhún cuénta impuesto cája na já. <sup>47</sup> Ta a cáhán ndo ña naçaja ndó cuahá ña vaha tá ná

cahan Ndióxi cuití ndó xihín ñani táhan ndó jáchi janda ñayivi co xini Ndióxi cája na já. <sup>48</sup> Xini ñuhú caja ndaa ndó xihin tóco ndihi ñayivi tá quiahva cája ndaa Ndióxi, tátá yo, mé a íin indivi —nacachi Jesús.

## 6

### *Jánaḡa Jesús ña ndítahan chindeé yo na ndahví*

<sup>1</sup> Já nacachi tucu Jesús já:

—A ndúcu ndó caja vaha ndó nuú ñayivi sahá ña ná cuni táhyí na ña cája ndó já candoo vaha ndó nu ná. Jáchi tá ná caja ndó já coó toho ñaha ñehé táhvi ndó nu Ndióxi, tátá ndo íin indivi. <sup>2</sup> Sahá ña cán queá tá chindeé ndó ñayivi, na ndímaní ñaha nuu, a cáca nuu ndó cahan lándá ndó ña nuú ñayivi tá quiahva cája na co cúu ná tá quiahva ndaa na. Jáchi na cán sahan na ñaha nuú na ndahví ini veñuhu xihín nu táca ñayivi íchi já ná cuu cuni táhyí tóco ndihi ñayivi ña vaha cája na. Jáchi na cán cuni na ña ná caja cáhnu ñayivi na. Mé a ndaa cáchi i xihin ndó ña sa yahvi na cúu mé ña cája cáhnu ñayivi na. <sup>3</sup> Ña ndítahan caja ndó tá chindeé ndó na ndímaní ñaha nuu queá caja ndó ña ná a cándaḡa ini ni in ñayivi ña cája ndó <sup>4</sup> ta xini ñuhú caja jehé ndó ña. Ta Ndióxi, tátá ndo sándehe a ña vaha cája ndó xihin ñayivi ta mé á queá chahvi a sahá ña cája ndó jan.

### *Jánaḡa Jesús ñayivi ndaja cacá tahví na nu Ndióxi*

(Lc. 11:2-4)

<sup>5</sup> Tá xica tahví ndo nu Ndióxi a cája ndó tá quiahva cája na co cúu ná tá quiahva ndaa na jáchi catóo na candita na veñuhu xihin cáyé ña cacá tahví na nu Ndióxi ña ná cuni táhyí ñayivi na. Mé a ndaa ná cahan i xihin ndo sa yahvi na cúu mé ña xini ñayivi na. <sup>6</sup> Joo ndóhó, tá xica tahví ndó nu Ndióxi, tátá ndo íin indivi ndítahan quihvi ndó ini vehe ndó ta chicaji tuun ndó yehé a ta jan cuu cacá tahví jehé ndo nu Ndióxi. Jáchi jan íin Ndióxi, tátá ndo xihin ndo taa joho a nu cahan ndo ta caja mé á ñamaní xihin ndó.

<sup>7</sup> Ta tá xica tahví ndó nu Ndióxi, a cahan tucu tucu ndó mé tuhun ña coó saha jáchi ñayivi, na co xini Ndióxi cán cája na já. Ta cáhan na táa joho Ndióxi na sahá ña cuaḡa

cahan na joo a juú ña ndaa. <sup>8</sup> Joo a cája ndó tá quiahva cája na cán jáchi Ndióxi, tátá ndo sa xini va mé á ndá queá xini ñuhú ndo janda tá cámaní cacá ndó ña nu á. <sup>9</sup> Ña yóho queá ndítahan cachi ndó tá xica tahví ndo nu Ndióxi:

Tátá Ndióxi, ña íin indivi, cáhnu ná cacuu quivi ndó.

<sup>10</sup> Ná tandaa quí quivi cacomí ndó cuéntá sahá nde.

Ta ná coo tá íin cuni mé ndó coo ñuyivi yóho tá quiahva íin indivi cája ndó.

<sup>11</sup> Quiahva ndó nuú nde ña ndímaní nuú nde cuxu nde in in quivi.

<sup>12</sup> Caja cáhnu ini ndó sahá cuaḡa nde tá quiahva cája cáhnu ini mé nde sahá ña núu cája ñayivi xihin nde.

<sup>13</sup> Ta a quiahva ndó ñamaní ña ná coto ndojó tiñahá sacuaḡa ndeḡe já ná a cája nde cuaḡa nu ndó.

Jáchi cómi ndó cuéntá saha tóco ndihi ñayivi,

ta cúu cája ndó tóco ndihi ñaha,

ta cáhnu cúu mé ndó anda ama cáa quivi.

Já ná coo, quiahva já cachi ndó tá xica tahví ndó nu Ndióxi.

<sup>14</sup> Jáchi tá cája cáhnu ini ndó sahá ña núu cája inga na xihin ndo já queá caja cáhnu ri ini Ndióxi, tátá ndo, mé a íin indivi sahá ndo. <sup>15</sup> Ta tá co cuni ndo caja cáhnu ini ndó sahá ña núu nacaja inga na xihin ndo já queá a cája cáhnu ini Ndióxi sahá cuaḡa cája ndó.

### *Jánaḡa Jesús ndaja ndítahan caja na tá cajuhun na*

<sup>16</sup> Tá cajuhun ndó a cája ndó tá quiahva cája na co cúu ná tá quiahva ndaa na. Na cán cuni na ña ná cuni táhyí tóco ndihi ñayivi ña xijuhun na sahá ña cán queá cája cuaḡa nuu na já ná ndínehe jícó ñahá na. Mé a ndaa cáchi i xihin ndo ña sa yahvi na cúu ña xini ñayivi na. <sup>17</sup> Joo ndóhó, tá ná cajuhun ndó ndítahan cuchú nuú ndo ta ndaja vií ndó mé ndó. <sup>18</sup> Já queá ná a cuni ñayivi ña xijuhun ndó ta in túhún Ndióxi, tátá ndo, mé a íin tuun xihin ndó cándaḡa ini ña mé a ndaa xijuhun ndó ta mé á queá chahvi a sahá ña cája ndó jan.

*Indiví cúú nu ndítahan ndaja tútú ñayivi ña vaha*

*(Lc. 12:33-34)*

<sup>19</sup> 'A ndúcú ndó játaca cuahá ndivaha ndó ña cuicá canduu nu ndo ñuyívi yóho jáchi yóho cúú nu quíhvi tiquíji ñaha ndó jándihi rí sahá ta já tívi ndihi ñaha ndó. Ta jári cuu quíhvi ta cuíhná caja cuíhná da ña. <sup>20</sup> Vaha chága ná játaca ndó ña vaha indiví jáchi cán coo quíhvi toho tiquíji jándihi rí sahá ñaha ndó. Ta mé cán ni in ñaha coo tívi ta ni ta cuíhná a cúu ndíhvi caja cuíhná. <sup>21</sup> Jáchi nuú ndajaja tútú ndo ña ndáyahvi nu ndó, cán coo ri ínimá ndo.

*Nduchú núú yo cúú á tátuhun lámpara ña jándiyehé nu xíca í*

*(Lc. 11:34-36)*

<sup>22</sup> 'Nduchú núú yo cúú á tátuhun in lámpara jándiyehé nu yó já xíní yo nu xíca í. Ta tá tívi vaha nduchú núú yo já cuu candehé vaha í nu xíca í. <sup>23</sup> Joo tá coo tívi nduchú núú yó já queá xíca yó nu naá ndivaha. Ta tá cáhan yo ña cúú yó na xíca nu yéhe ndivaha ta cáa ví yó cája í cuachi já queá cúú yó tátuhun na xíca nu naá ndivaha.

*In ñaha cúú Ndióxi ta inga ñaha cúú jjuhún*

*(Lc. 16:13)*

<sup>24</sup> 'Ni in túhún ñayivi a cúu caja chúun nuú ivi xitoho na jáchi candají na in xitoho na ta inga xitoho na quíhvi ini chága na. Á tá coo ta caja ndívi vaha na chuun nuú in xitoho na ta inga na cán a cája chúun vaha na nuu. Ta quiahva já in ri xihin ndóhó va jáchi a cuu caja cáhnu ndó Ndióxi tá chínúu ndó ínimá ndó jatá jjuhún ndo.

*Ndaá Ndióxi na cúú cuéntá mé á*

*(Lc. 12:22-31)*

<sup>25</sup> 'Candehé ndo ña cáhan i xihin ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quívi. Ta ni a ndícani ini ndó sahá jáhma candixi ndó. Jáchi tá tácu ndo, ña jan cúú ña cáhnu chága a juú ga ña cuxu ndó. Ta in chága sahá yiquí cuñu ndó a juú ga jáhma ndíxi ndó jan. <sup>26</sup> Candehé ndó laa ndáchi nu táchi jan: rí jan ni coo xútu rí ta ni a vája sahan rí jáquee rí ta ni coo yáca ri nu táan vaha ri nuní ri. Ta Ndióxi, tátá ndo, mé a

in indiví sahan ña xíxi rí jan nu ri. Á coo xíní ndó ña in chága sahá mé ndó a juú ga laa cán. Sahá ña cán queá quiahva mé á ña xíní ñuhú ndó catacu ndó. <sup>27</sup> Ta coo sahá toho ña ndícani nahá ini ndó jáchi a cuu ndaja jícó ndó mé ndó java metro chága sahá ña ndícani ini ndó.

<sup>28</sup> 'Ta ni coo ndítahan ndícani ini ndó sahá jáhma candixi ndó. Candehé ndo ndá quiahva ndató sáhnu itá yúcu. Mé ita jan ni coo cája chúun a ta ni coo cávaha jáhma á. <sup>29</sup> Joo mé a ndaa ná cáhan i xihin ndo ña ñúchi chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuicá. <sup>30</sup> Candehé ndó ndaja ndáa vaha Ndióxi yucu ita vatí in too a viti ta itaan cáyi a jándihi sahá. Ndaja ga ví caja Ndióxi xihin ndóhó ña quiahva mé á tóco ndihi ña xíní ñuhú ndó catacu ndó. Joo mé ndó coo cándusa ndó ña candaa mé á ndohó. <sup>31</sup> Ña cán queá a ndícani ini ndó sahá ndá ña cuxu ndó á sahá ña coho ndó á sahá ña candixi ndó. <sup>32</sup> Jáchi na coo xíní íchi cuéntá Ndióxi, na cán cúú na ndícani cuahá ini sahá tóco ndihi ña yóho. Joo cúú ndó cuéntá Ndióxi, tátá ndo in indiví ta xíní vaha mé á ña ndímaní nu ndó catacu ndó. <sup>33</sup> Joo ndítahan nu ndó ndiquiahva ndó mé ndó ndáha Ndióxi ña ná cacomí mé á cuéntá sahá ndó ta já quiahva mé á ña ndímaní nu ndo catacu ndó. <sup>34</sup> A ndícani ini ndó sahá ña quixi nu ndó inga quívi itaan jáchi Ndióxi cuití va xíní a ndía vaxi nu ndó quívi itaan ta coo sahá ndícani ini ndó sahá ña ndoho ndó itaan.

## 7

*Coo ndítahan candehé ndaa yó ñayivi*

*(Lc. 6:37-38, 41-42)*

<sup>1</sup> 'A candehé ndaa ndó ñayivi já ná a cándehé ndaa Ndióxi ndohó. <sup>2</sup> Jáchi tá quiahva cája ndó xihin inga ñayivi quiahva já caja ri Ndióxi xihin ndóhó va. Sahá ña cán queá tá quiahva sándehé ndaa ndó ñayivi quiahva já caja ri Ndióxi xihin mé ndó. <sup>3</sup> Jáchi ndá cuéntá queá sándehé ndó ña núu cája ñani táhan ndó ta coo sándehé ndo ndá quiahva náhnu chága ña núu cája mé ndó. Cúú á tátuhun ndácaan in xehé loho nduchú núú ñani táhan ndó nani ndácaan

in yító ndúhu cáhnu ini nduchú núú ndo.  
 4 Ta tá a cuú cuni ndó yitó cáhnu ndácaan ini nduchú núú mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” 5 Jándahvi ndó mé ndó xihín ña cája ndó. Xíní ñúhú tavá ndó yitó cáhnu ndácaan nduchú núú mé ndó jan já ná nuna nu ndó cuni vaha ndó já ná cuu tavá ndó xehe loho ndácaan nduchú núú ñani táhan ndó.

6 'A quiahva ndó ña yii cuénta Ndióxi nuú ñayivi quini. Jáchi tá cája ndó já cuú á tátuhun tá ná quiahva ndó ñaha yii nuú tina ta tiahva náá ndicó coo rí tiin rí ndohó. Ta jári cuú á tátuhun tá ná quiahva ndó ñaha yahvi ndivaha tátuhun perla nu cóchi jáchi cuu cuani nihni rí ña.

*Ndaja caja í caca í ñamaní nu Ndióxi  
(Lc. 11:9-13; 6:31)*

7 'Ndá ñaha ndímani nu ndó xíní ñúhú caca ndó ña nu Ndióxi ta já quiahva mé á ña nu ndo. Ndinducú ndó ña cuni ndo ta ñehe ndó ña caja Ndióxi. Cuú á tátuhun catí ndáha ndo yéhe ta já nuna yéhe nu ndo. 8 Jáchi na xíca in ñaha, na cán cuú na ñehe va. Ta na ndúcú ñaha, na cán cuú na ndíñehe ña. Ta na catí ndáha yéhe, na cán cuú na ndínuna yéhe nuu.

9 'Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe rí ndó quiahva ndó yuu nu á ña ná caxi a. 10 Ta ama ná quiahva rí ndó in coo nu á caxi tá xíca tiyacá nu ndó cuxu a. Co cája ndó já. 11 Candehé ndó. Vatí mé ndó cuú ndó ñayivi cája cuachi joo xíni vaha ndó quiahva ndó ña vaha nuú jahyi ndó. Ndaja ga ví cája Ndióxi, tátá ndo, mé a íin indivi xihín ndo. Quiahva mé á ña vaha nu ndo tá ná caca ndó ña nu mé á.

12 'Candehé ndó. Tá quiahva cuni ndó caja ñayivi xihín ndo quiahva já ndítahan caja rí ndohó va xihín ná jáchi ña yóho quea sáhdá ley Moisés xihín ña nacahyí na profeta caja ndó.

*Yéhe táhan cuú nuú quihvi na cuhun indivi  
(Lc. 13:24)*

13 'Cuú á tátuhun íin ivi yéhe. In yéhe cuú á ña táhan ndivaha ta xíní ñúhú ndinducú ndó ndihvi ndó cán. Jáchi inga yéhe cuú

á ña ndíca ndivaha nuú ndihvi na cuhun indayá. Ta cuahá ndivaha ñayivi cuú na xíca íchi ndíca cuahan na indayá nuú ndihi saha ná. 14 Joo ña cuú íchi ña ndáca ñayivi yéhe táhan nu ndihvi na indivi cuú á íchí táhan ndivaha ta yáncá ndivaha caca nuu í nu á. Ta chá ndivaha cuú na ndihvi cán.

*Xihín cuhi cúun nuú in yitó cuu ndicuní ndá yitó cuú dó  
(Lc. 6:43-44)*

15 'Cuénta coo ndó xihín na tuhún, na cáchi cáhan na cuénta Ndióxi jan. Jáchi uun ndivaha cása na nu ndo. Joo cuú ná tátuhun ndivahyí quini ndivaha vatí náha na tátuhun ndicachi loho. 16 Cuú ndicuni ndó na xihín ña cája na. Jáchi ñayivi quini co cája vaha toho na. Cuú á tátuhun tá a cuú cuun uva nuú tohíñú ta ni a cuú jáquee ndó titó ñuhú nuú tohíñú. 17 Ña cán quea tóco ndihi yitó vaha ndinuhu cuhi vaha cuití cúun nu do. Joo yitó quini ndinuhu cuhi quini cuití cúun nu do. 18 Dó cuú yitó vaha cán a cuú toho cana cuhi quini nu do ta ni yitó quini cán a cuú cuun cuhi vaha nu do. 19 Ta tóco ndihi yitó, dó co cána cuhi vaha nuu, tahnda do ta quee dó nu cándaha ñúhu ña cayi do. 20 Saha ña cán quea xihín ña cája ñayivi já cuu ndicuni ndó á cuú ná ñayivi vaha á cuú ná na quini.

*A juú ndihi toho ñayivi ndihvi na nuú cacomí Ndióxi cuénta saha ná  
(Lc. 13:25-27)*

21 'A juú ndihi toho na cáchi cuú yehe xitoho na cuhun na nuú cacomí Ndióxi cuénta saha ná. Na cája ña sáhdá Ndióxi, tátá i, mé a íin indivi na cán cuití cuú na cacomí mé á cuénta saha. 22 Jáchi tá ná xinu coo quivi caja ví Ndióxi saha ñayivi já quea casáha cahan cuahá ndivaha ñayivi xihín i ta já cachi na já: “Jesús, mé ndó cuú xitoho nde ta xihín quivi mé ndó naxíca nuu nde cáhan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínimá ñayivi ta xihín quivi mé ndó nacaja cuahá ndivaha nde ña xitúhún”, cachi na xihín i. 23 Ta anda já nducú ñehe e tuhun nu ná já cachi i já xihín ná: “Co xíni toho i yo cuú ndohó. Caxoo ndó nuú i jáchi ndinuhu ña quini cája ndó”, cachi i xihín ná.

*Sácú Jesús quiahva sahá ivi da nacavaha vehe*

*(Mr. 1:22; Lc. 6:47-49)*

<sup>24</sup> Ndá na xini joho ña cáhan i ta cája na ña, na cán cúu ná tátuhun in dataa, da ín xini túni ta nacavaha da vehe da jata in tóto. <sup>25</sup> Ta tá naxinu javi já nasahnu yuta ta naxinu tachí quini jata vehe cán joo cóo nandicava vehe da jáchi tóyíí cándichi vehe da jata tóto cán. <sup>26</sup> Joo na xini joho nu cáhan i ta có cája na ña, na cán cúu ná tátuhun in dataa, da có xini túni ta nacavaha da vehe da nuú ñuti. <sup>27</sup> Tá nandihí já naxinu javi já nasahnu yuta ta naxinu tachí quini jata vehe cán. Anda já nandicava vehe da ta chí nandihí saha chí uun —nacachi Jesús jánaḥa ñayivi.

<sup>28</sup> Ta tá nandihí nacahan Jesús ña yóho já tóco ndihí ñayivi nacatontó na xini joho na ndá quiahva jánaḥa mé á <sup>29</sup> jáchi tá jánaḥa mé á nu ná cáhan tá quiahva cáhan in da ín saha cahnda chuun ta có cáhan toho a tá quiahva cája na jánaḥa ley Moisés.

## 8

*Tá nandaja vaha Jesús in da ndóho cuehe táhyi*

*(Mr. 1:40-45; Lc. 5:12-16)*

<sup>1</sup> Tá nanuu Jesús jata yucu nuú nasanúu a cán já ndíco cuahá ndivaha ñayivi jata cuahan. <sup>2</sup> Ta ndaja coo já nacayati in dataa, da ndóho cuehe táhyi nu á. Ta já nacaxítí da nu á já nacachi da já xihin á:

—Cuu ndaja vaha ndó yehe, xitoho i tá cúni ndó —nacachi da xihin Jesús.

<sup>3</sup> Tá nandihí já nacani ndaa ndáḥa Jesús da já nacachi a já xihin dá:

—Cúni ña ná ndivahún ña cán quea nandivahún viti —cáchi a xihin dá.

Tá nacachi Jesús já chí ivi laá nandindaa cuehe táhyi nandoho da cán. <sup>4</sup> Anda já nacachi Jesús já xihin dá:

—Candehé. A cáxi tuhun tohún ña yóho xihin ni in túhún ñayivi. Cuáhán ndacún nahun mún nuú jutu. Ta ndítahan jocún ñaha nu Ndióxi tátuhun sáhdá ley Moisés sanahá caja na sa nandivaha. Já ná candaḥa ini tóco ndihí ñayivi ña sa nandindaa va cuehe nasandohún —nacachi Jesús xihin da cán.

*Tá nandaja vaha Jesús in da cája chuun nuú in jefe soldado*

*(Lc. 7:1-10)*

<sup>5</sup> Tá nandihí Jesús ñuu Capernaum já nacayati in da sáhdá chuun nuú soldado naquixi ñuu Roma nu Jesús jáchi cúni da caça da in ñamani nu á.

<sup>6</sup> Já nacachi da já xihin á:

—Á có cúni ndó caja ndó ñamani ndaja vaha ndó mozo i, datacú jáchi cánduhu da vehe quihvi da naxihí tuchu yiquí cuñu da ta a juú quiahva cáhiví yiquí cuñu da —nacachi da cán xihin Jesús.

<sup>7</sup> Já nacachi Jesús já xihin dá:

—Vaha va, cuhun i ndaja vaha i da —nacachi Jesús.

<sup>8</sup> Anda já nacachi tucu da sáhdá chuun nuú soldado cán já xihin Jesús:

—Candehé ndó. Cóo saha toho yehe ña ná ndihvi ndó vehe e. Joo cahnda cuití ndó chuun janda nu ín ndó yóho ta já ndivaha va mozo i. <sup>9</sup> Jáchi ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuú. Ta tá chindahá i in da ña ná cuhun da nu cúni mí i cuhun da ta cuahan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nuú mozo i ña ná caja da ña sáhdá i ta cája da ña —nacachi da cán.

<sup>10</sup> Tá naxini joho Jesús ña yóho já nacatontó a já nacachi a já xihin na ndíco cuahan cán:

—Mé a ndaa ná cáhan i xihin ndo ña a ñaha cuni i tañu na Israel in da candeé cáhnu nahá ini Ndióxi tá quiahva candeé cáhnu ini da yóho Ndióxi. <sup>11</sup> Candehé ndo ná cáhan i xihin ndo ña quixi ñayivi ndi-jáá ní cúu saha ñuyiví ta cacoo na cuxu na xihin Abraham ta xihin Isaac ta xihin Jacob indiví nu ín Ndióxi cómi a cuénta sahá ñayivi. <sup>12</sup> Joo cuahá na Israel, na nanditahan nuú coo cán a cóo toho na cán. Ña caja Ndióxi xihin na cán quea cuita na jata véhe cuhun na nuú naá ndivaha. Ta cán cuacu ndivaha na janda quiahva chicáhñá mé nuḥu ná —cáchi Jesús.

<sup>13</sup> Tá nandihí já nacahan tucu Jesús xihin da sáhdá chuun nuú soldado cán já nacachi a já xihin dá:

—Cuanúhu vehún. Nandivaha mosún tá quiahva cúnun jáchi nacandúsún yehe — nacachi Jesús xihin dá.

Chí mé hora já nandivaha mozo da cán.

*Tá nandaja vaha Jesús ñá cúu xojo Pedro*  
(Mr. 1:29-31; Lc. 4:38-39)

<sup>14</sup> Nasahan Jesús vehe Pedro ta tá naxinu a cán cándúhu ñá cúu xojo Pedro quíhvi ña jáchi chícaan cáhni ndeé ña. <sup>15</sup> Anda já natiin Jesús ndáha ña quíhvi cán ta chí nandindaa cáhni ña. Ta já nandacoo ñá cán cája ndívi ñá nu ná.

*Tá nandaja vaha Jesús cuahá ndivaha na quíhvi*

(Mr. 1:32-34; Lc. 4:40-41)

<sup>16</sup> Ta tá nacuaá já ñehe cuahá ndivaha na na quíhvi xihin na ñúhu ínimá quini ini nuú Jesús. Ta xihin in túhún tuhun nacahan mé á natavá ínimá quini ñúhu ínimá ñayivi ta jári nandaja vaha mé á tóco ndihi na quíhvi.

<sup>17</sup> Ta tóco ndihi ña yóho nayaha já ná xinu coo nuú tuhun ña nacahyí profeta Isaías tá nacachi da já: “Mé á nandiquehe ndihi a ña cávita iní ta naxojo ndihi a cuehe yo”, cáchi tuhun Ndióxi.

*Na cúni candico Jesús*

(Lc. 9:57-62)

<sup>18</sup> Tá naxini Jesús ña a juú quiahva cándíhi táhan ñayivi ndúu na xihin á já nasahnda chuun ña ná cojo cava na inga xoo tañuhú cán. <sup>19</sup> Joo nacayati in da jánahe ley Moisés nu á já nacachi da já xihin á:

—Maestro, cúni candico i ndohó ndá nacuu nuú cuhun ndo —nacachi da xihin á.

<sup>20</sup> Já nanducú ñehe Jesús tuhun nu dá já nacachi a já xihin dá:

—Ndicuii cúu rí ta vatí ín cáva ñúhu rí. Ta laa cúu rí ta vatí ín táca ñúhu rí. Joo yehe, da nachindahá Ndióxi nduu ñayivi, chí ni nuú cuju mí i coo va —nacachi Jesús xihin dá.

<sup>21</sup> Ta inga da sa xíca xihin á nacachi da já xihin á:

—Maestro, quiahva jihna ndó ñamani nuú i ña ná cuhun i jánduxu tátá i já quixi i candico i ndohó —nacachi da xihin á.

<sup>22</sup> Já nacachi Jesús já xihin dá:

—Xíni ñuhú candicún yehe viti jáchi ná cuhun mé ñayivi, na a ñaha cacu ndaa ínimá

jánduxu na ndii jan —nacachi Jesús xihin dá.

*Tá najacatáji Jesús tachí xihin tañuhú tá ndícojo do*

(Mr. 4:35-41; Lc. 8:22-25)

<sup>23</sup> Ta ndaja coo naquihvi Jesús ini in barco ta cátahan na xíca tuun xihin á cán cuahan na. <sup>24</sup> Ta nani xíca na nuú tañuhú cán cuahan na ta in náa cuití naxinu in tachí quini ndivaha nuú tañuhú cán. Ta a juú quiahva ndeé nacasahá ndícojo ticuú cán janda quiahva nandichutú ticuú ini barco cán. Joo cándúhu Jesús ini barco quíji va. <sup>25</sup> Anda já ndáva na xíca tuun xihin á cán nasahan na ndíñehe na ña. Já nacayuhú na já cáchi na xihin á:

—Chindeé ndó ndehe, xitoho nde. Jáchi cácoo barco cahá tañuhú cuahan do —nacachi na xihin á.

<sup>26</sup> Anda já nanducú ñehe Jesús tuhun nu ná já nacachi a já xihin ná:

—Ndá cuénta quea yíhvi nahá ndo. Ndá cuénta quea co cándeé ini ndó yehe —nacachi a.

Já nandacoo a ta jánani a tachí quini cán xihin tañuhú cán ta já nacatáji uun tóco ndihi a cán. <sup>27</sup> Tá naxini na xíca tuun xihin á cán ña yóho já nacatontó na ta nacasahá ndáca tuhún táhan na já cáchi xihin táhan na já:

—Ta ndá da cúu dataa yóho ña janda tachí xihin tañuhú cándusa nu cáhan da —cáchi xihin táhan na cán.

*Tá naqueta ivi da ñúhu ínimá quini ini nuú Jesús*

(Mr. 5:1-20; Lc. 8:26-39)

<sup>28</sup> Tá naxinu coo Jesús inga xoo tañuhú cán nu ín ñundáhyi cuénta Gadara já naqueta ivi da ñúhu ínimá quini ini tañu nu ndúxu ndii. Ta nacayati da nuú Jesús. Ndívi mé da ñúhu ínimá quini ini yóho cúu dá tátuhun quíti, rí cuehe ndivaha. Sahá ña cán quea ni in túhún ñayivi a cuú yaha chí íchi cán. <sup>29</sup> Tá naxini da Jesús já nacasahá da cáyuhú da nu á já cáchi da já xihin á:

—Ndá cuénta quea vasún quíhvi nuún xihin nde, Jesús, da cúu in túhún jiní já jahyi Ndióxi. Á vasún jándoho yachún ini nde tá cámaní yii ndindaa tiempo ndoho ini nde —nacachi rí quini cán xihin Jesús.

<sup>30</sup> Ta ndaja coo yati cán nasanduu cuahá ndivaha cóchí xíxáhan rí. <sup>31</sup> Ta mé rí quini ñúhu ini ndíví dataa cán naxica tahví rí nu Jesús já cáhí rí já xihín á:

—Tá ta ná tavún ndehe ini da yóho, quiahva ñamaní nuú nde ña ná cuhún nde ndihvi nde ini cóchí ndúu cáa —ñacachi rí xihín Jesús.

<sup>32</sup> Anda já ñacachi Jesús já xihín rí:

—Cuáhán ndó, dá já.

Chí ñaqueta rí quini cán ini ndíví dataa cán já nasahan rí nandihvi rí ini cóchí cán. Ta chí ivi laá xínu tóco ndihi cóchí cán cuahan rí núu rí nu ndáyí yuhú tañuhú cán. Ta najáqueta nuu rí mé rí ini tañuhú chí ñacandaa rí ticuúí já naxihí rí.

<sup>33</sup> Ta chí a juú quiahva nayihví da ndáa cóchí chí naxinu ndivaha da cuahan da. Ta tá naxinu da ñuu já ñacasáhá da ndícani da ndaja cáa ña nayaha xihín ndíví da nasañuhu ínima quini ini cán. <sup>34</sup> Anda já ñaqueta tóco ndihi ñayivi ñuu cán cuahan ña candehé ña Jesús. Ta tá naxini na mé á já naxica tahví na nu á ña ná quee a cuhún a.

## 9

*Tá nandaja vaha Jesús in da naxihí tuchu saha*

*(Mr. 2:1-12; Lc. 5:17-26)*

<sup>1</sup> Tá sa nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda quiahva naxinu coo a ñuu mé á. <sup>2</sup> Ta cán ñéhe na in da quíhvi, da naxihí tuchu saha ta cándúhu da nu yívi loho ñéhe na ñacasaa na nu á. Ta tá naxini Jesús ndá quiahva cándeé ini da cán mé á já ñacachi a já xihín da quíhvi cán:

—Candehé, jahyi a. A ndícani toho inún jáchi cája cáhnu ini i sahá cuachún viti —ñacachi Jesús xihín dá.

<sup>3</sup> Java táhan da jánaha ley Moisés ñacasáhá da cáhán da já: “Mé da yóho ndája núu da Ndióxi xihín tuhun cáhan da jáchi ni in túhún toho ñayivi a cuú caja cáhnu ini sahá cuachi.” <sup>4</sup> Joo sa ñacandaa ini Jesús ña cáhvi ini da cán sahá ña cán quea nandaca tuhún a da já ñacachi a já xihín dá:

—Ndá cuéntá quea cáhvi núu ini ndó sahá yehe. <sup>5</sup> Á cáhán ndo ña ihvi chága cachi i xihín da yóho: “Ñacaja cáhnu ini i sahá

cuachún viti.” Á tá coo ta cachi i xihín dá: “Cuándacoo ta cuáhán.” <sup>6</sup> Candehé vaha ndo ná naha i nu ndo ña ín sahá i, da nachindahá Ndióxi nduu ñayivi caja cáhnu ini i sahá cuachi cája ñayivi ñuyívi yóho —ñacachi Jesús xihín dá.

Tá nandihí já nandicahan tucu a xihín da naxihí tuchu saha cán:

—Ta viti cáhan i xuhún cuándacoo ndiquehe xito lohún ta cuanúhu vehún —ñacachi Jesús xihín dá.

<sup>7</sup> Chí ivi laá nandacoo da quíhvi cán ta já ñaquee da cuanúhu dá. <sup>8</sup> Tá naxini ñayivi ndúu cán ña ñacaja Jesús yóho já nayihví na ta ñacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xitúhún.

*Tá ñacana Jesús Mateo ña caca tuun da xihín á*

*(Mr. 2:13-17; Lc. 5:27-32)*

<sup>9</sup> Tá nandihí já ñaquee Jesús cuahan ta nani xica cuahan já naxini a in dataa naní Mateo, da ín coo nu sácoo da jataca jjuhún cuéntá impuesto. Ta ñacana Jesús da já ñacachi a já xihín dá:

—Naha quí candícun yehe.

Anda já nandaca ndichi Mateo ta ñacasáhá ndíco da Jesús.

<sup>10</sup> Tá nandihí já ín coo Jesús xíxi a vehe da cán ta cán naxinu coo cuahá táhan na jataca jjuhún cuéntá impuesto xihín java ga ñayivi cája cuachi. Nasacoo na xíxi na xihín Jesús ta cán ndúu coo ri na xica tuun xihín a cán. <sup>11</sup> Ta tá naxini ña fariseo ña ndúu na cán xíxi na xihín Jesús já ñacasáhá ña ndáca tuhún na ña xica tuun xihín Jesús cán já:

—Ndá cuéntá quea xíxi xitoho ndó xihín na jataca jjuhún cuéntá impuesto ta xihín java ga ña cája cuachi —ñacachi ña fariseo cán.

<sup>12</sup> Joo tá naxini joho Jesús ña yóho já ñacachi a já xihín ña fariseo cán:

—Ñayivi ín vaha coo xíní ñúhú toho na da cája tátá ñahá joo ña quíhvi, ña cán cúu ña xíní ñúhú da cája tátá ñahá. <sup>13</sup> Ta yehe coo vaxi toho i cana i ña sa ín vaha. Vaxi i cana i ñayivi, ña cája cuachi ña ná jándacoo na cuachi cája na. Xíní ñúhú cuhún ndo jácuaha vaha ndó ña cúni cachi tuhún Ndióxi tá cáhí a já: “Ña cúni quea ná



candáhví ini ndó ñayivi jáchi vaha chága ña yóho a juú ga ña ná joco ndó quítí nuú i”, cáchí tuhun Ndióxi —cáchí Jesús xihín ná.

*Cáhan Jesús ndá saha queá cajuhun na (Mr. 2:18-22; Lc. 5:33-39)*

<sup>14</sup> Tá nandihí na xíca xihín Juan, da jácandúta ñayivi cán naxinu coo na nu Jesús. Já ñacasáhá ndáca tuhún na mé á já ñacachi na já xihín á:

—Ndávaha co xíjuhun toho na xíca xihín yóhó nani cuahá ndivaha xíjuhun mé nde xihín na fariseo —ñacachi na cán xihín Jesús.

<sup>15</sup> Anda já nanducú ñehe Jesús tuhun nu ná já ñacachi a já xihín ná:

—Á cáhán ndo canduu cuéha na ndúu in vicó tándaha nani íin mé da tándaha cán xihín ná. Uhun. Jáchi cáji ini na. Joo xinu coo quívi candaa na da tándaha cán anda jáví casáhá cajuhun na. Ta cáchí i xihín ndo ña vaxi quívi candaa na yehe nuú na yóho ta anda jáví casáhá na xíca tuun xihín i cajuhun na —ñacachi Jesús.

<sup>16</sup> Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in tuhun jáhma saá jáchi tá nandihí ndíndí a, sáhdá chága ví a jahmá yatá cán ta jándacáhnú chága ví a yávi ña nandicahmá na cán. <sup>17</sup> Ta ni co táán na vino saá ini vóso níi yatá jáchi jácáhdí mé vino cán níi ta cuíta mé vino cán ta tíví vóso níi cája dó. Sáhá ña cán queá ndítahan taán yo vino saá ini vóso níi saá ná a ndíhi saha vino xihín vóso —cáchí Jesús.

*Tá nandaja vaha Jesús jahyi jíhí Jairo xihín in ñá ñacani ndaa ndáha jáhma á (Mr. 5:21-43; Lc. 8:40-56)*

<sup>18</sup> Ta nani cáhan Jesús cándichi a naxinu coo in da sáhdá chuun nuú na Israel. Já ñacaxítí da nu á ta já ñacachi da já xihín á:

—Jácá naxihí uun ñá loho cúu jahyi jíhí i joo tá ná caja ndó ñamaní quixi ndó vehe e ta chinúu ndó ndáha ndó jata ña já nditacu tucu ñá —ñacachi da cán xihín Jesús.

<sup>19</sup> Anda já ñaquee Jesús cuahan xihín da cán ta ndáca na xíca tuun xihín á cán cuahan na. <sup>20</sup> Ta ndaja coo cán íin in ñáñáha, ñá ndítahví níi ñá tíxi uxu ivi cuia. Ta ñacayati ñá chí jata Jesús já ñacani ndaa

ndáha ñá yuhú jáhma á. <sup>21</sup> Jáchi ñacahán ña: “Tá ná cani ndaa cuití ndáha í jáhma Jesús já ndivaha í”, ñacahán ña. <sup>22</sup> Joo nandicoto nihni játa Jesús nu ñá ta tá naxini a ñá já ñacachi a já xihín ña:

—A cáyihví tohún, jahyi a. Nandivahún jáchi ñacandúsún yehe —ñacachi Jesús xihín ñá.

Ta chí mé hora já nandivaha ñá.

<sup>23</sup> Ta tá naxinu coo Jesús vehe da sáhdá chuun nuú na Israel cán já naxini a ña sa ndúu música cán ña ná cuhun na jánduxu na jahyi da cán. Ta naxini a jándá joho sácu cóhó ñayivi ndúu na. <sup>24</sup> Ta chí já ñacachi a já xihín tóco ndihí na cán:

—Cuahán queta ndó jata véhe. Jáchi coo naxihí toho ñá loho yóho. Quíji cuití va ñá —ñacachi Jesús xihín ñayivi ndúu cán.

Joo ñacasáhá na cán sácu ndaa ñahá na.

<sup>25</sup> Ta chí ñatavá Jesús na jata véhe. Ta tá ñacayati a nu ñá cán já ñatiin a ndáha ñá chí ivi laá nandacoo ñá. <sup>26</sup> Ta níi cúu ñundáhyi cán nandicuíta nuu tuhun sahá ña ñacaja Jesús cán.

*Tá nandaja vaha Jesús ivi da cuáá*

<sup>27</sup> Tá ñaquee Jesús cuahan já ndíco ivi da cuáá jata cuahan da já ñacasáhá cáyuhú cóhó da já cáchí da já xihín á:

—Jesús, da ñaquixi chichi David caja ndó ñamaní candáhví loho ini ndó ndehe —cáchí da cáyuhú da jata Jesús.

<sup>28</sup> Ta ndaja coo ñaquihvi Jesús ini in vehe ta já ñacayati ndíví da cuáá cán nu á. Já ñacasáhá ndáca tuhún a da cán já ñacachi a já xihín dá:

—Á cáhán ndo ña cuu caja i jándiyehé nuu ndo —ñacachi Jesús xihín da cán.

—Ajan, xitoho nde. Cándúsa nde ña cuu caja ndó ña —ñacachi ndíví da cuáá cán xihín Jesús.

<sup>29</sup> Tá nandihí já ñacani ndaa ndáha Jesús nduchú núu da cán ta já ñacachi a já xihín ndíví da cán:

—Ná coo tá quiahva cúni ndo jáchi cándeé ini ndó yehe —cáchí a.

<sup>30</sup> Tá nandihí já ñacasáhá sándehe ndíví da cuáá cán. Ta ñasahnda Jesús chuun nu dá ña ná a cáxi tuhun da nuú ñayivi sahá ña ñacaja mé á xihín dá.

<sup>31</sup> Joo tá jacá naqueta uun da cán já nacasáhá da ndícani da nuú ndijáá ñayivi ndúu ñundáhyi cán sahá ña nacaja Jesús xihín dá.

### *Tá nandaja vaha Jesús in da níhi*

<sup>32</sup> Nani naquee da cuáá cán cuahan da já nasaa java ñayivi nu Jesús ñéhe na in da níhi, da ndácaan ínima quini ini. <sup>33</sup> Ta tá natavá Jesús ínima quini ini da cán chí ivi láá nacasáhá cahan da. Ta a juú quiahva nacatontó ñayivi ta já cáchi na já:

—Ni in túhún tañu coó naxini nde in ñaha tátuhun ña yóho ñundáhyi Israel —nacachi na cán.

<sup>34</sup> Joo na fariseo cán nacasáhá cáchi na já:

—Rí cúú tiñáhá sacuahá nu rí quini sáhan rí ndée rí nuú Jesús yóho ña ná tavá a ínima quini ini ñayivi —nacachi na fariseo cán.

### *Táhnda ini Jesús sahá ñayivi*

<sup>35</sup> Ndiáá ñuu náhnu xihín ñuu válí naxica nuu Jesús jánañá tuhun Ndióxi ini veñuhu na cán. Ta nacaxi tuhun a tuhun vaha xihín ñayivi ña sa nacayati quiví cacomí Ndióxi cuéntá saha ná. Ta nandaja vaha mé á tá nuú cuehe ndóho ñayivi. <sup>36</sup> Ta tá naxini Jesús ñayivi cuaha cán já natahvi ini a saha ná jáchi ndóho ini na ta cávitá ini na tátuhun ndicachi, rí coó da candaa ñahá. <sup>37</sup> Anda já nacachi Jesús já xihín na xica tuun xihín a cán:

—Mé á ndaa ndúu cuahá ndivaha ñayivi, na cuni cuni johó tuhun Ndióxi joo chá cuití na cuni cuhun na cahan na ña xihín ñayivi. Cúú á tátuhun ín cuahá ndivaha ní ña xini ñúhú jáquee joo ndímaní ñayivi jáquee na ña. <sup>38</sup> Sahá ña cán quea xini ñúhú caça tahví ndó nu Ndióxi ña ná chindahá mé á chága na cája chúun cuéntá mé á —cáchi Jesús xihín ná.

## 10

*Chindahá Jesús na xica tuun xihín á ña ná cuhun na cahan na tuhun Ndióxi xihín ñayivi (Mr. 3:13-19; Lc. 6:12-16)*

<sup>1</sup> Tá nandihi já nacana Jesús ndíhuxu ivi na xica tuun xihín á cán. Ta já nasahan ndée nu ná ña ná cuu tavá na ínima quini ini ñayivi. Ta nasahan ndée nu ná ña ná ndaja vaha na tá nuú cuehe ndóho ñayivi.

<sup>2</sup> Ña yóho cúú quiví ndíhuxu ivi na cúú

apóstol xica tuun xihín á cán: Da nu cuití cán naní da Simón ta cahan ri na Pedro xihín dá. Ta inga da cán cúú Andrés ñani da. Ta inga da cúú Jacobo xihín ñani da, Juan. Ndívi da yóho cúú dá jahyi Zebedeo. <sup>3</sup> Tañu na cán ndácaan ri Felipe xihín Bartolomé xihín Tomás xihín Mateo, da najátaca jiuñun cuéntá impuesto. Ta cán ndácaan ri Jacobo, da cúú jahyi Alfeo xihín Lebeo, da cahan ri na Tadeo xihín. <sup>4</sup> Ta cán ndácaan ri Simón, da naxica cuéntá na cananista xihín Judas Iscariote, mé da najicó túhún Jesús tá nu ndíhí cán.

<sup>5</sup> Tá nachindahá Jesús ndíhuxu ivi na cán já nacachi a já xihín ná:

—Coto a cuhun ndó chí ñuu ñayivi tóho, na coo cúú na Israel. Ta ni a quíhvi ndó ñuu ñúhu chí estado Samaria. <sup>6</sup> Vaha chága ná cuhun ndó cahan ndó tuhun Ndióxi xihín na Israel jáchi cúú ná tátuhun ndicachi, rí nandiñúhú. <sup>7</sup> Cuahán ndó caxi tuhun ndó xihín ná ña sa nacayati quiví cacomí Ndióxi cuéntá saha ñayivi. <sup>8</sup> Ta ndaja vaha ndó na quíhvi ta jánditacu ndó ndii ta ndaja vaha ndó na ndóho cuehe táhyi. Ta tavá ndó rí quini ñúhu ínima ñayivi. Ta a quehe ndó yahvi sahá ña cája ndó jáchi coó naxeen ndó ndée ñéhe ndó jan. <sup>9</sup> A cáñehe toho ndó ni jiuñun cuáán ni jiuñun cúxú ni jiuñun caa cuahá caca nuu ndó. <sup>10</sup> Ta ni a cáñehe ndó yátí cuhun ndó íchi. Ta ni a cáñehe ndó inga naha jáhma ndó cuhun xihín ndó. Ta ni a cáñehe ndó inga ndusa ndó cuhun ndó. Ta ni garróte a cáñehe ndó cuhun ndó. Jáchi nditahan nuú ñayivi quiahva na ña nu ndó.

<sup>11</sup> Tá ná xinú coo ndó in ñuu cáhnu á ñuu loho, xini ñúhú ndinducú ndó in ñayivi, na cuu candeé ini ndó ta vehe na jan canduu ndó janda quiahva ná xinú quiví quee ndó cuhun ndó. <sup>12</sup> Ta tá ná xinú coo ndó vehe jan cahan Ndióxi ndó xihín ná. <sup>13</sup> Ta tá ná ndiquehe vaha ñayivi vehe jan ndohó já quea cachi ndó xihín ná ña ná coo vaha ini na. Joo tá coo cuni na ndiquehe vaha na ndohó já quea a cahan ndó xihín ná ña ná coo vaha ini na. <sup>14</sup> Ta tá coo cuni na ndiquehe vaha na ndohó ta ni coo cuni na cuni johó na nu cahan ndó já quea cuahán queta ndó vehe jan á ñuu jan ta catí ndó ña yacá saha ndó já ná naha ña cuahan cuachí na cán jata mé va na. <sup>15</sup> Jáchi mé a ndaa ná

cahan i xihin ndo ña tá ná xinu coo quivi caja ví Ndióxi sahá ñayivi ndúu ñuyiví já queá jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihin ñuu Gomorra sanahá sahá ña coo nandiquehe na ndohó.

*Vaxi quivi caja xixi ñayivi xihin na xica cáhan tuhun Ndióxi*

<sup>16</sup> Candehé ndo. Yehe chindahá i ndohó cuhun ndó tañu ñayiví quini. Cúu ndó tátuhun ndicachi válí tañu ndivahyí ña cán queá xíní ñúhú cuéntá vaha coo ndó tá quiahva cája coo. Ta xíní ñúhú coo mánsó ndo tá quiahva cája ndijata. <sup>17</sup> Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta caní na ndohó ini veñuhu. <sup>18</sup> Ta saha mí i cañehe na ndohó cuhun ndó nuú na cúu gobernador á nuú na cómí cuéntá sahá in nación. Ta já ná cuu ndicani ndó sahá i nuú na cán ta xihin nuú na tóho, na coo cúu na Israel. <sup>19</sup> Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchi tá ná ndindaa hora cahan ndó xihin ná já queá quiahva mé va Ndióxi tuhun nu ndó ña ná cuu cahan ndó sahá i nuú na cán. <sup>20</sup> Jáchi a juú jiní mé ndó quixi ña cahan ndo. Ínima yíi Ndióxi cacuu ña quiahva tóco ndihi ña cahan ndo.

<sup>21</sup> Ta java taa jicó túhún da ñani da ta java da jicó túhún da jahyi da ña ná cahní ñahá na. Ta java na ndicuíta na caní táhan na xihin tátá na ña ná cahní ñahá na. <sup>22</sup> Ta ndaja táhan ñayivi ndúu ñuyiví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. <sup>23</sup> Tá ná ndicuíta na caja xixi na xihin ndó in ñuu já cunu ndó cuhun ndó inga ñuu. Jáchi mé a ndaa ná cahan i xihin ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáá ñuu ndácaan ñundahyi Israel.

<sup>24</sup> Candehé ndo. Ni in túhún toho da xica jácuaha tiaha chága da nu mé dá jánaha ñahá cán. Ta ni in túhún mozo coo cúu dá da cáhnu chága nuú xitoho da. <sup>25</sup> In da jácuaha ndítahan cajíi íní da tá sa xini ndihi da ña xini maestro da. Ta da cúu mozo ndítahan cajíi ini da tá ná xinu da cacuu da cáhnu

tátuhun xitoho da. Candehé ndo. Tá ná cachi ñayivi xihin da cúu xitoho ndó ña cúu da Beelzebú, rí cúu tiñahá sacuaḥa ndaja ga ví cachi na xihin ndohó.

*Yo já ndítahan cayihví yo*

*(Lc. 12:2-7)*

<sup>26</sup> Candehé ndo. A cáyhví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndáca náha nu á. Ta vatí cáhan jehé ñayivi tuhun joo vaxi quivi tá candaa ini ñayivi sahá. <sup>27</sup> Ña cáhan yehe xihin ndó nuú naá xíní ñúhú cahan ndó ña ndiví táhyí nani yehe candii. Ta ña cáhan jehé e xihin ndo xíní ñúhú ndaa ndó jiní véhe cayuhú ndó ña. <sup>28</sup> A cáyhví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihin ínima ndo. Ndióxi queá xíní ñúhú cayihví ndo jáchi mé á cuu jándihi a saha yiquí cuñu ndó ta cuu jácana mé á ínima ndo ini indayá anda ama cáa quivi.

<sup>29</sup> Candehé ndo. Laa válí ndáchí rí nu táchi ta núu ndivaha jicó na rí. Joo ni in rí cán coo cúyu nu ñúhu ña quivi rí tá coo sahan Ndióxi, tátá ndó ñamaní. <sup>30</sup> Ta viti caja ndó cuéntá xihin mé ndó. Janda ijí jiní ndó jan ndáhvi tá in tá in a nu Ndióxi. <sup>31</sup> Ña cán queá a cáyhví toho ndó jáchi ndiyahvi chága ndo nu Ndióxi a juú ga cuahá ndivaha laa válí.

*Tá cáhan cáxi ñayivi ña cúu ná cuéntá Jesús*

*(Lc. 12:8-9)*

<sup>32</sup> Ndá na cáxi tuhun nuú ñayivi ña cuahan na cuéntá mí i já queá cachi mí i sahá na nu Ndióxi, tátá i, mé a íin indiví, ña mé a ndaa cúu ndusa na cán cuéntá mí i. <sup>33</sup> Joo ndá na ná cachi xihin ñayivi ña coo xini toho na yehe já queá ni yehe a ndícuni toho i na ña cúu ná cuéntá mí i nu Ndióxi, tátá i, mé a íin indiví.

*Cája Jesús ña sáhdá java táhan ñayivi*

*(Lc. 12:51-53; 14:26-27)*

<sup>34</sup> A cáhán toho ndó ña naxinu i ñuyiví yóho caja i ña ná coo vaha ini ñayivi. Coo cája i já. Jáchi ña vaxi yehe caja i queá ná cahnda java táhan na. <sup>35</sup> Vaxi i jáceni táhan i dataa xihin tátá da sahá yehe. Ta vaxi i jáceni táhan i in ñañaha xihin náná ña sahá yehe. Ta vaxi i jáceni táhan i ña cúu sanu

xihín xojo ñá sahá yehe. <sup>36</sup> Ta ndaja vehe mé ñayivi ndicujita na caní táhan na sahá yehe.

<sup>37</sup> Ta ndá na cúní chága tátá na á náná na a juú ga yehe já quéa coó saha toho na cacuu na cuéntá mí i. Ta ndá na quíhvi ini chága jahyi yíi na á jahyi jíhí na a juú ga yehe já quéa coó saha toho na cacuu na cuéntá mí i. <sup>38</sup> Ndá na co cúní ndoho ini sahá ña candico na yehe ta co ín tiahva na quivi na sahá i já quéa coó saha toho na cacuu na cuéntá mí i. <sup>39</sup> Jáchí ndá na cátóo coo chága na ñuyiví yóho, na cán cúú na ndihi saha. Joo na sahan ndeé ini quivi sahá i, na cán cúú na ñehe táhvi na catacu na anda ama cáa quivi.

*Ña quiahva Ndióxi nuú ñayivi*  
(Mr. 9:41)

<sup>40</sup> Ndá na ndíquehe vaha ndohó, ndíquehe vaha ri na yehe va. Ta ndá na ndíquehe vaha yehe, ndíquehe vaha ri na Ndióxi, mé a nachindahá yehe vaxi i ñuyiví yóho. <sup>41</sup> Ndá na ndíquehe vaha in profeta vaxi cuéntá Ndióxi já quéa tá quiahva coo yahvi ndiquehe profeta cán quiahva já coo ri yahvi ndiquehe na cán. Ta ndá na ndíquehe in taa vaha sahá ña cúú dá ñayivi vaha já quéa ndiquehe na cán yahvi na tá quiahva cáa yahvi ndiquehe taa vaha cán. <sup>42</sup> Ta ndá na ná quiahva ñaha vatí in yáxi ticuú nuú in na cúú jahyi i yóho sahá ña ndíco na íchi cuéntá mí i, mé a ndaa ná cahan i xihín ndó ña chahvi Ndióxi sahá ñamaní cája na xihín ná —cáchi Jesús.

## 11

*Juan, da jácandúta ñayivi nachindahá da java da xíca xihín dá nuú Jesús*  
(Lc. 7:18-35)

<sup>1</sup> Tá nandihí nanaha Jesús nuú na xíca tuun xihín á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

<sup>2</sup> Mé tiempo já nasandacaan Juan vecaa, mé dá cúú dá da jácandúta ñayivi. Ta cán nañehe dá tuhun sahá ña náhnu cája Jesús. Anda já nachindahá da java na xíca xihín dá nu á <sup>3</sup> ña ná ndaca tuhún na Jesús á jivi ndusa cúú á Cristo, mé a chindahá Ndióxi

cacomí a cuéntá sahá ñayivi, á ndítahan candati na inga ga quixi. <sup>4</sup> Tá nandihí nandaca tuhún da cán Jesús sahá ña yóho já nacachi Jesús já xihín ná:

—Cuáhán ndó ndicani ndó nu Juan tóco ndihí ña naxini ndó cája i xihín tóco ndihí ña naxini johó ndó cahan i. <sup>5</sup> Ta ndicani ndó nu dá ña ndínuna nuú na cuaá ta ndícaca na réncó cája i. Ta ndaja vaha i na ndóho cuehe táhyi. Ta jándinuna i johó na jóho já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. <sup>6</sup> Tahví nacuu na co jándacoo ña cándéé ini na yehe —nacachi Jesús.

<sup>7</sup> Tá naquee na nachindahá Juan cán cuahan na já nacasahá Jesús cahan xihín ñayivi já cáchi a já xihín ná:

—Ndía nacahan ndo cuni ndó tá naqueta ndó nasahan ndó sándehe ndo Juan yucú íchi cán. A juú da cán cúú taa láhá já quíji nuu da tátuhun quíji nuu in tóyoó cája tachí. <sup>8</sup> Ndía naqueta ndó candehé ndó. A juú da cán cúú taa ndíxi jahmá lándá ndivaha. Sa xini vaha ndó ña co ndúu toho da ndíxi jahmá lándá yucú íchi. Ndá da ndíxi jahmá lándá cúú da ndúu vehe rey cuití va. <sup>9</sup> Ndía nasahan ndó candehé ndó cán. Á coo nasahan ndó cuni johó ndó nu cahan in da cúú profeta nu ndo. Mé a ndaa da cán cúú dá in profeta ta ín chága saha dá a juú ga inga profeta nasanduu sanahá. <sup>10</sup> Jáchí mé Juan cúú dá da cahan tuhun Ndióxi saha tá cáchi a já:

Chindahá i in da cánúu cuhun nu mún, já ná caja tiahva da íchi nuú quisún, já nacahyi a sanahá.

<sup>11</sup> Candehé ndo ná cahan i xihín ndo. Tañu tóco ndihí ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúú ná na coó saha, na cán cúú na cáhnu chága a juú ga Juan.

<sup>12</sup> Jandá quiví naxinu Juan, da jácandúta ñayivi ta jandá viti ñuhú ndíhi ndivaha ini ñayivi ndiquiahva na mé ná ndáha Ndióxi. Ta na sahan tuhun ndeé ini, na cán cúú na ñehe táhvi cacomí Ndióxi cuéntá saha. <sup>13</sup> Jandá tá cámani xinu Juan tóco ndihí ña nacahyi na profeta xihín ña nacahyi Moisés

cáhan ña vaxi quiví cacomí Ndióxi cuénta sahá ñayivi. <sup>14</sup> Ta tá cúní ndo candúsa ndó ña ñacahyí na cán sanahá já cuu candaa ini ndó ña Juan cúu dá da ñacahan na cán saha tá ñacachi na ña ndítahan quixi tucu profeta Elías ñuyiví yóho. <sup>15</sup> Na ín johó, ná cuni johó na.

<sup>16</sup> 'Ná cahan i xihin ndó ndaja ín ñayivi ndúu tiempo viti. Cúu ná tátuhun na valí sácoo sájiquí na nuú yahvi ta cáyuhú na nuú java ga na valí ndúu cán ta já cáchí na já: <sup>17</sup> "Nativí nde tótiví nu ndo joo coo ñaxeen ndó cata sáhá ndo. Ta ñaxita cuéha ndivaha nde nu ndo ta ni coo ñasacu ndó." <sup>18</sup> Quiahva já ín ñayivi ndúu tiempo viti jáchí tá ña quixi Juan, da jácandúta ñayivi ta ñaxijuhun da ta ni coo ñaxihi da vino joo ñacachi ndó saha dá ña ndácaan ínima quini ini da. <sup>19</sup> Ta tá ñaxinu yehe, da ñachindahá Ndióxi nduu ñayivi ta xíxi i pan ta xíxi i vino já ñacasáhá cáchí ndó sahá i ña cúu u in ña ndehé ndivaha ta xíxi ndivaha i. Ta cáchí ndó ña cátóo ndivaha i cacuu amigo na cája cuachi xihin na jataca jjuhún cuénta impuesto. Joo na cúní cándaa ini ña ndaa, na cán cúu na cándaa ini ña cája Juan ta cája ri yehe ña ndaa —ñacachi Jesús xihin ná.

*Ñayivi sáa ini co cúní na caja na ña cúní Ndióxi*  
(Lc. 10:13-15)

<sup>20</sup> Tá ñandihí já ñacasáhá Jesús jáñani a ñayivi ndúu ndíjáa ñuu nuú ñacaja cuaha chága mé á ña xituhún. Jáchí vatí ñacaja cuaha mé á ña xituhún nu ná coo ñandicó coo ini na nu Ndióxi. Ña cán quea ñacachi Jesús já xihin ná:

<sup>21</sup> —Ndáhví nahá ñacuu ndó, na ñuu Corazín. Ta ndáhví nahá ñacuu ndó, na ñuu Betsaida. Cuaha ndivaha ña nahnu ñacaja i nu ndo joo coo ñaxeen ndó ndicó coo ini ndó jándacoo ndó cuachi ndó. Sanahá najándihí Ndióxi sahá ñuu Tiro xihin sahá ñuu Sidón sahá cuachi na. Tá ná sahan i caja i ña nahnu nuú na cán tá quiahva ñacaja i nu mé ndó, sa najándacoo va na cán cuachi na, nduu. Ta chí iví laá ndaca ndixi na jahmá ndii ta jácuyu na yaa yiquí jini na, nduu. Jáchí xihin ña yóho jáñaha na ña ñandicó coo ini na sahá cuachi na.

<sup>22</sup> Mé a ndaa ná cahan i xihin ndo tá ná xinu quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Tiro xihin ñuu Sidón sanahá. <sup>23</sup> Ta viti cahan i xihin ndó, na ndúu ñuu Capernaum. Janda indiví cúní ndó cuhun ndó joo sahá ña sáa ini ndó cuhun ndó janda indayá, caja Ndióxi. Jáchí tá ná caja i ña xituhún nuú ñayivi ñuu Sodoma tá quiahva ñacaja i nu ndóhó ta ni a ndíhi sahá ñuu cán, nduu. <sup>24</sup> Mé a ndaa ná cahan i xihin ndo ña tá ná xinu quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Sodoma sanahá —ñacachi Jesús.

*Tá ñacajii ndivaha ini Jesús*  
(Lc. 10:21-22)

<sup>25</sup> Mé tiempo cán ñacahan Jesús já ñacachi a já:

—Cája cáhnu i ndohó, tátá Ndióxi, ña cúu xitoho tóco ndihí ñaha ndúu indiví xihin ñuyiví. Jáchí najánaha ndó ña ndíchí ndivaha nuú ñayivi, na coo cuaha saha nuú java ga na. Ta ñacaja ndó ña ná a cuú candaa ini na ndíchí xihin na tácu ini ñaha mé ndó. <sup>26</sup> Já ñacaja ndó jáchí já ñasacu ini ndó caja ndó —ñacachi Jesús.

<sup>27</sup> Anda já ñacachi a já xihin na ndúu cán: —Ñandiquiahva tátá i tóco ndihí ñaha ndahá i ña ná cacomí i cuénta sahá. Ta ni in túhún toho ñayivi coo xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na coo xini vaha na yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jáñaha i nuu sahá Ndióxi, tátá i já ná candaa vaha ini na yo cúu mé á. <sup>28</sup> Naha ndihí ndó nuú i, na sa ñacanaá cája chúun. Taxi ndó ña ndójo ndó jan nuú i ta já yehe caja i ña ná ndiquehe ndé ndo. <sup>29</sup> Yehe cúní ña ná ndiquiahva ndó mé ndó ndahá i. Ta ña yóho cúu á tátuhun in yúcu chínúu na sahá jiquí tindiquí. Ta xini ñuhú catiahva ndó caja ndó tá quiahva cája yehe. Jáchí coo cama jini i xihin ñayivi ta cúu u ña manso ndivaha. Quiahva já caja ndó já ñehe ini ndo ndiquehe ndé ndo. <sup>30</sup> Jáchí yúcu chínúu i jata ndo xihin ñaha jácojo i

jata ndo cúu á ña cama ñúhú laá —ñacachi Jesús.

## 12

*Ña ñacaja na xica tuun xihín Jesús in quivi ndíquehe ndée ñayivi*

(Mr. 2:23-28; Lc. 6:1-5)

<sup>1</sup> Ta ndaja coo in quivi ndíquehe ndée ñayivi xica Jesús cuahan tañu nuú naxutu na trigo. Ta sahá ña cuico na xica tuun xihín Jesús sahá ña cán quéa ñacasáhá na túhún na java yucu jini trigo cán ta tává na trigo sáxí na. <sup>2</sup> Tá naxini na fariseo ña yóho já ñacasáhá na cáhan cuachi na nuú Jesús. Já cáhí na já:

—Candehé. Na xica tuun xuhun jan cája na chuun ña co ndítahan caja ñayivi quivi ndíquehe ndée yó —ñacachi na xihín Jesús.

<sup>3</sup> Já nanducú ñehe Jesús tuhun nu ná já ñacachi a já xihín ná:

—Á a ñáha toho cahvi ndó nuú tuhun Ndióxi nu cáhan sahá ña ñacaja David sanahá tá ñacuico da xihín na xica xihín dá. <sup>4</sup> Ña ñacaja da quéa ñaquihvi da ini veñuhu Ndióxi ta naxixi da pan ña yii. Ta ni nu mé dá ta ni nuú na xica xihín dá cán co cáni a nuú cuxu na pan cán. In túhún jutú cuití va cáni a nuú cuxu na pan cán. <sup>5</sup> Ta á a ñáha toho cahvi ndó ña ñacahyí Moisés nu ley tá ñacahyí da ña co cája toho jutú cuachi nu Ndióxi vatí cája chúun da veñuhu quivi ndíquehe ndée ñayivi. <sup>6</sup> Mé a ndaa ná cahan i xihín ndo ña ín chága sahá i, da cándichi yóho a juú ga sahá veñuhu nu cája cáhnu na Ndióxi jan. <sup>7</sup> Mé ndó co cándaá toho ini ndó ña cuni cachi tuhun Ndióxi tá cáhí a já: “Yehe cuni ña ná candahví ini ndó ñayivi jáchi vaha chága ña yóho a juú ga ña ná joco ndó quítí nuú i”, cáhí tuhun Ndióxi. Jáchi tá ná cándaá ini ndó tuhun yóho, nduu ta a chicaan toho ndó cuachi jata ñayivi, na coo cuachi. <sup>8</sup> Candehé ndó. Yehe, da ñachindahá Ndióxi nduu ñayivi, ín sahá i cahnda i chuun sahá quivi ndíquehe ndée ñayivi —ñacachi Jesús.

*Tá nandaja vaha Jesús in da nahichi ndáha*

(Mr. 3:1-6; Lc. 6:6-11)

<sup>9</sup> Tá nandihí já ñaquee Jesús cuahan já nandihvi a veñuhu mé ñuu cán. <sup>10</sup> Ta cán

nasandacaan in dataa, da nahichi ndáha. Ta sahá ña ndúcú na fariseo ndúu cán ndá quiahva caja na já ná cuu chicaan na cuachi jata Jesús sahá ña cán quéa nandaca tuhún na mé á já ñacachi na já:

—Á sahan Ndióxi ñamaní ndaja vahún na quihvi quivi ndíquehe ndée yo —ñacachi na cán xihín á.

<sup>11</sup> Anda já ñacachi Jesús já xihín ná:

—Candehé ndó. Tá ín in ndicachi loho jana ndo ta tá ná ndicava rí ini in táhvi quivi ndíquehe ndée yo, ama ná a cuhun ndó tavá ndó ri. <sup>12</sup> Ta ndíyahvi chága ñayivi a juú ga ndicachi. Ña cán quéa sahan Ndióxi ñamaní cája í ña vaha quivi ndíquehe ndée yo —ñacachi Jesús xihín ná.

<sup>13</sup> Tá nandihí ñacachi a já xihín dataa, da nahichi ndáha cán já:

—Jándacaá ndáhun —ñacachi a xihín dá.

Tá najándacaá da ndáha dá já nandivaha ndáha dá. Ta cáa tá quiahva cáa inga ndáha da cán. <sup>14</sup> Joo tá ñaqueta na fariseo cán já ñacasáhá na jándique táhan na tuhun na ña cahní na Jesús.

*Ña cáhan Isaías sahá Jesús*

<sup>15</sup> Tá ñañehe Jesús tuhun ña ndúcú na cán cahní ñahá na já ñaquee a cuahan va ta cuahá ndivaha ñayivi ndíco jata cuahan. Ta ndaja táhan na quihvi nandaja vaha Jesús. <sup>16</sup> Ta ñasahnda Jesús chuun nuú na sa nandivaha cán ña ná a cáxi tuhun na nuú ñayivi yo cúu mé á. <sup>17</sup> Tóco ndihí ña yóho ñayaha já ná xinu coo nuú tuhun ñacahyí profeta Isaías tá ñacahyí da já:

<sup>18</sup> Yóho ín da cája chúun cuéntá mí i, mé dá ñacaxi i.

Quihvi ndivaha ini i da ta cájii ín i xihín ña cája da.

Ta jáchutu ndaa i ínima dá xihín ínima yii mí i,

ñá ná jánaá da nuú ñayivi ndúu ñuyiví ndá quiahva cája ví i saha ná.

<sup>19</sup> Ta ni a cáhan cuachi toho da ta ni a cáyuhú cóhó da,

já quéa a cuni joho ñayivi xica cállé nu cáhan da.

<sup>20</sup> Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúní ndahva janda quiahva ná quee vaha ña ndaa xihín ña ihví.

<sup>21</sup> Ta ndaja táhan ñayivi ndúu níí cúú ñuyíví tandaa candeé ini na mé dá, ñacahyí Isaías sanahá.

*Jácojo na cuachi jatá Jesús ña cája chúun a xihín ndée tiñáhá sacuahá*

*(Mr. 3:20-30; Lc. 11:14-23; 12:10)*

<sup>22</sup> Java ñayivi ñéhe na in da cuaá ta cúú dá da níhi jáchi ndácaan rí quini ini da. Ta tá nandaja vaha Jesús da já ñasandehé da ta nandicahan da. <sup>23</sup> Tá naxini ñayivi ndúu cán ña yóho já ñacatóntó ndivaha na já ñacasáhá ndáca tuhún táhan na já cáchí na já:

—Á a juú da yóho cúú da ñaquixi chichi rey David —cáchí xihín táhan na.

<sup>24</sup> Tá naxini johó na fariseo ña cáhan ñayivi cán já ñacasáhá cáchí mé na fariseo cán já:

—Taa yóho cúú tává da rí quini ñúhu ini ñayivi jáchi mé Beelzebú, rí cúú tiñáhá sacuahá nu rí quini cán sáhan rí ndée rí nu dá cája da ña —ñacachi na.

<sup>25</sup> Ta sa xini va Jesús ña cáhvi ini na cán sahá ña cán quea ñacachi a já xihín ná:

—Tá sáhdá java táhan ñayivi ndúu in nación ta ndúu na cuaha táhdá já casáhá cáni táhan ndaja táhan mé va na já cama chá ndihi sahá nu ndúu na cán. Ta quiahva já vaha ri xihín in ñuu á in vehe tá sáhdá java táhan ndaja táhan mé ná já quea jándihi na sahá ná. <sup>26</sup> Ta quiahva já yáha xihín Satanás, rí cúú tiñáhá sacuahá. Ta tá ná tavá rí inga rí quini ini ñayivi á tá ná cani táhan ndaja táhan mé rí já quea ndihi sahá ndée ña cómi rí. <sup>27</sup> Mé ndó cáchí ndo ña tává i rí quini ini ñayivi xihín ndée Beelzebú, rí cúú tiñáhá sacuahá. Joo tá mé a ndaa cúú ndusa ña cáchí ndo sahá i jan, ndáchí quehe na cúú cuéntá mé ndó jan ndée tavá na rí quini ini ñayivi. Ama ná cachi ndó ña tává ndo rí quini xihín ndée tiñáhá sacuahá. Ña yóho náha ña co cáhvi ndaa ini ndó.

<sup>28</sup> Candehé ndo. Yehe tává i ínimá quini ini ñayivi xihín ndée ínimá yíi Ndióxi. Ta xihín ña yóho náha cáxí a ña sa naxinu coo quivi cacomí Ndióxi cuéntá sahá ndó.

<sup>29</sup> Candehé ndo. Sácú u in quiahva nu ndo. Ni in dataa a cúu ndihvi da caja cuíhná da ñaha vehe in da ndacú joo tá ná cató da da ndacú cán já cuu quehe da ñaha da cán.

<sup>30</sup> 'Ndá na coo cuahan xoo i, cúú ná na coo cúní yehe. Jáchi ndá na coo chindeé yehe xihín ña cája i, cúú ná na sájí nuu nuú i.

<sup>31</sup> 'Ña cán quea cáchí i xihín ndo ña caja cáhnu ini Ndióxi sahá tá nuú cuachi cája ñayivi xihín sahá tá nuú tuhun quini cáhan na. Joo tá ná cáhan núu na sahá ínimá yíi Ndióxi já quea a cája cáhnu toho ini Ndióxi sahá ña ñacaja na. <sup>32</sup> Caja cáhnu ini Ndióxi janda sahá ndá na ná canahá xihín yehe, da ñachindahá Ndióxi nduu ñayivi joo tá ná canahá na xihín ínimá yíi Ndióxi já quea a cája cáhnu toho ini Ndióxi sahá ná ni nani tácu na ndúu na ñuyíví yóho ta ni tá cuhun na cavií sahá ná nu Ndióxi.

*Xihín cuíhi cúun nuú in yito cuu ndicuní ndá yito cúú dó*

*(Lc. 6:43-45)*

<sup>33</sup> 'Xini ñúhú jándee ndó yitó vaha ña ná cuun cuíhi vaha nu do. Jáchi tá ná jándee ndó yitó núu já quea cuíhi núu cuun nu do. Jáchi xihín cuíhi cúun nuú in yito cuu ndicuní ndá yito cúú dó. <sup>34</sup> Mé ndó cúú ndó tátuhun coo jáchi cúú ndó na quini sahá ña cán quea cáhan ndó tuhun quini ta a cuú cana tuhun vaha yúhu ndo. Jáchi yúhu ñayivi cána tóco ndihi ña nandicutú ñúhu ínimá ná. <sup>35</sup> In taa vaha cáhan da ndinuhu ña vaha jáchi ndinuhu ña vaha ñúhu ínimá dá. Ta in taa quini cáhan da ndinuhu ña núu jáchi ña núu quea ndácaan ínimá dá. <sup>36</sup> Mé a ndaa ná cáhan i xihín ndo ña tá ná ndindaa quivi caja vii Ndióxi sahá ñayivi ndúu ñuyíví anda jáví ndiquiahva ñayivi cuéntá nu Ndióxi sahá ndaja táhan tuhun núu ñacahan na ñuyíví yóho. <sup>37</sup> Jáchi sahá mé tuhun ñacahan ndó jan caja vii Ndióxi sahá ndo. Ta xihín ña jan cachi Ndióxi ña á ín cuachi ndó á coo cuachi ndó —cáchí Jesús.

*Xíca ñayivi quini ña ná caja Jesús ña xitúhún nu ná*

*(Mr. 8:12; Lc. 11:29-32)*

<sup>38</sup> Java na fariseo xihín na jánaha ley Moisés ñacahan na xihín Jesús já ñacachi na já xihín á:

—Maestro, cúnĭ nde ña ná caja ndó in ñaha xitúhún nuú nde já ná cuni nde — ñacachi na xihín Jesús.

<sup>39</sup> Já nanducú ñehe Jesús tūhun nuú ña cán já ñacachi a já xihín ná:

—Ñayivi quini, ña co cúnĭ cándúsa Ndióxi, ña yóho cúú ña cúnĭ cuni ña xitúhún. Joo a cúnĭ toho na ña. Ña cuni ndusa na quéa ña ndoho ĩ tá quiahva ñandoho Jonás, ña ñasacuu profeta sanahá. <sup>40</sup> Jáchi tá quiahva ñasandacaan Jonás unĭ quivĭ xihín unĭ ñuú tixi tiyacá cáhnu tá ñacocó rí ña quiahva já ndacaan ri yehe, ña ñachindahá Ndióxi nduu ñayivi tixi ñundáhyĭ unĭ quivĭ xihín unĭ ñuú.

<sup>41</sup> Ta ñayivi ñasanduu Nínive sanahá cán ndacuĭta na chĭcaan ña cuachi jatá ndó tá ná xĭnu quivĭ caja viĭ Ndióxi sahá cuachi ñayivi ndúu viti. Jáchi mé ña ñasanduu ñuu Nínive cán najándacoo na cuachi cája na tá ñacahan Jonás xihín ná ña ñacachi Ndióxi coo. Ta yehe ĩn chága sahá ĩ a juú ga Jonás joo co cándúsa ndó yehe. <sup>42</sup> Jári tá ná xĭnu quivĭ caja viĭ Ndióxi sahá cuachi ñayivi ndúu tiempo viti andá já ndacuĭta in ña ñasacomí cuéntá sahá ñayivi ndúu chí xoo sur sanahá ta chĭcaan ña cuachi jatá ñayivi ndúu tiempo viti. Jáchi mé ña cán vatĭ ñasahĭin xĭcá ndivaha ña ñu rey Salomón sanahá ñasahan ña cuni johó ña tūhun ndíhĭ cáhan ña. Ta yehe ĩn chága sahá ĩ a juú ga Salomón joo co cándúsa ndó yehe.

*Jánaha Jesús ña cuahá tañu ndícó coo tucu ínima quini ini ñayivi vatĭ sa ñaquee rí*  
(Lc. 11:24-26)

<sup>43</sup> Tá quéta in ínima quini ini in ñataa já quée rí cuahan rí xĭca nuu rí ndijáa yucú íhĭ ndínducú rí nuú candoo rí. Ta tá co ndíñehe rí ña já cásahá cáhvi ini rí já: <sup>44</sup> “Coho ndícó coo tucú ini da nuú ñasandacaan ĩ cán jáchi cúú á tátūhun vehé”, cáhán rĭ. Ta tá xĭnu coo rí ini da cán já sándehe rĭ ña ĩn viĭ va ĩni ña cán tá quiahva viĭ ini vehe tá ñatihvi á ta ñandaca ndójó vaha tóco ndihĭ ñaha ini a. <sup>45</sup> Andá já quée tucu mé rí quini cán cuahan rí quehe rí usa ga rí quini chága a juú ga mé rí já xĭnu ndihĭ rí ndihvi rí ini ñataa cán. Ta mé ña cán ndiquini chága ña a juú ga tá

ñasandacaan in tálaá rí ini da. Quiahva já ndoho ri ñayivi quini ndúu tiempo viti — cáhĭ Jesús.

*Náná Jesús xihín ñani a cúnĭ ña cuni na a*  
(Mr. 3:31-35; Lc. 8:19-21)

<sup>46</sup> Nani cáhan yĭi va Jesús xihín ñayivi já ñaxĭnu coo náná Jesús xihín ñani a ña ná cáhan ña xihín á cúnĭ ña. Joo ñacandoo na ndíta na jatá véhe. <sup>47</sup> Já ñasahan in na cáxi tūhun na nuú Jesús já cáhĭ ña já xihín á:

—Jatá véhe cáa ĩn nánún xihín ñanún ta cáhan ña xūhun cúnĭ ña —ñacachi na xihín Jesús.

<sup>48</sup> Joo nanducú ñehe Jesús tūhun nuú ña cán já ñacachi a já xihín ná:

—Cáhan ĩ xihín ndó ndá ña cúú ndusa náná ĩ xihín ñani ĩ —ñacachi Jesús xihín ná.

<sup>49</sup> Andá já ñanaha ndáha mé á ña xĭca tuun xihín á cán já ñacachi a já:

—Ña yóho cúú ná tátūhun náná ĩ xihín ñani ĩ. <sup>50</sup> Jáchi ndá ña cája ña cúnĭ Ndióxi, tátá ĩ, mé a ĩn indivĭ, ña cán cúú ná tátūhun ñani ĩ xihín quiahva ĩ xihín náná ĩ —ñacachi Jesús xihín ña cán.

## 13

*Sácú Jesús quiahva sahá in ña sáta tata*  
(Mr. 4:1-9; Lc. 8:4-8)

<sup>1</sup> Sa mé quivĭ já ñaqueta Jesús vehe cán já ñasahan ñasacoo a yati yuhú tañuhú cán.

<sup>2</sup> Ta sahá ña ñataca cuahá ndivaha ñayivi nu á sahá ña cán quéa ñandaa mé á jatá in barco loho ta ñasacoo a jatá do cán nani ndúu ñayivi ñutĭ yuhú tañuhú cán. <sup>3</sup> Andá já ñacasahá jánaha cuahá ñaha nu ná ta ñasacu a quiahva nu ná já ñacachi a já xihín ná:

—In ña sáta tata ñaquee da cuahan ña cata ña. <sup>4</sup> Ta tá sáta ña ña cuahan ña já ñacuyu java ña íhĭ ta cán ñaxĭnu laa ta ñasaxĭ rí ña. <sup>5</sup> Ta java ña ñacuyu a tañu yuu nuú coo cuaha ñuhū. Ta cama chá ñanduta mé tata jáchi coo cúná ñuhū nuú ñacuyu a. <sup>6</sup> Joo tá ñaqueta candĭi já najáhĭchĭ ñaha sahá ña coo cuaha yóho a chí ñandihĭ sahá. <sup>7</sup> Ta java tata ñacuyu tañu tohĭnú ta tá ñasahnu tohĭnú cán já ñanditáha ndihĭ a ñacaja tohĭnú. <sup>8</sup> Ta java tata ñacuyu a nu ñuhū vaha ta já ñasahan cuahá ñaha ña jáquee na nu á. Java ña ñasahan in ciento



a nuú in in tata ta java ña nasahan uní jícó uxu a ta java ña nasahan oco uxu a nuú in in tata. <sup>9</sup> Na ín johó, ná cuni johó na — nacachi Jesús.

*Ndicani Jesús ndá saha quéa nasacu a quiahva nu ná*

*(Mr. 4:10-12; Lc. 8:9-10)*

<sup>10</sup> Na xíca tuun xihín Jesús cán nacayati na nu á já nacasáhá ndáca tuhún na mé á ndá cuéntá quéa jánahá mé á xihín quiahva cuití va nuú ñayivi. <sup>11</sup> Andá já nacachi Jesús já xihín ná:

—Ña coó nacandaa ini ndó jihna ña cán cándaa ini ndó viti jáchi nasuná Ndióxi xíní túní ndó cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúú na sácú u quiahva nuu. <sup>12</sup> Jáchi ndá na sa ín ñaha nuu, ñehe táhvi na coo chága ñaha nu ná. Joo na co á ñaha nuu, janda ña chá ín nu ná ndindaa. <sup>13</sup> Sahá ña cán quéa cáhan i xihín ndinuhu quiahva xihín mé ndó jáchi vatí sándehe na joo cúú ná tátuhun na co tívi nuu. Ta vatí xíní johó na joo cúú ná tátuhun na jóho jáchi co cándaa ini na ña cáhan i xihín ná. <sup>14</sup> Ta xihín ña yóho xínu coo nuú tuhun nacachi profeta Isaías sanahá ndivaha tá nacachi da já:

Vatí xíní johó na joo cúú ná tátuhun na jóho jáchi co cándaa ini na ña cáhan i xihín ná.

Ta vatí sándehe na joo cúú ná tátuhun na co tívi nuu.

<sup>15</sup> Jáchi nandaji xíní túní tóco ndihi ñayivi ñuu yóho.

Ta ndájí tuun johó na ta ndájí tuun nduchú núu na.

Ña cán quéa a cuú cuni johó na, ta ni a cuú candehé na,

ta ni a cuú cándaa ini na ña xíní johó na.

Ta xihín ña yóho co ndícó coo na nuú i ña ná ndaja vaha i na, nacahyí Isaías sanahá.

<sup>16</sup> Joo tahví nacuu ndó jáchi cándaa ini ndó ña sándehe ndó xihín ña xíní johó ndó.

<sup>17</sup> Mé a ndaa ná cáhan i xihín ndó ña cuahá ndivaha na profeta xihín cuahá ndivaha ñayivi vaha naxica ini na cuni na ña xíní ndó yóho viti joo coó naxini na ña ta naxica

ini na cuni johó na ña xíní johó ndó yóho joo coó naxini johó na ña.

*Ndicani Jesús ña cúní cachi quiahva nasacu a nu ná*

*(Mr. 4:13-20; Lc. 8:11-15)*

<sup>18</sup> Cuni johó ndó ña cúní cachi quiahva nasacu u sahá da sátá tata cán. <sup>19</sup> Ñayivi, na xíní johó tuhun vaha sahá ña sa nacayati quiví cacomí Ndióxi cuéntá sahá ñayivi joo co cándaa ini na ña, na cán cúú ná tátuhun tata ña nacuyu íchi cán. Jáchi xínu tiñáhá sacuahá ta tává ri tuhun Ndióxi cán ínima ná. <sup>20</sup> Ta tata ña nacuyu tañu yuu cán náha ndá quiahva ín ñayivi, na cájji ndivaha ini ndíquehe tuhun Ndióxi. <sup>21</sup> Joo sahá ña co ñehe íní yóho a cuhun cúná a sahá ña cán quéa chá tiempo cuití va cándusa na tuhun Ndióxi. Jáchi tá casáhá ndóho ini na sahá tuhun Ndióxi chí jándacoo va na ña. <sup>22</sup> Ta tata ña nacuyu tañu tohíñú cán náha ndá quiahva ín ñayivi, na xíní johó tuhun Ndióxi joo co jándacoo na íchi naxica na jihna. Ta casáhá ndicani ini na sahá ñaha ñuyiví yóho ta casáhá na catóo na canduu cuahá ñaha cuicá nu ná ta casáhá ndicají ini na caja na ña núu. Sahá ña cán quéa cúú á tátuhun tata ña co cána ñaha jáquee na nuu jáchi coó nasahnu na xihín tuhun Ndióxi. <sup>23</sup> Joo tata ña nacuyu nuú ñuhú vaha cán náha ndá quiahva ín ñayivi, na xíní johó tuhun Ndióxi ta cándaa ini na ña ta cája na ña cájji ini Ndióxi xihín. Java na cúú ná tátuhun yucu trigo ña nasahan in ciento a nuú in in tata. Ta java na cúú ná tátuhun tata ña nasahan uní jico uxu a nuú in in tata. Ta java na cúú ná tátuhun tata ña nasahan oco uxu a nuú in in a —nacachi Jesús xihín ná.

*Sácú Jesús quiahva sahá yucu quini nána tañu trigo*

<sup>24</sup> Andá já nasacu Jesús inga quiahva nuú ñayivi ndúu cán já nacachi a já xihín ná:

—Tá ná casáhá cacomí Ndióxi cuéntá sahá ñayivi já cacuu a tátuhun tá naxutu in dataa trigo ña vaha nu ñuhu dá. <sup>25</sup> Joo tá sa ndúu ndihi na quiji na já naxinu coo in da co cúní táhan xihín dá ta nachihin da tata yucu quini tañu trigo cán já naquee da cuahan da. <sup>26</sup> Ta tá nasahnu trigo cán ta nacasáhá cána yóco a já nanduta ri yucu

quini cán. <sup>27</sup> Anda já nasahan na cája chúun cán cahan na xihín xitoho na já nacachi na já: “Candehé ndo. Tata vaha quéa nachihin ndó nu ñúhu ndo joo co cánda ini nde ndáchi naquixi yucu quini nanana xihín á yóho”, nacachi na cán xihín xitoho na. <sup>28</sup> Anda já nanducú ñehe da cán tuhun nu ná já nacachi da já xihín ná: “Ndá da co cúní yehe, da cán cúú da nacaja ña yóho”, nacachi da. Anda já nacachi na cája chúun nu dá cán já xihín dá: “Á co cúní ndó ña ná quihvi nde tuhun ndihi nde yucu quini cáa tañu trigo”, nacachi na xihín dá. <sup>29</sup> Anda já nacachi da já xihín ná: “Ná coo mé á jáchi tiaha náa nani túhun ndó yucu quini jan cuu tuhun ndó yucu trigo xihín á. <sup>30</sup> Vaha chá ná quiahva í ñamaní cuahnu a xihín trigo janda quiahva ná ndindaa tiempo jáqueé trigo. Ta tá sa jáqueé já cahnda i chuun nuú na jáquee ña ná tavá xoo na yucu quini jihna ñúhú ta ná cató na ña tá nuhni tá nuhni ña ná chicaan ñúhu ná ña. Ta anda jáví ná jataca na trigo taan vaha na ini yáca ñaha í”, nacachi da —cáchi Jesús sácú a quiahva nu ná.

*Sácú Jesús inga quiahva saha ndíqui mostaza*

*(Mr. 4:30-32; Lc. 13:18-19)*

<sup>31</sup> Ta nasacu Jesús inga quiahva nu ná já nacachi a já xihín ná:

—Tá ná xinú coo quiví cacomí Ndióxi cuéntá saha ñayivi já cúú á tátuhun in ndíqui mostaza ña chíhin in dataa nu ñúhu da. <sup>32</sup> Cúú á ndíqui loho chága nu tóco ndihi ndíqui válí in ñuyiví. Joo sáhnú a janda quiahva ndúu a in yító, dó cáhnú nu ndíhi yító nu xinú coo laa cávaha rí choho rí nu ndáha do —cáchi Jesús.

*Sácú Jesús quiahva saha yusá naxaa*  
*(Lc. 13:20-21)*

<sup>33</sup> Ta nasacu Jesús inga quiahva nu ná já nacachi a já xihín ná:

—Tá ná cacomí Ndióxi cuéntá saha ñayivi já cacuu a tátuhun tá cává táhan in ñáñáha uní táhnda náhnú harina xihín loho yusá naxaa ña ná jánañu a tóco ndihi mé yúsá cán —nacachi Jesús.

*Sácú Jesús quiahva cuití va nuú ñayivi*  
*(Mr. 4:33-34)*

<sup>34</sup> Xihín ndinuhu quiahva cuití najánahe Jesús tóco ndihi ña yóho nuú ñayivi. <sup>35</sup> Já nacaja Jesús ña ná xinú coo nuú ña nacachi in da profeta sanahá tá nacachi da já:

Xihín ndinuhu quiahva cuití va cahan i xihín ñayivi, ta cahan i sahá ñaha nasahin jehé nu ná janda mé saha tá cámaní cava sahá sahá ñuyiví —cáchi tuhun Ndióxi.

*Ndicani Jesús ña cúní cachi quiahva nasacu a sahá yucu quini nanana tañu trigo cán*

<sup>36</sup> Tá nandihí nandindayí Jesús ñayivi cuaha ndúu cán já naquihvi a ini vehe. Anda já nacativi na xíca tuun xihín a cán nu á já nacachi na já xihín á:

—Ná ndicani ndó nuú nde ndía cúní cachi quiahva nasacu ndó sahá yucu quini nanana tañu trigo cán —nacachi na.

<sup>37</sup> Anda já nacachi Jesús já xihín ná:

—Da xútu tata vaha cúú yehe, da nachindahá Ndióxi nduu ñayivi. <sup>38</sup> Ta ñúhu nu xútu u tata cúú á ñayivi ñuyiví. Ta tata vaha cán cúú á yuhú nuú na cómí Ndióxi cuéntá saha. Ta yucu quini cán cúú á yuhú nuú ñayivi quini, na cúú cuéntá rí quini. <sup>39</sup> Ta da co cúní táhan xihín i nasahan da naxutu da yucu quini nu ñúhu cán ta cúú dá yuhú nuú tiñahá sacuaaha. Ta tiempo jáquee na cán cúú á tá ná xinú coo quiví caja víi Ndióxi sahá ñayivi ndúu ñuyiví. Ta na xíca jáquee cán cúú ná tát Ndióxi. <sup>40</sup> Ta tá quiahva nacaja na cán xihín yucu quini tá najátaca na ña ta nachicaan ñúhu na ña quiahva já yaha ri xihín ñayivi ñuyiví yóho tá ná tandaa quiví ndihi sahá ñuyiví. <sup>41</sup> Ta yehe, da nachindahá Ndióxi nduu ñayivi chindahá i tát mí i ña ná cahnda java táhan na na cómí i cuéntá saha xihín na co cúú cuéntá mí i. Jáchi na cán jácahan na inga na caja na cuachi xihín java ga na cája ña núu. <sup>42</sup> Ta jáqueta nuu i na ini indayá ta cán cuacu na anda quiahva chicáñá nuhu na jáchi ndóho ndivaha ini na. <sup>43</sup> Ta anda já na cája ña cúní Ndióxi ndiyihvi ndaa na tá quiahva yehe candii nuú cacomí Ndióxi cuéntá saha ná, mé á cúú á tátá na. Ndá na in johó, ná cuni johó na.

*Sácú Jesús quiahva saha sató jihún ndacaan jehé*

44 'Tá ná cacomí Ndióxi cuéntá sahá ñayivi cacuu a tátuhun ña yáha xihín in dataa tá ndínehe dá in sató jiuhún ña ndácaan jehé in ñundáhyi. Ta tá nandihí já chíjahvi tucu da ña xihín ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú nanduxu mé sató jiuhún cán.

*Sácú Jesús quiahva sahá in jíqui sándacu na ña yahvi ndivaha*

45 'Tá ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahvi ndúcú da jíqui sándacu na ña yahvi ndivaha. 46 Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

*Sácú Jesús quiahva sahá in ñunu táva tiyacá*

47 'Ta tá ná cacomí Ndióxi cuéntá sahá ñayivi cacuu a tátuhun in ñunu jácana na nuú tañuhú ta já tíin na tá nuú tiyacá. 48 Ta tá sa nachutú ñunu cán já táva na tiyacá cán yuhú tañuhú ta cán sácoo na ndácahnda java na ri. Ta rí vaha cán táan vaha na ini toyicá na joo rí núu cán xíta ri cája na. 49 Quiahva já yaha ri xihín ñayivi tá ná ndihí sahá ñuyíví. Jáchi queta tátó Ndióxi ndacahnda java na vaha tañu na quini. 50 Ta ñayivi quini cán chicaan na ini indayá ta cán cuacu na janda quiahva chicahña nuhu na jáchi ndóho ndivaha ini na —cáchi Jesús.

*Tá jánaha Jesús sahá ña saá xihín ña yatá*

51 Tá nandihí já nandaca tuhún Jesús na já nacachi a já:

—Á cándaq ini nó tóco ndihí ña cáhan i yóho —cáchi a.

—Ajan, cándaq ini nde ña —nacachi na cán xihín a.

52 Anda já nacachi Jesús já xihín ná:

—Tá jácuaha in da jánaha ley Moisés sahá ndaja ndiquiahva da mé dá ndáha Ndióxi cacomí a cuéntá saha dá já cúu dá tátuhun in dataa, da íin ñaha ini vehe. Ta xini vaha da táva da ñaha da á cúu á ña saá á ña yatá —cáchi a.

*Tá cuahan Jesús ñuu Nazaret*  
(Mr. 6:1-6; Lc. 4:16-30)

53 Tá nandihí najánaha Jesús xihín quiahva yóho já naquee a cuanúhu a. 54 Tá naxinu a ñuu mé á já nacasáhá jánaha ini veñuhu cán. Ta jandá johó cátoóto ñayivi ñuu cán já cáchi na já:

—Ta ndájá nacatiahva nahá ri da yóho ña xini da. Ta ndaja cája da ñaha xituhún yóho. 55 Á a juú da yóho cúu jahyi da cája chúun xihín yito. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti. 56 Ta sa mé ñuu yóho ndúu ri quiahva da jan. Ndájá nacatiahva nahá da ña jánaha da nu yo, dá já —nacachi xihín táhan na cán.

57 Ta chí coó naxeen na candúsa ñahá na. Sahá ña cán queá nacachi a já xihín ná:

—Vatí tóco ndihí ñayivi cája cáhnu na in profeta joo na vehe da xihín na ñuu da co candúsa na da —cáchi Jesús.

58 Ta coó nacaja cuahá Jesús ña xituhún ñuu cán jáchi coó nacandúsa toho ñayivi cán mé á.

## 14

*Tá naxihí Juan, da nacaja ndúta ñayivi*  
(Mr. 6:14-29; Lc. 9:7-9)

1 Mé tiempo cán naxini johó Herodes, da cúu gobernador cán ña ndítuhún na sahá Jesús. 2 Anda já nacachi da já xihín mozo da:

—Á a juú Jesús cúu á Juan, da najácandúta ñayivi ta viti nanditacu tucu da. Sahá ña cán queá íin ndée da cája da tóco ndihí ña cája da yóho —cáchi Herodes.

3 Jáchi janda mé saha natiin Herodes Juan nacató ñahá da ta nachicaan da da vecaa. Ta nacaja da ña yóho sahá Herodías, ña nasacuu ñájihí Felipe, ñani da. 4 Jáchi mé Juan najánani ñahá da sahá ña íin Herodes xihín ña ta já nacachi da:

—Co ndítahan coún xihín ñájihí ñanún —nacachi Juan xihín dá.

5 Ta janda já nanducú Herodes cahní da Juan joo a cúu caja da ña jáchi yíhvi da ñayivi sahá ña cándúsa na ña cúu Juan in profeta nachindahá Ndióxi. 6 Joo in tañu nani ndácaan Juan vecaa já nacavaha Herodes víco sahá quivi nacacu da. Ta nandaca ndíchí ña cúu jahyi Herodías cán naxita sahá ña nu ndihí na ndúu víco cán.

Ta a juú quiahva nacajii ini Herodes xihín ña yóho. <sup>7</sup> Sahá ña cán quéa quivi Ndióxi tává da tá sahan da tuhun da nu ña cán ña quiahva da nu ña ndá ña cuni mé ña caca ña nu dá. <sup>8</sup> Tá nandihhi nandaca tuhún jihna ña náná ña já ndáva ña nasahan ña nu Herodes já cáchí ña já xihín dá:

—Viti ñuhú cuni ña ná quiahva ndó yiquí jíní Juan, da jácanduta ñayivi nuú i ini in cohó cáhnu —nacachi ña xihín dá.

<sup>9</sup> Tá nacachi ña já xihín Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tuhun dá nu ña cán ta sahá ña cuni da candoo vaha da nuú na ndúu víco xihín da cán sahá ña cán quéa nasahnda da chuun ña ná quiahva na ña nu ña. <sup>10</sup> Chí nasahnda da chuun ña ná chituhun ná yiquí jíní Juan ini vecaa cán. <sup>11</sup> Ta já nachicaan na yiquí jíní da ini in cohó cáhnu já nasahan na ña nu ña cán. Anda já nandiquiahva ña cán ña ndáha náná ña.

<sup>12</sup> Anda jáví naxinu na naxica xihín Juan cán já nasahan na nandiquehe na yiquí cuñu da ta najánduxu na da. Ta já nasahan na nacaxi tuhun na ña yóho nuú Jesús.

*Tá nasahan Jesús ña cuxu uhun mil taa*  
(Mr. 6:30-44; Lc. 9:10-17; Jn. 6:1-14)

<sup>13</sup> Tá naxini johó Jesús saha Juan já naquee xóo a ini in barco loho cuahan nuú co ndúu ñayivi. Joo tá naxini johó ñayivi ña cuahan Jesús já naquee na ñuu na ndíco na cuahan sahá na nu ín a. <sup>14</sup> Ta tá nanuu Jesús barco cán já naxini a cuahá ndivaha ñayivi ta natahvi ini a saha ná. Ta chí nandaja vaha mé á na quíhvi naquixi tañu na cán. <sup>15</sup> Ta tá sa cáhini cuahan já nacayati na xica tuun xihín a cán nu á. Já cáchí na já xihín á:

—Sa nahini va ta a juú xoo nu ndúu ñayivi quéa yóho. Ndindayí ndó ñayivi ná cuhun na ñuu válí yati jan já ná cueen na ña cuxu na —nacachi na cán xihín á.

<sup>16</sup> Anda já nacachi a já xihín ná:

—Co xini ñuhú toho quee na cuhun na. Mé ndó quiahva ndó ná cuxu na —nacachi Jesús.

<sup>17</sup> Anda já nacachi tucu na cán já xihín á:

—Co mé ñaha va cuxu na yóho. Uhun víxí pan xihín ivi laá tiyacá cuití va ín yóho —nacachi na xihín Jesús.

<sup>18</sup> —Taxi ndó a chóho —nacachi Jesús xihín ná.

<sup>19</sup> Anda já nasahnda Jesús chuun ña ná ndaca nduu ndihi na cán nuú yucu. Anda já natiin a ndíhuhun pan xihín ndívi tiyacá cán já nasandehé a chí indivi já nandiquiahva ndixahvi nu Ndióxi. Tá nandihhi já nasahnda java pan ta nasahan ña nuú na xica tuun xihín á cán ta na cán nandicahnda na ña nuú ñayivi cuaha cán.

<sup>20</sup> Ta tóco ndihi na naxixi na janda quiahva nachutú na. Ta tá nandihhi naxixi na já najátaca na ña nacandoo cán ta najácutú na uxu ivi toyicá xihín ña nacandoo cán.

<sup>21</sup> Ta tóco ndihi na naxixi cán nasacuu na tátuhun uhun mil taa. Co cáhan sahá najihí xihín na valí.

*Tá naxica sahá Jesús nuú tañuhú*  
(Mr. 6:45-52; Jn. 6:16-21)

<sup>22</sup> Ta tá nandihhi já nacaja Jesús ña ná ndihvi na xica tuun xihín á cán ini in barco ña ná cuhun cuéé na inga xoo tañuhú cán nani candoo tóo mé á jándindayí a ñayivi cuaha cán. <sup>23</sup> Ta tá sa najánduta tóco ndihi ñayivi já nandaa mé á yucu cuahan caca tahví a nu Ndióxi. Tá nandihhi já nacuaá ta in tuhún mé á ndacaan xica tahví a nu Ndióxi cán. <sup>24</sup> Ta ndaja coo barco loho, dó candoojé na xica tuun xihín á cán sa naxinu coo dó janda mahnú tañuhú cuahan do. Ta ndícojo ndivaha tañuhú jáchi xoo cuahan na vaxi tachí. <sup>25</sup> Joo tátuhun sa cuahan tívi já xica sahá Jesús cuahan nuú tañuhú naxinu a nu ná. <sup>26</sup> Ta tá naxini na xica sahá Jesús vaxi a nuú tañuhú cán já nacatontó na. Ta nacasahá na cáyuhú cóhó na sahá ña yíhvi na já cáchí na já:

—Ínima quéa vaxi yóho —cáchí na.

<sup>27</sup> Joo ivi laá nandicahan Jesús xihín ná já cáchí a já:

—Ndacú coo ini ndó jáchi yehe va cúu u. A yíhvi toho ndó —nacachi a xihín ná.

<sup>28</sup> Anda já nacachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu saa i nu ndo ta ná caca i nuú tañuhú —nacachi da xihín Jesús.

<sup>29</sup> Ta já cáchí Jesús já:

—Naha quíi —cáchi a xihín dá.

Anda já nanuu Pedro barco cán ta nacasáhá xíca sáhá da nuú tañuhú cuahan da nuú Jesús. <sup>30</sup> Joo tá naxini da tachí ndeé xícó nuú tañuhú cán já nayihví da. Chí ivi laá nacasáhá quéta nuu da cuahan da ini tañuhú. Já nacayuhú cóhó da já cáchi da já xihín Jesús:

—Chindeé ndó yehe, xitoho i —nacachi da xihín á.

<sup>31</sup> Ta cama chá natiin Jesús ndáha da ta já nacachi a já xihín dá:

—Ndá cuéntá quéa co cándéé chága inún yehe ta nacasáhá cáhvi ivi johó inún —nacachi Jesús xihín dá.

<sup>32</sup> Ta tá nandaa ndívi na jata barco já nacatáji tachí cán. <sup>33</sup> Anda já nacaja cáhnu na ñúhu ini barco cán Jesús já cáchi na já xihín á:

—Mé a ndaa táhyí cúu jivi ndusa ndó in túhún jini já jahyi Ndióxi —nacachi na xihín á.

*Tá nandaja vaha Jesús na quíhvi ndúu ñundáhyi Genesaret*  
(Mr. 6:53-56)

<sup>34</sup> Ta já naxica loho ga na nuú tañuhú cán já naxinu coo na ñundáhyi Genesaret.

<sup>35</sup> Ta tá nandicuni ñayivi ndúu cán mé á já nachindahá na chuun nasahan nuú ndaja táhan ñayivi ndúu ndijáá ñundáhyi cán. Já ñéhe ndihi na na quíhvi nacasaá na nu á.

<sup>36</sup> Ta na quíhvi cán naxica tahví na nu á ña ná quiahva ñamaní caní ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

## 15

*Ña cája quini ínimá ñayivi*  
(Mr. 7:1-23)

<sup>1</sup> Ndaja coo java na fariseo xihín java na jánaha ley Moisés ndúu ñuu Jerusalén cán nacayati na nuú Jesús já nacasáhá cáchi na já xihín á:

<sup>2</sup> —Ndávaha co cája na xíca tuun xuhun ña nacachi tásahnu jícó yo caja na. Ndávaha xíxi na tá cámani ndahá na tá quiahva sáhndá ley caja na —nacachi na cán xihín Jesús.

<sup>3</sup> Anda já nanducú ñehe Jesús tuhun nu ná já nacachi a já:

—Ta jári ndóhó va, ndá cuéntá quéa jándacoo ndó ña sáhndá Ndióxi nu ndó caja ndó. Ta ña cája ndó quéa ndíco ndó costumbre mé va ndó. <sup>4</sup> Jáchi sáhndá Ndióxi chuun já cáchi a já: “Caja cáhnún tátún xihín nánún.” Ta jári cáchi a: “Ndá na ná chícaan cháhan jata tátá na á náná na, ndítahan quivi na”, cáchi a. <sup>5</sup> Joo ndóhó, jánaha ndó nuú ñayivi ña cuu cuahan na já xihín tátá na á náná na: “A cuú chindeé e ndóhó jáchi sa nasacu xoo i ñaha i quiahva i ña nu Ndióxi”, cáchi na. <sup>6</sup> Tá ná cachi na ña yóho já quéa co ndúsa ga chindeé na tátá náná na. Quiahva johó cája ndó ta sácu xóo ndó ña nasahnda Ndióxi chuun nu ndo ta ndája ndó a tátuhun in ñaha ña coo saha. Jáchi ndíco cáhnu ndó ña najándacoo tásahnu jícó ndo nu ndo. <sup>7</sup> Co cúu ndó tá quiahva ndáa ndó. Mé a ndaa nacahan profeta Isaías saha ndo sanahá tá nacahyí da ña nacachi Ndióxi:

<sup>8</sup> Yuhú ninu uun na cája cáhnu na yehe.

Ta co cája cáhnu na yehe xihín ndinuhu ínimá na.

<sup>9</sup> Ta mé a uun quéa cája cáhnu na yehe, jáchi ña jánaha na nuú ñayivi cuití va cúu á ña quíxi jini mé va na, nacachi profeta Isaías sanahá ndivaha —nacachi Jesús xihín na cán.

<sup>10</sup> Tá nandihí já nacana Jesús tóco ndihi ñayivi ndúu cán já nacachi a já xihín ná:

—Cuni johó vaha ndó ña cáhan i xihín ndó ta ná candaa ini ndó ña. <sup>11</sup> A juú ñaha xíxi ñayivi ndája quini ínimá ná. Tuhun quini quéta yúhu ná ña jan quéa cája quini ñahá —nacachi Jesús.

<sup>12</sup> Tá nandihí já nacayati na xíca tuun xihín Jesús cán nu á já nacachi na já xihín á:

—Chí a váha mé nacuu ini na fariseo tá naxini johó na ña nacachi ndó jan —nacachi na cán.

<sup>13</sup> Anda já nacachi Jesús já xihín ná:

—Ñayivi, na co ndíquehe vaha tuhun Ndióxi cúu ná tátuhun in yíto, dó coo najándee Ndióxi, tátá i ña ín indiví. Sáhá ña co cúu dó cuéntá mé á já tandaa quívi ña tuhun mé á do anda yóho do. <sup>14</sup> Sáhá ña cán quéa co ndítahan ndicani ini ndó sahá na jan jáchi na cuáa va cúu ná. Ta a cúu toho caja in da cuáa candaca da inga da cuáa

cuhun da jáchi ndívi já da ndacava da yávi —nacachi Jesús.

15 Tá nandihí já nacachi Pedro já xihín Jesús:

—Ndicani loho ndó nuú nde ndaja cáa ña cáchí ndó ña co cája quini toho ña xíxi ñayivi mé ná jáchi co cándaá ini nde ña —nacachi Pedro xihín Jesús.

16 Já nacachi Jesús já xihín ná:

—Á coó toho xíní túni ri ndóhó va, vaha. 17 Jáchi co cándaá ini ndó ña tóco ndihí ñaha xíxi ñayivi a cuú caja quini a na. Jáchi ña xíxi ñayivi co xínu a ini ínima ná joo xínu coo ña tixi va na já queta tucu a yiquí cuñu na. 18 Ña cuu ndaja quini ñayivi cuú ña quíxi ínima ná tátuhun tuhun cáhan na xihín ña cája na. 19 Jáchi chí ínima ñayivi quíxi ña cáhvi núu ini na tátuhun ña cáhvi ini na cahni na ndii. Ta sa mé cán quíxi ña cáhvi ini in dātaa coo da xihín ñájíhí ñani táhan da á xihín in ña co cuú ñájíhí da. Ta sa mé cán quíxi ña ndiáva íní da caja cuíhná da. Ta sa mé cán quíxi ña cávaha jíquí da tuhun sahá ñani táhan da ta jári quíxi ña cánahá da xihín Ndióxi. 20 Tóco ndihí ña cáhvi núu ini ñayivi caja na, ña yóho quéa ndája quini a na. Joo co cáquini toho ñayivi sahá ña co ndáhá na tá cámaní cuxu na tá quiahva ín costumbre na —nacachi Jesús xihín na xíca tuun xihín á cán.

*Tá nacandeeé ini in ñá tóho Jesús  
(Mr. 7:24-30)*

21 Tá nandihí já naquee Jesús cuahan chí ñundáhyi cuéntá Tiro xihín cuéntá Sidón cán. 22 Ta nu xíca cuahan cán naqueta in ñáñáha ñundáhyi Canaan nu á já cáyuhú ña já cáchí ña já xihín á:

—Xitoho i, da naquixi chichi David caja ndó ñamaní candáhví loho ini ndó yehe. Chindeé ndó jahyi jíhí i jáchi rí quini ndácaan ini ñá —nacachi ñáñáha cán xihín Jesús.

23 Joo ni in túhún tuhun coó nanducú ñehe Jesús nu ña. Anda já nacativi na xíca tuun xihín a cán nu á já nacachi na já xihín á:

—Taxi ndó ñá jan ná quee ña cuhun ña jáchi cáyuhú ña ndácaa ñá jata yó vaxi ñá —nacachi na cán xihín Jesús.

24 Anda já nacachi Jesús xihín ñáñáha cán já:

—Nachindahá Ndióxi yehe vaxi i nuú ñayivi Israel cuití va, mé na cuú tátuhun ndicachi, rí nandiñúhú —nacachi Jesús.

25 Anda já ndáva ñá cán naxinu coo ña nacaxítí ña nu Jesús já cáchí ña já xihín á:

—Caja ndó ñamaní chindeé loho ndó yehe, xitoho i.

26 Anda já nacachi Jesús já xihín ñá:

—A váha toho candaa i pan ndahá na valí ta já cana i ña nuú tina —nacachi Jesús xihín ñá cán.

27 Anda já nacachi ñá cán já xihín Jesús:

—Mé a ndaa cáhan ndo joo anda tina, rí ndúu tixi mesa xíxi rí ña jácuyu jahyi xitoho rí —nacachi ñá cán xihín Jesús.

28 Anda já nacachi Jesús já xihín ñá:

—Mé a ndaa cándeé cáhnu inún Ndióxi. Ná coo a tá quiahva cúní mún —nacachi Jesús xihín ñá.

Chí mé hora já nandivaha jahyi jíhí ña.

*Ndája vaha Jesús cuahá na quíhvi*

29 Tá nandihí já naquee Jesús cuahan já naxinu coo a yati yuhú tañuhú Galilea. Já nandaa in jiní yúcu ta cán nasacoo a. 30 Ta já nacasáhá nataca cuahá ndivaha ñayivi já ñehe na na quíhvi sahá xihín na cuaá xihín na níhí xihín na réncó ndáha. Ta cuahá ga nuú na quíhvi ñehe na nacasaá na nachinduu na na nu Jesús. Ta nandaja vaha mé á na. 31 Ta xihín ña yóho a juú quiahva nacatontó na tá naxini na ña nacasáhá ndícahan na níhí. Ta nacatontó na tá naxini na ña nandivaha ndahá na réncó ta ndícaca vaha na quíhvi sahá ta quiahva já nandivaha ri na cuaá. Ta nacasáhá na cája cáhnu na Ndióxi, mé a cómí cuéntá sahá na Israel.

*Tá nasahan Jesús ña cuxu comi mil natqa  
(Mr. 8:1-10)*

32 Anda já nacana Jesús na xíca tuun xihín á já nacachi a já xihín ná:

—Táhnada ndivaha ini i sahá ñayivi yóho jáchi sa naxinu uní quívi ndúu na xihín i ta chí coó ga ña cuxu na. Ta co cúní chindahá i na nuhu na vehe na jáchi cámaní cuxu na ta tiahva náá cuitá na ta cuyu na íchi —nacachi Jesús.

<sup>33</sup> Anda já nacachi na xíca tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nacachi na cán xihín Jesús.

<sup>34</sup> Já nacachi Jesús já:

—Ndaja pan cómi ndo.

Já nacachi na cán já:

—Usa pan xihín java tiyacá válí.

<sup>35</sup> Anda já nasahnda Jesús chuun ña ná cacoo ndihi ñayivi nu ñúhu cán. <sup>36</sup> Ta

já natiin a ndíhusa pan cán xihín java tiyacá válí cán já nandiquiahva ndixahvi nu Ndióxi. Ta já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuaha cán.

<sup>37</sup> Ta naxixi tóco ndihi na janda quiahva nachutú tixi na. Ta tá najánditaca na ña nacandoo cán já nachutú usa toyicá xihín ña. <sup>38</sup> Ta na naxixi cán cuú ná comi mil taa ta co cáhan sahá najihí xihín na válí.

<sup>39</sup> Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuénta Magdala.

## 16

*Cúni na fariseo xihín na saduceo cuni na in ña xitúhún caja Jesús*

(Mr. 8:11-13; Lc. 12:54-56)

<sup>1</sup> Ta ndaja coo naxinu coo na fariseo xihín na saduceo nu Jesús. Ta sahá ña cúni na coto ndojó cuití ñahá na sahá ña cán quea naxica na nu á ña ná caja in ña xitúhún cuénta indivi já ná candaa ini na á mé a ndaa cuú á ña nachindahá Ndióxi. <sup>2</sup> Anda já nanducú ñehe Jesús tuhun nu ná já nacachi a já xihín ná:

—Tá nahini já cáchi ndo já: “Tiempo vaha ndivaha cacuu a jáchi ndiyéhe cuhá indivi”, cáchi ndo. <sup>3</sup> Ta naha cáchi ndo já: “Viti ndusa quea cuun ndeé ndivaha javi jáchi iin víco ndivaha ta iin víco cuhá indivi”, cáchi ndo. Co cuú ndó tá quiahva ndaa ndó. Ndá cuénta quea tiáhva ndó ndicuni ndó ndá quea coo tá sándehe ndó indivi joo co tiáhva ndó ndicuni ndó ndá tiempo cuú á viti.

<sup>4</sup> Ñayivi quini, na co cúni candúsa Ndióxi, na cán cuú na xíca ña ná caja i ña xitúhún nu ná. Joo ni in túhún toho ñaha xitúhún

a cája ga i nu ná. In túhún ña candehe na cacuu a ña tandaa quivi ndoho i tá quiahva nandoho profeta Jonás sanahá ndivaha —nacachi Jesús xihín ná.

Já naquee a cuahan.

*Tá sácú Jesús quiahva sahá na fariseo (Mr. 8:14-21)*

<sup>5</sup> Ta ndaja coo naxinu coo a inga xoo tañuhú xihín na xíca tuun xihín á cán ta nandindojó na cán cañehe na pan cuxu na.

<sup>6</sup> Tá nandihí já nacachi Jesús já xihín ná:

—Candehe ndo. Cuénta coo ndó xihín na fariseo ta xihín na saduceo jan jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

<sup>7</sup> Joo na xíca tuun xihín á cán ndítuhún xihín táhan na ña nacachi Jesús já sahá ña coo pan ñehe na cuahan xihín ná.

<sup>8</sup> Ta tá nacandaa ini Jesús ña cáhan na já nacachi a já xihín ná:

—Ndá cuénta quea co cándee cáhnu ini ndó yehe ta cáhan ndo ña cáchi i ña yóho xihín ndo sahá ña co ñehe ndó pan vaxi ndó. <sup>9</sup> A ñaha candaa ini ndó. Ndítahan ndicuhun ini ndó ña nandaja cuhá i uhun víxi pan tá naxixi uhun mil taa. Ta sa xini ndó ndaja toyicá najácutú ndo xihín ña nacandoo cán. <sup>10</sup> Ta ndítahan ndicuhun ini ndó ña nacaja i xihín usa pan tá nandicahnda i ña naxixi comi mil taa ta sa xini ndó ndaja toyicá najácutú ndo xihín ña nacandoo cán. <sup>11</sup> Ndá cuénta quea co candaa toho ini ndó ña coo nacachi i ña yóho xihín ndó sahá ña coo pan ñehe ndó vaxi ndó. Joo nacachi i ña cuénta coo ndó xihín na fariseo ta xihín na saduceo jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

<sup>12</sup> Tá nacachi Jesús ña yóho já nacandaa ini na xíca tuun xihín á cán ña a juú toho sahá yusa naxaa cáhan Jesús saha. Ña cúni Jesús cachi a xihín ná quea cuénta vaha ná coo na xihín ña jánaha na fariseo xihín na saduceo.

*Tá cáxi tuhun ndaa Pedro ña cuú Jesús mé a nachindahá Ndióxi cacomí a cuénta sahá ñayivi*

(Mr. 8:27-30; Lc. 9:18-21)

<sup>13</sup> Tá naxinu coo Jesús ñundáhyi Cesarea cuéntá Filipino já nandaca tuhún a na xíca tuun xihin á cán já nacachi a já xihin ná:

—Ndá da cáchi ñayivi cúu yehe, da nachindahá Ndióxi nduu ñayivi —nacachi Jesús.

<sup>14</sup> Já nacachi na cán já:

—Java na cáchi na ña cúu ndó Juan, da nacaja ndúta ñayivi. Ta java na cáchi na ña cúu ndó profeta Elías. Ta java na cáchi na ña cúu ndó profeta Jeremías. Ta java na cáchi na ña cúu ndó in táhan profeta nasanduu sanahá —nacachi na.

<sup>15</sup> Anda já nacachi Jesús já xihin ná:

—Ta ndóhó ri, ndá da cáchi ndó cúu u —nacachi a.

<sup>16</sup> Anda já nanducú ñehe Simón Pedro tuhun nu Jesús já nacachi da já xihin á:

—Mé ndó cúu Cristo, ña nachindahá Ndióxi cacomí cuéntá sahá ñayivi. Ta cúu ndó in tuhún jini já jahyi Ndióxi, mé a tácu in indivi —nacachi da.

<sup>17</sup> Anda já nanducú ñehe Jesús tuhun nu dá já nacachi a já xihin dá:

—Tahví nahá cúun, Simón, jahyi Jonás jáchi ni in tuhún ñayivi coo nacaxi tuhun ña yóho xuhun. In tuhún tátá i, mé a in indivi nanaha ña yóho nuun. <sup>18</sup> Ta quiahva joho cáchi ri yehe saha yóho: Yohó cúun Pedro ta quivun cuni cachi a tóto. Ta cúun tátuhun yuu ndúhu saha in vehe nuú cavaha i veñuhu mí i jáchi yóho caca nuún cahun saha i nuú ñayivi já ná quee vaha na xihin tiñahá sacuaaha já ná a cuhun na indayá. <sup>19</sup> Ta caja i xuhun ña ná cuu ndicanún nuú ñayivi ndaja ndiquiahva na mé ná ndaha i cacomí i cuéntá saha ná. Cacuu a tátuhun quiahva i yávi nuun ña ná cunún íchi nuú ndihvi ñayivi cacomí i cuéntá saha ná. Tá co sahun ñamani ná ndihvi ñayivi cán já quea a quiahva toho i ñamani nu ná. Joo tá sahun ñamani nu ná ndihvi na cán já quea quiahva ri yehe ñamani nu ná —cáchi a xihin Pedro.

<sup>20</sup> Anda já nasahnda Jesús chuun nuú na xíca tuun xihin á cán ña ná a cáxi tuhun na xihin ni in tuhún ñayivi ña cúu mé á Cristo, mé á nachindahá Ndióxi cacomí cuéntá sahá ñayivi.

*Tá cáxi tuhun Jesús ña quivi a*  
(Mr. 8:31-9:1; Lc. 9:22-27)

<sup>21</sup> Ta janda mé quivi já nacasahá Jesús cáxi tuhun a xihin na xíca tuun xihin á ña ndítahan nu á cuhun a ñuu Jerusalén. Ta mé cán ndoho ndivaha ini a ndahá na sacuaaha veñuhu xihin ndahá na sacuaaha nuú jutú xihin ndahá na jannah ley Moisés. Ta caja xíxi ri na cán va xihin á ta cahni ñahá na. Joo tá ná xinu uni quivi nditacu tucu a. <sup>22</sup> Anda já natavá xóo Pedro Jesús já nacasahá da jananí ñahá da já nacachi da já xihin á:

—Ama ná yaha ña yóho xihin ndó, xitoho i. Ná a quiahva toho Ndióxi ñamani ndoho ndó já —nacachi Pedro xihin Jesús.

<sup>23</sup> Joo nacava nuu Jesús sándehe a nu Pedro ta já cáchi a já xihin dá:

—Cuáhán quee Satanás, rí cúu tiñahá sacuaaha. Tá quiahva in na sáji nuu nu ná quiahva já iún nuú i. Jáchi co cáhvi inún tá quiahva cáhvi ini Ndióxi joo cáhvi inún tá quiahva cáhvi ini ñayivi cuéntá ñuyíví yóho —nacachi Jesús xihin dá.

<sup>24</sup> Anda já nacachi Jesús já xihin na xíca tuun xihin a cán:

—Ndá na cuni candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coo caja toho a ná quivi na sahá i. <sup>25</sup> Jáchi ndá na catóo coo chága ñuyíví yóho ndihi saha ná. Joo ndá na sahan ndeé ini quivi saha i xihin saha tuhun Ndióxi, ñehe táhvi ná catacu na anda ama cáa quivi. <sup>26</sup> Vatí ná quee vaha in na ñuyíví yóho ta cómi na tóco ndihi ñaha ñuyíví yóho joo ndá chuun quea tá nu ndihí ndihi saha ná indayá. Jáchi ni in ñaha a cuú chahvi in na saha inima ná ña ná a cuhun na indayá. <sup>27</sup> Jáchi yehe, da nachindahá Ndióxi nduu ñayivi quixi tucu u xihin ndée Ndióxi, tátá i ta xihin ndée tátó Ndióxi. Mé tiempo cán nahá ndaja cáhnu cúu yehe. Anda já chahvi i nuú in in ñayivi saha ñaha nacaja na nani nasanduu na ñuyíví yóho. <sup>28</sup> Mé a ndaa ná cahan i xihin ndo ña java na ndúu yóho a quíví toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.



## 17

*Tá nandijama nuu Jesús quiahva cáa*  
(Mr. 9:2-13; Lc. 9:28-36)

<sup>1</sup> Tá nayaha iñu quivi já nandaa Jesús in yucú jícó ta ndáca táhan Pedro xihín Jacobo xihín ñani da Juan cuahan na xihín á. <sup>2</sup> Ta nu táhyí mé na cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachi ña ta chí a juú quiahva yéhe ña. <sup>3</sup> Ta ndaja coo nandaca náha Moisés xihín Elías ta nacasáhá ndítuhún da xihín Jesús. <sup>4</sup> Anda já nandicahan Pedro xihín Jesús já nacachi da já xihín á:

—Vaha cúu ndúu nde yóho, xitoho nde. Tá cúní ndó cavaaha nde uní vehe tiyahvá válí. In a coo mé ndó ta inga coo Moisés ta inga coo Elías —cáchi Pedro.

<sup>5</sup> Ta nani cáhan Pedro nanuu in vico jata ná ta nacava nuu a na. Ta a juú quiahva ndató yéhe a. Ta tañu vico cán naxini johó na ña cáhan in a ta já cáchi a já:

—Da yóho cúu jahyi maní i ta cájii ini i xihín dá. Cuni johó ndó nu cáhan da —nacachi mé a cán.

<sup>6</sup> Tá naxini johó na xíca tuun xihín Jesús cán ña cáhan yóho já nacaxítí na janda quiahva naxinu nuu ná nu ñúhu. Ta a juú quiahva ná yihví na. <sup>7</sup> Anda já nacayati Jesús nu ná ta nacani ndaa ndáha na já nacachi a já xihín ná:

—Cuándacoo ndó. A cáyihví toho ndó —nacachi Jesús xihín ná.

<sup>8</sup> Tá tá nandiñehe na cán nuu ná já naxini na ña íin in túhún jiní mé va Jesús.

<sup>9</sup> Tá tá nanuu na jiní yucu cán já nasahnda Jesús chuun nu ná já nacachi a já xihín ná:

—A cáxi tuhun ndó ña naxini ndó yóho nuú ni in ñayivi janda quiahva ná ndítacu tucu yehe, da nachindahá Ndióxi nduu ñayivi —nacachi Jesús.

<sup>10</sup> Já nacachi na cán já xihín á:

—Ndávaha cáchi na jánahá ley Moisés ña ndítahan quixi jihna ñúhú profeta Elías —nacachi na.

<sup>11</sup> Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. <sup>12</sup> Joo mé a ndaa ná cahan i xihín ndo ña sa naquixi

va Elías joo coo naxeen na ndicuni na da. Ta nacaja na tá quiahva cúní mé ná xihín dá. Ta quiahva já jándoho ri na ini yehe, da nachindahá Ndióxi nduu ñayivi —nacachi Jesús.

<sup>13</sup> Anda jáví nacandaa ini na xíca tuun xihín Jesús cán ña cáhan Jesús saha Juan, da najácandúta ñayivi tá nacachi a ña sa naquixi va Elías.

*Tá nandaja vaha Jesús in da loho ndácaan*  
*ínima quini ini*

(Mr. 9:14-29; Lc. 9:37-43)

<sup>14</sup> Tá tá sa nanuu na ta naxinu coo na nu ndúu cuahá ñayivi cán já naxinu coo in dātaa ta já nacaxítí da nu Jesús. Já nacachi da já xihín á:

<sup>15</sup> —Candáhví loho ini ndó jahyi i, xitoho i jáchi xihí yihí da ta ndóho ndivaha ini da. Ta cuahá tañu ndícava da nu ñúhu ita á ini ticuú. <sup>16</sup> Tá ñéhe e da nacasaá i nuú na xíca tuun xihín ndó yóho joo coo nacuu ndaja vaha na da —nacachi da xihín Jesús.

<sup>17</sup> Anda já nacachi Jesús já:

—Ndáhví nahá nacuu ndó jáchi sa cuahá ndivaha quivi íin i xihín ndo ta a ñaha candeé ini ndó yehe. Cúu ndó ñayivi quini ndivaha chí co ndeé ga ini i xihín ña cája ndó. Taxi ndó ta loho jan chóho —nacachi Jesús.

<sup>18</sup> Anda já najánani Jesús rí quini ndácaan ini da loho cán. Chí naqueta rí cuahan ri ta mé hora já nandivaha da loho cán.

<sup>19</sup> Tá nandihí já nacahan jehé na xíca tuun xihín Jesús cán xihín á já nacachi na já:

—Ndávaha coo nacuu caja nde tavá nde ínima quini nasandacaan ini da loho jan —nacachi na xihín Jesús.

<sup>20</sup> Já nacachi Jesús já xihín ná:

—Coó nacuu caja ndó jáchi co candeé cáhnu ini ndó yehe. Mé a ndaa cáchi i xihín ndó, loho tíin ndivaha cáa in ndíqui mostaza joo ndúu dó in yíto cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó xihín in yucu ña ná caxoo a ta chí caxoo ndusa ña. Tóco ndihí ñaha cuu caja ndó tá ná candeé ini ndó yehe. <sup>21</sup> Joo

tá cún̄i ndó tavá ndó ínima quini tátuhun rí yóho xín̄i ñúhú cajuhun ndó ta cacā tahvi ndó nu Ndióxi —cáchi Jesús xih̄in ná.

*Tá cáxi tuhun tucu Jesús ña quivi a (Mr. 9:30-32; Lc. 9:43-45)*

<sup>22</sup> Ta ndaja coo xíca tútú ndihi na xíca tuun xih̄in Jesús cán cuahan na xih̄in á chí estado Galilea. Ta já nandicaní Jesús nuú na cán ña tandaa quivi ndiquiahva ñayivi mé á ndáha na cahni ñahá, mé a nachindahá Ndióxi nduu ñayivi. <sup>23</sup> Ta nacachi a xih̄in ná ña tá sa ná yaha un̄i quivi já nditacu tucu a. Tá nacachi Jesús ña yóho xih̄in na xíca tuun xih̄in á cán já nacacuéha ndivaha ini na.

*Tá nacahvi Jesús jjuhún impuesto cuénta veñuhu cáhnu ñuu Jerusalén*

<sup>24</sup> Tá naxinu coo Jesús ñuu Capernaum xih̄in na xíca tuun xih̄in á já naxinu coo na jataca jjuhún impuesto cuénta veñuhu nu Pedro. Já nacachi na já xih̄in dá:

—Á co cháhvi toho Jesús, da jánaha ndohó jan jjuhún impuesto cuénta veñuhu ñuu Jerusalén —nacachi na xih̄in Pedro.

<sup>25</sup> Anda já nacachi Pedro já:

—Cháhvi a ña —nacachi da.

Anda já nandihvi Pedro ini vehe nu ndácaan Jesús joo jihna ñúhú nandicañan Jesús xih̄in dá já nacachi a já:

—Ndía cáhvi inún, Simón. Yo já ndítahan nuú chahvi jjuhún cuénta impuesto nuú na sáhdá chuun ñuyiví yóho. Á na ñuu mé ná á na ñuu tóho —nacachi Jesús.

<sup>26</sup> Já nacachi Pedro já:

—Na tóho va sá cháhvi jjuhún cája na —nacachi Pedro.

Já nacachi tucu Jesús já:

—Sahá ña cán quéa mé na ñuu co cháhvi toho na. <sup>27</sup> Joo mí co cún̄i yo ña ná ndicuita na xohó sahá ña cán quéa cuhún tañuhú. Ta mé cán tavún tiyacá. Ta rí nu cuítí ná tavún jan candehún yúhu rí jáchi jan nditáhún in jjuhún caa. Ta cañehe a cuhun chahvún saha mún ta saha mí i jáchi queta va —nacachi Jesús xih̄in Pedro.

## 18

*Ndicani Jesús ndá na cúu na ñin chága saha (Mr. 9:33-37; Lc. 9:46-48)*

<sup>1</sup> Mé tañu já nacayati na xíca tuun xih̄in Jesús nu á já nacasáhá ndáca tuhún ñahá na já nacachi na já xih̄in á:

—Yo já cacuu da cáhnu chága tá ná tandaa quivi cacomí Ndióxi cuénta saha ñayivi —nacachi na xih̄in Jesús.

<sup>2</sup> Anda já nacana Jesús in da loho já nasacandichi a da mahñú java na cán. <sup>3</sup> Já nacachi a já:

—Mé a ndaa ná cañan i xih̄in ndo ña ndítahan ndaja núu ndó mé ndó ta nduu ndó tátuhun na valí já cuu cacomí Ndióxi cuénta saha ndo. <sup>4</sup> Na cún̄i cacuu na cáhnu chága tá cacomí Ndióxi cuénta saha ñayivi ndítahan nduu na tátuhun in na coó saha ta já nduu na tátuhun ta loho yóho. <sup>5</sup> Ta ndá na ná ndiquehe in aloho tátuhun da yóho saha ña cún̄i na yehe, na cán cúu na ndiquehe ri na yehe viti.

*Tá jándacava ñayivi inga na nuú cuachi (Mr. 9:42-48; Lc. 17:1-2)*

<sup>6</sup> Ta ndá na ná jándacava in na ndahvi, na cándeé ini yehe nuú cuachi janda vaha chága ná candico in yuú yojó jico ná ta ná ndihi saha na cahá tañuhú. <sup>7</sup> Ndáhvi nahá nacuu ñayivi ñuyiví yóho jáchi mé a ndaa ñin cuahá ndivaha ña núu ñuyiví yóho. Ña cán quéa ndácava cuahá ñayivi nuú cuachi joo ndáhvi nahá nacuu na jándacava inga na nuú cuachi.

<sup>8</sup> Sahá ña cán quéa tá ndáha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhun a. Jáchi vaha chága ná cuhun réncó ndó á lundu ndó indiví a juú ga ña ná cuhun ní yiquí cuñu ndó indayá nu cáyi ñúhu ita anda ama cáa quivi. <sup>9</sup> Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchi vaha chága ná cuhun ndó indiví xih̄in in tuhún nduchú núu ndo a juú ga ña ná cuhun ndó xih̄in ndívi nduchú núu ndo indayá nu cáyi ñúhu ita.

*Tá sácú Jesús quiahva saha in ndicachi, ri nandiñuhú*

*(Lc. 15:3-7)*

<sup>10</sup> Coto a quéhe núu ndó ni in na cúu cuénta mí i jáchi cáchi i xih̄in ndó ña táto Ndióxi, mé na ndáa na cán ní tiempo ndíta na nu Ndióxi, tátá i indiví. <sup>11</sup> Jáchi yehe, da

nachindahá Ndióxi nduu ñayivi naquixi i jaca u ñayivi, na cajú cuachi.

<sup>12</sup> 'Cuni johó ndó ná cahan i xihin ndo: Tá cómi in dataa in ciento ndicachi ta tá ndiñuhú in rí já queá ña cajú da queá jándacoo da comi jico sahun comi rí cán yucu ta já quee da cuhun da ndinducú da mé rí nandiñuhú cán. <sup>13</sup> Ta tá ndiñehe dá rí cajii chága ini da saha rí nandiñuhú cán a juú ga sahá comi jico sahun comi rí sa ndúu nu dá cán. <sup>14</sup> Ta quiahva já ndoho ri Ndióxi, tátá i jáchi co cuni mé á ña ná ndihi sahá ni in na cándéé ini mé á.

*Ndítahan caja cáhnu ini sahá ñani táhan i (Lc. 17:3)*

<sup>15</sup> 'Tá cajú quini ñani táhan ndó xihin ndo já queá tavá xoo ndó da ta cahan ndó xihin dá ña ná ndicuni da ña a váha toho cajú da. Ta tá ná tahvi ini da sahá cuachi cajú da já queá sa nandiquehe táhan maní tucu ndó xihin dá. <sup>16</sup> Joo tá co cuni da cuni johó da nu cahan ndo já queá ndítahan nu ndó cana ndó in á ivi chága ñani táhan ndó já ná cacuu na testigo sahá ña cahan ndo. <sup>17</sup> Ta tá co cuni da cuni johó da nu cahan na cán xihin dá já queá ndítahan cuhun ndó nu tóco ndihi na cúu cuéntá Jesús táca veñuhu. Ta tá co cuni da cuni johó da nu cahan ndihi na cán xihin dá já queá ndítahan caja ndó xihin dá tá quiahva cajú ndó xihin in da tóho, da co cándúsa Ndióxi á in da játaca jjuhún cuéntá impuesto.

<sup>18</sup> 'Mé a ndaa ná cahan i xihin ndo ña tóco ndihi ñaha ná cató ndo ñuyívi yóho candico a janda indivi. Ta tóco ndihi ña ná ndaxi ndo ñuyívi yóho janda indivi ndaxi ña.

<sup>19</sup> 'Ta jári cahan i ña yóho xihin ndó. Tá jándique táhan tuhun ivi ndó ñuyívi yóho ta tá mé a ndaa in cúu ndó sahá ña xica tahvi ndó nu Ndióxi, mé á in indivi já queá quiahva tátá i ña nu ndo. <sup>20</sup> Jáchi nu ndúu ivi á uní na ta táca na cuéntá mí i já queá tañu na cán ndacaan i —nacachi Jesús.

*Tá sácú Jesús quiahva sahá in da co cuni caja cáhnu ini da sahá inga da*

<sup>21</sup> Ta ndaja coo nacayati Pedro ndaca tuhún da Jesús já nacachi da já:

—Xitoho i, ndaja tañu xini ñuhú caja cáhnu ini i sahá ñani táhan i tá cajú núu da

xihin i. Á ndítahan nuú i caja cáhnu ini i saha dá janda usa tañu —nacachi da xihin Jesús.

<sup>22</sup> Já nacachi Jesús já xihin dá:

—A juú janda usa tañu cuití ndítahan caja cáhnu inún sahá ñani táhún. Vaha janda comi ciento comi jico uxu tañu ndítahan nuun caja cáhnu inún sahá ñani táhún.

<sup>23</sup> 'Cáchi i ña yóho xihin ndó jáchi tá cómi Ndióxi cuéntá sahá ñayivi cúu á tátuhun ña nayaha xihin in rey tá nacasáha da játaca da cuéntá nuú na yíca nu dá. <sup>24</sup> Mé tañu já ñehe na in da yíca cuahá millón nu dá nacasaá na. <sup>25</sup> Ta sahá ña coo nacuu chahvi da ña yíca da sahá ña cán queá nasahnda rey chuun ña ná jico na mé dá xihin ñajhí da xihin jahyi válí da ta janda ñaha da viti ña ná cuu ndiquehe rey cán cuéntá da. <sup>26</sup> Anda já nacaxítí da yíca cán nu mé rey já nacasáha xica tahvi da já cáchi da já: “Caja ndó ñamaní, xitoho i candati tóo chága ndó yehe, ndáhvi i, já chahvi ndihi i ña yíca i nu ndo”, nacachi da xica tahvi da nu rey cán. <sup>27</sup> Anda já nacandáhvi ini rey cán da ta nacaja cáhnu ini a saha tóco ndihi ña yíca da já najaní a da cuahan da.

<sup>28</sup> 'Ta tá naqueta da yíca cán cuahan da já nandique táhan da xihin inga da cúu mozo. Ta mé mozo cán yíca da loho va nuú da cán. Ta já nacasáha da ndaca yihí da cuéntá nuú da cúu mozo jácuahnú ñaha da. Já cáchi da já: “Chahvún ña yícun nuú i”, cáchi da cán. <sup>29</sup> Anda já nandacava xítí mé da cúu mozo cán nu dá já nacasáha xica tahvi da nu dá já cáchi da já xihin dá: “Cajún ñamaní candati tóo chágun yehe, ndáhvi i, já chahvi ndihi i ña yíca i nuun”, nacachi da cúu mozo cán.

<sup>30</sup> Joo coo naxeen da ta ña nacaja da queá nasahan da nachicaan da da cúu mozo cán vecaa janda quiahva ná cuu chahvi ndihi da ña yíca da nu dá. <sup>31</sup> Ta tá naxini java ga na cúu mozo cán ña yóho já nandihivi ndivaha ini na ta chí ndáva na nasahan na nacaxi tuhun na nu mé rey cán ndaja cáa ña nacuu. <sup>32</sup> Anda já xójo ndivaha ini mé rey cán chí nacana da da nasayíca cán já nacachi da já xihin dá: “Mozo quini ndivaha cúu yóho. Cuahá ndivaha jjuhún nasayícun nuú i joo nacaja cáhnu ini i saha tóco ndihi a jáchi naxica tahvún nuú i.

<sup>33</sup> Quiahva já ndítahan ri nu yóhó va caja cáhnu inún sahá ña yíca ñani táhún nuun jáchi já nacaja i xuhun”, nacachi rey cán.

<sup>34</sup> Ta sahá ña xójo ndivaha ini mé rey cán xihín dá sahá ña cán quea nandiquiahva da da yíca cán ndáha na jácaxáhan ñahá cán janda quiahva ná chahvi da saha tóco ndihi ña yíca da —cáchi Jesús.

<sup>35</sup> Já nacachi tucu Jesús já:

—Quiahva já caja ri Ndióxi, tátá i, mé a ín indivi xihín ndóhó va tá co cája cáhnu ini ndó sahá ñani táhan ndó xihín ndinuhu ini ndó —cáchi Jesús.

## 19

*Jánaha Jesús nuú na sa natandaha ña co ndítahan jándacoo táhan na (Mr. 10:1-12; Lc. 16:18)*

<sup>1</sup> Tá nandihí nacachi Jesús ña yóho já naquee a estado Galilea já naxinu coo a estado Judea, ña ín inga xoo yuta Jordán cán.

<sup>2</sup> Ta a juú quiahva cuahá ñayivi nandico jatá ta nandaja vaha mé á na quihvi.

<sup>3</sup> Joo ndaja coo java na fariseo nacayati na nu Jesús sahá ña coto ndojó ñahá na cuni na. Já nacachi na já xihín á:

—Á núná nuú in dataa jándacoo da ñájihí da saha ndá ña nacuu —nacachi na fariseo cán.

<sup>4</sup> Anda já nacachi Jesús já:

—Á a ñaha cahvi ndó tuhun Ndióxi nu cáchi a ña janda mé saha tá nacavaha Ndióxi ñayivi nu cuítí já nacavaha dataa ta nacavaha ñañaha. <sup>5</sup> Ta nacachi tucu a ña ndítahan nuú dataa jándacoo da tátá da xihín náná da já ndique táhan da xihín ñájihí da. Já xinu ndiví na cán cacuu na tátuhun in víxí yiquí cuñu na. <sup>6</sup> Sahá ña cán quea co cúu ga na ivi yiquí cuñu saha ña nanduu na tátuhun in túhún yiquí cuñu na. Sahá ña cán quea co ndítahan nuú da cán janí táhan da ña najácatáhan Ndióxi tá natandaha ná —nacachi Jesús.

<sup>7</sup> Anda já nandaca tuhún tucu na cán Jesús já nacachi na já:

—Joo já cachi ndó xihín nde: ndá cuénta quea nasahnda ri Moisés chuun ña cuu cavaha in dataa in tutu quiahva da nu ñájihí da ta xihín ña cán cuu jándacoo da ña —nacachi na cán xihín Jesús.

<sup>8</sup> Já nacachi Jesús já:

—Sahá ña táhyí ndivaha ínima ndo sahá ña cán quea sahan Moisés ñamani nu ndó ña cuu cavaha ndó tutu quiahva ndó nu ñájihí ndo ña ná jándacoo ndó ña. Joo tá nacavaha Ndióxi ñayivi nu cuítí coo nacacuni toho a coo ña yóho. <sup>9</sup> Cuni johó ndó ná cahan i xihín ndo. Tá ná jándacoo in dataa ñájihí da ta co cúu á sahá ña nacaja ña cuachi xihín inga ta ta tá tandaha dá xihín inga ña já quea cája da cuachi nu Ndióxi. Ta quiahva já ín ri cuachi da ná tandaha xihín ña nacandoo cán —cáchi Jesús.

<sup>10</sup> Tá naxini johó na xíca tuun xihín Jesús cán ña yóho já nacachi na já:

—Tá ta quiahva já cája janda vaha chága ná a tandaha ñayivi, dá já —nacachi na cán.

<sup>11</sup> Já nacachi Jesús já:

—A juú ndihí ñayivi candaa ini ña cahan i yóho. Ndinuhu na ndinuna xini túni cája Ndióxi, na cán cúu na candaa ini ña yóho.

<sup>12</sup> Ndúu java dataa ta a cuú tandaha da jáchi já nacacu da ta já ta cúu mé va da. Ta java da a cuú tandaha da jáchi já nacaja ñayivi xihín ná ta já ta cúu mé va na. Ta java da a tandaha da jáchi cúni da ndiquiahva ní da mé dá nu Ndióxi ña ná cacomí a cuénta saha dá. Ta ndá ndó, na ndinuna xini túni, candaa ini ndó ña yóho —nacachi Jesús.

*Cája yii Jesús na valí*

*(Mr. 10:13-16; Lc. 18:15-17)*

<sup>13</sup> Tá nandihí já ñéhe na java na valí nacasaa na nu Jesús ña ná chinúu a ndahá a jini ná ta já caca tahví a nu Ndióxi saha ná. Joo ndaja coo na xíca tuun xihín á cán nacasahá na cája cuehe na xihín na ndaca na valí cán. <sup>14</sup> Já nacachi Jesús xihín na xíca tuun xihín á cán já:

—Quiahva ndó ñamani ná quixi na valí nuú i ta a cáji nuu ndó nu ná jáchi cacomí Ndióxi cuénta sahá ñayivi tá ná caja na tá quiahva cája na valí yóho —nacachi Jesús.

<sup>15</sup> Tá nandihí já nachinúu Jesús ndáha a jini na valí cán. Anda já naquee a cuahan.

*Ndítuhún in da cuicá xihín Jesús*

*(Mr. 10:17-31; Lc. 18:18-30)*

<sup>16</sup> Ta ndaja coo naxinu in dataa nu ín Jesús ta nandaca tuhún ñahá da já nacachi da já:

—Maestro, mé ndó cúú ndó taa vaha ña cán quéa ndáca tuhún i ndohó ndía ndítahan caja i já ná ñehe táhvi i cuhun i indiví coo i anda ama cáa quivi —ñacachi da xihín Jesús.

<sup>17</sup> Já ñacachi Jesús já xihín dá:

—Ndá cuénta quéa cáchún xihín i ña cúú u da vaha. Ni in tuhún toho ñayivi coo cúú ná na vaha ñuyiví yóho. In tuhún Ndióxi cuití va quéa vaha. Tá cúnun catacún nu in mé á já quéa xíní ñuhú cajún ña sáhdá tuhun Ndióxi —ñacachi Jesús xihín dá.

<sup>18</sup> Já ñacachi da cán já:

—Ndá cúú mé ña ndítahan caja i —ñacachi da.

Já ñacachi Jesús já xihín dá:

—Coto a cáhnún ndji. Coto a cóun xihín ñájíhí á yí ñani táhún. Coto a cája cuíhnún. Coto a cáhun ña tuhún sahá ñayivi.

<sup>19</sup> Ndítahan caja cáhnún tátún xihín nánún. Ta ndítahan quihvi inún ñani táhún tá quiahva quihvi inún mún —ñacachi Jesús.

<sup>20</sup> Já ñacachi da yúta cán já xihín á:

—Janda taa loho nasacuu u ñacasahá i cája i tóco ndihi ña sáhdá Ndióxi caja i. Ndía cúú ga ndítahan caja i —ñacachi da.

<sup>21</sup> Já ñacachi Jesús já xihín dá:

—Tá ta cúnun cacuún in taa ndacú nu Ndióxi cuáhán jicún tóco ndihi ñahún jan ta ndacahndún jiuún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —ñacachi Jesús.

<sup>22</sup> Tá ñaxini johó da yúta cán ña yóho já ñaquee cuéha ndivaha da cuahan da jáchi da cuicá ndivaha cúú dá.

<sup>23</sup> Anda já ñacachi Jesús xihín na xíca tuun xihín á cán já:

—Mé a ndaa ná cachi i xihín ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuénta saha ná. <sup>24</sup> Jáchi janda cama chága cuu yaha in camello ini in yávi sahá yitucú a juú ga ña ná ndiquiahva in da cuicá mé dá ndáha Ndióxi ña ná cacomí a cuénta saha dá —ñacachi a.

<sup>25</sup> Tá ñaxini johó na xíca tuun xihín Jesús cán ña yóho já ñacatontó ndivaha na ta nandaca tuhún táhan na já cáchí na já:

—Ndá na cúú na cuu cacu ndaa ínima, dá já —cáchí na.

<sup>26</sup> Nandicoto nihni Jesús nu ná já ñacachi a já xihín ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha coo íhvi toho nu Ndióxi —ñacachi Jesús.

<sup>27</sup> Anda já ñacachi Pedro já:

—Joo ndehe, najándacoo ndihi nde ñaha ñasacomí nde ta ndíco nde ndohó. Ndía ñehe táhvi nde caja ndó —ñacachi Pedro xihín Jesús.

<sup>28</sup> Anda já ñacachi Jesús já xihín dá:

—Mé a ndaa ná cachi i xihín ndo. Tá ná tandaa quivi nduu saá tóco ndihi ñaha já cacoo yehe, da ñachindahá Ndióxi nduu ñayivi nuú ndicáhnú ndivaha i. Ta cán cacoo ri ndohó, na ñaxíca tuun xihín i nuú uxu ivi táyi vaha. Ta cán caja víí ndó sahá ndíhuxu ivi táhdá na ñaquixi chichi Israel.

<sup>29</sup> Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúú na ñehe ná cuahá chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi. <sup>30</sup> Ta ndúu cuahá na in saha ñuyiví yóho viti joo vaxi quivi cacuu na na coo saha nu Ndióxi. Ta ndúu cuahá na coo saha ñuyiví yóho viti joo vaxi quivi cacuu na na in saha nu Ndióxi —ñacachi Jesús.

## 20

*Sácú Jesús quiahva sahá java da sáhdá uva*

<sup>1</sup> Já ñacachi Jesús já sácú a quiahva:

—Nuú cacomí Ndióxi cuénta sahá ñayivi cúú á tátuhun ña yóho: Ín in dataa naha chá ñaquee da cuahan da nducú da mozo caja chúun da cahnda da uva nu ñuhú dá.

<sup>2</sup> Ta ñacandoo da chahvi da in jiuún caa naní denario in quivi. Ta já ñachindahá da mé mozo cán cuahan da caja chúun da nu ñuhú dá. <sup>3</sup> Tá nandihí já ñaquee tucu da xihín ñaha ñuhú cán tátuhun caa in naha já nanditahan da java da ndúu núná uun nuú yahvi. <sup>4</sup> Já ñacachi mé da xihín ñaha ñuhú cán já: “Cuáhán ri ndohó va cahnda ndó uva nu ñuhú i ta já chahvi i ndohó tá quiahva ndítahan nu ndó quehe ndó”, ñacachi da. Já ñaquee mozo cán cuahan da jáquee da nu ñuhú dá. <sup>5</sup> Ta tá ñacuu caxivi já ñaqueta tucu da xihín ñaha ñuhú

cán cuahān da ta natiin da java ga da caja chūun xihīn dá. Ta tá nācuu caa unī natiin chāga da da jáquee nu ñúhu dá. <sup>6</sup> Ta tá nācuu tátuhun caa uhun sahini naqueta tucu da ta nuú yahvi cán naxini chāga da da ndúu núná uun. Já nācachi da já xihīn da ndúu cán: “Ndá cuéntá quēa sa nācuu ndiví yaa ndúu ndó yóho”, nācachi da xihīn da ndúu cán. <sup>7</sup> Ta nanducú ñehe da cán tuhun já cáhí da já: “Cō cāja chūun nde jáchī cōo nā quíxi ndúcú nde caja chūun nde”, nācachi da cán. Anda já nācachi da xihīn ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já chahvi i ndohó tá quiahva ndítahan nu ndó quehe ndó”, nācachi da.

<sup>8</sup> Ta tá sa nācuaá já nācachi da xihīn ñaha ñúhu cán xihīn da cómí chuun nu mozo cán ña ná cana da da cúu mozo cán já ná quehe yahvi da sahá chuun nācāja da. Ta da nāquihvi nācāja chūun nu ndíhí cán, da cán cúu da jihna ñúhú ná quehe yahvi. Tá nandihí cán ná quehe yahvi da nāquihvi nu cuití. <sup>9</sup> Anda já nācasaa da nāquihvi caja chūun caa uhun sahini já nāquehe in in da cán in denario. <sup>10</sup> Ta ndaja coo tá nācani a nuú da nāquihvi caja chūun janda naha cán quehe yahvi da já quēa nācāhán da ña cuahā chāga jjuhún ndiquehe da nuú da nāquihvi caa uhun sahini cán. Joo quiahva já in denario nāquehe ri in in da cán. <sup>11</sup> Sahá ña cán quēa nācasáhá da cáhan cuachí da xihīn da xihīn ñaha ñúhu cán. <sup>12</sup> Já nācachi da já: “Da nandai cuu caja chūun nu ndíhí cuí yóho in hora cuití nācāja chūun da. Ta tá quiahva nāchahvi ndó ndehe, da nācāja chūun ndiví yaa nu ndítahyí quiahva já nāchahvi ri ndó nuú da cāa va”, nācachi da cáhan cuachí da cán. <sup>13</sup> Anda já nācachi da xihīn ñaha ñúhu cán xihīn in táhan mozo cán já: “Candehé, amigo. Cō cāja quini toho i xuhun. Á a juú in denario nācandoo i chahvi i nuun. <sup>14</sup> Juhun ña ndítahan quehún ta cuanúhun. Jáchī cúnī chahvi i nuú da nācāja chūun in hora cuití va tá quiahva nācandoo i chahvi i nu yóhó. <sup>15</sup> Jáchī núná nuú i caja i ña cúnī mí i xihīn jjuhún i. Ta cō ndítahan cahihvi inún sahá ña vaha ini i”, nācachi da xihīn ñaha ñúhu cán xihīn da cáhan cuachí cán —

nācachi Jesús sácú a quiahva.

<sup>16</sup> Ta nācachi tucu a já:

—Sahá ña cán quēa ndúu cuahá na ín saha ñuyiví yóho viti joo vaxi quivi cacuu na nā cōo saha nu Ndióxi. Ta ndúu cuahá na cōo saha ñuyiví yóho viti joo vaxi quivi cacuu na na ín saha nu Ndióxi —nācachi a.

*Cáxi tuhun tucu Jesús ña quivi a*

(Mr. 10:32-34; Lc. 18:31-34)

<sup>17</sup> Ta tá sa nāquee tucu Jesús cuahān chí Jerusalén já íchī cán nātavá xóo a ndíhuxu ivi nā xíca tuun xihīn á cán já nācachi a já xihīn ná:

<sup>18</sup> —Candehé ndo. Yóho ndáa í cuahān yó chí Jerusalén nuú ndiquiahva na yehe, da nāchindahá Ndióxi nduu ñayivi ndahá na sacuahā nuú jutū xihīn nuú na jánaha ley Moisés. Ta na cán cúu nā cacu ini sahá ndaja quivi i. <sup>19</sup> Anda já ndiquiahva na yehe ndahá na tóho ña ná cuacu ndaa na yehe. Ta caní na yehe ta já cata caa na yehe ndica crúxu joo tá ná yaha unī quivi já nditacu tucu u —nācachi Jesús.

*Tá naxíca náná Jacobo xihīn Juan ñamanī nuú Jesús*

(Mr. 10:35-45)

<sup>20</sup> Anda já nācayati ñájihí Zebedeo, ña cúu náná Jacobo xihīn Juan nuú Jesús. Ta ndáca ña ndiví jahyi ña nācasaa ña nācaxítí ña nu á jáchī cúnī ña caca ña in ñamanī nuú Jesús. <sup>21</sup> Anda já nācachi Jesús já xihīn ña:

—Ndá quēa cúnī ndó —nācachi a.

Já nācachi ña cán já:

—Ña cúnī quēa ná caja ndó ñamanī cahnda ndó chuun ña ná cacoo in in jahyi i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —nācachi ña cán.

<sup>22</sup> Anda já nācachi Jesús já xihīn ña:

—Cō cándaā ini ndó ña xíca ndó nuú i —nācachi a.

Anda já nācachi a já xihīn Jacobo xihīn Juan cán:

—Á cuu ndoho ini ndó tá quiahva ndítahan nuú i ndoho ini i. Jáchī ña vaxi nuú i ndoho ini i cúu á tátuhun coho i in yáxi ndutá ova. Á ín tiāhva ndó ndoho ini ndó tá quiahva ndítahan nuú i ndoho ini i anda quiahva ná quivi i —nācachi Jesús xihīn ndiví da cán.

—Cuu caja nde ña —ñacachi ndívi da cán xihín Jesús.

<sup>23</sup> Anda já ñacachi tucu a já xihín dá:

—Mé a ndaa tandaa quívi coho ndó ña ova ñúhu in yáxi, mé ña coho i. Ta tandaa quívi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xíca ndó cacoo in ndó xoo cuáha i ta in ndó xoo iti i a juú yehe cúu dá cuu quiahva i ña nu ndo. Jáchi sa ñandicaxi Ndióxi na ñehe táhvi cacoo cán —ñacachi a.

<sup>24</sup> Joo ndaja coo tá ñaxini johó ndíhuxu chága na xíca tuun xihín Jesús cán ña yóho já ñacasáhá na xójo ini na xihín ndívi da cúu ñani cán. <sup>25</sup> Anda já ñacana Jesús tóco ndihi na xíca tuun xihín a cán já ñacachi a já xihín ná:

—Sa xíni ndó ndaja cája na sáhdá chuun nuú ñayivi ndúu ñuyívi yóho. Ña cája na queá jácandíhi na ñayivi ta cája na tá quiahva cúni mé ná. <sup>26</sup> Joo co ndítahan coo ña cán tañu mé ndó jáchi ndá da cúni cacuu da cáhnu chága tañu ndó xíni ñúhú cacuu da in da cája chúun cuéntá ndihi ndó. <sup>27</sup> Ta ndá da cúni cacuu da nu cuítí tañu ndóhó ndítahan cacuu da da cája ndívi nuú ndihi ndó. <sup>28</sup> Jáchi ni yehe, da ñachindahá Ndióxi nduu ñayivi coo ñaquixi i ñuyívi yóho ña ná caja ndívi ñayivi nuú i. Ña ñaquixi i caja i queá caja ndívi i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cùhun na indayá —ñacachi a.

*Tá nandaja vaha Jesús ivi da cuaá  
(Mr. 10:46-52; Lc. 18:35-43)*

<sup>29</sup> Ta tá ñaqueta Jesús ñuu Jericó xihín na xíca tuun xihín á cán já ndíco cuahá ndivaha ñayivi jatá cásahan na. <sup>30</sup> Ta ndaja coo yati jíin íchi cán ñasanduu coo ivi da cuaá ta tá ñaxini johó da ña yáha Jesús cuahan já ñacasáhá ndívi da cáyuhú da já cáchi da já:

—Jesús, da ñaquixi chíchi David, caja ndó ñamaní candáhví loho ini ndó ndehe —cáchi da.

<sup>31</sup> Anda já ñacasáhá cája cuehe ñayivi xihín ndívi da cuaá cán ña ná catáji yúhu dá. Joo ví ga ví cáyuhú da já cáchi da já:

—Jesús, da ñaquixi chíchi David, caja ndó ñamaní candáhví loho ini ndó ndehe —ñacachi da.

<sup>32</sup> Anda já nandaca ndichi Jesús já ñacana ndívi da cuaá cán. Ta já nandaca tuhún a da já ñacachi a já xihín dá:

—Ndía cúni ndó ña ná caja i xihín ndo —ñacachi a.

<sup>33</sup> Já ñacachi ndívi da cuaá cán já:

—Candehé nde cúni nde, xitoho.

<sup>34</sup> Anda já ñacandáhví ini Jesús da ta ñacani ndaa ndáha á nuu dá. Chí ivi laá ñanuna nuú da cuaá cán ta ñacasáhá da ndíco da jatá Jesús cuahan da.

## 21

*Ndíhvi Jesús ñuu Jerusalén*

*(Mr. 11:1-11; Lc. 19:28-40; Jn. 12:12-19)*

<sup>1</sup> Ta tá sa ja chá xinu coo na ñuu Jerusalén já ñaxinu na in ñuu loho naní Betfagé yati jíin yúcu naní olivo. Ta cán ñasahnda Jesús chuun nuú ivi táhan da xíca tuun xihín á cán. <sup>2</sup> Já ñacachi a já xihín dá:

—Cuáhán ndó ñuu loho jan ta tá ná xinu coo ndó jan ndiñehe ndo in búrró jíhí ndíco ndaa rí ta xihín mé rí jan cándichi inga búrró loho. Ndaxí ndó rí ta cañehe ndó ndívi rí quixi ndó. <sup>3</sup> Ta ndá na ná cuahan xihín ndo já queá cachi ndó xihín ná ña xíni ñúhú xitoho ndó rí joo tá ná ndihi chuun rí já nducú ñehe tucu da rí, já cachi ndó xihín ná —ñacachi Jesús xihín ndívi da cán.

<sup>4</sup> Tóco ndihi ña yóho ñayaha já ná xinu coo nuú ña ñacahyí in da profeta já:

<sup>5</sup> Joho cachi ndó xihín na ñuu Jerusalén:  
“Candehé ndo. Ndáhví uun cáa da cómi cuéntá saha ndó.

Vaxi da nu ndo ta canúu da jatá búrró jíhí, jahyi in rí ndiójo, canúu da vaxi da nu ndo”, cáchi tuhun Ndióxi.

<sup>6</sup> Ta ndívi da xíca tuun xihín Jesús cán ñasahan da ñacaja da tá ín ñasahnda Jesús chuun nu dá. <sup>7</sup> Já ñehe da búrró jíhí cán xihín búrró loho, jahyi rí ñaxinu na nuú Jesús. Anda já nachojó na cotó ndéé na jatá rí ta nandaa Jesús jatá rí. <sup>8</sup> Ta mé cuahá ñayivi ndúu cán ñacasáhá na chinduu na cotó ndéé na íchi mé nuú yaha Jesús cán. Ta java na ñacasáhá na sáhdá na ndahá yíto ta chinduu na do íchi mé nuú yaha Jesús cuhun a. <sup>9</sup> Ta ñayivi cuahan chí nuu ta jári na vaxi chí jatá ñacasáhá na cáyuhú na já cáchi na já:

—Cája cáhnu í da ñaquixi chichi David yóho. Ndicáhnu nahá ná cacuu da cómi cuéntá saha yo jáchi cúú dá da vaxi yuhú nuu Ndióxi. Cáhnu ná cacuu Ndióxi —cáchi ñayivi cuaha cán cáyuhú ña cásahan ña xihin á.

<sup>10</sup> Ta tá ñandihvi Jesús ñuu Jerusalén cán tóco ndihi ñayivi ñacasáhá catóntó ndivaha na. Já cáchi xihin táhan na já:

—Ndá da cúú da yóho —cáchi xihin táhan na.

<sup>11</sup> Java táhan ña cán cáchi ña:

—Da yóho cúú in profeta, da ñuu Nazaret cuéntá estado Galilea —cáchi xihin táhan na.

*Tá ñataxi Jesús ña ndúu jícó ñaha yéhe veñuhu*

(Mr. 11:15-19; Lc. 19:45-48; Jn. 2:13-22)

<sup>12</sup> Anda já ñandihvi Jesús veñuhu cáhnu cán já ñacasáhá táxi ndihi a ña ndúu jícó xihin ña ndúu xéen cán. Ta ñaxicó ñehe a mesa ña ndúu ndijama jjuhún cán ta ñaxicó ñehe a táyi sácoo ña ndúu jícó ndijata. <sup>13</sup> Já ñacasáhá cáchi a já xihin ndihi ña cán já:

—Já cáchi tuhun Ndióxi já: “Vehe mí i cacuu a vehe nuú quixi na caça tahvi ña nu Ndióxi”, cáchi tuhun Ndióxi. Joo ndóhó ñandai cuu ndó yóho caja cuíhna ndo nuú ñayivi —ñacachi Jesús xihin ná.

<sup>14</sup> Tá ñandihvi já ñacayati java ña cuaa xihin java ña rénco nu á ini mé veñuhu cáhnu cán ta ñandaja vaha mé á ña. <sup>15</sup> Joo xójo ndivaha ini ña sacuaña nuú jutú xihin ña jánaha ley Moisés tá ñaxini na ña xituhún ñacaja mé á ta tá ñaxini joho na ña cája cáhnu ña valí cán mé á tá cáchi ña já: “Cája cáhnu í da ñaquixi chichi David.” Sahá ña cán queá xójo ini na <sup>16</sup> ta já ñacachi na já xihin Jesús:

—Á xini johún ña cáhan ña valí yóho —ñacachi na xihin Jesús.

Já ñacachi Jesús já:

—Ajan, xini joho i ña cája cáhnu na Ndióxi. Á coo ñacahvi ndó tuhun Ndióxi nu cáchi a já:

Janda ña valí ta janda ña chíchí ñacaja Ndióxi xihin ná,

ñá ná cuu caja cáhnu na mé á, cáchi tuhun Ndióxi —ñacachi Jesús xihin ña cán.

<sup>17</sup> Anda já ñajándacoo a ña já ñaqueta jatá ñuu cán cuahan chí ñuu Betania ta cán ñasahin a.

*Tá ñachicaan Jesús cháhan jata titó ñuhú*  
(Mr. 11:12-14, 20-26)

<sup>18</sup> Ta inga quivi itaan tá ñandicó coo a cuahan chí Jerusalén já ñacasáhá cuíco a cuahan. <sup>19</sup> Ta yuhú ichi cán ñaxini a cándichi in titó ñuhú. Ta chí ñasahan sándehe a á lín cuíhi nu do caxi a. Joo coo ñaha ná ndiñehe a. Ndáha uun dó cán cuiti va lín. Anda já ñacachi a já xihin do:

—Ni in túhún ga tañu a cána cuíhi nu yóho —ñacachi a xihin do.

Chí ivi laá ñahichi titó ñuhú cán. <sup>20</sup> Tá ñaxini ña xica tuun xihin Jesús cán ña yóho já ñacatónto ña já cáchi ña já:

—Ndá cuéntá queá ñahichi titó ñuhú cán ivi tuhun —ñacachi na xihin Jesús.

<sup>21</sup> Ta ñanducú ñehe Jesús tuhun nu ná já ñacachi a já:

—Mé a ndaa ná cahan i xihin ndo ña tá ná candeé ini ndó yehe ta ni loho co cáhvi ivi joho ini ndó já queá cuu caja ndó ña náhnu chága nuú ña ñacaja i yóho. Ta janda cuu cachi ndó xihin in yucu: “Caxoo ta cuahán jáquetún mún ini tañuhú”, ta chí já ndusa coo. <sup>22</sup> Ta tá ná candeé ini ndó yehe nani xica tahvi ndo nu Ndióxi ta co cáhvi ivi joho ini ndó já queá ñehe ndó ña xica ndo nu á —ñacachi Jesús.

*Tá ndaca tuhún ña Jesús yo sahan ndeé nu á ña jánaha mé á nuú ñayivi*

(Mr. 11:27-33; Lc. 20:1-8)

<sup>23</sup> Tá ñandihvi já ñandihvi Jesús ini veñuhu cáhnu cán ta nani jánaha tuhun Ndióxi nuú ña ndúu cán ñaxinu ña sacuaña nuú jutú xihin ña sacuaña nuú ña Israel cán nu á. Já ñacachi na já xihin á:

—Yo já sahan ñamaní nuun cajún ña cájún yóho —ñacachi na.

<sup>24</sup> Anda já ñanducú ñehe Jesús tuhun nu ná já ñacachi a já:

—Ta ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já ñasahan ñamaní nuú i caja i ña cája i yóho. <sup>25</sup> Ta viti cachi ndó xihin i yo já ñachindahá Juan ña ná quixi da caja nduta dá ñayivi. Á Ndióxi



nachindahá da á ñayivi nachindahá ñahá —nācachi Jesús ndáca tuhun a na.

Já nacasáhá ndítuhún xihín táhan na já cáchí nā já:

—Tá ná cachí ña Ndióxi quéa nachindahá Juan ta já nducú ñehe Jesús tuhun nu yo já cachi da xoho: “Ndá cuéntá quéa coo naxeen ndó candúsa ndó da, dá já”, cachi Jesús xoho. <sup>26</sup> Ta tá ná cachí ña ñayivi cúu nā nachindahá Juan já yihví yo ña ndicuíta ñayivi xihín yo. Jáchi tóco ndihi na cándúsa na ña naquixi Juan jáyaha da ña nācahan Ndióxi nuú ñayivi —cáchí nā ndítuhún xihín táhan na.

<sup>27</sup> Sahá ña cán quéa nācachi na já xihín Jesús:

—Cō xini toho nde yo já nachindahá Juan.

Anda já nācachi Jesús já xihín ná:

—Ta ni yehe a cáxi tuhun i nu ndo yo já nasahan ñamani nuú i caja i ña yóho —nācachi Jesús xihín nā cán.

*Sácu Jesús quiahva sahá ivi da cúu jahyi in dataa*

<sup>28</sup> Anda já nācachi tucu Jesús xihín nā cán já:

—Cuni johó ndó ña nayaha in tañu. Ín in dataa ta nasahin ivi jahyi ta da. Ta nasahan da nuú in táhan da cán já nācachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, nācachi da xihín jahyi da. <sup>29</sup> Já nācachi jahyi da já xihín dá: “A cūhūn toho i jáchi cō xíca ini i cūhūn i”, nācachi da. Joo tá nandihí nācavi ini da ña a váha ná cuu ini da chí já naquee da cuahan da caja chúun da nu ñuhú tátá da. <sup>30</sup> Ta jári nasahan tátá da cáhan da xihín inga jahyi da ta quiahva já nasahnda ri da chuun nuú da cán. Ta da cán nācachi da já xihín tátá da: “Ajan. Cūhūn i”, cáchí da. Joo tá nandihí coo nasahan toho da. <sup>31</sup> Ta viti cachi ndó xihín i ndá da cúu da nācaja ña cūni tátá da —nācachi Jesús.

Já nācachi nā cán:

—Da nu cuítí.

Anda já nācachi tucu Jesús já:

—Mé a ndaa ná cahan i xihín ndo ña ín chága sahá nā játaca jiuhún cuéntá impuesto xihín najihí xíca jii ña ná cacomí Ndióxi cuéntá saha ná a juú ga ndohó.

<sup>32</sup> Jáchi naquixi Juan, da jácandúta ñayivi najánaha da ndohó ndaja ndítahan caja ndó ta coo naxeen ndó candúsa ndó da. Joo nā játaca jiuhún cuéntá impuesto xihín najihí xíca jii nācandúsa na ña nācahan da. Ta vatí naxini ndó ña yóho joo coo naxeen ndó ndijama ndó ña cája ndó jáchi coo naxeen ndó candúsa ndó mé Juan.

*Sácu Jesús quiahva sahá java mozo, da nācaja quini xihín xitoho da*

(Mr. 12:1-12; Lc. 20:9-19)

<sup>33</sup> Cuni johó ndó ná cacu u inga quiahva nu ndo. Nasahin in dataa ta najánde cuaha dá tó uva nu ñuhú dá. Ta nasacu da in corra yito nu do. Ta nācavaha da in nuú cūhni mé uva cán ña cavaha vino. Ta nācavaha da in nu jícó canúu da já cuu candaa da tóco ndihi dó cán.

’Anda já nasahan ndojó da ñuhú dá nuú java na caja chúun na ña. Ta já naquee da cuahan xíca da. <sup>34</sup> Ta tá naxinu tiempo jáquee nā já nachindahá da java mozo da ña ná cūhūn nā nuú nā ndúu cája chúun ñuhú da cán ña ná ndiquiahva na nu dá ña cáni nu dá ndiquehe da saha ñuhú dá ña nasahan ndojó da nuú nā cán. <sup>35</sup> Joo ndaja coo nā cája chúun nu ñuhú cán natiin na in táhan da cúu mozo da cán ta nācani na da. Ta inga táhan da cán nandicuíta ñee na xihín yuu. <sup>36</sup> Joo mé da xihín ñaha ñuhú cán nachindahá cuaha chága da mozo da nasahan da nu ñuhú dá. Ta tá quiahva nācaja na xihín mé java mozo nasahan nu cuítí cán quiahva já nācaja ri nā xihín tóco ndihi mozo cán.

<sup>37</sup> Tá nandihí já nasacu ini da xihín ñaha ñuhú cán chindahá da jahyi da jáchi nācahan da: “Cája i cuéntá coo toní ñuhú nā xihín jahyi i”, nācahan da xihín ñaha ñuhú cán. <sup>38</sup> Joo tá naxini nā cája chúun ndojó ñuhú cán ña vaxi da cúu jahyi da xihín ñaha ñuhú cán já nācachi xihín táhan na já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñuhú yóho. Cōho cahni yó da já ná candōo ñuhú yóho ndáha mí”, nācachi xihín táhan nā cán.

<sup>39</sup> Ña cán quéa natiin na da ta nātavá na

da janda yuhú cútú ta cán nasahní na da — nacachi Jesús sácú a quiahva.

<sup>40</sup> Anda já nandaca tuhún Jesús na ndúu cán já nacachi a já:

—Ndía cáhán ndo caja da xihín ñaha ñúhu yóho xihín na cája chúun nu ñúhu dá — nacachi a.

<sup>41</sup> Anda já nacachi na cán já xihín Jesús:

—Ña caja da quea cahní da na quini, mé na nacaja chúun too nu ñúhu da cán. Ta já ndiquiahva ndojó da ñúhu da nuú java ga na ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da saha ñúhu dá —nacachi na cán xihín Jesús.

<sup>42</sup> Já nacachi Jesús já xihín na cán:

—Á a ñaha cahvi ndó tuhun Ndióxi nu cáchi a:

Mé yuu ña najácana da cávaha vehe, ña cán cúu ña nanduu yuu ndúhu sahá vehe ña ín chága saha.

Ña yóho quea nacaja Ndióxi, ta cúu á in ñaha cáhnu ndivaha nu yo, cáchi tuhun Ndióxi.

<sup>43</sup> Ña cán quea cáhan i xihín ndó ña cacu xoo Ndióxi ndohó ña ná a cácomí ga mé á cuénta saha ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuénta saha ná, mé na ndiquiahva na nu á ña cáni nu á ndiquehe a. <sup>44</sup> Ta cáchi i xihín ndó ña yehe cúu u tátuhun mé yuu cáhan i saha. Ta ndá na ná ndicava jatá yuu cán chí chachi xéhe na. Quiahva já ndihi sahá ñayivi tá co cúni na candúsa na yehe. Ta tá mé yuu cán ná yaha ndicava jatá in na já caji ndihí ñahá. Quiahva já ndihi sahá ñayivi ini indayá tá co cúni na candúsa na yehe —nacachi Jesús.

<sup>45</sup> Tá naxini johu na cúu sacuaaha nuú jutu xihín na fariseo cán ña yóho, nacandaa táhyí ini na ña saha mé ná cáhan Jesús.

<sup>46</sup> Sahá ña cán quea nanducú na tiin na mé á joo coo nacuu caja na sahá ña nayihvi na ñayivi jáchi candúsa ñayivi cán ña cáhan Jesús cuénta Ndióxi.

## 22

*Sácú Jesús quiahva sahá vicó tándaha  
(Lc. 14:15-24)*

<sup>1</sup> Tá nandihí já nacasáhá tucu Jesús jánaha ñayivi xihín ndinuhu quiahva. Já cáchi a já xihín ná:

<sup>2</sup> —Nuú cacomí Ndióxi cuénta sahá ñayivi cúu á tátuhun ña nayaha xihín in rey tá nacavaha da in víco ña tándaha jahyi ta da. <sup>3</sup> Nachindahá da mozo da ña ná cahun da cana da na ndítahan quixi. Joo coo naxeen na quixi na mé víco. <sup>4</sup> Anda já nachindahá chága da mozo da ña ná caxi tuhun da nuú na ndítahan quixi cán ña sa nacaja ndíví da ña cuxu na. Sa naxihí tindiquí xihín java ga quíti, rí nandaha. Sa nacandíví ndihi ñaha cuénta víco tándaha sahá ña cán quea ná quixi na. Ña yóho cúu chuun natahnda nu mozo cán cachi da xihín na ndítahan quixi cán. <sup>5</sup> Joo co ndaa na cán cahun na. In táhan da cán naquee da cuahan da candehé da nu ñúhu dá. Ta inga da naquee da cuahan da caja ndahvi da. <sup>6</sup> Ta java ga na cán natiin na mozo mé rey cán ta nacaja xixi na xihín dá janda quiahva nasahní ñahá na. <sup>7</sup> Anda já naxojo ndivaha ini rey cán sahá ña cán quea nachindahá da soldado da ña ná cahun na cahní na na nasahní ndii cán ta ná chicaan ñúhu dá ñuu na. <sup>8</sup> Anda já nacachi tucu rey cán já xihín java ga mozo da: “Sa nacandíví tóco ndihi ñaha ña coo víco joo na nacana i cán coo saha toho na quixi na víco. <sup>9</sup> Ña cán quea cuahán ndó ndijáá cáyé náhnu ta ndá ñayivi nacuu cana ndó na ná quixi na víco tándaha yóho”, nacachi rey cán nasahnda da chuun nu mozo da. <sup>10</sup> Anda já naquee mozo da nasahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti natata nacaja na. Ta já najácutú na vehe nuú coo víco tándaha cán xihín ñayivi.

<sup>11</sup> 'Anda já nandihvi rey nu ñúhu na cán já naxini da ndacaan in dataa, da co ndíxi jáhma ña ndíxi na ndúu víco tándaha.

<sup>12</sup> Ta nacayati mé rey nu dá já nacachi da já xihín dá: “Amigo, ndaja nacajún naquihvún yóho tá co ndíxi tohún jáhma ña ndíxi na ndúu víco tándaha”, nacachi rey xihín da cán. Joo coo nanducú ñehe da tuhun nu rey. <sup>13</sup> Anda já nasahnda rey chuun nu mozo da. Já nacachi da já xihín ná: “Cató ndó ndáha dá xihín saha

dá. Ta jácana ndó da chí jata nuú naá yávi. Cán cuacu ndivaha da anda quiahva cahña nuhu da”, cáchi da. <sup>14</sup> Jáchí cuahá ndivaha cúú ná nacana Ndióxi ña ná cacomí a cuéntá saha joo chá cúú ná ndiquiahva na ndáha mé á ña ná cuu caxi a na —nacachi Jesús.

*Ndáca tuhún na Jesús á ndítahan nu ná chahvi na jiuhún cuéntá impuesto*

*(Mr. 12:13-17; Lc. 20:20-26)*

<sup>15</sup> Tá nandihí já naquee na fariseo nasahan na jándique táhan na tuhun na ndaja caja na coto ndojó na Jesús xihín tuhun cáhan mé á já ná cuu jácojo na cuachi jata. <sup>16</sup> Ña cán quea nachindahá na java na cuéntá mé ná xihín java na cuéntá Herodes nuú Jesús já nacachi na já xihín á:

—Maestro, xini nde ña ndinuhu ña ndaa cáhan mé ndó. Ta cándaq ini nde ña jánaha ndó ña ndaa saha íchi cuéntá Ndióxi. Ta co quehe ndó cuéntá tá cáhan núu ñayivi saha ndó. Ta cándaq ini nde ña tá cáhan ndó saha in ñaha cája ñayivi cúú á saha ña sándehe ndó janda ínimá ná. <sup>17</sup> Saha ña cán quea cuni nde candaa ini nde ndía cachi ndó saha ña yóho: Á ndítahan nuú nde chahvi nde jiuhún cuéntá impuesto nuú da cómi cuéntá saha ñuu Roma. Á chahvi nde ña á a chahvi toho nde ña —nacachi na cán xihín Jesús.

<sup>18</sup> Joo sa nacandaq ini Jesús ña cáhvi núu ini na saha ña cán quea nacachi a já xihín ná:

—Co cúú ndó tá quiahva ndaa ndó jáchi cuni ndó coto ndojó cuití ndó yehe. <sup>19</sup> Jánaha ndó in táhan jiuhún ña chahvi ndó impuesto jan nuú i —nacachi Jesús.

Anda já nasahan na in jiuhún caa naní denario nu á. <sup>20</sup> Tá naxini Jesús ña yóho já nacachi a já xihín ná:

—Yo nahná ta yo quivi quea ndaa nu á —nacachi a.

<sup>21</sup> Já nacachi na cán já xihín á:

—Ñehe a nahná xihín quivi da cómi cuéntá saha ñuu Roma —nacachi na.

Anda já nacachi tucu Jesús já:

—Ndiquiahva ndó ña cúú ñaha da cómi cuéntá saha ñuu Roma jan nu dá. Ta ndiquiahva ndó ña cúú ñaha Ndióxi nu á —nacachi a.

<sup>22</sup> Tá naxini johó na cán ña yóho já nacatontó na ta najándacoo na a naquee na cuahan na.

*Tá ndáca tuhun na Saduceo Jesús á mé a ndaa nditacu ndii*

*(Mr. 12:18-27; Lc. 20:27-40)*

<sup>23</sup> Ta sa mé quivi já nasahan java na saduceo cáhan na xihín Jesús. Ta mé na saduceo yóho co cándusa na ña nditacu tucu na sa naxihí. Saha ña cán quea nandaca tuhún na Jesús já cáchi na já xihín á:

<sup>24</sup> —Maestro, nu ley nacahyí Moisés sanahá natahnda chuun ta cáchi a já: “Tá tándaha in dataa xihín ñájihí da ta tá xihí da ta coó jahyi da cacu já quea ndítahan nuú ñani da tandaha dá xihín ña cuaan nacandoo cán. Ta já ná coo jahyi da cán xihín yuhú nuú ñani da”, cáchi ley Moisés. <sup>25</sup> Ta viti cuni johó ndó ná cacu nde in quiahva nu ndó. Tañu mé nde yóho nasanduu usa ñani. Ta da nu cuití cán natandaha dá xihín in ñañaña. Tá nandihí já naxihí da. Joo saha ña coó jahyi da nacacu xihín ñájihí da saha ña cán quea nandiquehe ñani da, da chí ivi jata dá ña cuaan cán. <sup>26</sup> Ta quiahva já nandoho ri da chí ivi cán jáchi naxihí da ta coó jahyi da nacacu xihín ña. Ta janda ndihusa ñani cán natandaha xihín ña ta ndihusa da naxihí ta ni in da coó nacacu jahyi xihín ña. <sup>27</sup> Ta tá nu ndihí naxihí ri ñañaña cán va. <sup>28</sup> Ta viti cachi ndó xihín nde tá ná xinu quivi nditacu tucu ndii, ndá da cacuu ndusa yí ña cán jáchi ndihusa ñani cán natandaha xihín ña ñuyiví yóho —nacachi na saduceo cán xihín Jesús.

<sup>29</sup> Anda já nacachi Jesús já:

—A váha toho cáhan ndo jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúú ndee Ndióxi.

<sup>30</sup> Jáchi mé quivi tá ná nditacu tucu ndii a tándaha ga ná ta ni a quiahva na jahyi jíhí na tandaha ná. Cacuu na tátuhun táto Ndióxi ndúu indiví ta co tándaha na cán.

<sup>31</sup> Joo sa xini yo ña nditacu tucu ndii. Á a ñaha cahvi ndó tuhun Ndióxi nu cáchi a já:

<sup>32</sup> “Yehe cúú Ndióxi ña cája cáhnu Abraham ta yehe cúú Ndióxi ña cája cáhnu Isaac ta yehe cúú Ndióxi ña cája cáhnu Jacob viti”, nacachi a. Ta ña yóho cuni cachi a ña tácu

yii va Abraham xihín Isaac xihín Jacob vatí sa naxihí yiquí cuñu na —nācachi Jesús.

<sup>33</sup> Tá naxini joho ñayivi ndúu cán ña yóho já nācatóntó nā xihín ña jánaḥa Jesús nu ná.

*Tá cáhan Jesús ndá ley quéa cáhnu chága (Mr. 12:28-34)*

<sup>34</sup> Tá nañehé nā fariseo tūhun ña naquee vaha Jesús nasahnu a nuú nā saduceo já nanditútú ndihi na. <sup>35</sup> Ta in táhan mé da cán, da jánaḥa ley Moisés nandaca tūhún da Jesús jáchi cúní da coto ndojó da mé á. Já nācachi da já:

<sup>36</sup> —Maestro, ndía cúu ña cáhnu chága sáhdá ley Moisés caja í —nācachi da cán xihín Jesús.

<sup>37</sup> Já nācachi Jesús já xihín dá:

—Ña cáhnu chága nu ley Moisés cúu ña yóho: “Ndítahan quihvi ini ndó Ndióxi, xitoho ndó xihín tóco ndihi ínimá ndó ta xihín ndinuhu ini ndó ta xihín tóco ndihi xíní túní ndo.” <sup>38</sup> Ña yóho cúu ley nu cuítí ta cúu á ña cáhnu chága nu tóco ndihi ley. <sup>39</sup> Ta tá quiahva ín ña nu cuítí yóho quiahva já ín ri ña chí jvi va ta cáhí a já: “Xíní ñúhú quihvi ini ndó ñani táhan ndó tá quiahva quihvi ini ndó mé ndó.” <sup>40</sup> Ta jatá ndívi ña yóho tíin tóco ndihi ley Moisés xihín ña najánaḥa nā profeta sanahá —nācachi Jesús xihín nā fariseo cán.

*Ndaca tūhún nā Jesús ndáchí naquixi a (Mr. 12:35-37; Lc. 20:41-44)*

<sup>41</sup> Ta nani nanditútú ndihi nā fariseo ndúu na nu Jesús cán já nandaca tūhún a nā. <sup>42</sup> Já nācachi a já xihín ná:

—Ndía cáhvi ini ndó saḥa Cristo. Ndá chichi cáhán ndo vaxi a —nācachi Jesús xihín ná.

Já nācachi nā cán já:

—Vaxi a chichi David, da nasacuu rey sanahá —nācachi nā cán xihín Jesús.

<sup>43</sup> Anda já nācachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quéa nācachi da ña cúu á xitoho da. Jáchi nāchutú ndaa ínimá David xihín ínimá yii Ndióxi tá nācahyí da já:

<sup>44</sup> Já nācachi Ndióxi xihín xitoho í: “Cacoo xoo cuáha í yóho janda quiahva ná caja í ña ná cacomún cuéntá saḥá nā co cúní yohó”, nācachi Ndióxi, nācachi David.

<sup>45</sup> Ndávaha cáhí na ña vaxi Cristo chichi David tá ta sa mé David nācachi da ña cúu á xitoho da —nācachi Jesús.

<sup>46</sup> Ta chí ni in na coo nācuu caja nducú ñehe na tūhun nu á. Ta janda mé quivi já ni in ga nā coo nasahan ndeé ini ndaca tūhún chága nā mé á.

## 23

*Chicaḥa Jesús cuachi jatá nā fariseo xihín jatá nā jánaḥa ley Moisés*

*(Mr. 12:38-40; Lc. 11:37-54; 20:45-47)*

<sup>1</sup> Anda já nācachi Jesús já xihín tóco ndihi ñayivi ta xihín nā xica tuun xihín á cán já:

<sup>2</sup> —Nā jánaḥa ley xihín nā fariseo cúu ná nā ndítahan nu ndicani na ña cúní cachi ley Moisés. <sup>3</sup> Ña cán quéa xíní ñúhú caja ndó tóco ndihi ña jánaḥa nā nu ndo. Joo a caja toho ndó tá quiahva caja mé ná jáchi co caja na ña jánaḥa mé va na. <sup>4</sup> Jáchi caja na ña ná coo ihvi ndivaha ley janda quiahva co ndeé ini ñayivi caja na ña. Joo mé ná ni loho tíin co chindeé ñahá nā. <sup>5</sup> Ta caja na tóco ndihi ñaha ña ná cuni ñayivi na jáchi catóo nā candico listoni náhnu jiní ná xihín jico ndáha ná nu ndaa tūhun Ndióxi. Ta catóo nā coo lándá chága yuhú jáhma ná a juú ga java ga ñayivi. <sup>6</sup> Ta tá cuahan nā víco catóo nā coo na nuú vaha cuítí va. Ta tá quihvi na veñuhu catóo nā cacoo na nu sácco nā ín chága saḥa. <sup>7</sup> Ta catóo nā ña ná caḥan toní ñúhú ndivaha ñayivi xihín ná tá xica nuu na nuú yahvi. Ta chí a juú quiahva catóo nā ña ná cachi ñayivi 'maestro' xihín ná.

<sup>8</sup> 'Joo ndóhó co ndítahan nu ndó nducú ndó ña ná caḥan ñayivi 'maestro' xihín ndo. Jáchi in ñani cúu ndihi ndó ta in tūhún cúu maestro ndo, mé á cúu Cristo. <sup>9</sup> Ta a cáhan ndo tátá cáhnu xihín ni in ñayivi ñuyíví yóho jáchi in tūhún Ndióxi cúu á tátá ndo ta mé á ín a indiví. <sup>10</sup> Ta a ndúcú ndo ña ná caḥan ñayivi 'jefe' xihín ndó jáchi in tūhún laá va cúu jefe ndo, mé a cúu Cristo. <sup>11</sup> Ndá da cúu da cáhnu chága tañu ndó xíní ñúhú da caja chúun da saḥá ndihi ndó. <sup>12</sup> Jáchi ndá nā ndíñehe jícó mé, jánuu ndáha Ndióxi nā. Joo ndá nā jánuu ndáha mé nu Ndióxi, jándíñehe jícó mé á nā.

<sup>13</sup> 'Ndáhví nācuu ndó, nā jánaḥa ley Moisés xihín nā fariseo jáchi co cúu ndó tá

quiahva ndaa ndó. Jáchí sájí nuu ndó nuú ñayivi já ná a cuú cacomí Ndióxi cuéntá saha ná. Ta ni ndóhó cō ndiquiahva ndó mé ndó ndáha Ndióxi ná cacomí a cuéntá saha ndó. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi. <sup>14</sup> Ndáhvi nahá nacuu ndó, na jánaha ley Moisés xihín na fariseo jáchi cō cúu ndó tá quiahva ndaa ndó. Jáchí cánda ndó vehe najihí cuáan ta tá nandihí cuahá ndivaha xíca tahví ndó nu Ndióxi jáchi cúni ndó jájahvi ndó nuú ña núu cája ndó. Saha ña cán quéa cáchí i xihín ndó ña ndóhó cacuu ndó na ndoho chága ini, caja Ndióxi.

<sup>15</sup> Ndáhvi nahá nacuu ndó, na jánaha ley Moisés xihín na fariseo jáchi cō cúu ndó tá quiahva ndaa ndó. Jáchí a juú quiahva xíca nuu ndó ndúcú ndó in tálaá ñayivi ña ná candico na ña jánaha ndó. Ta tá sa nandaja ndó na cuéntá mé ndó já cája chága na cuachi janda cáni a nu ná ndoho chága ini na indayá a juú ga mé ndó.

<sup>16</sup> Ndáhvi nahá nacuu ndó jáchi cúu ndó tátuhun na cuaá ndáca inga na cuaá. Jáchí jánaha ndó ñayivi ña tá sahan na tuhun na nuú inga ñayivi nani táva na quivi veñuhu cáhnu já quéa cō ndúsa jáxinu cō na tuhun na. Joo cáchí ndó ña tá táva na quivi jiuhun cuáan ndácaan veñuhu cáhnu já quéa ndúsa jáxinu cō na tuhun na, já cáchí ndó. <sup>17</sup> Joo tóntó ndivaha ndó ta cúu ndó tátuhun na cuaá viti. Jáchí cō cánda ini ndó ña ín chága sahá veñuhu cáhnu a juú ga sahá jiuhun cuáan jáchi mé jiuhun cuáan cúu á cuéntá Ndióxi sahá ña ndácaan ini veñuhu cáhnu ña cúu cuéntá mé á. <sup>18</sup> Ta inga tucu ña jánaha ndó nuú ñayivi cúu ña yóho: Tá sahan in na tuhun na nuú ñayivi nani táva na quivi nu náa Ndióxi já quéa cō ndúsa jáxinu cō na tuhun na. Joo cáchí ndó ña tá táva ñayivi quivi ña sájo cō na cánúu nu náa cán já quéa ndúsa jáxinu cō na tuhun na, já cáchí ndó. <sup>19</sup> Joo tóntó ndivaha ndó ta cúu ndó tátuhun na cuaá. Jáchí ín chága sahá nu náa cán a juú ga sahá ña sájo cō na cánúu nu náa jáchi ña sájo cō na cán cúu á cuéntá Ndióxi sahá ña cánúu a nu náa cuéntá mé á. <sup>20</sup> Saha ña cán quéa ndá na táva quivi nu náa já quéa táva ndihí ri na quivi tóco ndihí ña sájo cō na cánúu nu náa cán. <sup>21</sup> Ta ndá

na táva quivi veñuhu cáhnu já quéa táva ri na quivi Ndióxi jáchi cán ín mé á. <sup>22</sup> Ta ndá na táva quivi indiví já quéa táva ri na quivi Ndióxi xihín quivi nu sácoo a sáhdá a chuun.

<sup>23</sup> Ndáhvi nahá nacuu ndó, na jánaha ley Moisés xihín na fariseo jáchi cō cúu ndó tá quiahva ndaa ndó. Mé ndó cávaha ndó uxu táhdá ña jáquee ndó ñundáhyi ndó ta sahan ndó in táhdá ña nu Ndióxi. Já cája ndó anda yucu válí ña támi sahan tátuhun menta xihín anís xihín comino. Joo cō cája ndó ña ín chága saha ña sáhdá ley Moisés. Jáchí cō cája ndó ña ndaa ta cō cándahví ini ndó ñayivi ta cō cándeé ini ndó Ndióxi tá quiahva sáhdá ley caja ndó. Mé a ndaa xini ñúhú cája ndó tóco ndihí ña yóho joo a jándacoo ndó ña jóco ndó nu Ndióxi in táhdá nuú uxu táhdá ña ñéhe ndó. <sup>24</sup> Mé ndó cúu ndó tátuhun na cuaá ndáca inga na cuaá. Jáchí ndinuhu ini ndó cája ndó ña cōo cuahá saha cuéntá ley Moisés joo sácú xoo ndó ña ín chága saha nu Ndióxi caja ndó. Cúu ndó tátuhun in da ndihí ini da tavá da in ndicama loho ndácaan tása da ná a cóco da ri. Joo cō ihvi toho nu dá cóco da in camello.

<sup>25</sup> Ndáhvi nahá nacuu ndó, na jánaha ley Moisés xihín na fariseo jáchi cō cúu ndó tá quiahva ndaa ndó. Jáchí ndihí ini ndó caja ndó costumbre ña ndícata ndó jata vaso xihín jata cohó joo ña ñúhu ini a cán najátaca cuíhná ndó sahá ña ndiáva ndivaha ini ndó ña núu. <sup>26</sup> Ndáhvi nahá nacuu ndó, na fariseo jáchi cúu ndó tátuhun na cuaá. Ña ndítahan caja ndó nu cuítí quéa ndaja víi ndó ínima ndó já cacuu ndó tátuhun in vaso á in cohó sa nandicata vaha na jáchi nandivií ini a xihín jata viti.

<sup>27</sup> Ndáhvi nahá nacuu ndó, na jánaha ley Moisés xihín na fariseo jáchi cō cúu ndó tá quiahva ndaa ndó. Cúu ndó tátuhun vehe válí ndíta camasanto nu táan na ndii. Ndató jándicuchu na jata joo chí ini a a juú quiahva quini sahan jáchi ndinuhu lásá ndii ñúhu ini a. <sup>28</sup> Quiahva já cúu mé ndó jáchi ndaa ndó tátuhun ñayivi vaha ndivaha. Joo mé a ndaa cō cúu ndó tá quiahva ndaa ndó jáchi ndinuhu ña núu ndácaan ínima ndó.

<sup>29</sup> 'Ndáhvi nahá nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Cávaha ndó vehe válí ndíta camasanto nuú cañuhu lásá na nasacuu profeta sanahá ta jácacutú ndó nuú nanduxu na nacaja ndaa. <sup>30</sup> Ta cáchi ndo já: “Ta tá nasanduu nde tiempo nasanduu tásáhnú jícó yo sanahá ta chí a chindeé toho nde na nasahní profeta, na nasanduu sanahá”, cáchi ndo. <sup>31</sup> Ta xihín ña yóho náha táhyí a ña naquixi ndó chíchi na nasahní profeta sanahá. <sup>32</sup> Cuáhán ndo jáxinu coo ndó mé cuachi nacasahá cája tásáhnú jícó ndo sanahá.

<sup>33</sup> 'Mé ndó cúu ndó tátuhun coo jáchi cája ndó tá quiahva cája coo. A cuú cacu ndaa ínima ndó ta chí tandaa quivi cuhun ndó indayá nu ndoho ndivaha ini ndó. <sup>34</sup> Sahá ña cán quéa yehe chindahá i java profeta nu ndo xihín java na ndichí xihín java na jánaha tuhun Ndióxi nu ndo. Joo java na cahni ndó na ta java na cata caa ndó na ndica crúxu ta java na cani ndó na ini veñuhu ta java na taxi ndó na tá ñuu tá ñuu. <sup>35</sup> Ña cán quéa caça Ndióxi cuéntá nu ndó saha tóco ndihi ñayivi ndaa, na nasahní ndo sanahá. Caça mé á cuéntá saha Abel, da nasacuu da ndaa janda quiahva naxinu coo a nuú caça mé á cuéntá saha Zacarías, da nasacuu jahyi Berequías. Mé da yóho nasahní ndó ini veñuhu tañu nu náa xihín nuú yji ndivaha. <sup>36</sup> Mé a ndaa ná cahan i xihín ndo ña caça Ndióxi cuéntá saha tóco ndihi ndji jan nuú ñayivi ndúu tiempo viti.

*Tá sácu Jesús sahá ñayivi ndúu ñuu Jerusalén*  
(Lc. 13:34-35)

<sup>37</sup> 'Ndáhvi nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuíta ndó cáni ndó na xihín yuu na nachindahá Ndióxi nu ndó. Cuahá ndivaha tañu cuni jándataca ndihi i ndohó joo coo naxeen ndó cuni johó ndó. Cúu á tá quiahva cája nduxú tá játa rí jahyi válí rí tixi ndixi rí. <sup>38</sup> Ta viti cuni johó ndó ña cahan i xihín ndo. Vaxi quivi tá janí ndáha mé vehe ndó candoo a. <sup>39</sup> Ta mé a ndaa ná cahan i xihín ndó ña a cuni ga ndó yehe janda quiahva ná xinu coo quivi cachi ndó: “Cáhnú nahá ná cacuu da

vaxi cuéntá Ndióxi, xitoho í”, cachi ndó — nacachi Jesús xihín na cán.

## 24

*Cáxi tuhun Jesús ña vaxi quivi ndihi sahá veñuhu cáhnú ndacaan ñuu Jerusalén*

(Mr. 13:1-2; Lc. 21:5-6)

<sup>1</sup> Ta tá sa naquee Jesús veñuhu cáhnú Jerusalén cán cuahan já nacetivi na xica tuun xihín á nu á ta nacasahá na cahan na xihín á ndá quiahva cá veñuhu cán. <sup>2</sup> Joo nanducú ñehe Jesús tuhun nu ná já nacachi a já:

—Mé a ndaa ná cahan i xihín ndo ña janda ni in yuu yóho a candoo jatá inga yuu jáchi vaxi quivi tá nditaní ndihi ña yóho — nacachi Jesús xihín na xica tuun xihín á cán.

*Ña coo tá sa nacayati quivi ndihi saha ñuyivi*

(Mr. 13:3-23; Lc. 21:7-24; 17:22-24)

<sup>3</sup> Anda já naquee Jesús cuahan chí yúcu nu cáa yitó olivo xihín na xica tuun xihín á. Ta nani ndúu na cán nacetivi na xica tuun xihín á nu in coo a cán já nacasahá ndaca tuhún xóo na a já nacachi na já xihín á:

—Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quivi quixi tucu ndó ñuyivi yóho. Ta ndaja coo tá ná ndihi saha ñuyivi —nacachi na xihín Jesús.

<sup>4</sup> Já nacachi Jesús já:

—Cuéntá coo ndó ná a jándahvi ni in na ndohó. <sup>5</sup> Jáchi cuahá ndivaha na quixi na cuéntá mí i ta cahan na ña tuhún tá cachi na já xihín ndo: “Yehe cúu Cristo, da nachindahá Ndióxi cacomí cuéntá sahá ñayivi”, cachi na. Ta xihín ña yóho cuahá ndivaha ñayivi jándahvi na. <sup>6</sup> Ta jandá johó ñehe ndó tuhun ña ndicuíta ñayivi cani táhan na yóho á cáa. Joo a cáyihví toho ndó jáchi já ndítahan coo. Joo ña yóho coo cuni cachi a ña naxinu coo quivi nu ndíhí. <sup>7</sup> Jáchi ñayivi ndúu in nación ndicuíta na cani táhan na xihín na ndúu inga nación. Ta quixi tama ta quixi cuehe ta ndaja táhan quixi a táan. <sup>8</sup> Ta ña yóho cacuu a tondohó ña casahá jihna ñuhú vaxi nuú ñayivi jáchi cámaní xinu coo nuú ndoho chaga ini na.

<sup>9</sup> 'Anda já tiin na ndohó ta ndiquiahva na ndohó ndahá na coo cuni ndohó já ná

caja xíxi na xihin ndo. Ta cahní na ndohó ta tóco ndihi ñayivi ndúu ñuyíví candají na ndohó sahá yehe. <sup>10</sup> Ta mé tañu já cuaha ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó túhún táhan na. <sup>11</sup> Ta quixi cuahá ndivaha na tuhún ta cachi na cúu ná profeta cuéntá Ndióxi joo jándahvi na cuahá ndivaha ñayivi. <sup>12</sup> Ta sahá ña ndicuahá ndivaha ña núu ñuyíví yóho sahá ña cán quéa jándacoo cuahá ñayivi ña quíhvi ini táhan na. <sup>13</sup> Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. <sup>14</sup> Ta níí cúu ñuyíví ndicuita nuu tuhun vaha cáhan sahá yehe já ná candaa ini ñayivi ndá quiahva cacomí Ndióxi cuéntá saha ná. Andá javí ndihi saha ñuyíví.

<sup>15</sup> Na cáhvi tutu ná candaa ini na ña cáhan. Sanahá nacahyí profeta Daniel sahá in ña quini ña jativí ñahá. Tá ná cuni ndó ña xinu coo ña yóho nuú yíi cuéntá Ndióxi <sup>16</sup> já quéa ndá na ndúu estado Judea xíní ñúhú cunu na cuhun na chí yúcu. <sup>17</sup> Ta ndá na cándójó jini véhe, co ndítahan nuu na tavá na ndá ñaha vehe na. <sup>18</sup> Ta ndá na ndúu yúcu, ná a ndicó coo na vehe na ndiquehe na jáhma ná. <sup>19</sup> Ndáhvi nacuu najihí, na ñúhu jahyi mé quivi já. Ta ndáhvi nacuu najihí na néhe ndaa na valí táhan ña chíchi yíi. <sup>20</sup> Caca tahví ndo nu Ndióxi ña ná a cácuu a tiempo vixi tá ná cunu ndó cuhun ndo. Ta cacá tahví ndo nu á ña ná a cácuu a quivi ndiquehe ndée ná. <sup>21</sup> Jáchí quiví ndoho ndivaha ini ñayivi cacuu a cán. Jáchí janda tá nacava sahá saha ñuyíví coo nandoho ini na tá quiahva ndoho ini na mé quivi já. Ta tá ná yaha ña jan, a ndicó coo ga ña ndoho ini na quiahva já. <sup>22</sup> Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá na sa nacaxi mé á sahá na cán ndaja cuítí mé á tiempo cán.

<sup>23</sup> Ta tá ná cachi in na xihin ndó: “Candehé ndo. Yóho íin Cristo, da nachindahá Ndióxi cacomí a cuéntá sahá ñayivi.” Á tá ná cachi na: “Candehé ndo. Caa íin da”, cachi na, já quéa a cándúsa toho ndó na. <sup>24</sup> Jáchí quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná

ta cachi na cahan na cuéntá Ndióxi ta jári caja na cuahá ndivaha ña náhnu xihín ña xitúhún ña ná jándahvi na ñayivi. Ta janda na sa nacaxi Ndióxi jándahvi na tá ná cuu caja na ña. <sup>25</sup> Candehé ndo jáchi sa nacaxi tuhun yachi ndihi i ña yóho xihin ndo. <sup>26</sup> Ña cán quéa tá ná cachi na xihin ndo: “Candehé ndo. Yucú íchí caa íin Cristo.” Já quéa a cuhun ndó jan. Á tá ná cachi na xihin ndo: “Candehé ndo. Ini vehe yóho ndacaan da cúu Cristo.” A cándúsa ndó na. <sup>27</sup> Jáchí tá quiahva yehe tása quéta xoo nu cána candii ta xójo cava indiví quiahva já queta yehe, da nachindahá Ndióxi nduu ñayivi. <sup>28</sup> Mé nu candúhu yiquí cuñu ndii cán cacuu nuú ndicutú tiyocó canduu rí.

*Ndá quiahva coo tá ná quixi tucu Jesu-cristo*

(Mr. 13:24-37; Lc. 21:25-33; 17:26-30, 34-36)

<sup>29</sup> Ta ivi laá tá jacá nayaha quiví ndoho nahá ini na cán já canaá nuú candii ta ni a ndiyehe ga yoo ta janda indiví quee quimi cuyu rí nu ñúhu ta janda indiví ña nacavaha Ndióxi ndiquiji nuu. <sup>30</sup> Andá já ndaca náha ña xitúhún indiví já candaa ini ñayivi ña vaxi yehe, da nachindahá Ndióxi nduu ñayivi. Ta ndaja táhan ñayivi ndúu níí cúu sahá ñuyíví ndahyi cóhó na ta já cuni na yehe quixi i tañu vico indiví xihin tóco ndihi ndeé e ta cuni na ndá quiahva cáhnu cúu yehe. <sup>31</sup> Ta já chindahá i tátó mí i ña ná tiví cóhó na trompeta já ná nditaca tóco ndihi na nacaxi i tañu tóco ndihi ñuu janda níí cúu saha ñuyíví ta janda níí cúu sahá indiví.

<sup>32</sup> Jacuaha ndó ña cúní cachi mé quiahva sácú u nu ndó sahá yito titó ñuhú. Jáchí tá yúta ndáha dó cán ta já vaxi núma válí do já candaa ini ndó ña sa nacayati tiempo ihní. <sup>33</sup> Quiahva já cuu candaa ini ndó ña tá ná cuni ndó ña sa cúu tóco ndihi ña nacaxi i xihin ndo yóho já cuu candaa cáxi ini ndó ña sa nacayati tiempo quixi tucu yehe ñuyíví yóho. <sup>34</sup> Mé a ndaa ná cahan i xihin ndo ña yaha tóco ndihi ña yóho ta anda javí quivi na ndúu tiempo viti. <sup>35</sup> Ta ndihi saha indiví xihín ñuyíví joo a ndíhi toho sahá tuhun nacahan i xihin ndo yóho jáchí coo tá coo tá quiahva nacaxi i yóho.

<sup>36</sup> Joo ni in túhún toho ñayivi cō xíní na ndá quiví á ndá hora yaha ña yóho. Ni mé tátō Ndióxi ndúu indiví cō xíní na ndá quiví coo ña yóho. Ta ni yehe, da cúu in túhún jiní já jahyi Ndióxi cō xíní ndá quiví coo ña yóho. In túhún Ndióxi, tátá i quéa xíní a. <sup>37</sup> Tá quiahva nayaha tiempo tá nasahin Noé sanahá quiahva já yaha ri tá ná tandaa quiví quixi tucu yehe, da nachindahá Ndióxi nduu ñayivi. <sup>38</sup> Jáchi mé tiempo cán tá camaní cuun javí quíni cán já cáxixi ñayivi ta cáxihi na ta tándaha ná ndúu na janda quiahva naquihvi Noé ini barco cáhnu cán. <sup>39</sup> Ta coó naquehe na cuéntá janda quiahva naxinu cō javí quíni cán ta najánaá dó sahá ndihi na. Quiahva já a quéhe na cuéntá saha ndá quiví quixi yehe, da nachindahá Ndióxi nduu ñayivi. <sup>40</sup> Mé tiempo já canduu ivi dataa xutu da ta in da ndindita cūhun xihín i ta inga da candoo va. <sup>41</sup> Ta canduu ivi najihí ndíco na ta in ña ndindita cūhun xihín i ta inga ña candoo va.

<sup>42</sup> Xíní ñuhú coo tiahva vaha ndó jáchi cō xíní ndó ndá quiví quixi tucu xitoho ndó. <sup>43</sup> Xíní ñuhú candaá vaha ini ndó ña tá xíní in dataa ndá hora cúní quihvi ta cuihná vehe da já quéa a cúju toho da jáchi candaá vaha da vehe da já ná a quihvi da cuihná vehe da. <sup>44</sup> Sahá ña cán quéa ndítahan canduu tiahva ri ndóhó va. Jáchi xinu cō yehe, da nachindahá Ndióxi nduu ñayivi mé hora tá cō cáhán ndo xinu cō i nu ndo.

*Da cāja chúun vaha ta da cō cāja chúun vaha*

*(Lc. 12:41-48)*

<sup>45</sup> Mé ndó ndítahan nu ndó cacuu ndó tátuhun in da ndíchí jiní, da cāja chúun vaha nuú xitoho da. Ta najándacoo xitoho da chuun ndáha dá ña ná quiahva da cuxu na java ga cúu mozo xihín da cán. Anda já naquee xitoho da cuahan da. <sup>46</sup> Tahví nacuu mé mozo cán tá xinu cō xitoho da ta ndítahan da cāja chuun yii va da ña nacandoo nu dá caja da. <sup>47</sup> Mé a ndaa ná cahan i xihín ndo ña quiahva xitoho da cán chuun nu dá ña ná cacomí da cuéntá saha tóco ndihi ñaha cómí xitoho da. <sup>48</sup> Joo tá casáha da cāja núu da ta cáhán da ña cayáncá ndivaha xitoho da ndicó cō da.

<sup>49</sup> Ta sahá ña cán quéa casáha da cāja xixi da xihín java ga na cúu mozo xihín dá. Ta já cãa ga da casáha xixi da ta xihí da ta já xini da. <sup>50</sup> Ta ndaja coo xinu cō xitoho mozo cán mé quiví cō cáhán da ña xinu cō da. <sup>51</sup> Anda javí jándoho quini xitoho da cán ini da jáchi cō cúu dá tá quiahva cãa da. Ta ndítahan ndoho da tá quiahva ndoho tóco ndihi na cāja já mé nuú cuacu ndivaha na janda quiahva cáhña nuhu ná —nacachi Jesús.

## 25

*Sácú Jesús quiahva sahá ña nacaja uxu najihí, na tacú*

<sup>1</sup> Já cáchi tucu Jesús já:

—Tá ná xinu cō quiví cacomí Ndióxi cuéntá sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá naquehe na candil ña ñuhu sítí ini já cuahan na ndique táhan na xihín da tándaha cán. <sup>2</sup> Uhun táhan na tacú cán cúu ná na tácu ini ta uhun na cán cúu ná na cō tácu toho ini. <sup>3</sup> Ndíhuhun na cō tácu ini cán natiin na candil ñaha na cuahan na joo coó naquehe chága na sítí ña jácutú tucu na candil tá sa cúní ndahva ña. <sup>4</sup> Joo na tácu ini cán ñehe na candil ñaha na ta ñehe ri na yúyú sítí cuahan na ña jácutú na candil tá sa cúní ndahva ña. <sup>5</sup> Ta ndaja coo nacasáha cáyáncá mé da tándaha cán sahá ña cán quéa nanaá ini ndihi na ta naquiji va na. <sup>6</sup> Joo tá nacuu yati java ñuú já tácu cáyuhú java na já cáchi na já: “Candehé ndo. Sa vaxi da tándaha. Cuahán queta ndó ndiquehe ndó da”, cáchi na cáyuhú na cán. <sup>7</sup> Já nandacoo tóco ndihi na tacú cán ta nacasáha na cāja ndiví na candil ñaha na. <sup>8</sup> Anda já nacasáha ndíhuhun na cō tácu ini cán cáhan na xihín ndíhuhun na tácu ini cán já cáchi na já xihín ná: “Caja ndó ñamaní quiahva loho ndó sítí ndo nuú nde jáchi sa nandihí sítí nde ta jalóho cúní ndahva candil ñaha nde”, cáchi na cō tácu ini cán. <sup>9</sup> Já nanducú ñehe ndíhuhun na tácu ini cán tuhun nu ná já cáchi na já: “A cúu toho caja nde quiahva nde sítí nu ndó jáchi tiahva náá ndimaní dó nu mé nde. Vaha chága cuahán mé ndó nu cáyahvi dó cueen ndó do”, nacachi na tácu ini cán xihín ná. Já



naquee na cō tácu toho ini cán cuahan na. <sup>10</sup>Joo nani naquee ndíhuhun na cō tácu ini cán cuahan na cueen na sítí na já naxinu da tándaha cán ta nandihvi ndíhuhun najihí tácu ini cán ini vehe nu ín vicó tándaha cán ta nandaji yéhe. <sup>11</sup>Tá nandihí já nandai cuu ndíhuhun na nasahan naxeen sítí cán já catí ndáha ná yéhe ta cáyuhú na já cáchí na já: “Cuná loho ndó yéhe nuú nde, xitoho”, cáchí na cáyuhú na ndíta na jatá véhe. <sup>12</sup>Anda já nanducú ñehe da tándaha cán tuhun nu ná já cáchí da já xihín ná: “Cō xini toho i yo cúu ndóhó”, nacachi da cán xihín ná —nacachi Jesús.

<sup>13</sup>Já nacachi tucu Jesús já:

—Sahá ña cán quéa xini ñúhú cuéntá vaha coo ri ndóhó va jáchi cō xini ndó ndá hora xinu cō quiví cacomí Ndióxi cuéntá saha ndo —cáchí Jesús.

*Ña nacaja in taa xihín jiuhún da  
(Lc. 19:11-27)*

<sup>14</sup>Ta já cáchí tucu Jesús já:

—Tá ná xinu cō quiví cacomí Ndióxi cuéntá saha ñayivi já cacuu a tátuhun ña nayaha xihín in dataa. Tá naxinu cō quiví quee da cuhun xicá da já nacana da java da cája chúun xihín dá. Ta já nandiquiahva da jiuhún da ndahá da cán ña ná candaa da ña. <sup>15</sup>Ta tá quiahva tiahva in in da cañehe da jiuhún quiahva já nasahan xitoho da nu dá. In táhan da cán nasahan xitoho da uhun mil nu dá ña ná candaa da ña. Ta inga da cán nañehe ivi mil. Ta inga da cán nañehe in mil. Anda já naquee xitoho da cuahan xicá da. <sup>16</sup>Ta ndaja coo da nandiquiahva xitoho uhun mil ndáha cán nacaja da ndahvi xihín jiuhún xitoho da ta já nañehe dá inga uhun mil chága jatá. <sup>17</sup>Ta jári da nasahan xitoho ivi mil nu cán nacaja da ndahvi xihín jiuhún cán ta nañehe dá inga ivi mil jatá. <sup>18</sup>Joo da nasahan xitoho in mil nu cán natiin da jiuhún xitoho da ta já nasahan da nacaa da in yávi ta já najánduxu da ña.

<sup>19</sup>Ta tá sa nayaha cuaha tiempo já nandicó cō xitoho mozo cán. Ta já nacasáhá cája vií da cuéntá xihín da cán. <sup>20</sup>Ta já naxinu da nañehe uhun mil cán nuú xitoho da ta já nandiquiahva da inga uhun mil ña nañehe dá jatá jiuhún cán nuú

xitoho da. Ta já cáchí da já xihín xitoho da: “Candehé ndo uhun mil nasahan ndó nuú i. Joo yóho ín inga uhun mil nañehe e jatá”, nacachi da xihín xitoho da. <sup>21</sup>Anda já nacachi xitoho da já xihín dá: “Vaha ndivaha nacajún. Mozo vaha ndivaha cúu yóhó jáchi chá va nasahan i nuun ta vaha nacaja chúun ña. Sahá ña cán quéa caja i ña ná cacomún cuéntá saha cuaha chága ñaha. Ta viti cuu coún xihín i ta já ná cajii chága inún”, nacachi xitoho da. <sup>22</sup>Tá nandihí já naxinu cō ri da nandiquehe ivi mil cán nuú xitoho da. Já nacachi da já xihín xitoho da: “Ivi mil nasahan ndó nuú i joo yóho ín inga ivi mil nañehe e jatá”, nacachi da xihín xitoho da. <sup>23</sup>Anda já nacachi xitoho da já xihín dá: “Vaha ndivaha nacajún. Mozo vaha cúu yóhó jáchi chá va nasahan i nuun ta nacaja chúun vahún ña. Sahá ña cán quéa caja i ña ná cacomún cuéntá saha cuaha chága ñaha. Ta viti cuu coún xihín i ta já ná cajii chága inún”, nacachi xitoho da. <sup>24</sup>Joo tá naxinu cō ri da nañehe in mil ndahá xitoho cán já nacasáhá cáchí da já xihín xitoho da: “Candehé ndo, xitoho i. Sa cándaa vaha ini i ña cúu ndó in taa ndacú ndivaha tuhun. Ta vatí cō xutu ndó nuú in ñúhu joo jáquee tá jáquee ndó nu á. Ta játaca ndó ña nuú cō naxutu ndó ña. <sup>25</sup>Sahá ña cán quéa nayihvi vi ta nasahan i najánduxu u jiuhún nasahan ndó nuú i tixi ñúhu. Joo yóho ín jiuhún ndo ndiquehe ndó ña”, nacachi da cán xihín xitoho da. <sup>26</sup>Anda já nacachi xitoho da já xihín dá: “Cō cúun in mozo vaha nuú i. Cúun da júsá ndivaha. Sa cándaa vaha inún ña jáquee e nu ñúhu ña cō xutu u, <sup>27</sup>ñá cán quéa ndá cuéntá quéa cō nasahan tóun jiuhún i banco já ná ndiquehe e jiquí á nuú na cán tá ná ndicó cō i, nduu”, nacachi xitoho da cán xihín dá. <sup>28</sup>Anda já nacachi da xihín java na ndúu cán: “Candaa ndó in mil jan ndahá da jan ta quiahva ndó ña nuú da sa cómí uxu mil jan. <sup>29</sup>Jáchi da cája chúun vaha ñehe chága ví da ñaha já quéa ná coo cuahá chága nu dá. Joo da cō cája chúun vaha janda ña chá cómí da ndindaa ndáha dá. <sup>30</sup>Ta mozo a váha toho jan tiin ndó da jácana ndó da nuú naá jatá véhe jan. Cán cúu nu ndáhyi ndaá ñayivi janda quiahva

cáhñá nuhu ná sahá ña ndóho ndivaha ini na”, nācachi xitoho da, —nācachi Jesús.

### *Tá ná cavii sahá ñayivi nu Ndióxi*

<sup>31</sup> Já nācachi tucu Jesús já:

—Tá ná xinu quivi quixi yehe, da nāchindahá Ndióxi nduu ñayivi ta quixi i xihin tóco ndihi na cúu tátō Ndióxi. Anda já cacōo i nu sácoo na sáhdá chuun ta já ndicáhu ndivaha i. <sup>32</sup> Ta nditaca ñayivi ndúu ndíjáá ñuyíví nuú i. Ta já casáhá i ndicahnda java táhan i na tá quiahva cája in da ndáá ndicachi tá sáhdá java da ndicachi xihin tijúhu ña ná a cáva táhan rí. <sup>33</sup> Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na coo cúu cuéntá mí i, na cúu tátuhun tijúhu cán. <sup>34</sup> Ta sahá ña cúu u da cómí cuéntá sahá ñayivi sahá ña cán queá cachi i já xihin na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá saha ndo jáchi cúu ndó na nācaja cuahá mé á ñamaní xihin. Jáchi janda tá cámaní cava sahá saha ñuyíví sa nasacu tiahva mé á nuú canduu ndó ña cacomí a cuéntá saha ndo. <sup>35</sup> Jáchi nasahan ndó naxixi i tá nācuico i. Ta nasahan ndó ticuúí nuú i tá nahichi ini i. Ta nandiquehe vaha ndó yehe tá nasacuu u da tóho naxinu i nu ndo. <sup>36</sup> Ta najasá ndo jáhma nuú i tá coo ñéhé e ña cándixi i. Ta tá nasaquíhvi já nāchindeé ndó yehe. Ta tá nasandacaan i vecaa já naxito nihni ndó yehe.” <sup>37</sup> Anda já ndaca tuhún java na nācaja vaha ta já cachi na já xihin i: “Ndá tañu queá naxini nde ña cuico ndó, xitoho nde ta já nasahan nde ña xixi ndó. Ta ndá tañu naxini nde ña íchi ndó ticuúí ta já nasahan nde ticuúí nu ndo. <sup>38</sup> Ta ndá tañu nasacuu ndó da tóho ta nandiquehe vaha nde ndohó. Ta ndá tañu naxini nde ña cámaní jáhma candixi ndó ta najasá nde ña nu ndo. <sup>39</sup> Ta ndá tañu queá naxini nde ña quíhvi ndo ta nāchindeé nde ndohó. Ta ndá tañu nasandacaan ndó vecaa ta naxito nihni nde ndohó.” <sup>40</sup> Anda já cachi yehe, da cómí cuéntá sahá ñayivi já xihin ná: “Mé a ndaa ná cahan i xihin ndó ña tá nācaja ndó a xihin na cúu cuéntá mí i, na coo saha nuú ñayivi ñuyíví já cúu á tátuhun nācaja ndó a xihin mí i”, cachi i xihin na ndúu xoo cuáha i.

<sup>41</sup> Anda já casáhá cachi i já xihin na ndúu xoo íti i cán já: “Caxoo ndó nuú i jáchi cúu ndó na nācatavi cháhan ta cuhun ndó indayá cañuhu ndó anda ama cáa quivi. Jáchi ña jan cúu ña nasacu tiahva Ndióxi ndacaan tiñáhá sacuahá xihin tátō mé rí. <sup>42</sup> Jáchi coo nasahan ndó ña xixi i tá nācuico i ta ni coo nasahan ndó ticuúí nuú i coho i tá nahichi ini i. <sup>43</sup> Da tóho cúu u naxinu coo i tañu ndó ta coo nandiquehe vaha ndó yehe. Ta nandimaní i ña candixi i ta coo nasahan ndó in jáhma loho nuú i. Nasaquíhvi ta nasandacaan i vecaa ta coo naxito nihni ndó yehe”, cachi i xihin na ndúu xoo íti i cán. <sup>44</sup> Anda já nducú ñehe ri na cán tuhun nuú i já cachi na já xihin i: “Ndá tañu queá naxini nde ña cuico ndó ta ndá tañu queá naxini nde ña íchi ini ndó ticuúí ta ndá tañu nasacuu ndó da tóho ta ndá tañu nandimaní jáhma ndo ta ndá tañu nasahin quíhvi ndo ta ndá tañu nasandacaan ndó vecaa ta coo nāchindeé nde ndohó”, cachi na ndúu xoo íti i cán xihin i. <sup>45</sup> Anda já cachi i já xihin na coo cúu cuéntá mí i já: “Mé a ndaa ná cahan i xihin ndo ña tá ta coo nācaja ndó xihin ñani táhan ndó, na coo saha nuú ñayivi ñuyíví já queá coo nācaja ndó ña xihin yehe”, cachi i xihin na coo cúu cuéntá mí i. <sup>46</sup> Ta já yaha ndihi na cán cuhun ná indayá anda ama cáa quivi. Ta na nācaja vaha cán yaha na nu Ndióxi catacu na anda ama cáa quivi —cáchi Jesús.

## 26

### *Ndítuhún jehé na tiin na Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Tá nandihí nācahan Jesús tóco ndihi ña yóho xihin ñayivi cán já nācachi a xihin na xíca tuun xihin á cán já:

<sup>2</sup> —Sa cándaá ini ndó ña tixi ivi quivi coo vicó pascua ta já ndiquiahva na yehe, da nāchindahá Ndióxi nduu ñayivi ndahá na cata caa yehe ndica crúxu —nācachi Jesús xihin na xíca tuun xihin á cán.

<sup>3</sup> Anda já na sacuahá nuú jutú xihin na jánahá ley Moisés xihin na sacuahá veñuhu nandique táhan na yéhé Caifás, da cúu sacuahá chága nu ndíhi jutú cán. <sup>4</sup> Ta najándique táhan tuhun na ndá quiahva

caja na tiin jehé na Jesús ña ná cahní ñahá na. <sup>5</sup> Já cáhí xihín táhan na já:

—Joo a tীন toho í da tañu mé víco jáchi tiahva náá ndivaa ñayivi —ñacachi na.

*Tá nachojo in ñáñáha perfume jini Jesús  
(Mr. 14:3-9; Jn. 12:1-8)*

<sup>6</sup> Ta ndaja coo íin Jesús ñuu Betania vehe Simón, da cahan na xihín: taa nandoho cuehe táhyi. <sup>7</sup> Já naxinu in ñáñáha nu á ta cánee in yúyú ña alabastro ndáha ña. Ta ini mé yúyú cán ñúhu perfume, dó yahvi ndivaha. Ta já naxinu ña najácuyu ña do jini Jesús nani íin coo a nu mesa cán. <sup>8</sup> Tá naxini na xica tuun xihín Jesús cán ña yóho já ñacasáhá na xójo ini na já cáhí na já:

—Ndá cuénta quéa tívi uun perfume yahvi ndivaha yóho. <sup>9</sup> Jáchi cuu jicó yó do ta já quehé cuhá jiuhún saha do, nduu ta já cuu jasá yo jiuhún cán nuú na ndahví —ñacachi na cán.

<sup>10</sup> Ta ñacandaá ini Jesús ña cáhvi ini na cán ña cán quéa ñacasáhá cáhí a já xihín ná:

—Ndá cuénta quéa cája cuehe ndó xihín ñáñáha jan jáchi ña vaha quéa ñacaja ña yóho xihín i. <sup>11</sup> Jáchi na ndahví níi tiempo canduu na tañu ndó joo yehe a cóo tuun toho i xihín ndo. <sup>12</sup> Jáchi tá najácuyu ña perfume yiquí cuñu i já ñacaja tiahva ña yehe ná coo tiahva vi tá ná casaá quivi nduxu. <sup>13</sup> Mé a ndaa ná cahan i xihín ndo ña níi cúu ñuyivi nuú caca nuu ñayivi cahan na tuhun vaha sahá i ndicani na ña ñacaja ña yóho xihín i já ndicuhun ini na saha ña —ñacachi a.

*Jicó túhún Judas Jesús  
(Mr. 14:10-11; Lc. 22:3-6)*

<sup>14</sup> Ta ndaja coo in táhan da uxu ivi xica tuun xihín Jesús, da nani Judas Iscariote ñasahan da cahan da xihín na sacuaaha nuú jutú. <sup>15</sup> Ta já cáhí da já xihín ná:

—Ndaja quiahva ndó nuú i tá ná ndiquiahva i Jesús nu ndo —ñacachi Judas xihín na sacuaaha nuú jutú cán.

Anda já ñasahan na oco uxu jiuhun cúxú nu dá sahá Jesús. <sup>16</sup> Ta sa mé nani já ñacasáhá Judas ndúcú da ndaja cuu caja da ndiquiahva da Jesús ndáha ná.

*Tá naxijini ndayí Jesús xihín na xica tuun xihín á*

*(Mr. 14:12-25; Lc. 22:7-23; Jn. 13:21-30; 1 Co. 11:23-26)*

<sup>17</sup> Mé quivi nuú víco xíxi na pan, ña co quee yusá naxaa xihín cán já naxinu na xica tuun xihín Jesús cán nu á. Já ñacachi na já xihín á:

—Ndáchí cúní ndó cuhun nde caja ndívi nde cajini ndó vicó pascua —ñacachi na xihín á.

<sup>18</sup> Anda já ñacachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jánaaha ndehe cáhí xuhun: Cuhun i vehe ndó cajini i vicó pascua xihín na xica tuun xihín i jáchi sa nandindaa tiempo cuhun i viti” —ñacachi Jesús.

<sup>19</sup> Já ñaquee na cán ñasahan na ñacaja na tá íin ñasahnda Jesús nu ná ta cán ñacaja ndívi na ña cajini na vicó pascua.

<sup>20</sup> Ta ndaja coo tá ñacuaá já ñasacoo Jesús nu mesa xihín ndíhuxu ivi na xica tuun xihín a cán. <sup>21</sup> Ta nani xijini na já ñacasáhá cáhí a já:

—Mé a ndaa ná cahan i xihín ndó ña in táhan ndó, na xica tuun xihín i cacuu da jicó túhún yehe —ñacachi Jesús xihín ná.

<sup>22</sup> Anda já ñacasáhá na cán cácuéha ndivaha ini na já ñacasáhá tá in tá in na ndáca tuhún na Jesús já cáhí na já xihín á:

—Á yehe cacuu da jicó túhún ndo, xitoho i —cáhí na ndáca tuhún ñahá na.

<sup>23</sup> Anda já nanducú ñehe Jesús tuhun nu ná já ñacachi a já xihín ná:

—Da ñaquihvi ndáha ini coho xíxi i, da cán cúu da jicó túhún yehe. <sup>24</sup> Yehe cúu da ñachindahá Ndióxi nduu ñayivi ta ndítahan nuú i quivi i tá íin cáhí tuhun Ndióxi. Joo ndahví nahá ñacuu da jicó túhún yehe. Janda vaha chága ná a cácu da, nduu —ñacachi Jesús.

<sup>25</sup> Anda já nandicaahan Judas, mé da jicó túhún ñahá cán já ñacachi da já xihín Jesús:

—Xitoho i, á yehe cúu da jicó túhún ndo —ñacachi da xihín á.

—Jivi mún cúu dá —ñacachi Jesús xihín dá.

<sup>26</sup> Ta nani xíxi na ndúu na ñatiin Jesús pan já nandiquiahva ndixahvi nu Ndióxi. Tá nandihi já ñasahnda java ña ta

nandicahnda ña nuú na xíca tuun xihín á cán. Ta já nacachi a já xihín ná:

—Júhun ndó jáchi ña yóho cúu tátuhun yiquí cuñu i —nacachi a.

<sup>27</sup> Tá nandihí já natiin a in vaso nu ñúhu tó uva já nandiquiahva ndixahvi nu Ndióxi já nacachi a já xihín na xíca tuun xihín á cán já:

—Coho ndihí ndó dó ñúhu ini vaso yóho. <sup>28</sup> Jáchi dó yóho cúu dó tátuhun ñi i, dó cuíta sahá cuahá ñayivi já ná ndoo cuachi na. Tá ná cuíta ñi i já candaá ini ndó ña najáxinu coo Ndióxi tuhun a nasahan sanahá. <sup>29</sup> Mé a ndaa ná cahan i xihín ndo ña a cóho ga i tó uva janda quiahva ná xinu coo quiví coho tucu u inga dó vaha chága xihín ndo tá ná xinu quiví cacomí Ndióxi, tátá i cuénta sahá ñayivi —nacachi a.

*Cáxi tuhun Jesús ña chijehé tuhún Pedro ña xini da mé á*

(Mr. 14:26-31; Lc. 22:31-34; Jn. 13:36-38)

<sup>30</sup> Ta tá nandihí naxita na in canto já naquee na cuahan na yucu yitó olivo. <sup>31</sup> Ta já nacachi Jesús já xihín ná:

—Mé ñuú viti jándacoo ndihí ndó yehe cuhun ndó sahá ña ndoho i. Já cáchi tuhun Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cuhun ri”, cáchi tuhun Ndióxi. <sup>32</sup> Joo tá sa ná nditacu tucu u já cuhun jihna ñúhu yehe estado Galilea anda já cuhun mé ndó —nacachi Jesús.

<sup>33</sup> Anda já nanducú ñehe Pedro tuhun nu á já nacachi da já xihín á:

—Vatí ná jándacoo tóco ndihí na mé ndó sahá ña ndoho ndó joo a jándacoo toho i ndohó —nacachi da xihín á.

<sup>34</sup> Anda já nacachi Jesús já xihín dá:

—Mé a ndaa ná cahan i xuhun ña mé ñuú viti tá cámaní cana chéle já chijehé tuhún ña xínun yehe uní táhnda —nacachi Jesús xihín dá.

<sup>35</sup> Anda já nacachi tucu da já:

—Vatí ná quivi i xihín ndo joo a chíjehé tuhun toho i sahá ña xini i mé ndó —nacachi da xihín Jesús.

Ta quiahva já nacachi tóco ndihí java ga na xíca tuun xihín á cán.

*Tá xíca tahví Jesús nu Ndióxi in nuú nani a Getsemani*

(Mr. 14:32-42; Lc. 22:39-46)

<sup>36</sup> Anda já naxinu coo Jesús xihín na xíca tuun xihín á cán in nuú nani a Getsemani. Já nacachi a já xihín ná:

—Yóho cacoo ndó nani ná cuhun i cáca caça tahví i nu Ndióxi —cáchi a.

<sup>37</sup> Ta ndáca Pedro xihín ndiví da cúu jahyi Zebedeo cuahan xihín á. Ta já nacasahá cácuéha ndivaha ini a ta a juú quiahva táhvi ini a. <sup>38</sup> Anda já nacachi a já:

—A juú quiahva cácuéha ini i chí quivi i cúu ini i. Yóho candati tóo ndó yehe ta coto a cúu ndo —nacachi Jesús.

<sup>39</sup> Ta já naquee mé á nasahan loho chága chí nuu já nacaxítí a janda quiahva naxinu taan nu ñúhu. Ta já cáchi a já:

—Tátá Ndióxi, tá ta ná cuu caja ndó ñamaní ña ná a ndóho i ña ihvi ndivaha vaxi nuú i ndoho i. Joo ná coo tá lín cuni mé ndó ta ná a cóo toho ña cuni yehe —cáchi Jesús.

<sup>40</sup> Tá nandihí já nandicó coo a nuú najándacoo a na xíca tuun xihín á cán ta já nandiñehe á na quiji na ndúu na. Anda já nacachi a já xihín Pedro:

—Á coo nacuu candita ndó ni in hora. <sup>41</sup> Xini ñúhu coo tiahva ndó ta caça tahví ndo nu Ndióxi já ná a cóto ndojó ri quini ndohó. Jáchi ínimá ñayivi cuni a ndinducú a Ndióxi joo yiquí cuñu na coo lín tiahva caja ña cuni Ndióxi —nacachi Jesús.

<sup>42</sup> Anda já naquee tucu Jesús táhnda ivi cuahan tucu a caça tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamaní ná a ndóho ini i ña jan já ná coo tá lín cuni mé ndó coo —cáchi a.

<sup>43</sup> Tá nandihí já nandicó coo tucu a nu ndúu na xíca tuun xihín á cán ta nandiñehe á na quiji tucu na ndúu na jáchi naquehe a mahnú na. <sup>44</sup> Já naquee tucu a nasahan xíca tahví a nu Ndióxi táhnda uní ta sa mé tuhun cán nacahan tucu a. <sup>45</sup> Anda já naquixi tucu a nu ndúu na xíca tuun xihín á cán já nacachi a já xihín ná:

—Vatí cuni ndó cuju ndó ta vatí cuni ndó ndiquehe ndée ndó joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi

nduu ñayivi ndahá ñayivi cája cuachi.  
<sup>46</sup> Cuahán ndacoo ndó ná cohō. Jáchī sa vaxi da jicó tühún yehe —cáchi a.

### Tá natiin na Jesús

(Mr. 14:43-50; Lc. 22:47-53; Jn. 18:2-11)

<sup>47</sup> Ta nani cáhan yī va Jesús já naxinu Judas, da cúu in táhan uxu ivi na xica tuun xihin á cán. Ta ndáca da cuahá ñayivi, ñéhe na machítí xihin yító viti. Ta na cán cúu ná na naquixi cuéntá na sacuaḥa nuú jutū xihin cuéntá na sacuaḥa veñuhu.

<sup>48</sup> Ta mé Judas, da ndiquiahva ñahá cán sa naçandoo da xihín na cán ña tatí yúhu dá sajóho Jesús jáchi naçachi da já xihín ná:

—Ndá da ná tatí yuhú u sajóho, da cán cúu dá tiin ndó —naçachi da.

<sup>49</sup> Chí ivi laá naçativi da nu Jesús já naçahan Ndióxi dá xihín á ta já naçatí yúhu dá sajóho mé á. <sup>50</sup> Anda já naçachi Jesús já xihín dá:

—Cama chá cajún ña, amigo.

Anda já naçayati na nu Jesús ta natiin tuun na a.

<sup>51</sup> Joo in táhan da xica tuun xihín Jesús cán, naçavá da machítí da ta já naçhitúhun da in johō da cúu mozo nuú da sacuaḥa chága nu ndíhi jutū cán. <sup>52</sup> Anda já naçachi Jesús já xihín dá:

—Chicaḥan vaḥa machítí jan jáchi ndá na sáhní xihín machítí, xihín machítí quivi ri na cán va. <sup>53</sup> Á co cándaḥa inún ña cuu caça taḥví i nu Ndióxi, tátá i ña ná chindahá mé á cuahā ndivaha tátō mé á ña ná chindeé na yehe. <sup>54</sup> Cuu caja i ña joo xíní ñúhú yaha tá yaha ña naçahyí nuú tuhun Ndióxi ndoho i —cáchi Jesús.

<sup>55</sup> Ta já naçachi Jesús já xihín na naxinu tiin ñahá cán:

—Cája ndó xihín i tátuhun cája na xihín ta cuīhná jáchi naçqueta ndó vaxi ndó tiin ndó yehe xihín machítí ta xihín yító viti. Ta ndijáá níi quivi naçahin i xihín ndo ini veñuhu cáhnu jánaḥa i tuhun Ndióxi nu ndo ta ni in tañu coo natiin ndó yehe. <sup>56</sup> Joo tóco ndihi ña yóho yáha ña já ná xinu coo ña naçahyí na profeta saḥá i ini tuhun Ndióxi sanahá —cáchi a.

Tá nandihí já naxinu ndihi na xica tuun xihín Jesús cán cuahān na ta najándacoo na mé á.

### Tá ñéhe na Jesús cuahān na nuú nataca ndihi na sacuaḥa

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Tá natiin na cán Jesús já ñéhe na a cuahān na nuú Caifás, da cúu sacuaḥa chága nu ndíhi jutū. Ta cán sa nanditútú na jánaḥa ley Moisés ndúu na xihín na sacuaḥa veñuhu. <sup>58</sup> Joo ndaja coo naçandico xicá Pedro Jesús anda quiahva naxinu da yéhe vehe da cúu sacuaḥa chága nu ndíhi jutū cán. Ta já nandihvi da naçacoo da nu ndúu soldado cán sándeḥé da ndá quea caja na xihín Jesús.

<sup>59</sup> Ta na sacuaḥa nuú jutū xihín tóco ndihi na cómi cuéntá saḥá na Israel nataca na cán ndúcú na cuachi jácojo na jatá Jesús já ná cuu cahní ñahá na. <sup>60</sup> Joo coo nañehe ná cuachi jíquí ña cuu chinúu na jatā mé á vatí naxinu coo cuahá na naçahan ña tuhún saḥá. Anda jáví naxinu coo ivi ga da cáhan ña tuhún saḥá. <sup>61</sup> Já naçachi da já:

—Naxini johō nde naçachi da jan já: “Jánditani i veñuhu cáhnu cán ta jácandichi tucu u ña tixi uní quivi”, cáchi da —naçachi na cán chicaḥan na cuachi jatá Jesús.

<sup>62</sup> Anda já nandaca ndichi da cúu sacuaḥa chága nu ndíhi jutū cán já cáchi da já xihín Jesús:

—Á chí a ndúcú ñehún tuhun nuú nde saḥá cuachi jácojo na jatun —naçachi da.

<sup>63</sup> Joo ni in tuhun coo nanducú ñehe Jesús nu dá. Anda já naçachi da cúu sacuaḥa chága nu ndíhi jutū cán já xihín á:

—Tavún quivi Ndióxi, ña tácu ín indiví ta cachún xihín nde á jivi ndusa yóho cúun Cristo, da cúu in tühún jiní já jahyí Ndióxi, da naçindahá mé á cacomí cuéntá saḥá ñayivi —naçachi da xihín Jesús.

<sup>64</sup> Já nanducú ñehe Jesús tuhun nu dá já naçachi a já:

—Ajan, jivi yehe cúu u da cáchi ndó jan. Ta viti ná caḥan i xihín ndo ña vaxi quivi tá cuni ndó yehe, da naçindahá Ndióxi nduu ñayivi cacoo i xoo cuáha Ndióxi, mé á ín cuahā ndée. Ta já cuni ndó yehe ndicó coo i ñuyíví yóho tañu vico tá ná quixi i chí indiví —naçachi a.

<sup>65</sup> Tá naxini johō da sacuaḥa chága nu ndíhi jutū cán ña yóho já nandatá da jáhma

dá ña ná candaa ini ñayivi ña xójo ini da. Ta já ñacachi da já:

—Ndája núu da yóho Ndióxi. Coó chicuu chága yó ñayivi ná cahan na xihin yo jáchi sa ñaxini johó ndihí ña ñacanáhá da yóho xihin Ndióxi. <sup>66</sup> Ta ndaja xíní ndó caja í xihin dá viti —ñacachi da.

—Anda já ñacachi ndihi na cán já:

—Íin cuachi da ñan ta ndítahan cuhun da quivi da —ñacachi na cán.

<sup>67</sup> Ta já ñacasáhá na xihnu ndaa na tójií na nu á. Ta ñacasáhá túxú na yiquí a. Ta java na cáni jahndá nuu á. <sup>68</sup> Ta já cáchi na já xihin á:

—Cahan xihin nde yo ñacani yohó tá ta mé a ndaa cúun Cristo, da ñachindahá Ndióxi cacomí cuénta sahá ñayivi —cáchi na xihin á.

*Tá ñachijehé tuhun Pedro ña xini da Jesús*  
(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Ta ndaja coo íin coo Pedro yuhú yéhe da cúu sacuahá chága nu ndíhi jutú cán. Já ñacativi in ñáñáha, ña cája chúun mé vehe cán. Já ñacasáhá cáchi ña já xihin dá:

—Yohó cúun in táhan da xica tuun xihin Jesús, da estado Galilea —ñacachi ña cán xihin dá.

<sup>70</sup> Joo ndaja coo ñachijehé tuhun Pedro nu ndíhi na cán ña xini da Jesús. Já cáchi da já:

—Co xini toho í ndá saha cáhun —ñacachi da xihin ña cán.

<sup>71</sup> Ta tá sa ñaqueta da yéhe cán já ñaxini inga ñáñáha da já ñacasáhá cáchi ña já xihin tóco ndihi na ndúu cán:

—Ñaxini í ñaxica tuun da yóho xihin Jesús, da ñuu Nazaret cán —ñacachi ña cán.

<sup>72</sup> Ta já ñacasáhá tucu Pedro chíjehé tuhun da ña xini da Jesús ta ñatavá da quivi Ndióxi já cáchi da já:

—Co xini toho í ndá da cúu da ñan —ñacachi Pedro xihin na cán.

<sup>73</sup> Chá va ñayaha ña yóho ta ñacayati java na ndúu cán nu Pedro. Já ñacachi na já xihin dá:

—Mé a ndaa táhyí jivi táhan na xica tuun xihin Jesús cúu ri yohó va jáchi cáhun tátuhun cahan na cán —ñacachi na xihin dá.

<sup>74</sup> Anda já ñacasáhá Pedro cánahá da ta ñatavá da quivi Ndióxi ña co xini da Jesús. Já cáchi da já:

—Co xini toho í ndá da cúu da ñan —ñacachi da.

Tá ñacachi da já chí ivi laá ñacana chéle. <sup>75</sup> Anda já ñandicuhun ini Pedro ña ñacahan Jesús xihin dá tá ñacachi a xihin dá: “Tá cámaní cana chéle sa chíjehé tuhún ña xihun yehe uní tañu.” Anda já ñaqueta da jatá véhe ta a juú quiahva sácu da jáchi cácuéha ndivaha ini da.

## 27

*Tá ñandiquiahva na Jesús ndáha Pilato*  
(Mr. 15:1; Lc. 23:1-2; Jn. 18:28-32)

<sup>1</sup> Tá ñativi inga quivi itaan já ñandique táhan ndihi na sacuahá nuú jutú xihin na sacuahá veñuhu ña ndituhún na ndá quiahva jácojo na cuachi jatá Jesús já ná cuu cahní ñahá na. <sup>2</sup> Sahá ña cán quéa ñacató na mé á ta ñéhe na a cuahan na ndiquiahva na mé á nu Pilato, da cúu gobernador ñuu cán.

*Tá ñaxihi Judas*

<sup>3</sup> Ta ndaja coo ñaxini Judas, da ñajicó tuhún Jesús ña ñasacu ini na cán cahní na Jesús. Já ñacahvi ini da sahá ña núu ñacaja da chí ndáva da cuahan da nducú ñehe da ndíhoco uxu jiuahun cúxú nuú na sacuahá nuú jutú xihin nuú na sacuahá veñuhu. <sup>4</sup> Já ñacachi da já xihin na cán:

—Cuachi cáhnu ndivaha quéa ñacaja í jáchi ñajicó tuhún í in da coó cuachi.

Já ñacachi na cán já xihin dá:

—Co sáhní toho nde mé nde sahá ña yóho. Mún xini ndá quéa ñacajún —ñacachi na cán xihin dá.

<sup>5</sup> Anda já ñacuihna Judas jiuahun cán ini veñuhu cáhnu. Ta já ñaqueta da ñasahan da ñacata caa da mé dá já ñasahní da mé dá.

<sup>6</sup> Ta já najátaca na sacuahá nuú jutú jiuahun cán já ñacachi xihin táhan na já:

—A váha toho ña ná chicaan yó jiuahun yóho ini sato nu táan na jiuahun jóco na nu Ndióxi jáchi ndii ñaxihi sahá ña yóho —ñacachi na.

<sup>7</sup> Ta tá sa ñandituhún vaha xihin táhan na já ñaxeen na in ñúhu xihin jiuahun cán.

Mé ñúhu cán naní a ñúhu da cávaha ñaha xihín ñundáhyi. Ta ñúhu cán cacuu a nu jánduxu na na tóho. <sup>8</sup> Sahá ña cán quéa nasacu na quivi ñúhu cán ña cananí a yójo nuú naxita nji. Ta já naní a janda viti. <sup>9</sup> Ta xihín ña yóho naxinu coo nuú ña naca hyi profeta Jeremías sanahá tá naca chi da já sahá Jesús: “Natiin na ndíhocó uxu jiu hun cúxú jáchi ña jan nasacuu yahvi nasacu na Israel chahvi na saha dá. <sup>10</sup> Ta xihín mé jiu hun cán naxeen na ñúhu naní a ñúhu da cávaha ñaha xihín ñundáhyi jáchi quiahva já nasahnda Ndióxi chuun nuú i caja i”, cáchi tuhun Ndióxi.

### *Tá cándichi Jesús nu Pilato*

*(Mr. 15:2-5; Lc. 23:3-5; Jn. 18:33-38)*

<sup>11</sup> Ta ndaja coo cándichi Jesús nu Pilato, da cúu gobernador. Ta já nacasahá da cán ndáca tuhún ñahá da já cáchi da já xihín á:

—Á mé a ndaa cúu in rey, da cómi cuénta sahá na Israel.

—Ajan. Jivi ndusa cúu u tá quiahva cáchi ndó jan —naca chi Jesús xihín dá.

<sup>12</sup> Ta na sacua ha nuú jutu xihín na sacua ha veñuhu nacha caan na cuachi jatá Jesús joo ni in tuhun coo nanducú ñehe a nu ná. <sup>13</sup> Anda já naca chi Pilato já xihín Jesús:

—Á co xini johu tohún ndaja cuahá nuú cuachi jácojo na jatun —naca chi da.

<sup>14</sup> Joo ni in tuhún tuhun coo nanducú ñehe Jesús nu dá. Chí catóntó ndivaha da cúu gobernador sahá ña co cáhan Jesús.

### *Sácú ini na ndaja caja na ña ná quivi Jesús*

*(Mr. 15:6-20; Lc. 23:13-25; Jn. 18:38-19:16)*

<sup>15</sup> Tañu mé víco pascua nasahin costumbre da cúu gobernador cán sá janí da in táhan da ndácaan vecaa. Ndá da cúni ñayivi janí da, da cán cúu da janí da. <sup>16</sup> Mé tañu já nasandacaan in da naní Barrabás vecaa. Níi cúu naxita nuu tuhun sahá da yóho. <sup>17</sup> Ta tá natata ndihi ñayivi já nandaca tuhún Pilato na já naca chi da já xihín ná:

—Yo cúni ndo ña ná janí i. Á Barrabás janí i á Jesús, da cáchi na cúu Cristo, da nachindahá Ndióxi cacomí cuénta sahá ñayivi. Yo janí i cúni ndo —naca chi da.

<sup>18</sup> Naca chi Pilato ña yóho xihín ná jáchi sa cánda a vaha ini da ña sahá ña cáhivi ini na

xihín Jesús sahá ña cán quéa nandiquiahva na mé á nu dá. <sup>19</sup> Ta naní in coo da nu sácoo da sáhdá da chuun vechúun cán já nachindahá ñájihí da tuhun nu dá já naca chi ña já: “Á quíhvi ndáhun Jesús jáchi cúu dá in ta ndaa. Nuú anda véhe nasaní i naca cha Jesús ta ndícani ndivaha ini i sahá”, naca chi ña.

<sup>20</sup> Joo ndaja coo na sacua ha nuú jutu xihín na sacua ha veñuhu cán najaca han na ñayivi ña ná caa na nu Pilato ña ná janí da Barrabás ta ná cahní da Jesús. <sup>21</sup> Anda já naca chi da cúu gobernador cán já xihín ná:

—Yo cúni ndó ña ná janí i.

—Anda já naca chi na cán já:

—Barrabás jan va janí ndó —naca chi na xihín dá.

<sup>22</sup> Anda já naca chi tucu Pilato já xihín ná: —Ndía cúni ndó caja i xihín Jesús, da cáchi ndo cúu Cristo.

—Anda já naca chi tóco ndihi na cán já:

—Cata caa ndó da ndica crúxu.

<sup>23</sup> Anda já naca chi tucu Pilato já xihín ná: —Ndá cuachi naca cha da, vaha —naca chi da xihín ná.

Joo xihín ña yóho ví ga ví nacasahá cáyuhú na já cáchi na já:

—Cata caa ndó da ndica crúxu.

<sup>24</sup> Ta tá naxini Pilato ña co yaa na cán ta ví ga ví ndivaa na já natiin da ticuii ta nandahá da nu ndihi ñayivi cán ta já naca chi da já xihín ná:

—Xihín ña yóho jánaha i nu ndo ña coo cuachi toho ndójo i saha ndá ña ná caja ndó xihín da yóho jáchi coo cuachi toho da yóho. Jata mé ndó ná cuhun ndihi va —naca chi da xihín ná.

<sup>25</sup> Anda já naca chi tóco ndihi na cán já:

—Vaha ná candojo nde cuachi ta janda jahyi nde viti ná candojo na cuachi sahá ña ná quivi da —naca chi na cán xihín dá.

<sup>26</sup> Anda já najaní Pilato Barrabás. Ta tá nandihí najacaxáhan na Jesús já nandiquiahva da a ndáha ná ña ná cata caa na a ndica crúxu.

<sup>27</sup> Anda já ñehe soldado cuénta gobernador cán Jesús yuyehé vechúun. Já najátaca soldado cán java ga táhan da ta cán naca va toyivi da mé á ndúu da. <sup>28</sup> Tá nandihí já natavá na jáhma á. Anda já nacinúu na in jahmá cuahá túun jatá. <sup>29</sup> Ta

ja nacinuu na in tivivi iñu jini á. Ta nachee na in ndoo ndaha cuaha. Ta ja nacasaha na caxiti na nu á ja sacu ndaa ichi ñaha na ja cachi na ja xihin á:

—Cáhnú nahá ná cacuu yóhó, da cúu rey nuú na Israel —nacachi na.

<sup>30</sup> Ta nacasaha xihnu ndaa na toji na nuu á. Ta ja canda na ndoo cán ndaha á ta cani na yiqui jini a xihin do. <sup>31</sup> Ta tá sa nandihí nasacu ndaa ñaha na ja nacanda na jáhma nacinuu na jatá cán ta najacandixi tucu na a xihin jáhma mé á. Anda ja ñehe na a cuahan na cata caa na a ndica cruxu.

*Tá nacata caa na Jesús ndica cruxu*

*(Mr. 15:21-32; Lc. 23:26-43; Jn. 19:17-27)*

<sup>32</sup> Ta tá ñehe na Jesús cuahan na cata caa na a ja nanditahan na in da naní Simón, da ñuu Cirene. Ta nacaja ndusa na xihin dá ña ná ndicojo da cruxu nuú cata caa na Jesús. <sup>33</sup> Ta naxinu coo na xiqui naní Gólgota. Tuhun yóho cuni cachi a: nu nduu lásá yiqui jini ndii. <sup>34</sup> Mé cán nasahan na vino nu á, dó nacava táhan xihin ña ova ña ná coho a do. Joo tá naxito ndojó a do coo naxeen toho a coho a do.

<sup>35</sup> Ta tá sa nandihí nacata caa na a ndica cruxu ja naquehe na jáhma a nandicahnda nu táhan na. Joo jihna ñuhú nasajiqui na sahá ta da naquee vaha cán, da cán nandiquehe jáhma á. Xihin ña yóho naxinu coo nuú ña nacyhyí profeta sanahá tá nacyhyí da ja: “Nandicahnda nu táhan mé ná cotó níhnu i ta ja nasajiqui na sahá cotó maá i ta da naquee vaha cán nandiquehe da ña”, cachi tuhun Ndióxi. <sup>36</sup> Ta ja nasacoo soldado cán nduu na ndáá ñaha na. <sup>37</sup> Ta jini ndica cruxu cán nacyhyí na ndá saha nacata caa na a ja cachi a ja: “Da yóho cúu Jesús, da cúu rey nuú na Israel.”

<sup>38</sup> Ta sa mé ja nacata caa ri na ivi taa cuihná xihin Jesús: in da xoo cuaha ta inga da xoo íti. <sup>39</sup> Chí cáva jini mé ñayivi yáha cán canahá na xihin á. <sup>40</sup> Ta ja cachi na ja:

—Yóhó cáhún jánditaní veñuhu cáhnu cán ta tixi uní víxí quiví cáhún jácandichi tucún ña. Tá ta mé a ndaa cúun jahyi Ndióxi jácacu mún ta cuahán nuu ndica cruxu jan —nacachi na xihin Jesús.

<sup>41</sup> Ta quiahva ja nacaja ri na sacuahá nuú jutú xihin na janahá ley Moisés xihin na

sacuahá veñuhu. Sacu ndaa na a ja cachi na ja:

<sup>42</sup> —Najáca cu da java ga ñayivi ta viti chí a cuú caja da jácacu da mé dá. Tá ta mé a ndaa cúu dá rey nuú na Israel, ná nuu da ndica cruxu viti ñuhú ja ná candusa nde da. <sup>43</sup> Cándéé ini da Ndióxi ta cachi da cúu da jahyi Ndióxi ja quéa ná quixi Ndióxi chindeé a da tá ta mé a ndaa quihvi ini a da —nacachi na cán canahá na xihin Jesús.

<sup>44</sup> Quiahva ja canahá ri ndívi taa cuihná tácaa in in xoo jini a cán xihin á.

*Tá naxihi Jesús*

*(Mr. 15:33-41; Lc. 23:44-49; Jn. 19:28-30)*

<sup>45</sup> Tá naxinu coo caxivi ndaa nacanaá níi cúu ñuyiví ta janda caa uní sahini ja nacasaha nandiyehé tucu. <sup>46</sup> Ta sa mé hora ja nacayuhú cóhó Jesús ja nacachi a ja:

—Elí, Elí, lama sabactani —ña yóho cuni cachi a: Ndióxi mí i, Ndióxi mí i, ndávaha najandacoo ndaha ndó yehé.

<sup>47</sup> Ta java na ndíta cán tá naxini johó na tuhun cachi a ja nacachi na ja:

—Cána da profeta Elías —nacachi na cán.

<sup>48</sup> Ivi laá xínu in da nasahan da naxindaxi da in ticoto ini vino iyá. Ta nacató da ña nuú in yitó ndoo ja nachee da do yati yuhu Jesús ña ná coho a do. <sup>49</sup> Joo na java ndíta cán nacachi na ja xihin dá:

—Cóho candehé yo á quixi Elías jácacu a da —nacachi na cán.

<sup>50</sup> Anda ja nacayuhú cóhó tucu Jesús ja naxihi a. <sup>51</sup> Ta ndaja coo nandatá java ndaa jáhmá ndeé ña sáji nuu nuú yii ndivaha veñuhu cáhnu ñuu Jerusalén cán. Janda jini á ta janda sahá nandata. Ta mé hora ja nataan ta ndijáa yuu tóto nduu cán nandata. <sup>52</sup> Ta nanuna cáva nu nasañuhu na naxihi ta cuahá ñayivi, na nasacuu cuéntá Ndióxi nanditacu tucu na. <sup>53</sup> Ta tá sa nanditacu tucu Jesús ja naxinu na naqueta cáva cán ñuu Jerusalén ta cuahá ndivaha ñayivi naxini ñaha.

<sup>54</sup> Ta da cúu sacuahá nuú soldado cuéntá Roma xihin da ndáá Jesús xihin da cán tá naxini da ña nataan ta naxini da java ga ña nayaha cán ja nacasaha yihví ndivaha da. Já nacachi da ja:

—Mé a ndaa táhyí cúu da yóho in tuhún jini ja jahyi Ndióxi —nacachi da.



<sup>55</sup> Ta mé cán nasandita cuahá najihí sándehe xicá na Jesús. Mé na cán cúu na nacaja ndíví ñahá nu Jesús tá nandico na mé á naquixi na janda estado Galilea. <sup>56</sup> Tañu najihí cán nasandacaan María, ñá ñuu Magdala xihin María, ñá cúu náná Jacobo xihin José. Ta cán nasandacaan ri ñá cúu náná ndíví da cúu jahyi Zebedeo.

*Tá nachicaan na yiquí cuñu Jesús ini cáva  
(Mr. 15:42-47; Lc. 23:50-56; Jn. 19:38-42)*

<sup>57</sup> Ta ndaja coo nasahin in da cuicá naní José, da ñuu Arimatea. Mé da yóho nasacuu da in táhan da nasaxica tuun xihin Jesús. Ta tá sa nacuaá já naxinu da <sup>58</sup> nasahan da cahan ndahví da xihin Pilato ñá ná ndiquiahva da yiquí cuñu Jesús nu dá. Anda já nasahnda Pilato chuun ñá ná ndiquiahva na ñá nu dá. <sup>59</sup> Ta já nachitíví José cán yiquí cuñu Jesús xihin in jáhma vaha ñá vií. <sup>60</sup> Ta já nachicaan da yiquí cuñu Jesús ini in yávi ñá saá ndácaan ndica cáva ñá jacá nacáan da cuéntá mé dá. Ta tá nandihí já nachijahví da yuhú cáva cán xihin in yuu jáhnda cáhnu ta já naquee da cuahan da. <sup>61</sup> Ta nu yéhe mé cáva cán nasanduu coo María, ñá ñuu Magdala xihin inga ñá naní María cán.

*Tá ndáá java soldado nu ndácaan Jesús*

<sup>62</sup> Ta ndaja coo sa nandihí nacaja ndíví na ñaha cuéntá quivi ndíquehe ndée na. Ta inga quivi itaan najátaca táhan na sacuahá nuú jutú xihin na fariseo já nasahan na nu Pilato. <sup>63</sup> Já nacachi na já xihin dá:

—Vaxi nde nu ndo caça loho nde ñamani nu ndó. Jáchi ndícuñun ini nde ñá tá nasatacu Jesús, da naxica jándahvi ñayivi cán nacachi da ñá tá sa ná yaha uní quivi já nditacu tucu da. <sup>64</sup> Ñá cúní nde queá ná chindahá loho ndó na cuñun candaa nuú nachicaan na yiquí cuñu da cán janda quiahva ná yaha uní quivi. Jáchi tiahva náá xinu coo na naxica tuun xihin dá ñuu ta caja cuíhná na yiquí cuñu da. Ta já casáhá cachi na xihin ñayivi ñuu ñá nanditacu tucu Jesús tañu na naxihí. Ta xihin ñá yóho jándahvi chága na ñayivi a juú ga jihna — nacachi na.

<sup>65</sup> Anda já nacachi Pilato já:

—Cañehe ndó in táhnda soldado. Cuahán ndó candaa ndó nu ndácaan da tá quiahva xini mé ndó caja ndó —cáchi Pilato xihin ná.

<sup>66</sup> Anda já naquee na cán nasahan na já nachicají vaha chága na nu ndácaan yiquí cuñu Jesús cán. Ta nasacu na sello yuu jáhnda cán ta já nasacu na soldado ñá ná candaa da ñá.

## 28

*Tá nanditacu tucu Jesús*

*(Mr. 16:1-8; Lc. 24:1-12; Jn. 20:1-10)*

<sup>1</sup> Tá sa nayaha quivi ndíquehe ndée ná ta nativi inga quivi itaan já naxinu María, ñá ñuu Magdala xihin inga María cán sándehe na nuú nachicaan na yiquí cuñu Jesús cán. <sup>2</sup> In naá cuití nataan ndeé ndivaha. Nayaha ñá yóho jáchi nanuu in táto Ndióxi indiví. Ta najátíví a yuu jáhnda nasajahví nuú nasandacaan yiquí cuñu Jesús cán. Ta já nasacoo a jatá. <sup>3</sup> Ta yéhe mé táto Ndióxi cán tá quiahva yéhe tasa. Ta jáhma ndíxi a cúu á jahmá yaa cachi. <sup>4</sup> Ta a juú quiahva ná yihví soldado ndúu cán nacaja táto Ndióxi chí nacasáhá quiji ninu da. Ta já nacuyu da nu ñúhu tátuhun ndii naxihí. <sup>5</sup> Joo ndaja coo táto Ndióxi cán nandicahan xihin najihí cán já nacachi a já xihin ná:

—A cáyihví toho ndó. Sa xini vaha i ñá ndínducú ndo Jesús, ñá nacata caa na ndica crúxu. <sup>6</sup> Coó toho a cán íin yóho jáchi sa nanditacu tucu a tá quiahva nacachi mé á xihin ndo. Naha ndó candehé ndo nuú nasahin a já cuni ndó ñá coó ga íin nuú nasacu na ñá. <sup>7</sup> Ta cama ndó cuñun ndó caxi tuhun ndó xihin da naxica tuun xihin á ñá sa nanditacu tucu Jesús tañu na sa naxihí. Ta viti cánuú mé á cuahan estado Galilea. Ta tá cuñun ndó cán já cuni ndó a. Ta ndicuhun ini ndó ñá nacachi i xihin ndo —nacachi táto Ndióxi cán.

<sup>8</sup> Anda já naquee mé najihí cán mé nuú nasandacaan yiquí cuñu Jesús. Ta vatí yihví na joo cávatá ndivaha na ta sahá ñá cán queá xinu na cuahan na caxi tuhun na ñá yóho nuú na naxica tuun xihin Jesús cán. <sup>9</sup> Ta nani cuahan na ivi laá sa íin va Jesús xihin ná. Já nacachi a já xihin ná:

—Ndióxi ná coo xihin ndo.

Anda já nacayati na cán nu á já nanumi na sahá ta nacaja cáhnu na a. <sup>10</sup> Anda já nacachi tucu Jesús já xihín ná:

—A cáyihví toho ndó. Cuáhán ndo caxi tuhun ndó xihín na cúu cuéntá mí i ña ná cūhūn na estado Galilea jáchī cán cuni na yehe —nacachi Jesús xihín najihí cán.

<sup>11</sup> Ta nani xínu najihí cán cuahan na já ndáva java soldado, da nasandaa nuú nasandacaan Jesús cán naxinu da ñuu Jerusalén já nacaxi tuhun da ña nacuu nuú na sacuaḥa nuú jutu. <sup>12</sup> Anda já najátaca táhan na sacuaḥa cán xihín na sacuaḥa veñuhu já najándique táhan na tuhun na ta já nasahan cuahá ndivaha na jjuhún nuú na soldado cán. <sup>13</sup> Já nacachi na já xihín soldado cán:

—Coto a cáhan ndó ña nanditacu Jesús. Ña cachi ndó cúu ña yóho: “Na naxica tuun xihín á cán, na cán cúu na naquixi ñuu ta nacaja cuíhná na yiquí cuñu a nani naquiji nde”, já cachi ndó xihín ndá na ná ndaca tuhún ndohó. <sup>14</sup> Ta a cáyihví toho ndó tá ná candaa ini da cúu gobernador sahá ña yóho jáchī cahan mé nde xihín dá ta chindeé nde ndohó ña ná a cája da ni in ñaha xihín ndo —nacachi na sacuaḥa cán xihín soldado.

<sup>15</sup> Anda já naquehe da cúu soldado cán jjuhún ta nacaja da tá quiahva nasahnda na sacuaḥa cán chuun nu dá. Ta xihín ña yóho nandicuita nuu tuhun sahá ña nayaha cán. Ta cáhan na Israel cán sahá ña yóho janda quivi víti.

*Tá sáhdá Jesús chuun nuú na naxica tuun xihín á*

*(Mr. 16:14-18; Lc. 24:36-49; Jn. 20:19-23)*

<sup>16</sup> Joo ndíhuxu in na naxica tuun xihín Jesús cán nasahan na chí Galilea. Já nandaa na in jini yucu tá quiahva nasahnda mé Jesús chuun nu ná. <sup>17</sup> Ta tá naxini na mé á já nacaja cáhnu na a. Joo java na cáhvi ivi joho ini na jáchī cō cándúsa na ña nanditacu tucu a. <sup>18</sup> Anda já nacayati Jesús nu ná já nacachi a já xihín ná:

—Nasahan Ndióxi ndée nuú i caja i ña náhnu ndivaha indivi xihín ñuyiví yóho. <sup>19</sup> Sahá ña cán quéa cuáhán ndo jánaḥa ndo nuú ñayivi ndúu ndijáá ñuyiví ndaja caja na caca vaha na íchī cuéntá mí i. Ta caja ndúta ndó na xihín quivi Ndióxi, tátá i ta

xihín quivi yehe, da cúu in túhún jini já jahyi mé á ta xihín quivi ínimá yii Ndióxi. <sup>20</sup> Ta jánaḥa ndó na ña ná caja na tóco ndihi ña nasahnda i nu ndó caja ndó. Ta mé a ndaa coo i xihín ndo ndijáá ní quivi janda quiahva ná xinu coo quivi ndihi saha ñuyiví. Já ná coo —nacachi Jesús.

## Tuhun vaha nacahyí Marcos saha Jesucristo

*Tá jácandúta Juan ñayivi yucú íchí  
(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Quiahva johó nacava sáhá tuhun vaha cáhan saha Jesucristo, mé a cúu in túhún jini já jahyi Ndióxi.

<sup>2</sup> Sanahá nacahyí profeta Isaías ña nacahan Ndióxi xihín jahyi a. Já cáhí a já: Chindahá i in da canuú cuhun nu mún, ña ná caxi tuhun da nuú ñayivi saha yóhó ta já ndaja ndacú da íchí nuú yahún.

<sup>3</sup> Ta cahan cóhó da tañu yucú íchí ta cachi da já xihín ñayivi:

“Caja tiahva ndó íchí nuú quixi xitoho í ta cuná ndó in íchí ndacú nu mé á ña ná ndihvi a ínimá ndo”, nacahyí Isaías.

<sup>4</sup> Ta ndaja coo ín Juan yucú íchí ta nacasáhá cája ndúta dá ñayivi. Ta caxi tuhun da xihín ná ña tá cúní na caja cáhnu ini Ndióxi sahá cuachi na já ndítahan nu ná ndicó coo ini na ta já candúta ná. <sup>5</sup> Chí naquixi cuahá ndivaha ñayivi estado Judea xihín ñuu Jerusalén taa johó na nu cáhan da ta tá náhma na cuachi na já nacaja ndúta dá na ini yuta Jordán.

<sup>6</sup> Ta nasandixi mé Juan yóho jáhma ña nacavaha na xihín íji camello ta nasandico in níj jáhndá tóco dá. Ta naxixi da tica xihín ñuñu yucú. <sup>7</sup> Tá caxi tuhun da nuú ñayivi já cáhí da já:

—Jatá yehe vaxi in da ín cuaha chága ndée dá a juú ga yehe chí coó sahá i ndica xítí i nu dá ña ndaxí i correa ndusa dá.

<sup>8</sup> Yehe najácandúta i ndohó xihín ticuú joo mé da cán cúu da jándicutú ínimá ndó xihín ínimá yij Ndióxi —nacachi Juan xihín ná.

*Tá nacandúta Jesús  
(Mt. 3:13-17; Lc. 3:21-22)*

<sup>9</sup> Mé tiempo já naquee Jesús ñuu Nazaret ña ndácaan estado Galilea. Naxinu a nu ín Juan ta najácandúta Juan Jesús ini yuta Jordán cán. <sup>10</sup> Ta tá naquee Jesús ticuú cán já naxini a nandinuna indiví ta nanuu ínimá yij Ndióxi jatá mé á. Ta cáa ínimá yij Ndióxi yóho tá quiahva cáa in ndijata. <sup>11</sup> Ta

naxini johó na cáhan in a indiví ta já cáhí a já:

—Yóhó cúun jahyi máni i ta cájij ndivaha ini i xuhun.

*Tá naxito ndojó tiñáhá sacuaḥa Jesús  
(Mt. 4:1-11; Lc. 4:1-13)*

<sup>12</sup> Ivi laá nasahan ínimá yij Ndióxi ndáca Jesús yucú íchí nu coó ñayivi. <sup>13</sup> Ta cán nasahjin a ivi jico quivi ta mé tiñáhá sacuaḥa naxito ndojó rí a. Ta cán ndúu quití quini joo naxinu java táto Ndióxi chin-deé na mé á.

*Cásahá Jesús cáhan tuhun vaha xihín ñayivi*

*(Mt. 4:12-17; Lc. 4:14-15)*

<sup>14</sup> Tá nandihí nachicaan na Juan vecaa já nasahan Jesús estado Galilea caxi tuhun a nuú ñayivi tuhun vaha saha Ndióxi. <sup>15</sup> Já cáhí a já xihín ná:

—Sa naxinu tiempo viti ta nacayati quivi cacomí Ndióxi cuéntá sahá ñayivi. Ña ndítahan nu ndo quea jándacoo ndó cuachi cája ndó ta candúsa ndó tuhun vaha ña cuu jácacu ndohó —nacachi Jesús.

*Cána Jesús comí na caca tuun xihín á  
(Mt. 4:18-22; Lc.: 5:1-11)*

<sup>16</sup> In tañu xica Jesús cuahan yati yuhú tañuhú Galilea. Ta naxini a in da naní Simón xihín Andrés, da cúu ñani. Ndíví mé da yóho cúu dá da tává tiyacá ta ñuhu da jácana da ñunu dá ini tañuhú. <sup>17</sup> Nacasáhá cáhí Jesús já xihín dá:

—Naha quíj ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

<sup>18</sup> Ta chí ivi laá najándacoo da ñunu dá ta nandico da Jesús.

<sup>19</sup> Anda já naxica loho ga Jesús chí nuú já naxini a Jacobo xihín ñani da Juan, da cúu jahyi Zebedeo. Ndíví da yóho ñuhu da ini barco ndája vaha da ñunu dá. <sup>20</sup> Nacana Jesús ndíví da yóho ta chí najándacoo da tátá da, Zebedeo cán ini barco xihín java ga da cája chúun xihín dá ta já nacasáhá xica tuun da xihín Jesús.

*Tá ndácaan ínimá quini ini in dataa  
(Lc. 4:31-37)*

21 Naxinu coo Jesús xihín na xíca tuun xihín á ñuu Capernaum. Ta tá natandaa quivi ndiquehe ndée ñayivi já naquihvi Jesús ini veñuhu ta ñacasáhá jánaha na cán. 22 Ta ñacatóntó tóco ndihi ñayivi sahá tuhun cáhan mé á jáchi najánaha mé á tátuhun in da ín saha cahnda chuun ta co cáhan tátuhun na jánaha ley Moisés. 23 Ini mé veñuhu cán ñasandacaan in dataa, da ndacaan ínimá quini ini. Ñacasáhá cáyuhú rí cán já cáchi rí já:

24 —Jesús, da ñuu Nazaret. Ndá cuéntá quéa quíhvi nuún xihín nde. Á vasún jándihún sahá nde. Sa xini vaha i yohó ta cándaá cáxí ini i ña cúun in da yíi nachindahá Ndióxi —ñacachi rí cán.

25 Ta ñacasáhá Jesús jánani a rí quini ndacaan ini da cán. Já ñacachi a já:

—Caji yuhun ta janí da yóho.

26 Ta tá quéta rí quini ndacaan ini da cán ñasahní yihí rí da ta cáyuhú cóhó rí já ñaqueta rí ini da cán. 27 Ñacatóntó tóco ndihi ñayivi chí ñacasáhá ndaca tuhún táhan na já cáchi na já:

—Ndía quéa yóho. Ta ndá ñaquixi tuhun saá jánaha da yóho jáchi cáhan da xihín rí quini tátuhun in da sáhdá chuun ta chí cándúsa rí quee rí cuhun rí —ñacachi na.

28 Ta chí cama chá ñandicujta nuu tuhun saha Jesús ní cúu estado Galilea.

*Ta ñandaja vaha Jesús ñá cúu xojo Simón (Mt. 8:14-15; Lc. 4:38-39)*

29 Tá ñaquee na veñuhu já cuahan Jesús xihín Jacobo xihín Juan vehe Simón xihín ñani da, Andrés. 30 Ta ndaja coo cándúhu ñá cúu xojo Simón nuú xito nachicaan cáhni ndeé ña. Ta tá naxinu coo na cán já ñacaxi tuhun na nuú Jesús ña quíhvi ña. 31 Anda já ñacayati Jesús nu ña ta natiin a ndáha ña já ñandiñehe a ña chí ivi laá ñandindaa cáhni á ña. Anda já ñacasáhá cája ndíví ña ña cuxu na.

*Ndája vaha Jesús cuahá ñayivi (Mt. 8:16-17; Lc. 4:40-41)*

32 Tá ñaqueta nuu candii ta ñacuaá já ñehe ndihi ñayivi na quíhvi xihín na ñuhu ínimá quini ini ñacasaa na nu Jesús. 33 Ta tóco ndihi na ñuu ñandai cuu na yuyéhe nu ín Jesús. 34 Ñandaja vaha Jesús cuahá ñayivi, na ndóho tá nuú cuehe. Ta natavá

a cuahá ínimá quini ini ñayivi. Joo coo ñasahan Jesús ñamani nu rí quini ña ná cahan rí jáchi xini rí yo cúu Jesús.

*Xíca nuu Jesús jánaha ñayivi estado Galilea*

*(Lc. 4:42-44)*

35 Ta naha inga quiví itaan tá cámaní yíi tiví ñandacoo Jesús ta ñaquee a ñuu cuahan nuú coo ñayivi ña cacá tahví a nu Ndióxi. 36 Tá ñandacoo Simón xihín java ga da xíca tuun xihín Jesús já naxini na ña coo a ín chí ñaquee na cuahan na ndinducú na mé á. 37 Ta tá ñandiñehe ñahá na já cáchi na já xihín á:

—Tóco ndihi ñayivi ndinducú na ndohó.

38 Joo cáchi Jesús já xihín ná:

—Cóho java ga ñuu yati yóho ña ná jánaha i tuhun vaha nuú na cán viti jáchi sahá ña yóho vaxi i —cáchi Jesús.

39 Ta chí naxica nuu Jesús ní cúu estado Galilea cáhan tuhun vaha ini veñuhu in in ñuu cán ta tává a ínimá quini ndacaan ini ñayivi.

*Tá ñandaja vaha Jesús in da ndóho cuehe táhyi*

*(Mt. 8:1-4; Lc. 5:12-16)*

40 Ta ndaja coo ñacayati in dataa ndóho cuehe táhyi nuú Jesús ta ñacaxítí da nu á já ñacasáhá cáchi da já:

—Cuu ndaja vaha ndó yehe tá cúni ndó —cáchi da.

41 Ta ñatahvi ini Jesús saha dá. Anda já ñacani ndaa ndáha á da. Já cáchi a já:

—Cúni ña ná ndivahún ña cán quéa ñandivahún viti —ñacachi Jesús xihín dá.

42 Tá ñacachi a já chí ivi laá ñandindaa cuehe táhyi ña ñandoho da cán. Já ñandivií yiquí cuñu da. 43 Tá ñandihí najándindayí Jesús da ta ñasahnda chuun nu dá já cáchi a já xihín dá:

44 —Candehé. A cáhun xihín ni in túhún toho ñayivi ña ñacaja i xuhun. Cuáhán ndacún nahun mún nuú jutú. Ta ndítahan jocún ñaha nu Ndióxi tátuhun ñasahnda ley Moisés sanahá caja na sa ñandivaha. Já ná candaa ini tóco ndihi ñayivi ña sa ñandindaa va cuehe ñasandohún —ñacachi Jesús xihín dá.

45 Joo tá ñaquee da cuahan da ñacasáhá da ndícani da nuú ndihi ñayivi ña ñandaja

vaha Jesús da sahá ña cán quéa coó nacuu ga ndihvi tívi Jesús ni in ñuu. Jatá ñuu nuú co ndúu ñayivi nasahjin a ta janda mé cán xínu coo ñayivi, na quíxi nuú ndijáá ñuu xito nihni na mé á.

## 2

*Tá nandaja vaha Jesús in da naxihí tuchu saha*

(Mt. 9:1-8; Lc. 5:17-26)

<sup>1</sup> Tá nayaha chá quívi já nandico coo tucu Jesús ñuu Capernaum. Ta nacandaa ini ñayivi ña íin a vehe. <sup>2</sup> Ta chí cama chá nanditútú cuahá ñayivi chí co vátí ga yuyéhé cándita na. Já nacasáhá cáxi tuhun Jesús tuhun Ndióxi nu ná. <sup>3</sup> Anda já naxinu coo comí taa ta ñéhe da in da naxihí tuchu saha. Nasaa da nu íin Jesús. <sup>4</sup> Joo naxini da ña a cuú xínu da yati nu íin Jesús sahá cuahá ñayivi chútú ndaa nu íin a cán. Chí nandaa da jiní véhe ta nacasáhá da súná da jiní véhe mé xoo nu íin Jesús. Ta mé cán najánuu da xito loho nu cándúhu da quíhvi chí yávi jiní véhe cán. <sup>5</sup> Tá naxini Jesús ña cándeé ini da cán mé á já cáhí a já xihín mé da quíhvi cán:

—Candehé, jahyi a. Sa nacaja cáhnu ini i sahá cuachún viti —nacachi Jesús.

<sup>6</sup> Joo java na jánaha ley Moisés ndúu coo cán nacasáhá cáhán na: <sup>7</sup> “Ndá cuéntá quéa ndája núu da Ndióxi xihín tuhun cáhan da. Jáchi ni in túhún toho ñayivi a cuú caja cáhnu ini sahá cuachi. In túhún jiní Ndióxi quéa cuu caja cáhnu ini sahá cuachi”, nacahán na. <sup>8</sup> Joo sa nacandaa ini Jesús ña cáhvi ini na cán chí nacachi a já xihín ná:

—Ndávaha cáhán ndo já. <sup>9</sup> Á cáhán ndó ña ihvi chága cachi i xihín da yóho: “Nacaja cáhnu ini i saha cuachún viti.” Á tá coo ta cachi i xihín dá: “Cuándacoo, ndiquehe xitún ta caca nuún.” <sup>10</sup> Candehé vaha ndó ná naha i nu ndo ña íin sahá i, da nachindahá Ndióxi nduu u ñayivi caja cáhnu ini i sahá cuachi cája ñayivi ñuyívi yóho —nacachi Jesús xihín ná.

Anda já nacachi a xihín mé da naxihí tuchu saha cán:

<sup>11</sup> —Ta viti cáhan i xuhun cuándacoo ndiquehe xito lohún ta cuanúhu —nacachi a.

<sup>12</sup> Chí ivi laá nandacoo mé da quíhvi cán ta nandiquehe da xito loho da já naquee da cuahan da nuú ndihi na ndúu cán. Anda já nacatontó tóco ndihi na ta nacasáhá cája cáhnu na Ndióxi já cáhí na já:

—Ni in túhún tañu coo naxini nde in ñaha cáhnu tátuhun ña yóho —nacachi na.

*Tá nacana Jesús Leví, da cáhan na Mateo xihín*

(Mt. 9:9-13; Lc. 5:27-32)

<sup>13</sup> Tá nandihí já nasahan tucu Jesús yuhú tañuhú cán ta tá nacayati cuahá ñayivi nu á já nacasáhá jánaha nu ná. <sup>14</sup> Nani xíca Jesús cuahan nayaha nu íin in da naní Leví, jahyi Alfeo. Ta íin coo da nu sácoo da játaca jjuhún cuéntá impuesto. Ta cáhí a já xihín dá:

—Naha quí candicun yehe.

Anda já nandaca ndichi Leví ta nandico da Jesús.

<sup>15</sup> Tá nandihí nasahan Jesús vehe Leví ta nasacoo a xíxi a xihín cuahá da játaca jjuhún cuéntá impuesto xihín java ga na cája cuachi. Ta sa mé cán nasanduu ri java da xíca tuun xihín Jesús xíxi da tañu na cán jáchi cuahá ñayivi ndico na Jesús. <sup>16</sup> Joo na jánaha ley Moisés xihín na fariseo tá naxini na íin coo Jesús xíxi a xihín na cán nacasáhá cáhí na já xihín da xíca tuun xihín Jesús:

—Ndá cuéntá quéa xíxi xitoho ndó xihín na játaca jjuhún cuéntá impuesto ta xihín java ga na cája cuachi —nacachi na cán.

<sup>17</sup> Tá naxini johu Jesús ña yóho nacasáhá cáhí a já:

—Ñayivi íin vaha coo xíní ñuhú toho na da cája tátá ñahá joo na quíhvi, na cán cuú na xíní ñuhú da cája tátá ñahá. Ta yehe coo vaxi toho i cana i na sa íin vaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús.

*Cáhan Jesús ndá saha quéa cajuhun na*

(Mt. 9:14-17; Lc. 5:33-39)

<sup>18</sup> In tañu tá xíjuhun na xíca xihín Juan xihín na xíca xihín na fariseo naxinu coo java ñayivi nu Jesús ta nacasáhá ndáca tuhún na mé á já cáhí na já:

—Ndávaha coo xíjuhun toho na xíca tuun xihín yóho joo xíjuhun mé nde, na xíca xihín Juan xihín na xíca xihín na fariseo —nacachi na.

19 Ta nanducú ñehe Jesús tuhun nu ná já ñacachi a já:

—Á cáhán ndo xíjuhun na ndúu víco tándaha nani íin mé da tándaha cán xihín ná. Uñun. Jáchi cájji íní na nani íin mé da tándaha xihín ná. Chí a cuú toho cajuhun na. 20 Joo xinu quivi candaa na mé da tándaha ta anda jávi casáha cajuhun na. Ta cáchi i xihín ndó ña vaxi quivi candaa na yehe nuú na yóho ta anda jávi casáha na xíca tuun xihín i cajuhun na —ñacachi Jesús.

21 Ta nasacu Jesús inga quiahva nu ná já cáchi a já:

—Ama ná jándaha ñayivi jahmá yatá xihín in tuhun jáhma saá jáchi tá nandihí ndíndíí a, sáhdá chága ví a jahmá yatá cán ta jándacáhu chága ví a yávi ña nandicahmá na cán. 22 Ta ni co táán na vino saá ini vóso níi yatá jáchi jácáhdí mé vino cán níi ta cuíta mé vino cán ta tívi vóso níi caja dó sahá ña cán quéa ndítahan taán na vino saá ini vóso níi saá —ñacachi a.

*Ña nacaja na xíca tuun xihín Jesús in quivi ndíquehe ndée ñayivi*

*(Mt. 12:1-8; Lc. 6:1-5)*

23 In quivi ndíquehe ndée ñayivi nani xíca Jesús cuahan tañu nuú naxutu na trigo xihín na xíca tuun xihín á já ñacasáha tuhun na yucu jini trigo. 24 Tá naxini na fariseo ña cája na já ñacachi na já xihín Jesús:

—Candehé. Ndávaha cája na xíca tuun xuhun chuun ña co ndítahan caja na quivi ndíquehe ndée yo —ñacachi na fariseo.

25 Anda já ñacachi Jesús já xihín ná:

—Á a ñaha cahvi ndó nuú tuhun Ndióxi nu cáhan sahá ña nacaja David sanahá tá ñacuico mé dá xihín na xíca xihín dá. 26 Ña nacaja David quéa ñaquihvi da veñuhu Ndióxi tá nasacuu Abiatar da sacuaha nuú jutú. Já naxixi da pan yii ña in tuhún jutú cúu da ndítahan nuú cuxu ña cán, nduu. Joo naxixi David ña ta nasahan da ña nuú java ga na xíca xihín dá.

27 Ta ñacachi tucu Jesús já xihín ná:

—Candehé ndo. Coó ñacavaha Ndióxi ñayivi ndoho ini na sahá quivi ndíquehe ndée ná jáchi nasacu ini a cavaha in quivi já ná cuu ndíquehe ndée ñayivi. 28 Ña cán quéa yehe va, da ñachindahá Ndióxi nduu

ñayivi íin sahá i cahnda i chuun sahá quivi ndíquehe ndée ñayivi —ñacachi Jesús.

### 3

*Tá nandaja vaha Jesús in da nahichi ndáha*

*(Mt. 12:9-14; Lc. 6:6-11)*

1 Naquihvi tucu Jesús ini veñuhu ta cán nasandacaan in dataa, da nahichi ndáha. 2 Ta ñacasáha nani na fariseo Jesús sándehe na á ndaja vaha mé á da cán quivi ndíquehe ndée ná já ná cuu chacaan na cuachi jatá. 3 Anda já cáchi Jesús xihín da nahichi ndáha cán já:

—Cuándaco ta candichi mahñú yóho —ñacachi Jesús.

4 Anda já nandaca tuhún a na java cán já cáchi a já xihín ná:

—Ndía cáchi ley ndítahan caja í mé quivi ndíquehe ndée ñayivi. Á chindeé yó ñayivi á caja í ña núu xihín ná. Á jácácu na á cahni yó na —ñacachi Jesús.

Joo ni in tuhún tuhun coó ñacahan na. 5 Ñacasáha xójo ini Jesús sándehe a nu ná. Joo táhvi tucu ini a saha ná jáchi cúu ná ñayivi saá ini. Ta cáchi a xihín mé dataa, da nahichi ndáha cán:

—Jándaca ndáhu.

Tá najándaca da ndáha dá ivi laá nandivaha ndáha dá. 6 Tá nandihí naquee na fariseo veñuhu já ñacasáha na jándique táhan na tuhun na xihín na cuénta Herodes ña cahni na Jesús.

*Tá nanditútu cuahá ñayivi yuhú tañuhú*

7 Joo nasahan Jesús xihín na xíca tuun xihín á yuhú tañuhú ta cuahá ndivaha ñayivi estado Galilea nandico na nasahan na. 8 Tá ñacandaa ini ñayivi ña náhu cája Jesús, ñaquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu válí jin ñuu Tiro xihín Sidón jáchi candehé na Jesús cúni na. 9 Sahá ña yóho quéa naxica Jesús ñamaní nuú na xíca tuun xihín á ña ná cacu tiahva na in barco nuú ndacaan mé á ña ná a cándíhi ñayivi cuaha cán ña. 10 Jáchi cuahá ndivaha ñayivi nandaja vaha mé á. Sahá ña cán quéa tóco ndihí na quihvi cáti na jatá ña cani ndaa ndáha ná mé á cúni na.

11 Ta tá naxini na ñúhu ínima quini ini cán Jesús ivi laá ndícava xítí na nu á ta cásáhá cáyuhú cóhó na já cáhí rí quini ndácaan ini na cán já:

—Yóhó cúun da cúu in túhún jini já jahyi Ndióxi.

12 Joo jánani Jesús rí cán já sáhdá a chuun nu ri ña ná a cáxi tuhun rí yo cúu mé á.

*Tá naxaxi Jesús uxu ivi da caca tuun xihin á*

*(Mt. 10:1-4; Lc. 6:12-16)*

13 Tá nandihí já naquee xóo Jesús nasahan in xiqui ta tá nandihí nacana mé á java na xíca xihin á cán, mé na cuni a caxi a ta naxinu na cán nu Jesús. 14 Ta tañu na cán nandicaxi Jesús uxu ivi da caca tuun xihin á ta tá nandihí já nachindahá mé á da cahun da cahan da tuhun Ndióxi xihin ñayivi. 15 Ta nacaja mé á ña cuu ndaja vaha da na quíhvi ta cuu cahnda da chuun nu rí quini ña ná quee rí ini ñayivi. 16 Ña yóho cúu quívi uxu ivi da nandicaxi Jesús caca tuun xihin á: Simón, da nasacu tucu a quívi cananí Pedro 17 xihin Jacobo xihin ñani da, da naní Juan, jahyi Zebedeo. Ndívi da yóho nasacu a quívi cananí Boanerges ta mé tuhun yóho cuni cachi a cúu dá tátuhun jahyi in tasa ña cána indiví. 18 Naxaxi a Andrés xihin Felipe xihin Bartolomé xihin Mateo xihin Tomás xihin Jacobo, da cúu jahyi Alfeo xihin Tadeo xihin Simón, da naxica cuénta na cananista 19 xihin Judas Iscariote, mé da najicó túhún Jesús tá nu ndíhí.

*Jácojo na cuachi jatá Jesús ña cája chúun a xihin ndé tiñáhá sacuahá*

*(Mt. 12:22-32; Lc. 11:14-23; 12:10)*

Anda já naquihvi Jesús ini in vehe xihin na xíca tuun xihin á. 20 Ta inga tucu nachutú cuhá ñayivi nu ín a janda a cuú cuxu a xihin na xíca tuun xihin á cán. 21 Ta tá nañehé na vehe Jesús tuhun sahá ña yóho ivi laá naquixi na ña cañehe na mé á cahun a cuni na jáchi nacatachi Jesús cáhán na.

22 Jári na jánaha ley Moisés, na naquixi Jerusalén nacasáhá cahan na já cáhí na já:

—Taa yóho ndácaan Beelzebú ini da, rí cúu sacuahá nu rí quini. Ta xihin ndéé mé

rí cán tává da rí quini ini ñayivi —nacachi na.

23 Anda já nacana Jesús ñayivi já nasacu a in quiahva nu ná ja cáhí a já xihin ná:

—A cuú tavá tiñáhá sacuahá mé rí. 24 Jáchi tá sáhdá java táhan na ndúu in ñuu ta cáni táhan ndaja táhan mé va na já quea a ñehe iní na coo nahá na. 25 Ta tá cásáhá sáhdá java táhan na ndúu in vehe ta cáni táhan na já a cuú ga canduu nahá na mé vehe cán. 26 Ta quiahva já tá ná casáhá rí quini ndúu ndáha tiñáhá sacuahá cáni táhan rí xihin mé va rí janda quiahva sáhdá java táhan rí já quea a cuú canduu nahá ri jáchi ndihí saha ri.

27 'Sácú u inga quiahva nu ndo. Ni in dataa a cuú ndihvi da caja cuíhna da ñaha vehe in da ndacú cán joo tá ná cató da da ndacú já cuu quehe da ñaha da cán.

28 'Mé a ndaa ná cahan i xihin ndo. Ndióxi cuu caja cáhnu ini a saha tá nuú cuachi cája ñayivi xihin saha tá nuú tuhun quini cahan na. 29 Joo tá ná cahan núu na saha ínima yíi Ndióxi já quea a cája cáhnu ini Ndióxi sahá ña nacaja na ta anda ama cáa quívi candojo na cuachi sahá —nacachi Jesús.

30 Nacachi a ña yóho xihin na cán jáchi cáhí na ña ndácaan ínima quini ini a.

*Naná Jesús xihin ñani a cuni na cuni na a*  
*(Mt. 12:46-50; Lc. 8:19-21)*

31 Tá nandihí naxinu naná Jesús xihin ñani a nu ín a joo nacandoo na jata véhe. Ta nachindahá na in na nasahan nacana ñahá. 32 Ta na ndúu coo xihin Jesús cáhí na já xihin á:

—Jata véhe cáa ín nánún xihin ñanún ta ndínducú na yohó —cáhí na xihin Jesús.

33 Anda já nacachi Jesús já xihin ná:

—Ná cahan i xihin ndo yo já cúu tátuhun náná i xihin ñani i.

34 Anda já nasandehé a nuú na ndúu coo tivyivi xihin á cán já cáhí a já xihin ná:

—Na yóho cúu ná tátuhun náná i xihin ñani i. 35 Jáchi ndá na cája ña cuni Ndióxi, na cán cúu ná tátuhun ñani i xihin quiahvá i xihin naná i —nacachi Jesús.

## 4

*Sácú Jesús quiahva sahá in da sátá tata*  
(Mt. 13:1-9; Lc. 8:4-8)

<sup>1</sup> Nacasáhá tucu Jesús jánaha ñayivi yuhú tañuhú ta nataca cuahá ñayivi nu ín a cán. A juú quiahva cuaha cúú ná sahá ña cán quea naquihvi Jesús ini in barco, dó cándichi yuhú tañuhú cán. Ta nasacoo a cán ta tóco ndihi ñayivi nandaca ndita na nuú ñutí yuhú tañuhú cán. <sup>2</sup> Já najánaha cuahá ñaha nuú na cán ta nasacu a quiahva nu ná já cáchí a já:

<sup>3</sup> —Cuni johó ndó ña yóho: In da sátá tata naquee da cuahan da cata da ña. <sup>4</sup> Ta tá sátá da ña cuahan da nacuyu java ña íchi ta naxinu laa ta nasaxí rí a. <sup>5</sup> Ta java ña nacuyu a tañu yuu nuú coo cuaha ñuhu. Ta cama chá nanduta mé tata cán jáchi co cúná ñuhu nuú nacuyu a. <sup>6</sup> Joo tá naqueta candii já najáhichi a ña sahá ña coo cuaha yóho a chí nandihí sahá. <sup>7</sup> Ta java tata nacuyu a tañu tohíñú ta tá nasahnu tohíñú cán já nanditáha ndihi a nacaja tohíñú chí coo nasahan mé tata cán ndá ñaha jáquee na nu á. <sup>8</sup> Ta java tata nacuyu a nuú ñuhú vaha. Nanduta mé tata cán ta nasahnu a já nasahan cuahá ñaha ña jáquee na nu á. Java ña nasahan oco uxu a nuú in in tata ta java ña nasahan uní jico uxu a ta java ña in ciento a nuú in in tata.

<sup>9</sup> Andá já nacachi tucu Jesús já xihín ná:

—Na ín johó, ná cuni johó na —nacachi a.

*Ndicani Jesús ndá saha quea nasacu a quiahva nu ná*

(Mt. 13:10-17; Lc. 8:9-10)

<sup>10</sup> Tá nacandoo Jesús xihín mé na uxu ivi xíca tuun xihín á cán xihín java ga na ndíco ñahá cán já nacasáhá ndáca tuhún na Jesús ña ndía cuní cachi a xihín quiahva nasacu a nuú na cán. <sup>11</sup> Ta cáchí a já xihín ná:

—Ña coo nacandaa ini ndó jihna ña cán cándaa ini ndó a viti jáchi nasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúú na sácú u quiahva nuú. <sup>12</sup> Já quea vatí sádehé na joo cúú ná tátuhun na co tívi nuú ta vatí xíní johó na joo cúú ná tátuhun na jóho jáchi co cándaa ini na ña cáhan i xihín ná. Ta sahá ña cán quea co ndíco coo

na nu Ndióxi ta ni mé á co cája cáhnu ini sahá cuachi na.

*Ndicani Jesús sahá da sátá tata cán*  
(Mt. 13:18-23; Lc. 8:11-15)

<sup>13</sup> Ta já cáchí tucu a já xihín na xíca tuun xihín á:

—Ta tá co cándaa ini ndó quiahva, ña nasacu u yóho ndaja caja ndó cándaa ini ndó java ga quiahva ña cachi i xihín ndo.

<sup>14</sup> Mé da sátá tata cán cúú dá tátuhun da xíca cáhan tuhun Ndióxi xihín ñayivi.

<sup>15</sup> Java ga ñayivi cúú ná tátuhun tata ña nacuyu íchi. Táa johó na tuhun Ndióxi ta tá nandihí naxini johó na ña já vaxi tiñáhá sacuaaha ta cája rí xihín ná ña ndíndójo na ña.

<sup>16</sup> Ta java ñayivi cúú ná tátuhun tata ña nacuyu tañu yuu jáchi táa johó na tuhun Ndióxi ta cájii ini na ndíquehe na ña.

<sup>17</sup> Ta tá quiahva ndiává yucu sahá ña co ñuhu cúná yóho a quiahva já ndóho ñayivi tá casáhá ndicuíta ñayivi cája xíxi na xihín ná.

Ta tá casáhá ndóho ini na sahá tuhun Ndióxi ña naxini johó na cán chí ivi laá jándacoo va na ña cándeé ini na Ndióxi.

<sup>18</sup> Ta java na cúú ná tátuhun tata ña nacuyu tañu tohíñú jáchi táa johó na tuhun Ndióxi

<sup>19</sup> joo ndicani ndivaha ini na sahá ñaha ñuyiví yóho. Cátóo ndivaha na ñaha cuicá chí jándahvi na mé ná xihín ña cán ta xíca ini na coo tóco ndihi ñaha nu ná.

Ta cáva nuu táhan ñaha ñuyiví yóho xihín tuhun Ndióxi ini ínima ná sahá ña cán quea cávitá ini na ta co sáhnu na xihín tuhun Ndióxi.

<sup>20</sup> Joo ndúu java na xíní johó tuhun Ndióxi ta cándúsa na ña. Ta cája chuun vaha na xihín á ta já cuahnu na xihín á. Cúú ná tátuhun tata nacuyu nu ñuhú vaha.

Java na cúú ná tátuhun tata ña nasahan oco uxu a nuú in in a. Ta java na cúú ná tátuhun ña nasahan uní jico uxu a ta java na cúú ná tátuhun ña nasahan in ciento a nuú in in tata —nacachi Jesús xihín na cán.

*Sácú Jesús quiahva sahá in lámpara*  
(Lc. 8:16-18)

<sup>21</sup> Ta cáchí tucu Jesús xihín ná:

—Coo toho chuun lámpara tá chícaan i ña tixi sato á tixi xito jáchi chuun ña quea cánúu ña nu jícó já ná jándiyehé ña nu yo.

<sup>22</sup> Ni in tuhún toho ñaha a cuú coo jehé jáchi xinu quivi já ndáca náha nu á. Ta ni in



tuhun naçahan jehé ñayivi a cuú coo jehé nahá jáchi xinu quivi já candaa ini tóco ndihi ñayivi sahá tuhun nasahin jehé cán.

<sup>23</sup> Na íin johó, ná cuni johó na —naçachi a.

<sup>24</sup> Ta cáchi tucu a já xihin ná:

—Candehé vaha ndó ña taa johó ndó. Tá quiahva cája ndó xihin ñayivi quiahva já caja Ndióxi xihin ndó joo chága ví caja mé á xihin ndó. <sup>25</sup> Jáchi da sa íin ñaha nuu, ñehe táhvi dá coo chága ñaha nu dá joo da coo ñaha nuu, janda ña chá íin nu dá ndindaa —naçachi Jesús.

*Jánaħa Jesús nu ná ndá quiahva sáħnu tata*

<sup>26</sup> Ta cáchi tucu Jesús já:

—Tá ndiquiahva ñayivi mé ná ndáħa Ndióxi ña ná cacomí a cuéntá saħa ná já cúú á tátuhun in dataa nachihin tata. <sup>27</sup> Tá nandihí yáħa quivi ta quiji da ta ndácoo da já yáħa quivi xihin ñuu. Ta já ndúta mé tata cán ta sáħnu a joo mé da nachihin a cán coo xini da ndaja sáħnu a. <sup>28</sup> Sáħnu a jáchi chuun nu mé ñuhu quea caja ña ná cuahnu ña cán. Jihna ñuhú ndúta mé yucu trigo já cana yoco a ta nu mé yoco a cán ndicutú ndaa ndiqui á. <sup>29</sup> Ta tá nachichi mé ndiqui a cán já quee na cuahan na jáquee na ña jáchi naxinu coo quivi jáquee na ña —naçachi Jesús.

*Sácú Jesús inga quiahva saħa ndiqui mostaza*

(Mt. 13:31-32; Lc. 13:18-19)

<sup>30</sup> Ta cáchi tucu Jesús já:

—Viti sácú u inga quiahva nu ndó já ná cándaħ ini ndó ndá quiahva caja Ndióxi xihin ñayivi tá casáħa a cómí a cuéntá saħa ná. <sup>31</sup> Cúú á tátuhun in ndiqui mostaza ña chíhin na nuú ñundáhyi. Cúú á ndiqui loħo chága nu tóco ndihí ndiqui válí íin ñuyíví. <sup>32</sup> Joo tá nandihí nachihin na a nasahnu a ta nanduú a in yító, dó cáħnu nu ndíhi yító. Ta xihin ndahá náħnu dó sácú do cati ta janda laa ndiquehe ndée ri nu cati do —naçachi Jesús.

*Sácú Jesús quiahva cuití va nuú ñayivi*

(Mt. 13:34-35)

<sup>33</sup> Najánaħa Jesús tuhun Ndióxi nu ná. Ta nasacu cuahá quiahva nu ná tátuhun ña yóħo janda quiahva xinu nu mé ná cándaħ ini na. <sup>34</sup> Xihin mé quiahva cuití va

najánaħa Jesús nuú ñayivi joo tá naçandoo Jesús xihin mé na xica tuun xihin á já ndícani cáxi ndihí a ñaha nuú na cán.

*Tá najácatáji Jesús tañuhú tá ndicojo do*

(Mt. 8:23-27; Lc. 8:22-25)

<sup>35</sup> Tá naçuaá mé quivi cán já naçachi Jesús já xihin na xica tuun xihin á:

—Cóħo inga xoo tañuhú yóħo.

<sup>36</sup> Anda já najándacoo na ñayivi já naquee na cuahan na xihin Jesús ini mé barco nuú sa ndácaan mé á. Ta ndáca táħan java ga barco cuahan dó xihin ná. <sup>37</sup> Ta ndaja coo naxinu in tachi quini ndivaha. Ta naçasáħa ndicojo tañuhú ndíhvi dó ini barco já naçasáħa ndicutú ticuifí ini mé barco cán. <sup>38</sup> Ta chí xoo jata mé barco cán cánduhu Jesús quiji a ta cánúu jini á jata ña yihi jini ná. Já najándacáxi ini na mé á ta cáchi na já xihin á:

—Maestro. Chí coo sáħní a mé á ña cúní ndihí saħa yo jáchi sácoo barco cahá ticuifí cuahan do —naçachi na.

<sup>39</sup> Anda já nandacoo Jesús ta naçasáħa jánaní a tachi xihin tañuhú viti já cáchi a já:

—Catáji ndó.

Já najáyaħ tachi. Já naçandoo táji níí mé cán. <sup>40</sup> Anda já naçachi Jesús xihin na xica tuun xihin á:

—Ndávaha nayihví nahá ndó. Ndávaha coo candeé ini ndó yehe —naçachi a.

<sup>41</sup> A juú quiahva nayihví mé na cán já naçasáħa caħan xihin táħan na:

—Ndá da cúú dataa yóħo ña janda tachi xihin tañuhú cándúsa nu caħan da —naçachi na cán.

## 5

*Tá nandaja vaha Jesús in da ndácaan ínima quini ini*

(Mt. 8:28-34; Lc. 8:26-39)

<sup>1</sup> Anda já naxinu na inga xoo mé tañuhú cán nu íin ñundáhyi cuéntá Gadara. <sup>2</sup> Ta tá nanuu Jesús barco cán já naquee in dataa camasanto já naxinu da nuú Jesús. Mé da yóħo cúú dá da ndácaan ínima quini ini. <sup>3</sup> Ta íin va da nu ndúxu ndii ta ni in na a cuú cató na da ni xihin cadena a cuú cató na da. <sup>4</sup> Vatí cuahá tañu sa naçató na saħa dá xihin ndáħa dá joo sáħndá da cadena ta jácuachi da ña ta ni in na a cuú caja xihin dá. <sup>5</sup> Nuú ta

ndiví xíca nuu da yúcu xihín nu ndúxu ndii cáyuhú da xíca nuu da ta jándicuehe da mé dá xihín yuu. <sup>6</sup> Joo tá naxini xíca da Jesús, nihi chá nasahan da naxinu da nu íin a já nandicava xítí da nu á. <sup>7</sup> Ta cáyuhú cóhó da já cáchí da já xihín á:

—Ndá cuéntá queá vasún quihvi nuún xihín i. Yóhó cúún Jesús, da cúú in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i —nacachi da.

<sup>8</sup> Nacachi da ña yóho xihín Jesús jáchi nacasáhá sáhdá mé á chuun nu rí quini cán já cáchí a já:

—Ínimá quini, janí da yóho.

<sup>9</sup> Anda já nandaca tuhún Jesús mé rí quini cán já cáchí a já:

—Ndaja nanún.

Anda já nanducú ñehe da cán tuhun nu á já nacachi da já xihín á:

—Legión naní nde jáchi cuaha cúú nde.

<sup>10</sup> Ndáhví mé xíca tahví da cán nu Jesús ña ná a tává xíca a rí quini cuhun ri. <sup>11</sup> Ta ndaja coo xíca nuu cuaha cóchí xixáhan rí yati yúcu cán. <sup>12</sup> Sahá ña cán queá naxica tahví mé ínimá quini cán nu Jesús já cáchí rí já:

—Chindahá ndehe ná cuhun nde ndihvi nde cóchí cáa.

<sup>13</sup> Anda já nasahan Jesús ñamaní ta chí naquee ínimá quini nasañuhu ini da cán já nandihvi rí ini cóchí xíca nuu cán. Ta tóco ndihí cóchí yóho xínu rí cuahan rí nanuu rí nu ndáyi já najáqueta nuu rí mé rí ini tañuhú chí nacandaa rí ticuúí já naxihí rí. Tátuhun ivi mil cóchí nandihí saha.

<sup>14</sup> Ta ndaja coo mé da ndáa cóchí cán nayihví da chí xínu da cuahan da caxi tuhun da ña nayaha yóho nuú ñayivi ñuu Gadara xihín nuú java ga na ndúu yati cán. Naquee cuahá ñayivi mé cán candehe na ña nacuu. <sup>15</sup> Tá naxinu coo na nu íin Jesús naxini na íin coo da nasañuhu cuaha rí quini ini cán. Sa nandaca ndixi da jáhma ta sa nandicaxí táhyí ini da. Chí nayihví na. <sup>16</sup> Ta na naxini ña nacaja Jesús cán nacasáhá na ndicani na nuú ñayivi ña nandoho dataa, da nasañuhu rí quini ini cán xihín ña nandoho cóchí viti. <sup>17</sup> Anda já

nacasáhá na xíca tahví na nu Jesús ña ná quee a cuhun a.

<sup>18</sup> Tá sa cuahan ndihvi Jesús ini mé barco cán já naxinu da nasañuhu rí quini ini cán já nacasáhá da xíca tahví da nu á ña ná quiahva ñamaní nu dá cuhun da xihín á. <sup>19</sup> Joo coo nasahan Jesús ñamaní nu dá já nacachi a xihín dá:

—Cuanúhu vehún ta ndicani nuú na vehún ndaja náhnu ñaha nacaja Ndióxi xuhun ta ndaja natahvi ini a sahun —nacachi a.

<sup>20</sup> Já naquee da cuahan da ta nacasáhá da ndicani da nuú ñayivi ndúu java ñuu cuéntá Decápolis tóco ndihi ña nacaja Jesús xihín dá. Chí catóntó na táa johu na ña.

*Tá nandaja vaha Jesús jahyi jhí Jairo xihín in ña nacani ndaa ndáha jáhma á (Mt. 9:18-26; Lc. 8:40-56)*

<sup>21</sup> Tá nandihí nandihvi Jesús ini mé barco cán já naxinu coo a inga xoo tañuhú nuú naquixi a. Ta cán nanditútú cuahá ñayivi nu á mé yuhú tañuhú cán. <sup>22</sup> Já naxinu in da naní Jairo, da sáhdá chuun veñuhu. Tá naxini da Jesús nacaxítí da sahá. <sup>23</sup> Ta ndáhví mé naxica tahví da nu á já cáchí da já:

—Xíhi jahyí i viti ñuhú. Caja ndó ñamaní ná cohó vehe chinúu ndó ndáha ndó jata ña ná ndivaha ña já ná catacu ña —nacachi da.

<sup>24</sup> Anda já naquee Jesús cuahan xihín dá. Chí cándihí táhan mé ñayivi ndíco na jata cuahan na. <sup>25</sup> Ta tañu ñayivi cán ndácaan in ña quíhvi. Sa naxinu uxu ivi cuia nditahví ni ña. <sup>26</sup> Nandoho ndivaha ini ña nuú na cája tátá ñayivi ta sa najátiví ndihi ña jjuhún ña catátá ña cúni ña. Joo a cuú ndivaha ña ta janda cája ndeé chága ví a xihín ña. <sup>27</sup> Tá naxini johu ña saha Jesús já cuahan ña cayati ña chí jata tañu tóco ndihi ñayivi cuahan jata mé a cán. Ta nacani ndaa ndáha ña jáhma á <sup>28</sup> jáchi nacahan ña: “Tá ná cani ndaa cuití ndahá yo jáhma á já ndavaha í”, nacahan ña. <sup>29</sup> Ivi laá nahichí ni ña. Naxini cáxi ña nandivaha ña ta cuahan va cuehe nandoho ña. <sup>30</sup> Jári Jesús ivi laá nacandaa ini a ña ndivaha in ñayivi nacaja ndeé mé á. Já nacasáhá sándehe a chí jata tañu ñayivi. Já nacasáhá ndaca tuhún á na já cáchí a já:

—Ndá ndó ñacani ndaa ndáha jahmá i.

<sup>31</sup> Ta ñanducú ñehe mé ña xíca tuun xihín á cán tuhun nu á já cáchi ña já xihín á:

—Sándehe váha mé ndó ndá quiahva cándíhi táhan ñayivi vaxi na xihín ndó ta cáa ga mé ndó ndáca tuhún ndó ndá ña ñacani ndaa ndáha jáhma ndó —ñacachi na.

<sup>32</sup> Joo cáva nuu nuu Jesús sándehe a ndá na ñacani ndaa ndáha jáhma á. <sup>33</sup> Ta mé ñá ñandivaha cán tá ñacandaa ini ñá ña ñayaha já ñacasáhá quíji ñinu ñá sahá ña yíhvi ña. Já ñaxinu ñá ñasaxítí ña nu Jesús. Anda já ñacasáhá ña ndícani ñá nu á ndaja cáa ña ñacaja ñá. <sup>34</sup> Anda já ñacachi Jesús já xihín ña:

—Jahyi a, ñandivahún jáchi ñacandúsún yehe. Cuanúhu ta a ndícani ga inún jáchi ñandindaa cuehun —ñacachi Jesús.

<sup>35</sup> Cáhan yíi va Jesús xihín ñá cán tá ñaxinu java na ñaquixi vehe mé ña sáhdá chuun veñuhu cán já ñacachi na já xihín dá:

—Sa ñaxihí va jahyi ndó. A jáquihvi ga ndó ña xíca jánaha ñayivi ña —ñacachi na.

<sup>36</sup> Joo ñacaja Jesús tátuhun co xíni joho a nuú ñacahan ña. ñacasáhá cáchi a já xihín dá sáhdá chuun veñuhu cán:

—A cáyihvi tohún. Cándusa cuití vún yehe —cáchi a.

<sup>37</sup> Ta coó ñasahan Jesús ñamani nuú ña cuaha ndúu cán cuhun ña xihín á. Ña ñasahan cuití xihín á cúu Pedro xihín Jacobo xihín Juan, ña cúu ñani Jacobo.

<sup>38</sup> Tá ñaxinu ña vehe mé ña sáhdá chuun veñuhu cán já ñaxini a ndíváa ñayivi sácu ndivaha na cáyuhú ña ndúu na cán. <sup>39</sup> Já ñaquihvi a vehe ta já cáchi a já:

—Ndávaha ndíváa nahá ndó ta sácu cuaha ndó. Ta coó ñaxihí toho ñáloho yóho joo quíji cuití va ñá —ñacachi a xihín ña cán.

<sup>40</sup> Joo ñacasáhá ña sácu ndaa na a. Anda já ñatavá Jesús tóco ndihi ñayivi jata véhe. Ña ñaquihvi xihín á ñasacuu tátá ñaná ña xihín ña xíca tuun xihín á. Ta ñacayati a nu cándúhu mé ñáloho cán. <sup>41</sup> Já ñatiin a ndáha ña ta ñacasáhá cáchi a já xihín ña:

—Talita, cumi —ñacachi a. Mé tuhun yóho cúni cachi a: Náloho cáhan i xuhun cuándaco.

<sup>42</sup> Ivi laá ñandaco ñáloho, ñá ndacaan uxu ivi cuia ta ñacasáhá ña xíca nuu ñá. Já ñacatóntó tóco ndihi ñayivi. <sup>43</sup> Joo ñasahnda Jesús chuun nuú ña ndúu cán ña ná a cáxi tuhun na ña ñayaha yóho nuú java ga ñayivi. Ta ñasahnda a chuun nu ná ña ná quiahva na ña cuxu mé ñáloho cán.

## 6

### *Ín Jesús ñuu a Nazaret*

*(Mt. 13:53-58; Lc. 4:16-30)*

<sup>1</sup> Ñaquee Jesús cuanúhu á ñuu a. Já ñaquee ña xíca tuun xihín á cuahan ña xihín á. <sup>2</sup> Tá ñaxinu quívi ndíquehe ndée ná já ñacasáhá Jesús jánaha ñayivi ini veñuhu cán. Ta cuahá ñayivi ñaxini joho nuú ñacahan ta chí ñacatóntó ña ta ndáca tuhún xihín táhan na já cáchi ña já:

—Ndájá ñacatiava nahá ña yóho ña jánaha dá nu yo. Ndá ñaquixi ña ndíchí jini dá. Ndá ñaquixi ñaha xituhún cája da.

<sup>3</sup> Á a juú ña yóho cúu ña cája chúun xihín yíto, ña cúu jahyi María. Ta ñani da cúu Jacobo xihín José xihín Judas xihín Simón. Ta quiahva ña ña ndúu ñuu yóho xihín mí —cáchi ña ndáca tuhún táhan na.

Ta chí coó ñaxeen na cándusa ñahá ña.

<sup>4</sup> Sahá ña cán quea ñacachi Jesús já xihín ná:

—Vatí tóco ndihi ñayivi cája cáhnu na in profeta joo ña vehe da xihín ña ñuu da co cándusa na ña —ñacachi Jesús.

<sup>5</sup> Chí coó ñacuu caja Jesús ña náhnu nuú ña cán. Java va ña quíhvi cuití va ñachinúu a ndahá jini ná já ñandaja váha a ña. <sup>6</sup> Ta chí ñacatóntó Jesús sahá ña co cándusa na mé á. Sahá ña cán quea ñaquee Jesús cuahan jánaha ñayivi java ga ñuu válí ndúu yati cán.

*Tá ñachindahá Jesús uxu ivi ña xíca tuun xihín á cáxi tuhun na nuú ñayivi saha mé á*

*(Mt. 10:5-15; Lc. 9:1-6)*

<sup>7</sup> Tá ñajánditaca Jesús ndíhuxu ivi ña xíca tuun xihín á cán já ñachindahá a ña tá ivi tá ivi cañehe táhan na cuhun ña. Ta ñasahan ndée nu ná ña ná cuu tavá ña ínimá quini ñúhu ini ñayivi. <sup>8</sup> Ta ñasahnda a chuun nu ná ña ná a cáñehe toho na ñaha cuhun ña íchi. In túhún ña cuu cañehe na cuhun ña cúu in garrote, dó tiin ndaa na. Joo a cúu cañehe na ni yátí ni pan ni jihún.

<sup>9</sup> Ndítahan cayihi na ndusa ta in túhún cotó na ndítahan candixi na cuhun na. <sup>10</sup> Ta nacachi a já xihin ná:

—Tá ná xinu coo ndó in vehe, canduu ndó mé vehe jan anda quiahva xinu quivi quee ndó cuhun ndó. <sup>11</sup> Ta ndá ñuu co cuni na ndiquehe vaha na ndohó ta ni co cuni na taa johó na nu cáhan ndó já quea cuáhán queta ndó cuhun ndó ta cati ndó ña yacá saha ndó já ná nahá ña cuahan cuachi na cán jata mé va na. Mé a ndaa ná cahan i xihin ndó ña tá ná xinu quivi caja víi Ndióxi sahá ñayivi ndúu ñuyivi já quea jándoho chága Ndióxi ini ñayivi ñuu jan sahá ña coo nandiquehe na ndohó a juú ga tá quiahva najándoho a ini na ñuu Sodoma xihin Gomorra sanahá —nacachi Jesús xihin ná.

<sup>12</sup> Anda já naquee mé na xica tuun xihin á cuahan na caxi tuhun na nuú ñayivi ña ndítahan nu ná ndicó coo ini na jándacoo na cuachi caja na. <sup>13</sup> Ta natavá cuaha ná ínima quini nasañuhu ini ñayivi ta tá naxojo na síti jini ñayivi quihvi já nandivaha na.

*Tá naxihi Juan, da nacaja ndúta ñayivi (Mt. 14:1-12; Lc. 9:7-9)*

<sup>14</sup> Nañehe Herodes, mé da cómi cuénta sahá ñayivi cán tuhun sahá Jesús jáchi níi cúu nandicuita nuu tuhun sahá. Ta já cáchi Herodes já saha Jesús:

—Á a juú Jesús cúu á Juan, da najácandúta ñayivi ta viti nanditacu tucu da. Sahá ña cán quea ín ndée da caja da tóco ndihi ña caja da yóho —cáchi da.

<sup>15</sup> Ta java na cáchi na já:

—Á a juú da yóho cúu Elías, da nasacuu profeta.

Ta java na cáchi na já:

—Á a juú da yóho cúu in profeta tátuhun na profeta nasanduu sanahá ndivaha.

<sup>16</sup> Tá naxini johó Herodes ña yóho já nacasáhá cáchi da já:

—Jivi ndusa da yóho cúu Juan, da najácandúta ñayivi, da nasahnda i chuun ná chituhun ná jico dá joo viti nanditacu tucu da —nacachi da.

<sup>17</sup> Jáchi mé Herodes yóho sa nasahnda da chuun ña ná tiin na Juan, da najácandúta ñayivi ta nacató na da já nachicaan na da vecaa. Nacaja da ña yóho sahá Herodías,

ña nasacuu ñájíhi Felipe, ñani mé Herodes jáchi sa naquehe Herodes ña cacuu ña ñájíhi mé dá. <sup>18</sup> Ta natiin Herodes mé Juan jáchi já nasacahan Juan já xihin dá:

—Coo ndítahan coún xihin ñájíhi ñanún —nacachi da.

<sup>19</sup> Sahá ña cán quea naxojo ini Herodías xihin Juan. Ta cuni ña cahní ña da joo a cúu caja ña. <sup>20</sup> Jáchi yihvi Herodes Juan sahá ña xini da ña cúu Juan in taa ndaa, da co caja cuachi. Ña cán quea coo nasahan Herodes ñamani nu mé Herodías caja ña ña núu xihin dá. Ta taa johó Herodes nu cáhan Juan vatí cáhvi ivi johó ini da sahá ña xini johó da joo cájii ini da taa johó da nu cáhan da. <sup>21</sup> Joo in quivi nanuna nu Herodías cahní ña Juan jáchi nacaja Herodes in víco cuénta quivi nacacu da. Mé já nacana da da náhnu ndúu nu dá ña ná quixi na cuxu na xihin dá. Ta nacana da tóco ndihi na cúu sacuahá nuú soldado xihin tóco ndihi ñayivi ín saha estado Galilea. <sup>22</sup> Ta ndaja coo ña cúu jahyi jíhi Herodías naquihvi ña nu ndúu na xixi na ta nacasáhá ña xita sahá ña nuú ndihi na cán. Ta nacatóo Herodes xihin na ndúu xixi xihin dá nda quiahva naxita sahá ña sahá ña cán quea nacachi Herodes xihin ña:

—Ndía cuni mún, cacún ña nuú i jáchi quiahva i ña nuun —nacachi da.

<sup>23</sup> Ta nasahan da tuhun da nu ña cán ña quiahva da tóco ndihi ñaha ná cacá ña nu dá vatí ñahnu táhvi ndaa ñundáhyi ña cómi da chuun saha nacachi da quiahva da nu ña. <sup>24</sup> Já naquee ña cán cuahan ña caxi tuhún ña nu náná ña ña nacachi Herodes xihin ña. Ta nandaca tuhún ña náná ña ndía cacá ña nu dá ta já nacachi mé náná ña já xihin ña:

—Caca yiquí jini Juan, da jácandúta ñayivi —nacachi Herodías.

<sup>25</sup> Ta cama chá naquihvi tucu ña cán nu ndacaan Herodes já cáchi ña já xihin dá:

—Viti ñúhú cuni ña ná quiahva mé ndó yiquí jini Juan, da jácandúta ñayivi nuú i ini in coho cáhnu —nacachi ña.

<sup>26</sup> Ta ndaja coo nacasáhá nacacuéha ndivaha ini Herodes sahá ña naxica ña cán yiquí jini Juan. Joo sahá ña sa nasahan da tuhun da nu ña ta sa naxini johó tóco ndihi na ndúu xixi xihin dá cán ña nacachi da

xihin ña sahá ña cán quéa ndúsa caja da ña cúni ña. <sup>27</sup> Chí ivi laá nachindahá da in soldado vecaa ña ná cañehe da yiquí jíní Juan quixi a. <sup>28</sup> Naxinu soldado cán vecaa já nachitúhün dá jico Juan já ñehe da ña ini in cohó cáhnu já nandiquiahva da ña nu ña cán já nandiquiahva ña a nu náná ña.

<sup>29</sup> Tá nacandaa ini na naxica xihin Juan ña nacaja na xihin dá já nasahan na nandiquehe na yiquí cuñu da já najánduxu na da.

*Tá nasahan Jesús ña cuxu uhun mil taa*  
(Mt. 14:13-21; Lc. 9:10-17; Jn. 6:1-14)

<sup>30</sup> Tá nandihí já nandique táhan tucu na xica tuun xihin Jesús xihin á já nacasáhá ndícani na nu á ña nacaja na xihín ña najánaha na. <sup>31</sup> Já nacachi Jesús xihín ná:

—Naha ndó ná cohó ndiquehe ndée loho í nu cáa xóo.

Nacachi a já xihín ná jáchi cuahan vaxi ñayivi xica nuu cuaha chá na mé cán ta chí co sahan na ñamaní cuxu na. <sup>32</sup> Anda já nandihvi Jesús xihín na xica tuun xihín á ini in barco já naquee na cuahan na in nu cáa xóo. <sup>33</sup> Joo cuahá ñayivi nandicuni na Jesús tá naquee a cuahan. Já xinu cuahá ñayivi tá nuú ñuu cán cuahan sahá na xoo nuú cuahan Jesús ini barco. Ta jihna ga mé ná naxinu yuhú tañuhú cán a juú ga Jesús. <sup>34</sup> Tá nanuu Jesús barco cán já naxini a cuahá ndivaha ñayivi. Já natahvi ini a saha ná jáchi tá quiahva ndúu ndicachi, rí coó xitoho quiahva já ndúu na. Anda já nacasáhá jánaha cuahá ñaha nu ná. <sup>35</sup> Ta tá sa cáhini cuahan naxinu na xica tuun xihín á já cáchi na já:

—Sa nahini va ta a juú xoo nu ndúu ñayivi quéa yóho. <sup>36</sup> Ndindayí ndó ñayivi ná cuhun na ñuu válí xihín nuú yati yóho já ná cueen na ña cuxu na —nacachi na xica tuun xihín Jesús.

<sup>37</sup> Tá nandihí já nanducú ñehe Jesús tuhun já cáchi a já:

—Mé ndó quiahva ndó ná cuxu na —nacachi Jesús xihín na cán.

Ta nacachi na já xihín á:

—Ndá cuu caja nde quiahva nde ña cuxu na yóho jáchi jiuhún cuahá ndivaha xíní ñuhú nde já cuu cueen nde pan cuxu ñayivi

cuaha yóho. Ta ni a quéta toho ivi ciento denario —nacachi na.

<sup>38</sup> Já nacachi tucu Jesús já xihín na cán:

—Ndaja pan cómi ndo. Cuahán ndo candehé ndo.

Tá nasahan na sándehe na já cáchi na já xihín á:

—Ín uhun pan xihín ivi tiyacá.

<sup>39</sup> Anda já nasahnda Jesús chuun nu ná ña ná jácaco na ndihi ñayivi tá táhnda nuú yucu cuí cán. <sup>40</sup> Ta nasaco na java táhnda in ciento na ta java táhnda ivi jico uxu na. <sup>41</sup> Anda já natiin Jesús ndíhuhun pan xihín ndíví tiyacá ta sándehe a indiví já nandiquiahva ndixahvi nu Ndióxi. Ta nasahnda java pan já nasahan ña nuú na xica tuun xihín á já ná ndicahnda na ña nuú ñayivi. Tá quiahva já nasahnda tiyacá já nanditahnda rí nu tóco ndihi ñayivi cán. <sup>42</sup> Já naxixi tóco ndihi ñayivi cán ta nachutú tixi ndihi na. <sup>43</sup> Ta mé pan xihín tiyacá ña nacandoo naxixi na najáchutú na uxu ivi toyicá. <sup>44</sup> Ta naxixi uhun mil dataa cán.

*Tá naxica sahá Jesús nuú tañuhú*  
(Mt. 14:22-27; Jn. 6:16-21)

<sup>45</sup> Tá nandihí nacaja Jesús ña ná ndihvi na xica tuun xihín á ini in barco ña ná cuhun cuée na inga xoo tañuhú já xinu na Betsaida nani ndíndayí a ñayivi já saa mé á cán ndique táhan xihín ná. <sup>46</sup> Ta tá sa nandindayí ndihi a ñayivi naquee a cuahan yucu caca tahví a nu Ndióxi. <sup>47</sup> Tá nacuaá sa ndácaan barco mahñú tañuhú cán ta Jesús ín yí va nu ñúhu. <sup>48</sup> Ta naxini a ña ndóho ini na xica tuun xihín á jáchi a cuú jácaca na barco ini ticuú jáchi mé xoo nuú cuhun na vaxi tachí. Tá sa cuahan tívi já xica sahá Jesús cuahan nuú ticuú xoo nu ndúu na ta tá nacayati a nu ndúu na jalóho yaha saa cuhun a, nduu. <sup>49</sup> Joo tá naxini na xica sahá Jesús nuú ticuú nacahan na cúú á in ínima já nacayuhú cóhó na. <sup>50</sup> Jáchi tóco ndihi na naxini ñahá nayihví na. Joo nandicahan Jesús já cáchi a já:

—Ndacú coo ini ndó jáchi yehe va cúú u. A yíhvi toho ndó —nacachi Jesús.

<sup>51</sup> Tá nandaa Jesús jata barco nu cándójó na já najáya tachí. Chí nacatontó mé na xica tuun xihín á cán. <sup>52</sup> Jáchi a ñaha tacu vaha ini na sahá ña nacaja Jesús tá nandaja

cuaḥa mé á pan xihín tiyacá jáchi nandaji tuun xíní túni ná.

*Tá nandaja vaha Jesús na quíhvi ndúu ñundáhyi Genesaret (Mt. 14:34-36)*

<sup>53</sup> Naxinu na inga xoo tañuhú ta nacató ndaa na barco yuhú tañuhú cán já nasaa na ñundáhyi Genesaret. <sup>54</sup> Tá quéta Jesús xihín na xíca tuun xihín á ini barco cán ivi laá nandicuni ñayivi mé á. <sup>55</sup> Já xínu na cuahan na ndijáá ñuu válí ndúu yati cán ndúcú na na quíhvi já ñéhe na na nuú xito cásaa na nu Jesús. <sup>56</sup> Ta ndá ñuu nacuu nu quíhvi Jesús cúú á ñuu náhnu á ñuu válí á yúcu já quéta ñayivi sácú na na quíhvi yuhú íchi. Ta já xíca tahví na nu Jesús ña ná quiahva ñamaní caní ndaa ndáha ná a vatí loho yuhú jahmá a. Ta ndá na nacani ndaa ndáha mé á ivi laá nandivaha na.

## 7

*Ña cajú quini ínima ñayivi (Mt. 15:1-20)*

<sup>1</sup> In tañu na fariseo xihín java na jánaḥa ley Moisés, na naquixi ñuu Jerusalén nacayati na nu ín Jesús. <sup>2</sup> Ta naxojo ini na tá naxini na ña ndúu coo java na xíca tuun xihín Jesús xíxi na tá cámani ndahá na tá quiahva ín costumbre na Israel. <sup>3</sup> Jáchi jánaḥa na fariseo xihín ndihi na Israel ña a cuú cuxu na tá cámani ndahá vaha na tá quiahva ín costumbre tásáhnu jíco na. <sup>4</sup> Ta jári jánaḥa na ña tá ndícó coo na sahan na yahvi xíní ñuhú ndahá na tá quiahva ín costumbre na já ná cuu cuxu na. Ta ín cuahá ga nuú ñaha jánaḥa na ndítahan caja na tátuhun ña ndícata na yáxi xíhi na xihín tindoho xihín cohó caa anda xito quíji na viti, ndítahan ndicata na. <sup>5</sup> Anda já nacasáhá na fariseo xihín na jánaḥa ley Moisés cáchi na já xihín Jesús.

—Ndávaha co cajú na xíca tuun xuhun tá quiahva nacachi tásáhnu jíco yo caja í. Ndávaha xíxi na tá cámani ndahá na tá quiahva sáhndá ley caja í —nacachi na. <sup>6</sup> Já nacachi Jesús já xihín ná:

—Mé a ndaa nacahan profeta Isaías saha ndo jáchi co cúú ndó tá quiahva ndáa ndó.  
Já nacahyí da já:

Yuhú ninu uun na cajú cáhnu na yehe. Ta co cajú cáhnu na yehe xihín ndinuhu ínima ná.

<sup>7</sup> Mé a uun va quéa cajú cáhnu na yehe, jáchi ña jánaḥa na nuú ñayivi cúú á ña quixi jiní mé cuití va na, nacahyí Isaías sanahá.

<sup>8</sup> Jáchi najándacoo ndó ña nasahnda Ndióxi nu ndó caja ndó ta nacasáhá ndíco cáhnu ndó costumbre ña nacaja tásáhnu jíco ndo. Ta sahá ña yóho ndícata ndó tindoho xihín yáxi xíhi ndó ta cajú ndó cuahá chága costumbre yata —nacachi Jesús xihín ná.

<sup>9</sup> Já nacachi tucu a já xihín ná:

—Sahá ña cuni ndo candíco cáhnu ndó costumbre mé va ndó sahá ña cán quéa najándacoo ndó ña nasahnda Ndióxi caja ndó. <sup>10</sup> Jáchi já cáchi ley Moisés: “Caja cáhnun tátún xihín nánun”, ta jári cáchi a já: “Ndá na ná chican cháhan jata tátá na á jata náná na, ndítahan quivi na”, cáchi ley Moisés. <sup>11</sup> Joo ndóhó jánaḥa ndó nuú ñayivi ña cuu cahan na já xihín tátá na á náná na: “A cuú chindee e ndóhó jáchi sa nasacu xoo i ñaha i quiahva i ña nu Ndióxi”, cáchi na. <sup>12</sup> Tá ná cachi na ña yóho já quéa co ndúsa ga chindee na tátá na á náná na. <sup>13</sup> Quiahva joho cajú ndó sácu xoo ndó ña nasahnda Ndióxi nu ndo ta ndája ndó a tátuhun in ñaha ña coo saha. Jáchi ndíco cáhnu ndó costumbre ña najándadacoo tásáhnu jíco ndó nu ndo ta quiahva já jánaḥa ndó nuú jahyi ndó. Ta cuahá ga ñaha tátuhun ña yóho cajú ndó —nacachi Jesús.

<sup>14</sup> Anda já nacana tucu Jesús ñayivi já nacachi a já xihín ná:

—Cuni joho ndihi ndó nu cahan i xihín ndo ta candaa ini ndó ña. <sup>15</sup> Ni in ñaha xíxi ñayivi a cuú caja quini ínima ná. Ña cuu ndaja quini ñayivi cúú ña quixi ínima na tátuhun ña cahan na xihín ña cajú na. <sup>16</sup> Na ín joho, ná cuni joho na —cáchi Jesús.

<sup>17</sup> Tá nandihí nandihvi Jesús ini in vehe ta nacandoo cuahá ñayivi jata véhe. Já nandaca tuhún na xíca tuun xihín á ña ndía cuni cachi a xihín tuhun nacahan xihín ná. <sup>18</sup> Ta nanducú ñéhe a tuhun nu ná já nacachi a já:

—Á coo toho xíní túni ri ndóhó va, vaha. Jáchi co candaa ini ndó ña tóco ndihi ñaha

xíxi ñayivi a cuú caja quini a na. <sup>19</sup> Jáchí ña xíxi ñayivi co xínu a ini ínima ná joo xínu coo a tixi na já queta tucu a yiquí cuñu na —ñacachi Jesús.

Xihín tuhun yóho ñacachi Jesús xihín ná ña cuu cuxu na tóco ndihi ñaha ña xíxi ñayivi jáchí co ndája quini a ínima ná. <sup>20</sup> Ta ñacachi tucu Jesús já:

—Ña cuu ndaja quini ñayivi cúu ña quíxi ínima ná tátuhun tuhun cáhan na xihín ña cája na. <sup>21</sup> Jáchí chí ini ínima ná quéta ña cáhvi núu ini na tátuhun ña cáhvi ini in dataa coo da xihín ñájíhí ñani táhan da á tá xíca ini da coo da xihín in ñáñáha, ña coo cúu ñájíhí da á tá cáhvi ini na cahní na ndíi. <sup>22</sup> Ta sa mé cán quéta ña xíca ini na caja cuíhná na ta jári xíca ini na coo cuahá ndivaha ñaha nu ná. Ta sa mé cán quéta ña núu cája na ta cáhan na ña tuhún ta cája na tá nuú cuachi ta cáhíhvi ini na ta catóo na cahán na saha táhan na ta cája cáhnu na mé ná ta quíhvi cája na. <sup>23</sup> Tóco ndihi ña núu yóho ña cáhvi ini ñayivi caja na, quíxi a ínima ná ta ndája quini a na.

### *Tá ñacandéé ini in ñá tóho Jesús (Mt. 15:21-28)*

<sup>24</sup> Já ñaquee Jesús cuahán chí ñundáhyi cuéntá Tiro xihín Sidón. Ta ñaquíhvi a in vehe coo a ta coo cúní a ña ná candaa ini na ñuu ña iin a cán joo coo ñacuu coo jehé a. <sup>25</sup> Chá va ta ñacandaa ini in ñáñáha ña iin Jesús vehe cán. Ta iin in jahyi jíhí ña, ña ndácaan ínima quini ini. Ta ndaja coo nasaa ña ta ñacaxítí ña saha Jesús. <sup>26</sup> Ta cúu ña ña tóho cuéntá ñundáhyi Sirofenicia. Ta ñaxíca tahví ña nu Jesús ña ná tavá a ínima quini ndácaan ini jahyi ña. <sup>27</sup> Anda já ñacachi Jesús já xihín ña:

—Jihna ñúhú ndítahan nuú i chindeé e na Israel anda jáví cuu chindeé e ndohó, na tóho jáchí iin in tuhun ta cáchí a ña a váha toho candaa í pan xíxi na valí ta jácana í ña nuú tina —ñacachi Jesús.

<sup>28</sup> Anda já ñacachi mé ña tóho cán já xihín Jesús:

—Mé a ndaa cáhan ndó, xitoho. Joo anda tina, rí ndúu tixi mesa xíxi rí ña jácuyu jahyi xitoho rí —ñacachi ña.

<sup>29</sup> Anda já ñacachi Jesús já xihín ña:

—Vaha va ñacahun. Sahá ña cán quéta cáchí i xuhun cuanúhu viti jáchí sa ñaqueta va ínima quini nasandacaan ini jahyún —ñacachi Jesús.

<sup>30</sup> Ta tá ñaxínu ña vehe já ñaxini ña cándúhu jahyi ña nuú xito ta sa coo ga ínima quini cán ndácaan ini jahyi ña.

### *Tá ñandaja vaha Jesús in da jóho, da a cuú cahán*

<sup>31</sup> Naquee Jesús ñundáhyi cuéntá Tiro ta nayaha chí ñuu Sidón xihín java ga ñuu cuéntá Decápolis cán já ñaxínu coo a tañuhú Galilea. <sup>32</sup> Cán ñéhe na in dataa nacasa na nu Jesús. Cúu dá da jóho ta cúu dá da níhi. Ta ñaxíca na nu á ña ná chinúu a ndáha á jini dá já ná ndivaha da. <sup>33</sup> Já ñatavá xoo Jesús da tañu ñayivi cán. Já najáquíhvi a in nducu ndáha jóho da ta ñaxihnu a tójí a já ñacani ndaa a tójí a yáa dá. <sup>34</sup> Tá ñandíhi nasandehé a indiví já ndísaa ndísaa ínima á já ñacachi a já xihín dá:

—Efata —ñacachi a ta ña yóho cúní cachi: Ná ndinuna.

<sup>35</sup> Ivi laá ñandinuna jóho mé da jóho cán ta ñandivaha yáa dá já ñacasahá cáhan vaha da. <sup>36</sup> Ta nasahnda Jesús chuun nuú ndihi na ña ná a cáxi tuhun na ña yóho nuú ni in ñayivi. Joo tá ñacachi a ña yóho já quéta ví ga ví cáhan na. <sup>37</sup> Chí catóntó ndihi ñayivi tá xini jóho na ña ta cáhan xihín táhan na já cáchí na já:

—Vaha ndivaha cája Jesús tóco ndihi ñaha jáchí jánditacu a na jóho ta jándicahán mé á na níhi —ñacachi na.

## 8

### *Tá nasahan Jesús ña cuxu comi mil ñayivi (Mt. 15:32-39)*

<sup>1</sup> Mé já ñanditútú tucu cuahá ñayivi ta chí coo mé ñaha cuxu na. Anda já ñacana Jesús na xíca tuun xihín á já ñacachi a já xihín ná:

<sup>2</sup> —Táhnda ndivaha ini i sahá ñayivi yóho jáchí sa ñaxínu uní quívi ndúu na xihín i yóho ta chí coo ga ñaha cuxu na. <sup>3</sup> Ta coo cúní chindahá i na nuhu na vehe na jáchí cámaní cuxu na ta tiahva náá cuitá na ta cuyu na íchi jáchí sa cání ndivaha ñaquixi java na —ñacachi Jesús.

<sup>4</sup> Anda já nacachi na xíca tuun xihín á cán já:

—Ndaa cáhan ndo. Ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nacachi na.

<sup>5</sup> Anda já nandaca tuhún Jesús na já cáchi a já xihín ná:

—Ndaja pan cómi ndo.

Já nacachi na cán já:

—Usa ña.

<sup>6</sup> Anda já nasahnda Jesús chuun nuú ñayivi ña ná cacoo na nu ñúhu. Já natiin a ndíhusa pan cán. Ta nandiquiahva ndixahvi nu Ndióxi. Já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuaha cán. <sup>7</sup> Ta jári nasacomí na java tiyacá válí ta nandiquiahva mé á ndixahvi nu Ndióxi saha ri já nasahnda chuun nu ná ña ná ndicahnda na ri. <sup>8</sup> Ta naxixi tóco ndihi na ndúu cán anda quiahva nachutú tixi na ta tá nandihí najácutú na janda usa toyicá xihín ña nacandoo. <sup>9</sup> Tátuhun comi mil ñayivi naxixi. Ta tá nandihí já najándindayí Jesús na. <sup>10</sup> Já nandihvi a ini barco xihín na xíca tuun xihín á já naquee na cuahan na ñundáhyi cuénta Dalmanuta.

*Cúni na fariseo ña ná caja Jesús in ña xituhún nu ná*

*(Mt. 16:1-4; Lc. 12:54-56)*

<sup>11</sup> Anda já naxinu na fariseo nu Jesús já nacasáhá ndítuhún na xihín á. Ta sahá ña cúní na coto ndojó cuití ñahá na sahá ña cán quéa naxica na nu á ña ná caja in ña xituhún, ña quixi indiví já ná candaa ini na á mé a ndaa cúu á ña nachindahá Ndióxi. <sup>12</sup> Ndísaa ndísaa ini Jesús jáchi ndíhi ini a xihín ná já cáchi a já:

—Ndá saha quéa xíca na yóho ña ná caja i in ña xituhún. Mé a ndaa ná cahan i xihín ndó ña a cája i ñaha xituhún nuú na yóho —nacachi a.

<sup>13</sup> Anda já nandihvi tucu Jesús ini mé barco cán ta najándacoo a na cán já naquee a cuahan inga xoo tañuhú.

*Tá cahan Jesús sahá ña jánaha na fariseo*

*(Mt. 16:5-12)*

<sup>14</sup> Ta ndaja coo nandindójó mé na xíca tuun xihín a cán cañehe na ñaha cuxu na joo

nasahin in pan cuití va xihín ná ini barco cán. <sup>15</sup> Anda já nasahnda Jesús chuun nu ná já cáchi a já xihín ná:

—Candehé ndo. Cuénta coo ndó xihín na fariseo ta xihín na cúu cuénta Herodes jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

<sup>16</sup> Coó nacandaa ini na ña cáchi a ña cán quéa nacasáhá ndítuhún xihín táhan na já cáchi na já:

—Sahá ña coó pan ñehé vaxí sahá ña cán quéa cáhan Jesús ña yóho xoho —nacachi na.

<sup>17</sup> Sa nacandaa ini Jesús ña cáhan na ta já nacasáhá cáchi a já:

—Mé ndó cáchi ndó ña coó pan ñehé vaxí jáchi co candaa ini ndó ta ni co cája ndó cuénta sahá ña jánaha i. Nandaji tuun xíní túní ndo. <sup>18</sup> Cúu ndó tátuhun na co tívi nuú xihín na coó joho jáchi vatí xíní ndo ta xíní joho ndó joo co candaa ini ndó. Á co ndícuhun ini ndó ña nacaja i <sup>19</sup> tá nandicahnda i ndíhuhun pan nuú uhun mil taa. Ndaja toyicá nanditaca nacaja ndó xihín ña nacandoo cán —nacachi Jesús.

Já nanducú ñehe na tuhún nu á:

—Uxu ivi ña.

<sup>20</sup> Ta nacachi tucu Jesús xihín ná já:

—Ta tá nandicahnda i usa pan nuú comi mil ñayivi, ndaja toyicá nanditaca nacaja ndó xihín ña nacandoo —nacachi a.

Já nanducú ñehe na tuhún nu á:

—Usa ña.

<sup>21</sup> Anda já nacachi a já xihín ná:

—Camaní yij va candaa ini ndó —nacachi a.

*Tá nandaja vaha Jesús in da cuáá ñuu Betsaida*

<sup>22</sup> Tá nandihí naxinu na ñuu Betsaida já ñehe na in da cuáá nacasaa na nu Jesús. Já naxica tahví na nu á ña ná caní ndaa ndáha á da. <sup>23</sup> Ta chí natiin a ndáha da cuáá cán já natavá a da yuhú ñuu. Nachindaa tójí a nduchú núu da já nachinúu a ndáha á jiní dá. Já nandaca tuhún a da á cuu candehé da. <sup>24</sup> Ta já nacachi da cán já sádehé da:

—Sádehé e java taa joo tá quiahva ndaa yíto quiahva já ndaa da xíca nuu da xíní i —nacachi da.



<sup>25</sup> Anda já nāchinúu tucu Jesús ndáha á nduchú núu da já nasandehé ndaa da. Anda jáví nandivaha nduchú núu da ta nacasáhá sándehe cáxi vaha da tóco ndihi ñaha. <sup>26</sup> Ta nāchindahá Jesús da cuanúhu da vehe da já nācachi a já xihín dá:

—A ndíhvún mahñú ñuu ni a ndícanún ña yóho nuú ñayivi ndúu jan —nācachi a.

*Tá cáxi tuhun ndaa Pedro ña cúu Jesús mé a nāchindahá Ndióxi cacomí cuéntá sahá ñayivi*

(Mt. 16:13-20; Lc. 9:18-21)

<sup>27</sup> Tá nandihí já nasahan Jesús xihín na xíca tuun xihín á ñuu válí ndácaan Cesarea cuéntá Filipino. Nani xíca na cuahan na íchi nandaca tuhún a na já cáchí a já xihín ná:

—Ndá da cáchí ñayivi cúu yehe —nācachi a.

<sup>28</sup> Já nācachi na cán já:

—Java na cáchí na ña cúu ndó Juan, da nācaja ndúta ñayivi. Ta java na cáchí na ña cúu ndó profeta Elías. Ta java na cáchí na ña cúu ndó in táhan profeta nasanduu sanahá —nācachi na.

<sup>29</sup> Anda já nandaca tuhún tucu Jesús na já cáchí a já xihín ná:

—Ta ndóhó ri, ndá da cáchí ndo cúu u —nācachi a.

Anda já nācachi Pedro já xihín á:

—Mé ndó cúu Cristo, mé a nāchindahá Ndióxi cacomí cuéntá sahá ñayivi —nācachi da.

<sup>30</sup> Anda já nasahnda Jesús chuun nu ná ña ná a cáxi tuhun na ña yóho nuú ni in ñayivi.

*Cáxi tuhun Jesús ña quivi a*

(Mt. 16:21-28; Lc. 9:22-27)

<sup>31</sup> Anda já nacasáhá jánaha Jesús nu ná ña tandaa quiví ndoho ndivaha ini mé á, da nāchindahá Ndióxi nduu ñayivi. Ta na sacuahā veñuhu xihín na sacuahā nuú jutū xihín na jánaha ley Moisés candají na mé á janda quiahva ná cahní ñahá na. Joo tá ná xinu uní quiví nditacu tucu a. <sup>32</sup> Cáxi ndivaha nācahan Jesús ña yóho xihín ná ta chí anda já natavá xóo Pedro Jesús já nacasáhá jánani da a sahá ña nācachi a xihín ná. <sup>33</sup> Joo nācava Jesús ta nandicoto nihni a nuú na xíca tuun xihín á já nacasáhá ndícuehe a xihín Pedro já cáchí a já xihín dá:

—Cuáhán quee Satanás, rí cúu tiñahá sacuahā. Co ín xíní túnun tá quiahva ín xíní túní Ndióxi jáchi cáhvi inún tá quiahva cáhvi ini ñayivi ñuyiví yóho —nācachi a.

<sup>34</sup> Anda já nācana Jesús na xíca tuun xihín á xihín java ga ñayivi já nācachi a já xihín ná:

—Ndá na cúni candico yehe ndítahan nu ná ndihí chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coo caja toho a ná quivi na sahá i. <sup>35</sup> Jáchi ndá na catóo coo chága ñuyiví yóho ndihí saha ná. Joo ndá na sáhan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quiví. <sup>36</sup> Vatí ná quee vaha in na ñuyiví yóho ta cómi na tóco ndihi ñaha ñuyiví joo ndá chuun quea tá nu ndihí ndihí saha ná indayá. <sup>37</sup> Jáchi ni in ñaha a cúu chahvi in na saha ínimā ná ná a cūhun na indayá. <sup>38</sup> Candehé ndo. Mé tiempo viti cája ñayivi cuahá cuachi ta co xéen na caja na ña sáhdá Ndióxi nu ná. Ta ndá na cácahan nuu sahá i xihín sahá tuhun vaha cáhan i quiahva já cacahan ri nuú yehe, da nāchindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán nahā ndaja cáhnu cúu yehe jáchi quixi i xihín ndeé Ndióxi ta xihín ndeé táto yii mé á viti —nācachi Jesús.

## 9

<sup>1</sup> Ta nācachi tucu Jesús já xihín ná:

—Mé a ndaa ná cahan i xihín ndo. Java na ndúu yóho a quiví toho na janda quiahva ná xinu quiví cuni na cacomí Ndióxi cuéntá sahá ñayivi xihín ndeé mé á —nācachi a.

*Tá nandijama Jesús quiahva cáa*

(Mt. 17:1-13; Lc. 9:28-36)

<sup>2</sup> Tá nayaha iñu quiví já nandaa Jesús in yucú jícó ta ndáca táhan Pedro xihín Jacobo xihín Juan cuahan na xihín á. Ta nu táhyí mé na cán nandijama quiahva cáa. <sup>3</sup> Ta a juú quiahva nandiyehē jáhma ndíxi a chí nandiyaa cachí ña. Ni in ñayivi ñuyiví yóho a cúu ndicata yaa nahá jáhma tá quiahva yaa nanduu jáhma á. <sup>4</sup> Anda já na xíca tuun xihín Jesús naxini na Elías xihín

Moisés ndúu na ndítúhún na xihín á. <sup>5</sup> Ta já nacachi Pedro já xihín Jesús:

—Maestro, vaha cúu ndúu nde yóho jáchi já cuu cavaḥa nde uní vehe tiyahvá válí. In a coo mé ndó ta inga coo Moisés ta inga coo Elías —nacachi da.

<sup>6</sup> Nayihví ndivaha na xíca tuun xihín Jesús sahá ña cán quéa co xíni mé Pedro ndía cáa cáḥan va da. <sup>7</sup> Anda já nanuu in vico jata ná já najáhavi a na ta tañu vico cán naxini johó na ña cáḥan in a já cáchi a já:

—Da yóho cúu jahyi maníi. Cuni johó ndó nu cáḥan da.

<sup>8</sup> Ta tá nandicoto nihni na sa coó ga na naxini na ta jandá in túhún Jesús naxini na.

<sup>9</sup> Tá sa cuahān nuu na jini yucu cán já nasahnda Jesús chuun nu ná ña ná a cáxi tuhun na nuú ñayivi ña naxini na anda quiahva ná xinu quivi nditacu tucu mé a nachindahá Ndióxi nduu ñayivi. <sup>10</sup> Sahá ña cán quéa nachijehé tuhun na sahá joo nandítúhún xihín táhan na ndía cúní cachi Jesús tá nacachi a ña nditacu tucu a.

<sup>11</sup> Anda já nacasáhá ndáca tuhún na mé á já cáchi na já xihín á:

—Ndávaha cáchi na jánaha ley Moisés ña ndítahan quixi jihna ñúhú profeta Elías —nacachi na.

<sup>12</sup> Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. Á co xíni ndó ndá quiahva cáchi tuhun Ndióxi sahá da chindahá Ndióxi nduu ñayivi. Cáchi a ña ndoho ini da ta candají na da. <sup>13</sup> Joo cáxi tuhun i nu ndó ña sa naquixi va Elías ta nacaja na tá quiahva cúní mé va na xihín dá ta tá quiahva cáchi tuhun Ndióxi ndoho da quiahva já nandoho da —nacachi Jesús.

*Tá nandaja vaha Jesús in taa loho ndácaan ínimā quini ini*

*(Mt. 17:14-21; Lc. 9:37-43)*

<sup>14</sup> Tá nandihí já nandicó coo Jesús xihín na cán nu ndúu java ga na xíca tuun xihín á cán. Já naxini na cuahá ndivaha ñayivi nacava nuu na na cán. Jári ñúhu java na jánaha ley Moisés cáni táhan yúhu ná xihín na xíca tuun xihín Jesús. <sup>15</sup> Tá naxini ñayivi yóho Jesús chí nacatontó ndihi na já nandava nihni na nasahān na cáḥan Ndióxi

na xihín á. <sup>16</sup> Anda já nandaca tuhún Jesús na já cáchi a já xihín ná:

—Ndá saḥa ndítúhún ndó xihín na jan —nacachi a.

<sup>17</sup> In da cándichi cán nanducú ñehe da tuhun nu Jesús já cáchi da já:

—Maestro, yóho ñehe e jahyí i nacasaā i nu ndó jáchi ndácaan in ínimā quini ini da ta nandaja níhi ñahá ri. <sup>18</sup> Ndá nacuu tín rí da, jándacava rí da nu ñúhu ta já casáhá cána cuyu chiquiñu yúhu dá ta cáhñá nuhu dá. Xihín ña yóho casáhá jácuitá rí da. Ta sa naxica i ñamaní nuú na xíca tuun xihín ndó ña ná tavá na mé ínimā quini yóho joo coo nacuu caja na ña —nacachi da.

<sup>19</sup> Já nacachi Jesús já xihín ná:

—Ndáhví nahá nacuu ndó jáchi sa cuahá ndivaha quivi ín i xihín ndo ta a ñaha candeé ini ndó yehe. Ta chí co ndeé ga ini i xihín ña cája ndó. Taxi ndó da loho jan chóho —nacachi a.

<sup>20</sup> Chí ñehe na da loho cán nasaa na nu Jesús. Ta tá naxini mé rí quini ndácaan ini da loho Jesús ivi laá nacaja rí ña ná quivi yihí da loho cán já tíví núu da nandicava da nu ñúhu xihín chiquiñu cána yúhu dá.

<sup>21</sup> Anda já nandaca tuhún Jesús tátá da cán já cáchi a já xihín dá:

—Á sanahá ndóho jahyún ña yóho —nacachi a.

Já nacachi tátá da cán já:

—Janda tá loho da cája rí já xihín dá. <sup>22</sup> Ta cuahá tañu chicaan rí quini da ini yávi núhu xihín ini ticuiví viti ña cahní ñahá ri cúní ri. Ña cán quéa xíca tahví i nu ndó ña ná candáhví loho ini ndó ndeḥe ta chindeé ndó ndeḥe tá ta cuu caja ndó ña —nacachi da.

<sup>23</sup> Anda já cáchi Jesús já xihín dá:

—Cuu caja i ña tá cándúsún yehe. Jáchi cuu caja i tóco ndihi ñaha xihín ñayivi tá candeé ini na yehe —nacachi a.

<sup>24</sup> Ivi laá nacayuhú tátá mé da loho cán já cáchi da já:

—Cándúsa vi joo chindeé ndó yehe ná candúsa chága i —nacachi da.

<sup>25</sup> Ta tá naxini Jesús ña nacasáhá chutú cuahá ñayivi já nandicueḥe mé á xihín mé rí quini cán já cáchi a já xihín ri:

—Ínima quini, rí nandaja níhi ta nandaja jóho da loho yóho, sáhdá i chuun nuun ña ná queún cuhun ta a ndícó coo gaún ndihvún ini da —nacachi a.

<sup>26</sup> Anda já nacayuhú cóhó rí quini cán já nasahní yihí tucu rí da. Chí naqueta rí cuahan rí ta najándacoo rí da loho cán tátuhun in ndii sahá ña cán quéa nacasáhá cáchí ñayivi ña sa naxihí va da jan. <sup>27</sup> Joo natiin Jesús ndáha dá já nandiñehe a da. Ta já nandaca ndichi da cán.

<sup>28</sup> Ta tá nandihvi Jesús ini in vehe xihín na xíca tuun xihín á já nandaca tuhún jehé na mé á já cáchí na já xihín á:

—Ndávaha cóo nacuu caja ndehe tavá nde ínima quini nasandacaan ini da loho jan —nacachi na.

<sup>29</sup> Já nacachi Jesús já xihín ná:

—Tá cúni ndó tavá ndo tá ínima quini táhan rí yóho ndítahan cajuhun ndó ta cacá tahví ndo nu Ndióxi —nacachi a.

*Cáxi tuhun tucu Jesús ndaja coo nuú quivi a*

*(Mt. 17:22-23; Lc. 9:43-45)*

<sup>30</sup> Tá naquee na cuahan na nayaha na chí estado Galilea ta co cúni Jesús ña ná candaa ini ñayivi <sup>31</sup> jáchi jánaaha Jesús nuú na xíca tuun xihín á cúni a. Ta cáchí a xihín ná ña vaxi quivi ndiquiahva ñayivi mé á, da nachindahá Ndióxi nduu ñayivi ndahá ñayivi ta cahni ñahá na joo tá ná yaha uní quivi nditacu tucu a. <sup>32</sup> Joo cóo nacandaa ini na ña cahan xihín ná ta yíhví na ndaca tuhún na mé á sahá tuhun cahan.

*Ndicani Jesús ndá na cúu na ún chága saha*  
*(Mt. 18:1-5; Lc. 9:46-48)*

<sup>33</sup> Ta ndaja coo naxinu na ñuu Capernaum ta tá sa ndúu na vehe já nacasáhá ndaca tuhún Jesús na xíca tuun xihín á já cáchí a já xihín ná:

—Ndía ndítuhún ndó saha tá vaxi ndó íchi —nacachi a.

<sup>34</sup> Joo cóo nanducú ñehe na cán tuhun nu á jáchi íchi nuú naquixi na nandituhún cuaha ná saha ndá da cúu da cáhnu chága tañu mé ná. <sup>35</sup> Anda já nasacoo Jesús já nacana ndíhuxu ivi da xíca tuun xihín á já nacasáhá cáchí a já xihín dá:

—Ndá ndó, na cúni cacuu na nu cuítí ndítahan ndaja núu ndó mé ndó cacuu ndó

na nu ndíhí ta caja ndíví ndo nu ndíhi na —nacachi a.

<sup>36</sup> Tá nandihí já nacana Jesús in da loho já nasacu a da mahnú nu ndúu na já nasañehe ndaa da já nacasáhá cáchí a já:

<sup>37</sup> —Ndá na ná ndiquehe vaha in da loho tátuhun da yóho sahá ña quihvi ini na yehe, ndiquehe ri na yehe viti. Ta ndá na ndiquehe yehe, a juú in túhún yehe ndiquehe na vaha jáchi ndiquehe ri na tátá i, mé a nachindahá yehe —nacachi a.

*Tá ndúu java na ndiquehe saha yo já quéa cuahan na xoo í*

*(Mt. 10:42; Lc. 9:49-50)*

<sup>38</sup> Anda já nacachi Juan já:

—Maestro, naxini nde in dataa ta cahan da quivi mé ndó já tavá da ínima quini ñúhu ini ñayivi. Joo co xíca nuu da xihín yo sahá ña cán quéa nasaji nuu nde nu dá caja da ña —nacachi da.

<sup>39</sup> Joo nacachi Jesús já:

—A cáji nuu ndó nu dá jáchi tá cája in na ña xituhún xihín quivi i já quéa a cuú caca nuu na cahan núu na sahá i. <sup>40</sup> Jáchi ndá na co ndíndita caja xíxi xoho, mé na cán cuahan na xoo mí. <sup>41</sup> Ta ndá na ná quiahva in ñaha nu ndó vatí in yáxi ticuúí sahá ña ndícó ndó yehe mé a ndaa ná cahan i xihín ndo ña chahvi tá chahvi Ndióxi sahá ñamaní cája na xihín ndó —nacachi Jesús.

*Tá jándacava ñayivi inga na nuú cuachi*  
*(Mt. 18:6-9; Lc. 17:1-2)*

<sup>42</sup> Ta cáchí tucu Jesús já:

—Ndá na ná jándacava in na ndahví, na cándéé ini yehe nuú cuachi janda vaha chága ná candico in yuú yojó jico ná ta ná ndihí sahá na cahá tañuhú. <sup>43</sup> Tá ndáha ndo quéa jándacava ndohó nuú cuachi chituhún ndó a jáchi vaha chága ná cuhun ndó indiví xihín in túhún ndáha ndo a juú ga cuhun ndó xihín ndíví ndáha ndo indayá nuú co ndáhva ñúhu cáyi. <sup>44</sup> Ta cán ni ticujú co xihí ni ñúhu cáyi co ndáhva. <sup>45</sup> Tá saha ndo quéa jándacava ndohó nuú cuachi chituhún ri ndó ña jan va jáchi vaha chága ná cuhun réncó ndó indiví xihín in túhún saha ndo a juú ga cuhun ndó xihín ndíví saha ndo indayá nuú co ndáhva ñúhu cáyi. <sup>46</sup> Ta cán ni ticujú co xihí ta ni ñúhu cáyi co ndáhva. <sup>47</sup> Tá nduchú núu ndó quéa jándacava ndohó nuú

cuachi tavá ndó ña jáchi vaha chága ná coo cóhó nuu ndó cuhun ndó nuú cacomí Ndióxi cuéntá saha ndo a juú ga ña ná coo ndíví nduchú núú ndo cuhun ndó indayá. <sup>48</sup> Ta cán ni co xihí ticujú ta ni ñúhu cáyi co ndáhva.

<sup>49</sup> Tá quiahva ndíví jjuhún cuáán cája ñúhu cáyi quiahva já ndíví ínimá ñayivi xihín ña ndóho ini na. Ta tóco ndihi ñaha jóco na nu Ndióxi chícaan na ñi yívi na já co tívi a. <sup>50</sup> Vaha va cája ñi jáchi xihín ñi ndihaji ña xíxi na joo tá co óhva ña já a cuú caja ohva tucu yó a já ná caja chúun tucú ña. Ndítahan nu ndóhó caja ndó tátuhun cája ñi ta já canduu víi xihín táhan ndó — cáchi Jesús.

## 10

*Jánaha Jesús nuú na sa natandaha ña co ndítahan jándacoo táhan na*  
(Mt. 19:1-12; Lc. 16:18)

<sup>1</sup> Naquee Jesús ñuu Capernaum cuahan. Já nasahan estado Judea xihín ñundáhyi íin inga xoo yuta Jordán. Cán ñacasáha nanditaca tucu ñayivi nu á chí jánaha tucu a na tá quiahva ñacaan mé á cája. <sup>2</sup> Anda já nacayati java na fariseo nu Jesús sahá ña coto ndojó ñaha na cuni na. Nacachi na já xihín á:

—Á núná nuú in dataa jándacoo da ñájíhí da —nacachi na.

<sup>3</sup> Já nanducú ñehe Jesús tuhun nu ná já cáchi a já xihín ná:

—Ndaja cáchi ley Moisés ña ndítahan caja ndó —nacachi a.

<sup>4</sup> Anda já nacachi na cán já:

—Tá ná quiahva in dataa in tutu nu ñájíhí da sahá ña cuni da jándacoo da ña já queá sahan ley Moisés ñamaní jándacoo da ña —nacachi na.

<sup>5</sup> Anda já nacachi Jesús já xihín ná:

—Sáhan ley Moisés ñamaní yóho nu ndo jáchi táhyi ndivaha ínimá ndo. <sup>6</sup> Joo janda mé saha tá nacavaha Ndióxi ñayivi nu cuítí já nacavaha in túhún taa xihín in túhún ñáha. <sup>7</sup> Sahá ña cán queá ndítahan nuú dataa jándacoo da tátá da xihín náná da já ndique táhan da xihín ñájíhí da. <sup>8</sup> Já xinu ndíví na cán cacuu na tátuhun in víxi yiquí cuñu na sahá ña cán queá co cúu

ga na ivi yiquí cuñu sahá ña nanduu na tátuhun in túhún yiquí cuñu. <sup>9</sup> Sahá ña cán queá co ndítahan nuú na cán janí táhan na ña najátahan Ndióxi tá natandaha ná —nacachi Jesús xihín ná.

<sup>10</sup> Ta tá nandicó coo tucu na vehe já ñacasáha tucu na xíca tuun xihín á cán ndáca tuhún na Jesús sahá ña nacahan. <sup>11</sup> Ta nanducú ñehe Jesús tuhun nu ná já nacachi a já:

—Tá ná jándacoo in dataa ñájíhí da ta tándaha dá xihín inga ñáñáha já queá cája da cuachi nu ñájíhí nuú da jáchi íin da xihín inga ñáha. <sup>12</sup> Ta tá ná jándacoo in ñáñáha yí ña ta tándaha ña xihín inga da cája ri ña cán va cuachi nu yí ña jáchi íin ña xihín inga dataa —nacachi Jesús.

*Cája yíi Jesús na valí*

(Mt. 19:13-15; Lc. 18:15-17)

<sup>13</sup> Anda já ñehe na java na valí ñacasaa na nu Jesús ña ná cani ndaa ndáha á na. Joo mé na xíca tuun xihín á cán ñacasáha na cája cuehe na xihín mé na ndáca na valí cán.

<sup>14</sup> Tá naxini Jesús ña cája na já nandicuehe a já cáchi a já xihín na xíca tuun xihín á:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. <sup>15</sup> Mé a ndaa ná cahan i xihín ndo ndá na co cuni ndiquiahva na mé ná ndáha Ndióxi tátuhun cája na valí yóho já queá a cúu cacomí Ndióxi cuéntá saha ná —nacachi a.

<sup>16</sup> Anda já ñacasáha Jesús ñehe ndaa na valí ta chínúu a ndáha á jini ná já cája yíi á na.

*Cáhan in da cuicá xihín Jesús*

(Mt. 19:16-30; Lc. 18:18-30)

<sup>17</sup> Tá cuahan tucu Jesús íchi já xínu in dataa ñacasaa da nasaxítí da nu á já cáchi da já xihín á:

—Maestro, mé ndó cúu ndó taa vaha ña cán queá ndáca tuhún i ndóhó ndía ndítahan caja i já ná ñehe táhvi cuhun i indiví coo i anda ama cáa quivi —nacachi da.

<sup>18</sup> Já nacachi Jesús já xihín dá:

—Ndá cuéntá queá cáhún xihín i ña cúu u da vaha. Ni in túhún toho ñayivi co cúu ná na vaha ñuyívi yóho. In túhún Ndióxi cuítí va queá vaha. <sup>19</sup> Sa xini vún ña sáhdá

Ndióxi nuun cajún já cáchi a já: “Coto a cóún xihín ñájíhí á yí ñani táhún. Coto a cáhnún ndii. Coto a cája cuíhnún. Coto a cáhún ña tuhún sahá ñayivi. Coto a jándahvún ñayivi. Ta caja cáhnún tátún xihín nánún” —ñacachi Jesús xihín dá.

<sup>20</sup> Já ñacachi da cán já:

—Maestro, janda tá ñasacuu u ña loho ñacasáhá i cája i tóco ndihi ña sáhná Ndióxi caja i —ñacachi da.

<sup>21</sup> Ñasandehé Jesús nu dá ta táhná ini a saha dá já ñacachi a já xihín dá:

—Inga ñaha cámani cajún: Cuáhán jicún tóco ndihi ñahún jan ta ndacahndún jiuhún jan nuú na ndahví já ñehe táhvun coo cuahá ñahún indiví. Ta tá ñandihí já quisún candicún yehe —ñacachi Jesús.

<sup>22</sup> Joo tá ñaxini johó da cuicá cán ña ñacachi Jesús ivi laá ñacavitá ini da já ñaquee cuéha dá cuahan da jáchi ín cuahá ndivaha ñaha da.

<sup>23</sup> Anda já ñacasáhá sándehe Jesús nuú na xica tuun xihín a cán já ñacachi a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná —ñacachi a.

<sup>24</sup> Chí ñacatóntó mé na xica tuun xihín á cán sahá tuhun ñacahan joo ñandicahan tucu Jesús já cáchi a já:

—Jahyi a, ndaja yáncá cáa sahá in na cándeé ini jiuhún ndiquiahva na mé ná ndáha Ndióxi ña ná cacomí a cuéntá saha ná. <sup>25</sup> Jáchi janda cama chága cuu yaha in camello ini in yávi saha yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —ñacachi Jesús.

<sup>26</sup> Anda já ñacatóntó ndihi mé na xica tuun xihín á cán tá ñaxini johó na ña yóho. Já ñacasáhá ndáca tuhún táhan na já cáchi na já:

—Ndá na cúu na cuu cacu ndaa ínima, dá já —ñacachi na.

<sup>27</sup> Ñandicoto nihni Jesús nu ná já cáchi a já xihín ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha co íhvi toho nu Ndióxi —ñacachi a.

<sup>28</sup> Anda já ñacachi Pedro já xihín Jesús:

—Joo ñehe ñajándacoo ndihi ñe ña ñasacomí ñe ta ndíco ñe ndohó —ñacachi da.

<sup>29</sup> Já ñanducú ñehe Jesús tuhun nu ná já cáchi a já:

—Mé a ndaa ná cahan i xihín ndo ña ndá na jándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi ná sahá yehe xihín sahá tuhun cahan i, <sup>30</sup> na cán cúu na ñehe cuaha chága ví ñaha ñuyiví yóho jatá ña ñajándacoo na tátuhun vehe na, ñani na, quiahva na, náná na, jahyi na, ñundáhyi ná viti vatí ná ndicuíta ñayivi caja xixi na xihín ná. Joo ñehe táhvi ná catacu na anda ama cáa quivi xihín Ndióxi. <sup>31</sup> Ta ndúu cuahá na ín sahá ñuyiví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyiví yóho viti joo vaxi quivi cacuu na na ín saha nu Ndióxi —ñacachi a.

*Cáxi tuhun tucu Jesús ña quivi a  
(Mt. 20:17-19; Lc. 18:31-34)*

<sup>32</sup> Ta ndaja coo cuahan Jesús xihín na xica tuun xihín á chí íchi ndaa cuahan chí Jerusalén. Cánuu Jesús cuahan xihín ná. Ta ñacatóntó na cán ta yíhvi na cuahan na xihín á. Anda já ñatavá xoo tucu a ndihuxu ivi na xica tuun xihín á já ñacasáhá cahan xihín ná ña ndoho a chága chí nuu. <sup>33</sup> Já ñacachi a já:

—Candehé ndo. Yóho ndaa í cuahan yo chí Jerusalén nuú ndiquiahva na yehe, da ñachindahá Ndióxi nduu ñayivi ndahá na sacuaaha nuú jutú xihín nuú na jánaha ley Moisés. Na yóho cúu na cacu ini sahá ndaja quivi i. Anda já ndiquiahva na yehe ndahá na tóho. <sup>34</sup> Cuacu ndaa na yehe ta caní na yehe ta cuhna na tójí na nuú i ta já cahní na yehe. Joo tá ná yaha uní quivi nditacu tucu u —ñacachi Jesús xihín ná.

*Tá ñaxica Jacobo xihín Juan ñamani nu Jesús  
(Mt. 20:20-28)*

<sup>35</sup> Anda já ñacayati Jacobo xihín Juan, jahyi Zebedeo nu Jesús já ñacachi da já xihín á:

—Maestro, cúní ñe caça ñe in ñamani nu ndo —ñacachi da.

<sup>36</sup> Já ñacachi Jesús já xihín dá:

—Ndía maní cúní ndó caja i xihín ndo —  
nācachi a.

<sup>37</sup> Já nācachi da cán já xihín á:

—Ñā xíca nde nu ndo quea ná quiahva  
ndó ñamaní nuú nde cacoo in in nde xoo  
jín ndo. In nde coo xoo cuáha ta in nde  
coo xoo íti jín mé ndó indiví nuú coo ndó  
cacomí ndó cuéntá sahá ñayivi —nācachi  
da.

<sup>38</sup> Anda já nācachi Jesús já xihín dá:

—Co cándaā ini ndó ñā xíca ndó nuú i. Á  
cuu ndoho ini ndó tá quiahva ndítahan nuú  
i ndoho ini i. Jáchi ñā vaxi nuú i ndoho ini  
i cúú á tátuhun coho i in yáxi ndutá ova.  
Á in tiahva ndó ndoho ini ndó tá quiahva  
ndítahan nuú i ndoho ini i anda quiahva  
ná quivi i —nācachi a.

<sup>39</sup> Já nācachi da cán já:

—Cuu caja nde ñā.

Já nācachi Jesús já xihín dá:

—Mé a ndaa tandaa quivi coho ndó ñā  
ova ñúhu ini yáxi, mé ñā coho i. Ta tandaa  
quivi ndoho ndivaha ini ndó tá quiahva  
ndoho ini i anda quiahva ná quivi i. <sup>40</sup> Joo  
sahá ñā cacoo in ndó xoo cuáha i ta in  
ndó xoo íti i a juú nuú i quiahva i ñā nu  
ndo. Jáchi sa nādicaxi Ndióxi na ñehe  
táhvi cacoo cán —nācachi Jesús xihín dá.

<sup>41</sup> Tá naxinu joho uxu chága na xíca tuun  
xihín Jesús cán ñā yóho já nācasáhá xójo  
ini na xihín Jacobo xihín Juan viti. <sup>42</sup> Joo  
nācana Jesús na já nācachi a já xihín ná:

—Sa xíní ndó ndaja cája na sáhdá chuun  
nuú ñayivi ndúu ñuyíví yóho. Ñā cája  
na quea jácandíhi na ñayivi ta cája na tá  
quiahva cúní mé ná. <sup>43</sup> Joo co ndítahan coo  
ñā cán tañu mé ndó jáchi ndá da cúní cacuu  
da cáhnu chága tañu ndó xíní ñúhú cacuu da  
in da cája ndíví nuú ndihi ndó. <sup>44</sup> Ta ndá da  
cúní cacuu taa nu cuítí tañu ndóhó ndítahan  
cacuu da da cája ndíví nu ndihi ndó. <sup>45</sup> Jáchi  
ni yehe, da nāchindahá Ndióxi nduu ñayivi  
coo nāquixi i ñuyíví yóho ñā ná caja ndíví  
ñayivi nuú i. Ñā nāquixi i caja i quea caja  
ndíví i nu ná ta ndiquiahva i mí i quivi i já  
ná cuu cacu ndaa ínimā cuahá ñayivi ná a  
cúhūn na indayá —nācachi a.

*Tá nandaja vaha Jesús in da cuáá nani  
Bartimeo*  
(Mt. 20:29-34; Lc. 18:35-43)

<sup>46</sup> Anda já naxinu na ñuu Jericó. Ta tá  
sa naqueta tucu Jesús cuahan jatá ñuu cán  
xihín na xíca tuun xihín á xihín cuahá ga  
ñayivi ta mé yuhú íchi cán íin coo in da cuáá  
naní Bartimeo, jahyi Timeo sáti da. <sup>47</sup> Ta  
tá naxini joho da ñā cáyati Jesús, da ñuu  
Nazaret vaxi da já nācasáhá mé da cuáá  
cán cáyuhú cóhó da já cáchi da já:

—Jesús, da nāquixi chichi David caja  
ndó ñamaní candáhvi loho ini ndó yehe —  
nācachi da.

<sup>48</sup> Joo nācasáhá cuahá ñayivi cája cuehe  
na xihín dá ñā ná caji da yúhu dá. Joo ví ga  
ví cáyuhú da já cáchi da já:

—Ndóhó, da nāquixi chichi David caja  
ndó ñamaní candáhvi loho ini ndó yehe —  
nācachi da.

<sup>49</sup> Anda já nādaça ndichi Jesús já  
nācachi a já:

—Cana ndó da ná quixi da.

Já nācana na da cuáá cán já cáchi na já  
xihín dá:

—A ndícani inún. Candichi jáchi cána  
Jesús yohó —nācachi na.

<sup>50</sup> Anda já najácana da cotó ndeé da ta  
nādaça ndichi da já nāsaā da nu íin Jesús.

<sup>51</sup> Anda já nādaça tuhún Jesús da já cáchi  
a já xihín dá:

—Ndía cúnun ná caja i xuhun.

Já nācachi mé da cuáá cán já:

—Candehé e cúní, xitoho.

<sup>52</sup> Já nācachi Jesús já xihín dá:

—Cuu nuhu vún viti. Sa nāndivahún jáchi  
nācandee inún yehe —nācachi a.

Chí ivi laá nādaça ndehé da cuáá cán. Já  
nāndico da Jesús íchi cán cuahan da.

## 11

*Ndihvi Jesús ñuu Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Tá naxinu na yati ñuu Jerusalén jín ñuu  
Betfagé xihín ñuu Betania ñā ndíque táhan  
nuu xihín yúcu yitó Olivo já nāsañda Jesús  
chuun nuú ivi da xíca tuun xihín á. <sup>2</sup> Já  
cáchi a já xihín dá:

—Cuáhán ndo ñuu loho ndácañ yati jan.  
Tá ná xinu coo ndó jan ndíñehe ndó in  
búrro ndíco ndaa, rí cámaní yíi ndaa na.  
Ndaxí ndó rí ta cañehe ndó rí quixi ndó.

<sup>3</sup> Ta ndá na ná ndaça tuhún ndohó saha

ri já queá cachi ndó xihin ná ña xini ñuhú xitoho ndó ri viti joo tá ná ndihi chuun rí já ndixi tucu rí, já cachi ndó xihin ná — nacachi Jesús xihin da.

<sup>4</sup> Ta naquee da cán cuahan da já nandinhehe dá mé búrró cán ndico ndaa rí jin yéhe yuhú ichi já nandaxi da ri.

<sup>5</sup> Ta ndaja coo java na ndúu cán nacasáhá cáchi na já:

—Ndía cája ndó. Ndávaha ndaxi ndo búrró jana nde jan —nacachi na.

<sup>6</sup> Anda já nanducú ñehe mé da xica tuun xihin Jesús cán tuhun nu ná ta nacachi da tá quiahva nacachi Jesús xihin dá. Anda já nañehe dá ñamaní cañehe da rí cuhun da.

<sup>7</sup> Tá nandihí já ñehe da búrró cán nacasaá da nu Jesús já nachojó da cotó ndéé da jata ri já ndaa Jesús jata ri. <sup>8</sup> Ta cuahá ñayivi nacasáhá na chinduu na cotó ndéé na ichi ta java na nacasáhá na sáhdá na ndáha yito já chinduu na do ichi. <sup>9</sup> Ta na cuahan chí nuu ta jári na vaxi chí jata nacasáhá na cáyuhú na já cáchi na já:

—Cája cáhnu í Ndióxi. Ndicáhnu nahá ná cacuu da cómi cuénta saha yo jáchi cúu dá da vaxi yuhú nuu Ndióxi. <sup>10</sup> Cáhnu ná coo quivi tá casáhá Ndióxi cacomí a cuénta saha yo. Tá quiahva nasacomí David, tátá yo cuénta sahá ñayivi sanahá quiahva já cacomí mé á cuénta saha yo. Cáhnu ná cacuu Ndióxi —cáchi ñayivi.

<sup>11</sup> Anda já nandihvi Jesús ñuu Jerusalén ta já naxinu a veñuhu cáhnu cán. Ta tá nandihí nasandehé ndihi a níi xoo cán já naquee a cuahan chí ñuu Betania xihin ndihuxu ivi na xica tuun xihin á jáchi sa nahini ta cuahan cuáa va.

### *Tá nachicaan Jesús cháhan jata titó ñuhú (Mt. 21:18-19)*

<sup>12</sup> Tá naquee na Betania inga quivi itaan já nacasáhá cuico Jesús cuahan. <sup>13</sup> Tá naxini xica a in titó ñuhú vaha dó ndoco ndáha. Nasahan Jesús sádehé a á in cuhi nu do joo coo rí ná ñehe a. Ndáha uun va dó cán in jáchi a juú tiempo coo rí cán queá. <sup>14</sup> Anda já nacahan Jesús xihín titó ñuhú cán já cáchi a já xihin do:

—Ni in ga na a cáxi ga cuhi nu yóhó — cáchi a xihin do.

Ta naxini johó na xica tuun xihin á cán tuhun yóho.

### *Tá nataxi Jesús na ndúu jico ñaha yéhe veñuhu*

(Mt. 21:12-17; Lc. 19:45-48; Jn. 2:13-22)

<sup>15</sup> Tá nandihí já naxinu na Jerusalén. Ta tá nandihvi Jesús veñuhu cáhnu cán já nacasáhá táxi a na ndúu jico cán xihín na ndúu xéen viti. Ta naxico ñehe a mesa na ndúu ndíjama jihún ñayivi ta naxico ñehe a táyi sácoo na ndúu jico ndíjata. <sup>16</sup> Ta chí coo nasahan ñamaní nuú ñayivi cañehe na ñaha ndihvi na veñuhu. <sup>17</sup> Anda já nacasáhá jánaha nu ná já cáchi a já xihin ná:

—Já cáchi tuhun Ndióxi: “Vehe mí i cacuu a vehe nuú quixi na caça tahví na nuú i saha tóco ndihi ñayivi ñuyivi”, cáchi tuhun Ndióxi. Joo ndóhó nandai cuu ndó yóho caja cuíhna ndo nuú ñayivi —nacachi Jesús xihin ná.

<sup>18</sup> Tá mé na sacuaaha nuú jutú cán xihín na jánaha ley Moisés naxini johó na ña yóho já nacasáhá na ndúcú na ndá quiahva cahni na a jáchi yíhvi ñahá na sahá ña catóntó ndihi ñayivi xihín ña jánaha mé á nu ná. <sup>19</sup> Joo tá nacuaá já naquee Jesús ñuu cuahan xihín na xica tuun xihin á.

### *Tá nahichi titó ñuhú, dó coo cuhi nuu (Mt. 21:20-22)*

<sup>20</sup> Ta naha chá inga quivi itaan nayaha na nu cándichi mé titó ñuhú cán já naxini na ña nahichi do janda yóho do nahichi. <sup>21</sup> Anda já nandicuhun ini Pedro saha mé titó ñuhú já cáchi da já xihin Jesús:

—Maestro, candehé ndó titó ñuhú, dó nacahan cuehe ndó xihin. Sa nahichi dó viti —nacachi da.

<sup>22</sup> Já nacachi Jesús já xihin dá:

—Candee ini ndó Ndióxi. <sup>23</sup> Jáchi mé a ndaa ná cahan i xihin ndo ña tá ná cachi ndó xihin yucu yóho: “Caxoo ta cuahán jáquetún mún ini tañuhú”, ta tá coo cáhvi ivi johó ini ndó ta tá candúsa ndó coo tá in cáchi ndó ta chí já ndusa coo. <sup>24</sup> Sahá ña cán queá cáchi i xihin ndo ña tóco ndihi ñaha xica tahví ndó nu Ndióxi ta tá candúsa ndó ña sa nañehe ndó a já queá ñehe ndusa ndó a. <sup>25</sup> Ta tá ndúu ndó xica tahví ndo nu Ndióxi xini ñuhú caja cáhnu ini ndó saha ndá na xójo ini ndó xihin já ná caja cáhnu

ri ini Ndióxi, tátá ndo ña íin indivi sahá cuachi ndó. <sup>26</sup> Joo tá co cája cáhnu ini ndó sahá ñayivi já quea ni Ndióxi, tátá ndo ña íin indivi a cája cáhnu ini a sahá cuachi ndó —nacachi a.

*Tá nandaca tuhún na Jesús ña ndáchí quíxi ndée á ña cája cuahá nuú ñaha*

*(Mt. 21:23-27; Lc. 20:1-8)*

<sup>27</sup> Anda já nandicó coo tucu na ñuu Jerusalén. Ta tá xíca Jesús chí veñuhu cáhnu cán já nacayati na sacuahá nuú juu xihín na jáñaha ley Moisés xihín na sacuahá veñuhu nu á. <sup>28</sup> Já nandaca tuhún na Jesús já cáchí na já xihín á:

—Yo já sahan ñamaní nuun cajún ña cajún yóho —nacachi na.

<sup>29</sup> Já nacachi Jesús já xihín ná:

—Ná ndaca tuhún ri yehe va ndohó ta tá ná nducú ñehe ndó tuhún nuú i anda já caxi tuhún i nu ndo yo já nasahan ñamaní nuú i caja i ña cája i yóho. <sup>30</sup> Cachi ndó xihín i yo já nachindahá Juan ña ná quixi da caja ndúta da ñayivi. Á Ndióxi nachindahá da, á ñayivi nachindahá ñahá. Nducú ñehe quí ndó tuhún nuú i viti —nacachi Jesús xihín ná.

<sup>31</sup> Anda já nacasáhá ndítuhún xihín táhan na cán já cáchí na já:

—Tá ná cachí ña Ndióxi quea nachindahá Juan ta já nducú nehe Jesús tuhún nu yo já cachí da xoho: “Ndá cuéntá quea coo naxeen ndó candúsa ndó da, dá já”, cachi Jesús xoho. <sup>32</sup> Ta tá ná cachí: “Ñayivi cúu na nachindahá Juan”, já ndicuíta ñayivi xihín yo —nacachi na ndítuhún xihín táhan na.

Já cáchí na jáchí yíhví na ñayivi jáchí tóco ndihi ñayivi nacahán na saha Juan ña cúu dá da nachindahá Ndióxi jáyaha da tuhún cáhan mé á nuú ñayivi. <sup>33</sup> Sahá ña cán quea nacachi na já xihín Jesús:

—Co xini toho nde yo nachindahá Juan.

Anda já nacachi a já xihín ná:

—Ta ni yehe a caxi tuhún i nu ndo yo já nasahan ndée nuú i caja i ña yóho —nacachi a.

## 12

*Sácú Jesús quiahva sahá java mozo, da nacaja quini xihín xitoho*

*(Mt. 21:33-46; Lc. 20:9-19)*

<sup>1</sup> Anda já nacasáhá Jesús sácú a quiahva nuú ñayivi já nacachi a já xihín ná:

—Nasahin in dataa najánde cuaha dá tó uva nu ñúhu dá ta já nasacu da in corra yito nu do. Ta nacavaha da in nuú cuhni mé uva cán ña cavaha vino. Ta nacavaha da in nu jíco canúu da já cuu candaa da tóco ndihi dó cán.

<sup>2</sup> Tá nandihí já nasahan ndojó da ñúhu dá nuú java na caja chúun na ña já naquee da cuahan xíca da. <sup>2</sup> Ta tá naxinu tiempo jáquee na já nachindahá da in mozo da nuú na cája chúun ñúhu da cán ña ná ndiquiahva na ña cáni nu dá ndiquehe da saha ñúhu da ña nasahan ndojó da nuú na cán. <sup>3</sup> Joo mé na cája chúun tóo ñúhu cán natiin na mozo da cán já nacani na da. Tá nandihí já nanducú ñehe na da nuú xitoho da joo coo ñaha ná sahan na nu dá. <sup>4</sup> Anda já nachindahá tucu mé da xihín ñaha ñúhu cán inga mozo. Joo da yóho nacaja xíxi tucu na xihín dá jáchí nacani na da xihín yuu. Ta najándicuehe na jini dá já nacasáhá canahá na xihín dá. <sup>5</sup> Ta mé da xihín ñaha ñúhu cán nachindahá tucu da inga mozo da ta nasahní na da. Ta nachindahá cuahá ga da mozo da nasahan cán. Ta java da nacani na ta java da nasahní na.

<sup>6</sup> Nacandoo in túhún jahyi mé da xihín ñaha ñúhu cán ta quíhví ndivaha ini da jahyi da. Joo tá nu ndihí já nachindahá da jahyi da jáchí cáhán da: “Cája i cuéntá coo toni ñúhu na xihín jahyi i”, nacahán da. <sup>7</sup> Joo mé na cája chúun ñúhu cán nacasáhá ndítuhún xihín táhan na já cáchí na já: “Candehé ndo. Yóho vaxi da cúu jahyi xitoho í. Ta tá ná xinu quívi quivi xitoho í ta da yóho cacuu da ndicojo chuun saha ñúhu yóho. Cóho cahni yó da já ná candoo ñúhu yóho ndáha mí”, nacachi xihín táhan na cán. <sup>8</sup> Anda já natiin na da cán ta nasahní na da já najácana na yiquí cuñu da jata cútu cán —nacachi Jesús.

<sup>9</sup> Anda já nandaca tuhún Jesús ñayivi ndúu cán já cáchí a já:

—Á co xini ndó ndía caja da xihín ñaha ñúhu yóho viti. Ña caja da quea quixi da ta cahni ndihi da na cája chúun tóo nu ñúhu dá. Já ndiquiahva da ñúhu dá nuú java ga na já ná caja chúun na nu á.



10 'Á cō xini ndó ña cáchí tūhun Ndióxi. Ña cáchí a quéa:

Mé yū ña najácana da cávaha vehe, ña cán cúu ña nanduu yū ndúhu sahá vehe ña iin chága saha.

11 Ña yóho quéa ñacaja Ndióxi ta cúu á in ñaha cáhnu ndivaha nu yō, cáchí tūhun Ndióxi —ñacachi Jesús.

12 Anda já ñacasáhá ndúcú na sacuaḥa tiin na Jesús chicaoan na a vecaa jáchi ñacandaḥa ini na ña saḥa mé ná ñasacu a quiahva yóho. Joo sahá ña yihví na ñayivi najándacoo na a ta ñaquee na cuahan na.

*Ndáca tūhún na Jesús á ndítahan nu ná chahvi na jiuḥún cuéntá impuesto*  
(Mt. 22:15-22; Lc. 20:20-26)

13 Tá nandihí já ñachindahá na java na fariseo xihín na cúu cuéntá Herodes nu Jesús ña ná coto ndojó ñahá na xihín tūhun cáhan mé á já ná chicaoan na cuachi jatá.

14 Anda já naxinu na nu Jesús já cáchí na já xihín á:  
—Maestro, xini nde ña ndinuhu ña ndaa cáhan mé ndó. Ta cō quéhe ndó cuéntá tá cáhan núu ñayivi saḥa ndo. Ta cándaḥa ini nde ña tá cáhan ndó sahá in ñaha cája ñayivi cúu á sahá ña sándeḥé ndó janda ínimá ná. Ta cándaḥa ini nde ña jánaḥa ndó ña ndaa saḥa íchi cuéntá Ndióxi. Ta viti cūni nde ndaca tūhún nde ndohó á ndítahan nuú nde chahvi nde jiuḥún cuéntá impuesto nuú da cómi cuéntá saḥa yō ñuu Roma. Á chahvi nde ña, á a chahvi toho nde ña —ñacachi na.

15 Joo sa ñacandaḥa ini Jesús ña cō cúu ná tá quiahva ndáa na ña cán quéa ñacachi a já xihín ná:

—Cándaḥa cáxi táhyí ini i ña cūni ndó coto ndojó cuití ndó yeḥe. Jánaḥa ndó in táhan jiuḥún jan nuú i ná candehé e ña —ñacachi a.

16 Já ñasahan na mé jiuḥún cán nu á ta tá naxini a ña já ñacachi a já xihín ná:

—Yo nahná ta yo quivi quéa ndáa nu á.

Já ñacachi na cán já xihín á:

—Ñeḥe a quivi xihín nahná da cómi cuéntá saḥa yō ñuu Roma —ñacachi na xihín á.

17 Anda já ñacachi Jesús já xihín ná:

—Ndiquiahva ndó ñaha da cómi cuéntá saḥa ndó ñuu Roma jan nu dá. Ta

ndiquiahva ndó nu Ndióxi ña cúu ñaha mé á —ñacachi a.

Chí ñacatóntó mé na cán sahá ña ñacachi Jesús xihín ná.

*Ndáca tūhún na saduceo Jesús á mé a ndaa nditacu ndii*  
(Mt. 22:23-33; Lc. 20:27-40)

18 Anda já ñasahan java na saduceo cahan na xihín Jesús. Ta mé na saduceo yóho cō cándusa na ña ndítacu tucu na sa naxihí. Sahá ña cán quéa nandaca tūhún na Jesús já cáchí na já xihín á:

19 —Maestro, nu ley ñacahyi Moisés sanahá ñatahnda chuun ta cáchí a já: “Tá tándaḥa in dataa xihín ñájihí da ta tá cōo jahyi ña cácu xihín dá ta tá ná xinu quivi quivi da cán já quéa cáchí ley Moisés ña ndítahan tándaḥa tucu ñájihí da xihín da cúu ñani mé ndii cán já ná cōo jahyi da cán xihín yuhú nuú ñani da”, já cáchí ley Moisés. 20 Ta viti cuni johō ndó ná cacu nde in quiahva nu ndó. Ñasahiin usa ñani ta da nu cuití ñatandaḥa dá xihín in ñáñáḥa. Tá nandihí naxihí da joo cōo jahyi da ná cacu xihín ña cán. 21 Ta ñatandaḥa ñani da, da chí ivi xihín ña cuáan cán. Tá já naxihí ri da cán va ta ni da yóho cōo ñacacu jahyi xihín ñájihí ñani. Ta quiahva já ñandoho ri ñani da, da chí uní. 22 Anda quiahva naxinu ndihusa da ñatandaḥa xihín ña ta ni in da cōo ñacacu jahyi xihín ña. Tá nu ndihí naxihí ri mé va ñá. 23 Ta viti ndáca tūhún nde ndohó ndá da cacuu ndusa yí ña cán tá ná xinu quivi nditacu tucu ndii jáchi ndihusa va ñani da cán ñatandaḥa xihín ña —ñacachi na.

24 Anda já ñanducú ñeḥe Jesús tūhun nu ná já cáchí a já xihín ná:

—A váha toho cáhvi ini ndó jáchi cō xini ndó ndaja cáhan tūhun Ndióxi ta ni cō xini ndó ndá quiahva cáhnu cúu ndee Ndióxi.

25 Jáchi tá ná nditacu tucu ndii a tándaḥa ga na ta ni a quiahva na jahyi jíhí na tándaḥa ná. Cacuu na tátuhun tátō Ndióxi ndúu indiví ta cō tándaḥa na cán. 26 Joo sa xini yō ña nditacu tucu ndii. Á a ñaha cahvi ndó ña ñacahyi Moisés sahá ña ñacahan Ndióxi xihín dá tañu tohíñú, dó cándaha ñúhu cán. Já ñacachi a já xihín dá: “Yeḥe cúu Ndióxi cája cáhnu Abraham ta yeḥe cúu Ndióxi cája

cáhnú Isaac ta yehe cúú Ndióxi cája cáhnú Jacob”, nācachi a. <sup>27</sup> Ta ña yóho cúni cachi a ña tácu yji va Abraham xihín Isaac xihín Jacob vatí sa naxihí yiquí cuñu na. Sahá ña cán quéa cō xini ndó ndá saha cáhan ndo — nācachi a.

*Tá cáhan Jesús ndía cúú ña cáhnú chága sáhná Ndióxi caja í*  
(Mt. 22:34-40)

<sup>28</sup> Ta ndaja coo in da jánaha ley Moisés nācayati da nu Jesús jáchi sa naxini johó da ña nācahan Jesús xihín na ndúu cán. Sahá ña xini da ña nanducú ñehe ndaa Jesús tuhun nuú na cán sahá ña cán quéa nandaca tuhún da Jesús já cáchi da já xihín á:

—Ndía cúú ña cáhnú chága sáhná Ndióxi caja í — nācachi da.

<sup>29</sup> Já nācachi Jesús já xihín dá:

—Ña cáhnú chága cúú ña cáchi tuhun Ndióxi yóho: “Taa johó ndó, na Israel. Ín in túhún jini Ndióxi ta mé á cúú xitoho í. <sup>30</sup> Ta ndítahan quihvi ini ndó mé Ndióxi, xitoho ndó xihín tóco ndihi ínimā ndo ta xihín ndinuhu ini ndó. Ta quihvi ini ndó a xihín tóco ndihi xini túni ndo ta xihín tóco ndihi ndée ndo.” Ña yóho cúú ña nu cuítí sáhná Ndióxi caja ndó. <sup>31</sup> Tá cúni coo ña nu cuítí já cúni coo ri ña chí ivi va ta cáchi a: “Quihvi ini ndó ñani táhan ndó tá quiahva quihvi ini ndó mé ndó.” Coó ga inga ña sáhná Ndióxi caja ndó cacuu ña cáhnú chága nuú ña yóho — nācachi a.

<sup>32</sup> Anda já nācachi mé da jánaha ley Moisés cán xihín Jesús:

—Vaha chá nācahan ndó, Maestro. Mé a ndaa quéa nācahan ndo ña íin in táláa cuítí Ndióxi ta coó inga ga Ndióxi. <sup>33</sup> Ta ndítahan quihvi ini mé á xihín tóco ndihi ínimā yō ta xihín ndinuhu ini ta xihín tóco ndihi xini túni yō ta xihín tóco ndihi ndée yō. Ta ndítahan quihvi ini ñani táhan í tá quiahva quihvi ini mí. Ndíyahvi chága ña yóho a juú ga tóco ndihi ñaha jóco na nu Ndióxi ta ndíyahvi chága ña a juú ga ñaha chícaan ñuhu ná nu náa — nācachi da.

<sup>34</sup> Tá naxini Jesús ña nanducú ñehe vaha da cán tuhun nu á já cáchi a já xihín dá:

—Jalóho cúni ña cacomí Ndióxi cuéntá sahn — nācachi Jesús.

Tá nandihí cán ni in ga na coó nācahan ndeé ini na ndaca tuhún ga na mé á.

*Ndaca tuhún na Jesús ndáchí naquixi a*  
(Mt. 22:41-46; Lc. 20:41-44)

<sup>35</sup> Ndacaan Jesús veñuhu cáhnú jánaha nuú ñayivi já cáchi a já xihín ná:

—Ndávaha cáchi na jánaha ley Moisés ña vaxi Cristo chichi David. <sup>36</sup> Ta sa mé David tá nāchutú ndaa ini da xihín ínimā yji Ndióxi já nācachi da já:

Já nācachi Ndióxi xihín xitoho í:

“Cacoo xoo cuáha i yóho, anda quiahva ná caja i ña ná cacomún cuéntá sahá na cō cúni yohó”, nācachi Ndióxi sanahá.

<sup>37</sup> Ndávaha cáchi na ña vaxi Cristo chichi David joo mé tiempo cán nācachi David ña cúú á xitoho da — nācachi Jesús.

Ta cuaha ndivaha ñayivi cájii íni na taa johó na nu cáhan Jesús.

*Chícaan Jesús cuachi jatá na jánaha ley Moisés*

(Mt. 23:1-36; Lc. 11:37-54; 20:45-47)

<sup>38</sup> Tá jánaha Jesús na já cáchi a já xihín ná:

—Cuéntá coo ndó xihín na jánaha ley Moisés jáchi cátóo na cándixi na jáhma nani caca nuu na. Ta cátóo na cahan toni ñuhú ndivaha ñayivi xihín ná tá xica nuu na nuú yahvi. <sup>39</sup> Ta tá cuahan na veñuhu cátóo na cacoo na nu sácoo na íin chága saha. Ta tá cuahan na víco nuú vaha cátóo na coo na. Cuéntá coo ndó xihín na yóho. <sup>40</sup> Jáchi cándaa na vehe najihí cuaan ta tá nandihí cuhá ndivaha xica tahvi na nu Ndióxi jáchi cúni na jájahvi na nuú ña núu cája na. Mé a ndaa ná cahan i xihín ndo ña mé na jánaha ley Moisés yóho cacuu na na ndoho chága ini caja Ndióxi — cáchi Jesús.

*Ña najoco in ña cuaan ndáhví*  
(Lc. 21:1-4)

<sup>41</sup> In tañu íin coo Jesús ini veñuhu cáhnú cán yati nu íin satō nu táan na jjuhún jóco na nu Ndióxi. Ta sándehe a ndá quiahva táan ñayivi jjuhún ini mé satō cán. Ta naxini a cuhá taa cuicá xinu coo táan cuhá na jjuhún ini mé satō cán. <sup>42</sup> Ta mé já naxinu coo in ña cuaan ndáhví ta nataán ña ivi jjuhún ña núu yahvi ini mé satō cán. <sup>43</sup> Já nācana Jesús na xica tuun xihín á ta já cáchi a já xihín ná:

—Mé a ndaa ná cahan i xihin ndo ña cuaha chága jiuñun nasahan ña cuaan ndáhví yóho a juú ga tóco ndihi java ga na cán. <sup>44</sup> Jáchí tóco ndihi na cán nasahan na ña yójo nu ná joo ña cuaan ndáhví yóho nasahan ña nu Ndióxi tóco ndihi ña cómi ña catacu ña —ñacachi a xihin ná.

## 13

*Cáxi tuhun Jesús nu ná ña vaxi quivi ndihi sahá veñuhu cáhnu ñuu Jerusalén*

*(Mt. 24:1-2; Lc. 21:5-6)*

<sup>1</sup> Tá ñaquee Jesús veñuhu cáhnu cán já ñacachi in da xica tuun xihín a cán já:

—Maestro, candehe ndó ndaja náhnu yuu ñacavaña na veñuhu yóho ta ndaja jícó ndivaña ñacavaña na ña —ñacachi da.

<sup>2</sup> Anda já ñacachi Jesús já xihin dá:

—Mé a ndaa náhnu a joo ndá chuun cúu á jáchí ni janda in yuu yóho a cándo jatá inga yuu jáchí vaxi quivi tá nditaní ndihi ña yóho —ñacachi a.

*Ndicani Jesús ña coo tá ná cayati quivi ndihi sahá ñuyiví*

*(Mt. 24:3-28; Lc. 21:7-24; 17:22-24)*

<sup>3</sup> Anda já nasahan na cán yucu yito Olivo, ña xito ndaa táhan xihín veñuhu cáhnu cán. Ta tá ín coo Jesús cán já ñaxinu Pedro xihin Jacobo xihin Juan xihin Andrés já ñacahan jehé na xihin á já cáchí na já:

<sup>4</sup> —Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá sa ñacayati mé quivi cán —ñacachi na.

<sup>5</sup> Já ñacachi Jesús já xihin ná:

—Cuénta coo ndó ta a quiahva ndó ñamaní jándahvi ni in ñayivi ndohó. <sup>6</sup> Jáchí cuahá ndivaña na quixi na cuénta mí i ta cahan na ña tuhún tá cachi na já xihin ndó: “Yehe cúu Cristo, da ñachindahá Ndióxi cacomí cuénta sahá ñayivi.” Ta xihín ña yóho cuahá ndivaña ñayivi jándahvi na.

<sup>7</sup> Joo tá ñacasahá xini joho ndó ña yóho cáa cúu tondóho, a cáyihví toho ndó jáchí quiahva já ndítahan coo. Joo cámaní yíi xinu coo quivi nu ndíhí. <sup>8</sup> Jáchí ñayivi ndúu in nación ndicuíta na caní táhan na xihín na ndúu inga nación ta caní táhan na in ñuu xihín na inga ñuu. Ta quixi nditáan ndijáá nu ndúu ñayivi já xinu tama ndeé

ta já casahá na ndivaña na. Ta tóco ndihi ña yóho cúu á tá cava sahá sahá ña núu vaxi nuú ñayivi jáchí cámaní xinu coo chága nuú ndoho ini na.

<sup>9</sup> Joo candaa vaha ndó mé ndó jáchí ndiquiahva na ndohó ndahá na cómi chuun ta caní na ndohó ini veñuhu. Ta sahá yehe cañehe na ndohó nuú na cómi cuénta sahá ñayivi xihín nuú na cúu jutixia ta já cuu cahan ndó sahá i nuú na cán. <sup>10</sup> Joo jihna ñúhú xini ñúhú ndicuíta nuu tuhun vaha saha mí i nu tóco ndihi ñayivi anda jáví ndihi saha ñuyiví yóho. <sup>11</sup> Ta tá ná cañehe na ndohó cuhun ndó nuú na jutixia, a ndicani ini ndó sahá ndá tuhun cahan ndó xihin ná. Mé hora já cahan ndó ña quiahva Ndióxi nu ndó cahan ndo. Jáchí a juú jini mé ndó quixi ña cahan ndo. Ínima yíi Ndióxi cacuu ña quiahva tóco ndihi ña cahan ndo. <sup>12</sup> Ta java ta jicó tuhún da ñani da ta java da jicó tuhún da jahyi da ña ná cahní ñahá na. Ta cuaha ná ndicuíta na caní táhan na xihin tátá na ta cahní ñahá na. <sup>13</sup> Ta ndaja táhan ñayivi ndúu ñuyiví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na jan cacuu na cacu ndaa ínima.

<sup>14</sup> Na cáhvi tutu ná candaa ini na ña cahan. Daniel cúu da ñacahyí sanahá sahá in ña quini ña jativí ñahá. Tá ná cuni ndó ña cándichi in a nuú co ndítahan coo a já ndítahan nuú na ndúu estado Judea cunu na cuhun na chí yucu. <sup>15</sup> Ta ndá na cánúu jini vehe mé quivi já co ndítahan nuu na tavá na ñaha vehe na. <sup>16</sup> Ta ndá na ndúu yucu co ndítahan ndicó coo na vehe na ndiquehe na jáhma ná. <sup>17</sup> Ndáhví najihí, mé na ñúhu jahyi mé quivi já. Ta ndáhví na ñehe ndaa na valí táhan ña chíhí yíi. <sup>18</sup> Caça tahví ndo nu Ndióxi ña ná a cacuu a tiempo vixi tá ná cunu ndó cuhun ndo já ná a ndóho chága ini ndó. <sup>19</sup> Jáchí quivi ndoho ndivaña ini ndó cacuu a cán. Jáchí janda tá ñacava sahá saha ñuyiví coo nandoho ini na tá quiahva ndoho ini na mé quivi jan. Ta tá ná yaha ña jan, a ndicó coo ga ña ndoho ini na quiahva já. <sup>20</sup> Ta tá ná a ndája cuítí Ndióxi tiempo yóho ni in ñayivi a cúu cacu ndaa. Joo nasacu ini a ndaja cuítí a mé

tiempo yóho jáchi quíhvi ini a tóco ndihi na naçaxi mé á.

<sup>21</sup> 'Ta tá ná cachi in na xihin ndó: "Candehé ndo, yóho íin Cristo, da nachindahá Ndióxi cacomí cuéntá sahá ñayivi", á tá ná cachi na: "Candehé ndo, cáa íin da", cachi na já queá a cándúsa toho ndó na. <sup>22</sup> Jáchi quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúú ná. Ta quixi cuahá ná ta cachi na cahan na cuéntá Ndióxi ta jári caja na cuahá nuú ña náhnu xihín ña xituhún ña ná jándahvi na ñayivi. Ta anda na sa naçaxi Ndióxi jándahvi na tá ná cuu caja na ña. <sup>23</sup> Xíni ñúhú candehé vaha ndó mé ndó jáchi sa naçaxi tuhun yachí ndihi i ña yóho xihin ndo —naçachi Jesús.

*Ndaja coo tá ná xinu coo quivi quixi tucu Jesús*

(Mt. 24:29-35,42,44; Lc. 21:25-36)

<sup>24</sup> Já cáchi tucu Jesús já:

—Joo tá sa nayaha tóco ndihi ña nandoho ini ñayivi já canaá nuú candii ta a ndíyehé ga yoo. <sup>25</sup> Anda indivi quee quimi cuyu rí nu ñúhu ta quiji nuu indivi ña naçavaha Ndióxi. <sup>26</sup> Anda já cuni na yehe quixi i tañu vico xihin tóco ndihi ndée cáhnu i, da nachindahá Ndióxi nduu ñayivi. Ta cuni na ndá quiahva cáhnu cúú yehe. <sup>27</sup> Ta tá nandihí já chindahá i táto mí i ña ná jánditaca na na sa naçaxi i tañu tóco ndihi ñuu janda nú cúú sahá ñuyíví ta janda nú cúú sahá indivi.

<sup>28</sup> 'Catiahva ndó ña cúni cachi mé quiahva sácú u nu ndó sahá titó ñúhú. Tá yúta ndáha dó cán ta vaxi núma válí do já candaa ini ndó ña vaxi tiempo ihní. <sup>29</sup> Ta quiahva já cacuu ña yóho tá ná cuni ndó yaha tóco ndihi ña yóho. Jáchi anda jáví candaa ini ndó ña naçayati tiempo quixi tucu yehe ñuyíví yóho. <sup>30</sup> Mé a ndaa ná cahan i xihin ndó ña yaha tá yaha tóco ndihi ña naçachi i xihin ndo ta anda jáví quivi na ndúu tiempo viti. <sup>31</sup> Ta ndihi sahá indivi xihin ñuyíví joo a ndíhi toho sahá tuhun naçahan i xihin ndó yóho. Jáchi coo tá coo va ña.

<sup>32</sup> 'Joo ni in túhún toho ñayivi co xini na ndá quivi á ndá hora yaha ña yóho. Ta ni mé táto Ndióxi ndúu indivi co xini na ndá

quivi coo ña yóho. Ta ni yehe, da cúú in túhún jini já jahyi Ndióxi co xini ndá quivi coo ña yóho. In túhún Ndióxi, tátá yo queá xini a.

<sup>33</sup> 'Sahá ña cán queá cañuhu ini ndó sahá ña yóho. Coo tiahva ndó ta caça tahví ndo nu Ndióxi jáchi co xini ndó ndá quivi xinu coo ña yóho. <sup>34</sup> Jáchi ña yóho cúú á tátuhun in dataa quéta cuahan xicá joo tá cámaní quee da cuhun da jándacoo tóo da vehe da nu mozo da ña ná candaa na ña. Ta sahan da chuun caja in in mozo da. Ta nuú da ndáá yehé nasahnda da chuun ña ná candaa vaha da ña. <sup>35</sup> Sahá ña cán queá xini ñúhú coo tiahva ndó jáchi co xini ndo ndá quivi xinu coo mé da cúú xitoho vehe. Co xini ndo á cacuu a tá naçuaá tóo á cacuu a java ñuu táji á cacuu a tá naçana chéle á cacuu a tá sa nativi. <sup>36</sup> Cuéntá coo ndó. A juú tiahva náá xinu coo da ta ndínehe dá ndohó ndúu ndó quiji ndo. <sup>37</sup> Ña cahan i xihin ndó cahan i xihin ndihi na: Xíni ñúhú coo tiahva ndó sahá mé quivi quixi tucu u —naçachi Jesús.

## 14

*Ndítuhún jehé na tiin na Jesús*

(Mt. 26:1-5; Lc. 22:1-2; Jn. 11:45-53)

<sup>1</sup> Tá cámaní ivi quivi caja na vico pascua xihin vico tá xixi na pan ña co quee yusá naçaa xihin já naçasahá na saçuahá nuú jutú xihín na jánahá ley Moisés ndúcú na ndá quiahva caja na tiin jehé na Jesús já cuu cahní na a. <sup>2</sup> Ta já cáchi xihin táhan na: —A tiin toho í da mé vico jáchi tiahva náá ndivaa ñayivi —naçachi na.

*Tá nachojo in ñáñáha perfume jini Jesús*

(Mt. 26:6-13; Jn. 12:1-8)

<sup>3</sup> Ta ndaja coo íin Jesús ñuu Betania vehe Simón, da cahan na xihin: taa nandoho cuehe táhyi. Ta naní ndúu coo na nu mesa cán naçinu in ñáñáha ta ñehe ña in yúyú alabastro nachutú jini a xihin perfume, dó támi ndivaha sahan ta cúú dó perfume yahvi ndivaha. Ta natahví ña yóho mé yúyú cán já nachojó ña do jini Jesús. <sup>4</sup> Ta java na ndúu cán naçasahá na jáa ná xihin ña já naçasahá cáchi xihin táhan na já:

—Ndavaha nativi uun perfume yóho. <sup>5</sup> Coo jicó yó do, nduu ta yaha ga nuú

uni ciento denario quehé saha dó ta xihín jiuhún cán cuu chindeé yó nā ndahví, nduu —cáchi nā.

Sahá ña cán queá naxojo ini na xihín ñáñáha cán ta naxahan núu na saha ña.

<sup>6</sup> Anda já naxachi Jesús já xihín ná:

—A cahan ndó xihín ña. A jáquihvi ndó ña. Ña vaha queá naxaja ñá yóho xihín i.

<sup>7</sup> Jáchi nā ndahví níí tiempo canduu na tañu ndó ta cuu caja ndó ña vaha xihín ná ndá tañu cúni mé va ndó joo yehe a cóo tuun toho i xihín ndo. <sup>8</sup> Mé ñá yóho naxaja ñá janda nuú naxinu ndée ñá caja ñá xihín i. Sa najándicuchu yachi va ñá yóho yiquí cuñu i xihín perfume, dó támi sahan jan ña ná coo tiahva vi tá ná casa quivi nduxu.

<sup>9</sup> Mé a ndaa ná cahan i xihín ndo ní cúu ñuyiví nuú caca nuu ñayivi cahan na tuhun vaha saha mí i já queá ndicani na ña naxaja ñá yóho xihín i já ndicuhun ini na saha ña —naxachi a.

### *Jícó túhún Judas Jesús*

(Mt. 26:14-16; Lc. 22:3-6)

<sup>10</sup> Ta ndaja coo in táhan da uxu ivi xica tuun xihín Jesús, da naní Judas Iscariote nasahan da cahan da xihín na sacuaña nuú jutú. Já nasahan da tuhun da nuú nā cán ña ndiquiahva da Jesús ndáha ná. <sup>11</sup> Tá naxini johó nā cán ña naxachi da xihín ná naxavatá nā ta nasahan na tuhun na nu mé Judas ña quiahva na jiuhún nu dá. Ta sa mé nani já naxasáhá Judas ndúcú da ndaja cuu caja da ndiquiahva da Jesús nu ná.

*Tá naxijini ndayí Jesús xihín na xica tuun xihín á*

(Mt. 26:17-29; Lc. 22:7-23; Jn. 13:21-30; 1 Co 11:23-26)

<sup>12</sup> Mé quivi nuú víco pascua tá xíxi na pan ña co queé yusá naxaa xihín já sáhní nā ndicachi válí jóco nā nu Ndióxi. Já nandaca tuhún nā xica tuun xihín Jesús mé á já cáchi nā já xihín á:

—Ndáchi cúni ndó cuhun nde caja ndíví nde cajini ndó víco pascua —naxachi na.

<sup>13</sup> Anda já naxindahá Jesús ivi da xica tuun xihín á já cáchi a já xihín dá:

—Cuáhán ndó ñuu jan jáchi jan ndiñehe ndó in dataa ñehe da in yoo ticuú ta candico ndó da cuhun ndo. <sup>14</sup> Tá ná xinu da vehe nuú ndihvi da já cachi ndó xihín da

cúu xitoho vehe cán já: “Da jánaha ndehe cáchi xuhun: Ndáchi in nuú coo i cajini i vicó pascua xihín nā xica tuun xihín i.”

<sup>15</sup> Anda já jánaha mé da cán in cuarto cáhnu ña cánúu jini véhe piso ninu. Sa in tiahva va ña. Cán caja ndíví ndo ña cajini —naxachi Jesús xihín ná.

<sup>16</sup> Já naquee mé nā xica tuun xihín Jesús cán cuahan nā ta tá naxinu nā ñuu cán nasahin tá in cáchi Jesús xihín ná. Já naxaja ndíví nā ña cajini na vicó pascua mé cán.

<sup>17</sup> Tá naxuaá naxinu Jesús xihín ndihuxu ivi nā xica tuun xihín á. <sup>18</sup> Ta tá ndúu coo na nu mesa xíxi nā já naxachi Jesús já xihín ná:

—Mé a ndaa ná cahan i xihín ndo ña in táhan ndó, da ndúu coo xíxi xihín i nu mesa yóho cacuu da jicó túhún yehe —naxachi a.

<sup>19</sup> Anda já naxasáhá nā cán cácuéha ini na já naxasáhá tá in tá in na ndaca tuhún nā mé á já cáchi nā já xihín á:

—Á yehe cacuu da jicó túhún mé ndó.

Já naxachi inga tucu da já:

—Á a juú yehe cacuu da.

<sup>20</sup> Anda já naxachi Jesús já:

—In táhan ndó da cúu uxu ivi, da in ndúu xíxi xihín i ini cohó i, da cán cúu da jicó túhún yehe. <sup>21</sup> Yehe cúu da naxindahá Ndióxi nduu ñayivi ta ndítahan nuú i quivi i tá in cáchi tuhun Ndióxi. Joo ndáhví nahá naxuu da jicó túhún yehe. Janda vaha chága ná a cácu da, nduu —naxachi a.

<sup>22</sup> Nani xíxi na ndúu na natiin Jesús pan já nandiquiahva ndixahvi nu Ndióxi. Tá nandihi nasahnda java ña ta nasahan ña nu ná já cáchi a já xihín ná:

—Juhun ndó jáchi ña yóho cúu tátuhun yiquí cuñu i —naxachi a.

<sup>23</sup> Tá nandihi natiin a in vaso nu ñúhu tó uva já nandiquiahva ndixahvi nu Ndióxi. Ta nasahan mé á do nuú nā cán ta tá in tá in na naxihi na do. <sup>24</sup> Já naxachi a já xihín ná:

—Dó yóho cúu dó tátuhun níi i, dó cuíta sahá cuhá ñayivi. Tá ná cuíta níi i já candaa ini ndó ña najaxinu coo Ndióxi tuhun a nasahan sanahá. <sup>25</sup> Mé a ndaa ná cahan i xihín ndo ña a cóho ga i tó uva janda quiahva ná xinu coo quivi coho tucu u

inga dó vaha chága tá ná xinu quivi cacomí Ndióxi cuénta sahá ñayivi —ñacachi a.

*Cáxi tuhun Jesús ña chijehé tuhun Pedro ña xini da mé á*

(Mt. 26:30-35; Lc. 22:31-34; Jn. 13:36-38)

<sup>26</sup> Tá nandihí naxita na in canto já ñaquee na cuahan na yucu yitó Olivo.

<sup>27</sup> Anda já ñacachi Jesús já xihin ná:

—Tóco ndihí ndó jándacoo ndó yehe ñuú viti jáchi já cáchi tuhun Ndióxi já: “Cahní i da ndáá ndicachi ta xihin ña yóho ndicuita nuu ndicachi jana dá cuhun ri”, cáchi tuhun Ndióxi. <sup>28</sup> Joo tá nandihí nditacu tucu u ta já cuhun jihna ñuhú yehe estado Galilea anda já cuhun mé ndó —ñacachi a.

<sup>29</sup> Anda já ñacachi Pedro já xihin Jesús:

—Vatí ná jándacoo ndihí na mé ndó joo a jándacoo toho i ndohó —ñacachi da.

<sup>30</sup> Anda já ñacachi Jesús já xihin dá:

—Mé a ndaa ná cahan i xuhun mé ñuú viti tá camaní cana ivi chéle já chijehé tuhun ña xínun yehe uní tañu —ñacachi a.

<sup>31</sup> Já ñacasáhá ndúcú ndéé Pedro cáhan da já cáchi da já:

—Vatí ná quivi i xihin ndo joo a chíjehé tuhun toho i sahá ña xíní i mé ndó —ñacachi da.

Ta mé quiahva já ñacachi ndihí na cán xihin á.

*Tá xica tahví Jesús tañu yitó olivo nani a Getsemaní*

(Mt. 26:36-46; Lc. 22:39-46)

<sup>32</sup> Anda já ñaxinu na cán in nuú nani Getsemaní já ñacachi Jesús já xihin na xica tuun xihin á:

—Yóho cacoo ndó nani ná cuhun i cáa caa tahví i nu Ndióxi —ñacachi a.

<sup>33</sup> Ta ndáca Pedro xihin Jacobo xihin Juan cuahan xihin á. Ta ndaja coo ñacasáhá cácuéha ini a ta a juú quiahva táhvi ini a. <sup>34</sup> Já ñacachi a já xihin ná:

—Cácuéha ndivaha ini i chí quivi i cúu ini i. Yóho candoo too ndó ta coto a cúju ndo —ñacachi a.

<sup>35</sup> Anda já ñaquee Jesús cuahan chága chí nuu já ñacaxítí a janda quiahva ñaxinu coo nuu á nu ñuhu cán. Já ñaxica tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuu. <sup>36</sup> Já cáchi a já xica tahví a nu Ndióxi:

—Tátá Ndióxi, tóco ndihí ñaha cuu caja ndó. Chindeé ndó yehe ná a ndóho i ña ihvi ndivaha ña vaxi nuu i ndoho i. Joo ná coo tá in cuni mé ndó ta ná a cóo toho ña cuni yehe —ñacachi a.

<sup>37</sup> Anda já nandicó coo a nu ndúu na xica tuun xihin á cán ta já nandiñehe á na quiji na ndúu na. Já ñacasáhá cáchi a já xihin Pedro:

—Á quiji vún, Simón. Á cóo ñacuu candidún ni in hora. <sup>38</sup> Xíní ñuhú coo tiahva ndó ta caa tahví ndo nu Ndióxi já ná a cóto ndojó rí quini ndohó. Mé a ndaa ínima ñayivi cuni a ndinducú a Ndióxi joo yiquí cuñu na co in tiahva caja ña cuni Ndióxi —ñacachi a.

<sup>39</sup> Anda já ñaquee tucu a cuahan caa tahví a nu Ndióxi. Ta sa mé tuhun ñacahan nu cuítí cán ñacahan tucu a chí ivi. <sup>40</sup> Ta tá nandicó coo a nandiñehe tucu a na xica tuun xihin á cán ndúu na quiji na jáchi ñaquehe a mahnú na. Ta chí co xini na ndá tuhun nducú ñehe na nu Jesús sahá ña quiji na. <sup>41</sup> Tá nandicó coo a táhndá uní já ñacachi a já xihin ná:

—Vatí cuni ndó cuju ndo ta vatí cuni ndó ndiquehe ndéé ndo joo a cúu caja ndó ña viti. Jáchi sa ñaxinu coo hora ndiquiahva na yehe, da ñachindahá Ndióxi nduu ñayivi ndahá ñayivi cája cuachi. <sup>42</sup> Cuáhán ndacoo ndó ná coho. Jáchi sa vaxi da jícó túhún yehe —ñacachi a.

*Tá natin na Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Ta nani cáhan yij va Jesús cándichi a já ñaxinu Judas, da cúu in táhan da uxu ivi xica tuun xihin Jesús cán. Ta xihin mé da cán vaxi cuahá ñayivi ñehe na machiti xihin yitó viti. Mé na vaxi cán cúu ná na vaxi cuénta na sacuahá nuú jutú xihin nuú na jánaha ley Moisés xihin nuú na sacuahá veñuhu. <sup>44</sup> Ta mé Judas, da ndiquiahva mé á nuú na cán sa ñacandoo da xihin na cán ña tatí yuhu dá sajóho Jesús jáchi ñacachi da já xihin ná:

—Mé da ná tatí yuhú u sajóho, da cán cúu dá tiin ndó ta cató tuun ndó da cañehe ndó cuhun ndo —ñacachi da.

<sup>45</sup> Ta tá ñaxinu da cán chí ivi laá ñacayati da nu Jesús já cáchi da já xihin á:

—Maestro, maestro.

Já natatí yúhu dá sajóho a. <sup>46</sup> Anda já natiin tuun na Jesús.

<sup>47</sup> Joo in táhan da xíca tuun xihín Jesús cán natavá da machiti da já nachitúhun dá in johó da cúu mozo da sacuaḥa nuú jutú cán.

<sup>48</sup> Anda já nacachi Jesús já xihín na naxinu tiin ñahá cán:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihín machiti ta xihín yító.

<sup>49</sup> Ndijáá ní quivi nasahin i tañu ndó jan ta najánaḥa i ndohó ini veñuhu cáhnu ta ni in tañu coó natiin ndó yehe. Joo tóco ndihi ña yáha yóho xíní ñúhú yaha ña já ná xinú coo nuú ña nacahyi sahá i ini tuhun Ndióxi —nacachi a.

<sup>50</sup> Anda já naxinu ndihi na xíca tuun xihín Jesús cán cuahan na ta najándacoo na mé á.

### *Tá naxinu in datacú cuahan da*

<sup>51</sup> Joo in datacú cátivi da in túhún jiní sávana ndíco da jatá na cán cuahan da ta natiin na da. <sup>52</sup> Joo najaní da mé dá ta nacandoo sávana da já naxinu lahla da cuahan da.

### *Nasacu na Jesús nuú nataca ndihi na sacuaḥa*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Anda já nasañehe na Jesús nasahan na nuú da cúu sacuaḥa chága nu ndíhi jutú. Ta nandique táhan tóco ndihi na sacuaḥa nuú jutú xihín na sacuaḥa veñuhu xihín na jánaḥa ley Moisés. <sup>54</sup> Ta nasandico xíca Pedro Jesús anda quiahva naxinu da yéhe vehe da cúu sacuaḥa chága nu ndíhi jutú cán. Já nasacoo da xihín da ndáá veñuhu cáhnu cán xitúní da yati yávi núhu cán.

<sup>55</sup> Ta na sacuaḥa nuú jutú xihín tóco ndihi na cómi cuéntá sahá na Israel nataca na cán ndúcú na cuachi jácana na jatá Jesús já cuu cahní ñahá na. Joo coó cuachi jíquí ná ñehe ná chínúu na jatá mé á. <sup>56</sup> Ta cuaha ná nacasáhá cáhan na ña tuhún saha Jesús joo coo xínu tuhun cáhan na jáchi a cuú ndique táhan vaha tuhun na. <sup>57</sup> Ta nandaca ndichi java da cáhan da tuhun jíquí saha Jesús já cáchí da já:

<sup>58</sup> —Naxini johó nde nacachi da jan já: “Jánditani i veñuhu cáhnu cán, ña nacavaḥa ñayivi ta tixi uní quivi jácandichi tucu u inga ga ña a cuú cavaḥa ndahá taa” —nacachi da.

<sup>59</sup> Joo ni já coó nacuu ndique táhan tuhun na xihín ña nacachi na cán.

<sup>60</sup> Anda já nandaca ndichi mé da cúu sacuaḥa chága nu ndíhi jutú tañu na cán já nandaca tuhún da Jesús já cáchí da já xihín á:

—Á chí a ndúcú ñehún tuhun nuú nde sahá cuachi jácojo na jatun —nacachi da.

<sup>61</sup> Joo coó nacahan Jesús ni in tuhun xihín ná já táji ní já va nasahin a. Mé da cúu sacuaḥa chága nu ndíhi jutú cán nacasáhá ndáca tuhún tucu da a já cáchí da já xihín á:

—Á jivi ndusa yóho cúun Cristo, da cúu in túhún jiní já jahyi Ndióxi yii, mé da nachindahá Ndióxi cacomí cuéntá sahá ñayivi —nacachi da.

<sup>62</sup> Anda já nacachi Jesús já:

—Ajan, jivi yehe cúu dá. Ta vaxi quivi tá cuni ndó yehe, da nachindahá Ndióxi nduu ñayivi cacoo i xoo cuáha Ndióxi, mé a in cuaha ndée. Ta já cuni ndó yehe ndicó coo i ñuyivi yóho tañu vico tá ná quixi i chí indivi —nacachi a.

<sup>63</sup> Anda já nandatá da cúu sacuaḥa chága nu ndíhi jutú jáhma da ña ná candaḥa ini ñayivi ña xójo ini da. Já cáchí da já:

—Ndá chicuu chága yó ñayivi ndicani nu yo. Xihín ña nacahan da yóho candaḥa iní ña ndája núu da Ndióxi. <sup>64</sup> Á sa naxini johó ndó ña ndája núu da Ndióxi xihín tuhun nacahan da. Ndaja xíní ndó caja í xihín dá viti —nacachi da.

Anda já nandique táhan tuhun ndihi ñayivi ña ndácaan cuachi nu Jesús ña cán quea ndítahan quivi a.

<sup>65</sup> Java na nacasáhá na xihnu ndaa na tójí nu á ta java na nachicaji na jáhma nu á já nacasáhá cáni na jahndá nuu á já ndáca tuhún ñahá na já cáchí na já xihín á:

—Cahan xihín nde yo nacani yohó viti —nacachi na.

Ta janda na ndáá veñuhu cáhnu cán viti nacasáhá cáni na jahndá nuu á.

*Tá naxijehé tuhun Pedro ña xini da Jesús (Mt. 26:69-75; Lc. 22:56-62; Jn. 18:15-18, 25-29)*

<sup>66</sup> Ta ndaja coo Pedro íin yijí dá xítúni da cán já naxinu in ñá cája chúun xihín da cúu sacuahá chága nu ndíhi jutú. <sup>67</sup> Já naxini ñá xítúni Pedro ta nahá vaha nasandehé ñá nu dá já cáchí ña já:

—Yóhó cúun táhan da xica tuun xihín Jesús, da ñuu Nazaret —naxachi ñá.

<sup>68</sup> Joo naxijehé tuhun da ña xini da Jesús já cáchí da já:

—Uhun. Co xini toho i da ta co xini toho yehé ndá saha cáhun —cáchí Pedro.

Anda já naxayati da yuyehé ta ivi laa naxana chéle. <sup>69</sup> Tá naxini mé ñá cája chúun xihín da cúu sacuahá chága nu ndíhi jutú cán ña nasandichi too da yehé cán já naxasáhá ña cáxi tuhun ña xihín tóco ndíhi ñayivi ndúu cán já cáchí ña já:

—Candehé ndó. Da caa cúu in táhan da xica tuun xihín Jesús —naxachi ñá.

<sup>70</sup> Naxachi tucu Pedro ña co xini da Jesús. Chá va nayaha ña yóho ta já naxachi na ndúu xítúni cán xihín Pedro:

—Táhan ri da caa va cúu yóhó jáchi cúun da Galilea ta cáhun tátuhun cáhan na cán —naxachi na.

<sup>71</sup> Anda já naxasáhá Pedro canahá da ta natavá da quivi Ndióxi ña co xini da Jesús já naxachi da já:

—Ni co xini mí i ndá taa cúu da jan, da cáhan ndó saha jan —naxachi da.

<sup>72</sup> Tá naxachi da já ivi laa naxana chéle ña chí ivi. Anda já nandicuhun ini Pedro ña naxachi Jesús xihín dá tá naxachi a já: “Tá camaní cana ivi chéle sa chíjehé tuhún ña xínún yehé uní tañu.” Tá nandicuhun ini Pedro ña yóho já naxasáhá sácu ndivaha da.

## 15

*Tá nandiquiahva na Jesús ndáha Pilato (Mt. 27:1-2, 11-14; Lc. 23:1-5; Jn. 18:28-38)*

<sup>1</sup> Tá nativi inga quivi itaan já nandique táhan na sacuahá nuú jutú xihín na sacuahá veñuhu xihín na jánahá ley Moisés xihín ndíhi na cómi cuéntá saha na Israel. Já naxató na Jesús ñehe na a cuahan na já nandiquiahva na mé á nu Pilato. <sup>2</sup> Ta mé

Pilato nandaca tuhún da Jesús já cáchí da já xihín á:

—Á mé a ndaa cúun in rey, da cómi cuéntá saha na Israel.

—Ajan. Jivi cúu u tá quiahva cáchí ndo jan —naxachi Jesús xihín dá.

<sup>3</sup> Ta najácojo na sacuahá nuú jutú cán cuahá cuachi jata Jesús. <sup>4</sup> Já nandaca tuhún tucu Pilato Jesús já naxachi da já xihín á:

—Ndavaha co ndúcu ñehún tuhun nuú i. Candehé ndaja cuahá nuú cuachi jácojo na jatun —naxachi da.

<sup>5</sup> Joo ni in tuhun coo naxahan Jesús. Tá naxini Pilato ña co ndúcu ñehe Jesús tuhun já naxatontó da saha ña cája.

*Sácu ini na saha Jesús ndaja caja na ña ná quivi a*

*(Mt. 27:15-31; Lc. 23:13-25; Jn. 18:38-19:16)*

<sup>6</sup> Tañu mé víco pascua nasahin costumbre Pilato ña janí da in da ndacaan vecaa. Ndá da cuni ñayivi janí da, da cán cúu da janí da. <sup>7</sup> Ta ndaja coo mé já ndacaan in da naní Barrabás vecaa xihín java ga da naxica xihín dá. Ndacaan da vecaa saha ña nasahní da ndii tá nandivaa ñayivi. <sup>8</sup> Chí naxinu ñayivi nu Pilato já naxasáhá na cáhan na xihín dá ña ná caja da tá quiahva sá caja da. <sup>9</sup> Joo nandaca tuhún Pilato na já cáchí da já:

—Á co cuni ndó ña ná janí i da cúu rey nuú ñayivi Israel yóho —naxachi da.

<sup>10</sup> Naxachi Pilato ña yóho jáchi xini da ña nandiquiahva na sacuahá nuú jutú cán Jesús nu da saha ña cáhiví ini na xihín á.

<sup>11</sup> Joo na sacuahá nuú jutú cán naxasáhá na jándinihi na ñayivi ña ná cachi na xihín Pilato ña ná janí da Barrabás. <sup>12</sup> Tá nandíhi já nandaca tuhún Pilato na já naxachi da já xihín ná:

—Ndía cuni ndó caja i xihín da cáchí ndó cúu rey nu ndóhó, na Israel —naxachi da.

<sup>13</sup> Anda já nanducú ñehe ñayivi cán tuhun nu Pilato já cáchí na já xihín dá:

—Cata caa ndó da ndica crúxu.

<sup>14</sup> Já naxachi Pilato já xihín ná:

—Ndá cuachi naxaja da, vaha.

Joo ví ga ví cáyuhú cóhó na já cáchí na já:

—Cata caa ndó da ndica crúxu.



15 Ta sahá ña cuni Pilato candoo vaha da nuú ñayivi najani da Barrabás. Ta tá nandihí najacaxáhan na Jesús já nandiquiahva da a ndáha na cuhun cata caa ñahá na ndica crúxu.

16 Anda já ñéhe soldado Jesús cuahan na yuyéhe vechúun cán. Já najánditaca soldado cán java ga táhan da. 17 Já nachinúu na in jahma cuáhá túun jatá Jesús ta nachinúu na in tiyivi ñu jini á. 18 Tá nandihí já nacasáhá na cáyuhú na já cáhí na já:

—Cáhnú nahá ná cacuu yóhó, da cúu rey nuú na Israel —cáhí na sácu ndaa ñahá na.

19 Tá nandihí nacasáhá cáni na yiquí jini a xihín in ndoo ta nacasáhá na xihnu ndaa na tójií na nuú á já nacasáhá na cáxítí na nuú á ña cája na tátuhun cája cáhnú na a. 20 Tá nandihí nasacu ndaa na a já natavá na jáhma cuáhá túun ña nasanúu jatá. Ta najándaca ndixi na a xihín jáhma mé á já nasañehe na a cuahan na cata caa na a ndica crúxu.

#### *Tá nacata caa na Jesús ndica crúxu*

(Mt. 27:32-44; Lc. 23:26-43; Jn. 19:17-27)

21 Tá ñéhe na Jesús cuahan na cata caa na a ndica crúxu já nandique táhan na xihín in da vaxi da ndihvi da ñuu Jerusalén. Mé da cán naní da Simón, da ñuu Cirene, da cúu tátá Alejandro xihín Rufo. Já nacaja ndúsa ná xihín dá ña ná ndicojo da crúxu nuú cata caa na Jesús.

22 Já nasañehe na Jesús nasahan na in xiquí naní Gólgota. Tuhun yóho cuni cáhí a: nuú ndúu lásá yiquí jini ndii. 23 Cán nasahan na vino nuú Jesús, dó nacava táhan xihín jusa ña naní mirra. Joo coó naxeen toho a coho a do. 24 Anda já nacata caa na a ndica crúxu. Já nacasáhá soldado cán sájiquí da saha jáhma Jesús ta nacachi xihín táhan da ña ndá da ná quee vaha cuu quehe in in jáhma Jesús.

25 Ta cúu á tátuhun caa in naha tá nacata caa na Jesús ndica crúxu cán. 26 Ta jini ndica crúxu cán nacahyí na ndá sahá nacata caa na a ta já cáhí a já: “Da yóho cúu rey nuú na Israel.” 27 Ta sa mé já nacata caa na ivi ta cuihná xihín Jesús: in da xoo cuáha ta in da xoo íti. 28 Ta xihín ña yóho naxinu coo tuhun Ndióxi tá cáhí a já: “Taño ta quini nasacu na a.”

29 Chí cáva jini mé ñayivi yáha cán cánahá na xihín á já cáhí na já:

—Candehé. Yóhó cáhún ña jánditanun veñuhu cáhnú cán ta tixi uní víxí quivi cáhún jácandichi tucún ña. 30 Jáca cu mún. Cuáhán nuu ndica crúxu jan —nacachi na sácu ndaa ichi na.

31 Ta quiahva já cája na sacua ha nuú jutu cán xihín na jána ha ley Moisés sácu ndaa ñahá na. Ta nacasáhá cáhan xihín táhan na já cáhí na já:

—Nacuu nacaja Jesús jáca cu da java ga ñayivi joo viti a cuú jáca cu da mé dá. 32 Tá ta mé a ndaa cúu dá Cristo, da cúu rey nuú na Israel ná nuu da ndica crúxu viti ñuhú já ná candúsa nde da —cáhí na.

Ta janda da ivi táhan ndáca ndica crúxu jini á cán cánahá da xihín á.

#### *Tá naxihi Jesús*

(Mt. 27:45-56; Lc. 23:44-49; Jn. 19:28-30)

33 Tá naxinu coo caxivi ndaa nacanaá níi cúu ñuyiví ta janda caa uní sahini já nacasáhá nandiyehé tucu. 34 Ta sa mé hora já nacayuhú cóhó Jesús já cáhí a já:

—Eloi, Eloi, lama sabactani —nacachi a. Tuhun yóho cuni cáhí a: Ndióxi mí i, Ndióxi mí i, ndávaha najándacoo ndáha ndó yehé.

35 Ta java na ndíta cán naxini johó na tuhun cáhí a. Já nacachi na já:

—Cuni johó ndó jáchi cána da profeta Elías —nacachi na.

36 Anda já xinu in da nasahan da nachindaxi da in ticoto ini vino iyá. Já nacató da mé ticoto cán nuú in yitó ndoo já nachitivi da do yati yuhu Jesús ña ná coho a do. Já nacachi da já xihín java da cán:

—Cóho candehó á quixi Elías januu a da ndica crúxu —nacachi da.

37 Anda já nacayuhú cóhó Jesús já naxihi a. 38 Anda já nandatá java ndaa jáhma ndeé ña sáji nuu nuú yi ndivaha veñuhu cáhnú ñuu Jerusalén cán. Janda jini á ta janda sahá nandatá. 39 Ta ndaja coo in datáa, da sáhdá chuun nuú soldado cuéntá Roma nasahin da nu ndáca Jesús cán ta tá naxini da naxihi a já nacachi da já:

—Mé a ndaa táhyí cúu da yóho in túhún jini já jahyi Ndióxi —nacachi da.

40 Ta nasanduu java najihí ta sádehé xicá na Jesús. Taño na yóho nasandacaan

ñá naní María, ñá ñuu Magdala xihín María, ñá cúu náná Jacobo, da loho chá nuú José xihín in ñá naní Salomé. <sup>41</sup> Nasandico najihí yóho jata Jesús ta nachindee ñahá na tá nasahin a estado Galilea. Cuahá ga najihí nasanduu cán ta java na cúu ná na nasahan xihín á ñuu Jerusalén jihna tá cámaní quivi a.

### *Tá najánduxu na Jesús*

*(Mt. 27:57-61; Lc. 23:50-56; Jn. 19:38-42)*

<sup>42</sup> Tá nacuaá too uun quivi viernexe tá cámaní casaá quivi ndiquehe ndée na Israel já nayaha tóco ndihi ña yóho. <sup>43</sup> Ta ndaja coo in in da naní José, da ñuu Arimatea, da cúu táhan na cómi cuénta sahá na Israel. Mé José yóho ndáti da casaá quivi cacomí Ndióxi cuénta sahá ñayivi ñuyivi yóho. Ta nasahan ndee ini da cuhun da cahan máni dá xihín Pilato sahá yiquí cuñu Jesús ña ná quiahva mé Pilato ña nu dá. <sup>44</sup> Chí nacatontó Pilato tá nacandaa ini da ña sa naxihí Jesús. Já nacana da da sahnda chuun nuú soldado da já nandaca tuhún ñahá da á sa naxihí Jesús. <sup>45</sup> Tá nacaxi tuhun da cán nu Pilato ña sa naxihí Jesús já nasahan Pilato ñamaní nuú José ña ná ndiquehe da yiquí cuñu Jesús. <sup>46</sup> Anda já naxeen José in jahmá vaha ta najánuu da yiquí cuñu Jesús ndica crúxu já nachitiví da ña xihín mé jahmá vaha cán. Tá nandihí já nachicaan da mé yiquí cuñu Jesús cán ini in yávi ndácaan ndica cáva. Tá nandihí já nachijahvi da yuhú cáva cán xihín in yuu jáhnda cáhnu. <sup>47</sup> Ta ndaja coo María, ñá ñuu Magdala xihín María, náná José nasandehé na nuú nasacu na yiquí cuñu Jesús ini mé cáva cán.

## 16

### *Tá nanditacu tucu Jesús*

*(Mt. 28:1-10; Lc. 24:1-12; Jn. 20:1-10)*

<sup>1</sup> Ta tá sa nayaha quivi ndiquehe ndée na já nasahan María, ñá ñuu Magdala xihín María, ñá cúu náná Jacobo xihín Salomé viti naquee na cuahan na cueen na java nuú ñaha támi sahan ña chindáa na yiquí cuñu Jesús. <sup>2</sup> Ta naha chá mé quivi domingo tá naqueta candii já cuahan na nuú nachicaan na yiquí cuñu Jesús cán. <sup>3</sup> Ta nani xica na cuahan na íchi cán já ndítuhún

xihín táhan na ndá quiahva caja na tava na yuu ndájí nuú ndácaan yiquí cuñu Jesús cán. Já cáhí na já:

—Yo tava toho yuu ndájí nuu nuú quihví ini nu ndácaan yiquí cuñu Jesús —cáhí xihín táhan na cáshan na jáchi cáhnu ndivaha mé yuu cán.

<sup>4</sup> Joo tá naxinu na mé cáva cán já naxini na ña coó ga yuu ndájí yuhú cáva cán. <sup>5</sup> Ta tá nandihvi na mé cáva cán já naxini na cáa in in dataa ndíxí jahmá yaa ña cáni. In coo da xoo cuáha ta cúu dá da yúta. Tá naxini najihí yóho da cán chí nayihví na. <sup>6</sup> Anda já nacahan da cán já cáhí da já:

—A yihví toho ndó. Xini yehe ña ndínducú ndo Jesús ña Nazaret, ña nacata caa na ndica crúxu. Candehé ndo nuú nasacu na a. Coó ga in viti jáchi nanditacu tucu a. <sup>7</sup> Ta viti cuahán ndo caxi tuhun ndó xihín na naxica tuun xihín á ta xihín Pedro ña cánuú mé á cuahan estado Galilea. Tá cuhun ndó cán já cuni ndó a tá quiahva nacachi mé á xihín ndo —nacachi tátó Ndióxi.

<sup>8</sup> Já naquee na cán xinu na cuahan na jáchi nayihví ndivaha na anda quiji ninu na. Coó nacahan na xihín ni in ñayivi jáchi nayihví ndivaha na.

### *Tá naxini María, ñá ñuu Magdala Jesús*

*(Jn. 20:11-18)*

<sup>9</sup> Tá nandihí nanditacu tucu Jesús ta tá nativi mé quivi domingo já ña nu cuítí naxini Jesús nasacuu ña María, ñá ñuu Magdala, mé ña natava Jesús usa rí quini nasandacaan ini ña. <sup>10</sup> Ta tá naxini ña mé á já naquee ña cuahan ña caxi tuhun ña nuú na naxica tuun xihín Jesús ña tácu a. Ta ndúu cuéha ini na ta sácu na ndúu na tá nasaa ña. <sup>11</sup> Ta nacaxi tuhun ña nu ná ña nanditacu tucu Jesús ta naxini ña mé á joo coó naxeen na candúsa na ña.

*Tá naxini ivi da naxica tuun xihín Jesús mé á*

*(Lc. 24:13-35)*

<sup>12</sup> Ta tá nandihí já nandijama Jesús ndá quiahva cáa já nandaca náha á nuú ivi táhan na cuahan yúcu, na naxica tuun xihín á. <sup>13</sup> Joo tá nandicuni na mé á já naquee na cuahan na caxi tuhun na xihín na java cán joo coó naxeen na candúsa na tuhun nacahan ndiví na yóho xihín ná.

*Sáhndá Jesús chuun nuú na xíca tuun xihín á*

*(Mt. 28:16-20; Lc. 24:36-49; Jn. 20:19-23)*

<sup>14</sup> Tá nandihí cán nandaca náha Jesús nuú ndíhuxu in na naxica tuun xihín á nani ndúu na xíxi na. Já nacasáhá jánani a na jáchi nandaja táhyí na ínima ná ta coó naxeen na candúsa na ña naxini na java cán Jesús tá nandihí nanditacu tucu a. <sup>15</sup> Já nacasáhá cáchi Jesús já xihín ná:

—Cuáhán ndo ní cúú ñuyiví yóho ta caxi tuhun ndó xihín ndihí ñayivi tuhun vaha sahá i. <sup>16</sup> Ta ndá na ná candúsa yehe ta candúta ná já quéa cacu ndaa ínima ná ta a cühun na indayá. Joo na co candúsa yehe, na cán cúú na cühun na ndoho ini na indayá anda ama cáa quiví. <sup>17</sup> Joo na cándeé ini yehe caha na ña xitúhún. Ta xihín quiví yehe tavá na ínima quini ndacaan ini ñayivi. Ta ndacahan na tuhun saá ña coó nacaiahva na. <sup>18</sup> Ta tá ná tiin ndáha ná coo ta tá ná coho na ña cúú cahni ñahá, a cahni toho a na. Ta tá ná chinúu na ndáha ná jiní na quíhvi já ndivaha mé na quíhvi cán —nacachi Jesús.

*Tá nandaa Jesús cuahan indiví*

*(Lc. 24:50-53)*

<sup>19</sup> Tá nandihí nacahan Jesús, xitoho í tóco ndihí tuhun yóho xihín ná anda já nandindita cuahan indiví ta nasacoo a xoo cuáha Ndióxi, tátá yo. <sup>20</sup> Tá nandihí já naquee na naxica tuun xihín á cán cuahan na caxi tuhun na tuhun vaha saha Jesús ndijáá ñuu. Ta já nachindeé Jesús, xitoho í na cán ta náha ña cúú á ña ndaa cahan na jáchi nacaja mé á ña cúú caha na cuahá nuú ña xitúhún. Já ná coo.

## Tuhun vaha nacahyí Lucas sahá Jesucristo

*Ndicani Lucas ndavaha nacahyí da tuhun yóho*

<sup>1</sup> Sa xini vahún, Teófilo ña sa cuahá ñayivi ndúcú na cahyí na tá cáa tá íin ña nayaha tañu nde. <sup>2</sup> Ta najánaha na nuú nde tóco ndihi ña naxini na janda mé saha. Mé na yóho cúu ná na naxica nuu nacahan na tuhun vaha saha Jesús nuú ñayivi. <sup>3</sup> Ta cuni ri yehe va cahyí i ña jáchi cuéé cuéé nandaca tuhún i ndaja cáa anda mé saha já ná cuu cahyí víi ndihi i ña nu mún, Teófilo, da quíhvi ndivaha ini i. <sup>4</sup> Jáchi cuni ña ná candaá vaha inún ndaja cáa ña ndaa ña najánaha na nuun.

*Cáxi tuhun in tátō Ndióxi ña cacu Juan, da jácandúta ñayivi*

<sup>5</sup> Mé tiempo cán nasacuu Herodes rey nuú na Judea. Ta nasahin in da cúu jutú naní Zacarías. Ta nasacuu da cuénta in táhnda jutú naní Abías. Ta ñájíhí da naní ña Elisabet, ña naquixi chíchi Aarón, da nasacuu jutú sanahá. <sup>6</sup> Mé Zacarías yóho xihín ñájíhí da nasacuu na ñayivi naxica ndaa nu Ndióxi. Ta xihín ndinuhu ini na nacaja na ña sáhnda Ndióxi nuú tuhun mé á caja na. Ta ni in túhún toho ñayivi coo nacuu ñehe íni na cahan núu na saha ná. <sup>7</sup> Joo coo toho jahyí na nacacu jáchi coo nacuu canduu jahyí Elisabet cán. Ta mé tiempo já sa nacayatá ndivaha ndívi na.

<sup>8</sup> Ta ndaja coo in quivi nanditahan nuú mé táhnda jutú xica xihín Zacarías cán caja chúun na cuénta Ndióxi. <sup>9</sup> Tóco ndihi jutú cán nasajíquí na ndá da ná quee vaha ta da cán cacuu da quíhvi chiníhmá ini veñuhu cáhnu ndácaan ñuu Jerusalén cán. Ta naquee vaha Zacarías. <sup>10</sup> Ta nani chiníhmá Zacarías cán ini veñuhu já nanditútu ñayivi ndúu na yéhe ñuhu cán ndícahán na Ndióxi. <sup>11</sup> Ta nani chiníhmá Zacarías nu náa cán ndácaan da já nacanáha in tátō Ndióxi nu dá cándichi a xoo cuáha nu náa nu chiníhmá da cán. <sup>12</sup> Tá naxini Zacarías tátō Ndióxi cán, nayíhvi ndivaha da ta ni co xini da ndía caja

da. <sup>13</sup> Joo nandicahan tátō Ndióxi cán xihín dá já nacachi a já:

—A yíhvi tohún, Zacarías jáchi sa naxini johó Ndióxi nuú naxica tahvún nu á. Sahá ña cán queé caja mé á ña ná cacu in jahyí Elisabet, ñájíhún. Ta cacún quivi dá cananí da Juan. <sup>14</sup> A juú quiahva cavatún ta cajii inún caja ta loho jan tá ná cacu da. Ta cuahá ga java na cajii íni na caja da tá ná cacu da. <sup>15</sup> Jáchi da cáhnu cacuu jahyún jan nu Ndióxi. A cóho da ni in túhún toho dó xíhi ñayivi xini na xihín. Ta cacuu da in da jándicutú ndaa Ndióxi xihín ínima yii mé á janda tá cámaní cacu da. <sup>16</sup> Ta mé jahyún jan caja da ña ná ndicó coo cuahá na Israel nu Ndióxi, xitoho na. <sup>17</sup> Ta jihna ñúhú mé Juan cuhun da caja tiaha da ñayivi janda ná quixi mé á chindahá Ndióxi. Tá quiahva nandicutú ndaa ínima profeta Elías xihín ínima yii Ndióxi quiahva já ndicutú ndaa ínima Juan xihín á já ná coo ndeé dá caja da ñaha tátuhun nacaja Elías. Ta caja mé Juan ña ná ndique táhan máni ñayivi xihín jahyí na. Ta caja da ña ná coo johó ñayivi sáa ini já ná caja na ña cuni Ndióxi. Quiahva já caja da cacu tiaha da ñayivi janda quiahva ná xinú quivi quixi da nasahan Ndióxi tuhun a chindahá a — nacachi tátō Ndióxi cán xihín Zacarías.

<sup>18</sup> Anda já nandaca tuhún Zacarías cán tátō Ndióxi já nacachi da já xihín á:

—Ndaja caja i candaá ini i á mé a ndaa táhyí coo tá íin cáhún coo jáchi sa nacayatá ndivaha i ta quiahva já nacayatá ri ñájíhí vi — nacachi Zacarías cán.

<sup>19</sup> Anda já nanducú ñehe tátō Ndióxi cán tuhun nu dá já cáhí a já xihín dá:

—Yehe cúu Gabriel ta chuun Ndióxi xica nuu i cája i. Mé a cán nachindahá yehe ña ná quixi i caxi tuhun i ña yóho xuhun. <sup>20</sup> Joo viti sahá ña coo nacandúsún ña nacachi i xuhun candoo níhun ña ná a cúu cahun janda quiahva ná xinú quivi cacu jahyún. Sa vaxi quivi coo tá íin nacachi i xuhun coo — nacachi tátō Ndióxi cán xihín dá.

<sup>21</sup> Joo ndaja coo ñayivi ndíta ndáti yéhe ñuhu cán sa nacasáhá ndíhi ini na sahá ña sa nacanáha ta coo Zacarías cán quéta jata véhe. <sup>22</sup> Joo tá naqueta Zacarías veñuhu coo nacuu cahan da ni in túhún tuhun xihín ná. Xihín ña yóho nacandaá ini na ña naxini da

in ñaha ñacaja Ndióxi nu náa yii mé á cán. Jandá ndáha uun da cúu nuú na cán jáchi ñacandoo níhi dá.

<sup>23</sup> Ta tá sa najáxiñu Zacarías quivi cája chúun da veñuhu cán já ñaquee da cuanúhu dá vehe da. <sup>24</sup> Tá sa nayaha ña yóho já ñaquee jahyi Elisabet, ñájíhí Zacarías cán. Ta tixi uhun yoo coo ñaquee ñá caca nuu ñá. Ta ñacahán ña: <sup>25</sup> “Ñacaja Ndióxi ña yóho xihín i viti já ná a cándehé ndaa nahá ga ñayivi yehe”, ñacahán ña.

### *Cáxi tuhun táto Ndióxi xihín María ña cacu Jesús*

<sup>26</sup> Tá ñaxinu iñu yoo ñúhu jahyi Elisabet cán já ñachindahá Ndióxi mé Gabriel, táto mé á in ñuu naní Nazaret ndácaan estado Galilea. <sup>27</sup> Ñasahan táto Ndióxi yóho Nazaret ñaxito nihni a in ñá tacú naní María, ñá ñatiin tuhun in da naní José ña ná tandaha ñá xihín dá. Mé José yóho ñaquixi da chichi David, da ñasacomí cuénta sahá ñayivi Israel sanahá. <sup>28</sup> Ñandihvi táto Ndióxi cán nu ín ñá ta já ñacachi a já xihín ña:

—Cáhan Ndióxi yehe xuhun, María jáchi cúun in ñá ñañehe táhvi nu Ndióxi. Ín Ndióxi xuhun ta ñacaja cuaha chága ñamaní xuhun a juú ga xihín java ga najíhí —ñacachi táto Ndióxi cán xihín ña.

<sup>29</sup> Joo tá ñaxini María táto Ndióxi cán já ñacatóntó ña táa johó ñá ña cáhan mé a cán xihín ña. “Ta ndá cuénta quea cáhan táto Ndióxi yóho já xihín yo”, ñacahán ña. <sup>30</sup> Anda já ñacachi táto Ndióxi cán já xihín ña:

—A yíhvi tohún, María jáchi cúun in ñá ñañehe táhvi nu Ndióxi. <sup>31</sup> Ta viti quee jahyún ta tá sa ñacacu a já cacún quivi á ná cananí a Jesús. <sup>32</sup> Mé jahyún ñan cacuu a ña cáhnu. Ta cachi ñayivi saha dá ña cacuu da in túhún jini já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuénta sahá ñayivi tá quiahva ñasacomí David, da cúu tásahnu jícó da cuénta sahá ñayivi. <sup>33</sup> Quixi da cacomí da cuénta sahá ñayivi Israel ta anda ama cáa quivi cacomí da cuénta saha ná —ñacachi táto Ndióxi cán xihín María.

<sup>34</sup> Anda já ñandaca tuhún María táto Ndióxi cán já cáchi ña já xihín á:

—Ndaja coo cacu jahyi i ta ni in túhún toho ña coo ín xihín i —ñacachi ñá xihín á.

<sup>35</sup> Anda já ñanducú ñehe táto Ndióxi cán tuhun nu ñá já cáchi a já:

—Ínima yii Ndióxi quea quixi jándicutú yohó. Ta ndée Ndióxi, mé á cáhnu nu ndíhi a cán cava nuu a yohó táto tuhun caja in vico. Sahá ña cán quea tá ná cacu jahyún ñan cacuu da in da yii ñacaxi Ndióxi caja chúun nu mé á. Ta cachi ñayivi saha dá ña cúu dá in túhún jini já jahyi Ndióxi. <sup>36</sup> Ta cáxi tuhun i xuhun ña cacu jahyi Elisabet, ña cúu táhún cán vatí sa ñacayatá ña. Ta viti sa ñaxinu iñu yoo ñúhu jahyi ñá, mé ña ñacachi ñayivi saha ña a cúu coo jahyi ñá.

<sup>37</sup> Jáchi Ndióxi cuu caja tóco ndíhi ñaha —ñacachi táto Ndióxi cán xihín María.

<sup>38</sup> Anda já ñacachi María já:

—Ndióxi cúu xitoho i ta ná caja mé á tá quiahva cúni a xihín i. Ná coo tá ín cáchi ndó coo.

Tá ñandihvi ñacachi María cán ña yóho já ñaquee táto Ndióxi cán cuahan.

### *Xíto nihni María Elisabet, ña cúu táhan ñá*

<sup>39</sup> Ta mé tañu quivi já já xínu María ñasahan ña in ñuu ndácaan chí yucu cuénta Judea cán. <sup>40</sup> Ta tá ñaquihvi ñá vehe Zacarías, yii Elisabet cán já ñacahan Ndióxi ñá xihín Elisabet. <sup>41</sup> Ta tá ñaxini johó Elisabet ñacahan Ndióxi María xihín ña chí ñacandita ña loho ndácaan tixi Elisabet cán chí ivi laá ñandicutú ndaa ñá xihín ínima yii Ndióxi. <sup>42</sup> Anda já ñacayuhú cóho Elisabet já ñacachi ñá já xihín María:

—Ni in túhún toho najíhí coo ñacaja mání Ndióxi xihín tá quiahva ñacaja mání á yohó. Ta ñacaja yii mé á jahyún. <sup>43</sup> Ta coo saha toho yehe ná quisún yóho, ña cúu náná xitoho i coto nihnúñ yehe. <sup>44</sup> Jáchi tá ñaxini johó uun i ña ñacahan Ndiósun xihín i ivi laá ñacanda jahyi i ini tixi i jáchi ñacajii ín i a. <sup>45</sup> Tahví ñacuún jáchi ñacandúsun ña ñacachi Ndióxi, xitoho í xuhun. Jáchi caja tá caja mé á ña ñacachi a caja —ñacachi Elisabet cán xihín María.

<sup>46</sup> Anda já ñacachi María já:

Cája cáhnu i Ndióxi, xitoho í xihín ínima i.

<sup>47</sup> Ta cájii ndivaha ini i xihín ña cája Ndióxi, mé a jácacu yehe.

48 Jáchí nandicuhun ini a sahá yehe, ñá ndáhví, ñá cúú in mozo mé á.

Ta cachi ñayivi ndúu viti xihín na vaxi quiví canduu ñuyiví yóho ña ñacaja cuaha Ndióxi ñamaní xihín i.

49 Jáchí mé Ndióxi, mé a cuu caja tóco ndihi ñaha ñacaja cuaha ña náhnu xihín i.

Ta yii ndivaha quiví mé á.

50 Ta ní tiempo táhvi ini mé á saha tóco ndihi ñayivi, na cája cáhnu mé á.

51 A juú quiahva náhnu ñaha ñacaja mé á.

Nasahnu a nuú na ndínehe jícó mé.

52 Ta ñacandaa mé á chuun ndahá da náhnu ta najánuu ndáha mé á da.

Ta nandínehe jícó mé á na najánuu ndáha mé ñuyiví yóho.

53 Ta najándicutú ndaa mé á ñaha nuú na nandimaní ñaha cuxu.

Ta ñacandaa mé á ña nasacomí na cuicá já ñataxí a na cán ná quee na cuhun na.

54 Náchindee a na Israel, na cája chúun cuéntá mé á.

Ta coó nandindójó a tahvi ini a saha ná.

55 Jáchí quiahva já nasahan mé á tuhun a caja anda ama cáa quiví xihín Abraham ta xihín tásáhnu jícó yo, na ñaquixi chichi mé dá, já ñacachi María cája cáhnu ñá Ndióxi.

56 Ta ñacandoo María nasahin ñá vehe Elisabet tíxi uní yoo. Anda já ñaquee ñá cuanúhu ñá vehe ñá.

### *Tá ñacacu Juan, da jácandúta ñayivi*

57 Tá nandindaa quiví cacu jahyi Elisabet já ñacacu in ta loho. 58 Ta tóco ndihi ñayivi ndúu yati xihín ñá xihín na cúú táhan ñá nasahan na xito nihni na ña. Ta cájii íni na jáchi ñacandaa ini na ña ñacaja Ndióxi cuahá ñamaní xihín ña. 59 Ta tá naxinu ña loho cán una quiví já nasahan na ñachicaan na marca yiquí cuñu a tátuhun ín costumbre na. Ta ñacahán na cananí a Zacarías tá quiahva naní tátá a. 60 Joo já ñacachi Elisabet já:

—A cananí toho da já. Juan va cananí da —ñacachi ñá xihín na cán.

61 Anda já ñacachi na cán já xihín ña:

—Ndá cuéntá quea cananí jahyún já ta ni in túhún toho na vehún coó naní já.

62 Anda já ñacuu ndáha ná nu Zacarías cán ña ndáca tuhún na da ndaja coo cananí

ñá loho cán. 63 Anda já naxica Zacarías cán in tutu nu ná ta já ñacahví da já: “Juan cananí da.” Tá ñacahvi na cán ña yóho já ñacatóntó ndihi na. 64 Ta chí sa mé hora já nandicahan tucu Zacarías. Já ñacasahá da cája cáhnu da Ndióxi. 65 Xihín tóco ndihi ña ñayaha yóho ñacatóntó ndihi na nasanduu yati xihín Zacarías cán. Ta ní cúú ñuu válí ñúhu chí yucu cuéntá Judea cán nandicuítanu tuhun saha tóco ndihi ña ñayaha yóho. 66 Ta tóco ndihi na naxini johó ña yóho ñacasahá ndícani ini na sahá. Já ñacasahá ndáca tuhún táhan na já cáhí xihín táhan na já:

—Ndá ta cacuu ta loho yóho tá ná cuahnu da.

Ñacachi na ña yóho jáchi naxini táhyi na ñamaní náhnu cája Ndióxi xihín ta loho cán.

### *Cája cáhnu Zacarías Ndióxi*

67 Anda já nandicutú ínimá Zacarías, tátá Juan cán xihín ínimá yii Ndióxi. Já ñacasahá da cáhan da tuhun sahan Ndióxi nu dá cáhan da. Já ñacachi da já:

68 Cáhnu ná cacuu Ndióxi, mé a cúú xitoho ñayivi ñaquixi chichi Israel.

Jáchí ñaquixi a jácacu a mí, na cúú cuéntá mé á.

69 Náchindahá Ndióxi mé a jácacu mí ná a cuhun yó indayá.

Ta ín ndée á caja tóco ndihi ña náhnu.

Ta ñaquixi a chichi David, da ñacaja chúun cuéntá Ndióxi sanahá.

70 Ta janda sanahá ndivaha nasahan Ndióxi tuhun a ña caja mé á ña yóho.

Ta já najáyaha na profeta cán tuhun ñacahan Ndióxi nuú ñayivi.

71 Ña ñacachi mé á quea jácacu a mí ndahá na ihvi yo xihín ndáha na coo cúní mí.

72 Ta ñacachi a tahvi ini a saha tásáhnu jícó yo, na nasanduu sanahá cán.

Ta a ndíndójó toho mé á sahá tuhun yii nasahan nu ná jáchi ña yii cúú tóco ndihi tuhun sahan Ndióxi nuú ñayivi.

73 Ña yóho cúú tuhun ñacachi Ndióxi jáxinu coo a nuú tá nasahan mé á tuhun a nu Abraham, da nasacuu tásáhnu jícó yo cán.

74 Ta ñacachi mé á xihín dá ña jácacu a mí ndahá ña cō cūni mí já ná a cáyihví yō caja chúun í cuéntá mé á.

75 Ta já ná cacuú ñayivi ndaa, ña ñandiquiahva mé caja ña cūni mé á tóco ndihi quivi ndúu ñuyivi yóho, ñacachi Zacarías nu ndíhi ñayivi cán.

76 Anda já ñacasáhá ña cáhan ña xihín ña loho jahyi da já cáchi ña já xihín á:

Ta yóhó, jahyi a, cachi ñayivi sahan ña cūun in profeta Ndióxi, mé a cūu cáhnu nu ndíhi a.

Ta jihna ñúhu cūhún jácāhún ñayivi ña ná cacu tiahva na ínimā ná ndiquehe na mé a chindahá Ndióxi vaxi.

77 Ta xihín ña yóho cuu caxi tuhún xihín ñayivi ña cája cáhnu ini Ndióxi sahá cuachi na.

Já ná cuu cacu ndaa ínimā ná ná a cūhún ña indayá.

78 Sahá ña quíhvi ini Ndióxi mí ta sahá ña táhvi ini mé á saha yō sahá ña cán quēa janda indivi nu ín mé á ñachindahá a in a cuu chindeé a mí ná ndihví ichi saá cuéntá mé á.

79 Jáchi vaxi a jándiyehē a nuú ñayivi ndúu nuú naá ña ná caca na íchi nuú cuu coo vaha ini na xihín Ndióxi, ñacachi Zacarías xihín jahyi loho da.

80 Já ñacasáhá sahnu ña loho cán cuahan ña. Ta ndíndacú ña xihín ñaha Ndióxi viti. Ta ñasahin da yucú íchi nuú cō ndúu cuahá ñayivi janda quiahva ñaxinu quivi ñacasáhá jana ña nuú ña Israel.

## 2

### Tá ñacacu Jesús ñuu Belén

(Mt. 1:18-25)

1 Ta mé tiempo cán tá ñasacomí Augusto cuéntá sahá ñayivi ndúu ñuyivi já ñasahnda da chuun ña ná nditaca quivi ndaja táhan ñayivi cómi ña cuéntá saha.

2 Ta mé tañu nu cuítí tá ñanditaca quivi ná já ñasacuu Cireneo gobernador estado Siria. 3 Ta tóco ndihi ñayivi ñanditahan nu ná cūhún ña tá ñuu tá ñuu nuú ñacacu táshnu jíco ña ná quēe quivi ná. 4 Sahá ña cán quēa ñaquee José ñuu Nazaret cuéntá Galilea cán já ñasahan ña ñuu Belén ña ndácaan estado Judea nuú ñacacu David jáchi ñaquixi da chichi David. 5 Ñasahan

María xihín José ñuu Belén quēe quivi ná. Mé María yóho cūu ña ñaxica ña cacuu ñájihí ña. Ta sa já ñúhu jahyi ña cuahan ña ñuu Belén. 6 Ta nani ñasanduu na ñuu Belén cán ñaxinu quivi cacu jahyi María. 7 Ta ñacacu jahyi nuú ña. Ta ñachitiví ña a ticoto já ñachindúhu ña a nu xixáhan quítí cán. Mé nu sánduu quítí cán ñacacu jahyi María jáchi cō ñañehē ná vehe canduu na jáchi sa ñacatáñu va vehe nuú canduu ñayivi xinu cō ñuu Belén cán.

### Cáxi tuhun táto Ndióxi xihín ña ndáa ndicachi ña ñacacu Jesús

8 Ñasanduu java ña ndáa ndicachi jana ná ñuu yati ñuu Belén cán. 9 Ta in náa cuítí ñanaha táto Ndióxi mé á nu ná. Ta chí ñandiyihvi ndaa nu ndúu ña cán ñacaja Ndióxi ta ñayihvi ndivaha na. 10 Joo ñandicahan táto Ndióxi cán xihín ná já ñacachi a já:

—A yíhvi toho ndó jáchi tuhun vaha quēa ñehē e vaxi i cahan i xihín ndo. Ta xihín ña yóho cajii ndivaha ini tóco ndihi ñayivi.

11 Jáchi mé quivi víti ñacacu in a jácacu a ndohó nuú cuachi ndó ta mé á cán cūu Cristo, xitoho ndó, ña ñachindahá Ndióxi cacomí a cuéntá saha ndo. Ta ñacacu a ñuu Belén nuú ñacacu David sanahá. 12 Tá ná cūhún ndo cán já cuni ndó ña loho cán catíví a ticoto cándúhu á nu xixáhan quítí. Tá ná cuni ndó ña yóho já candaa ini ndó ña cáhan i ña ndaa xihín ndo —ñacachi táto Ndióxi xihín ña ndáa ndicachi cán.

13 Ta nani cáhan táto Ndióxi cán ñaxinu cō cuaha chága táto Ndióxi nu ín a cán. Mé táto Ndióxi yóho ñaquixi na indivi ta cája cáhnu na Ndióxi já cáchi ña já:

14 Cáhnu ná cacuu Ndióxi ín indivi. Ta ná coo vaha ini tóco ndihi ñayivi ndúu ñuyivi, mé ña cajii ini xihín ñamaní cája Ndióxi xihín ná, ñacachi táto Ndióxi cán.

15 Ta tá sa ñandicó cō táto Ndióxi cán cuahan chí indivi já ñacasáhá cáchi xihín táhan ña ndáa ndicachi cán já:

—Cōho quí yō ñuu Belén candehé yō ña ñacachi Ndióxi, xitoho í xōho ña ñacuu ñuu Belén cán.

16 Já xinu na ñasahan ña ta tá ñaxinu cō na cán já ñandíñehē ná María xihín José xihín mé ña loho cándúhu nu xixáhan

quíti cán. <sup>17</sup> Anda já nacasáhá nandicani na ndáá ndicachi cán nu ná ña nacachi tátō Ndióxi xihin ná sahá ña loho cán. <sup>18</sup> Ta chí cātóntó tóco ndihi ñayivi tá xini johō na ña ndicani na ndáá ndicachi cán nu ná. <sup>19</sup> Joo nandicuhun ini María tóco ndihi ña nayaha ta ndicani ini ña sahá. <sup>20</sup> Tá nandihí já naquee na ndáá ndicachi cán cuahan na. Ta a juú quiahva cája cáhnu na Ndióxi cuahan na saha tóco ndihi ña naxini johō na xihín saha tóco ndihi ña naxini na jáchi nasahjin tá in nacachi tátō Ndióxi cán xihin ná.

*Tá ñehe na lee loho Jesús cuahan na ndiquiahva na cuénta saha mé á veñuhu cáhnu ñuu Jerusalén*

<sup>21</sup> Tá nayaha una quivi nacacu lee jahyi María cán já nachicaan na marca yiquí cuñu a tá quiahva in costumbre na. Ta nasacu na quivi á cananí a Jesús jáchi quiahva já nacachi tátō Ndióxi cán xihin María ña ndítahan cananí a janda tá cámaní cañuhu jahyi ña.

<sup>22</sup> Ta nu ley Moisés, ña nacahyí da sanahá cáchí a ña tá ná ndihi nacacu jahyi in ñañaha, a cúu quihvi ña veñuhu anda ná yaha sáhdá ley quivi. Ta tá sa nayaha quivi cán já naquehe María xihin José mé lee loho Jesús cán. Já ñehe na ña cuahan na ndiquiahva na cuénta sahá nu Ndióxi veñuhu cáhnu ñuu Jerusalén cán. <sup>23</sup> Nacaja na ña yóho jáchi já cáchí ley nasahnda Ndióxi sanahá: “Tóco ndihi taa valí, na cúu jahyi nuú najihí, ndítahan ndiquiahva na ña nu Ndióxi.” <sup>24</sup> Ta jári najoco na ña sáhdá ley Moisés coo tá nandihí nacacu jahyi na. Ta ña yóho cúu ivi ndiyuu á ivi ndijata.

<sup>25</sup> Ta ndaja coo mé tiempo cán nasahjin in dataa naní Simeón ñuu Jerusalén cán. Ta nasacuu da in taa vaha ndivaha, da cája cáhnu Ndióxi. Ta ndáti da xinu coo quivi chindahá Ndióxi in da chindeé na Israel já ná a ndóho ga ini na. Ta nandicutú ndaa ínima dá xihin ínima yii Ndióxi. <sup>26</sup> Ta mé a cán quea nacachi xihin dá ña a quiví toho da janda quiahva ná cuni táhyí da Cristo, mé a nasahan Ndióxi tuhun a chindahá a. <sup>27</sup> Ta mé ínima yii Ndióxi ndáca Simeón cuahan da veñuhu mé quivi naxinu María xihin José cán caja na xihin

Jesús tá quiahva sáhdá ley Moisés caja na. <sup>28</sup> Tá nandique táhan da xihin ná já natiin da Jesús já nasañehe ndaa da a. Já nacasáhá da cája cáhnu da Ndióxi já cáchí da já:

<sup>29</sup> Tátá Ndióxi, sa cuu quiahva ndó ñamani quivi yaa i viti,

jáchi sa najaxinu coo ndó nuú tuhun ndó, ña nasahan ndó nuú yehe, da cúu mozo ndo.

<sup>30</sup> Jáchi naxini i xihín nuú i mé a nachindahá ndó jacacu ndehe.

<sup>31</sup> Nasacu ndó a ña ná jacacu a ndaja táhan ñayivi.

<sup>32</sup> Mé a yóho jándiyehē a nuú na coo naquixi chichi Israel.

Ta saha mé a yóho cahan vaha ñayivi saha na Israel, na cúu cuénta mé ndo, nacachi Simeón.

<sup>33</sup> Chí nacatóntó José xihin María táa johō na ña cahan Simeón saha Jesús. <sup>34</sup> Tá nandihí naxica tahví Simeón nu Ndióxi saha ná anda já nacasáhá cáchí da já xihin María, naná Jesús:

—Nacaxi Ndióxi taa loho yóho ña ná caja da ná cuhun cuahá na Israel ndoho ini na ta caja da ña ná cacu ínima cuahá na cán. Naquixi da nu Ndióxi joo candají cuaha ná da <sup>35</sup> já náha táhyí ña cáhvi ini in in na cán. Ta yóhó, María tahví ndivaha inún saha ña yóho ta cacuu a tátuhun tuxú na machiti ínimun —nacachi Simeón xihin María.

<sup>36</sup> Ta mé cán nasahjin ri in ña naní Ana, ña jáyaha tuhun cáhan Ndióxi nuú ñayivi. Ta nasacuu ña jahyi da naní Fanuel, da naquixi chichi Aser. Mé Ana yóho nacayatá ña. Tá yuta ña natandaha ña joo usa laa cuia nasahjin ña xihin yí ña já naxihí da.

<sup>37</sup> Ta viti sa naxinu comi jícó comi cuia in cuaan ña. Nuú ta ndiví in tuun ña veñuhu cája cáhnu ña Ndióxi. Xijuhun ña ta xica tahví ña nu mé á. <sup>38</sup> Mé hora in Simeón ndítuhún da xihin María já naxinu coo Ana cán. Ta tá nandihí nandiquiahva ña ndixahvi nu Ndióxi já nacasáhá cáhan ña saha ña loho Jesús cán nuú ñayivi, na ndáti quixi quiví chindahá Ndióxi da chindeé na ñuu Jerusalén. Ta cáchí ña ña jivi mé Jesús cán quea ndáti na quixi.

*Tá nandicó coo na ñuu Nazaret*



<sup>39</sup> Tá nandihí nacaia José xihín María ña sáhdá ley Moisés cája na cán já cuanúhu na ñuu Nazaret, ña ndácaan estado Galilea cán. <sup>40</sup> Ta mé taa loho Jesús sáhdá da ta ndíndacú da. Ta johó ndíndíhí ga ví jini dá cuahán da. Ta cuahá ndivaha ñamaní cája Ndióxi xihín dá.

*Ndácaan Jesús veñuhu cáhnu ñuu Jerusalén*

<sup>41</sup> Tá nu cuía sáhan náná tátá Jesús víco pascua ñuu Jerusalén. <sup>42</sup> Ta tá naxinu Jesús uxu ivi cuía já ndáca táhan mé á xihín ná tá cuahán na víco ñuu Jerusalén cán jáchi já nasahin costumbre ñayivi cája na tañu víco cán. <sup>43</sup> Ta tá sa nayaha víco cán já nandicó coo José xihín María cuahán na. Joo coo naxini na ña nacandoo Jesús ñuu Jerusalén cán. <sup>44</sup> Tañu ñayivi cuaha cán cátahan da vaxi da, naçahán na. Ta tá sa naxinu ní in quivi xica na cuahán na já nacasáhá ndínducú na da tañu ñayivi cúu táhan na xihín tañu na xini táhan xihín ná. <sup>45</sup> Joo coo nandínehe ná da. Anda já nandicó coo tucu na ñuu Jerusalén ndínducú na da.

<sup>46</sup> Janda quivi uní ví já nandínehe ná Jesús ini veñuhu cáhnu cán. Cáa ín coo da tañu na jánaha ley Moisés cán. Taa johó da nu cáhan na ta ndáca tuhún da na sahá java ga ñaha. <sup>47</sup> Ta chí cátoótó tóco ndihí ñayivi tá xini johó na tuhun ndúcu ñehe da nuú na jánaha ley Moisés cán jáchi náha ña ndíhí jini dá. <sup>48</sup> Tá naxini María xihín José ña ndácaan Jesús tañu na jánaha ley Moisés cán já nacatóntó na. Anda já nacachi María já xihín Jesús:

—Jahyi maní i. Ndá cuéntá quéa nacajún ña yóho xihín nde. Yehe xihín tátún a juú quiahva ndícani ini nde xica nuu nde ndínducú nde yohó —nacachi María xihín Jesús.

<sup>49</sup> Anda já nacachi Jesús já:

—Ndá cuéntá quéa ndínducú ndó yehe. Á coo xini toho ndó ña ndítahan ndihí ini i cája i chuun nasahnda tátá i, mé á ín indivi nuú i cája i, vaha —nacachi Jesús xihín ná.

<sup>50</sup> Joo ni María ni José coo nacandaá ini na ña nacachi Jesús cán xihín ná.

<sup>51</sup> Anda já nandicó coo Jesús cuahán xihín ná ñuu Nazaret. Ta nacaia da tóco

ndihí ña cuni na. Ta nandicuhun ini María ña nacaia Jesús ini veñuhu cáhnu cán. <sup>52</sup> Ta sáhdá Jesús ta cátaçu ini da cuahán. Ta cájii ini Ndióxi xihín ña cája Jesús. Ta quiahva já cájii ri ini ñayivi va xihín ña cája da.

### 3

*Cásahá Juan cáhan da tuhun Ndióxi xihín ñayivi yucú íchí cán*

(Mt. 3:1-12; Mr. 1:1-8; Jn. 1:19-28)

<sup>1</sup> Tá naxinu sahan cuía cómi Tiberio cuéntá sahá ñayivi ñuyivi já nasacuu Poncio Pilato gobernador nuú na ndúu estado Judea. Ta da naní Herodes nasacuu gobernador nuú na ndúu estado Galilea. Ta ñani Herodes, da naní Felipe cán nasacuu gobernador nuú na ndúu Iturea xihín nuú na ndúu Traconite. Ta da naní Lisnias nasacuu gobernador nuú na ndúu Abilinia. <sup>2</sup> Ta Anás xihín Caifás nasacuu da sacuaaha nu ndihí jutú. Mé tiempo cán naçahán Ndióxi xihín Juan, da cúu jahyi Zacarías, mé nu ín da yucú íchí cán. <sup>3</sup> Anda já nayaha Juan ndíjáá ñuu válí ñuhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cája na já ná caja cáhnu ini Ndióxi sahá cuachi na ta já ná candúta ná. <sup>4</sup> Tóco ndihí ña yóho nayaha tá ín nacachi Isaías tá nacahyí da sanahá:

Vaxi quivi tá cahan cóhó in da tañu yucu íchí ta cachi da já:

“Caja tiyahva ndó íchí nuú quixi xitoho í, ta cuná ndó in ichí ndacú nu mé á ña ná ndihvi a ínima ndó.

<sup>5</sup> Tóco ndihí ña cúu táhvi ná ndicutú ndihí a.

Tóco ndihí yucu xihín xiqui ná ndicava ndaa ndihí a.

Tóco ndihí ichí ndícava ná ndíndacú ndihí a.

Ta íchí ña coo ín ndaa nuu ndíndaa ndihí nu á.

<sup>6</sup> Ta tóco ndihí ñayivi ndúu ñuyivi cuni na ndá quiahva jácaçu Ndióxi ñayivi”, já cáhí tutu nacahyí Isaías sanahá ndivaha.

<sup>7</sup> Ta nacasáhá ñayivi ndái cuu na nu ín Juan ña ná jácandúta da na joo nacasáhá xójo ndivaha ini da xihín ná já cáhí da já:

—Mé ndó cúú ndó tátuhun coo jáchi cúú ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. <sup>8</sup> Xíni ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. Ta a cáhán ndo ña jácacu Ndióxi ndohó sahá ña cúú ndó na naquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cahan i xihin ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. <sup>9</sup> Mé ndó cúú ndó tátuhun in yíto, dó sa ñatiin na hacha cuahan na cahnda na. Ta tóco ndihi yíto, dó co sahan cuíhi vaha nuu, tahnda do ta quee dó nu ñúhu cayi do. Quiahva já caja rí Ndióxi xihin ndóhó tá co cúni ndó ndicó coo ini ndó nu mé á —ñacachi Juan xihin ñayivi cán.

<sup>10</sup> Anda já ñacasáhá ñayivi cán ndáca tuhún na da já cáchi na já xihin dá:

—Ndía ndítahan nuú nde caja nde.

<sup>11</sup> Já cáchi Juan já xihin ná:

—Ndá na ndúu ivi cotó ná quiahva na in a nuú na coo ñaha nuu. Ta ndá na in ña cuxu ná cahnda java táhan na ña xihin na coo a nuu —cáchi Juan xihin na cán.

<sup>12</sup> Tañu na nandai cuu cán ñaxinu ri java da játaca jiuhún cuénta impuesto ña candúta dá. Ta nandaca tuhún da Juan já ñacachi da já:

—Maestro, ndía ndítahan nuú nde caja nde.

<sup>13</sup> Anda já ñacachi Juan já xihin dá:

—Quehe ndó jiuhún nuú ñayivi tá quiahva sáhdá ley cuití va quehe ndó —ñacachi Juan xihin da cán.

<sup>14</sup> Ta jári java da cúú soldado nandaca tuhún da Juan já ñacachi da já:

—Ta ndehe ri ndía ndítahan caja nde.

Já ñacachi Juan já xihin dá:

—A cándaa ndó ña cómi ñayivi. A jáyihví ndó na sahá ña ná quiahva na ñaha nu ndo. Ta ni a jácojo ndó cuachi jata ná tá coo ñacaja na ña. Ta xíni ñúhú coo vaha ini ndó xihin yahvi quehe ndó sahá chuun cája ndó —ñacachi Juan xihin da cán.

<sup>15</sup> Tóco ndihi ñayivi ndihi ini na jáchi cúni na candaa ini na ña á mé Juan cúú Cristo,

da nachindahá Ndióxi cacomí cuénta sahá ñayivi. <sup>16</sup> Joo nandicahan Juan xihin tóco ndihi ñayivi já ñacachi da já xihin ná:

—Mé a ndaa cája ndúta i ndohó xihin ticuú. Joo vaxi inga da ta da cán cúú da jándicutú ínimá ndo xihin ínimá yii Ndióxi ta ña cán cacuu a tátuhun ñúhu cáyi. Ta da cán in cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa dá. <sup>17</sup> Mé da vaxi cán caxi da ñayivi vaha tañu ñayivi quini. Cúú á tátuhun in dataa tá jáxixi da trigo xihin pala já ná quee xehe á já cacu vaha da ña. Ta xehe ñacana cán cuhun a cayi a xihin ñúhu ita ña a ndáhva toho —ñacachi Juan.

<sup>18</sup> Quiahva johó ñacahan Juan nuú ñayivi tá ñacaxi tuhun da tuhun vaha nu ná. Ta cuahá java ga ñaha cahan da xihin ná caja na. <sup>19</sup> Inga ñaha ñacaja da quea najánani da Herodes, da cúú gobernador jáchi ñasahin Herodes xihin Herodías, ña cúú ñájíhi ñani da, Felipe. Ta najánani Juan da sahá java ga ña núu ñacaja da. <sup>20</sup> Joo ñacaja johó Herodes mé dá ta coo ñaxeen da coo johó da nu cahan Juan xihin dá. Ña ñacaja da quea ñacaja chága da ña núu tá nachicaan da Juan vecaa.

### *Tá ñacandúta Jesús*

*(Mt. 3:13-17; Mr. 1:9-11)*

<sup>21</sup> Tá cámaní ndácaan Juan vecaa, cája ndúta dá ñayivi ta já najacandúta ri da Jesús. Ta nani xíca tahví Jesús nu Ndióxi já ñanuna indiví. <sup>22</sup> Ta ñanuu ínimá yii Ndióxi jata Jesús. Ta nasacaa ínimá yii Ndióxi yóho tá quiahva cáa in ndijata. Tá ñandihí já ñaxini johó na ña cahan in a indiví já ñacachi a já:

—Yóhó cúún jahyi maní i ta cájii ndivaha ini i xuhun —ñacachi a.

### *Ña yóho cúú quiví na nasacuu tásáhu jícó Jesús*

*(Mt. 1:1-17)*

<sup>23</sup> Nasandacaan Jesús tátuhun oco uxu cuia tá ñacasáhá jánaha tuhun Ndióxi nuú ñayivi. Ta ñacahan ñayivi ña nasacuu a jahyi José. Ta José cán nasacuu da jahyi Elí, <sup>24</sup> ta tátá Elí nasananí Matat. Ta tátá Matat nasananí Leví. Ta tátá Leví nasananí Melqui. Ta tátá Melqui nasananí

Jana. Ta tátá Jana ñasanani José. <sup>25</sup> Ta tátá José ñasanani Matatías. Ta tátá Matatías ñasanani Amós. Ta tátá Amós ñasanani Nahum. Ta tátá Nahum ñasanani Esli. Ta tátá Esli ñasanani Nagai. <sup>26</sup> Ta tátá Nagai ñasanani Maat. Ta tátá Maat ñasanani Matatías. Ta tátá Matatías ñasanani Semei. Ta tátá Semei ñasanani José. Ta tátá José ñasanani Judá. <sup>27</sup> Ta tátá Judá ñasanani Joana. Ta tátá Joana ñasanani Resa. Ta tátá Resa ñasanani Zorababel. Ta tátá Zorababel ñasanani Salatiel. Ta tátá Salatiel ñasanani Neri. <sup>28</sup> Ta tátá Neri ñasanani Melqui. Ta tátá Melqui ñasanani Adi. Ta tátá Adi ñasanani Cosam. Ta tátá Cosam ñasanani Elmodam. Ta tátá Elmodam ñasanani Er. <sup>29</sup> Ta tátá Er ñasanani Josué. Ta tátá Josué ñasanani Eliezer. Ta tátá Eliezer ñasanani Jorim. Ta tátá Jorim ñasanani Matat. <sup>30</sup> Ta tátá Matat ñasanani Leví. Ta tátá Leví ñasanani Simeón. Ta tátá Simeón ñasanani Judá. Ta tátá Judá ñasanani José. Ta tátá José ñasanani Jonán. Ta tátá Jonán ñasanani Eliaquim. <sup>31</sup> Ta tátá Eliaquim ñasanani Melea. Ta tátá Melea ñasanani Mainán. Ta tátá Mainán ñasanani Matata. Ta tátá Matata ñasanani Natán. <sup>32</sup> Ta tátá Natán ñasanani David. Ta tátá David ñasanani Isai. Ta tátá Isai ñasanani Obed. Ta tátá Obed ñasanani Booz. Ta tátá Booz ñasanani Salmón. Ta tátá Salmón ñasanani Naasón. <sup>33</sup> Ta tátá Naasón ñasanani Aminadab. Ta tátá Aminadab ñasanani Aram. Ta tátá Aram ñasanani Esrom. Ta tátá Esrom ñasanani Fares. Ta tátá Fares ñasanani Judá. <sup>34</sup> Ta tátá Judá ñasanani Jacob. Ta tátá Jacob ñasanani Isaac. Ta tátá Isaac ñasanani Abraham. Ta tátá Abraham ñasanani Taré. Ta tátá Taré ñasanani Nacor. <sup>35</sup> Ta tátá Nacor ñasanani Serug. Ta tátá Serug ñasanani Ragau. Ta tátá Ragau ñasanani Peleg. Ta tátá Peleg ñasanani Heber. Ta tátá Heber ñasanani Sala. <sup>36</sup> Ta tátá Sala ñasanani Cainán. Ta tátá Cainán ñasanani Arfaxad. Ta tátá Arfaxad ñasanani Sem. Ta tátá Sem ñasanani Noé. Ta tátá Noé ñasanani Lamec. <sup>37</sup> Ta tátá Lamec ñasanani Matusalén. Ta tátá Matusalén ñasanani Enoc. Ta tátá Enoc ñasanani Jared. Ta tátá Jared ñasanani Mahalaleel. Ta tátá Mahalaleel ñasanani

Cainán. <sup>38</sup> Ta tátá Cainán ñasanani Enós. Ta tátá Enós ñasanani Set. Ta tátá Set ñasanani Adán. Ta Ndióxi ñacavaha Adán.

## 4

*Xíto ndojó tiñáhá sacuahá Jesús*  
(Mt. 4:1-11; Mr. 1:12-13)

<sup>1</sup> Tá ñandihí cán ñaquee Jesús yuta Jordán. Ta ñandicutú ndaa ínima mé á xihín ínima yíi Ndióxi ta mé a cán ñasandaca Jesús ñasahan yucú íchí nuú co ndúu ñayivi. <sup>2</sup> Ta cán ñasahin Jesús tíxi ivi jico quivi ta ñaxito ndojó tiñáhá sacuahá mé á. Ta tóco ndihí quivi cán coo ñaxixi a ta tá ñandihí já ñacasáhá cuico a. <sup>3</sup> Andá já ñacachi tiñáhá sacuahá cán já xihín á:

—Tá tá jivi ndusa jahyi Ndióxi cúun, cahnda chuun ña ná nduu yuu yóho pan.

<sup>4</sup> Andá já ñanducú ñehe Jesús tuhun nu rí já ñacachi a já:

—Já cáchí tuhun Ndióxi: “A juú pan cuití cuxu ñayivi já catacu na, vaha. Xíní ñúhú caja ri na ña sáhdá tuhun Ndióxi nu ná já quéa ná cuu catacu na nu Ndióxi”, — ñacachi Jesús xihín rí cán.

<sup>5</sup> Tá ñandihí já ndáca tiñáhá sacuahá cán Jesús ñasahan rí in jini yucú jícó xihín á já ñanaha rí tóco ndihí ñuu ndúu ñuyiví nu á in tóo loho joho. <sup>6</sup> Andá já ñacachi rí já xihín á:

—Candehé ndaja náhnu cúu ñuu ndúu ñuyiví ta yehe sáhdá i chuun nuú ndaja táhan ña ta cuu jasá i ña nu yóhó jáchi cuu jasá i ña yo nu cúni mí i jasá i ña. <sup>7</sup> Ta quiahva i ña nuun tá ná caxítún nuú i caja cáhnún yehe —ñacachi rí xihín á.

<sup>8</sup> Joo ñanducú ñehe Jesús tuhun nu rí já cáchí a já:

—Satanás, cuáhán caxoo jáchi já cáchí tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuu” —ñacachi Jesús xihín tiñáhá sacuahá cán.

<sup>9</sup> Tá ñandihí já ndáca tucu tiñáhá sacuahá cán Jesús ñasahan rí ñuu Jerusalén xihín á. Ta najándaa rí a nu jícó jini veñuhu cáhnu ndácaan cán já ñacachi rí já xihín á:

—Tá tá jivi ndusa jahyi Ndióxi cúun jácana mún chí ninu. <sup>10</sup> Jáchi nuú tuhun Ndióxi ndaa in tuhun ña cáchí a já:

Cahnda Ndióxi chuun nu tátó mé á ña ná candaa na yohó.

11 Ta ndiñehe ndáha ná yohó já queá ná a ndícuehe sahun tá ná cachihin sahun xihín yuu, cáchí tuhun Ndióxi —ñacachi rí xihín Jesús.

12 Anda já nanducú ñehe Jesús tuhun nu rí já cáchí a já:

—Ín inga tucu nuú ñacahyi tuhun Ndióxi ta cáchí a já: “A cóto ndojó tohún Ndióxi, xitohún” —ñacachi Jesús xihín rí cán.

13 Ña cán queá ñaquee xóo tóo tiñáhá sacuaḥa nu Jesús ta ñaquee rí cuahan rí jáchí cóo ñañehe ín rí ndá quiahva coto ndojó chága rí a.

*Tá ñacasáhá cáxi tuhun Jesús tuhun Ndióxi nuú na estado Galilea*

(Mt. 4:12-17; Mr. 1:14-15)

14 Ta ndaja coo nandicó coo Jesús estado Galilea. Ta ín cuahá ndée a jáchí nandicutú ndaa ínima mé á xihín ínima yíi Ndióxi. Ta ndijáá ñayivi ndúu cán ñacasáhá na cahan na saha mé á. 15 Ta ñacasáhá a jánaḥa tuhun Ndióxi nuú ñayivi ini veñuhu in in ñuu na. Ta tóco ndihi na cahan vaha na sahá ña caja mé á.

*Tá ñasahin Jesús ñuu Nazaret*

(Mt. 13:53-58; Mr. 6:1-6)

16 Tá nandihí já cuanúhu Jesús ñuu Nazaret nuú ñasahnu a. Ta mé quívi ndíquehe ndée ná cán, ñasahan mé á veñuhu. Ta ñacaja tá quiahva sá caja mé á já nandaca ndichi a cahvi a tuhun Ndióxi nuú ñayivi. 17 Ñasahan na libro ñacahyi profeta Isaías nu á ña ná cahvi a ña nuú na ndúu veñuhu cán. Ta tá ñasuná a libro cán já nandíñehe á nu ndaa ña cáchí a já:

18 Chútú ndaa ínima i xihín ínima yíi Ndióxi, jáchí ñacaxi mé á yehe ña ná cuhun i caxi tuhun i tuhun saá ña vaha nuú na ndahvi.

Ta nachindahá mé á yehe ña ná ndaja vaha i na ín cuéha ini.

Ta nachindahá mé á yehe ña ná caxi tuhun i nuú na ndúu ndahá tiñáhá sacuaḥa ndá quiahva caja na queta na ndáha rí.

Ta nachindahá mé á yehe ña ná cuná i nduchú núu na cuáá já ná cuu candehé na.

Ta nachindahá a yehe ña ná candaa i ña ndóho ini ñayivi.

19 Ta nachindahá mé á yehe ña ná cahan i xihín ñayivi ña sa naxinu coo tiempo vaha ndivaha jáchí cúní Ndióxi caja cuahá ñamani xihín ñayivi, já cáchí ña ñacahvi Jesús nuú na cán.

20 Tá nandihí já nachicaji Jesús libro cán já nandiquiahva mé á ña nuú da caja chuun veñuhu cán ta ñasacoo a. Na ñúhu veñuhu cán sándehe na nu mé á. 21 Sahá ña cán queá ñacachi a já xihín ná:

—Mé quívi viti naxini ndó naxinu coo nuú tuhun ñacahyi Isaías sanahá ndivaha —ñacachi Jesús xihín na cán.

22 Ta ndijáá ñayivi cán cahan vaha na saha Jesús ta cátontó na sahá ña ndató ndivaha tuhun cahan xihín ná. Já ñacasáhá ndaca tuhún táhan na já cáchí na já:

—Á a juú da yóho cúu jahyi José cán — cáchí na cahan xihín táhan na.

23 Anda já ñacachi Jesús xihín na cán já:

—Caja i cuénta cúní ndó cachi ndó tuhun yóho xihín i: “Yohó, da cúu doctor ndaja vaha jihna mún.” Ta xihín ña yóho cúní ndó cachi ndó xihín i: “Ña náhnu naxini johó nde ñacajún ñuu Capernaum cán, caja ña mé ñuu mún yóho ná cuni nde.”

24 Anda já ñacahan chága Jesús xihín ná já ñacachi tucu a já:

—Mé a ndaa ná cahan i xihín ndo ña ni in túhún toho ñayivi co ndíquehe vaha na profeta mé ñuu da. 25 Mé a ndaa ná cahan i xihín ndo. Tá ñasahin profeta Elías sanahá já ñasanduu cuahá ri na cuáan tañu ñayivi Israel ta nandoho ndivaha ini na jáchí ñaquixi in joco ndeé ndivaha sahá ña cóo ñacuun javi tixi uní cuia java. 26 Joo cóo nachindahá toho Ndióxi Elías ña ná cuhun da chindeé da na ndúu nación Israel cán. Ña ñacaja Ndióxi queá nachindahá a da nuú in ña cuáan ñasahin ñuu Sarepta yati ñuu Sidón cán. 27 Ta quiahva já ñasahin ri tiempo tá ñasacuu Eliseo profeta. Mé tiempo cán ñasanduu cuahá na nandoho cuehe táhyi nación Israel cán. Joo in túhún da ndajaja vaha da cán, da naní Naamán, da ñaquixi ñuu tóho naní Siria —ñacachi Jesús xihín na cán.

28 Tá naxini johu na ñúhu veñuhu cán ña naçachi Jesús xihin ná já naxojo ndivaha ini na xihin á. 29 Já nandicuïta na xihin á ta natavá na Jesús yuhú ñuu. Ta cán najándaa na a jini yucú jícó nu cánúu ñuu cán. Já naçahán na chindahá nihni na a janda ninu. 30 Joo nayaha Jesús cuahan nu ná já naquee a cuahan va.

*In da nasandacaan ínimá quini ini*  
(Mr. 1:21-28)

31 Anda já naquee Jesús cuahan ñuu Capernaum, ña ndácaan estado Galilea. Ta cán naçasáhá jánaḥa tuhun Ndióxi nuú ñayivi mé quivi ndiquehe ndée ná. 32 Ta chí catóntó na tá quiahva jánaḥa Jesús nu ná jáchi cáhan mé á tátuhun in da íin saḥa cahnda chuun.

33 Mé ini veñuhu nu ndácaan Jesús jánaḥa cán nasandacaan in dataa, da ndácaan in ínimá quini ini. Já naçayuhú ínimá quini cán nu Jesús já cáchi ri já:

34 —Jándacoo táji ndeḥe, Jesús, da ñuu Nazaret. Ndá cuéntá quea quíhvi nuún xihín nde. A vásún jándihún saḥá nde. Sa xini vaḥa i yohó ta cándaḥa cáxi ini i ña cúun in da yii nachindahá Ndióxi —naçachi ínimá quini cán xihin Jesús.

35 Anda já naçasáhá Jesús jánaḥa a ínimá quini ndácaan ini dataa cán já naçachi a já xihin ri:

—Caji yuhun ta janí da yóho —naçachi Jesús xihin ri.

Tá naçachi a já chí najándacava rí quini dataa nuú na cán já naqueta rí ini da cán. Ta coó naçaja rí ni in ña núu xihin dá.

36 Tóco ndihi ñayivi nasanduu cán nayihvi ndivaha na. Ta já naçasáhá cáchi xihin táhan na já:

—Íin ndivaha saḥá tuhun cáhan Jesús yóho jáchi xihín ña cáhan da sáhdá da chuun xihin ndée dá ta tává da ínimá quini ta chí quee rí cuahan ri —naçachi xihin táhan na cán.

37 Ta níí cúú ñuu válí cán nandicuïta nuu tuhun saḥa Jesús.

*Ndája vaḥa Jesús ñá cúú xojo Simón Pedro*

(Mt. 8:14-15; Mr. 1:29-31)

38 Anda já naquee Jesús veñuhu cán já cuahan vehe in da naní Simón. Tá naxinu

a cán já naquihvi a ini vehe da. Ta naxini a ña quíhvi ñá cúú xojo Simón cán, ña chícaan cáhni ndeé ña. Chí naxica tahví na nu Jesús ña ná ndaja vaḥa mé á ña. 39 Anda já naçayati Jesús nu ña já nasahnda chuun nuú cueḥe cán ña ná quee a. Já nandindaa ña chícaan cáhni á ña chí ivi laá nandicoo ñá já naçasáhá cája ndíví ñá ña cuxu na.

*Ndája vaḥa Jesús cuahá na quíhvi*  
(Mt. 8:16-17; Mr. 1:32-34)

40 Tá naqueta nuu candii mé quivi cán já ñeḥe ñayivi na quíhvi ndúu nu ná naxinu na nu Jesús. Tá nuú cueḥe nasandoho na cán ta tá nachinúu Jesús ndáḥa á jini in in na já ndivaha na naçaja mé á. 41 Ta cuaha táhan na quíhvi cán naçana ínimá quini ini na naçaja mé á. Ta tá quéta rí quini cán já cáyuhú cóhó ri nu Jesús já cáchi ri já:

—Yóhó cúun in túhún jini já jahyi Ndióxi —cáchi ri xihin Jesús.

Joo najánani Jesús ínimá quini cán ta co cúni a quiahva ñamaní ña ná cahan ri jáchi xini vaḥa rí cán ña cúú mé á Cristo, da nachindahá Ndióxi cacomí cuéntá saḥa ñayivi.

*Jánaḥa Jesús tuhun Ndióxi nuú ñayivi ndúu estado Galilea*

(Mr. 1:35-39)

42 Tá nativi inga quivi itaan já naquee Jesús ñuu cán ta cuahan in nu cáa xóo. Joo naçasáhá ñayivi ndínducú na mé á janda quiahva naxinu na nu íin a jáchi cúni na caji na nuú á ná a jándacoo a na. 43 Anda já naçachi Jesús já xihin ná:

—Ndítahan nuú i cuhun i çaxi tuhun i xihín ñayivi ndúu java ga ñuu ña vaxi quivi cacomí Ndióxi cuéntá saḥa ná. Jáchi chuun yóho nachindahá Ndióxi yeḥe vaxi i —naçachi Jesús xihín na cán.

44 Chí naxica nuu Jesús jánaḥa tuhun Ndióxi nuú ñayivi ini veñuhu estado Galilea cán.

## 5

*Cája Jesús ña ná cuu tiin cuaha ná tiyacá*  
(Mt. 4:18-22; Mr. 1:16-20)

1 In tañu íin Jesús yuhú tañuhú naní Genesaret. Ta a juú quiahva natata ñayivi chí naçasáhá cándihi na Jesús jáchi cúni na cuni johu na tuhun Ndióxi. 2 Ta naxini

Jesús ivi barco ndíta dó yati yuhú tañuhú cán. Coó da ñúhu ini dó jáchi sa ñaquee da tává tiyacá ta yati jín va ndícata da ñúnu dá. <sup>3</sup> Anda já ñaquihvi Jesús ini in táhan barco cán, do cúu ñaha Simón. Ta ñacachi Jesús xihín Simón ña ná jácaxícá loho da do. Tá ñandihi já ñasacoo Jesús ini barco já ñacasáhá jánaḥa nuú ñayivi janda mé ini barco cán. <sup>4</sup> Ta tá sa ñandihi ñacahan xihín ñayivi cán já ñacachi a já xihín Simón:

—Cañehe barco yóho ná cuhun dó xoo nu cúná chága ticuij ta jácanún ñúnun tavún tiyacá —ñacachi Jesús xihín dá.

<sup>5</sup> Anda já ñanducú ñehe Simón tuhun nu Jesús já cáchi da já xihín á:

—Maestro, nini yaa ñuu ñacaja chúun nde ña ndúcú nde tavá nde tiyacá. Ta coó ñaha ñatavá nde. Joo tá sa cáchi mé ndó já caja i tá ín cáchi ndo cuhun i jácana i ñúnu i ini tañuhú —ñacachi Simón xihín Jesús.

<sup>6</sup> Ta tá ñacaja da ña ñacachi Jesús xihín dá já a juú quiahva cuahá tiyacá ñatavá da chí janda ñúnu dá cán ñacasáhá táhnda. <sup>7</sup> Anda já ñacuu ndáha dá nuú java ga da tává tiyacá ñúhu ini inga barco ña ná quixi da chindeé táhan da xihín dá. Anda já ñaquixi da cán chindeé táhan da xihín Simón. Já najácutú da ndíví barco cán xihín tiyacá chí janda ndúcú cacoo dó cán cahá tañuhú xihín ña cuahá tiyacá ñaquee ini dó. <sup>8</sup> Tá ñaxini Simón Pedro cán ña yóho já ñacaxítí da nu Jesús já cáchi da já xihín á:

—A cáyati ndó nuú i, xitoho i jáchi cúu u in taá cája cuachi.

<sup>9</sup> Já ñacachi Simón jáchi ñayihví da. Ta quiahva já ñayihví da ñachindeé táhan xihín dá cán sahá ña cuaha nahá tiyacá ñatavá da. <sup>10</sup> Quiahva já ñayihví ri Jacobo xihín Juan, da cúu jahyi Zebedeo. Ndíví da yóho chindeé táhan da xihín Simón cán. Tá já ñacachi Jesús já xihín Simón:

—A cáyihví tohún jáchi viti casáhún caca nuún tavún ñayivi tañu cuachi tá quiahva ñacajún tá ñatavún tiyacá ini tañuhú —ñacachi Jesús xihín dá.

<sup>11</sup> Ña cán quéa tá ñatavá da cán barco da yuhú tañuhú cán já najándacoo ndihi da ñaha da ta ñandico da Jesús.

*Tá ñandaja vaha Jesús in da ndóho cuehe táhyi*

(Mt. 8:1-4; Mr. 1:40-45)

<sup>12</sup> Ta ndaja coo ín Jesús in ñuu ta já ñaxinu coo in da ndóho cuehe táhyi nu á. Ta tá ñaxini da Jesús já ñacaxítí da nu á janda quiahva ñacani ndaa nuú dá nu ñúhu. Já ñacasáhá xica tahví da nu á já cáchi da já xihín á:

—Cuu ndaja vaha ndó yehe, xitoho i tá cúni ndo —ñacachi da xihín Jesús.

<sup>13</sup> Anda já ñacani ndaa ndáha Jesús da já ñacachi a já:

—Cúni ña ná ndivahún ña cán quéa ñandivahún viti —ñacachi Jesús.

Tá ñacachi Jesús já chí ivi laá ñandindaa cuehe táhyi ñandoho da cán. <sup>14</sup> Anda já ñasahnda Jesús chuun nu dá ña ná a ndícani da nuú ñayivi sahá ña ñacaja xihín dá. Ña ñacachi a xihín dá quéa:

—Cuáhán ndacún jánaḥun mún nuú jutú. Ta ndítahan jocún ñaha nu Ndióxi tátuhun ñasahnda ley Moisés sanahá caja na sa ñandivaha. Já ná candaḥ ini ñayivi ña sa ñandindaa va cuehe ñasandohún —ñacachi Jesús xihín da cán.

<sup>15</sup> Joo ví ga ví ñacasáhá ndícuija nuu tuhun sahá ña cája Jesús. Sahá ña cán quéa táca cuahá ndivaha ñayivi cuni johu na nu cáhan mé á xihín ná. Ta jári táca na jáchi cúni na ña ná ndaja vaha mé á na. <sup>16</sup> Joo tává xoo Jesús mé á xoo nuú coó ñayivi ta cán sa xica tahví a nu Ndióxi.

*Ndája vaha Jesús in da ñaxihí tuchu saha*

(Mt. 9:1-8; Mr. 2:1-12)

<sup>17</sup> In tañu ndácaan Jesús ini in vehe jánaḥa nuú ñayivi. Tañu na cán ñasanduu coo java na fariseo xihín java na jánaḥa ley Moisés. Tóco ndihi na cúu ná na ñaquixi ndijáá ñuu válí ñúhu estado Galilea cán xihín ñuu válí ñúhu estado Judea xihín ñuu Jerusalén viti. Ta náha Jesús ña ñehe a ndée Ndióxi jáchi ndivaha ñayivi cája mé á. <sup>18</sup> Mé hora já ñaxinu coo java dataa ta ñehe da in xito loho nu cándúhu in da quihvi, da ñaxihí tuchu saha. Ta cúni da jáquihvi da da cán ini vehe nu ndácaan Jesús cán já chindúhu dá da nu Jesús, ñacahan da. <sup>19</sup> Joo coó ñacuu caja da quihvi da jáchi ñanditútú ndivaha ñayivi ndúu na yéhe vehe cán.

Sahá ña cán quéea nandaa da jiní vehe já n̄tavá da teja cándójó cán. Já najánuu da x̄ito loho nu cándúhu mé da quíhvi cán tañu tóco ndihi ñayivi ñúhu ini vehe cán janda quiahva naxinu x̄ito da quíhvi cán nu ín Jesús. <sup>20</sup> Tá naxini Jesús ña cándeé ini da ñéhe da quíhvi cán mé á já n̄acachi a já x̄ihín da quíhvi cán já:

—Candehé. Sa n̄acaja cáhnu ini i sahá cuachún viti —n̄acachi Jesús x̄ihín dá.

<sup>21</sup> Anda já n̄acasáhá na jánaha ley Moisés x̄ihín na fariseo cán cáhán na: “Ndá da cúu da yóho ta ndá cuéntá quéea ndája núu da Ndióxi x̄ihín tuhun cáhan da. Jáchi ni in túhún toho ñayivi a cúu caja cáhnu ini sahá cuachi. In túhún jiní Ndióxi quéea cuu caja cáhnu ini sahá cuachi”, n̄acahán na cán.

<sup>22</sup> Joo Jesús sa n̄acandaa va ini a ña cáhvi ini na cán sahá ña cán quéea n̄acachi a já x̄ihín ná:

—Ndávaha cáhán ndo já. <sup>23</sup> Á cáhán ndo ña ihvi chága cachi i x̄ihín da yóho: “N̄acaja cáhnu ini i sahá cuachún viti.” Á tá coó tá cachi i x̄ihín dá: “Ndicoo ta cuanúhu.” <sup>24</sup> Candehé vaha ndo ná naha i nu ndo ña ín sahá i, da n̄achindahá Ndióxi nduu u ñayivi, caja cáhnu ini i sahá cuachi ñayivi ñuyiví yóho —n̄acachi Jesús x̄ihín na cán.

Anda já n̄acachi tucu a x̄ihín da naxihi tuhú sahá cán já:

—Ta viti cáhan i x̄uhun, cuándacoo ndiquehe x̄ito lohún ta cuanúhu.

<sup>25</sup> Tá n̄acachi Jesús já chí ivi laá n̄andicoo da nu ndíhi ñayivi ndúu cán jáchi n̄andivaha sahá dá. Ta n̄andiquehe da x̄ito loho da nu n̄asandúhu dá. Anda já cája cáhnu da Ndióxi naquee da cuanúhu dá vehe da. <sup>26</sup> Ta tóco ndihi ñayivi n̄asanduu cán n̄acatontó na ta n̄acaja cáhnu na Ndióxi sahá ña n̄acaja Jesús. Ta a juú quiahva yíhvi na já n̄acachi na já:

—Ña náhnu ndivaha va quéea naxini quivi viti —n̄acachi na.

*Cána Jesús in da naní Leví, da cáhan na Mateo x̄ihín, ña ná caca da x̄ihín á*  
(Mt. 9:9-13; Mr. 2:13-17)

<sup>27</sup> Tá n̄andihí já naquee Jesús x̄ica cuahan. Ta cán naxini a in da j̄ataca jiuhún cuéntá impuesto. Mé da yóho naní da Leví ta ín coo da nu s̄acoo na j̄ataca jiuhún

cuéntá impuesto cán. Anda já n̄acachi Jesús já x̄ihín dá:

—Naha quí candicun yehe —n̄acachi a x̄ihín dá.

<sup>28</sup> Anda já n̄andaca ndichi Leví cán ta najándacoo da tóco ndihi ñaha cán ta já n̄acasáhá ndíco da Jesús x̄ica da. <sup>29</sup> Tá n̄andihí já n̄acavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na j̄ataca jiuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán. <sup>30</sup> Joo na fariseo x̄ihín na jánaha ley Moisés n̄acasáhá na cáhan núu na sahá na x̄ica tuun x̄ihín Jesús já n̄acachi na já:

—Ndá cuéntá quéea x̄ixi ndó x̄ihín na j̄ataca jiuhún cuéntá impuesto ta x̄ihín java ga na cája cuachi —n̄acachi na cán x̄ihín na x̄ica tuun x̄ihín Jesús.

<sup>31</sup> Anda já n̄anducú ñehe Jesús tuhun nuú na cán já n̄acachi a já x̄ihín ná:

—Ñayivi ín vaha co x̄iní ñúhú toho na da cája tátá ñahá joo na quíhvi, na cán cúu na x̄iní ñúhú da cája tátá ñahá. <sup>32</sup> Ta yehe coó vaxi toho i cana i na sa ín vaha. Vaxi i cana i ñayivi, na cája cuachi ña ná j̄andacoo na cuachi cája na —n̄acachi Jesús x̄ihín na cán.

*Ndáca tuhún na Jesús ndá cuéntá quéea co x̄ijuhun da x̄ica tuun x̄ihín á*  
(Mt. 9:14-17; Mr. 2:18-22)

<sup>33</sup> Anda já n̄acasáhá ndáca tuhún tucu na Jesús já cáchi na já x̄ihín á:

—X̄iní nde ña x̄ica tahví ndivaha va na n̄asaxica tuun x̄ihín Juan ta j̄ari x̄ijuhun ndivaha va na cán. Ta quiahva já cája na fariseo. Joo na x̄ica tuun x̄ihín yóhó jan ní tiempo x̄ixi na pan ta x̄ihi na vino. Ndá cuéntá quéea cája na já —n̄acachi na cán x̄ihín Jesús.

<sup>34</sup> Anda já n̄anducú ñehe Jesús tuhun nu ná já cáchi a já x̄ihín ná:

—Cúu á tátuhun tá cája na víco tándaha ta ín va mé da tándaha cán x̄ihín ná já quéea co ndítahan nu ná cajuhun na. Quiahva já ín ri x̄ihín yehe va. Coó sahá cajuhun na x̄ica tuun x̄ihín i jáchi ín v̄i x̄ihín ná viti. <sup>35</sup> Joo vaxi quivi ndindaa i nuú na yóho. Anda já casáhá na yóho cajuhun na —n̄acachi Jesús x̄ihín na cán.

<sup>36</sup> Anda já nasacu Jesús quiahva nu ná já nacachi a já xihín ná:

—Ni in túhún toho ñayivi co sáhdá na in túhún jáhma saá já ndicahmá na in jáhma yatá. Jáchi tá ná caja na já játiví na jáhma saá cán. Ta ni co ndíque táhan vaha in jáhma yatá tá jándaha na ña xihín in túhún jáhma saá. <sup>37</sup> Ta ni in túhún toho ñayivi co táan na vino saá ini in níi yatá. Jáchi tá ná caja na já já queá jácandí va vino saá níi yatá cán. Ta xihín ña yóho tiví níi cán ta tiví ri dó cúu vino cán va. <sup>38</sup> Ña ndítahan caja na queá taán na vino saá ini níi saá já ná cuu cañuhu vaha dó cán ta mé níi co cáhndí a. <sup>39</sup> Ta ni in túhún táhan na xihí vino yatá co xíca na vino saá coho na jáchi cáhí na ña vaha chága xihí dó yatá —nacachi Jesús xihín quiahva sácú a nuú na cán.

## 6

*Tá na xíca tuun xihín Jesús túhun na yucu jini trigo quivi ndíquehe ndée ñayivi*  
(Mt. 12:1-8; Mr. 2:23-28)

<sup>1</sup> In quivi ndíquehe ndée ñayivi nani xíca Jesús cuahan xihín na xíca tuun xihín á já nayaha na tañu nuú naxutu na trigo. Já nacasáhá na cán túhun na yucu jini trigo cán já tává na trigo já chíníhni ndáha ná a ta sáxí na cásahan na. <sup>2</sup> Tá naxini java na fariseo cán ña cája na já nacachi na já:

—Ndávaha cája ndó chuun ña co ndítahan caja ndó quivi ndíquehe ndée yo —nacachi na fariseo cán xihín na xíca tuun xihín Jesús.

<sup>3</sup> Anda já nanducú ñehe Jesús túhun nu ná já nacachi a:

—Á a ñáha cahvi ndó nuú túhun Ndióxi nu cáhan sahá ña nacaja David sanahá tá nacuico da xihín na xíca xihín dá. <sup>4</sup> Ña nacaja da cán queá naquihvi da ini veñuhu Ndióxi ta natiin da pan yíi já naxixi da ña ta nasahan da ña nuú na xíca xihín dá ña ná cuxu na. Joo jutú cuití va cúu na ndítahan nuú cuxu ña cán, nduu. <sup>5</sup> Ta yehe va, da nachindahá Ndióxi nduu ñayivi ín sahá i cahnda i chuun sahá quivi ndíquehe ndée ñayivi —nacachi Jesús xihín na cán.

*Tá nandaja vaha Jesús in da nahichí ndáha*  
(Mt. 12:9-14; Mr. 3:1-6)

<sup>6</sup> Inga tucu quivi ndíquehe ndée ná já naquihvi Jesús ini in veñuhu ta nacasáhá jánahá nu ná. Ta ini mé veñuhu cán nasandacaan in dataa, da nahichí ndahá cuáha. <sup>7</sup> Ta ndaja coo na jánahá ley Moisés xihín na fariseo nání na Jesús sándehe na ña á ndaja vaha mé á da cán quivi ndíquehe ndée na. Ta xihín ña yóho cáhán na cuu ñehe ini na jácojo na cuachi jatá. <sup>8</sup> Joo sa xini va Jesús ña cáhvi ini na cán. Sahá ña cán queá nacachi a já xihín da nahichí ndáha cán já:

—Cuándaco ta candichi mahñú yóho —nacachi Jesús xihín dá.

Anda já nandaca ndichi da cán nuú Jesús.

<sup>9</sup> Anda já nacasáhá Jesús cáhan xihín java ga na ndúu cán já nacachi a já xihín ná:

—Cuni johó ndó ná ndaca túhún i ndohó. Ndía cáhí ley ndítahan caja í mé quivi ndíquehe ndée ñayivi. Á chindeé yo ñayivi á caja í ña núu xihín ná. Á jácací na á cahní yó na —nacachi Jesús xihín ná.

<sup>10</sup> Anda já nandicoto nihni Jesús nuú ndihi na nacava nuu ndúu xihín á cán. Ta nacachi a já xihín da nahichí ndáha:

—Jándacañ ndáhun.

Ta tá najándacañ da cán ndáha dá chí ivi laá nandivaha ndáha dá. <sup>11</sup> Joo tóco ndihi na java ndúu cán naxojo ndivaha ini na. Já nacasáhá ndítuhún xihín táhan na ña ndá queá cuu caja na já ná cuu jándihi na saha Jesús.

*Tá nacaxi Jesús uxu ivi da cacuu apóstol*  
(Mt. 10:1-4; Mr. 3:13-19)

<sup>12</sup> Mé tañu já naquee Jesús nasahan in jini yucu caca tahví a nu Ndióxi. Ta níi cúu ñuú naxica tahví a nu Ndióxi. <sup>13</sup> Ta tá sa nativi já nacana mé á na xíca xihín á. Ta tañu na cán nacaxi a uxu ivi da cacuu da in táhdá ta cananí apóstol, da chindahá a caca nuu cáhan túhun Ndióxi. <sup>14</sup> Nacaxi a da naní Simón, da nasacu tucu a quivi cananí Pedro. Ta nacaxi a da cúu ñani Pedro, da naní Andrés. Ta nacaxi a Jacobo xihín Juan xihín Felipe xihín Bartolomé <sup>15</sup> xihín Mateo xihín Tomás xihín Jacobo, da cúu jahyi Alfeo. Ta nacaxi a Simón, da naxica cuéntá na cananista. <sup>16</sup> Ta nacaxi ri a Judas, ñani Jacobo xihín Judas Iscariote, mé da najicó túhún Jesús tá nu ndihí.



*Jánaha Jesús nuú cuahá ñayivi*  
(Mt. 4:23-25)

<sup>17</sup> Tá nandihí nanuu Jesús jini yúcu xihín na xíca tuun xihín á já naxinu a yojó ndaa nasahjin a xihín ná. Ta cán nasanduu ri cuahá ndivaha ñayivi táhan na naquixi ndijáá ñuu válí ndúu chí estado Judea xihín na ndúu ñuu Jerusalén xihín na ndúu ñuu Tiro xihín Sidón, ña ndúu yati yuhú tañuhú. Ta tóco ndihí ñayivi yóho naxinu na cuni johó na nu cáhan Jesús. Ta naxinu na jáchi cúní na ña ná ndaja vaha mé á na. <sup>18</sup> Ta tóco ndihí na nasañuhu ínima quini ini nandaja vaha ri Jesús na jáchi natavá a ínima quini nasañuhu ini na. <sup>19</sup> Ta tóco ndihí ñayivi cúní na caní ndaa ndáha ná Jesús jáchi xihín ndée mé á ndája vaha tóco ndihí na quihvi.

*Jánaha Jesús ndá quiahva cajii chága ini*  
*já ná a cánduu cuéha yo*  
(Mt. 5:1-12)

<sup>20</sup> Tá nandihí já nasandehé Jesús nuú na xíca tuun xihín á já nacasáhá cáchí a já xihín ná:

–Tahví nacuu ndó, na cándahví jáchi ndóhó cúu na cacomí Ndióxi cuéntá saha.

<sup>21</sup> Tahví nacuu ndó, na cuico viti ñuhú jáchi ndóhó cacuu na chutú ndaa tá ná ndihí.

Tahví nacuu ndó, na sácu viti jáchi ndóhó cacuu na casáhá cuacu tá nu ndihí.

<sup>22</sup> Tahví nacuu ndó tá cándají ñayivi ndohó ta casáhá táxi na ndohó á canahá na xihín ndo. Ta tahví nacuu ndó tá quehe núu na ndohó sahá ña cáhan na ña cúu ndó na núu ndivaha. Tá ná caja na tóco ndihí ña yóho xihín ndo sahá ña candeé ini ndó yehe, da nachindahá Ndióxi nduu ñayivi, tahví nacuu ndó. <sup>23</sup> Já queá ndítahan cájii ndivaha ini ndó mé quiví já jáchi sa naxica tahví Ndióxi in ña vaha ndivaha ín indiví quiahva nu ndo. Jáchi tá quiahva cája xíxi na jan xihín ndó viti quiahva já nacaja xíxi ri tásánu jícó na jan xihín na nasacuu profeta sanahá.

<sup>24</sup> Joo ndáhví nacuu ndó, na cuicá viti jáchi sa nacajii ndivaha va ini ndó ñuyíví yóho.

<sup>25</sup> Ndáhví nacuu ndó, na nachutú ndaa viti jáchi ndóhó cúu na quixi tama nuu.

'Ndáhví nacuu ndó, na sácu viti jáchi ndóhó cúu na cuacu xihín ña cacuéha ini ndó.

<sup>26</sup> 'Ndáhví nacuu ndó tá ná casáhá ñayivi cahan vaha na saha ndo jáchi quiahva já nacahan vaha tásánu jícó na jan sahá na profeta túhún nasanduu najándahvi ñayivi sanahá.

*Xíní ñuhú quihvi ini na co cúní mí*  
(Mt. 5:38-48; 7:12)

<sup>27</sup> Tóco ndihí ndó, na xíní johó nu cáhan i yóho, ndítahan quihvi ini ndó na co cúní ndohó. Ta xíní ñuhú caja vaha ndó xihín ndá na cándají ndohó. <sup>28</sup> Xíní ñuhú caça tahví ndó nu Ndióxi ña ná caja yii á na nachicaan cháhan jata ndo. Ta caça tahví ndó nu Ndióxi sahá na canahá xihín ndo. <sup>29</sup> Ta ndá na ná caní in xoo sajóho ndó, cata ñee ndó inga xoo sajóho ndó nu ná ña ná caní na. Ta tá ná candaa na jahmá ndeé ndo quiahva ndó ñamaní ña ná quehe ri na cotó ndo tá já cúní na. <sup>30</sup> A cájihnda ndó nuú na xíca ñaha nu ndo. Ta ndá na cándaa ña cúu ñaha ndó, a ndíndaca ndó ña nu ná. <sup>31</sup> Tá quiahva cúní ndó caja ñayivi xihín ndo quiahva já ndítahan caja ri ndóhó va xihín ná.

<sup>32</sup> Jáchi tá quihvi ini ndó ñayivi sahá ña quihvi ri ini na cán ndohó va, ndía vaha cája ndó jáchi quiahva já cája ñayivi quini. <sup>33</sup> Ta tá cája vaha cuití ndo xihín na cája vaha xihín mé ndó, ndía vaha cája ndó jáchi quiahva já cája ri ñayivi quini va. <sup>34</sup> Ta tá sahan tóo ndó ñaha ndó nuú ñayivi sahá ña cáhan ndo caja na ñamaní xihín mé ndó, ndía vaha cája ndó jáchi quiahva já cája ri ñayivi quini va. <sup>35</sup> Joo ndóhó, xíní ñuhú quihvi ini ndó na co cúní ndohó. Ta xíní ñuhú caja vaha ndó xihín ñayivi. Ta xíní ñuhú quiahva tóo ndó ñaha ndó ta a cándati ndó ña ná nducú ñehe na cán ña nu ndo. Tá ná caja ndó já já queá ñehe táhvi ndó ña vaha ndivaha caja Ndióxi ta nduu ndó jahyi Ndióxi, mé a cúu Ndióxi cáhnu ndivaha. Jáchi mé Ndióxi cándahví ini a ndá na co ndíquiahva ndixahvi nu mé á ta cándahví ri ini a ñayivi quini va. <sup>36</sup> Xíní ñuhú tahnda ini ndó sahá ñayivi tá quiahva táhnda ini Ndióxi saha ná.

*Co ndítahan candehé ndaa yó ñayivi  
(Mt. 7:1-5)*

<sup>37</sup> A candehé ndaa ndó ñayivi já ná a caja Ndióxi já xihín ndo. A chícáan ndó cuachi jatá inga na já ná a quéhe Ndióxi cuéntá sahá cuachi mé ndó. Caja cáhnu ini ndó saha ná já ná caja cáhnu ini Ndióxi saha mé ndó. <sup>38</sup> Jasá ndo ñaha nuú ñayivi já ná ñehe ndó ñaha nu Ndióxi. Cúú á tátuhun cája ñayivi tá jáchutú na in ndohó xihín nuní ta quíji nihni na ndohó já ná ndituun a ta jácuyu chága na nuní já táan na ña ini a janda quiahva xíta ña yuhú ndohó cán. Tá quiahva cája mé ndó xihín ñayivi quiahva já caja Ndióxi xihín ndo jáchi tá cuaha sahan ndó nuú ñayivi quiahva já cuaha quiahva ri Ndióxi nu ndóhó va —ñacachi Jesús xihín na cán.

<sup>39</sup> Tá nandihí já nasacu a quiahva nu ná já ñacachi a já:

—A cuú toho caja in taa cuáá candaca da inga da cuáá cuhun da jáchi ndívi já da ndicava da yávi. <sup>40</sup> Ni in túhún toho da xíca jácuaha tiaha chága nu mé da jánaha ñahá cán. Joo tá ná xinu quívi já catiaha vaha da já candaá ini da tóco ndihí ña xíní da najánaha ñahá cán.

<sup>41</sup> Jáchi ndá cuéntá quéa sándehe ndó ña núu cája ñani táhan ndó ta co sándehe ndo ndá quiahva náhnu chága ña núu cája mé ndó. Cúú á tátuhun ndácaan in xehe loho nduchú núu ñani táhan ndó nani ndácaan in yító ndúhu cáhnu ini nduchú núu ndo.

<sup>42</sup> Ta tá a cuú cuni ndó yító cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” Jándahvi ndó mé ndó xihín ña cája ndó. Xíní ñúhú tavá ndo yító cáhnu ndácaan nduchú núu mé ndó já ná nuná nu ndó cuni vaha ndó já ná cuu tavá ndó xehe loho ndácaan nduchú núu ñani táhan ndó —ñacachi Jesús.

*Tá xíní yo cuíhi in yító já candaá ini ndá  
yító cúú dó*

*(Mt. 7:17-20; 12:34-35)*

<sup>43</sup> Anda já ñacasáhá tucu a cáchi já:

—Coó toho yító vaha cúun cuíhi quini nuu. Ta ni coó yító quini cuu cuun cuíhi vaha nuu. <sup>44</sup> Jáchi xihín cuíhi cúun nuú

in in yító candaá ini ndá yító cúú dó. A vāja cúú tuhun sáhdá ñayivi tití ñúhu nuú tohíñú. Ta ni a vāja cúú tuhun sáhdá na uva nuú tonáña yúcu. <sup>45</sup> In taa vaha cáhan da ndinuhu ña vaha jáchi ndinuhu ña vaha ñúhu ínimá dá. Ta in taa quini cáhan da ndinuhu ña núu jáchi ña núu quéa ndácaan ínimá dá. Jáchi yúhu ñayivi cána tóco ndihí ña nandicutú ñúhu ínimá ná —ñacachi Jesús.

*Sácú Jesús quiahva sahá ivi da ñacavaha  
vehe*

*(Mt. 7:24-27)*

<sup>46</sup> Cáhan tucu Jesús já cáchi a já:

—Ndá cuéntá quéa cáhan xitoho nahá ndó yehe ta co cája ndó ña sáhdá i nu ndo. <sup>47</sup> Ná cáhan i xihín ndó ndaja in da vaxi nuú i cuni johó da tuhun cáhan i ta cája da ña cáchi i. <sup>48</sup> Cúú dá tátuhun in dataa ñacavaha vehe. Tá ñacasáhá da tává da sahá vehe da já nasata cúná da já ná chinúu da vehe da jatá tóto. Ta tá nasahnu cuahá yuta já ñacani ndaa ñihí ticuíí cán jatá vehe da. Joo coó nandicava vehe da ñacaja ticuíí cán jáchi tóyíí cándichi vehe da jatá tóto cán. <sup>49</sup> Joo ndá da xíní johó nu cáhan i ta co cája da ña cáchi i, cúú dá tátuhun inga dataa, da ñacavaha vehe nu ñúhu uun. Ta coó nasata da nuú nanduxu sahá. Ta tá nasahnu cuahá yuta já ñacani ndaa ñihí ticuíí cán jatá vehe da. Ta xihín ña yóho nandicava vehe da ta chí nandihí saha chí uun —ñacachi Jesús.

## 7

*Tá nandaja vaha Jesús in da cája chúun  
nuú in jefe soldado*

*(Mt. 8:5-13)*

<sup>1</sup> Tá nandihí ñacahan Jesús xihín ñayivi cán já ñaquee a cuahan chí Capernaum. <sup>2</sup> Mé ñuu Capernaum cán nasahin in dataa, da sáhdá chuun nuú soldado ñaquixi ñuu Roma. Mé da yóho nasahin in mozo da ta quíhvi ndivaha ini da mozo da. Joo ndaja coo mé mozo da yóho quíhvi ndeé da ta janda ja chá quivi da. <sup>3</sup> Tá ñaxini johó da sáhdá chuun nuú soldado yóho sahá Jesús já ñachindahá da java na sacuaha táhan na ñaquixi chíchi Israel já ná cacá na ñamani nuú Jesús quixi a ndaja vaha mozo da cán.

<sup>4</sup> Tá naxinu na cán nuú Jesús nacasáhá xíca tahví ndivaha na nu á já cáchí na já xihín á:

—Íin sahá da sáhndá chuun nuú soldado yóho ña ná chindeé ndó da. <sup>5</sup> Jáchi quíhvi ini da tóco ndihi ñayivi ndúu nación Israel ta sa mé da jan cúu da nasahnda chuun ña ná cavaha na veñuhu nde —nacachi na cán xihín Jesús.

<sup>6</sup> Anda já naquee Jesús cuahan xihín ná. Joo tá sa jalóho xinu coo na vehe da sáhndá chuun nuú soldado cán já nachindahá da java amigo da nuú Jesús ná cahan na yuhú nu da já nacachi na já:

—A jándihi ndó mé ndó ndihvi ndó vehe e, xitoho i jáchi coo saha toho i ña ná ndihvi ndó vehe e. <sup>7</sup> Sahá ña cán quéa coo nasahan ndeé ini i cuhun i ndinducú u mé ndó. Joo janda nu íin ndó jan cahnda ndó chuun ña ná ndivaha mozo i já ndivaha da. <sup>8</sup> Jáchi ndúu java na náhnu chága sáhndá chuun nuú i. Ta ndúu ri soldado sáhndá ri yehe va chuun nuu. Ta tá chindahá i in da ña ná cuhun da nu cuni mí i cuhun da ta cuahan da. Ta tá sáhndá i chuun nuú inga da ña ná quixi da nuú i ta vaxi da nuú i. Ta tá sáhndá i chuun nu mozo i ña ná caja da ña sáhndá i ta caja da ña —nacachi na.

<sup>9</sup> Tá naxini johó Jesús tóco ndihi ña nacahan amigo da sáhndá chuun nuú soldado cán xihín á já nacatontó a xihín dataa cán. Anda já nasandehé a nu tóco ndihi ñayivi ndíco cuahan cán já nacachi a já xihín ná:

—Mé a ndaa ná cahan i xihín ndo ña a náha cuni i tañu na Israel in da cándéé cáhnu nahá ini Ndióxi tá quiahva cándéé cáhnu ini da yóho Ndióxi —nacachi Jesús xihín na ndíco jatá cán.

<sup>10</sup> Ta tá nandíco coo na cúu mozo da sáhndá chuun nuú soldado cán vehe da já naxini na ña sa nandivaha va da nasaquíhvi cán.

### *Tá najánditacu Jesús jahyi in ña cuáan*

<sup>11</sup> Tá sa nayaha ña yóho já naquee Jesús cuahan chí in ñuu naní Naín xihín na xíca tuun xihín á. Ta a juú quiahva cuahá ñayivi ndíco cuahan. <sup>12</sup> Tá naxinu coo a yati yuhú ñuu cán já naxini a ñayivi ñéhe na in ndii cuahan na jánduxu na. Mé ndii cán nasacuu da in túhún já nu náná da, ña cúu

ñá cuáan. Ta a juú quiahva cuahá ñayivi ñuu cán ndáca táhan xihín ña cuahan na jánduxu na jahyi ña. <sup>13</sup> Tá naxini Jesús ña já natahvi ini a saha ña. Anda já nacachi a já xihín ña:

—A cuácu gaun.

<sup>14</sup> Anda já nacayati Jesús nuú sató ndii cán já nacani ndaa ndáha á do. Anda já nasacuita na ndójo sató ndii cán. Ta nacahan Jesús xihín da cúu ndii cán já nacachi a já xihín dá:

—Yehe cahan i xuhun, da tacú, cuándacoo —nacachi Jesús xihín dá.

<sup>15</sup> Anda já nasacoo da nasacuu ndii cán ta nacasáhá da cahan da. Já nandiquiahva Jesús da nu náná da. <sup>16</sup> Tá naxini tóco ndihi ñayivi cuahan cán ña nacaja Jesús já yíhvi na. Ta nacasáhá na cája cáhnu na Ndióxi já cáchí na já:

—In profeta cáhnu ndivaha cúu da naxinu coo tañu mí yóho viti.

Ta nacachi tucu na:

—Ndióxi quéa naxinu coo nu yo ña ná chindeé a ñayivi cuéntá mé á —nacachi na.

<sup>17</sup> Ta níi cúu ñayivi cuéntá estado Judea xihín na ndúu yati cán nacandaa ini na saha ña nacaja Jesús cán.

### *Juan, da jácandúta ñayivi, nachindahá da java da xíca xihín dá nu Jesús*

*(Mt. 11:2-19)*

<sup>18</sup> Ta ndaja coo nañehe Juan, da jácandúta ñayivi, tuhun saha tóco ndihi ña nacaja Jesús yóho jáchi nandicani na xíca xihín Juan ña nu dá. Sahá ña cán quéa nacana da ivi táhan da xíca xihín da <sup>19</sup> já nachindahá da na nu Jesús ña ná ndaca tuhún na mé á á jivi ndusa cúu á Cristo, mé a chindahá Ndióxi cacomí cuéntá saha ñayivi, á ndítahan candati na inga ga quixi. <sup>20</sup> Tá naxinu na xíca xihín Juan nu íin Jesús já nacachi na já xihín á:

—Da naní Juan, da xíca jácandúta ñayivi, da cán cúu da nachindahá ndehe vaxi nde ndaca tuhún nde ndohó á cúu ndó Cristo, ña chindahá Ndióxi cacomí cuéntá saha ñayivi, á ndítahan candati nde inga ga —nacachi na cán xihín Jesús.

<sup>21</sup> Mé hora naxinu coo na cán nu íin Jesús já naxini na nandaja vaha Jesús cuahá ñayivi quíhvi, na nasandoho tá nuú cuehe.

Ta natavá a ínima quini nasañuhu ínima java na. Ta cuahá ndivaha na cuahá nandinuna nuu nacaja Jesús. <sup>22</sup> Sahá ña cán quéa tá nanducú ñehe Jesús tuhun nuú na xíca xihín Juan cán já nacachi a já xihín ná:

—Cuáhán ndó ndicani ndó nu Juan saha tóco ndihi ña naxini ndó cája i xihín tóco ndihi ña naxini johó ndó cáhan i. Ta ndicani ndó nu dá ña ndínuna nuú na cuahá ta ndícaca na réncó cája i. Ta ndája vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. <sup>23</sup> Tahví nacuu na co jándacoo ña cándeé ini na yehe —nacachi Jesús xihín ná.

<sup>24</sup> Tá naquee na nachindahá Juan cán cuahan na já nacasahá Jesús cáhan saha Juan nuú ñayivi cán já cáchi a já xihín ná:

—Ndía nacahán ndó cuni ndó tá naqueta ndó nasahan ndó sándehe ndó Juan yucú íchí cán. A juú da cán cúu ta láhá já quíji nuu da tátuhun quíji nuu in tíyoó cája tachí.

<sup>25</sup> Ndía naqueta ndó candehé ndó. A juú da cán cúu ta ndíxi jahmá lándá ndivaha. Sa xíni vaha ndó ña co ndúu toho da ndíxi jahmá lándá yucú íchí. Ndá da ndíxi jahmá lándá ta cája da ña cuni yiquí cuñu da, mé da cán cúu da ndúu vehe rey cuití va.

<sup>26</sup> Ndía nasahan ndó naxini ndó cán. A coo nasahan ndó cuni johó ndó nu cáhan in da cúu profeta nu ndó. Mé a ndaa da cán cúu dá in profeta ta ín chága saha dá a juú ga inga profeta nasanduu sanahá. <sup>27</sup> Jáchi mé Juan cúu dá da cáhan tuhun Ndióxi saha tá cáchi a já:

Chindahá i in da canuú cuhun nu mún, já ná caja tiahva da íchí nuú quisún, já nacahyi a sanahá.

<sup>28</sup> Candehé ndó ná cahan i xihín ndó. Tañu tóco ndihi ñayivi coo ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuénta saha ná, vatí cúu ná na coo saha, na cán cúu na cáhnu chága a juú ga Juan —nacachi Jesús.

<sup>29</sup> Tá naxini johó tóco ndihi ñayivi ndúu cán ña yóho já nandicuni na ña cája ndaa Ndióxi tóco ndihi ñaha. Na nacahán já cúu na najácandúta Juan ta tañu na cán nasañuhu java ri na játaca jjuhún cuénta

impuesto. <sup>30</sup> Joo na fariseo xihín na jánaha ley Moisés, na coo najácandúta Juan cán, na cán cúu na naqueehe núu na tóco ndihi ñamaní cuni Ndióxi caja xihín ná. <sup>31</sup> Anda já nacachi Jesús já xihín ná:

—Ná cahan i xihín ndó ndaja ín ñayivi ndúu tiempo viti. <sup>32</sup> Cúu ná tátuhun na valí sácoo sájiquí nuú yahvi ta cáyuhú na nuú java ga na valí ndúu cán já cáchi na já: “Nativí nde tótíví nu ndo joo coo naxeen ndó cata sahá ndó. Ta naxita cuéha ndivaha nde nu ndo ta ni coo nasacu ndó.”

<sup>33</sup> Quiahva já ín ñayivi ndúu tiempo viti jáchi naquixi Juan, da jácandúta ñayivi ta naxijuhun da ta coo naxihi da vino joo nacachi ndó saha dá ña ndácaan ínima quini ini da. <sup>34</sup> Ta tá naxinu yehe, da nachindahá Ndióxi nduu ñayivi ta xíxi i pan ta xíxi i vino já nacasahá cáchi ndo sahá i ña cúu u in ta ndehé ndivaha ta xíxi ndivaha i. Ta cáchi ndo ña cátoó ndivaha i cacuu u amigo na cája cuachi xihín na játaca jjuhún cuénta impuesto. <sup>35</sup> Joo na cuni cándaá ini ña ndaa, na cán cúu na cándaá ini ña cája Juan xihín yehe ña ndaa —nacachi Jesús xihín na cán.

### *Ín Jesús vehe Simón, da cúu fariseo*

<sup>36</sup> In táhan da fariseo nacana da Jesús ña ná cuhun a cuxu a vehe da. Anda já nasahan Jesús vehe da já nasacoo a nu mesa. <sup>37</sup> Joo ndaja coo in ñañáha, mé ña ñuu cán tá nañehe ña tuhun ña naxinu Jesús vehe Simón cán cuxu a já naxinu ña xihín in yúyú alabastro, ña nachutú ndaa xihín sítí támi sahan nacasaá ña nu Jesús. Mé ñañáha yóho cúu ña in ña cája cuahá cuachi. <sup>38</sup> Ta sácu ña nacaxítí ña saha Jesús ta xihín ticuú nuu ña najácuchu ña sahá. Ta tá nandihí já najáhichí ña do xihín ijí jini ña. Anda já natatí yúhu ña sahá. Ta nachojó ña sítí támi sahan cán jatá saha á. <sup>39</sup> Tá naxini mé da fariseo, da nacana Jesús vehe da cán ña yóho já nacahán da já: “Tá profeta ndusa ná cacuu da yóho ta sa cándaá va ini da ndá ña cúu ña cáni ndaa ndáha saha dá jáchi cúu ña ña cája cuahá cuachi”, nacahán Simón cán.

<sup>40</sup> Anda já nacachi Jesús já xihín da fariseo cán:

—Candehé Simón, cuni johó ná cahan i xuhun —nacachi Jesús xihin dá.

Anda já nacachi Simón cán já xihin Jesús:

—Cahan mé á xihin i, xitoho i —nacachi da.

<sup>41</sup> Anda já nasacu Jesús in quiahva nu dá já nacachi a já xihin dá:

—Nasanduu ivi dataa ta nasayicá da jiuhún nu mé da sahan too a cán. In da nasayicá uhun ciento ta inga da nasayicá ivi jico uxu. <sup>42</sup> Ta ni in da cán co ndéé da chahvi da ña yicá da sahá ña cán quea nacaja cáhnu ini da sahan too jiuhún cán sahá ña yicá ndívi da cán. Ta viti cachún xihin i, Simón, ndá da cáhún tixi ndívi da yóho cacuu da da quihvi ini chága mé da, da nacaja cáhnu ini saha cuéntá ña nasayicá da cán —nacachi Jesús xihin Simón.

<sup>43</sup> Anda já nanducú ñehe Simón cán tuhun nu Jesús já nacachi da já xihin á:

—Cája i cuéntá ña quihvi ini chága da nasayicá cuahá jiuhún cán nu dá —nacachi da.

Anda já nacachi Jesús já xihin Simón:

—Mé a ndaa cáhún —nacachi a.

<sup>44</sup> Anda já nasandehé Jesús ña nachojo síti sahá cán já nacachi a já xihin Simón:

—Candehé vaha ñañaha jan, Simón. Naquihvi i vehún joo coo nasahún ticuú ndoo sahá i. Joo ñañaha yóho najácuchu ña sahá i xihin ticuú nu ña. Ta tá nandihí já najáhichí ña sahá i xihin ijí jiní ña.

<sup>45</sup> Ta yóho, coo natatí yuhún sajóho yehe tá nasaa i vehún. Joo ña yóho, janda nani naquihvi ña vehún tátí yuhu ña sahá i. Ta anda viti ñuhú cája ña a. <sup>46</sup> Ta ni coo nachojó tohún síti jiní i tá naxinu i vehún. Joo ña yóho nachojó ña síti támi sahan sahá i. <sup>47</sup> Ta cáhí i xuhun, Simón, ña xihin ña cája ña yóho nahá ña mé a ndaa quihvi ini ña yehe jáchi nacaja cáhnu ini i sahá cuachi ña vatí cuahá ndivaha cúu á. Joo ndá na cáhán ña chá cuití va cuachi cája cáhnu ini i saha, na cán cúu ri na chá cuití quihvi ini na yehe —nacachi Jesús xihin Simón.

<sup>48</sup> Anda já nacasáhá cáhí a já xihin ñañaha cán:

—Sa nacaja cáhnu ini i sahá cuachún viti.

<sup>49</sup> Ta tóco ndihí java ga na nataca ndúu coo nu mesa vehe Simón cán nacasáhá cáhí xihin táhan na já:

—Ndá ta cúu da yóho jáchi janda cuachi cája ñayivi cája cáhnu ini da saha —nacachi xihin táhan na cán.

<sup>50</sup> Anda já nacachi Jesús já xihin ñañaha cán:

—Nacacu ndaa ínimun jáchi nacandéé inún yehe. Cuanúhu ta a ndícani ga inún viti —nacachi Jesús xihin ña.

## 8

### *Tá java najihí chindeé na Jesús*

<sup>1</sup> Tá nandihí nayaha ña yóho já nacasáhá Jesús xica nuu a cuahá ñuu náhnu xihin ñuu válí ña caxi tuhun a xihin ná ña sa nacayati quiví cacomí Ndióxi cuéntá saha ná. Ta ndíco ndíhuxu ivi na apóstol cán mé á. <sup>2</sup> Ta nasandaca táhan java ri najihí xihin á, na natavá mé á ínimá quini ini xihin na nandaja vaha mé á nuú cuhe nasandoho na. Tañu najihí yóho nasandacaan ña naní María, ña cahan na Magdalena xihin. Mé María yóho cúu ña natavá Jesús usa ínimá quini ini. <sup>3</sup> Ta catáhan ri in ña naní Juana cuahan ña xihin na cán. Mé Juana cúu ña ñájihí da naní Chuza, da cómi cuéntá sahá vehe Herodes. Ta jári in ña naní Susana naxica nuu ña xihin Jesús. Cuaha chága najihí naxica nuu na xihin á ta nachindeé ñahá na xihin ña cómi na.

### *Sácú Jesús quiahva sahá in da sátá tata*

(Mt. 13:1-17; Mr. 4:1-12)

<sup>4</sup> Naqueta ñayivi cuahá ñuu jáchi cúní na cuni na Jesús. Ta tá sa nataca cuahá ñayivi nu in Jesús, nacasáhá cahan xihin ná. Ta nasacu a in quiahva nu ná já nacachi a já xihin ná:

<sup>5</sup> —In da sátá tata naquee da cuahan da cata da ña. Ta tá sátá da ña cuahan da já nacuyu java ña íchi. Ta tá nayaha ñayivi já nachiníhni saha johó na a ta já naxinu laa nasaxí rí ña. <sup>6</sup> Ta java tata cán nacuyu a tañu yuu. Ta tá nanduta mé tata cán, cama chá nahichí a jáchi íchí ndivaha tañu yuu cán. <sup>7</sup> Ta java ga tata cán nacuyu a tañu tohíñú ta tá nanduta ña já nanditáha ndihí a nacaja tohíñú, dó nasahnu xihin á cán.

<sup>8</sup> Joo java tata nacuyu a nu ñuhú vaha. Ta tá nasahnu a já najáquee na cuahá ñaha nu á. Janda in ciento tata nacana jatá in in nuú tata cán —nacachi Jesús xihin ná.

Ta tá nandihí nandicaní Jesús ña yóho nu ná já nacahan cóhó a nu ná já nacachi a já xihín ná:

—Ndá ndó, na ín johó, ná cuni johó ndó —nacachi Jesús xihín na cán.

<sup>9</sup> Anda já nacasahá na xíca tuun xihín á cán ndáca tuhún na mé á ndía cúní cachi quiahva nacachi a xihín ñayivi cán. <sup>10</sup> Ta nanducú ñehe Jesús tuhun nu ná já nacachi a já xihín ná:

—Ña coó nacandaa ini ndó jihna, ña cán cándaa ini ndó viti jáchí nasuná Ndióxi xíní túní ndó candaa ini ndó ndá quiahva cacomí mé á cuéntá sahá ñayivi. Joo sácú u quiahva nuú java ga ñayivi já quéa vatí sándehé na joo cúu ná tátuhun na co tívi nuu. Ta vatí xíní johó na, cúu ná tátuhun na johó jáchí co cándaa ini na ña cáhan í xihín ná —nacachi Jesús xihín na xíca tuun xihín á cán.

*Ndicani Jesús ña cúní cachi quiahva nasacu a nuú na cán*

*(Mt. 13:18-23; Mr. 4:13-20)*

<sup>11</sup> Anda já nacachi Jesús já xihín ná:

—Ña yóho cúní cachi quiahva nasacu u nuú ñayivi yóho: Mé tata cán cúu á yuhú nuú tuhun Ndióxi, ña xíca java na cáhan na xihín ñayivi. <sup>12</sup> Mé tata ña nandicava íchí cán náha nu yo ndá quiahva ín java ñayivi. Xíní johó na tuhun Ndióxi joo tá nandihí já vaxi tiñáhá sacuahá ta cája rí xihín ná ña ndíndójó na ña já ná a cándúsa na tuhun Ndióxi ña ná a cácu ndaa ínima ná. <sup>13</sup> Ta tata ña nandicava tañu yuu cán náha nu yo ña ndúu java ñayivi ta xíní johó na tuhun Ndióxi ta cájii íní na ndíquehe na ña. Joo sahá ña co ñehe íní yóho á cuhun cúná a sahá ña cán quéa chá tiempo cuití va cándúsa na tuhun Ndióxi. Jáchí tá cásahá ndóho ini na sahá tuhun Ndióxi chí jándacoo va na ña. <sup>14</sup> Ta tata ña nandicava tañu tohíñú cán náha nu yo ña ndúu java ñayivi ta xíní johó na tuhun Ndióxi joo co jándacoo na íchí naxíca na jihna. Ta cásahá ndícani ini na sahá ñaha ñuyíví yóho ta cásahá na catóo na canduu cuahá ñaha cuíca nu ná ta cásahá ndicají ini na caja na ña núu. Sahá ña cán quéa cúu á tátuhun tata ña co cána ñaha jáquee na nuu jáchí coó nasahnu na xihín tuhun Ndióxi. <sup>15</sup> Joo tata

ña nandicava nu ñuhú vaha cán náha nu yo ña ndúu java ñayivi ta xíní johó na tuhun Ndióxi xihín ndinuhu ini na ta cája na ña sáhndá a nu ná. Ta sahá ña ndíco cáhnu na Ndióxi ta co jándacoo na mé á sahá ña cán quéa cúu ná tátuhun tata nasahan cuahá ñaha ña cuu jáquee na nuu jáchí sáhnu na xihín tuhun Ndióxi —nacachi Jesús ndícani a nuú na xíca tuun xihín á cán.

*Sácú Jesús in quiahva sahá in lámpara*

*(Mr. 4:21-25)*

<sup>16</sup> Ni in tuhún toho ñayivi co ndícahmi na in lámpara ta anda já chíhavi na jatá xihín in ñaha. Ta ni co chícaan jehé na ña tíxi xito. Ña cája na quéa chínúu jícó na ña já ná yehe a nuú na quíhvi ini vehe cán. <sup>17</sup> Ni in tuhún toho ñaha a cuú coo jehé nahá jáchí xínu quívi já ndáca náha nu á. Ta ni in tuhun nacahan jehé ñayivi a cuú coo jehé nahá jáchí xínu quívi já candaa ini tóco ndihí ñayivi sahá tuhun nasahín jehé cán.

<sup>18</sup> Sahá ña cán quéa ndítahan coo johó vaha ndó nu cáhan í xihín ndo. Jáchí da ín ñaha nuu, ñehe táhvi dá coo chága ñaha nu dá joo da coó ñaha nuu, janda ña lohó ín nu dá ndindaa —nacachi Jesús.

*Tá naxínu coo náná Jesús xihín ñani a nu ín a*

*(Mt. 12:46-50; Mr. 3:31-35)*

<sup>19</sup> Anda já naxínu coo náná Jesús xihín ñani a mé nu ín a cán. Joo coó nacuu cayatí na nu á jáchí a juú quiahva nachutú ñayivi ndúu na xihín á cán. <sup>20</sup> Anda já nasahan in da caxi tuhun da xihín Jesús já cáchí da já xihín á:

—Jata véhe cáa ín nánún xihín ñanún ta cahan na xuhun cúní na —nacachi da cán xihín Jesús.

<sup>21</sup> Anda já nacachi Jesús xihín tóco ndihí ñayivi ndúu cán já:

—Ndá na xíní johó tuhun Ndióxi ta cája na ña cáchí a, na cán cúu ná tátuhun náná í xihín ñani í —nacachi Jesús xihín ná.

*Tá najacatáji Jesús tachí xihín tañuhú tá ndícojo do*

*(Mt. 8:23-27; Mr. 4:35-41)*

<sup>22</sup> In quívi naquíhvi Jesús ini in barco xihín na xíca tuun xihín á. Ta já nacachi a já xihín ná:

—Cóho inga xoo tañuhú yóho.

Anda já naquee na cuahan na. <sup>23</sup> Ta nani xójo cava na tañuhú cán cuahan na já nanaá ini Jesús naquiji á. Ta in náá cuití naxinu in tachi quini ndivaha nuú tañuhú cán ta nacasáhá ndíndita dó ta jáchutú do ini barco cán. Ta chí iyo ndivaha cáa jáchi cuu cacoo barco cahá ticuú. <sup>24</sup> Anda já nasahan na ndíñehe na Jesús já nacachi na já xihin á:

—Maestro, Maestro. Cácoo barco yo cahá ticuú cuahan do —nacachi na xihin á.

Anda já nandicoo Jesús já nacasáhá jánani a tachi xihin ticuú ndícojo cán. Tá nandihí já najáyaá mé á tachi xihin ticuú chí táji ní uun nacandoo nuú tañuhú cán. <sup>25</sup> Anda já nacachi Jesús já xihin na xica tuun xihin á:

—Ndaja vaha co cándeé ini ndó yehe —nacachi a.

Joo na cán nayihví na ta nacatontó na. Ta chí jandá ndaca tuhún táhan na já cáchi na já:

—Ndá da cúu dataa yóho ña anda tachi xihin tañuhú cándusa nu cáhan da —nacachi xihin táhan na cán.

*Tá natava Jesús ínimá quini nasañuhu ini in dataa ñuu Gadara*

(Mt. 8:28-34; Mr. 5:1-20)

<sup>26</sup> Tá nandihí já cuahan na ta naxinu coo na ñundáhyi cuéntá Gadara, ña cándoo inga xoo tañuhú ta ndícoto nihni táhan xihin estado Galilea. <sup>27</sup> Tá nanuu Jesús barco cán já nacayati in dataa, da ñuu Gadara cán nu á. Mé da yóho sa nacanahá ndivaha ñuhu ínimá quini ini da. Ta já cáa vichí láhlá da xica nuu da. Ta ni co íin da vehe. Tañu nu jánduxu na ndii cán va íin tuun da. <sup>28</sup> Tá naxini da Jesús nandicava xítí da nu á ta já nacayuhú da já nacachi da já xihin á:

—Ndá cuéntá quea vasún quihvi nuún xihin i. Yóhó cúun Jesús, da cúu in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i.

<sup>29</sup> Nacachi da ña yóho xihin Jesús jáchi nacasáhá sáhdá mé á chuun nu ínimá quini cán ña ná quee rí ínimá da cán. Ta cuahá tañu nasatiin rí da. Ta vatí nacató na ndáha dá xihin saha dá xihin cadena joo nasahnda túhún dá ña nacaja rí quini cán. Ta já nacaja rí ña ná cunu da cuhun da chí

yucú íchí nuú co ndúu ñayivi. <sup>30</sup> Nandaca tuhún Jesús mé rí quini cán já nacachi a já xihin ri:

—Ndaja nanún.

Anda já nanducú ñehe da cán tuhun nu á já nacachi da já xihin á:

—Legión naní i.

Nacachi da cán ña naní da Legión jáchi cuahá ndivaha rí quini nandihvi rí ini da. <sup>31</sup> Ta mé rí quini ñuhu ini da cán naxica tahví rí nu Jesús ña ná a chindahá a rí cuhun rí nu ndúu ínimá ndii. <sup>32</sup> Ta yati in ndica yucu cán nasanduu cuahá ndivaha cóchí xixáhan rí. Saha ña cán quea naxica rí quini cán ñamaní nu Jesús ña ná ndihvi rí ini cóchí ndúu cán. Anda já nasahan Jesús ñamaní nu ri. <sup>33</sup> Chí naquee rí quini dataa cán cuahan rí já nandihvi rí ini cóchí cán. Ta tóco ndihí cóchí yóho xínu rí cuahan rí nanuu rí nu ndáyi já najáqueta nuu rí mé rí ini tañuhú cán ta já nacandaa rí ticuú já naxihí ri.

<sup>34</sup> Tá naxini mé dataa ndáa cóchí cán ña yóho já naxinu da cuahan da caxi tuhún da ña nayaha yóho nuú ñayivi ñuu Gadara cán xihin nuú java ga na ndúu yati cán.

<sup>35</sup> Anda já naqueta ñayivi sándehe na ña nacuu cán. Ta tá naxinu coo na nu íin Jesús cán já naxini na íin coo mé da nasañuhu rí quini ini cán saha Jesús. Ta sa nandaca ndixi da jáhma ta chí sa nandicaxí táhyí ini da. Tá naxini na ña yóho chí nayihví na.

<sup>36</sup> Ta na naxini nuú natavá Jesús rí quini ini dataa cán, na cán cúu na nandicani ña nuú na coo naxini cán. <sup>37</sup> Tá naxini johó na ñuu Gadara cán ndaja nasahjin já naxica tahví ndihí na nu Jesús ña ná quee a cuhun a jáchi yihví ndivaha na. Saha ña cán quea nandihvi tucu Jesús ini barco cán ña ná quee a cuhun a. <sup>38</sup> Joo tá cámaní quee a cuhun a já nacasáhá da naqueta rí quini ini cán xica tahví da nu Jesús ña ná quiahva mé á ñamaní cuhun da xihin á. Joo nasahnda Jesús chuun nu dá ña ná candoo da. Já nacachi a já xihin dá:

<sup>39</sup> —Cuanúhu vehún. Ta já ndicanún nuú na vehún ndaja náhnu ñaha nacaja Ndióxi xuhun —nacachi Jesús xihin da cán.

Anda já naquee da cán cuahan da. Já nandicani da nu tóco ndihi na Gadara cán ndaja cáa ña ñacaja Jesús xihín dá.

*Tá nandaja vaha Jesús jahyi jhí Jairo xihín in ña ñacani ndaa ndáha jáhma á*

*(Mt. 9:18-26; Mr. 5:21-43)*

<sup>40</sup> Tá nandicó coo Jesús inga xoo tañuhu cán, a juú quiahva cávatá ñayivi naxinu na ndiquehe na mé á jáchi mé cán nasanduu na ndáti na mé á. <sup>41</sup> Anda já ñacasaá in dataa naní Jairo, da sáhdá chuun veñuhu. Mé Jairo yóho naxinu da ñacaxítí da saha Jesús já naxica tahví da nu á ña ná cuhun a vehe da. <sup>42</sup> Jáchi xihí ña loho cúu jahyi jhí da ta in já cúu ña nu dá ta ndacaan ña tátuhun uxu ivi cuia. Chí naquee Jesús cuahan ta nani xíca cuahan vehe Jairo cán a juú quiahva cuahá ñayivi ndíco na jatá cuahan na ta chí janda cándíhi na mé á cuahan na.

<sup>43</sup> Ta tañu ñayivi cuahan cán ndacaan in ñañáha ta ndítahví nii ña tixi uxu ivi cuia. Ta najándihi ndihi ña jjuhún ña nuú na cája tátá ñayivi joo ni in na coo ñacuu caja tátá ñahá. <sup>44</sup> Joo ñacayati ña chí jata Jesús ta natiin ña yúhu jáhma á. Chí ivi laá nasacuiin nii ña cán.

<sup>45</sup> Anda já ñacasáhá Jesús ndáca tuhún a tóco ndihi ñayivi já ñacachi a já xihín ná:

—Ndá ndó ñacani ndaa ndáha yehe — ñacachi a xihín ná.

Joo ni in na coo nasahan tuhun nu á. Sahá ña cán queá ñacachi Pedro xihín java ga da xíca tuun xihín mé á cán já xihín á:

—Maestro, a juú quiahva cándíhi ñayivi mé ndó ta chindahá nihni joho na mé ndó vaxi na ta cáa ga mé ndó ndáca tuhún ndo ndá na ñacani ndaa ndáha ndohó — ñacachi da cán xihín á.

<sup>46</sup> Anda já ñacachi Jesús já:

—Íin in na ñacani ndaa ndáha yehe jáchi ñacandaá ini i ña nandivaha in na xihín ndée mí i — ñacachi Jesús.

<sup>47</sup> Joo ndaja coo mé ña nandivaha cán tá naxini ña ña ñacandaá ini Jesús sahá ña ñacaja ña já nandiquiji ninu ña xihín ña yíhví ña ta já naxinu coo ña ñacaxítí ña nu Jesús. Ta nu ndíhi ñayivi ndúu cán ñacasáhá ña ndícani ña nu á ndá cuéntá queá ñacani ndaa ndáha ña mé á chí ivi laá

nandivaha ña. <sup>48</sup> Anda já ñacachi Jesús já xihín ña:

—Jahyi a, nandivahún jáchi ñacandúsún yehe. Cuanúhu. Ta a ndícani ga inún — ñacachi Jesús xihín ña.

<sup>49</sup> Ta nani cáhan Jesús xihín ña cán já naxinu in da ñaquixi chí vehe Jairo, da sáhdá chuun veñuhu cán. Já ñacachi da cán já xihín dá:

—Sa naxihí va jahyi ndó. A jáquihvi ga ndó da xíca jánaha ñayivi jan.

<sup>50</sup> Joo tá naxini joho Jesús ña ñacachi da cán já ñacachi a já xihín Jairo:

—A cáyihví tohún. Candúsa cuití vún yehe chí ndivaha va jahyún — ñacachi Jesús xihín dá.

<sup>51</sup> Tá naxinu coo Jesús vehe Jairo cán coo naxeen a quiahva ñamaní ña ná quihvi ñayivi ini vehe cán xihín á. Na ñaquihvi xihín á nasacuu Pedro xihín Jacobo xihín Juan xihín tátá mé ña loho cán xihín náná ña. <sup>52</sup> Jandá joho ndíváá ñayivi sácu ndivaha na ndúu na saha ña loho cán. Anda já nandicahan Jesús xihín ná já ñacachi a já:

—A cuácu ndó. Coó naxihí toho ña loho yóho. Quiji cuití va ña — ñacachi a xihín ná.

<sup>53</sup> Joo ñacasáhá na cán sácu ndaa na Jesús jáchi xini na ña sa naxihí ña loho cán ta sa cúu ña ndíi. <sup>54</sup> Anda já natiin Jesús ndáha ña naxihí cán já ñacahan cóho a xihín ña já ñacachi a já:

—Ña loho, cuándacoo.

<sup>55</sup> Chí ivi laá nanditacu ña loho cán já nandicoo ña. Ta nasahnda Jesús chuun ña ná quiahva na ña cuxu ña. <sup>56</sup> Chí a juú quiahva ñacatóntó tátá náná ña loho cán sahá ña ñacaja Jesús. Joo nasahnda Jesús chuun nu ná ña ná a ndícani na nuú ni in ñayivi sahá ña nayaha.

## 9

*Tá nachindahá Jesús ndíhuxu ivi na xíca tuun xihín á ña ná cuhun na caxi tuhun na tuhun Ndióxi nuú ñayivi*

*(Mt. 10:5-15; Mr. 6:7-13)*

<sup>1</sup> Najánditaca Jesús ndíhuxu ivi na xíca tuun xihín á já nasahan ndée nu ná ña ná cuu tavá na tá nuú ínima quini ñúhu ini ñayivi ta nasahan ndée mé á nu ná ña ná



cuu ndaja vaha na tá nuú cuehe ndóho ñayivi. <sup>2</sup> Nasahnda Jesús chuun nu ná ña ná caxi tuhun na xihín ñayivi ña sa ñacayati quiví cacomí Ndióxi cuéntá saha ná. Ta nasahnda chuun nu ná ña ná ndaja vaha na na quíhvi. <sup>3</sup> Ta ñacachi a já xihín ná:

—A cáñehe ndó ñaha cuhun ndó íchi. Ni garróté ni yátí ni pan ni jiuhún a cáñehe ndó cuhun ndó. In túhún cotó cáñehe ndó cuhun xihín ndó. <sup>4</sup> Tá ná xinu coo ndó in vehe, canduu ndó vehe jan janda quiahva ná ndindaa quiví quee ndó cuhun ndó. <sup>5</sup> Ta ndá ñuu nuú coo cúní na ndiquehe vaha na ndohó, cuáhán quee ndó ñuu jan ta catí ndó ña yácá saha ndó já ná ñaha ña cuahan cuachi na cán jata mé va na —ñacachi Jesús xihín ná.

<sup>6</sup> Anda já ñaquee na cán cuahan na ta nasahan na naxica nuu na ndijáá ñuu válí. Xíca na cáxi tuhun na nuú ñayivi tuhun vaha cahan saha Jesús, mé a cuu jácacu ñahá. Ta ndája vaha na na quíhvi.

*Tá naxihi Juan, da ñacaja ndúta ñayivi*  
(Mt. 14:1-12; Mr. 6:14-29)

<sup>7</sup> Ta ndaja coo Herodes, da cúu gobernador cán ñacandaá ini da saha tóco ndihi ña cája Jesús. Ta chí coo xíní da ndíá cahán da jáchi java na cáchí na xihín dá ña cúu Jesús mé Juan, da najácandúta ñayivi ta viti ñanditacu tucu da cáchí java na xihín dá. <sup>8</sup> Ta java ri na cáchí na ña cúu Jesús profeta Elías, mé da naxica nuu sanahá ta viti naxinu tucu da nu ná. Ta java na cáchí na ña cúu á in táhan na profeta nasanduu sanahá joo túní queá ñanditacu tucu a xíca nuu a, cáchí na. <sup>9</sup> Anda já ñacachi Herodes já xihín ná:

—Mí yehe cúu da nasahnda chuun ña ná chituhun ná jico da naní Juan cán. Ta coo xíní ndá da cúu da naní Jesús yóho. Jáchi mé a ndaa xíní johó i ña cája cuahá ndivaha da ña náhnu —ñacachi Herodes cán.

Ta chí cúní Herodes cuni da Jesús.

*Sáhan Jesús ña cuxu uhun mil taa*  
(Mt. 14:13-21; Mr. 6:30-44; Jn. 6:1-14)

<sup>10</sup> Tá ñandicó coo na ñachindahá Jesús caca nuu cahan tuhun Ndióxi xihín ñayivi cán nu ín mé á já ñandicani na nu á saha tóco ndihi ña ñacaja na nuú nasahan na. Anda já ñehe Jesús na nasahan na in nu

cáa xóo yati chí ñuu Betsaida cán. <sup>11</sup> Joo tá ñacandaá ini ñayivi ndá xoo cuahan Jesús já ndíco na cuahan na. Ta ñandiquehe vaha Jesús na ta ñandicani a nu ná ña sa ñacayati quiví cacomí Ndióxi cuéntá saha ná. Ta ñandaja vaha mé á na quíhvi.

<sup>12</sup> Ta tá sa cáhini cuahan já ñacayati ndíhuxu ivi na apóstol cán nu Jesús já ñacachi na já xihín á:

—Cahan ndó xihín ñayivi ná quee na cuhun na ndiquehe ndée ná ta ná nducú na ña cuxu na ñuu válí xihín nuú yati chá yóho nu ndúu ñayivi jáchi coo ñaha mé va nu ndúu yóho —ñacachi na cán xihín Jesús.

<sup>13</sup> Anda já ñacachi Jesús já xihín ná:

—Mé ndó quiahva ndó ná cuxu na —ñacachi a xihín ná.

Anda já ñacachi na cán já xihín á:

—Uhun víxí pan xihín ivi laá tiyacá cuití va ín nuú nde. Ta ama ná cuhun ri ndehe cueen nde ñaha cuxu tóco ndihi ñayivi ndúu yóho —ñacachi na cán.

<sup>14</sup> Jáchi ñayivi cán cúu ná tátuhun uhun mil taa. Anda já ñacachi tucu Jesús já xihín na xíca tuun xihín á:

—Cacu coo ndó na tá táhnda ivi jico uxu, ivi jico uxu na.

<sup>15</sup> Chí nasacu coo ndíhuxu ivi na apóstol cán na. <sup>16</sup> Anda já ñatiin Jesús ndíhuhun pan xihín ndíví tiyacá cán já nasandehé a chí indiví já ñandiquiahva ndixahvi nu Ndióxi sahá ña cán. Tá ñandihí já nasahnda java táhvi a ña já nasahan ña nuú na xíca tuun xihín á cán já ñanditahnda ña cuxu ñayivi ndúu cán. <sup>17</sup> Ta tóco ndihi na ñañehé naxixi janda quiahva ñachutú tixi na. Tá ñandihí já najáchutú na uxu ivi toyicá xihín ña ñacandoo naxixi ndihi na cán.

*Tá náhma Pedro ña cúu Jesús mé a ñachindahá Ndióxi cacomí cuéntá sahá ñayivi*

(Mt. 16:13-28; Mr. 8:27-9:1)

<sup>18</sup> In tañu tá ñacana xóo Jesús xihín na xíca tuun xihín á ña caça tahví a nu Ndióxi já ñandaca tuhún mé á na já ñacachi a já xihín ná:

—Ndá da cáchí ñayivi cúu yehe —ñacachi a xihín ná.

<sup>19</sup> Anda já ñanducú ñehe na cán tuhun nu á já ñacachi na já xihín á:

—Java ñayivi cáchí na ña cúu ndó Juan, da najácandúta ñayivi. Ta java na cáchí na ña cúu ndó profeta Elías. Ta cáchí java ga ví na ña cúu ndó in táhan profeta nasanduu sanahá, da nanditacu tucu xíca nuu viti —nacachi na xíca tuun xihín Jesús cán.

<sup>20</sup> Anda já nandaca tuhún Jesús na já nacachi a já xihín ná:

—Ta ndóhó ri ndá da cáchí ndo cúu u —nacachi a xihín ná.

Anda já nacachi Pedro já xihín á:

—Mé ndó cúu Cristo, ña nachindahá Ndióxi cacomí cuéntá sahá ñayivi —nacachi da xihín á.

<sup>21</sup> Joo nacachi Jesús xihín na xíca tuun xihín a ña coto a ndícani na ña yóho nuú ni in túhún ñayivi. <sup>22</sup> Anda já nacachi a já xihín na cán:

—Yehe cúu u da nachindahá Ndióxi nduu ñayivi ta ndítahan nuú i ndoho ndivaha ini i. Ta na sacuahá veñuhu xihín na sacuahá nuú jutú xihín na jánaha ley Moisés candaji na yehe ta anda já cahní na yehe. Joo tá ná xinu uní quivi já nditacu tucu u —nacachi a xihín ná.

<sup>23</sup> Tá nandihí já nacachi tucu a já xihín ndihí na xíca tuun xihín á cán já:

—Ndá na cuní candico yehe ndítahan nu ná ndihí chága ini na sahá yehe a juú ga saha mé ná. Ta ndijáá ní quivi ndítahan coo tiaha na ndoho ini na sahá yehe ta coó caja toho a ná quivi na sahá i. <sup>24</sup> Jáchi ndá na cátóo coo chága ñuyíví yóho ndihí saha ná. Joo ndá na sahan ndeé ini quivi sahá i ñehe táhvi ná catacu na anda ama cáa quivi. <sup>25</sup> Vatí ná quee vaha in na ñuyíví yóho ta cómí na tóco ndihí ñaha ñuyíví joo ndá chuun quea tá nu ndihí ndihí saha ná indayá. <sup>26</sup> Ndá na cácahan nuu sahá i xihín sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán naha ndaja cáhnu cúu yehe jáchi quixi i xihín ndeé Ndióxi ta xihín ndeé táto mé á viti. <sup>27</sup> Mé a ndaa ná cahan i xihín ndo ña ndúu java na ndíta yóho ta ni a quiví toho na janda quiahva ná xinu quivi cuni na cacomí Ndióxi cuéntá sahá ñayivi —nacachi Jesús xihín na cán.

*Tá nandijama Jesús quiahva cáa*  
(Mt. 17:1-8; Mr. 9:2-8)

<sup>28</sup> Ta tá nayaha tátuhun una quivi nacachi Jesús ña yóho xihín ná já nandaa jiní in yúcu ña caça tahví a nu Ndióxi. Ta ndáca táhan Pedro xihín Jacobo xihín Juan cuahan na xihín á. <sup>29</sup> Ta nani xíca tahví Jesús nu Ndióxi já nandijama quiahva cáa nuu á. Ta janda jáhma ndíxi a cán nandiyaa cachí ña ta chí a juú quiahva yehe ña. <sup>30</sup> Anda já naxini na ivi taa ndúu da ndítuhún da xihín Jesús. In da cán cúu Moisés ta inga da cán cúu Elías. <sup>31</sup> A juú quiahva ndató ndíyehe ndaa nu ndúu na cáhan na xihín Jesús ta ndítuhún na sahá ña jándoho na ini a ñuu Jerusalén ta já quivi a. <sup>32</sup> Ta vatí cuní cuju Pedro xihín java ga na cátahan xihín dá cán nasandita na. Ta naxini na ndá quiahva cáhnu cúu Jesús xihín da ivi táhan ndúu xihín á cán. <sup>33</sup> Ta tá nacasáhá cáxíca Moisés xihín Elías cán nu Jesús cuahan na já nacachi Pedro já xihín Jesús:

—Maestro, ndaja vaha cúu á ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías —nacachi da.

Joo chí co xini mé va Pedro ndía cáa cáhan da. <sup>34</sup> Ta nani cáhan da ndíta na já nanuu in vico jata ná ta najáhahví a na. Ta chí nacasáhá yíhvi na xíca tuun xihín Jesús cán tá naxini na nacava nuu vico cán na. <sup>35</sup> Anda já naxini johó na cáhan in a tañu vico cán já nacachi a já:

—Da yóho cúu jahyi maní i. Cuni johó ndó nu cáhan da.

<sup>36</sup> Tá nandihí naxini johó na ña cáchí a cán já naxini na ña ín in túhún jiní mé va Jesús. Ta mé na xíca tuun xihín á cán nasahin táji yúhu ná sahá ña naxini na ta coó nandicaní na sahá nuú ni in túhún ñayivi.

*Tá nandaja vaha Jesús in taa loho ndacaan ínimá quini ini*  
(Mt. 17:14-21; Mr. 9:14-29)

<sup>37</sup> Ta inga quivi itaan tá nanuu Jesús xihín na xíca tuun xihín á jiní yúcu cán já naqueta cuahá ndivaha ñayivi cuahan na ndique táhan na xihín Jesús. <sup>38</sup> Anda já nandicahan cóhó ndivaha in dataa tañu

tóco ndihi ñayivi cán já ñacachi da já xihin Jesús:

—Maestro, caja ndó ñamaní candehe loho ndó jahyí i jáchi in túhún jini já cúú dá nuú i. <sup>39</sup> Ta ndácaan in ínima quini ini da ta tín rí dá ta cája rí xihin dá ña ná ndahyi cóhó da. Ta cája rí ña ná quivi yihí da ta já cána cuyu chiquiñu yúhu dá. A juú quiahva cája xíxi rí quini cán xihin dá ta chí co cúni rí janí rí da. <sup>40</sup> Sa ñaxica tahví i nuú ña xíca tuun xihin ndo ña ná tavá ña mé rí quini cán joo coo ñacuu caja na ña —ñacachi da cán xihin Jesús.

<sup>41</sup> Anda já ñacachi Jesús já:

—Ndáhví nahá ñacuu ndó jáchi sa cuahá ndivaha quivi in i xihin ndo ta a ñaha candeé ini ndó yehe. Cúú ndó ñayivi quini ndivaha chí co ndéé ga ini i xihín ña cája ndó. Taxi ndó ña loho jan chóho —ñacachi Jesús xihin ná.

<sup>42</sup> Ta tá cáyati ña loho cán cuahan da nu Jesús já ñacaja rí quini cán ña ná ndicava da nu ñúhu ta cán ñacaja rí ña ná quivi yihí tucu da. Anda já ñajani Jesús rí quini cán já ñandivaha ña loho cán ta ñandiquiahva mé á da nu tátá da. <sup>43</sup> Ta tóco ndihi ñayivi ñasanduu cán ñacatontó ña tá ñaxini na ña náhu cája Ndióxi.

Ta nani catontó ña ndúu na sahá ña náhu cája Jesús cán já ñacasáhá cáhan mé á xihín ña xíca tuun xihin á. Já ñacachi a já xihin ná:

<sup>44</sup> —Cuni joho vaha ndó ña yóho ta coto a ndíndójó ndó ña. Tiin na yehe, da ñachindahá Ndióxi nduu ñayivi ta já ndiquiahva na yehe ndahá java ñataa —ñacachi Jesús xihin ná.

<sup>45</sup> Joo ni in táhan ña xíca tuun xihin á cán coo ñacandaá ini na ndía cúni cachi Jesús. Jáchi coo ñanuna xíní túní ná ña ná candaá ini na ña. Ta yíhví ña ndaça tuhún ña mé á ña ná ndicani a ña nu ná.

*Ndicani Jesús ndá ña cúú ña in chága saha (Mt. 18:1-5; Mr. 9:33-37)*

<sup>46</sup> Tá ñandihí já ñacasáhá ña xíca tuun xihin Jesús cán ndítuhún xihin táhan na saha ndá da cúú da cáhu chága tañu mé ná.

<sup>47</sup> Anda já ñaxini Jesús ña cáhvi ini ña cán já ñatiin a in ña loho já ñasacu ndichi a da jín á. <sup>48</sup> Já ñacachi a já xihin ná:

—Ndá ña ná ndiquehe vaha ña loho yóho sahá ña quíhvi ini ña yehe, ndiquehe ri na yehe viti. Ta ndá ña ndiquehe yehe, ndiquehe ri na tátá i, mé a ñachindahá yehe. Ndá ña coo saha mé tañu tóco ndihi ndó, ña cán cúú ña in chága saha nu Ndióxi —ñacachi Jesús xihín ña cán.

*Tá ndúu java ña ndiquehe saha yo já quea cuahan na xoo í*

*(Mr. 9:38-40)*

<sup>49</sup> Anda já ñacachi Juan já xihin Jesús:

—Maestro, ñaxini nde in ñataa ta cáhan da quivi mé ndó já tává da ínima quini ñúhu ini ñayivi. Joo coo xíca nuu da xihin yo sahá ña cán quea ñasaji nuu nde nu dá caja da ña —ñacachi da cán.

<sup>50</sup> Anda já ñacachi Jesús já xihin dá:

—A cáji nuu ndó nu dá sahá ña cája da ña. Jáchi ndá da coo ndíndita caja xíxi xoho, mé da cán cuahan da xoo mí —ñacachi Jesús.

*Janani Jesús Jacobo xihin Juan*

<sup>51</sup> Tá ñacayati quivi ndíndita Jesús cuhun a indivi coo ñayíhví a quehe a íchi cuahan chí ñuu Jerusalén. <sup>52</sup> ñachindahá Jesús java ña xíca xihin á ña ná cuhun cuéé ña in ñuu loho ndácaan estado Samaria cán já ná nducú ña nuú canduu tóo na chí ñaquee na cuahan ña. <sup>53</sup> Joo coo ñaxeen toho ña Samaria cán ndiquehe na Jesús jáchi ñaxini na ña cuahan chí ñuu Jerusalén. <sup>54</sup> Tá ñaxini Jacobo xihin Juan cán ña yóho já ñacachi da já xihin Jesús:

—Á coo cúni ndó, xitoho i ña ná cahnda nde chuun ña ná cuyu ñúhu cáyi indivi já ná jánaá nde sahá ñayivi yóho tá quiahva ñacaja profeta Elías sanahá —ñacachi na xihín á.

<sup>55</sup> Anda já ñandicoto nihni Jesús nu ná já ñacasáhá janani a ña já ñacachi a já xihin ná:

—Coo xíní ndó ña a váha toho cáhvi ini ndó já. <sup>56</sup> Jáchi coo ñaquixi toho yehe, da ñachindahá Ndióxi nduu ñayivi, ña ná jánaá i sahá ñayivi. Ñaquixi i ñuyiví yóho jáchi cúni ña ná çacu ndaa ínima ná —ñacachi Jesús xihín ña cán.

Anda já ñaquee na cuahan ña inga ñuu loho.

*Ña cúni candico Jesús*

*(Mt. 8:19-22)*

<sup>57</sup> Ta nani xíca na cuahān nā já nacachi in dataa já xihin Jesús:

—Cúni candico i ndohó ndá nacuu nuú cuhun ndo —nacachi da.

<sup>58</sup> Anda já nanducú ñehe Jesús tuhun nu dá já cáchí a já xihin dá:

—Ndicuii cúu rí ta vatí íin cáva ñúhu rí. Laa cúu rí ta vatí íin táca ñúhu rí. Joo yehe, da nachindahá Ndióxi nduu ñayivi chí ni nuú cuju mí i coó va —nacachi a xihin dá.

<sup>59</sup> Tá nandihí já nacachi Jesús já xihín inga da:

—Naha quí candico yehe.

Joo nanducú ñehe da cán tuhun nu Jesús já cáchí da já xihin á:

—Quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —nacachi da xihin Jesús.

<sup>60</sup> Anda já nacachi Jesús já xihin dá:

—Ná cuhun mé ñayivi, na a ñaha cacu ndaa ínima jánduxu na ndii jan. Joo yóhó, cuahán caxi tuhun nuú ñayivi ña sa nandindaa quívi cacomí Ndióxi cuéntá saha ná —nacachi Jesús xihin dá.

<sup>61</sup> Anda já nacativi inga dataa nu Jesús já nacachi da já xihin á:

—Jesús, candico i ndohó cúni. Joo quiahva ndó ñamaní nuú i ná cuhun loho i ndindayí jihna ñúhú i na vehe e já quixi i candico i ndohó —nacachi da xihin Jesús.

<sup>62</sup> Anda já nacachi Jesús já xihin dá:

—Ndá da cásahá ndico yehe ta já ndico coo tucu da cuahān da chí jata, cúu dá da coó chuun toho cacomí Ndióxi cuéntá saha. Jáchi da cán cúu dá tátuhun da tiin yata ta cásahá da xútu da cuahān da joo tá nandihí ndicoto nihni tucu da chí jata ta chí coo saha dá cacomí Ndióxi cuéntá saha dá —nacachi Jesús.

## 10

*Chindahá Jesús uní jico uxu taa cuhun da cahan da tuhun Ndióxi xihín ñayivi*

<sup>1</sup> Tá nandihí já nacaxi Jesús inga uní jico uxu chága dataa. Ta tá ivi tá ivi da nachindahá a da cuahān da já ná cuhun cuéé da cahan da tuhun Ndióxi xihín ñayivi ndúu tóco ndihí ñuu nuú nasacu ini Jesús cuhun a coto nihni a ñayivi. <sup>2</sup> Anda já nacachi a já xihin ná:

—Mé a ndaa ndúu cuahá ndivaha ñayivi, na cúni cuni johohó tuhun Ndióxi joo coo cuahá na cúni cuhun cahan ña xihin ná. Cúu á tátuhun vaha ndivaha nacana ní nuú utu joo ndímaní na jáquee ña. Ña cán quéa xini ñúhú caca tahví ndo nuú da xihín ñaha utu cán ña ná chindahá chága da na jáquee nuú utu da. Quiahva já ndítahan caca tahví ndo nu Ndióxi ña ná chindahá chága mé á na caca nuu cahan tuhun Ndióxi xihín ñayivi já ná ndiquehe vaha na ña. <sup>3</sup> Mé ndó cúu ndó na chindahá i cuhun caca nuu cahan tuhun Ndióxi. Mé a ndaa iyo ndivaha cáa nuú cuhun ndo jáchi cacuu ndó tátuhun ndicachi válí tañu cuahá ndivahyí. <sup>4</sup> Tá naquee ndó cuahān ndo coto a cáñehe ndó yátí cuhun ndo ni jihún ni inga ndusa ndó a cáñehe ndó cuhun ndo. Ta a cacuíta ndó cahan Ndióxi ndó xihín ñayivi ndique táhan xihín ndó íchi. <sup>5</sup> Ta tá ná xinu coo ndó in vehe, jihna ñúhú cahan Ndióxi ndó xihín na ndúu vehe cán já cachi ndó já xihin ná: “Ná coo vaha ini ndó, na ndúu vehe yóho”, cachi ndó xihin ná. <sup>6</sup> Ta tá mé a ndaa íin vaha ini ñayivi ndúu vehe cán já a cándo nuu toho tuhun nacachi ndó xihín na cán. Joo tá co íin vaha ini na cán já a quéhe ndó cuéntá saha ña nacachi ndó ña ná coo vaha ini na jan jáchi a juú na coo vaha ini cúu toho na jan. <sup>7</sup> Tá ná xinu coo ndó in vehe nu ndiquehe vaha na ndohó, canduu ndó mé vehe jan. Ta a cáca nuu ndó tá vehe tá vehe nducú ndo nuú coo ndó. Ta ndá ñaha íin nu ná sahan na nu ndo cuxu ndó á coho ndó, tiin ndó a ndáha ná. Jáchi ndítahan nuú in dataa ndiquehe da ña catacu da saha chuun cája da. <sup>8</sup> Ta tá ná xinu coo ndó in ñuu nu ndiquehe vaha na ndohó, cuxu ndó ndía cúu mé a sahan na nu ndo. <sup>9</sup> Ta ndaja vaha ndó ndá na quíhví ndúu cán. Ta cachi ndó já xihin ná: “Sa nacayati quívi cacomí Ndióxi cuéntá saha ndo”, cachi ndó xihin ná. <sup>10</sup> Joo tá ná xinu coo ndó in ñuu nuú coo cúni na ndiquehe vaha na ndohó, cuahán ndó cáyé ñuu cán já cachi ndó já xihin ná: <sup>11</sup> “Janda ña yacá natiin ndaa saha nde ñuu ndó yóho quíji nihni nde ta xihín ña yóho náha nde ña cuahān cuachi ndó jata mé va ndó. Jáchi sa nacaxi tuhun va nde xihin ndo ña sa nacayati quívi cacomí Ndióxi

cuéntá sahá ñayivi”, cachi ndó xihín ná — ñacachi Jesús xihín ná cán.

<sup>12</sup> Anda já ñacachi tucu a já xihín ná:

—Tá ná xinü coo quivi caja vii Ndióxi sahá ñayivi já jándoho chága mé á ini ñayivi ñuu jan a juú ga tá quiahva najándoho a ini na ñuu Sodoma sanahá —ñacachi Jesús xihín ná.

*Cáhan Jesús sahá ñuu nu ndúu ñayivi, na co cúnijándacoo cuachi*

*(Mt. 11:20-24)*

<sup>13</sup> Anda já ñacachi tucu Jesús xihín ná já:

—Ndáhví nahá ñacuu ndó, na ñuu Corazín. Ta ndáhví nahá ñacuu ndó na ñuu Betsaida. Cuahá ndivaha ña náhnu ñacaja i nu ndo joo coo ñaxeen ndó ndicó coo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva ñacaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndíí ta jácuyu na yaá yíquí jíní na, nduu. Jáchi xihín ña yóho jánaaha na ña ñandicó coo ini na sahá cuachi na. <sup>14</sup> Joo tá ná xinü quivi caja vii Ndióxi sahá ñayivi já ndoho chága ini mé ndó, na ñuu jan a juú ga tá quiahva ñandoho ini ñayivi ñasanduu ñuu Tiro xihín ñuu Sidón sanahá. <sup>15</sup> Ta viti cáhan i xihín ndó, na ndúu ñuu Capernaum. Janda indivi cúní ndó cuhun ndó joo sahá ña sáá ini ndó cuhun ndó janda indayá, caja Ndióxi —ñacachi Jesús.

<sup>16</sup> Anda já ñacachi a xihín ná xíca tuun xihín á já:

—Ndá na xíní johó nu cáhan ndo ta cája na ña cáhí ndo já quéa cúú á tátuhun cája na ña cáhí yehe xihín ná caja na. Ta ndá na cándají ndohó cúú á tátuhun cándají ri na yehe va. Ta ndá na cándají yehe, cándají ri na Ndióxi, mé a ñachindahá a yehe quixi i ñuyiví yóho —ñacachi Jesús xihín na chindahá mé á cuhun cahan tuhun Ndióxi xihín ñayivi cán.

Anda já ñacache na cuahan na.

*Tá ñandicó coo ndihuni jico uxu na ñachindahá Jesús caca nuu cahan tuhun Ndióxi*

<sup>17</sup> A juú quiahva cájii íní na uní jico uxu na ñachindahá Jesús cahan tuhun Ndióxi

cán tá ñandicó coo na. Já ñacachi na já xihín Jesús:

—Tá cáhan nde quivi ndó sáhdá nde chuun nu ínima quini ta chí xíní johó rí ta cája rí ña sáhdá nde nu ri —ñacachi na cán xihín Jesús.

<sup>18</sup> Anda já ñacachi Jesús já xihín ná:

—Mé a ndaa quéa cáhan ndó jan. Jáchi ñaxini i xihín nuú mí i ndá quiahva ñaquee Satanás, rí cúú tiñahá sacuahá indivi ta ñandicava rí nu ñúhu tátuhun in tasa.

<sup>19</sup> Chí ñasahan i ndée nu ndohó ña ná cuu cahnda ndó chuun nuú tiñahá sacuahá. Já cuu cuani nihni ndó jatá coo xihín jata líhma ta a ndóho ndó ni in ñaha. Ta ñasahan i ndée nu ndo ña ná cuu quee vaha ndó nuú ndihi ña núu cúní tiñahá sacuahá caja rí xihín ndo. <sup>20</sup> Vatí cájii ini ndó sahá ña cándusa rí quini nu sáhdá ndó chuun nu ri joo ndítahan cájii chága ini ndó sahá ña sa ñaquee va quivi ndó ña cuhun ndó indivi —ñacachi Jesús xihín ná.

*Tá ñacajii ndivaha ini Jesús*

*(Mt. 11:25-27; 13:16-17)*

<sup>21</sup> Ta chí mé hora já ñacaja ínima yíi Ndióxi ña ná cajii ndivaha ini Jesús. Já ñacasahá cáhí a já:

—Cája cáhnu i ndohó, tátá Ndióxi, ña cúú xitoho tóco ndihi ñaha ndúu indivi xihín ñuyiví. Jáchi najánaaha ndó ña ndichí ndivaha nuú ñayivi, na coo cuahá saha nuú java ga na. Ta ñacaja ndó ña ná a cúu candaa ini na ndichí xihín na tácu ini ñaha mé ndó. Já ñacaja ndó jáchi já ñasacu ini ndó caja ndó —ñacachi Jesús.

<sup>22</sup> Anda já ñacachi a já xihín na ndúu cán:

—Ñandiquiahva tátá i tóco ndihi ñaha ndahá i ña ná cacomí i cuéntá sahá. Ta ni in túhún toho ñayivi co xíní vaha na yehe, da cúú in túhún jini já jahyi Ndióxi. Mé Ndióxi, tátá i cuití va xíní vaha yehe. Ta ni in túhún toho na co xíní vaha yo cúú tátá i. In túhún yehe, da cúú jahyi a xíní vaha i yo cúú mé á. Ta yehe cúú da caxi ndá ñayivi jánaaha i nuu sahá Ndióxi, tátá i já ná candaa vaha ini na yo cúú mé á —ñacachi Jesús.

<sup>23</sup> Anda já ñasandehé a nuú na xíca tuun xihín á cán. Já ñacasahá cáhí a já xihín mé cuití na:

—Tahví nacuu ñayivi tá ná cuu candehé na tóco ndihi ña xíní mé ndó viti. <sup>24</sup> Mé a ndaa ná cahan i xihin ndo ña cuaha táhan na profeta nasanduu sanahá ta cuaha táhan na nasacomí cuénta sahá ñayivi sanahá cúní na cuni na tóco ndihi ña xíní ndo cája i. Joo coó naxini na ña. Ta cúní na cuni johó na ña xíní johó ndó cáhan i xihin ndo. Joo coó naxini johó na ña.

*Sácu Jesús quiahva sahá in da Samaria, da nacaja vaha*

<sup>25</sup> Ta ndaja coo in da jánaha ley Moisés nandaca ndichi da cahan da xihin Jesús jáchi cúní da coto ndojó ñahá da. Ta nacachi da já xihin á:

—Maestro, ndía ndítahan caja i já ná cuu catacu u indivi anda ama cáa quivi —nacachi da xihin á.

<sup>26</sup> Anda já nanducú ñehe Jesús tuhun nu dá já nacachi a já xihin dá:

—Ndaja cáchi ley Moisés. Ndaja cáchi ley tá cáhvún ña —nacachi Jesús xihin dá.

<sup>27</sup> Anda já nanducú ñehe da jánaha ley Moisés cán tuhun nu Jesús já nacachi da já:

—“Quihvi inún Ndióxi, xitohún xihin tóco ndihi ínimun ta xihin ndinuhu inún. Ta quihvi inún a xihin tóco ndihi ndéun ta xihin tóco ndihi xíní túnun. Ta quihvi inún ñani táhún tá quiahva quihvi inún mún” —nacachi da cán nanducú ñehe da tuhun nu Jesús.

<sup>28</sup> Anda já nacachi Jesús já xihin dá:

—Mé a ndaa vaha va nacahun. Cuáhán caja tóco ndihi ña yóho já ñehe táhvun cat-acún indivi anda ama cáa quivi —nacachi Jesús xihin dá.

<sup>29</sup> Joo da jánaha ley Moisés cán cúní da candoo vaha da nuú ñayivi ndúu cán sahá ña cán quéa cáchi da já xihin Jesús:

—Yo já cúu ñani táhan i.

<sup>30</sup> Anda já nandicani Jesús nu dá já cáchi a já xihin dá:

—In tañu naquee in dataa ñuu Jerusalén cuahan da íchi ña nanuu cuahan chí ñuu Jericó. Ta ndaja coo cán naqueta java ta cuíhná nu dá. Ta natin na da ta nacaja cuíhná ndihi na ñaha da janda jáhma dá viti naquee na. Tá nandihí já nacani quini ndivaha na da janda quiahva nasahní tóo na da. Já naquee na cuahan na. <sup>31</sup> Ta ña

vaha quéa nayaha in jutú mé íchi cán. Joo tá naxini ñahá da já nayaha saa da cuahan va da. <sup>32</sup> Ta sa mé íchi cán nayaha ri in da naquixi chichi Leví ta tá naxini da da nandicuehe cándúhu íchi cán já nayaha saa da cuahan da. <sup>33</sup> Jári in da Samaria xíca cuahan mé íchi cán. Joo tá naxini da da nandicuehe cándúhu íchi cán chí natahvi ini da saha dá. <sup>34</sup> Anda já nacayati da nu cándúhu dá. Já nacaja tátá da nuú nandicuehe da quihvi cán xihin síti xihin vino viti. Ta já nacató da nuú nandicuehe cán xihin ticoto. Tá nandihí najánda da da jata búrró jana dá já ñehe ñahá da cuahan da. Já nanducú da vehe coo tóo da quihvi cán ña ná candaa na da. <sup>35</sup> Ta inga quivi itaan tá nasacu ini da Samaria cán quehe da íchi cuhun da já natavá da ivi jiuhún caa nasahan da nuú da xihin ñaha vehe cán. Já nacachi da já xihin dá: “Cajún ñamaní candaa vahún da quihvi yóho. Ta tá ná chicaan chágun jiuhún xihin dá, a ndícani toho inún jáchi chahvi mí vi ña nun tá ná ndicó coo i”, cáchi da Samaria cán —nacachi Jesús.

<sup>36</sup> Anda já nandaca tuhún Jesús da jánaha ley Moisés cán já nacachi a já xihin dá:

—Ta viti cachún xihin i tixi ndihuni da nayaha íchi nuú nasanduhú da nandicuehe nacaja taa cuíhná yóho, ndá da cúu da nanaha ña mé a ndaa táhyí quihvi ini da ñani táhan da —nacachi Jesús.

<sup>37</sup> Anda já nacachi da jánaha ley Moisés já:

—Da natahvi ini sahá da nandicuehe jan, da jan cúu da cája i cuénta nanaha da ña mé a ndaa quihvi ini da ñani táhan da —nacachi da cán.

Anda já nacachi Jesús já xihin dá:

—Ta viti cuáhán ri yóhó va, quihvi inún ñani táhún tá quiahva nacaja da Samaria yóho —nacachi a xihin dá.

*Tá nasahan Jesús vehe Marta xihin María*

<sup>38</sup> Naquee Jesús íchi xíca cuahan janda quiahva naxinu coo a in ñuu loho. Ta cán nandiquehe vaha in ña naní Marta mé á vehe ña. <sup>39</sup> Ta nasahin in quihvi Marta yóho, ña naní María. Ta naxinu coo María nasacoo ña yati saha Jesús jáchi cúní ña cuni johó ña nu cáhan mé á. <sup>40</sup> Joo ndaja

coo a juú quiahva ndíhi ini mé Marta cája ndíví ñá ñaha cuxu na ndácaan ña. Anda já nacayati ñá nu Jesús já nacachi ñá já xihín á:

—Candehé ndo, xitoho i. Á co sándehe toho ndó ña in túhún mí i cája ndíví i ñaha ta ñá cúu quihví i jan co chindeé loho ñá yehe. Cahán loho ndó xihín ña ná chindeé ñá yehe —nacachi Marta cán xihín Jesús.

<sup>41</sup> Anda já nanducú ñehe Jesús tuhun nu ña já cáchi a já xihín ña:

—Marta loho, a juú quiahva ndícani inún ta ndíhi inún jáchi ín ndivaha chuun nuun.

<sup>42</sup> Joo ín in túhún ñaha ña ín chága saha ta cúu á ña ndítahan cajún. Ta María, ñá cúu quihvun yóho nacaxi ñá ña vaha chága. Ta ni in na a cúu caji nuu nu ñá cuni joho ña tuhun cáhan i —nacachi Jesús xihín ña.

## 11

*Jánaḡa Jesús na xíca tuun xihín á ndaja caja na caça tahví na nu Ndióxi*  
(Mt. 6:9-15; 7:7-11)

<sup>1</sup> In tañu xíca tahví Jesús nu Ndióxi ndácaan. Ta tá nandíhi naxíca tahví a já nacachi in táhan da xíca tuun xihín á cán já xihín á:

—Jánaḡa ndó ndeḡe, xitoho nde caça tahví nde nu Ndióxi, tátá yo tá quiahva nacaja Juan, da nacaja ndúta ñayivi. Jáchi najánaḡa da nuú na nasaxíca xihín dá ndá quiahva caja na caça tahví na nu Ndióxi —nacachi da cán xihín Jesús.

<sup>2</sup> Anda já nacachi Jesús já xihín na cán:

—Tá ná caça tahví ndo nu Ndióxi já cachi ndó já:

Tátá Ndióxi, ña ín indiví, cáhnu ná cacuu quiví ndo.

Ná tandaa quí quiví cacomí ndó cuéntá sahá nde.

Ta ná coo tá ín cúní mé ndó coo ñuyiví yóho tá quiahva ín indiví cája ndó.

<sup>3</sup> Quiahva ndó nuú nde ña ndímaní nuú nde cuxu nde in in quiví.

<sup>4</sup> Caja cáhnu ini ndó sahá cuachi nde tá quiahva cája cáhnu ini nde saha tóco ndíhi ña núu cája ñayivi xihín nde.

Ta a quiahva ndó ñamaní ña ná coto ndojó tiñáhá sacuaḡa ndeḡe já ná a cája

nde cuachi nu ndo, já cachi ndó caça tahví ndo —nacachi Jesús.

<sup>5</sup> Anda já nasacu Jesús in quiahva nu ná já nacachi a já xihín ná:

—Cúu á tátuhun tá ná cuhun ndó vehe in amigo ndo java ñuú táji ta já cachi ndó já xihín dá: “Amigo, á a quiahva tóun uní pan nuú i <sup>6</sup> jáchi nacasaḡ in da xíní táhan xihín i vehe e ta cúu dá da nasahan xíca ta coó ñaha nuú i quiahva i cuxu da”, cachi ndó xihín amigo ndo. <sup>7</sup> Ta viti ná caja í cuéntá nducú ñehe da ndácaan ini vehe cán tuhun nu ndo já cachi da já: “A jáquihvún yehe jáchi ndájí tuun yéhe. Ta ndúu jahyi válí i quíji na xihín i nuú xito ta a cuú caja i ndacoo i quiahva i ndá ñaha nuun”, cachi da cán xihín ndo ná caja í cuéntá. <sup>8</sup> Mé a ndaa ná cahan i xihín ndo ña vatí co cúní da jan ndacoo da quiahva da ñaha nu ndo sahá ña xíní táhan ndó xihín dá joo ndacoo tá ndacoo da quiahva da ñaha nu ndo sahá ña jáquihví ndó da. Sahá ña cán quea ndacoo da quiahva da tóco ndíhi ña xíní ñúhú ndo nu ndo. <sup>9</sup> Ña cán quea cáhan i ña yóho xihín ndo: Ndá ñaha ndímaní nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cúní ndo ta ñehe ndó ña caja Ndióxi. Cúu á tátuhun catí ndáḡa ndo yéhe ta já nuna yéhe nu ndo. <sup>10</sup> Jáchi na xíca, na cán cúu na ñeḡe va. Ta na ndúcú ñaha, na cán cúu na ndíñeḡe va. Ta na catí ndáḡa yéhe, na cán cúu na ndínuna yéhe nuu.

<sup>11</sup> Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe ri ndó quiahva ndó yuu nu á ña ná caxí a. Ta ama ná quiahva ndó coo caxí a tá xíca cuñu tiyacá caxí a. <sup>12</sup> Ta ama cuéhe ri ndó quiahva ndó líhma caxí jahyi ndó tá xíca ndívi nu ndo. <sup>13</sup> Vatí cúu ndó ñayivi cája cuachi joo xíní vaha ndó quiahva ndó ña vaha nuú jahyi ndó. Ta ndaja ḡa ví cája Ndióxi, tátá ndo, mé a ín indiví xihín ndo. Quiahva mé á ínima yíi á nu ndá na ná caça ña nu á —nacachi Jesús.

*Chícaan na cuachi Jesús ña ñeḡe a ndeḡe tiñáhá sacuaḡa*  
(Mt. 12:22-30; Mr. 3:20-27)

<sup>14</sup> In tañu tává Jesús ínima quini ini in dataa, da nanduu níhi, nacaja rí quini. Ta

tá sa nacana mé rí quini ini da cán nacaja Jesús anda já nandicahan tucu da. Ta chí nacetóntó cuahá ñayivi ndúu cán tá naxini na ña yóho. <sup>15</sup> Joo java na nacasahá cáhí na já saha Jesús:

—Taa yóho cúu távā da rí quini ñúhu ini ñayivi jáchi mé Beelzebú, rí cúu tiñáhá sacuaḥa nu rí quini cán, sahan rí ndée rí nu dá cāja da ña —nacachi na.

<sup>16</sup> Ta java ga na cúni na coto ndojó na Jesús sahá ña cán quea naxica na nu á ña ná cāja mé á ñaha xitúhún quixi indiví já ná cuni na. <sup>17</sup> Joo xini vaḥa va Jesús ña cáhvi ini na cán sahá ña cán quea nacachi a já xihín ná:

—Tá sáhdá java táhan ñayivi ndúu in ñuu ta ndúu na cuahá táhdá já cāsahá cáni táhan ndaja táhan mé va na já cama chá ndihi sahá ñuu nu ndúu na cán. Ta quiahva já yáha xihín na ndúu in vehe tá cāsahá sáhdá java táhan na ta cáni táhan na já cama chá ndihi sahá vehe na. <sup>18</sup> Ta quiahva já yáha xihín Satanás, rí cúu tiñáhá sacuaḥa va. Tá ná cani táhan ndaja táhan mé rí já quea ndihi saha ndée ña cómi ri. Cáhan i ña yóho xihín ndo jáchi cáhí ndo ña távā i rí quini ini ñayivi xihín ndée Beelzebú, rí cúu tiñáhá sacuaḥa. <sup>19</sup> Joo tá mé a ndaa cúu ndusa ña cáhí ndó sahá i jan, ndáchí quehe na cúu cuéntá mé ndó jan ndée távā na rí quini ini ñayivi. Ama ná cachi ndó ña távā ndó rí quini xihín ndée tiñáhá sacuaḥa. Ña yóho náha ña co cáhvi ndaa ini ndó. <sup>20</sup> Joo yehe xihín in túhún ndée Ndióxi távā i ínimā quini ini ñayivi. Ta xihín ña yóho náha cáxi a ña sa naxinu coo quiví cacomí Ndióxi cuéntá saha ndo —cáhí Jesús.

<sup>21</sup> Ta sácú Jesús quiahva nu ná ta xihín ña yóho jánaḥa ña quee vaḥa mé á xihín tiñáhá sacuaḥa. Já cáhí a já:

—Íin in dataa ta tóyíí cáa da ta ñéhe da ndá chúun chindeé da mé dá. Ta nani ndáá da vehe da mé a ndaa coo toho ñaha ndoho ñaha da jáchi ndáá vaḥa da ña. <sup>22</sup> Joo tá ná quixi inga taḥa, da ndacú chága a juú ga mé da cán ta quee vaḥa da xihín dá já candaa ndihi da ndá chúun ña nacandee ini da mé dá. Ta já cāja tá cúni mé da ndacú chága cán xihín ñaha da inga cán.

<sup>23</sup> Ndá na coo cuahān xoo i, cúu ná na coo cúni yehe. Jáchi ndá na coo chindeé yehe xihín ña cāja i, cúu ná na sājí nuu nuú i.

*Jánaḥa Jesús ña cuahá tañu ndicó coo tucu rí quini ini ñayivi vatí sa naquee rí*  
(Mt. 12:43-45)

<sup>24</sup> Tá quéta in rí quini ini in dataa já quee rí cuahān rí xíca nuu rí ndijáá yucú íchí ndínducú rí nuú candoo rí. Ta tá coo ndíñehe rí ña já cāsahá cáhvi ini rí já: “Cóho ndicó coo tucú ini da nuú nasandacaan í cán jáchi cúu á tátuhun vehe”, cáhán ri. <sup>25</sup> Ta tá xinu coo rí ini da cán já sándehe ri ña íin víi va ini da cán tá quiahva víi ini vehe tá natihvi á ta nandaca ndójó vaḥa tóco ndihi ñaha ini a. <sup>26</sup> Anda já quee tucu mé rí quini cán cuahān ri quehe rí usa ga rí quini chága a juú ga mé rí já xinu ndihi rí ndihvi rí ini da cán. Ta mé da cán ndiquini chága da a juú tá nasandacaan in táláá rí ini da —nacachi Jesús.

*Ndá na cúu na tahví chága nacuu*

<sup>27</sup> Ta nani cáhan Jesús tuhun yóho nuú ñayivi já nacayuhú cóhó in ñáñáha tañu ñayivi cuahā cán já nacachi ná já:

—Tahví nacuu ná najácacu yohó, mé ña najácuáñnu yohó —nacachi ná xihín Jesús.

<sup>28</sup> Anda já nacachi Jesús já:

—Tahví chága nacuu ñayivi tá xini johō na tuhun Ndióxi ta cāja na ña cáhí a —nacachi Jesús.

*Xíca ñayivi quini ña ná cāja Jesús ña xitúhún cuni na*

<sup>29</sup> Tá ndítaca cuahá ñayivi nu íin Jesús já nacasahá mé á cáhan xihín ná já nacachi a já:

—Quini ndivaḥa va ñayivi ndúu tiempo viti. Xíca na ña ná cāja i ñaha xitúhún nu ná. Joo coo toho ña cán coo. Ña cuni ndusa na quea ndoho i tá quiahva nandoho Jonás, da nasacuu profeta sanahá. <sup>30</sup> Jáchi mé ñayivi nasanduu sanahá ñuu Nínive cán nacandaa ini na ña nachindahá Ndióxi Jonás nu ná. Ta quiahva já candaa ri ini na ndúu viti ña nachindahá ri Ndióxi yehe va, da nanduu ñayivi. <sup>31</sup> Tá ná xinu quiví cāja víi Ndióxi sahá cuachi ñayivi ndúu tiempo viti anda já ndicuita in ña nasacomí cuéntá sahá ñayivi ndúu chí sur sanahá ta chicaan ña cuachi



jatá ñayivi ndúu tiempo viti. Jáchi mé ñá cán vatí ñasahjin xicá ndivaha ñá nu rey Salomón sanahá ñasahan ñá cuni johó ñá tuhun ndíchi cáhan da. Ta yehe in chága sahá i a juú ga Salomón joo co cándusa ndó yehe. <sup>32</sup> Ta jári ñayivi ñasanduu Nínive sanahá cán ndicuita na chicaan na cuachi jatá ndo tá ná xinu quiví caja vií Ndióxi sahá cuachi ñayivi ndúu viti. Jáchi mé na ñasanduu ñuu Nínive cán najándacoo na cuachi cája na tá ñacahan Jonás xihín ná ña ñacachi Ndióxi coo. Ta yehe in chága sahá i a juú ga Jonás joo co cándusa ndó yehe.

*Nduchú núu yó cúu á tátuhun in lámpara (Mt. 5:15; 6:22-23)*

<sup>33</sup> Ni in túhún toho ñayivi co chicaan ñúhu ná in lámpara ta já quéhe na ña sácú na in nuú jehé. Ni co chicaan na ña tixi sato. Ña cája na quéa chínúu jícó na ña já ná yehe nuú na quíhvi ini vehe cán. <sup>34</sup> Nduchú núu yó cúu á tátuhun in lámpara jándiyehé a nu yó já xini yó nu xica í. Ta tá tivi vaha nduchú núu yó já cuu candehé vaha í nu xica í. Joo tá co tivi nduchú núu yó já quéa xica í nu naá ndivaha. <sup>35</sup> Cuénta coo ndó a juú cahán ndo ña cúu ndó na xica nu yehe ta cáa ví ndó cája ndó cuachi tátuhun na xica nu naá. <sup>36</sup> Tá ná quiahva ndó ñamaní jándiyehé Ndióxi ínimá ndo já a cája ga ndó cuachi jáchi a cánehe ga ndó ínimá quini. Tá cája ndó ña cuni Ndióxi já cúu á tátuhun in lámpara jándiyehé ínimá ndo —ñacachi Jesús.

*Chicaan Jesús cuachi jatá na fariseo xihín jatá na jánaha ley Moisés*

*(Mt. 23:1-36; Mr. 12:38-40; Lc. 20:45-47)*

<sup>37</sup> Tá ñandihí ñacahan Jesús já ñacana in da fariseo Jesús ña ná cuhun a cuxu a vehe da. Tá ñandihí já ñasahan Jesús vehe da já ñaquíhvi a ñasacoo a nu mesa xihín java na cán. <sup>38</sup> Joo ndaja coo da fariseo cán chí ñacatóntó da jáchi ñaxini da ña coo ñandahá Jesús cacoo a cuxu a tá quiahva in costumbre mé na fariseo cán. <sup>39</sup> Andá já ñacachi Jesús já xihín da fariseo cán:

—Ndóhó, na fariseo, ndíhi ini ndó cája ndó costumbre ña ndícata ndó jatá vaso xihín jatá cohó viti joo co ndíhi ini ndó ndícata ndó ini a. Quiahva já cája mé va ndó jáchi ndíhi ini ndó ndahá ndo tátuhun

costumbre ndo joo co ndíhi ini ndó ndaja vií ndo ínimá ndo nuú ñachutú ndaa xihín ñaha quini cáhvi ini ndó. <sup>40</sup> Ndaja tóntó jini ndo. Á co xini toho ndó ña tá ñacavaha Ndióxi ñayivi já ñacavaha mé á yiquí cuñu na ta ñacavaha mé á ínimá ná. <sup>41</sup> Caja ndó ñamaní xihín na ndahví xihín ndinuhu ini ndó já ná coo vií ndó nu Ndióxi.

<sup>42</sup> Ndahví ñacuu ndó, na fariseo. Mé ndó tá cáchi ndo sahan ndó ñaha nu Ndióxi já cávaha ndó uxu táhnda ñaha ndó cán. Ta in a sahan ndó nu Ndióxi ta quéhe ndíhi ndó ña java cán. Quiahva já cája ndó xihín minu estila xihín yucu lotá ta quiahva já cája ndó xihín tá nuú ñaha cána nu ñúhu ndo. Joo co cája ndó ña ndaa xihín ñayivi. Ta ni co quíhvi ini ndó Ndióxi. Joo ña cuni Ndióxi caja ndó quéa ná caja ndaa ndó ta ná quíhvi ini ndó a. Ta a ndíndójó ndó quiahva ndó ñaha nu Ndióxi.

<sup>43</sup> Ndahví ñacuu ndó, na fariseo. Jáchi tá sahan ndó veñuhu catóo ndo cacoo ndó nu sácoo na náhnu. Ta cuni ndó ña ná cahan Ndióxi toní ñúhú ndivaha ñayivi xihín ndo tá ndique táhan na xihín ndo íchi.

<sup>44</sup> Ndahví ñacuu ndó, na jánaha ley Moisés. Ta ndahví ñacuu ndó, na fariseo. Jáchi co cúu ndó tá quiahva ndaa ndó. Mé ndó cúu ndó tátuhun yávi nu táán na ndii jáchi núu cája ndó. Vatí xójo cava ñayivi yáha na nuú ñanduxu ndii cán joo co xini na ña cúu á in yávi nu ñúhu ndii jáchi coo yuu ñáñí a —ñacachi Jesús.

<sup>45</sup> Andá já ñanducú ñehe in da jánaha ley Moisés cán tuhun nu Jesús já ñacachi da já xihín á:

—Maestro, xihín tuhun cáhan jan jándihíhvi ri a ndehe va.

<sup>46</sup> Andá já ñacachi Jesús já xihín dá:

—Ndahví ñacuu ri ndóhó va, na jánaha ley Moisés. Jáchi cája ndó ña ná coo ihvi ndivaha ley já ná a cúu caja ñayivi ña. Joo mé ndó cája ndúsa ndó xihín ná ña ná caja na ña vatí ni mé ndó a cúu caja ndó ña.

<sup>47</sup> Ndahví ñacuu ndó jáchi cúu á tátuhun cávaha ndó ñáñí nu jánduxu ndó na profeta, na ñasahní tásáhnu jícó ndo sanahá.

<sup>48</sup> Ta xihín ña yóho náha ndó ña cáji ini ndó xihín ña ñacaja tásáhnu jícó ndo sanahá tá ñasahní na na profeta. Ta viti cúu á tátuhun chindeé táhan ndó xihín na cán

jáchi mé ná nasahní nā nā profeta ta mé ndó nacavaha ndó nuú nanduxu nā.

<sup>49</sup> 'Xini vaha Ndióxi ñayivi ta ndaa nacahan mé á tá nacachi a já: "Chindahá i java profeta xihín java apóstol nu ndo. Joo mé ndó cahní ndo java na ta java na ndicuita ñee ndó nā", nacachi Ndióxi sanahá. <sup>50</sup> Joo viti caça Ndióxi cuéntá nuú ñayivi ndúu tiempo viti saha tóco ndihi nā profeta, nā naxihí ndijáá tiempo janda nani nacava sáhá saha ñuyiví. <sup>51</sup> Caça Ndióxi cuéntá nuú ñayivi ndúu tiempo viti sahá nā profeta ndii naxihí sanahá. Caça mé á cuéntá sahá Abel, da naxihí nacaja Caín cán. Ta caça mé á cuéntá sahá ndijáá nā profeta naxihí tiempo naquixi cán janda quiahva naxinu coo a nuú caça cuéntá sahá ndii Zacarías. Mé da yóho nasahní nā da ini veñuhu sanahá tañu nu náa xihín nuú yí ndivaha. Ña cán quea cahan i xihín ndó ña caça Ndióxi cuéntá saha tóco ndihi ndii jan nuú ñayivi ndúu tiempo viti.

<sup>52</sup> 'Ndahví nacuu ndó, nā jánaha ley Moisés. Jáchi cajú ndó ña ná a cúu candaá ini ñayivi ña cáchi tuhun Ndióxi. Ta xihín ña yóho cúu ndó nā sáji nuu cuití va jáchi ni co sahan ndó ñamaní nu ná ña ná candúsa na ña ndaa. Ta mé ndó vatí xini ndó cúu á ña ndaa joo co cajú ndó ña cáchi a —nacachi Jesús xihín nā jánaha ley Moisés cán.

<sup>53</sup> Tá nacachi Jesús ña yóho já naxojo ndivaha ini nā jánaha ley Moisés cán xihín nā fariseo cán xihín á. Ta já nacasáhá nā ndaca tuhun cuaha chága nā mé á sahá ña cuni nā jáquihví cuití ñahá nā. <sup>54</sup> Ta nasacu cuaha ná tuhun ihví nu á jáchi ndúcú nā ndá quiahva chican nā cuachi jatá xihín in tuhun ña ná yaha yuhu á cahan.

## 12

*Jánaha Jesús sahá nā co cúu ná tá quiahva ndaa na*

<sup>1</sup> Ta nani cahan Jesús cán nacasáhá táca cuahá ndivaha ñayivi. Cuaha mil nā nacasáhá ndái cuu na cán. Janda quiahva cándíhi táhan ndaja táhan mé ná xihín á cuahan ná. Nu cuití nacahan Jesús xihín nā xica tuun xihín á já cáchi a já:

—Cuéntá coo ndó xihín nā fariseo jáchi cúu ná tátuhun yusa naxaa quee xihín harina ña cava na pan. Co cúu ná tá quiahva ndaa na. <sup>2</sup> Ta ni in túhún toho ñaha a cúu coo jehé nahá jáchi cana tá cana tuhun sahá. <sup>3</sup> Tóco ndihi tuhun nacahan jehé ndó ñuu já vaxi quivi cuni johó ñayivi ña ndiví táhyí. Tóco ndihi ña nacahan jehé ndo tá ndáji yehé já vaxi quivi candaá ini tóco ndihi ñayivi ñuu sahá —nacachi Jesús xihín nā xica tuun xihín á.

*Yo já ndítahan cayihví yo  
(Mt. 10:26-31)*

<sup>4</sup> Anda já nacasáhá cahan Jesús xihín ndihi nā cán já cáchi a já:

—Candehé ndo, nā cúu amigo i. Cuni cahan i xihín ndo ña a cáyhví toho ndó ñayivi, nā cuu cahní yiquí cuñu ndó. Jáchi ña jan cúu ndihi va ña cajú na ta a cúu cajú na ni in ñaha xihín ínima ndó. <sup>5</sup> Ta viti ná cahan i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchi mé a cán quea cuu cajú ña ná quivi ndó ta tá nandihí cuu chican ínima ndo ini indayá. Mé a cán quea ndítahan ndusa cayihví ndo.

<sup>6</sup> 'Sa xini vaha ndó ña uhun laa válí yahvi rí ivi jiuhún. Vatí núu ndivaha sahan ñayivi rí joo co ndíndójó toho Ndióxi saha rí jáchi ndaa mé á rí. <sup>7</sup> Quiahva já in rí saha mé ndó nu Ndióxi. Jáchi janda ijí jini ndó jan ndahví tá in tá in a nu Ndióxi. A cáyhví toho ndó jáchi ndiyahví chága ndóhó nu Ndióxi a juú ga cuahá laa válí.

*Tá cahan cáxi ñayivi ña cúu ná cuéntá Jesús*

*(Mt. 10:32-33; 12:32; 10:19-20)*

<sup>8</sup> 'Mé a ndaa ná cahan i xihín ndó ña ndá nā cáxi tuhun nuú ñayivi ña cuahan nā cuéntá mí i já quea cachi mí i, da nachindahá Ndióxi nduu ñayivi saha ná ña mé a ndaa cúu ndusa nā cán cuéntá mí i. Já cachi i xihín tátó Ndióxi. <sup>9</sup> Joo ndá nā ná cachi xihín ñayivi ña co xini toho na yehé já quea ni yehé a ndícuni toho i nā ña cúu ná cuéntá mí i nu tátó Ndióxi.

<sup>10</sup> 'Ta ndá nā ná cahan núu sahá yehé, da nachindahá Ndióxi nduu ñayivi, cajú cáhnu ini i saha ná. Joo ndá nā ná cahan núu saha

ínima yíi Ndióxi, na cán cúu na a cája cáhnu ini toho Ndióxi saha.

<sup>11</sup> Tá ná tiin na ndohó ña cañehe na ndohó cuhun ndó nahma ndó nuú na sacuaḥa veñuhu á nuú na jutixia sahá i, a ndícani toho ini ndó ña ndá tuhun quea cahan ndó nuú na cán. <sup>12</sup> Jáchi tá ná xinu coo hora cahan ndó nuú na cán, jánaḥa ínima yíi Ndióxi nu ndo ndá tuhun nducú ñehe ndó nuú na cán —ñacachi Jesús xihin ná.

### *In da cuicá, da ñacaja quiñví*

<sup>13</sup> In táhan da ndácaan tañu ñayivi cuaha cán ñacahan da xihin Jesús já ñacachi da já xihin á:

—Maestro, cahan loho ndó xihin ñani i ña ná cahnda java da ñaha ña najándacoo tátá nde nuú nde tá nañihi na —ñacachi da xihin Jesús.

<sup>14</sup> Anda já nducú ñehe Jesús tuhun nu dá já ñacachi a já xihin dá:

—A juú juéxe cúu yehe já coo i cahnda java i ñaha ndó, vaha.

<sup>15</sup> Anda já ñacachi tucu a já xihin na ndúu cán:

—Cuni johu vaha ndó. Cuénta coo ndó ña ná a ndiáva nahá ini ndó canduu cuahá ñaha cuicá nu ndo. Jáchi a juú saha ña ndúu cuahá ñaha cuicá nu ndó chí cuu catacu nahá chága ndó, vaha —ñacachi Jesús.

<sup>16</sup> Anda já nasacu a in quiahva nu ná já ñacachi a já xihin ná:

—Ñasahin in da cuicá ta a juú quiahva nasahnu vaha ñaha nu ñúhu dá. <sup>17</sup> Anda já ñacasahá mé da cuicá cán ndícani ini da já ñacahan da já: “Ndáchí taán toho í cuahá nahá ñaha ñacana nu yo yóho jáchi coo ga nuú cañuhu a”, ñacahan da. <sup>18</sup> Anda já ñacahan tucu da já: “Ña caja í quea ndícani ndihi í yáca ní ñaha í já cavaḥa í ña náhnu chága. Ta cán taán yo ndihi ña ñacana nu yo ta cán taán yo tóco ndihi java ga ña cómi yo. <sup>19</sup> Anda já cachi i já xihin mí i: Sa cuahá ndivaha va ñaha nasacu vahún viti. Ta queta ña cusún tixi cuahá ndivaha cuia. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá cajii cuití ini vún, já va cachi i xihin mí i”, ñacahan da. <sup>20</sup> Joo ñacahan Ndióxi já ñacachi a já xihin dá: “Taa quiñví, sa mé

ñuú viti quivi vún. Ta tóco ndihi ña nasacu vahún jan a juú ña cusún cúu á. Ndá na cúu mé va na cuxu ña jan”, ñacachi Ndióxi xihin dá. <sup>21</sup> Quiñví ndivaha cája ñayivi tá ndája tútú na ñaha ñuyíví yóho joo co ñúhu ini na saha Ndióxi ña ná caja na ña cúni mé á. Sahá ña cán quea cúu ná na ndahví ndivaha nu mé á —ñacachi Jesús xihin ná.

### *Ndaa Ndióxi na cúu ndusa jahyi mé á (Mt. 6:25-34)*

<sup>22</sup> Tá nandihí já ñacahan Jesús xihin na xíca tuun xihin á cán já ñacachi a já xihin ná:

—A ndícani toho ini ndó sahá ña cuxu ndó catacu ndó ta ni saha jáhma candixi ndó.

<sup>23</sup> Jáchi cáhnu chága mé ndó a juú ga ña xíxi ndó xihin ña ndíxi ndó. <sup>24</sup> Candehé ndó rí naní ticacá jan. Co xútu rí ta ni co jáquee rí. Ta ni coo yáca nu taán rí ñaha rí. Joo sahan va Ndióxi ñaha cuxu rí ña ná catacu rí vatí laa va cúu rí. Ta mé ndó ndiyahvi chága ndó a juú ga laa jan. <sup>25</sup> A ndícani toho ini ndó jáchi coo toho a ñehe ndó ndícani ini ndó. Ni in túhún toho ndó a cúu ndaja jícó ndo mé ndó java metro chága sahá ña ndícani ini ndó. <sup>26</sup> Tá ta ni loho ña yóho a cúu caja ndó, ndía ndóho ndó ndícani nahá ini ndó caja ndó java ga ñaha, dá já.

<sup>27</sup> Candehé ndo ndá quiahva ndató sahnu ita. Co cája chúun a ta ni co cávaha jáhma á. Joo mé a ndaa ná cahan i xihin ndo ña ñúchí chága ita yóho ñacaja Ndióxi a juú ga jáhma vaha ndivaha nasandixi rey Salomón sanahá, da nasahin cuahá ñaha cuicá. <sup>28</sup> Candehé ndó ndaja ndaa vaha Ndióxi yucu ita vatí in tóo a viti ta itaan cáyi a jándihí sahá. Ta ndiyahvi chága mé ndó a juú ga yucu ita. Joo co cándusa ndó ña candaa mé á ndohó. Ña cán quea xíní ñúhú candee ini ndó Ndióxi ña quiahva tá quiahva mé á jáhma candixi ndó. <sup>29</sup> Ta a ndícani ini ndó ndaja caja ndó ñehe ndó ña cuxu ndó xihin ña coho ndó. <sup>30</sup> Jáchi ñayivi, na co xíní íchí cuénta Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuénta Ndióxi, mé a cúu tátá ndo ta xíní vaha mé a ña ndímaní nu ndó catacu ndó. <sup>31</sup> Joo ndítahan nu ndó ndiquiahva ndó mé ndó ndáha Ndióxi ña ná

cacomí a cuénta saha ndo já quiahva mé á nu ndo ña ndímaní nu ndo catacu ndó.

*Indiví cúu nu ndítahan ndaja tútú ñayivi ña vaha*

*(Mt. 6:19-21)*

<sup>32</sup> 'A cáyhvi toho ndó jáchi mé ndó cúu ndó tátuhun ndicachi válí janá i. Mé a ndaa chá va cúu ndó joo cájii ini Ndióxi ña cómi a cuénta saha ndo. <sup>33</sup> Jicó ndó ña cómi ndo ta jasá ndó ñaha nuú na ndímaní ñaha nuu. Jáchi quiahva já ndaja tútú ndó ñaha vaha indiví nuú cuhun ndo. Jáchi mé cán a ndíhi sahá ña vaha cómi ndo. Ta ni na cuíhná a cuú quíhvi na caja cuíhná ñaha ndó cán. Ta ni tiquíjii a cuú jándihi rí sahá ñaha ndó cán. <sup>34</sup> Jáchi nuú nandaja tútú ndo ña ndáyahvi nu ndo, cán coo ri ínimá ndo.

*Náha Jesús ña xíní ñúhú canduu tiahva ñayivi cuhun na xihín mé á*

<sup>35</sup> 'Xíní ñúhú canduu tiahva ndó candati ndó ndá hora ndicó coo tucu u quixi i ndiquehe e ndohó. <sup>36</sup> Xíní ñúhú cacuu ndó tátuhun mozo tá ndáti tiahva da ndicó coo xitoho da, da cuahan víco tándaha. Ndáti tiahva da cuná da yéhe nu dá tá ná xinu coo da caní ndáha dá yéhe. <sup>37</sup> Tahví nacuu mozo tá co quíjii da ndúu da tá ná xinu coo xitoho da. Mé a ndaa ná cahan i xihín ndo ña janda mé da cúu xitoho da cán ndiquehe ñahá da ta já cacoo da da nu mesa da ta já chicaan da coho cuxu mozo da. <sup>38</sup> Coó caja toho a ña ná xinu coo xitoho da java ñuú tájii á tá sa yati tiví, tahví nacuu mozo cán tá ndíta da ndúu da tá naxinu xitoho da nu dá. <sup>39</sup> Candehé ndo jáchi xíní ñúhú candaa ini ndó ña yóho. Tá xínii in dataa ndá hora cúni na cuíhná quíhvi na vehe da já queá a cúju da jáchi ndáa vaha da vehe da já ná a quíhvi na caja cuíhná na ñaha vehe da. <sup>40</sup> Quiahva já xínú ñúhú canduu tiahva ri ndohó va jáchi quixi tucu yehe, da nachindahá Ndióxi ndúu ñayivi mé quívi coo cáhán ndo quixi i —nacachi Jesús xihín ná.

*In mozo vaha xihín in mozo a váha*

*(Mt. 24:45-51)*

<sup>41</sup> Anda já nandaca tuhún Pedro Jesús já nacachi da já xihín á:

—Á nuú ndehe cuití nasacu ndó quiahva yóho á nasacu ndó ña nuú ndaja táhan ñayivi ndúu yóho.

<sup>42</sup> Anda já nacachi Jesús já xihín dá:

—Ña cáhan i yóho cáhan i ña xihín da tácu ini, da cája vaha ndusa. Cúu á tátuhun in mozo tá jándacoo xitoho da chuun ndáha dá ña ná quiahva da cuxu na java ga cúu mozo xihín dá cán. Anda já naquee mé xitoho da cuahan da. <sup>43</sup> Tahví nacuu mé mozo cán tá xínu coo xitoho da ta ndíñehe dá da cája da chuun ña nacandoo nu dá caja da. <sup>44</sup> Mé a ndaa ná cahan i xihín ndo ña quiahva xitoho da cán chuun nu dá ña ná cacomí da cuénta saha tóco ndíhi ñaha cómi xitoho da. <sup>45</sup> Joo da cúu mozo yóho tá ná casahá da cahan da ña cayancá ndivaha xitoho da ndicó coo da ta sahá ña cán queá casahá da cája xíxi da xihín java ga na cúu mozo xihín dá cán. Ta já cáa ga da casahá xíxi da ta xíhi da ta já xínii da. <sup>46</sup> Ta ndaja coo xinu coo xitoho mozo cán mé quívi coo cáhán da. Anda jáví jándoho quini xitoho da cán ini da jáchi coo nacaja da ña ndítahan caja da. Ta ndoho da yóho tá quiahva ndóho tóco ndíhi na sáa ini, mé na coo cája ña sáhdá xitoho na nu ná caja na.

<sup>47</sup> 'Tá ná candaa ini mozo ña cúni xitoho da caja da joo coo ín tiahva da caja da ña ta ni coo cúni da caja da ña sáhdá xitoho da nu dá, da cán cúu da ndoho ndivaha ini. <sup>48</sup> Joo tá ín in mozo ta coo cándaa vaha ini da ndá queá cúni xitoho da caja da ta ndaja coo cája da in ñaha ña coo táhán ini xitoho da xihín já queá chá cuití va ndoho ini da. Tá ná caja Ndióxi cuahá ñamaní xihín in ñayivi já queá ndítahan caja chúun cuaha ná nu mé á. Ta tá sa cándéé ini ñayivi inga na já queá ndinuhu ñamaní náhnu chága caça na cán ña ná caja na xihín ná.

*Cája Jesús ña sáhdá java táhan ñayivi*

*(Mt. 10:34-36)*

<sup>49</sup> 'Yehe naquixi i ñuyiví yóho cahnda java táhan i ñayivi já ná ñaha na cúni cuhun xoo mí i xihín na coo cúni cuhun xoo i. Ta ña yóho cúu á tátuhun naquixi i chícaan ñúhu i ñuyiví yóho. Ta cúni ña ná ndíhi quíi chuun naquixi caja i yóho. <sup>50</sup> Vaxi quívi ndoho ndivaha ini i ta a juú quiahva ndíhi ini i ndáti xinu coo mé quívi jan. <sup>51</sup> A cáhán toho

ndó ña naxinu i ñuyívi yóho caja i ña ná coo vaha ini ñayivi. Ña vaxi yehe caja i quea ná cahnda java táhan na. <sup>52</sup> Jáchí viti xihín chí nuu cacuu a tátuhun canduu uhun ñayivi in vehe joo a cúní táhan na sahá yehe jáchi ivi na cacuu cuéntá mí i ta uní na candají yehe. Á tá coo ta uní na quihvi ini yehe ta ivi na candají ri yehe. <sup>53</sup> Ta jári da cúu tátá caní táhan da xihín jahyi da sahá yehe. Ta jári ndicuíta dataa caní táhan da xihín tátá da sahá yehe. Ta jári najihí caní táhan na xihín jahyi jíhí na sahá yehe. Ta jári najihí caní táhan na xihín náná na sahá yehe. Ta jári ndicuíta najihí caní táhan na xihín sanu na sahá yehe. Ta jári ndicuíta najihí caní táhan na xihín xojo na sahá yehe —nacachi Jesús.

*Có cúní ñayivi candaq ini na yo cúu Jesús (Mt. 16:1-4; Mr. 8:11-13)*

<sup>54</sup> Anda já nacachi tucu Jesús já xihín ñayivi:

—Mé ndó tá xíní ndo ndicuíta vico vaxi a ñuu ndó chí xoo nu quea candii já cáhí ndó ña cuun javi ta chí cúun ndusa dó. <sup>55</sup> Ta tá xíní ndo vaxi tachí chí xoo sur já cáhí ndo ña ihní ndivaha coo ta chí ihní ndusa sahín. <sup>56</sup> Co cúu ndó tá quiahva ndaa ndó. Candaq vaha ini ndó ña cúu ñuyívi ta candaq ini ndó cahan ndó ndá quea coo tá sándehe ndó indiví. Joo co cúní ndó candaq ini ndó ña jánaha i nu ndo.

*Ndítahan caja vaha ndó xihín na co cúní ndohó (Mt. 5:25-26)*

<sup>57</sup> Ndávaha co tává vaha ndó cuéntá ndía quea vaha ta ndía quea a váha. <sup>58</sup> Tá sácú ini na saha ndó cuhun ndó vecaa ta ndáca táhan ndó xihín na cán cuahan ndó nuú na jutixia, xíní ñuhú nducú ndó ndá quiahva ndique táhan maní tucu ndó xihín ná nani xíca ndó íchi cuahan ndo. Já quea ná a cánehe na cán ndohó cuhun ndó nu juéxe jáchi da cúu juéxe cán ndiquiahva da ndohó ndáha policía ta policía cán chicaan da ndohó vecaa. <sup>59</sup> Mé a ndaa ná cahan i xihín ndo ña tá ndacaan ndó vecaa jan chí a cána ndó janda quiahva ná chahvi ndihi ndó ña yíca ndo nuú da cán já janí da ndohó —nacachi Jesús xihín ná.

## 13

*Cáhan Jesús ña ndítahan jándacoo ñayivi cuachi cája na*

<sup>1</sup> Mé tiempo já naxinu coo java na ndi-cani na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán quea cáhí na ña nacatáhan níi da naxihí xihín níi quíti, rí jóco da. <sup>2</sup> Anda já nacachi Jesús já xihín ná:

—Á cáhán ndo ña naxihí da Galilea yóho sahá ña ín chága cuachi da a juú ga java ga na Galilea. <sup>3</sup> A juú a já jáchi quiahva já ndihi ri saha ndohó va tá ná a jándacoo ndó cuachi cája ndó. <sup>4</sup> Sannah ndivaha já naxihí sahun uní taa jáchi nandicava in torre naní Siloé jata ná. Á cáhán ndo ña nandicava torre cán jata na yóho jáchi nasahin chága cuachi na a juú ga na ñuu Jerusalén. Joo co cúu á quiahva já. <sup>5</sup> Mé a ndaa ná cahan i xihín ndo ña quiahva já ndihi ri saha ndohó va tá ná a jándacoo ndó cuachi cája ndó —nacachi Jesús xihín ná.

*Sácú Jesús quiahva saha in titó ñuhú, dó co cána cuihi nuu*

<sup>6</sup> Anda já nasacu Jesús in quiahva nu ná já nacachi a já xihín ná:

—In dataa najánde da in titó ñuhú nu ñuhú dá. Ta tá nayaha tiempo já nasahan da sándehe da do ña á cána titó ñuhú nu do. Joo co mé rí nandiñehe dá. <sup>7</sup> Anda já nacachi da já xihín da ndáá ñuhú dá cán: “Cándehe, sa naxinu uní cuia já cuítí quixi i ndúcú u titó ñuhú nu yíto yóho. Ta coo ñaha cána nu do. Vaha chága ná candún do jáchi ndá chuun quea candichi uun dó cája tánu dó nu ñuhú i”, nacachi da xihín da ndáá ñuhú dá cán. <sup>8</sup> Anda já nacachi da ndáá ñuhú dá cán já xihín dá: “Quiahva ndó ñamaní, xitoho i ña ná coo too ga dó cuia víti ná jáyai i ñuhú saha do ta ná chicaan loho i tata saha do. <sup>9</sup> Ta xihín ña yóho jonáa cana cuihi nu do. Ta tá coo ñaha cána nu do já cahnda ndó do tá cúní ndo”, nacachi mozo cán xihín xitoho da —nacachi Jesús.

*Mé quivi ndiquehe ndée ñayivi ndája vaha Jesús in ña xíca tojo*

<sup>10</sup> Ta ndaja coo in quivi ndiquehe ndée ná já nasandacaan Jesús veñuhu jánaha tuhun Ndióxi nuú ñayivi. <sup>11</sup> Ta mé ini

veñuhu cán nasandacaan in ñáñáha, ñá quíhvi sahun uní cuia. In ínima quini cúu rí naquihvi ini ñá ta nacaja rí ñá ná nditojo ñá ta chí ni loho a cuú jándicaa ñá mé ñá. <sup>12</sup> Tá naxini Jesús ñá já nacana mé á ñá já nacachi a já xihín ñá:

—Ndaja vaha i yohó viti —nacachi Jesús xihín ñá.

<sup>13</sup> Anda já nachojó a ndáha á jata ñá chí mé hora já nandicaa yiquí cuñu ñá ta nacasáha ñá cája cáhnu ñá Ndióxi. <sup>14</sup> Joo mé da cúu sacuaaha veñuhu cán nacasáha ndícuehe da jáchi nandaja vaha Jesús ñáñáha cán mé quívi ndíquehe ndée ná. Já nacasáha cáchi da cán já xihín ñayivi ndúu ini veñuhu cán já:

—Ín iñu quívi núná nu yó cája chúun í ta tañu quívi já cuu quixi ndó catátá ndo tá cúni ndo. Joo a quíxi ndó catátá ndo quívi ndíquehe ndée yó —nacachi da xihín ná.

<sup>15</sup> Anda já nacachi Jesús já xihín da sacuaaha veñuhu:

—Co cúu ndó tá quiahva ndáa ndó. Cája mé ndó chuun quívi ndíquehe ndée yo tá ndaxí ndo tindiquí á búrró jana ndó sahan ndó jácoho ndó ri ticuí. <sup>16</sup> Ta viti candehé ndo ñáñáha yóho. Cúu ñá ñá naquixi chíchi Abraham ta sa ín sahun uní cuia naquehe cuehe ñá nacaja Satanás, mé tiñáha sacuaaha. Ta mé ndó cáhán ndo ñá a váha toho nacaja i ñá najaní i ñáñáha yóho ndáha cuehe ñá nandoho ñá tixi cuahá cuia. Joo mé a ndaa nanditahan nuú i janí i ñá ndahá cuehe yóho coo caja toho a cúu á quívi ndíquehe ndée yo —nacachi Jesús.

<sup>17</sup> Tá nacachi Jesús ñá yóho chí a juú quiahva nacacahan nuú na co cúni Jesús cán. Joo tóco ndihi java ga ñayivi cán cájii ndivaha ini na jáchi naxini na ñá cája Jesús ñá náhnu ndivaha.

*Sácú Jesús quiahva sahá in ndíqui mostaza*

*(Mt. 13:31-32; Mr. 4:30-32)*

<sup>18</sup> Tá ndihi já nacachi tucu Jesús já:

—Ná ndicani i nu ndó ndaja ín nu ndíquiahva ñayivi mé ná ndáha Ndióxi ñá ná cacomí a cuéntá saha ná. <sup>19</sup> Cúu á tátuhun in ndíqui mostaza ñá chíhin in dataa nu ñúhu dá. Ta mé ndíqui loho yóho sáhnu a janda quiahva ndúu a tátuhun in

yitó cáhnu nu xínu coo laa chójó ri táca ri nu ndáha do —nacachi Jesús.

*Sácú Jesús quiahva saha ndaja cája yusá naxiaa tá quee a xihín harina*

*(Mt. 13:33)*

<sup>20</sup> Anda já nacachi tucu Jesús já:

—Ná ndicani i nu ndo ndaja ín nu ndíquiahva ñayivi mé ná ndáha Ndióxi ñá ná cacomí a cuéntá saha ná. <sup>21</sup> Cúu á tátuhun tá cávaha na pan ta quee yusá naxaa xihín harina. Cúu á tátuhun tá cáva táhan in ñáñáha loho yusá naxaa xihín uní táhnda náhnu harina ñá ná jánañu a tóco ndihi mé yúsá cán —nacachi Jesús.

*Táhán ndivaha yéhe nuú quíhvi ñayivi cuhun na indiví*

*(Mt. 7:13-14, 21-23)*

<sup>22</sup> Nandíquehe Jesús íchi cuahan chí ñuu Jerusalén ta ndijáa ñuu náhnu xihín ñuu válí nu yáha janaña mé á tuhun Ndióxi cuahan.

<sup>23</sup> Ta ndaja coo nandaca tuhún in da Jesús já nacachi da já xihín á:

—Xitoho í, á chá cuití va ñayivi cacuu na cacu ndaa ínima cuhun chí indiví —nacachi da xihín Jesús.

Anda já nanducú ñehe Jesús tuhun já cáchi a já xihín dá:

<sup>24</sup> —Cúu á tátuhun ín in yéhe táhán loho nuú ndíhvi ñayivi indiví. Ñá cán quea xíní ñúhú ndó ndíhi ini ndó ndíhvi ndó chí yéhe loho cán jáchi cuahá ndivaha ñayivi ndítihvi na ñá quíhvi na joo a cúu quíhvi na. <sup>25</sup> Jáchi tá quiahva ín in xitoho vehe quiahva já ín Ndióxi. Jáchi tá ná ndicoo da cúu xitoho vehe cán chícaji tuun da víti yéhe vehe da já xínu coo ndó cándichi ndó jata véhe cáni ndáha ndó yéhe já cachi ndó já: “Á ndúyu ndó, xitoho i. Á a cája ndó ñamaní cuná loho ndó yéhe ná quíhvi nde”, cachi ndó xihín dá. Ta já nducú ñehe da cán tuhun nu ndó cachi da já xihín ndo: “Cuahán ndo jáchi co xíní toho i ndohó.”

<sup>26</sup> Ta já casáha mé ndó cachi ndó já xihín dá: “Cuahá tañu sa naxixi nde ta naxihi nde xihín ndo. Ta níi cáyé ñuu nde naxica nuu ndó najánaña ndó ñayivi.” <sup>27</sup> Anda já nducú ñehe da cán tuhun nu ndo já cachi da já xihín ndo: “Sa nacahan vi xihín ndo ñá co xíní toho i ndá na cúu ndohó. Caxoo ndíhi ndó nuú i jáchi cúu ndó ñayivi cája

ndinuhu ña núu.”<sup>28</sup> Ta cán ndusa queá cuacu cóhó ndo ta casáhá cahñá nuhu ndó xihín ña cojo ini ndó. Jáchi cán cuni ndó Abraham xihin Isaac xihin Jacob xihin tóco ndihi na profeta. Cuni ndó ña ndúu na indivi cán ta cómí Ndióxi cuéntá saha ná. Ta a juú quiahva tahnda ini ndó jáchi tavá xóo Ndióxi ndohó ña ná a ndíhvi ndó nu ndúu na cán.<sup>29</sup> Jáchi xinu ñayivi ndúu ndijáá ñuyíví nu Ndióxi ta ndaca nduu na nuú cacomí Ndióxi cuéntá sahá ñayivi.<sup>30</sup> Ta mé quivi cán já cuni ndó java ñayivi, na coo saha mé nuú ñayivi ta nduu na na ín chága saha nu Ndióxi. Ta cán cuni ndó java na ndíñehe jícó mé viti ta a cóo toho saha ná nu Ndióxi —ñacachi Jesús.

*Táhnda ini Jesús ta sácu a sahá ñayivi ndúu ñuu Jerusalén*  
(Mt. 23:37-39)

<sup>31</sup> Mé quivi já naxinu coo java na fariseo nu Jesús já ñacachi na já xihin á:

—Cuáhán inga ñuu cóun jáchi sácú ini Herodes cahni da yohó —ñacachi na xihin á.

<sup>32</sup> Anda já ñacachi Jesús já xihin ná:

—Cuáhán ndó cahan ndó xihin da catóo jándahvi ñayivi jan ta cachi ndó xihin dá ña tavá i ínima quini ñuhu ini ñayivi ta ndája vaha i na quíhvi ta caja tá caja i ña yóho janda quiahva ná xinu coo quivi jándihi i chuun yóho.<sup>33</sup> Joo sa mé Jerusalén jan quivi vi jáchi jan cúu nu sáhní na profeta. Ta viti ndítahan caca nuu yií vi íchi xíca i cuahan i yóho —ñacachi Jesús.

<sup>34</sup> Anda já ñacachi tucu Jesús já:

—Ndáhví nahá ñacuu ndó, na ndúu ñuu Jerusalén. Jáchi sáhní ndó na profeta. Ta ndícuíta ndó cáni ndó na ñachindahá Ndióxi nu ndó xihin yuu. Cuahá ndivaha tañu cúní jánditaca ndihi i ndohó joo coo ñaxeen ndó. Cúu á tá quiahva cája nduxú tá játaca rí jahyi válí rí tíxi ndíxi rí.<sup>35</sup> Ta viti cuni joho ndó ña cahan i xihin ndo. Vaxi quivi janí ndáha mé vehe ndó candoo a. Ta mé a ndaa ná cahan i xihin ndo ña a cúní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuéntá Ndióxi, xitoho í” —ñacachi Jesús.

## 14

*Tá nandaja vaha Jesús in da naquihvi cuiñu*

<sup>1</sup> Ta ndaja coo in quivi ndíquehe ndée ná já ñasahan Jesús ñaxixi a vehe in da cúu sacuaña nuú na fariseo. Ta java ga na fariseo cán ñacasáhá nání na Jesús ndúu na.<sup>2</sup> Ta mé yati nu Jesús cán ñasahiin in dataa, da ñaquihvi cuiñu yiquí cuñu.<sup>3</sup> Anda já nandaca tuhún Jesús na jánaha ley Moisés xihin na fariseo já ñacachi a já xihin ná:

—Á núná nu yó ndaja vaha i in da quíhvi mé quivi ndíquehe ndée yo, á coo núná toho nu yó cája i ña —ñacachi Jesús xihin ná.

<sup>4</sup> Joo táji ñasahiin yuhú na cán. Anda já nandaja vaha Jesús da quíhvi cán já ñacachi a xihin dá ña ná quee da cuhun da.<sup>5</sup> Ta já ñacachi a já xihin na fariseo cán:

—Mé ndó tá ndicava búrro á tindi qui jana ndo ini in táhvi chí ivi laá tavá ndó rí. Ta coo caja toho a á cúu á quivi ndíquehe ndée yo —ñacachi Jesús.

<sup>6</sup> Joo coo ñacuu nducú ñehe na tuhun nu Jesús.

<sup>7</sup> Anda já naxini Jesús ña jandá joho ndacaxi na ñataca cán nuú vaha cacoo na já najánaha nu ná ndíja vaha chága ndítahan caja na. Já ñacachi a já:

<sup>8</sup> —Tá ná cana in na yohó cuhun in víco tándaha, a ndúcú tohún cacoun nu sácco na náhnú. Jáchi cuu xinu coo in da ín chága saha a juú ga yohó.<sup>9</sup> Ta da ñacana yohó víco cán cuu cachi da já xuhun: “Quiahva nu ín cóun jan ná cacoo da yohó”, cachi da xuhun. Anda já cacahan nuun já queún cuhun cacoun janda nu ndíhí.<sup>10</sup> Ña ndítahan cajún queá cacoun janda nu ndíhí. Já queá tá ná xinu da ñacana yohó nu iún já cachi da já xuhun: “Amigo, cuáhán yaha nu ndúu na náhnú cóun.” Xihin ña yóho ndindita jícún nuú na ndúu coo nu mesa xixi xuhun cán.<sup>11</sup> Jáchi ndá na cája cáhnú mé, na cán cacuu na ñanuu ndáha joho. Ta na coo ndíñehe jícó mé, na cán cúu na ndicáhnú —ñacachi Jesús.

<sup>12</sup> Anda já ñacahan Jesús xihin mé da ñacana nahá cán já ñacachi a já xihin dá:

—Tá ná cavaha cuahún ña cajáhnú na á ña cajíni na, a cána tohún na cúu amigún jan ni na cúu ñanún jan ta ni a cána tohún

na cúu táhún ta ni a cánún na cuicá ndúu yati xuhun jan. Jáchí tá ná caja na víco cana ri na jan va yohó ta xihín ña jan táhnda cuéntá sahá ñamaní ñacajún xihín na cán. <sup>13</sup> Ña ndítahan cajún tá ná cavahún in víco queá canún na ndahví ta canún na réncō ta canún na cuaá. <sup>14</sup> Ta já cajii ínún jáchí na cán a cúu toho caja na chahvi na ñamaní ñacajún xihín ná ñuyívi yóho. Joo vaxi quiví tá ná nditacu ñayivi ñasañehe ínima vaha ñuyívi yóho já chahvi Ndióxi ñamaní ñacajún jan – ñacachi Jesús xihín ná.

*Sácú Jesús quiahva sahá in dataa, da ñacana cuaha chá ñayivi ña ná cuhun na víco vehe da*

*(Mt. 22:1-10)*

<sup>15</sup> Tá ñaxini johō in táhan da ín coo nu mesa xihín Jesús cán ña yóho já ñacachi da já xihín á:

–Tahví ñacuu na ná ñehe táhvi cuhun indiví ña ná cacomí Ndióxi cuéntá sahá na –ñacachi da xihín Jesús.

<sup>16</sup> Anda já ñasacu Jesús in quiahva nu dá já ñacachi a já xihín dá:

–In dataa ñacavaha da in víco cáhnu ta ñacana cuahá ndivaha da ñayivi. <sup>17</sup> Ta tá sa ñaxinu coo hora cajini na já ñasahnda da chuun nu mozo da ña ná cuhun da cana da na ña quixi na ndaca nduu na nu mesa. Já ñacachi da já xihín ná: “Naha quíi ndo jáchí sa ñacandíví ndihi ñaha”, ñacachi mozo xihín na cán. <sup>18</sup> Joo tóco ndihi na cán ñacasáhá na cáhan na ña a cúu toho cuhun na. Ta in táhan da cán ñacasáhá cáhí da já xihín mé mozo cán já: “Jaca ñaxeen uun i in ñúhu ta xini ñúhu cuhun i candehé e nu á. Cáhnu coo ínún”, ñacachi da xihín mozo cán. <sup>19</sup> Ta inga da ñacachi da xihín mé mozo cán já: “Jaca ñaxeen e uhun yúntá tindiquí ta viti cuni cuhun i coto ndojó i ri. Cáhnu coo ínún”, ñacachi da xihín mozo cán. <sup>20</sup> Ta inga tucu da ñacasáhá cáhí da já: “Jaca ñatandaha vi sahá ña cán queá a cúu toho cuhun i”, ñacachi da xihín mozo cán. <sup>21</sup> Tá ñandicó coo mozo cán nuú xitoho da já ñandicani ndihi da nuú xitoho da ña ñacachi na cán xihín dá. Anda já ñacasáhá ñandicuehe xitoho da cán já ñacachi tucu da já xihín mozo da: “Ta viti cuahán camún ndijáá cáyé ñuu játacún na ndahví xihín na réncō

xihín na cuaá. Cañehún na quisún yóho ná cuxu na”, ñacachi xitoho da cán xihín dá. <sup>22</sup> Tá ñandihí já ñasahan mozo cán já ñacaja da ña ñacachi xitoho da xihín dá. Ta tá ñandicó coo da já ñacachi da já xihín xitoho da: “Sa ñacaja i tá ín ñasahnda ndó nuú i. Joo yójo tá yójo nuú cuu canduu chága na”, ñacachi da xihín xitoho da. <sup>23</sup> Anda já ñacachi xitoho da já xihín dá: “Cuahán ndijáá cáyé xihín ndijáá íchí ta xihín ña ndúsa játacún na ña ná quixi na já ná chutú vehe e. <sup>24</sup> Jáchí ni in túhún toho táhan na ñacana i quixi vehe e nu cuítí cán, a quixi ga na cajini na ña ñacatáhan vehe e”, ñacachi da xihín mozo da –ñacachi Jesús.

*Ndítahan jándacoo í ndá ña ndáyahvi nu yo tá ta mé a ndaa cuni yó candico yó Jesús*

*(Mt. 10:37-38)*

<sup>25</sup> Cuahá ñayivi ndico na jata Jesús cuahan na. Anda já ñandicó coo játa nu Jesús já ñacachi a já xihín ná:

<sup>26</sup> –Ndá na cuni jácuaha xihín i xini ñúhu quihvi ini chága na yehe a juú ga tátá na xihín náná na. Ta xini ñúhu quihvi ini chága na yehe a juú ga ñájihí na á jahyi na á ñani na á quiahva na. Ta xini ñúhu quihvi ini chága na yehe a juú ga mé ná. <sup>27</sup> Ta ndá na co ndico yehe sahá ña yíhvi na quivi na, mé a ndaa coo saha toho na cacuu na cuéntá yehe. <sup>28</sup> Tá cuni ndó cavaha ndó in vehe jícó ña cája ndó queá tavá vaha ndó cuéntá ña á queta jjuhún ndo á a queta já ná jáxinu ndó ña. <sup>29</sup> Jáchí tá ná a tává jihna ndó cuéntá ta casáhá ndó cavaha ndó vehe ndó joo tá ñandihí co queta ga jjuhún ndó ña ná jáxinu coo ndó ña já queá cacahan nuu ndo jáchí casáhá ñayivi cuacu ndaa na ndohó. <sup>30</sup> Já cachi na já xihín ndo: “Taa jan ñacasáhá da cavaha da vehe da joo coo ñacuu jáxinu dá ña”, já cachi na cuacu ndaa na ndohó –ñacachi Jesús.

<sup>31</sup> Anda já ñacachi tucu Jesús já:

–Tá ná cani táhan in rey, da cómi uxu mil soldado xihín inga rey, da cómi oco mil soldado já queá xini ñúhu ndicani vaha ini da ña á cuu quee vaha da xihín da inga rey cán tá ná quihvi táhan da xihín dá. <sup>32</sup> Ta tá ñatavá vaha da cuéntá ña a cúu quee vaha da xihín rey, da cómi oco mil soldado cán janda xicá va ín da já chindahá da



java nataa ña ná cuhun da caca da ñamani nuú inga rey cán ña ná ndico va tondóhó. <sup>33</sup> Quiahva já ín ri xihín ndóhó va. Ndá ndóhó, na co cuni jándacoo tóco ndihi ña cómi ndo sahá yehe já quea coo saha toho ndó cacuu ndó cuénta yehe —nacachi Jesús.

*Cahan Jesús ña tá jándacoo ñayivi ichi cuénta mé á cúu ná tátuhun ñii, ña co óhva ga (Mt. 5:13; Mr. 9:50)*

<sup>34</sup> Anda já nacachi tucu Jesús já:

—Ña vaha ndivaha cúu ñii yívi na joo coo chuun toho a tá co óhva ña. <sup>35</sup> Mé ñii, ña co óhva ga jan ni co váha ña jácana í nu ñúhu yo jáchi co ndáhá toho ñúhu yo cája ña. Ña cája na xihín ñii jan quea sátá va na ña. Na ín johó, ná cuni johó na —nacachi Jesús.

## 15

*Sácú Jesús quiahva sahá in ndicachi, ri nandiñúhú (Mt. 18:10-14)*

<sup>1</sup> Cuahá na játaca jiuhún cuénta impuesto xihín cuahá na cája cuachi nacasáhá na cáyati na nu ín Jesús jáchi cuni na cuni johó na nu cahan mé á. <sup>2</sup> Sahá ña cán quea nacasáhá na fariseo xihín na jánaha ley Moisés cahan núu na sahá. Já cáchi xihín táhan na já:

—Taa jan ndiquehe vaha da ñayivi cája cuachi ta xíxi da xihín ná —cáchi xihín táhan na cán.

<sup>3</sup> Anda já nasacu Jesús in quiahva nu ná já nacachi a já xihín ná:

<sup>4</sup> —Mé ndó tá cómi ndo in ciento ndicachi ta tá in cuití ndiñúhú in ndicachi jana ndo ña cája ndó quea jándacoo ndó comi jico sahun comi rí cán yucu ta já quee ndó cuahan ndó ndinducú ndó rí nandiñúhú cán janda quiahva ndiñehe ndó rí. <sup>5</sup> Ta tá ndiñehe ndó rí já cávatá ndo já quehe ndó rí chinúu ndó rí sahá jiqui ndo vaxi ndó. <sup>6</sup> Ta tá xinu coo ndó vehe ndó já játaca ndó ñani táhan ndo xihín na xini táhan xihín ndó. Já casáhá cáchi ndó já xihín ná: “Xini ñúhú cajii íni ndó xihín i jáchi cajii íni i sahá ña nandiñehe e ndicachi janá i, rí nandiñúhú cán”, cáchi ndó xihín ná. <sup>7</sup> Mé a ndaa ná cahan i xihín ndo ña quiahva já ta janda chága ví cajii ini na ndúu indivi tá jándacoo in ñayivi cuachi cája na a juú ga sahá comi

jico sahun comi ñayivi, na cája tá cája ña vaha.

*Sácú Jesús quiahva sahá in jiuhún, ña nandiñúhú*

<sup>8</sup> Ta viti ná cahan tucu u inga quiahva xihín ndo. In ñañaha nasahin uxu jiuhún caa ña yahvi ndivaha nu ña. Ta tá ndiñúhú in táhan ña cán já ndicahmi ña ñúhu ta tíhvi ña vehe ña jáchi ndihi ini ña ndinducú ña ña ta vii vii ndinducú ña ña janda quiahva ná ndiñehe ña ña. <sup>9</sup> Ta tá sa nandiñehe ña ña já játaca ña ñani táhan ña xihín na xini táhan xihín ña já casáhá cáchi ña já xihín ná: “Xini ñúhú cajii íni ndó xihín i jáchi cajii ini i sahá ña nandiñehe e jiuhún i, ña nandiñúhú”, cachi ña cán —nacachi Jesús.

<sup>10</sup> Anda já nacachi tucu Jesús já:

—Mé a ndaa ná cahan i xihín ndo quiahva já cajii íni tátó Ndióxi ndúu indivi tá jándacoo in ñayivi cuachi cája na —nacachi Jesús.

*Tá najándacoo in dataa tátá da ta naquee da cuahan xicá da*

<sup>11</sup> Anda já nasacu Jesús in quiahva nu ná já nacachi a já:

—In dataa nasahin ivi jahyi ta da. <sup>12</sup> Ta da loho chá cán nacachi da já xihín tátá da: “Taá i, á a váha ná ndicahnda va ndó ñaha cómi ndo já ná ndiquehe e ña cáni nuú i ndiquehe e”, nacachi da cán xihín tátá da. Anda já nasahnda java tátá da ñaha, in táhnda naquee mé dá ta in táhnda naquee ñani da. <sup>13</sup> Ta chá va quivi nayaha já najicó ndihi da loho chá cán ñaha ña ñehe dá nu tátá da ta xihín jiuhún nacana cán naquee da cuahan xicá ndivaha da chí ñuu tóho. Ta cán nacasáhá da játiví ndaja nacuu johó da jiuhún da ña cája da ña núu. <sup>14</sup> Ta tá sa najativí ndihi da jiuhún da já naxinu in tama ndeé ndivaha mé nu ín da cán. Já nacasáhá naxinu joco nu dá ta nacasáhá cuico da. <sup>15</sup> Anda já naquee da nasahan da nducú da chuun caja da nuú in dataa mé nu ín da cán. Ta nasahan da cán chuun nu dá ña ná cuhun da candaa da cóchi janá da cán. <sup>16</sup> Ta tá cuni coo ndiava já cuni coo ña sáxi cóchi cán. Ta chí caxi da ña cán janda quiahva chutú tixi da cuni da. Joo co sahan na ña nu dá. <sup>17</sup> Anda já nacasáhá da ndicani ini da

já naçahán da já: “Cuaha chá mozo táhan na cája chúun nu tátá i chí yójó johó ñaha xixáhan na ta yóho xihí va yehe joco ín i. <sup>18</sup> Ña caja i quéa ndicó coo tucu u nu ín tátá i ta já cachi i já xihín ná: Tátá maní i, naçaja i cuachi nu Ndióxi ta naçaja ri cuachi nu ndóhó va. <sup>19</sup> Ta chí coó saha mí vi cacuu u jahyi ndó sahá ña naçaja i. Ndiqeehe ndó yehe ná cacuu u tátuhun in mozo va ndó, já cachi i cuhun i nu tátá i”, naçahán da. <sup>20</sup> Anda já naqeehe da íchi cuanúhu dá vehe tátá da.

“Ta janda xíca va vaxi da já naxini tátá da mé dá já nandicuni a da. Ta naçahvi ini a saha dá. Já xínu a naçahan ñehé a da já nanumi a da ta naçatí yúhu á sajóho da. <sup>21</sup> Anda já naçachi da já xihín tátá da: “Tátá maní i, naçaja i cuachi nu Ndióxi ta naçaja ri cuachi nu ndóhó va. Ta chí coó saha mí i cacuu u jahyi ndó”, naçachi da xihín tátá da. <sup>22</sup> Ta ndaja coo tátá da naçasáhá cáhan xihín java ga mozo já naçachi a já xihín ná: “Cama ndó ta tavá ndó jáhma, ña vaha ta jácandixi ndó jahyi i. Ta chicaan ndó in jéhe nducu ndáha dá. Ta chicaan ndó ndusa saha dá. <sup>23</sup> Ta cañehe ndó chélo, rí ndató nandaha jan já ná quivi rí cuxú jáchi caja i in víco viti. <sup>24</sup> Jáchi jahyi i yóho tá naqee da cuahan da naçahán i naxihí da. Joo viti nandicó coo da nuú i. Sahá ña cán cúu á tátuhun nanditacu tucu da. Naçacuu da tátuhun da nandiñúhu joo viti nandee va da”, naçachi tátá da cán. Anda já naçasáhá na cája na víco.

<sup>25</sup> Joo ndaja coo da cúu ñani da, da sacuaça chága cán, ndácaan da cája chúun da yúcu va. Ta tá nandicó coo da já naxini johó da tívi musica ta cáxita sáhá na. <sup>26</sup> Anda já naçana da in da cája chúun cán já nandaca tuhún ñahá da ndía cúu. <sup>27</sup> Anda já naçachi da cája chúun cán xihín dá: “Cúu víco jáchi nandicó coo ñanún. Ta naçahnda tátún chuun ña ná quivi chélo, rí ndató nandaha cán jáchi cáji iní na ña naçasaa vaha ñanún ta coo a nandoho da”, naçachi da cán. <sup>28</sup> Joo ndaja coo da sacuaça cán najoo da ta chí coó naxeen da quihvi da nu cúu víco cán. Sahá ña cán naqueta tátá da jata véhe já cáhan ndahví a xihín dá ña ná quihvi da. <sup>29</sup> Anda já naçasáhá

cáchí da já xihín tátá da: “Taá i, sa cándaa vaha ini ndó ña sa cuahá ndivaha cuia cája chúun i nu ndó ta cája i tóco ndihi ña sáhdá ndó nuú i caja i. Joo ni in tuhún toho tañu coo naçahan ndó ni in tijúhu loho nuú i ña ná caja i in víco loho cuxu u xihín na xíní táhan xihín i. <sup>30</sup> Joo viti naçahní ndó chélo, rí ndató nandaha jan, ña cája ndó víco jáchi naçasaa ñani i jan. Ta mé da jan naxica nuu da najátiví ndaja naçuu da jiuún ndo xihín najihí xíca jii”, naçachi da cán xihín tátá da. <sup>31</sup> Anda já naçachi tátá da já xihín dá: “Candehé jahyi a. Mé a ndaa níi tiempo ín xihín i. Ta ñaha mé vún cúu ndihi ña ín nuú i. <sup>32</sup> Joo mé a ndaa ndítahan nu yo caja i víco ta cajii iní yo viti jáchi nandicó coo ñanún, mé da naçahán yo ña naxihí. Ta viti naçasaa da cúu á tátuhun nanditacu tucu da. Naçacuu a tátuhun nandiñúhu da joo nandiñehe yó da viti”, naçachi a cán xihín jahyi a —naçachi Jesús.

## 16

*Ndíndaa chuun ndáha in mozo jáchi coo naçaja vaha da nuú xitoho da*

<sup>1</sup> Anda já naçacu tucu Jesús inga quiahva nuú na xíca tuun xihín á. Já naçachi a já xihín ná:

—Naçahin in taa cuicá ta naçahin in da ndáa ñaha da. Joo java ñayivi naçahan na chicaan na cuachi jata dá nuú xitoho da ña játiví ndaja naçuu johó da ña cúu ñaha xitoho da. <sup>2</sup> Anda já naçana xitoho da mé dá já naçachi da já xihín dá: “Johó cáchi ñayivi naquixi na cáhan na sahun sahá ña cán quéa táxi i cuéntá nuun ña ndicanún nuú i ndaja cáa chuun naçajún jáchi ndindaa chuun ndáhun ta a cácuu gaún da ndáa ñaha i”, naçachi xitoho da cán xihín dá. <sup>3</sup> Anda já naçasáhá da cúu mozo cán ndícani ini da já naçahán da já: “Ndía caja i viti jáchi ndindaa va chuun ndahá i caja xitoho i. Ta co ndée toho i caja i chuun vee. Ta tá ná caca nuu i cuati i ta cacahan va nuú i. <sup>4</sup> Sa xíní vi ndía caja i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, naçahán da. <sup>5</sup> Anda já naçana da tá in tá in na yíca nuú xitoho da. Ta tá naxinu da nu cuítí cán nu dá já nandaca tuhún ñahá da já naçachi

da já xihín dá: “Ndaja yícún nuú xitoho i”, ñacachi da xihín da yíca cán. <sup>6</sup> Já ñanducú ñehe da cán tuhun já ñacachi da já: “In ciento lata síti yíca i nuú xitohún”, ñacachi da cán xihín dá. Anda já ñacachi da cúu mozo cán já xihín dá: “Candehé nu tutu yóho ndáa ndaja yícún nuú xitoho i. Joo cacoo quíi jan ta cahyí ña yícún ivi jico uxu lata síti cuití va”, ñacachi mozo cán xihín da yíca nuú xitoho da cán. <sup>7</sup> Tá ñandihi já ñandaca tuhún da inga da yíca nuú xitoho da já ñacachi da já xihín dá: “Ta yóho ri ndaja yícún nuú xitoho i”, ñacachi da. Anda já ñanducú ñehe da yíca cán tuhun nu dá já ñacachi da já xihín dá: “In ciento maquila trigo yíca i nu dá”, ñacachi da cán. Anda já ñacachi tucu da ndáa ñaha cán já: “Candehé yóho ndáa ndaja yícún. Joo cacoo quíi jan ta cahyí ña yícún comi jico maquila trigo cuití va”, ñacachi da ndáa ñaha cán xihín dá. <sup>8</sup> Tá ñandihi já ñacachi xitoho da xihín dá ña mé a ndaa cúu dá in da ndíchi jini jáchi xihín ña ñacaja da cán candoo vaha da nuú ñayivi yíca nuú xitoho da vatí coó ñacaja vaha da nuú xitoho da — ñacachi Jesús xihín quiahva sácú a nuú na xíca tuun xihín á cán.

Anda já ñacachi tucu a já xihín ná:

—Ñayivi cátóo canduu vaha ñuyiví yóho xini vaha chága na ndaja cája na candoo vaha nu táhan na a juú ga na sa xíca íchi cuéntá Ndióxi.

<sup>9</sup> Ñayivi ndúu ñuyiví yóho cája na ña núu xihín ña cómi na. Joo ndóhó, xini ñuhú caja ndó ndinuhu ña vaha xihín ña cómi ndo. Jáchi ña jan quéa cuni Ndióxi caja ndó. Jáchi tá ná xinu quivi quivi ndó já ndiquehe vaha na ndóhó indivi sahá ña ñacaja vaha ndó xihín ña ñasacomí ndo.

<sup>10</sup> Ta ndá da xihín ndinuhu ini ndáa da ñaha da vatí loho cúu á quiahva já caja ri da candaa da ñaha da tá cuaha cúu á. Joo ndá da co ndáa da ñaha da xihín ndinuhu ini da vatí loho cúu á quiahva já a candaa vaha da ñaha da tá cuaha cúu á. <sup>11</sup> Ta tá co ndáa vaha ndó ñaha ñuyiví yóho já quéa ni Ndióxi a quiahva toho a ñaha cuéntá indivi nu ndo jáchi a catiahva ndó candaa ndó ña. <sup>12</sup> Ta tá co tiáhva ndó candaa ndó ña ñasahan too inga na nu ndo, náha ña a cúu ndiquiahva

na ña cacuu ñaha mé ndó nu ndo jáchi a catiahva ndó candaa ndó ña.

<sup>13</sup> Ni in tuhún toho mozo a cúu caja chúun nuú ivi xitoho. Jáchi candají da in xitoho da ta inga xitoho da quihvi ini chága da. Á tá coó ta caja ndívi vaha da chuun nuú in xitoho da ta inga da cán a cája chúun vaha da nuú. Ta quiahva já in ri xihín ndóhó va jáchi a cuú caja cáhnu ndó Ndióxi tá chínúu ndó ínima ndó jatá jjuhún ndo — ñacachi Jesús.

<sup>14</sup> Ta nu cáhan Jesús cán ndíta na fariseo, na cátóo ndivaha jjuhún táa johó na nu cáhan mé á. Ta ñacasahá na sácú ndaa na Jesús. <sup>15</sup> Anda já ñacachi Jesús já xihín ná:

—Cája ndó tátuhun cúu ndó ñayivi vaha nuú ñayivi joo sa xini vaha Ndióxi ínima ndo. Ndá ña cáhvi ini ñayivi ndáyahvi chága, ña jan quéa co ndáyahvi nu Ndióxi — ñacachi Jesús xihín ná.

*Ndítahan nuú ñayivi caja na ña ñasahnda Ndióxi anda quiahva ná naá saha ñuyiví xihín indivi*

<sup>16</sup> Anda já ñacachi tucu Jesús já:

—Janda tá cámaní xinu Juan, da ñacaja ndúta ñayivi já ñasahin ley Moisés xihín ña najánaha na profeta sanahá. Joo viti ndijáa ndícuíta nuu tuhun Ndióxi cuahan ña vaxi quivi cacomí Ndióxi cuéntá sahá ñayivi. Ta ndá na cuni ndiquiahva na mé ná ndáha Ndióxi ndítahan nu ná ndíhi ini na ndíhvi na íchi cuéntá mé á.

<sup>17</sup> Joo janda quiahva ná naá saha ñuyiví xihín indivi ndítahan nuú ñayivi caja na tóco ndíhi ña sáhdá ley. Jáchi janda vaha chága in a ná ndíhi sahá ñuyiví xihín indivi a juú ga ña ná ndíhi sahá in tuhún tuhun ndácaan nu ley Moisés — ñacachi Jesús.

*Tá jándacoo táhan na sa ñatandaha (Mt. 19:1-12; Mr. 10:1-12)*

<sup>18</sup> Anda já ñacachi tucu Jesús já:

—Tá jándacoo in dataa ñájihí da ta tándaha dá xihín inga ñáñaha já quéa cája da cuachi nu Ndióxi. Ta ndá da tándaha xihín in ñáñaha, ña najándacoo yíi, cája ri da cán va cuachi nu Ndióxi — ñacachi Jesús.

*Ña ñandoho in da cuicá xihín ña ñandoho in da naní Lázaro*

19 Ndícani Jesús nuú ñayivi já ñacachi a já xihín ná:

—Ñasahiin in da cuicá ta a juú quiahva vaha jáhma ñasandixi da ta chí a juú quiahva ñúchí ñacaja cutú da vehe da jáchi ndijáá níi quivi ñasacaja da víco nu xíxáhan cuicá ndivaha da. 20 Ta ñasahiin in da ndahví naní Lázaro. Quíhvi da ta ndóho da cuehe ndíhi táhyi. Ta ndahví cáa da íin coo da nu ñúhu yuyéhé da cuicá cán. 21 Ta mé da ndahví yóho cúni da jáchutú da tixi da xihín ña ndícava nu mesa da cuicá cán. Ta xihín ña ndeé quíhvi da ndahví yóho chí janda tina xínu coo rí yácó ndaa rí nuú ndíhi ñanana níi da cán. 22 Ta ndaja coo in quivi ñaxihí da ndahví cán. Já ñaxinu tátó Ndióxi já ñéhe na da cuahan da coo da indivi nu íin Abraham. Ta jári da cuicá cán va ñaxihí da ta ñasahan na najánduxu ná da. 23 Ta nani ndóho ini da cuicá cán ndácaan da indayá já ñandiñehe da nuú dá. Já ñaxini xicá da Abraham. Ta ñaxini da íin Lázaro xihín dá. 24 Anda já ñacasáhá da cuicá cán cáyuhú da já ñacachi da já: “Tátá Abraham, candahví loho ini ndó yehe. Ta ná chindahá ndó Lázaro ná quixi da yóho quiahva loho da ticuú jándaxi loho da yaá i jáchi ndóho ndivaha ini i indayá yóho nu cáyi ñuhú ita.” 25 Anda já ñacachi Abraham já xihín dá: “Jahyi a, xíní ñuhú ndicuhun inún ña vaha ndivaha ñasahiún ñuyíví. Ta Lázaro yóho ndahví ndivaha ñandoho da ñuyíví sahá ña cán quea coo ndóho ga ini da yóho viti nani ndóho inún jan viti. 26 Ta a cúu saa toho Lázaro nu íin jan jáchi íin in táhvi cúna ndivaha tañu ndehe, na ndúu xoo chóho xihín ndóhó, na ndúu xoo chí jan. Sahá ña cán quea a cuú cuhun na ndúu xoo chóho chí jan ta ni na ndúu xoo chí jan a cuú quixi xoo chóho”, ñacachi Abraham xihín da cán. 27 Anda já ñacachi da cuicá cán já xihín Abraham: “Tá ta já ta caja loho ndó ñamani, tátá Abraham ña ná chindahá loho ndó Lázaro ña ná cuhun da vehe tátá i 28 ná cahan loho da xihín na vehe e. Jáchi ndúu uhun ñani i ta coo cúni i ña ná quixi na cán yóho ndoho ini na tá quiahva ndóho ini i viti”, ñacachi da cuicá cán xihín Abraham. 29 Joo ñanducú ñehe Abraham tuhun nu dá já ñacachi da já xihín dá: “Sá íin va ley ñacahyí Moisés xihín ña ñacahyí na profeta

nuú na cán. Vaha va ná caja na ña cáchi a”, ñacachi Abraham xihín dá. 30 Anda já ñanducú ñehe da cuicá cán tuhun nu Abraham já ñacachi da já xihín dá: “Mé a ndaa quea cahan ndó jan, tátá Abraham. Joo vaha chága ná chindahá ndó in táhan na sa ñaxihí já ná cahan na xihín ñani i já ná jándacoo cama na cuachi cája na”, ñacachi da xihín Abraham. 31 Anda já ñacachi tucu Abraham já xihín dá: “Tá coo cúni ñanún caja da ña ñacahyí Moisés xihín ña ñacahyí na profeta quiahva já a cándusa toho ri na ndiquehe vaha na in ndii tá ná nditacu a cuhun a cahan xihín ñanún”, ñacachi Abraham xihín da cuicá cán —ñacachi Jesús xihín ñayivi.

## 17

*Tá jácahan táhan ñayivi caja na cuachi*  
(Mt. 18:6-7, 21-22; Mr. 9:42)

1 Anda já ñacachi Jesús já xihín na xíca tuun xihín á:

—Níi tiempo quixi ñaha ña cája ña ná ndicají ini ñayivi caja na cuachi. Joo ndahví ñacuu na tá ná jándicava na inga na nuú cuachi. 2 Janda vaha chága ná candico in yuú vojó jico ná ta ná ndíhi saha ná cahá tañuhú a juú ga ña jándicava na na ndahví yóho nuú cuachi. 3 Cuéntá coo ndó xihín ña cája ndó.

“Tá ná caja ñani táhan ndó cuachi nu ndo, jánani ndó da. Ta tá ná tahvi ini da saha cuachi ñacaja da, caja cáhnu ini ndó saha dá. 4 Ta vatí usa táhndá ná caja da cuachi nu ndo in quivi ta já vaxi tucu da nu ndo usa táhndá ta já casáhá cáchi tucu da xihín ndo ña a ndícó coo ga da caja da ña já ndítahan nu ndó caja cáhnu ini ndó saha dá —ñacachi Jesús.

*Cúni na xíca tuun xihín Jesús candeé cáhnu chága ini na mé á*

5 Tá ñandihi já ñacachi na xíca tuun xihín Jesús cán já xihín á:

—Vá ná caja ndó ña ná candeé chága ini nde ndohó —ñacachi na xihín á.

6 Anda já ñacachi Jesús já xihín ná:

—Tá ná candeé ini ndó yehe vatí cúu á tátuhun in ndiquí mostaza cuu cachi ndó xihín in yíto cáhnu ña ná cuhun dó candichi dó ini tañuhú ta chí já ndusa coo.

### *Ña ndítahan caja in da nuú xitoho da*

<sup>7</sup> Tá íin in mozo ndo ta chindahá ndó da yúcu ña ná tiin da yaṭa á candaa da quití jana ndo ta tá ná ndicó coo da cán já ama ná cachi ndó xihín dá ña ná yaḥa da cacoo da nu mesa cuxu da. <sup>8</sup> Ña caja ndó quéa cachi ndó já xihín dá: “Jácatáhan ñaha ná cajíni i ta caja ndívi ná cuxu u. Ta tá sa nandíhi naxixi i já cuxu mún tá cúnun”, ña jan va quéa caḥan ndó xihín mozo ndo. <sup>9</sup> Ta ama ná ndiquiahva ñayivi ndixahvi nu mozo na tá nandíhi naṭaja da in chuun naṣahnda na nu dá caja da. <sup>10</sup> Ta quiahva já ndítahan coo ri xihín ndóhó va. Tá ná ndíhi naṭaja ndó tóco ndíhi chuun naṣahnda Ndióxi nu ndo já ndítahan nu ndó cachi ndó já: “Mé nde cúu nde mozo coo saḥa ta naṭaja cuití va nde chuun ndítahan nuú nde caja nde”, já ndítahan cachi ndó —naṭachi Jesús xihín na cán.

### *Tá nandaja vaḥa Jesús uxu ṭaa ndóho cueḥe táhyi*

<sup>11</sup> Ta nani xíca Jesús cuḥan chí ñuu Jerusalén já nayaha chí xoo nu íin lindero na Samaria xihín na Galilea. <sup>12</sup> Ta tá naxinu coo a in ñuu loho já naqueta uxu ṭaa ndóho cueḥe táhyi nu á joo naṣacuṭa xíca da nu á. <sup>13</sup> Já naṭasáhá cáyuhú da nu Jesús já naṭachi da já xihín á:

—Jesús, maestro, candáhvi loho ini ndó ndeḥe —naṭachi da xihín Jesús.

<sup>14</sup> Tá naxini Jesús ndíhuxu da cán já naṭachi a já xihín dá:

—Cuáhán ndó naḥa ndó mé ndó nuú na cúu jutú —naṭachi Jesús xihín dá.

Ta nani xíca ndíhi da cuḥan da nandivií yiquí cuñu da ta nandindaa cueḥe da. <sup>15</sup> Ta ndaja coo in táhan ndíhuxu da cán tá naxini da ña nandivií yiquí cuñu da já naṭavatá ndivaha da. Ta naṭasáhá da cája cáhnu da Ndióxi cáyuhú cóhó da já nandicó coo da nu Jesús. <sup>16</sup> Já naṭaxítí da nu á janda quiahva naxinu taan da nu ñúhu jáchi ndíquiahva ndivaha da ndixahvi nu á. Ta mé dataa yóho cúu dá da Samaria. <sup>17</sup> Anda já naṭachi Jesús já xihín dá:

—Uxu cúu da nandivaha naṭaja i. Joo in da cán coo naxeen toho da ndicó coo da ndiquiahva da ndixahvi nuú i. <sup>18</sup> In túhún da tóho yóho cuití va cúu da nandicó coo

ndíquiahva ndixahvi nu Ndióxi —naṭachi Jesús.

<sup>19</sup> Anda já naṭachi Jesús já xihín dataa cán:

—Candichi ta cuáhán. Nandivahún jáchi naṭandúsún yeḥe —naṭachi Jesús.

### *Ndaja coo tá ná xinu coo quiví cacomí Ndióxi cuéntá saḥá ñayivi*

(Mt. 24:23-28, 36-41)

<sup>20</sup> Ta ndaja coo na fariseo naṭasáhá na ndáca túhún na Jesús ña ndá ama casáhá Ndióxi cacomí a cuéntá saḥá ñayivi. Anda já nanducú ñeḥe Jesús túhún nu ná já naṭachi a já xihín ná:

—A cúu cuni ndó nuú cacomí Ndióxi cuéntá saḥá ñayivi. <sup>21</sup> Coó toho ñayivi cachi xihín ndo: “Yóho íin a”, á “Cáa íin a.” Mé a ndaa ná caḥan i xihín ndo sa naxinu va quiví ta viti tañu mé ndó naṭasáhá cómi Ndióxi cuéntá saḥá ñayivi —naṭachi Jesús xihín na fariseo cán.

<sup>22</sup> Anda já naṭasáhá cáchi a já xihín na xíca tuun xihín á:

—Vaxi quiví tá cúní ndó cuni ndó yeḥe, da nachindahá Ndióxi nduu ñayivi vatí ná coo i in quiví cuití va. Joo a cóo toho i xihín ndo. <sup>23</sup> Ta queta ñayivi cachi xihín ndo: “Yóho íin da.” Á tá coo ta cachi na xihín ndo: “Cán íin da”, cachi na xihín ndo. Joo coto a cúhún ndó candehé ndo. A candico ndó jata ná cūhún ndo. <sup>24</sup> Jáchi tá ná xinu ndusa quiví quixi yeḥe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quiví quixi yeḥe, da nachindahá Ndióxi nduu ñayivi.

<sup>25</sup> Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yeḥe. <sup>26</sup> Tá quiahva naṣahin tiempo tá naṣahin Noé sanahá quiahva já coo ri tá ná xinu coo quiví quixi ri yeḥe, da nachindahá Ndióxi nduu ñayivi.

<sup>27</sup> Jáchi mé tiempo cán xíxi na ta xíhi na ta cája na vicó tándaha janda quiahva naxinu quiví naquihvi Noé ini barco cáhnu. Já naxinu javi quini ndivaha ta najahvi ñuyiví xihín ticuiví já naxihí ndíhi ñayivi naṣanduu tiempo cán. <sup>28</sup> Ta quiahva já naṣahin ri mé tiempo tá naṣatacu Lot sanahá. Jandá johó cáxixi ñayivi ta jandá johó cáxixi na

ta jandá johó xéén na ñaha ta jandá johó jícó na ñaha ndúu na jandá johó cáxutu na ta jandá johó cávaha na vehe na. <sup>29</sup> Ta tá naxinu quivi najándacoo Lot ñuu Sodoma cán já naqueta da cuahan da xihin na vehe da já nacuyu ñuhu xihin yuu cáyi chí indivi ta já naxihi ndihi ñayivi nasanduu cán. <sup>30</sup> Quiahva já caja ñayivi mé tiempo já jáchi ndihi ini na catacu na janda quiahva xinu coo quivi quixi tucu yehe ñuyivi yóho, mé da nachindahá Ndióxi nduu ñayivi.

<sup>31</sup> "Ta ndá ndó, na ndúu jata véhe ndó mé quivi já a quihvi ndó ini vehe ndó ña tavá ndó ñaha cómi ndó. Ta ndá ndó, na ndúu yucu a ndixi ndó vehe ndó. <sup>32</sup> Ndítahan ndicuhun ini ndó ndaja nandoho ña cóu ñájihí Lot jáchi nacava jata nuu ña sándehe ña ña najándacoo ña ta já nandihí saha mé ña cán. <sup>33</sup> Ndá na chínúu ínima jata ñaha ñuyivi yóho, na cán cóu na ndihí saha. Joo ndá na ndiquiahva mé ndáha mí i ta ín tiahva na quivi na sahá i, na cán cóu na catacu anda ama cáa quivi.

<sup>34</sup> 'Mé a ndaa ná cahan i xihin ndo ña tá ná xinu quivi cán já ndiquehe e na cóu cuénta mí i. Cacu a tátuhun tá ndúu ivi na quiji na in xito ta in na ndiquehe e ta inga na candoo va sahá ña coo nacandúsa na mí i. <sup>35</sup> Ta tá ndúu ivi na ndíco na ta in ña ndindita cuhun xihin i ta inga ña candoo va. <sup>36</sup> Ta tá ndúu ivi dataa yucu xutu da ta in da ndindita cuhun xihin i ta inga da candoo va —nacachi Jesús.

<sup>37</sup> Tá naxini johó na xíca tuun xihin Jesús ña yóho já ndaca tuhún na mé á já nacachi na já xihin á:

—Ta ndachi yaha tóco ndihí ña cáchi ndó xihin nde yóho, xitoho.

Anda já nacachi Jesús já xihin ná:

—Tá quiahva cája tiyocó tá táca ri nu cánduhu in quiti, ri naxihi quiahva já caja ñayivi taca na nuu i tá ná xinu quivi quixi i —nacachi Jesús.

## 18

*Tá naxíca in ña cuáan ñamani nuú da cóu juéxe*

<sup>1</sup> Nasacu Jesús in quiahva nu ná jáchi xihin quiahva yóho cuni a jánaha nu ná ña ní tiempo xini ñuhú caca tahvi na nu

Ndióxi ta co ndítahan cuita ini na xihin á. <sup>2</sup> Já nacachi a já xihin ná:

—In ñuu nasahin in juéxe ta coo nasahin toni ñuhú da xihin Ndióxi ta ni co sáhní da mé da cóu ñayivi. <sup>3</sup> Ta mé ñuu cán nasahin in ña cuáan. Ta ndijáa ní quivi sahan ña cahan ndahvi ña xihin mé juéxe cán ña ná caja ví da sahá ña sahá in na co cuni táhan xihin ña. <sup>4</sup> Ta sa cuhá quivi ta já cóu va ña sahan ña nu dá ta co cuni da caja ví da saha ña. Joo tá nandihí já nacahan da já: "Vatí coo toni ñuhú i xihin Ndióxi ta ni co sáhní i mí i cóu ñayivi" <sup>5</sup> joo já caja tá caja ví i saha ña cuáan yóho jáchi jándihí ndivaha ña yehe saha ña cán ndiquehe e saha ña já ná a quixi ga ña jándihí ña ini i", nacahan da cóu juéxe cán —nacachi Jesús xihin ná.

<sup>6</sup> Anda já nacachi Jesús já xihin na ndúu cán já:

—Ña yóho quéa nacachi juéxe, da co ñehe ínima vaha cán. <sup>7</sup> Joo cáhnu ga ví ñaha caja Ndióxi tá ná ndiquehe a saha na cóu cuénta mé á tá xíca tahvi na nu á ñuu ta ndivi. Jáchi ndati tiahva chindee a na cóu cuénta mé á. <sup>8</sup> Mé a ndaa ná cahan i xihin ndo ña ivi laa ndiquehe mé á saha ná. Joo in ñaha cuni ndaca tuhún i ndohó. Á ndíñehé e ñayivi cándeé ini na yehe tá ná xinu quivi quixi tucu u ñuyivi yóho —nacachi Jesús xihin ná.

*Sácu Jesús quiahva saha in da fariseo xihin saha da jataca jiuhun cuénta impuesto*

<sup>9</sup> Anda já nasacu Jesús inga quiahva nuu java ñayivi, na ndíñehé jícó mé, na cáhán ña mé cuití na cája ña vaha. Ta já nacasahá cáchi a já xihin ná:

<sup>10</sup> —In tañu ivi taa nasahan da veñuhu caca tahvi da nu Ndióxi. In táhan da cán cóu fariseo ta inga da cán cóu da jataca jiuhun cuénta impuesto. <sup>11</sup> Ta nani xíca tahvi da fariseo cán nu Ndióxi cándichi da já cáchi da já: "Tátá Ndióxi, ndiquiahva i ndixahvi nu ndo jáchi co cája i tá quiahva cája java ga ñayivi. Jáchi java na cája cuíhná na ta quini cája na ta catóo na coo na xihin ñájihí ñani táhan na. Ta jári ndiquiahva i ndixahvi nu ndo jáchi co cája i tá quiahva cája da jataca jiuhun cuénta impuesto yóho.

<sup>12</sup> Jáchi yehe ivi tañu xíjuhun i in in semana ta tá cháhvi na yehe saha chuun cája i já cávaha i uxu táhnda ta já jóco i in táhnda

nu mé ndó”, cáchí da fariseo cán. <sup>13</sup> Joo da játaca jiuhún cuéntá impuesto cán xícá xícá nasandichi da ta chí ni nuu dá co cúní da ndíñehe da indiví sahá ña cáhán da ña coó saha dá caja da ña. Ña cája da queá cáni da yica ndícá da ta já cáchí da já xícá tahví da nu Ndióxi: “Tátá Ndióxi, candáhvi ini ndó yehe jáchi cúu u in da cája cuachi”, cáchí da. <sup>14</sup> Mé a ndaa ná cahan i xihin ndo ña nacaja cáhnu ini Ndióxi sahá da játaca jiuhún cuéntá impuesto já cuanúhu va da joo coó nacaja cáhnu ini a sahá da fariseo cán. Nacaja cáhnu ini Ndióxi sahá da játaca jiuhún cuéntá impuesto jáchi ndá na ndíñehe jícó mé jánuu ndáha Ndióxi na. Joo ndá na jánuu mé nu Ndióxi já jándíñehe jícó mé á na —nacachi Jesús xihin ná.

*Cája yíi Jesús na valí*  
(Mt. 19:13-15; Mr. 10:13-16)

<sup>15</sup> Ta cuahá ñayivi ñehe na na valí naxinu coo na nu Jesús já ná caní ndaa ndáha á na. Joo tá naxini na xica tuun xihin Jesús cán ña yóho, nacasáhá na cája cuéhe na xihin mé na ndáca na valí cán. <sup>16</sup> Joo nacana Jesús na já nacachi a já xihin ná:

—Quiahva ndó ñamaní ná quixi na valí nuú i. Ta a cájí nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. <sup>17</sup> Mé a ndaa ná cahan i xihin ndo ndá na co cúní ndiquiahva na mé ná ndáha Ndióxi tátuhun cája na valí yóho já queá a cúu cacomí Ndióxi cuéntá saha ná —nacachi Jesús xihin ná.

*Cáhan in da cuicá xihin Jesús*  
(Mt. 19:16-30; Mr. 10:17-31)

<sup>18</sup> In táhan da sáhdá chuun cán nandaca tuhún da Jesús já nacachi da já xihin á:

—Maestro, mé ndó cúu ndó taa vaha ña cán queá ndáca tuhún i ndohó ndíá ndítahan caja i já ná ñehe táhvi i cuhun i indiví coo i anda ama cáa quivi —nacachi da xihin Jesús.

<sup>19</sup> Anda já nacachi Jesús já xihin dá:

—Ndá cuéntá queá cáchún xihin i ña cúu u da vaha. Ni in túhún toho ñayivi coo cúu ná na vaha ñuyiví yóho. In túhún Ndióxi cuití va queá vaha. <sup>20</sup> Sa xini vún ña sáhdá Ndióxi nuun cajún já cáchí a já: “Coto a coún xihin ñájíhí á yíi ñani táhún. Coto a cáhnún

ndii. Coto a cája cuíhnún. Coto a cáhún ña tuhún sahá ñayivi. Ta caja cáhnún tátún nánún” —nacachi Jesús xihin da cuicá cán.

<sup>21</sup> Anda já nanducú ñehe da cán tuhun nu Jesús já nacachi da já xihin á:

—Janda taa loho i nacasáhá i cája i tóco ndihi ña sáhdá Ndióxi caja i —nacachi da xihin Jesús.

<sup>22</sup> Tá naxini johó Jesús ña nacachi da yóho xihin á já nacachi a já xihin dá:

—Inga ñaha cámaní cajún: Cuáhán jicún tóco ndihi ñahún jan ta ndicahnda jiuhún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —nacachi Jesús xihin dá.

<sup>23</sup> Tá naxini johó da cuicá cán ña nacachi Jesús xihin dá já nacacuéha ndivaha ini da jáchi iin cuahá ndivaha ñaha dá. <sup>24</sup> Tá naxini Jesús ña nacacuéha ini da cuicá cán já cáchí a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná. <sup>25</sup> Jáchi janda cama chága cuu yaha in camello ini in yávi saha yitucú a juú ga ña ná ndiquiahva in na cuicá mé ná ndáha Ndióxi ña ná cacomí a cuéntá saha ná —nacachi Jesús.

<sup>26</sup> Tá naxini johó ñayivi ndíta cán ña nacachi Jesús já nacachi na cán já:

—Ndá na cúu na cuu cacu ndaa ínima, dá já.

<sup>27</sup> Anda já nacachi Jesús já xihin ná:

—Ndióxi queá cuu caja tóco ndihi ñaha vatí ñayivi a cuú caja na ña —nacachi Jesús xihin ñayivi ndúu cán.

<sup>28</sup> Anda já nacachi Pedro já:

—Candehé ndo, xitoho i. Ndehe najándacoo nde tóco ndihi ña nasacomí nde ta ndíco nde ndohó —nacachi da xihin Jesús.

<sup>29</sup> Anda já nanducú ñehe Jesús tuhun nu dá já nacachi a já:

—Mé a ndaa ná cahan i xihin ndo ña ndá na jándacoo vehe á tátá náná na á ñani na á ñájíhí na á jahyi na sahá ña cúní na ña ná cacomí Ndióxi cuéntá saha ná, <sup>30</sup> na cán cúu na ñehe cuaha chága ñaha ñuyiví yóho jata tóco ndihi ña najándacoo na. Ta vaxi quivi já ñehe táhvi ri na catacu na indiví anda ama cáa quivi —nacachi Jesús.

*Cáxi tuhun tucu Jesús ña quivi a  
(Mt. 20:17-19; Mr. 10:32-34)*

<sup>31</sup> Tá nandihí já ñatavá xóo Jesús ndihuxu ivi na xíca tuun xihín á cán. Já ñacachi a já xihín ná:

—Viti cohó chí ñuu Jerusalén nuú xinu coo tóco ndihí ña ñacahyí na profeta sahá yehe, da ñachindahá Ndióxi nduu ñayivi. <sup>32</sup> Jáchi mé ñuu cán tiin na yehe já ndiquiahva na yehe ndahá na tóho. Cuacu ndaa na yehe. Canahá na xihín i. Cuihna ndaa na tójí na yehe. <sup>33</sup> Cani na yehe. Ta tá nandihí já cahní na yehe. Joo tá ná yaha uní quivi já nditacu tucu u tañu na ñaxihí —ñacachi Jesús.

<sup>34</sup> Joo na xíca tuun xihín á cán ni loho coo ñacandaa ini na ña cúní Jesús cachi a xihín ná. Jáchi cúu á ñaha ña coo ñacuu candaa ini na saha.

*Tá ñandaja vaha Jesús in da cuaá ñuu Jericó*

*(Mt. 20:29-34; Mr. 10:46-52)*

<sup>35</sup> Tá ñacayati Jesús ñuu Jericó cán ta yati jín íchi nu xíca mé á cuahan cán ín coo in da cuaá sáti da. <sup>36</sup> Ta tá ñaxini johó da ña yaha cuahá ñayivi cuahan na já ñacasáhá da ndaca tuhún da ndía cúu. <sup>37</sup> Anda já ñacachi na já xihín dá:

—Jesús, da ñuu Nazaret, da cán cúu da yaha cuahan yóho —ñacachi na xihín dá.

<sup>38</sup> Anda já ñacasáhá da cuaá cán cáyuhú da já cáchi da já:

—Jesús, da ñaquixi chichi David, caja ndó ñamaní candáhví loho ini ndó yehe —cáchi da.

<sup>39</sup> Joo ñayivi, na cánúu cuahan xihín Jesús cán ñacasáhá na cája cuehe na xihín dá ña ná caji da yúhu dá. Joo ví ga ví ñacasáhá da cáyuhú da já cáchi tucu da:

—Ndóhó, da ñaquixi chichi David, caja ndó ñamaní candáhví loho ini ndó yehe —cáchi da cáyuhú da.

<sup>40</sup> Anda já ñacandichi Jesús já ñasahnda chuun ña ná cañehe na da cuaá cán nu á. Ta tá ñaxinu da nu á já ñandaca tuhún a da.

<sup>41</sup> Já ñacachi a já xihín dá:

—Ndía cúnun ná caja i xuhun —ñacachi Jesús xihín dá.

—Anda já ñanducú ñehe da cuaá cán tuhun nu á já ñacachi da já:

—Ndaca ndehé e cúní i, xitoho i —ñacachi da.

<sup>42</sup> Tá nandihí já ñacachi Jesús já xihín dá: —Candehé viti. Nandivahún jáchi candeé inún yehe —ñacachi Jesús xihín dá.

<sup>43</sup> Chí ivi laá ñanuna nuú da cuaá cán. Ta chí a juú quiahva cája cáhnu da Ndióxi. Ndico da Jesús cuahan da. Ta jári tóco ndihí ñayivi tá ñaxini na ña yóho já ñacasáhá na cája cáhnu na Ndióxi.

## 19

*Tá cáhan Jesús xihín in da naní Zaqueo*

<sup>1</sup> Tá nandihí já nandihvi Jesús ñuu Jericó cán já xíca mahñú ñuu cuahan. <sup>2</sup> Ta cán ñasahín in da cuicá naní Zaqueo, da cúu da sacuahá nuú na játaca jjuhún cuéntá impuesto. <sup>3</sup> Ta cúní da cuni da Jesús joo a cuú cuni ñahá da jáchi cáti cuahá ndivaha ñayivi nu Jesús. Ta mé dá co xinu coo da cuni ñahá da jáchi cúu dá da ndihí. <sup>4</sup> Chí xinu da ñacanuú da nuú ñayivi cuaha cán já ñandaa da nuú in yíto yati mé jín íchi, mé nuú yaha Jesús cán ña ná cuni ñahá da. <sup>5</sup> Ta tá ñayaha Jesús yati saha yíto cán já ñandiñehe nuú á nu cánúu da cán. Já ñacachi a já xihín dá:

—Zaqueo, cuánuu quí jáchi cúní coo tóo i vehún quivi viti —ñacachi Jesús xihín dá.

<sup>6</sup> Anda já ndáva nihni Zaqueo ñanuu da nu yíto cán. Já cávatá da ñandiquehe vaha da Jesús cañehe da a cuahan da xihín á vehe da. <sup>7</sup> Joo tá ñaxini tóco ndihí java ga ñayivi cán ña yóho já ñacasáhá na cáhan nú na saha Jesús. Ta cáchi na ña cuahan mé á coo tóo a vehe in dataa, da cája cuahá cuachi.

<sup>8</sup> Ta tá sa ndúu ndihí na vehe Zaqueo já ñandaca ndichi Zaqueo já ñacachi da já xihín Jesús:

—Candehé ndo, xitoho i. Cahnda java ndaa i ñaha cómí i ta já ndicahnda i ña nuú na ndahví. Ta ndá na ñacaja cuíhna i ñaha, na cán quiahva i comí táhnda chága ñaha nuú jáchi ñajándahvi i na —ñacachi Zaqueo cán.

<sup>9</sup> Anda já ñacachi Jesús já xihín ná:

—Quiví viti cája cáhnu ini Ndióxi sahá cuachi da yóho xihín cuachi na vehe da jáchi xihín ña ñacaja da yóho viti náha ña mé a ndaa candeé ini da Ndióxi tá



quiahva ñacaja Abraham. <sup>10</sup> Ta yehe, da ñachindahá Ndióxi nduu ñayivi ñaquixi i ndinducú u ña xíca nuu cája cuahá cuachi jáchi cacu ndaa ínimá ná cúni —ñacachi Jesús xihín ná ta já ñaquee a cuahan tucu a íchi chí ñuu Jerusalén.

*Tá ñasahan in dataa jiuhún da nuú uxu mozo da*

*(Mt. 25:14-30)*

<sup>11</sup> Ta nani xíni johó ñayivi ña cáhan Jesús já ñasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndíco cuahan cán ñacahán ña ña tá xinu coo a ñuu Jerusalén cán chí ivi laá va casahá Ndióxi cacomí a cuéntá sahá ñayivi vatí a juú a já. <sup>12</sup> Anda já ñacachi Jesús já xihín ná:

—Ñasahin in dataa, da cúu jahyi in rey. In quivi ñaquee da cuahan xíca da ña ndicojo da chuun cacuu da rey. Tá ñandihí ñasacu ini da nuhu da ñuu da. <sup>13</sup> Joo tá cámaní nuhu da já ñacana da uxu mozo da. Ta ñasahan da in in jiuhún nuú in in da cán ta mé jiuhún cán cúu á ña íin ndivaha yahvi. Anda já ñacachi da já xihín mozo dá: “Caja ndó ndahvi xihín jiuhún yóho janda quiahva ná xinu quivi ndicó coo tucu u quixi i”, ñacachi da xihín mozo da. Já ñaquee da cuanúhu dá. <sup>14</sup> Ta ndaja coo ñayivi ñundáhyi xíca cándají ña da. Sahá ña cán queá ñachindahá ña in táhnda táto ña ná cachi na xihín tátá da ña coo cúni toho na ña ná cacomí da cán cuéntá sahá ná. <sup>15</sup> Joo já ñandicojo da cán chuun cacuu da rey mé ñundáhyi xíca. Ta tá ñaxinu coo da cán já ñasahnda da chuun ña ná cuhun ña cana na mozo da, da ñasahan da jiuhún nu cán. Jáchi cúni da candaa ini da ndaja jiuhún ñañehe in in da cán jatá jiuhún da. <sup>16</sup> Tá ñandihí já ñaxinu coo in táhan da ñañehe jiuhún cán nu dá já ñacachi da já: “Candehé ndó, xitoho i. Ñasahan ndó in jiuhún nuú i ta viti ñandu a uxu”, ñacachi da. <sup>17</sup> Anda já ñanducú ñehe da cúu rey cán tuhun nu dá já ñacachi da já xihín dá: “Vaha ndivaha ñacajún xihín ña yóho. Náha ña mé a ndaa cúun in mozo vaha jáchi ñacaja ndihún tá íin ñacachi i xuhún cajún xihín jiuhún i vatí loho queá ñasahan i nuun caja chúun. Ta viti caja

i ña ná cacomún cuéntá sahá uxu ñuu”, ñacachi rey cán xihín dá. <sup>18</sup> Tá ñandihí já ñaxinu coo inga táhan da ñañehe jiuhún cán nu dá já ñacachi da já: “Candehé ndó, xitoho i. Ñasahan ndó in jiuhún nuú i ta viti ñandu a uhun”, ñacachi mozo cán. <sup>19</sup> Anda já ñacachi da cúu rey já xihín dá: “Vaha ñacajún sahá ña cán queá caja i ña ná cacomún cuéntá sahá uhun ñuu”, ñacachi rey cán xihín dá. <sup>20</sup> Ta tá ñandihí já ñaxinu coo inga táhan da cán já ñacachi da já: “Candehé ndó, xitoho i. Yóho íin mé jiuhún ñasahan ndó nuú i. Ñachicaan vaha i ña nu jáhma i <sup>21</sup> sahá ña yíhvi i ndohó. Jáchi cúu ndó in taa cuehe ndivaha. Ta cátóo ndó ndiquehe maní uun ndó ñaha. Ta cátóo ndó ña ná caja chúun inga ñayivi já jandá xinu uun ndó ndiquehe ndó ñaha ñañehe ná jatá chuun cája ndó”, ñacachi mozo cán. <sup>22</sup> Anda já ñanducú ñehe da cúu rey cán tuhun nu mozo da já ñacachi da já xihín dá: “Coo cúun in mozo vaha nuú i. Xihín tuhun cáhun chícáun cuachi jatun jáchi coo cúun caja chúun sahá i. Cáchún ña xíni vahún cúu yehe in da cuehe ndivaha ta cátóo i quehe e jiquí jiuhún i vatí coo ñacaja chúun i sahá. <sup>23</sup> Sahá ña cán queá ndá cuéntá queá coo ñasahan tóun jiuhún i, dá já. Já queá tá ná ndicó coo i já ná ndiquehe e jiquí á nuú ña cán, nduu”, ñacachi rey cán xihín mozo da. <sup>24</sup> Tá ñandihí já ñacachi tucu rey xihín java ga ñayivi ndíta cán já: “Candaa ndó jiuhún ndáha dá ta quiahva ndó ña nuú da cómi uxu a jan”, ñacachi da cúu rey cán. <sup>25</sup> Anda já ñacachi ña ndíta cán já xihín rey: “Candehé ndó, xitoho i. Ndá túni quiahva ri nde jiuhún yóho nuú da sa cómi uxu a cáa jáchi sa cuahá va jiuhún cómi da cáa”, ñacachi na xihín rey cán. <sup>26</sup> Já ñacachi rey cán já: “Mé a ndaa ná cahan i xihín ndó, ña ndá ña sa íin ñaha nuu, mé ña cán ñehe táhvi ná coo chága ña nu ná. Joo ndá ña coo ñaha nuu sahá ña coo cája chúun na já queá janda ña loho cómi ña ndindaa”, ñacachi rey cán. <sup>27</sup> Ta ñacachi tucu da já: “Cuahán ndó quehe ndó ñayivi quini, ña coo cúni yehe, ña coo ñaxeen ña ná cacomí i cuéntá sahá ña cán já ná quixi na. Ta cahni ndó ña ná quivi na nuu táhyi i”, ñacachi rey cán — ñacachi Jesús ndicani a nuú ñayivi.

*Ndihvi Jesús ñuu Jerusalén**(Mt. 21:1-11; Mr. 11:1-11; Jn. 12:12-19)*

<sup>28</sup> Tá nandihvi ñacachi Jesús ña yóho xihín ná já ñaquehe tucu a íchi xíca cuahan chí ñuu Jerusalén. <sup>29</sup> Ta tá sa ñaxinu coo a jiní yúcu yitó olivo cán nuú ja chá xinu coo a ñuu Betfagé xihín ñuu Betania cán já ñasahnda chuun nuú ivi táhan da xíca tuun xihín á cán. <sup>30</sup> Já ñacachi a já xihín dá:

—Cuáhán ndo ñuu loho ndácaan jan. Ta tá ná xinu coo ndó jan ndiñehe ndó in búrró ndíco ndaa jan, rí a ñáha yii ndaa na. Ndaxí ndó rí ta cañehe ndó rí quixi ndó. <sup>31</sup> Ta ndá na ná ndaca tuhún ndohó ña ndá cuéntá queá ndaxí ndó rí já cachi ndó já xihín ná: “Mé a cúu xitoho nde xíní ñúhú a rí”, cachi ndó xihín ná —ñacachi Jesús xihín da cán.

<sup>32</sup> Já ñaquehe ndíví da cuahan da. Ta tá quiahva ñacachi Jesús coo chí quiahva já ndusa ñasahiin. <sup>33</sup> Jáchi nani ndaxí da búrró cán ndúu da já ñacahan mé na xihín jana rí cán saha rí já ñacachi na cán já:

—Ndá cuéntá queá ndaxí ndó búrró jana nde jan —ñacachi na cán.

<sup>34</sup> Anda já nanducú ñehe da xíca tuun xihín Jesús cán tuhun nu ná já ñacachi da já:

—Ndaxí nde rí jáchi mé a cúu xitoho nde, xíní ñúhú a rí —ñacachi da.

<sup>35</sup> Já ñaquehe da rí ñehe da cuahan da nu Jesús. Anda já ñachojó ñayivi jáhma ná jata rí já ñajánda na Jesús jata rí. <sup>36</sup> Ta nani xíca búrró cán cuahan rí xihín Jesús já ñachinduu ñayivi jáhma ná íchi nuú yaha rí cán xihín á. <sup>37</sup> Ta yati ñuu Jerusalén, mé nuú ndíca yúcu naní yitó Olivo cán já ñacasáhá cáyuhú tóco ndihí na cúu cuéntá mé á cán. Cája cáhnu na Ndióxi xihín ña cájii íní na saha tóco ndihí ña náhnu ñaxini na ñacaja Jesús. <sup>38</sup> Já cáchí na já cáyuhú na:

—Ndicáhnu nahá ná cacuu da cómi cuéntá saha yo yóho jáchi cúu dá da vaxi yuhú nuú Ndióxi. Viti cájii ini na ndúu indiví. Cáhnu ná cacuu Ndióxi —cáchí na cáyuhú na.

<sup>39</sup> Anda já ñacachi java na fariseo ñúhu tañu ñayivi cán já xihín Jesús:

—Maestro, jánani ndó na ndíco jata ndó yóho ná a cáyuhú cóhó na —ñacachi na xihín Jesús.

<sup>40</sup> Joo nanducú ñehe Jesús tuhun nu ná já ñacachi a já xihín ná:

—Mé a ndaa ná cahan i xihín ndo ña tá ná catáji yuhú na yóho janda já yuu ndúu jiní íchi jan casáhá cayuhú a caja cáhnu a yehe —ñacachi Jesús.

<sup>41</sup> Tá ñacayati chága Jesús ñuu Jerusalén cán ta tá ñaxini a ñuu cán já ñacasáhá táhvi ini a sácu a sahá. <sup>42</sup> Já ñacachi a já:

—Cúni jánaha i ndohó ndía ndítahan caja ndó já ná coo vaha ínimá ndó nu Ndióxi. Joo coo cúni toho ndó candaá ini ndó ña. Ta viti a cúu ga candaá ini ndó ña. <sup>43</sup> Jáchi vaxi quivi tá quixi na coo cúni ndohó ta caji nuu na nu ndo ta caní táhan na xihín ndo. Ta ni in xoo a cúu cunu ndó jáchi níí cúu caji nuu na cán já ná a queé ndó. <sup>44</sup> Ta jándihí na saha ndo jáchi cahní na tóco ndihí ndó, na ndúu cán. Ta ni in yuu a cándoo jata inga yuu jáchi ña cuyu cacuu ndihí a. Já ndoho ndó jáchi coo candaá ini ndó ña ñaquixi i jácacu u ndohó já ná a ndíhi saha ndo —ñacachi Jesús.

*Tá ñataxí Jesús na ndúu jícó ñaha yéhe veñuhu*

*(Mt. 21:12-17; Mr. 11:15-19; Jn. 2:13-22)*

<sup>45</sup> Tá ñaxinu coo Jesús ñuu Jerusalén cán já nandihvi a veñuhu cáhnu ndácaan ñuu cán. Já ñacasáhá táxi a na ndúu jícó cán xihín na ndúu xéen cán. <sup>46</sup> Jáchi ñacaja cuehe a xihín ná ta já ñacachi a já:

—Já cáchí tuhun Ndióxi: “Vehe mí i cacuu a nuú quixi na caça tahví na nuú i”, cáchí a. Joo ndohó ñandai cuu ndó yóho cája cuíhna ndó nuú ñayivi —ñacachi Jesús.

<sup>47</sup> Ndijáá ní quivi sahan Jesús veñuhu cáhnu cán jánaha tuhun Ndióxi nuú ñayivi. Joo na cúu sacuaaha nuú jutú xihín na jánaha ley Moisés xihín na sacuahá ñuu ndúcú na ndá quiahva caja na cahní na Jesús. <sup>48</sup> Joo coo ñehe íní na ndaja caja na cahní na Jesús jáchi tóco ndihí ñayivi cúni na taa johó na nu jánaha Jesús.

**20**

*Tá ñandaca tuhún na Jesús ña yo sahan ñamaní nu á jánaha ñayivi*

*(Mt. 21:23-27; Mr. 11:27-33)*

<sup>1</sup> Ta ndaja coo in quivi ndácaan Jesús veñuhu cáhnu jánaha ñayivi ndaja cuu cacu ndaa ínimá ná já ñaxinu na cúu sacuaaha

nuú jutú xihín na jánaha ley Moisés ta cátahan ri na sacuahá veñuhu naxinu coo na xihín ná nu ndácaan Jesús cán. <sup>2</sup> Anda já nacachi na já xihín Jesús:

—Ndá saha queá jánahún ña yóho. Yo já sahan ñamaní nuun cajún ña cájún yóho — nacachi na cán xihín Jesús.

<sup>3</sup> Anda já nanducú ñehe Jesús tuhun nu ná já nacachi a já xihín ná:

—Ndáca tuhún ri yehe va ndohó. Cachi ndó xihín i: <sup>4</sup> Yo já nachindahá Juan ña ná quixi da caja ndúta dá ñayivi. Á Ndióxi nachindahá da, á ñayivi nachindahá ñahá —nacachi Jesús xihín na cán ndáca tuhún a na.

<sup>5</sup> Anda já nacasáhá ndítuhún xihín táhan na sacuahá cán já cáchí na já:

—Ndía cachi yó xihín Jesús yóho. Jáchi tá ná cachí ña Ndióxi queá nachindahá Juan já nducú ñehe Jesús tuhun nu yo já cachi a já xohó: “Ndá cuénta queá coo naxeen ndó candúsa ndó da, dá já”, cachi Jesús xohó. <sup>6</sup> Ta tá ná cachí ñayivi va cúu na nachindahá Juan já ndicuíta ñayivi ta cahní na mí xihín yuu. Jáchi tóco ndihi ñayivi cándaq vaha ini na ña Ndióxi queá nachindahá Juan jáyaha da tuhun cáhan mé á nuú ñayivi —nacachi xihín táhan na cán.

<sup>7</sup> Saha ña cán queá nacachi na xihín Jesús ña co xini toho na yo já nachindahá Juan ña ná quixi da caja ndúta dá ñayivi. <sup>8</sup> Anda já nanducú ñehe Jesús tuhun nu ná já nacachi a já xihín ná:

—Ta ni yehe a cáxi tuhun i xihín ndó yo já nasahan ñamaní nuú i caja i ña yóho — nacachi Jesús xihín ná.

*Sácú Jesús quiahva sahá java mozo, da nacaja quini xihín xitoho da*

*(Mt. 21:33-44; Mr. 12:1-11)*

<sup>9</sup> Tá nandihí já nacasáhá Jesús cáhan xihín ñayivi ta já nasacu a quiahva yóho nu ná já nacachi a já:

—Nasahin in dataa ta najándeé cuaha dá tó uva. Ta tá nandihí já nasahan ndojó na mé dó uva cán. Anda já naquee da cuahan xicá da cuaha tiempo. <sup>10</sup> Ta tá naxinu coo tiempo jáquee na uva nu dó uva ñaha da cán já nachindahá da in mozo da ña ná cuhun da ndiquehe da uva, rí ndítahan nu

dá ndiquehe da. Joo mé na cája chúun tóo ñuhu dá cán natin na mé mozo cán ta nacani na da ta já cáa uun da nandicó coo da nacaja na. <sup>11</sup> Tá nandihí já nachindahá mé da xihín ñaha ñuhu cán inga tucu mozo da. Joo quiahva já nacaja ri na xihín da cán va. Nacanahá na xihín dá ta nacani na da. Ta já cáa uun da nachindahá tucu na da nuú xitoho da. Coó ñaha nasahan na nu dá. <sup>12</sup> Ta mé da xihín ñaha ñuhu cán nachindahá tucu da inga mozo da ta quiahva já nacaja ri na xihín da cán va. Najándicuehe na da ta já nataxí na da.

<sup>13</sup> Ta tá nu ndihí já nacahán mé da xihín ñaha ñuhu cán já: “Ña caja i viti queá chindahá i jahyi maní i jáchi cája i cuénta coo toní ñuhú na xihín dá tá ná cuni na da”, nacahán mé da xihín ñaha ñuhu cán. Ta tá nandihí já nachindahá da jahyi maní dá. <sup>14</sup> Joo tá naxini na cája chúun tóo ñuhu dá cán ña vaxi jahyi da já nacachi xihín táhan na cán já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha ñuhu yóho. Cóho cahní yó da já ná candoo ñuhu yóho ndáha mí”, nacachi xihín táhan na cán. <sup>15</sup> Anda já natavá na da cúu jahyi xitoho cán jata cútu ta cán nasahní na da —nacachi Jesús.

Anda já nandaca tuhún Jesús ñayivi ndúu cán já nacachi a já xihín ná:

—Á co xini ndó ndía caja da xihín ñaha ñuhu viti. <sup>16</sup> Ña caja da queá quixi da ta cahní ndihi da na nacaja chúun tóo nu ñuhu dá. Já ndiquiahva da ñuhu dá nuú java ga na já ná caja chúun na nu á —nacachi Jesús.

Tá naxini johó na ndíta cán ña yóho já nacachi ndihí na já:

—A cándéé Ndióxi coo ña jan já —nacachi na cán.

<sup>17</sup> Joo nasandehé Jesús nu ná já nacachi a já:

—Ta viti cachi ndó xihín i ndía cúni cachi tuhun Ndióxi tá cáchí a já:

Mé yuu ña najácana da cávaha vehe, ña cán cúu ña nanduu yuu ndúhu sahá vehe ña ín chága saha, cáchí tuhun Ndióxi.

<sup>18</sup> Ta yehe cúu ụ tátuhun in tóto cáhnu. Ta ndá na ná yaha ndicava jata tóto cán chí chachi ndihí na. Quiahva já ndihí sahá

ñayivi tá cō cūni na candúsa na yehe. Ta mé tótō cáhnu cán tá ná yaha ndicava jatá in ñayivi chícaji ndihi ñahá a cán. Quiahva já ndihi sahá ñayivi ini indayá tá cō cūni na candúsa na yehe —ñacachi Jesús.

*Ndáca tuhún na Jesús á ndítahan nu ná chahvi na jjuhún cuéntá impuesto*  
(Mt. 21:45-46; 22:15-22; Mr. 12:12-17)

<sup>19</sup> Chí sa mé hora já cūni na cúu sacuaḥa nuú jutu xihín na jánaḥa ley Moisés cán tiin na Jesús jáchi ñacandaḥa ini na ña saḥa mé va na cán sácú Jesús mé quiahva nuú ñayivi cán. Joo cōó natiin na Jesús jáchi ñayihví na ñayivi ndúu táa johō nu cáhan Jesús cán. <sup>20</sup> Ña ñacaja na queá nachindahá na java dataa ña ná canani da Jesús. Ta ndája da mé dá ña cúu dá taḥa vaha ndivaha joo cō cúu da tá quiahva ndáa da. Ta xihín ña yóho cūni da cayati da nu Jesús ná candehe da á yaha yúhu á cahan ndá ñaha ña cuu cuhun da jicó tuhún da mé á nuú da cúu gobernador. <sup>21</sup> Sahá ña cán queá ñacayati da nu Jesús ta nandaca tuhún da mé á já ñacachi da já xihín á:

—Maestro, cándaḥa ini nde ña cáhan ndó ta jánaḥa ndó ña ndaa. Ta cándaḥa ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínima ná. Ta cándaḥa ini nde ña jánaḥa ndó ña ndaa saḥa íchi cuéntá Ndióxi. <sup>22</sup> Sahá ña cán queá cūni nde candaa ini nde viti á ndítahan nuú nde chahvi nde jjuhún cuéntá impuesto nuú da cómi cuéntá saḥa yo ñuu Roma, á cō ndítahan toho nuú nde caja nde ña —ñacachi na cán xihín Jesús.

<sup>23</sup> Joo sa ñacandaḥa va ini Jesús ña cáhvi núu va ini na sahá ña cán queá nanducú ñehe a tuhun nu ná já ñacachi a já xihín ná:

—Cándaḥa cáxi táhyi ini i ña cūni ndó coto ndojó cuití ndó yehe. <sup>24</sup> Jánaḥa ndó in táhan jjuhún jan nuú i. Yo nahná ta yo quivi queá ndáa nu á —ñacachi a xihín ná.

Já ñacachi na já:

—Ñehe a quivi xihín nahná da cómi cuéntá sahá yo ñuu Roma —ñacachi na xihín á.

<sup>25</sup> Anda já ñacachi Jesús já xihín ná:

—Ndiquiahva ndó ñaha da cómi cuéntá saḥa ndó ñuu Roma jan nu dá. Ta

ndiquiahva ndó nu Ndióxi ña cúu ñaha mé á nu á —ñacachi Jesús xihín ná.

<sup>26</sup> Chí cōó ñacuu caja na jándahvi na Jesús nuú ñayivi ndúu cán jáchi vii nanducú ñehe ndihi Jesús tuhun nu ná. Ta chí johō cátóntó ndihi ñayivi xihín quiahva nanducú ñehe Jesús tuhun nu ná. Chí ñacatáji na cán.

*Ndáca tuhún na saduceo Jesús á mé a ndaa nditacu tucu ndii*  
(Mt. 22:23-33; Mr. 12:18-27)

<sup>27</sup> Tá nandihí já ñacuu java na saduceo cuahan na cahan na xihín Jesús. Ta mé na saduceo cō cándusa na ña ndítacu tucu na sa ñaxihí. Tá ñasaa na nu in Jesús já ñacachi na já xihín á:

<sup>28</sup> —Maestro, nu ley ñacahyi Moisés sanahá ñatahnda chuun ta cáchi a já: “Tá tándaḥa in dataa xihín ñájihí da ta tá cōó jahyi ná cacu xihín dá ta tá ná xinu quivi quivi da já queá cáchi ley Moisés ña ndítahan tandahá tucu ñájihí da xihín da cúu ñani mé ndii cán já ná cōó jahyi da cán xihín yuhú nuú ñani da”, já cáchi ley Moisés. <sup>29</sup> Ta viti cuni johō ndó ná cacu nde in quiahva nu ndo. Ñasahin usa ñani. Ta da nu cuití cán ñatandahá dá. Joo ñayaha tiempo ñaxihí da ta cōó toho jahyi da ñacacu xihín ñájihí da. <sup>30</sup> Anda já ñatandahá tucu ña cuáan cán xihín ñani chí ivi mé ndii cán. Joo ñaxinu quivi ñaxihí ri da yóho va ta chí cōó jahyi da ñacacu xihín ná cán. <sup>31</sup> Anda já ñatandahá da chí uní cán xihín ña. Joo ni da cán ni java ga ñani da cōó ñacuu cacu jahyi xihín ña. Ndihusa da ñatandahá xihín ña ta ndihusa da ñaxihí. Joo ni in da cōó ñacacu jahyi xihín ña. <sup>32</sup> Tá nu ndihí já ñaxihí ri mé va ná. <sup>33</sup> Ña cūni nde candaa ini nde queá, ndá da cacuu ndusa yí ña cán tá ná xinu quivi nditacu tucu ndii. Jáchi ndihusa va ñani da cán ñatandahá xihín ña —ñacachi na cán ndáca tuhún na Jesús.

<sup>34</sup> Anda já nanducú ñehe Jesús tuhun nu ná já ñacachi a já:

—Nani ndúu ñayivi ñuyivi yóho cuití va tándaḥa ná. <sup>35</sup> Jáchi ndá na nanditacu tucu ta ñañeḥe táhvi ná cōó na indivi já queá cō tándaḥa na ta ni cōó sahan toho na jahyi jíhí na tandahá ná. <sup>36</sup> Jáchi mé cán cacuu

na tátuhun táto Ndióxi já a quívi ga na. Ta cacuu na jahyi Ndióxi jáchi sa nanditacu na tañu ndii. <sup>37</sup> Ta sa xini yo ña nditacu tucu ndii jáchi já nacachi Moisés sanahá tá nacahyí da sahá ña naxini da tañu tohíñú, dó cándaha ñúhu cáyi cán. Tá nacahan da sahá Ndióxi, nacachi da ña janda viti cája cáhnu Abraham xihín Isaac xihín Jacob mé Ndióxi vatí naxihí na sanahá. <sup>38</sup> Ta ña yóho cuni cachi a ña tácu yí va Abraham xihín Isaac xihín Jacob vatí sa naxihí yiquí cuñu na. Jáchi tóco ndihi na cúu cuéntá Ndióxi, tácu na nu mé á —nacachi Jesús xihín ná.

<sup>39</sup> Anda já nacachi java na jánaha ley Moisés cán já xihín á:

—Vaha va nacahan ndó, Maestro.

<sup>40</sup> Ta chí coo nasahan ndeé ga ini na ndaca tuhún chága na mé á.

*Jánaha Jesús nuú ñayivi ña cúu Cristo taa ta cúu á Ndióxi*

(Mt. 22:41-46; Mr. 12:35-37)

<sup>41</sup> Anda já nacachi Jesús já xihín ñayivi ndúu cán:

—Ndávaha cáchi ñayivi ña vaxi Cristo chichi David. <sup>42</sup> Ta ndáa ini Salmos ña nacahyí David já nacachi da já:

Ndióxi quea nacachi já xihín xitoho i:

“Coo xoo cuáha i yóho,

<sup>43</sup> janda quiahva ná caja i ña ná común cuéntá sahá na co cúní yohó”, nacachi Ndióxi, já nacahyí David sanahá.

<sup>44</sup> Ndávaha cáchi na ña vaxi Cristo chichi David joo mé tiempo cán nacachi David ña cúu á xitoho da —nacachi Jesús.

*Cáhan Jesús sahá cuachi na jánaha ley Moisés*

(Mt. 23:1-36; Mr. 12:38-40; Lc. 11:37-54)

<sup>45</sup> Tóco ndihi ñayivi ndúu cán naxini johó na tá nacasahá Jesús cáchi a xihín na xica tuun xihín á já:

<sup>46</sup> —Cuéntá coo ndó xihín na jánaha ley Moisés jáchi cátóo na cándixi na jahmá nani caca nuu na. Ta cátóo na cahán toni ñúhú ndivaha ñayivi xihín ná tá xica nuu na nuú yahvi. Ta tá cuahan na veñuhu cátóo na cacoo na nu sácoo na iin chága saha. Ta tá cuahan na víco cátóo na coo vaha na. <sup>47</sup> Ta cándaa na vehe najihí cuáan. Ta tá nandihí caní ndivaha cája na xica tahví na

nu Ndióxi jáchi cuni na jájahvi na nuú ña núu cája na. Mé a ndaa ná cahán i xihín ndo ña na jánaha ley Moisés yóho cacuu na na ndoho chága ini caja Ndióxi nu ndihí —nacachi Jesús.

## 21

*Ña najoco in ña cuáan ndáhví*

(Mr. 12:41-44)

<sup>1</sup> Ta ndaja coo ndacaan Jesús ini veñuhu cáhnu cán ta sándehe a ndá quiahva táan na cuicá jiuhún ini sató nu jóco ñayivi jiuhún nu Ndióxi. <sup>2</sup> Ta jári naxini a naxinu coo in ña cuáan ndáhví ta nataán ña ivi jiuhún ña núu yahvi ini mé sató cán. <sup>3</sup> Anda já nacachi Jesús já xihín na xica tuun xihín á cán:

—Mé a ndaa ná cahán i xihín ndo ña cuaha chága jiuhún nasahan ña cuáan ndáhví yóho a juú ga tóco ndihi java ga na cán. <sup>4</sup> Jáchi tóco ndihi na java cán sahan na ña yóho nu va na. Joo ña cuáan ndáhví yóho nasahan ña nu Ndióxi tóco ndihi ña cómi ña catacu ña —nacachi Jesús.

*Cáxi tuhun Jesús ña vaxi quivi ndihi saha veñuhu cáhnu ndacaan Jerusalén cán*

(Mt. 24:1-2; Mr. 13:1-2)

<sup>5</sup> Java ñayivi cán ndítuhún na sahá veñuhu cáhnu ñuu Jerusalén ndíta na. Ta ndítuhún na sahá yuu ndató ndivaha nacavaha veñuhu cán. Ta cáhan na sahá ñaha najoco ñayivi nu Ndióxi ndáa cán. Anda já nacachi Jesús já xihín ná:

<sup>6</sup> —Vaxi quivi ndihi saha tóco ndihi ña ndíta ndó sándehe ndo yóho. Ta ni janda in yuu a cándo jatá inga yuu ña nditani cacuu tóco ndihi ña yóho —nacachi Jesús xihín ná.

*Ña coo tá ná cayati quivi ndihi saha ñuyiví*

(Mt. 24:3-28; Mr. 13:3-23)

<sup>7</sup> Anda já ndaca tuhún na Jesús já nacachi na já xihín á:

—Maestro, ndá ama coo tóco ndihi ña yóho. Ta ndaja coo tá sa nacayati mé quivi cán —nacachi na xihín Jesús.

<sup>8</sup> Anda já nacachi Jesús já:

—Cuéntá coo ndó ta a quiahva ndó ñamaní jándahvi ñayivi ndohó. Jáchi quixi cuahá ndivaha na cuéntá mí i ta cahán na ña tuhún tá cachi na já xihín ndo: “Yehe

cúu Cristo, da n̄achindahá Ndióxi cacomí a cuéntá sahá ñayivi.” Ta cachi na já: “Viti n̄axinu coo tiempo ndihi saha ñuyivi”, cachi na xihin ndo. Joo coto a cándusa ndó candico ndó jata ná cuhun ndo. <sup>9</sup> Tá ná cuni johó ndó ña cáni táhan ñayivi ñuyivi yóho, a cáyihví toho ndó. Jáchi ndusa já ndítahan coo. Joo cámaní yí va jáxinu coo quivi ndihi sahá ñuyivi —n̄acachi Jesús xihin ná.

<sup>10</sup> Anda já n̄acahan chága Jesús xihin ná já n̄acachi a já:

—Ñayivi ndúu in nación ndicuíta na caní táhan na xihin na ndúu inga nación ta caní táhan na in ñuu xihin na inga ñuu. <sup>11</sup> Ta quixi cuahá ña taan tá sa n̄acayati quivi ndihi sahá ñuyivi. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnu chí indiví. Ta yihví ndivaha na tá cuni na java ñaha xitúhún ndivaha.

<sup>12</sup> Joo tá cámaní xinu coo quivi coo tóco ndihi ña yóho já ndicuíta ñayivi caja xíxi na xihin ndó, na cándusa yehe. Ta cañehe na ndohó cuhun ndó ini veñuhu na ta cán caja víi na saha ndo sahá ña cándéé ini ndó yehe. Ta taán na ndohó ini vecaa ta já cañehe na ndohó cuhun ndó cavií saha ndó nuú na cúu jutixia xihin nuú na cómi cuéntá sahá ñayivi. Tóco ndihi ña yóho ndoho ndó sahá ña cándéé ini ndó yehe.

<sup>13</sup> Ta xihin ña yóho cuu ñehe íni ndo cahan ndó sahá i nuú na cán. <sup>14</sup> Ta a ndícani ini ndó saha ndá tuhun cahan ndó saha mé ndó nuú na cán tá ná xinu ndó nu ná.

<sup>15</sup> Jáchi mí i quiahva i tuhun nu ndo ta ndaja ndíchi i jini ndo já ná cuu nducú ñehe vaha ndó tuhun nuú na cán. Ta chí a cuú quee vaha yuhú na cán xihin ndo. <sup>16</sup> Joo cuahá ñayivi jicó túhún na ndohó. Ta chí janda tátá ndo á ñani ndó á táhan ndó á na xini táhan xihin ndo, na cán cacuu na jicó túhún ndohó cuahá tañu. Ta java táhan ndó, na cándéé ini yehe quivi ndó caja na. <sup>17</sup> Ta ndijáá ñayivi ñuyivi candají na ndohó sahá ña cándéé ini ndó yehe. <sup>18</sup> Joo ni in ñaha a ndóho ndó anda ni in íj jini ndó a ndíhi saha. <sup>19</sup> Ta tá coo n̄acuitá ndo xihin tóco ndihi ña núu caja na xihin ndo já xinu ndó canduu ndó indiví anda ama cáa quivi.

<sup>20</sup> Tá ná cuni ndó ña n̄acava tiyivi soldado jata ñuu Jerusalén ndúu da, xini ñuhú candaa ini ndó ña sa n̄axinu quivi ndihi sahá ñuu cán. <sup>21</sup> Ña ndítahan caja ndó mé quivi cán quea cunu ndó cuhun ndó chí yucu tá ndúu ndó chí estado Judea. Ta ndá ndó, na ndúu ñuu Jerusalén xini ñuhú jándacoo ndó ñuu jan ta cunu ndó cuhun ndo. Ta ndá ndó, na ndúu yucu, a ndíco coo ga ndó ndihvi ndó ñuu Jerusalén yóho. <sup>22</sup> Jáchi mé quivi já cacuu a quivi ndoho ini ñayivi já ná xinu coo tóco ndihi nuú ña n̄acachi tuhun Ndióxi coo sanahá ndivaha. <sup>23</sup> Ndáhví n̄acuu najihí tá ñuhu jahyi na mé quivi já. Ta ndáhví n̄acuu na tá ñehe ndaa na na valí táhan ña chíchi yí. Jáchi ndoho ndivaha ini ñayivi ndúu ñuyivi mé quivi já sahá ña xójo ndivaha ini Ndióxi xihin na cán. <sup>24</sup> Java ñayivi quivi na caja soldado ta java na cato ná já cañehe na na cuhun na ndijáá chí ñuu tóho canduu na jáchi ndihi sahá ñuu Jerusalén yóho. Ta já quixi na ñuu tóho ta casahá na cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun na.

<sup>25</sup> Anda já cuni ndó ña náhnu ndivaha chí nuú candii xihin nuú yoo xihin nuú quimi viti. Ta ñayivi ñuyivi yóho yihví ndivaha na ta chí a cándaa ini na ndía caja na jáchi quini ndivaha tacu nuú ndicojo tañuhú. <sup>26</sup> Ta chí janda quivi tóo ñayivi xihin ña yihví na jáchi casahá ndicani ndivaha ini na saha tóco ndihi tondóho vaxi ñuyivi yóho. Jáchi janda mé candii xihin yoo xihin quimi ndiquiji nuu a. <sup>27</sup> Anda já cuni ndó yehe, da n̄achindahá Ndióxi nduu ñayivi, quixi i tañu vico xihin tóco ndihi ndéé cáhnu i ta chí ndiyihvi ndaa mé nuú quixi i. <sup>28</sup> Tá ná casahá yaha tóco ndihi ña cáchi i xihin ndo yóho, xini ñuhú ndindeé ini ndó ta ndiñehe ndó nuu ndó jáchi sa n̄acayati quivi jácacu Ndióxi ndohó cuhun ndó coo ndó indiví —n̄acachi Jesús xihin ná.

*Sácú Jesús quiahva sahá titó ñuhú  
(Mt. 24:32-35; Mr. 13:28-31)*

<sup>29</sup> Anda já nasacu a in quiahva nu ná já n̄acachi a já:

—Xini ñuhú candehé ndo ndá quiahva cája chúun in titó ñuhú, á ndá yito n̄acuu.

<sup>30</sup> Tá ná cuni ndó ña jandá johó cana núma do já cándaq ini ndó ña nacayati tiempo javi. <sup>31</sup> Ta quiahva já tá ná cuni ndó ña sa cúu yáha tóco ndihi ña cáhí i xihin ndo yóho já candaq ini ndó ña sa nacayati quivi casahá Ndióxi cacomí a cuénta sahá ñayivi.

<sup>32</sup> 'Mé a ndaa ná cahan i xihin ndo ña cuni ñayivi ndúu mé tiempo já yaha tóco ndihi ña nacachi i xihin ndo já quivi na.

<sup>33</sup> Mé a ndaa ña cúu indivi xihin ñundáhyi yóho ndihi sahá joo tuhun nacahan yehe xihin ndo a ndihi toho sahá jáchi coo tá coo tá ín nacachi i xihin ndó coo.

<sup>34</sup> 'Cuénta coo ndó. Xíní ñúhú candati tiahva ndó quivi quixi i ndiquehe e ndohó. A cáca nuu ndó yóho cáa ña caja ndó ña cúní yiquí cuñu ndó. A cóho ndó caca nuu ndó. Ta a ndíhi nahá ini ndó ndicani ini ndó sahá ñaha ñuyivi yóho. <sup>35</sup> Tá ná xinu quivi quixi i cacuu a tátuhun tá sácú jehé in dataa in trampa nuú in quíti sahá ña cúní da tiin da ri. Mé quíti cán co xíní rí ndáchí ín jehé trampa tiin nahá cán. Quiahva já co xíní ñayivi ndúu ñuyivi ndá quivi quixi tucu u ñuyivi yóho. <sup>36</sup> Xíní ñúhú canduu tiahva ndó quivi quixi i. Níi tiempo xíní ñúhú caca tahví ndo nu Ndióxi já ná ndindeé ini ndó tá ná quixi tóco ndihi ña yóho nu ndo ta já ná cuu xinu coo vaha ndó indivi já ná cuu coo vii ndo nuú yehe, da nachindahá Ndióxi nduu ñayivi —nacachi Jesús jánaha nuú ñayivi cán.

<sup>37</sup> Nini quivi nasahin Jesús ini veñuhu cáhnu jánaha tuhun Ndióxi nuú na cán. Ta tá ñuú já sahan quiji a yucu yitó Olivo cán.

<sup>38</sup> Ndijáa níi quivi naha chá naxinu coo ñayivi veñuhu cáhnu cán jáchi cúní na cuni johó na ña jánaha Jesús nu ná.

## 22

*Jándique táhan na tuhun na ña cahní na Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Ta yati tandaa víco pascua tá xíxi ñayivi pan ña co quée yusá naxiaa xihin. <sup>2</sup> Já nacasahá na sacuaḥa nuú jutú xihín na jánaḥa ley Moisés ndúcú na ndaja caja na cahní na Jesús. A cuú caja na cahní tívi na ña jáchi yíhví na canahá ñayivi xihin ná.

<sup>3</sup> Joo ndaja coo tiñahá sacuaḥa nandeta nuu rí ínima in táhan uxu ivi da xíca tuun xihin Jesús. Mé da cán naní da Judas ta Judas Iscariote cáhan na xihin dá. <sup>4</sup> Ta nasahan Judas cahan da xihín na sacuaḥa nuú jutú ta xihín na sacuaḥa nu policia ndáa veñuhu. Ta nanditúhún da xihin ná ña cuu caja da jicó túhún da Jesús ta ndiquiahva nahá dá mé á nu ná. <sup>5</sup> Xihín ña yóho nacajii íní na cán ta nasahan na tuhun na nu Judas ña quiahva na jiuḥún nu dá. <sup>6</sup> Ta nacandúsa Judas caja da ña chí nacasahá da ndúcú da ndaja caja da ndiquiahva da Jesús nuú na cán tá coo ñayivi ndúu xihin á.

*Xíjini Jesús vicó pascua xihín na xíca tuun xihín á*

(Mt. 26:17-29; Mr. 14:12-25; Jn. 13:21-30; 1 Co 11:23-26)

<sup>7</sup> Natandaa mé víco tá xíxi na pan ña co quée yusá naxiaa xihin. Mé víco yóho nasacaja na ña tá nu cuía ta sáhní na ndicachi válí jóco na nu Ndióxi. <sup>8</sup> Mé quivi já nasahnda Jesús chuun nu Pedro xihín nu Juan já nacachi a já xihin dá:

—Cuáhán ndó caja ndívi ndo ña cajíní vicó pascua —nacachi a xihin dá.

<sup>9</sup> Anda já nacachi da cán já xihin á:

—Yo vehe cúní ndó cuhun nde ná caja ndívi nde ña cuxú.

<sup>10</sup> Anda já nanducú ñehe Jesús tuhun nu dá já nacachi a já:

—Tá ná quihvi ndó ñuu Jerusalén jan já cuni ndó in dataa ta ndójo da in yoo ticuif cuahan da. Candico ndó jata dá cuhun ndo janda quiahva cuni ndó ndá vehe quihvi da. <sup>11</sup> Ta já cuhun ndó cahan ndó xihin mé da xihín ñaha vehe cán já cachi ndó já xihin dá: “Da jánaḥa ndeḥe cúu da cáhí xuhun: Ndáchí ín nuú coo i cajíní i vicó pascua xihín na xíca tuun xihín í.” <sup>12</sup> Anda já jánaḥa mé da cán in cuarto cáhnu ña cánúu jiní vehe piso ninu. Sa ín tiahva va ña. Cán caja ndívi ndó ña cajíní —nacachi Jesús.

<sup>13</sup> Anda já naquee ndívi da cán cuahan da. Ta tá ín nacachi Jesús xihin dá coo quiahva já ndusa nasahin. Ta chí nacaja ndívi da tóco ndihi ña cajíní na vicó pascua.

<sup>14</sup> Tá naxinu coo hora cajíní na já nasacoo Jesús xihin tóco ndihi na xíca tuun xihin á

nu mesa. <sup>15</sup> Anda já nacachi Jesús já xihin ná:

—Sa xíca ndivaha ini i cajini i vicó pascua yóho xihin ndó nani íin tóo i xihin ndo jáchi vaxi quivi quivi i. <sup>16</sup> Jáchi mé a ndaa ná cahān i xihin ndo janda ná xinu quivi cacomí Ndióxi cuéntá sahá ñayivi anda jávi cajini tucu u vicó pascua xihin ndo — nacachi Jesús xihin ná.

<sup>17</sup> Anda já ñatiin a in vaso nu ñúhu tó uva ta nandiquiahva ndixahvi nu Ndióxi. Ta já nacachi a já xihín na xíca tuun xihín á:

—Coho ndó dó ñúhu ini vaso yóho ta cahnda java ndó dó nu táhan ndó. <sup>18</sup> Jáchi a ndicó coo ga i coho i tó uva janda quiahva ná xinu coo quivi cacomí Ndióxi cuéntá sahá ñayivi — nacachi Jesús xihin ná.

<sup>19</sup> Tá nandihí ñatiin a pan ta nandiquiahva ndixahvi nu Ndióxi sahá. Anda já nasahnda java ña já nasahan ña nuú na xíca tuun xihín á cán já nacachi a já xihín ná:

—Mé pan yóho cúu á tátuhun yiquí cuñu i jáchi ndiquiahva i mí i quivi i sahá ndihí ndó. Xíní ñúhú caja ndó ña yóho ña ná ndicuhun ini ndó ña naxihí i saha ndo — nacachi Jesús xihin ná.

<sup>20</sup> Tá sa nandihí naxijini na ta já ñatiin a vaso nu ñúhu tó uva ta já nacachi a já:

—Dó ñúhu ini vaso yóho cúu dó tátuhun ní i jáchi cahni na yehe ta cuíta ní i saha ndihí ndó. Ta xihín ña yóho xinu coo nuú tuhun nasahan Ndióxi nuú ñayivi sanahá tá nacachi a jácau a ñayivi.

<sup>21</sup> Cuni johó vaha ndó ná cahān i xihin ndo. Nu mesa yóho íin coo da jicó túhún yehe. <sup>22</sup> Jáchi janda sanahá nasacu ini Ndióxi ña ndítahan ndoho ini yehe, da nachindahá mé á nduu ñayivi. Joo ndáhví nacuu da jicó túhún yehe — nacachi Jesús.

<sup>23</sup> Xihín ña nacachi Jesús yóho nacasáhá na xíca tuun xihín á cán ndáca tuhún táhan na saha ndá da cúu da sácú ini cuhun jicó túhún ñahá.

*Ndítuhún ihvi xihín táhan na xíca tuun xihín Jesús*

<sup>24</sup> Tá nandihí já nacasáhá ndítuhún ihvi xihín táhan da xíca tuun xihín Jesús cán sahá ndá da cúu da íin chága saha. <sup>25</sup> Sahá

ña cán quéa nacachi Jesús já xihín ndihí da cán:

—Ndijáá ñuyiví sáhdá rey chuun nuú ñayivi tá quiahva cúni mé dá. Ta jári cúni da ña ná cachi ñayivi saha dá ña cúu dá da cája vaha. <sup>26</sup> Joo coo nditahan coo ña cán tañu mé ndó. Ña ndítahan caja ndó quéa tá in ndó cúni ndó cacuu ndó da íin chága saha, xíní ñúhú jánuu ndáha ndó mé ndó tátuhun da loho chága nu ndihí ndó. Ta ndá da cúni cahnda chuun, xíní ñúhú cacuu da tátuhun in da cája ndíví nu mesa xitoho da. <sup>27</sup> Mé ndó sa cánda vaha ini ndó ña íin chága sahá da íin coo nu mesa a juú ga da cája ndíví ñahá. Joo yehe najánuu ndáha i mí i ta nanduu u tátuhun in da cája ndíví nu ndo.

<sup>28</sup> 'Ndóhó cúu ndó na nasanduu tuun xihín i nu tóco ndihí ña ihvi naquixi nuú i.

<sup>29</sup> Sahá ña cán quéa tá quiahva nacaja tátá i ñamaní xihín i ña ná cacomí i cuéntá sahá ñayivi quiahva já caja i ñamaní xihín ndó

<sup>30</sup> ña ná nditútú ndó canduu ndó xihín i tá ná cacomí i cuéntá sahá ñayivi. Ta já ná cuu caja víi ndo sahá na naquixi ndihuxu ivi táhdá na naquixi chichi Israel — nacachi Jesús xihín ná.

*Cáxi tuhun Jesús ña chijehé tuhun Pedro ña xini da mé á*

*(Mt. 26:31-35; Mr. 14:27-31; Jn. 13:36-38)*

<sup>31</sup> Anda já nandicahan Jesús já nacachi a já xihín Pedro:

—Simón, cuni johó vahún. Jáchi naxíca Satanás, mé tiñahá sacuahā ñamaní ña ná coto ndojó rí tóco ndihí ndó tá quiahva jáxixi na trigo. <sup>32</sup> Joo sa naxíca tahví i nu Ndióxi saha yóhó, Simón já ná a jándacoun ña cándeé inún yehe. Ta tá sa nandicó coo inún xihín ña cajún jan, ndítahan chindeún java ga na cándeé ini yehe já ná coo ndacú na íchi cuéntá mí i — nacachi Jesús xihín dá.

<sup>33</sup> Anda já nanducú ñehe Pedro tuhun nu Jesús já nacachi da já xihín á:

—Candehé ndo, xitoho i. Yehe sa íin tiahva i cuhun i vecaa xihín ndo. Ta janda ná cahni na yehe xihín ndo tá cúni na jáchi sa íin tiahva ví — nacachi da xihín Jesús.

<sup>34</sup> Já nacachi Jesús já xihín dá:



—Candehé Pedro ná cahan i ña ndaa xuhun. Mé quiví viti tá cãmanî cana chéle já unî tañu chijehé tuhún sahá i ta cahún ña co xini tohún yehe —nacachi Jesús xihîñ dá.

*Cáxi tuhun Jesús ña sa cáyati hora ndoho ini a*

<sup>35</sup> Tá nãndihi já nãndaca tuhún Jesús na xica tuun xihîñ á cán já nacachi a já xihîñ ná:

—Jihna nachindahá i ndohó cuhun ndó cahan ndó tuhun Ndióxi ta nacachi i xihîñ ndo ña ná a cáñehe ndó yátí ni jiuhún ta ni inga ndusa a cáñehe ndó cuhun xihîñ ndo. Á nãndimaní ñaha nu ndo tá nasahan ndo já —nacachi Jesús xihîñ ná.

Já nacachi na já:

—Ni in ñaha coó nãndimanî nuú nde —nacachi na.

<sup>36</sup> Anda já nacachi tucu a já xihîñ ná:

—Joo viti coó ga ña cán coo. Viti cáchí i xihîñ ndo ña tá ín yátí nu ndo, xíní ñúhú cañehe ndó ña cuhun ndo. Cañehe ndó jiuhún ndo tá ná quee ndó cuhun ndo. Ta tá coó machiti nu ndó, xíní ñúhú jicó ndó jahmá ndeé ndo já cueen ndó machiti ña ná coo tiahva ndó. <sup>37</sup> Jáchi sanahá nacahyi a nu libro yî Ndióxi ta sahá yehe nacahan tá nacachi a já: “Nacachi ñayivi cúú dá ta quini sahá ña cán quea nachitahan na da xihín ñayivi quini.” Tóco ndihi ña nacahyi nuú tuhun Ndióxi sahá yehe sanahá xíní ñúhú xinu coo a viti —nacachi Jesús.

<sup>38</sup> Anda já nacachi na xica tuun xihîñ á cán já:

—Candehé ndo, xitoho nde. Yóho ñéhe nde ivi machiti —nacachi na.

—Sa ín vaha —nacachi Jesús xihîñ ná.

*Cuahan Jesús Getsemaní caca tahví a nu Ndióxi*

*(Mt. 26:36-46; Mr. 14:32-42)*

<sup>39</sup> Tá nãndihi já naquee Jesús cuahan yucu yito Olivo nu sá sahan tuun a caca tahví a nu Ndióxi. Ta já ndíco ndihi na xica tuun xihîñ á cán jatá cuahan na. <sup>40</sup> Ta tá sa naxinu coo na cán já nacachi a já xihîñ ná:

—Caca tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihîñ ná.

<sup>41</sup> Tá nãndihi já natavá xóo Jesús mé á tañu na cán já nasahan tátuhun in quiahva

nu xinu coo in yuu tá jání yó ña xihîñ ndáha yo. Quiahva já nacaxícá mé á tañu na cán já nacaxítí a xíca tahví a nu Ndióxi. <sup>42</sup> Já nacachi a já:

—Tátá Ndióxi, á cuu caja ndó ñamanî já ná a ndóho i ña ihvi ndivaha ña vaxi nuú i ndoho i. Joo ná coo tá ín cúni mé ndó ná a cóo toho ña cúni yehe —cáchí Jesús xíca tahví a.

<sup>43</sup> Anda já nacanáha in tátó Ndióxi indiví já naxinu a sahan tuhun ndeé ini Jesús.

<sup>44</sup> Ta nacasáhá ndóho ndivaha ini Jesús jáchi nacacuéha ini a. Sahá ña cán quea nãnducú ndeé chága ví a xíca tahví a nu Ndióxi. Ta chí ndícaa mé teen á nu ñúhu ta dó cán cúú dó tátuhun ni cúyu nu ñúhu.

<sup>45</sup> Ta tá nãndihi naxíca tahví a nu Ndióxi já nãndaca ndichi a já naquee a cuahan nu ndúu na xica tuun xihîñ á cán. Ta nãnditahan mé á na ndúu na quíji na. Ajuú quiahva cándí ini na sahá ña cán nanaá ini na naquiji na. <sup>46</sup> Anda já nacachi a já xihîñ ná:

—Ndá cuéntá quea quíji ndo ndúu ndó. Cuahán ndacoo ndó ta caca tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihîñ ná.

*Tá natiin na Jesús*

*(Mt. 26:47-56; Mr. 14:43-50; Jn. 18:2-11)*

<sup>47</sup> Janda cahan chá va Jesús xihín na xica tuun xihîñ á cán cándichi a já naxinu cuahá ndivaha ñayivi nu ín a. Ta in táhan da uxu ivi xica tuun xihîñ á, da naní Judas cán, da cán cúú da ndáca ñayivi vaxi da. Ta nacayati da tatí yúhu dá sajóho Jesús. <sup>48</sup> Anda já nacachi Jesús já xihîñ dá:

—Judas, tatí yúhun sajóho i tátuhun da quíhvi ini yehe. Joo xihín ña cájún jan ndíquiahvún yehe ndahá na co cúni yehe, da nachindahá Ndióxi nduu ñayivi —nacachi Jesús.

<sup>49</sup> Tá naxini tóco ndihi na ndúu xihîñ Jesús cán ña cúu já nacasáhá ndáca tuhún na mé á já nacachi na já:

—Á cúni ndó, xitoho nde ña ná ndicuíta nde xihîñ machiti cani táhan nde xihîñ ná —nacachi na.

<sup>50</sup> Joo in táhan da xica tuun xihîñ Jesús cán najándicuehe da in da cúú mozo da sacuaaha

nuú jutu cán jáchi năchitúhūn dá johō xoo cuáha da. <sup>51</sup> Joo já năcachi Jesús já xihín ná:

—Să ín vaha. A căni táhan ndó xihín ná —năcachi Jesús.

Tá năndihi já năcani ndaa ndáha mé á johō mozo cán já năndaja vaha mé á da. <sup>52</sup> Ta năcasáhă căhan Jesús xihín nă sacuahă nuú jutu cán xihín nă sacuahă nu policia ndáá veñuhu xihín nă sacuahă veñuhu cán, mé nă năcasăa tiin na Jesús já năcachi a já xihín ná:

—Cája ndó xihín i tătuhun căja na xihín taa cuihnă jáchi năqueta ndó vaxi ndó tiin ndó yehe xihín machiti ta xihín yito. <sup>53</sup> Joo coó a ná caja toho ndó xihín i tá năsahiiin i tañu ndó veñuhu cán. Joo núnă nu ndó viti caja núu ndó jáchi năsahan Ndióxi ñamaní ña ná tiin ndó yehe. Jáchi năcuaa viti ta chíndeé tiñáhă sacuahă ndohó caja ndó ña núu —năcachi Jesús xihín nă cán.

*Tá năchijehé tuhun Pedro ña xini da Jesús*  
(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Anda já nătiin na Jesús. Já ñehe na a cuahan nă vehe da cúu sacuahă nuú jutu cán. Ta xicá xicá ndico Pedro jata ná cuahan da. <sup>55</sup> Ta tá năxinu coo ñayivi cán yuhú yehé da cúu sacuahă nuú jutu cán já năndicahmi na ñúhu năsacoo na xítúní nă. Já năxinu coo ri Pedro năsacoo da tañu nă cán xítúní da. <sup>56</sup> Joo ndaja coo in ñáñáhă căja chúun vehe jutu sacuahă cán năxini ñá ín coo da xítúní da yávi núhu cán. Ta năcasáhă sándehe ña nu dá já cáchi ñá já:

—Da xica tuun xihín Jesús cúu ri da ín coo yóho va —năcachi ñá cán.

<sup>57</sup> Joo năcasáhă Pedro chíjehé tuhun da já năcachi da já:

—Candehé, ñáñáhă. Co xini toho i ndá da cúu da jan —năcachi Pedro xihín ñá cán.

<sup>58</sup> Chá va ta năxini inga dataa Pedro ta já năcachi da já xihín dá:

—In táhan da xica tuun xihín Jesús căa cúu ri yóho va —năcachi da cán xihín Pedro.

—Anda já năcachi Pedro já:

—Uhun. A juú toho táhan nă cán cúu yehe —năcachi da.

<sup>59</sup> Ta tá sa năyaha tătuhun in hora já năcachi inga dataa já:

—Mé a ndaa da xica tuun xihín Jesús cúu ri da yóho va jáchi cúu dá da estado Galilea.

<sup>60</sup> Anda já năcachi Pedro já xihín dá:

—Co xini toho i ndá saha căhun —năcachi Pedro.

Tá chí mé hora já nani căhan Pedro xihín dataa cán já năcana chéle. <sup>61</sup> Anda já năndicoto nihni Jesús năsandehe a nu Pedro. Tá năndicuhun ini Pedro sahá tuhun năcachi Jesús xihín dá tá cămaní tiin na a tá năcachi a já: “Mé quivi viti tá cămaní cana chéle já uni tañu chíjehé tuhún sahá i ta căhún ña co xini tohún yehe”, năcachi a xihín dá. <sup>62</sup> Anda já năqueta Pedro cuahan da já năcasáhă sacu ndivaha da.

*Tá sacu ndaa na Jesús*  
(Mt. 26:67-68; Mr. 14:65)

<sup>63</sup> Ta java dataa, da ndúu ndáá Jesús cán năcasáhă da sacu ndaa da ña. Ta năcani ñahá da. <sup>64</sup> Năchicaji da nuu á ta năcani da jahnda nuu á já năcasáhă da ndaca tuhún da mé á já cáchi da já xihín á:

—Cachi yo já năcani jahnda nuun —cáchi da xihín á.

<sup>65</sup> Ta cuahă chága nuu ña núu căhan na xihín á ña cănahă nă xihín á.

*Nđaja ndichí na Jesús*  
(Mt. 26:59-66; Mr. 14:55-64; Jn. 18:19-24)

<sup>66</sup> Ta tá sa nătivi já nătaca nă sacuahă nuú nă Israel cán xihín nă sacuahă nuú jutu cán xihín nă jănahă ley Moisés cán viti. Já ñehe na Jesús cuahan nă cavii sahá nuu nă cán. Ta tá sa nănditútú ndihi na cán ndúu na já năndaca tuhún nă Jesús já năcachi na já xihín á:

<sup>67</sup> —Caxi tuhun xihín nde á cúun Cristo, da năchindahă Ndióxi cacomí cuéntă sahá ñayivi —năcachi na xihín á.

—Anda já năcachi Jesús já xihín ná:

—Tá ajan ná cachi i xihín ndo ta chí a cándusa toho ndó yehe. <sup>68</sup> Ta căja i cuéntă a căhan ndó xihín i tá ná ndaca tuhún i ndohó. Ta căja i cuéntă ni a cándusa ndó janí ndó yehe. <sup>69</sup> Joo viti sa nătandaa quivi cuhun yehe, da năchindahă Ndióxi nduu ñayivi ta coo i xoo cuáha Ndióxi indivi jáchi ín ndée mé á caja tóco ndihi ñaha —năcachi Jesús xihín ná.

<sup>70</sup> Anda já nacasáhá tóco ndihi na cán ndáca tuhún na mé á já nacachi na já:

—Á jivi ndusa yóho cúun in tuhún jiní já jahyi Ndióxi, dá já —nacachi na.

Anda já nacachi Jesús já xihín ná:

—Ajan. Jivi cúu ụ tá ín cáhí ndó jan —nacachi Jesús.

<sup>71</sup> Anda já nacasáhá tóco ndihi na cán cáhan na já nacachi na já:

—Co ndítahan ndinducú chága yó ñayivi cacuu testigo nuú ña cáhan da yóho jáchi sa xíni joho í ña cáhan da ta chícaan da cuachi jatá mé dá —nacachi na cán.

## 23

### *Tá nandiquihva na Jesús ndáha Pilato*

*(Mt. 27:1-2, 11-14; Mr. 15:1-5; Jn. 18:28-38)*

<sup>1</sup> Anda já nandaca ndichi ndihi na cán já ñéhe na Jesús nasahan na nu Pilato. <sup>2</sup> Ta cán nacasáhá na chícaan na cuachi jatá já nacachi na já sahá:

—Natiin nde da yóho jáchi xíca nuu da jándivaa da ñayivi ñuu nde. Cáhí da ña co ndítahan toho nuú nde chahvi nde jjuhún cuéntá impuesto nuú da cómi cuéntá saha yó ñuu Roma. Ta cáhí da ña mé dá cúu dá Cristo, da chindahá Ndióxi cacomí cuéntá sahá ñayivi. Ta cáhí da cúu dá in rey —nacachi na cán xihín Pilato.

<sup>3</sup> Anda já nandaca tuhún Pilato Jesús já nacachi da já xihín á:

—Á mé a ndaa cúun in rey, da cómi cuéntá sahá na Israel —nacachi da cán xihín Jesús.

Anda já nacachi Jesús já xihín dá:

—Ajan. Jivi cúu ụ tá quiahva cáhí ndó jan.

<sup>4</sup> Anda já nandicahan Pilato xihín na sacuaaha nuú jutú cán ta xihín ñayivi ndúu cán já nacachi da já:

—Co ndíñehe mí vi ndá cuachi quea nacaja da yóho —nacachi Pilato.

<sup>5</sup> Joo ñayivi cuaha cán nacasáhá cáyuhú cóhó chága na já cáhí na já:

—Mé da jan naxica nuu da jándivaa da tóco ndihi ñayivi estado Judea xihín ña jánaha da nu ná. Ta janda Galilea nacasáhá da jándivaa da ñayivi. Ta viti naxinu da ñuu nde cája da já —nacachi ñayivi cáyuhú na.

### *Tá ñéhe na Jesús cuahan na nu Herodes*

<sup>6</sup> Tá naxini joho Pilato ña nacachi ñayivi cán já nandaca tuhún da na á cúu Jesús da estado Galilea. <sup>7</sup> Ta tá nacachi na ña ndusa cúu Jesús da estado Galilea já nanchindahá Pilato Jesús ña ná cuhun a nuú Herodes, da cúu gobernador nuú ñayivi estado Galilea. Jáchi mé tañu já nasahin too da ñuu Jerusalén. <sup>8</sup> Tá naxini Herodes Jesús já nacajii íní da jáchi sa janda jihna cuni da Jesús cúni da. Jáchi cuahá tañu nandicani ñayivi nu dá sahá ña cája Jesús. Ta cúni da cuni da ña ná caja Jesús in ñaha xituhún. <sup>9</sup> Ta cuahá ndivaha ñaha nandaca tuhún Herodes cán Jesús joo cóo nanducú ñehe a tuhun nu dá. <sup>10</sup> Ta tañu ñayivi cán ñúhu ri na sacuaaha nuú jutú xihín na jánaha ley Moisés ta chí a juú quiahva ndúcú ndéé na chícaan na cuachi jatá Jesús. <sup>11</sup> Anda já nacasáhá Herodes cája xíxi da xihín Jesús ta quiahva já cája ri na cúu soldado da cán xihín á. Ta najacandixi na Jesús xihín jahmá lándá tátuhun jáhma sándixi in rey. Nacaja na já xihín á jáchi cúni na cuacu ndaa ñahá na. Tá nandihí já nanchindahá tucu Herodes Jesús ña ná cuhun a nu Pilato. <sup>12</sup> Ta chí mé quivi já nandique táhan máni Herodes xihín Pilato jáchi jihna co cúni táhan toho da, nduu.

### *Sácú ini na ndaja caja na cahní na Jesús*

*(Mt. 27:15-26; Mr. 15:6-15; Jn. 18:39-19:16)*

<sup>13</sup> Anda já najánditaca Pilato na cúu sacuaaha nuú jutú cán xihín na jutixia xihín java ñayivi. <sup>14</sup> Já nacachi da já xihín ná:

—Mé ndó ñehe ndó da yóho nacasa da nuú i. Ta cáhí ndó ña xíca nuu da jándivaa da ñayivi. Joo sa naxini ndó ña nandaja ndíchí i da nu ndo. Ta ni in tuhún toho cuachi táhan ña cáhan ndó saha jan cóo nanditahan i nu dá. <sup>15</sup> Ta ni Herodes cóo cuachi ná ndíñehe jatá dá sahá ña cán quea nanducú ñehe da da nuú i. Cuni joho vaha ndó: Cóo saha cúu á ña quivi da. <sup>16</sup> Ña caja i quea jándoho i ini da. Anda já janí vi da cuhun da —nacachi Pilato cán xihín ná.

<sup>17</sup> Tañu víco pascua cán nasahin costume nu Pilato janí da in táhan da ñúhu vecaa ña ná candoo vaha da nuú ñayivi. <sup>18</sup> Sahá

ña cán quea nacasáhá cáyuhú tóco ndihi ñayivi nu dá já cáchí na já:

—Cahní ndó da jan ta janí ndó Barrabás nuú nde —cáchí na cáyuhú na.

<sup>19</sup> Mé Barrabás yóho ndácaan da vecaa jáchi najátaca cuaha dá ñayivi ta nandicuita da xihín na sacuaḥa ñuu Jerusalén cán ta cúú dá da sáhní ndii. Sahá ña cán quea ndácaan da vecaa. <sup>20</sup> Joo cúni Pilato janí da Jesús sahá ña cán quea nacahan tucu da xihín ñayivi. <sup>21</sup> Joo ví ga ví nacasáhá na cán cáyuhú cóhó na nu dá já cáchí na já:

—Cata caa ndó da ndica crúxu. Cata caa ndó da.

<sup>22</sup> Ta anda já nacahan tucu Pilato ña cúu uní xihín ná já nacachi da já:

—Coó toho ña núu nahá nacaja toho da yóho. A cúu cahnda i chuun ña ná cahní na da jáchi coo cuachi da. Ña caja i quea cahnda i chuun ña ná jándoho na ini da. Anda já janí vi da —nacachi Pilato.

<sup>23</sup> Joo ví ga ví ndúcú ndéé na cán cáyuhú na ña ná cata caa na Jesús ndica crúxu. Ta xihín ña ndúcú ndéé na cán cáhan na ta ndúcú ndéé ri na sacuaḥa nuú jutú cán cáhan na. Sahá ña cán quea natahnu ini Pilato. <sup>24</sup> Ta nacandúsa da caja da ña cúni na cán xihín Jesús. <sup>25</sup> Ta najaní da Barrabás jáchi da cán nacahan mé ná saha ña ná janí dá. Ta mé Barrabás yóho nasandacaan da vecaa sahá ña najándivaḥa da ñayivi ta sahá ña nasahní da ndii. Anda já nandiquiahva da Jesús nu ná ña ná caja na tá cúni mé ná xihín á.

*Tá nacata caa na Jesús ndica crúxu*

(Mt. 27:32-44; Mr. 15:21-32; Jn. 19:17-27)

<sup>26</sup> Ta tá ñéhe na Jesús cuahan na cata caa na a já naxini na in da naní Simón, da ñuu Cirene vaxi da ndihvi da ñuu Jerusalén. Ta já najácuḥun ndáha ná da ña ná ndacojo da crúxu nuú taca Jesús cán. Ta nandico da Jesús cuahan da.

<sup>27</sup> Ta a juú quiahva cuahá ñayivi ndíco jatá cuahan na. Ta cuahá najihí sácu ndivaḥa na ta cáyuhú na cuahan na jatá jáchi táhnda ini na sahá. <sup>28</sup> Joo nandicoto nihni Jesús nu ná já nacachi a já xihín ná:

—Najihí, na ñuu Jerusalén, a cuácu toho ndó sahá yeḥe. Saha mé va ndó ta sahá

jahyi ndó viti ndítahan cuacu ndó. <sup>29</sup> Jáchi vaxi quivi já casáhá ñayivi cachi na já: “Tahví nacuu najihí, na coo nacacu jahyi. Ta tahví nacuu na coo jahyí chíchí”, cachi na jáchi ndóho ndivaḥa ini na. <sup>30</sup> Mé tiempo já casáhá ñayivi cachi na já: “Vá ná cuyu yúcu jata yo já ná quivi”, cachi na. Ta cachi na xihín java yúcu: “Chijehé ndó ndeḥe”, já cachi na sahá ña ndóho ndivaḥa ini na. <sup>31</sup> Candehé ndo ndá quiahva jándoho na ini i ta cúu u tátuhun in yitó cui, dó tácu. Ta cája xixi na xihín i joo xixi chága caja na xihín ndóho jáchi cúu ndó tátuhun in yitó íchí —nacachi Jesús xihín na cán.

<sup>32</sup> Ta tá ñéhe na Jesús cuahan cata caa na a ndica crúxu já ñéhe ri na ivi da cúu da quini cuahan na cata caa na da já ná quivi da xihín á. <sup>33</sup> Ta tá naxinu coo na in nuú naní lásá yiquí jini ndii cán nacata caa na a ndica crúxu. Ta nacata caa ri na ivi da quini cán va: in da xoo cuaha Jesús ta inga da xoo íti a. <sup>34</sup> Ta tá cata caa na Jesús ndica crúxu já nacachi a já:

—Tátá Ndióxi caja cáhnu ini ndó sahá ña cája ñayivi yóho xihín i. Jáchi co xini na ndia cája na —nacachi Jesús.

Ta ndaja coo java soldado cán nacasáhá da sájíqui da saha jáhma Jesús já quea ndá da ná quee vaha ndiquehe da jáhma á. <sup>35</sup> Ta ñayivi ndúu cán sándeḥé na nu tácaa Jesús ndica crúxu nani na cúu jutixia nasacuita na ndúu na sácu ndaa ñahá cán já cáchí na já:

—Najácau da java ga ñayivi. Ta viti ná jácau da mé dá tá mé a ndaa cúu dá Cristo, da nacaxi Ndióxi cacomí cuénta sahá ñayivi —cáchí na sácu ndaa ñahá na.

<sup>36</sup> Ta jári java soldado sácu ndaa da Jesús ndúu da. Ta nacayati da cán nu Jesús já nachínee da vino, dó iyá yúhu á ña ná coho a do. <sup>37</sup> Ta já cáchí da já cáyuhú da nu á:

—Tá ta mé a ndaa cúun rey, da cómi cuénta sahá na Israel chindeé mún já ná a quívun —cáchí da.

<sup>38</sup> Ta nachindaa na in tabla ndica crúxu yati jini Jesús ta nu mé tabla cán nacahyí na: “Da yóho cúu rey nuú na Israel.” Ta mé ña yóho nacahyí na ña tuhun griego, ña cáhan na nación Grecia xihín tuhun

latín, ña cáhan na ñuu Roma xihín tuhun hebrero, ña cáhan na Israel viti.

<sup>39</sup> Ta in táhan da quini tácaa ndica inga crúxu yati jín á cán ñacasáhá da cáhahá da xihín á. Já cáhí da já:

—Tá mé a ndaa cúun Cristo, da ñachindahá Ndióxi cacomí cuéntá sahá ñayivi chindeé mún já ná a quívún. Ta chindeé ndehe já ná a quíví nde —cáhí da.

<sup>40</sup> Joo inga táhan da quini tácaa inga xoo jín a cán ñacasáhá da jánani da da cáhan xihín Jesús cán já ñacachi da já xihín dá:

—Á co yíhví tohún Ndióxi. Jáchi in cúu yo ndóho iní yóho <sup>41</sup> joo mé Jesús yóho coó toho cuachi ñacaja da. Ta mé cuití ví ndítahan ndoho iní ña ná chahví sahá cuachi ñacaja í —ñacachi da cán jánani da inga da tácaa cán.

<sup>42</sup> Tá ñandihí já ñacachi da já xihín Jesús:

—Jesús, caja ndó ñamaní ndicuhun ini ndó sahá í tá ná casáhá ndó cacomí ndó cuéntá sahá ñayivi —ñacachi da xihín Jesús.

<sup>43</sup> Anda já ñacachi Jesús já xihín dá:

—Mé a ndaa ná cahan i xuhun ña mé quíví víti cuhún coún xihín í indiví —ñacachi a xihín dá.

### *Tá ñaxihí Jesús*

(Mt. 27:45-56; Mr. 15:33-41; Jn. 19:28-30)

<sup>44</sup> Ta tátuhun caxivi já ñacanaá ní cúu ñuyíví. Ta janda caa uní sahini já ñacasáhá ñandiyehé tucu. <sup>45</sup> Nanaá nuú candii. Ta janda já ñandatá java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yíi ndivaha. <sup>46</sup> Anda já ñacayuhú cóhó Jesús já cáhí a já:

—Tátá Ndióxi, ndáha mé ndó jándacoo i ínimá í.

Ta tá ñacachi a ña yóho já ñaxihí va.

<sup>47</sup> Ta ndaja coo da sáhdá chuun nuú soldado cuéntá Roma cán tá ñaxini da tóco ndihí ña ñayaha yóho já ñacasáhá cája cáhnu da Ndióxi já ñacachi da já:

—Mé a ndaa táhyí coó toho cuachi da yóho —ñacachi da.

<sup>48</sup> Ta tóco ndihí ñayivi ñasanduu cán, na ñaxini nuú ñaxihí Jesús jandá johó cáni na yíca ndicá na sahá ña táhnda ini na saha Jesús já cuanúhu va na. <sup>49</sup> Joo tóco ndihí na xíní táhan xihín Jesús ñacandoo na ndíta xicá na sándehe na. Ta tañu na cán

ñasanduu ri ñajihí táhan na ñaquixi xihín á janda estado Galilea cán.

*Tá ñachicaan na yiquí cuñu Jesús ini cáva*  
(Mt. 27:57-61; Mr. 15:42-47; Jn. 19:38-42)

<sup>50</sup> Ta ndaja coo ñasahii in dataa naní José, da ñuu Arimatea ña ndacaan estado Judea cán. Ta cúu dá in taa vaaha, da cája ña ndaa cuití va. Ta cúu da in táhan na cómí cuéntá sahá na Israel. <sup>51</sup> Mé José yóho coó ñatahan ini da xihín ña ñacaja java ga na cán jáchi ndátí da casaa quíví cacomí Ndióxi cuéntá sahá ñayivi. <sup>52</sup> Ta ñasahan da cahan ndahví da xihín Pilato ña ná ndiquiahva da yiquí cuñu Jesús nu dá. <sup>53</sup> Ta chí ñasahan Pilato ñamaní nu dá chí ñasahan da ñajánuu da yiquí cuñu Jesús ndica crúxu cán. Já ñachitíví ñahá da xihín jáhma vaaha ta já ñachicaan ñahá da ini in yávi ndacaan ndica cáva. Ta ni in túhún toho ndii a ñaha chicaan na ini mé cáva cán. <sup>54</sup> Mé quíví cán ñasacuu a quíví cája ndíví ñayivi ñaha vehe na jáchi ja chá cacuu a quíví ndiquehe ndeé ná sahá ña cán quéa ndíhi ini na jáxinu na chuun cája na.

<sup>55</sup> Ta ñajihí, na ñasandico jata Jesús janda tá ñaquixi a chí estado Galilea cán ñasahan na sándehe na ndica cáva nuú ñajáqueta nuu na yiquí cuñu Jesús cán. <sup>56</sup> Ta tá ñasaa na vehe na já ñacaja ndíví na perfume xihín java ga ñaha támi sahan ña ná jándicuchu na yiquí cuñu Jesús. Ta inga quíví itaan ñandiquehe ndeé ná tá quiahva ñasahnda Ndióxi caja na janda sanahá.

## 24

### *Tá ñanditacu tucu Jesús*

(Mt. 28:1-10; Mr. 16:1-8; Jn. 20:1-10)

<sup>1</sup> Ta tá sa ñayaha quíví ndiquehe ndeé ná ta naha chá quíví domingo já ñaquee tucu ñajihí cán cuahan na nuú ñachicaan na yiquí cuñu Jesús ini cáva cán. Já ñehe na perfume, dó ñacaja tiaha na cán. Ta ndaca táhan java ga ñajihí xihín ná cuahan na. <sup>2</sup> Ta tá ñaxinu coo na cán já ñaxini na ña coó ga yuu ndáji ndaa yuhú cáva nuú ñasandacaan yiquí cuñu Jesús. <sup>3</sup> Anda já ñaquihví na ini cáva cán joo coó ga yiquí cuñu Jesús ñanditahan na. <sup>4</sup> Ta chí ñayihví na ta co xíní na ndía caja na. Ta jonáa va

naxini na ndíta ivi dataa yati jín ná. Ta a juú quiahva ndató yéhe jáhma ndíxi da cán. <sup>5</sup> Ta chí a juú quiahva yíhvi najihí já nacandayi na janda quiahva naxinu jini ná nu ñúhu. Anda já nacachi dataa cán já xihin ná:

—Co ndítahan toho ndinducú ndo in da tácu tañu nu sánduu ndii. <sup>6</sup> Coó toho Jesús ín yóho jáchi sa nanditacu va. Xíní ñúhú ndicuhun ini ndó ña nacachi a xihin ndo tá nasahin a estado Galilea. <sup>7</sup> Mé á cúú á da nachindahá Ndióxi nduu ñayivi ta sa nacachi a xihin ndo ña ndiquiahva na mé á ndahá ñayivi quini. Ta nacachi a xihin ndo ña cata caa na a ndica crúxu ta tá ná xinu uní quivi já nditacu tucu a —nacachi dataa cán.

<sup>8</sup> Anda já nandicuhun ini najihí cán ña nacachi Jesús xihin ná. <sup>9</sup> Chí naquee na cuahan na já nandicani ndihi na sahá ña yóho nuú na uxu in naxica tuun xihin Jesús xihin nuú java ga na ndúu cán viti. <sup>10</sup> Mé najihí cán, na nasahan cáxi tuhun ña yóho nuú na apóstol cán nasacuu María, ña ñuu Magdala xihin Juana xihin María, ña cúú náná Jacobo xihin java ga najihí. <sup>11</sup> Joo na apóstol, na naxica tuun xihin Jesús cán nacahan na ña cuénto uun va queá. Sahá ña cán queá coó naxeen na candúsa na ña nacachi najihí cán xihin ná.

<sup>12</sup> Joo ndaja coo naqueta Pedro xínu da cuahan da sándehe da ini cáva nuú naxicaan na yiquí cuñu Jesús cán. Naxini da jáhma vaha ña nasativí a cán joo coó toho yiquí cuñu a. Ta chí nacatontó da naquee da cuanúhu dá vehe da.

*Cátahan Jesús cuahan xihin ivi na cuahan chí ñuu Emaús (Mr. 16:12-13)*

<sup>13</sup> Ta mé quivi já ivi táhan na cúú cuénta Jesús naquee na cuahan na in ñuu naní Emaús. Mé ñuu cán ñéhe táhan tátuhun uxu in kilometro xihin ñuu Jerusalén. <sup>14</sup> Ta ndítuhún na cán casahan na saha tóco ndihi ña nacuu ñuu Jerusalén cán. <sup>15</sup> Ta nani ndítuhún na casahan na já nacayati Jesús nu ná já nacasáhá xica mé á xihin ná cuahan na. <sup>16</sup> Ta vatí sándehe na cán nu Jesús joo coó nacuu ndicuni na mé á. <sup>17</sup> Anda já nandaca tuhún Jesús na cán já nacachi a já:

—Ndía ndítuhún ndó casahan ndo. Ta ndavaha cácuéha ini ndó casahan ndo —nacachi a xihin ná.

<sup>18</sup> Já in táhan na cán, da naní Cleofas nanducú ñehe da tuhun nu á já nacachi da já:

—Níí cúú va nandicuita nuu tuhun sahá ña nacuu ñuu Jerusalén tañu quivi yóho. In túhún yóho tañu na ndúu cán cúú da co xini ña nayaha —nacachi da.

<sup>19</sup> Anda já nacachi Jesús já xihin ná:

—Ndía nacuu, vaha.

Já nacachi na cán já xihin á:

—Naquixi in da naní Jesús chí ñuu Nazaret ta nasacuu da in profeta cáhnu ndivaha jáchi cuhá ndivaha ña náhnu nacahan da. Ta cuhá ndivaha ña náhnu nacaja da nu Ndióxi xihin nuú ñayivi. <sup>20</sup> Joo na sacuahá nuú jutú xihin na jutixia ñuu nde natiin na mé Jesús ta já nandiquiahva na da ña ná cahní na da ta já nacata caa na da ndica crúxu. <sup>21</sup> Joo mé nde nacahan nde ña mé Jesús cán cacuu da da ndáti nde chindeé da ndehe, na Israel yóho já ná a cája xíxi ga na ñuu Roma xihin nde, nacahan nde. Joo nandihí va viti jáchi sa nayaha uní quivi naxihí da cán. <sup>22</sup> Vatí naqueta java najihí tañu nde yóho najáyihvi na ndehe jáchi naha chá nasahan na nuú nanduxu Jesús cán. <sup>23</sup> Ta cáchi na ña coó ga yiquí cuñu Jesús ndacaan cán. Sahá ña cán queá naxinu na nuú nasanduu nde ta nandicani na nuú nde ña nacanáha java tátó Ndióxi nu ná ta nacachi na ña tácu va Jesús. <sup>24</sup> Ta java táhan da xica tuun xihin nde cán nasahan da sándehe da ini cáva cán ta chí já ndusa cá tá quiahva cáchi najihí. Ta co mé Jesús naxini na —nacachi na cán xihin Jesús.

<sup>25</sup> Anda já nacachi Jesús já xihin na cán:

—Ñayivi tóntó ndivaha cúú ndó. Jáchi yáncá ndivaha já xinu ini ndó candúsa ndó ña ndaa ña nacahan na profeta sanahá. <sup>26</sup> Á co cándaq ini ndó ña jihna ñúhú nanditahan nuú da cúú Cristo ndoho ini da ta tá sa nandihí já ndiñehe jíco Ndióxi da já ndacojo da chuun cacomí da cuénta sahá ñayivi —nacachi Jesús.

<sup>27</sup> Anda já nacasáhá ndicani a nu ná ña nacahyi nuú tuhun Ndióxi nu cáhan saha tóco ndihi ña ndítahan ndoho da cúú Cristo.

Nacasáhá ndícani a janda libro nacahyi Moisés sanahá janda quiahva naxinu a nu tóco ndihi libro ña nacahyi na profeta sanahá.

<sup>28</sup> Ta tá naxinu coo na ñuu nuú cuahan na cán já nacaja Jesús tátuhun yáha saa cuahan. <sup>29</sup> Joo mé na cán nacaja ndúsa ná xihin á ña ná coo tóo a xihin ná. Já nacachi na já xihin á:

—Yóho candoo ndó coo tóo ndó jáchi sa nahini cuí va ta ja chá cuaá —nacachi na xihin á.

Anda já naquihvi Jesús ini vehe ña candoo a xihin ná. <sup>30</sup> Ta tá nasacoo a nu mesa xihin ná já natiin a in pan já nandiquiahva ndixahvi nu Ndióxi sahá. Ta nasahnda java ña já nasahan ña nu ná. <sup>31</sup> Ta chí ivi laá nanuna xini túni ná ta já nandicuni na mé á ña cúu á Jesús. Joo ivi laá najandiñuhú a mé á nu ná. <sup>32</sup> Anda já nacachi xihin táhan na já:

—Íchi quéa cájii ndivaha ini tá nandicani Jesús tuhun Ndióxi nu yo tá vaxi íchi xihin á —nacachi xihin táhan na cán.

<sup>33</sup> Chí ivi laá naquehe tucu na íchi ña ndicó coo tucu na ñuu Jerusalén. Tá naxinu na cán nandiñehe ná ña ndítutú ndihuxu in táhan na naxica tuun xihin Jesús cán ndúu na xihin java ga na ndúu cán. <sup>34</sup> Anda já nacachi na cán xihin ndívi na yóho:

—Mé a ndaa táhyi nanditacu tucu Jesús, xitoho í. Ta naxini Simón mé á —nacachi na.

<sup>35</sup> Anda já nacasáhá ndívi na cán ndícani na ña nasandaca táhan na xihin Jesús nasahan na. Ta nandicani na ña nandicuni na mé á nani nasahnda java mé á pan ña cuxu na.

*Náha Jesús mé á nuú na naxica tuun xihin á*

(Mt. 28:16-20; Mr. 16:14-18; Jn. 20:19-23)

<sup>36</sup> Ta nani ndítuhún yii ná ndúu na já naxinu coo Jesús nandaca ndichi a mahñú na cán já nacahan Ndióxi á xihin ná já nacachi a já:

—Ná caja Ndióxi ña ná coo vaha ini ndó.

<sup>37</sup> Joo nayihvi na cán ta nacahan na ña cúu á in ínimá ndii va. <sup>38</sup> Joo já nacachi Jesús já:

—Ndá cuénta quéa yíhvi ndo. Ta ndá cuénta quéa coo cándusa ndó ña cúu yehe Jesús. <sup>39</sup> Candehé ndó ndahá i ta candehé ndó sahá i. Sa mé yehe cúu vi. Cani ndaa ndáha ndó yehe ta candehé vaha ndó yehe. Jáchi in ínimá ndii coo toho yiquí cuñu a tá quiahva sándehe ndó ña in yiquí cuñu yehe —nacachi Jesús xihin ná.

<sup>40</sup> Ta nani cáhan Jesús xihin ná já nacasáhá náha ndáha á xihin sahá nu ná. <sup>41</sup> Joo cámaní yii cándusa na cán ña cúu mé á Jesús jáchi nacatontó na ta cájii ndivaha ini na ña cán quéa nacachi tucu Jesús já xihin ná:

—Ndá ñaha in nu ndó ná cuxu u —nacachi Jesús xihin ná.

<sup>42</sup> Anda já nasahan na in tuhun tiyacá nayata nu á xihin in ñimá ñuñu nu á. <sup>43</sup> Já natiin a ña ndáha ná já naxixi a ña nani sándehe na a. <sup>44</sup> Tá nandihí já nacachi a já xihin ná:

—Sa nayaha tá in nacachi i xihin ndó jihna. Sa naxinu coo tá in nacahyi Moisés xihin na profeta sanahá sahá ña ndítahan ndoho i. Ta jári David tá nacahyi da libro Salmos já nacahan ri da cán va sahá ña ndoho i —nacachi a xihin ná.

<sup>45</sup> Anda já nacaja Jesús ña ná ndinuna xini túni ná já ná candaa ini na ña cuni cachi tuhun Ndióxi cán. <sup>46</sup> Ta nacachi a já xihin ná:

—Janda sanahá nacahyi ña ndítahan quivi yehe, da cúu Cristo, da nachindahá Ndióxi cacomí cuénta sahá ñayivi. Joo nacahyi ri ña ndítahan nditacu tucu u quivi uní. <sup>47</sup> Ña cán quéa ndítahan nuú ñayivi caca nuu na cahan na tuhun vaha sahá i níi cúu ñuyivi já ná ndicó coo ini ñayivi ta jándacoo na cuachi cája na. Anda já caja cáhnu ini Ndióxi sahá ndihi cuachi na. Ta janda ñuu Jerusalén xini ñuhú ñayivi casáhá na cahan na tuhun vaha sahá i ta já cuhun na janda ndijáa ñuyivi. <sup>48</sup> Ta ndóhó cúu na naxini ndaja cáa ña nandoho i ña cán quéa ndítahan nu ndó cuhun ndó caxi tuhun ndó tóco ndihi ña yóho nuú ñayivi. <sup>49</sup> Cuni johó vaha ndó jáchi chindahá i ínimá yii Ndióxi já ná cañuhu a ini in in ndó. Jáchi quiahva já nacachi Ndióxi, tátá i tá nasahan tuhun a nu ndo. Joo ndítahan canduu ndihi ndó ñuu Jerusalén yóho janda

quiahva ná ndicutú ndaa ínima ndo xihin ndée Ndióxi ña quixi indiví —ñacachi Jesús xihin ná.

*Tá nandaa Jesús cuahān indiví  
(Mr. 16:19-20)*

<sup>50</sup> Anda já ndáca Jesús na cán ñasahañ na xihin á yuhú ñuu Betania. Ta ñandiñehe a ndáha á já ñacaja yii á na. <sup>51</sup> Ta tá cája yii á na já ñatavá xóo a mé á já nandaa cuahān indiví. <sup>52</sup> Tá ñandihi ñacaja cáhnu na cán Jesús já cávatá ndivaha na ñandicó coo na ñuu Jerusalén. <sup>53</sup> Ta níi tiempo ñasanduu tuun na veñuhu cáhnu cája cáhnu na Ndióxi. Já ná coo.



## Tuhun vaha nacahyí Juan sahá ña nacaja Jesucristo

*Jesucristo cúú á tuhun Ndióxi ta nanduu a ñayivi*

<sup>1</sup> Tá nacava sáhá saha ñuyiví sa ín va mé á naní tuhun Ndióxi. Nasahin mé á xihin Ndióxi ta in cúú mé á xihin Ndióxi. <sup>2</sup> Ta janda mé saha sa ín va xihin Ndióxi. <sup>3</sup> Ta mé a cán cúú á Jesucristo ta nacaja Ndióxi ña nacava mé á tóco ndihi ñaha. Ta ni in túhún toho ñaha ín, a cóo tá ná a cava mé á ña, nduu. <sup>4</sup> Ta mé á quea cája ña ná catacu tóco ndihi ñaha ta mé á jándiyéhe a ínimá ñayivi já ná ndicuni na yo cúú mé á. <sup>5</sup> Mé Jesucristo cúú á tátuhun in ñuhu cáyi ña jándiyéhe a xoo naá ta a cuú ndahva ña.

<sup>6</sup> Ta ndaja coo nachindahá Ndióxi in dataa naní Juan. <sup>7</sup> Naquixi da caxi tuhun da xihin ñayivi ña cúú Jesucristo ña jándiyéhe ínimá ñayivi, na ndúu nuú naá já ná cuu candusa na mé á sahá ña nacahan da. <sup>8</sup> Mé Juan yóho coo cúú dá mé á jándiyéhe ínimá ñayivi. Naquixi cuití da caxi tuhun da xihin ñayivi ña mé Jesucristo quea jándiyéhe ínimá ñayivi. <sup>9</sup> Mé Jesucristo naxinu a ñuyiví yóho ta cúú ndusa mé a ña jándiyéhe ínimá tóco ndihi ñayivi.

<sup>10</sup> Naquixi mé a naní tuhun Ndióxi ta nasahin a ñuyiví yóho. Ta xihin ña nacaja Jesucristo nacava Ndióxi ñuyiví. Joo ñayivi ndúu ñuyiví yóho coo naxeen na candaa ini na yo cúú mé á. <sup>11</sup> Naquixi Jesucristo ñuyiví ña nacava mé á joo na ñuu mé á coo naxeen toho na ndiquehe vaha na mé á. <sup>12</sup> Joo ndá na ná ndiquehe vaha mé á ta candeé ini na mé á já quea sahan mé á ñamaní nu ná ña ná nduu na na cúú cuéntá Ndióxi. <sup>13</sup> Ta na cán cúú na nanduu jahyi mé á. Ta coo cúú á sahá ña nacacu na ñuyiví yóho ta ni coo cúú á sahá ña cuni in ta cacu in jahyi da. Nanduu na jahyi mé á jáchi já nasacu ini mé á coo.

<sup>14</sup> Mé Jesucristo, mé a naní tuhun Ndióxi cán nanduu a in ta ta naquixi a nasahin a tañu nde. Ta tóco ndihi ña nasacaja mé á nasacuu a ña ndaa. Ta a juú quiahva quíhvi ini a ñayivi. Ta naxini nde ndá quiahva

cáhu cúú mé á jáchi sahá ña cúú mé á in túhún jiní já jahyi Ndióxi sahá ña cán quea nacaja Ndióxi ña ná ndicáhu ndivaha mé á. <sup>15</sup> Tá nandicani mé Juan sahá Jesús nuú ñayivi já nacachi da já saha mé á:

—Mé a yóho cúú á ña nacahan i sahá nu ndo tá nacachi i xihin ndo ña vaxi inga a jatá yehe. Ta nacachi i xihin ndo ña ín chága saha mé a cán a juú ga yehe jáchi janda tá camaní yí cacu u sa ín va mé á — nacachi Juan.

<sup>16</sup> Ta sahá ña ín ndivaha ñamaní nu mé á sahá ña cán quea a juú quiahva ñehe táhvi tóco ndihí nu mé á. <sup>17</sup> Nacahyí Moisés ley Ndióxi sanahá. Joo Jesucristo, mé á cúú á ña ndaa naquixi a ñuyiví yóho sahá ña quíhvi ndivaha ini a mí. <sup>18</sup> Ta ni in túhún toho ñayivi coo naxini na Ndióxi. In túhún Jesucristo, mé á cúú in túhún jiní já jahyi Ndióxi, mé a cán quea xini ndá quiahva ín Ndióxi jáchi in cúú á xihin á ta mé a quea nanaha ña yóho nu yo.

*Ndicani Juan nuú ñayivi yo cúú Jesús (Mt. 3:11-12; Mr. 1:7-8; Lc. 3:15-17)*

<sup>19</sup> Ta ndaja coo java na sacaha nuú na Israel, na ndúu ñuu Jerusalén cán nachindahá na java jutú xihin java na naquixi chichi Leví nu ín Juan ña ná ndaca tuhún na da á cúú dá da nasahan Ndióxi tuhún a chindahá a ñuyiví. <sup>20</sup> Ta cáxi táhyí nacahan Juan xihin ná ña coo cúú dá da cán ta já nacachi da já:

—A juú toho yehe cúú da nacachi Ndióxi chindahá a cacomí cuéntá sahá ñayivi — nacachi Juan.

<sup>21</sup> Anda já nandaca tuhún tucu na da já nacachi na já xihin dá:

—Yo já cúú yóhó, dá já. Á a juú yóhó cúú profeta Elías — nacachi na.

—A juú toho yehe cúú profeta Elías — nacachi Juan.

Anda já nacachi tucu na já xihin dá:

—Á a juú toho yóhó cúú profeta da nacachi Ndióxi chindahá a, dá já — nacachi na.

Joo nanducú ñehe Juan tuhún nu ná já nacachi da já xihin ná:

—Ni in túhún toho da cáchi ndó jan coo cúú yehe.

<sup>22</sup> Anda já nacachi tucu na já xihin dá:

—Ndítahan ndicani lohún nuú nde yo cúu yóhó. Jáchi java na nachindahá na ndehe ña ná quixi nde ndaca tuhún nde yóhó. Ta tá co cúnun caxi tuhún xihín nde yo cúu yóhó, ndá cuhun nde quehe nde tuhun nducú ñehe nde nuú na nachindahá ndehe cán —nacachi na.

<sup>23</sup> Anda já nacachi Juan já xihín ná:

—Yehe cúu da xíca nuu tañu yucú íchi ta cáyuhú cóhó i já cáchi i já xihín ñayivi: “Cuná ndó in íchi ndacú nu mé á ña ná ndihvi a ínimá ndo” —nacachi Juan xihín ná tá quiahva nacahyí profeta Isaías sanahá.

<sup>24</sup> Ta na ndaca tuhún Juan cán nasahan na jáchi já natahnda chuun nacaja na fariseo, mé na sáhdá chuun ñuu Jerusalén cán. <sup>25</sup> Já nacachi tucu na já xihín Juan:

—Ndá cuéntá queá cája ndúta yóhó ñayivi tá ta co cúun Cristo, da nachindahá Ndióxi cacomí cuéntá sahá ñayivi. Ta ndá cuéntá queá jácandutun ñayivi tá ta ni co cúun Elías ta ni co cúun mé profeta, da nacachi Ndióxi chindahá a —nacachi na cán.

<sup>26</sup> Anda já nacachi Juan já xihín ná:

—Yehe cája ndutá i ñayivi xihín ticuú joo tañu mé ndó ín in da co xini ndo. <sup>27</sup> Ta vaxi in da jatá yehe ta ín cuaha chága saha dá a juú ga yehe. Ta chí ni coó sahá i ndaxi i correa ndusa dá —nacachi Juan xihín na nasahan ndaca tuhún ñahá cán.

<sup>28</sup> Tóco ndihi ña yóho nayaha chí ñuu Betábara ña ndacaan inga xoo yuta Jordán nuú nacaja ndúta Juan ñayivi.

### *Jesús cúu á tátuhun in ndicachi rí jóco na nu Ndióxi*

<sup>29</sup> Ta inga quiví itaan já naxini Juan cáyati Jesús vaxi a nu ín da. Já nacachi Juan já xihín ñayivi ndúu cán:

—Candehé ndo. Da vaxi jan cúu dá tátuhun ndicachi jóco na nu Ndióxi. Ta da jan cúu da jándoo cuachi ñayivi ndúu ñuyiví. <sup>30</sup> Da jan cúu da cáchi i saha ña vaxi in da jatá yehe ta ín cuaha chága saha dá a juú ga yehe. Jáchi janda tá camaní cacu yehe sa ín va mé da jan. <sup>31</sup> Ta ni mí i coó naxini i ndá quiahva cáa da joo nacasáhá i jácandutá i ñayivi xihín ticuú já ná candaa ini na Israel yo cúu mé dá —nacachi Juan.

<sup>32</sup> Ta nandicani da ña naxini da já nacachi da já:

—Sa xini xihín nuu mí i ndá quiahva nanuu ínimá yii Ndióxi jatá Jesús. Mé ínimá yii Ndióxi cán nanuu a indivi ta cáa tá quiahva cáa in ndijata. <sup>33</sup> Mé a ndaa coó naxini toho yehe yo cúu mé da yóho, nduu. Joo Ndióxi, mé a nachindahá yehe jácandutá i ñayivi xihín ticuú, mé a cán queá nacachi já xihín i: “Ndá da ná cunún ná nuu ínimá yii mí i ta sacoo a jata dá, da cán cúu da jándicutú ini ñayivi xihín ínimá yii mí i”, nacachi Ndióxi xihín i. <sup>34</sup> Ta viti mé a ndaa sa xini vi yo cúu mé á ta caxi tuhun i xihín ndo ña mé á cúu á in tuhún jiní já jahyi Ndióxi —nacachi Juan.

### *Tá nacasáhá java ñayivi ndico na Jesús xíca na xihín á*

<sup>35</sup> Ta inga quiví itaan nasahin tucu Juan cán xihín ivi na xíca xihín dá. <sup>36</sup> Já naxini da ña yaha Jesús cuahan já nacachi Juan já xihín na xíca xihín dá cán:

—Candehé ndo. Da jan cúu tátuhun ndicachi, rí jóco na nu Ndióxi —nacachi Juan.

<sup>37</sup> Tá naxini johó da ndíta xihín da cán ña yóho já ndico da jatá Jesús cuahan da. <sup>38</sup> Tá naxini Jesús ña ndico da cán jatá já nandicoto nihni a nu dá já nacachi a xihín ndíví da cán já:

—Ndía cuni ndo —nacachi a.

Já nacachi da cán já xihín á:

—Maestro, ndájá ín vehe ndó já —nacachi da.

<sup>39</sup> Anda já nducú ñehe Jesús tuhun nu dá já nacachi a já:

—Cóho ná cuni ndó, dá já —nacachi a.

Já ndaca táhan da nasahan da xihín á sádehé da nu ín a. Ta nasacuu a tátuhun caa comi sahini já nasanduu da xihín á.

<sup>40</sup> In táhan da naxini johó ña nacachi Juan ta ndico da jatá Jesús cán naní da Andrés, da cúu ñani Simón, da cáhan na Pedro xihín cán. <sup>41</sup> Mé Andrés yóho ndáva da nasahan da ndínducú da ñani da, da naní Simón cán. Tá tá nandiñehe ñahá da já nacachi da já xihín dá:

—Nanditahan nde da nachindahá Ndióxi cacomí cuéntá sahá ñayivi, mé a cúu Cristo —nacachi da.

<sup>42</sup> Tá nandihí já ndáca Andrés cán ñani da ñasahan da nu Jesús. Ta tá ñaxini Jesús da já ñacachi a já xihín dá:

—Yóhó cúún Simón, jahyi Jonás. Joo yehe chinúu i quivun cananún Cefas viti — ñacachi Jesús.

Quivi Cefas yóho in cúu va xihín Pedro ta cúni cachi a in tóto.

*Cána Jesús Felipe xihín Natanael ña ná caca tuun da xihín á*

<sup>43</sup> Ta inga quivi itaan já ñaquee Jesús cuahan chí estado Galilea. Ta cán ñanditahan mé á da naní Felipe já ñacachi a já xihín dá:

—Naha quíi caca tuún xihín i — ñacachi a xihín dá.

<sup>44</sup> Mé Felipe yóho cúu dá da ñuu Betsaida ta mé ñuu cán cúu ri ñuu Andrés xihín Pedro. <sup>45</sup> Ta ndaja coo Felipe yóho ndáva da ñasahan da ñandinducú da Natanael ta tá ñandinehe ñahá da já ñacachi da já xihín dá:

—Ñanditahan nde da ñacahyí Moisés saha nu ley sanahá. Ta jári ña profeta ñacahyí ri na saha dá. Ta mé dá cúu Jesús, jahyi José, da ñuu Nazaret — ñacachi Felipe xihín Natanael cán.

<sup>46</sup> Anda já ñacachi Natanael já:

—Ndá quehe ri ñaha vaha quixi chí ñuu Nazaret ñan — ñacachi da.

Anda já ñacachi Felipe já xihín dá:

—Cóho candehún — ñacachi da.

Anda já ñaquee da cuahan da nu in Jesús.

<sup>47</sup> Ta tá ñaxini Jesús ñacayati Natanael nu á já ñacachi a já:

—Da yóho cúu ndusa in da ñaquixi chichi Israel ta cúu dá ña cajú ña ndaa cuití va — ñacachi Jesús.

<sup>48</sup> Tá ñaxini joho Natanael ña yóho já ñandaca tuhún da Jesús já ñacachi da já xihín á:

—Á xini ndó yehe, vaha.

Anda já ñacachi Jesús já xihín dá:

—Janda tá cámaní quee Felipe cuhun da cana da yóhó já ñaxini i in coún saha titó ñuhú — ñacachi Jesús xihín Natanael.

<sup>49</sup> Anda já ñacasahá cáchí da já xihín Jesús:

—Maestro, jivi ndusa cúu ndó in tuhún jini já jahyi Ndióxi ta cúu ndó ña cómi cuénta sahá ñayivi Israel — ñacachi da xihín Jesús.

<sup>50</sup> Anda já ñanducú ñehe Jesús tuhun nu dá já ñacachi a já:

—Ñacandúsún yehe sahá ña ñacachi i xuhun ña ñaxini i in coún saha titó ñuhú. Joo náhnu chága ñaha cunún xihín nduchú núún caja i — ñacachi Jesús xihín dá.

<sup>51</sup> Anda já ñacachi tucu Jesús já:

—Mé a ndaa ná cahan i xihín ndo ña cuni ndó xihín nuu ndó ña nuná indiví. Ta cuni ndó táto Ndióxi ndaa na ta nuu na xinu na nu in yehe, da ñachindahá Ndióxi nduu ñayivi — ñacachi Jesús.

## 2

*Tá ñasahan Jesús in vicó tándaha*

<sup>1</sup> Tá ñayaha uní quivi já ñasahin in vicó tándaha ñuu Caná ña ndacaan estado Galilea cán. Ta ñasahan María, náná Jesús mé víco cán. <sup>2</sup> Ta jári ñacana na Jesús xihín na xica tuun xihín á ta chí ñasahan ndihí na mé víco cán. <sup>3</sup> Joo ndaja coo nani cúu víco cán ñandihí va vino xíhi na. Ta tá ñaxini náná Jesús ña yóho já ñacachi ñá já xihín Jesús:

—Sa ñandihí va vino xíhi na — ñacachi ña xihín á.

<sup>4</sup> Já ñacachi Jesús já xihín ñá:

—Co xini ñuhú toho cahan ndó já xihín i jáchi cámaní yíi va ndindaa hora caja i ñaha xituhún — ñacachi Jesús xihín ña.

<sup>5</sup> Tá ñandihí já ñacachi náná Jesús já xihín na jácaca vino cán:

—Ndá ñaha ná cahnda Jesús nu ndó caja ndó, caja ndó ña — ñacachi ña xihín ná.

<sup>6</sup> Ta mé vehe nu cúu víco cán ñasahin in iñu yoo náhnu ña ñacavaha na xihín yuu. Mé yoo cán ñasacuu a nu táan na Israel cán ticuúí, dó ndája vií na mé ná tá quiahva sáhdá ley nu ná caja na. Ta tá tuhun comi jícó á in ciento litro ticuúí quéta ini in in yoo náhnu cán. <sup>7</sup> Tá ñandihí já ñacachi Jesús já xihín na jácaca vino cán:

—Jácutú ndihí ndó yoo náhnu ñan xihín ticuúí.

Ta chí najácutú jini ndaa na yoo náhnu cán xihín ticuúí. <sup>8</sup> Tá ñandihí já ñacachi tucu Jesús já xihín ná:

—Ta viti tavá loho ndó do ta quiahva ndó do ná coto ndojó da cómí chuun saha víco yóho —nacachi Jesús.

Já ñéhe na do nasahan na nuú da cómí chuun saha víco cán. <sup>9</sup> Joo sa nacaja Jesús ña ná nduu ticuúí cán vino. Ta naxito ndojó da do joo co xini da ndájá naquixi dó. In tühún na xini cúu na naxini ña nandaja Jesús cán ticuúí ña ná nduu dó vino. Tá naxito ndojó mé da cómí chuun yóho do já nacatontó da ta nacana da mé da tándaha cán. <sup>10</sup> Já nacachi da já xihin dá:

—Ndijáá ñayivi tá cája na in víco já sahan na vino vaha nu cuítí nuú na táhan cán. Ta tá sa naxihi cuahá na já sahan na dó núu cán. Joo yóho nasacu vahún vino vaha ta ja víti sáhún do nuú na táca víco —nacachi da.

<sup>11</sup> Ña xituhún yóho nacaja Jesús ñuu Caná cuéntá estado Galilea nasacuu a ña xituhún nu cuítí nacaja Jesús já ná cuni ñayivi ndá quiahva cáhnu cúu mé á. Ta xihin ña yóho nacandéé ini na xica tuun xihin a cán mé á.

<sup>12</sup> Tá sa nayaha ña yóho já naquee a cuahan xihin na xica tuun xihin á chí ñuu Capernaum. Ta ndáca táhan náná a xihin ñani a ndíco na cuahan na xihin á. Ta nasanduu na ñuu Capernaum cán chá quivi cuítí va.

*Tává Jesús na ndúu jícó veñuhu cáhnu ñuu Jerusalén*

(Mt. 21:12-13; Mr. 11:15-18; Lc. 19:45-46)

<sup>13</sup> Tá nacayati quivi caja na Israel víco pascua já naquee Jesús nasahan chí ñuu Jerusalén. <sup>14</sup> Ta tá naxinu coo a veñuhu cáhnu ndácaan Jerusalén cán já naxini a ña jandá johó ndúu na jícó. Java na jícó tindiqui xihin ndicachi xihin ndijata viti ta java na ndúu coo ndíjama jihún. <sup>15</sup> Ta chí natiin Jesús yóho ta nacavaha in churrú xihin á já nacasáhá táxi ndihi a na ndúu jícó cán. Ta janda tindiqui xihin ndicachi jana ná natavá a ri quee rí cuhun ri. Ta já naxinu coo a nu ndúu na ndíjama jihún cán já naxicó ñéhe a mesa na já nacuyu ndihi jihún na nu ñúhu. <sup>16</sup> Ta nasahnda a chuun nuú na jícó ndijata cán já nacachi a já:

—Tavá ndihi ndó ña jícó ndó jan. A cája ndó xihin vehe tátá i ña cúu á nu cáyahvi ñaha —nacachi Jesús xihin ná.

<sup>17</sup> Tá nandihí já nandicuhun ini na xica tuun xihin Jesús cán ña cáhí tühun Ndióxi. Já cáhí a já: “A juú quiahva xójo ini i sahá ña co cája cáhnu ñayivi vehe Ndióxi”, cáhí tühun Ndióxi.

<sup>18</sup> Tá naxini na Israel cán ña nacaja Jesús ña yóho já nandaca tühun na mé á já nacachi na já xihin á:

—Xini ñúhú cajún in ñaha xituhún já ná cuni nde ña mé a ndaa ín sahún tasún na ndúu jícó veñuhu yóho —nacachi na xihin Jesús.

<sup>19</sup> Anda já nanducú ñéhe Jesús tühun nu ná já nacachi a já xihin ná:

—Tá ná janditani ndó veñuhu yóho ta tixi uní quivi já jácandichi tucu u ña —nacachi Jesús xihin ná.

<sup>20</sup> Anda já nacachi na Israel cán já xihin á:

—Co cándúsa nde ña cáhún jáchi nacaja chún na ivi jico inu cuia já naxinu veñuhu jan. Ta yóho cáhún ña tixi uní víxí quivi jácandichi tucún ña, vaha —nacachi na cán xihin Jesús.

<sup>21</sup> Joo co cáhan toho Jesús sahá veñuhu cáhnu cán jáchi cáhan mé á saha yiquí cuñu a. <sup>22</sup> Ña cán quea tá naxihi Jesús ta nanditacu tucu a tixi uní quivi já nandicuhun ini na xica tuun xihin á cán sahá tühun nacahan mé á nuú na Israel yóho. Ta chí nacandúsa na tühun Ndióxi ta nacandúsa na tóco ndihi ña nacahan Jesús xihin ná.

*Sa xini va Jesús inima ñayivi*

<sup>23</sup> Cuahá ñayivi ñuu Jerusalén cán nacandúsa na Jesús nani nasahin a víco pascua cán sahá ña náhnu xihin ña xituhún nacaja nu ná. <sup>24</sup> Vatí nacachi na cándúsa na mé á joo coo nacandúsa toho Jesús na jáchi xini vaha mé á ndá inima ñéhe in in na cán. <sup>25</sup> Ta co xini ñúhú toho a ña caxi tühun na xihin á ndá quiahva ín in in ñayivi jáchi sa xini ndihi va mé á inima ná.

### 3

*Ndituhún Nicodemo xihin Jesús*

1 Nasahiin in da xíca cuéntá na fariseo naní Nicodemo ta cúú dá da sacuahá nuú na Israel cán. 2 Ta ñuú naqueta da cuahan da coto nihni da Jesús. Ta tá naxinu coo da nu á já nacachi da já xihín á:

—Maestro, cándaa cáxí ini nde ña nachindahá Ndióxi ndohó vaxi ndó nuú nde ña ná jánaha ndó nuú nde. Jáchí ni in túhún toho ñayivi a cuú caja ña náhnu cája mé ndó tá ta co ín Ndióxi xihín ná —nacachi da xihín Jesús.

3 Anda já nanducú ñehe Jesús tuhun nu dá já nacachi a já:

—Mé a ndaa ná cahan i xihín ndo ña ni in túhún ñayivi a cuú cacomí Ndióxi cuéntá saha tá ná a ndicó coo tucu na cacu tucu na —nacachi a.

4 Anda já nandaca tuhún Nicodemo Jesús já nacachi da:

—Ndá quiahva cuu cacu tucu na tá sa nacayatá na. Ama ná ndihvi tucu na tixi náná na já cacu tucu na —nacachi Nicodemo xihín Jesús.

5 Anda já nacachi tucu Jesús já xihín dá:

—Cáhan i ña ndaa xihín ndo. Tá nacanduta ñayivi xihín ticuú ta tá nandicutú ndaa ínima ná xihín ínima yii Ndióxi já cúú á tátuhun cacu tucu na ta anda já cuu cacomí Ndióxi cuéntá saha ná.

6 Jáchí ñuyiví yóho cacu jahyi ñayivi ta sa já ñayivi cúú va na. Joo na jándicutú Ndióxi xihín ínima yii mé á, na cán cúú jahyi mé á.

7 Ta co ndítahan catóntó ndó tá cáxí i xihín ndó ña ndítahan cacu tucu ndihi ñayivi já ná cacomí Ndióxi cuéntá saha ná. 8 Jáchí cúú á tátuhun tá xícó tachí ndá xoo cúni mé á. Vatí xíní johó í xícó tachí joo co xíní yo ndá xoo quíxi a ta co xíní yo ndá xoo cuahan. Quiahva já ín ínima yii Ndióxi jáchí vatí co xíní ñayivi mé á joo xíní na ndá quiahva cája mé á tá ñúhu a ini na —nacachi Jesús xihín Nicodemo.

9 Tá nandihí já nacachi Nicodemo já xihín Jesús:

—Co cándaa toho ini i ña cáxí ndo xihín i —nacachi da.

10 Anda já nacachi Jesús já xihín dá:

—Cúú ndó da jánaha nuú ñayivi Israel ta ndítahan cándaa ini ndó ña yóho, nduu jáchí cúú ndó maestro cáhnu nu ná. 11 Mé a ndaa ná cahan i xihín ndo. Cáhan nde sahá ña

cándaa ini nde ta sahá ña naxini nde xihín nuú nde joo ndóhó co cándusa ndó ña cahan nde xihín ndo. 12 Cáhan i sahá ñaha ñuyiví yóho xihín ndo ta co cándusa ndó ña. Ndaja ga ví caja ndó tá ná cahan i sahá ñaha ín indiví.

13 'Ni in túhún toho ñayivi a ñaha ndaa cuhun chí indiví. In túhún da ndaa indiví cúú da nanuu, da naquixi ñuyiví yóho. Ta da cán cúú yehe, da nachindahá Ndióxi nduu ñayivi. 14 Sanahá ndivaha nacata caa Moisés in coo, rí nacavaha xihín caa nu yito yucú íchí. Quiahva já cata caa rí na yehe, da nachindahá Ndióxi nduu ñayivi ndica crúxu 15 já quéa ná cacu ndaa ínima ñayivi já ná a cuhun na indayá tá ná candeé ini na yehe. Ta xihín ña yóho catacu na anda ama caa quivi.

*Quíhvi ndivaha ini Ndióxi ñayivi nduu ñuyiví*

16 Jáchí saha ña naquihvi ndivaha ini Ndióxi ñayivi nduu ñuyiví sahá ña cán quéa nachindahá mé á in túhún jini já jahyi a ñuyiví yóho. Já quéa tá ná candeé ini na mé á cuu cacu ndaa ínima ná já ná catacu na anda ama caa quivi. 17 Coó nachindahá Ndióxi jahyi a ña ná quixi da jándihi da sahá na nduu ñuyiví yóho. Nachindahá a jahyi a jáchí cúni a jácacu a ñayivi.

18 'Ta ndá na sa candeé ini yehe, ña cúú u jahyi Ndióxi, na cán cúú na cája cáhnu ini Ndióxi saha. Joo na coo naxeen cándusa ñaha cán, na cán cúú na co cája cáhnu ini Ndióxi saha jáchí coo naxeen na cándusa na da cúú in túhún jini já jahyi mé á.

19 Ta na coo naxeen cándusa cán sa nasacu va Ndióxi saha ná cuhun na indayá jáchí nacaan na cája na ña núu. Saha ña cán quéa naxinu mé á cúú jahyi Ndióxi ñuyiví yóho ta cúni a jándiyéhe a nuú ñayivi. Jáchí catóo chága na canduu na nuú naá jáchí cája na ña núu. 20 Jáchí tóco ndihi na cája ña núu cándají na ña vaha, ña cúú tátuhun ña yehe. Ta co cúni na cayati na nuú ña yehe cán já ná a ndítivi ña núu cája na. 21 Joo na cája ña ndaa, na cán cúú na cayati chága nuú ña vaha, ña cúú tátuhun ña yehe já ná nahá ña mé a ndaa cája na ña cúni Ndióxi —nacachi Jesús.

*Ndicani tucu Juan sahá Jesús*

<sup>22</sup> Tá sa nayaha ña yóho já naquee Jesús nasahan chí estado Judea xihín na xíca tuun xihín á. Ta cán nasahin a chá tiempo xihín ná jáchi najácandúta ná ñayivi mé cán. <sup>23</sup> Ta jári Juan va najácandúta dá ñayivi chí ñuu naní Enón yati ñuu Salim cán jáchi cán ñúhu cuahá ticuú. Ta cuahá ñayivi nasahan na cán candúta ná. <sup>24</sup> Tóco ndihi ña yóho nayaha tá cámaní tiin na Juan chicaan na da vecaa.

<sup>25</sup> In tañu java na xíca xihín Juan cán nasahá na ndítuhún ihvi na xihín java na Israel sahá ña yóho: á ndiyahvi chága tá cája ndúta Juan ñayivi á tá cája ndúta na xíca tuun xihín Jesús ñayivi. <sup>26</sup> Tá nandihí já ndáva na xíca xihín Juan nasahan na cáhan na xihín dá já nacachi na já:

—Maestro, dataa, da nandituhún xihín ndó inga xoo yuta Jordán cán, da nacahan mé ndó saha nuú nde cán, viti xíca nuu da jácandúta dá ñayivi ta jandá johó tóco ndihi ñayivi ndíco na da viti —nacachi na cán xihín Juan.

<sup>27</sup> Anda já nacachi Juan já xihín na cán:

—Ni in túhun toho ñaha a cúu caja ñayivi tá co sahan Ndióxi ñamaní nu ná caja na ña. <sup>28</sup> Ta sa naxini johó ndó ña nacaxi tuhun yachi vi xihín ndo ña co cúu yehe da nasahan Ndióxi tuhun a chindahá a cacomí a cuénta sahá ñayivi. Nachindahá Ndióxi yehe já ná cacu tiahva i íchi nuú quixi mé da cán. <sup>29</sup> Candehé ndo. Cúu á tátuhun tá cúu in víco tándaha. Ta da cúu amigo da tándaha cán ndáti da casa da. Ta cájii ini da tá xini johó da nu cáhan vatá da tándaha cán jáchi in ñájihí da xihín dá. Ta quiahva já cájii ini i jáchi casahá ñayivi ndíco na jatá Jesús viti. <sup>30</sup> Mé Jesús jan ndicáhnú johó ga cuhun a. Ta yehe ndítahan nuu ndáha johó i cuhun i —nacachi Juan.

### *Jesús quea naquixi chí indiví*

<sup>31</sup> Mé Jesús naquixi chí indiví ta cáhnú chága mé á nu ndihi ñaha. Ta ñayivi nacacu ñuyiví yóho cáhan na sahá ñaha ñuyiví cuítí va. Joo mé á naquixi chí indiví cán cúu á ña cáhnú chága nu tóco ndihi ñaha. <sup>32</sup> Ta cáhan mé a cán sahá ña naxini xihín nuu a ta cáhan sahá ña naxini johó a. Joo ni in na co cúni candúsa na ña cáhan mé á. <sup>33</sup> Joo ndá na cándúsa nu cáhan mé á, na cán cúu na

cánda cáxi ini na ña cáhan Ndióxi ña ndaa. <sup>34</sup> Ndióxi quea nachindahá mé á ta cáhan ndinuhu tuhun Ndióxi jáchi co ndáhvi toho cúu ini Ndióxi jándicutú ndaa mé a cán xihín inima yii mé á. <sup>35</sup> Ta Ndióxi, tátá a ña in indiví quíhvi ndivaha ini a in túhun jini já jahyi a ta nasahan ndée a nuú jahyi a ña ná cuu caja tóco ndihi ñaha. <sup>36</sup> Ta ndá na cándeé ini mé a cúu in túhun jini já jahyi Ndióxi cán, na cán cúu na catacu anda ama cáa quivi. Joo na co cúni candúsa ñahá cán, na cán cúu na a ñéhe táhvi toho na catacu na xihín Ndióxi. Ña caja Ndióxi xihín ná quea chindahá a na cuhun na indayá anda ama cáa quivi.

## 4

### *Ndítuhún Jesús xihín in ñáñaha cuénta Samaria*

<sup>1</sup> Ta ndaja coo na fariseo nacanda ini na ña cuaha chága ñayivi ndíco jatá Jesús ta cuaha chága ñayivi jácandúta Jesús a juú ga Juan. <sup>2</sup> Vatí a juú mé Jesús jácandúta ñayivi joo na xíca tuun xihín á cán jácandúta ñahá. <sup>3</sup> Ta tá naxini johó Jesús ña cáhan ñayivi sahá já naquee a estado Judea xihín na xíca tuun xihín á cuahan na ndíco coo na chí estado Galilea.

<sup>4</sup> Ta nuú cuhun a Galilea cán ndúsa yaha ndaa estado Samaria já xinú a nuú cuhun a cán. <sup>5</sup> Ta naxinu a in ñuu loho naní Sicar cuénta mé Samaria cán yati nuú ñundáhyi ña najándicoo táhvi Jacob nu José, jahyi da. <sup>6</sup> Ta cán nasahin in chicho ña naní chicho Jacob. Ta cúu á tátuhun caxivi tá naxinu coo Jesús ñuu Sicar cán. Ta chí a váha ga nacanaa a sahá ña cán quea nasaco a yati yuhú chicho cán. <sup>7</sup> Ta nani in coo a cán já naxinu in ñáñaha cuénta Samaria tavá ña ticuú ini chicho cán. Já nacachi Jesús já xihín ña:

—Quiahva loho ticuú ná coho i —nacachi a xihín ña. <sup>8</sup> Jáchi sa cuahan na xíca tuun xihín á ñuu cunen na ñaha cuxu na.

<sup>9</sup> Anda já nacatontó ña jáchi coo xini táhan va na Israel xihín na Samaria. Ta nacachi ña já xihín Jesús já:

—Ndá cuénta quea xíca yóhó, da Israel, ticuú nuú i cohún ta ña Samaria va cúu yehe —nacachi ña cán xihín Jesús.

<sup>10</sup> Já nacachi a já xihín ña:

—Tá ná candaa inún yo cúu yehe, da xíca ticuú nuun ta tá ná candaa inún ndá quiahva ín ña cúní Ndióxi quiahva nuun já cacún ña nuú i. Jáchi yehe cuu caja i ña ná catacún anda ama cáa quivi ta ña yóho cuu a tátuhun ticuú, do a cúu ndihi saha —nacachi Jesús.

<sup>11</sup> Anda já nacachi ña cán já xihin á:

—Candehé ndo. Ni yáxi co ñehe ndó tavá ndó ticuú ini chicho yóho ta chicho cúná ndivaha cúu ña yóho. Ndá cuu caja ri ndó quiahva ndó ticuú cáchi ndo jan nuú i. <sup>12</sup> Tásáhnú jícó nde, da naní Jacob cán najándacoo chicho yóho nuú nde. Ta nuú chicho yóho naxihi da cán ticuú ta sa mé chicho yóho naxihi ri jahyi da cán ta yóho naxihi ri quití jana dá. Ama ná cuu quiahva mé ndó ticuú vaha chága a juú ga dó najándacoo Jacob nuú nde —nacachi ña cán xihin Jesús.

<sup>13</sup> Anda já nanducú ñehe Jesús tuhun nu ña já nacachi a já:

—Ndá ñayivi nacuu va xíhi ticuú chicho yóho já quea ichi tá ichi ini na. <sup>14</sup> Joo ndá na ná coho ticuú táhan dó sahan yehe, na cán cúu na a ndícó coo ga na ichi ini na anda ama cáa quivi. Jáchi cúu á tátuhun sa mé ini mé va na cana ticuú, dó a ndíhi saha ta catacu na anda ama cáa quivi —nacachi Jesús xihin ña.

<sup>15</sup> Anda já nacachi ña cán já xihin Jesús:

—Quiahva mé ndó ticuú, dó co ndíhi saha jan nuú i ña ná a ichi ga ini i ticuú já ná a quixi ga i yóho tavá i dó coho i —nacachi ña xihin á.

<sup>16</sup> Anda já nacachi Jesús já xihin ña:

—Cuáhán cana yíun ná quixi da yóho xuhun.

<sup>17</sup> Anda já nanducú ñehe ña cán tuhun nu á já nacachi ña já:

—Coó toho yíi i.

Anda já nacachi Jesús já xihin ña:

—Mé a ndaa coó toho yíun. <sup>18</sup> Joo nasahin uhun yíun ta da ín xuhun viti jan co cúu toho da yíun. Ndaa ndusa cáhun —nacachi Jesús.

<sup>19</sup> Já nacachi ña já xihin á:

—Jivi ndusa in profeta cúu mé ndó.

<sup>20</sup> Tásáhnú jícó nde, na Samaria yóho nacaja cáhnu na Ndióxi yati jini yucu jan.

Joo ndóhó, na Israel cáchi ndo ña ndúsa ndítahan nuú nde cuhun nde ñuu Jerusalén caja cáhnu nde Ndióxi. Ta mé ndó ndaja cachi ndó —nacachi ña cán xihin Jesús.

<sup>21</sup> Anda já nanducú ñehe Jesús tuhun nu ña já nacachi a já xihin ña:

—Xíni ñuhú candúsún ña cáhan i jáchi mé a ndaa vaxi quivi caja cáhnu ndihi ndó Ndióxi, tátá yo ndá xoo nacuu va. A cúní ñuhú ga ndó cuhun ndo jini yucu cáa ta ni a cúní ñuhú ga ndó cuhun ndo ñuu Jerusalén caja cáhnu ndó Ndióxi. <sup>22</sup> Joo ndóhó, na Samaria cája cáhnu cuáá ndo Ndióxi jáchi co xini ndó a. Joo ndehe, na Israel xini vaha nde yo cúu Ndióxi cája cáhnu nde. Jáchi chichi mé nde, na Israel nasacu ini Ndióxi quixi mé á jáca cu ñayivi. <sup>23</sup> Ta viti naxinu quivi tá ndítahan caja cáhnu ñayivi Ndióxi, tátá yo xihin ndinuhu ini na tá quiahva cúní inima yíi Ndióxi jáchi quiahva já cúní Ndióxi, tátá yo ña ná caja cáhnu ñayivi mé á. <sup>24</sup> A cúu cuni yó Ndióxi jáchi coó toho yiquí cuñu a saha ña cán quea xini ñuhú caja cáhnu ñayivi mé á xihin inima ná ta xihin ndinuhu ini na —nacachi Jesús xihin ña.

<sup>25</sup> Anda já nacachi tucu ña cán já:

—Sa cándaa cáxi ini i ña vaxi quivi quixi da chindahá Ndióxi cacomí a cuénta saha ñayivi, mé da cúu Cristo. Ta tá ná quixi da cán já ndicani ndihi da nuú nde ndaja coo —nacachi ña cán xihin Jesús.

<sup>26</sup> Anda já nacachi Jesús já xihin ña:

—Da cán cúu yehe, da cáhan xuhun viti —nacachi Jesús xihin ña.

<sup>27</sup> Ta nani cáhan Jesús xihin ña naxinu coo na xíca tuun xihin á já nacatontó na jáchi naxini na ndítuhún a xihin in ñañáha. Joo ni in túhún na coo nasahan ndeé ini na cuhun na ndaca tuhún ñahá ndá a cúní ña cán, á ndá saha ndítuhún a xihin ña. <sup>28</sup> Tá nandíhi já najándacoo ña cán yoo ña ta naquee ña cuahan ña ñuu. Ta cán nacasáha cáhan ña xihin na ñuu cán já cáchi ña já xihin ná:

<sup>29</sup> —Naha quíi ndó. Candehé ndó in dataa, da nacahan ndihi da tá quiahva nacaja i. Á a juú da yóho cúu Cristo, da nacachi Ndióxi chindahá a cacomí cuénta saha ñayivi —nacachi ña cán xihin ná.

<sup>30</sup> Tá nandihí já naqueta ndihí na cán cuahān na xihín ña nu ín Jesús. <sup>31</sup> Joo tá cámaní xinu coo na nu ín Jesús já najácahan na xíca xihín á mé á ña ná cuxu a vatí loho.

<sup>32</sup> Anda já nacachi Jesús já xihín na xíca tuun xihín á cán:

—Sa ín va ñaha cuxu u. Ta ndóhó, co xíní toho ndó ndá a queá —nacachi Jesús xihín ná.

<sup>33</sup> Tá nandihí já nacasáhá na cán ndáca tuhún táhan na já cáchí na já:

—Ndá na sa naquixi ñehe va ñaha cuxu a —cáchí xihín táhan na.

<sup>34</sup> Sahá ña cán queá nacachi Jesús já xihín ná:

—Tá quiahva ndívaaha ini ñayivi tá xíxi na quiahva já ndívaaha ini i tá cája i chuun ña nachindahá Ndióxi yehe caja i ñuyiví yóho. Ta xíní ñúhú caja i ña janda quiahva ná jáxinu coo i ña. <sup>35</sup> Xíní ñúhú ndíñehe ndó nuu ndó candehé ndo ñayivi jáchí cúu ná tátuhun nuú naxutu na trigo. Joo co xíní ñúhú caja ndó tá quiahva cája ñayivi tá ndáti na comí yoo jáquee na trigo. Jáchí viti ñúhú ín tiahva ñayivi ndiquehe na tuhun Ndióxi. <sup>36</sup> Ndá na xíca chindeé ñayivi ndiquehe na tuhun Ndióxi, na cán cúu ná tátuhun na xíca jáquee trigo. Ta a cája chúun uun toho na jáchí quehe na yahvi sahá chuun cája na. Ta na ndíquehe tuhun Ndióxi cán cúu na cuhun catacu indivi anda ama cáa quivi. Ta sahá na cán cavatá da naxutu xihín da najáquee. <sup>37</sup> Jáchí ín in tuhun ta ndaa cáhan ña. Já cáchí a já: “In da xútu ta inga da jáquee jáchí cúu ndíví da da cája chúun nuú in xitoho.” <sup>38</sup> Ta quiahva já nayaha xihín mé ndó jáchí yehe nachindahá i ndohó ña ná cuhun ndó chindeé ndo ñayivi ndihvi na íchí cuéntá Ndióxi vatí coo nandohó ini ndó caxi tuhun ndó tuhun Ndióxi xihín ná. Jáchí inga na nacaxi tuhun tuhun Ndióxi xihín na cán joo ndóhó ñehe táhvi ndó chindeé ndó na ndihvi na íchí cuéntá Ndióxi —nacachi Jesús xihín na xíca tuun xihín á cán nani cámaní xinu coo ñayivi ñuu cán nu á.

<sup>39</sup> Ta cuahá ñayivi ñuu Samaria cán nacandúsa na Jesús sahá ña nacahan ñáñaha cán xihín ná jáchí nacachi ñá cán já xihín ná: “Nacachi mé á xihín i ndaja

cáa tóco ndihí ña nacaja i.” <sup>40</sup> Sahá ña cán queá tá naxinu coo na Samaria cán nu ín Jesús já naxica tahví na nu á ña ná coo chága xihín ná. Sahá ña cán queá nacandoo Jesús nasahin a ivi quivi xihín na cán. <sup>41</sup> Ta cuahá java ga na Samaria cán nacandúsa na Jesús sahá tuhun nacahan mé á xihín ná. <sup>42</sup> Já nacachi mé na Samaria cán xihín ñáñaha cán já:

—Nacandúsa nde yohó tá nacahún sahá Jesús nuu nde joo viti cándéé ini nde mé á jáchí naxini johó nde nu cáhan mé á. Ta viti ndusa cándúsa nde ña cúu á Cristo, mé á nachindahá Ndióxi jácaçu a ñayivi ñuyiví —nacachi na Samaria cán xihín ña.

*Tá nandaja vaha Jesús jahyi in da cája chúun cuéntá gobierno*

<sup>43</sup> Tá sa nayaha ivi quivi nasahin Jesús mé Samaria cán já naquee tucu a cuahān chí estado Galilea. <sup>44</sup> Jáchí sa nacachi mé Jesús já: “Ni in tuhún toho profeta co cája cáhnu na da ñuu da”, nacachi Jesús. <sup>45</sup> Joo tá naxinu coo Jesús estado Galilea cán já nandiquehe vaha na cán mé á jáchí sa nasahan ri na cán vicó pascua ñuu Jerusalén ta cán naxini na ña náhnu nacaja mé á.

<sup>46</sup> Anda já naxinu coo tucu Jesús ñuu Caná cuéntá Galilea cán nuú nandaja mé á ticuí nanduu dó vino. Ta mé ñuu cán nasahin in dataa, da cája chúun cuéntá gobierno. Ta a juú quiahva quihvi jahyi da cándúhu dá ñuu Capernaum. <sup>47</sup> Ta tá naxini johó da cán ña sa naquee Jesús estado Judea ta ín a estado Galilea viti já ndáva da nasahan da nu á já naxica tahví da nu á ña ná cuhun a vehe da ndaja vaha jahyi da jáchí sa ndicáhvi da cándúhu dá.

<sup>48</sup> Tá nandihí já nacachi Jesús já xihín dá:

—Ndúsa caja i ña náhnu xihín ña xituhún nu ndo já cuu candúsa ndó yehe á tá coo ta co cúní ndó candúsa ndó yehe —nacachi Jesús.

<sup>49</sup> Anda já nanducú ñehe da cája chúun cuéntá gobierno cán tuhun nuú Jesús já nacachi da já xihín á:

—Á a cuú caja ndó ñamaní cuhun quíi ndó vehe e jáchí cúní quivi jahyi i —nacachi da xihín Jesús.

<sup>50</sup> Anda já nacachi Jesús já xihín dá:



—Cuáhán ndicó coo ndó vehe ndó jáchi nandivaha jahyi ndó —nacachi Jesús xihín dá.

Ta nacandúsa da cán ña nacachi Jesús xihín dá chí naquee da nandicó coo da cuanúhu dá. <sup>51</sup> Ta tá sa yati xinu coo da vehe da já ndáva nihni na cúu mozo da nasahan na ñehe ná da já nacachi na já xihín dá:

—Sa co quíhvi ga jahyi ndó viti.

<sup>52</sup> Anda já nandaca tuhún da cán mozo da já cáhí da já:

—Ndá hora nacasáhá nandivaha jahyi i —nacachi da xihín ná.

Já nacachi na cán já:

—Cuni tátuhun caa in sahini já nandindaa ña chicaan cáhni á da.

<sup>53</sup> Xihín ña yóho nacandaa ini da cán ña mé a ndaa nandaja vaha Jesús jahyi da jáchi mé hora cán nacachi Jesús xihín dá ña tácu tá tácu jahyi da. Sahá ña cán queá nacandúsa mé dá xihín na vehe da Jesús.

<sup>54</sup> Ta xihín ña yóho naxinu ivi ña xituhún nacaja Jesús estado Galilea cán anda nani naquee a Judea já nandicó coo tucu a Galilea.

## 5

*Tá nandaja vaha Jesús in da quíhvi, da ín yuhú ticuúí nani Betesda*

<sup>1</sup> Tá nayaha ña yóho já naquee Jesús cuahan ñuu Jerusalén nu cája na Israel víco.

<sup>2</sup> Ta mé nu quíhvi johu na ñuu Jerusalén cán ín in yéhe nani yéhe ndicachi. Ta yati cán nasahin in vehe ta ín uhun yuyéhe nu quíhvi na ini a ta ini mé vehe cán ndácaan in pila cáhnu nu ñúhu ticuúí ta nani a Betesda tuhun hebreo. <sup>3</sup> Ta ní ini mé vehe cán nacaníhni na quíhvi ndúu na. Java na cúu ná na cuáá. Java na quíhvi saha. Ta java na naxihí tuhú. Ní cán nacaníhni na ndúu na ndáti na ndicanda ticuúí cán. <sup>4</sup> Jáchi ndá tañu núu tátó Ndióxi ta jándicanda mé á ticuúí cán. Ta ndá na ná queta nuu nu cuítí ini mé ticuúí cán tá nandihí nandicanda do já ndivaha na ta co cája toho a ndá cuehe ndóho na. <sup>5</sup> Ta tañu tóco ndihí na quíhvi nasanduú cán nasandacaan in dataa, da sa ín oco sahun uní cuia quíhvi da. <sup>6</sup> Ta tá naxini Jesús cándúhu dá tañu na quíhvi cán ta tá nacandaa ini a ña sanahá ndivaha

quíhvi da já nandaca tuhún a da já nacachi a já xihín dá:

—Á ndivahún cúnun.

<sup>7</sup> Anda já nanducú ñehe da cán tuhun nu á já nacachi da já:

—Coó ni in ñayivi yóho ña chindeé na yehe queta nuu i ini ticuúí tá ndicanda do. Jáchi tá jacá cáhán uun i jáqueta i mí i, sa naquee vaha va inga na nuú i. Ña cán queá a cuú ndivaha i —nacachi da cán xihín Jesús.

<sup>8</sup> Anda já nacachi Jesús já xihín dá:

—Cuáhán ndacoo nditivún yívun ta cuanúhun —nacachi Jesús xihín da cán.

<sup>9</sup> Tá nacachi Jesús já chí ivi laá nandivaha da quíhvi cán já nandiquehe da yivi dá já nacasáhá da xica da. Ta sahá ña cúu á quívi ndiquehe ndée ná <sup>10</sup> sahá ña cán queá naqueta java na sacuaḥa nuú na Israel já nacachi na já xihín dá:

—Viti cúu á quívi ndiquehe ndée yo ta co ndítahan toho nuun cojún yívun caca nuún —nacachi na xihín dá.

<sup>11</sup> Anda já nanducú ñehe da cán tuhun nu ná já nacachi da já:

—Mé da nandaja vaha yehe cán cúu da nasahnda chuun nuú i ña ná cojo i yivi cuhun i —nacachi da cán xihín ná.

<sup>12</sup> Já nandaca tuhún tucu na Israel cán da já nacachi na já:

—Yo já nacachi xuhun ña ná ndicojún yívun cuhun —nacachi na cán.

<sup>13</sup> Joo da cán co xini da yo nandaja vaha ñahá jáchi tá nandaja vaha Jesús da já naquíhvi nuu a cán tañu ñayivi cuaha cán cuahan. <sup>14</sup> Tá nandihí já nanditahan Jesús da cán ini veñuhu cáhnu já nacachi a já xihín dá:

—Candehé. Sa co quíhvi gaún viti. A ndicó coo gaún cajún cuachi jáchi tiaḥva náá quixi ña ndeé chága ví ndohún —nacachi Jesús xihín dá.

<sup>15</sup> Tá nandihí já ndáva da cán nasahan da cáxi tuhun da nuú na Israel ña Jesús cúu ña nandaja vaha ñahá. <sup>16</sup> Sahá ña cán queá nacasáhá na Israel cán cája xixi na xihín Jesús. Ndúcu na cahni na a sahá ña cája chún a ndája vaha mé á na quíhvi quívi ndiquehe ndée ná. <sup>17</sup> Anda já nacachi Jesús já xihín ná:

—Cája chúun ta cája chúun Ndióxi, tátá i sahá ña cán quéa cája chúun ta cája chúun ri yehe va —ñacachi Jesús.

<sup>18</sup> Sahá ña cán quéa ví ga ví cúní na Israel cán cahní na Jesús jáchi cáchí na co cája cáhnu a Ndióxi quívi ndíquehe ndée ná tá quiahva cáchí ley. Ta cúní na cahní na mé á jáchi cáchí a ña cúú á in túhún jini já jahyi Ndióxi ta xihín ña yóho ndája mé á tátuhun mé Ndióxi.

*Ña cúú cája Jesús sahá ña cúú á in túhún jini já jahyi Ndióxi*

<sup>19</sup> Já ñacachi Jesús já xihín na Israel cán:

—Mé a ndaa ná cahan i xihin ndo. Yehe cúú u in túhún jini já jahyi Ndióxi ta co cája i ni in ñaha cuénta mí i jáchi cája i ña xíní i cája Ndióxi, tátá i. Ta tóco ndihi ña cája tátá i ña cán cúú ña cája ri yehe va. <sup>20</sup> Jáchi sahá ña quíhvi ini Ndióxi, tátá i yehe sahá ña cán quéa náha mé á nuú i ndaja táhan ñaha cája mé á. Ta janda ñaha náhnu chága ví náha mé á nuú i ta chí catóntó ndihi ndó tá ná cuni ndó ña. <sup>21</sup> Jáchi tá quiahva cája Ndióxi, tátá i jánditacu a ndii ña ná catacu na quiahva já cuu caja ri yehe jánditacu u na cúní mí i catacu. <sup>22</sup> Ta mé Ndióxi, tátá i co cája víí toho a sahá ñayivi. Ña ñacaja mé á quéa nasahan ñamaní nuú i, da cúú in túhún jini já jahyi mé á, ña ná caja víí i saha ná. <sup>23</sup> Já quéa ná caja cáhnu ñayivi yehe tá quiahva cája cáhnu na Ndióxi, tátá i. Jáchi ndá na co cája cáhnu yehe náha ña co cája cáhnu na Ndióxi, tátá i jáchi mé a cán nachindahá yehe vaxi i.

<sup>24</sup> Mé a ndaa ná cahan i xihin ndo. Ndá na taa johó vaha nu cáhan i ta cándusa na Ndióxi, mé a nachindahá yehe quixi i, na cán cúú na catacu anda ama cáa quívi. Ta a jándoho Ndióxi ini na indayá jáchi cúú á tátuhun sa najánditacu tucu Ndióxi na. <sup>25</sup> Mé a ndaa ná cahan i xihin ndo ña vaxi quívi ta cúú á tiempo viti tá na co tácu cuni johó na ña cáhan yehe, da cúú in túhún jini já jahyi Ndióxi. Ta ndá na ná ndiquehe vaha tuhun cáhan i xihin ná catacu na anda ama cáa quívi. <sup>26</sup> Jáchi tá quiahva cuu caja Ndióxi catacu ñayivi quiahva já ñacaja mé á ña ná caja ri yehe, da cúú in túhún jini já jahyi mé á, ña ná cuu catacu ñayivi. <sup>27</sup> Ta nasahan mé á ñamaní nuú i ña ná caja

víí i sahá ñayivi ñuyiví jáchi yehe cúú da ñaquixi indiví nduu in ñayivi. <sup>28</sup> A catóntó ndo sahá ña cáhan i xihin ndo yóho jáchi mé a ndaa vaxi quívi tá cuni johó tóco ndihi na sa ñaxihí nuú cahan i xihin ná <sup>29</sup> já queta na camasanto. Ta na ñacaja vaha cán nditacu na ta cuhun na catacu na anda ama cáa quívi. Ta na ñacaja ña quini nditacu na ta cuhun na indayá ndoho ini na.

*Náha Jesús ña in saha cája tóco ndihi ña cája*

<sup>30</sup> Tóco ndihi ña cája i a juú in túhún mí i caja ña. Tá quiahva sáhdá Ndióxi, tátá i chuun nuú i ña ná caja víí i sahá ñayivi quiahva já cája víí i saha ná. Ta cája víí ndaa i saha ná jáchi co ndúcú u caja i ña cúní mí i. Ña ndúcú u caja i cúú ña cúní Ndióxi, tátá i caja i jáchi mé á nachindahá yehe quixi i. <sup>31</sup> Jáchi tá saha mí i ná caca nuu i cahan i, co nditahan ndíquehe ndó ña cáhan i sahá i. Co nditahan nuú i cahan i saha mí i <sup>32</sup> jáchi in inga ña cáhan sahá i ta ña cáhan mé a cán sahá i cúú á ña ndaa. <sup>33</sup> Ta mé ndó nachindahá ndo java na nasahan na ndaca tuhún na Juan sahá i. Ta ña ndaa nasacuu tóco ndihi tuhun nanducú ñehe da cán nu ndo. <sup>34</sup> Vatí co ndátí i cándusa ndó yehe sahá ña cáhan in ñayivi sahá i joo cuu cacu ndaa inima ndó tá ná cándusa ndó ña cáhan Juan sahá i. <sup>35</sup> Jáchi mé Juan, da ñacaja nduta ñayivi cán nasacuu da tátuhun in íti, dó jándiyéhe nuu ndo. Joo chá tiempo cuití va ñacajii ini ndó xihín tuhun ñacahan da. <sup>36</sup> In inga ña cáhnu chága a juú ga ña ñacahan Juan sahá i. Ta ña cán cúú á ña náhnu xihín ña xituhún ñaxini ndó ñacaja i. Ta ña yóho náha nu ndo yo cúú yehe ta náha ña cúú á ña ndaa ña nachindahá Ndióxi, tátá i yehe. Jáchi tóco ndihi ña cája i cúú á ña ñacachi Ndióxi, tátá i xihín i caja i. <sup>37</sup> Ta Ndióxi, tátá i, mé á nachindahá yehe náha tuhun sahá i. Joo ndóhó, co xini johó ndó nu cáhan mé á ta ni co xíní tívi ndó a. <sup>38</sup> Ta ni coó tuhun mé á ndacaan inima ndo jáchi co cándusa ndó yehe, da nachindahá mé á quixi ñuyiví yóho. <sup>39</sup> Vatí jácuaha vaha ndó tuhun Ndióxi sahá ña ndúcú ndo ndaja cuu catacu ndó anda ama cáa quívi joo co cándaa ini ndó

ñā mé tuhun Ndióxi cán cúú á ñā cáhan sahá yehe. <sup>40</sup> Ta co cúni ndó quixi ndó nuú i já ná caja i ñā ná catacu ndó anda ama cáa quivi.

<sup>41</sup> 'Co ndúcú toho i ñā ná caja cáhnu ndó yehe. <sup>42</sup> Sa xini vaha i ínima ndo ta cándaā ini i ñā co quíhvi ini ndó Ndióxi. <sup>43</sup> Naxinu i ñuyiví yóho cuéntá Ndióxi, tátá i ta co cúni ndó ndiquehe vaha ndó yehe. Joo tá ná quixi in da cuéntá mé dá já ndiquehe vaha ndusa ndó da. <sup>44</sup> Jáchi mé ndó cátoó ndó candoo vaha ndó nuú ñayivi cuití va ta co ndúcú ndó candoo vaha ndó nu Ndióxi. Sahá ñā cán queá ihvi ndivaha cúú ini ndó cándeé ini ndó in túhún jini Ndióxi. <sup>45</sup> Coto a juú cahán ndo ñā jácojo i cuachi jata ndo nu Ndióxi, tátá i. Mé ley nacahyí Moisés, ñā cán cúú á chícaan cuachi jata ndó vatí cándeé ini ndó da. <sup>46</sup> Tá ta mé a ndaa cándúsa ndó ñā nacahyí Moisés sanahá já queá cándúsa ndó yehe jáchi sahá yehe nacahyí Moisés sanahá. <sup>47</sup> Joo sahá ñā co cándúsa ndó ñā nacahyí Moisés sahá i sahá ñā cán queá co cándúsa ndó ñā cáhan i xihin ndo —nacachi Jesús xihin na Israel cán.

## 6

*Sáhan Jesús ñā cuxu uhun mil taa*  
(Mt. 14:13-21; Mr. 6:30-44; Lc. 9:10-17)

<sup>1</sup> Tá sa nayaha tóco ndihi ñā yóho já naquee Jesús cuahan inga xoo tañuhú Galilea cán. Ta mé tañuhú cán cáhan tucu na xihin dó naní do Tiberias. <sup>2</sup> Ta cuahá ndivaha ñayivi ndíco jata Jesús cuahan na jáchi naxini na ñā náhnu nacaja mé á tá nandaja vaha mé á na quíhvi. <sup>3</sup> Tá nandihí já nandaa Jesús in xiqui ta cán nasacoo a xihin na xica tuun xihin a cán. <sup>4</sup> Ta mé tiempo já sa cáyati vicó pascua ñā cája mé na Israel cán. <sup>5</sup> Ta tá nandicoto nihni Jesús já naxini a ñā ndíco cuahá ñayivi jata vaxi na já nacachi a já xihin Felipe:

—Ndájá cájún cuéntá cohó cueen nahá yo ñā cuxu tóco ndihi ñayivi yóho —nacachi Jesús xihin dá.

<sup>6</sup> Nacachi Jesús ñā yóho xihin Felipe jáchi cúni a cuni a ndía cachi da cán xihin á. Jáchi sa xini vaha Jesús ndáa queá caja ñā ná cuxu ndihi na cán. <sup>7</sup> Anda já nanducú ñehe Felipe tuhun nuú Jesús já nacachi da já xihin á:

—Ni ivi ciento denario ná cañehé, a quéta toho ñā cán cueén pan ná quiahva in yuhú in yuhú cuxu in in ñayivi ndúu yóho —nacachi da cán xihin Jesús.

<sup>8</sup> Anda já nacahan Andrés, da cúú in táhan na xica tuun xihin Jesús, da cúú ñani Simón Pedro. Já nacachi da já xihin Jesús:

<sup>9</sup> —Yóho iin in taa loho ta ñehe da uhun pan cebada xihin ivi tiyacá. Joo ama ná queta ri ñā yóho cuxu tóco ndihi ñayivi jan —nacachi Andrés xihin Jesús.

<sup>10</sup> Anda já nacachi Jesús já:

—Cahan ndó xihin ná ñā ná cacoo na.

Anda já nasacoo ndihi na cán. Ta a juú quiahva ndató nasahnu yucu nuú nasacoo tátuhun uhun mil taa. <sup>11</sup> Tá nandihí já natiin Jesús pan cán já nandiquiahva ndixahvi nu Ndióxi. Ta tá nandihí já nasahan ñā nuú na xica tuun xihin á ta nandicahnda na ñā nuú na ndúu coo cán. Ta quiahva já nacaja ri a xihin tiyacá va. Ta naxixi ndihi na janda quiahva nachutú tixi na. <sup>12</sup> Ta tá nandihí já nacachi Jesús já xihin na xica tuun xihin á cán:

—Jánditaca ndó tóco ndihi ñā nacandoo jan já ná a tiví ñā —nacachi Jesús xihin ná.

<sup>13</sup> Sahá ñā cán queá najánditaca na ñā ta najándicutú na uxu ivi toyicá xihin ñā nacandoo. <sup>14</sup> Tá naxini ndihi ñayivi cán ñā xituhún nacaja Jesús yóho já nacasáhá cáchi xihin táhan na já:

—Jivi ndusa da yóho cúú profeta nacachi Ndióxi chindahá a ñuyiví yóho —cáchi xihin táhan na.

<sup>15</sup> Joo naquee Jesús cuahan in túhún mé á coo a yucu jáchi xini mé á ñā ndúcú ñayivi cañehe ndúsa na mé á jáchi cúni na ndaja na mé á rey nu ná.

*Tá naxica sahá Jesús nuú tañuhú*  
(Mt. 14:22-27; Mr. 6:45-52)

<sup>16</sup> Tá sa nacuaá já nanuu na xica tuun xihin Jesús xiqui cán cuahan chí yuhú tañuhú cán. <sup>17</sup> Ta chí sa nacanaá vaha va ta coo Jesús xinu coo nu ndúu na sahá ñā cán queá nandaa na jata in barco ta nacasáhá na jándicaca na do jáchi cúni na cuhun na ñuu Capernaum. <sup>18</sup> Ta ndaja coo nacasáhá ndícojo ticuú nuú tañuhú cán jáchi nacasáhá xicó in tachí ndeé ndivaha. <sup>19</sup> Ta tá sa nacaxicá na uhun á ññu kilometro

cuaḥan na xih̄in barco cán nuú ticuif̄ já nax̄ini na xica sáhá Jesús cuaḥan nuú ticuif̄ já cáyati a nu barco cándójó na cán. Anda já načasáhá yíhv̄i na ndúu na. <sup>20</sup> Ta tá nax̄inu cōo Jesús nu ná já naçachi a já xih̄in ná:

—A cáyihv̄i toho ndó jách̄i yeḥe va cúu u —naçachi a xih̄in ná.

<sup>21</sup> Anda já cávatá na najánda na a jata barco. Ta iv̄i laá sa nax̄inu cōo na nuú cuaḥan na.

### *Nd̄inducú ñayivi Jesús*

<sup>22</sup> Tá naṭivi inga quiv̄i itaṇ já naçasáhá ñayivi nd̄inducú na Jesús jách̄i nax̄ini na ña cōo nandaa toho a in túhún barco naṣah̄in cán xih̄in na xica tuun xih̄in a jách̄i mé cuití na cán sa nandaa cuaḥan. <sup>23</sup> Ta nani ndúu na yuhú tañuhú yati nuú nandaja cuaḥa Jesús pan tá nandih̄i nandiquiahva mé á ndixahvi nu Ndióxi cán já nax̄inu cōo java barco, dó naquixi chí ñuu Tiberias. <sup>24</sup> Ta sahá ña cōo nanditahan na Jesús sahá ña cán quea nandaa na barco cán já naquee na cuaḥan na ñuu Capernaum nd̄inducú ñahá na.

### *Jesús cúu á tátuhun pan xixi ñayivi já tácu na*

<sup>25</sup> Tá nax̄inu cōo na cán inga xoo tañuhú já nanditahan na Jesús. Ta naçasáhá ndáca tuhún na mé á já cách̄i na já:

—Maestro, ndá hora nax̄inu cōo ndó yóho —naçachi na xih̄in á.

<sup>26</sup> Anda já naçachi Jesús já xih̄in ná:

—Mé a ndaa ná caḥan i xih̄in ndo. Xica ndó nd̄inducú ndó yeḥe joo cōo cúu á sahá ña naçandaa ini ndó yo cúu yeḥe. Sahá ña náhnu naçaja i tá naṣah̄an i ña nax̄ixi ndó janda naçhutú tixi ndó sahá ña cán quea nd̄inducú ndó yeḥe. <sup>27</sup> Cōo ndítahan ndih̄i nahá ini ndó sahá ña cuxu ndó ñuyiv̄i yóho. Ña ndítahan caja ndó quea nd̄inducú ndó ndá quiahva catacu ndó anda ama cáa quiv̄i. Jách̄i yeḥe cúu da naçindahá Ndióxi nduu ñayivi ta cuu caja i ña ná catacu ndó anda ama cáa quiv̄i. Jách̄i Ndióxi, tátá i náha ña mé a ndaa naçaxi a yeḥe caja i chuun yóho —naçachi Jesús xih̄in na cán.

<sup>28</sup> Anda já naçachi na cán já xih̄in á:

—Ndía ndítahan nuú nde caja nde já ná jáx̄inu cōo nde ña cúni Ndióxi —naçachi na xih̄in Jesús.

<sup>29</sup> Já naçachi Jesús já xih̄in ná:

—Ña cúni Ndióxi caja ndó quea ná candúsa ndó yeḥe, da naçindahá mé á ñuyiv̄i yóho.

<sup>30</sup> Anda já naçachi tucu na cán já xih̄in á:

—Ndá ñaha xituhún chága cuu caja ndó nuú nde viti ña ná cuni nde ña já ná cuu candúsa nde ndohó. Ndá a náhnu quea cuu caja ndó. <sup>31</sup> Jách̄i mé tásahnu jícó nde nax̄ixi na pan tá nax̄ica na yucú ích̄i nu cōo ndúu ñayivi cán. Já cách̄i tuhun Ndióxi já: “Nax̄ixi na pan ña naquixi indivi naçaja Moisés” —naçachi na cán xih̄in Jesús.

<sup>32</sup> Já naçachi Jesús já xih̄in ná:

—Mé a ndaa ná caḥan i xih̄in ndo. A juú toho Moisés cúu da naṣah̄an pan ña naquixi indivi nu ná. Jách̄i Ndióxi, tátá i cúu ndusa ña naṣah̄an pan naquixi indivi nu ná. Ta viti cúni Ndióxi quiahva in ñaha vaḥa chága nu ndo a juú ga ña naṣah̄an Moisés nuú na cán sanahá. <sup>33</sup> Jách̄i yeḥe cúu u tátuhun pan ña nanuu indivi naçaja Ndióxi ña ná cuu catacu ñayivi anda ama cáa quiv̄i —naçachi Jesús xih̄in na cán.

<sup>34</sup> Anda já naçachi na cán já xih̄in á:

—Nini quiv̄i quiahva ndó táhan pan jan nuú nde, xitoho.

<sup>35</sup> Já naçachi Jesús já xih̄in ná:

—Yeḥe cúu u tátuhun mé pan jan. Tá ná ndiquehe ñayivi yeḥe já ndivaḥa ini na ta cúu á tátuhun a cuico ga na. Ta ndá na cándúsa na mí i já cúu á tátuhun a ích̄i ga ini na ticuif̄. <sup>36</sup> Joo cúu á tá quiahva naçachi i xih̄in ndo: cōo cándúsa toho ndó yeḥe vatí xini ndó yeḥe. <sup>37</sup> Joo tóco ndih̄i na vaḥi nuú i cája Ndióxi, na cán cúu na cándúsa yeḥe. Ta ndá na cándúsa yeḥe, na cán cōo táxi i na ña ná quee na cuhun na. <sup>38</sup> Jách̄i vatí nanuu i indivi nu in Ndióxi joo cōo naquixi i caja i ña cúni mí i. Vaḥi i caja i ña cúni Ndióxi, tátá i jách̄i mé á naçindahá yeḥe. <sup>39</sup> Ta ña cúni Ndióxi quea ña ná a quiahva i ñaman̄i ndih̄i sahá na naṣah̄an mé á nuú i. Ña cúni mé á quea ná jánditacu u tóco ndih̄i na tá ná x̄inu cōo quiv̄i nu ndih̄i. <sup>40</sup> Ña cúni Ndióxi quea ná catacu ñayivi, na cándeé ini yeḥe anda ama cáa quiv̄i. Ta yeḥe, da cúu in túhún jini já jahyi mé á jánditacu u na quiv̄i nu ndih̄i cuif̄ —naçachi Jesús.

<sup>41</sup> Andá já nacasáhá na Israel cán cahan núu na sahá Jesús jáchi sa nacachi a ña cúu á tátuhun pan ta nacachi a ña nanuu a chí indiví. <sup>42</sup> Ta já nacachi xihin táhan na cán já:

—Á a juú jahyi José va cúu Jesús yóho. Ta xini vaha va mí yo cúu naná da xihin tátá da. Ta ndá cuéntá queá cáchí ri da ña naquixi da chí indiví, dá já —nacachi xihin táhan na cán.

<sup>43</sup> Andá já nacachi Jesús já xihin ná:

—A cahan núu ga ndó sahá i. <sup>44</sup> Jáchi jácahan Ndióxi, tátá i, ñayivi ña ná candúsa na yehe. Ta ni in túhún toho ñayivi a cuú candúsa na yehe tá ta co jácahan Ndióxi ínimá ná, mé á nachindahá yehe. Ta na cán cúu na jánditacu u quivi nu ndíhi. <sup>45</sup> Já nacahyi na profeta sanahá: “Jánaha Ndióxi tóco ndihi ñayivi.” Ña cán queá tóco ndihi ñayivi, na xini johó nu cahan Ndióxi ta cajú na ña jánaha mé á nu ná, na cán cúu na vaxi nuú i.

<sup>46</sup> Joo a juú cahan ndo ña cuu cuni java ñayivi Ndióxi, tátá i. Jáchi yehe, da nachindahá mé á ñuyivi yóho, cúu in túhún da xini ñahá. <sup>47</sup> Mé a ndaa ná cahan i xihin ndo. Ndá na candeé ini yehe, na cán cúu na catacu anda ama cúa quivi. <sup>48</sup> Jáchi yehe cúu u tátuhun pan ña cuu caja ña ná catacu na. <sup>49</sup> Sa xini ndó tásáhnú jícó ndo naxixi na pan yucú íchí sanahá joo naxihí tá naxihí na. <sup>50</sup> Joo yehe cúu u tátuhun pan ña nanuu chí indiví já queá ndá na candúsa yehe cúu ná tátuhun na xixi pan ta já a quivi na. Jáchi tá ná cuxu na pan quiahva i nu ná já queá catacu na anda ama cúa quivi. <sup>51</sup> Yehe cúu u tátuhun mé pan xixi na. Nanuu i indiví ta a cúu ndihi sahá i. Ta jivi mé yiquí cuñu i cúu á tátuhun pan xixi na yóho ta vaxi quivi ndiquiahva i ña nu ná já ná cuu cacu ndaa ínimá ná. Ta tá ná cuxu na ña já catacu na anda ama cúa quivi —nacachi Jesús.

<sup>52</sup> Andá já nacasáhá na Israel cán ndítuhún cuehe xihin táhan na já nacachi na já:

—Cáchí da yóho ña cúu yiquí cuñu da tátuhun pan xixi ñayivi. Ndaja cuu caja ri da quiahva da ña nu yo cuxú —cáchí xihin táhan na.

<sup>53</sup> Andá já nacachi Jesús já xihin ná:

—Mé a ndaa ná cahan i xihin ndo. A cuú catacu ndó anda ama cúa quivi tá ta co candúsa ndó yehe. Ta tá candúsa ndó yehe cúu á tátuhun xixi ndó yiquí cuñu i ta cúu á tátuhun xixi ndó ni i. <sup>54</sup> Ndá na xixi na yiquí cuñu i ta xixi na ni i, na cán cúu na cacu ndaa ínimá ná ta jánditacu u na quivi nu ndíhi. <sup>55</sup> Jáchi yiquí cuñu i cúu ndusa tátuhun in ñaha vaha ndivaha cuxu na ta ni i cúu dó tátuhun in dó vaha xixi na. <sup>56</sup> Ndá na ná ndiquehe vaha yehe cúu á tátuhun ndiquehe vaha na in pan cuxu na ta cúu á tátuhun ndiquehe na ticui xixi na. Já queá in nduu na xihin i ta já in nduu ri yehe va xihin mé ná. <sup>57</sup> Ta sahá ña tácu Ndióxi, tátá i, mé a nachindahá yehe sahá ña cán queá tácu ri yehe va cajú mé á. Quiahva já vaha ri xihin ñayivi jáchi tá ná ndiquehe vaha na yehe já catacu na caja i. <sup>58</sup> Jáchi yehe cúu u ndusa tátuhun pan ña nanuu indiví. Ta co cúu á tátuhun ña nayaha xihin tásáhnú jícó ndo tá naxixi na pan naní maná yucú íchí cán jáchi tá nandihí naxihí tá naxihí na cán. Joo ndá na candeé ini yehe cúu ná tátuhun na xixi pan ña naquixi indiví. Ta na cán catacu na anda ama cúa quivi —nacachi Jesús.

<sup>59</sup> Tóco ndihi ña yóho najánaha Jesús nu ná ini veñuhu ñuu Capernaum cán.

*Cuu catacu ñayivi anda ama cúa quivi tá ná candeé ini na Jesús*

<sup>60</sup> Ta cuahá táhan na xica xihin Jesús cán tá naxini johó na ña nacahan mé á já nacasáhá cahan núu na sahá já cáchí na já:

—Yáncá ndivaha candúsa í tuhun cahan Jesús yóho. A cúu toho caja i xihin á —nacachi na cán.

<sup>61</sup> Tá naxini Jesús ña cáhvi núu ini na xica xihin a cán já nacasáhá cáchí a já xihin ná:

—Ndíhiví ndó sahá tuhun nacahan i yóho. <sup>62</sup> Ndaja ga ví ndíhiví ndó tá ná cuni ndó yehe ndaa i cuhun i indiví nuú nasahin i jáchi yehe cúu u da nachindahá Ndióxi nduu ñayivi. <sup>63</sup> Nasahan Ndióxi in ínimá nuú in in ñayivi ña ná chindeé a na ndinducú na mé á. Joo yiquí cuñu ñayivi co chindeé toho a na ndinducú na mé á. Ta tóco ndihi ña nacahan i xihin ndo cúu á ña cuu xinu ini ínimá ndo ña ná catacu ndó anda ama cúa quivi. <sup>64</sup> Joo ndúu java ndó

cámaní yíí candúsa ndó ña cáhan i xihín ndo —ñacachi a.

Ñacachi Jesús ña yóho jáchi sa xini mé á anda saha ndá na cúu na co candúsa ñahá. Ta sa xini Jesús ndá da cúu da jicó túhún ñahá. <sup>65</sup> Anda já ñacachi tucu a já:

—Sahá ña cán quéa cáhí i xihín ndó ña ni in túhún toho ñayivi a cuú candúsa na yehe tá co jácahan Ndióxi ínima ná —ñacachi Jesús.

<sup>66</sup> Tá ñacachi Jesús ña yóho já quéa cuaha táhan na nasaxica xihín a cán najandacoo na mé á ta chí coó naxeen ga na caca nuu na xihín á. <sup>67</sup> Anda já nandaca tuhún Jesús ndihuxu ivi na xica tuun xihín a cán já ñacachi a já xihín ná:

—Á cuhun ri ndóhó va cúni ndo —ñacachi a.

<sup>68</sup> Anda já nanducú ñehe Simón Pedro tuhun nuú Jesús já ñacachi da já:

—Candehé ndo, xitoho i. Yo nuú ga cuu cuhun nde. Tuhun cáhan ndó xihín nde caja ña ná cuhun nde catacu nde anda ama cáa quivi tá ná candúsa nde ña. <sup>69</sup> Ta ndehe sa ñacandúsa va nde ndohó. Ta sa xini vaha nde ña cúu ndó Cristo, ña in túhún jini já jahyi Ndióxi, ña tácu indivi —ñacachi Pedro cán xihín Jesús.

<sup>70</sup> Anda já ñacachi Jesús já:

—Mé a ndaa ñacaxi i ndihuxu ivi ndó ña ná caca tuun ndó xihín i. Ta vatí ñacaxi i ndihi ndó joo in táhan ndó cúu dá cuéntá tiñahá sacuaḥa —ñacachi Jesús.

<sup>71</sup> Ñacachi Jesús ña yóho saha Judas, jahyi Simón Iscariote jáchi mé Judas cán cúu dá da jicó túhún ñahá chága chí nuu vatí cúu dá in táhan da uxu ivi na xica tuun xihín Jesús cán.

## 7

*Có cúni na cúu ñani Jesús candúsa na mé á*

<sup>1</sup> Tá nayaha ña yóho já naxica nuu Jesús tá ñuu tá ñuu estado Galilea cán. Coó naxeen ga cuhun a chí Judea jáchi cán ñacasahá na ndúcú na mé á cahní na a.

<sup>2</sup> Joo sahá ña ñacayati víco tá ndúu ñayivi vehe tayahvá válí cája na Israel <sup>3</sup> sahá ña cán quéa ñacachi java ñani Jesús já xihín á:

—Ndía cájún coún yóho. Cuáhán chí Judea já ná cuni na xica xuhun cán ndaja ndáa ña náhnu cájún. <sup>4</sup> Jáchi tá cúni in dataa naha

da ña náhnu cája da já quéa co ndácoo jehé toho da cája da ña. Tá ta mé a ndaa cájún ña náhnu já quéa xini ñuhú cajún ña já ná cuni ní cúu ñayivi ndaja náhnu ñaha cájún —ñacachi ñani Jesús xihín á.

<sup>5</sup> Ñacachi na cán ña yóho jáchi ni mé ñani a cán coó ñacandúsa ñahá. <sup>6</sup> Anda já ñacachi Jesús xihín na cán já:

—Cámaní yíí ndindaa hora cuhun i. Ta vaha ri ndóhó ndá hora ñacuu va cuu cuhun ndó jan. <sup>7</sup> Jáchi ñayivi cája ña núu ñuyivi yóho a cuú candají toho na ndohó joo candají na yehe jáchi cáxí táhyí cáhan i xihín ná ña cája na ña núu. <sup>8</sup> Cuáhán mé ndó víco tá cúni ndó cuhun ndo jáchi yehe a cuhun toho i jáchi cámaní yíí xinu hora cuhun i —ñacachi a.

<sup>9</sup> Ña yóho ñacachi Jesús xihín ñani a. Ta ñacando mé á estado Galilea cán.

*Tá naxinu coo Jesús víco vehe tayahvá cán*

<sup>10</sup> Joo tá nandihí ñaquee ñani Jesús cán cuahan na víco já ñaquee ri Jesús cuahan mé víco cán. Joo coó naxeen a naha tívi a mé á nuú ñayivi. <sup>11</sup> Ta mé na sacuaḥa nuú na Israel cán ñacasahá na ndúcú na Jesús: “Ndá xica nuu da tañu víco cán”, cáhan na.

<sup>12</sup> Ta jandá johó ndítuhún yaá ñayivi sahá Jesús xica nuu na víco cán. Java na cáhí na sahá Jesús ña cúu dá ta cája vaha. Ta java na cáhí na: “Có cúu toho da ta vaha jáchi xica nuu cuití da jándahvi da ñayivi”, cáhí na.

<sup>13</sup> Joo ni in na co sahan ndeé ini cahan sahá nuú na sacuaḥa nuú na Israel cán jáchi yíhvi ñahá na.

<sup>14</sup> Ta tá natahvi java víco cán já ñaquihvi Jesús ini veñuhu cáhnu ñuu Jerusalén cán já ñacasahá jánaha nuú ñayivi. <sup>15</sup> Ta tá xini johó na Israel cán nu cáhan Jesús chí catóntó na já ñacasahá ndaca tuhún táhan na já cáhí na já:

—Ndájá ñacatihva nahá da yóho ña jánaha da nu yo jáchi a juú da naxica jácuaha cúu dá —ñacachi xihín táhan na cán.

<sup>16</sup> Anda já ñacachi Jesús já xihín ná:

—Ña jánaha i nu ndo yóho co cúu á ña ñaquixi jini mí i jáchi cúu á ña quixi nu Ndióxi, tátá i, mé á ñachindahá yehe. <sup>17</sup> Ta tá mé a ndaa sácú ini ndó caja ndó ña cúni Ndióxi já quéa cuu candaa ini ndó á cáhan

i cuéntá Ndióxi, á cáhan i cuéntá mí cuití vi. <sup>18</sup> Jáchí ndá na cáhan cuéntá mé ná já quéa ndúcú na ña ná caja cáhnu ñayivi na. Joo ndá na ndúcú ña ná ndicáhnu mé á nachindahá ñahá cán, na cán cúú ndusa na cáhan ña ndaa ta co caja na ña co ndítahan nu ná caja na.

<sup>19</sup> Mé a ndaa najándacoo Moisés ley nu ndo joo ni in túhún ndo co caja ndó ña cáhí a. Ta viti cúní ndó cahní ndó yehe —nacachi Jesús.

<sup>20</sup> Anda já nanducú ñehe na cán tuhun nu á já nacachi na já:

—Rí quini va ndacaan ini yóhó jáchí ni in túhún toho na co ndúcú cahní yohó —nacachi na cán.

<sup>21</sup> Anda já nacachi Jesús já xihín ná:

—Chí catóntó ndivaha ndó sahá in túhún ña cáhnu nacaja i quivi ndíquehe ndée yo. <sup>22</sup> Joo candehé ndo. Moisés cúú da nasahnda chuun nu tásáhnu jícó yo ña ná chicao na marca yiquí cuñu na vatí a juú Moisés natavá sahá, vaha. Mé tásáhnu jícó yo natavá sahá ta mé ndó chicao tá chicao ndó marca yiquí cuñu ta valí vatí cúú á quivi ndíquehe ndée yo. <sup>23</sup> Ta viti cáhí ndo xihín i ndaja cáa ri ña yóho. Mé ndó chicao ndó marca yiquí cuñu da valí vatí cúú á quivi ndíquehe ndée yo jáchí co cúní ndó yaha nuú ña nasahnda Moisés nu ndó. Ta viti xójó ini ndó xihín i sahá ña nandaja vaha i in ní yiquí cuñu in dataa quivi ndíquehe ndée yo. Ndaja cáa ri ña jan cáa já. <sup>24</sup> Mé ndó ndaja nacuu cáhan nú ndó sahá ñayivi ta co ndítahan toho caja ndó já. Jáchí ndítahan nu ndó candaa ini ndó ña cúú ña ndaa —nacachi Jesús xihín na cán.

### *Ndicani Jesús ndáchí naquixi a*

<sup>25</sup> Ta java na ñuu Jerusalén nacasáhá ndaca tuhún táhan na já cáhí na já:

—Á a juú da yóho cúú da xíca na ndúcú na cahní na. <sup>26</sup> Nu ndíhi na cándichi da jánaha da ta ni in na co ndaa cúú da. Á tá coó ta janda na jutixia cáa cándusa na ña cúú dá Cristo, da nachindahá Ndióxi cacomí a cuéntá sahá ñayivi. <sup>27</sup> Joo mí xíní vaha í ndá ñuu naquixi da yóho ña cán quéa xíní yo ña co cúú toho da Cristo jáchí tá ná quixi ndusa Cristo cán ni in na a cánda ini ndá ñuu

quixi da —nacachi na cán cáhan na sahá Jesús.

<sup>28</sup> Ta nani jánaha Jesús ini veñuhu cáhnu cán já nacasáhá cáhan cóhó a já nacachi a já:

—Mé a ndaa xíní vaha ndó yehe ta xíní ndó ndá ñuu naquixi i. Joo coó vaxi yehe cuéntá mí i. Mé Ndióxi nachindahá yehe vaxi i, mé a cán caja ña ndaa. Joo mé ndó co xíní toho ndó a. <sup>29</sup> Yehe xíní vaha i yo cúú mé á jáchí naquixi i nu ín mé á ta nachindahá mé á yehe vaxi i —nacachi a.

<sup>30</sup> Anda já ndúcú na tiin na Jesús chicao na a vecaa joo ni in na coó nasahan ndee ini tiin ñahá jáchí cámaní yí ndindaa hora tiin na a. <sup>31</sup> Ta cuaha táhan ñayivi naxini johu nuú nacahan Jesús cán nacandusa na mé á ta já cáhí na já:

—Á a juú da yóho cúú Cristo jáchí tá ná quixi inga da ama ná caja da ñaha xituhún chaga a juú ga da yóho —nacachi na.

### *Nducú na fariseo chicao na Jesús vecaa*

<sup>32</sup> Tá naxini johu na fariseo ña cáhan núu ñayivi sahá Jesús já nandindee ini na ta nandindee ini ri na sacuaa nuú jutú cán chí nachindahá na java soldado cuéntá veñuhu cáhnu cán ña ná tiin na Jesús chicao na a vecaa. <sup>33</sup> Anda já nacachi tucu Jesús já:

—Chá tiempo cuití va coo tóo i xihín ndo ñuyívi yóho jáchí tá nandihi já cuhun tucu u nu ín mé á nachindahá yehe. <sup>34</sup> Anda jáví caca nuu ndó ndinducú ndó yehe joo a ndítahan ndó yehe jáchí a cúú cuhun ndó nuú coo i —nacachi Jesús.

<sup>35</sup> Tá naxini johu na Israel cán ña nacachi Jesús já nacasáhá ndaca tuhún táhan na já cáhí na já:

—Ta ndáchí já cuhun ri da yóho ña cáhí da ña a cúú ndítahan í da. Á cuhun xíca da ñuu na tóho nu ndúu na Israel ña ná jánaha da nuú na griego. <sup>36</sup> Ndía cúní cachi da xihín yó tá nacachi da ña ndinducú yó da ta a ndítahan toho í da. Jáchí nacachi da xihín yó ña a cúú coho nuú coo da —nacachi xihín táhan na cán jáchí coó nacanda ini na ña nacachi Jesús xihín ná.

### *Jesús cúú á tátuhun yuta ticuú*

<sup>37</sup> Ta mé quiví nu ndíhí víco cán nasacuu a quiví cáhnu chága nuú na Israel. Ta mé quiví cán nandaca ndichi Jesús já nacayuhú a já nacachi a já:

—Ndá ndó íchi ini ticuú, naha ndó nuú i já ná caja i ña ná ndivaha ini ndó. <sup>38</sup> Jáchi já nahyi a nuú tuhun Ndióxi: “Ndá na ná cándéé ini yehe, ini mé ínimá ná cana tátuhun yuta ticuú, dó caja ña ná catacu na” —nacachi Jesús xihín na cán.

<sup>39</sup> Ña cúni Jesús cachi a xihín na yóho queá tá ná cándéé ini na mé á já xinú quiví ndiquehe na ínimá yíi Ndióxi ini ínimá ná. Vatí mé a ndaa a ñaha toho xinú ínimá yíi Ndióxi ini ñayivi jáchi cámaní yíi va ndindita Jesús ndicáhnu ndivaha mé á indiví.

### *Sa jún sa jún ñaha cáhan ñayivi sahá Jesús*

<sup>40</sup> Java na ndúu tañu ñayivi cuaha cán tá naxini johó na ña yóho já nacasáhá cáchí na já:

—Jivi ndusa da yóho cúu profeta nacachi Ndióxi chindahá a ñuyíví yóho —cáchí na.

<sup>41</sup> Ta java na cáchí na sahá Jesús ña cúu á Cristo, da nanchindahá Ndióxi cacomí cuéntá sahá ñayivi. Ta java na cáchí na ña a juú toho a jáchi cáhán na ña a cúu toho quixi Cristo estado Galilea. <sup>42</sup> Jáchi cáchí tuhun Ndióxi ña tá ná quixi Cristo ñuyíví yóho cacuu da da quixi chichi David, da nasacomí cuéntá sahá ñayivi Israel sanahá. Ta cáchí tuhun Ndióxi ña cacu da cán ñuu Belén nuú nacacu mé David cán.

<sup>43</sup> Ta chí nacasáhá na sáhdá java táhan na sahá ña coó nandique táhan tuhun na saha Jesús. <sup>44</sup> Ta java na cúni na tiin na a ña ná cañehe ñahá na cuhun a vecaa. Joo ni in na coó natiin ñahá.

### *Co cúni na jutixia candúsa na Jesús*

<sup>45</sup> Tá nandihí já nandicó coo soldado cuéntá veñuhu cán nu ndúu na fariseo xihín na sacuaña nuú jutú cán joo coó Jesús ñehe na ná casaa na. Já nacasáhá na ndúu cán ndaca tuhún ñahá na já cáchí na já:

—Ndá cuéntá queá coó natiin ndó da —nacachi na cán xihín soldado.

<sup>46</sup> Anda já nanducú ñehe soldado cán tuhun nu ná já cáchí da já xihín ná:

—Nacatóntó nde naxini johó nde nu cáhan da jáchi ñúchí ndivaha cáhan da ta ni

in túhún na coó nacahan tá quiahva cáhan mé dá —nacachi soldado cán.

<sup>47</sup> Já nacachi na fariseo já xihín dá:

—Á jári ndóhó va najándahvi da jan viti.

<sup>48</sup> Jáchi janda ni in túhún toho táhan na sacuaña ndúu tañu mé nde co cándúsa nde da jan. Ta ni in na fariseo co cándúsa na nu cáhan Jesús jan. <sup>49</sup> Joo cháhan va vaxi jatá ñayivi cándéé ini Jesús jan jáchi co xini na ña cáchí ley Moisés —nacachi na fariseo xihín soldado.

<sup>50</sup> Anda já nandicahan Nicodemo, da cúu in táhan na fariseo cán, mé dá nasahan da nandituhún xihín Jesús in ñuu. Já nacachi da já xihín na java ga cán:

<sup>51</sup> —Cáchí ley ña a cúu tiin in ta ta já chicaan ndaja nacuu da vecaa. Ña cáchí ley queá ndítahan cuni johó í nuú cahan da já ná candaá iní ndaja cáa ña nacaja da —nacachi Nicodemo.

<sup>52</sup> Anda já nacaja cuehe na xihín Nicodemo já nacachi na já xihín dá:

—Á da Galilea cúu ri yóhó va. Cuahán cahvi vaha tuhun Ndióxi já cunún ña co cána ni in profeta estado Galilea —nacachi na xihín Nicodemo.

<sup>53</sup> Tá nandihí já nandicuita nuu ndihí na cán cuánúhu ná vehe na.

## 8

### *Cája cáhnu ini Jesús sahá in ñáñáha*

<sup>1</sup> Ta ndaja coo naquee Jesús cuahan chí yucu yitó olivo. <sup>2</sup> Ta tá nativi inga quiví itaan já nandicó coo tucu a veñuhu cáhnu cán. Ta tá nacayati ñayivi nu á já nasacoo a ta nacasáhá jánaha nu ná. <sup>3</sup> Ta ndaja coo na jánaha ley Moisés xihín na fariseo ñehe na in ñáñáha nasaa na nu á. Mé ñáñáha cán nanditahan na ña mé hora cándúhu ña xihín in dataa, da co cúu yíi ña. Ta já ñehe na ña nasacu ndichi na ña nuú na ndúu cán.

<sup>4</sup> Já nacachi na já xihín Jesús:

—Candehé ndo Maestro. Nanditahan nde ñáñáha yóho cándúhu ña xihín in dataa, da co cúu yíi ña. <sup>5</sup> Ta nu ley najándacoo Moisés nuú nde táhnda chuun ña ná cuun nde yuu najihí cája já. Ta mé ndó ndía cachi ndó —nacachi na.

<sup>6</sup> Nacachi na cán já xihín Jesús jáchi cúni na coto ndojó cuití ñahá na ta cúni na ñehe



íní na jácojo na cuachi jatá Jesús. Tá nandihí já nasacoo Jesús já nacasáhá cáhyí a nu ñúhu cán xihín nducu ndáha á. <sup>7</sup> Ta sahá ña ndúcú ndéé na cán ndáca tuhún ñahá na nandaca ndichi Jesús já nacachi a já xihín ná:

—Ndá ndó, na coó nacaja cuachi jácana jihna ñúhu ndó yuú jatá ña —nacachi a xihín ná.

<sup>8</sup> Já nasacoo tucu a cáhyí a nu ñúhu cán xihín nducu ndáha á. <sup>9</sup> Ta tá naxini johó tóco ndihí na cán ña nacachi Jesús já nacasáhá na cácan nuú ná ta tá in tá in na nacasáhá quee na cuahan na. Ta jihna ñúhu ga na yatá nacasáhá quee cuahan já ndíco na yúta chága cuahan na. Ta tá sa naquee ndihí na cuahan na já nacandoo mé Jesús xihín ña cán. <sup>10</sup> Anda já nandaca ndichi a ta nandaca tuhún a ña já nacachi a já xihín ña:

—Ndáchí cuahan na jácojo cuachi jatun. Á coó ga na jácojo cuachi jatun viti —nacachi Jesús xihín ña.

<sup>11</sup> Anda já nacachi ña cán já xihín Jesús:

—Mé a ndaa coó ga na.

Anda já nacachi Jesús já:

—Ta ni yehe a chicaan i cuachi jatun. Cuánúhu vehún ta a cája gaún cuachi —nacachi a.

*Jesús cúu á tátuhun ñúhu ña jándiyéhe ínimá ñayivi*

<sup>12</sup> Já nacasáhá tucu Jesús cáhan xihín ñayivi já cáchí a já xihín ná:

—Yehe cúu u tátuhun ñúhu ña jándiyéhe ínimá ñayivi ta ndá na cándeé ini yehe cúu á tátuhun a cáca ga na nuú naá. Jáchí jándiyéhe e nu ná ta cája i ña ná catacu na anda ama cáa quivi.

<sup>13</sup> Anda já nacachi na fariseo já:

—Saha mé vún cáhun ta xihín ña jan náhún ña cúnun ndíñehe jícun mún. Ta xihín ña jan náha ña co cáhun ña ndaa —nacachi na.

<sup>14</sup> Anda já nacachi Jesús já xihín ná:

—Tóco ndihí ña cáhan i saha mí i cúu á ña ndaa ta ín sahá vatí mí i cáhan i ña. Jáchí xini vaha i ndá naquixi i ta xini vaha i ndá cuhun i. Joo ndóhó, co xini toho ndó ndá naquixi i ta co xini toho ndó ndá cuhun i. <sup>15</sup> Mé ndó cátoó ndó cándehe ndaa ndó

ñayivi tá quiahva cája ñayivi ñuyíví. Joo yehe co cája toho i já. <sup>16</sup> Joo tá ná caja víi i sahá ñayivi, caja i ña tá quiahva ndítahan caja i jáchí cája i ña ndaa. Ta a juú in tuhún yehe caja víi saha ná jáchí Ndióxi, tátá i, mé a nachindahá yehe, mé á cán quea caja víi saha ná xihín mí i. <sup>17</sup> Nu ley mé ndó cáchí a ña tá in nuú cáhan ivi ñayivi sahá ña nayaha já náha ña cúu á ña ndaa. <sup>18</sup> Ta viti cuni johó ndó jáchí quiahva já yaha ri xihín yehe va. Jáchí yehe cúu in testigo ta cáhan i saha mí i. Ta inga testigo cúu Ndióxi, tátá i, mé a nachindahá yehe —nacachi Jesús xihín ná.

<sup>19</sup> Anda já nandaca tuhún na Jesús já cáchí na já xihín á:

—Ndájá ín tátún jan —nacachi na.

Anda já nacachi Jesús já:

—Tá ná cuni ndó yo cúu yehe já cuu candaa ri ini ndó yo cúu tátá i. Joo co xini ndo yo cúu yehe ta cáchí ga ví tátá i co xini ndó a —nacachi Jesús.

<sup>20</sup> Tóco ndihí ña yóho nacachi Jesús xihín ná nani jánahe ini veñuhu cáhnu yati nuú nasahin sato ndée jiuhún jóco na cán. Joo ni in na coó nasahan ndeé ini tiin ñahá chicaan vecaa jáchí coó nasahan Ndióxi ñamaní sahá ña cámaní yí ndindaa hora tiin na mé á.

*Cáhan Jesús xihín ñayivi ña a cúu toho cuhun na nuú cuhun mé á*

<sup>21</sup> Anda já nacasáhá tucu Jesús cáchí a já xihín ná:

—Vaxi quivi quee yehe cuhun i. Ta caca nuu ndó ndinducú ndó yehe joo a ndíñehe ndó yehe jáchí cája tá cája ndó cuachi janda quiahva xinu quivi quivi ndó. Ta sahá ña cán quea a cúu cuhun ndó nuú cuhun yehe cán —nacachi Jesús.

<sup>22</sup> Anda já nacasáhá na Israel cán ndítuhún xihín táhan na já cáchí na já:

—Á cahní da yóho mé dá cuni da ña cán quea cáchí da xihín yo ña a cúu toho caja í cohó nuú cuhun da —cáchí na.

<sup>23</sup> Já nacachi tucu Jesús já:

—Mé ndó cúu ndó ñayivi ndúu ñuyíví yóho joo yehe cúu u da naquixi chí indiví. Mé ndó cúu ndó cuéntá ñuyíví yóho joo yehe co cúu toho i cuéntá ñuyíví yóho. <sup>24</sup> Saha ña cán quea nacachi i xihín ndó

ñā caja ndó cuachi janda quiahva xinu quiví quivi ndó. Jáchí tá cō cándusa ndó ñā cúú yehe da cáchí i cúú u, da nachindahá Ndióxi, já quea quivi ndó sahá cuachi ndó —nacachi Jesús.

<sup>25</sup> Anda já nandaca tuhún na cán Jesús já nacachi na já xihín á:

—Ta ndá da cúú yóhó, dá já —nacachi na. Já nacachi Jesús já:

—Janda sahá va nacahan i xihín ndó yo cúú yehe. <sup>26</sup> Ta ñā xini johó i cáhan mé á nachindahá yehe, ñā cán cúú ñā cáhan i xihín ñayivi ñuyiví. Ta ndinuhu ñā ndaa quea cáhan mé á. Ta mé a ndaa ín cuahá ndivaha ñā núu cája ndó ta cuu tavá i sahá nu ndó tá ná caja vií i sahá ndo —nacachi Jesús.

<sup>27</sup> Joo cóo nacandaa ini na ñā cáhan Jesús sahá Ndióxi, tátá a tá nacachi a já xihín ná. <sup>28</sup> Sahá ñā cán quea nacachi tucu a já xihín ná:

—Tá nandihí ná cata caa ndó yehe, da nachindahá Ndióxi nduu ñayivi ndica crúxu já quea canda ndusa ini ndó ñā yehe cúú u da cáchí i cúú u. Ta ni in tuhún ñaha cō cája i cuéntá mí i. Ta ñā jánaha i nu ndo cúú ñā najánaha Ndióxi, tátá i nuú i. <sup>29</sup> Ta mé á nachindahá yehe cō najándacoo ndáha toho a yehe jáchí ín tuun Ndióxi, tátá i xihín i. Ta nú tiempo ñā cája i cúú ñā cáji ini Ndióxi xihín —nacachi Jesús.

<sup>30</sup> Ta chí cuahá ñayivi nacandúsa na Jesús tá naxini johó na tóco ndihí ñā yóho.

*Na ndúu ndáha rí quini xihín na ndúu ndáha Ndióxi*

<sup>31</sup> Anda já nacahan Jesús xihín java na Israel, na sa nacandúsa ñahá cán já nacachi a já xihín ná:

—Tá ná caja ndó tá ín nacahan i xihín ndo já naha ndó ñā mé a ndaa táhyí cúú ndó na cuéntá mí i. <sup>32</sup> Ta já canda ini ndó ñā ndaa ta ñā cán caja ñā ná a cácuu ga ndó tátuhun in mozo, da ndúu ndáha rí quini —nacachi Jesús.

<sup>33</sup> Anda já nacachi na cán já xihín á:

—Na naquixi chichi Abraham cúú nde. Ta janda ni in tuhún tañu cóo nasacuu nde mozo. Joo yóhó cáchún xihín nde ñā a cácuu ga nde mozo. Ndaja cá ñā cá ri a já —nacachi na.

<sup>34</sup> Já nacachi Jesús já xihín ná:

—Mé a ndaa ná cahan i xihín ndo. Tóco ndihí na sá caja cuachi cúú tá cúú na tátuhun mozo nuú cuachi jáchí cómí a cuéntá sahá ná. <sup>35</sup> Ta da cúú mozo nuú in xitoho, cóo sahá dá coo nahá da xihín xitoho da jáchí vaxi quiví ndítahan quee da cuhun da. Joo da cúú jahyi mé da cúú xitoho cán ín sahá dá coo nahá da xihín tátá da jáchí cúú dá da vehe tátá da. <sup>36</sup> Ta quiahva já ín xihín yehe, da cúú jahyi Ndióxi. Cája i ñā ná a cácomí ga cuachi cuéntá sahá ndo ta já a cácuu ga ndó tátuhun mozo nuú cuachi cája ndó. <sup>37</sup> Ta sa cándaa vaha ini i ñā cúú ndó ñayivi naquixi chichi Abraham. Joo mé ndó cúní ndó cahní ndó yehe jáchí cō cúní ndó ndiquehe vaha ndó tuhun cáhan i. <sup>38</sup> Cáhan i sahá tóco ndihí ñā nanaha Ndióxi, tátá i nuú i. Joo ndóhó cája ndó ñā cáhan tátá ndo xihín ndó —nacachi Jesús.

<sup>39</sup> Anda já nacachi na cán já xihín á:

—Abraham cúú tátá nde jáchí chichi da cán naquixi nde —nacachi na.

Já nacachi Jesús já xihín ná:

—Tá jivi ndusa cúú ndó na naquixi chichi Abraham já quea caja ndó tá quiahva nacaja da cán, nduu. <sup>40</sup> Joo ndúcú ndó cahní ndó yehe jáchí cáhan i ñā ndaa xihín ndo tá cáchí i ñā najánaha Ndióxi nuú i. Mé Abraham cóo nacaja toho da já. <sup>41</sup> Joo cája ndó ñā núu tá quiahva cája tátá ndo —nacachi Jesús.

Já nacachi na cán já xihín á:

—A juú jahyi ndáhví toho ñayivi cúú ndehe. Ndióxi cúú ndusa tátá nde —nacachi na.

<sup>42</sup> Já nacachi Jesús já:

—Tá Ndióxi ndusa ná cacuu tátá ndo ta quihví ini va ndó yehe, nduu. Jáchí Ndióxi nachindahá yehe vaxi i ta ín i yóho viti. Cóo vaxi toho i cuéntá mí i. Ndióxi quea nachindahá yehe vaxi i. <sup>43</sup> Joo cō cándaa ini ndó tóco ndihí ñā ndícani i nu ndo ta cúú á sahá ñā cō cúní ndó cuni johó ndó nu cáhan i xihín ndo. <sup>44</sup> Tátá ndo cúú tiñáhá sacuaña ta cája ndó ñā cúní rí cán jáchí ñúhu ndó ndáha rí. Ta rí sáhní ndii cúú rí cán janda mé sahá. Ta ni in tuhún tañu cóo natiin rí ñā ndaa já cahan rí ñā. Jáchí cáhan rí ñā tuhún cuití va ta cuéntá mé rí quixi

ndihi ña tuhún. <sup>45</sup> Candehé ndo. Co cúni ndó candúsa ndó yehe jáchi cáhan i ña ndaa xihín ndó. <sup>46</sup> Ni in tuhún toho ndó a cúu nahá nuú ñayivi ña ín cuachi i. Ta tá cáhan i ña ndaa cuití va xihín ndó ndá cuéntá quea co candúsa ndó yehe, dá já. <sup>47</sup> Jáchi ndá na cúu ndusa cuéntá Ndióxi táa johu na ña cúu tuhun Ndióxi. Joo náha cáxi a ña co cúu ndó cuéntá Ndióxi jáchi co cúni ndó cuni johu ndó nu cáhan mé á xihín ndo — ñacachi Jesús.

### *Janda tá camaní cacu Abraham sa ín va Jesús*

<sup>48</sup> Anda já ñacanáhá na Israel xihín Jesús já ñacachi na já:

—Mé a ndaa cúun in da Samaria ta ndácaan rí quini inún — ñacachi na.

<sup>49</sup> Anda já ñacachi Jesús já xihín ná:

—Coó toho rí quini ndácaan ínima yehe.

Ña cája i quea cája cáhnu i Ndióxi, tátá i. Joo quehe núu ndivaha ndó yehe. <sup>50</sup> Co cúni toho i ña ná caja cáhnu ndó yehe vatí mé a ndaa cúni Ndióxi ña ná caja cáhnu ndó yehe. Ta mé a cán quea caja víi saha ndo. <sup>51</sup> Mé a ndaa ná cáhan i xihín ndó. Ndá na ná caja ña cáhan i yóho, na cán catacu na anda ama cáa quivi — ñacachi Jesús.

<sup>52</sup> Já nanducú ñehe na cán tuhun nu á já ñacachi na já xihín á:

—Viti ndusa cándaá ini nde ña ndácaan rí quini inún jáchi cáhún ña tá ná caja nde ña cáhún já quea catacu nde anda ama cáa quivi. Joo xini vaha nde ña naxihí tá naxihí Abraham, táshnu jícó nde ta jári na profeta nasanduu sanahá naxihí na. <sup>53</sup> Á cáhnu chága yóho a juú ga Abraham, da nasacuu táshnu jícó nde, dá já. Mé Abraham naxihí da ta jári mé na profeta naxihí ri na cán va. Á cájún cuéntá ña cúun da cáhnu chága a juú ga na cán, dá já — ñacachi na xihín Jesús.

<sup>54</sup> Já ñacachi Jesús já xihín ná:

—Tá ná caja cáhnu i mí i, coó saha toho ña cája i. Joo Ndióxi, tátá i jándicáhnu a yehe. Ta jári mé ndó cáhí ndo ña jivi mé a cán cúu Ndióxi cája cáhnu ndó. <sup>55</sup> Joo co xini toho ndó yo cúu mé á. Yehe xini yo cúu mé á. Tá ná cachi i ña co xini toho i mé á, cúu u in da tuhún tátuhun mé ndó. Joo mé a ndaa xini vaha i yo cúu Ndióxi ta cája i ña cáhí mé á.

<sup>56</sup> Ta mé Abraham, da nasacuu táshnu jícó

ndo ñacajii íni da jáchi ñañehe dá tuhun ña quixi yehe ñuyiví yóho. Ta a juú quiahva ñacajii íni da tá ñaxini da ña yóho — ñacachi Jesús.

<sup>57</sup> Anda já cánahá chága na Israel xihín á já ñacachi na já xihín á:

—Ni ivi jícó uxu cuia co ndácaan yóho viti. Ta ndaja cúu cáhún ñaxinún Abraham, da cúu táshnu jícó nde — ñacachi na.

<sup>58</sup> Já nanducú ñehe Jesús tuhun nu ná já ñacachi a já xihín ná:

—Mé a ndaa ná cáhan i xihín ndo. Janda tá camaní cacu Abraham sa ín va yehe jáchi cúu u Ndióxi — ñacachi Jesús.

<sup>59</sup> Anda já natiin na Israel cán yuu ña janí na jatá. Joo nandacoo jehé Jesús já nayaha tañu na cán ta ñaquee a veñuhu cáhnu cán cuahan.

## 9

### *Cája Jesús ña ná ndinuna nuú in dataa ñacacu cuáa*

<sup>1</sup> In tañu tá xíca Jesús cuahan já ñaxini a in dataa, da ñacacu cuáa. <sup>2</sup> Anda já ñacasahá na xíca tuun xihín Jesús cán ndaca tuhún na mé á sahá da cuáa cán já cáhí na já xihín á:

—Maestro, ndá cuéntá quea ñacacu cuáa da yóho. Á ñacacu cuáa da sahá cuachi ñacaja tátá da á náná da. Á ñacacu cuáa da sahá cuachi ñacaja mé dá — ñacachi na.

<sup>3</sup> Já nanducú ñehe Jesús tuhun nu ná já ñacachi a já xihín ná:

—Coó ñacacu cuáa toho da yóho sahá cuachi mé dá ta ni sahá cuachi tátá da á náná da. Ñacacu cuáa da já ná nahá i nuú ñayivi ndá quiahva náhnu ñaha cúu cája Ndióxi. <sup>4</sup> Jáchi ndítahan caja i chuun, ña nachindahá tátá i caja i nani xíca nuu i ñuyiví yóho. Ta cúu á tátuhun ndiví táhyí cúu á viti joo vaxi quivi a coo ga i caja i ña yóho ta já cacuu a tátuhun ñacuaá ndivaha. Ta mé tiempo já ni in na a cúu caja chúun. <sup>5</sup> Nani ín tóo i ñuyiví yóho cúu á tátuhun jándiyéhe mí i nuú na ndúu ñuyiví yóho — ñacachi Jesús.

<sup>6</sup> Tá nandihí ñacachi Jesús ña yóho já ñaxihnu a tójí a nu ñuhu. Ta xihín tójí a cán ñacavaha in mbohla loho ndahyi ta

nachindaa mé á ña nduchú núú da cuaá cán. <sup>7</sup> Tá nandihí já nacachi a já xihín dá:

—Cuáhán chichohó naní Siloé ta cán cuchún nuún —nacachi Jesús xihín dá. Mé tuhun Siloé yóho cúni cachí a: Da nachindahá na.

Anda já naquee mé da cuaá cán nasahan da nachichí nuú da ta tá nandicó coo da cán sa sándehe va da nacasaá da. <sup>8</sup> Ta ndaja coo java na cúu ñani táhan da xihín java na naxini ña sáti da cán tá naxini na ña sándehe tucu da já nacachi na xihín táhan na já:

—Á a juú da yóho cúu da da cuaá sácoo sáti yuhú íchí —cáchi xihín táhan na.

<sup>9</sup> Ta já cáchi java na já:

—Jivi da jan cúu dá.

Ta java na cáchi na:

—A juú toho da jan cúu dá vatí quiahva já cáa da —nacachi na.

Joo mé da nasahin cuaá cán cáhan da xihín ná já cáchi da já:

—Jivi yehe cúu da nasacuu da cuaá cán —cáchi da.

<sup>10</sup> Anda já nacasáhá na ndáca tuhún na da já cáchi na já xihín dá:

—Ndaja nacajún nanuná nuun —cáchi na.

<sup>11</sup> Já nacachi da cán já:

—Da naní Jesús cúu da nacavaha in mbohla loho ndahyi. Ta nachindaa da ña nuú i ta nacachi da xihín i ña ná cuhun i cuchú nuú i chichohó naní Siloé. Ta já nasahan i nachichí nuú i cán ta xihín ña yóho nanuná nuú i. Sándehe e viti —nacachi da.

<sup>12</sup> Já ndaça tuhún tucu na cán da já cáchi na já:

—Ta ndájá cuahan da ndajaja vaha yohó viti —nacachi na.

—Co xini toho i —nacachi da xihín ná.

*Ndája ndichí na fariseo da cuaá, da nandivaha cán*

<sup>13</sup> Tá nandihí ndáca na da nasacuu da cuaá cán nasahan da nuú na fariseo <sup>14</sup> jáchí nasacuu a quivi ndiquehe ndée na tá ndajaja vaha Jesús da cuaá cán xihín mbohla loho ndahyi nachindaa a nuú da cán. <sup>15</sup> Já ndaça tuhún na fariseo cán da ndá quiahva nanuná nuú dá sándehe da

viti. Já nanducú ñehe da tuhun nu ná já nacachi da já xihín ná:

—Nachindaa da ndahyi nuú i ta nachichí nuú i ta viti tívi nuú i sándehe e —nacachi da xihín ná.

<sup>16</sup> Joo java na fariseo nacachi na xihín da nasacuu da cuaá cán já:

—Da ndajaja vaha yohó coo vaxi toho da cuénta Ndióxi jáchí co cája cáhnu da quivi ndiquehe ndée yo —nacachi na.

Joo já cáchi java na fariseo já:

—Tá da cája cuachi ná cacuu Jesús jan ta a cúu caja da ñaha xituhún nahá tátuhun ña yóho, nduu —nacachi java na.

Chí coo nacuu ndique táhan vaha tuhun na fariseo cán sahá ña cán quea nasahnda táhan ndaja táhan mé va na. <sup>17</sup> Já nacasáhá ndáca tuhún tucu na da nasacuu da cuaá cán já cáchi na já xihín dá:

—Ta viti nanuná nuun nacaja da jan. Yo já cúu dá cáchún —nacachi na.

Já nanducú ñehe da tuhun nu ná já nacachi da já xihín ná:

—Yehe cáchi i ña cúu dá in profeta —nacachi da.

<sup>18</sup> Joo coo naxeen na Israel cán candúsa na ña nasacuu da da cuaá ta ni co cándúsa na ña nanuná nuú dá. Sahá ña cán quea nasahan na nacana na tátá náná da. <sup>19</sup> Ta já ndaça tuhún na tátá da xihín náná da já nacachi na já xihín ná:

—Á jahyi ndó cúu da yóho. Á mé a ndaa sa já cuaá já cáa da nacacu da. Ta ndá cuénta quea sa tívi nuú dá viti —nacachi na.

<sup>20</sup> Anda já nanducú ñehe na cán tuhun nuú na Israel cán já nacachi na já xihín ná:

—Cándaqa cáxi ini nde ña jahyi nde cúu da yóho. Ta xini vaha nde ña nacacu cuaá da. <sup>21</sup> Joo co xini nde ndaja nacuu nanuná nuú dá sándehe da viti. Ta ni co xini nde yo cúu da nasuná nuú dá. Jan ín mé jahyi nde. Ndaça tuhún ndó mé dá. Sa quiahva cahan mé da jan xihín ndo cúu á jáchí a juú da loho ga cúu dá jan —nacachi tátá da nasacuu da cuaá cán xihín na Israel cán.

<sup>22</sup> Nacachi na ña yóho jáchí yíhví na ña ná a quiahva ga na Israel cán ñamaní nu ná ndihvi na veñuhu. Jáchí mé na Israel cán najándique táhan na tuhun na ña a quiahva ga na ñamaní nuú ñayivi quihvi

na ini veñuhu tá ta cáhan na ña cúu Jesús da ñachindahá Ndióxi cacomí cuénta sahá ñayivi. <sup>23</sup> Sahá ña cán quéa ñacachi tátá náná da ñasacuu da cuaá cán xihín na Israel ña ndítahan ndaça tuhún na mé dá jáchi a juú ga da loho cúu da jan.

<sup>24</sup> Tá nandihí já ñacana tucu na Israel da ñasacuu da cuaá cán já ñacachi na já xihín dá:

—Xíní ñúhú caja cáhnún Ndióxi ta a cája cáhnún Jesús jan jáchi xíní vaha nde ña cúu dá in da cája cuachi —ñacachi na.

<sup>25</sup> Anda já ñacachi da cán já xihín na Israel:

—Co xíní toho i á cúu dá da cája cuachi á cúu dá da co cája cuachi. Ña xíní ndusa i quéa ñasacuu u da cuaá ta jivi da jan ñasuná nuú i sándehe e viti —ñacachi da xihín ná.

<sup>26</sup> Anda já ñacasáhá ndáça tuhún tucu na da já cáchí na já xihín dá:

—Ta ndaja ñacaja da ñasuná da nduchú núún. Ndiá ñacaja da xuhún —ñacachi na xihín dá.

<sup>27</sup> Anda já ñacachi da ñasacuu da cuaá cán já xihín ná:

—Sa ñacachi vi xihín ndo ndá quiahva ñacaja da ñasuná da nuú i. Joo co cúní ndó candúsa ndó yehe. Ndá cuénta quéa ndáça tuhún tucu ndó yehe. Á cuhún ri ndóhó va caca nuu ndó xihín dá cúní ndo, vaha —ñacachi da xihín ná.

<sup>28</sup> Já ñacasáhá na Israel cán cánhá na xihín dá ta já ñacachi na já xihín dá:

—Yóhó va cúu da xíca nuu xihín da jan. Joo ndehe jácuaha nde ley Moisés cuití va.

<sup>29</sup> Jáchi cándaç vaha ini nde ña ñacahan Ndióxi xihín Moisés. Joo mé Jesús jan co cúu dá cuénta Ndióxi ta ni co xíní nde ndájá ñaquixi da jan —ñacachi na xihín da ñasacuu da cuaá cán.

<sup>30</sup> Anda já ñacachi tucu da cán já xihín ná:

—Mé a ndaça cántóntó vi xihín ña yóho jáchi jivi Jesús jan ñasuná da nuú i ta ndóhó ni co cándaç ini ndó ndá da cúu dá ta ni co xíní ndo ndájá ñaquixi da. <sup>31</sup> Sa xíní yo ña co xíní johó Ndióxi ña xíca tahví ñayivi cája cuachi nu á. Joo xíní johó mé á nu cáhan ñayivi tá cája cáhnu na mé á ta tá cája na ña cúní a. <sup>32</sup> Ta viti candehe ndo. Janda saha

ñuyiví a ñaha cuni johó í ña ndícuná in dataa nduchú nuú in da ñacacu cuaá. <sup>33</sup> Ta Jesús yóho a cúu toho caja cuná a nuú i tá ta co cúu á ña ñaquixi cuénta Ndióxi —ñacachi da.

<sup>34</sup> Anda já nanducú ñehe na cán tuhún nu dá já ñacachi na já xihín dá:

—Anda tá ñacacún ñachutú ndaún xihín cuachi. Ta viti chí cúní ri yóhó jáñahún ndehe —ñacachi na Israel cán xihín dá.

Anda já ñataxí na da veñuhu cán.

*Ñayivi, na sándehe cúu ná tátuhun na co tívi nuu*

<sup>35</sup> Tá nandihí já ñacandaç ini Jesús ña ñataxí na da ñasacuu da cuaá cán veñuhu. Ta tá nandítahan tucu Jesús da já ñacachi a já xihín dá:

—Á cándéé inún da ñachindahá Ndióxi nduu ñayivi —ñacachi Jesús xihín dá.

<sup>36</sup> Já ñacachi da já xihín á:

—Cachi ndó xihín i yo já cúu dá ña ná cuu candeé ini i da —ñacachi da.

<sup>37</sup> Anda já ñacachi Jesús já xihín dá:

—Sa ñaxini vún yehe ta jivi yehe, da cáhan xuhún yóho cúu da ñachindahá Ndióxi nduu ñayivi —ñacachi Jesús.

<sup>38</sup> Ta tá ñacachi Jesús ña yóho já ñacaxítí da cán nu á caja cáhnu da a já ñacachi da já xihín á:

—Mé a ndaça cándéé ini i ndohó, xitoho i —ñacachi da.

<sup>39</sup> Anda já ñacachi tucu Jesús já xihín dá:

—Yehe ñaquixi i ñuyiví yóho já ná ñaha i nuú ñayivi ndá quiahva ndáa ña cája na. Jáchi ndá na cándéé ini yehe cúu ná tátuhun na sa nandiyehé nuu. Joo ndá na cáhan ña cúu ná na sa nandiyehé nuu cúu ná tátuhun na cuaá —ñacachi Jesús.

<sup>40</sup> Ta java na fariseo, na ndíta xihín Jesús cán tá ñaxini johó na ña yóho já nandaça tuhún na mé á já cáchí na já:

—Á co cáhún ña cúu ri ndehe va na cuaá —ñacachi na.

<sup>41</sup> Anda já ñacachi Jesús já xihín ná:

—Tá ná ndicuni ndó ña cúu ndó tátuhun na cuaá ta coó toho cuachi ndó, nduu. Joo tá cáchí ndó ña tívi vaha ndivaha nuu ndo ta co xíní ñúhú ndó in na jáñaha ndohó sahá ña cán quéa ín tá ín cuachi ndó —ñacachi Jesús xihín ná.

## 10

### *Jesús cúú á tátuhun in da ndáá ndicachi*

<sup>1</sup> Andá já nacachi Jesús já:

—Mé a ndaa ná cahan i xihin ndo. Tá ná quihvi in dataa ini in corra nu ñúhu ndicachi joo co cúni da quihvi da chí yéhe nu quihvi mé rí ta ña cája da quéa ndáva ndojó da corra ri já náha xicá a ña cúú dá da cuíhná. <sup>2</sup> Joo mé da quihvi chí yéhe cúú dá da ndáá ndicachi. <sup>3</sup> Ta mé da ndáá yéhe corra nu ñúhu ndicachi cán súná da yéhe ña ná ndihvi da ndáá ndicachi ta jácana da rí cán tá quivi in in rí. Ta mé ndicachi cán ndícuni rí tachí dá já quéta rí cuahan rí caca nuu rí xihin dá. <sup>4</sup> Ta tá sa naqueta ndihi rí já ndáca da ri. Ta cánúú da nu ri cuahan da já vaha cuahan rí xihin dá jáchi ndícuni vaha rí tachí dá. <sup>5</sup> Joo co ndíco rí jatá ñayivi tóho jáchi co ndícuni rí tachí ná jáchi cúú ná na tóho. Ña cája rí quéa xínu rí nu ná — nacachi Jesús xihin na fariseo.

<sup>6</sup> Ta ña yóho nasacuu in quiahva nasacu Jesús nuu na fariseo joo coó nacandaá ini na ña cúni mé á cachi a xihin ná.

<sup>7</sup> Andá já nacachi tucu Jesús já xihin ná:

—Mé a ndaa ná cahan i xihin ndo. Yehe cúú u tátuhun in yéhe nu yaha ndicachi já ndihvi rí corra ri. <sup>8</sup> Tóco ndihi na naquixi tá cámaní xinu i ñuyiví yóho najándahvi na ñayivi ta cúú ná tátuhun na cuíhná. Joo coó naxeen na cúú cuéntá mí i, na cúú tátuhun ndicachi taa johó na nu cáhan na cán. <sup>9</sup> Yehe cúú u tátuhun in yéhe ta ndá na ná quixi nuú i quiahva i ñamaní nu ná quihvi na já ná cacu ndaa ínima ná. Cúú á tátuhun núná nuú ndicachi quihvi rí ini corra ri ta núná nuú rí queta tucu rí jáchi in yucu cuí nu ri xixáhan rí.

<sup>10</sup> Jáchi da cúú da cuíhná cán cája cuíhná da ri ta sáhní da ri ta jándihi da saha ri. Joo yehe naquixi i ñuyiví yóho já ná cuu catacu vaha ñayivi ta já ná cuu coo vaha na anda ama cáa quivi. <sup>11</sup> Yehe cúú u tátuhun in da ndáá vaha ndicachi. Jáchi da cán co yíhvi da quivi da sahá ndicachi jana dá. <sup>12</sup> Joo da quéhe yahvi sahá ña ndáá da ndicachi, ndáá da ri saha yahvi quéhe da cán cuití va. Sahá ña cán quéa tá xini da vaxi ndivahyí quehe rí in ndicachi, ña cája da quéa xínu da cuahan da ta jándacoo da ndicachi ndáhví

cán. Jáchi co cúú dá da ndáá vaha rí ta ni jana dá co cúú ndicachi cán. Ta co sáhní da mé dá tá ná xinu co ndivahyí ña ná tiin rí ndicachi cán cata nuu ñahá ri. <sup>13</sup> Da quéhe yahvi cán jándacoo da ri jáchi co cúú rí jana mé dá ta co sáhní da mé dá cúú ndicachi.

<sup>14</sup> Joo yehe cúú u tátuhun in da ndáá vaha ndicachi. Tá quiahva xini vaha da cán ndá rí cúú ndicachi jana dá quiahva já xini vaha i ndá na cúú cuéntá mí i. Ta jári xini vaha mé ná yehe. <sup>15</sup> Tá quiahva xini vaha Ndióxi, tátá i yehe ta xini vaha i mé á quiahva já xini vaha i na cúú cuéntá mí i. Ta sahá ña yóho in tiahva i ndiquiahva i mí i quivi i saha ná jáchi cúú ná tátuhun ndicachi janá i. <sup>16</sup> Joo ndúu java ga ñayivi inga ñuu ta cacuu na cuéntá mí i. Xini ñúhú ndiquehe e na cán ña ná cuni johó na nu cáhan i. Ta in nduu ndihi na ña ná candaa i tóco ndihi na.

<sup>17</sup> Quihvi ini Ndióxi, tátá i yehe jáchi ndiquiahva i mí i quivi i sahá na cúú cuéntá mí i ta tá nandihí nditacu tucu u. <sup>18</sup> Ta ni in na a cúú cahní yehe ndaja nacuu joo ndiquiahva i mí i quivi i jáchi cúni caja i ña. Núná nuú i ndiquiahva i mí i quivi i ta núná nuú i nditacu tucu u. Ña yóho cúú chuun nasahnda tátá i nuú i caja i — nacachi Jesús.

<sup>19</sup> Tá naxini johó na Israel cán ña yóho já nacasáhá na sáhní táhan tucu na. <sup>20</sup> Ta cuaha táhan na cán nacasáhá cáchi na já:

—Ndá cuéntá quéa táa johó ndó nu cáhan da jan ta da nacatachi va cúú dá. Tiñáhá va ndácaan ini da — cáchi xihin táhan na.

<sup>21</sup> Joo java na cáhan vaha na sahá Jesús já cáchi na já:

—Ni in toho ñayivi a cúú cahan vaha nahá tátuhun cáhan Jesús yóho tá ndácaan tiñáhá ini ínima ná. Jáchi ama ná cuu caja ri tiñáhá jándiyehé rí nuú na cuaá — cáchi java na cán.

### *Cándají na Israel Jesús*

<sup>22</sup> Naxinu co quivi cája na víco nu cuía ñuu Jerusalén tá cája cáhnu na quivi naxinu veñuhu cáhnu ñuu Jerusalén. Ta mé tiempo vixi nasacuu a cán. <sup>23</sup> Ta jivi ini mé veñuhu cáhnu cán nasahin Jesús ta xica nuu a yati yuyéhe naní Salomón. <sup>24</sup> Já nacava tiyivi na Israel cán mé á já nacasáhá ndáca tuhún na mé á já nacachi na já xihin á:

—Ndaja cáa chí quiví caxi tuhun ndaun xihín nde ña á jivi ndusa cúun Cristo, da chindahá Ndióxi cacomí cuénta sahá ñayivi. Jáchi in ivi joho cáhun xíní nde ta co cándaá vaha ini nde á jivún á a juú tohún —naxachi na cán.

<sup>25</sup> Anda já nanducú ñehe Jesús tuhun nu ná já naxachi a já:

—Sa naxahan vi xihin ndó joo coo naxandúsa ndó yehe. Tóco ndihi ña náhnu cája i, cája i ña xihin ndée sahan tátá i nuú i ta jivi mé ña náhnu jan náha nu ndó ña cúu u da naxindahá Ndióxi. <sup>26</sup> Joo ndóhó co cándúsa ndó yehe jáchi co cúu ndó tátuhun ndicachi janá i. <sup>27</sup> Joo ñayivi, na cúu tátuhun ndicachi janá i, na cán cúu na ndícuni nu cáhan i ta ndícuni i na ña cúu ná cuénta mí i ta já ndíco na yehe. <sup>28</sup> Ta caja i ña ná catacu na anda ama cáa quiví já ná a ndíhi saha ná. Ta ni in túhún ñayivi a cúu caja candaa na cán ndahá i tá sa ñúhu na ndahá i. <sup>29</sup> Ndióxi, tátá i naxahan na cán nuú i ta mé á quea cáhnu chága nu tóco ndihi ñaha. Ta ni in na a cúu caja candaa na cán ndáha mé á. <sup>30</sup> Yehe xihin Ndióxi, tátá i in cúu va nde —naxachi Jesús.

<sup>31</sup> Anda já natiin tucu na Israel cán yuu cuun na Jesús ña cahní ñahá na. <sup>32</sup> Anda já naxachi Jesús já xihin ná:

—Cuahá ndivaha ña náhnu naxaja i nu ndó, ña naxahan tátá i ñamaní nuú i caja i nu ndo yóho ta viti cachi ndó xihin i ndá quea co táhan ini ndó xihin. Ndá cuénta quea vaxi ndó cuun ndó yuu yehe —naxachi Jesús.

<sup>33</sup> Anda já naxachi na cán já xihin á:

—Co nducú toho nde cuun nde yuu yohó sahá ña náhnu cájún. Cuun nde yuu yohó cúni nde jáchi ndája núun Ndióxi. Jáchi cúun in ta tátuhun ndehe ta ndájún mún cúun Ndióxi —naxachi na cán.

<sup>34</sup> Anda já naxachi Jesús já xihin ná:

—Nu ley najándacoo Moisés nu ndo cáchi a ña cúu ñayivi tátuhun Ndióxi sahá ña cúu ná jahyi mé á. <sup>35</sup> Ta sa cándaá vaha ini ña a cúu tahnu ña cáhan tuhun Ndióxi. Ta naxachi Ndióxi xihin na nandiquehe tuhun mé á ña cúu ná tátuhun Ndióxi. <sup>36</sup> Sahá ña cán quea ndá cuénta quea cáchi ndo ña nandaja núu i Ndióxi sahá ña cáchi i cúu u in túhún jini já jahyi Ndióxi. Jáchi mé Ndióxi

naxachi a yehe ta naxindahá a yehe vaxi i ñuyiví yóho. <sup>37</sup> Sahá ña cán quea co ndítahan candúsa ndó yehe tá ta co cája i ña náhnu tátuhun ña cája Ndióxi, tátá i. <sup>38</sup> Joo tá cája i ña já quea xíní ñúhú candúsa ndó ña náhnu xíní ndo cája i vatí co cúni ndó candúsa ndó yehe. Ta xihín ña yóho cuu candúsa ndó ña in cúu Ndióxi, tátá i xihin i ta in cúu yehe xihin mé á —naxachi Jesús.

<sup>39</sup> Anda já nducú tucu na tiin na a chican na a veca joo naxijehé a nu ná cuahan.

<sup>40</sup> Ta já naquee tucu a cuahan chí inga xoo yuta Jordán nuú naxaja ndúta Juan ñayivi nu cuítí cán. Ta naxandoo Jesús naxahin a cán. <sup>41</sup> Ta cuahá ñayivi naxahá na xínu na nu á ta já cáchi xihin táhan na já:

—Mé a ndaa coo toho ñaha xitúhún naxaja Juan. Joo tóco ndihi ña naxachi da cán saha Jesús yóho cúu á ña ndaa —naxachi xihin táhan na cán.

<sup>42</sup> Ta cuaha ná naxandúsa na Jesús mé nuú naxahin a cán.

## 11

### *Tá najánditacu Jesús Lázaro*

<sup>1</sup> Ta ndaja coo naquehe cuehe in da naní Lázaro, da ñuu Betania. Ta jivi mé ñuu yóho cúu ri ñuu María xihin Marta, quihvi ña. <sup>2</sup> Mé María, ña cúu quiahva Lázaro yóho cúu ña ña naxojo perfume jatá sahá Jesús ta najándihichi ña do xihin ijí jini ña. <sup>3</sup> Ta mé ña xihin quihvi ña naxindahá na chuun cuahan nuú Jesús ña cáchví ndivaha Lázaro, da quihvi ini mé á.

<sup>4</sup> Ta tá nañehe Jesús tuhun yóho já naxachi a já:

—A juú cuehe cahní ñahá cúu toho ña yóho. Joo xihin cuehe yóho cuu nahá ndá quiahva cáhnu cúu Ndióxi. Ta xihin ña yóho nahá nuú ñayivi ndá quiahva cáhnu cúu yehe, da cúu in túhún jini já jahyi Ndióxi —naxachi a.

<sup>5</sup> Ta ndaja coo quihvi ndivaha ini Jesús Marta xihin quihvi ña ta quiahva já quihvi ri ini a Lázaro viti. <sup>6</sup> Joo tá nañehe Jesús tuhun ña quihvi Lázaro já naxandoo a ivi quiví chága mé nuú naxahin a cán. <sup>7</sup> Ta tá nandihí já naxachi Jesús já xihin na xica tuun xihin á:

—Xihín ndo ná cohó tucú chí Judea —  
nācachi a.

<sup>8</sup> Anda já nācachi nā cán já xihín á:

—Maestro, viti chá va ndúcú ñayivi ndúu cán cahní nā ndohó xihín yuu ta cáa tucu ri ndó cūhun ndo cūni ndo —nācachi na.

<sup>9</sup> Joo sa xini Jesús ña cámaní xinu quivi quivi a sahá ña cán quea nācachi a já xihín ná:

—Candehé ndó. Uxu ivi hora ndáca in quivi ta tá xica nuu na ndivi a cúu toho cachihin saha ná jáchi tívi xicá yehe nu xica na. <sup>10</sup> Joo ndá nā xica nuu ñuú cuu cachihin saha ná jáchi co yehe nu xica na —nācachi Jesús.

<sup>11</sup> Tá nandihí já nācachi tucu a já xihín ná:

—Sa naquiji va amigo yo Lázaro viti. Joo vílaa cūhun i ndiñehe e da —nācachi Jesús.

<sup>12</sup> Anda já nācachi nā cán já xihín á:

—Maestro, tá ta nanaá ini da naquiji dá já quea ín vaha da, dá já —nācachi nā cán.

<sup>13</sup> Joo ña cūni cachi Jesús quea sa naxihí va Lázaro vatí nā xica tuun xihín a cán nācahan nā ña cūni mé á cachi a quea naquiji Lázaro cán tá quiahva quiji tóco ndihí ñayivi. <sup>14</sup> Anda já nācahan cáxí táhyí tucu Jesús xihín ná já nācachi a já:

—Naxihí va Lázaro. <sup>15</sup> Joo cájji va ini i ña cóo i ná sahiin i tá naxihí da jáchi ña yóho chindee a ndohó já ná candúsa chága ndó yehe. Cóho candehé yo Lázaro —nācachi Jesús.

<sup>16</sup> Anda já nācasáhá Tomás, da cáhan nā cuatí xihín cán cáhan da xihín java ga nā xica tuun xihín Jesús já cáchí da já:

—Cóho ri mí ví quivi xihín mé dá, dá já — cáchí da.

Já naquee na cuahan nā.

*Cúu cája Jesús ña ná nditacu tucu na sa naxihí*

<sup>17</sup> Tá naxinu cóo Jesús yati ñuu Betania cán já ñeñe á tuhun ña sa naxihí Lázaro ta sa ín comí quivi nachicaan va na da ini in cáva. <sup>18</sup> Mé ñuu Betania cán ñeñe táhan yati a xihín Jerusalén tátuhun uní kilometro ñeñe táhan. <sup>19</sup> Ta cuaha táhan nā Israel cán nācahan nā ndúu tóo na xihín Marta xihín María tá quiahva jáyaha na ini na sahá ña naxihí Lázaro quiahva na. <sup>20</sup> Ta tá

ñañeñe Marta tuhun ña cáyati Jesús ñuu cán cuahan já ndáva ña nācahan ñeñe ñahá ña. Joo nācandoo María vehe. <sup>21</sup> Tá nandique táhan Marta xihín Jesús já nācachi ña já xihín á:

—Xitoho, tá ná coo ndó yóho ta ni a quivi toho Lázaro quiahva i, nduu. <sup>22</sup> Joo cándaava vaha ini i ña tá ná caca ndó ña cūni mé ndó nu Ndióxi quiahva va mé a cán ña nu ndo —nācachi Marta.

<sup>23</sup> Anda já nācachi Jesús já xihín ña:

—Candehé Marta. A ndicani inún jáchi nditacu tucu va Lázaro, quiahvún jan — nācachi Jesús.

<sup>24</sup> Anda já nācachi ña já xihín á:

—Sa xini vi ña nditacu tucu quiahva i tá ná xinu cóo quivi nu ndihí tá ná nditacu tóco ndihí nā sa naxihí —nācachi Marta.

<sup>25</sup> Já nācachi Jesús já xihín ña:

—Yehe cúu da cuu caja ña ná nditacu tucu ndii ta cuu caja i ña ná catacu ñayivi anda ama cáa quivi. Ta ndá nā cādeé ini yehe vatí ná quivi na catacu tá catacu na. <sup>26</sup> Ta tóco ndihí nā cādeé ini yehe catacu na anda ama cáa quivi ta a ndihí toho saha ná ini indayá. Á cándúsún ña cáhan i xuhun — nācachi Jesús.

<sup>27</sup> Anda já nācachi Marta já xihín á:

—Cándúsa i ndohó ña cúu ndó in túhún jini já jahyi Ndióxi ta cándúsa i ña mé ndó cúu Cristo, da nachindahá Ndióxi quixi ñuyívi yóho —nācachi ña xihín á.

*Sácu Jesús saha Lázaro*

<sup>28</sup> Tá nandihí já naquee Marta nācahan ña cana ña María quihvi ña. Ta já nācahan yaá ña xihín María já nācachi ña já xihín ña:

—Sa naxinu cóo Jesús, xitoho í ta ín a yóho. Cuáhán nu ín a jáchi cána yohó — nācachi Marta xihín quihvi ña.

<sup>29</sup> Tá naxini johó María cán ña nācachi quihvi ña xihín ña chí ivi laá ndáva ña nācahan ña nu ín Jesús. <sup>30</sup> Mé Jesús nāsandati a cán yuhú ñuu, mé nuú nandique táhan xihín Marta cán. <sup>31</sup> Ta ndaja coo mé nā Israel, nā ndúu jáyaha ini ña cán tá naxini na naquee númí johó ña cuahan ña já nandicuíta na ndico nā jata ña cuahan nā. Jáchi nācahan nā cuahan ña cuacu ña nu ndácaan Lázaro, quiahva ña. <sup>32</sup> Ta tá naxinu cóo ña nu ín Jesús já



naçaxítí ña nu á ja naçasáhá cáchí ña ja xihín á:

—Tá ná coo ndó yóho, nduu ta ni a quíví toho Lázaro quiahva i —naçachi ñá.

<sup>33</sup> Ta tá naçini Jesús ña sácu cóhó María xihín na Israel, na ndíco naçaa xihín ña cán ja natahvi ndivaha ini a janda quiahva nandisaá ini a. <sup>34</sup> Anda ja nandaca tuhún a María cán ja naçachi a ja xihín ña:

—Ndájá naçicaan ndó da ja —naçachi Jesús.

—Naha quíi ndó, xitoho i. Candehé ndo nuú naçicaan nde da —naçachi María.

<sup>35</sup> Anda ja naçacu Jesús. <sup>36</sup> Tá naçini na Israel ña yóho ja naçasáhá cáchí xihín táhan na ja:

—Candehé ndo ndaja náha naquihvi ini Jesús yóho Lázaro —naçachi na.

<sup>37</sup> Ta java na naçasáhá cáchí na ja:

—Mé Jesús yóho naçuná da nduchú núu na cuaá. Á chí a cuú cuití caja da chindeé da Lázaro ja ná a quíví da, nduu —naçachi java na cán.

### *Jánditacu tucu Jesús Lázaro*

<sup>38</sup> Tá nandihí ja naçasáhá táhvi ndivaha tucu ini Jesús ta ja naçayati a nuú naçicaan na yiquí cuñu Lázaro. Mé nuú ndácaan da cán naçacu a in ndica cáva ta in yuu jáhnda cáhnu naçaji nuu yéhe cán.

<sup>39</sup> Anda ja nandicaan Jesús xihín java na ndúu cán ña ná jácaxoo na yuu ndájí nuu nu ndácaan Lázaro cán. Joo ndaja coo Marta, ña cúu quiahva mé ndii cán naçasáhá ña cáchí ña ja xihín Jesús:

—Candehé ndo, xitoho i. Sa quini cúu sahan ndii quiahva i jan jáchí sa ín comí quíví naçihí da —naçachi ñá.

<sup>40</sup> Anda ja naçachi Jesús ja xihín ñá:

—Xíní ñuhú ndicuhun inún tá naçachi i xuhun ña tá ná candúsún Ndióxi já cunún ndá quiahva cáhnu ñaha cuu caja mé á —naçachi Jesús.

<sup>41</sup> Tá nandihí ja najácaxoo na yuu cáhnu ña naçaji nuu nuú naçandacaan Lázaro. Já nandinehe Jesús nuu á chí indiví ja naçachi a ja:

—Tátá Ndióxi, ndíquiahva i ndixahvi nu ndo jáchí naçini johó ndó nuú naçahan i xihín ndo. <sup>42</sup> Vatí mé a ndaa cándaá vaha ini i ña nú tiempo xíní johó ndó nu cáhan

i xihín ndo. Joo cáhan i ña yóho sahá ña ná cuni johó ñayivi ndúu xihín i yóho ja ná candúsa na ña mé ndó naçindahá ndó yehe vaxi i ñuyíví yóho —naçachi Jesús ndíquiahva ndixahvi nu Ndióxi.

<sup>43</sup> Tá nandihí ja naçayuhú cóhó a ja naçachi a ja:

—Lázaro, cuáhán queta.

<sup>44</sup> Tá nandihí ja naçeta Lázaro nuú naçandacaan da. Naçava nuu ndáha dá anda saha dá xihín ticoto ta ndáji jáhma nuu dá naçeta da vaxi da. Anda ja naçachi Jesús xihín java na ndúu cán ña ná ndaxí na da ja ná quee da cuhun da. Ta ja naçaja na.

### *Jándique táhan na Israel tuhun na ña tiin na Jesús chícqaan na vecqa*

*(Mt. 26:1-5; Mr. 14:1-2; Lc. 22:1-2)*

<sup>45</sup> Ta cuaha táhan na Israel, na ndáca táhan naçahan xihín María cán tá naçini na ña najánditacu tucu Jesús Lázaro cán ja naçandúsa na mé á. <sup>46</sup> Joo java táhan na Israel cán ndáva na naçahan na cáhan na xihín na fariseo ta nandicaní na nu ná ña naçaja Jesús. <sup>47</sup> Anda ja naçasáhá na fariseo xihín na saçuaha nuú jutú cán najátaca na tóco ndihí na saçuaha nuú na Israel ja naçachi na ja xihín ná:

—Ndía caja í xihín Jesús viti jáchí cuahá ndivaha ñaha xituhún cája da yóho. <sup>48</sup> Xíní ñuhú caji nuu í nu dá jáchí tá ná a cájé nuu í nu dá vaxi quíví tá tóco ndihí ñayivi candeé ini na mé dá. Ta xihín ña yóho xinú ini na jutixia ñuu Roma quixi na jándicani na veñuhu í ta jándihí na saha tóco ndihí mí, na Israel —naçachi na.

<sup>49</sup> Joo in táhan da ndúu cán naní da Caifás, da naçacu da saçuaha chága nu ndíhi jutú mé cuía cán, nandicaan da ja naçachi da ja:

—Mé ndó cúu ndó ñayivi co xíní túní.

<sup>50</sup> Jáchí co cándaá ini ndó ña vaha chága ña ná quivi in ta nu ndíhi ñayivi ja ná a ndíhi saha tóco ndihí ñayivi. Ña cán quea cáhan i ña vaha chága ná quivi Jesús jan ja ná a ndíhi saha mí —naçachi Caifás.

<sup>51</sup> Joo coo naçahan Caifás ña yóho sahá ña naquixi a jiní mé dá. Ndióxi quea najacaan ínimá dá ña cáchí da ja jáchí mé tiempo ja naçacu da saçuaha chága nu

ndíhi jutū ta najácahan Ndióxi ínima dá ña ná cachi da ña ndítahan quivi Jesús sahá na Israel. <sup>52</sup> Ta a juú sahá in túhún na Israel cuití va vaha jáchi mé Jesús nanditahan quivi a sahá tóco ndíhi na cúu cuénta Ndióxi, na ndícuíta nuu ndúu ndijáá ñuyívi já ná cuu coo in ñuu. <sup>53</sup> Chí janda mé quivi já nasacu ini na Israel cán cahní na Jesús.

<sup>54</sup> Sahá ña cán queá coo naxica nuu tívi ga Jesús tañu na Israel cán. Ña nacaja mé á queá naquee a estado Judea cán já nasahan chí in ñuu naní Efraín, ña ín yati xoo yucú íchí nuú coo ñayivi. Cán nasahjin a xihín na xica tuun xihín á.

<sup>55</sup> Tá nacayati quivi coo vicó pascua cája na Israel já naquee cuahá ñayivi ndúu ndijáá ñuu cán cuahan na chí Jerusalén jáchi cúni na ndaja vii na mé ná, ná coo tiahva na tá quiahva nasahnda ley Moisés nu ná caja na tá camani chá quivi coo vicó pascua. <sup>56</sup> Tá nataca ñayivi ñuu Jerusalén cán nacasáhá ndúcú na Jesús. Joo nani ñúhu na veñuhu cáhnu cán ndáca tuhún táhan na sahá Jesús já cáchí xihín táhan na já:

—Ndaja xini ndo á quixi Jesús á a quixi toho a vicó pascua yóho —nacachi xihín táhan na cán.

<sup>57</sup> Ta na fariseo xihín na sacuahá nuú jutū nasahnda na chuun ña ndá na ná cuni Jesús já ná cuhun na caxi tuhun na xihín na cán ndájá ín a jáchi cúni na tiin na a chicaan na a vecaa.

## 12

*Tá nachojó in ñañáha perfume sahá Jesús (Mt. 26:6-13; Mr. 14:3-9)*

<sup>1</sup> Ta tá camani iñu quivi coo vicó pascua já naquee Jesús nasahan ñuu Betania, mé ñuu nu ín Lázaro, da najánditacu tucu mé á cán. <sup>2</sup> Ta cán nacaja ndívi na ña cajini Jesús jáchi cúni na caja cáhnu na mé á. Ta mé Marta cúu ña cája ndívi nu ná. Ta Lázaro cúu in táhan da ín coo nu mesa xixi xihín Jesús. <sup>3</sup> Ta ndaja coo María nasahan ña quehe ña tátuhun java litro perfume, dó yahvi ndivaha. Jáchi cúu dó dó nacavaha xihín ndinuhu yucu támi sahan naní nardo. Najácuyu ña do jata sahá Jesús. Ta tá nandíhi já najáhichi ña sahá xihín ijí jini ña. Ta níi ini vehe cán nandícuíta nuu jíco

perfume cán. <sup>4</sup> Anda já naxini in táhan da xica tuun xihín Jesús, da naní Judas Iscariote cán ña yóho. Mé Judas yóho cúu dá da jíco tuhún Jesús tá nu ndíhi ta já cáchí da já:

<sup>5</sup> —Ndá cuénta queá coo nacayahvi perfume yóho já ná cana jjuhún jasá yó nuu na ndahví, nduu. Jáchi quiahva na uní ciento denario sahá dó, nduu —nacachi Judas cán. Ta in denario cúu ña quehe ñayivi cája chúun na in quivi.

<sup>6</sup> Joo coo nacachi Judas ña yóho sahá ña quíhvi ini ndusa da na ndahví, vaha. Nacachi da já jáchi cúu dá da cuíhna ta ndáha mé dá ñúhu ndíhi jjuhún ta cája cuíhna da ña tá cúni da. <sup>7</sup> Anda já nacachi Jesús já xihín dá:

—A cáhun xihín ña jáchi nasacu vaha ña do ña ná chojó ña do yiquí cuñu i. Jáchi sa xini ña ña sa nacayati quivi quivi i. <sup>8</sup> Ta níi tiempo canduu na ndahví jan tañu ndó ta ndá tañu cúni mé ndó cuu chindee ndó na. Joo yehe a coo tuun toho i xihín ndo —nacachi Jesús.

*Sácú ini na sacuahá nuú jutū cahní na Lázaro*

<sup>9</sup> Cuahá na Israel cán nañehe ná tuhun ña ín Jesús ñuu Betania. Sahá ña cán queá nasahan na cán jáchi cúni na cuni na Jesús ta cúni na cuni na Lázaro, mé da najánditacu tucu Jesús. <sup>10</sup> Anda já nasacu ini na sacuahá nuú jutū cán cahní ri na Lázaro viti. <sup>11</sup> Jáchi sahá Lázaro cán cuahá na Israel nacasáhá na candeé ini na Jesús. Ta najándacoo na ndíco na jatá na sacuahá nuú na Israel.

*Tá naquihvi Jesús ñuu Jerusalén (Mt. 21:1-11; Mr. 11:1-11; Lc. 19:28-40)*

<sup>12</sup> Ta inga quivi itaan cuahá ndivaha ñayivi naxinu coo na ñuu Jerusalén nuú coo vicó pascua. Ta tá nacandaa ini na ña xinu coo Jesús ñuu Jerusalén cán <sup>13</sup> já nasahan na nasahnda na ndáha tó ñuu já ndáva na nasahan na nañehe ñahá na. Ta cáyuhú na já cáchí na já:

—Cája cáhnu í Ndióxi. Cáhnu nahá ná cacuu da cómi cuénta sahá na Israel jáchi cúu dá da vaxi yuhú nuu Ndióxi —cáchí na.

<sup>14</sup> Nanditahan Jesús in búrru ta nasanu a ri tá quiahva nacachi tuhun Ndióxi sanahá tá cáchí a já:

15 A cáyihví toho ndó, na ndúu ñuu Sión. Candehé ndó da cómí cuéntá saha ndó jan, cánúu da jata búrrō loho vaxi da, cáchí tuhun Ndióxi.

16 Ta cóo ñacandaa ini na xíca tuun xihín Jesús cán ndá cuéntá quea cája ñayivi já xihín á. Joo chága chí nuu tá sa ñandindita Jesús cuahan indivi já ñacandaa ini na ña quiahva já ndaa nuu tuhun Ndióxi sanahá ña caja na xihín Jesús.

17 Mé ñayivi, na nasanduu xihín Jesús tá ñacahan xihín Lázaro ña ná queta da nuu ñanduxu da ña nditacu da, mé na cán ñandicani na nuu java ga ñayivi ña ñaxini na ñacaja Jesús cán. 18 Sahá ña cán quea ñaqueta ñayivi nasahan na ñehe ná Jesús jáchí ña ñehe ná tuhun sahá ña cáhnu ñacaja mé a cán. 19 Tá ñaxini na fariseo ña yóho já ñacasahá cáchí xihín táhan na já:

—Candehé ndo. Ndá cuu caja í quee vaha í xihín da jan. Jáchí tóco ndihi ñayivi cáti na cuahan na xihín da jan —ñacachi xihín táhan na fariseo cán.

### *Java na griego ndínducú na Jesús*

20 Tañu ñayivi cuaha ñaxinu coo cája cáhnu Ndióxi víco ñuu Jerusalén cán ñaxinu coo ri java na ñaquixi chí ñundáhyi cuéntá Grecia. 21 Ta mé na griego yóho ñacayati na nu Felipe, da ñuu Betsaida cuéntá Galilea cán. Ta já ñacasahá na cáhan ndahví na xihín dá já ñacachi na já xihín dá:

—Cahan nde xihín Jesús cúni nde —ñacachi na.

22 Anda já ñaquee Felipe nasahan da caxi tuhun da xihín Andrés ta já ndáca táhan ndívi da nasahan da ndícani da ña nuu Jesús. 23 Anda já ñacachi Jesús já xihín dá:

—Sa ñaxinu coo va tiempo caja cáhnu Ndióxi yehe, da ñachindahá mé á nduu ñayivi. 24 Mé a ndaa ná cahan í xihín ndo. Tá quiahva ndihi saha in ndiquí trigo tá ndíca va ña ini ñundáhyi quiahva já ndítahan nuu í quivi í. Jáchí tá ná a ndíhi saha ndiquí trigo cán já in já cacuu va ña. Joo tá ná ndíhi sahá ña cán já nduta ña ta já ndicuahá ndivaha ña. 25 Ndá na cátóo chága cája ña cúni mé cuití na a juu ga ña cúni Ndióxi, na cán cúu na ndíhi saha. Joo na cája ña cúni Ndióxi, na cán cúu na catacu anda ama cáa quivi. 26 Ta ndá na cúni caja chúun cuéntá

mí í ndítahan nu ná candico na yehe. Jáchí nuu coo yehe, cán coo ri na cája ña cúni yehe. Ta na cán cacuu na na ndínehe jícó Ndióxi.

### *Cáxi tuhun Jesús ña quivi a*

27 Ta viti ñuhú cácuéha ndivaha ini í. Ta a cuu caca tahví í nu Ndióxi ña ná a quiahva mé á ñamaní ndoho ini í jáchí sahá chuun yóho ñaquixi í ñuyívi yóho. 28 Ña ndítahan cachi í quea: “Tátá Ndióxi, cáhnu ná cacuu mé ndó” —ñacachi Jesús.

Tá ñacachi Jesús ña yóho, ñacahan Ndióxi indivi já ñacachi a já:

—Sa ñandaja cáhnu í mí í ta caja tucu u ña —ñacachi a.

29 Ta ñayivi ndúu cán tá ñaxini joho na ña yóho já ñacachi na ña javi va cána. Ta java na ñacachi na tátō Ndióxi quea ñacahan.

30 Anda já ñandicahan Jesús xihín ná já ñacachi a já:

—A juu sahá yehe ñaxini joho ndó ña yóho. Joo ñacatácu a já ná cuni joho mé ndó. 31 Ta sa ñatandaa quivi cavií sahá ñayivi ndúu ñuyívi ta sa ñatandaa quivi ndíhi sahá ña cája tiñahá sacuahá, mé rí sáhdá chuun ñuyívi yóho. 32 Jáchí tá ná cata caa na yehe já caja í ña ná casahá ñayivi níí cúu ñuyívi candeé ini na yehe —ñacachi Jesús.

33 Xihín ña yóho cúni mé á ndicani a nu ná ña quivi a ndíca crúxu. 34 Anda já ñacachi ñayivi ndúu cán já xihín á:

—Tá cáhvi nde ley Moisés ñacahyi sanahá já cándaa ini nde ña anda ama cáa quivi catacu da chindahá Ndióxi cacomí cuéntá sahá ñayivi. Yo já cúu da cáhún saha. Tá ta mé a ndaa cúun da ñachindahá Ndióxi nduu ñayivi, da catacu anda ama cáa quivi ndá cuéntá quea cáhún quivún —ñacachi na xihín Jesús.

35 Já ñacachi Jesús já xihín ná:

—Yehe cúu da jándiyehé ínimá ñayivi ta coo tóo loho chága í xihín ndo. Sahá ña cán quea xíní ñuhú caca nuu ndó nani jándiyehé íchí cuhun ndo ta viti núná nu ndó caja ndó ña. Jáchí vaxi quivi quivi í caja na ta anda já cacuu a tá tuhun canaá yávi ta já a cándaa ini ndó ndá xoo cuhun ndo. 36 Xíní ñuhú candeé ini ndó yehe jáchí cúu u da jándiyehé nu ndó nani ín í xihín ndó. Anda

jáví xinu coo ndó cacuu ndó ñayivi cuéntá mí i —ñacachi Jesús.

Tá nandihí já ñaquee Jesús cuahan chíjehé a nu ná.

### *Cò cándúsa na Israel Jesús*

<sup>37</sup> Vatí ñacaja Jesús cuahá ña xitúhún nuú ñayivi cán joo coó ñaxeen na candúsa na mé á. <sup>38</sup> Já ñasahiin jáchi nanditahan xinu coo nuú tuhun ña ñacahyi Isaías sanahá cán tá ñacachi a já:

Tátá Ndióxi, coo cúní na candúsa na tuhun ña cáhan í xihin ná.

Vatí xíní na ña náhnu cája mé ndó joo coo cúní na candúsa na ndohó, já ñacahyi Isaías sanahá.

<sup>39</sup> Sahá ña cán quéa coó ñacuu candúsa ñahá ñayivi cán. Ta inga tucu tuhun ñacahyi Isaías quéa cáchi já:

<sup>40</sup> Mé Ndióxi quéa najácuáá ñahá ta coó ñasuná a ínimá ná,

já ná a cúu candaá ini na yo cúu mé á, já ná a cúu ndicó coo na nu mé á ña ná ndaja vaha mé á na, ñacahyi Isaías.

<sup>41</sup> Quiáhva já ñacahan Isaías jáchi ñaxini mé dá ndá quiáhva cáhnu cúu Jesús.

<sup>42</sup> Ta cuaha táhan na Israel cán ñacandee ini na Jesús. Ta janda java na sacuaaha nuú na Israel cán ñacandee ini na Jesús. Joo coó ñaxeen na ñaha tuhun na sahá jáchi ñayihví na taxí na fariseo cán na veñuhu.

<sup>43</sup> Jáchi cúní na candoo vaha chága na nuú ñayivi a juú ga nu Ndióxi.

### *Táhvi ini ñayivi sahá cuachi na tá xíní johó na nu cáhan Jesús*

<sup>44</sup> Tá nandihí já ñacahan cóhó Jesús já ñacachi a já:

—Ndá na cándee ini yehe já quéa a juú in túhún yehe cándee ini na, vaha. Jáchi cándee ini ri na Ndióxi, tátá i, mé a ñachindahá yehe vaxi i ñuyíví yóho.

<sup>45</sup> Ta ndá na xíní yehe xíní ri na mé a ñachindahá yehe vaxi i ñuyíví. <sup>46</sup> Yehe ñaquixi i ñuyíví yóho ña ná jándiyéhe ínimá ñayivi já quéa ndá na ná cándee ini yehe, a cánduu ga na nuú naá. <sup>47</sup> Joo na xíní johó nu cáhan i ta coo cája na ña, a juú toho yehe chícaan cuachi jata ná. Joo tuhun cáhan i quéa chícaan cuachi jata ná. Jáchi coo vaxi i ñuyíví yóho chícaan i cuachi jata ñayivi. Ñaquixi i já ná cuu cacu ndaa ínimá ná.

<sup>48</sup> Ndá na cándají yehe ta coo cúní na caja na ña cáchí i xihin ná, na cán cúu na cuhun indayá jáchi mé tuhun ñacahan i cacuu a ña chícaan cuachi jata ná tá ná xinu coo mé quívi nu ndihí cuí. <sup>49</sup> Jáchi coo jánaha i ña quíxi jini mé cuití i. Tóco ndihí ña cáhan i ta tóco ndihí ña jánaha i nuú ñayivi cúu á ña ñachindahá Ndióxi, tátá i yehe jánaha i nu ná. <sup>50</sup> Ta candaá cáxi ini i ña tóco ndihí ña jánaha Ndióxi, tátá i caja ña ná cuhun na coo na indiví anda ama cáa quívi. Ta tóco ndihí ña cáhan i xihin ñayivi, cáhan i ña tá quiáhva ñasahnda Ndióxi, tátá i nuú i caja i —ñacachi Jesús.

## 13

### *Jándoo Jesús sahá na xíca tuun xihin á*

<sup>1</sup> Tácamañi in quívi coo vicó pascua já sa xíní Jesús ña sa ñaxinu coo quívi quívi a jándacoo a ñuyíví yóho já ndaa mé á ndique táhan xihin Ndióxi, tátá a. Níi tiempo ñaquihvi ini Jesús tóco ndihí na cúu cuéntá mé á ndúu ñuyíví yóho ta coo najándacoo mé á ña quíhvi ini a na.

<sup>2</sup> Ta ndaja coo ín Jesús xihin na xíca tuun xihin á xíjini na. Jihna sa najácahan tiñahá sacuaaha Judas Iscariote, da cúu jahyi Simón, ña ná jicó túhún da Jesús. <sup>3</sup> Joo sa xíní vaha Jesús ña ñasahan Ndióxi, tátá a tóco ndihí ndee á nu mé á. Ta sa xíní a ña ñaquixi a nu Ndióxi ta jivi nu Ndióxi ndindita tucu a cuhun a. <sup>4</sup> Ta nani xíjini na ñandaca ndichi Jesús já ñatavá a cotó níhnu a ta já ñatiin a in jáhma ñachiñee a tóco á.

<sup>5</sup> Tá nandihí já ñataán a ticují ini in tisahan loho já ñacasahá jándoo a sahá na xíca tuun xihin a cán. Ta já najándihichi a saha ná xihin jáhma cáñee tóco á cán.

<sup>6</sup> Ta tá nanditahan ndoo saha Simón Pedro já ñandaca tuhún da Jesús já cáchí da já:

—Á mé a ndaa jándoo ndó sahá i, xitoho i —ñacachi da.

<sup>7</sup> Já ñacachi Jesús já xihin dá:

—Viti ñúhú coo candaá toho inún ndía quéa cája i yóho joo chága chí nuú já candaá inún ndá cuéntá quéa cája i já —ñacachi Jesús.

<sup>8</sup> Anda já ñacachi Pedro já:

—Chí a quiáhva toho mí i ñamañi nu ndó jándoo ndó sahá i —ñacachi da.

Anda já nacachi Jesús já xihin dá:

—Tá ná a quiahvún ñamaní jándoo i sahún já a cúu cacuún cuéntá mí i —nacachi Jesús.

<sup>9</sup> Anda já nacachi tucu da já xihin Jesús:

—Tá ta já cáchí ndo quiahva va i sahá i jándoo ndó ta quiahva ri ñamaní jándahá ndó yehe ta quiahva ri ñamaní chihin ndó jini i viti —nacachi da.

<sup>10</sup> Anda já nanducú ñehe Jesús tuhun nu dá já nacachi a já xihin dá:

—Tá sa nachichi vaha ñayivi já ndúu vii na ta saha cuití va ndó xini ñúhú ndicata i. Mé ndó, na xica tuun xihin i, sa ndúu vii ndo jáchi sa najándoo i cuachi ndó sahá ña cándéé ini ndó yehe vatí a juú ndihi ndó ndúu vii —nacachi Jesús.

<sup>11</sup> Nacachi Jesús a juú ndihi na ndúu vii jáchi sa nacandaa va ini mé á ndá da cúu da jicó túhún ñahá.

<sup>12</sup> Tá nandihí najándoo Jesús saha ná já nacandixi tucu a cotó níhnu a. Já nasacoo tucu a nu mesa já nacachi a já xihin ná:

—Cája i cuéntá co cándaa vaha ini ndó ndá cuéntá quéa najándoo i saha ndo. Saha ña cán quéa ndicani i ña nu ndo viti. <sup>13</sup> Mé ndó cáchí ndo maestro xihin i ta cáchí ndo cúu u xitoho ndó ta ndaa cáhan ndó jáchi jivi ndusa i. <sup>14</sup> Ta viti candehé ndó. Yehe cúu u maestro ndo ta cúu u xitoho ndó ta najándoo i saha ndo. Saha ña cán quéa quiahva já ndítahan caja ndó xihin ndaja táhan mé ndó. <sup>15</sup> Sa nasacu u in quiahva nu ndo ta ndítahan caja ndó tá quiahva nacaja mí i xihin ndo. <sup>16</sup> Xini ñúhú candaa ini ndó ña ni in túhún toho mozo a cúu cacuu da da cáhnu chága a juú ga xitoho da. Ta mé a ndaa in chága saha in da sáhdá chuun a juú ga mé da cuahan caja chúun cán. <sup>17</sup> Tá nacandaa ini ndó ña cáhan i xihin ndo yóho ta tá ná caja ndó ña já quéa cuu cajii ini ndó.

<sup>18</sup> A juú saha tóco ndihi ndó cáhan i jáchi sa cándaa vaha ini mí i ndá ndó nacaxi i. Joo saha in ndó ndítahan xinu coo nuú tuhun Ndióxi tá nacachi a já: “In da sácoo tuun xixi xihin i, da cán cúu da nandicujita xihin i”, cáchí tuhun Ndióxi. <sup>19</sup> Sa cáxi tuhun cuéé e ña yóho xihin ndo já quéa tá sa naxinu ña yóho já cándéé ini ndó yehe, ña cúu u da cáchí i cúu u. <sup>20</sup> Mé a ndaa ná cáhan i xihin ndo. Ndá na ná ndiquehe vaha in da ná chindahá i, cúu á tátuhun

ndiquehe vaha na yehe. Ta ndá na ndiquehe vaha yehe, ndiquehe vaha ri na Ndióxi, mé a nachindahá yehe quixi i ñuyiví yóho —nacachi Jesús.

*Cáxi tuhun Jesús ña cúu Judas da jicó túhún ñahá*

(Mt. 26:20-25; Mr. 14:17-21; Lc. 22:21-23)

<sup>21</sup> Tá nandihí nacachi Jesús ña yóho já nacacuéha ndivaha ini a já nacachi a já:

—Mé a ndaa ná cáhan i xihin ndo. In táhan ndó cacuu da cuhun jicó túhún yehe —nacachi Jesús.

<sup>22</sup> Tá nandihí já nacasáhá na xica tuun xihin Jesús cán sándehé nu táhan na. “Yo saha cáhan Jesús”, cáhan na. <sup>23</sup> Jiin Jesús cán in coo in táhan da xica tuun xihin á, da quihvi ini mé á cán. <sup>24</sup> Saha ña cán quéa nacuu ndáha Simón Pedro nu dá ña ná ndaca túhún da mé á saha ndá da cúu da jicó túhún ñahá. <sup>25</sup> Anda já nacativi chága da cán jiin Jesús já nacasáhá da ndaca túhún ñahá da já nacachi da já:

—Ndá da cúu dá, xitoho i —nacachi da.

<sup>26</sup> Anda já nacachi Jesús já xihin dá:

—Viti ñúhú chindaxi i in túhún pan ta ndá da ná quiahva i túhún pan cán nuu, da cán cúu dá —nacachi Jesús.

Tá nandihí já nachindaxi a in túhún pan já nasahan ña nu Judas Iscariote, da cúu jahyi Simón. <sup>27</sup> Ta tá natiin Judas pan cán chí ivi laá nandihvi tiñahá sacuahá ini da. Já nacachi Jesús já xihin dá:

—Xini ñúhú ndihi inún cajún ña nasacu inún cajún —nacachi Jesús.

<sup>28</sup> Joo ni in túhún java ga na ndúu coo xixi xihin Jesús cán coo nacandaa ini na ndá cuéntá quéa nacachi Jesús ña yóho xihin Judas. <sup>29</sup> Java na nacahan na ña nasahnda Jesús chuun nu Judas ña ná cuhun da cueen da ñaha cuéntá víco pascua. Ta java na nacahan na ña nasahnda chuun nu dá ña ná jasá da jiuhún nuú na ndahví jáchi ndáha mé dá ñúhu ndihi jiuhún. <sup>30</sup> Tá nandihí natiin Judas pan nasahan Jesús nu dá chí ivi laá naquee da cuahan da. Ta sa ñuu va quéa cán.

*Ndítahan quihvi ini táhan na cúu cuéntá Jesús*

<sup>31</sup> Tá sa ñaqueta Judas cuahan da já ñacasáhá cáchí Jesús já xihín ña xíca tuun xihín á:

—Viti ndusa quéa ñacasáhá ndicáhnu ndivaha yehe, da ñachindahá Ndióxi nduu ñayivi. Ta sahá ña caja i ndicáhnu ndivaha Ndióxi, tátá i. <sup>32</sup> Ta tá náha yehe ndá quiahva cáhnu cúu Ndióxi, tátá i quiahva já náha ri Ndióxi ndá quiahva cáhnu cúu yehe, da ñachindahá Ndióxi nduu ñayivi. Ta ja chá cámaní coo tóco ndihi ña yóho. <sup>33</sup> Candehé ndo, jahyi mání i. Ja chá cuití tiempo coo i xihín ndo. Anda já ndinducú ndó yehe joo a ndíñehe ndó yehe. Ndítahan ndicuhun ini ndó tá ñacachi i xihín ña Israel ña a cúu cuhun ña nuú cuhun yehe. Quiahva já cáchí ri xihín ndóhó va: A cúu cuhun ndó nuú cuhun i. <sup>34</sup> Ta viti sáhndá i inga chuun nu ndo ta cúu á ña saá. Ta ña yóho cúu á: Ndítahan quihvi ini táhan ndó. Tá quiahva quihvi ini yehe ndohó quiahva já ndítahan quihvi ri ini táhan ndó. <sup>35</sup> Jáchi tá ná quihvi ini táhan ndó já candaa ini tóco ndihi ñayivi ña mé a ndaa táhyí cúu ndó cuéntá mí i —ñacachi Jesús.

*Cáxi tuhun Jesús ña chijehé tuhun Pedro ña xini da mé á*

(Mt. 26:31-35; Mr. 14:27-31; Lc. 22:31-34)

<sup>36</sup> Anda já ñandaca tuhún Simón Pedro cán Jesús já ñacachi da já xihín á:

—Xitoho i, ndájá cuhun ndó já —ñacachi da.

Anda já ñacachi Jesús já xihín dá:

—A cúu toho cuhun yóhó nuú cuhun i viti. Joo cacuáchi lohún já xinu cón cán —ñacachi Jesús.

<sup>37</sup> Anda já ñacachi Pedro já xihín Jesús:

—Ndá cuéntá quéa cáchí ndo ña a cúu candico i ndohó cuhun i nuú cuhun ndó viti. Jáchi sa ín tiahva i quivi i saha ndo —ñacachi Pedro.

<sup>38</sup> Já ñanducú ñehe Jesús tuhun nu dá já ñacachi a já xihín dá:

—Mé a ndaa ná cahan i xuhun. Vatí ín tiahvún quivún sahá i joo tá cámaní cana chéle já uní tañu chijehé tuhún sahá i ta cahún ña co xini tohún yehe —ñacachi Jesús xihín Pedro.

## 14

*Ndáca Jesús ñayivi cuhun ña nu Ndióxi, tátá a*

<sup>1</sup> Já ñacachi tucu Jesús já:

—Coto a ndícani ini ndó. Ndítahan candeé ini ndó Ndióxi ta ndítahan candeé ini ndó yehe. <sup>2</sup> Mé nu ín Ndióxi, tátá i, cán ín cuhá ndivaha nu núna nu ndó canduu ndó. Tá ná a cóo nuú canduu ndó cán janda mé saha va sa ñacaxi tuhun i xihín ndó, nduu. Ta cuhun i cacu tiahva i mé nuú canduu ndó cán. <sup>3</sup> Tá sa ná quee e cuhun i ta tá sa ná caja ndívi i nuú canduu ndó cán já quixi tucu u ndiquehe e ndohó já ná cuhun ndó canduu ndó xihín i mé nuú coo i cán. <sup>4</sup> Mé ndó sa xini ndó ndá íchi candico ndó já cuu saá ndó nuú cuhun i —ñacachi Jesús xihín ña xíca tuun xihín a cán.

<sup>5</sup> Anda já ñandicahan Tomás xihín Jesús já ñacachi da já xihín á:

—Mé nde co xini toho nde ndájá cuhun ndo, xitoho nde. Ndaja caja ri nde candaa ini nde ndá íchi quehe nde cuhun nde —ñacachi da xihín á.

<sup>6</sup> Já ñanducú ñehe Jesús tuhun nu dá já ñacachi a já xihín dá:

—Yehe cúu tátuhun íchi ña ndítahan candico ñayivi ta yehe cúu da jánaha ña ndaa. Ta yehe cúu da cája ña ná catacu ñayivi anda ama cáa quivi. Ta in tuhún yehe ndítahan candeé ini ñayivi já ná cuu xinu coo na nu Ndióxi, tátá i. <sup>7</sup> Tá xini ndó yo cúu yehe já xini ri ndó yo cúu Ndióxi, tátá i. Ta viti xihín chí nuú xini ndó a jáchi sa ñaxini ndó a —ñacachi Jesús.

<sup>8</sup> Anda já ñacachi Felipe já xihín Jesús:

—Xitoho nde, jánaha ndó nuú nde yo cúu tátá ndo já ná cajji ini nde —ñacachi da.

<sup>9</sup> Anda já ñacachi Jesús já xihín dá:

—Ndá cuéntá quéa cáchún já jáchi janda jihna ndivaha va ín i xihín ndo ta sa ndítahan candaa ini ndó yo cúu yehe. Jáchi ndá ña sa xini yo cúu yehe xini ri na yo cúu Ndióxi, tátá i. Sahá ña cán quéa ndá cuéntá quéa cuni ndó ña ná jánaha i tátá i nu ndo. <sup>10</sup> Xini ñuhú candúsa ndó ña in cúu va yehe xihín Ndióxi, tátá i ta in cúu va mé á xihín i. Tóco ndihi ña cahan i xihín ndo yóho co cahan i ña sahá ña quixi a jini mé cuití vi. Cahán i ña quixi nu Ndióxi jáchi ín mé á xihín i. Ta chuun cája i quixi a nu

Ndióxi jáchi cája chúun mé á. <sup>11</sup> Xíní ñúhú candúsa ndó ña in cúu yehe xihín Ndióxi, tátá i ta in cúu Ndióxi, tátá i xihín i. Ta tá co cúní ndó candúsa ndó ña já queá xíní ñúhú candúsa ndó ña sahá ña náhnu naxini ndó naxaja i. <sup>12</sup> Mé a ndaa ná cahan i xihín ndo. Ndá na cándéé ini yehe, cuu caja na ña xituhún tátuhun ña cája mí i. Ta janda ña náhnu chága cuu caja na jáchi cuhun i nu ín Ndióxi, tátá i. <sup>13</sup> Ta tóco ndihi ña caça ndó nu Ndióxi, xíní ñúhú caça ndó ña xihín quivi mí i já ná caja i ña. Ta ndicáhnu Ndióxi, tátá i xihín ña caja i saha ndo. <sup>14</sup> Ta caja i ndá ña ná caça ndo nuú i tá ná caça ndó ña xihín quivi mí i.

*Sáhan Jesús tūhun a ña chindahá a ínimá yii Ndióxi cañuhu a ini ñayivi*

<sup>15</sup> Tá mé a ndaa quihvi ini ndó yehe, caja tá caja ndó ña sáhdá i nu ndo caja ndó. <sup>16</sup> Ta caça i nu Ndióxi, tátá i ña ná chindahá mé á ínimá yii mé á nu ndo. Ta chindeé mé á ndohó já ná quiahva tūhun ndéé ini ndó ta já cuu coo tuun a xihín ndo. <sup>17</sup> Joo ñayivi, na co cúu cuéntá mí i, a cúu ndiquehe na ña jáchi co cándaá ini na yo cúu mé á ta ni co cúní na ndiquehe vaha na ña. Joo ndohó xíní vaha ndó a jáchi sa ín a xihín ndo ta ní tiempo cañuhu a ini ndó. <sup>18</sup> A jándacoo ndáha toho i ndohó jáchi ndicó coo tucu u já coo i xihín ndo. <sup>19</sup> Já chá cuití ta a cúní ga ñayivi cuéntá ñuyivi yehe. Joo mé ndó cuni tá cuni ndó yehe. Ta sahá ña nditacu tucu u sahá ña cán queá cuu catacu mé ndó anda ama cáa quivi. <sup>20</sup> Ta mé quivi cán cándaá ini ndó ña mé a ndaa in cúu yehe xihín Ndióxi, tátá i. Ta cándaá ini ndó ña quiahva já in cúu ndó xihín i ta in cúu yehe xihín mé ndó viti. <sup>21</sup> Ndá na ndiquehe vaha tūhun cahan i ta cája na ña, náha na xihín ña yóho ña mé a ndaa quihvi ini na yehe. Ta mé Ndióxi, tátá i quihvi ini a ndijáá na quihvi ini yehe. Ta quihvi ri ini yehe na ta nahá i mí i nu ná —naxachi Jesús.

<sup>22</sup> Anda já in da naní Judas, da co cúu toho da naní Judas Iscariote, nandaca tūhún da Jesús já naxachi da já xihín á:

—Xitoho nde, ndá cuéntá queá cáchí ndó ña nahá ndó mé ndó nuú nde joo a nahá toho ndó mé ndó nuú ñayivi cuéntá ñuyivi —naxachi da.

<sup>23</sup> Já nanducú ñehe Jesús tūhun nu dá já naxachi a já xihín dá:

—Ndá na quihvi ini yehe, na cán cúu na cája ña cahan i. Ta já quihvi ini Ndióxi, tátá i na ta já quixi nde coo nde xihín ná. <sup>24</sup> Joo na co quihvi ini yehe, na cán cúu na quehe núu tūhun cahan i. Ta mé tūhun cahan i nu ndó yóho co cúu á ña quixi jiní mí i. Cúu á tūhun Ndióxi, tátá i, mé a nachindahá yehe quixi i ñuyivi yóho.

<sup>25</sup> Tóco ndihi ña yóho ndicani i ña nu ndó viti nani ín i xihín ndo. <sup>26</sup> Joo ínimá yii Ndióxi, mé a chindahá Ndióxi yuhú nuú i quixi a, chindeé a ndohó. Mé a cán queá jánaaha tóco ndihi ñaha nu ndo. Ta jándicuhun a ini ndó tóco ndihi ña naxachi i xihín ndo.

<sup>27</sup> Tá sa ná quee e cuhun i já caja i ña ná coo vaha ini ndó. Joo a cácuu a tátuhun tá cája ñayivi cuéntá ñuyivi. “Ná coo vaha ini ndó”, cáchí xihín táhan na joo co ín vaha ini xihín táhan na. Coto a ndicani nahá ini ndó ta coto a yihvi ndo jáchi caja i ña ná coo vaha ini ndó. <sup>28</sup> Sa naxini johó ndó ña naxachi i xihín ndo ña quee e cuhun i ta ndicó coo tucu u já coo i xihín ndo. Ta tá mé a ndaa quihvi ndusa ini ndó yehe já queá cajii ini ndó sahá ña cáchí i cuhun i nu ín Ndióxi, tátá i. Ta ín chága saha mé á a juú ga yehe. <sup>29</sup> Sa ndicani cuéé vi ña yóho nu ndo já queá tá ná xinu coo ña cáchí i xihín ndo coo já queá cuu candúsa ndó yehe.

<sup>30</sup> Já chá cuití va coo i ñuyivi yóho ndituhún i xihín ndo jáchi sa natandaa hora xinu rí quini, rí cómí cuéntá sahá ñayivi ñuyivi yóho vatí mé a ndaa co ndéé rí caja rí ni in nahá xihín i. <sup>31</sup> Joo yaha tá yaha ña cúní ri caja rí xihín i. Ta xihín ña yóho cándaá ini ñayivi ndúu ñuyivi ña mé a ndaa quihvi ini ndusa i Ndióxi, tátá i ta cája i ña nasahnda mé á nuú i caja i. Candichi ndó. Xihín ndo ná coho —naxachi Jesús xihín na xica tuun xihín a cán.

## 15

*Jesús cúu á tátuhun in tó uva*

<sup>1</sup> Anda já naxachi tucu Jesús já xihín ná: —Yehe cúu ndusa tátuhun in tó uva ta Ndióxi, tátá i cúu á tátuhun da ndája víi saha mé tó uva cán. <sup>2</sup> Ta ñayivi cúu ná

tátuhun ndáha tó uva cán. Ta ndá na co xeén caja ña cúní Ndióxi jácaxoo a na nu mé á tá quiahva cája da ndája vií dó cán tá chítuhun dá ndáha tó uva, ña co cána uva nuu. Joo tá cána cuaha uva nu do já quea ndája vií da ndáha do ta ndíjatá da do já ná cana cuaha chága uva nu do. Quiahva já cája ri Ndióxi xihín ñayivi, na cája ña cúní mé á. <sup>3</sup> Joo mé ndó sa nandivií va ndó jáchi naxini johó ndó ña jánaha i nu ndo. <sup>4</sup> Xíní ñúhú in cacuu ndó xihín i tá quiahva in cúu yehe xihín ndo. Jáchi in ndáha tó uva a cuú cana uva nu do tá co tীন dó tóco tó uva cán. Quiahva já in ri xihín ndóhó va. A cúu caja ndó ña cúní Ndióxi tá coó in cúu ndó xihín i.

<sup>5</sup> Yehe cúu u tátuhun tó uva ta ndóhó cúu ndó tátuhun ndáha mé tó uva cán. Ta ndá na in cúu xihín i tá quiahva in cúu u xihín ná já quea cuu caja ndihi na ña cúní Ndióxi. Cacuu a tátuhun cána cuaha uva vaha nu ndáha tó uva cán. Jáchi mé a ndaa ni in túhún ñaha a cúu caja ndó tá ná a chindeé yehe ndohó. <sup>6</sup> Ta ndá na co cúní in cacuu xihín i, na cán cúu na jácaxoo Ndióxi. Ta cúu ná tátuhun in ndáha tó uva, dó sa nahichí ta nditaca dó cuhun dó cayi do.

<sup>7</sup> Tá in ná cacuu ndó xihín i ta tá ná caja ndó ña najánaha i nu ndo já cuu caça ndó ndá ña cúní mé ndó nuú i já quiahva i ña nu ndo. <sup>8</sup> Mé Ndióxi, tátá i ndicáhnu ndivaha tá ná caja ndó ña cúní a xihín ndinuhu ini ndó. Ta xihín ña yóho náha ndó ña cúu ndó cuéntá mí i. <sup>9</sup> Quíhvi ini i ndohó tá quiahva quíhvi ini Ndióxi, tátá i yehe. Xíní ñúhú coo tuun ndó xihín i jáchi quíhvi ini i ndohó. <sup>10</sup> Tá ná caja ndó tóco ndihi ña sáhdá i nu ndo caja ndó já quea coo tuun ndó xihín i jáchi quíhvi ini i ndohó. Quiahva já cája ri yehe va. Cája i tóco ndihi ña nasahnda Ndióxi, tátá i caja i ta xihín ña yóho in tuun i xihín á jáchi quíhvi ini a yehe.

<sup>11</sup> 'Cáxi tuhun i ña yóho xihín ndo já ná cajii iní ndo tá quiahva cajii iní yehe. Ta xihín ña yóho ndicutú ndaa inima ndo xihín ña cajii ini ndó. <sup>12</sup> Cuni johó ndó ña sáhdá i nu ndo yóho: Ndítahan quíhvi ini táhan ndó tá quiahva quíhvi ini yehe ndohó. <sup>13</sup> Tá mé a ndaa táhyí quíhvi ini ñayivi ñani táhan na já quea in tiahva na quivi na saha ná. <sup>14</sup> Mé ndó cúu ndó amigo i tá cája ndó ña

sáhdá i nu ndó caja ndó. <sup>15</sup> Cáchi i xihín ndo ña cúu ndó amigo i jáchi cáxi tuhun ndihi i xihín ndo ña cáhan Ndióxi, tátá i xihín i. Ta a cáhan ga i xihín ndo ña cúu ndó mozo jáchi in mozo co xíní toho da ndaja cáa ña cája xitoho da. <sup>16</sup> Mé ndó coó nacaxi ndó yehe caca nuu i xihín ndo. Joo mí i nacaxi i ndohó ña ná caca nuu ndó xihín i. Ta najánaha i ndohó ndá quiahva caja ndó já ná cacuu ndó tátuhun in yító, dó sahan cuahá cuíhi ña a ndíhi saha. Tá ná caja ndó ña cúní Ndióxi já quiahva tátá i ndá a cúní mé ndó tá ná caça ndó ña xihín quívi mí i. <sup>17</sup> Ña yóho quea sáhdá i nu ndó caja ndó: Quíhvi ini táhan ndó.

*Cándají ñayivi cuéntá ñuyíví Jesús ta cándají ri na na cúu cuéntá mé á*

<sup>18</sup> 'Candehé ndo. Tá ná casáha candají ñayivi cuéntá ñuyíví ndohó xíní ñúhú ndicuhun ini ndó ña jihna ñúhú ga nacandají ri na yehe va. <sup>19</sup> Tá ná caja ndó tá quiahva cája ñayivi ñuyíví já quea quíhvi ini va na cán ndohó. Jáchi já cája xihín táhan mé na cán. Joo yehe nacaxi i ndohó ña ná quee ndó tañu na cán. Saha ña cán quea co cúní na cán ndohó jáchi co cúu ga ndó na ñuyíví yóho. <sup>20</sup> Coto a ndíndójó ndo ña nacahan i xihín ndo tá nacachi i ña ni in túhún toho mozo a cúu cacuu da da cáhnu chága nuú xitoho da. Ta ni mé ndó co cúu ndó na náhnu chága a juú ga yehe. Jáchi tá quiahva nacaja xíxi na xihín yehe quiahva já caja xíxi ri na xihín ndóhó va. Tá ná candúsa na ña nacahan i xihín ná quiahva já candúsa ri na ña ná cahan ri ndóhó va xihín ná. <sup>21</sup> Tóco ndihi ña yóho caja na xihín ndo saha ña cándéé ini ndó yehe. Jáchi co xíní na Ndióxi, tátá i, mé a nachindahá yehe vaxi i ñuyíví yóho.

<sup>22</sup> Tá ná a quíxi toho i ñuyíví yóho caxi tuhun i xihín ñayivi, nduu coó toho na jácojo cuachi jata ná, nduu. Joo viti naquixi i ñuyíví yóho ta ndítahan nu ná ndiquiahva na cuéntá saha cuachi na. <sup>23</sup> Ndá ñayivi cándají yehe, cándají ri na Ndióxi, tátá i. <sup>24</sup> Nacaja i ña náhnu nu ná joo coó nacandúsa na yehe saha ña cán quea ndójo na cuachi. Ta ni in túhún toho ñayivi coó nacaja ña náhnu tá quiahva nacaja i nu ná. Vatí naxini na ña náhnu nacaja i joo cándají



na yehe ta cándají na Ndióxi, tátá i. <sup>25</sup> Joo xihin tóco ndihi ña cúu yóho xínu coo nu ley najándacoo Moisés nu ná sanahá tá cáchí a já: “Chí coo saha ná candají na yehe”, já nacachi Moisés sanahá.

<sup>26</sup> Tá ná quixi ínima yii Ndióxi, mé a chindahá i cuéntá Ndióxi, tátá i, mé a cán quea cahan vaha sahá i. Ta jánaha ña ndaa saha Ndióxi ta chindeé a ñayivi. <sup>27</sup> Ta jári mé ndó cahan vaha ndó sahá i jáchi janda saha tá nacasáhá cája chúun i ñuyiví yóho nasanduu tuun ndó xihín i –nacachi Jesús.

## 16

<sup>1</sup> Já nacachi tucu Jesús já:

–Caxi tuhun i ña yóho xihin ndó já ná a jándacoo ndó ña cándeé ini ndó yehe. <sup>2</sup> Jáchi vaxi quiví tá taxi ñayivi ndohó veñuhu. Ta ndá na ná cahní ndohó cahan na ña cája chúun na cuéntá Ndióxi. <sup>3</sup> Caja na ña yóho jáchi co xini na yo cúu Ndióxi, tátá i ta ni co xini na yehe. <sup>4</sup> Sa caxi tuhun cuéé e ña yóho xihin ndó já quea tá ná xínu coo quiví cán já ndicuhun ini ndó ña sa nacaxi tuhun yachi vi xihin ndó ña já coo.

### *Ña cája ínima yii Ndióxi*

‘Coo nacaxi tuhun i ña yóho xihin ndó jihna jáchi nasahin i xihin ndó. <sup>5</sup> Já chá cuhun i coo i xihin Ndióxi, tátá i, mé a nachindahá yehe ñuyiví yóho joo ni in ndó co ndaca tuhún ndó yehe ndájá cuhun i. <sup>6</sup> Ña cája ndó quea cacuéha ndivaha ini ndó sahá ña ndícani i tóco ndihi ña yóho nu ndó. <sup>7</sup> Joo mé a ndaa ná cahan i xihin ndó: Vaha chága ná quee e cuhun i. Jáchi tá ná a quee yehe cuhun i já a cúu quixi ínima yii Ndióxi coo a xihin ndó ta mé a cán chindeé a ndohó. Joo tá ná quee e cuhun i já chindahá i mé á quixi a nu ndó. <sup>8</sup> Ta tá ná xínu a cán jánaha cáxí táhyí a nuú ñayivi ña cája na cuachi. Ta jánaha nu ná ndaja ín íchi cuéntá ña ndaa. Ta jánaha nu ná ndá quiahva cavií sahá ñayivi caja Ndióxi. <sup>9</sup> Ta jánaha cáxí táhyí a ña ín cuachi na jáchi co cándeé ini na yehe. <sup>10</sup> Ta jánaha ínima yii Ndióxi ndaja ín íchi cuéntá ña ndaa jáchi quee e cuhun i nu ín Ndióxi, tátá i ta a cúní ga ndó yehe. <sup>11</sup> Ta jánaha cáxí táhyí a ña caja vií Ndióxi sahá cuachi jáchi sa nacaja vií a

sahá tiñahá sacuahá vatí viti ñuhú cómí rí cuéntá sahá ñayivi ñuyiví yóho.

<sup>12</sup> ‘Íin cuahá ndivaha ñaha cúní cahan chága i xihin ndó. Joo vatí já va viti jáchi a cándoo ga jini ndó. <sup>13</sup> Tá ná xínu ínima yii Ndióxi, mé a cúu ña ndaa, mé a cán candaca ndohó íchi cuéntá ña ndaa. Ta a cahan toho a cán ña quixi jini mé á jáchi cahan mé á ña xini johó a cahan Ndióxi. Ta caxi tuhun a xihin ndó ndá a coo chága chí nuu. <sup>14</sup> Ta mé a cán caja cáhnu a yehe jáchi jánaha nu ndó ña cúní mí i jánaha i nu ndó. <sup>15</sup> Tóco ndihi ñaha jánaha Ndióxi, tátá i cúu ri a ña jánaha yehe va. Sahá ña cán quea cáchí i xihin ndó ña ínima yii mé á caxi tuhun a xihin ndó ña cúní mí i jánaha i nu ndó.

<sup>16</sup> ‘Já chá cuití coo i xihin ndó ta a cúní ga ndó yehe jáchi quee e cuhun i nu ín Ndióxi, tátá i. Joo tá nandihí já cuni tucu ndó yehe –cáchi Jesús.

<sup>17</sup> Andá já nacasáhá java na xíca tuun xihin á cán ndaca tuhún táhan na já cáchí xihin táhan na já:

–Ndía cúní ri Jesús cachi a xoho tá cáchí a ña ja chá cuití va ta a cúní ga í mé á ta tá nandihí já cuni tucú mé á. Ta cáchí a ña cúu á sahá ña quee a cuhun a nu ín Ndióxi, tátá a. <sup>18</sup> Ndía cúní ri a cachi a ña ja chá cuití va cuni mé á. Co cándaa vaha toho iní ndía cúní mé á cachi a xihín tuhun yóho –nacachi xihin táhan na.

<sup>19</sup> Joo nacandaa ini Jesús ña cúní na ndaca tuhún na mé á sahá ña cán quea nacachi a já xihin ná:

–Nacachi i xihin ndó ña ja chá cuití ta a cúní ga ndó yehe ta tá nandihí já cuni tucu ndó yehe. Ta viti cúní ndó ndaca tuhún ndó yehe ndía cúní cachi ña yóho. <sup>20</sup> Mé a ndaa ná cahan i xihin ndó. Tandaa quiví cuacu ndó ta cacuéha ndivaha ini ndó ta ñayivi ñuyiví yóho cavatá ndivaha na sahá ña ndoho i. Ta vatí cacuéha ini ndó joo in cuití ndajama ña jan ta já caji ndivaha ini ndó. <sup>21</sup> Cacuu a tátuhun tá xínu coo hora cacu jahyi in ñañáha ta já casáhá ndóho ini ña. Joo tá sa nacacu jahyi ña ndíndójó ndihi ña sahá ña nandoho ini ña jáchi sa nacacu jahyi ña ta caji ndivaha ini ña xihin á. <sup>22</sup> Quiahva já ndóho ini ndó xihín ña táhnda ini ndó viti. Joo ndicó coo tucu yehe

já cuni táhan tucú ta já ndicutú ndaa ínima ndó xihín ña cájii íní ndo. Ta ni in na a cúu caja caji nuu nuú ña cájii íní ndó jan.

<sup>23</sup> Mé quiví cán coo ga ñaha caça ndó nuú i. Jáchi mé Ndióxi, tátá i quiahva tóco ndihi ña xíní ñúhú ndo tá ná caça ndó ña nu á xihín quiví mí i. <sup>24</sup> Janda viti a ñaha caça ndó ñaha nu Ndióxi, tátá i xihín quiví yehe. Joo viti xíní ñúhú caça ndó ña cúní ndó nu mé á xihín quiví yehe ta já quiahva mé á ña nu ndo. Ta xihín ña yóho cuu ndicutú ndaa ini ndó xihín ña cájii íní ndo.

*Naquee vaha Jesús nu tóco ndihi ña núu ñuyíví yóho*

<sup>25</sup> Xihín quiahva cuití naçahan i ña yóho xihín ndo. Joo tandaa quiví ta a çahan ga i xihín quiahva nu ndo. Ña caja i quea cáxi táhyí çahan i saha Ndióxi, tátá i nu ndo. <sup>26</sup> Ta mé quiví cán caça ndó ña cúní ndó nu Ndióxi, tátá i xihín quiví mí i. Sa núná nu ndó caça tahví ndó nu á ta co xíní ñúhú ga caça tahví yehe nu mé á saha ndo. <sup>27</sup> Jáchi sa quíhvi ini tátá i ndohó sahá ña quíhvi ini ndó yehe ta sahá ña naçandúsa ndó ña nachindahá mé á yehe vaxi i. <sup>28</sup> Mé nu ín Ndióxi, tátá i naquee e vaxi i ñuyíví yóho. Ta yachi chá ta jándacoo i ñuyíví yóho já ndicó coo tucu u çuhun i nu ín Ndióxi, tátá i — naçachi Jesús.

<sup>29</sup> Anda já naçachi na xíca tuun xihín á cán já:

—Viti ndusa quea çahan cáxi táhyí ndo xihín nde ta co sácú ga ndó quiahva nuú nde. <sup>30</sup> Ta viti ndusa cándaa ini nde ña xíní ndo tóco ndihi ñaha. Ta ni co xíní ñúhú toho ndó ña ná ndaça tuhún nde ndohó jáchi sa xíní va ndó ña cúní nde cándaa ini nde. Sahá ña cán quea cándúsa nde ña naquixi ndó nu ín Ndióxi — naçachi na.

<sup>31</sup> Já nanducú ñehe Jesús tuhun nu ná já naçachi a já xihín ná:

—Á ja víti ndusa cándúsa ndó yehe. <sup>32</sup> Joo sa naxinu coo va hora ndicuita nuu ndó ndá naçuu çuhun ndo ta jándacoo in tuhún ndó yehe. Vatí mé a ndaa a cándoo mé toho i jáchi ín Ndióxi, tátá i xihín i. <sup>33</sup> Cáxi tuhun i ña yóho xihín ndo já ná coo vaha ini ndó sahá ña in cúu ndó xihín i. Mé a ndaa ndoho tá ndoho ini ndó ñuyíví yóho. Joo a cáyihví toho ndó jáchi yehe naçandee e

naçahnu i nu tóco ndihi ña núu ñuyíví yóho — naçachi Jesús xihín na xíca tuun xihín á cán.

## 17

*Xíca tahví Jesús nu Ndióxi sahá na xíca tuun xihín á*

<sup>1</sup> Tá nandihí naçachi Jesús tóco ndihi ña yóho xihín na xíca tuun xihín á cán já nandiñehe a nuu á chí indiví já naçachi a já:

—Tátá Ndióxi, sa naxinu coo quiví quivi i. Caja ndó ña ndicáhnu ndivaha mí i, da cúu in tuhún jiní já jahyi mé ndó já ná cuu caja cáhnu ri yehe va ndohó. <sup>2</sup> Jáchi mé ndó naçahan ndó nuú i ña ná cacomí i cuénta sahá tóco ndihi ñayivi já ná cuu caja i ña ná catacu na anda ama caa quiví jáchi cúu ná na naçahan ndo nuú i. <sup>3</sup> Ta tá xíní na yo cúu mé ndó ta tá xíní na yo cúu yehe, da nachindahá ndó ñuyíví yóho já cuu catacu na anda ama caa quiví. Jáchi in tuhún mé ndó cúu ndusa Ndióxi.

<sup>4</sup> Sa naçaja cáhnu i ndohó nani ín i ñuyíví yóho ta sa najáxinu coo ndihi i ña naçahnda ndó nuú i caja i. <sup>5</sup> Ta viti xíca tahví i nu ndo, tátá Ndióxi ña ná ñaha ndo nuú ñayivi ndaja cáhnu cúu yehe nu mé ndó jáchi quiahva já in cáhnu naçacuu u xihín ndó janda tá cámaní cava sahá saha ñuyíví.

<sup>6</sup> Ta naçaxi ndó na cacuu cuénta mí i tañu ñayivi cuénta ñuyíví yóho. Ta sa naçaxi tuhun i xihín ná yo cúu mé ndó. Naçaxi ndó na ta nandiquiahva ndó na nuú i. Ta naçandúsa na tuhun ndó. <sup>7</sup> Ta viti cándaa ini na ña tóco ndihi ña sahan ndó nuú i quíxi a cuénta mé ndó. <sup>8</sup> Ta sa naçaxi tuhun i xihín ná tóco ndihi ña naçahan ndó nuú i ta nandiquehe vaha na ña. Ta sa naçandaa ini na ña mé a ndaa naquixi i cuénta mé ndó. Ta naçandúsa na ña nachindahá ndó yehe.

<sup>9</sup> Co xíca tahví i nu ndó sahá ñayivi cuénta ñuyíví yóho. Joo xíca tahví i nu ndó sahá na naçahan ndó nuú i jáchi cúu ná cuénta mé ndó. <sup>10</sup> Tóco ndihi na cúu cuénta mí i cúu ná cuénta mé ndó viti. Ta tóco ndihi na cúu cuénta mé ndó cúu ri na cuénta yehe va. Ta ndicáhnu ndivaha mí i sahá ña cája na.

11 'A cóo ga i ñuyívi yóho jáchi saa i nu ín mé ndó. Joo na ñacaxi ndó yóho canduu too na ñuyívi yóho. Tátá Ndióxi, yíi ndivaha cúu mé ndó. Xíca tahví i nu ndó ña ná candaa vaha ndó na cúu cuéntá mé ndó jáchi xihín ndée mé ndó cuu candico na íchi cuéntá mé ndó. Já quea in ná nduu ndihi na tá quiahva in cúu mé ndó xihín yehe. 12 Jáchi nani ín i xihín ná ñuyívi yóho ndáa i na xihín ndée mé ndó. Ta ni in túhún toho táhan na nasahan ndó nuú i cacomí i cuéntá saha cán coo nandihí saha. In túhún da nandihí saha cúu da janda sanahá nasahin saha ña ndihi saha dá já ná cuu xinú coo nuú ña ñacahyi nuú tuhun Ndióxi sanahá.

13 'Ta viti quee e ñuyívi yóho saa i nu ín ndó jan. Joo cahan i ña yóho xihín ndó nani ín i ñuyívi yóho já ná ndicutú ndaa ini na yóho xihín ña cájii ín na tá quiahva cájii ín mí i. 14 Sa ñacaxi tuhun i tuhun mé ndó nu ná. Joo na cúu cuéntá ñuyívi cándají na na cúu cuéntá mí i jáchi coo cúu ná cuéntá ñuyívi yóho tá quiahva coo cúu toho yehe cuéntá ñuyívi yóho. 15 Coo xíca tahví i nu ndo ña ná tavá ndo na ñuyívi yóho. Ña cuni quea ná chindeé ndó na já ná a quee vaha tiñáhá sacuaña xihín ná. 16 Tá quiahva coo cúu toho i da cuéntá ñuyívi yóho quiahva já coo cúu ga na cán ñayivi cuéntá ñuyívi. 17 Ta xíca tahví i nu ndó ña ná ndaja vii ndó na xihín tuhun mé ndó ña jánaha ndó nu ná jáchi tuhun mé ndó cúu ña ndaa. 18 Ta tá quiahva ñacaja ndó ñachindahá ndó yehe tañu na ñuyívi yóho quiahva já chindahá ri yehe va na cúu cuéntá mí i tañu ñayivi cuéntá ñuyívi. 19 Ta ndiquiahva i mí i caja i ña cuni mé ndó já quea ná cuu ndiquiahva na yóho mé ná ndáha mé ndó sahá ña sa xini na ña ndaa.

20 'Ta a juú sahá na yóho cuití va xíca tahví i nu ndo, vaha. Xíca tahví ri nu ndó sahá na ná candúsa yehe chága chí nuu sahá tuhun cahan mé na yóho xihín ná. 21 Tátá Ndióxi, xíca tahví i nu ndó ña ná caja ndó ña in ná nduu tóco ndihi na cúu cuéntá mé ndó yóho. Ta caja ndó ña in ná nduu ndihi na xihín yó tá quiahva in cúu ndó xihín yehe ta in cúu yehe xihín mé ndó. Jáchi tá ná caja ndó ña in ná nduu

tóco ndihi na já cuu candúsa ñayivi cuéntá ñuyívi ña mé a ndaa ñachindahá ndó yehe vaxi i. 22 Ñacaja i ña ñandicáhnu na cán tá quiahva ñandaja cáhnu ndó yehe. Já quea in ná nduu ndihi na tá quiahva in cúu mé ndó xihín yehe. 23 Ta in cúu yehe xihín ná tá quiahva in cúu mé ndó xihín i já ná xinú coo ndihi na cacuu na tátuhun in víxi ñayivi. Ta já ná cuni ñayivi cuéntá ñuyívi ña mé a ndaa ñachindahá ndó yehe vaxi i. Ta já ná cuni na ña quíhvi ini ndó na tá quiahva quíhvi ini ndó yehe.

24 'Tátá Ndióxi, ñacaja ndó ña cómí i cuéntá sahá na yóho. Ta cuni ña ná coo na xihín i nuú coo i já ná cuni na ndá quiahva cáhnu cúu u jáchi ñacaja ndó ña ná ndicáhnu ndivaha i. Jáchi janda tá camaní cava sahá saha ñuyívi quíhvi ini ndó yehe. 25 Tátá Ndióxi, cája ndó ña ndaa. Ta ñayivi cuéntá ñuyívi yóho coo xini toho na ndohó. Joo yehe xini vaha i ndohó ta na cúu cuéntá mí i yóho sa cándaa vaha ini na ña ñachindahá ndó yehe. 26 Sa ñacaja i ña ná candaa ini na yo cúu mé ndó ta cája i ña ná candaa chága ini na saha ndo. Ta xihín ña yóho candaa ini na ña quíhvi ini ndó na tá quiahva quíhvi ini ndó yehe ta já in ná nduu na xihín i –ñacachi Jesús xíca tahví a nu Ndióxi.

## 18

### Tá natiin na Jesús

(Mt. 26:47-56; Mr. 14:43-50; Lc. 22:47-53)

1 Tá nandihí ñaxíca tahví Jesús nu Ndióxi já ñaqueta mé á xihín na xíca tuun xihín a cán cuahan chí inga xoo yivi naní Cedrón. Ta yati cán cáa cuaha yitó cuíhi nuú ñaquíhvi Jesús xihín na xíca tuun xihín á. 2 Ta Judas Iscariote, mé da jícó túhún ñahá cán sa xini vaha da nu sáhin Jesús xihín na xíca tuun xihín á jáchi cuahá tañu nanditútú ndihi na cán. 3 Ña cán quea ndáca da in táhndá soldado ta ndáca da java policía, na ndáa veñuhu cáhnu ñuu Jerusalén cán. Cúu ná na ñachindahá na sacuaña nuú jutú xihín na fariseo. Ta jandá johó ñéhe na ñaha ná cani na a cuahan na ta ñéhe ri na ití yúsá jándiyéhe na nu ná. 4 Joo sa xini vaha Jesús ndia ndítahan

ndoho a sahá ña cán quéa naqueta nu ná já nandaca tuhún a na já nacachi a já xihin ná:

—Yo ndínducú ndo já —nacachi a.

<sup>5</sup> Já nanducú ñehe na cán tuhun nu á já nacachi na já xihin á:

—Ndínducú nde Jesús, da ñuu Nazaret —nacachi na.

—Yehe cúu u da ndínducú ndo —nacachi a.

Ta tañu na cán ndácaan ri Judas, da najicó tuhún ñahá cán. <sup>6</sup> Tá nacachi Jesús: “Yehe cúu u da ndínducú ndo”, já naxica jatá na ta nacuyu na nu ñúhu. <sup>7</sup> Já nandaca tuhún tucu Jesús na já nacachi a já xihin ná:

—Yo ndínducú ndo já —nacachi a.

Já nanducú ñehe na cán tuhun nu á já nacachi na já xihin á:

—Jesús, da ñuu Nazaret ndínducú nde —nacachi na.

<sup>8</sup> Anda já nacachi tucu Jesús já xihin ná:

—Sa nacachi vi xihin ndo ña yehe cúu u da ndínducú ndo. Sahá ña cán quéa quiahva ndó ñamaní nuú na yóho ña ná quee na cuhun na —nacachi Jesús.

<sup>9</sup> Nacachi Jesús ña yóho já ná a tñin na na xica tuun xihin a cán já ná xinu coo nuú tuhun ña nacachi mé á tá naxica tahvi a nu Ndióxi tá nacachi a já: “Tátá Ndióxi, ni in tuhún toho táhan na nasahan ndó nuú i coo nandihí saha jáchi nasandaa vaha i na.” <sup>10</sup> Ta ndaja coo nasañee in machítí nu tóco Simón Pedro. Já natuhun da ña ta nachituhun dá johu cuaha in da naní Malco, da cúu mozo nuú da cúu sacuahá chága nu ndíhi jutú. <sup>11</sup> Anda já nacachi Jesús já xihin Pedro:

—Chicaan vaha machítí jan. Jáchi sa nasacu ini Ndióxi, tátá i ndoho ini i tóco ndíhi ña vaxi nuú i ta ín tiaha i ndoho ini i —nacachi Jesús.

*Ñehe na Jesús cuahan na nuú da sacuahá chága nu ndíhi jutú*

(Mt. 26:57-58; Mr. 14:53-54; Lc. 22:54)

<sup>12</sup> Tóco ndíhi soldado cán xihin da sáhdá chuun nu dá xihin java na ndáá veñuhu cán natiin na Jesús ta natató na a. <sup>13</sup> Jihna ñúhu ñehe na a nasahan na nu Anás, da cúu xojo Caifás, da sacuahá chága nu ndíhi jutú mé cuia cán. <sup>14</sup> Mé Caifás yóho cúu dá da nacachi xihin na Israel ña vaha chága ña ná

quivi in ta nu ndíhi ñayivi já ná a ndíhi saha tóco ndíhi ñayivi.

*Chíjehé tuhun Pedro ña xini da Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Ta ndaja coo Simón Pedro xihin inga táhan da xica tuun xihin Jesús cán ndíco na jatá nu ñehe na a cuahan na. Ta da inga cán xini táhan vaha da xihin da sacuahá chága nu ndíhi jutú ña cán quéa nañehe dá ñamaní ndíhvi da xihin Jesús yuyehé vehe jutú cán. <sup>16</sup> Joo nacandoo Pedro jatá véhe yati yehé cán. Joo da inga cán nandicó coo da já naxica da ñamaní nu ña ndáá yehé vehe jutú cán ña ná quiahva ña ñamaní nu Pedro quihvi da. Sahá ña cán naquihvi Pedro chí yuyehé vehe cán. <sup>17</sup> Ta mé ña ndáá yehé cán nandaca tuhún ña Pedro já nacachi ña já xihin dá:

—Á a juú in táhan da xica tuun xihin Jesús cúu yóho —nacachi ña.

Anda já nacachi Pedro já xihin ña:

—Co cúu toho i in táhan da xica tuun xihin á —nacachi Pedro.

<sup>18</sup> Ta mé ñuu cán vixi xini na cúu mozo xihin na ndáá veñuhu cán. Sahá ña cán quéa nandicahmi na ñúhu ta nandaca nduu na xitúni na ta tañu na cán cándichi ri Pedro xitúni da.

*Ndája ndíchi da sacuahá chága nu ndíhi jutú Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Tá nandíhi já nacasahá da sacuahá chága nu ndíhi jutú cán ndája ndíchi da Jesús já nandaca tuhún da mé á sahá na naxica tuun xihin á. Ta nandaca tuhún da mé á sahá ña najánaña nuú ñayivi. <sup>20</sup> Anda já nacachi Jesús já xihin dá:

—Coó nacañan jehé toho i xihin ñayivi tá najánaña i nu ná. Níi tiempo najánaña i tuhun Ndióxi nu ná ini veñuhu ta quiahva já najánaña i nu ná nu táca na ini veñuhu cáhnu ñuu Jerusalén. Ta ni in tuhún toho ñaha coo najánaña jehé e nu ná. <sup>21</sup> Ta viti cachi ndó xihin i ndá cuénta quéa ndáca tuhún ndó yehe sahá ña yóho. Cuahán ndó ndaca tuhún ndo ñayivi, na najánaña i nu cán já ná ndicani na cán nu ndo ndaja cáa

ñā najánaḥa i nu ná. Jáchi xíni vaha na ñā naçahan i xihín ná —naçachi Jesús.

<sup>22</sup> Tá naçachi Jesús ñā yóho já naçani in da ndáá veñuhu cán jahndá nuú á já naçachi da já xihín á:

—A váha toho ndiñehe yuhun nuú da sacuaḥa chága nu ndíhi jutū —naçachi da.

<sup>23</sup> Anda já naçachi Jesús já xihín dá:

—Tá co váha ná caja i, caḥan xihín i ndá cúu ñā coó naçaja vaha i. Joo tá naçaja vaha i ndá cuéntá quéa cánún yehe —naçachi Jesús.

<sup>24</sup> Tá nandihí já nasañehe na Jesús nuú Caifás, da sacuaḥa chága nu ndíhi jutū cán ta sa já ndíco a xihín yóho ñehe na a cuḥan na.

*Chíjehé tuhun tucu Pedro ñā xíni da Jesús (Mt. 26:71-75; Mr. 14:69-72; Lc. 22:58-62)*

<sup>25</sup> Ta ndaja coo íin coo yíi Pedro xítúni da xihín java na ndúu cán. Ta já naçasáhá na cán ndáca tuhún na da já naçachi na já xihín dá:

—Á a juú táhan da xíca tuun xihín Jesús cúu yóho —naçachi na.

Joo naçihjehé tuhun Pedro ñā xíni da Jesús já naçachi da já:

—Co cúu toho i in táhan da xíca tuun xihín á —naçachi da.

<sup>26</sup> Joo tá nandihí já nandaca tuhún in da cúu mozo nuú da sacuaḥa chága nu ndíhi jutū cán, da cúu in táhan da naçhituhun Pedro johó. Ta naçachi da já xihín Pedro:

—Cája i cuéntá naçini i yohó nu cáa cuaha yitó cuíhi nuú nañiin na Jesús cán —naçachi da.

<sup>27</sup> Joo naçihjehé tuhun tucu Pedro ñā xíni da Jesús ta ivi laá naçana chéle tá quiahva naçachi Jesús xihín dá coo.

*Ñehe na Jesús cuḥan na nu Pilato*

*(Mt. 27:1-2, 11-14; Mr. 15:1-5; Lc. 23:1-5)*

<sup>28</sup> Ta tá nañivi yaa já naçavá na Jesús vehe Caifás cán já ñehe na a cuḥan na vechúun nu ndácaan da cúu gobernador cuéntá ñuu Roma. Joo mé na Israel coó naçeen na ndihvi na vechúun cán jáchi cáchi ley na ñā tá ná ndihvi na vehe na tóho já cuu yuxu na ta já a cúu cajini na vicó pascua ñā coo quiví itaan. <sup>29</sup> Sahá ñā cán quéa naçqueta

Pilato, da cúu gobernador jata véhe caḥan da xihín na Israel já naçachi da já:

—Ndá cuachi naçaja da yóho —naçachi Pilato.

<sup>30</sup> Já nanducú ñehe na Israel cán tuhun nu dá já naçachi na já:

—Ta tá a juú ta quini ná cacuu da yóho ta a cañehe toho nde da quixi da nu ndó, nduu —naçachi na.

<sup>31</sup> Já naçachi Pilato já xihín ná:

—Mé ndó cañehe ndó da cuhun ndo. Caja vii ndó saḥa dá tá quiahva sáhdá ley mé ndó —naçachi Pilato.

Já naçachi na Israel cán já xihín dá:

—Ñā cúní nde quéa ná cata caa ndó da ndica crúxu jáchi cúu nde na Israel ta co ñehe toho nde ñamaní cahní nde ñayivi —naçachi na.

<sup>32</sup> Ta xihín ñā yóho naçinu coo nuú ñā naçachi Jesús tá naçachi a ndá quiahva quivi a. <sup>33</sup> Tá nandihí já nandihvi tucu Pilato ini vechúun cán ta naçana da Jesús já nandaca tuhún ñahá da já naçachi da já xihín á:

—Á mé a ndaa cúun in rey, da cómi cuéntá saḥá na Israel —naçachi da.

<sup>34</sup> Já naçachi Jesús já xihín dá:

—Á jiní mé ndó naquixi ñā ndáca tuhún ndó yehe. Á ndáca tuhún ndó yehe saḥá ñā naçachi ñayivi saḥá i —naçachi a.

<sup>35</sup> Anda já naçachi Pilato já xihín Jesús:

—Co cándaḥ ini i saḥa ñā yóho jáchi co cúu yehe da Israel. Mé ñayivi Israel jan xihín na sacuaḥa nuú jutū cúu na nandiquiahva yohó ndahá i. Ndía naçajún, vaha —naçachi Pilato.

<sup>36</sup> Já nanducú ñehe Jesús tuhun nu dá já naçachi a já xihín dá:

—Co cómi i cuéntá saḥá ñayivi tátuhun cája ñayivi cuéntá ñuyiví. Jáchi tá ná cacomí i cuéntá saḥa ná tátuhun na ñuyiví já quéa cuu caja i xihín na cómi i cuéntá saḥa ñā ná caní táhan na xihín na Israel ñā ná a tiiin na yehe. Joo co cómi toho i cuéntá saḥa ná tátuhun cája ñayivi cuéntá ñuyiví —naçachi a.

<sup>37</sup> Anda já naçachi tucu Pilato já xihín Jesús:

—Á cúun da cómi cuéntá saḥá ñayivi, dá já —naçachi da.

Já ñacachi Jesús já xihín dá:

—Ñá ndaa quéa cáhan ndó jan. Yehe cúu u da cómi cuéntá sahá ñayivi cuéntá mí i jáchi ñacacu u ñuyiví yóho ña ná caja i já. Ta ñaquixi i já ná caxi tuhun i ña ndaa xihín ñayivi. Ta tóco ndihi na cúu cuéntá ña ndaa xini johó ña cáhan i —ñacachi a.

<sup>38</sup> Já ñacachi tucu Pilato já xihín á:

—Yo xini ndia cúu ña ndaa —ñacachi da.

Tá ñandihí já ñaqueta tucu Pilato vechúun cáhan da xihín na Israel já ñacachi da já xihín ná:

—Chí co ndíñehe mí vi ndá cuachi quéa ñacaja da yóho. <sup>39</sup> Tañu mé víco pascua ín in costumbre ndo ña ná janí i in da sá ndacaan vecaa. Ta viti cachi ndó xihín i á co cuni ndó ña ná janí i da cúu rey nuú na Israel —ñacachi Pilato.

<sup>40</sup> Ta já ñacasáhá tóco ndihi na cán cáyuhú cóhó na já cáchí na já:

—A janí toho ndó Jesús jan. Vaha chága ná janí ndó Barrabás jan —cáchí na cáyuhú na nu Pilato.

Ta Barrabás cán ñasacuu da in ta cuíhná.

## 19

### *Sácu na sahá Jesús quivi a*

<sup>1</sup> Anda já ñasahnda Pilato chuun ña ná jácaxáhan na Jesús xihín churrú. <sup>2</sup> Ta da cúu soldado cán ñajehén da in tiyivi xihín íñu já ñachinúu da a jini á ta ñachinúu da in jáhma cuáhá túun jatá. <sup>3</sup> Tá ñandihí já ñacativi da nu á sácu ndaa ichi ñahá da já ñacachi da já xihín á:

—Cáhnú nahá ná cacuu yóhó, da cúu rey nuú na Israel —ñacachi da.

Anda já cáni da nuú á.

<sup>4</sup> Tá ñandihí já ñaqueta tucu Pilato chí jatá já ñacachi da já xihín tóco ndihi na ndúu cán:

—Candehé ndo. Tavá ñehe e Jesús nu ndo já ná candaa ini ndó ña coó toho cuachi da ndítahan i —ñacachi da.

<sup>5</sup> Tá ñandihí já ñatavá ñehe Pilato Jesús ta sa já cánúu tiyivi íñu jini á. Ta sa já tácaa jáhma cuáhá túun jatá ñaqueta. Anda já ñacasáhá cáchí Pilato já:

—Candehé ndo. Yóho ín da —ñacachi da.

<sup>6</sup> Joo na sacuaña nuú jutu xihín na ndaa veñuhu tá ñaxini na Jesús já ñacasáhá na cáyuhú cóhó na já cáchí na já:

—Cata caa ndó da ndica crúxu, cata caa ndó da —cáchí na.

Anda já ñacachi Pilato já xihín ná:

—Mé ndó cañehe ndó da cuhun ndo cata caa ndó da ndica crúxu tá cuni ndo. Jáchi yehe co ndítahan i ndá cuachi ñacaja da —ñacachi Pilato.

<sup>7</sup> Anda já ñacachi na Israel cán já xihín Pilato:

—Nu ley mé nde ndítahan quivi da jáchi cáchí da cúu dá in túhún jini já jahyi Ndióxi —ñacachi na.

<sup>8</sup> Tá ñaxini johó Pilato cán ña yóho já ñayihví chága ví da. <sup>9</sup> Já ñaquihvi tucu Pilato xihín Jesús ini vechúun cán já ñandaca tuhún da mé á já ñacachi da já xihín á:

—Ndá ñuu ñaquisún já —ñacachi da.

Joo coó ñanducú ñehe Jesús tuhun nu dá.

<sup>10</sup> Já ñacachi tucu Pilato já:

—Ndá cuéntá quéa co cunún nducú ñehún tuhun nuú i. Á co xini tohún ña cuu cahnda i chuun ña ná cata caa na yohó ndica crúxu. Ta cuu janí ri yohó ña ná queún cuhun tá cuni —ñacachi da.

<sup>11</sup> Anda já ñanducú ñehe Jesús tuhun nu dá já ñacachi a já xihín dá:

—Ni in túhún toho ñaha co núná nu ndó caja ndó xihín i tá co sahan Ndióxi, tátá i ñamaní nu ndo. Joo mé a ndaa ín chága cuachi nuú da ñandiquiahva yehe ndáha ndó a juú ga ndóhó —ñacachi Jesús.

<sup>12</sup> Anda já ñanducú Pilato ndá quiahva caja da janí da Jesús ña ná quee a cuhun a. Joo coó ñaxeen na Israel ta ñacasáhá na cáyuhú cóhó na nu dá já cáchí na já:

—Tá ná janí ndó Jesús jan já quéa náha ña co cúu ndó da ñehe táhan vaha xihín da cómi cuéntá sahá ñayivi ñuu Roma. Jáchi Jesús jan cáchí da ña cúu dá da cómi cuéntá sahá ñayivi ta xihín ña yóho jándihihvi da emperador, da cómi cuéntá sahá ñayivi ñuu Roma —ñacachi na.

<sup>13</sup> Tá ñaxini johó Pilato ña yóho já ñasahnda da chuun ña ná tavá na Jesús. Ta ñasacoo mé dá nu sácco da sáhdá chuun vechúun. Mé nu sácco da cán naní a Gabata tuhun hebreo. Mé tuhun yóho cuni cachi a nuú ñaquihvi piso yuu. <sup>14</sup> Nayaha tóco

ndihi ña yóho tá cámaní in quivi coo víco pascua. Ta cúu á tátuhun caxivi ta nandaca ndichi Pilato já nacachi da já xihín na Israel cán:

—Jan ín da cúu rey nu ndo —nacachi da.

<sup>15</sup> Joo na cán nacasáhá tucu na cáyuhú cóhó na nu dá já cáhí na já:

—Cahní ndó da. Ná quivi da. Cata caa ndó da ndica crúxu —cáhí na.

Já nacachi Pilato já xihín ná:

—Ama ná cata caa ri da cúu rey nu ndó ndica crúxu —nacachi Pilato.

Anda já nacachi na sacuahá nuú jutú cán já:

—Da cómí cuéntá sahá ñuu Roma, in túhún da cán cuití va cúu rey nuú nde —nacachi na cán.

<sup>16</sup> Anda já nandiquiahva Pilato Jesús nu ná ña ná cañehe na a cuhun na cata caa na a ndica crúxu.

### *Cáta caa na Jesús ndica crúxu*

(Mt. 27:32-44; Mr. 15:21-32; Lc. 23:26-43)

<sup>17</sup> Nachinúu na in crúxu joco Jesús já ndójo a do cuahan chí xiqui naní a nu ndúu lásá yiquí jíní ndii. Ta cáhí na Gólgota xihín á tuhun hebreo. <sup>18</sup> Ta cán nacata caa na a ndica crúxu ta nacata caa ri na inga ivi da xihín á, in in da in in xoo jín á. Ta tácaa Jesús mahñú ndíví da cán. <sup>19</sup> Ta nasahnda Pilato chuun ña ná cuhun java na chítivi ndaa na in tabla ndica crúxu yati jini Jesús cán. Ta nu tabla cán nacahyí na: “Da yóho cúu Jesús, da ñuu Nazaret, da cúu rey nuú na Israel.” <sup>20</sup> Ta cuahá na Israel nacahvi na ña nacahyí cán jáchi yati yuhú ñuu Jerusalén nacata caa na Jesús. Ta ña ndáa nu tabla cán nacahyí na ña tuhun hebreo ña cáhan na Israel xihín tuhun latín ña cáhan na ñuu Roma xihín tuhun griego ña cáhan na nación Grecia. <sup>21</sup> Ta tá naxini na sacuahá nuú jutú cán ña yóho já nacachi na já xihín Pilato:

—A cáhyí toho ndó ña cúu da jan rey nuú na Israel. Vaha chága ná cahyí ndó ña cáhí da cúu dá rey nuú na Israel —nacachi na.

<sup>22</sup> Já nanducú ñehe Pilato tuhun nu ná já nacachi da já xihín ná:

—Coo tá coo ña sa nasacu u ta a tává toho i ña —nacachi da.

<sup>23</sup> Tá nandihí nacata caa mé soldado Jesús ndica crúxu, já natiin da jahmá a ta nandicahnda nu táhan ndicomí dá ña. Ta cotó ndée a cúu á ña nacavaha ní na ña jini á ta janda sahá ta coo nacucu na ña. Ta natiin da ña <sup>24</sup> ta já nacachi xihín táhan da já:

—Ná a jácuachí toho í jáhma jan já ná coo ní yí va. Ña cuu caja í quea cajiquí yo sahá ta ndá da ná quee vaha, da cán ndiquehe jáhma jan —nacachi xihín táhan da cán.

Nacaja da ña yóho já ná xinú coo nuú tuhun Ndióxi nacahyí sanahá tá nacachi a já: “Nandicahnda nu táhan mé ná jahmá i ta já nasajiquí na sahá cotó ndée e ta da naquee vaha cán nandiquehe da ña.” Quiahva já nacahyí tuhun Ndióxi sanahá. Ta quiahva já nacaja soldado cán xihín jáhma á.

<sup>25</sup> Ta jini mé crúxu nuú nacata caa na Jesús cán nasandichi náná a xihín quihvi ña cán xihín María, ña cúu ñajihí Cleofas xihín María, ña ñuu Magdala. <sup>26</sup> Tá naxini Jesús ña cándichi náná a saha crúxu ta tá naxini a cándichi yehe, da naní Juan, da xica tuun xihín á, da quihvi ndivaha ini mé á chí já nacachi a já xihín náná a:

—Da jan cúu tátuhun jahyí ndó viti —nacachi Jesús.

<sup>27</sup> Tá nandihí já nacachi a já xihín mé da xica tuun xihín a cán:

—Candaa vaha ña jáchi cúu ña tátuhun nánún viti —nacachi Jesús.

Tá naxini johó da ña yóho já nandiquehe vaha da María cán ndáa da ña tátuhun náná da.

### *Tá naxihí Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Tá sa nayaha tóco ndihí ña yóho já sa xini vaha Jesús ña sa naxinu coo tóco ndihí ña nacachi tuhun Ndióxi coo. Ta naxinu coo nuú ña nacahyí nuú tuhun Ndióxi sahá Jesús sanahá tá nacachi a já:

—Íchi ini i ticuí.

<sup>29</sup> Mé cán nasandichi in tindojo nachutú jini xihín vino iyá. Ta najándaxi na in ticoto xihín vino cán já nacató da ña nuú in yito naní hisopo ta já nachitivi na ña yati yuhu

Jesús ña ná coho a do. <sup>30</sup> Anda já naxihi Jesús mé vino iyá cán já nacachi a já:

—Sa nayaha tóco ndihi ñaha ña ndítahan ndoho i —nacachi a.

Já nanditoo jico á. Naxihi a.

*Tá natuxú na in yíto tátuhun póyá yicá ndíca Jesús*

<sup>31</sup> Ta ndaja coo nasahan na Israel cán naxica na ñamaní nu Pilato ña ná cahnda da chuun ña ná cahnu da lásá sahá da tácaa ndica crúxu cán já ná quivi yachi da. Jáchi coo naxeen na Israel cán ña ná taca ndii ndica crúxu inga quivi itaan. Jáchi cacuu a quivi ndiquehe ndée ná ta cacuu a in quivi yii ndivaha nu ná. <sup>32</sup> Sahá ña cán quea naquee soldado nasahan da já nasahnu da lásá sahá ndíví da tácaa ndica crúxu jín Jesús cán. <sup>33</sup> Joo tá nacayati da nu Jesús ña cahnu da lásá sahá, naxini da ña sa naxihi va mé á sahá ña cán quea coo nasahnu da lásá sahá.

<sup>34</sup> Joo in táhan soldado cán natuxú da in yíto tátuhun póyá yicá ndíca a já nacana nii xihín ticuúí cán. <sup>35</sup> Ta yehe cúu u da ndícani ña yóho nu ndo ta naxini i ña xihín nuú i. Ta cúu á ña ndaa. Ta cándaá cáxí ini i ña cáhan i ña ndaa já ná candúsa ndó ña ndícani i nu ndo. <sup>36</sup> Jáchi tóco ndihi ña yóho nayaha já ná xinu coo nuú tuhun Ndióxi tá cáchí a já: “Ni in túhún toho lásá da, a cáhnu na”, já cáchí tuhun Ndióxi. <sup>37</sup> Ta inga tucu cáchí tuhun Ndióxi já: “Cuni tucu na da, da natuxú na póyá yicá ndíca”, já nacahyí na nuú tuhun Ndióxi sanahá.

*Tá najánduxu na Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Tá sa nayaha tóco ndihi ña yóho já naxinu coo in da naní José, da ñuu Arimateo, nu Pilato. Ta naxica da ñamaní nu Pilato ña ná ndiquehe da yiquí cuñu Jesús cañehe da cuhun da. Mé José yóho cúu dá cuénta Jesús joo coo nanaha tuhun da sahá jáchi yíhví da na Israel. Ta ndaja coo nasahan Pilato ñamaní nu dá ña ná ndiquehe da yiquí cuñu Jesús. Chí nasahan da nandiquehe da ña. <sup>39</sup> Ta jári íin in da naní Nicodemo ta ñéhe da tátuhun oco uxu kilo perfume, dó nacavaha xihín ña naní mirra ta xihín ña naní aloes.

Mé Nicodemo yóho cúu da da nasahan nandituhún xihín Jesús tá ñuu. <sup>40</sup> Ña cán quea natiin José xihín Nicodemo yiquí cuñu Jesús ta naxitivi na ña xihín in jáhma vaha ña nachindaxi da xihín mé perfume cán. Jáchi quiahva já íin costumbre na Israel cája na tá jánduxu na ndii. <sup>41</sup> Ta yati nuú nacata caa na Jesús cán nasahin nu cáa cuaha yitó cuíhi. Ta tañu yíto cán nasahin in yávi ndíca cáva nuú cuu chicaan na ndii. Mé cáva cán nasacuu a ña saá jáchi ni in ndii a ñáha chicaan na ini ña cán. <sup>42</sup> Ta cán nachicaan da yiquí cuñu Jesús jáchi yati nasahin a. Ta númi dá jáchi sa nacativi quivi ndiquehe ndée na Israel.

## 20

*Tá nanditacu tucu Jesús*

(Mt. 28:1-10; Mr. 16:1-8; Lc. 24:1-12)

<sup>1</sup> Ta tá sa nayaha mé quivi ndiquehe ndée ná ta naha vaha chá quivi domingo tá cámani queta candii já nasahan María, ña ñuu Magdala nuú nachicaan na yiquí cuñu Jesús cán. Já naxini ña ña nacaxoo yuu cáhnu nasandaji yuhú cáva cán. <sup>2</sup> Anda já naxinu ña nasahan ña nu íin Simón Pedro xihín inga da naxica tuun xihín Jesús, da quíhvi ndivaha ini mé á cán. Ta tá naxinu coo ña nu dá já nacachi ña já xihín dá:

—Natavá na yiquí cuñu xitoho i ta yo xíni ndájá nasacu na ña —nacachi ña.

<sup>3</sup> Anda já naqueta Pedro xihín inga da naxica tuun xihín Jesús cán ndáva da cuahan da nuú nasandacaan Jesús. <sup>4</sup> In nuú xínu ndíví da cuahan da. Joo nihi chága xínu da inga cán a juú ga Pedro ña cán quea jihna ñúhú da naxinu coo da nuú nandacaan Jesús cán. <sup>5</sup> Anda já nacandayi da sándehe da nuú nasandacaan Jesús cán. Já naxini da ñúhu ticoto nasatívi a cán cuití va. Joo coo nandihvi da janda mé ini cáva cán. <sup>6</sup> Anda já naxinu coo Simón Pedro ta nandihvi da cán. Ta naxini da mé ticoto nasatívi yiquí cuñu Jesús cán. <sup>7</sup> Ta naxini da ticoto ña nasatívi jini á nacaxoo jín ña cán ta nanditívi vaha ña. <sup>8</sup> Anda já nandihvi ri da inga cán, da naxinu jihna ñúhú. Ta tá naxini da ña coo yiquí cuñu Jesús ndácaan já nacandúsa da ña nanditacu tucu a. <sup>9</sup> Jáchi coo nacandaá ini



na cúu cuéntá mé á ña cáchi tuhun Ndióxi nu cáchi a ña nditacu tucu Jesús. <sup>10</sup> Tá nandihí já ndáca táhan ndíví da naxica tuun xihín Jesús cán nandicó coo da vehe nuú nasanduu na.

*Tá naxini María, ña ñuu Magdala Jesús  
(Mr. 16:9-11)*

<sup>11</sup> Ta nani nayaha tóco ndihi ña yóho, nandicó coo María mé nuú nasandacaan yiquí cuñu Jesús. Sácu ñá ñin ñá yuhú cáva cán. Ta nani sácu ñá nacandayi ñá ndicoto nihni ñá ini cáva cán. <sup>12</sup> Já naxini ñá ivi tátō Ndióxi, ña ndíxi jahmá yaa. Ndáa ndúu coo a nuú nasahin yiquí cuñu Jesús: in a nuú nasahin jiní Jesús ta inga nuú nasahin sahá. <sup>13</sup> Anda já nandaca tuhún tátō Ndióxi cán María já nacachi a já xihín ñá:

—Ndá cuéntá quéa sácun —nacachi a.

Já nacachi ñá já xihín á:

—Sácu u jáchi naquehe na yiquí cuñu Jesús, xitoho i ta coo xini ndájá nasacu na ña —nacachi ña.

<sup>14</sup> Tá jacá nacachi uun ñá ña yóho já nandicoto nihni ñá já naxini ñá in a cándichi a nu ñá já va joo coo nandicuni ñá ña cúu á Jesús. <sup>15</sup> Anda já nandaca tuhún Jesús ña já nacachi a já xihín ñá:

—Ndá cuéntá quéa sácun. Yo já ndínducun —nacachi a.

Ta nacahan María ña mé da cáhan xihín ñá cúu dá da ndáa mé yitó cuihi cáa cán. Sahá ña cán quéa já nacachi ñá já:

—Tá natavún yiquí cuñu Jesús ña nasandacaan ini cáva yóho, caxi tuhún xihín i ndájá nasacun ña já ná cuhun i ndiquehe e ña —nacachi María.

<sup>16</sup> Anda já nacachi Jesús já xihín ña:

—María.

Anda já nacava nuu ñá já nandicuni ña Jesús ta nacahan ña tuhun hebreo xihín á já nacachi ñá já:

—Raboni —mé tuhun yóho cuni cachi a maestro.

<sup>17</sup> Já nacachi Jesús já xihín ña:

—A tীন tuún yehe. Jáchi a ñáha toho ndindita i cuhun i indiví nu ñin Ndióxi, tátá i. Joo cuáhán caxi tuhún xihín na cúu cuéntá mí i ña cuhun i nu ñin Ndióxi, tátá i, mé a cúu tátá mé ndó viti. Cúu á Ndióxi nu mí i ta cúu ri a Ndióxi nu mé ndó —nacachi Jesús.

<sup>18</sup> Anda já ndáva María, ñá ñuu Magdala nasahan ñá nandicani ñá nuú na naxica tuun xihín Jesús cán ña naxini ñá mé á. Ta nandicani ñá ña nacachi Jesús xihín ña.

*Tá naxini na naxica tuun xihín Jesús mé á  
(Mt. 28:16-20; Mr. 16:14-18; Lc. 24:36-49)*

<sup>19</sup> Ta tá nacuaá mé quivi domingo cán já nanditútú tóco ndihi na naxica tuun xihín Jesús cán. Nuhu tuun na ini vehe ta nachicaji tuun na yéhe jáchi yíhvi na xinu na Israel cán tiin ñahá na. Ta in cuití naxinu coo Jesús nu ná ta nandaca ndichi a mahñú ndaa nu ndúu na cán. Já nacahan Ndióxi a xihín ná já nacachi a já:

—Ná coo vaha ini ndó —nacachi a.

<sup>20</sup> Ta tá nacachi a ña yóho já najánaha ndáha á xihín yicá ndicá a nu ná ña ná candaa ini na ña jivi cúu mé á. Ta nacajii ini na tá naxini na a. <sup>21</sup> Tá nandihí já nacachi tucu Jesús já xihín ná:

—Ná coo vaha ini ndó. Tá quiahva nacaja Ndióxi, tátá i nachindahá a yehe ñuyiví yóho quiahva já chindahá ri yehe va ndohó cuhun ndo caxi tuhun ndó xihín ñayivi saha mí i —nacachi Jesús.

<sup>22</sup> Anda já nativi a nu ná já nacachi a já xihín ná:

—Ndiquehe ndó ínimá yij Ndióxi. <sup>23</sup> Ta tá ná caha cáhnu ini ndó saha cuachi ñayivi, na cán cúu na sa nacaja cáhnu ini Ndióxi saha. Ta tá ná a caha cáhnu ini ndó saha cuachi, na cán cúu na coo nacaja cáhnu ini Ndióxi saha —nacachi Jesús.

*Tá naxini xihín nuu Tomás Jesús*

<sup>24</sup> In táhan da naxica tuun xihín Jesús, da naní Tomás, da cáhan na cuatí xihín cán, coo toho da nasahin xihín na cán tá naquixi Jesús nu ndúu na. <sup>25</sup> Tá nandihí já nacaxi tuhun na java cán xihín dá já nacachi na já:

—Naxini nde Jesús, xitoho í —nacachi na.

Já nanducú ñehe Tomás tuhun nu ná já nacachi da já xihín ná:

—A cándusa toho i ña cáchi ndo janda quiahva ná cuni xihín nuú i ndáha Jesús ta já jáquihvi i nducu ndahá i ini yávi nuú naquihvi clavo nacaja na cán. Ta xini ñuhú jáquihvi i nducu ndahá i ini yávi nacaa na

yicá ndícá a cán. Anda jáví candúsa i ndohó —nācachi da.

<sup>26</sup>Tá nayaha unā quivi já nandique táhan tucu nā naxica tuun xihín Jesús cán ini in vehe. Ta mé tañu já nashijin Tomás xihín ná. Ta quiahva já nashiji tuun tucu na yéhe vehe nu ñúhu nā cán. Anda já in cuití naxinu coo Jesús nu ná ta nandaca ndichi a mahñú nā cán ta nācahan Ndióxi á xihín ná já nācachi a já xihín ná:

—Ná coo vaha ini ndó —nācachi a.

<sup>27</sup>Tá nandihí já nācachi a já xihín Tomás:

—Naha quí jáquihvi nducú ndáhun ini ndahá i ta candehé ini ndahá i nuú naquihvi clavo. Ta jáquihvi nducú ndáhun yicá ndícá i já ná cunún nuú najāndicuehe nā yehe. A cáhvi ivi joho inún jáchi xíní ñúhú candúsún yehe —nācachi Jesús.

<sup>28</sup>Anda já nācatóntó Tomás já nācachi da já:

—Mé ndó cúu xitoho i ta cúu ndó Ndióxi ña cája cáhnu i —nācachi da.

<sup>29</sup>Anda já nācachi Jesús já xihín dá:

—Mé a ndaa cándúsún yehe viti jáchi naxinún yehe. Joo cajji ini ñayivi, nā cándúsa yehe vatí coó i xíní nā xihín nuu ná —nācachi Jesús.

*Cáhan Juan ndá sahá nācayí da libro yóho*

<sup>30</sup>Cuaha ndivaha java ga ña xituhún nācāja Jesús nuú nā naxica tuun xihín a cán vatí co ná cahyí a nu libro yóho. <sup>31</sup>Joo ña yóho nācayí a já ná candúsa ndó ña cúu Jesús da nāchindahá Ndióxi cacomí cuéntá sahá ñayivi, mé a cúu in túhún jini já jahyi Ndióxi. Ta sahá ña cándeé ini ndó mé á cuu catacu ndó anda ama cáa quivi.

## 21

*Naha Jesús mé á nuú usa táhan nā naxica tuun xihín a cán*

<sup>1</sup>Tá sa nayaha ña yóho já nanaha tucu Jesús mé á nuú nā naxica tuun xihín á nani nashandu na yati yuhú tañuhú naní Tiberias cán. Ta quiahva joho nashijin a. <sup>2</sup>In tañu ndúu tútú Simón Pedro xihín Tomás, da cáhan nā cuatí xihín cán. Ta jári ndúu Natanael, da ñuu Caná cuéntá Galilea cán xihín ndívi da cúu jahyi Zebedeo cán. Ta nashandu ri inga ivi ga táhan da naxica

tuun xihín Jesús. <sup>3</sup>Anda já nācahan Simón Pedro xihín tóco ndihí nā cán já nācachi da já xihín ná:

—Cuhun i tavá i tiyacá —nācachi da.

—Cuhun ri ndehe va tavá nde tiyacá xuhun —nācachi nā cán xihín dá.

Já nandihvi ndihí na ini barco cuahan nā tavá nā tiyacá. Joo coó tiyacá nātavá na mé ñuu cán. <sup>4</sup>Ta tá sa cuahan ndúcú tivi já nācanaha Jesús yuhú ticui cán. Joo nā naxica tuun xihín a cán co xíní nā ña cúu á Jesús. <sup>5</sup>Anda já nācayuhú Jesús ndāca tuhún á nā já nācachi a já xihín ná:

—Á coó toho tiyacá nātavá ndo, ñani —nācayuhú a.

—Coó mé rí ná tavá nde —nānducú ñehe na tuhun nu á.

<sup>6</sup>Anda já nācachi tucu Jesús já xihín ná:

—Jācana tucu ndó ñunu ndó chí xoo cuaha barco jan já tavá ndó ri —nācachi a.

Anda já najācana na ñunu ná cán xoo cuaha barco ta tá nandihí chí co ndéé nā tavá nā ñunu cán jáchi a juú quiahva nāchutú ndaa ña xihín tiyacá. <sup>7</sup>Anda já nādicahan yehe, da quihvi ndivaha ini mé a cán já nācachi i já xihín Pedro:

—Cúu á Jesús, xitoho í —nācachi i.

Tá naxini joho Simón Pedro ña cúu a cán Jesús já nādicandixi da cotó da jáchi coó toho cotó da ndíxi da, nduu. Tá nandihí já ndáva da cuahan da jitá da ticui chí yuhú tañuhú cán. <sup>8</sup>Tá nandihí já naxinu coo java ga nā naxica tuun xihín Jesús cán xihín barco nā chí yuhú tañuhú já ñúhu na ñunu nāchutú xihín tiyacá cán nashā nā janda yuhu. Jáchi tátuhun in ciento metro nashandichi barco nā yuhú tañuhú cán tá nātavá nā tiyacá. <sup>9</sup>Tá naxinu coo nā cán nu ñuhu já naxini na cáyi ñuhu. Ta naxini na cánúu in tiyacá yáta rí nu ñuhu cán. Ta naxini na ña sa ín pan cuxu na viti. <sup>10</sup>Anda já nācachi Jesús já xihín ná:

—Taxi ndó java tiyacá, rí jacá nātavá ndó jan —nācachi a.

<sup>11</sup>Anda já ndáva Simón Pedro nashāhan da nādaa da jata barco cán já ñúhu da ñunu, ña nāchutú ndaa xihín tiyacá nāhnu cán, naxinu da janda yuhu. Ta nashacu rí in ciento ivi jico sahun uní. Ta vatí cuaha ndivaha cúu rí coó nātahnda ñunu nuú

naşañuhu rí cán. <sup>12</sup> Anda já naçachi Jesús já xihin ná:

—Naha ndó cajini ndó —naçachi a.

Ta ni in túhún na cán coo naşahan ndeé ini na ndaça tuhún na yo cúú mé á. Jáchi sa naçandaá cáxí ini na ña cúú á Jesús, xitoho na. <sup>13</sup> Tá nandihí já nañiin Jesús pan cán já naşahnda java ña já naşahan ña nu ná. Ta quiahva já naçaja ri a xihín tiyacá va, nandicahnda ri já naşahan rí nu ná.

<sup>14</sup> Xihín ña yóho nañinu uní tañu nanaha Jesús mé á nuú na nañica tuun xihín á janda naní nanditacu tucu a.

### *Cáhan Jesús xihín Simón Pedro*

<sup>15</sup> Tá nandihí nañijini na já nandaca tuhún Jesús Simón Pedro já naçachi a já xihín dá:

—Simón, da cúú jahyi Jonás á quíhvi ini chágún yehe a juú ga na java yóho —naçachi a.

Já naçachi da cán já:

—Mé ndó cúú ndó xitoho i ta sa xini vaha ndó ña quíhvi ini i ndohó —naçachi da.

Já naçachi Jesús já xihín dá:

—Xini ñuhú candaa vahún na cúú cuéntá mí i tá quiahva ndáá vaha pastó ndicachi válí jana dá —naçachi a.

<sup>16</sup> Anda já naçachi tucu Jesús já xihín dá:

—Simón, da cúú jahyi Jonás, á quíhvi inún yehe —naçachi a.

Anda já naçachi da já xihín á:

—Mé ndó cúú ndó xitoho i ta candaá vaha ini ndó ña quíhvi ini i ndohó —naçachi da.

Já naçachi Jesús já xihín dá:

—Xini ñuhú candaa vahún na cúú cuéntá mí i tá quiahva ndáá vaha pastó ndicachi jana dá —naçachi a xihín dá.

<sup>17</sup> Anda já nandaca tuhún tucu a da táhnda uní já naçachi a já xihín dá:

—Simón, da cúú jahyi Jonás, á mé a ndaa quíhvi inún yehe —naçachi a.

Tá nañini mé Simón Pedro cán ña nañinu uní táhnda ndaca tuhún Jesús da sahá ña yóho já naçacuéha ini da já naçachi da já xihín Jesús:

—Jesús, mé ndó xini vaha ndó tóco ndihí ñaha. Mé ndó xini vaha ndó ña quíhvi ini i ndohó —naçachi da.

Já naçachi Jesús já xihín dá:

—Xini ñuhú candaa vahún na cúú cuéntá mí i tá quiahva ndáá vaha pastó ndicachi jana dá. <sup>18</sup> Jáchi mé a ndaa ná çahan i xuhún. Tá naşacuún ta yuta chá já ndicandisún jáhmún ña cúnun ta já cuahún ndá nu cúní mún cuhún. Joo tá ná cayatún já jácaún ndáhun ta inga na jácandixi yohó jáhmún. Ta já tiin ndaa na yohó cuhún xihín ná nuú co cúní mún cuhún —naçachi a.

<sup>19</sup> Xihín ña yóho cúní Jesús ndicani a nu Pedro cán ndá quiahva quivi da ña ná caha cáhnu da Ndióxi. Tá nandihí já naçachi Jesús já xihín dá:

—Xini ñuhú candicún yehe —naçachi a.

### *Ndaca tuhún Pedro saha Juan nu Jesús*

<sup>20</sup> Nani xica na cashañ na xihín Jesús já nandicoto nihni Pedro chí jata dá já nañini da táca Juan vaxi da. Mé Juan yóho cúú dá da quíhvi ndivaha ini mé Jesús. Ta sa mé Juan yóho cúú yehe, da naşahin coo jin á tá nañijini na vicó pascua. Ta cúú yehe, da nandaca tuhún mé á saha ndá da cúú da jicó túhún ñaha. <sup>21</sup> Tá nañini Pedro ndico da yóho jata ná já nandaca tuhún da Jesús já naçachi da já xihín á:

—Ta ndaja coo Juan yóho, xitoho i. Ndaja quivi da —naçachi Pedro.

<sup>22</sup> Anda já nanducú ñehe Jesús tuhun nu dá já naçachi a já xihín dá:

—Tá cúní yehe ña ná catacu da janda quiahva ná xinu coo quiví ndicó coo i ñuyiví yóho, co ndítahan toho ndihí inún sahá. Ña ndítahan cajún quea candicún yehe —naçachi a.

<sup>23</sup> Ta sahá ña naçachi Jesús ña yóho sahá ña cán quea nandicuita nuu tuhun tañu tóco ndihí na nañica tuun xihín Jesús cán. Ta cáhí na sahá i ña a quiví toho i. Joo a juú toho ña yóho quea cúní Jesús cachi a xihín ná. Ña naçachi Jesús quea tá cúní mé á catacu u janda quiahva ná ndicó coo mé á, co ndítahan toho ndihí ini Pedro sahá ña cán.

<sup>24</sup> Ta jivi mé da çahan na saha cán cúú yehe, da cáhyí tóco ndihí ña yóho. Ta tóco ndihí na xini na ña cúú á ña ndaa.

<sup>25</sup> Cuahá ndivaha nuu ñaha naçaja chága Jesús. Tá ná cacu ini i çahyí i tá in tá in ña naçaja mé á, cája i cuéntá a quéta toho

ñuyíví yóho coo libro caḥan saḥá ña naḥaja  
mé á. Já ná coo.

## Tuhun vaha nacahyí Lucas sahá ña nacaja na apóstol

*Nasahan Jesús tuhun a quixi ínima yii Ndióxi*

<sup>1</sup> Jihna sa nacahyí i in libro ña ná candoo a nu ndóhó, tá Teófilo. Mé libro cán cáhan ndihi a sahá ña nacaja Jesús ta cáhan ndihi a sahá ña najánaḥa mé á tá nacasáhá cája chúun a <sup>2</sup> ta janda tá nandaa cuahan indiví. Tá nasahiin a ñuyívi yóho ta cámani cūhun a indiví já nacaxi Jesús uxu ivi dataa cacuu da apóstol ña ná caja chúun na cuéntá mé á. Ta nacaja ínima yii Ndióxi ña ná cuu jánaḥa Jesús nuú na cán ña ndítahan nu ná caja na. <sup>3</sup> Ta tá sa naxihí Jesús ta nanditacu tucu a já naxica nuu a ñuyívi yóho tixi ivi jícó quivi. Ta nanaḥa mé á nuú ndihi na cúu apóstol já ná candaa ini na ña mé a ndaa nanditacu tucu a. Ta najánaḥa nu ná ña cūni Ndióxi cacomí a cuéntá sahá ñayivi.

<sup>4</sup> Tá cámani ndaa Jesús cūhun a indiví já nasahiin a xihín na apóstol já nasahnda mé á chuun nu ná já cáchí a já xihín ná:

—Xíní ñuhú candati ndó ñuu Jerusalén yóho anda quiahva xinu ínima yii Ndióxi cañuhu a ini ínima ndo. Jáchi nasahan tátá i tuhun a nu ndo ña quixi ínima yii mé á ndacaan ini ínima ndo ña cán quea najánaḥa i ndohó ña nacachi mé á. <sup>5</sup> Mé a ndaa najácandúta Juan ñayivi xihín ticuú joo tixi chá quivi jándicutú Ndióxi ndohó xihín ínima yii mé á —cáchí Jesús xihín ná.

*Tá nandaa Jesús cuahan indiví*

<sup>6</sup> Ta ndaja coo tá nataca na cán xihín Jesús já nacasáhá ndaca tuhún na mé á já cáchí na já xihín á:

—Jesús, xitoho nde, á viti quea quiahva ndó ñamani nuú nde, na Israel cacomí nde cuéntá saḥa mé nde já ná a cacomí ga gobierno ñuu Roma cuéntá sahá nde —nacachi na xihín á.

<sup>7</sup> Anda já nanducú ñehe Jesús tuhun nu ná já nacachi a já:

—Co ndítahan toho nu ndóhó candaa ini ndó ndá quivi caja Ndióxi, tátá yo ña jan.

Jáchi in tuhún mé á cuití va quea xini a ndá quivi yaha ña sáhdá mé á coo. <sup>8</sup> Joo ndítahan nu ndó candati ndó yóho anda quiahva ná quixi ínima yii Ndióxi cañuhu a ini ndó. Já ná nduu ndeé ini ndó ña ná cuu jánaḥa ndó nuú ñayivi sahá i. Anda já ndítahan nu mé ndó cahan ndó sahá i ñuu Jerusalén yóho xihín estado Judea xihín estado Samaria. Anda já quee ndó cūhun ndó cuahá ñuu xicá níi cúu ñuyívi jánaḥa ndó nuú ñayivi cán saḥa mí i —nacachi Jesús xihín ná.

<sup>9</sup> Tá nandihí nacahan Jesús ña yóho xihín ná ta nani sádehé cáxi na cán nu Jesús ndíta na já nandaa cuahan indiví. Já naxinu in vico nachijahvi ñahá a chí coo naxini ga na mé á. <sup>10</sup> Ta nani ndíta na cán sádehé na nuú nandaa Jesús cuahan indiví já nandicoto nihni na ta sa ndíta ivi taa ndíxi jahmá yaa jin ná. <sup>11</sup> Já nacachi da já xihín ná:

—Taa Galilea, ndávaḥa sádehé ndó indiví nuú nandaa Jesús cuahan. Jáchi tá quiahva naxini ndó nandindita cuahan indiví quiahva já cuni tucu ndó a ndicó coo tucu a ñuyívi yóho —nacachi ndívi da cán xihín ná.

*Nacaxi na Matías caja da chuun ña najándacoo Judas*

<sup>12</sup> Tá nandihí nandaa Jesús cuahan indiví já naquee na apóstol yucu nani yitó olivo cán já nandicó coo na ñuu Jerusalén. Ta mé yucu cán cándoo a tátuhun in kilómetro jatá ñuu Jerusalén. <sup>13</sup> Tá naxinu coo na ñuu Jerusalén cán já nandaa na vehe cánúu jícó jáchi mé vehe cán nasanduu too na. Tóco ndihí na nasanduu cán nasacuu Pedro xihín Jacobo xihín Juan xihín Andrés xihín Felipe xihín Tomás xihín Bartolomé xihín Mateo xihín Jacobo, da cúu jahyi Alfeo xihín Simón, da naxica cuéntá cananista xihín Judas, da cúu ñani Jacobo. <sup>14</sup> Níi tiempo nasataca ndíhuxu in na yóho xihín ñani Jesús xihín María, náná Jesús xihín java ga najihí cacá tahví na nu Ndióxi.

<sup>15</sup> Ta ndaja coo in quivi nataca tátuhun in ciento oco na cúu cuéntá Jesús. Já nacandichí Pedro mahñú na cán ta já nacachi da já xihín ná:

16 —Candehé ndo, ñani i, na cúu cuéntá Jesús. Nasahiin tá iin nacachi ínima yii Ndióxi coo. Jáchí nacaja Ndióxi ña ná cahan rey David ini tuhun mé á saha Judas, da nasandaca na natiin Jesús ñéhe na a cuahan na vecaa. 17 Mé Judas yóho nasacuu da da naxica xihin yo ta nacaja chúun da cuéntá Jesús xihin yo. 18 Joo najicó tühún da Jesús ta naquehe da jiuhún sahá ña núu nacaja da. Ta xihín jiuhún cán naxeen da in ñúhu. Ta tá nandihí já najándicava ndayi da mé dá ta nandata tixi da chí nacana cuyu ndihí xiti da. 19 Tá nañehé ñayivi ñuu Jerusalén tuhun ña sa naxihí Judas cán já nachinúu na quiví mé ñúhu naxeen da cán cananí a Acéldama. Mé tuhun cán cúni cachi a yójo nuú naxita nii jáchí cán naxita nii Judas tá naxihí da. 20 Jáchí já cáhí in Salmo ndácaan ini libro yii Ndióxi tá nacahan saha Judas já cáhí a já:

Ná candoo ndáha vehe da, ta ni in ñayivi ná a canduu ga ini a. Ta sa mé cán ndácaan inga tucu Salmo ta cáhí a:

Inga tucu da ná ndicojo chuun nasandojo da, cáhí tuhun Ndióxi.

21 Anda já nacachi tucu Pedro já xihin ná: —Tañu mí yóho ndúu java na naxica nuu xihin yo tá naxica í xihin Jesús, xitoho í nani nasahiin a ñuyiví yóho. 22 Java na yóho nasanduu na xihin yo tá najácandúta Juan Jesús xihín ticuiví ta nasanduu na xihin yo janda quiahva nandaa Jesús cuahan indiví. Ña cán quéa ndítahan nu yó caxí in da tañu na yóho já ná caca da xihin yo caxi tuhun da nuú ñayivi ña nanditacu tucu Jesús — nacachi Pedro xihín na cán.

23 Sahá ña cán quéa nacana ivi da tañu ñayivi cán. Anda já nasacu ini na caxi na in da tañu ndiví da. In da nacana na cán nasananí José ta naní tucu da Barsabás ta inga tucu quiví dá nasacuu Justo. Ta da inga cán nasananí Matías. 24 Anda já naxica tahví ndihí na cán nu Ndióxi já nacachi na já:

—Tátá Ndióxi, sa xini ndó ndía cáhvi ini tóco ndihí ñayivi. Ña cán quéa caja ndó ñamani jána ndó nuú nde ndá da cúu da sa nacaxi ndó 25 cacuu apóstol ña ná

caja da mé chuun ña najándacoo Judas. Mé Judas nacaja da cuachi cáhnu nu ndo ña cán quéa viti ín da nu ndítahan nu dá coo da — nacachi na xihin Ndióxi.

26 Anda já nasajiquí na ndá da cuu quee vaha. Naquee vaha Matías chí nandique táhan da xihín na uxu in apóstol cuéntá Jesús cán.

## 2

*Tá nanuu ínima yii Ndióxi jatá na cúu cuéntá Jesús*

1 Tá naxinu coo quiví coo víco Pentecostés já nanditaca ndihí na cúu cuéntá Jesús ndúu tútú na ini in vehe. 2 In cuití naxini johó na in a níhi naquixi a chí indiví. Tá quiahva níhi xícó tachí ndeé quiahva já níhi a naquixi a. Ta já naxini johó ndihí na ndúu coo vehe cán ña. 3 Anda já naxini na in ñaha ña cáa tá quiahva cáa ñuhú ita. Anda já nanditahnda ña nasandójó a jiní in in na cán. 4 Ta nachutú ndaa ínima ndihí na cán xihin ínima yii Ndióxi. Chí nacasáhá nandicahan na tuhun, ña coó nasatiahva na jáchí já nacaja ínima yii Ndióxi.

5 Mé tiempo já nasanduu java na Israel, na cája cáhnu Ndióxi ñuu Jerusalén cán. Mé na Israel yóho naquixi na ndijáa ñuu jatá ñuyiví. 6 Tá naxini johó na cán ña níhi xójo cúu cán já nacasáhá ndítaca na. Joo tá naxinu na nu ndúu na cúu cuéntá Jesús cán já nacatontó na jáchí naxini johó na cahan na cúu cuéntá Jesús cán mé tuhun cahan na vatí coo cúu ná na ñuu na. 7 Chí nacatontó ndivaha na cán já nacasáhá ndítuhún xihin táhan na já cáhí na já:

—Tóco ndihí na cúu cuéntá Jesús yóho cúu ná na naquixi estado Galilea. 8 Ndá cuéntá quéa cahan na tuhun cahan in in mí. 9 Jáchí sa jín sa jín ñuu naquixi mí. Java í naquixi nación Partia ta java í naquixi nación Media ta java í naquixi nación Elam ta java í naquixi nación Mesopotamia ta java í naquixi estado Judea ta java í naquixi estado Capadocia ta java í naquixi estado Ponto ta java í naquixi estado Asia 10 ta java í naquixi estado Frigia ta java í naquixi estado Panfilia ta java í naquixi nación Egipto ta java í naquixi ñuu cuéntá Africa, ña xicá chága a juú ga ñuu Cirene. Ta

ndúu java ñayivi ñaquixi ñuu Roma yóho. Ta java na cán cúu ná na ñaquixi chichi Israel ta java na co cúu ná na ñaquixi chichi Israel joo cája cáhnu na Ndióxi, mé a cája cáhnu mí. <sup>11</sup> Ta sa mé yóho ndúu java ñayivi ñaquixi nación Creta xihin nación Arabia. Ta xini johu ndihí cáhan na cúu cuénta Jesús yóho tuhun cáhan in in mí. Ta cáhan na sahá ñaha xituhún cája Ndióxi xihin ná — cáchi ndihi na sándehe cán.

<sup>12</sup> Ta chí co xini na ndúu sándehe cán ndia cahan na sahá na cúu cuénta Jesús cán. Jáchi ñacatontó ndivaha na janda ndaca tuhun táhan mé ná ndúu na já cáchi na já:

—Ndia cuni cachi ña cája na yóho.

<sup>13</sup> Joo java na ndúu cán ñacasahá sácu ndaa ñahá na já cáchi na já:

—Na xihí va cúu na yóho.

### *Cáhan ndojó Pedro nuú ñayivi*

<sup>14</sup> Anda já ñacandichi Pedro xihin ndihuxu in ga na apóstol cán já ñacasahá cáhan cóhó da xihin tóco ndihi na cán já cáchi da já:

—Cuni johu vaha ndó ña cáhan i xihin ndó, ñayivi Israel, na estado Judea xihin ndihi ndó na tóho ndúu ñuu Jerusalén viti.

<sup>15</sup> Mé ndó cahan ndo ña ñaxini tóco ndihi ñayivi ndúu yóho. Joo co cúu ná na ñaxini jáchi jacá caa in naha va queá. <sup>16</sup> Ña cája na yóho quea ñacachi da naní Joel sanahá tá ñacahan da xihin ñayivi ña ndítahan coo. Mé da cán cúu da ñacachi ña cáchi Ndióxi coo já ñacachi da já:

<sup>17</sup> Tá sa ñacayati quivi ndihi saha ñuyivi yóho já cáchi Ndióxi já:

“Chindahá i ínimá yii mí i cañuhu a ini tóco ndihi ñayivi.

Ta tóco ndihi jahyi yii ndo xihin jahyi jíhi ndo caxi tuhun na xihin ndó tuhun cahan i xihin ná.

Ta na tacú cuni ndímáhnú na ñaha ñaha i nu ná.

Ta na yatá quixi sani nu ná caha i.

<sup>18</sup> Ta mé tiempo já chindahá i ínimá yii mí i ña ná cañuhu a ini na cája chúun cuénta mí i, á cúu ná taa á cúu ná ñaha.

Ta caha i ña ná cahan na sahá i nuú ñayivi.

<sup>19</sup> Ta cuahá ndivaha ña náhnu caha i indivi xihin ñuyivi ta cuni ñayivi ña.

Cuni na ni xihin ñúhu cáyi xihin ñihma ña ndindita tátuhun vico núhú.

<sup>20</sup> Ta canaá nuú candii ta ndicuahá ni nuú yoo.

Ña yóho cacuu ña yaha tá sa ñacayati quivi xinu yehe, mé á cúu xitoho na caha vii i sahá ñayivi ñuyivi.

Mé quivi cán cacuu a in quivi cáhnu ndivaha.

<sup>21</sup> Joo cacu ndaa ínimá tóco ndihi na ná ndicahán quivi i”, ñacachi Ndióxi ini libro ñacahyí Joel sanahá — ñacachi Pedro.

<sup>22</sup> Anda já ñacachi tucu Pedro já:

—Cuni johu vaha ndó tuhun cáhan i xihin ndó, na Israel. Jáchi cáhan i saha Jesús, mé a ñaquixi ñuu Nazaret. Jáchi ñatahan ini Ndióxi xihin tóco ndihi ñaha ñacaja mé Jesús. Ta ñaxini xihin nuú ndó ña náhnu xihin ña xituhún ñacaja mé á nu ndo xihin ndée ñasahan Ndióxi nu a. Ta sa cánda vaha ini mé ndó ña yóho. <sup>23</sup> Joo tá ñatiin ndó Jesús já najáxinu coo ndó ña ñasacu ini Ndióxi coo sanahá ndivaha. Ta mé ndó ñandiquiahva ndó Jesús ndáha taa quini. Ta ñacaja ndó ña ná cata caa na Jesús ndica crúxu. <sup>24</sup> Joo najánditacu Ndióxi Jesús já ná a cóo a nu ndóho ini na sa ñaxihí jáchi ni in ñaha a cúu caha ña ná coo Jesucristo nu ndúu na sa ñaxihí. <sup>25</sup> Sanahá ndivaha ñacahyí rey David sahá Jesús já ñacachi da já:

Xini vaha i ña ní tiempo íin ndó xitoho i, xihin i,

ta íin ndó xoo cuáha i chindeé ndó yehe saha ña cán quea co yíhví toho i.

<sup>26</sup> Sahá ña cán quea ñacajii ndivaha ini i,

ta ñacahan vatá ndivaha i.

Jáchi vatí ná quivi i cacuu u ndii joo coo vaha ini i.

<sup>27</sup> Jáchi caha ndó ña ná nditacu tucu u já ná a cándo nahá ínimá i nu ndúu ínimá ndii.

Ta ni a quiahva toho ndó ñamaní tahyi yiquí cuñu i jáchi cúu u jahyi mání ndo.

<sup>28</sup> Najána ña ndó nuú i ndaja caha i ña cuni ndo.

Jáchutú ndaa ndó ínimá i xihin ña cájii ini i jáchi já íin va ndó xihin i, ñacahyí

David sanahá ndivaha —cáchi Pedro xihín na ndúu cán.

<sup>29</sup> Anda já nacachi tucu Pedro já xihín ná: —Candehé ndo, ñani i ná ndicani i nu ndo ña cúní cachi ña yóho. Sa cándaá cáxí iní ña sa naxihí David, da nasacuu tásáhnú jícó yo. Ta najánduxu na da ta ín yíi va nuú najánduxu na da. <sup>30</sup> Nacachi David ña yóho jáchi nasacuu da profeta. Jáchi mé Ndióxi quéa nasahan tuhun a nu dá ta nacachi a xihín dá ña quixi Jesucristo chichi mé dá ta nacachi a ña cacomí mé Jesucristo cán cuéntá sahá ñayivi Israel. <sup>31</sup> Sa nacandaá ini David ña caja Ndióxi chí nuu sahá ña cán quéa nacachi da xihín ñayivi ña nditacu tucu Jesús tá nandihí quivi a. Ta nacaxi tuhun David nu ná ña a jándicoo toho Ndióxi ínima Jesús nu ndúu ínima ndii ta ni a quiahva toho mé á ñamaní tahyi yiquí cuñu mé Jesús cán. <sup>32</sup> Ta viti cándaá iní ña naxinu tuhun nacahyi David jáchi naxini tóco ndihí ña najánditacu Ndióxi Jesús. <sup>33</sup> Ta najándindita cáhnú ndivaha Ndióxi Jesús ta nasacu a ña xoo cuáha mé á. Ta nasahan Ndióxi ínima yíi mé á nu Jesús jáchi ña yóho cúu tuhun nasahan Ndióxi sanahá. Ta tóco ndihí ña naxini ndó xihín nuu ndo ta naxini johó ndó yóho cúu á ña naquixi cuéntá Ndióxi. <sup>34</sup> Ta sa xíni yo ña co cáhan David saha mé dá jáchi a juú David cúu da nandaá indiví, vaha. Sa mé David cúu dá da nacachi tuhun yóho:

Nacachi Ndióxi xihín xitoho i:  
“Naha xoo cuáha jíin i cacoún,

<sup>35</sup> janda quiahva ná cacu u na cándají yohó tixi sahún”, nacachi Ndióxi —já nacahyi David sanahá.

<sup>36</sup> Anda já nacachi tucu Pedro já:

—Ña cán quéa cúní ña ná candaa ini tóco ndihí ndó ña cáhan i xihín ndó, na Israel. Mé Jesús, mé a nacata caa ndó ndica crúxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nachindahá mé á cacomí cuéntá sahá ñayivi —nacachi Pedro xihín na ndúu cán.

<sup>37</sup> Tá naxini johó na cán ña nacachi Pedro xihín ná ivi laá natahvi ini na já nacasáhá ndáca tuhún na Pedro xihín java ga na apóstol cán já cáchi na já xihín ná:

—Ndía ndítahan caja nde, ñani, na cúu cuéntá Jesús.

<sup>38</sup> Anda já nanducú ñehe Pedro tuhun nu ná já cáchi da já xihín ná:

—Xíni ñuhú ndicó coo ini ndó ta jándicoo ndó cuachi cája ndó ta candúta ndó cuéntá Jesucristo já quéa ná caja cáhnú ini Ndióxi sahá cuachi ndó ta já ñehe táhvi ndó quiahva Ndióxi ínima yíi mé á nu ndo. <sup>39</sup> Jáchi nasahan Ndióxi tuhun a caja ña jáchutú ndaa ínima ndo xihín ínima yíi mé á ta quiahva já caja ri a xihín jahyi ndó ta jári xihín na tóho, na ndúu xíca. Jáchi já caja mé á xihín ñayivi nacaxi mé á —nacachi Pedro xihín ná.

<sup>40</sup> Ta cuahá ndivaha java ga tuhun nacahan Pedro xihín ná ta já najacahan da na já nacachi da já xihín ná:

—Candee ini ndó Jesús já ná jácacu a ndohó já ná a cühun ndó indayá nuú cühun ñayivi cája cuachi —nacachi Pedro xihín ná.

<sup>41</sup> Cuahá ñayivi nandiquehe vaha na tuhun nacahan Pedro ta nacandee ini na Jesús. Ta mé quivi já nacandúta tátuhun uní mil ñayivi já nandihvi na íchi cuéntá Jesús. Ta nandique táhan na cán xihín java ga na cúu cuéntá Jesús. <sup>42</sup> Ta ndinuhu ini na jácuaha na ña jánaha na apóstol nu ná. Ta cándusa táhan tóco ndihí na ta ndítutú na xíca tahvi na nu Ndióxi. Ta níi tiempo sá taca na ndicahnda java táhan na pan cuxu na.

*Ña nacaja ñayivi tá nacasáhá na ndíco na íchi cuéntá Jesús*

<sup>43</sup> Mé tiempo já nasahan Ndióxi ñamaní nuú na apóstol cán ña ná cuu caja na cuahá ndivaha ñaha xituhún xihín cuahá ña náhnú ndivaha ta chí cántontó tóco ndihí ñayivi tá xíni na ña yóho. <sup>44</sup> Ta tóco ndihí na cúu cuéntá Jesús cán in nanduu ndihí na ta ndicahnda java ñaha nu táhan na. <sup>45</sup> Ta jícó na ñaha cómi na ta já ndicahnda na jiuhún na nuú na ndímaní ñaha nuu. <sup>46</sup> Ta ndijáá níi quivi ndítutú na cája cáhnú na Ndióxi veñuhu cáhnú ndácaan ñuu Jerusalén cán. Ta tá ndíque táhan na vehe já ndicahnda java táhan na pan cuxu na ta cávatá ndivaha xihín táhan na cája na já. Ta ni in na co ndíñehe jícó mé. <sup>47</sup> Nacaja cáhnú na Ndióxi ta tóco ndihí ñayivi ndúu ñuu Jerusalén ín vaha ini na xihín na cán. Ta nini quivi nacaja Ndióxi ña nandicuahá na cúu



cuéntá Jesús, mé na jácacu ndaa Ndióxi ínima.

### 3

#### *Ndivaha in taa réncō cāja Pedro*

<sup>1</sup> In quiví tátuhun cāa uní sahini cuahan Pedro xihín Juan veñuhu cáhnu Jerusalén cán. Mé hora já táca ñayivi cuahan na veñuhu caça tahví na nu Ndióxi. <sup>2</sup> Ta mé yuyéhé ñuhu cán ín coo ín da naxihí tuchu saha. Ta janda tá nacacu da cáa da já. Ta ndijáá ní quiví ñéhe na da cuahan da yuyéhé ñuhu cáhnu naní yéhé ñúchí. Ta cán ín coo da sáti da nuú ñayivi ndíhvi ini veñuhu cán. <sup>3</sup> Ta tá naxini da réncō cán cuahan quíhvi Pedro xihín Juan ini veñuhu cán já nacata ñee da ndáha dá nu ná sáti da. <sup>4</sup> Anda já nandicoto nihni Pedro xihín Juan nuú da réncō cán já nacachi Pedro já xihín dá:

—Candehé nuú nde.

<sup>5</sup> Anda já nasandehé cáxi da cán nu ná jáchi cáhán da quiahva na jiuhún nu dá.

<sup>6</sup> Joo já nacachi Pedro xihín dá já:

—Coó toho jiuhún i quiahva i nuun joo ña ín nuú i ña cán quiahva i nuun. Ín ndivaha ndée Jesucristo, mé á ñuu Nazaret sahá ña cán quéa sáhdá i chuun nuun ña ná candichún cacún —nacachi Pedro xihín dá.

<sup>7</sup> Anda já natiin Pedro ndahá cuáha da cán ta nandíhehe da da já nacandichi da chí ivi laá nandíhvi ndée saha dá já nanditacu tuchu saha dá. <sup>8</sup> Anda já nacandita mé da nasahíin réncō saha cán já nacandichi da ta já nacasáhá da xíca da. Cándita da cāja cáhnu da Ndióxi nandíhvi da xihín ná ini veñuhu cán. <sup>9</sup> Ta tóco ndihi ñayivi ndúu cán naxini na cándita da cāja cáhnu da Ndióxi. <sup>10</sup> Ta a juú quiahva nacatóntó na ta nayíhvi na sahá ña naxini na cán. Jáchi nandicuni na da cán cúu da da nasacuu réncō, da nasahíin coo sáti yéhé ñuhu naní yéhé ñúchí cán.

#### *Cáhan ndojó Pedro nuú ñayivi ndúu yéhé ñuhu cáhnu cán*

<sup>11</sup> Mé da nasacuu taa réncō cán natiin tuun da Pedro xihín Juan ta chí coo cúni da janí ñahá da. Ta tóco ndihi ñayivi nacatóntó na xínu na cuahan na candehé na da réncō

cán nu ndíta da yéhé ñuhu, ña naní yéhé Salomón. <sup>12</sup> Tá naxini Pedro nacasáhá táca cuahá ñayivi nu ín da já nacasáhá cáchi da já xihín ná:

—Cuni johó vaha ndó, ñayivi Israel. Cátóntó ndivaha ndó sandehé ndó ndehé jáchi cáhán ndo ña nandaja vaha nde da yóho xihín ndée mé nde. Á tá coó ta cáhán ndo ña nandaja vaha nde da sahá ña ndícahán ndivaha nde Ndióxi. <sup>13</sup> Joo coo ín toho a tá quiahva cáhán ndo. Jáchi mé Ndióxi, ña nacaja cáhnu Abraham xihín Isaac xihín Jacob, tásáhnu jícó yo nandaja vaha mé á da yóho. Ta mé Ndióxi cán nacaja ña ná nduu cáhnu ndivaha Jesucristo, jahyi mé á. Joo mé ndó nandiquiahva ndó a ndahá na jutixia. Ta tá cúni Pilato janí da Jesús já nasaji nuu ndó nu dá cāja da ña. <sup>14</sup> Mé Jesús cúu á ña yii ndivaha ta ndinuhu ña ndaa cuití va cāja. Joo mé ndó nacandají ndó a ta naxíca ndó nu Pilato ña ná janí da in da sáhní ndii. <sup>15</sup> Tá nandíhi já nasahní ndó Jesús, mé a cúu cāja ña ná catacu ñayivi anda ama cáa quiví. Ta vatí naxihí a nasacuu a ndii joo najánditacu tucu Ndióxi mé á. Ta cándaa cáxi ini nde ña cáhán nde ña ndaa xihín ndo. <sup>16</sup> Ta sa mé Jesús cúu á ña cándeé ini nde. Ta sahá ña cándeé ini nde mé á sahá ña cán quéa nandivaha da cándichi nu ndó yóho. Ta xíni ndó da nandivaha yóho ta cándaa cáxi ini ndó nandíhvi ndée saha dá sahá ña cándeé cáhnu ini nde Jesús.

<sup>17</sup> Candehé ndo, ñani i. Sa xíni vaha nde viti ña tá nasahní ndó Jesús coo nacandaa ini ndó ndía nacaja ndó. Ta ni na cúu jefe ndo coo nacandaa ini na ndía nacaja na. <sup>18</sup> Joo xihín ña yóho najáxinu coo Ndióxi tuhun nasahan nu yó sanahá tá nacachi na profeta cuéntá Ndióxi ña ndítahan ndoho ini Jesucristo, mé a natchindahá Ndióxi cacomí cuéntá sahá ñayivi. <sup>19</sup> Sahá ña cán quéa xíni ñúhú jándacoo ndó cuachi cāja ndó ta ndicó coo ini ndó nu Ndióxi já ná jándoo mé á cuachi nacaja ndó. Anda já cāja Ndióxi ña ná ndivaha ini ndó. <sup>20</sup> Janda jihna nacaxi Ndióxi Jesucristo ná chindahá a ña ná quixi a ñuyíví yóho já ná cacomí a cuéntá sahá ñayivi. <sup>21</sup> Ta viti ín Jesucristo indiví ndáti a tandaa quiví cāja Ndióxi ña

nduu vií tóco ndihi ñaha. Já ndítahan coo jáchi sanahá ndivaha ñacahan Ndióxi xihín na profeta mé á sahá ña yóho ta mé ná ñacaxi tuhun na ña nuú ñayivi. <sup>22</sup> Ta ña yóho cúu tuhun ñacahan Moisés nu tásáhnú jíco yo já ñacachi da já xihín ná: “Tañu mé ndó jan cana in profeta caja Ndióxi, xitoho í tá quiahva ñacaja mé á xihín mí i. Ta coto a quéhe núu ndó ni in túhún tuhun cahan mé profeta jan xihín ndo. <sup>23</sup> Jáchi tóco ndihi ñayivi, na co cuni candúsa tuhun cahan mé profeta jan ndihi saha ná ta a ñéhe táhvi ga na coo na xihín na ñuu Ndióxi”, ñacachi Moisés sanahá —ñacachi Pedro xihín ná.

<sup>24</sup> Ta ñacahan chága Pedro xihín ná já cáchi da já xihín ná:

—Tóco ndihi na profeta ñacahan na sahá ña yáha tiempo viti. Ta profeta Samuel cúu da ñacasahá cahan sahá ña yóho. Ta tóco ndihi java ga na profeta ñaquixi tá nu ndihí ñacahan na cán saha tiempo viti. <sup>25</sup> Náchindahá Ndióxi na profeta sanahá ña ná caxi tuhun na xihín yo ña sahan Ndióxi tuhun a nu yó, na Israel. Ñacaja vaha mé á saha yo tá ñacachi a já xihín Abraham, da ñasacuu tásáhnú jíco yo: “Xihín ña caja na quixi chichún chí nuú já caja cuahá ndivaha i ñamaní xihín tóco ndihi ñayivi ndúu ndijáá ñuyívi”, ñacachi a. <sup>26</sup> Tá najánditacu Ndióxi Jesucristo, jahyi mé á jihna ñúhú ga nu mé ndó, na Israel náchindahá a ña já ná caja yii á ndohó já ná jándicoo ndó cuachi cája ndó —ñacachi Pedro.

## 4

*Ndíquehe Pedro xihín Juan saha mé dá nuú na sacuahá veñuhu*

<sup>1</sup> Ta janda cahan chá va Pedro xihín Juan nuú ñayivi cán já ñaxinu java da cúu jutú xihín da sáhdá chuun nu policia veñuhu cán. Ta tañu na yóho ñaxinu ri na saduceo. <sup>2</sup> Xójo ndivaha ini na jáchi jánahá Pedro xihín Juan nuú ñayivi ña sa ñanditacu tucu Jesucristo. Ta xihín ña yóho náha ña vaxi quivi nditacu tucu ndii. <sup>3</sup> Sahá ña cán quéa ñatiin na cán Pedro xihín Juan ta ñataán na da vecaa. Ta cán ñacandoo da janda inga quivi itaan jáchi sa ñacuaá va. <sup>4</sup> Joo cuahá ndivaha ñayivi ñacandúsa tuhun ñacahan

Pedro ta xihín ña yóho ñandicuaña chága na cúu cuéntá Jesús. Jáchi na ñacandúsa cán ñasacuu na tátuhun uhun mil dataa.

<sup>5</sup> Ta ndaja coo na cúu sacuahá nuú ñayivi Israel cán xihín na sacuahá veñuhu xihín na jánahá ley Moisés ñandique táhan ndihi na inga quivi itaan. <sup>6</sup> Ta tañu na cán ndacaan ri da naní Anás, da cúu sacuahá nuú jutú. Ta tañu na cán ñasandacaan ri Caifás xihín Juan xihín Alejandro xihín tóco ndihi na cúu na vehe na sacuahá nuú jutú cán. <sup>7</sup> Anda já ñatavá na Pedro xihín Juan vecaa. Ta ñéhe na da cuahan na nuú ñataca na cán ta ñasani ndichi na da mahñú na ñataca cán ta já ñandaca tuhún na da já cáchi na já xihín dá:

—Ndaja ñacaja ndó ñandaja vaha ndó da ñasaquihvi saha cán. Yo já ñasahan ndée nu ndó ña cúu cája ndó ña yóho —cáchi na ndaca tuhún ñahá na.

<sup>8</sup> Ta ñacaja Ndióxi ña ná ndicutú ndaa ínima Pedro xihín ínima yii Ndióxi ña cán quéa ñacasahá da ndúcú ñehe da tuhun nu ná já cáchi da já xihín ná:

—Cuni johó vaha ndó, na sacuahá ñuu xihín na sacuahá veñuhu Israel. <sup>9</sup> Ñandaca tuhún ndó ndehe ndaja ñacaja nde ñandaja vaha nde da ñasaquihvi saha cán. <sup>10</sup> Cuni johó ndó ná ndicani nde sahá ña yóho nu ndo ta já ná cuu candaá ri ini tóco ndihi ñayivi Israel ña mé dataa, da cándichi nu ndo yóho ñandivaha da xihín ndée Jesucristo, ña ñuu Nazaret. Mé a cán ñacata caa mé ndó ndica crúxu cán ta tá ñandihí já najánditacu ñahá Ndióxi. <sup>11</sup> Ta mé Jesús yóho cúu á ña cahan tuhun Ndióxi saha, ña cúu á tátuhun yuu ndúhu, ña ñacandají na cávaha vehe. Ta mé ndó cúu ndó tátuhun na cávaha vehe cán, na ñacandají Jesús. Joo viti ñaxinu a cúu á tátuhun yuu ña ín chága saha ñacaja Ndióxi. <sup>12</sup> Jáchi ni in túhún toho ñayivi ndúu ñuyívi a cúu jáca cu mí ña ná a cúnun yó indayá. In túhún Jesucristo quéa náchindahá Ndióxi nu yo já ná cacu ndaa ínima yo —ñacachi Pedro xihín ná.

<sup>13</sup> Tá ñaxini na sacuahá cán ña co yíhvi Pedro ni Juan ndíta da cahan da xihín ná já ñacatónto na jáchi sa xini na ña coo tiahva da tutu. Ta ñaxini na ña cúu dá da ndahví, da ñaxica xihín Jesús. <sup>14</sup> Ta ni co ñéhe ín na sacuahá cán cachi na xihín Pedro ña cúu dá

da tuhún jáchi sa nuu táhyí na já va cándichi da nandivaha saha cán. <sup>15</sup> Anda já natavá too na da cán já nacasáhá ndítuhún xihín táhan na. <sup>16</sup> Já cáchi na já:

—Ndía caja í xihín ndíví da yóho viti jáchi sa nacandaá ini ndihi ñayivi ñuu Jerusalén ña xituhún nacaja da. Ta ni mí, a cúu cachí ña cúu á ña tuhún. <sup>17</sup> Joo cóho jáyihví yó na ná a cáhan chága na saha Jesús nuú ni in tuhún toho ga ñayivi. Jáchi co cúní yo ña ná ndicuíta nuu tuhun saha Jesús —cáchi na ndítuhún xihín táhan na.

<sup>18</sup> Anda já nacana tucu na Pedro xihín Juan ta nasahnda na chuun nu ná ña ná a jánahá ga na saha Jesús ta ni ná a cáhan ga na quívi Jesús. <sup>19</sup> Anda já nanducú ñehe Pedro xihín Juan tuhun nu ná já cáchi da já xihín ná:

—Cahvi vaha ini ndó, na sacuahá. Á cáhan ndó ña vaha chága caja nde ña sáhdá ndóhó á ña sáhdá Ndióxi nuú nde caja nde. <sup>20</sup> Jáchi a cúu jándacoo nde cahan nde sahá ña naxini nde xihín sahá ña naxini johó nde —cáchi da xihín na sacuahá cán.

<sup>21</sup> Anda já nacahan cuehe na sacuahá cán xihín dá ña ná a jánahá chága da saha Jesús. Joo tóco ndihi ñayivi cája cáhnu na Ndióxi sahá ña nacaja da cán. Ña cán queá najani ñahá na jáchi coo ñañehe íni na ndá quiahva caja xíxi na xihín dá. <sup>22</sup> Ta mé da nandivaha cán naxinu chága da nuú iví jícó cuia tá nandivaha saha da.

### *Xíca tahví na cúu cuéntá Jesús nu Ndióxi*

<sup>23</sup> Ta tá sa najani Pedro xihín Juan já naquee da cuahan da nuú nasanduu java ga na cúu cuéntá Jesús cán. Ta já nandicani na nuú na cán ña nacahan na sacuahá nuú jutú xihín na sacuahá veñuhu cán xihín ná. <sup>24</sup> Tá naxini johó java ga na cúu cuéntá Jesús cán ña ndicani da nu ná já nacasáhá tóco ndihi na xíca tahví na nu Ndióxi já cáchi na já:

—Tátá Ndióxi. Mé ndó cúu Ndióxi ña nacavaha indiví xihín ñuyíví xihín tañuhú xihín tóco ndihi ñaha. <sup>25</sup> Sanahá ndivaha tá najándicutú ndaa ndó ínimá David, tásáhnu jícó nde xihín ínimá yíi mé ndó já nacachi ndó já xihín dá ta já nacahyí da:

Ndá cuéntá queá ndívaá nahá ñayivi ndúu ñuyíví ta ndinuhu ña núu cáhvi ini na caja na.

<sup>26</sup> Tóco ndihi da cómi cuéntá sahá ñayivi ndúu ñuyíví xihín da sáhdá chuun nuú ñuu nandique táhan na cani táhan na xihín Ndióxi.

Ta cani táhan na xihín mé a nacaxi Ndióxi chindahá a cacomi cuéntá sahá ñayivi, nacachi ndó sanahá.

<sup>27</sup> Ta mé a ndaa queá yóho jáchi ini ñuu yóho najátaca táhan Herodes xihín Poncio Pilato xihín na tóho xihín na Israel viti. Najátaca táhan na caja núu na xihín Jesús, da cúu jahyí yíi mé ndó, mé a nacaxi ndó.

<sup>28</sup> Joo xihín ña nacaja na yóho naxinu coo nuú ña nasacu ini mé ndó coo janda jihna ndivaha jáchi cuu caja ndó tóco ndihi ña cúní ndó caja ndó. <sup>29</sup> Ta viti candehe ndó, tátá Ndióxi ndá quiahva cúní na caja xíxi na xihín nde. Ta quiahva ndó ñamani ná candeé ini nde ndohó já ná a yíhví nde cahan nde tuhun vaha saha mé ndó xihín ndá nuú ñayivi nacuu jáchi mé nde cúu nde na caja chúun nu ndo. <sup>30</sup> Ta xíca tahví nde nu ndo ña ná cuu ndaja vaha nde na quíhví xihín ndée mé ndó. Ta ná caja ndó ñamani ña ná caja cuahá nde ñaha xituhún xihín cuahá ña náhnu ná cuni ñayivi ña xihín ndée Jesucristo, jahyí yíi mé ndó cája nde tóco ndihi ña yóho —cáchi na xíca tahví na nu Ndióxi.

<sup>31</sup> Tá nandihí naxíca tahví na nu Ndióxi já naquiji nuu vehe nu ndúu tútú na cán. Ta já nandicutú ndaa ínimá ndihi na cán xihín ínimá yíi Ndióxi ta nandindeé ini na cahan na tuhun Ndióxi nuú ñayivi.

### *Sáhdá java táhan na cúu cuéntá Jesús ñaha cómi na*

<sup>32</sup> Cuahá ndivaha nasacuu na cúu cuéntá Jesús cán joo chí in jiní ndíhi na. Ta ni in tuhún na coo cájihnda ñaha nu táhan jáchi cáchi na: “Ñaha tóco ndihí queá.” <sup>33</sup> Xihín ndée sahan Ndióxi nu ná cáxi tuhun na apóstol ña nanditacu tucu Jesús. Ta nacaja Ndióxi cuahá ndivaha ñamani xihín tóco ndihi na cúu cuéntá Jesús cán. <sup>34</sup> Ta ni in na coo nandimaní ñaha nuu jáchi na íin ñaha nuu tátuhun vehe á ñúhu najícó na ña ta ñehe na mé jjuhún cán <sup>35</sup> ta sahan na ña

nuú na apóstol já ná ndicahnda mé ná ña nuú in in na xini ñuhú a. <sup>36</sup> Já ñacaja in dataa naní José, da ñaquixi chichi Leví. Ta cúu dá da ñacacu in isla naní Chipre. Mé da yóho ñachinúu na apóstol quivi dá naní da Bernabé ta mé tuhun yóho cúni cachi a da sahan tuhun ndeé ini ñayivi. <sup>37</sup> Ta mé da naní Bernabé yóho najicó da ñuhu dá ta já ñasahan da mé jiuhún da cán nuú na apóstol.

## 5

### *Cája Ananías xihin Safira cuachi nu Ndióxi*

<sup>1</sup> Joo mé tañu já in da naní Ananías xihin Safira, ñájíhi da najicó na in ñundáhyi ná. <sup>2</sup> Joo coo ñandiquiahva ndihi da jiuhún ña ñacayahvi ñuhu cán nuú na apóstol. Ta ñacachi da xihin ná ña cán cúu ndihi va ña ñaquehe da saha ñuhu. Joo najándique táhan tuhun da xihin ñájíhi da ña ná candoo chá jiuhún cán nu ná. <sup>3</sup> Ta tá ñaxinu coo Ananías ndiquiahva da jiuhún cán nu Pedro já ñacachi Pedro já xihin dá:

—Ndá cuénta quéa ñasahun ñamaní nu tiñahá sacuahá ñandihvi rí ínimun, Ananías. Ta ñasacu inún jándahvún ínimayii Ndióxi ta já ñaquehún táhan jiuhún ñachahvi na sahá ñuhu jan. <sup>4</sup> Ñaha mé vún ñasacuu ñuhu jan, nduu. Ta tá najicún ña, ñaha mé vún cúu ri jiuhún jan va. Ñachavi inún cajún ña núu yóho ta xihín ña ñacajún yóho a juú nu mé nde cuití va ñacahún ña tuhún joo ñacahún ña tuhún nu Ndióxi — ñacachi Pedro xihin dá.

<sup>5</sup> Tá ñaxini joho Ananías ña ñacachi Pedro xihin dá ivi laá ñandicava da ñaxihi da sahá cuachi ñacaja da nu Ndióxi. Ta tóco ndihi na ñacandaa ini sahá ña ñayaha yóho ñayihví ndivaha na. <sup>6</sup> Anda já ñaxinu java da tacú já ñachitíví na ndii cán já ñéhe na a cuahan na jánduxu na.

<sup>7</sup> Ta tá sa ñayaha tátuhun uní hora já ñaquihvi ñájíhi Ananías nu ndácaan Pedro cán. Joo ni coo xini ña ña ñandoho yí ña. <sup>8</sup> Anda já ñandaca tuhún Pedro ña já cáchi da já xihin ña:

—Á mé a ndaa najicó ndó ñuhu ndo ta ñachahvi na tá quiahva ñacachi yíun xihín i sahá — ñacachi Pedro.

Anda já ñanducú ñéhe ña cán tuhun nu dá já cáchi ña já xihin dá:

—Ajan, quiahva já najicó nde ña.

<sup>9</sup> Anda já ñacachi Pedro já xihin ña:

—Mé ndó najándique táhan ndó tuhun ndó coto ndojó ndo ínimayii Ndióxi. Candehé. Jata vehe jan vaxi na ñasahan najánduxu yíun. Ta viti cañehe ri na yohó va cuhun na jánduxu na — ñacachi Pedro xihin ña.

<sup>10</sup> Tá ñacachi Pedro já ivi laá ñandicava ña saha dá ñaxihi ña sahá cuachi ñacaja ña. Tá ñaxinu coo da tacú, da ñasahan najánduxu yíi ña cán já ñaxini na cánduhu ri mé va ña ñaxihi ña. Anda já ñatavá na ña ta najánduxu na ña in xoo mé nuú najánduxu na yíi ña cán. <sup>11</sup> Ta tóco ndihi na cúu cuénta Jesús cán xihin tóco ndihi java ga na tá ñacandaa ini na sahá ña ñayaha yóho ñayihví ndivaha na.

### *Sahan Ndióxi ndeé nuú na apóstol já ná caja na cuahá ñaha xituhún*

<sup>12</sup> Ta ñacaja Ndióxi ña ná cuu caja na apóstol cán cuahá ñaha xituhún xihín cuahá ña náhnu tañu ñayivi cán. Ta tóco ndihi na cúu cuénta Jesús ñasataca na yéhe ñuhu cáhnu naní yéhe Salomón. <sup>13</sup> Ta java ga ñayivi, na coo ndico íchi cuénta Jesús cán yihví na catáhan na xihín na cúu cuénta Jesús yóho. Joo ndijáa java ga ñayivi cán in toni ñuhú na xihín na apóstol cán. <sup>14</sup> Ta cuahá ndivaha ñayivi ñacasahá cándusa na Ndióxi, ña viti najihí viti. <sup>15</sup> Ta sahá ña náhnu cája na apóstol yóho ñatavá na na quihvi jata véhe ta ñachinduu na na nuú xito á nu yívi mé nuú yaha Pedro cán. Já quéa tá ná yaha da vatí candahvi cuití da ná cani ndaa jata java na cán ña ná ndivaha na. <sup>16</sup> Ta cuahá ñayivi nduu java ñuu válí nduu yati cán ñéhe na na quihvi xihín na ñuhu ínimayii quini ini vaxi na ñuu Jerusalén ta cán ñandivaha ndihi na.

### *Jándoho na ini na apóstol*

<sup>17</sup> Anda já da cúu sacuahá nuú jutú cán xihín na cúu cuénta Saduceo cán ñacasahá cáhiví ndivaha ini na xihín na apóstol. <sup>18</sup> Sahá ña cán quéa ñatiin na na apóstol cán ta ñataán na na vecaa. <sup>19</sup> Joo ñuu ñaxinu

coo in táto Ndióxi ta nasuná a yéhe caa cán ta natavá a na ta já nacachi a já xihín ná:

<sup>20</sup>—Cuáhán ndó veñuhu cáhnu ta ndicani ndó nuú ñayivi saha tóco ndihi ña cája Ndióxi, mé a ndíjama ñayivi ná ndihvi na íchi cuénta mé á —nacachi a xihín ná.

<sup>21</sup>Ña cán quéa tá nativi inga quivi itaan já nandihvi na apóstol veñuhu cáhnu cán ta nacasáhá na jánaħa na nuú ñayivi cán.

Joo da cúu sacuaħa nuú jutú cán xihín tóco ndihi na sacuaħa cómi cuénta saħa nación Israel cán nasahnda na chuun nu policia cán ña ná cuħun na tavá na na apóstol ñúhu vecaa cán ná quixi na nuú na sacuaħa cán. <sup>22</sup>Joo tá naxinu coo na cúu policia vecaa cán coo nandínehe toho ñahá na. Ta já nandico coo na caxi tuhun na xihín na sacuaħa cán. <sup>23</sup>Já cáchi na já:

—Tá naxinu nde yéhe caa já naxini nde ndájí tuun a ta ndíta soldado ndáa vaha da ña. Joo tá nandihvi nde ini vecaa sándehe nde coo na apóstol cán ná ndínehe nde.

<sup>24</sup>Tá naxini johó na sacuaħa nuú jutú xihín da cúu sacuaħa nu policia veñuhu xihín java ga na sacuaħa veñuhu cán ña yóho já nacasáhá ndáca tuhún táhan na saħa ña ndítahan quixi nu ná chí nuu saħa ña cája na apóstol yóho.

<sup>25</sup>Mé hora já naxinu coo in dataa ta cáchi da já xihín ná:

—Na apóstol nataán ndó vecaa cuni cán, ndíta na jatá veñuhu jánaħa na ñayivi —nacachi da cán xihín ná.

<sup>26</sup>Anda já nasahan da cúu sacuaħa nuú policia xihín java ga policia já natiin tucu da na apóstol nasanehe da na nuú na sacuaħa veñuhu cán. Joo coo nacaja xixi na xihín ná jáchi nayihvi na ndicuıta ñayivi cuaha cán cani na na xihín yuu. <sup>27</sup>Ta tá naxinu coo na xihín na apóstol nu ndúu na sacuaħa veñuhu cán já nasacu ndichi na na nu ná. Anda já nacachi da cúu sacuaħa nuú jutú cán já xihín ná:

<sup>28</sup>—Mé nde nasahnda nde chuun nu ndó ña ná a jánaħa chága ndó saħa Jesús jan. Joo mé ndó sa najándicutú ndó Jerusalén xihín ña jánaħa ndó jan. Ta cúni ndó jácojo ndó cuachi jatá nde ña nasahní nde Jesús jan —cáchi da.

<sup>29</sup>Anda já nanducú ñehe Pedro xihín java ga na apóstol cán tuhun nu ná já cáchi na já xihín ná:

—Ndítahan nuú nde caja jihna ñúhú ga nde ña sáhdá Ndióxi nuú nde, a juú ga ña sáhdá ñayivi nuú nde caja nde. Saħa ña cán quéa coo nacaja nde ña nacachi ndó xihín nde. <sup>30</sup>Ta mé Ndióxi nacaja cáhnu tásáħnu jícó yo sanahá nacaja ña ná nditacu Jesús, mé a nasahní ndo tá nacata caa ndó a ndica crúxu. <sup>31</sup>Joo nandínehe jícó Ndióxi Jesús ta nasacu a ña xoo cuáha mé á ta nacaja ña ná nduu Jesús ña cacomí cuénta saħa ñayivi Israel ta jácaacu a na já ná a cuħun na indayá. Ta tá ná ndicó coo ini na já caja cáhnu ini Ndióxi saħa cuachi cája na. <sup>32</sup>Ta naxini xihín nuú nde tóco ndihi ña yóho ta cáhan nde saħa ta quiaħva já cáhan ínima yii Ndióxi saħa ña yóho. Ta chindahá Ndióxi ínima yii mé á cañuhu a ini na cája ña cúni mé á —cáchi na apóstol xihín na cán.

<sup>33</sup>Tá naxini johó na sacuaħa cán ña nacachi na apóstol já ivi laá naxojo ndivaha ini na xihín ná chí cúni na cahní ñahá na. <sup>34</sup>Joo ndaja coo ín tañu na cán in da sacuaħa cúu fariseo naní Gamaliel, da ín toni ñúhú ñayivi xihín. Ta cúu dá da jánaħa ley Moisés nu ná. Nacandichi da tañu na sacuaħa cán já nasahnda da chuun ña ná tavá xóo na na apóstol cán jata véhe. <sup>35</sup>Anda já nacachi da já xihín na sacuaħa cán:

—Candehé ndo, nataa Israel. Cuénta coo ndó a juú caja ndaja nacuu ndó xihín na apóstol yóho. <sup>36</sup>Xíní ñúhú ndicuhun ini ndó ña sanahá nandindita in da naní Teudas ta nacachi da xihín ñayivi ña cúu dá in da ín cuahá saħa. Ta nasandico tátuhun comi ciento taa jata dá joo nasahní na da ta tá naxihí da já nandicuıta nuu tóco ndihi ñayivi naxica jatá da cán ta xihín ña yóho nanaá saħa ndihi ña nacaja da. <sup>37</sup>Tá nandihí já nandindita inga tucu da naní Judas, da naquixi estado Galilea mé tiempo cándahvi ñayivi ñuu. Ta cuahá ndivaha ñayivi nandico jatá da cán joo nasahní ri na da cán va ta tóco ndihi na nasandico jata dá nandicuıta nuu ndihi na. <sup>38</sup>Saħa ña cán quéa jácahan i ndohó viti ná a quihvi ndáħa ndó na apóstol yóho. A quihvi nuu ndó xihín ña cája na jáchi tá jiní mé va na naquixi

ña cája na já queá ndihi va sahá ña cája na yóho. <sup>39</sup> Joo tá Ndióxi nāchindahá na caja na ña cája na yóho já queá a cúu toho caja ndó jándihi ndó sahá ña cája na. Cuéntá coo ndó jáchī tiahva náá xihín Ndióxi canī táhan ndó —cáchi Gamaliel xihín na sacuahā cān.

<sup>40</sup> Tóco ndihi na sacuahā naxini jōho nuū nācāhan da cān, nātahan ini na xihín ña nācāhan da. Anda já nācana na nā apóstol ta já nācanī na nā xihín churú. Ta nācachi na xihín ná ña ná a cāhan ga nā sahā Jesús nuū ñayivi. Anda já najanī ñahá na. <sup>41</sup> Ta cáji ndivaha ini na apóstol cān nāqueta na nu ñūhu na sacuahā cān jáchī nāsahān Ndióxi ñamanī nu ná ndoho ini na sahā Jesús. <sup>42</sup> Ta ndijáá ní quivi ini veñuhu cāhnu xihín ini vehe ñayivi cāhan na ta jānaha nā sahā Jesucristo.

## 6

### *Cáxi na usā da cacuu diácono, da chíndeé na apóstol*

<sup>1</sup> Ta mé tiempo cān ndicuahá ndivaha na cúu cuéntá Jesús. Ta ndaja coo na cāhan tuhun griego cān nācasáhā cāhan cuachī na nuū na Israel. Mé na cāhan tuhun griego yóho cáchi na ña co ndítahnda in nuū ñaha cája na Israel tá ndítahnda ña cuxu na cuāan in in quivi. <sup>2</sup> Anda já nāndaja tūtú ndihuxu ivi na apóstol cān tóco ndihi na cúu cuéntá Jesús já nācasáhā cáchi na já xihín ná:

—Ña ndítahan nu mé nde, na apóstol queá caxi tuhun nde tuhun Ndióxi nuū ñayivi. Sahá ña cān queá co yáchi nde ndicahnda nde ña cuxu ñayivi. <sup>3</sup> Sahá ña cān queá xíní ñūhú ndinducú mé ndó usā taa tañu ndó já ná caja na chuun yóho. Joo xíní ñūhú cacuu na ñayivi cāndeé ini ndó. Ta xíní ñūhú cacuu na nā tácu ini. Ta xíní ñūhú cacuu na nā nāndicutú ndaa ínima xihín ínima yīi Ndióxi já ná cuu quiahva ndó chuun yóho nu ná. <sup>4</sup> Ta ña caja mé nde queá ndinuhu ini nde caca tahví nde nu Ndióxi ta jānaha nde tuhun mé á nuū ñayivi —nācachi na apóstol xihín na cúu cuéntá Jesús cān.

<sup>5</sup> Ta tóco ndihi na nātahan ini na xihín ña nācachi na apóstol. Sahá ña cān queá nācaxi na da nanī Esteban. Mé Esteban yóho cúu dá da cāndeé cāhnu ini Ndióxi. Ta cúu dá da nāndicutú ndaa ínima xihín ínima

yīi Ndióxi. Ta nācaxi na da nanī Felipe xihín Prócoro xihín Nicanor xihín Timón xihín Parmenas xihín Nicolás, da nāquixi ñuu Antioquía. Mé Nicolás yóho nācasáhā cāndúsa da tá quiahva cāndúsa na Israel, nduu joo nāndiquehe da íchī cuéntá Jesús. <sup>6</sup> Tá nāndihi já ñéhe na cúu cuéntá Jesús cān ndihusa na nāxinu coo na nu ndúu na apóstol cān. Anda já nāxica tahví na nu Ndióxi sahā ná. Ta nāchinúu na apóstol cān ndāha ná jinī in in ndihusa na cān ña ná caja na chuun Ndióxi.

<sup>7</sup> Ta nācasáhā ndicuita nuu tuhun cāhan sahā Jesús chí nāndicuahā na cúu cuéntá Jesús ñuu Jerusalén. Ta cuahā na cúu jutū cān nācasáhā cāndeé ini na Jesús.

### *Tiin na Esteban*

<sup>8</sup> Ta ndaja coo nācaja cuahā Ndióxi ñamanī xihín in da nanī Esteban cān ta nāndicutú ndaa ínima dá xihín ínima yīi Ndióxi chí nācasáhā cāja da cuahā ñaha náhnu xihín ña xitúhún nuū ñayivi. <sup>9</sup> Joo in quivi nācasáhā java na cāni táhan yúhu ná xihín mé Esteban. Na cān cúu ná cuéntá veñuhu nanī Esclavos Libertados xihín java na ñuu Cirene xihín na ñuu Alejandría xihín na ñuu Cilicia xihín java ga na nāquixi ñuu válí ndúu estado Asia nācasáhā cāni táhan yúhu ná xihín dá. <sup>10</sup> Joo a cuū quee vaha na xihín dá jáchī nāsahān ínima yīi Ndióxi tuhun ndíchī nuū mé Esteban cān ña ná nducú ñehe da nu ná. <sup>11</sup> Anda já nāchahvi na cān java na já ná cāhan na tuhun túhún sahā Esteban. Ta nācachi na cān ña nāxini jōho na ña nācanahā Esteban xihín Moisés ta nācanahā da xihín Ndióxi. <sup>12</sup> Ta xihín ña yóho najāndivaa ná ñayivi xihín na sacuahā veñuhu xihín na jānaha ley Moisés. Ta já nātiin na da já ñéhe na da cuahān da nuū ndihi na sacuahā ñuu cān. <sup>13</sup> Ta nānducú na da cāndúsa cavaħa tuhun túhún sahā Esteban ta já nācasáhā cáchi da cāvaha ña tuhún já:

—Cānahā da yóho xihín veñuhu cāhnu Ndióxi yóho ta cānahā da xihín ley Moisés.

<sup>14</sup> Ta nāxini jōho nde cáchi da ña jātanī Jesús veñuhu cāhnu yóho, mé da nāquixi ñuu Nazaret ta ndijama da costumbre najāndacoo Moisés nu yō —cáchi da cāhan ña tuhún sahā Esteban.

<sup>15</sup> Anda já nandicoto nihni na sacuahá xihín tóco ndihi na ndúu coo cán nu Esteban já naxini na nandiyéhe nuu dá tátuhun in nuu tátó Ndióxi ndúu indiví.

## 7

*Ndíquehe Esteban saha mé dá nuú na sacuahá*

<sup>1</sup> Anda já nandaca tuhún da cúu sacuahá nuú jutú cán Esteban já nacachi da já xihín dá:

—Á ña ndaa cúu ndihi ña cáhan na yóho sahún.

<sup>2</sup> Anda já nanducú ñehe Esteban tuhun nu ná já nacachi da já:

—A juú toho ña ndaa quéa cáhan na jan sahá i. Joo cuni johó ndó ña ná cáhan i xihín ndo, na sacuahá xihín ñani i. Sanahá ndivaha tá nasahin tásáhnú jícó yo, da nasananí Abraham ñundáhyi Mesopotamia tá cámaní quee da cuhun da coo da ñuu Harán já nanaha Ndióxi mé á nu dá. Ta mé Ndióxi, xitoho í cúu á in Ndióxi cáhnú ndivaha. <sup>3</sup> Ta já nacachi a já xihín Abraham: “Jándacoo táhún ta jándacoo ñuún ta cuáhán inga ñuu nuú nahá i nuún coún”, nacachi Ndióxi xihín dá. <sup>4</sup> Anda já najándacoo Abraham ñundáhyi Caldea nuú nasahin da ta já naquee da cuahan da coo da ñuu Harán. Tá nandihí já naxihí tátá da ta janda já nasandaca Ndióxi Abraham naquixi da nu ndúu yó viti. <sup>5</sup> Joo cóo nasahan Ndióxi ñundáhyi nu dá tá nasahin da yóho. Ni in loho ñúhu cóo nasahan mé á nu dá mé tiempo cán. Joo nacachi a xihín dá ña quiahva ña nu dá chága chí nuu. Ta nacachi a xihín dá ña nduu a ñaha jahyi da tá ná quivi da vatí cámaní cacu jahyi Abraham mé tiempo já. <sup>6</sup> Ta nacachi Ndióxi xihín dá ña tóco ndihi jahyi da xihín na quixi chichi jahyi da cacuu na tátuhun na tóho jáchi canduu na inga ñuu, ña cóo cúu ñuu na. Ta cán caja chúun na joo a quéhe yahvi na sahá chuun caja na ta jándoho ndivaha na cán ini na tixi comi ciento cuia. <sup>7</sup> Nacachi tucu Ndióxi xihín dá já: “Joo jándoho i ini ñayivi, na caja xixi xihín ñayivi quixi chichún. Ta tá nandihí caja i ña ná queta na quixi chichún ta quixi na chóho já ná caja cáhnú na yehe.” <sup>8</sup> Ña yóho quéa

nacachi Ndióxi xihín Abraham tá nasahan tuhun a nu dá. Ta nacachi a xihín dá ña ná chicaan da marca yiquí cuñu da já ná a ndíndójó da sahá tuhun nasahan Ndióxi nu dá. Ta tá nacacu jahyi Abraham, da naní Isaac já nachicaan Abraham marca yiquí cuñu da tá naxinu una quivi nacacu da. Ta quiahva já nacaja ri Isaac xihín Jacob, jahyi da tá nacacu da. Ta sa mé quiahva já nacaja ri Jacob xihín uxu ivi jahyi da tá nacacu da. Ta jahyi Jacob yóho cúu tátá uxu ivi táhnda ñayivi Israel.

<sup>9</sup> Ta mé jahyi Jacob yóho nasacuu tásáhnú jícó yo joo nacahivi ini na xihín in ñani na, da naní José. Sahá ña cán quéa najicó na da cuahan da nación Egipto. Joo nasahin Ndióxi xihín dá. <sup>10</sup> Ta nachindee a da nu tóco ndihi ña nandoho ini da ta nasahan cuaha Ndióxi xini túni dá. Ta nacaja mé á ña ná tahan ini Faraón, mé rey nación Egipto cán xihín ña cája José. Sahá ña cán quéa nasacu rey cán José ña ná nduu da gobernador saha tóco ndihi nación Egipto cán. Ta nacaja rey cán ña ná cacomí da cuénta sahá vehe mé rey cán viti.

<sup>11</sup> Ta in tañu naxinu tama ndee ta nacasahá ndóho ndivaha ini tóco ndihi ñayivi ndúu nación Egipto. Ta quiahva já nandoho ri ini na ndúu ñundáhyi Canaán ta chí cóo ñehe ná ña cuxu tásáhnú jícó yo. <sup>12</sup> Joo tá nacandaa ini Jacob ña íin trigo nación Egipto já nachindahá da jahyi da, na nasacuu tásáhnú jícó yo cán já nasahan na naxeen na ña cuxu na. Ta tá nasahan na nu cuítí yóho cóo nandicuni na ñani na José cán. <sup>13</sup> Joo tá nasahan na ña chí ivi chí Egipto cán já najánaha José mé dá nuú ñani da. Ta xihín ña yóho nacandaa ini da cúu rey nación Egipto cán ña cúu José da Israel. <sup>14</sup> Anda já nasahnda José chuun ña ná cañehe na Jacob, tátá da xihín tóco ndihi na vehe da quixi na canduu na ñundáhyi Egipto cán. Ta tóco ndihi na nasahan cán nasacuu na uni jico sahún ñayivi. <sup>15</sup> Já naquee Jacob cuahan da coo da Egipto xihín tóco ndihi na vehe da. Ta sa mé cán naxihí da ta cán naxihí jahyi da, na nasacuu tásáhnú jícó yo. <sup>16</sup> Já nachicaan na ndii cán ini cáva mé Egipto cán joo tá nayaha tiempo já natavá na lásá na já ñehe na ña nasahan na nachicaan na ini cáva mé

cama santo ña naxeen Abraham nuú jahyi in da naní Hamor ñuu Siquem cán.

17 Ta tá nacayati quiví xinu coo ña nasahan Ndióxi tuhun a nu Abraham coo já nacasáhá cácu cuahá jahyi na naquixi chichi Israel. Já nandicuaḥa ná nani ndúu na Egipto cán. 18 Anda já nacasáhá inga tucu rey cómi da cuéntá sahá ñayivi nación Egipto cán ta mé rey saá cán co xini toho da José. 19 Ta mé rey yóho najándahvi da tásáhnú jícó yo cán ta nacasáhá cája xíxi da xihin ná. Ta nacaja ndúsa dá xihin ná ña ná jándacoo na jahyi na, na jacá nacacu já ná quivi na. 20 Ta mé tiempo já nacacu Moisés ta nasacuu da in tucuahá loho ña natahan ini Ndióxi xihin. Ta najácuahnu tátá náná Moisés yóho mé dá tixi uní yoo mé vehe mé na cán. 21 Joo tá naxinu quivi ndítahan nu ná jándacoo na da já nandiquehe ña cúu jahyi rey Egipto cán da já najácuahnu ña da tátuhun jahyi ña. 22 Ta najácuaha Moisés tóco ndihi ña xini na ndichí nación Egipto cán. Ta nandindichí ndivaha jini dá. Ta nacaja cuahá dá ña náhnú.

23 Ta tá naxinu Moisés ivi jico cuia já nasacu ini da coto nihni da ñani táhan da, na naquixi chichi Israel. 24 Tá nacasaá da nu ndúu na cán já naxini da cája xíxi in da Egipto xihin in da Israel. Ta cuni Moisés ndiquehe da sahá da Israel ña cán quea nasahní Moisés mé da Egipto cán. 25 Jáchi nacahán Moisés ña cuu candaa ini na Israel cán ña chindahá Ndióxi da já ná janí da na ndáha na Egipto cán. Joo coo nacandaa ini na ña yóho. 26 Ta inga quiví itaan tá naxinu coo Moisés nu ndúu na Israel cán já naxini da cáni táhan ivi da naquixi chichi Israel. Anda já nacasáhá Moisés sáhná java táhan da da cán já cáchi da já xihin ná: “Ndaja ñani mé va ndó, a váha toho cája ndó cáni táhan ndaja táhan mé va ndó.” 27 Anda já nachindahá nihni da cája xíxi xihin ñani táhan cán Moisés já nacachi da já xihin dá: “Ni in toho na coo nasahan chuun nu yóho cacuún da cacomí cuéntá sahá nde já ná cuu caja viún sahá nde. 28 Á tá quiahva nacajún nasahnún da Egipto cán cuni quiahva já cúnun cajún xihin i”, nacachi da cán xihin Moisés. 29 Tá naxini johó Moisés ña yóho já nayihví ndivaha

da chí naxinu da cuahan da chí ñundáhyi cuéntá Madián já nasahjin da cán tátuhun in da toho. Ta cán natandaha dá ta nacacu ivi jahyi ta da.

30 Ta tá sa nayaha ivi jico cuia nasahjin Moisés Madián cán já nanaha in táto Ndióxi mé á nu dá tañu in tohínú cándaha ñúhu mé yucú íchí yati yucú naní Sinaí cán. 31 Ta chí nacatóntó Moisés xihin ña naxini da nacaja Ndióxi cán. Ta tá nacayati da sándehe da ña já naxini johó da cáhan Ndióxi xihin dá já cáchi a já: 32 “Yehe cúu u Ndióxi nacaja cáhnú tásáhnú jícún Abraham xihin Isaac xihin Jacob.” Anda já nacasáhá quiji Moisés xihin ña yihví da ta coo nasahan ndeé ini da ndicoto nihni da nu cáhan Ndióxi cán. 33 Anda já nacachi tucu Ndióxi já xihin dá: “Tavá ndusa sahun jáchi yí ndivaha cúu nu sánun jan. 34 Sa naxini i ndá quiahva ndáhví ndóho ñayivi cuéntá mí i, na ndúu Egipto ta naxini johó i nu tána na sahá ña jándoho na Egipto jan ini na. Sahá ña cán quea vaxi i chindeé e na ta yóho cacuún da chindahá i cuhun Egipto já ná tavún na nu ndóho ini na cán”, nacachi Ndióxi xihin Moisés.

35 Nacandají na Israel cán Moisés ta nacachi na xihin dá: “Coo na nasacu toho yohó ña ná cacomún cuéntá sahá nde já ná cuu caja viún sahá nde.” Joo Ndióxi quea nachindahá Moisés ña ná cacuu da da cacomí cuéntá sahá na Israel cán ta já ná jacacu da na. Jáchi já nacachi táto Ndióxi xihin dá tá nanaha mé á tañu tohínú cándaha ñúhu cán. 36 Ta mé Moisés nasahan tucu da mé Egipto cán ta natavá da tóco ndihi na Israel, na nasanduu Egipto cán ta nacaja da cuahá ñaha náhnú xihin ña xituhún mé Egipto cán. Ta quiahva já nacaja da xihin tañuhú naní Tañuhú Cuahá tá nasuná da do nuú nayaha na Israel cán. Ta quiahva já nacaja da cuahá ña náhnú yucú íchí nuú naxica na ivi jico cuia cán. 37 Ta mé Moisés nacaxi tuhun da xihin ñayivi já nacachi da já xihin ná: “Tá quiahva nacaja Ndióxi nachindahá a yehe nu ndo quiahva já chindahá mé á inga da cacuu profeta nu ndo. Ta mé da cán cacuu da in da quixi chichi mé ndó”, nacachi Moisés xihin ná. 38 Ta mé Moisés nasahjin da tañu ñayivi Israel, na nasacuu tásáhnú



jícó yó tá naxica na yucú íchí cán. Ta xihin mé da cán nacahan tátō Ndióxi jini yúcu Sinaí cán. Ta cán nasahan Ndióxi ley nu dá já ná nahá da ña nu yó ña ná caca vaha í ichi cuéntá Ndióxi.

<sup>39</sup> Joo coó naxeen toho tásáhnū jícó yó cuni johō na nuú nacahan Moisés xihin ná. Ña cán quéa nacandají na da ta nacasahá ndúcú na ndicó coo na Egipto. <sup>40</sup> Ta nani nasahin Moisés jini yúcu Sinaí cán já nacachi na xihin Aarón, ñani Moisés já: “Cúni nde ña ná cavahún tñiñu yúú Ndióxi caja cáhnu nde ta ná canuú a cūhun a nuú nde. Jáchi co cándaā ini nde ndiā nandoho Moisés, da natavá ndehe nuú nasanduu nde Egipto cán.” <sup>41</sup> Anda já nacavaha na in yoco ñehe nahná chélo ta já nasahní na quítí najoco na nuú mé yoco cán. Ta nacajii ndivaha ini na xihín yoco ña nacavaha mé na cán. <sup>42</sup> Anda já najándacoo Ndióxi na já ná caja cáhnu na ndá ña cúni na tátuhun quimi xihín yoo xihín candii. Já nacachi Ndióxi ini libro nacahyí na profeta sanahá: Ndóhó, na Israel, a juú nu mí i nasahní toho ndó quítí najoco ndó tañu ivi jico cuia nani naxica nuu ndó yucú íchí jan.

<sup>43</sup> Ña nacaja ndó quéa nacaja cáhnu ndó yoco ña nacavaha mé va ndó.

Ta nacachi ndó ña cúu mé yoco cán inga ndiόxi naní Moloc.

Ta nasañehe ndó ña xihín cáti á tá cuahan ndo.

Ta nacavaha ndó inga tñiñu quimi nacachi ndó cúu á inga tucu ndiόxi naní Renfán.

Ta nasañehe ndó tñiñu cán cuahan ndó caja cáhnu ndó coó nacaja cáhnu ndó yehe.

Ña cán quéa tavá i ndohó ñundáhyi na Israel ta chindahá i ndohó in ñuu tóho xicá chága a juú ga Babilonia, nacachi Ndióxi xihín na cán —nacachi Esteban xihín na sacuahá ñuu cán.

<sup>44</sup> Já nacachi tucu Esteban já xihín ná:

—Vatí nacaja cáhnu tásáhnū jícó yó java ga yoco joo nasañehe tá nasañehe na in veñuhu ní quítí cuéntá Ndióxi tá naxica nuu na yucú íchí nuú co ndúu ñayivi cán. Jáchi janda jihna nasahnda Ndióxi chuun nu Moisés tá quiahva coo mé veñuhu ní

quítí cán ta nasahnda chuun nu dá ña ná cavaha da ña xihín ní quítí. Ta ini mé veñuhu cán nataán da yuu jáhnda nu ndáa ley nasahan Ndióxi nu dá sanahá. <sup>45</sup> Tá sa nayaha cuahá cuia já naxihí Moisés já nandiquehe da naní Josué chuun ña cañehe da cuéntá saha tásáhnū jícó yó. Ta mé tásáhnū jícó yó nacani táhan na xihín na nasanduu ñundáhyi yóho. Ta nacaja Ndióxi ña ná quee vaha na Israel xihín na cán. Natavá Ndióxi na cán já ná canduu na Israel ñundáhyi yóho ta mé tiempo já na Israel ñehe na veñuhu ní quítí cuahan na. Ta já nasahin a xihín ná janda quiví nasacomí David cuéntá sahá na Israel. <sup>46</sup> Nacaja Ndióxi cuahá ñamaní xihín David sahá ña cán quéa nasacu ini David cavaha da in nuú coo Ndióxi, mé a nacaja cáhnu Jacob sanahá. <sup>47</sup> Joo da nacavaha mé vehe Ndióxi cán nasacuu Salomón, jahyi David. <sup>48</sup> Ta sa cándaā iní ña a juú quiahva cáhnu cúu Ndióxi ta co ndácaan toho a ini veñuhu cavaha dataa. Ín in profeta ta nacahyí da ña nacachi Ndióxi já:

<sup>49</sup> Tátuhun in rey, da ín coo silleta vaha, ta chínúu da saha dá jatá in táyi loho, quiahva já ín coo i indiví ta chínúu i sahá i jata ñuyíví.

Yehe cómí i cuéntá sahá indiví xihín ñuyíví sahá ña cán quéa coó toho vehe cuu cavaha ndó coo yehe,

ta co xíní ñúhú i in vehe nu ndiquehe ndée.

<sup>50</sup> Jáchi yehe cúu Ndióxi ña nacavaha tóco ndihi ñaha, já nacachi Ndióxi sanahá —nacachi Esteban xihín ná.

<sup>51</sup> Anda já nacachi tucu Esteban já xihín ná:

—Joo mé ndó cúu ndó ñayivi sáa ini ta cúu ndó tátuhun na co xíní Ndióxi. Jáchi co cúni ndó cuni johō ndó ña cáchi Ndióxi xihín ndo ta co cúni ndó cándaā ini ndó tuhun Ndióxi. Ta ní co cúni ndó quiahva ndó ñamaní ndihvi ínima yii Ndióxi ini ínima ndo. Xíxi ndivaha nasahin ini tásáhnū jícó ndo ta quiahva já cája ri mé ndó viti. <sup>52</sup> Mé tásáhnū jícó ndo nacaja xixi ndivaha na xihín ndihi na profeta ta nasahní ñahá na mé na yóho naquixi na cáxi tuhun saha mé a quixi chí nuu, mé a co cája cuachi. Ta tá naxinu mé a cán já najicó

túhún ndó a ta nasahní ndó a. <sup>53</sup> Ta mé ndó cúú ndó na nasahan táto Ndióxi ley nuu joo co cúni ndó caja ndó ña cáchi a —nacachi Esteban xihín ná.

### *Tá nasahní na Esteban*

<sup>54</sup> Tá naxini johó na sacuaḥa cán tóco ndihi ña nacahan Esteban já naxojo ndivaha ini na xihín dá chí cáhñá nuhu na. <sup>55</sup> Joo nandicutú ndaa ínima Esteban xihín ínima yii Ndióxi ta já nandicoto nihni da indiví já naxini da ndá quiahva cáhnu cúú Ndióxi ta naxini da cándichi Jesús xoo cuáha Ndióxi. <sup>56</sup> Anda já nacachi Esteban já xihín ná:

—Candehé ndó. Núná indiví xíní i ta tívi cándichi Jesús xoo cuáha Ndióxi —nacachi Esteban xihín ná.

<sup>57</sup> Joo naxicaji tuun na cán johó na já ná a cúni johó na ña cáhan Esteban. Ta nacasáhá cáyuhú cóhó na cáti na cuahan na caní na da. <sup>58</sup> Natavá na mé Esteban yuhú ñuu ta cán nacasáhá cúun na yuu dá. Ta mé na najáchojo cuachi jata Esteban cán natavá na cotó na ta nachinduu tóo na ña nuú in da tacú naní Saulo cándichi cán. <sup>59</sup> Ta nani cúun na cán yuu Esteban já nacasáhá mé Esteban xíca tahví da nu Ndióxi já cáchi da já:

—Jesús, mé ndó cúú xitoho i. Ndiqeehe ndó ínima i viti.

<sup>60</sup> Anda já nacaxítí Esteban já nacasáhá cáyuhú cóhó da já nacachi da já:

—Jesús, xitoho i, a quéhe ndó cuéntá saḥa cuachi cája na yóho.

Tá nandihí nacachi Esteban tuhun yóho já naxihí da.

## 8

### *Cásáhá Saulo cája xíxi da xihín na cúú cuéntá Jesús*

<sup>1</sup> Ta mé hora nasahní na Esteban cándichi Saulo sándehe da ta natahan ini da xihín na nasahní Esteban cán.

Ta mé quívi cán nacasáhá na cája xíxi chága na xihín na cúú cuéntá Jesús ndúu ñuu Jerusalén cán. Chí tóco ndihi na cúú cuéntá Jesús nandicuíta nuu na ndijáa chí estado Judea xihín estado Samaria. Joo mé na apóstol cuití va coo naxita nuu toho na. Nacandoo na ñuu Jerusalén. <sup>2</sup> Ta java dataa

nandiquehe na yiquí cuñu Esteban cuahan na jánduxu na da tá quiahva ín costumbre na ta a juú quiahva nasacu na saḥa dá. <sup>3</sup> Ta mé Saulo nacaja xíxi chága da xihín na cúú cuéntá Jesús ta naquihvi da vehe tá vehe na ta ñúhu da na ta táva da na jata véhe. Coó caja toho á cúú ná taa á cúú ná ñaha ta já ñehe da na cuahan na vecaa.

### *Cáhan na cúú cuéntá Jesús tuhun vaha saḥa mé á nuú na estado Samaria*

<sup>4</sup> Ta na cúú cuéntá Jesús tá nandicuíta nuu na jata ñuu Jerusalén cán nacaxi tuhun na tuhun vaha saḥa Jesús níi cúú nu xíca na cuahan na. <sup>5</sup> Ta ndaja coo in da cúú cuéntá Jesús naní Felipe naqee da cuahan da chí in ñuu cuéntá Samaria ta cán nacasáhá da cáhan da saḥa Jesucristo nuú ñayivi. <sup>6</sup> Nacasáhá ndítútú cuahá ñayivi nu dá ta xihín ndinuhu ini na taa johó na nu cáhan da xihín ná jáchi naxini xihín nuu ná cuahá ñaha náhnu cája Felipe. <sup>7</sup> Nandaja vaha da cuahá ñayivi, na nasañuhu ínima quini ini chí cáyuhú cóhó mé ínima quini cán tá quéta ini na quíhvi cán. Ta nandaja vaha ri da cuahá na naxihí tuchu ta nandaja vaha ri da na xíca réncó. <sup>8</sup> Saḥa ña cán quéa nacajii ndivaha ini ñayivi ñuu cán xihín ña nacaja da.

<sup>9</sup> Ta mé ñuu cán nasahin in da tají naní Simón. Mé Simón yóho nasacuu da in taa, da najándahvi ñayivi Samaria cán jáchi nasacachi da ña cúú dá in da ín ndivaha saḥa. <sup>10</sup> Ta tóco ndihi mé ñayivi ñuu cán, á cúú ná na ndahví á na náhnu, nasaxini johó na xihín ndinuhu ini na nuú nasacahan da, nduu. Ta nacachi na saḥa dá ña cája da ña náhnu tá quiahva cája Ndióxi. <sup>11</sup> Ta nasacandúsa na nuú nasacahan da xihín ná jáchi tíxi cuaha tiempo najándahvi da na xihín ña tají. <sup>12</sup> Ta ndaja coo nacasáhá na cándúsa na ñuu cán tuhun vaha cáhan Felipe saḥa Jesucristo, ña cacomí Ndióxi cuéntá saḥa ná tá ná candeé ini na Jesucristo. Ta já nacasáhá na cándúta ná, taa xihín ñaha viti. <sup>13</sup> Ta janda mé Simón cán nacandúsa da ta nacandúta dá já nacasáhá xíca nuu da xihín Felipe. Ta chí catóntó da xíní da ña náhnu xihín ña xituhún cája Felipe cán.

14 Ta tá nañehé na apóstol ndúu ñuu Jerusalén cán tuhun ña nandiquehe na Samaria cán tuhun vaha cáhan saha Jesús já nachindahá na Pedro xihin Juan estado Samaria cán. 15 Ta tá naxinu coo Pedro xihin Juan estado Samaria cán já naxica tahví na nu Ndióxi sahá na cúu cuéntá Jesús cán ña ná chutú ndaa ínima ná xihin ínima yii Ndióxi. 16 Jáchi sa nacandúta ná cuéntá Jesucristo sahá ña cándéé ini na mé á joo a ñaha chutú ndaa ínima ná xihin ínima yii Ndióxi. 17 Anda já chójó Pedro xihin Juan ndáha dá jiní in in na cán nani xica tahví da nu Ndióxi já nachutú ndaa ínima ná xihin ínima yii Ndióxi.

18 Tá naxini Simón ña nachutú ínima na cúu cuéntá Jesús cán xihin ínima yii Ndióxi tá chinúu na apóstol ndáha ná jiní ná já cuni da cueen da ndée Ndióxi cán. 19 Já nacachi Simón já xihin ná:

—Quiahva ndó ndée cómi ndó jan nuú i já ná cacomí ri yehe va ña já quéa ndá na ná chinúu i ndahá i jiní ná cuu ndicutú ndaa ínima ná xihin ínima yii Ndióxi.

20 Anda já nanducú ñehe Pedro tuhun nu dá já cáchi da já xihin dá:

—Ná jándihi Ndióxi sahun xihin sahá jjuhún cómun jáchi cáhún ña cuu cueún ña jása maní uun Ndióxi nuú ñayivi. 21 Coó sahá tohún cajún ña cája nde yóho jáchi coo ín vaha toho ínimun nu Ndióxi. 22 Xíní ñúhu jándacoún ña núu cáhvi inún jan ta ndítahan caça tahvún nu Ndióxi já ná candehé mé á á caja cáhnu ini a sahun jáchi núu ndivaha cáhvi inún. 23 Jáchi náha cáxi ña cáhivi ndivaha inún. Cúu á tátuhun mé ña quini nacató a yohó chí cájún ña núu.

24 Anda já nanducú ñehe Simón tuhun nu Pedro já cáchi da já:

—Caça tahvi ndó nu Ndióxi sahá i já ná a quíxi ña núu cáchi ndó jan nuú i —nacachi da xihin ná.

25 Tá nandihí nandicani Pedro xihin Juan sahá ña nacaja Ndióxi xihin ná. Ta tá nandihí nacahan na tuhun Ndióxi nuú na cán já naquee na nasahan na cáhan na tuhun Ndióxi, ña cuu jácacu ñayivi ndijáá ñuu válí ñúhu chí estado Samaria cán. Anda jáví nandicó coo tucu na chí ñuu Jerusalén.

### *Cáhan Felipe saha Jesús nuú in da naquixi nación Etiopía*

26 Tá sa nayaha ña yóho já naxinu in táto Ndióxi nu íin Felipe estado Samaria cán ta já cáchi a já xihin dá:

—Cuáhán chí sur nu quée íchi ña quéta ñuu Jerusalén cuahan chí ñuu Gaza —nacachi táto Ndióxi xihin dá.

Ta mé íchi cán yaha nuú co ndúu ñayivi jáchi íchi ndivaha. 27 Anda já naquee Felipe cuahan da. Ta íchi nu xica da cuahan da cán nandítahan da in dataa, da naquixi nación Etiopía. Mé da Etiopía yóho cúu dá in ta cáhnu nación dá jáchi cúu dá da cómi cuéntá sahá jjuhún ña cúu ñaha ña naní Candace, ña cómi cuéntá sahá ñayivi nación Etiopía. Mé da yóho sa nasahan da ñuu Jerusalén caja cáhnu da Ndióxi. 28 Ta tá cuahan tucu da íchi ndicó coo da Etiopía cán ta nani ín coo da jata carreta já cáhvi da libro nacahyí profeta Isaías. 29 Anda já nacahan ínima yii Ndióxi xihin Felipe já nacachi a já xihin dá:

—Cativi jin carreta cuahan jan.

30 Anda já nacayati Felipe jin carreta cán ta já naxini johó da cáhvi da Etiopía cán libro Isaías. Anda já nandaca tuhún Felipe da já cáchi da já xihin dá:

—Á cándaa inún ña cáhvún jan.

31 Anda já nanducú ñehe da Etiopía cán tuhun nu Felipe já nacachi da já:

—Ndaja caja i cándaa ini i ña cáhvi i tá coo na ndicani nuú i ndía cuni cachi a —nacachi da Etiopía cán xihin Felipe.

Anda já naxica da ñamaní nu Felipe ña ná ndaa da jatá carreta da já ná cacoo da xihin dá ta ná ndicani da nu dá ña cuni cachi a. Chí ndaa Felipe carreta cán.

32 Ta cáhvi da Etiopía cán tuhun Ndióxi nu cáchi a:

Tá quiahva ñehe na in ndicachi cuahan rí quivi rí quiahva já nasañehe na da cuahan da quivi da.

Ta tá quiahva cája ndicachi tá coo ndáhyi ri nani ndíjatá na ri quiahva já nacaja mé dá jáchi coo nasuná da yúhu dá cahan da.

33 Nacaja xixi ndivaha na xihin dá ta coo nacaja ndaa na xihin dá.

Jáchi janda na naquixi chichi nuú naquixi mé dá coo nandiquehe na saha dá.

Ña ñacaja na quea ñasahní na ña já ná a cóo ga ña ñuyiví yóho, cáchí ñuhun Ndióxi nu cáhvi ña Etiopía cán.

<sup>34</sup> Anda já ñandaca ñuhun ña Etiopía cán Felipe já cáchí ña já xihín dá:

—Ta viti caja ndó ñamaní ndicani ndó nuú ña ndía cúní cachi a yóho. Á saha mé va profeta yóho cáhan ña á sahá inga va da cáhan ña.

<sup>35</sup> Anda já ñacasáhá Felipe ndicani da nuú ña cán ña ñacahyí Isaías já ñandicani da ñuhun vaaha saha Jesús nu dá. <sup>36</sup> Ta tá yáha na cuahan ña nu ñúhu ticuúí já ñacachi ña Etiopía cán já xihín Felipe:

—Yóho ñúhu ticuúí. Á cuu caja ndúta ndó yehe —ñacachi ña xihín Felipe.

<sup>37</sup> Anda já ñacachi Felipe xihín dá:

—Tá cándeé ini ndó Jesús xihín ndinuhu ini ndó ta cuu va candúta ndó.

Anda já ñanducú ñehe ña cán ñuhun nu Felipe já cáchí ña já:

—Cándúsa ña cúní Jesús Cristo in túhún ñini já jahyi Ndióxi —ñacachi ña Etiopía cán.

<sup>38</sup> Chí ñivi laá ñasahnda ña Etiopía cán chuun ña ná caní ndichi na carreta cándójó ña cuahan ña cán. Anda já ñanuu ndíví ña cuahan ña nu ñúhu ticuúí ta já ñajácandúta Felipe ña Etiopía cán. <sup>39</sup> Tá ñandihí ñaquee na ini ticuúí cán já ñehe ínimá yíí Ndióxi Felipe cuahan ña inga xoo chí cóo ñaxini táhan chága ña xihín ña Etiopía cán. Joo cájii ini ña Etiopía cán cuahan ña íchi. <sup>40</sup> Tá ñandicotó ñihni Felipe sa íin ña in ñuu naní Azoto. Ta tá ñuu tá ñuu cuahan ña cáhan ña ñuhun vaaha saha Jesús nuú ñayivi anda quiahva ñaxinu cóo ña ñuu Cesarea.

## 9

### *Ndíquehe Saulo íchi cuénta Jesús (Hch. 22:6-16; 26:12-18)*

<sup>1</sup> Joo ndaja coo ña naní Saulo cája xíxi tá cája xíxi ña xihín ña cúní cuénta Jesús. Ta sácú ini ña ndaja caja ña cahní ña ña. Ta sahá ña cúní ña jándihí ña saha ná sahá ña cán quea ñasahan ña cáhan ña xihín ña cúní sacuaña nuú jutú <sup>2</sup> ña ná quiahva na in carta nu cáhan ña ñehe dá ñamaní quihvi ña veñuhu ñúhu ñuu Damasco já ná ndinducú ña ña ndíco íchi cuénta Jesús já ná cató ña ña cañehe ña ña quixi ña cuhun ña

vecáa ñuu Jerusalén. Co cája toho a á cúní ná ña á ñaha. Chí ñaquee Saulo ñuu Jerusalén xihín mé carta. <sup>3</sup> Joo nani xíca ña cuahan ña íchi tá sa yati xinu cóo ña ñuu Damasco já in náá cuití ñandiyihvi ndaa ñúhu ña ña. Mé ñúhu yóho ñaquixi a chí indiví. <sup>4</sup> Chí ñivi laá ñandicava Saulo nu ñúhu. Anda já ñaxini joho ña cáhan in a xihín dá já cáchí ña já xihín dá:

—Saulo, Saulo. Ndá cuénta quea cája xísun xihín ña —cáchí ña xihín dá.

<sup>5</sup> Anda já ñacasáhá ndaca ñuhun Saulo já cáchí ña já:

—Yo cúní ndó, ña cáhan. Ndaja naní ndó —cáchí ña.

Anda já ñanducú ñehe a cán ñuhun nu dá já cáchí ña já xihín dá:

—Yehe cúní ña Jesús, mé ña cája xísun xihín. Ta xihín ña cájún yóho cúní á táñuhun cája xísun xihín mé vún jáchi cájún táñuhun cája in ñandiquí tá sání ndaa rí nu yócó poya ta jándicuehe rí mé va rí.

<sup>6</sup> Anda já ñacasáhá quíji Saulo xihín ña yíhví ña já ñacachi ña já:

—Cáhan ndó xihín ña, xitoho ña ndía quea cúní ndó ná caja ña —cáchí ña.

Anda já ñanducú ñehe Jesús ñuhun nu dá já cáchí ña já xihín dá:

—Cuándacoo ña cuahán quihvi ñuu Damasco. Ta ñan cáhan ña xuhun ndía ndítahan cájún —cáchí Jesús.

<sup>7</sup> Ta tóco ndihí ña cáshan xihín Saulo cán ñayihví ndivaha ña jáchi ñaxini joho ña ña cáhan cán vatí cóo ñayivi ná xini ña. <sup>8</sup> Tá ñandihí já ñandacoo Saulo nu ñúhu. Joo tá ñasuná ña nduchú nuú ña chí cóo tívi ga nuú dá. Sahá ña cán quea ñandá tñin ndaa ña ña cuahan ña chí Damasco. <sup>9</sup> Cán ñasahin cuáá ña ñivi quívi ña chí cóo ñaxixi ña ña ni ticuúí cóo ñaxihí ña.

<sup>10</sup> Mé ñuu Damasco cán ñasahin in ña cúní cuénta Jesús naní Ananías. Ta ndaja coo ñaxini ndímáhnú ña Jesús ña ñacahan xihín dá já ñacachi ña já:

—Ananías.

Anda já ñanducú ñehe ña ñuhun nu á já cáchí ña já:

—Yóho íin ña. Ndía cúní ndó, xitoho ña.

<sup>11</sup> Anda já ñacachi Jesús xihín dá:

—Candichi ña cuahán cáyé naní ña Ndacu Ndaa. Ta vehe ña naní Judas cán ndaca

tuhún sahá in da naní Saulo, da ñacacu ñuu Tarso. Viti ñúhú xíca tahví da nu Ndióxi ndácaan da. <sup>12</sup> Jáchí ñaxini ndímáhnú da ña quíhvi mún, Ananías vehe nu ndácaan da. Ta ñaxini da ña chínúún ndáhun jiní dá ta já cuu candehé tucu da —ñacachi Jesús xihín Ananías.

<sup>13</sup> Tá ñaxini johó Ananías ña yóho já ñacachi da já:

—Candehé ndo, xitoho i. Yíhvi i cuhún i jáchi sa cuahá ndivaha ñayivi ndícani nuú i sahá mé Saulo jan. Ta ndícani na nuú i ndá quiahva xíxi cája da xihín na cúu cuéntá mé á, na ndúu ñuu Jerusalén. <sup>14</sup> Ta viti vaxi da jan ñuu yóho jáchi sa ñaxica da ñamaní nuú na sacuaaha nuú jutú ña ná cuu játaca da tóco ndihi na cája cáhnu mé ndó já ná cañehe da na cuhún na vecaa —ñacachi Ananías.

<sup>15</sup> Anda já ñacachi Jesús já xihín Ananías:

—Cuáhán quíi jáchi sa ñacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómi cuéntá sahá na cán. Ta ñacaxi i da ña ná cahan da sahá i nuú na ñaquixi chichi Israel viti. <sup>16</sup> Ta jánaaha i nu dá ndá quiahva ndítahan ndoho ini da sahá i —ñacachi Jesús.

<sup>17</sup> Anda já ñaquee Ananías cuahan da vehe nu ín Saulo cán. Tá ñaxinu da cán já ñachinúu da ndáha dá jiní Saulo já ñacachi da já xihín dá:

—Ñani Saulo. Mé Jesús, xitoho í, mé á ñaxinún nuú ñaquisún íchi cán, mé á cán quéa ñachindahá yehe vaxi i já ná ndinuna nduchú núún já ná cuu candehé tucún. Ta já cúni Ndióxi ña ná ndicutú ndaa ínimun xihín ínimá yii mé á —ñacachi Ananías xihín Saulo.

<sup>18</sup> Chí ivi laá ñacasáhá cúyu ñaha tátuhun runchu tiyacá nduchú núú Saulo chí ñanuna nuú dá sáñdehé tucu da. Anda já ñasahan Saulo ñacandúta dá. <sup>19</sup> Tá ñandihí já ñaxixi da ta ñandihvi tucu ndée dá ta ñasahin tóo da chá quívi xihín na cúu cuéntá Jesús ndúu ñuu Damasco cán.

*Cáhan Saulo saha Jesús nuú ñayivi ñuu Damasco*

<sup>20</sup> Tá ñandihí já ñacasáhá Saulo jánaaha da tuhun Ndióxi ini veñuhu ta jánaaha da ña cúu Jesús in túhún jiní já jahyi Ndióxi. <sup>21</sup> Ta

tóco ndihi na táa johó nu cáhan da cátóntó na cája da. Já cáhí xihín táhan na já:

—Á a juú da yóho cúu da ñandicuita cája xíxi xihín na cúu cuéntá Jesús ñuu Jerusalén, nduu. Á a juú sa mé da yóho vaxi da tiin da na cúu cuéntá Jesús mé ñuu yóho já ná cuhún na nuú na sacuaaha nuú jutú já ná taán ñahá na vecaa —ñacachi xihín táhan na.

<sup>22</sup> Joo ví ga ví ndíndeé ini Saulo cáhan da tuhun Ndióxi. Ta náha da nuú ñayivi ña mé Jesús cúu Cristo, mé á ñachindahá Ndióxi cacomí cuéntá sahá ñayivi. Janda quiahva já najajaca da xíní túni na ñaquixi chichi Israel ndúu Damasco cán xihín tuhun cáhan da xihín ná.

*Xínu Saulo nuú java na Israel jáchi cúni na cahní na da*

<sup>23</sup> Tá sa ñayaha cuahá quívi já najándique táhan na ñaquixi chichi Israel cán tuhun na ña cahní na Saulo. <sup>24</sup> Joo ñacandaa ini Saulo ña ndúcú na cahní na da. Ta mé na ndúcú cahní Saulo cán ñasandati na ñuu ta ndiví yéhe ñuu cán janda quiahva ná queta da já ná cahní na da. <sup>25</sup> Joo in ñuu na cúu cuéntá Jesús ndúu ñuu Damasco cán ñachicaan na da ini in toyicá cáhnu já najánuu na da ndica náma cáhnu ndájí yuhú ñuu cán já ñacacu da ta ñaquee da cuahan da.

*Cuahan Saulo ñuu Jerusalén*

<sup>26</sup> Tá ñaxinu coo Saulo ñuu Jerusalén já ñanducú da ndique táhan da xihín na cúu cuéntá Jesús ndúu cán. Joo tóco ndihi na cán ñayihví na da jáchi co cándúsa na ña sa ñandiquehe da íchi cuéntá Jesús. <sup>27</sup> Joo ñandiquehe Bernabé saha Saulo. Ñasahan da najánaaha da da nuú na apóstol cán já ná ndique táhan na xihín dá. Ta ñandicani Bernabé nu ná ndaja ñasahin tá ñaxini Saulo Jesús íchi nu xíca da cuahan da chí ñuu Damasco. Ta ñandicani da ña ñacahan Jesús xihín Saulo. Ta ñandicani da ña coo ñayihví Saulo cahan da saha Jesús ñuu Damasco. <sup>28</sup> Anda já ñandiquehe na Saulo ta ñacandoo da ñuu Jerusalén. Ta ñacasáhá xíca nuu da xihín na apóstol. <sup>29</sup> Ta co yíhvi da cáhan da sahá Jesús. Ta ñanditúhún da xihín na ñaquixi chichi Israel, na cáhan tuhun griego ndúu ñuu cán. Joo mé na

cán ndúcu na ndá quiahva caja na cahni na da. <sup>30</sup> Tá nacandaa ini na cúu cuéntá Jesús ña ndúcu na cahni na Saulo já ñéhe na da cuahan da ñuu Cesarea. Anda já nachindahá na da cuanúhu dá ñuu Tarso.

<sup>31</sup> Anda já nanduu vaha ini tóco ndihi na cúu cuéntá Jesús ndúu ndijáá estado Judea xihín estado Galilea xihín estado Samaria. Ta nandindacú chága ví ini na xihín tuhun Ndióxi. Ta xihín ndinuhu ini na cája cáhnu na Ndióxi. Ta chindeé ínima yii mé á na. Ta já nandicuaḥa chága na cuahan na.

### *Ndivaha in da naní Eneas*

<sup>32</sup> Ta ndaja coo xíca nuu Pedro xíto nihni da na cúu cuéntá Jesús ndúu ñuu válí cán. Ta já nasahan ri da xíto nihni da na cúu cuéntá Jesús ndúu ñuu Lida.

<sup>33</sup> Cán nanditahan da in dataa naní Eneas, da naxihí tuchu saha. Ta tixi una cuia nasandúhu dá jáchi a cuú caca da. <sup>34</sup> Anda já naḥan Pedro xihín dá já nacachi da já:

—Eneas, viti ndája vaha Jesucristo yohó. Cuáhán ndacoo. Nditivún yivun —cáchi Pedro xihín dá.

Chí ivi laá nandacoo Eneas. <sup>35</sup> Tóco ndihi na ndúu ñuu Lida xihín na ñuu Sarón naxini na da nandivaha yóho ta anda já najándacoo na costumbre yatá nasacaja na já nandiquehe na íchi cuéntá Jesús, xitoho í.

### *Nditacu in ñañáha naní Dorcas*

<sup>36</sup> Ta ndaja coo nasahin in ñañáha, ña cúu cuéntá Jesús ñuu Jope. Ta mé ñañáha yóho naní ña Tabita ta tuhun griego cáchi na Dorcas xihín ña. Ta mé Dorcas yóho ní tiempo nandihí ini ña cája ña ñamaní xihín ñayivi ta nachindeé ña na ndahví. <sup>37</sup> Ta mé tañu já naquehe cuehe Dorcas ta naxihí ña. Ta tá sa nandicata na yiquí cuñu ña já ñéhe na ña nasahan na nachindúhu ná ña piso ninu vehe cán. <sup>38</sup> Ta yati va ñéhe táhan ñuu Jope cán xihín ñuu Lida nu íin Pedro. Tá nacandaa ini na cúu cuéntá Jesús ña íin yati Pedro já nachindahá na ivi dataa nasahan da cana da Pedro ña ná cuhun quí dá ñuu Jope cán.

<sup>39</sup> Anda já ndáca táhan Pedro cuahan da xihín ndíví dataa cán. Tá naxinu coo Pedro ñuu Jope cán já najáquihví na da ini vehe nu ndácaan mé ndii Dorcas cán.

Nataca tiyivi cuahá najihí cuaan ndúu na sácu ndivaha na saha ña naxihí cán. Ta najánaḥa na jáhma ña nacavaha Dorcas nu dá tá nasatacu ña. <sup>40</sup> Anda já nacachi Pedro xihín ndihi ñayivi ndúu cán ña ná quee tóo na jata vehe. Tá sa naqueta na cán já nacaxítí da xíca tahví da nu Ndióxi. Anda já nacasáhá sándehe da ndii cán já nacasáhá cáchi da já xihín ña:

—Cuáhán ndacoo, Tabita.

Tá nacachi da já chí ivi laá nanuna nduchú núu ña nanditacu ña. Tá naxini ña Pedro já nasacoo ña. <sup>41</sup> Anda já natiin Pedro ndáha ña já nandínehe da ña. Anda já nacana da na cúu cuéntá Jesús xihín na cuaan cán ná quihvi tucu na cán jáchi sa nanditacu ña. <sup>42</sup> Tóco ndihi ñayivi ñuu Jope cán nacandaa ini na ña nanditacu Dorcas chí cuahá ná nacandúsa na Jesús ta nandihvi na íchi cuéntá mé á. <sup>43</sup> Ta chí nacandoo Pedro cuahá quivi ñuu Jope cán. Nacandoo tóo da vehe in da naní Simón, da ndája víí ní quíti.

## 10

### *Cáhan Pedro tuhun vaha saha Jesús nu Cornelio*

<sup>1</sup> Ta ndaja coo nasahin in dataa naní Cornelio ñuu Cesarea cán. Ta mé Cornelio yóho cúu dá da cómi chuun nuú iñu ciento soldado. Ta mé táhndá soldado yóho naní a Táhndá Italiano. <sup>2</sup> Ta mé Cornelio yóho xihín tóco ndihi na vehe da cája cáhnu na Ndióxi xihín ndinuhu ini na. Ta jásá da jjuhún da ña chindeé da na naquixi chíchi Israel. Ta ní tiempo xíca tahví da nu Ndióxi. <sup>3</sup> In quivi tátuhun caa uní sahiní nani xíca tahví da nu Ndióxi já naxini cáxi táhyí da naquihvi in tátō Ndióxi ini vehe nu ndácaan da já nacachi a já xihín dá:

—Cornelio.

<sup>4</sup> Ta chí nayihví Cornelio sándehe da tátō Ndióxi cán. Anda já nacachi da já:

—Ndía cúní ndo, tátō Ndióxi.

Anda já nanducú ñehe tátō Ndióxi cán tuhun nu dá já cáchi a já xihín dá:

—Xini joho Ndióxi tá xíca tahvún nu á ta sa xini a ña nachindeé cuahún na ndahví. Ta táhán ini mé á xihín ña cájún. <sup>5</sup> Ta viti cúní Ndióxi ña ná chindahún java dataa ná cuhun da ñuu Jope já ná cana da da naní

Simón, da cáhan tucu na Pedro xihin ná quixi da. <sup>6</sup> In tóo Pedro vehe inga da naní Simón, da ndája vií níi quítí. Ta yati yuhú tañuhú in vehe da. Ta mé Pedro cán çaxi tuhun da xuhun ndíá ndítahan nuun cajún —naçachi tátō Ndióxi cán.

<sup>7</sup> Tá sa naquee tátō Ndióxi cán cuahan já naçana Cornelio ivi mozo da ta naçana da in táhan soldado, da cómi da cuéntá saha. Ta mé soldado yóho cúú dá in da cája cáhnu Ndióxi. Ta cándéé ini Cornelio da. <sup>8</sup> Ta tá nandihí nandicani Cornelio nu ndíhuni da ña naçachi tátō Ndióxi xihin dá já nachindahá ñahá da cuahan da ñuu Jope.

<sup>9</sup> Ta inga quiví itaan xica na cán cuahan na íchi ta sa yati xinu çoo na ñuu Jope. Ta cúú á tátuhun çaxivi ta mé hora já nandaa Pedro jini véhe çaçá tahví da nu Ndióxi. <sup>10</sup> A juú quiahva cuíco Pedro chí naçica da ña cuxu da. Ta nani cája ndíví na ña cuxu da já najánaça Ndióxi in ñaha nu dá. <sup>11</sup> Ta ña naçini da queá nandinuna indiví já nanuu in jáhma cáhnu tátuhun in sábaña ña ndíco ndícomí tito ta núu a vaxi ñuyiví yóho xini da. <sup>12</sup> Ta mé ini jáhma cán ñúhu tá nuú quítí, rí comí saha xihin çoo xihin laa viti. <sup>13</sup> Anda já naçini johó da cáhan in a xihin dá já naçachi a já:

—Pedro. Candichi ta cahní quítí jan casún.

<sup>14</sup> Anda já nanducú ñehe Pedro tuhun já cáchí da já:

—A cája toho i já, xitoho i jáchi ni in túhún tañu a ñaha çaxí i quítí quini tátuhun rí yóho. Jáchi cáchí ley naçahan ndó nuú nde ña ná a çaxí toho nde ri —cáchí Pedro xihin á.

<sup>15</sup> Anda já naçahan tucu a xihin dá já naçachi a já:

—Sa nandaja vií va Ndióxi rí jan. Saha ña cán queá ço ndítahan cachún ña cúú rí rí quini —cáchí a xihin dá.

<sup>16</sup> Tixi uní táhndá naçini da ña yóho naçaja Ndióxi. Anda já nandindita tucu jáhma cán cuahan chí indiví. <sup>17</sup> Chí naçasáhá ndicani ini Pedro ndíá cúní cachi ña naçini da. Ta xihin ña yóho naçinu çoo ndíhuni dataa, da nachindahá Cornelio mé vehe nu in Pedro cán. Jáchi vaxi da ndaçá tuhún da sahá vehe Simón janda quiahva nanditahan da ña. <sup>18</sup> Ndíta ndíhuni da cán

yuyéhé vehe Simón ta cáyuhú da ndáca tuhún da sahá in da naní Simón, da cáhan tucu na Pedro xihin. <sup>19</sup> Ta nani ndáca tuhún na yóho in yii va Pedro jini véhe cán ndicani ini da sahá ña naçini da naçaja Ndióxi cán. Anda já naçahan inima yii Ndióxi xihin dá já cáchí a já:

—Candehé, nandai cuu uní taa vehe yóho ta ndínducú da yohó. <sup>20</sup> Cuáhán nuu çuhún xihin dá ta a ndicani inún jáchi mí i nachindahá i da vaxi —cáchí a xihin Pedro.

<sup>21</sup> Anda já nanuu Pedro já naçinu da nu ndíta dataa nachindahá Cornelio cán. Já naçachi Pedro já xihin dá:

—Yehe cúú Pedro, da vaxi ndó ndínducú ndo ta viti cachi ndó xihin i ndá queá cúní ndo.

<sup>22</sup> Anda já nanducú ñehe da cán tuhun nu Pedro já cáchí da já:

—Da naní Cornelio cúú da nachindahá ndehe vaxi nde. Mé Cornelio cúú dá in da cómi cuéntá sahá inu ciento soldado. Mé dá cúú dá in taa cája ña ndaa. Ta cája cáhnu da Ndióxi. Ta quíhvi ndivaça ini na Israel da. Ta naçahan in tátō Ndióxi xihin dá ña ná chindahá da ndehe cana nde ndohó çuhun ndó vehe da já ná çahan ndó xihin dá ndá queá cúní Ndióxi caja da —cáchí da xihin Pedro.

<sup>23</sup> Anda já najáyaha Pedro ndíhuni dataa cán ini vehe. Já naçandoo da cán naçuiji da ñuu vehe Simón cán. Ta inga quiví itaan já naquee Pedro cuahan da xihin ndíhuni dataa cán. Ta ndáca Pedro java na cúú cuéntá Jesús ndúu ñuu Jope cán cuahan na xihin dá.

<sup>24</sup> Janda inga quiví itaan já naçinu çoo na ñuu Cesarea nu in Cornelio ndáti da na. Mé Cornelio yóho sa najátaca da tóco ndihí na vehe da xihin java na ñehe táhan vaha xihin dá ndúu na xihin dá ndáti na saa Pedro.

<sup>25</sup> Tá naçinu çoo Pedro vehe cán já naçqueta Cornelio ndiquehe ñahá da. Ta tá nandihí já naçaxítí Cornelio nu Pedro ña caja cáhnu ñahá da. <sup>26</sup> Joo naçacu ndichi Pedro da já naçachi Pedro já xihin dá:

—Candichi jáchi ñayivi xihin mé vún cúú yehe.

<sup>27</sup> Sa já cáhan Pedro xihin dá ndáca táhan da nandihvi da ini vehe. Ta tá nandihvi da cán já naçini Pedro nanditútú cuahá ñayivi

ndúu na cán. <sup>28</sup> Anda já nacasáhá Pedro cáhan da xihín ná já cáhí da já:

—Sa xíní vaha ndó ña cúu yehe in da naquixi chichi Israel. Ta sa xíní ndó ña sáhndá ley nuú nde ña ná a cátahan nde xihín ñayivi tóho. Ta ni vehe na ná a ndíhvi nde cáhí ley. Joo viti najánaña Ndióxi nuú i ña coo cúu ndehe ñayivi vií chága a juú ga ndóhó, na tóho. <sup>29</sup> Sahá ña cán quéa tá nacana ndó yehe ivi laá naquee e vaxi i. Ta ni coo nandaja ndíhí i da ndáca yehe vaxi i yóho. Ta viti cúní candaa ini i ndá cuénta quéa nacana ndó yehe vaxi i —cáhí Pedro.

<sup>30</sup> Anda já nanducú ñehe Cornelio tuhun nu Pedro já cáhí da já:

—Janda comí quívi tátuhun hora viti, xíjuhun i ta xíca tahví i nu Ndióxi ndácaan i vehe e. Ta tá nasandehé e já naxini i in dataa ndíxí jahmá yehe cándichi da nuú i. <sup>31</sup> Já nacachi da já xihín i: “Cornelio, sa xíní johó Ndióxi nu xíca tahvún nu á. Ta quéhe a cuénta sahá ñamaní cájún xihín na ndahví. <sup>32</sup> Ña cán quéa chindahá java dataa ná cuhun da ñuu Jope cana da Simón, da cáhan tucu na Pedro xihín ná quixi da cáhan da xuhun. Viti ín tóo da vehe in da naní Simón, da ndája vií ní quítí. Ta yati yuhú tañuhú ndácaan vehe da”, nacachi táto Ndióxi cán xihín i. <sup>33</sup> Sahá ña cán quéa ivi laá nachindahá i mozo i nasaa da nducú da ndóhó. Ta vaha nacaja ndó vaxi ndó. Ta viti nanditútú ndihi nde ndáti nde nu Ndióxi. Ta cúní nde cuni johó nde tóco ndihi ña nasahnda Ndióxi nu ndó cachi ndó xihín nde —cáhí Cornelio xihín Pedro.

*Cáxi tuhun Pedro nuú ñayivi vehe Cornelio*

<sup>34</sup> Anda já nacasáhá cáhan Pedro já nacachi da já:

—Viti candaa ini i ña coo na náhnu chága a juú ga inga na nu Ndióxi jáchi nu mé á in cúu ndihi ví. <sup>35</sup> Ña cája mé á quéa ndíquehe vaha ndá ñayivi nacuu tá candeé ini na mé á ta cája na ña vaha. Coó caja toho a á cúu ná na Israel á na tóho. <sup>36</sup> Nacaxi tuhun Ndióxi nuú ñayivi Israel ndá quíahva cuu coo vaha ini na tá candeé ini na Jesucristo, mé á cúu xitoho toco ndihí. <sup>37</sup> Sa candaa ini ndó ndaja nasahin tá nacasáhá Juan cáxi tuhun da nuú ñayivi ndúu estado Galilea

ña ná ndicó coo ini na nuú cuachi na ta já ná candúta na. Ta nandicutita nuu tuhun ndijáá nu ndúu na Israel. <sup>38</sup> Ta sa candaa ini ndó ndaja nacaja Ndióxi xihín Jesús, mé a naquixi ñuu Nazaret. Najándicutú ndaa Ndióxi Jesús xihín ínima yíi mé á ta najándicutú a ña xihín ndée mé á. Ta mé Jesús naxica nuu a cája ndinuhu ña vaha xihín ñayivi. Ta nandaja vaha mé á na nasandoho ini nacaja tiñáhá sacuaña. Nacaja Jesús ña yóho jáchi nasahin Ndióxi xihín á. <sup>39</sup> Ta mé nde, na apóstol cúu na naxini ña nacaja Jesús tóco ndihi ña yóho tá nasahin a estado Judea ta tá nasahin a ñuu Jerusalén. Anda já nasahni na mé á tá nacata caa na a ndica crúxu. <sup>40</sup> Joo tá nayaha uní quívi já najánditacu Ndióxi Jesús ta nacaja Ndióxi ña ná ñaha Jesús mé á nuú nde. <sup>41</sup> Coó nanaha toho Jesús mé á nu tóco ndihi ñayivi. Nuú ndehe, na nacaxi Ndióxi cuití va nanaha Jesús mé á. Jáchi janda jihna nacaxi mé á ndehe ña ná cuni nde ña ta ná cáhan nde xihín ñayivi saha mé á. Ta tá sa nanditacu tucu a tañu ndii cán já naxixi nde xihín á. <sup>42</sup> Ta mé á nachindahá ndehe caxi tuhun nde nuú ñayivi saha Jesús ta ná ndicani nde nu ná ña nasacu Ndióxi mé Jesús ña ná caja vií a sahá ñayivi. Coó caja toho a á tácu na á naxihí na. <sup>43</sup> Ta jári na profeta va janda sanahá nacahan na saha Jesús ta nacachi na ña caja cáhnu ini Ndióxi sahá cuachi ndijáá ñayivi tá ná candeé ini na mé á —cáhí Pedro xihín ndihi na ndúu vehe Cornelio cán.

*Jándicutú Ndióxi na coo naquixi chichi Israel xihín ínima yíi mé á*

<sup>44</sup> Ta nani cáhan Pedro cándichi da já naxinu ínima yíi Ndióxi najándicutú a ínima tóco ndihi na táa johó ña cáhan da cán. <sup>45</sup> Ta na cúu cuénta Jesús, na naquixi chichi Israel, na ndáca Pedro vaxi xihín dá cán, nacatontó na tá naxini na nandicutú na tóho cán xihín ínima yíi Ndióxi. <sup>46</sup> Ta xíní na ña cúu á ña ndaa jáchi naxini johó ña cája cáhnu na Ndióxi ta cáhan na inga tuhun ña coo nasatiahva na. <sup>47</sup> Anda já nacachi Pedro já:

—Cája i cuénta ni in túhún toho ñayivi a cúu caji nuu nuú na tóho yóho ña ná



candúta ná jáchi sa nandicutú ínima ná xihin ínima yii Ndióxi tátuhun nandicutú mé nde xihin á —cáchi Pedro.

<sup>48</sup> Anda já nasahnda Pedro chuun ña ná jácandúta ná na cuéntá Jesucristo. Tá nandihi já naxica tahví na cán nu Pedro ña ná candoo da chága quivi xihin ná.

## 11

*Ndicani Pedro nuú na cúu cuéntá Jesús ndúu ñuu Jerusalén sahá ña nayaha vehe Cornelio*

<sup>1</sup> Tóco ndihi na apóstol xihin na cúu cuéntá Jesús ndúu estado Judea nañehe ná tuhun ña nandiquehe ri na coo naquixi chichi Israel tuhun Ndióxi. <sup>2</sup> Ta tá nandicó coo Pedro chí ñuu Jerusalén já nacasáhá in táhdá na cúu cuéntá Jesús ndúu ñuu cán cáhan núu na saha dá. Mé na yóho cáhan na ña ndítahan nuú na tóho cahnda loho na yiquí cuñu na tátuhun ín costumbre na Israel. <sup>3</sup> Já cáchi na já xihin dá:

—Ndá cuéntá quéa nasahún naxito nihnún na coo naquixi chichi Israel. Ta ndá cuéntá quéa naxisún xihin ná. A váha toho nacajún cáhan nde —nacachi na Israel cán xihin Pedro.

<sup>4</sup> Anda já nacasáhá Pedro ndicani da tóco ndihi ña nayaha janda saha. Já nacachi da já:

<sup>5</sup> —Nasahin i ñuu Jope. Ta nani xica tahví i nu Ndióxi já najánaha mé á in ñaha nuú i. Ta ña naxini i cúu in jáhma cáhnu tátuhun sábaná nanuu chí indiví ta ndicomí xoo tito á naco. Ta chí janda yati nu in i naxinu a. <sup>6</sup> Ta tá nasandehé váha i ini a já naxini i ñuhu tá nuú quití, rí comí saha xihin tá nuú quití yucú xihin coo xihin laa ñuhu ini a naxini i. <sup>7</sup> Anda já naxini johó i cáhan in a já nacachi a já xihin i: “Pedro, cuáhán ndacoo cahni quití jan casún.” <sup>8</sup> Anda já nanducú ñehe e tuhun já nacachi i já: “A cáxi toho i rí yóho, xitoho i jáchi coo xini toho i cáxi i quití quini tátuhun rí yóho”, cáchi i xihin Ndióxi. <sup>9</sup> Anda já nacahan tucu a cán chí indiví já nacachi a já: “Sa nandaja vii va Ndióxi rí jan. Sahá ña cán quéa co ndítahan cachún ña cúu rí rí quini”, nacachi Ndióxi xihin i. <sup>10</sup> Uní táhdá nayaha ña yóho nacaja Ndióxi. Anda já nandaa tucu tóco ndihi ña

cán cuahan tucu a chí indiví. <sup>11</sup> Ta chí sa mé hora já naxinu coo uní ta ndinducú da yehe mé vehe nuú nasahin too i cán. Ta da cán naquixi da janda ñuu Cesarea ndinducú da yehe. <sup>12</sup> Ta já nachindahá ínima yii Ndióxi yehe cuahan i xihin ná sahá ña cán quéa coo nayihví i cuhun i xihin ná. Ta ndáca i ñnu ñaní yóho nasahan da xihin i. Tá naxinu coo nde ñuu cán já naquihvi nde vehe Cornelio, da nachindahá da cán ndinducú yehe. <sup>13</sup> Ta tá sa ñuhu ndihi nde vehe Cornelio cán já nacasáhá ndicani da nuú nde ña naxini da cándichi in táto Ndióxi ini vehe da ta nacachi a xihin dá já: “Chindahá java ta ná cuhun da ñuu Jope cana da in da naní Simón, da cáhan tucu na Pedro xihin. <sup>14</sup> Ta da cán caxi tuhun xuhun ta xihin ndihi na vehún ndaja caja ndó cacu ndaa ínima ndó”, nacachi táto Ndióxi xihin Cornelio cán. <sup>15</sup> Ta tá nacasáhá i cáhan i xihin na vehe Cornelio cán já nandicutú ndaa ínima ná xihin ínima yii Ndióxi tá quiahva najandicutú a ínima mí jihna. <sup>16</sup> Xihin ña yóho nandicuhun ini i ña nacachi Jesús, xitoho i xihin yo tá nacachi a já: “Mé a ndaa najácandúta Juan ndohó xihin ticuú joo vaxi quivi jándicutú Ndióxi ndohó xihin ínima yii mé á”, nacachi Jesús. <sup>17</sup> Ta tá sa nasahan Ndióxi ínima yii mé á nuú na cán tá quiahva nacaja xihin mí sahá ña nacandúsa i Jesucristo, xitoho i ama ná caní táhan i xihin Ndióxi sahá ña cája mé á xihin na cán —nacachi Pedro.

<sup>18</sup> Tá naxini johó na cán ña nacachi Pedro já nacaatáji ná ta nacaja cáhnu na Ndióxi já nacachi na já:

—Mé a ndaa sahan ri Ndióxi ñamaní nuú na tóho ña ná ndicó coo ini na jandacoo na cuachi cája na já ná coo na xihin mé á anda ama cáa quivi —nacachi na cúu cuéntá Jesús, na naquixi chichi Israel cán.

*Cuahá na ñuu Antioquia ndiquehe na ichi cuéntá Jesús*

<sup>19</sup> Tá nandihi nasahní na Esteban já nacasáhá cája xixi na xihin na cúu cuéntá Jesús. Anda já nandicuíta nuu na cuahan na ta java na naxinu na janda chí estado Fenicia. Java na naxinu na cuahan na chí isla Chipre. Ta java na naxinu na chí ñuu Antioquia. Ta cán nacasáhá cáhan

na tuhun Ndióxi nuú na naquixi chichi Israel cuití va. Joo coó naçaxi tuhun na ña nuú na tóho cán. <sup>20</sup> Joo java na cúu cuéntá Jesús, na naquixi chí isla Chipre cán xihín na naquixi ñuu Cirene naxinu coo na ñuu Antioquía ta naçasáhá na cáhan na tuhun vaha saha Jesús, xitoho í xihín na coó naquixi chichi Israel ndúu cán. <sup>21</sup> Ta nasahan Ndióxi cuahá ndée mé á nu ná. Ta cuahá ndivaha ñayivi najándacoo na costumbre yata na ta nandiquehe na íchi cuéntá Jesús, xitoho í.

<sup>22</sup> Tá naçandaa ini na cúu cuéntá Jesús ndúu ñuu Jerusalén tóco ndihi ña nayaha cán já nachindahá na Bernabé cuahan da janda ñuu Antioquía cán. <sup>23</sup> Tá naxinu coo Bernabé ñuu Antioquía cán já naxini da ndá quiahva naçaja Ndióxi ñamaní xihín ñayivi ñuu cán chí naçajji ndivaha ini da. Ta naçahan da xihín ná ña ná candico na íchi cuéntá Jesús xihín ndinuhu ini na. <sup>24</sup> Mé Bernabé yóho cúu dá in taa vaha. Ta chutú ndaa ínima da xihín ínima yji Ndióxi ta cándéé cáhnu ini da mé á. Ta cuahá ñayivi nandiquehe na íchi cuéntá Jesús, xitoho í sahá ña naçaja da.

<sup>25</sup> Tá nandihí já naquee Bernabé cuahan da ndinducú da Saulo chí ñuu Tarso. Ta tá nandiñehe dá Saulo já ñehe da da cuahan da chí ñuu Antioquía. <sup>26</sup> Ta nasanduu da xihín na cúu cuéntá Jesús mé ñuu cán tátuhun in cuia. Ta najánaha da tuhun Ndióxi nuú cuahá ndivaha ñayivi. Ta mé ñuu Antioquía cán cúu nuú nu cuití nasacu na quivi ná cananí na na cúu cuéntá Jesús.

<sup>27</sup> Ta mé tiempo já naxinu coo java na profeta mé ñuu Antioquía cán. Mé profeta yóho naquixi na chí ñuu Jerusalén ta tiahva na jáyaha na tuhun cáhan Ndióxi nuú ñayivi. <sup>28</sup> Ta in táhan da profeta cán, da naní Agabo nandaca ndichí da tañu na cúu cuéntá Jesús mé vehe nuú nataca na cán. Já naçachi da já:

—Cáxi tuhun ínima yji Ndióxi xihín i ña quixi in tama ndeé ndivaha ndijáá ñuyivi yóho —naçachi da xihín ná.

Ta chí já ndusa nasahin jáchi naquixi in tama ndeé ndivaha tá nasacomí Claudio cuéntá sahá ñayivi ñuu Roma. <sup>29</sup> Anda já na cúu cuéntá Jesús ñuu Antioquía cán najátaca

na jiuhún chindeé ñahá na cán. Ta ndá quiahva xinu coo nu mé ná quiahva na, quiahva já sahan na. Anda já nachindahá na ña nuú na cúu cuéntá Jesús ndúu estado Judea. <sup>30</sup> Ta mé Saulo xihín Bernabé cúu da ñehe jiuhún cán cuahan da ndiquiahva da ña nuú na sacuaña cómi cuéntá sahá na cúu cuéntá Jesús ndúu estado Judea cán.

## 12

*Tá naçasáhá ndóho chága ini na cúu cuéntá Jesús*

<sup>1</sup> Ta mé tiempo já naçasáhá Herodes, da cómi cuéntá sahá ñuu Jerusalén cán cája xixi da xihín java na cúu cuéntá Jesús. <sup>2</sup> Nasahnda da chuun ña ná cahní na Jacobo, ñani Juan xihín yuchú caní. Ta já naçaja na. <sup>3</sup> Ta tá naxini Herodes ña naçajji íní na sacuaña veñuhu Israel xihín ña nasahní da Jacobo já natin ri da Pedro. Ta ña yóho nasacuu a mé tiempo tá cája na Israel víco tá xixi na pan ña co cáva táhan yusá naxaa xihín. <sup>4</sup> Tá sa nachicaan Herodes Pedro vecaa já nasahnda da chuun nuú comi táhnda soldado ña ná candaa na da. Ta comi comi taa ndáca in in táhnda cán. Mé Herodes nasacu ini da tavá da Pedro vecaa ndiquiahva da da nuú ñayivi Israel ña ná cahní na da tá sa ná yaha víco. <sup>5</sup> Nani ndacaan Pedro vecaa ndáa vaha na da. Joo na cúu cuéntá Jesús xihín ndinuhu ini na xica tahví na nu Ndióxi saha dá.

*Tává Ndióxi Pedro vecaa*

<sup>6</sup> Ta in ñuu sácú ini Herodes tavá da Pedro vecaa inga quivi itaan ña ndiquiahva da da nuú ñayivi, nduu. Joo mé ñuu já nani cánduhu Pedro quiji da tañu ivi soldado ta ndico jin ga cadena ndáha dá ta co cáhan sahá java ga soldado ndíta ndáa yéhe vecaa cán. <sup>7</sup> Ta in náá cuití naxinu coo in táto Ndióxi ini vecaa cán chí nandiyihvi ndaa ini a. Anda já naxinu coo mé táto Ndióxi nu cánduhu Pedro já naquiní a ndáha á yica ndicá da já nandicaxí ini da. Anda já naçachi a já xihín dá:

—Camún ndacoo quíun.

Anda já naçayu cadena ña nasandico ndáha Pedro. <sup>8</sup> Anda já naçachi tucu táto Ndióxi cán já xihín dá:

—Ndaja tuun nií tisún ta cayihi ndusun.

Ta tá sa nacaja da ña já nacachi tucu tátō Ndióxi já xihin dá:

—Quehe ticachí níhnu chinúú jatun ná cohō candico yehe —cáchi a xihin dá.

<sup>9</sup> Anda já tácaa Pedro jata tátō Ndióxi cán cuahan da. Joo co xini da á jivi quea á a juú a. “Sání ví”, cáhán da. <sup>10</sup> Ta xica na cásahan na já nayaha na nu ndíta in táhndá soldado. Ta anda já nayaha na nu ndíta inga táhndá soldado. Ta tá sa naxinu coo na yéhe caa cán já nanuna mé va já naquee na vecaa cuahan na. Ta tá sa naxica chá na cáyé cán já naquee tátō Ndióxi cán cuahan ta já nacandoo Pedro cán. <sup>11</sup> Anda já nacandaa ini Pedro ña nayaha. Ta nacachi da já xihin mé dá:

—Viti ndusa cándaa ini i ña mé a ndaa táhyí quea nacaja tátō Ndióxi yóho. Mé Ndióxi nachindahá a tátō á já ná tava a yehe ndáha Herodes já ná a cáhni da yehe tá quiahva cuni na Israel —nacachi da.

<sup>12</sup> Nani cáhán Pedro xica da cuahan da vehe María, ña cúu náná Juan, da nani tucu Marcos. Cán nanditútú cuahá na cúu cuéntá Jesús ndúu na xica tahví na nu Ndióxi saha Pedro. <sup>13</sup> Ta tá naxinu coo da vehe María cán já nacasáhá catí ndáha dá yéhe cán. Anda já naxinu coo in ña loho nani Rode ña candehé ña ndá na cándichi jata véhe cán. <sup>14</sup> Tá naxini johó ña cáhan da já nandicuni ña tachí Pedro. Joo nandindójó ña cuná ña yéhe sahá ña cájii íni ña. Ta já xinu ña nandicó coo tucu ña ini vehe caxi tuhun ña xihín na java cán ña cándichi Pedro jata véhe. <sup>15</sup> Joo tá nandicani ña ña yóho nu ná já nacachi na já xihin ña:

—Tachí va cúu yóhó.

—Jivi da —cáchi ña cán ndúcú ndée ña cáhan ña xihin ná.

Anda já nacachi na cán já:

—Ndá ínimá va da quea jan jáchi vecaa va ndacaan Pedro —nacachi na.

<sup>16</sup> Joo ndaja coo Pedro catí ndáha yii va da yéhe cán. Já naxinu coo na nasuná na yéhe nu dá ta chí nayihví na tá naxini na da.

<sup>17</sup> Joo nacuu ndáha dá nu ná ña ná a cáhan chága na. Anda já nacasáhá da ndicani da nu ná ndaja nacaja Ndióxi natavá a da vecaa cán. Ta já nacachi da xihin ná:

—Ndicani ndó ña yóho nu Jacobo ta ndicani ndó ña nu tóco ndihi na cúu cuéntá Jesús —nacachi Pedro.

Anda já naqueta Pedro cuahan da.

<sup>18</sup> Tá nativi inga quiví itaan já nacatontó soldado vecaa cán tá nacandaa ini da ña coo Pedro in vecaa ta coo naxini da ndáchí cuahan da. <sup>19</sup> Anda já nasahnda Herodes chuun ña ná ndinducú na da. Joo coo nandiñehe ná da. Anda já nacasáhá da ndája ndichí da soldado vecaa cán ndáchí cuahan Pedro. Joo coo nacuu cachi na cán ndáchí cuahan da. Sahá ña cán quea nasahnda Herodes chuun ña ná cahni ndihi na soldado da nasandaa yéhe caa cán. Tá nayaha ña yóho já najándacoo Herodes estado Judea cán ta naquee da cuahan da chí Cesarea coo da.

### Quiví naxihí Herodes

<sup>20</sup> A juú quiahva xójo ini Herodes xihín ñayivi ndúu ñuu Tiro xihín na ndúu ñuu Sidón. Joo ndíví ñuu cán najándique táhan na tuhun na cuhun na cahan na xihin dá. Coo vaha ini na xihin dá cuni na jáchi ñundáhyi rey cán cána tóco ndihi ña xixi na. Joo jihna ñuhú nandique táhan máni ná xihín in da nani Blasto. Mé Blasto yóho nasacuu da in da cáhnu cája chúun nu rey cán. Ta nacahan na ña ná cahan ndahví da cán nu rey saha ná. <sup>21</sup> Ta nasacu Herodes in quiví nditútú ndihi na nu dá. Ta tá natandaa mé quiví já nasacandixi Herodes jáhma vaha ndivaha da, ña sácandixi rey. Ta nasacoo da nu sácoo rey. Ta já nacahan cóhó da xihín ñayivi. <sup>22</sup> Tá naxinu coo ña cáhan da já nacasáhá ñayivi cán cáyuhú na já cáchi na já:

—Ndióxi cúu da yóho ta coo cúu dá ndá taa nacuu —cáchi na cája cáhnu na Herodes cán.

<sup>23</sup> Ta chí sa mé hora já naxinu in tátō Ndióxi ta nacaja ña ná quehe Herodes cuehe jáchi coo nacaja cáhnu da Ndióxi ta já nasahan da ñamaní nuú ñayivi ña cáchi na cúu dá ndiόxi. Chí sa mé hora já naquihví ticujú yiquí cuñu da já naxihí da.

<sup>24</sup> Ta níi cúu nandicuíta nuu tuhun vaha saha Jesús xica cuahan. Ta chí nandicuaha chága na cúu cuéntá Jesús.

<sup>25</sup> Ta ndaja coo nandiquiahva Bernabé xihín Saulo mé jjuhún nuú na sacuaha veñuhu ndúu ñuu Jerusalén já nandicó coo

da cuah̄an da ñuu Antioquía. Ta ndáca na Juan, da naní tucu Marcos cuah̄an da xih̄in ná.

## 13

### *Cája chúun Bernabé xih̄in Saulo cuéntá Ndióxi*

<sup>1</sup> Ta ndaja coo tañu na cúu cuéntá Jesús ndúu ñuu Antioquía cán ndúu na cúu profeta ta ndúu ri na jánaha tuhun Ndióxi. Ta ña yóho cúu quiv̄i ná: Bernabé xih̄in Saulo xih̄in Simón, da cáhan na Taa Tuún xih̄in, xih̄in Lucio, da ñuu Cirene xih̄in Manaén, da ñasahnu xih̄in Herodes. Mé Herodes yóho cúu dá da cómi cuéntá sah̄a ñayivi estado Galilea. <sup>2</sup> In quiv̄i nani nanditútú ndihi na ndúu na xíjuhun na ta cája cáhnu na Ndióxi já ñacahan ínim̄a yij̄i mé á xih̄in ná já ñacachi a já:

—Tavá jíin ndó Bernabé xih̄in Saulo jáchi sa ñacaxi mí i chuun quiah̄va i nu ná caja na —ñacachi a.

<sup>3</sup> Ta tá sa ñandih̄i ñaxijuhun na ta tá ñandih̄i ñaxica tah̄ví na nu Ndióxi já ñachojó na ndáha ná jíin Saulo xih̄in Bernabé já ñandindayí na ña cuah̄an na caja na chuun Ndióxi.

### *Cáhan Saulo xih̄in Bernabé tuhun vaha sah̄a Jesús isla Chipre*

<sup>4</sup> Tá ñandih̄i já ñachindahá ínim̄a yij̄i Ndióxi Saulo xih̄in Bernabé cuah̄an na ñuu Seleucia. Ta cán ñandaa na barco cuah̄an na isla Chipre. <sup>5</sup> Ta ndáca na Juan, da naní tucu Marcos cuah̄an da xih̄in ná já ná chindeé da ña. Ta tá ñaxinu coo na ñuu Salamina nu sá ndíchí barco cán já ñacasáhá na cáhan na tuhun Ndióxi nu ñayivi táca veñuhu na Israel cán. <sup>6</sup> Níi cúu isla cán ñaxica nuu na janda quiah̄va ñaxinu coo na ñuu Pafos. Ta cán ñanditahan na in da tají ñaquixi chichi Israel ta naní da Barjesús. Ta cúu dá in da tuhún jáchi cáchí da xih̄in ñayivi ña cáhan da cuéntá Ndióxi. <sup>7</sup> Ta mé da tají yóho ñasah̄iin tuun da xih̄in in da naní Sergio Paulo, da cúu gobernador nuú ñayivi isla Chipre cán. Ta ñasacuu da da ndíchí jíin. Ta mé gobernador yóho ñacana da Bernabé xih̄in Saulo jáchi cúni da cuni joh̄o da tuhun Ndióxi. <sup>8</sup> Joo da tají naní Barjesús, da naní tucu Elimas ñacasáhá da sáji nuu da nuú Bernabé xih̄in nuú Saulo

jáchi coo cúni da ña ná candeé ini gobernador cán Jesús. <sup>9</sup> Nandicutú ndaa ínim̄a yij̄i Ndióxi ini Saulo, da cáhan na Pablo xih̄in já ñacasáhá sándehe ndaa da nuú da tají cán. <sup>10</sup> Já ñacachi da já xih̄in dá:

—Yóho cúun ta quini ta cúun jah̄yi tiñáhá, da xica jándahvi ñayivi. Coo cúnun tóco ndihi ña vaha jáchi cúnun caji nuún nuú ñayivi ná a ndiquehe na íchi cuéntá Jesús. <sup>11</sup> Ta viti jándoho Ndióxi inún. Jácuaá a yoh̄o ta ni a cúnun nuú candii tixi chá quiv̄i —ñacachi Pablo xih̄in da tají cán.

Tá ñacachi Pablo já chí iv̄i laá ñacuaá da cán. Jandá tíin ndaa na da xica da jáchi coo tívi nuú dá. <sup>12</sup> Tá ñaxini da cúu gobernador cán ña yóho chí iv̄i laá ñacandúsa da Jesús. Jáchi chí catóntó da xini joh̄o da tóco ndihi ña cáhan na sah̄a Jesús.

### *Xínu coo Pablo xih̄in Bernabé ñuu Antioquía ña ndácaan estado Pisidia*

<sup>13</sup> Nandaa Pablo xih̄in na xica xih̄in da barco ñuu Pafos cuah̄an na chí ñuu Perge ña ndácaan estado Panfilia. Joo ñasahnda táhan Juan, da naní tucu Marcos xih̄in ná já ñandicó coo da chí ñuu Jerusalén. <sup>14</sup> Tá ñandih̄i já ñaquee Pablo xih̄in na xica xih̄in dá ñuu Perge já ñaxinu na ñuu Antioquía ña ndácaan estado Pisidia. Ta mé quiv̄i ndiquehe ndée ñayivi ñandih̄vi na veñuhu já ñasacoo na. <sup>15</sup> Ta tá sa ñandih̄i ñacah̄vi na ley Moisés xih̄in ña ñacah̄yí na profeta já ñacana na sacuah̄a veñuhu cán Pablo xih̄in na xica xih̄in dá já ñacachi na já xih̄in ná:

—Ñani i, tá ín tuhun vaha cúni ndó cahan ndó xih̄in ñayivi yóho cuu candichi ndó cahan ndó xih̄in ná viti —ñacachi na cán xih̄in dá.

<sup>16</sup> Anda já ñacandichi Pablo já ñacuu ndáha da nu ná catáji yúhu ná já ñacasáhá cáchí da já xih̄in ná:

—Cuni joh̄o ndó ñayivi Israel xih̄in tóco ndihi ndó, na cája cáhnu Ndióxi. <sup>17</sup> Mé Ndióxi, mé a cája cáhnu ñayivi nación Israel ñacaxi a tásahnu jícó yo ta ñacaja mé á ña ná ndicuah̄a ndivaha na nani ñasacuu na na tóho nación Egipto cán. Joo tá ñandih̄i já ñatavá mé á na xih̄in ndée mé á. <sup>18</sup> Ta cáhnu ñasah̄iin ini Ndióxi sah̄a cuachi na tañu iv̄i jico cuia nani ñaxica nuu na yucú íchí cán. <sup>19</sup> Ta ñajándih̄i Ndióxi sah̄a usa

nación ñayivi nasanduu ñundáhyi Canaán já najáyaha ñundáhyi jan ndáha tásáhnú jícó yo jáchi janda sanahá nasahan mé á tuhun a nu ná ña caja já xihín ná. <sup>20</sup> Anda já nasahnda Ndióxi chuun nu juexe já ná cacomí na cuénta saha ná tixi comi ciento java cuia janda quiahva naxinu coo tiempo tá naquixi profeta Samuel, da jáyaha tuhun cáhan Ndióxi nuú ñayivi. <sup>21</sup> Anda já naxica tahví na Israel nu Ndióxi ña ná cacu mé á in rey ná cacomí da cuénta saha ná. Saha ña cán quéa nasacu Ndióxi in da naní Saúl ná cacuu da rey nu ná. Nasacuu da jahyi Cis, da naquixi chichi Benjamín. Ta nasacomí Saúl cuénta saha ná tixi ivi jico cuia. <sup>22</sup> Tá nandihí já natavá Ndióxi Saúl já nachinúu a David ña ná cacomí da cuénta saha ná. Já nacachi Ndióxi já saha dá: “Íin vaha ini i xihín David, jahyi Isaí jáchi xini ña caja mé dá tóco ndihí ña cuni”, nacachi Ndióxi saha David. <sup>23</sup> Ta in da naquixi chichi mé David cán cúu Jesús, mé a nasahan Ndióxi tuhun a chindahá jácacu ñayivi Israel janda sanahá ndivaha. <sup>24</sup> Ta janda tá cámaní quixi Jesús já naxica nuu Juan, da jácandúta ñayivi nacahan da xihín ñayivi ña ndítahan nu ná jándicoo na cuachi cája na ta ná candúta ná. <sup>25</sup> Ta tá sa yati quivi da já nacachi da já xihín ñayivi: “A juú cahán ndo ña cúu yehe da nachindahá Ndióxi cacomí cuénta saha ñayivi, vaha. Jáchi ja chá xinu inga da íin chága saha a juú ga yehe. Ta da cán cacomí cuénta saha ndo ta cúu ndusa da cáhnú chága ta chí coo saha mí i caxítí i ndaxí i correa ndusa dá”, nacachi Juan xihín ñayivi cán.

<sup>26</sup> Cuni johó vaha ndó, ñani i, na naquixi chichi Abraham xihín tóco ndihí ndó, na cája cáhnú Ndióxi xihín ndinuhu ini. Mé Ndióxi cuni a ña ná candaa ini ndó ña nachindahá mé á Jesús ñuyívi yóho já ná jácacu a ndohó já ná a cúnun ndó in-dayá. <sup>27</sup> Tóco ndihí na ndúu ñuu Jerusalén xihín na sacuaaha coo nacandaa ini na ña nachindahá Ndióxi Jesús ñuyívi yóho. Ta ni coo nacandaa ini na tuhun nacahyí profeta saha Jesús tá nasacahvi na ña veñuhu tá quivi ndíquehe ndée ná. Saha ña cán quéa nasahní na Jesús joo xihín ña nacaja na yóho najáxinu coo na ña nacachi profeta

sanahá. <sup>28</sup> Ta vatí coo ñañehe ná cuachi chicaan na jata Jesús joo naxica na ñamaní nu Pilato ña ná cahnda da chuun ña ná cahní na Jesús. <sup>29</sup> Ta tá sa naxinu coo tóco ndihí ña cáchi tuhun Ndióxi saha mé á coo anda já najánuu na a ndica crúxu já najánduxu na ña. <sup>30</sup> Joo najánditacu Ndióxi Jesús tañu ndii. <sup>31</sup> Ta tixi cuahá quivi nanaha Jesús mé á nuú na ñañehe táhan xihín á tá naquee a estado Galilea cuahan chí Jerusalén. Ta mé na cán cúu na xica cáhan saha mé á nuú ñayivi viti.

<sup>32</sup> Saha ña cán quéa cáxi tuhun nde tuhun vaha saha Jesús nu ndóhó viti jáchi janda saha nacachi Ndióxi xihín tásáhnú jícó yo ña já coo. <sup>33</sup> Ta tá najánditacu Ndióxi Jesús najáxinu coo a tuhun nasahan nu yó, na naquixi chichi na cán. Jáchi já nacahyí a nu Salmo ivi ta saha Jesús nacahan tá nacachi a já: “Jahyi mí i cúu yóhó. Ta yehe cája ña ná catacún quivi viti”, cáchi tuhun Ndióxi. <sup>34</sup> Joo Ndióxi sa nasahan va tuhun a ña jánditacu a Jesús já ná a tahyí yiquí cuñu a. Jáchi já nacahyí a ini libro yii mé á já cáchi a já: “Nu yóhó quiahva i tóco ndihí ña vaha, ña nasahan i tuhun i nu David quiahva i nu dá”, cáchi tuhun Ndióxi. <sup>35</sup> Já cáchi tucu inga Salmo já: “Mé ndó a quiahva toho ndó ñamaní tahyí yiquí cuñu i jáchi cúu u jahyi máni mé ndo, da cája chúnun nu ndo”, cáchi tuhun Ndióxi. <sup>36</sup> Ta sa xini yo co cáhan ña yóho saha ña nacaja David jáchi tá nandihí nacaja da ña nasahnda Ndióxi nu dá já naxihí da ta najánduxu na da nuú nanduxu tásáhnú jícó da. Ta natahyí yiquí cuñu da cán. <sup>37</sup> Joo yiquí cuñu Jesús coo natahyí toho a jáchi najánditacu Ndióxi ña. <sup>38</sup> Ña cán quéa vaxi nde caxi tuhun nde ña yóho nu ndo, ñani i já ná candaa ini ndó ña cája cáhnú ini Ndióxi saha cuachi ñayivi saha ña nacaja Jesús tá naxihí a ndica crúxu. <sup>39</sup> Ta cája cáhnú ini Ndióxi saha cuachi ñayivi tá cándéé ini na Jesús. Jáchi ni in túhún ñayivi a cúu nduu ndaa nu Ndióxi saha ña sácú vaha na ley Moisés. <sup>40</sup> Joo cuénta coo ndó a juú ndoho ndó ña nacachi na profeta sanahá tá nacachi na já: <sup>41</sup> Cuni johó vaha ndó, ndóhó na sácú ndaa ichi ña cáhan Ndióxi. Catóntó ndo jáchi cama chá ndihí saha ndo.

Jáchì yehe cúú Ndióxi ta cája i ña náhnu ndivaha,  
joo co cándúsa ndó ña cája i vatí ndicani java na ña nu ndo, ñacachi Ndióxi sanahá —ñacachi Pablo xihín ná.

<sup>42</sup> Ta tá ñaqueta Pablo xihín na xíca xihín dá veñuhu na Israel cán já ñaxíca ñayivi, na coó ñaquixi chichi Israel ñamaní nu dá ña ná cahan da xihín ná sahá tuhun Ndióxi inga quívi ndiquehe ndée ná. <sup>43</sup> Tá ñaquee ndihi na veñuhu cán já cuahá na Israel xihín cuahá na tóho, na cándúsa ley Moisés ta cája cáhnu na Ndióxi ñacasahá na ndíco na jata Pablo xihín jata Bernabé. Ta Pablo xihín Bernabé jannah da na ña ná candee cáhnu ini na Ndióxi já ná caja mé á ñamaní xihín ná.

<sup>44</sup> Ta tá ñaxinu coo inga quívi ndiquehe ndée ná já ñataca tátuhun tóco ndihi ñayivi ñuu veñuhu cán ña taa johu na tuhun Ndióxi cúni na. <sup>45</sup> Joo tá ñaxini na ñaquixi chichi Israel cán ña ñataca cuahá ndivaha ñayivi já ñacasahá na Israel cáhívi ini na. Já ñacasahá na cahan núu na saha Pablo ta ñacanahá na xihín dá. <sup>46</sup> Xihín ña cán ñandindee chága ini Pablo xihín Bernabé já ñacasahá cáhí da já:

—Jihna ñúhú ndítahan nuú nde caxi tuhun nde tuhun Ndióxi nu mé ndó, na ñaquixi chichi Israel. Joo sándehe nde ña co cúni toho ndó ndiquehe ndó ña. Ta cája nde cuénta ña coó saha ndó cuhun ndó indiví. Sahá ña cán quéa vaha chága ná cuhun nde cahan nde tuhun Ndióxi xihín na coó ñaquixi chichi Israel. <sup>47</sup> Jáchì já cáa chuun ñasahnda Ndióxi nuú nde tá ñacachi a já xihín nde:

Ñasacu yehe ndohó ña ná caxi tuhun ndó nuú ñayivi tóho ndúu ndijáá ñuyiví, já ná candaa ini na ndaja caja na ná cacu ndaa ínimá ná, ñacachi Ndióxi —ñacachi Pablo xihín ná.

<sup>48</sup> Tá ñaxini johu na tóho, na coó ñaquixi chichi Israel cán ña yóho chí ñacajii ini na já ñacasahá na cahan na ña cúú ndusa tuhun Ndióxi ña vaha. Ta tóco ndihi na ñacaxi Ndióxi cacu ndaa ínimá, ñandihvi na íchi cuénta mé á. <sup>49</sup> Já ñasahin nuú ñaxita nuu tuhun Ndióxi níí cúú ñundáhyi cán. <sup>50</sup> Joo na ñaquixi chichi Israel cán najándivaa na java najihí, na cátóo cuhun veñuhu, na co cahan

núu ñayivi saha. Ta najándivaa na java dataa, da ín saha ñuu cán ña ná ndicuita na xihín Pablo xihín Bernabé viti ta anda quiahva ná tavá ña da ñundáhyi cuénta ñuu cán. <sup>51</sup> Anda já ñaquiji nihni Pablo xihín Bernabé ña yacá ndusá saha mé dá já ná nahá nuú na cán ña coó ñatahan ini da xihín ña cája na Israel cán. Já ñaquee da ñuu Antioquia cán cuahan da inga ñuu naní Iconio. <sup>52</sup> Ta na cúú cuénta Jesús, na ñacandoo ñuu Antioquia cán ñandicutú ndaa ínimá ná xihín ínimá yii Ndióxi ta cájii ndivaha ini na.

## 14

*Cáhan Pablo xihín Bernabé tuhun Ndióxi nuú ñayivi ndúu ñuu Iconio*

<sup>1</sup> Tá ñaxinu Pablo xihín Bernabé ñuu Iconio já ñandihvi da veñuhu nu ndítaca na Israel cán. Ta cán ñacahan da tuhun vaha saha Jesús nu ná. Ta cuahá ndivaha na Israel xihín na coó ñaquixi chichi Israel ñacandee ini na Jesús. <sup>2</sup> Joo java na Israel, na coó ñacandúsa tuhun Ndióxi ñacasahá na cáva na jiní ñayivi, na coó ñaquixi chichi Israel ña ná cahan núu na sahá na cúú cuénta Jesús. <sup>3</sup> Sahá ña cán quéa ñasanduu nahá chága ví Pablo xihín Bernabé mé ñuu cán. Ta co ná yihví na cahan chága ví na tuhun Ndióxi jáchi cándee ini na Jesús, xitoho na. Ta ñasahan Ndióxi ndee á nu ná ña ná cuu caja na cuahá nuú ña náhnu ta xihín ña yóho ñacandaa ini ñayivi ña mé a ndaa táhyi quívi ini ndusa Ndióxi ñayivi. <sup>4</sup> Joo ñayivi ñuu cán ñacasahá na sáhdá táhan na jáchi java na cuahan na jata na Israel ta java na cuahan jata na apóstol cán. <sup>5</sup> Anda já na Israel xihín na coó ñaquixi chichi Israel najándique táhan na tuhun na xihín na jutixia ñuu cán ña ndúcú na canahá quini na xihín na apóstol ta nducú na cahni na da xihín yuu. <sup>6</sup> Joo tá ñacandaa ini Pablo xihín Bernabé ña sácú ini na cán caja xíxi na xihín dá já ñaxinu da cuahan da chí estado Licaonia. Ñaxinu coo da ñuu Listra xihín ñuu Derbe xihín java ga ñuu válí ñúhu ndijáá chí cán. <sup>7</sup> Ta cán ñacahan ri da tuhun vaha saha Jesús nuú ñayivi ndúu cán va.

*Cúun na yuu Pablo ñuu Listra*

8 Tá naxinu coo da ñuu Listra cán já nandique táhan da xihin in dataa, da a cuú caca. Ta íin coo da cán jáchi cúú dá da quíhvi saha janda tá nacacu da cáa da já. 9 Ta íin coo da quíhvi saha yóho táa johu da nu cáhan Pablo. Anda já nandicoto nihni Pablo nu dá ta cándaq ini Pablo ña cuu ndivaha da jáchi cándeé ini da quíhvi cán Ndióxi. 10 Sahá ña cán quea nacayuhú Pablo nu dá já cáchi da já:

—Cuáhán candichi —nacachi Pablo.

Ta chí ivi laá nacandita da ta nacasáhá xíca da. 11 Tá naxini ñayivi ñuu cán ña nandaja vaha Pablo da cán já nacasáhá na cán cáyuhú cóhó na mé tuhun cáhan na ñuu Licaonia, ña co cándaq ini Pablo. Já cáchi na já:

—Ndióxi cúú da yóho ña naquixi indivi túní a ñéhe cuití da nahná ñayivi —cáchi na cáyuhú na tuhun mé ná.

12 Nacachi na cán ña Bernabé cúú dá in ndióxi naní Júpiter. Ta Pablo cúú dá in ndióxi naní Mercurio cáchi na jáchi mé dá cúú da cáhan chága. 13 Ta da cúú jutú nuú veñuhu Júpiter, ña ndácaq yuhú ñuu cán ñéhe da tindiQUI xihin cuahá ita jáchi ndúcú ndihi na cán cahní na tindiQUI joco na rí nu Pablo xihin nuú Bernabé caja cáhnu na da. 14 Joo tá nacandaq ini Pablo xihin Bernabé ña ndúcú na cán caja cáhnu na da já nandatá da jáhma dá sahá ña co táhan ini da xihin ña cája na. Ta já nacasáhá na xínu na naquihvi na tañu ñayivi cán. Ta cáyuhú Pablo já cáchi da já xihin ná:

15 —Candehé ndo. A váha toho ña ndúcú ndó caja ndó yóho jáchi ñayivi xihin mé va ndó cúú ndehé. Ndá cuéntá quea cuni ndó caja cáhnu ndó ndehé. Ta chuun vaxi nde yóho quea caxi tuhun nde xihin ndó tuhun vaha saha Jesús. Ta já ndítahan nu ndo jándacoo ndó ña a váha jan. Ta candico ndó Ndióxi tácu, mé á nacavaha indivi xihin ñuyívi xihin tañuhú xihin tóco ndihi ñaha ndúu nuú in in ña cán. 16 Anda sanahá najándicoo ndáha Ndióxi ñayivi ndi-jáá nación caja na ndía cuni mé va na caja na. 17 Joo níí tiempo najánañaha Ndióxi yo cúú mé á nu ná jáchi níí tiempo nacaja vaha mé á xihin ná. Mé a chindahá javi nu yo. Ta mé á cája ña ná cana vaha ñundáhyi yo. Ta

cája mé á ña ná a cámaní ña cuxú já ná cajii íní yo —nacachi Pablo xihin na cán.

18 Ta vatí nacahan Pablo tuhun yóho xihin ná joo ihvi ndivaha já nacava da jiní ñayivi cán ña ná a cáhni na tindiQUI joco na nu dá ña caja cáhnu na da.

19 Tá nandihí já naxinu coo java na Israel, na naquixi ñuu Antioquia xihin java na naquixi chí ñuu Iconio. Já nacava na jiní ñayivi já nacañi na nacuun na yuu Pablo. Ta tá sa nacahan na naxihí da já ñúhu na da nasahan na najácana na da yuhú ñuu. 20 Joo na cúú cuéntá Jesús nataca na ta nacava nuu na nu cándúhu Pablo ta já nandacoo da já naquihvi tucu da ñuu cán. Ta inga quivi itaan já naquee da xihin Bernabé cuahan da ñuu Derbe.

21 Tá naxinu coo ndíví da cán ñuu Derbe já nacasáhá da cáxi tuhun da nuú ñayivi sahá Jesús ta cuaha ná nandiquehe íchi cuéntá Jesús ñuu cán. Anda javí nandico coo Pablo xihin Bernabé chí ñuu Listra xihin ñuu Iconio já naquee da cuahan da chí Antioquia. 22 Ta mé ñuu cán najácahan da na cúú cuéntá Jesús ña ná coo ndacú chága na ta ná a jándacoo na ña cándeé ini na Jesús. Ta nacachi da ña já ndusa ndoho ndivaha ini na janda quiahva ná xinu coo na cacomí Ndióxi cuéntá saha ná. 23 Tá nandihí já nasacu Pablo xihin Bernabé java da sacuañaha ña ná cacomí da cuéntá sahá na cúú cuéntá Jesús in in ñuu cán. Ta tá nandihí naxijuhun na ta naxica tahví na nu Ndióxi saha ná já nandiquiahva da na ndáha Ndióxi ña ná candaa mé á na jáchi cándeé ini na mé á.

*Ndicó coo Pablo xihin Bernabé ñuu Antioquia ña ndácaq estado Siria*

24 Tá nandihí já nayaha Pablo xihin Bernabé chí estado Pisidia janda quiahva naxinu coo na ñundáhyi cuéntá Panfilia.

25 Ta nacahan na tuhun vaha saha Jesús nuú ñayivi ñuu Perge. Anda já naquee na cuahan na chí ñuu Atalia. 26 Ta ñuu Atalia cán nandaa na barco já nandico coo na chí Antioquia nuú naquee na jihna. Jáchi mé cán cúú nuú nandiquiahva na da ndáha Ndióxi ña ná caja da chuun mé á. Ta viti sa najándihí da chuun natahnda nu dá cán. 27 Tá naxinu coo Pablo xihin

Bernabé mé ñuu Antioquía cán já najátaca da tóco ndihi na cúu cuéntá Jesús ndúu ñuu cán já nandicani da tóco ndihi ña ñacaja Ndióxi xihín dá. Nandicani da ndá quiahva nasahan Ndióxi ñamaní nuú na coó naquixi chichi Israel ña ná ndiquehe na íchi cuéntá mé á. <sup>28</sup> Ta ñacandoo nahá Pablo xihín Bernabé ñuu Antioquía cán xihín na cúu cuéntá Jesús.

## 15

### *Ndítaca na sacuahá cuéntá Jesús*

<sup>1</sup> Ta ndaja coo mé tiempo já java dataa, da naquixi chí estado Judea naxinu da ñuu Antioquía cán. Ta ñacasáhá na jánaha na nuú na cúu cuéntá Jesús ña ndítahan nu ná caja na ña cáhí ley Moisés ña ná chicaan na marca yiquí cuñu na já ná cuu jácacu Ndióxi na. <sup>2</sup> Joo Pablo xihín Bernabé ñacasáhá cáni táhan ndeé yúhu dá xihín na Judea cán sahá ña yóho. Ta sahá ña nanditúhún cuaha ná sahá ña yóho sahá ña cán quéa nasacu ini na cúu cuéntá Jesús cán chindahá na Pablo xihín Bernabé xihín java ga da cúu cuéntá Jesús ña ná cuhun na ñuu Jerusalén já ná nditúhún chága na sahá ña yóho xihín na apóstol ta xihín na sacuahá cómi cuéntá sahá na cúu cuéntá Jesús ndúu Jerusalén cán.

<sup>3</sup> Anda já na cúu cuéntá Jesús ndúu Antioquía ñachindahá na na cán chí ñaquee na cuahan na. Ta nu xíca na cuahan na cán ñayaha na chí ñundáhyi Fenicia xihín ñundáhyi Samaria. Ta cán nandicani na nuú na cúu cuéntá Jesús ndá quiahva nandiquehe na coó naquixi chichi Israel íchi cuéntá Jesús ta já najándacoo na costumbre yata nasacaja na jihna. Chí ñacajii ndivaha ini na cúu cuéntá Jesús cán tá naxini johu na ña yóho.

<sup>4</sup> Tá naxinu coo Pablo xihín Bernabé xihín java ga na cán ñuu Jerusalén já nandiquehe vaha na cúu cuéntá Jesús ndúu ñuu cán na. Ta jári na apóstol xihín na sacuahá veñuhu cán nandiquehe vaha na na. Anda já nandicani Pablo nuú na cán tóco ndihi ña náhnu ñacaja Ndióxi xihín dá. <sup>5</sup> Joo java na fariseo, na sa ndiquehe íchi cuéntá Jesús ñandaca ndichi na já ñacasáhá cáhí na já:

—Ndítahan nuú na cúu cuéntá Jesús, na coó naquixi chichi Israel chicaan na marca yiquí cuñu na. Ta ndítahan nu mí cahan í xihín ná ña ná cacu vaha na ley Moisés — ñacachi na fariseo cán.

<sup>6</sup> Anda já ñataca na apóstol xihín na sacuahá veñuhu ña ná nditúhún na ndaja coo sahá ña yóho. <sup>7</sup> Sa nanditúhún cuahá ndivaha na cán sahá ña yóho. Anda já ñandaca ndichi Pablo tañu na cán ta já ñacachi da já:

—Sa xini vaha ndó, ñani i ña ñacaxi Ndióxi yehe jihna ña ná caxi tuhún i tuhun vaha saha Jesús nuú na coó naquixi chichi Israel já ná candeé ri ini na cán va Jesús ña ná jácacu Ndióxi na. <sup>8</sup> Ta mé Ndióxi, mé a xini ndaja cáa ínimá in in ñayivi, mé a cán quéa najánaha nu yo ña ndiquehe vaha mé á na tóho. Jáchi nasahan ínimá yii mé á nu ná tá quiahva ñacaja xihín mí, na naquixi chichi Israel. <sup>9</sup> Ni in tuhún toho í coo cúu yo na vaha chága a juú ga inga na nu Ndióxi. Jáchi tá quiahva ñandaja vii Ndióxi mí sahá ña candeé ini Jesucristo quiahva já ñandaja vii ri a na cán va sahá ña candeé ini na Jesucristo. <sup>10</sup> Ta viti cúu á tátuhun nandindójo ndó ña ñacaja Ndióxi tá ñachindahá Jesucristo quivi a sahá cuachí. Ta viti cuni ndó caja ndúsa ndó xihín na tóho yóho ña ná cacu vaha na ley Moisés. Ta sa cánda ini ndó ña ni mí ta ni tásáhnú jícó yo a cuú caja í cacu vaha í ley cán. <sup>11</sup> Joo ña candeé cáhnú iní quéa ña jácacu maní uun Ndióxi mí sahá ña táhvi ini Jesucristo saha mí. Ta quiahva já táhvi ri ini a sahá na tóho cán va —ñacachi Pedro xihín ná.

<sup>12</sup> Ta xihín ña yóho ñacatáji yúhu tóco ndihi na cán. Ta táa johu na tá ñacasáhá Pablo xihín Bernabé ndicani da nu ná tóco ndihi ña náhnu xihín ña xitúhún ña nasahan Ndióxi ñamaní nu dá caja da nuú na coó naquixi chichi Israel cán. <sup>13</sup> Tá nandihí ñacahan da cán já ñacasáhá Jacobo cáhí da já:

—Cuni johu ndó ná cahan i xihín ndó, ñani i. <sup>14</sup> Sa ñacaxi tuhún Simón, da naní tucu Pedro nu yo tá nu cuítí ñacaja Ndióxi ñamaní xihín na tóho ta ñacaxi a na ña ná nduu na ñayivi cuéntá mé á. <sup>15</sup> Ta in quiahva cahan ña yóho xihín ña ñacahyí na



profeta sanahá tá nacaḥyí na ña nacachi Ndióxi:

<sup>16</sup> Tá sa nayaha tiempo já ndicó coo tucu ú. Ta tá quiahva nacaja cáhnu ñayivi yeḥe tá tiempo nasacomí David cuéntá sahá ñayivi Israel, quiahva já vaxi quivi caja i ña ná caja cáhnu tucu na yeḥe.

<sup>17</sup> Caja i já jáchi cuni ña ná ndinducú na tóho yeḥe ña ná cacuu u xitoho tóco ndihi na,

mé ná cúu ná nacaḥi yeḥe ná cacuu na cuéntá mí i.

<sup>18</sup> Ña yóho quéa nacachi Ndióxi sanahá ndivaha tá nacaḥi tuhun a ndaja coo tiempo viti —nacachi Jacobo xihín na cán.

<sup>19</sup> Já nacachi tucu Jacobo já xihín ná:

—Sahá ña cán quéa cáhan i ña co ndítahan caja ndúsa yó xihín na tóho cacu vaha na ley Moisés jáchi nacasahá ndico na íchi cuéntá Ndióxi viti. <sup>20</sup> Joo ña ndítahan caja í quéa caḥyí yo in carta ná cuḥun a nuú na cúu cuéntá Jesús ndúu ñuu Antioquía já ná caja na ñamaní ña ná a cáxi na cuñu quíti, rí najoco ñayivi nuú tiniñu yúu. Ta ná a cóo na xihín na co cúu ñájihí na á yí ná. Ta coto ná a cáxi na cuñu quíti, rí nasahnú. Ta coto ná a cáxi na nij. <sup>21</sup> Jáchi janda sanahá najánaha na ña yóho nuú ñayivi ndijáá ñuu tá quivi ndíquehe ndée ná tá jánaha na ley Moisés nu ná ini veñuhu —nacachi Jacobo xihín ná.

<sup>22</sup> Anda já na apóstol xihín na sacuahá veñuhu cán xihín tóco ndihi na cúu cuéntá Jesús najándique táhan na tuhun na ña caxi na tañu tóco ndihi na cúu cuéntá Jesús cán java da ná cuḥun ñuu Antioquía xihín Pablo xihín Bernabé. Ta da nacaḥi na cuḥun cúu Judas, da naní tucu Barsabás xihín Silas. Ndívi da yóho cúu da íin saha nuú na cúu cuéntá Jesús cán. <sup>23</sup> Ta ña yóho cúu tuhun ndáa nu carta ñéhe na cán cuahan na:

“Tóco ndihi ndeḥe, na cúu apóstol xihín na sacuahá veñuhu xihín na cúu cuéntá Jesús ndúu ñuu yóho chindahá nde Ndióxi coo ndóho, na cúu cuéntá Jesús, na coo naquixi chichi Israel, na ndúu ñuu Antioquía xihín ñundáhyi cuéntá Siria xihín Cilia jan. <sup>24</sup> Sa nañehé nde tuhun ña naquee

java na cúu cuéntá Jesús ñuu yóho nasaa na chí jan tá coo naxica na ñamaní nuú nde cuḥun na. Ta najáquihvi na ndohó ta najájana na jini ndó xihín tuhun cáhan na jáchi cáchi na xihín ndó ña ndítahan nu ndó chícáan ndó marca yiquí cuñu ndó ta ndítahan cacu vaha ndó ley Moisés já ná cuu cacu ndaa ínima ndo. <sup>25</sup> Sahá ña cán quéa ñúhu johu ndihi nde ña ná caxi nde java ñaní já ná catáhan da xihín Pablo xihín Bernabé saa da coto nihni da ndohó. <sup>26</sup> Mé Pablo xihín Bernabé yóho ndúu tiāhva da quivi da saha Jesucristo, mé a cúu xitoho í. <sup>27</sup> Ta chindahá nde Judas xihín Silas já ná cáhan yúhu mé ná xihín ndo já ná ndicani na saha tóco ndihi ña yóho nu ndo. <sup>28</sup> Mé ínima yíi Ndióxi najácahan ndeḥe ña co ndítahan nuú nde caja ndúsa nde xihín ndó cacu vaha ndó tóco ndihi ña sáhdá ley Moisés. Joo ná cáhan nde xihín ndo ndía quéa co ndítahan caja ndó: <sup>29</sup> Coto a cáxi ndó cuñu quíti, rí najoco na nuú tiniñu yúu. Ta coto a cáxi ndo nij ta a cáxi ndó cuñu quíti, rí nasahnú. Ta coto a cóo ndó xihín ñájihí á yí inga na. Tá ná cacu vaha ndó tóco ndihi ña yóho já quéa cúu ndó na cája vaha. Ña yóho cúu tuhun cáhan nde xihín ndo ta ná coo Ndióxi xihín ndo.” Ña yóho cáchi carta nachindahá na nuú na ñuu Antioquía cán.

<sup>30</sup> Anda já naquee na cán cuahan na ñuu Antioquía. Ta tá naxinu na ñuu Antioquía cán já najátaca na tóco ndihi na cúu cuéntá Jesús cán já nandiquiahva na carta nu ná.

<sup>31</sup> Ta tá nandihí nacaḥi na cúu cuéntá Jesús mé carta já nacaḥi ndivaha ini na jáchi nandindee chága ví ini na nacaja ña cáchi carta cán. <sup>32</sup> Mé Judas xihín Silas cúu da profeta, da jáyaha tuhun cáhan Ndióxi nuú ñayivi. Ta xihín ña yóho nasahan da cuahá tuhun ndeé ini na cúu cuéntá Jesús.

<sup>33</sup> Nasanduu na cán chá quivi ta chí nasacu ini Judas xihín Silas ndicó coo da ñuu Jerusalén jáchi cán ndúu na nachindahá ñahá ñuu Antioquía. Já nandindayí na cúu cuéntá Jesús da ña ná coo vaha da tá cuḥun da íchi. <sup>34</sup> Joo nasacu ini Silas candoo da ñuu Antioquía cán. <sup>35</sup> Ta nacandoo Pablo xihín Bernabé chága quivi ñuu Antioquía cán ta xihín cuahá java ga na najánaha

chága na tuhun vaha saha Jesús nuú ñayivi.

*Cuahān tucu Pablo cahān da tuhun vaha saha Jesús nuú ñayivi*

<sup>36</sup> Tá nayaha quivi já nacachi Pablo já xihín Bernabé:

—Cóho coto nihní na cúu cuéntá Jesús ndúu ndijáá ñuu nuú naxica nuu í nacahan yó tuhun Ndióxi jihna já ná candehé yo á ndíco yii va na Jesús —nacachi da.

<sup>37</sup> Cándúsa Bernabé cuhun da joo cúni da candaca tucu da Juan, da cáhan na Marcos xihín ña cuhun da xihín ná. <sup>38</sup> Joo Pablo nacahán da ña vaha chága ná a cáñehe na da cuhun da xihín ná jáchi najándacoo da na tá naxinu na estado Panfilia sahá ña coó naxeen ga da caca nuu da caja da chuun Ndióxi xihín ná. <sup>39</sup> Nanditúhún cuaha ná sahá ña yóho joo coó nandique táhan tuhun na sahá ña cán quéa nasahnda táhan na. Sahá ña cán quéa ñañehe Bernabé Marcos cuahan xihín dá chí isla Chipre. <sup>40</sup> Ta nacaxi Pablo Silas candaca táhan xihín dá. Ta naxica tahví na cúu cuéntá Jesús nu Ndióxi saha dá ña ná chindeé a da nuú cuhun da. Anda já naquee da cuahan da. <sup>41</sup> Nayaha da chí ñundáhyi Siria xihín ñundáhyi Cilicia ta ní cúu nuú cuahan da sahan da tuhun ndeé ini na cúu cuéntá Jesús ña ná candeeé chága ini na mé á.

## 16

*Cátahan Timoteo xica da xihín Pablo xihín Silas*

<sup>1</sup> Ta nayaha Pablo xihín Silas ñuu Derbe anda já naxinu coo na ñuu Listra. Ta cán nandiñehe ná in da cúu cuéntá Jesús, naní Timoteo, da cúu jahyi in ña cúu cuéntá Jesús, ña naquixi chíchi Israel. Ta tátá da cúu griego. <sup>2</sup> Ta na cúu cuéntá Jesús ndúu ñuu Listra xihín na ndúu ñuu Iconio nacahan vaha na saha Timoteo. <sup>3</sup> Cúni Pablo ña ná catáhan Timoteo xihín dá caca nuu da xihín dá sahá ña cán quéa nacaja Pablo ña nachicaan na marca yiquí cuñu Timoteo tá quiahva cáchi ley Moisés já ná a cáhan núu na Israel ndúu ndijáá ñuu válí cán saha dá. Jáchi sa xini vaha ndihi na cán ña cúu Timoteo jahyi in taa griego sahá ña cán quéa coó nachicaan na marca Timoteo tá loho chá da. <sup>4</sup> Ta já naquee ndihi na cán

cuahan na ta ní cúu ñuu nu xica na cuahan na cáxi tuhun na nuú na cúu cuéntá Jesús ña ná caja na ña nacachi na sacuaaha xihín na apóstol ndúu ñuu Jerusalén cán. <sup>5</sup> Xihín ña yóho nandindacú chága na cúu cuéntá Jesús ta candeé cáhnu chága ini na mé á. Ta in in quivi yaha johu ndícuaha chága ñayivi ndíhvi íchi cuéntá Jesús.

*Ña naxini Pablo nacaja Ndióxi tá nasahin da ñuu Troas*

<sup>6</sup> Ta nasaji ínima yii Ndióxi na cán ña ná a cuhun na estado Asia cahan na tuhun vaha saha Jesús nuú ñayivi cán. Sahá ña cán quéa nayaha na ñundáhyi cuéntá Frigia xihín Galacia cuahan na. <sup>7</sup> Já naxinu coo na yúhu estado Misia. Ta chí cán yaha na cuhun na ñundáhyi cuéntá Bitinia nacahán na. Joo coó nasahan ínima yii Ndióxi ñamaní nu ná caja na ña. <sup>8</sup> Anda já nayaha saa na estado Misia janda quiahva naxinu coo na in ñuu naní Troas. <sup>9</sup> Ta in ñuu nani ín da mé ñuu Troas cán nasani ndímáhnú Pablo. Ta ña naxini da cúu in taa, da naquixi chí estado Macedonia. Ta cándichi da cáhan ndahví da xihín Pablo já cáchi da já: “Naha ndó chí Macedonia yóho ña ná chindeé ndó ndehe.” <sup>10</sup> Tá nandicani Pablo ña yóho nuú nde chí ivi laá nacaja tiaha nde ñaha nde jáchi sa nacandaá cáxi ini nde ña mé Ndióxi quéa cána ndehe ña ná cuhun nde estado Macedonia cán já ná caxi tuhun nde tuhun vaha saha Jesús nuú ñayivi ndúu cán.

*Xinu coo Pablo xihín na xica xihín dá ñuu Filipos*

<sup>11</sup> Tá nandihi já nandaa nde barco ñuu Troas já naquee nde cuahan ndacú nde isla naní Samotracia. Ta janda quivi itaan já naxinu coo nde ñuu Neápolis. <sup>12</sup> Ta cán nanuu nde mé barco cuahan sahá nde chí ñuu Filipos. Mé ñuu Filipos cán cúu á ñuu ña ín chága saha nuú java ga ñuu válí ñúhu chí Macedonia cán. Ta ndíco a ñuu Roma. Ta nasanduu nde ñuu Filipos cán chá quivi. <sup>13</sup> Ta in quivi ndíquehe ndeé ná já naquee nde cuahan nde yuhú ñuu yati yuhú yuta nu sá taca ñayivi xica tahví na nu Ndióxi. Já nasacoo nde cán ta nacasáhá nde cáhan nde tuhun vaha saha Jesús nuú najihí, na táca cán. <sup>14</sup> In mé ñañáha cán naní ña Lidia ta cúu ña ña ñuu Tiatira. Mé Lidia yóho cúu

ñá ñá jíco jáhma vaha ña color ndíhí. Ta cúu ñá in ñá cája cáhnu Ndióxi. Ta nani xini joho ñá ña cáhan Pablo saha Jesús já nasuná Ndióxi xini túni ña já nacandúsa ñá ña cáhan Pablo cán. <sup>15</sup> Tá nandihí nacandúta ñá xihín na vehe ñá ta já cáhí ña já xihín nde:

—Tá ta mé a ndaa ndícuni ndó yehe ña cúu u cuéntá Jesús caja ndó ñamaní saá ndó vehe e coo ndó —nacachi ña xihín nde.

Ta nacaja ndúsa ña xihín nde chí nacandoo too nde vehe ñá cán.

<sup>16</sup> Ta ndaja coo in tañu tá cuahan nde nu sá xica tahví nde nu Ndióxi já nanditahan nde in ñá tacú, ñá ndácaan ínima quini ini. Ta cája ña cán ña ná ndicuni ini ñá. Mé ñá tacú yóho cúu ñá naxeen na. Ta mé xitoho ñá cán tává cuaha dá jihún sahá ña ndícuni ini ñá. <sup>17</sup> Ta mé ñá tacú yóho nacasáhá ña ndíco ñá jata Pablo xihín jata nde ta cáyuhú cóhó ña já cáhí ña já:

—Da cája cáhnu Ndióxi, ña cáhnu ín indivi cúu da cáshan yóho. Ta xica da cáxi tuhun da xihín ndó ndá quiahva cuu cacu ndaa ínima ndo —cáhí ña cáyuhú ña.

<sup>18</sup> Já cuití já cuití cája ñá cuahá quivi janda quiahva co ndéé ga ini Pablo xihín ña cája ñá. Chí nandicoto nihni Pablo nu ñá já nacachi da já xihín ínima quini ndácaan ini ñá cán:

—Xihín quivi Jesucristo sáhdá i chuun nuun ña ná queún ini ñá loho yóho —cáhí Pablo.

Chí ivi laá naqueta ínima quini cán cuahan.

<sup>19</sup> Joo tá naxini na cúu xitoho ñá cán ña a cóo ga cana jihún na caja ñá cán já natiin na Pablo xihín Silas já ñehe na da nasahan na vechúun nuú na jutixia. <sup>20</sup> Tá naxinu coo na cán já nacachi na já xihín da cúu juéxe cán:

—Da naquixi chichi Israel yóho nandai cuu da jándinihi da ñayivi ñuu í. <sup>21</sup> Jáchi jánaha da costumbre mé va da nuú ñayivi. Ta mí a cuú candúsa í ta ni a cuú caja í costumbre da yóho jáchi cúu yó ñayivi ndíco ñuu Roma —nacachi na cán xihín juéxe.

<sup>22</sup> Anda já nandicuítá ñayivi xihín dá. Já nasahnda juéxe cán chuun ña ná tavá na jáhma Pablo xihín Silas ta ná cani na ndíví da xihín yíto. <sup>23</sup> Tá nandihí nacani quini ndivaha na da já nataán na da vecaa. Ta

nasahnda na chuun nuú da ndáá vecaa cán ña ná candaa vaha da da. <sup>24</sup> Tá natahnda chuun yóho nuú da ndáá vecaa cán já nachicaan da Pablo xihín Silas janda sa vehe cuí vecaa cán. Ta já nachicaan da saha dá tañu ivi yíto nani cepo já ná ndituun vaha da.

<sup>25</sup> Joo tátuhun java ñuu xica tahví Pablo xihín Silas nu Ndióxi ta xíta da ña cája cáhnu da mé á nani táa joho java ga na ñúhu ini vecaa cán nu cáhan da. <sup>26</sup> In jonáá cuití nacasáhá táan ndeé ndivaha chí janda yuu ndúhu sahá vecaa cán cánda. Anda já nanuna tóco ndihí yéhe caa cán ta nacuyu cadena nasandíco tóco ndihí na nasañuhu vecaa cán. <sup>27</sup> Anda já nandicáxi ini da ndáá vecaa cán ta tá naxini da núna yéhe caa cán já natuhun da yuchú caní dá ña cahní da mé dá jáchi nacahán da sa naquee ndihí na nasañuhu vecaa cán cuahan na. <sup>28</sup> Joo nacayuhú Pablo nu dá já nacachi Pablo já xihín dá:

—A cáhí tohún yohó jáchi yóho ndúu ndihí va nde.

<sup>29</sup> Anda já naxica da ndáá vecaa cán in lámpara já xinu da nandihvi da nu ndúu na vecaa. Ta chí quíji mé dá xihín ña yíhví da já nacaxítí da nu Pablo xihín nu Silas. <sup>30</sup> Tá nandihí já natavá da na já nacasáhá ndáca tuhún da na já nacachi da já:

—Ndía ndítahan caja i já ná jácacu ndaa Ndióxi ínima i —nacachi da.

<sup>31</sup> Anda já nanducú ñehe Pablo xihín Silas tuhun nu dá já cáhí da já xihín dá:

—Ndítahan candúsún Jesucristo, xitoho í já ná cacu ndaa ínimum xihín ínima tóco ndihí na vehún —nacachi da.

<sup>32</sup> Anda já nacasáhá Pablo ndícani da tuhun vaha saha Jesús nuú da cán xihín nu tóco ndihí na ndúu vehe da cán. <sup>33</sup> Ta mé hora já nacaja tátá da ndáá vecaa cán nuú nandicuehe jata Pablo xihín jata Silas nuú nacani yíto cán. Ta tá nandihí já nacandúta da ndáá vecaa cán xihín tóco ndihí na vehe da. <sup>34</sup> Tá nandihí já ndáca da Pablo xihín Silas nasahan da xihín dá vehe da. Ta cán nacaja ndíví na ña cuxu Pablo xihín Silas. Ta chí nacajii ndivaha ini da ndáá vecaa cán xihín na vehe da jáchi sa nandiquehe na íchi cuéntá Jesús.

<sup>35</sup> Ta naha inga quiví itaān já nāchindahá nā cúú juéxe cán policia nuú da ndáá vecaa cán ña ná janí da Pablo xihín Silas vecaa. <sup>36</sup> Anda já nācachi da ndáá vecaa cán já xihín Pablo:

—Nasahnda nā cúú juéxe chuun nuú i ña ná janí i ndohó cuhun ndo. Sahá ña cán quea cáxi tuhun i xihín ndó cuáhán quee ndó ta ná cuhun Ndióxi xihín ndo — nācachi da xihín dá.

<sup>37</sup> Joo nācahan Pablo xihín da cúú policia cán já nācachi da já xihín ná:

—A váha toho nācaja na xihín nde jáchi cúú nde nā romano ta nā jutixia jan nācani quini na ndehe nu táhyí tóco ndihi ñayivi tá cámaní caja víi nā sahá nde. Ta tá nāndihi já nātaán jín ga nā ndehe vecaa. Ta viti cúni nā janí jehé nā ndehe quee nde cuhun nde. Joo a váha toho cája na já. Sahá ña cán quea a queta nde janda quiahva ná quixi mé ná tavá nā ndehe já quee nde — nācachi Pablo xihín da cúú policia cán.

<sup>38</sup> Anda já nasahan nā cúú policia nāndicani na nuú nā cúú juéxe ña nācachi Pablo xihín ná. Tá nācandaā ini nā cúú juéxe cán ña cúú Pablo xihín Silas da romano chí nayihví nā. <sup>39</sup> Anda já nasahan nā nāxica nā ñamaní nu Pablo xihín nu Silas ña ná caja cáhnu ini da sahá ña nācaja na. Já nātavá nā da vecaa ta tá nāndihi já nāxica nā ñamaní nu dá ña ná quee da ñuu cán cuhun da. <sup>40</sup> Tá nāquee Pablo xihín Silas vecaa já nasahan nā vehe ña naní Lidia. Ta tá nāndihi nāndique táhan da xihín nā cúú cuéntá Jesús ndúu cán já nasahan da tuhun ndéé ini na anda já nāquee da cuahan da.

## 17

### *Ndinihi ñayivi ñuu Tesalónica*

<sup>1</sup> Nani xica Pablo xihín Silas cuahan da íchi nayaha da chí ñuu naní Anfípolis xihín inga ñuu naní Apolonia anda quiahva nāxinu coo na ñuu Tesalónica. Cán nasahin veñuhu nu táca nā Israel. <sup>2</sup> Ta sahá ña nācaan Pablo sahan da veñuhu quiví ndiquehe ndéé ná sahá ña cán quea nāquihvi da veñuhu cán. Ta tixi uní semana nācahan da tuhun Ndióxi xihín ná mé quiví ndiquehe ndéé ná. <sup>3</sup> Ta nu libro yii

Ndióxi tává Pablo tuhun ndicani da nu ná ña nditahan nuú Jesucristo ndoho ini a. Ta tá sa nāndihi nāxihí a já nditacu a jáchi já cáchi libro yii Ndióxi coo. Já nācachi Pablo já xihín ná:

—Mé Jesús, mé a cáhan i saha nu ndo yóho, mé a yóho cúú Cristo, ña nāchindahá Ndióxi cacomí cuéntá sahá ñayivi — nācachi Pablo.

<sup>4</sup> Ta chí nācandúsa java nā Israel ña nācachi Pablo xihín ná. Anda já nācatáhan nā xihín Pablo xihín Silas xica nuu na. Ta cuahá ri nā griego, nā sa cája cáhnu Ndióxi ndúu cán nācandúsa na ña nācachi Pablo xihín ná. Tá nācandúsa ri cuahá najihí, nā ín toní ñúhú ñayivi xihín ta nāndihvi na íchi cuéntá Jesús. <sup>5</sup> Joo nā Israel, nā co cándúsa Jesús nācasahá cáhiví ini na. Sahá ña cán quea najátaca na java taā quini, da coo chuun nu xica nuu mé cáyé cán. Já nācasahá nā jándinihi na ñayivi mé ñuu Tesalónica cán. Anda já cáti na nasahan nā vehe in da naní Jasón. Ta xihín ña ndúsa nāquihvi na vehe da cán ña ndínducú nā Pablo xihín Silas ña tavá nā da ndíquiahva na da nuú nā sacuahā ñuu cán. <sup>6</sup> Joo coo nāndinehe ná Pablo xihín Silas cán sahá ña cán quea janda mé Jasón, da xihín ñaha vehe cán ñúhu na da xihín java ga nā cúú cuéntá Jesús cuahan nā nuú nā jutixia ñuu cán. Tá nāndihi já cáyuhú nā já cáchi nā já xihín nā jutixia cán:

—Da naní Pablo xihín da naní Silas xica nuu da níi cúú ñuyiví jájana da jini ñayivi. Ta quiahva já cúni da caja da xihín ñayivi ñuu í. <sup>7</sup> Ta da naní Jasón yóho nāndiquehe vaha da da cán vehe da. Ta xihín ña cája nā yóho náha ña co cája na ña sáhdá ley ñuu Roma ta ni co cája cáhnu na da cómi cuéntá sahá ñuu Roma. Jáchi mé nā yóho xica na cáhan nā ña ín inga da cómi cuéntá sahá ñayivi. Ta cáchi nā cúú dá in da naní Jesús — nācachi na.

<sup>8</sup> Tá nāxini johó ñayivi xihín nā jutixia cán ña yóho chí nācasahá nā ndívaā nā. <sup>9</sup> Joo nācahvi Jasón xihín java nā cúú cuéntá Jesús cán jjuhún nuú nā jutixia cán já najaní ñahá nā.

*Cuahan Pablo xihín Silas ñuu Berea*

<sup>10</sup> Ta tá sa nacuaá mé ñuuú já nachindahá na cúu cuéntá Jesús cán Pablo xihín Silas já ná cuhun da chí ñuu Berea. Ta tá naxinu coo da ñuu Berea cán já nandihvi da veñuhu na Israel cán. <sup>11</sup> Ta nasuná chága na Israel cán ínimá ná a juú ga na ndúu ñuu Tesalónica chí cájii íní na nandiquehe na tuhun Ndióxi. Ta ndijáá níi quivi ndínducú na nuú tuhun Ndióxi ña á mé a ndaa cúu ña jánaħa Pablo nu ná. <sup>12</sup> Ta cuaha táhan na naquixi chichi Israel cán nandiquehe na íchi cuéntá Jesús. Ta cuahá najihí griego, na tácu ini nación cán xihín cuahá nataa griego nandiquehe na íchi cuéntá Jesús. <sup>13</sup> Joo tá nañehé na Israel ñuu Tesalónica tuhun ña ín Pablo ñuu Berea cáhan da tuhun Ndióxi nuú ñayivi chí ivi laá nasahan na jándinihi na ñayivi ñuu Berea cán já ná ndicuíta na xihín Pablo. <sup>14</sup> Joo ivi laá na cúu cuéntá Jesús cán nachindahá na Pablo cuahan da yati yuhú tañuhu nani nacandoo Silas xihín Timoteo ñuu Berea cán. <sup>15</sup> Ta java na cúu cuéntá Jesús ndáca na Pablo ta nasañehé na da janda ñuu Atenas. Ta tá nandicó coo na cán ñuu Berea já ñéhe na chuun ña ná cuhun quíi Silas xihín Timoteo ñuu Atenas ná ndique táhan da xihín Pablo.

### *Ín Pablo ñuu Atenas*

<sup>16</sup> Nani ndáti Pablo xinu coo Silas xihín Timoteo ñuu Atenas cán já nacasáhá ndíhi ini da jáchi níi cúu ñuu cán nachutú ndaa xihín cuahá tiniñu yúu ndícaħán ñayivi ñuu cán. <sup>17</sup> Sahá ña cán quéa nacasáhá Pablo cáhan da tuhun Ndióxi xihín na Israel ini veñuhu na. Ta quiahva já nacahan ri da tuhun Ndióxi xihín java na toho, na cája cáhnu Ndióxi cán. Ta jári ndijáá níi quivi cáhan da tuhun Ndióxi xihín ñayivi táca nuú yahvi ñuu cán. <sup>18</sup> Ta java taa, da jácuaha íchi cuéntá Epicureos xihín da jácuaha íchi cuéntá Estoicos nacasáhá ndítuhún na xihín Pablo. Joo java na cán cáchi na saħa Pablo ña cuahá ndivaha cáhan da ta coo cándaħa ini na ndá quéa cáhan da. Ta java na cáchi na já saħa dá:

—Á tá coo ta java ga ndiόxi xica nuu da cáhan da saħa —cáchi na.

Nacachi na ña yóho saħa Pablo jáchi naxica nuu mé dá cáhan da tuhun vaha

saha Jesús ta cáhan da ña nanditacu tucu Jesús. <sup>19</sup> Sahá ña cán quéa ndáca na Pablo cuahan ná in nuú naní Areópago jáchi cán cúu nu ndítaca ñayivi ndítuhún na. Ta tá naxinu coo Pablo cán já nacasáhá ndáca tuhún na da já cáchi na já xihín dá:

—Á cajún ñamaní caxi tuhún xihín nde ndá cúu ña saá ña xícún jánaħún nuú ñayivi. <sup>20</sup> Jáchi sa nañehé nde tuhun ña cátóntó ñayivi xihín ña jánaħún nu ná ta viti cúní nde candaħa ini nde ndía quéa jánaħún nu ná —nacachi na xihín Pablo.

<sup>21</sup> Nacachi na já xihín Pablo jáchi tóco ndihi ñayivi Atenas xihín na toho ndúu cán ndijáá níi quivi ndinuhu ini na ndítuhún na ñaha saá, ña naxini johu na jánaħa inga na.

<sup>22</sup> Anda já nacandichi Pablo tañu na ndúu mé nuú naní Areópago cán já nacachi da já xihín ná:

—Candehé ndó, ñayivi ñuu Atenas. Candaħa cáxi ini i ña cúu ndó ñayivi cátóo ndicahán cuahá nuú tiniñu yúu, ña cúu ndiόxi ndo ta ndícaħán ndó ña xihín ndinuhu ini ndó. <sup>23</sup> Jáchi tá xica nuu i ñuu ndó já naxini i cuahá nunáa nu cája cáhnu ndó ña. Ta nu xica nuu i cán naxini i inga nunáa. Ta nunáa cán ndaa in tuhun ta cáchi a: “Naa yóho cúu nu ndícaħán nde ndiόxi co xini nde”, já naxini i cáchi a. Ta vatí co xini ndó Ndiόxi ndícaħán ndo cán joo cája cáhnu ndó ña. Ta mé Ndiόxi cán quéa cúní caħan i saħa nu ndó viti.

<sup>24</sup> Mé Ndiόxi cán quéa nacavaha ñuyiví xihín tóco ndihi ñaha ín ñuyiví yóho. Ta mé á cómi a cuéntá saħa indiví xihín ñuyiví. Ta co ndácaħan toho mé á ini veñuhu ña nacavaha ndahá ñayivi. <sup>25</sup> Ta ni co xini ñuhú a chindeé ñayivi mé á jáchi sa mé á quéa cája ña ná catacu mí. Mé Ndiόxi quéa saħan tachí yó nu yo ta mé á saħan tóco ndihi ñaha nu yo.

<sup>26</sup> Mé Ndiόxi cán nacavaha in taa nu cuítí. Ta tóco ndihi ñayivi ndúu ñuyiví naquixi na chichi mé taa, da nacavaha Ndiόxi cán. Tá nandihí já najándicuíta nuu Ndiόxi ñayivi naquixi chichi da cán níi cúu ñuyiví já nataħnda in in nación canduu a. Ta sa nasacu ini Ndiόxi ndaja tiempo canduu in in nación ñuyiví yóho ta nasacu ini mé á ndáchí coo in in nación. <sup>27</sup> Já nacaja

Ndióxi jáchi cúni a ña ná ndinducú ñayivi mé á ta já ná ndiñeñe ná íchi cuéntá mé á. Joo mé a ndaa yati va íin Ndióxi nu tóco ndihi ñayivi. <sup>28</sup> Jáchi mé á cája ña ná catacú ta ná canda yiquí cuñu í. Sanahá ñacachi java ña cuéntá mé ndó já: “Cúu yó ña vehe Ndióxi.” <sup>29</sup> Joo tá mé a ndaa cúu yó ña vehe Ndióxi co ndítahan cahán yo ña Ndióxi cúu tiniñu yúu ña najándicuchu na xihín jihun cuáán á xihín jihun cúxú. Ta ni co ndítahan cahán yo ña Ndióxi cúu tiniñu yúu cávaha ndahá ñayivi xihín yuu. Jáchi jiní mé va na ñan cána ña cávaha na. <sup>30</sup> Jihna ñasacu ini Ndióxi ña a jándoho toho a ini ñayivi sahá cuachi ñasacaja na jáchi co cánda ini na ña cúni mé á, nduu. Joo viti sáhdá Ndióxi chuun nu tóco ndihi ñayivi ña ná ndicó coo ini na ta ná a cája cáhnu ga na tiniñu yúu. <sup>31</sup> Jáchi sa ñasacu Ndióxi in quivi cajú vii a saha tóco ndihi ñayivi nduu ñuyivi yóho. Ta sa ñacaxi mé á Jesús ña cajú vii ndaa mé á saha ná. Ta najánditacu tucu Ndióxi Jesús tá nandihí ñaxihí a. Ta xihín ña yóho nanaha nuú ñayivi ña mé a ndaa cajú vii Jesús saha ná —ñacachi Pablo xihín ndihi na cán.

<sup>32</sup> Tá ñaxini johó na cán ña cáchi Pablo ña vaxi quivi nditacu ndii já ñacasáhá java na cán sácu ndaa na da. Joo java na cáchi na já xihín dá:

—Vaha chága ná cahún sahá ña ñan nuú nde inga tañu —cáchi na xihín dá.

<sup>33</sup> Anda já ñaquee Pablo nu Areópago cán cuahan da. <sup>34</sup> Joo java ñayivi, na ñacandúsa ña cáchi da ñacasáhá ndico na da xica na. Tañu na cán ñasandacaan in da naní Dionisio, da cúu táhan na ndítaca Areópago cán. Ta tañu na ñacandúsa cán ndácaan ri in ñáñáha naní Dámaris. Ta jári java chága na cándúsa nandihvi na íchi cuéntá Jesús.

## 18

### *Xínu coo Pablo ñuu Corinto*

<sup>1</sup> Tá nandihí já ñaquee Pablo ñuu Atenas cán já cuahan da chí ñuu Corinto. <sup>2</sup> Ta mé cán nandique táhan da xihín in da Israel naní Aquila, da ñasacuu estado Ponto. Ta jacá cúu saá va ñaxinu coo Aquila ñuu Corinto cán xihín ñájihí da, ña naní Priscila. Ta ndívi na yóho sa ñaquee na ñuu Roma ndácaan nación Italia jáchi Claudio, da cómi

cuéntá sahá na ñuu Roma cán ñasahnda da chuun ña ná quee ndihi na Israel cuhun na. Ña cán quea ñaxinu Aquila xihín ñájihí da ñuu Corinto cán. Anda já ñasahan Pablo ñaxito nihni da na nu nduu na cán. <sup>3</sup> Ta ñacandoo Pablo vehe na cán cája chúun da xihín ná jáchi sa mé chuun ña cája na cán tiahva ri da cán va. Ta chuun ñasacaja na quea cávaha na vehe lona, ña ndeé. <sup>4</sup> Ta tá xínu coo quivi ndiquehe ndeé ná já sahan da veñuhu na Israel cahan da tuhun Ndióxi xihín ná. Ta já najáxinu da ini na Israel xihín na tóho já ñacasáhá na cándúsa na Jesús.

<sup>5</sup> Ta ndaja coo najándacoo Silas xihín Timoteo estado Macedonia ta ñaxinu coo na ñuu Corinto cán. Anda jávi najándacoo Pablo chuun cája da cán já ñacasáhá da ndúcú ndeé chága da cahan da tuhun Ndióxi nuú ñayivi. Ta cáxi táhyí cahan da xihín na ñaquixi chichi Israel ña mé Jesús cúu á ña ndáti na chindahá Ndióxi quixi. <sup>6</sup> Joo na ñaquixi chichi Israel cán coo nandiquehe na tuhun cahan Pablo ta ñacasáhá cánahá na xihín dá ta cahan núu na saha Jesús. Anda já ñaquiji nihni Pablo jáhma dá já ná canda ini na ña co ndójo ga da cuachi sahá na Israel cán ta já ñacachi da já xihín ná:

—Tá ná cuhun ndó indayá ta cómi mé va ndó cuachi sahá. Joo yehe co ndójo ga i cuachi saha ndo jáchi sa ñacahan i tuhun Ndióxi xihín ndo ta co cúni ndó cándúsa ndó ña. Viti xihín chí nuu cuhun i cahan i tuhun vaha saha Jesús nuú na coo ñaquixi chichi Israel —ñacachi Pablo xihín ná.

<sup>7</sup> Já ñaqueta da veñuhu na cán cuahan da. Já ñasaa da vehe in da naní Justo, da cája cáhnu Ndióxi. Ta yati jiní veñuhu cán íin vehe da. <sup>8</sup> Ta in da naní Crispo, da sáhdá chuun veñuhu cán ñacandúsa da Jesús, xitoho í xihín tóco ndihí na vehe da. Ta cuaha táhan mé na ñuu Corinto cán nandiquehe na íchi cuéntá Jesús ta ñacandúta ná tá ñaxini johó na tuhun Ndióxi ñacahan Pablo xihín ná. <sup>9</sup> Ta ndaja coo in ñuu ñaquixi tátuhun in sani nu Pablo ta xihín ña cán ñacahan Ndióxi xihín dá já ñacachi a já:

—A yíhvún cahún sahá i nuú ñayivi ta coto a catáji yuhun cahan chágun xihín ná

saha i. <sup>10</sup> Jáchí íin vi xuhun ta ni in na a cúu tiin yohó ña ná caja xíxi na xuhun. Jáchí sa ndúu cuahá ndivaha ñayivi ñuu yóho, na cacuu cuéntá mí i —nacachi Ndióxi xihín dá.

<sup>11</sup> Sahá ña cán quéa nasahin tóo Pablo in cuia java ñuu Corinto cán ta najánaha da tuhun Ndióxi nuú ñayivi cán.

<sup>12</sup> Joo mé tiempo cán nacasáhá cómi in da naní Galión cuéntá sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cúní na caja xíxi na xihín Pablo chí natiin na da já ñéhe na da cuahan da vechúun. <sup>13</sup> Ta mé cán nacasáhá cáchí na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhdá ley yo cája íjá —cáchí na cán xihín gobernador.

<sup>14</sup> Anda já ndúcú Pablo candichi da cahan da joo mé Galión cán nacasáhá cáchí da já xihín na Israel cán:

—Tá cuachi ndeé ná caja da yóho já quéa cuu cuni johó i nu cahan ndo ná ndaja ndichi i saha dá, nduu. <sup>15</sup> Joo co cúní toho i caja víi sahá ña jan jáchi cúu á sahá tuhun cahan ndo xihín sahá quivi ñayivi Israel xihín saha ley mé va ndó ña cán quéa vaha chága ná caja víi mé va ndó sahá ña yóho —nacachi da cúu gobernador cán xihín ná.

<sup>16</sup> Tá nandihí já natavá da na Israel vechúun cán. <sup>17</sup> Anda já natiin tóco ndihi na griego cán da naní Sóstenes, da sáhdá chuun veñuhu cán. Ta natiin na da mé nu táhyí mé da cúu gobernador cán nacani na da. Joo coó nasahní toho Galión mé dá sahá ña nacaja na.

#### *Ndicó coo tucu Pablo chí Antioquia*

<sup>18</sup> Cuahá va quivi nacandoo tóo chága Pablo ñuu Corinto cán. Anda já nandindayí da na cúu cuéntá Jesús ndúu cán já naquee da cuahan da ñundáhyi cuéntá Siria. Ta ndáca da Aquila xihín Priscila cuahan na xihín dá. Ta tá naxinu da ñuu Cencrea tá camani ndaa da barco cuhun chága da chí nuu já najatá lahla da jini dá já ná xinu coo nuú tuhun nacahan da. <sup>19</sup> Ta tá naxinu coo da ñuu Efeso xihín na ndáca táhan xihín dá cán já najándacoo da Priscila xihín Aquila.

Ta naquee da cuahan da chí veñuhu ñuu Efeso cán nuú nacahan da tuhun Ndióxi nuú na Israel, na táca cán. <sup>20</sup> Tá nandihí já nacasáhá cahan ndahví na Israel cán xihín Pablo ña ná candoo tóo da chága quivi xihín ná. Joo coó naxeen toho da. <sup>21</sup> Ña nacaja da quéa nandindayí da na já nacachi da já xihín ná:

—Ndítahan cuhun i coo i Jerusalén jáchi sa nandindaa quivi vaxi víco. Joo ndicó coo tucu u coto nihni i ndohó tá cúní Ndióxi —nacachi Pablo xihín ná.

Tá nandihí já ndaa da barco naquee da ñuu Efeso. <sup>22</sup> Ta tá naxinu coo da ñuu Cesarea já naquee da cuahan da chí ñuu Jerusalén cahan Ndióxi da xihín na cúu cuéntá Jesús ndúu cán. Tá nandihí já naquee da cuahan da chí inga ñuu naní Antioquia. <sup>23</sup> Ta tá nandihí nasahin da chá quivi cán já naquee tucu da cuahan da tá in tá in ñuu válí ñuhu chí estado Galacia xihín estado Frigia ña quiahva da tuhun ndeé ini na cúu cuéntá Jesús ndúu cán.

#### *Cahan Apolos tuhun Ndióxi nuú na ñuu Efeso*

<sup>24</sup> Mé tañu já naxinu coo in da naquixi chichi Israel naní Apolos mé ñuu Efeso cán. Mé Apolos yóho cúu dá da nacacu ñuu Alejandría. Ta cúu dá in da tiahva vaha tuhun Ndióxi ta tiahva vaha da jánaha da ña nuú ñayivi. <sup>25</sup> Mé Apolos yóho sa najácuaha vaha da íchi cuéntá Jesús, xitoho í ta xihín ndinuhu ini da cahan da saha mé á nuú ñayivi. Ta cáxí táhyí jánaha da saha Jesús nu ná. Ta nacahan da xihín ná ña ndítahan candúta ñayivi tá quiahva najáandúta Juan ñayivi jihna. Joo co xini vaha da tóco ndihi ña najánaha Jesús. <sup>26</sup> Chí já naquihvi mé Apolos veñuhu cán cahan da tuhun Ndióxi xihín ñayivi jáchi co yíhví da cahan da xihín ná. Ta ndaja coo naxini johó Priscila xihín Aquila nu cahan da. Ta tá nandihí já ñéhe na da cuahan na já nandicani vaha chága na nu dá ndaja in íchi cuéntá Ndióxi. <sup>27</sup> Ta tá nasacu ini Apolos cuhun da chí estado Acaya já nachindeé na cúu cuéntá Jesús da já ná cuu cuhun vaha da. Ta nacahyí na in carta nasahan na nu dá ná quiahva da ña nuú na cúu cuéntá Jesús ndúu cán já quéa ná ndiquehe vaha

na da. Ta tá naxinu coo Apolos yóho estado Acaya cán naxindeé cuahá ndivaha da na cúu cuéntá Jesús, na nacandeé ini mé á sahá ña natahvi ini Ndióxi saha ná. <sup>28</sup> Ta nu cáxí táhyí ndihi ñayivi nanaha da ña a juú ña ndaa cúu ña jánaha na Israel nuú ñayivi. Ta xihín tuhun Ndióxi nanaha da nu ná ña mé Jesús cúu Cristo, mé a nachindahá Ndióxi cacomí cuéntá sahá ñayivi.

## 19

### *Tá in Pablo ñuu Efeso*

<sup>1</sup> Ta nani in Apolos ñuu Corinto cán já nayaha Pablo chí yucu janda quiahva naxinu coo da ñuu Efeso. Ta cán nandiñehe dá java na cúu cuéntá Jesús. <sup>2</sup> Já nandaca tuhún da na já nacachi da já xihín ná:

—Á nandicutú ndaa ínima ndo xihín ínima yii Ndióxi tá nacandúsa ndó Jesús —nacachi da xihín ná.

Já nanducú ñehe na cán tuhun nu dá já cáchí na já xihín dá:

—Chí a ñáha mé va candaá ini nde saha ínima yii Ndióxi jan —nacachi na cán xihín Pablo.

<sup>3</sup> Anda já nandaca tuhún Pablo na já cáchí da já xihín ná:

—Ndaja vaha nacandúta ndo, dá já.

Anda já nanducú ñehe na cán tuhun nu dá já nacachi na já:

—Nacandúta nde tá quiahva najánaha Juan —nacachi na.

<sup>4</sup> Anda já nacachi tucu Pablo já xihín ná:

—Najácandúta Juan ñayivi já ná naha na nuú ñayivi ña nandijama na ta co cája ga na cuachi nasacaja na jihna. Joo nacahan Juan xihín ná ña ndítahan nu ná candúsa na inga da vaxi jata dá. Ta da nacahan Juan cán saha cúu Jesús, mé a nachindahá Ndióxi cacomí cuéntá sahá ñayivi —nacachi Pablo xihín ná.

<sup>5</sup> Tá naxini johu na cán ña nacachi Pablo xihín ná chí ivi laá nacandúta ná cuéntá Jesús, mé a cúu xitoho í. <sup>6</sup> Ta tá nachojó Pablo ndáha dá jiní ná já naxinu ínima yii Ndióxi najándicutú a ini na. Anda já nacasáhá na ndícahan na inga tuhun ña coo nasatiahva na. Ta jáyaha na tuhun nacahan Ndióxi nuú na ndúu cán. <sup>7</sup> Ta tixi ndihi na cán cúu ná tátuhun uxu ivi taa.

<sup>8</sup> Ta tixi uní yoo nasahin Pablo ñuu cán sahan da veñuhu jánaha da saha Jesús nuú ñayivi xihín ndinuhu ini da. Ta jáxinu da ini ñayivi ña ná ndihvi na íchi cuéntá Jesús já cuu cacomí mé á cuéntá saha ná. <sup>9</sup> Joo java na cán sáa ini na ta coo naxeen na candúsa na nu cáhan da. Ña nacaja na quéa nacasáhá cáhan nuu na saha tuhun vaha cáhan saha Jesús nuú ñayivi. Saha ña cán quéa natavá xoo Pablo na cúu cuéntá Jesús tañu na cán já nasahan ndaca da na in vehe escuela nu in in da naní Tiranno ta cán jánaha Pablo tuhun Ndióxi nu ná ndijáa ní quivi. <sup>10</sup> Já nasacaja Pablo tixi ivi cuia ta xihín ña cája da naxini johu ndihi na ndúu estado Asia tuhun vaha saha Jesús, xitoho í. Ta na naxini johu tuhun Ndióxi cán cúu ná na naquixi chichi Israel xihín na tóho viti. <sup>11</sup> Ta nacaja Ndióxi ña ná cuu caja Pablo cuahá ña xituhún nuú ñayivi ndúu cán. <sup>12</sup> Jáchi janda pañito á jáhma ña cáni ndaa Pablo cán ñehe na ña cuahan na ta jácani ndaa na ña na quihvi xihín á chí ndivaha na. Ta tá ñúhu ínima quini ini na janda rí cán quéta cuahan.

<sup>13</sup> Joo java na Israel, na co cúu cuéntá Jesús xica nuu na táva na ínima quini ñúhu ini ñayivi. Ta ndaja coo nasacu ini na caja chúun na quivi Jesús, xitoho í, ña ná táva na ínima quini. Já nacachi na cán já xihín ínima quini ndácaan ini ñayivi:

—Xihín quivi Jesús ña xica nuu Pablo cáhan da saha, sáhdá nde chuun nuun ña ná queún chun —nacachi na cán.

<sup>14</sup> Já nacaja ndíhusa jahyi in da naní Esceva, da cúu da sacuahá nuú jutú veñuhu na Israel ndúu ñuu cán. <sup>15</sup> Joo tá nacachi na ña yóho xihín rí quini ñúhu ini in dataa já nanducú ñehe rí cán tuhun nu ná já cáchí rí já:

—Xini vi yo cúu Jesús ta xini ri ndá da cúu Pablo va. Joo mé ndó, co xini toho i ndohó —nacachi rí quini.

<sup>16</sup> Tá nacachi ínima quini cán já chí ivi laá nandava dataa ndácaan ínima quini ini cán jata ndíhusa na cán ta nacaja xixi quini da xihín ná jáchi a juú quiahva ndacú da. Quini nacaja da cán xihín ná anda naxinu lahla ndihi na jata véhe ta chí a váha na nandicuehe na nacaja ínima quini cán. <sup>17</sup> Ta



chí naçandaa ini ndihi ñayivi ndúu ñuu Efeso cán sahá ña nayaha yóho vatí cúu ná na Israel á cúu ná na tóho ñañehe ndihi na tuhun. Sahá ña cán quea nayihvi na. Ta cuaha ná naçahan na ña cáhnu cúu quivi Jesús ña cúu xitoho í.

<sup>18</sup> Ta cuaha táhan na cándusa Jesús cán naçasáhá na náhma na tóco ndihi cuachi naçaja na. <sup>19</sup> Ta cuahá na naçacuu na tají ñéhe ndihi na libro ña tají naçinu na ta naçicaan ñuhu ná ña nuú ndihi ñayivi. Tá najitá na cuénta sahá yahvi tóco ndihi libro naçayi cán naçinu a tátuhun ivi jico uxu mil jihun cúxú. <sup>20</sup> Já naçasáhá xita nuu tuhun vaha saha Jesús. Ta náha ña mé a ndaa iin ndée Jesús caja tóco ndihi ñaha.

<sup>21</sup> Tá sa nayaha ndihi ña yóho já naçacu ini Pablo cuhun da coto nihni da estado Macedonia xihin estado Acaya. Já quehe tucu da íchi cuhun da janda Jerusalén. Ta naçachi da ña tá sa naçahan da ñuu Jerusalén já yaha da cuhun da chí ñuu Roma. <sup>22</sup> Ta mé Pablo yóho naçindahá da ivi táhan da xica chindeé táhan xihin dá ña ná cuhun da chí estado Macedonia. Ta da naçindahá da cán cúu Timoteo xihin Erasto ta mé Pablo naçandoo too chaga da estado Asia.

### *Ndavaa ñayivi ndúu ñuu Efeso*

<sup>23</sup> Mé tiempo já a juú quiahva cuahá ñayivi ñuu Efeso nandivaa na sahá ña nandihvi cuahá ñayivi íchi cuénta Jesús. <sup>24</sup> In da naní Demetrio cúu dá da najandivaa na cán. Mé Demetrio yóho cávaha da tiniñu yúu xihin jihun cúxú ta mé tiniñu yúu cán ndaa tá quiahva cáa in veñuhu cuénta Diana, ña cúu ndióxi cája cáhnu na ñuu cán. Ta a juú quiahva vaha cáa jihun na cája chúun xihin dá cán. <sup>25</sup> Sahá ña cán quea mé Demetrio yóho najátaca da tóco ndihi na cája chúun xihin dá ta najátaca ri da java ga táhan na cája mé chuun cávaha tiniñu yúu cán. Já naçachi da já xihin ná:

—Candehé ndo, sa cándaa vaha ini ndó ña vaha ndivaha cáa jihun yo xihin chuun cája í yóho ta ndúu vaha í cája ña. <sup>26</sup> Joo sa xini ndo ta ñehe mé ndó tuhun sahá da naní Pablo. Xica nuu da cahan da xihin ñayivi ña a juú toho ndióxi cúu ña cávaha ndahá ñayivi. Ta sa cuahá ndivaha ñayivi naçava

da jini. Ta a juú in túhún ñuu Efeso yóho cuití va jáchi sa naçandee da naçava da jini cuahá na ndúu chí estado Asia viti. <sup>27</sup> Ta ihvi ndivaha cáa ña yóho jáchi cuu çahnu da nuú chuun cája í ta nu cáa jihun yo quea yóho. Ta janda veñuhu ndióxi yo, ña naní Diana cuu ndihi saha vatí ní cúu cahan vaha na saha veñuhu ña. Joo xihin ña cája Pablo yóho tá xica nuu da cuu casahá ñayivi cahan núu na saha Diana ta cuu casahá na candají na ña cúu ndióxi yo, mé Diana yóho. Ta mé ña cúu ña ña cáhnu ndivaha ta ñayivi ní cúu estado Asia yóho xihin ñayivi ní cúu ñuyiví cája cáhnu na ña —naçachi Demetrio cán xihin java ga da cávaha tiniñu yúu cán.

<sup>28</sup> Ta tá naçini johu ndihi na cán ña naçachi Demetrio chí ivi laá najaa quini na já naçayuhú na já naçachi na já:

—Cáhnu ná cacuu Diana, ña cúu ndióxi ndícahán na Efeso.

<sup>29</sup> Ta xihin ña yóho tóco ndihi ñayivi ñuu cán naçasáhá na ndivaa na. Sahá ña cán quea naçiin na ivi dataa, da naní Gayo xihin da naní Aristarco. Ndívi da yóho cúu da da estado Macedonia ta xica nuu da xihin Pablo. Ta mé ñayivi cán naçiin na da já ñuhu na da cuahan da vehe nu ndítaca ñayivi cán. <sup>30</sup> Ndúcu Pablo quihvi nuu da tañu ñayivi cán ña cahan da xihin ná cúni da. Joo na cúu cuénta Jesús cán coo naçeen na ña ná cuhun da. <sup>31</sup> Ta jári java na jutixia cuénta estado Asia ndúu cán ta xini táhan vaha xihin Pablo sahá ña cán quea naçindahá na chuun nu dá ña ná a quihvi nuu da cahan da xihin na cán. <sup>32</sup> Tañu nu táca ñayivi ndivaa nahá cán sa jiin sa jiin ñaha cáyuhú na ndúu na. Jáchi cuahá na naçaca cán ni co xini na nda cuénta quea naçaca na tañu ñayivi cuaha cán. <sup>33</sup> Joo java ñayivi ndúu cán nandicani na ndaja cáa ña cúu cán nuú in da naní Alejandro. Ta java na Israel ndúu cán naçindahá na Alejandro já ná candichi da cahan da xihin ñayivi cán. Anda já nandínehe Alejandro ndaha dá já ná catáji too yuhu ná já naçasáhá ndíquehe da sahá na cúu cuénta Jesús. <sup>34</sup> Joo tá naçini ñayivi cán ña cúu Alejandro in da Israel chí ivi laá naçasáhá tóco ndihi na cán cáyuhú na já cáchi na já:

—Cáhnú ná cacuu Diana, ñá cúú ndióxi ndícaháñ nā Efeso.

Ta coó ñacatáji nā tixi ivi hora cáyuhú nā mé tuhun yóho.

<sup>35</sup> Ta tá sa ñacatáji loho ñayivi já ñacasáhá da cúú da cáhyí tutu ñuu cán cáhan da xihín ñayivi já cáhí da já xihín ná:

—Candehé ndó, nā Efeso. Sa cándaā ini ndihi ñayivi ndúu ñuyívi ña ndítahan nuú ñayivi ndúu ñuu Efeso candaa vaha na veñuhu ñá cúú ndióxi naní Diana. Jáchi mé ñá cúú ñá ñá cáhnú ndivaha ta indiví ñaquixi nahná ña ñandicava nu yó. <sup>36</sup> Ta ni in na a cúu cachi ña cáhan i ña tuhún sahá ña cán quéa caja ndó ñamaní catáji ndo ta ndicaní vaha ini ndó sahá ña cúni ndó caja ndó. <sup>37</sup> Jáchi ndívi da ndáca ndó ñacasaa ndó yóho co caja cuíhná da veñuhu Diana ta ni co cáhan núu da saha ña. <sup>38</sup> Ta tá co táhan ini Demetrio xihín nā cája chúun xihín dá sahá ña cája Pablo já ndítahan nu ná cuhun nā vechúun nuú jutixia ta cán cuu ndiquehe in in na saha mé ná jáchi sahá ña cán ndúu juéxe cán caja víi nā sahá ñayivi. <sup>39</sup> Joo tá inga ñaha quéa cúni ndó caja víi ndó saha, xini ñuhú nditaca ndihí já ná cuu caja víi yó sahá. <sup>40</sup> Jáchi cája i cuénta cuu chicaan nā cuachi jata yó sahá ña jándicuita í ñayivi caní táhan na saha tóco ndihi ña ñayaha quívi viti. Jáchi mé a ndaa co xini yó ndá tuhun nducú ñehé tá ná ndaca tuhún nā mí ndá cuénta quéa ñandivaa nahá yó —ñacachi da xihín ná.

<sup>41</sup> Tá ñandihí ñacachi da cáhyí tutu cán tuhun yóho xihín ñayivi cán já najánduta da nā.

## 20

### *Cuahan Pablo estado Macedonia xihín estado Grecia*

<sup>1</sup> Tá sa ñanduta ndihi ñayivi, nā ñandivaa nahá cán já ñacana Pablo tóco ndihi nā cúú cuénta Jesús jáchi cúni da cáhan da xihín ná sahá java ñaha ña ndítahan nu ná caja na. Ta tá ñandihí ñacahan da xihín ná já ñanumi da nā ta ñandindayí da nā já ñaquee da cuahan da chí Macedonia. <sup>2</sup> Níi cúú estado Macedonia cán ñaxica nuu da sahan da tuhun ndée ini nā cúú cuénta Jesús xihín tuhun cáhan

da. Tá ñandihí já ñaquee da cuahan da ta ñaxinu da chí estado Grecia. <sup>3</sup> Ta ñacandoo da cán tixi uní yoo. Ta tá ja chá quehe da barco cuhun da chí ñundáhyi cuénta Siria já ñañehé dá tuhun ña sácu ini nā Israel cán cahnína da. Sahá ña cán quéa ñasacu ini da ña vaha chága ná cuhun sahá da já ná yaha tucu da chí Macedonia. <sup>4</sup> Ta ndáca táhan java nā cúú cuénta Jesús cuahan nā xihín Pablo. Ta nā cán cúú nā yóho: in da naní Sópater, da ñuu Berea xihín Aristarco xihín Segundo, da ñuu Tesalónica xihín Gayo, da ñuu Derbe xihín Timoteo. Ta tañu nā cán cuahan ri Tíquico xihín Trófimo, da ñaquixi estado Asia. <sup>5</sup> Tóco ndihi nā ndáca táhan xihín Pablo yóho ñasahan cuée nā chínuu candati na ndehé ñuu Troas. <sup>6</sup> Joo ndehé, da cúú Pablo xihín Lucas tá sa ñayaha víco tá xixi na pan ña co cáva táhan yusá ñaxaa xihín já ñandaa nde barco ñuu Filipos cuahan nde chí Troas. Ta janda quívi uhun já ñandique táhan nde xihín ndihí nā cán. Ta chí ñacandoo tóo chága nde usa quívi ñuu Troas cán.

### *Xíto nihni Pablo ñuu Troas*

<sup>7</sup> Ta quívi domingo ñataca ndihi nde, nā cúú cuénta Jesús ña cuxu nde pan yíi. Ta sahá ña queta Pablo cuhun da inga quívi itaan sahá ña cán quéa najánaha cuaha dá nu ná janda quiahva ñaxinu java ñuu. <sup>8</sup> Tóco ndihi nā cúú cuénta Jesús cán ñanditútú nde ndúu nde in vehe cánúu jiní ninu. Ta chí ndíyihvi ndaa nu ndúu nde jáchi cuahá lámpara cáyi. <sup>9</sup> Ta ndaja coo in da loho naní Eutico íin coo da ventana xini johu da nu cáhan Pablo. Joo sahá ña cuaha cáhan Pablo sahá ña cán quéa ñanaá ini da loho cán chí ñaquíji da. Já najani dá ñandicava da janda nu ñuhú piso uní. Ta tá ñanuu nā cúú cuénta Jesús cán ñandínehe na da janda ndii cúú dá. <sup>10</sup> Anda já ñanuu Pablo ta najácaā da mé dá jata da loho cán ta ñanumi da da ta já ñacachi da já xihín nā cúú cuénta Jesús cán:

—A cáyhívi toho ndó jáchi tácu va da yóho —ñacachi Pablo chí najánditacu ñahá da.

<sup>11</sup> Anda já ñandaa tucu Pablo cuahan da vehe piso ninu cán. Já ñasahnda java da pan yíi cán ta ñaxixi na ña. Anda já ñacahan chága da xihín ná janda quiahva

naṭivi. Já naṭee da cuahan da. <sup>12</sup> Ta sahá mé da loho, da nandicava cán cájii íní na ndáca vaha na da cuahan na jáchi nanditacu da.

*Qué Pablo ñuu Troas ta cuahan da chí ñuu Mileto*

<sup>13</sup> Nasacu ini Pablo cuhun sahá da anda ñuu Asón. Joo mé nde nandaa nde barco nasahan nde mé ñuu cán jáchi janda cán naṇando nde ndique táhan nde xihin dá. <sup>14</sup> Ta tá nandique táhan nde ñuu Asón cán xihin dá já nandaa da xihin ndihi nde ini barco. Já naṭee nde cuahan nde ñuu Mitilene. <sup>15</sup> Casahan nde ini barco ta inga quivi itaan já nayaha nde yati isla Quío ta janda tá nayaha inga tucu quivi já naxinu coo nde ñuu Samos. Ta naṭee tucu nde cuahan nde janda quiahva naxinu coo nde ñuu Trogilio. Ta cán nandiquehe nde nde ta janda inga quivi itaan naxinu coo nde ñuu Mileto. <sup>16</sup> Co cuni Pablo cayancá da estado Asia sahá ña cán quea coo nasahan nde ñuu Efeso. Númi da cuhun da ñuu Jerusalén coo da quivi víco Pentecostés jáchi nasacu ini da coo da víco cán tá ná quiahva Ndióxi ñamaní nu dá.

*Cáhan Pablo xihin na sacuahá ñuu Efeso*

<sup>17</sup> Ta nani ndúu nde ñuu Mileto cán já nacana Pablo tóco ndihi na sacuahá veñuhu ñuu Efeso cán já ná quixi na. <sup>18</sup> Ta tá sa nataca na nu ndúu nde já nacachi da já xihin ná:

—Sa xini vaha ndó ndaja nacaja i janda quivi nu cuítí tá naxinu coo i estado Asia yóho. <sup>19</sup> Nii tiempo nasahin i tañu ndó cán nacaja chún i cuénta Jesucristo, xitoho í. Ta coo nandinehe jícó i mí i sahá ña nacaja i. Ta cuahá tañu nasacu u saha ndo. Ta nandoho ini i sahá ña cuni na Israel cahní na yehe. <sup>20</sup> Ta coo najandacoo i cáhan i tuhun Ndióxi xihin ndo jáchi xini vaha i ña jan cuu chindeé a ndohó. Ta najánaḥa i ndohó nu táhyí ñayivi ta jári ini vehe ndó. <sup>21</sup> Ta najánaḥa i nuú na Israel xihin nuú na tóho ña ndítahan nu ná ndicó coo ini na ta jándacoo na cuachi cája na. Ta nacachi i xihin ná ña ndítahan candeé ini na Jesucristo, xitoho í. <sup>22</sup> Ta viti cuhun i chí ñuu Jerusalén jáchi cuni ínimá yii Ndióxi ña ná cuhun i cán ta co xini ndía cuu ndoho i

ñuu cán. <sup>23</sup> Ña xini ndusa i quea ña nacaxi tuhun ínimá yii Ndióxi xihin i ña ndá ñuu nacuu nuú cuhun i ña jivi i chicaan ñayivi yehe vecaa á jivi i caja xixi na xihin i. <sup>24</sup> Joo ni in ña yóho co cája toho a nuú i. Ta vatí ná cahní na yehe co yíhví toho i. Jáchi ña cuni mí i quea cajii íní i jáxinu coo i chuun nasahan Jesucristo nuú i caja i. Ta ña yóho cúú á cáxi tuhun i nuú ñayivi tuhun vaha saha mé á ta saha ndá quiahva quíhví ini a ñayivi.

<sup>25</sup> 'Sa naxica nuu i tañu ndó ta nacahan i xihin ndó ña vaxi quivi cacomí Ndióxi cuénta sahá ñayivi. Ta viti xini vaha i ña ni in ndó a cuni ga ndó yehe. <sup>26</sup> Sahá ña cán quea cáxi tuhun i xihin ndó quivi viti ña co ndójo ga i cuachi saha ndo tá ná jándicoo ndó íchi cuénta Jesús. <sup>27</sup> Jáchi sa nacaxi tuhun i nu ndo tóco ndihi ña sácú ini Ndióxi caja ta coo nachijehé tuhun toho i sahá nu ndo. <sup>28</sup> Sahá ña cán quea ndítahan candaa vaha ndó mé va ndó ta candaa vaha ndó tóco ndihi na cúú cuénta Jesús ná cuahnu chága na xihin tuhun Ndióxi. Jáchi mé ínimá yii Ndióxi nasacu a ndohó ña ná cacomí ndo cuénta sahá na cúú cuénta mé á jáchi naxita nij mé á sahá ndihi na tá naxihí a ndica cruxu. <sup>29</sup> Cáhan i ña yóho xihin ndo jáchi sa cándaḥa vaha ini i ña tá sa ná quee yehe cuhun i já quixi java ñayivi ta cacu ini na jándihi na sahá na cúú cuénta Jesús. Ta tá quiahva cája ndivahyí jándihi rí sahá ndicachi quiahva já cacuni na jándihi na sahá na cúú cuénta Jesús. <sup>30</sup> Ta janda mé tañu mé ndó jan va cana java na ta jánaḥa na ña tuhún nuú ñayivi. Ta nducú na ndiquehe na na sa cúú cuénta Jesús cuhun na jatá na cán. <sup>31</sup> Ña cán quea cuénta vaha coo ndó ná a jándahvi na ndohó. Xini ñúhú ndicuhun ini ndó ña tixi uní cuia coo najandacoo i cáhan i xihin ndó ndáa quea ndítahan nu ndó caja ndó. Ta ñuu ta ndiví nacahan i xihin ndó sahá ña yóho ta chí anda nasacu u saha ndo ña ná caja ndó ña cuni Ndióxi.

<sup>32</sup> Viti jándacoo i ndohó, ñani i, ndahá Ndióxi jáchi cáchi tuhun mé á ña quíhví ini a tóco ndihi ñayivi. Íin ndeé Ndióxi caja ndacú a ndohó já ná cuu coo ndó xihin tóco ndihi na nacaxi mé á caja ñamaní xihin. <sup>33</sup> Ta xini ñúhú ndicuhun ini ndó ña

coó nandiava ini i quehe e jiuhún á jáhma vaha cómi java ga ñayivi. <sup>34</sup> Ña ñacaja i quea ñacaja chúun i xihín ndahá i já ná a ndímaní ñaha catacu u ta já ná cuu catacu na xíca xihín i. <sup>35</sup> Ta níi tiempo najánaha i nu ndo ña quiahva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímaní ñaha nuu. Ndítahan ndicuhun ini ndó tuhun ñacachi Jesucristo tá ñacachi a: “Cájií chága ini na jása ñaha a juú ga na ñéhe á”, ñacachi Pablo xihín na sacuaña veñuhu ñuu Efeso cán.

<sup>36</sup> Tá nandihi ñacahan Pablo já ñacaxítí da já ñacasáhá xíca tahví da nu Ndióxi xihín ndihi na cúu cuéntá Jesús cán. <sup>37</sup> Ta tóco ndihi na cán ñasacu na xihín dá ta ñanumi na da ta já ñatati yúhu ná sajóho da ña ndíndayí na da. <sup>38</sup> Tóco ndihi na ñacacuéha ini na saha Pablo jáchi ñacachi da xihín ná ña a cúní ga na da. Tá nandihi já ndáca táhan ndihi na ñasahan na xihín dá janda nuú ñandaa da barco cán.

## 21

### *Cuahan Pablo chí ñuu Jerusalén*

<sup>1</sup> Tá nandihi ñandindayí nde na cúu cuéntá Jesús cán já ñandaa nde barco ñaquee nde cuahan ndacú nde in ñuu naní Cos. Ta inga quiví itaan já ñaquee tucu nde cuahan nde chí inga ñuu naní Rodas. Ta já ñaquee nde cuahan nde chí ñuu naní Pátara. <sup>2</sup> Ta mé cán ñandique táhan nde xihín in barco, dó cuhun chí estado Fenicia ta chí ñandaa nde dó cuahan nde. <sup>3</sup> Ta nani cásahan nde ini dó já ñaxini nde isla Chipre xoo íti nde. Joo ñayaha saa va nde janda quiahva ñaxinu coo nde ñuu Tiro ndácaan estado Siria jáchi mé cán ndítahan nu ná jánuu na ñaha ndójo dó. <sup>4</sup> Mé ñuu Tiro cán ñanditahan nde na cúu cuéntá Jesús ta ñacandoo tóo nde xihín ná tixi usa quiví. Ta najácahan ínimá yíi Ndióxi na cán ña ná caxi tuhun na xihín Pablo ña ná a cúhun da ñuu Jerusalén. <sup>5</sup> Joo tá sa ñayaha usa quiví já ñaquee nde cuahan nde chí ñuu Jerusalén. Ta ñaqueta tóco ndihi na cúu cuéntá Jesús cán xihín ñájhí na xihín jahyi válí na já ndáca táhan na xihín nde cuahan nde anda yuhú ñuu cán. Ta yatí yuhú tañuhú cán ñacaxítí ndihi nde ñaxíca

tahví nde nu Ndióxi. <sup>6</sup> Ta tá ñandindayí táhan nde já ñandaa nde barco ta na cán ñaquee na cuanúhu ná vehe na.

<sup>7</sup> Ñaquee nde mé ñuu Tiro cásahan nde nuú tañuhú janda quiahva ñaxinu coo nde ñuu Tolemaida. Ta mé cán ñacahan Ndióxi nde xihín na cúu cuéntá Jesús ndúu cán. Ta chí ñacandoo nde in quiví xihín ná. <sup>8</sup> Ta inga quiví itaan já ñaquee nde cuahan nde janda quiahva ñaxinu coo nde ñuu Cesarea. Ta cán ñasahan nde vehe in da sáxica nuu cáhan tuhun Ndióxi xihín ñayivi. Mé da yóho nani da Felipe ta ñasacuu da in táhan ndíhusa da chindeé na apóstol veñuhu ñuu Jerusalén. Ta chí ñacandoo tóo nde vehe da cán. <sup>9</sup> Ta ñasahin cómi jahyi jhí da, na tacú. Ta tiaha ndícomi ná jáyaha na tuhun cáhan Ndióxi nuú ñayivi. <sup>10</sup> Tá sa ñacaja chá quiví ndúu nde vehe da cán já ñaxinu coo in profeta, da ñaquixi estado Judea ta nani da Agabo. <sup>11</sup> Mé da yóho ñasaa da coto nihni da ndehe nu ndúu nde cán. Ta nani in da xihín nde cán já ñatiin da cinturón ñaha Pablo. Já ñacató da ndáha dá xihín saha dá xihín mé cinturón ta já ñacachi da já:

—Cáchi ínimá yíi Ndióxi ña tá quiahva ñacaja i ñacató i mí i quiahva já cató na Israel da xihín ñaha cinturón yóho. Ta já ndiquiahva na da ndahá na tóho —ñacachi Agabo cán xihín nde.

<sup>12</sup> Tá ñaxini johó nde ña ñacachi Agabo yóho já ñacasáhá nde cáhan ndahví nde xihín Pablo ña ná a cúhun da ñuu Jerusalén. Ta jári na cúu cuéntá Jesús ndúu ñuu Cesarea cán cáhan ndahví na xihín dá ña ná a cúhun da. <sup>13</sup> Joo ñanducú ñehe Pablo tuhun nuú nde já ñacachi da já:

—Ndá cuéntá quea sácu cóhó ndo ta cája ndó ña cándií ini i. Candehé ndo ná cahan i xihín ndo. Coó caja toho a ná cató na yehe jáchi in tiaha i ndiquiahva i mí i quiví i saha Jesús, xitoho í mé ñuu Jerusalén cán —ñacachi da.

<sup>14</sup> Coó ñacuu caja nde cava nde jiní dá ña ná a cúhun da. Chí coó ñacahan chága nde sahá ña yóho xihín dá ta ñacachi nde:

—Ná coo tá quiahva cúní Ndióxi va.

<sup>15</sup> Tá nandihi já ñacaja tiaha nde ñaha nde ta já ñaquee nde cuahan nde ñuu

Jerusalén. <sup>16</sup> Ta ndáca táhan java na cúu cuénta Jesús ñuu Cesarea cán cuahan na xihín nde. Ta tañu na cán ndácaan in da naní Mnasón, da naquixi isla Chipre. Ta anda sanahá ndíco da íchi cuénta Jesús. Ta sa mé vehe da yóho sácú ini nde canduu tóo nde ñuu Jerusalén cán.

### *Xíto nihni Pablo da naní Jacobo*

<sup>17</sup> Tá naxinu coo nde ñuu Jerusalén já cávatá na cúu cuénta Jesús cán nandiquehe na ndehe. <sup>18</sup> Ta inga quiví itaan já ndáca Pablo ndehe nasahan nde cotó nihni nde Jacobo. Ta tá naxinu coo nde cán já naxini nde ña nataca tóco ndihi na sacuahá nuú na cúu cuénta Jesús cán. <sup>19</sup> Ta nacahan Ndióxi Pablo xihín ná já nacasáhá ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na coo naquixi chichi Israel. <sup>20</sup> Tá naxini johu na cán ña yóho já nacaja cáhnu na Ndióxi. Ta tá nandihí já nacasáhá cáchí na já xihín Pablo:

—Candehé, ñani i. Sa xini vahún ña cuahá ndivaha táhan na naquixi chichi Israel sa ndíco na íchi cuénta Jesús viti. Ta tóco ndihi na cáchí na ña ndítahan caja na ña sáhndá ley Moisés. <sup>21</sup> Joo nañehe ná tuhun ña xíca nuún jánahún nuú na Israel, na ndúu ñuu tóho ña co xíní ñúhú ga caja na ña sáhndá ley Moisés ta ni marca cán co xíní ñúhú chican ga na yiquí cuñu jahyi na. Ta jánahún na ña co ndítahan caja na costumbre najándacoo tásáhnu jícó yo nu yo. <sup>22</sup> Ta co xini nde ndía caja nde viti jáchi nditútú na ndúu Jerusalén yóho tá ná candaa ini na ña nacasaun yóho. <sup>23</sup> Sahá ña cán quea caja nde cuénta ña vaha chaga ná cajún ña cáchí nde yóho: Cañehún comí ta ndúu tañu nde yóho já ná cuhun na xuhun. Jáchi sa naxinu coo quiví caja ndícomí da yóho ña nasahan da tuhun da nu Ndióxi caja da. <sup>24</sup> Ná cuhún xihín dá já ná ndaja viún mún xihín dá tá quiahva sáhndá ley Moisés ta já ná chahvún nuú jatá jini dá. Ta xihín ña yóho cuni na Israel ña a juú ña ndaa cúu tóco ndihi tuhun cáhan ihvi na sahun. Ta xihín ña yóho cuni na ña caja tá cajún ña sáhndá ley Moisés. <sup>25</sup> Ta sahá na tóho, na cúu cuénta Jesús, sa nacahyí nde in carta cuahan nu ná ña ná a jándihí na mé ná caja na ley Moisés. Joo

nacachi nde xihín ná ña ná a cáxí na cuñu quíti, rí najoco na nuú tiniñu yúu. Ta ná a cáxí na nii ta ni ná a cúxu na cuñu quíti, rí nasahnú. Ta ná a cóo na xihín ta a ñaha, na co cúu yí ná a ñájihí na. Ña yóho cúu tuhun nacahyí nde nu carta cuahan nuú na tóho —nacachi na sacuahá cán xihín Pablo.

<sup>26</sup> Anda já naquehe Pablo ndícomí dataa cán ndáca da cuahan xihín dá. Ta inga quiví itaan já nandaja vií da mé dá nu Ndióxi ta nandivií ndícomí da cán viti. Ta tá nandihí já naquihvi da veñuhu ña caxi tuhun da xihín ná ndá quiví xinu coo ña ndivií na já ná cuu joco in in da cán ñaha nu Ndióxi.

### *Tiin na Pablo veñuhu cáhnu ñuu Jerusalén cuahan da vecqa*

<sup>27</sup> Tá ja chá xinu coo quiví usa já naxinu coo java da Israel, da naquixi chí estado cuénta Asia. Ta tá naxini na cán ndácaan Pablo ini veñuhu cáhnu cán já najándivaa na ñayivi já ná ndicuita na caja xíxi na xihín dá. <sup>28</sup> Ta nacasáhá cáyuhú na nuú ñayivi já cáchí na já xihín ná:

—Candehé ndó, na Israel. Caja ndó ñamaní chindee ndó ndehe xihín da yóho jáchi níi cúu nu xíca da yóho cáhan núu da sahá ñayivi Israel ta jánahá da ñayivi ña co ndítahan nu ná candúsa na ley Moisés ta ni co ndítahan nu ná caja cáhnu na veñuhu cáhnu ndácaan Jerusalén yóho. Ta viti cája núu chaga da jáchi janda java da tóho, da ñuu Grecia najáquihvi da veñuhu í ta jáyuxu da veñuhu yíi yóho xihín da tóho jan —cáchí na.

<sup>29</sup> Tóco ndihi ña yóho nacachi ta Israel naquixi Asia cán xihín ñayivi jáchi nacahan da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Nacahan na já jáchi naxini na ndáca táhan Trófimo xihín Pablo xíca nuu da ñuu Jerusalén cán.

<sup>30</sup> Xihín ña nacachi da naquixi Asia yóho nandivaa tóco ndihi ñayivi ñuu Jerusalén já xínu na naxinu coo na natiin na Pablo. Já ñúhu na da natavá na da jatá veñuhu cán ta ivi laá nachicaji na yéhe veñuhu cán. <sup>31</sup> Chí ndúcú na cañí na da joo da cúu jefe soldado cán nañehe dá tuhun ña nandivaa ndihi ñayivi ñuu Jerusalén cán. <sup>32</sup> Anda

já najátaca da cúu jefe soldado xihín java ga da náhnu já xínu da naxinu coo da nu ndívaá ñayivi cán. Tá naxini ñayivi cán vaxi da cúu jefe soldado cán xihín java soldado já najáyaa ñahá na chí coo cáni ga na Pablo. <sup>33</sup> Anda já nacayati da cúu jefe soldado cán nu Pablo já natiin da da cuhun da vecaa. Ta nasahnda da chuun ña ná cató na da xihín ivi cadena. Tá nandihí já nacasáhá ndáca tuhún da ñayivi ña ndá da cúu da yóho ta ndíá nacaja da. <sup>34</sup> Joo sa jíin sa jíin tuhun cáyuhú in in ñayivi cán. Sahá ña cán quéa coo nacuu candaa ini da cúu jefe soldado cán ndá cuachi quéa jácojo na jata Pablo jáchi a juú quiahva ndívaá na cán ndúu na. Sahá ña cán quéa nasahnda mé jefe soldado cán chuun ña ná cañehe na Pablo vehe nu ndúu soldado. <sup>35</sup> Ta tá naxinu coo na cán nacahán na ndaa na cuani vehe soldado cán xihín Pablo joo coo nacuu ndaa na jáchi chí cándíhi táhan ñayivi cúni na cani na Pablo. Sahá ña cán quéa nasajocó soldado cán Pablo já ndaa na cuani vehe soldado cán xihín dá. <sup>36</sup> Ta tóco ndihí na cán cáyuhú cóhó na ndícaa na jata soldado já cáchi na já:

—Cahní ndó da. Ná quivi da —cáyuhú na.

### *Ndíquehe Pablo saha mé dá nuú ñayivi cán*

<sup>37</sup> Ta tá sa ndúcú na jáquihvi na Pablo ini vehe soldado cán já nacachi Pablo já xihín da cúu jefe soldado cán:

—Á quiahva ndó ñamaní nuú i ná cahán i ivi johó tuhun xihín ñayivi yóho.

Anda já nanducú ñehe da cúu jefe soldado cán tuhun nu Pablo já nacachi da já:

—Á tiahvún cahún tuhun griego, dá já.

<sup>38</sup> Á a juú toho yóhó cúu da naquixi nación Egipto viti chá va, da najácahan ñayivi ná ndicuita na cani táhan na xihín gobierno ta nasandaca da comi mil da sáhní ndii nasahan da chí yucú íchí nuú coo ñayivi. Á a juú toho yóhó cúu mé da cán —nacachi da cúu jefe soldado cán xihín Pablo.

<sup>39</sup> Anda já nanducú ñehe Pablo tuhun nu dá já nacachi da já:

—Jíin va cúu yehe jáchi cúu u in da naquixi chíchi Israel ta nacacu u ñuu Tarso, in ñuu cáhnu ndácaan estado Cilicia. Ta viti á cuu quiahva loho ndó ñamaní nuú

i ná cahán i ivi tuhun xihín ñayivi yóho —nacachi Pablo xihín da cúu jefe soldado cán.

<sup>40</sup> Anda já nasahan da cán ñamaní nu Pablo ña ná cahán da xihín ñayivi. Anda já nandaca ndichi Pablo nuú cuani vehe cán já nandiñehe da ndáha dá nu ná já ná catáji yúhu ná. Ta tá sa nacatáji yúhu ná já nacasáhá cahán da tuhun hebreo xihín ná.

## 22

<sup>1</sup> Já nacasáhá Pablo cáchi da já xihín ná:

—Cuni johó ndó nu cahán i xihín ndóhó, na sacuaaha xihín ñani i jáchi cúni ndiquehe e sahá i viti —nacachi Pablo xihín ná.

<sup>2</sup> Tá naxini johó na cán ña cahán Pablo tuhun hebreo, mé tuhun cahán mé ná já nacatáji chága yúhu ná. Anda já nacachi Pablo já xihín ná: <sup>3</sup> —Yehe cúu u da naquixi chíchi Israel. Ta nacacu u ñuu Tarso ndácaan estado Cilicia. Joo nasahnu u ñuu Jerusalén yóho ta mé yóho najácuaha vi xihín in da naní Gamaliel. Ta tá quiahva sáhdá ley Moisés, ña nasacu vaha tásáhnú jícó yo quiahva já nandihí ini i cája i. Níi tiempo nandihí ini i cája chúun i cuéntá Ndióxi xihín ndinuhu ini i tá quiahva cája mé ndó anda quivi viti. <sup>4</sup> Naxica nuu i cája xixi i xihín na ndíco íchi cuéntá Jesús janda quiahva sáhní i na. Ta cuahá taa, ñaha viti naxica nuu i játaca i na ña ná cuhun na vecaa. <sup>5</sup> Ta xini vaha da cúu sacuaaha nuú jutú xihín ndihí na sacuaahá veñuhu ña cahán i ña ndaa xihín ndo. Jáchi mé na yóho cúu na nacahyí tutu nasahan na nuú i já ná ndiquiahva i ña nuú ñaní, na naquixi chíchi Israel ndúu ñuu Damasco cán. Ta nasahan i cán ndínducú u na cúu cuéntá Jesús ña cañehe e na quixi i ñuu Jerusalén yóho caja xixi nde xihín ná.

### *Ndícani Pablo ndaja nacuu nandiquehe da íchi cuéntá Jesús*

(Hch. 9:1-19; 26:12-18)

<sup>6</sup> Joo nani xica i íchi cuahan i tátuhun caxivi cáa tá sa yati xinu coo i ñuu Damasco cán já in cuití nandiyehé ndaa nu íin i ta mé a yóho naquixi a indiví. <sup>7</sup> Chí nandicava i nu ñúhu ta já naxini johó i in a cahán xihín i já nacachi a já: “Saulo, Saulo ndá cuéntá quéa ndícuítún cája xísún xihín i”, nacachi a xihín i. <sup>8</sup> Anda já nacasáhá ndáca tuhún i já

cáchí i já: “Ndá na cúu ndóhó ta ndaja nani ndo”, nacachi i xihín á. Anda já nanducú ñehe a tuhun nuú i já cáchí a já: “Yehe cúu Jesús, da ñuu Nazaret ta xihín yehe ndícuítún cája xísún viti”, nacachi a cán xihín i. <sup>9</sup> Ta na cuahan xihín i cán nayihví na tá naxini na ña nandiyehé nu íin i cán. Joo coó naxini johó na ña cáhan xihín i cán. <sup>10</sup> Anda já nacachi i já xihín Jesús: “Cahan ndó xihín i, xitoho i ndía ndítahan caja i.” Anda jáví nacachi a já xihín i: “Candichi ta cuáhán ñuu Damasco nu cáhún cuhun jan. Ta ñuu jan ndicani in da nuun ndía ndítahan cajún”, nacachi Jesús xihín i. <sup>11</sup> Ta chí nacuaá nuú i nacaja ña nandiyihví cán. Sahá ña cán queá jandá natiin ndaa na ndáca táhan i cán yehe cuahan nde janda quiahva naxinu coo nde ñuu Damasco cán.

<sup>12</sup> Ta mé cán nasahin in da nani Ananías, da cája ña sáhdá ley Moisés xihín ndinuhu ini da. Ta tóco ndihi na Israel ndúu Damasco cán cáhan na saha dá ña cúu dá taa vaha. <sup>13</sup> Ta mé Ananías yóho nasaa da naxito nihni da yehe. Já nacasáhá cáchí da já xihín i: “Saulo, ñani i candehé tucu viti.” Tá nacachi da já chí ivi laá nanuna nuú i já naxini i da. <sup>14</sup> Anda já nacachi da cán já xihín i: “Mé Ndióxi, ña nacaja cáhnu tásáhnu jícó yo, mé a cán queá naxaxi a yohó já ná candaá inún ndá queá sácú ini mé á caja xuhun. Ta naxaxi a yohó já ná cunún Jesús, mé a cája ndinuhu ña ndaa. Ta naxaxi a yohó já ná cuni johún nu cáhan Jesús. <sup>15</sup> Já queá cuhún cahún saha mé á nu tóco ndihi ñayivi. Já ná ndicanún nu ná sahá ña naxinún xihín ña naxini johún. <sup>16</sup> A cándati chágun viti. Cuándacoo. Cándéé inún Jesucristo viti chí cuáhán candúta já ná ndoo cuachún, caja Ndióxi”, nacachi Ananías xihín i.

*Ndicani Pablo ña naxindahá Ndióxi da cahán da tuhun vaha saha Jesús nuú na tóho*

<sup>17</sup> Tá nandihí já nandicó coo i ñuu Jerusalén ta nasahan i veñuhu cáhnu cán caça tahví i nu Ndióxi. Ta nani xíça tahví i cán já naxixi tátuhun in sani nuú i vatí ndíta i. <sup>18</sup> Ta naxini i Jesús, xitoho i já nacachi a já xihín i: “Camún cuáqueún ñuu Jerusalén yóho jáchi a cándúsa toho na yóho tuhun vaha cahún sahá i”, nacachi Jesús

xihín i. <sup>19</sup> Anda já nanducú ñehe e tuhun nu Jesús já cáchí i já xihín á: “Candehé ndo, xitoho i. Sa xini vaha tóco ndihi ñayivi ña naxica nuu i ndijáá veñuhu tiin i na cándéé ini ndóhó ta já nacani i na ta nataán i na vecaa. <sup>20</sup> Ta sa xini na ña tá nasahni na Esteban, mé da naxica nuu cáhan tuhun vaha saha mé ndó, in nasacuu u xihín na nasahni ñahá cán. Jáchi táhán ini i cándichi i ndáá i jahmá ñayivi cán nani sáhní na Esteban”, nacachi i xihín Jesús. <sup>21</sup> Anda já nacachi Jesús já xihín i: “Cuáqueún cuhun jáchi chindahá xíca i yohó cuhún cahún sahá i nuú ñayivi tóho, na coo naxixi chichi Israel”, nacachi Jesús xihín i —nacachi Pablo xihín na cán.

*Cáhan chága Pablo xihín mé da cúu jefe nu ndihi soldado*

<sup>22</sup> Nasanduu táji na Israel cán nani cáhan Pablo xihín ná. Joo tá nacahan da sahá na tóho cán já nacasáhá cáyuhú na já cáchí na já:

—Cahní ndó da jan. Ná quivi da. Co ndítahan ga nu dá coo da ñuyiví yóho —cáchí na cán cáyuhú na.

<sup>23</sup> Ta sahá ña ndúcú ndeé na cáyuhú na ta jáni na jáhma ná nu táchi ta janda ña yácá jácana nihni na nu táchi. <sup>24</sup> Sahá ña cán queá nasahnda da cúu jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihín churú ní já ná nahma da ndía nacaja da ta ndá saha queá ndícuíta ñayivi cán xihín dá. <sup>25</sup> Joo tá sa nacató na Pablo ta ndúcú na jácaxáhan na da já nacachi Pablo já xihín in soldado cán:

—Ta viti cahán ndó xihín i á núná nu ndo jácaxáhan ndó in da cúu taa romano tá cámaní yíi caja víi ndó saha dá tá quiahva sáhdá ley romano jáchi yehe cúu u da romano —nacachi Pablo xihín soldado cán.

<sup>26</sup> Tá naxini johó da ña yóho chí ivi laá nasahan da cáxi tuhun da nu da cúu jefe soldado cán já cáchí da já xihín dá:

—Cuéntá vaha coo ndó ta coto a cája xíxi ndó xihín da jan jáchi cúu dá taa romano —nacachi in soldado cán.

<sup>27</sup> Anda já nacayatí da cúu jefe soldado cán nu Pablo já nacasáhá ndáca tuhún ñahá da já cáchí da já:

—Á ndaa cúun taa romano —cáchi da.

—Ajan, taa romano cúu u —nacachi Pablo xihin dá.

<sup>28</sup> Anda já nacasáhá cáchi mé da cúu jefe soldado cán já xihin Pablo:

—Yehe nachahvi i cuahá ndivaha jjuhún já nacuu nanduu u in taa romano —nacachi da cán xihin Pablo.

Ta já cáchi Pablo já xihin dá:

—Joo yehe cúu u taa romano jáchi já nacacu u —nacachi Pablo.

<sup>29</sup> Tá naxini johu na cúni jácaxáhan Pablo cán ña yóho chí nayihvi na já nacasáhá xica játa na cáxoo na nu dá. Ta janda mé da cúu jefe soldado cán nayihvi da jáchi sa natiin na da vatí cúu dá taa romano.

*Ndíquehe Pablo saha mé dá nuú na sacuahá Israel*

<sup>30</sup> Ta inga quivi itaan natavá da cúu jefe soldado cán cadena nasandico ndáha Pablo. Ta saha ña cúni da cán candaa ini da ndá cuachi quea jácojo na jata Pablo saha ña cán quea najátaca da na sacuahá nuú jutu xihin na sacuahá Israel. Anda já ñéhe da Pablo já nasacu da da nuú na cán.

## 23

<sup>1</sup> Anda já nasandehé Pablo nu tóco ndihi na sacuahá nuú na Israel cán já nacasáhá cáchi da já xihin ná:

—Candehé ndo, ñani i. Janda jihna ta janda quivi víti cája i ña cúni Ndióxi ta xini mé á ndaja ndacaan jiní i —nacachi Pablo.

<sup>2</sup> Joo da cúu sacuahá nuú jutu naní Ananías cán nasahnda da chuun nuú na ndíta yati xihin Pablo cán ña ná caní na jahnda yuhu dá. <sup>3</sup> Anda já nacachi Pablo xihin Ananías cán:

—Tá quiahva nacani na jahnda yuhú i quiahva já caní Ndióxi yohó, da co cúu tá quiahva ndáa da. Íun jan ndaja ndichún yehe jáchi jácojo na cuachi jata i ña co sácú vaha i ley. Joo yohó nandava ndojún ña sáhdá ley jáchi nasahndún chuun ña ná caní na yehe —nacachi Pablo xihin Ananías cán.

<sup>4</sup> Anda já nacasáhá na ndúu cán cáhan na xihin Pablo já cáchi na já xihin dá:

—Cuénta coún jáchi canahún xihin da cúu jutu sacuahá chága nu ndíhi jutu cuénta Ndióxi —nacachi na xihin Pablo.

<sup>5</sup> Anda já nacachi Pablo já:

—Cáhu coo ini ndó, ñani i jáchi co xini toho i ña cúu da jan jutu sacuahá chága nu ndíhi jutu cuénta Ndióxi. Mé tuhun Ndióxi sáhdá chuun já cáchi a já: “A canahún xihin da cómi chuun saha ñuu ndó” —nacachi Pablo.

<sup>6</sup> Tá nandihí já nandicuni Pablo ña ndúu java na saduceo ta ndúu ri java na fariseo mé cán. Saha ña cán quea nacahan cóho Pablo já nacachi da já:

—Candehé ndo, ñani i. Yehe cúu u in da fariseo ta in fariseo nasacuu ri tátá i. Ta víti cája vii na yóho saha i saha ña cándusa i ña vaxi quivi nditacu tucu ndii —nacachi Pablo.

<sup>7</sup> Tá nacachi Pablo já ivi laá nandicuítá na fariseo xihin na saduceo ndituhún xihin táhan na já nasahnda java táhan na. <sup>8</sup> Jáchi na saduceo cán co cándusa na ña vaxi quivi nditacu tucu ndii. Ta ni co cándusa na ña ndúu tátó Ndióxi. Ta ni co cándusa na ña íin ínimá ñayivi. Joo na fariseo cándusa va na tóco ndihi ña yóho. <sup>9</sup> Tóco ndihi na cán cáyuhú na ndúu na. Saha ña cán quea nandaca ndichi java na janaha ley Moisés, mé na cuahan xoo na fariseo cán. Já nacasáhá cáchi na já xihin tóco ndihi ñayivi cán:

—Coó toho cuachi ná caja da naní Pablo yóho. Jáchi ndá ínimá yii quea nacahan xihin da yóho á tá coó ta ndá tátó Ndióxi quea nacahan xihin da yóho. Saha ña cán quea tá ná cahan ihvi yó xihin da yóho cúu á tátuhun cáni táhan í xihin Ndióxi —nacachi na janaha ley Moisés xihin ná.

<sup>10</sup> A juú quiahva nacasáhá ndívaá ñayivi cán saha ña cán quea nacasáhá yihvi da cúu jefe soldado cán ña tiahva náa tiin na Pablo ta jácuachi na da. Saha ña cán quea nasahnda da chuun ña ná quixi soldado tavá da Pablo tañu ñayivi cuaha cán. Ta já ná cañehe tucu na da cuhun da vehe soldado cán.

<sup>11</sup> Ta ñuu inga quivi itaan já nacanáha nuú Jesús, xitoho í nu Pablo ta nacahan xihin dá já nacachi a já:

—A ndícani inún, Pablo jáchi tá quiahva nacahún saha i nuú ñayivi ñuu Jerusalén yóho quiahva já cahún saha i nuú ñayivi ndúu ñuu Roma —nacachi Jesús xihin dá.



### *Sácú ini na Israel cahní na Pablo*

<sup>12</sup> Ta inga quiví itaān já najándique táhan java na Israel tuhun na ña cahní na Pablo. Ta ñacachi na a cúxu na ta ni ticuifí a cóho na janda quiahva ná cahní na Pablo. Ta ñacachi xihín táhan na ña cuhun cháhan jata ndá da ñaxixi á ñaxihí ticuifí nani tácu Pablo. <sup>13</sup> Ta yáha ga nuú ivi jico taa cúu da najándique táhan tuhun caja ña yóho. <sup>14</sup> Tá nandihí já ñaquee na ñasahan na cahan na xihín da sacuaḥa nuú jutú cán xihín na sacuaḥa nuú na Israel cán já ñacachi na já xihín ná:

—Tóco ndihi nde najándique táhan nde tuhun nde cahní nde Pablo. Ta ñachicaān nde cháhan jata ndá da ná cuxu nani tácu Pablo. <sup>15</sup> Sahá ña cán quéa caja ndó ñamaní jándique táhan ndó tuhun ndó xihín java ga na sacuaḥa jan já ná cahan ndó xihín da cúu jefe soldado já ná cañehe tucu da Pablo quixi da nu ndo. Ta cahan loho ndó xihín dá ña cúni ndó caja vii cuéé chága ndó sahá ña ñacaja Pablo. Já va cachi ndó xihín da cúu jefe soldado cán ta ndeḥe canduu tiaḥva nde cahní nde da tá ná quixi da íchi —ñacachi na xihín na sacuaḥa cán.

<sup>16</sup> Joo in taa loho, da cúu jaxi Pablo ñañeḥe dá tuhun ña sácú ini na cahní na Pablo sahá ña cán quéa xínu da ñasahan da cáxi tuhun da nu Pablo vehe soldado cán. <sup>17</sup> Tá nandihí nandicani taa loho cán ña yóho nu Pablo já ñacana da in táhan da cúu soldado cán já ñacachi da já xihín dá:

—Cajún ñamaní candacún da loho yóho ná cuhun da nuú da cúu jefe nu soldado. Jáchi ín tuhun cúni da yóho cahan da xihín da cán —ñacachi Pablo xihín dá.

<sup>18</sup> Anda já ndáca soldado cán da cúu jaxi Pablo ñasahan da nuú da cúu jefe soldado cán já ñacachi da já xihín dá:

—Da nani Pablo ndácaān vehe soldado ñaxica da ñamaní nuú i ña ná candaca i da loho yóho quixi i ñeḥé e da jáchi ín tuhun cúni da cahan da xihín ndo —ñacachi da.

<sup>19</sup> Anda já natiin jefe soldado cán ndahá taa loho cán já natavá xóo da da já ñacasáhá ndáca tuhun ñahá da já ñacachi da já xihín dá:

—Ndía cúnun cahún xihín i —ñacachi da.

<sup>20</sup> Anda já ñacasáhá taa loho cán cáxi tuhun da já ñacachi da já:

—Najándique táhan na Israel tuhun na ña cacā na ñamaní nu mé ndó ña ná cañehe tucu ndó Pablo nuú na sacuaḥa nuú na Israel cán ña cavií vaḥa chága saḥa dá. <sup>21</sup> Joo a cándusa ndó caja ndó ña cúni na jáchi yáha chága nuú ivi jico taa ndáti jehé na íchi ña cahní na Pablo. Ta nandique táhan tuhun na ña a cúxu na ni a cóho na ticuifí janda quiahva ná cahní na Pablo. Ta viti ndáti na candehé na á caja ndó ña cúni na —ñacachi jaxi Pablo cán xihín da cúu jefe soldado.

<sup>22</sup> Ta tá nandihí já ñacachi da cúu jefe soldado cán xihín dá ña ná a ndícani da nuú ni in ñayivi sahá ña sácú ini na Israel caja na xihín Pablo. Chí ñaquee da loho cán cuahan da.

### *Chíndahá na Pablo cuahan da nuú gobernador nani Felix*

<sup>23</sup> Anda já ñacana jefe soldado cán ivi da sáhdá chuun nuú soldado ta ñasahnda da chuun nu dá ña ná caja tiaḥva da ivi ciento soldado táhan da xíca sahá xihín uní jico uxu soldado táhan da cándójó cuáyi. Ta ñataḥnda chuun nu dá ña ná caja tiaḥva da inga ivi ciento táhan da ñeḥe lanza já ná candaca na Pablo cuhun da ñuu Cesarea cán. Ta ná quee na cuhun na tátuhun caā in sacuaá. <sup>24</sup> Ta ñasahnda da chuun ña ná caja tiaḥva na cuáyi canúu Pablo cuhun da. Ta ñasahnda da chuun ña ná candaa vaḥa na Pablo já ná cuu xínu coo vaḥa da nuú da cúu gobernador nani Felix ñuu Cesarea cán. <sup>25</sup> Ta ñachindahá da in carta cuahan xihín ná já ná ndiquiahva na ña nuú da cúu gobernador cán ta ña yóho cúu mé tuhun ñacahyi nu carta cán:

<sup>26</sup> “Yeḥe cúu Claudio Lisias ta chíndahá i carta yóho nu ndo, tá Felix. Ta nu carta yóho cáhan Ndióxi yeḥe xihín ndo, da cúu da cáhnu ñuu Cesarea cán. <sup>27</sup> Candehé ndo, tá Felix. Chíndahá i da yóho nu ndo jáchi natiin na Israel da ta ndúcú na cahní na da. Joo tá ñacandaa ini i ña cúu dá da romano já ñasahan i xihín java soldado ta ñacandaa nde da ndáha na cán. <sup>28</sup> Ta sahá ña cúni candaa ini i ndá cuachi jácojo na jata dá sahá ña cán quéa ñasañeḥe e da ñasahan i nuú na sacuaḥa nuú na Israel cán. <sup>29</sup> Já ñacandaa ini i ña jácojo na cuachi jata dá saḥa ley mé va na. Ta sahá ña coo cuachi ñacaja da nu mí sahá ña cán quéa

coó naxeen nde ña ná cahní na da ta ni janda vecaa co cáni nu dá cuhun da, cahní i. <sup>30</sup> Joo nacandaa ini i ña sácú ini na Israel cahní na da sahá ña cán quea chindahá vaha i da nu mé ndó. Ta nacachi i xihín na xójo ini xihín dá ña ná saa na nu mé ndó cacu na saha dá ndía ndóho na xihín dá. Ña yóho cúu ndihi ña cahan i xihín ndo, tá Felix. Ndióxi ná coo xihín ndo”, cáchi carta cuahan xihín Pablo.

<sup>31</sup> Ta nacaja mé soldado cán tá ín natahnda chuun nu dá. Ta já ñéhe ñuu na Pablo nasahan na janda ñuu Antípatris. <sup>32</sup> Ta inga quivi itaan já nandicó coo java soldado, da nasahan sahá cán chí vehe soldado. Joo java da cándójó cuáyi cán catáhan yii dá xihín Pablo cuahan da. <sup>33</sup> Ta tá naxinu coo da ñuu Cesarea já nandiquiahva da carta cán nuú da cúu gobernador. Ta nandiquiahva ri da Pablo nuú da cán. <sup>34</sup> Ta tá sa nandihí nacahvi da cúu gobernador carta cán já nacasáhá ndaca tuhún da Pablo saha ndá ñuu naquixi da. Ta tá nacandaa ini da ña cúu Pablo da ñuu Cilicia <sup>35</sup> já nacachi da já xihín dá:

—Janda quiahva ná xinu coo na jácojo cuachi jatun anda já caja vii i sahún — nacachi Felix cán xihín Pablo.

Tá nandihí já nasahnda da chuun ña ná candaa vaha na Pablo nani ndacaan da vechuun Herodes cán.

## 24

*Ndiquehe Pablo saha mé dá nuú da cúu gobernador naní Felix cán*

<sup>1</sup> Ta tá sa nayaha uhun quivi já naxinu coo da cúu sacuaaha nuú jutu, da naní Ananías cán. Naxinu coo da ñuu Cesarea xihín java ga na sacuaaha ta ndaca da in da ndiquehe sahá na Israel naní da Tértulo. Tóco ndihi na yóho nacatáhan na nasahan na sácú na saha Pablo nuú gobernador cán. <sup>2</sup> Ta tá nandihí já nasahan quehe na Pablo já naxinu da nuú ndihi na cán. Anda já nacasáhá Tértulo cán sácú da saha Pablo já nacachi da já:

—Ndiquiahva nde ndixahvi nu ndó, tá gobernador jáchi sahá ña ndichí jini ndó cúu ndáa vaha ndó ndehe. Ta coo tandóho tañu nde ta tóco ndihí nde ndúu táji nde.

<sup>3</sup> Ñayivi ndúu ndijáá ñuu ín toni ñuhú na

xihín ndo ta ndiquiahva na ndixahvi nu ndo, tá Felix jáchi cája cuaha ndó ñamani xihín nde. <sup>4</sup> Ta viti coo cúni nde jáquihvi nde ndohó joo caja ndó ñamani cuni johó loho ndó ña cúni nde cahan nde xihín ndo yóho. <sup>5</sup> Candehé ndo, tá Felix. Nanditahan nde da naní Pablo yóho xíca nuu da jáquihvi da ñayivi. Ta ní cúu xíca nuu da sáhdá java táhan da ñayivi naquixi chichi Israel. Ta mé Pablo yóho cúu dá jini nuú in táhdá ñayivi, na naní nazarenos. <sup>6</sup> Ta jivi mé da yóho nanducú da jáyuxu da veñuhu cáhnu nde ndacaan ñuu Jerusalén cán. Sahá ña cán quea natiin nde da ta nanducú nde caja vii nde saha dá tá quiahva sáhdá ley mé nde caja nde. <sup>7</sup> Joo da cúu jefe soldado, da naní Lisias cán naquihvi da tañu nde ta xihín ña tóyí nacandaa da Pablo ndahá nde. <sup>8</sup> Ta nacachi da xihín nde ña ná quixi nde cahan cuachí nde nu mé ndó saha Pablo. Ta viti, tá Felix cuu ndaca tuhún ndó Pablo jan ta já nahma mé va da nu ndo. Ta xihín ña yóho cuu candaa ini ndó ña ndaa cahan nde sácú nde saha dá nu ndo —nacachi Tértulo cán xihín Felix.

<sup>9</sup> Ta jári na Israel ndúu cán nacachi na ña jivi ndusa ña ndaa quea. <sup>10</sup> Anda já nandínehe gobernador cán ndaha dá ña ná cahan Pablo. Ta já cáchi Pablo já:

—Cáji ini i ndiquehe e saha i nu mé ndó, tá Felix jáchi sa cuahá cuia cája vii ndó sahá ñayivi Israel. <sup>11</sup> Tá ná ndaca tuhún ndó ñayivi yóho já candaa ini ndó ña sa ín uxu ivi quivi naxinu coo i ñuu Jerusalén caja cáhnu i Ndióxi. <sup>12</sup> Ta ni in tuhún toho ñayivi coo ndítuhún ihvi yehe xihín. Ta ni in tuhún toho ñayivi coo najándinihi i veñuhu cáhnu ndacaan Jerusalén cán. Ta ni na táca veñuhu válí ta ni na táca cáyé ñuu Jerusalén cán coo najándinihi i. <sup>13</sup> Ta na jácojo cuachi jatá i yóho a cúu caja na nahá na nu mé ndó ña ndaa cahan na sahá i. <sup>14</sup> Ña cúni ndusa i caxi tuhún i xihín ndihi ndó quea cája cáhnu i Ndióxi, mé a nacaja cáhnu tásáhnu jícó i tá quiahva najánaaha Jesús caja í. Vatí cáchi na Israel yóho ña coo xíca i íchi ña ndaa. Joo cándusa i tóco ndihi ley nacahyí Moisés ta cándusa i ña nacahyí na profeta sanahá. <sup>15</sup> Ta tá quiahva cándusa na yóho quiahva já cándusa ri yehe va jáchi cándusa nde ña

vaxi quiví nditacu tóco ndihi na sa naxihí. Coó caja toho á cúu ná na vaha á na quini. <sup>16</sup> Sahá ña cán queá xini Ndióxi ña ndijáá ní quiví caja i ña vaha xihín ndinuhu ini i nu mé á xihín nuú ñayivi.

<sup>17</sup> Sa ín chá cuia naxica nuu i java ga ñuu. Anda javí nandicó coo tucu u ñuu Jerusalén ña quiahva i jiuhún nuú na Israel ta joco i nu Ndióxi ña ndítahan nuú i joco i nu á. <sup>18</sup> Ta nani caja i mé ña yóho ndácaan i veñuhu cáhnu Jerusalén cán já java da Israel, da naquixi chí estado Asia cán naxini da yehe nu ndácaan i ve ñuhu cán. Ta tá nandihí nandaja vii i mí i tá quiahva sáhdá ley caja nde, coó ñayivi cuaha nasanduu cán ta ni in túhún toho na cán coó najándinihi i. <sup>19</sup> Ta na naquixi chí Asia cán, na cán va cúu na ndítahan cacu sahá i nu ndo, tá Felix tá ín a ndóho na xihín i. <sup>20</sup> Joo na ndúu yóho coó saha toho na cacu na sahá i nu mé ndó. Á tá coó ná cahan na tá nandiñehe ná cuachi i tá nacaja vii na sahá i nuú na sacuahá nuú na Israel cán, dá já. <sup>21</sup> In túhún ña nacaja i tá caja vii na yóho sahá i queá nacayuhú u ta nacachi i: “Caja vii ndó sahá i sahá ña cándusa i ña vaxi quiví nditacu tucu ndii”, ña cán cúu ndihi va nacachi i xihín ná —nacachi Pablo cán xihín da cúu gobernador cán.

<sup>22</sup> Sa xini vaha Felix cán ndaja ín ña jánaha na cúu cuéntá Jesús cán sahá ña cán queá cuni da candati too da caja vii da saha Pablo. Sahá ña cán queá já nacachi da já xihín na Israel cán:

—Candati ndó janda quiahva ná casa da naní Lisias, da cúu jefe soldado ñuu Jerusalén já cuu caja vii i sahá da yóho —nacachi Felix.

<sup>23</sup> Tá nandihí já nasahnda Felix chuun nuú da sáhdá chuun nuú soldado cán ña ná chicao tucu na Pablo veca. Ta nasahnda da chuun ña ná caja vaha da xihín Pablo ta ná quiahva da ñamaní nuú na xica xihín Pablo coto nihni na da ña ná caja ndívi na nu dá.

<sup>24</sup> Tá nayaha chá quiví já nacasa tucu Felix cán xihín Drusila, ñájihí da, ña cúu ña Israel. Nacana tucu Felix Pablo ña ná quixi da ta ná ndicani da nu ná ndá quiahva caja na ndiquehe na íchi cuéntá Jesús. <sup>25</sup> Ta nandicani Pablo nu ná ña ndítahan nu ná

caja na ña ndaa cuití va ta ndítahan nu ná cahnu na nuú ña xica ini yiquí cuñu na caja. Ta nandicani Pablo nu ná ña vaxi quiví caja vii Ndióxi sahá cuachi ñayivi. Anda já nayihví Felix cán já nacachi da já xihín Pablo:

—Cuáhán viti. Tá núna nuú i já cana tucu u yohó quisún —nacachi Felix xihín Pablo.

<sup>26</sup> Mé Felix yóho ndáti da quiahva Pablo jiuhún nu dá já janí ñahá da. Sahá ña cán queá cuahá ndivaha tañu nacana da da ndituhún da xihín dá. <sup>27</sup> Ta tixi ivi cuia já cuití nacaja da xihín Pablo janda quiahva nandicojo da naní Porcio Festo chuun cacuu da gobernador saá cán. Ta mé Felix cán coó naxeen da janí da Pablo jáchi cuni da candoo vaha da nuú na Israel cán.

## 25

### *Ndiquehe Pablo saha mé dá nuú gobernador Festo*

<sup>1</sup> Tá sa nayaha uní quiví nandicojo Festo chuun cúu dá gobernador já naquee da ñuu Cesarea cán nasahan da chí ñuu Jerusalén. <sup>2</sup> Ta tá naxinu coo da cán nasahan na sacuahá nuú jutu xihín java ga na Israel, na ín chaga saha cahan cuachí na saha Pablo nu Festo. <sup>3</sup> Ta ñamaní cáhnu naxica na nu dá queá ña ná cahnda da chuun ná quixi Pablo chí ñuu Jerusalén yóho. Jáchi mé na cán nasacu ini na tiin na Pablo íchi cahni na da. <sup>4</sup> Joo coó nacandusa Festo caja da ña cuni na sahá ña cán queá nacachi da xihín ná ña ndáá vaha na Pablo ñuu Cesarea cán. Ta sahá ña sácú ini da cuhun yachi da mé cán <sup>5</sup> sahá ña cán queá nacachi da xihín ná já:

—Ndá na cúu na sacuahá nu ndó jan xini ñuhú cuhun na ñuu Cesarea xihín i já ná cuu cacu na saha Pablo tá ín cuachi nacaja da —nacachi Festo xihín na Israel cán.

<sup>6</sup> Ta nasahin Festo tátuhun uná á uxu quiví cuití va ñuu Jerusalén cán já nandicó coo tucu da chí ñuu Cesarea. Ta inga quiví itaan já nasacoo da nu silleta nu sácoo na cája vii sahá ñayivi. Anda já nasahnda da chuun ña ná cana na Pablo quixi da nu dá. <sup>7</sup> Ta tá naxinu coo Pablo nu Festo cán já tóco ndihi na Israel, na naquixi ñuu Jerusalén cán nacava nuu na jata Pablo já nacasahá jácojo cuaha ná cuachi ndeé jata dá. Joo

co ñéhe ná ndaja nahá na nu Festo cán ña cáhan na ña ndaa saha dá. <sup>8</sup> Ta ñacasahá Pablo ndíquehe da saha mé dá já ñacachi da já:

—Ni in túhún toho cuachi coó ñacaja i xihín ley na Israel ta ni xihín veñuhu cáhnu coó ñacaja i cuachi. Ta ni nuú da cómi cuéntá sahá ñuu Roma coó ñacaja i cuachi —ñacachi Pablo xihín tóco ndihi ñayivi ndúu cán.

<sup>9</sup> Ta sahá ña cúní Festo candoo vaha da nuú na Israel sahá ña cán queá nandaca tuhún da Pablo já ñacachi da já:

—Á cándúsún cuhún ñuu Jerusalén já ná caja vií i sahún cán —ñacachi da xihín Pablo.

<sup>10</sup> Anda já nanducú ñehe Pablo tuhún nu dá já ñacachi da já:

—Uhun. Coó saha cúu á cuhún i ñuu Jerusalén jáchi viti ñúhú cándichi i nu mé ndó ta cúu ndó gobernador romano. Ta mé ndó ndítahan nuu caja vií sahá i jáchi sa cándaa cáxi ini ndó ña coó cuachi toho ñacaja i xihín na Israel jan. <sup>11</sup> Joo tá ñacaja ndusa i cuachi, mé a ndaa co yíhvi toho i quivi i sahá cuachi i. Joo a juú toho ña ndaa cúu tóco ndihi cuachi jíquí jácojo na Israel jan jatá i sahá ña cán queá co ndítahan nu ndó ndiquiahva ndó yehe nuú na yóho. Ta viti xíca i ñamaní nu ndo ña ná chindahá ndó yehe ná cuhún i nuú emperador ñuu Roma ná caja vií mé dá sahá i —ñacachi Pablo xihín Festo cán.

<sup>12</sup> Tá nandihí já nanditúhún Festo cán xihín na sacuahá cája chuun nu dá cán ndaja ndítahan coo caja da. Anda já ñacachi tucu Festo cán já xihín Pablo:

—Vaha dá já. Nu emperador íin ñuu Roma ñacachún cuhún cúnun. Ta cán cuhún cavií sahún —ñacachi Festo xihín Pablo.

### *Tá íin Pablo nu rey Agripa*

<sup>13</sup> Tá nayaha chá quiví já naxinu coo in rey naní Agripa xihín ña naní Berenice ñuu Cesarea cán coto nihni na Festo. <sup>14</sup> Ta ñasanduu na chá quiví xihín Festo cán. Ta nani ndúu na cán nandicaní Festo nu rey Agripa ndaja cáa ña ndóho Pablo já ñacachi da já xihín dá:

—Ini vechúun yóho ndácaan in da naní Pablo ta anda tá ñasacuu Felix gobernador

já natiin na da. <sup>15</sup> Ta tá ñasahan i ñuu Jerusalén já sácú na sacuahá nuú jutú xihín na sacuahá nuú na Israel saha dá ña ná quivi da caja i. <sup>16</sup> Anda já nanducú ñehe e tuhún nu ná ña co sahan ley ñuu Roma ñamaní ña cahní na ñayivi tá coó na sácú saha dá ndíta nu táhyí da já ná cuu ndiquehe da saha dá nu ná. <sup>17</sup> Sahá ña cán queá tá nandai cuu na Israel cán ñuu Cesarea yóho já nandihí ini i já ñasahan i ñasacoo i inga quiví itaan nu sácú na caja vií sahá ñayivi. Já ñasahnda i chuun ña ná cañehe na Pablo quixi da nuú i. <sup>18</sup> Tá naxinu coo na cán sácú na saha dá coó ñasacu na cuachi cáhnu saha dá tá quiahva cáhán i. <sup>19</sup> Joo cáchi na ña co cúní da cándúsa da tá quiahva cándúsa mé ná. Ta sácú na saha dá jáchi xíca da jánaha dá saha Jesús, mé a naxihí jihna. Joo jánaha Pablo ña tácu yíi va mé Jesús. <sup>20</sup> Ta sahá ña co cándaa ini i ndaja caja i caja vií i sahá ña yóho sahá ña cán queá nandaca tuhún i Pablo ña á cándúsa da cuhún da ñuu Jerusalén caja vií i saha dá. <sup>21</sup> Joo ñacachi da xihín i ña cúní da cavií saha dá nuú da cúu emperador naní Augusto, da íin ñuu Roma cán. Sahá ña cán queá ñasahnda i chuun ña ná cándaa vaha na da janda quiahva ná cuu chindahá i da nuú emperador já ná caja vií da cán saha dá —ñacachi Festo xihín rey Agripa cán.

<sup>22</sup> Anda já ñacachi rey Agripa cán já xihín Festo:

—Cúní ri yehe va cuni johó i ndá quiahva cáhan da naní Pablo jan —cáchi Agripa.

Anda já ñacachi Festo já xihín dá:

—Itaan já cuni johún nuú cahan da —cáchi Festo.

<sup>23</sup> Ta inga quiví itaan naxinu coo rey Agripa xihín Berenice nu íin Festo cán. Ta ndíxi vaha ndivaha na nandihvi na xihín in yíco da cúu sacuahá nu soldado xihín nataa íin saha ñuu cán. Ta tá ñasanduu na já ñasahnda Festo chuun ña ná cuhún na quehe na Pablo. <sup>24</sup> Ta tá ñasaa da nu ná já ñacachi Festo já:

—Mé ndó, rey Agripa xihín ndihi ndó, na nataca ndúu xihín nde yóho. Candehé ndó da naní Pablo cándichi yóho. Cuahá ndivaha táhan na Israel, na ndúu ñuu Jerusalén xihín na ndúu ñuu Cesarea yóho sácú na saha dá nuú i. Ta a juú quiahva

ndúcú ndéé na cáhan na ña ndítahan quivi da caja i. <sup>25</sup> Joo yehe cáhan i ña co ndítahan toho nu dá quivi da jáchi coo cuachi cáhnu ná caja da. Ta sahá ña naxica mé dá cavií saha dá nuú emperador Augusto íin ñuu Roma cán sahá ña cán quéa sácú ini i chindahá i da cuhun da cán cavií saha dá. <sup>26</sup> Joo co xini ndía cahyí i nuú da cúu emperador ñuu Roma sahá cuachi sácú na saha dá. Sahá ña cán quéa nasani ndichi i da nuú ndihi ndó xihín nu mé ndó rey Agripa já ná ndaja ndichi ndó da já ná ñehe íni i ndaa cahyí i nu carta chindahá i nu emperador ñuu Roma cán. <sup>27</sup> Jáchi coo saha cúu á chindahá i da ñuu Roma tá a cuú cahyí i ndá cuachi jácojo na jatá dá —nacachi Festo xihín na cán.

## 26

### *Ndiquehe Pablo saha mé dá nu rey Agripa*

<sup>1</sup> Anda já nacachi rey Agripa cán já xihín Pablo:

—Viti va sáhan nde ñamaní nuun ndiquehún sahun.

Anda já nandíñehe Pablo ndáha da já nacasáha cáchi da já:

<sup>2</sup> —Cájji íni i ña cuu ndiquehe e saha mí i nu ndó, rey Agripa jáchi a juú quiahva cuahá cuachi jíquí jácojo na Israel jatá i.

<sup>3</sup> Cájji íni i cáhan i nu mé ndó, rey Agripa jáchi cándaa vaha ini ndó ndaja íin costumbre na Israel. Ta cándaa ini ndó ndá ñaha quéa ndítuhún táhan nde saha. Sahá ña cán quéa xíca tahví i nu ndó ña ná caja ndó ñamaní cáhnu coo ini ndó cuni johó ndó ña cáhan i xihín ndo yóho.

<sup>4</sup> Tóco ndihi na Israel xini vaha na ña nacaja i tá nasacuu u da tacú. Ta anda viti xini na yehe ta xini na ña nacaja i ñuu i xihín ñuu Jerusalén. <sup>5</sup> Ta xini vaha na ña janda yuta i nasacuu u ta fariseo ta chí cuu ndicani na nu mé ndó tá cuni na. Ta ndehe, na fariseo cúu nde na cája ley Moisés xihín ndinuhu chága ini nde a juú ga inga na.

<sup>6</sup> Ta sahá ña cándéé cáhnu ini i ña vaxi quiví jánditacu tucu Ndióxi tóco ndihi na naxihi sahá ña cán quéa na Israel yóho ñehe na yehe nacasa na caja vií na sahá i nu mé ndó. Ta mé Ndióxi quéa nasahan tuhun a nu tásáhnu jícó nde ña nditacu tucu ndii.

<sup>7</sup> Tóco ndihi ñayivi táhan na naquixi chichi ndihuxu ivi jahyi Israel cán ndati na cuni na nuú jáxinu coo Ndióxi nuú tuhun a. Sahá ña cán quéa ñuu ta ndivi cája cáhnu na Ndióxi. Candehé ndo, rey Agripa. Sahá ña cándusa i tá quiahva cándusa na cán sahá ña cán quéa jácojo na Israel cuachi jatá i viti —nacachi Pablo xihín rey Agripa.

<sup>8</sup> Anda já nacahan Pablo xihín na Israel ndúu cán já:

—Á mé a ndaa cándusa ndó ña cuu caja Ndióxi ña nditacu tucu ndii —nacachi Pablo xihín na Israel ndúu cán.

<sup>9</sup> Anda já nacachi tucu Pablo xihín rey Agripa já:

—Yehe nacahan i jihna ña ndítahan caja xíxi i xihín na cúu cuéntá Jesús, mé a naquixi ñuu Nazaret. <sup>10</sup> Sahá ña cán quéa já nacaja i ñuu Jerusalén jihna. Ta nasahan i naxica i ñamaní nuú na sacuaaha nuú jutú já ná quiahva na ñamaní nuú i caja i ña yóho. Ta tá nañehé e ñamaní já nataán cuahá i na cúu cuéntá Jesús vecaa. Ta tá nasahní ñahá na, cájji ini i sahá ña cája na já xihín ná. <sup>11</sup> Ta cuahá tañu nacaja xíxi i xihín ná ña ná cáhan ihvi na saha Jesús, mé a cándéé ini na. Níí cúu veñuhu naxica nuu i cája i já xihín ná. Ta janda ñuu tóho nasahan i nandicuita ñee e na jáchi nasaxojo ndivaha ini i xihín ná.

### *Ndicani Pablo ndaja nandihvi da íchi cuéntá Jesús*

(Hch. 9:1-19; 22:6-16)

<sup>12</sup> In tañu nañehé e ñamaní nuú na cúu sacuaaha nuú jutú ñuu Jerusalén ña ná cuhun i ñuu Damasco taán i na cúu cuéntá Jesús vecaa. Sahá ña cán quéa naquee e cuahan i. <sup>13</sup> Candehé ndó, rey Agripa. Nani xíca i cuahan i íchi cán cúu á tátuhun caxivi já naxini i nandiyihvi ndaa in ñúhu indiví ta yehe chága ña a juú ga candii. Ta nacava nuu a jatá i xihín jatá da casahan xihín i cán.

<sup>14</sup> Anda já nacuyu ndihi nde nu ñúhu ta já naxini johó nde in a cáhan tuhun hebreo já nacachi a já xihín i: “Saulo, Saulo ndá cuéntá quéa ndicuitún cája xísún xihín i. Candehé. Cája xísún xihín mé vún. Ña cájun xihín i cúu á tátuhun ña cája tindiquí tá sání ndaa rí nu póyá”, nacachi a cán xihín i. <sup>15</sup> Anda já nacasáha ndaca tuhún i já

cáchí i já: “Yo cúú mé ndó cáhan xihín i.” Anda já nanducú ñehe a cán tuhun nuú i já nacachi a já: “Yehe cúú Jesús, mé a xíca nuún cája xísún xihín. <sup>16</sup> Ta viti cuáhán ndacoo, candichi. Nanaha i mí i nuun já ná caja chúún cuéntá mí i viti já ná ndicanún nuú ñayivi ndaja cáa ña naxinún viti ta já ná ndicanún nu ná java ga ñaha jánaha i nuun chága chí nuu. <sup>17</sup> Mí i jáca cu u yohó já ná a cáhni na Israel yohó ni na tóho a cáhni na yohó jáchi nu mé na tóho cán chindahá i yohó cuhún cahún sahá i viti. <sup>18</sup> Ta jánahún nu ná ndaja caja na jándicoo na íchi naá ndivaha nu xíca na viti. Jáchi ndítahan nu ná ndicaca na íchi mí i nu yehe ndivaha. Ta jánahún nu ná ña ná a ndiquiahva ga na mé ná ndahá tiñahá sacuaaha. Ña ndítahan caja na quea ndiquiahva na mé ná ndaha Ndióxi ta ná caja na ña cúni mé á. Ta ndítahan candeé ini na yehe já ná caja cáhnu ini i sahá cuachi na. Ta já ná cuu in nduu na xihín na nacaxi i ñehe táhvi ña cúni Ndióxi quiahva nu na”, nacachi Jesús xihín i tá nasahan i íchi ñuu Damasco.

#### *Ndicani Pablo sahá chuun cája da*

<sup>19</sup> Candeheé ndó, rey Agripa. Coó nacaja sáa ini i. Jáchi nacaja i tá ín nasahnda Jesús nuú i caja i. <sup>20</sup> Sahá ña cán quea ivi laá nacasahá cáhan i tuhun vaha saha Jesús nuú ñayivi ñuu Damasco cán. Tá nandihí já naquee e nasahan i cahán i ña xihín na ndúu ñuu Jerusalén xihín na ndúu ndijáa ñuu estado Judea. Ta janda xihín na coó naquixi chichi Israel nacahan i saha Jesús. Ta nacachi i xihín ná ña ndítahan nu ná jándacoo na ña núu cája na ta ná ndicó coo na nu Ndióxi. Ta ndítahan caja na ña vaha já ná naha ña mé a ndaa táhyí nandiquehe na íchi cuéntá Jesús. <sup>21</sup> Ta sahá ña yóho cuití natiin na Israel yehe nani ndacaan i veñuhu cáhnu ñuu Jerusalén ta viti ndúcú na cahní na yehe. <sup>22</sup> Joo Ndióxi nachindeé a yehe sahá ña cán quea coó najándihí na sahá i. Ta anda viti xíca nuu i cáhan i tuhun Ndióxi nuú ñayivi ta coó caja toho a á cúú ná na ndahví á cúú ná na ín cuahá saha. Ta tóco ndihí ña jánaha i nu ná coo cúú á ña quixi jiní mí i jáchi cúú á ña nacachi na profeta xihín ña nacachi Moisés coo. <sup>23</sup> Ta ña nacachi na cán quea vaxi

quíví quixi Jesucristo ñuyíví yóho ta a juú quiahva jándoho na ini a. Ta cahní na ña ta tá nandihí jánditacu tucu a. Ta mé á cacuu ña nu cuití nditacu nuú tóco ndihí na sa naxihí. Ta mé á jánaha nuú ñayivi ndaja cuu cacu ndaa ínimá ná coo caja toho a á cúú ná na Israel á cúú ná na tóho —nacachi Pablo xihín rey Agripa cán.

#### *Cúni Pablo ná ndihvi Agripa íchi cuéntá Jesús*

<sup>24</sup> Tá nacatáji loho Pablo nu cáhan da já nacayúhú cóho Festo nu dá já cáchí da já:

—Nacatachi vún, Pablo. Nayaha ndivaha quiahva najacuahún sahá ña cán quea nacatachun —nacachi Festo cán xihín Pablo.

<sup>25</sup> Anda já nacachi Pablo já xihín dá:

—Coó nacatachi toho i, tá Festo jáchi nd-inuhu ña ndaa cáhan i xihín ndo. <sup>26</sup> Ta xíni vaha mé rey Agripa yóho ña cáhan i ña ndaa. Ta coo yíhvi cahán i nu dá jáchi cándaq ini i ña xíni vaha mé dá ndá saha cáhan i jáchi coo cúú á ñaha nayaha nuú jehé. <sup>27</sup> Ta viti cachi ndó xihín i, rey Agripa á cándúsa ndó ña nacahan na profeta sanahá. Cája i cuéntá cándúsa ndó ña nacachi na —nacachi Pablo.

<sup>28</sup> Anda já nanducú ñehe rey Agripa cán tuhun já nacachi da xihín Pablo:

—Ja lóho cuití ta cavún jiní i ña ná nduu u cuéntá Jesús, nduu —nacachi rey Agripa.

<sup>29</sup> Anda já nacachi Pablo já xihín dá:

—Á yachi á cuee coo caja toho a. Ña xíca táhvi i nu Ndióxi quea ná xinu coo mé ndó, rey Agripa xihín tóco ndihí na ndúu yóho cacuu ndó tátuhun mí i jáchi candeé cáhnu ini i Jesús vatí mé a ndaa coo cúni ña ná candico ndaha ndo tátuhun yehe —nacachi Pablo xihín dá.

<sup>30</sup> Tá nandihí nacahan Pablo já nandaca ndichi rey Agripa cán xihín Berenice ta nandaca ndichi Festo xihín java ga na nasanduu coo xihín dá cán. <sup>31</sup> Já natavá táhan na ndítuhún na saha Pablo já cáchí xihín táhan na já:

—Co ndítahan toho nuú da yóho quivi da jáchi coo cuachi ndeé ná caja da ta janda ni vecaa co ndítahan ndacaan da —cáchí na.

<sup>32</sup> Anda já nacachi rey Agripa cán já xihín Festo:

—Tá ná a cáhan da yóho ña cúní da cavií saha dá nuú da cúú emperador ñuu Roma ta cuu janí vún da, nduu —ñacachi Agripa cán xihín Festo.

## 27

### *Chindahá na Pablo ñuu Roma*

<sup>1</sup> Tá nasacu ini na chindahá na Pablo ná cuhun da chí nación Italia nu ndácaan ñuu Roma cavií saha dá já nandiquiahva na da xihín java ga da ndácaan vecaa cán nuú da naní Julio, da sáhdá chuun nu soldado cuéntá Roma. Mé Julio yóho cúú dá da cómí cuéntá sahá in táhdá soldado naní Augusto. Ta tañu na cuhun xihín Pablo cán cuahan ri yehe, da naní Lucas. <sup>2</sup> Ta tañu nde cán cuahan ri da naní Aristarco, da ñuu Tesalónica, ña ndácaan estado Macedonia. Nandaa nde ini barco, dó naquixi chí Adramitio. Mé barco yóho cúú dó cuhun ndijáá ñuu válí ñúhu estado Asia cán. Cándójó nde barco cán cuahan nde. <sup>3</sup> Ta inga quiví itaan naxinu coo nde ñuu Sidón. Ta cán nacaja vaha da naní Julio cán xihín Pablo jáchi nasahan da ñamaní nu Pablo ña ná coto nihni da na xini táhan xihín dá ndúu ñuu Sidón cán já ná caja ndíví na nu dá. <sup>4</sup> Ta inga quiví itaan já nandihvi tucu nde barco já naquee nde ñuu Sidón cán. Ta sahá ña vaxi tachí xoo nuú cuhun barco cán sahá ña cán quea nayaha nde xoo íti isla Chipre jáchi coo xicó cuahá tachí cán. <sup>5</sup> Naxojo cava nde anda inga xoo tañuhú ta já nayaha nde in xoo estado Cilicia xihín estado Panfilia. Anda já naxinu coo nde ñuu Mira ndácaan estado Licia.

<sup>6</sup> Mé ñuu Mira cán nandiñehé da sáhdá chuun nu soldado cán in barco, dó naquixi chí Alejandría ta cuhun do chí Italia. Ta najándaa da ndehe jata dó cán já naquee tucu nde cuahan nde. <sup>7</sup> Cuéé vaha va cuahan nde ta nandoho chá ini nde cuahan nde sahá ña cán quea cuahá quiví nacaja nde janda quiahva naxinu coo nde ñuu Gnido. Ta sahá ña xicó ndivaha tachí xoo nuú cuhun nde cán sahá ña cán quea nandijama nde nuú cuhun nde. Ta já nayaha nde inga xoo isla Creta nuú nayaha nde ñuu Salmón. <sup>8</sup> Cuéé ndivaha cuahan nde já yaha nde yati yuhú tañuhú isla Creta cán. Anda javí naxinu coo nde nuú

coo vaha barco naní Puerto Vaha yati ñuu Lasea.

<sup>9</sup> Sa nayaha cuahá quiví ta nacacuáchi nde. Ta iyo ndivaha cáa cuhun nde xihín barco jáchi nacayati tiempo vixi. Sahá ña cán quea nacahan Pablo xihín ndihi na cán já cáhí da já xihín ná:

<sup>10</sup> —Candehé ndo. Cája i cuéntá iyo ndivaha cáa coho xihín barco jáchi cuu ndihi saha barco xihín ña ndójo dó cuahan do. Ta janda mí cuu quiví —ñacachi Pablo xihín ná.

<sup>11</sup> Joo coo naxeen da sáhdá chuun nuú soldado cán cuni johó da nu cáhan Pablo. Nacandúsa chága da nuú nacahan da ñehe barco xihín da xíñaha barco a juú ga nuú nacahan Pablo. <sup>12</sup> Ña nacachi na quea a cúú candoo na yóho tiempo vixi jáchi xicó ndivaha tachí. Ta tóco ndihi na nacachi na ña vaha chága ná cuhun nde. Tiahva náá jana quee vaha nde xinu coo nde janda ñuu Fenice cáhan na. Mé ñuu Fenice cán ndácaan isla Creta ta coo xicó ndeé nahá tachí cán. Sahá ña cán quea nasacu ini na canduu na cán tiempo vixi.

### *Tá naxicó ndivaha tachí nuú tañuhú*

<sup>13</sup> Tá nandihí já nacasáhá vitá uun xicó tachí sahá ña cán quea nacahan na ña cuu va quee nde cuhun nde. Anda já naquee nde cuahan nde yati yuhu isla Creta cán xica nde cuahan nde. <sup>14</sup> Joo tá nandihí já naxinu tachí ndeé jata barco. Mé tachí ndeé cán vaxi a chí xoo norte xihín chí nu cána candii. <sup>15</sup> Ta nacasáhá ñúhu mé tachí ndeé cán barco cuahan do. Ta sahá ña coo nacuu caja nde jándicaca nde barco cán xoo nuú vaxi tachí sahá ña cán quea nasahan nde ñamaní ña ná cañehe a barco cuhun do tá quiahva cúní tachí. <sup>16</sup> Tá nandihí já nayaha nde jata in isla loho naní Clauda. Ta mé cán coo naxicó nahá tachí ndeé. Anda já nacasáhá nde jándaa nde lancha loho, dó jítá barco cáhnu cán. Joo nandoho chá ini nde já nacuu najándaa nde do jata barco cáhnu cán. <sup>17</sup> Tá nandihí já nacava nuu na rieta jata mé barco cáhnu já ná coo tóyí do. Tá nandihí já najánuu na jáhma cáhnu sándaca barco cán ña ná cañehe mé tachí do. Nacaja na ña yóho jáchi yíhví na xinu coo barco xoo naní Sirte nu yáji tañuhú ta cán cuu cachihin dó ñutí. <sup>18</sup> Ta

chí coó nasacuijn tachí ndeé nahá cán inga quiví itaan sahá ña cán quéa nacasáhá na jácana nihni na ñaha ndójo barco cán ini tañuhú já ná ndicama dó. <sup>19</sup> Ta tá naxinu quiví uní janda mé nde viti nacasáhá nde jácana nde ña sácaya chúun barco cán ini tañuhú já ná ndicama chága do. <sup>20</sup> Ta tixi cuahá ndivaha quiví coó naxini nde nuú candii ta ni quimi co tívi. Ta javi nacuun quini ndivaha dó ta a juú quiahva naxicó ndivaha tachí. Sahá ña cán quéa chí nasahnda vaha ini nde: “Yóho quiví viti”, nacañán nde.

<sup>21</sup> Cuahá ndivaha quiví nayaha ta ni in nde co cúní cuxu. Sahá ña cán nandaça ndichí Pablo tañu tóco ndihi na cán já nacasáhá cáchí da já:

—Tá ná coo johó ndó tá nacañan i xihin ndo ta ná candoo í ñuu Creta, nduu. Ta ni a ndóho í ña ndóho í yóho viti ta ni a tiví toho ndihi ñaha nasandojo barco yóho, nduu. Joo coó naxeen ndó candúsa ndó ña nacañan i xihin ndo. <sup>22</sup> Joo cáchí i xihin ndó viti ña co ndítahan ndicani ini ndó. Jáchi ni in túhún toho ndó a quiví vatí mé barco ndihi saha do. <sup>23</sup> Jáchi yehe cúu u cuéntá Ndióxi ta cája cáhnu i mé á. Ta mé ñuu janda véhe nanaha in tátó Ndióxi mé á nuú i. <sup>24</sup> Ta já nacañi a já xihín i: “A cáyihví tohún, Pablo. Jáchi ndítahan xinun tá xinun nuú da cúu emperador ñuu Roma cán. Ta saha yóhó jácacu ri Ndióxi tóco ndihi na ñuhu xuhun ini barco jan já ná a quiví na ini tañuhú”, já nacañi tátó Ndióxi xihín i. <sup>25</sup> Sahá ña cán quéa a ndicani ga ini ndó jáchi cándéé cáhnu ini i Ndióxi ta cándaa cáxí ini i ña coo tá ín nacañi tátó Ndióxi xihín i. <sup>26</sup> Joo in tachí ndeé caja ña ná tiví barco yóho yati in isla —nacañi Pablo xihín na cán.

<sup>27</sup> Sa naxinu sañun quiví xíca nde ini barco cán cuahán nde. Ta in ñuu naxinu coo nde in xoo tañuhú naní Adria. Joo tá xoo johó tá xoo cáa ñéhe tachí nde cuahán nde. Joo tátuhun java ñuu já naxini da ñéhe barco cán ña cáyati nde yuhú tañuhú cuahán nde. <sup>28</sup> Anda já nacasáhá chíquiahvá na ndá quiahva cúná tañuhú yati yuhu nu nduu nde cán. Ta quiahva cúná do nasacuu oco sañun in metro. Tá nacasáhá cáyati chága barco yuhu cán já

nachiquiahva tucu na. Ta cán sa yáji chága ta cúu á oco usa metro quiahva cúná a. <sup>29</sup> Ta sahá ña yíhví na xinu coo barco caní ndaa dó tóto ñuhu yati cán sahá ña cán quéa natiin na rieta ña ndíco comí caa gáncho cáhnu nu cán. Ta najácana na ña ini tañuhú chí xoo cáha mé barco cán já ná tiin a barco ná a cáca ga dó cuhun do chí nuu. Ta a juú quiahva yíhví na ndáti na ná tiví. <sup>30</sup> Joo ndaja coo java da cája chúun xihin barco cán nacañán da quee jehé da xihin lancha loho cán cuhun da. Sahá ña cán quéa nacasáhá da ndáxi da lancha loho cán ña jánuu da do nuú tañuhú ta já cuhun da, cáhán da. Ta nacasáhá cája da tátuhun táan chága da caa gáncho cán ini tañuhú já ná tiin a barco xoo chí nuu do. <sup>31</sup> Joo naxini Pablo ña cája da sahá ña cán quéa nacañi tuhun da nuú da sáhdá chuun nuú soldado ta xihín nuú soldado cán já cáchí da já xihin ná:

—Tá ná quee da jan cuhun da já quéa ndihi saha ndó ini tañuhú —nacañi Pablo.

<sup>32</sup> Anda já nasahan soldado cán nasahnda da rieta ndíco lancha loho cán já najándicava da dó ini tañuhú.

<sup>33</sup> Ta tá sa yati tiví yaa já najacañan Pablo tóco ndihi na cán ña ná cuxu na vatí loho. Já nacañi da já xihin ná:

—Sa nayaha sañun quiví co xíxi ndó ta ni co quíji ndo. <sup>34</sup> Sahá ña cán xíca i ñamaní nu ndó ña ná cuxu ndó vatí chá va. Xíní ñuhú cuxu ndó já ná coo ndéé ndo chindeé ndó mé ndó já ná cacu ndó. Jáchi cacu ndihí. Ta ni janda in túhún ijí jiní yo a ndihi saha —nacañi Pablo xihin ná.

<sup>35</sup> Tá nandihí nacañi Pablo ña yóho xihin ná já natiin da in pan ta nu táhyí ndihi na cán nandiquiahva da ndixahvi nu Ndióxi. Tá nandihí já nasahnda java da ña ta nacasáhá da xíxi da. <sup>36</sup> Xihín ña yóho nandindeé ri ini na java cán ta nacasáhá na xíxi na. <sup>37</sup> Ta tóco ndihi nde, na nasañuhu ini barco cán nasacuu nde iví ciento uní jícó sañun in ñayívi. <sup>38</sup> Tá nandihí naxixi nde ña cúní nde já nasata na trigo ini tañuhú já ná ndicama chága jata barco cán.

### *Cácoo barco cahá tañuhú*

<sup>39</sup> Joo tá nativi yaa já naxini na ñundáhyi. Joo coó nacu ndicuni da cája chúun xihin



barco cán ndá ñuu cúú á. Ta tá nandihí já naxini na ña ín ñutí nu yájí yuhú tañuhú cán. Anda já naçahán na jácayati na barco yati yúhu cán. <sup>40</sup> Sahá ña cán quea nasahnda na rieta ndíco barco cán já najani dó. Ta naçandoo caa gáncho ini tañuhú naçaja na. Ta tá nandihí já najánditayi na yító nuú jahnda ta xihín yító cán naçasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín tachí. Ta xihín ña yóho naçasáhá barco cán cáyati dó yuhú tañuhú. <sup>41</sup> Ta in cuití naxinu barco cán nu ndíque táhan ivi táhnda tañuhú. Ta sahá ña naçayájí tañuhú nuú ñutí cán sahá ña cán quea naçatjin nuu barco cán. Ta ni loho ga coo naçuu cuhun do. Joo xihín ña quiahva ndeé ndacú cáni ndaa tañuhú cán xoo cáha do sahá ña cán quea naçasáhá cháchí dó. <sup>42</sup> Anda já nanducú soldado cahní ndihí da na cuahan vecaa ñuu Roma cán. Jáchi tiahva náá jítá na cuhun na nuú tañuhú ta cunu na cuhun na tá sa naçqueta na yuhú tañuhú, cáhán na. <sup>43</sup> Joo da sáhnda chuun nuú soldado cán coo nasahan da ñamaní ña ná caja na já jáchi cúni da jácaacu da Pablo. Ña naçaja da quea nasahnda da chuun nuú na tiahva jítá ticuúí ña ná jácana na mé ná ini tañuhú cán já ná xinu na nu ñúhu. <sup>44</sup> Ta na java, na co tiahva jítá ticuúí cán naçachi da xihín ná ña ná ndaa na jata yító á jata túhun barco cán já ná xinu na nu ñúhu. Anda jáví naxinu coo vaaha tóco ndihí nde nu ñúhu.

## 28

### *Ín Pablo isla Malta*

<sup>1</sup> Tá sa naxinu coo vaaha ndihí nde yuhú ñundáhyi cán já naçandaa ini nde ña naní a isla Malta. <sup>2</sup> Ta vaaha ndivaha naçaja ñayivi ndúu isla cán xihín nde. Nandicahmi na ñúhu jáchi naçasáhá cúun ga javi ta a juú quiahva vixi xíní nde. Chí naçahan na xihín nde ña ná cativi nde catúní nde. <sup>3</sup> Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naçqueta in coo tañu títo cán xínu rí sahá ña ihní ñúhu. Ta natiin rí ndáha Pablo. <sup>4</sup> Ta tá naxini na isla Malta cán ña ndícaa coo

ndáha Pablo já naçasáhá cáchi xihín táhan na já:

—Ndá da sáhní ndii cúú da yóho jáchi vatí coo naxihí da ini tañuhú joo yóho cúni Ndióxi jándihí a saha dá —naçachi na.

<sup>5</sup> Joo mé Pablo naquiji nihni da coo ndícaa ndáha dá cán nu ñúhu cándaha cán ta coo ña ná ndoho da. <sup>6</sup> Tóco ndihí na cán ndátí na cuni na ña ná quihvi cuiñu ndáha dá á tá coo ta in cuití ndicava da quivi da, naçahán na. Ndátí na java cán cuni na ndaa ndoho Pablo joo tá sa naçanahá ndátí na coo ñaha ná ndoho toho Pablo cán. Anda já nandijama jiní ná ta naçasáhá na cáhan na ña cúú dá in ndióxi.

<sup>7</sup> Yati nuú naxinu nde cán naçacuu a ñundáhyi da naní Publio, da cómi cuénta saha isla cán. Ta tixi uní quivi nandiquehe vaaha ndivaha da ndehe ta vaaha naçaja da xihín nde. <sup>8</sup> Ta ndaja coo quihvi tátá Publio cándúhu dá ndóho da cuehe nji ta chicaan cáhni ñahá. Ta já nasahan Pablo naxito nihni da da ta naçasáhá Pablo xíca tahví da nu Ndióxi saha dá ta naçhinúu Pablo ndáha dá jiní dá ta já ndivaha da. <sup>9</sup> Tá naxini java ga na quihvi ndúu isla cán ña naçaja Pablo já naquixi na nu dá ña ná ndaja vaaha da na chí ndivaha na. <sup>10</sup> Ta nandiquiahva na ndixahvi nuú nde ta najasá na cuahá ñaha nuú nde. Tá naxinu coo quivi ndaa nde barco cuhun nde já nasahan na ña xíní ñúhu nde cuhun nde.

### *Xínu coo Pablo ñuu Roma*

<sup>11</sup> Nasanduu nde tátuhun uní yoo isla cán janda quiahva nandaa nde in barco, dó nasandati vaaha tiempo vixi mé isla Malta cán. Mé barco cán naquixi dó chí Alejandro. Ta nuu do cándaa ivi tiniñu yúu ndióxi cája cáhnu na cán. In a naní a Cástor ta inga a naní Pólux. <sup>12</sup> Naçquee nde cuahan nde já naxinu nde in ñuu naní Siracusa ta cán nasanduu nde uní quivi. <sup>13</sup> Ta naçquee nde cuahan nde yati yúhu tañuhú janda quiahva naxinu coo nde ñuu Regio. Joo inga quivi itaan já naçasáhá víi uun xíco tachí chí sur sahá ña cán quea tá sa nayaha ivi quivi já naxinu nde ñuu Puteoli. <sup>14</sup> Ta cán nanditahan nde java na cúú cuénta Jesús. Ta naçahan na xihín nde ña ná canduu nde in semana xihín ná ta já naçaja

nde. Ta tá nandihí já naquee nde cuahan sáhá nde chí ñuu Roma. <sup>15</sup> Ta ná cúú cuéntá Jesús ndúú ñuu Roma cán sa ñañehe ná tuhun ña xinu coo nde cán. Sahá ña cán quéa naqueta na vaxi na ñehe ná ndehe. Java na naquixi janda ñuu nu sáhin yahvi cáhnu naní a Apio ta java na naquixi janda ñuu naní Uní Taberna. Tá naxini Pablo na cán já nacasáhá ndiquiahva da ndixahvi nu Ndióxi ta nandindacú ini da. <sup>16</sup> Ta tá naxinu coo nde ñuu Roma já ndiquiahva da sáhdá chuun nuú soldado cán tóco ndihí da cuahan veca cán nuú in da cómi chuun saha mé veca ñuu Roma cán. Joo nasahan na ñamaní nu Pablo coo jín da vatí nasacu na in soldado ndáá ñahá.

### *Cáhan Pablo tuhun Ndióxi xihín na ñuu Roma*

<sup>17</sup> Tá sa naxinu uní quiví naxinu coo nde ñuu Roma cán já nacana Pablo tóco ndihí na sacuaaha nuú na Israel ndúú ñuu Roma cán. Ta tá sa nataca ndihí na ndúú na já nacachi da já xihín ná:

—Candehé ndó, ñani i. Ni in túhún toho ñaha núú coo nacaja yehe xihín na Israel mé ñuu Jerusalén cán ta ni xihín costumbre nacaja tásáhnu jícó yo. Joo natiin na Israel yehe ta ndiquiahva na yehe nuú na cúú cuéntá gobierno ñuu Roma yóho. <sup>18</sup> Ta tá nandihí nandaja ndichí na yehe já nasacu ini na janí na yehe jáchi coo ñañehe ná cuachi i sahá ña cuu cahní na yehe. <sup>19</sup> Joo ndaja coo na Israel coo naxeen na ña ná janí na cán yehe. Sahá ña cán quéa naxica i ñamaní ña ná cavií sahá i nu emperador ñuu Roma yóho. Joo yehe coo cuni toho i jácojo i cuachi jatá na Israel jáchi cúú ná na naquixi chichi nuú naquixi mí i. <sup>20</sup> Sahá ña cán quéa nacana i ndohó viti jáchi cuni cuni i ndohó já ná nditúhún i xihín ndo. Cuni ndicani i nu ndo ña ndico ndáha i xihín cadena yóho sahá mé a nachindahá Ndióxi jácacu a ndihí yó, na Israel —nacachi Pablo xihín na Israel cán.

<sup>21</sup> Anda já nanducú ñehe na cán tuhun nu Pablo já cáchi na já xihín dá:

—A ñaha quixi carta estado Judea nuú nde ña cáhan sahá ña cájún. Ta ni na cúú táhan na Israel tá nandai cuu na ñuu yóho coo toho tuhun núú ñehe na ná casaa na nuú nde saha yóho. <sup>22</sup> Joo cuni nde ña ná

ndicanún nuú nde ndia cándúsún jáchi níí cúú ñuyiví cáhan núú ñayivi sahá na cúú cuéntá Jesús —nacachi na Israel cán xihín Pablo.

<sup>23</sup> Tá nandihí nasacu na in quiví cáhan Pablo xihín ná ta tá naxinu coo mé quiví cán nataca cuahá ndivaha ñayivi mé vehe nu íin Pablo cán. Ta naha ta janda sahini najánaha da nu ná ña cuni Ndióxi cacomí a cuéntá sahá ñayivi. Ta xihín ña nacahyí Moisés sanahá ta xihín ña nacahyí na profeta já nandicani da nu ná saha Jesús ña ná candee ini na mé á. <sup>24</sup> Java na cán nacandúsa na ña nacachi Pablo xihín ná joo java na coo naxeen na candúsa na. <sup>25</sup> Ta sahá ña coo nacuu ndique táhan vaha tuhun na Israel cán sahá ña jánaha Pablo sahá ña cán quéa nacasáhá na quéa na cuahan na. Tá naxini Pablo ña yóho já nacasáhá cáchi da já xihín ná:

—Mé a ndaa nacahan ínima yíi Ndióxi nuú tásáhnu jícó yo tá nacahyí Isaías já:

<sup>26</sup> Cuáhán cáhan xihín ñayivi Israel jan já cachún já xihín ná:

Mé a ndaa táhyí cuni johó ndó joo a cánda iní ndó.

Ta vatí sándehe ndó in ñaha joo coo ndícuni ndó ña.

<sup>27</sup> Jáchi ihvi ndivaha cúú ini ndó ta coo cuni ndó caja ndó ña cáchi i.

Ta coo cuni ndó cuni johó ndó ña cáhan i xihín ndo.

Ta coo cuni ndó ndicuni ndó ña cája ndó cuachi.

Jáchi tá ná jándacoo ndó cuachi cája ndó, já quéa cuu caja cáhnu ini i saha ndo, ta já cuu coo vaha ini ndó, já nacachi ínima yíi Ndióxi xihín tásáhnu jícó yo.

<sup>28</sup> Anda já nacachi tucu Pablo já xihín ná:

—Ta viti xíní ñuhú candaa ini ndó, na Israel ña sa naxini johó na coo naquixi chichi Israel tuhun vaha saha Jesús. Ta cája i cuéntá candúsa mé na cán ña —nacachi Pablo xihín ná.

<sup>29</sup> Tá nandihí nacahan Pablo ña yóho já nanditúhún cuehe xihín táhan na Israel cán ta já naquee na cuahan na.

<sup>30</sup> Nacandoo Pablo ivi níí cuia vehe nuú nachahvi ndojo da. Ta ndiquehe vaha da tóco ndihí na sahan xito nihni ñahá. <sup>31</sup> Ta ni coo yíhvi da cáxi tuhun da xihín ñayivi ña

cúni Ndióxi cacomí a cuéntá saha ná. Ta najānaha da tuhun vaha saha Jesucristo, xitoho íta ni in na cóo nasaji nuu nū dá caja da ña.

## Carta nachindahá Pablo nuú na cúu cuéntá Jesús ndúu ñuu Roma

### *Cáhan Ndióxi Pablo xihín na cúu cuéntá Jesús*

<sup>1</sup> Yehe cúu Pablo ta Jesucristo cúu xitoho i. Nacaxi Ndióxi yehe cacuu u in apóstol cuéntá mé á ta nachindahá a yehe cūhun i cahan i tuhun vaha saha Jesús nuú ñayivi.

<sup>2</sup> Sanahá ndivaha nacaja Ndióxi ña ná cahyí na profeta mé á tuhun vaha sahá ini libro yíi Ndióxi. <sup>3</sup> Mé tuhun vaha yóho cáhan saha Jesucristo, xitoho í, mé a cúu in túhún jini já jahyi Ndióxi. Ta nanduu a in ñayivi nacacu ñuyívi yóho ta naquixi a chichi rey David. <sup>4</sup> Ta najánaha ínima yíi Ndióxi ñayivi ña cúu Jesús in túhún jini já jahyi Ndióxi, mé a cúu cája tóco ndihi ñaha. Jáchi tá sa naxihí Jesús já nanditacu tucu a ta xihín ña yóho náha ña cúu á in túhún jini já jahyi Ndióxi. <sup>5</sup> Ta sahá ña nacaja Jesucristo ndica crúxu sahá ña yóho nacaja Ndióxi ñamaní xihín ndihí. Já nachindahá Ndióxi mí ña ná cūhun í cuéntá mé á cahan í saha Jesús nu tóco ndihi ñayivi ndúu ñuyívi já ná cuu candeé ini na mé á ta já ná caja na ña cúni a. <sup>6</sup> Ta mé ndó, na cúu cuéntá Jesús ndúu ñuu Roma jan, nacaxi Ndióxi ndohó cacuu ndó cuéntá mé á.

<sup>7</sup> Ña cán queá cahyí i carta yóho nu ndó, na ndúu ñuu Roma jan. Jáchi cúni ndivaha Ndióxi ndohó ta nacaxi a ndohó nduu ndó ñayivi mé á. Ta ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja ña ná coo vaha ini ndó.

### *Cúni Pablo cūhun da ñuu Roma coto nihni da na cúu cuéntá Jesús ndúu cán*

<sup>8</sup> Ndiquiahva i ndixahvi nu Ndióxi sahá ña nacaja Jesucristo xihín in in ndó jáchi ñayivi ndúu ndijáá ñuyívi xini johu na ña candeé ini ndó Jesús. <sup>9</sup> Yehe cája chúun i cuéntá Ndióxi ta ndinuhu ini i cáxi tuhun i tuhun vaha saha Jesús, mé a cúu in túhún jini já jahyi Ndióxi nuú ñayivi. Ta xini vaha Ndióxi ña tóco ndihi quivi xica tahví i nu mé á sahá ndihi ndó. <sup>10</sup> Ta ndijáá nú

quivi xica tahví i nu Ndióxi ña ná quiahva ñamaní nuú i saa i jan coto nihni i ndohó tá cúni a. <sup>11</sup> Jáchi cúni cuni i ndohó já ná caxi tuhun i xihín ndo ndá quiahva cúni ínima yíi Ndióxi caja ñamaní xihín ndo já ná ndindacú chága ndó cuéntá mé á. <sup>12</sup> Ña cúni queá ná quiahva tuhun ndeé ini táhan í jáchi in candeé ini ndihí Ndióxi.

<sup>13</sup> Cúni ña ná candaa ini ndó, ñani mí i, na cúu cuéntá Jesús ña sa cuahá tañu sácu ini i saa i coto nihni i ndohó joo ín cuahá ña sáji nuu nuú i sahá ña cán queá cámani saa i jan. Cúni chindeé e ndohó ña ná caca vaha ndó íchi cuéntá Jesús. Jáchi quiahva já nachindeé e java ga ñayivi, na co cúu chichi Israel. <sup>14</sup> Joo ndítahan nuú i caxi tuhun i tuhun Ndióxi nu tóco ndihi ñayivi ndúu ñuu náhnu xihín na ndúu yucú ñuhú. Ta cahan i tuhun Ndióxi xihín na ndichí jini ta xihín na co ndichí jini. <sup>15</sup> Ña cán queá xica ndivaha ini i saa i nu ndúu ndó ñuu Roma jan cahan i tuhun vaha saha Jesús xihín ndo.

### *Jáca Ndióxi ñayivi sahá tuhun vaha cáhan saha Jesús*

<sup>16</sup> Co cácan nuú i sahá tuhun vaha cáhan saha Jesús jáchi cúu á ndeé Ndióxi jáca a tóco ndihi ñayivi, na candeé ini mé á. Ta jihna ñuhú nacasahá Ndióxi jáca a ñayivi naquixi chichi Israel ta viti jáca a tóco ndihi ñayivi tá candeé ini na mé á vatí cúu ná na tóho á cúu ná na Israel. <sup>17</sup> Jáchi náha tuhun Ndióxi nu yo ndá quiahva ndúu ñayivi ndaa nu mé á. Ta cúu á sahá ña candeé ini mé á ta sahá ña yóho cuítí va jáchi coo a inga nuú ña caja í cacuu ñayivi ndaa nu Ndióxi. Já cáchi tuhun Ndióxi já: “Ndá na cúu ñayivi ndaa nu Ndióxi catacu na sahá ña candeé ini na mé á.”

### *Tóco ndihi ñayivi ndúu ñuyívi cómi na cuachi nu Ndióxi*

<sup>18</sup> Janda indivi nu ín Ndióxi xójo ini a xihín tóco ndihi ñayivi cája cuachi ñuyívi yóho ta jándoho a ini na sahá cuachi cája na. Ta sahá ña núu cája na sáji nuu na nuú java ga ñayivi, na cúni candaa ini ña ndaa saha Ndióxi. <sup>19</sup> Jándoho Ndióxi ini ñayivi sahá cuachi cája na jáchi sa najánaha mé á ña ndaa nu ná ta sa xini na saha mé á

joo co cándúsa na ña. <sup>20</sup> Janda sahá ñuyívi xíní ñayivi ña nacavaaha Ndióxi ñuyívi xihín indivi xihín tóco ndihi ñaha. Ta xihín ña yóho cuu candaá ini na ña ín Ndióxi ta cuu candaá ini na ña ín ndée mé á caja ña cúní a anda ama cáa quívi. Sahá ña cán queá a cúu cachi na ña co xíní na á ín Ndióxi á coo a. <sup>21</sup> Vatí candaá vaha ini na ña ín Ndióxi joo co caja cáhnu na mé á tátuhun ndítahan nu ná caja na. Ta ni co ndíquiahva na ndixahvi nu á. Ña caja na queá cáhvi núu ini na ta coo saha toho ña cáhvi ini na. Ta cúu ná tátuhun ñayivi tóntó jini, na xíca nuu nuú naá yávi. <sup>22</sup> Ta vatí cáchí na cúu ná na ndíchí jini joo cúu ná na tóntó jini. <sup>23</sup> Najándacoo na ña caja cáhnu na Ndióxi, mé a tácu anda ama cáa quívi ta nacavaaha na tiniñu yúu ña ñéhe nahná taa, da xíhi yachí. Ta nacavaaha na nahná laa xihín nahná quíti xihín nahná coo. Ta nacasáhá caja cáhnu na ña.

<sup>24</sup> Sahá ña cán queá najándacoo Ndióxi na ña ná caja na tá nuú ña núu ña cúní na caja na. Anda jáví nacasáhá na caja quini na xihín yiquí cuñu táhan na. <sup>25</sup> Co xeén na cándúsa na ña ndaa cáhan saha Ndióxi joo nacandúsa na ña tuhún. Ta nacaja cáhnu na ña nacavaaha Ndióxi ta coo nacaja cáhnu na mé Ndióxi, mé a nacavaaha tóco ndihi ñaha. Jáchi Ndióxi queá xíní ñuhú caja cáhnu í anda ama cáa quívi. Já ná coo.

<sup>26</sup> Sahá ña cán queá najándacoo Ndióxi na ña ná caja na ña xíca ini na caja na, ña co ndítahan caja na. Ta naxinu na janda nuú najándacoo najihí ña quíji na xihín yí na ta já nacasáhá quíji xihín táhan ndaja jihí mé va na. Ta ña yóho cúu á ña coo nasacu ini Ndióxi caja na. <sup>27</sup> Ta quiahva já nacaja ri dataa. Najándacoo da ña quíji da xihín ñájihí da ta nacasáhá ndicají ini da caja da ña núu xihín táhan mé va da janda quiahva nacasáhá quíji xihín táhan mé dá. Chí nuú cacahan nuu yo queá caja xihín táhan da. Ta tá nandihí já casáhá ndóho ini yiquí cuñu na sahá ña núu caja na.

<sup>28</sup> Naxinu na nuú najándacoo xóo na Ndióxi ta co cúní ga na candaá ini na sahá. Sahá ña cán queá najándacoo xóo Ndióxi na ña ná cahvi núu ini na ta já caja tá caja na ña co ndítahan nu ná caja na. <sup>29</sup> Nandicutú ndaa ínima ná xihín tá nuú ña núu, ña cúu

cuachi. Ta ndiáva íní na quehe na ñaha cómi inga ñayivi ta caja xíxi na xihín ná ta cáhivi ini na ta sáhní na ndii ta cáni táhan na ta jándahvi na ñayivi ta cáhvi núu ini na sahá inga na ta xíca nuu na cáhan tuhún na. <sup>30</sup> Ta canahá quini ndivaha na xihín inga na ta cándají na Ndióxi ta yáha yúhu na xihín inga na ta caja ichi ini na ta caja cáhnu na mé va na. Ndiáva íní na ndaja caja chága na cuachi ta sáá ini na caja na ña cúní tátá náná na. <sup>31</sup> Co xíní túní na ta co jáxinu coo na tuhun sahan na nuú ñayivi. Co quíhvi ini na ñani táhan na ta co caja cáhnu ini na saha ná ta co táhnda ini na sahá ñayivi. <sup>32</sup> Xíní vaha na ña nasahnda Ndióxi nu ná ta xíní na ña ndítahan quívi na sahá cuachi caja na. Vatí candaá ini na ña yóho joo xihín ndinuhu ini na caja tá caja na ña núu. Ta janda cájii ini na tá caja java ñayivi mé ña núu.

## 2

### *Caja víi Ndióxi saha tóco ndihi cuachi*

<sup>1</sup> Mé a ndaa cómi ndó cuachi nu Ndióxi. Sándehé ndaa ndó inga ñayivi sahá cuachi caja na joo chícaan ndó cuachi jata mé va ndó jáchi caja ndó mé cuachi cán. <sup>2</sup> Sa xíní vaha í ña caja ndaa Ndióxi tá jándoho á ini ñayivi sahá cuachi caja na. <sup>3</sup> Mé ndó sándehé ndaa ndó cuachi caja java ga ñayivi ta cáhan ndo vaha caja Ndióxi tá chindahá na cuhun na indayá. Joo cáhan ndo ña caja cáhnu ini a saha mé ndó vatí caja ndó mé cuachi caja na cán. <sup>4</sup> Ndaja núu ndó Ndióxi, mé a cúní caja cuahá ñamaní xihín ndo jáchi xíní ndó ña co jándoho yachí Ndióxi ini na caja cuachi. Cúní Ndióxi ña ná ndicó coo ini ndó jándacoo ndó cuachi caja ndó. <sup>5</sup> Ihvi ndivaha cúu ini ndó jáchi co jándacoo ndó cuachi caja ndó. Nandicuahá cuachi ndó ta jándoho chága Ndióxi ini ndó tá ná tandaa quívi caja víi a sahá cuachi nacaja ñayivi. Mé quívi já ndaca náha ña cojo ini mé á saha cuachi ñayivi ta náha ña ín saha mé á jándoho a ini na cán. <sup>6</sup> Mé tiempo cán quiahva Ndióxi nuú in in ñayivi ña ndítahan nu ná ndiquehe na sahá ña nacaja na ñuyívi yóho. <sup>7</sup> Java ñayivi nacaja na ña vaha xihín ndinuhu ini na ta nacacúni na caja na ña ná cajii ini Ndióxi

xihin já ná cachi Ndióxi ña cúu ná ñayivi vaha. Ta nacacúni na coo na nu in Ndióxi anda ama cáa quivi. Ta mé na cán cúu na cuhun coo xihin Ndióxi anda ama cáa quivi. <sup>8</sup> Joo cojo ini Ndióxi tá jándoho a ini na sáa ini, na co cúni cuhun xoo ña ndaa jáchi cátóo na cuhun na xoo ña núu. <sup>9</sup> Ndoho ndivaha ini tóco ndihi ñayivi cája cuachi ta cacuéha ndivaha ini na. Jihna ñúhú na naquixi chichi Israel ndoho ini já casáhá ndoho ini na coo naquixi chichi Israel. <sup>10</sup> Joo cajii ini Ndióxi xihin na cája ña vaha ta ndaja cáhnu a na ta caja mé á ña ná coo vaha ini ná. Jihna ñúhú já caja mé á xihin na naquixi chichi Israel já casáhá caja ri a já xihin na coo naquixi chichi Israel.

<sup>11</sup> Jáchi coo cúu á tátuhun cúni Ndióxi in ñayivi ta cándají a inga na jáchi in cúu ndihi ví nu Ndióxi. <sup>12</sup> Vatí co cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na. Ta vatí cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na. <sup>13</sup> Jáchi tá cándaa ini na ña sáhdá ley Moisés ta coo cája na ña jáchi coo cáchi Ndióxi ña cúu ná ñayivi ndaa nu mé á. Ta tá cája na ña sáhdá mé ley Moisés anda jáví cáchi Ndióxi ña cúu ná ñayivi ndaa nu mé á. <sup>14</sup> Ñayivi, na coo naquixi chichi Israel coo xini na ña sáhdá ley Moisés. Cája mé ná ña sáhdá ley Moisés jáchi já xinu ini na caja na ña vatí coo xini na mé ley Moisés. <sup>15</sup> Ña cája mé ná náha nuú ñayivi ña nasacu Ndióxi ley mé á ini xini túni ná. Ta xihin xini túni ná cándaa ini na tá cája na ña vaha á tá cája na ña núu. Ta quiahva já xihin mé xini túni ná xini vaha na á cája na cuachi á cája na ña vaha <sup>16</sup> tá ná xinu quivi quiahva Ndióxi chuun nu Jesucristo caja víí a sahá ña nacaja tóco ndihi ñayivi vatí nacaja jehé na ña. Jáchi já cáhan tuhun vaha saha Jesús ña jána ha i nu ndo.

### *Na naquixi chichi Israel cándusa na ley Moisés*

<sup>17</sup> Ta mé ndó cáchi ndo cúu ndó na naquixi chichi Israel, na cándusa ley Moisés. Ta cáchi ndo cája chága Ndióxi ñamaní xihin mé ndó a juú ga xihin java ga ñayivi. <sup>18</sup> Ta cáchi ndo ña sa xini ndó ña cúni Ndióxi caja ndó ta cáchi ndo ña sa

xini ndó caxi ndó ña vaha jáchi sa najacuaha ndó ley Moisés. <sup>19</sup> Ta cáchi ndó tiahvava vaha ndó chindeé ndó ñayivi ña ná ndihvi na íchi Ndióxi ta cáchi ndo ña cúu ndo tátuhun in lámpara jándiyéhe nuú ñayivi xica nuu nuú naa. <sup>20</sup> Ta cáchi ndo ña tiahvava ndó jána ha ndó nuú ñayivi, na coo xini túni ta cáchi ndo ña tiahvava ndó jána ha ndó nuú ñayivi, na cámani catacu vaha ini. Cómí ndo ley Moisés sahá ña cán quéa cáhan ndo xini ndó tóco ndihi ña ndaa xihin tóco ndihi ñaha. <sup>21</sup> Mé ndó jána ha ndo ley Moisés nuú ñayivi joo jihna ñúhú ndítahan caja ndó ña. Mé ndó jána ha ndo nuú ñayivi ña a váha toho caja cuíhná na joo cúu ndó na cuíhná. <sup>22</sup> Mé ndó jána ha ndo nuú ñayivi ña a váha toho coo in ta xihin in ñañáha, ña coo cúu ñájihí da joo in ndó xihin ñájihí inga na. Mé ndó coo cúni ndó yoco ndindojo veñuhu ñayivi, na coo naquixi chichi Israel joo cája cuíhná ndo ña cuica ñúhu veñuhu na cán. <sup>23</sup> Cája cáhnu ndó mé va ndó jáchi cómí ndo ley Ndióxi joo coo cája cáhnu ndó mé á jáchi coo cúni ndó caja ndó ña sáhdá mé ley. <sup>24</sup> Ña cán quéa ndaa cáhan tuhun Ndióxi saha ndó tá cáchi a já: “Ñayivi, na coo naquixi chichi Israel cáhan núu na saha Ndióxi sahá ña cája mé ndó, na Israel”, cáchi tuhun Ndióxi.

<sup>25</sup> Tá cája ndó ña sáhdá ley Moisés já quéa ndiyahvi marca nachicaan na yiquí cuñu ndó. Joo tá coo cája ndó ña sáhdá ley Moisés já quéa coo ndiyahvi toho marca nachicaan na yiquí cuñu ndó. <sup>26</sup> Na coo naquixi chichi Israel coo chicaan toho na mé marca jan yiquí cuñu na joo tá cája na ña sáhdá ley Moisés já ndiquehe Ndióxi na tá quiahva ndiquehe ri mé á na in marca yiquí cuñu. <sup>27</sup> Ndá na cája ña cáchi ley vatí coo naquihvi marca yiquí cuñu na, in sahá na cán chicaan na cuachi jatá na coo cája ña cáchi ley vatí in a nu ná ta naquihvi marca yiquí cuñu na. <sup>28</sup> Ña cán quéa tá ná caja in na naquixi chichi Israel mé costumbre ña ná cuni cuití va ñayivi ña já quéa a juú ña ndaa ña cúu ná cuénta Ndióxi. Ta ndá na chicaan na marca yiquí cuñu na coo cája na mé costumbre cuénta yiquí cuñu cuití va na. <sup>29</sup> Ta ndá na naquixi chichi Israel tá mé a ndaa cúu ná cuénta Ndióxi ta cája

na ña cúní mé á cō cúú á sahá ña nasahnda loho na yiquí cuñu na. Cúú á sahá ña ñacaja ínima yíi Ndióxi ini na. Ta mé ña cán jácavatá ña ini Ndióxi jáchi xihín ínima yíi mé á cāja na ña cúní mé á.

### 3

<sup>1</sup> Sahá ña cán quéa ná ndaca tuhún i ndohó ña yóho: Á ín cuahá chága sahá ñayivi ñaquixi chichi Israel a juú ga sahá java ga ñayivi. Á ndiyahvi nu Ndióxi ña ñachicaan ña marca yiquí cuñu na. <sup>2</sup> Ajan. Ín cuahá sahá ñayivi ñaquixi chichi Israel ta tá ñachicaan ña marca yiquí cuñu na ndiyahvi a nu Ndióxi jáchi nasacu ini a jándacoo a tuhun a nuú ña ñaquixi chichi Israel já ná cacomí ña cuéntá sahá. <sup>3</sup> Ta vatí ná cāja java ñayivi, ña cándéé ini mé á ña cō cúní mé á cāja na joo ama sahá ña cán a ndíjama toho Ndióxi jini á ña ná cāja ña núu xihín ná, vaha. <sup>4</sup> Cō cāja toho Ndióxi já. Ña cāja Ndióxi níi tiempo cúú ndinuhu ña ndaa vatí tóco ndihi ñayivi cáhan ña ña tuhún. Já cáchí tuhun Ndióxi já:

Xihín tuhun cáhan Ndióxi cándaa ini ña cúú á Ndióxi ña ndaa ta a cúu quee vaha ña chicaan cuachí jíquí jatá jáchi cúú mé á in Ndióxi ndaa, já cáchí tuhun mé á.

<sup>5</sup> Ta viti ná cahan i xihín ndó tá quiahva cáhan ñayivi ñuyíví. Cáhan ña ña cō cāja vaha Ndióxi tá jándoho a mí sahá cuachí jáchi xihín cuachí jándindita jícó chága yó Ndióxi. Ta xihín ña cāja í náha ña cúú Ndióxi in Ndióxi ña ndaa ta mí cúú yó ñayivi cuachi. <sup>6</sup> Joo cō cáhan vaha na jáchi tá cō cāja ndaa Ndióxi, nduu já quéa a cuú cāja vií mé á sahá ndihi cuachi cāja tóco ndihi ñayivi ndúu ñuyíví.

<sup>7</sup> Já cáchí ñayivi já: “Cóho ná cāja yó cuachi já ná candaa chága ini ñayivi ña cāja ndaa Ndióxi ta xihín ña yóho cāja cáhnu chága ña mé á”, cáchí ña. Joo cō cáhan vaha na jáchi tá cáhan yo ña xihín cuachi cāja í ndicáhnu chága Ndióxi já quéa cō cándaa ini ndá saha quéa jándoho Ndióxi ini ñayivi sahá cuachi na. <sup>8</sup> Joo java ñayivi cáchí ña: “Cóho ná cāja í cuachi já ná cāja cáhnu ini mé á sahá cuachí já ndicáhnu chága Ndióxi”, cáchí ña joo cō cáhan vaha

na. Ta java ñayivi cáhan ihvi ña sahá yehe ta chicaan ña cuachi jatá i ta cáchí ña ña jánahá yehe ña yóho nuú ñayivi. Ndítahan jándoho Ndióxi ini tóco ndihi ñayivi, ña jánahá ña yóho.

*Tóco ndihi ñayivi ndúu ñuyíví cómí ña cuachi nu Ndióxi*

<sup>9</sup> Ña cán quéa a cuú cachi yó ña cúú mí ña vaha chága a juú ga inga ñayivi sahá ña ñaquixi chichi Israel. Jáchi sa najána ña nu ndo ña mí, ña ñaquixi chichi Israel xihín ña cō ña ñaquixi chichi Israel cúú yó ñayivi cāja cuachi. <sup>10</sup> Já cáchí tuhun Ndióxi já:

Cō toho ni in ñayivi cāja ña ndaa.

<sup>11</sup> Ta cō toho ni in ña cándaa ini ña ndaa, ta cō ni in ña ndínducú Ndióxi.

<sup>12</sup> Nacaxoo na nu Ndióxi já ñaquehe na ichí núu cuahan ña.

Cō ñayivi cāja ña vaha janda ni in tuhún ña cō.

<sup>13</sup> Quini ndivaha yúhu ná jáchi cúú á tátuhun in yávi ndii ña cámaní ndee ñúhu.

Cúú ná ñayivi tuhún ndivaha.

Tá quiahva cāja cō tá tén rí ñayivi já cāja ña cán tá cáhan ña ña tuhún.

<sup>14</sup> Ta mé cháhan cuití cáhan yúhu ná ta xihín ña yóho jatá ña ini ñayivi.

<sup>15</sup> Níi tiempo ndícají ini na cahní ña ndii ta xihí ndii cāja na.

<sup>16</sup> Ta ndá nu xínu ña jándoho na ini ñayivi jándacoo ndáhví ñahá ña.

<sup>17</sup> Ta cō xini ña ndá a quéa canduu vaha na xihín ñayivi.

<sup>18</sup> Ta ni cō cándaa ini na ña ndítahan nu ná cayíhví ña Ndióxi, cáchí tuhun Ndióxi.

<sup>19</sup> Sa xini yó ña ndítahan nuú ña Israel cāja na tóco ndihi ña sáhdá ley Moisés jáchi cúú á cuéntá ña ñaquixi chichi Israel. Ta xihín ña yóho chicaan ley Moisés cuachi jatá mé ña cán ta náha ña tóco ndihi ñayivi ndúu ñuyíví cómí ña cuachi nu Ndióxi ta a cuú cachi na ña cō cómí ña cuachi. <sup>20</sup> Ni in ñayivi a cúu nduu ndaa ña nu Ndióxi sahá ña cāja na tóco ndihi ñaha sáhdá ley Moisés. Ña cāja mé ley quéa ña ná candaa ini ña cómí yo cuachi nu Ndióxi.

*Jácacu Ndióxi mí jáchi cándéé ini mé á*

21 Viti jánaḥa Ndióxi nu yo ndá quiahva nduu ndaa yo nu mé á. Ta jári cáchi mé ley xihín na profeta sahá ña yóho. Ta co cúu á sahá ña cája í ña cáchi mé ley 22 joo sahá ña cándéé ini ñayivi Jesucristo já cája Ndióxi ña ná nduu ndaa na nu mé á. Já caja mé á xihín tóco ndihi na cándéé ini Jesucristo jáchi tá quiahva cája Ndióxi xihín na Israel quiahva já cája ri a xihín na co cúu na Israel. 23 Tóco ndihi ñayivi cómi na cuachi nu Ndióxi ta nacaxíca na nu á ta a cúu nduu na ñayivi vaha tá quiahva cúní mé á. 24 Joo nacaja Ndióxi in ñamaní cáhnu xihín yo já ná nduu ndaa yó nu mé á. Ta coó nachahví sahá jáchi nachahvi Jesucristo sahá cuachí tá naxihí a ndica crúxu. Ta viti co cómi ga yó cuachi nu mé á. 25 Nachindahá Ndióxi Jesucristo ña ná cuíta nií a sahá cuachí já ná cuu caja cáhnu ini Ndióxi saha yo tá ná cándéé ini Jesucristo. Xihín ña yóho náha ña cúu á in Ndióxi ndaa. Tá cámaní quivi Jesucristo sahá cuachí já coó naquehe Ndióxi cuéntá sahá cuachi. Já nacaja mé á jáchi cáhnu ndivaha ini a. 26 Ta xihín ña yóho náha ña mé a ndaa táhyí cúu á in Ndióxi ña ndaa janda quivi viti. Tóco ndihi na cándéé ini Jesús cúu ná na ndaa nu Ndióxi jáchi najándoo Jesús cuachi na. Ta xihín ña yóho náha ña cúu á Ndióxi ndaa.

27 Ndá sahá cája cáhnu í mí, vaha. Ama ná cuu caja cáhnu í mí sahá ña nacaja í. Jáchi a cuu nduu ndaa yó nu Ndióxi sahá ña nasacu vaha í ley Moisés. Cúu á sahá ña cándéé ini Jesús. 28 Sahá ña cán queá sa xini yó viti ña nduu ndaa yó nu Ndióxi tá ná cándéé ini Jesús cuití va. Ta co cúu á sahá ña nasacu vaha í ña sáhdá ley Moisés.

29 Á cája Ndióxi ña yóho sahá na naquixi chichi Israel cuití va, vaha. Uñun. Jáchi jácau Ndióxi na naquixi chichi Israel xihín na coó naquixi chichi Israel. 30 Jáchi íin in tálaá Ndióxi ta mé Ndióxi yóho jácau a ñayivi tá ná cándéé ini na mé á vatí cúu ná na Israel á co cúu toho ná. 31 Á cacu xoo í ley Moisés, da já. Uñun. Vatí cándéé ini Jesús joo a cuu cacu xoo í ley Moisés jáchi náha ña cúu á ña ndaa ta ndiyahvi a nu yo.

#### 4

#### *Ña nacaja Abraham sanahá ndivaha*

1 Ta ndá saha nacachi Ndióxi sahá Abraham, tásáhnu jícó yo ña nanduu da taa ndaa nu mé á. 2 Co cúu á sahá ña nacaja da ña nanduu da taa ndaa nu Ndióxi já ná a cája cáhnu da mé dá. Ta coó toho ñaha ña cuu caja cáhnu da mé dá saha. 3 Jáchi já cáchi tuhun Ndióxi: “Nacandéé ini Abraham Ndióxi sahá ña cán queá nanduu ndaa da nu mé á”, cáchi tuhun Ndióxi. 4 Ta viti ná caja í cuéntá cája chuun in dataa. Ta tá nandihí cháhvi na nu dá ta mé jjuhún cán co cúu á ña jásá na nu dá. Cháhvi na nu dá jáchi cáni a nu dá quehe da ña sahá chuun nacaja da. 5 Jáchi a cúu ndaja ndaa ñayivi mé ná nu Ndióxi sahá ña cája na. Tá ná cándéé ini ñayivi Jesús, mé a nachahvi sahá cuachí anda jáví ndaja Ndióxi na ñayivi ndaa nu mé á. 6 Ta quiahva já nacahan rey David sahá ña yóho tá nacachi da ña tahví nahá nacuu da ndája ndaa Ndióxi vatí coó nacaja da ñaha ña ná cuu ndaja ndaa da mé dá nu Ndióxi. 7 Já nacachi David já:

Tahví nahá nacuu ñayivi tá nacaja cáhnu ini Ndióxi sahá ña núu nacaja na ta tá najándoo a cuachi na.

8 Ta tahví nahá nacuu ñayivi tá coó naquehe Ndióxi cuéntá sahá cuachi nacaja na, nacachi David sanahá ndivaha.

9 Á tahví nahá nacuu na nachicaan marca yiquí cuñu cuití va. Uñun. Jáchi nduu ndaa ñayivi nu Ndióxi sahá ña cándéé ini na mé á ta co cúu á sahá ña nachicaan na marca yiquí cuñu á coó a. Ta sa xini yó ña nacachi Ndióxi ña nanduu Abraham taa ndaa nu mé á sahá ña nacandéé ini da mé á. 10 Á nacachi Ndióxi ña cúu Abraham taa ndaa nu mé á tá cámaní chicaan da marca yiquí cuñu da á tá nandihí nachicaan da marca yiquí cuñu da. Nacachi a já xihín dá tá cámaní chicaan dá marca yiquí cuñu da. 11 Jihna ñuhú nacandéé ini Abraham Ndióxi anda jáví nacachi a ña cúu Abraham taa ndaa nu á. Tá nandihí já nachicaan da in marca yiquí cuñu da já náha ña mé a ndaa nanduu da taa ndaa nu Ndióxi jáchi nacandéé ini da mé á. Xihín ña yóho naxinu Abraham nanduu da tátuhun tátá tóco ndihi ñayivi, na cándéé ini Ndióxi vatí coó nachicaan na marca yiquí cuñu na. Ta vatí coó nachicaan na mé marca yóho yiquí



cuñu na joo cúu ná ñayivi ndaa nu Ndióxi. <sup>12</sup> Ta quiahva já nanduu Abraham tátá na ín mé marca yiquí cuñu. Ta a juú sahá mé marca yóho cuití va jáchi nanduu da tátá na sahá ña cándéé cáhnu ini na Ndióxi tá quiahva nacandéé ini Abraham mé á tá cámaní chicaan da marca yiquí cuñu da.

### *Jáxinu coo Ndióxi tuhun sahan nu yo tá ná candéé ini mé á*

<sup>13</sup> Sanahá ndivaha nasahan Ndióxi tuhun a nu Abraham xihín nuú na naquixi chichi da. Nacachi Ndióxi ña tandaa quivi ñehe táhvi ná ña ná nduu ñuyivi ñaha mé ná. Coó nasahan Ndióxi tuhun a nu Abraham sahá ña nacaja da ña sáhdá ley Moisés. Nasahan mé á tuhun a nu dá sahá ña nacandéé ini da mé á ta já nanduu ndaa da nu Ndióxi. <sup>14</sup> Joo tá mé a ndaa na nasacu vaha ley cúu na ñehe táhvi cuhun indivi já quéa coó chuun cándéé ini Ndióxi, dá já. Jáchi xihín ña yóho jándacoo núu í tuhun nasahan Ndióxi nu yo ña caja mé á xoho. <sup>15</sup> Ndítahan nu Ndióxi jándoho a ini ñayivi tá co cája na ña sáhdá ley Moisés. Joo tá coó toho mé ley já quéa coó toho cuachi ñayivi nu ley.

<sup>16</sup> Nasahan Ndióxi tuhun a nu Abraham sahá ña nacandéé ini da mé á. Ta sahan mé á tuhun a nu yo tá cándéé ini mé á. Coó a cája toho a á cája í ña sáhdá ley Moisés á co cája toho í ña jáchi mé a ndaa ndiquehé ña vaha sahan Ndióxi nu yo tá cándéé ini mé á tátuhun nacandéé ini Abraham mé á. Ta cúu á tátuhun nanduu Abraham tátá tóco ndihi na cándéé ini Ndióxi. <sup>17</sup> Já cáchi Ndióxi já xihín Abraham: “Nacaja í ña ná nduu mún tátá ñayivi ndúu cuahá nación”, já cáchi tuhun Ndióxi sanahá. Mé Abraham cúu dá tátuhun tátá ndihí nu Ndióxi. Nacandéé ini da Ndióxi, mé á cuu jánditacu tucu ndii ta xihín tuhun cáhan mé á cája ña ná coo ña coó nasahjin jihna.

<sup>18</sup> Vatí coó naxinu nuú tuhun nasahan Ndióxi nu Abraham joo nacandéé tá nacandéé ini da Ndióxi ta nasandati da jáxinu coo mé á tuhun a. Já nanduu da chichi nuú naquixi cuahá ñayivi, na ndúu cuahá nación. Já nayaha jáchi já nacachi Ndióxi xihín dá sanahá: “Ndicuahá ndivaha ñayivi quixi chichún”, nacachi Ndióxi xihín dá. <sup>19</sup> Ta nacandéé ini

Abraham Ndióxi ña cacu jahyi da vatí sa nacayati quivi xinu da in ciento cuia ta vatí sa cándaá cáxi ini da ña jalóho cuití va quivi catacu da ñuyivi yóho xihín Sara, ñájihí da. Ta sa cándaá ini da ña a cuú ga cacu jahyi ná joo nacandéé ini da Ndióxi. <sup>20</sup> Ta coó nacavitá ini da ta coó nandicaní ivi johó ini da sahá tuhun nasahan Ndióxi nu dá. Joo nanduu ndéé chága ví ini da já ná cándéé cáhnu chága ví ini da Ndióxi ta nacaja cáhnu da mé á. <sup>21</sup> Já naxinu ini da ña mé a ndaa táhyí ín ndéé Ndióxi ná jáxinu a tuhun sahan nuú ñayivi. <sup>22</sup> Nacandéé ini Abraham Ndióxi sahá ña cán quéa nacachi a ña nanduu da ta ndaa nu mé á.

<sup>23</sup> Ta tá cáchi tuhun Ndióxi ña nanduu Abraham ta ndaa nu Ndióxi sahá ña nacandéé ini da mé á já quéa coó nacahyi ña yóho sahá Abraham cuití va. <sup>24</sup> Nacahyi ri a saha mí jáchi tá ná cándéé ini Ndióxi, mé á najánditacu Jesús, xitoho í tañu ndii já quéa ndiquehe Ndióxi mí ta ndaja mé á mí ña ná nduú ñayivi ndaa nu mé á. <sup>25</sup> Ta nandiquiahva na Jesús ña ná quivi a ndica crúxu sahá cuachí. Ta tá nandihí nanditacu tucu a ña ná nduú ñayivi ndaa nu mé á.

## 5

### *Nacaja Ndióxi ña ná nduu ndaa yo nu mé á*

<sup>1</sup> Sahá ña cán quéa coó ga cuachi jata yo jáchi nacandéé ini Ndióxi ta nandique táhan máni yó xihín á sahá ña nacaja Jesucristo, xitoho í. <sup>2</sup> Ta sahá ña cándéé ini Jesucristo sahá ña cán quéa cája Ndióxi cuahá ñamaní xoho. Cándéé ini mé á ta cájii ini ndátí cuhun í coo í xihín mé á. <sup>3</sup> Ta quiahva já cájii ini tá ná quixi tondóhó nu yo jáchi sa xini yo ña ndindacú chága ini cuéntá Ndióxi tá ndóho í tondóhó. <sup>4</sup> Tá sa nandindacú ini cuéntá Ndióxi nacaja tondóhó anda jáví táhan ini Ndióxi xihín yo jáchi naxito ndojó mé á mí ta nandindacú chága ini cuéntá mé á. Tá natan ini Ndióxi xihín yo anda jáví candaá vaha ini ña jáxinu coo mé á tuhun nasahan a nu yo. <sup>5</sup> Tá ndátí ña nasahan Ndióxi tuhun a quiahva nu yo já a cándoó núu toho Ndióxi xihín yo jáchi najándicutú Ndióxi inima yo xihín ña quíhvi ini a mí.

Nacaja Ndióxi ña yóho xihin ínima yii mé á ña nasahan nu yo.

<sup>6</sup> Sahá ña co ndée yo jácácu mí sahá ña cán queá naxihi Jesucristo saha yo ta coó nacayáncá a quivi a ta ni coó naxihi yachi a. Naxihi a mé quivi nanditahan quivi a sahá cuachi ñayivi quini. <sup>7</sup> Ihvi ndivaha cáa já queta in ñayivi quivi na sahá inga ñayivi vatí cúu ná na vaha. Joo mé a ndaa cuu queta in ñayivi coo tiaha na quivi na sahá in na cúu na vaha ndivaha. <sup>8</sup> Náha Ndióxi nu yo ña mé a ndaa táhyí quihvi ini a mí jáchi vatí cúu yó ñayivi cája cuachi joo naxihi tá naxihi Jesucristo saha yo. <sup>9</sup> Ta viti sa nanduú ñayivi ndaa nu mé á sahá nij Jesucristo, dó naxita saha yo. Ta sa saha mé á cacu ndaa ínima yo já ná a cójo ini Ndióxi sahá cuachi. <sup>10</sup> Nasacuú na coó naxini táhan vaha xihin Ndióxi joo sahá ña naxihi in túhún jiní já jahyi mé á sahá ña cán queá nandique táhan máni yó xihin á viti. Xihín ña yóho cuu cacu ndaa ínima yo jáchi nanditacu tucu Jesucristo ta sa nandique táhan máni yó xihin Ndióxi viti. <sup>11</sup> Ta a juú ña yóho cuití va vaha jáchi cájii ndivaha iní xihin Ndióxi sahá ña nacaja Jesucristo, xitoho í. Sahá ña cán queá naxinu yó nandique táhan máni yó xihin Ndióxi.

### *Ña nacaja Adán xihín ña nacaja Jesucristo*

<sup>12</sup> Ta sahá cuachi nacaja in taa naní Adán sahá ña cán queá nandihvi cuachi ñuyiví yóho ta tá nandihvi cuachi ñuyiví já nacasáhá xihí ñayivi. Tóco ndihí cája í cuachi ta sahá ña yóho ndítahan quivi ndihí. <sup>13</sup> Tá cámani quiahva Ndióxi ley mé á nu Moisés nasacomí tóco ndihi ñayivi cuachi. Joo co quehe Ndióxi cuéntá sahá cuachi jáchi coó toho ley nasahin tiempo já. <sup>14</sup> Janda tiempo nasahin Adán nacasáhá xihí ñayivi sahá cuachi na ta janda naxinu tiempo nasahin Moisés naxihi na vatí coó nacaja na mé cuachi nacaja Adán. Nasacomí Adán cuachi jáchi naquehe nú da ña nacachi Ndióxi xihin dá. Ta mé Adán yóho nasacuu da tátuhun yuhú nuú da quixi tá nu ndihí.

<sup>15</sup> Joo a cuú jándique táhan í cuachi nacaja Adán xihin tóco ndihi ña vaha sahan Ndióxi nu yo. Jáchi sahá cuachi nacaja

in túhún taa, xihí cuahá ndivaha ñayivi. Joo ñamani nacaja Ndióxi xoho sahá ña nacaja in túhún taa naní Jesucristo cúu á in ñamani cáhnu ndivaha ña ñéhe táhvi cuahá ndivaha ñayivi. <sup>16</sup> A cuú jácatáhan í cuachi nacaja in dataa xihín ñamani cája Ndióxi xoho jáchi saha in túhún cuachi naxinu cháhan jatá ñayivi ta já nacasáhá xihí na. Vatí nandicuahá cuachi ñayivi joo nacaja Ndióxi ñamani xihin ná já nandaja ndaa mé á na ta nacachi a ña coó ga cuachi na nu mé á. <sup>17</sup> Sahá cuachi nacaja in túhún taa naní Adán nacasáhá xihí ñayivi. Joo sahá ña nacaja in túhún taa naní Jesucristo ñéhe táhvi yó ndoo máni uun cuachí nu Ndióxi. Jáchi cáhnu ndivaha ñamani cája Ndióxi xoho ña cán queá ñéhe ndeé chága iní yo caca í íchi cuéntá Ndióxi sahá ña nacaja Jesucristo.

<sup>18</sup> Sahá cuachi nacaja Adán nacachi Ndióxi ña cómi tóco ndihi ñayivi cuachi nu á. Joo sahá ña ndaa nacaja Jesucristo nacachi Ndióxi ña ndá ñayivi nacuu cuu nduu ndaa na nu mé á jáchi co cómi ga na cuachi nu á. <sup>19</sup> Sáa nasahin ini Adán jáchi coó naxeén da caja da ña cúni Ndióxi. Ta sahá ña nacaja Adán cuahá ndivaha ñayivi nandu na ñayivi cuachi. Joo nacaja Jesucristo tóco ndihi ña cúni Ndióxi ta xihín ña nacaja in túhún taa Jesucristo nandu ndaa cuahá ndivaha ñayivi nu Ndióxi.

<sup>20</sup> Tá nasahan Ndióxi ley nu Moisés já nacandaa ini ñayivi ña cuahá chága cúu cuachi na. Joo tá nandicuahá cuachi ñayivi já natahvi chága ini Ndióxi saha ná. <sup>21</sup> Nandihvi cuachi ñuyiví ta nasacomí a cuéntá sahá ñayivi. Ta sahá ña nacaja na cuachi sahá ña cán queá nacasáhá xihí na. Joo nacaja Ndióxi cuahá ñamani xihin yo ta nasacomí a cuéntá saha yo já ná cuu nduú ñayivi ndaa nu mé á ta já ná cuu cacu ndaa ínima yo anda ama cáa quivi sahá ña nacaja Jesucristo, xitoho í.

## 6

### *Naxihi yó nuú cuachi joo tácu yo xoo Jesucristo*

<sup>1</sup> Ama ná cachi xihin táhan í: “Cóho caja tá caja í cuachi já ná coo cáhnu chága ini Ndióxi saha yo.” <sup>2</sup> Ama ná cachi rí já jáchi

cúu yō tátuhun na sa naxihí nuú cuachi ta tá sa naxihí yó nuú cuachi ama ná cacomí ga cuachi cuéntá saha yo. <sup>3</sup> Tá nacandúta yo cuéntá Jesucristo cúu á tátuhun in yó naxihí xihín Jesucristo. <sup>4</sup> Jáchí tá nacandúta yo já cúu á tátuhun in yó nanduxu xihín Jesucristo ta naxihí yó nuú cuachi. Ta tá najánditacu Ndióxi Jesucristo já cúu á tátuhun in yó nanditacu xihín mé á. Jáchí xihín ndée cáhnu Ndióxi, tátá yo nanditacu Jesucristo ta sa xihín mé ndée cán cuu caca í ichí saá viti.

<sup>5</sup> Tá quiahva in nanduú xihín Jesucristo tá naxihí a quiahva já in nanduú xihín á tá nanditacu a. <sup>6</sup> Tá cámaní cándéé iní Jesús já nacatóo ndivaha í cája í cuachi jáchi nasahnda cuachi chuun nu yo. Joo sahá ña naxihí Jesucristo ndica crúxu sahá ña cán quéa najándacoo í cuachi cája í ta viti co sáhnda ga cuachi chuun nu yo. <sup>7</sup> Jáchí tá sa naxihí in dataa co sáhnda ga cuachi chuun nu dá ña cán quéa cúu á tátuhun sa naxihí yó xihín Jesucristo sahá ña cán quéa co sáhnda ga cuachi chuun nu yó viti. <sup>8</sup> Ta cúu á tátuhun naxihí yo tá naxihí Jesucristo ña cán quéa xini vaha í ña cuhun yó coo í nu ín mé á anda ama cáa quivi. <sup>9</sup> Sa xini yo ña nanditacu tucu Jesucristo ta a ndíco coo ga quivi a jáchi ni in ñaha a cuú caja ña ná quivi tucu a. <sup>10</sup> In táláa tañu naxihí a sahá cuachí ta viti xihín chí nuu co ndítahan ga nu á quivi a sahá cuachí. Ta viti tácu Jesucristo cuéntá Ndióxi. <sup>11</sup> Ña cán quéa ndítahan catacu ndó ñuyiví yóho tátuhun na sa naxihí nuú cuachi já ná a cáhnda ga cuachi chuun nu ndo. Ndítahan catacu ndó cuéntá Ndióxi ña in ná nduu ndó xihín Jesucristo.

<sup>12</sup> Ña cán quéa a quiahva ndó ñamaní nuú cuachi ña ná cacomí a cuéntá sahá yiquí cuñu ndó jáchi tá ná ndiquiahva ndó mé ndó ndahá cuachi já quéa caja ndó cuachi ña xica ini ndó caja ndó. <sup>13</sup> A ndiquiahva ga ndó yiquí cuñu ndó ndáha cuachi ná a caja ndó ña núu. Joo vaha chága ná ndiquiahva ndó yiquí cuñu ndó ndáha Ndióxi. Nasacuu ndó tátuhun in ndii nu Ndióxi jáchi nacaja ndó cuachi joo viti cúu ndó tátuhun ñayivi, na nanditacu tucu nacaja Ndióxi. Ndítahan ndiquahva ndó mé ndó ndáha Ndióxi ña

ná caja ndó ña vaha. <sup>14</sup> Co cómí ga cuachi cuéntá saha ndó viti jáchi tácu ndo sahá ñamaní cája Ndióxi ta co tácu ndo sahá ña sácú vaha ndó ley Moisés.

#### *Ndítahan nu yo ndicaxí ndá ichí candico yo*

<sup>15</sup> Ama ná caja rí cuachi sahá ña co cómí ga ley Moisés cuéntá saha yo. Uhun. A caja toho í ña jáchi xihín ñamaní cája Ndióxi xihín yo cánda iní ña cómí mé á cuéntá saha yo. <sup>16</sup> Sa xini ndó ña ndiquiahva in mozo mé dá ndáha xitoho da ta cája da ndá chuun nacuu ña sahan xitoho da nu dá caja da. Ta viti cuu ndicaxi ndó ndá na cacuu xitoho ndó. Tá ná ndicaxi ndó caja ndó cuachi já quéa cacuu ndó mozo ña quini ta cuhun ndó indayá. Ta tá ná ndicaxi ndó caja ndó ña cuni Ndióxi já quéa cacuu ndó cuéntá mé á ta caja mé á ña ná nduu ndaa ndó nu á viti. <sup>17</sup> Jihna nacaja ndó cuachi cuití va joo ndixahvi Ndióxi jáchi xihín ndinuhu ini ndó cája ndó ña ndaa, ña nacatiahva ndó cuéntá Ndióxi. <sup>18</sup> Nandoo cuachi ndó ta co cúu ga ndó mozo cuéntá cuachi viti. Nanduu ndó mozo cuéntá Ndióxi ta cája ndó ña ndaa viti. <sup>19</sup> Najánaha í sahá in mozo nu ndó já ná candaa vaha chága ini ndó ña ndaa. Mé ndó nasacuu ndó tátuhun mozo jáchi jihna ndiquiahva ndó mé ndó ndahá cuachi ta mí cuachi nasacuu a tátuhun xitoho ndó. Nacaja ndó tá nuú ña núu, ña nacahvi ini ndó caja ndó. Joo viti ndiquiahva ndó mé ndó ndahá Ndióxi ta nasacuu ini ndó caja ndó ña ndaa xihín ndinuhu ini ndó jáchi já cáni a nu ndó caja ndó ña ná cacuu ndó ñayivi yii nu mé á.

<sup>20</sup> Tá nasacuu ndó mozo cuachi coo naxeén ndó caja ndó ña ndaa ña cuni Ndióxi. <sup>21</sup> Ni in ña vaha coo nañehe ndó saha cuachi nacaja ndó. Ta viti cácahan nuu ndo saha mé cuachi nacaja ndó. Ta ndá ñayivi sá cája cuachi cuhun na coo na indayá anda ama cáa quivi. <sup>22</sup> Joo co cómí ga cuachi cuéntá saha ndo viti jáchi nanduu Ndióxi xitoho ndó. Vaha quehe ndó tá ná caja ndó ña cuni mé á jáchi já xinu coo ndó cacuu ndó ñayivi yii nu Ndióxi ta já cuhun ndó coo ndó xihín mé á anda ama cáa quivi. <sup>23</sup> Jáchí tá cája í cuachi cúu á tátuhun ndíyíca yo nu Ndióxi sahá ña nacaja í ta ini

indayá chahví sahá. Joo ñamaní cája Ndióxi xohó sahá ña naxihí Jesucristo, xitoho í cúú á ña cohó catacú indiví xihín mé á anda ama cúa quivi.

## 7

### *Có cómi ga ley cuénta saha yo*

<sup>1</sup> Candehe ndo ñani mí i, na cúú cuénta Jesús. Sa xini vaha ndó ley Moisés ta sa xini ndó ña cómi ley cuénta sahá ñayivi nani tácu cuití va na. <sup>2</sup> Cúú á tátuhun tá natandaha in ñañáha xihín in dataa já quea cáchí ley cúú ña ñájihí da anda ná xinu coo quivi quivi da. Joo cáchí mé ley ña tá sa naxihí da co cúú ga ña ñájihí da. <sup>3</sup> Sahá ña cán quea cuu tandaha tucu ña xihín inga taa jáchi co sáhdá ga mé ley chuun nu ña. Ta co cája ña cuachi nu Ndióxi tá ná tandaha tucu ña jáchi sa naxihí va yí ña. Joo tá ná tandaha tucu ña nani tácu yí ña já quea cája ña cuachi nu Ndióxi.

<sup>4</sup> Ta quiahva já ndóho ri ndóho va ñani mí i, na cúú cuénta Jesús. Cúú á tátuhun naxihí ndó nu ley Moisés ña cán quea co cómi ga mé ley cuénta saha ndo. Ta viti núná nuú Jesucristo cacomí a cuénta saha ndo ña ná cacuu ndó cuénta mé a nanditacu tucu. Ta viti cuu cája í ña vaha, ña cúni Ndióxi. <sup>5</sup> Tá cámaní candeé iní Jesucristo nacaja í ndinuhu ña núu ña nasacahvi iní cája í. Vatí sa xini yó ña cáchí mé ley joo nacaja chága yó cuachi ña nahvi iní cája í. Ña cán quea nanditahan nu yó quivi ná cuhun í ndoho iní indayá, nduu. <sup>6</sup> Joo nacaja Ndióxi ña ná janí yó nuú ña sáhdá ley Moisés ña nasacomí cuénta saha yo. Ta viti núná nu yó cája í ña cúni mé á jáchi nandijama ínima yí Ndióxi mí sahá ña cán quea co cómi ga ley, ña nahví na jihna cuénta saha yo viti.

### *Cája tá cája í cuachi vatí candeé iní Jesucristo*

<sup>7</sup> Á cúni cachi ña yóho ña a váha toho ley Moisés. Uhun. Ña vaha cúú á jáchi xihín ña cahan mé ley cánda vaha iní ndá a cúú cuachi. Já cáchí mé ley já: “A ndiáva toho iní ndó cacomí ndó ñaha cómi inga na”, cáchí a. Ña cán quea cánda iní viti ña a váha toho tá ná cája í já. <sup>8</sup> Tá ná a cóo toho ley, nduu já quea a cánda iní i ña cúú cuachi. Ta

coó toho cuachi cája i tá coó ley, nduu. Joo viti cánda iní i ña a váha toho ndiáva iní i cacomí i ñaha ñani táhan i jáchi cáchí ley a cája i ña. Ña cán quea nandihvi cuachi iní i ta nacasáhá cáhvi iní i ndaja cája i cacomí i ñaha inga na. <sup>9</sup> Tá cámaní cánda iní i ña cáchí ley Moisés já nahán i cúú u da vaha. Joo tá natandaa quivi natacu iní i xihín ña cáchí ley Moisés anda jáví nacanda iní i ña ñúhu cuachi iní i ta nacanda iní i ña cúú u da cája cuachi ta nditahan nuú i cuhun i indayá sahá. <sup>10</sup> Tá ná cuu cája ñayivi tóco ndihi ña cáchí ley Moisés já cuhun na coo na nu in Ndióxi anda ama cúa quivi. Joo coó nacuu cája i ña cáchí mé ley sahá ña cán quea nditahan nuú i cuhun i indayá sahá. <sup>11</sup> Najándahvi cuachi yehe jáchi nahán i cuu cuhun i indiví sahá ña cája i ña cáchí ley joo sahá ña coó nacuu xinu coo i cája i ña sahá ña cán quea cuhun i indayá.

<sup>12</sup> Ta yí ndivaha cúú ley Moisés. Ta yí ndivaha cúú tuhun nasahnda Ndióxi cája í. Ta cúú á ña ndaa ta cúú á ña vaha. <sup>13</sup> Ama ná jáqueta nuu ley yehe iní indayá nani cúú á ña vaha. Uhun. A cúú cuití cája ley jáqueta nuu a yehe iní indayá. Cuachi quea ndúcú chindahá yehe cuhun i indayá. Nañehe iní cuachi cañehe a yehe cuhun i indayá saha ley. Xihín ña yóho cánda iní i ña quini ndivaha cúú cuachi ta vaha ndivaha cúú mé ley.

<sup>14</sup> Sa xini yo ña cúú ley cuénta Ndióxi joo yehe cúú u in da cája cuachi ta cája i ña núu jáchi mé cuachi cómi a cuénta sahá i. <sup>15</sup> Co cánda iní i ña cája i jáchi cúni cája i ña vaha joo co cája i ña. Ña cája i quea mé ñaha ña cándají i. <sup>16</sup> Tá cája i cuachi ña co cúni cája i já cánda iní i ña vaha cúú ley. <sup>17</sup> Mé a ndaa co cúni cája i cuachi joo cuachi ndacaan iní i cúú á ña jáchan yehe cája i ña. <sup>18</sup> Sa xini ña co ndeé yiquí cuñu i cája ña vaha jáchi coó ña vaha ndacaan iní i. Vatí cúni cája i ña vaha joo co sahan mé á cája i ña. <sup>19</sup> Cúni cája i ña vaha joo co cája toho i ña. Ña cája i cúú á ña núu ña co cúni cája i. <sup>20</sup> Cája i ña co cúni cája i já cánda iní i ña cuachi ndacaan iní i quea chindahá nihni a yehe cája i ña núu.

<sup>21</sup> Candehe ndo ña yóho: Vatí cúni cája i ña vaha joo cája i ña núu jáchi ña cán cuití va xinu iní i cája i. <sup>22</sup> Janda ínima

i xinu coo ña cátóo i caja i ña cáhan ley Ndióxi. <sup>23</sup> Joo ndácaan inga ñaha ini i ta cáni táhan mé ñaha cán xihin xini túni i. Ta mé ñaha ndácaan ini i cúu á cuachi. Ta cándeé cuachi xihín i já sáhdá a chuun nuú i.

<sup>24</sup> Ndáhvi nahá nacuu u. Yo cuu jácau yehe ná a cája ga i cuachi ña cañehe yehe cuhun i indayá. <sup>25</sup> Ndiquiahva i ndixahvi nu Ndióxi jáchi xihín ña nacaja Jesucristo, xitoho í cuu jácau Ndióxi yehe já ná a cája ga i cuachi. Ña cán quéa cándaá ini i ña ndítahan cája i ña sáhdá ley Ndióxi joo cuachi ndícaan ini i sáhdá chuun nuú i.

## 8

*Ndíco í in íchi nu cája í ña cúní ínimá yíi Ndióxi*

<sup>1</sup> Ta sahá ña in nanduú xihín Jesucristo sahá ña cán quéa a chínúu Ndióxi cuachi jata yo viti. Jáchi co cája ga í ña xíca ini yiquí cuñu í. Ña cája í cúu ña cúní ínimá yíi Ndióxi. <sup>2</sup> Jáchi xihín ña nacaja Jesucristo najácau ínimá yíi Ndióxi mí ta nasahnu a cuachí já ná a cuhun yó indayá. <sup>3</sup> Coó nacuu caja í tóco ndihi ña sáhdá ley Moisés ña cán quéa coó nacuu nduu ndaa yó nu Ndióxi xihín mé ley. Ña cán quéa nacaja Ndióxi inga ñaha tá nachindahá mé á Jesucristo, jahyi a. Nanduú Jesucristo in ñayivi ta tá quiahva cácu ñayivi quiahva já nacacu Jesucristo ñuyíví. Ta tá naxihí mé á ndíca crúxu já nachahvi a saha tóco ndihi cuachí sahá ña cán quéa co sáhdá ga cuachi chuun nu yo. <sup>4</sup> Ta nacaja Ndióxi ña yóho já ná cuu xinu coo í caja í ña sáhdá ley mé á tá ndáca ínimá yíi Ndióxi mí. Jín va caja í viti jáchi co ndúu ga yó ndahá cuachi.

<sup>5</sup> Ñayivi, na cája ña xíca ini yiquí cuñu, na cán cúu na ndícani cuahá ini sahá yiquí cuñu. Joo na cája ña cúní ínimá yíi Ndióxi na cán cúu ná ndúcú jácavatá na Ndióxi. <sup>6</sup> Tá ná ndicani cuahá ini na sahá ña cúní yiquí cuñu na já quéa cuhun na indayá. Joo tá ná ndicani ini na sahá ña cúní ínimá yíi Ndióxi já quéa coo vaha ini na ta ñehe táhvi ná cuhun na indiví. <sup>7</sup> Joo ñayivi ndícani ini saha yiquí cuñu, na cán cúu ná na ihvi Ndióxi jáchi co cúní na caja na ña cáchi ley Ndióxi ta ni a cuú caja na ña. <sup>8</sup> Sahá ña cán

quéa tá cómi cuachi cuénta saha ná já quéa a cuú caja na ña cáji ini Ndióxi xihín.

<sup>9</sup> Ta tá mé a ndaa ndácaan ínimá yíi Ndióxi ini ndó já quéa co ndíco ga ndó íchi cuénta ña núu, ña nasacaja ndó jihna. Ta viti ndíco ndó íchi vaha ta cája ndó ña cúní Ndióxi. Jáchi ndá na co ndácaan ínimá Jesucristo ini, na cán co cúu ná cuénta mé á. <sup>10</sup> Tá ndácaan Jesucristo ini ínimá ndo vaxi quívi quívi yiquí cuñu ndó saha cuachi nacaja ndó. Joo mé a ndaa catacu ínimá ndo nu ín Ndióxi anda ama cáa quívi jáchi nanduú ndaa ndó nu Ndióxi nacaja mé á. <sup>11</sup> Nacaja ínimá yíi Ndióxi ña ná nditacu tucu Jesucristo ta tá ndácaan ínimá yíi Ndióxi ini ínimá ndo já tandaa quívi caja mé á ña ná nditacu tucu yiquí cuñu ndó saha mé ínimá yíi Ndióxi ndícaan ini ndó.

<sup>12</sup> Candehé ndó ñani mí i, na cúu cuénta Jesús. Co ndítahan nu ndó caja ndó ña núu, ña xíca ini ndó caja ndó. <sup>13</sup> Jáchi tá ndinuhu ini ndó caja ndó ña núu, ña xíca ini ndó já quéa ndítahan nu ndó cuhun ndó indayá. Joo tá xihín ndée ínimá yíi Ndióxi jándihi ndó sahá ña núu xíca ini ndó caja ndó já quéa vaxi quívi cuhun ndó coo ndó xihín mé á anda ama cáa quívi.

<sup>14</sup> Ndá na nandiquiahva mé ndáha ínimá yíi Ndióxi ña ná candaca a na, mé a ndaa táhyí cúu ná jahyi Ndióxi. <sup>15</sup> Nasahan Ndióxi ínimá yíi mé á nu ndo joo coo nasahan ña nu ndo ña ná catavi nihni a ndohó ta já quixi ña jáyihví a ndohó. Nasahan Ndióxi ínimá yíi mé á nu ndo jáchi xihín ña yóho ndája Ndióxi ndohó jahyi mé á ta saha mé ínimá yíi yóho cáhan yó xihín Ndióxi ta cáchi yo: “Tátá maní i.” <sup>16</sup> Ta cáchi ínimá yíi Ndióxi xihín ínimá yo ña mé a ndaa cúu yó jahyi Ndióxi. <sup>17</sup> Ta sahá ña cúu yó jahyi mé á sahá ña cán quéa ñehe táhvi mí ví ndiquehé ña nacachi Ndióxi quiahva nu yo. Ta sa mé ña ñehe táhvi yo yóho tahnda java ña xihín Jesucristo. Tá ta mé a ndaa táhyí ndoho iní xihín á já quéa tá ndihi cohó coo í xihín mé á indiví ta cán ndicáhnu í xihín á.

<sup>18</sup> Coó a caja toho a tá ná ndoho ini í ñuyíví yóho jáchi vaxi quívi ndicáhnu ndivaha í xihín Jesucristo caja Ndióxi. <sup>19</sup> Tóco ndihi ña nacavaha mé á ndati ndihi a ta ndiáva íni a ña ná tandaa quí quívi

cachi Ndióxi ndá ñayivi cúu cuéntá mé á. <sup>20</sup> Nacaja Ndióxi ña ná ndoho ini tóco ndihi ña nacavaha mé á. Mé ñaha nacavaha Ndióxi cō cūni a ndoho ini a joo sácú ini Ndióxi ña ná ndoho ini tóco ndihi ña nacavaha mé á. Ta ndátí tiahva ndihi ñaha <sup>21</sup> andá tandaa quiví caja Ndióxi ña janí ña já ná a cácomí ga cuachi cuéntá sahá já ná a tíví ga ña. Ta ñúchí ndivaha mé quiví já tá cají ini tóco ndihi ñaha nacavaha Ndióxi xihín tóco ndihi na cúu jahyi mé á. Jáchí a cácomí ga cuachi cuéntá saha ná. <sup>22</sup> Sa xíní yo ña janda sanahá ndivaha ta andá viti tána ndivaha tóco ndihi ña nacavaha Ndióxi ta ndóho ndivaha ini a tátuhun ndóho ini in ñáñaha tá ndúcú ndéé ña cacu jahyi ñá. <sup>23</sup> Ta quiahva já ndóho ri ini mí ví. Ínima yíi Ndióxi cúu ña sahan tiahva mé á nu yo já ná candaá iní ndá quiahva ín ña quiahva mé á nu yo chága chí nuu. Ta tána ndivaha í andá quiahva ná yaha ña ndóho iní. Ta ndátí tandaa quiví ndaja Ndióxi tóco ndihi mí ná nduú jahyi mé á já ná ndiquehé yiquí cuñu saá. <sup>24</sup> Najácaacu Ndióxi mí jáchí nacandeeé iní mé á vatí coó naxiní ña nacachi mé á quiahva nu yo. Tá xíní cáxí yo in ñaha já candaá iní ña cō xíní ñúhú toho candatí quehé ña jáchí cō xíní ñúhú candatí ñaha cómí yo. <sup>25</sup> Joo tá ná candatí in ñaha ña cō xíní yo já queá cō ndihi iní nani ndátí ña.

<sup>26</sup> Tá cávitá iní já chindeé ínima yíi Ndióxi mí jáchí cō tiáhva í ndaja caça tahví yo nu Ndióxi tá quiahva ndítahan caça tahví yó nu á. Joo sa mé ínima yíi Ndióxi yóho tána ta cáhan xihín tuhun ña a cuú cahan yo. Já caja mé á tá xíca tahví a nu Ndióxi saha yo. <sup>27</sup> Ta sa xíní Ndióxi ña cáhvi iní ta sa xíní a ña xíca tahví ínima yíi mé á saha yo. Ña cūni Ndióxi caja saha yo ña jan queá xíca tahví ínima yíi mé á saha yo, na cúu ñayivi cuéntá mé á.

*Ni in ñaha a cúu cahnu a mí tá cándeeé iní Jesucristo*

<sup>28</sup> Ta sa xíní yo ña tóco ndihi ña ndóho í ndaja Ndióxi ña ná nduu a ña vaha tá quíhvi iní mé á. Jáchí mí cúu yó na sa nasacu ini Ndióxi ña ná caja í ña cūni mé á.

<sup>29</sup> Ndá ñayivi nacaxi Ndióxi anda saha nacaxi a na ña ná nduu na tátuhun Jesucristo, mé á cúu jahyi Ndióxi. Jáchí cūni Ndióxi ña ná nduu Jesucristo jiní nuú ndihi na cúu cuéntá mé á. <sup>30</sup> Ta nacana Ndióxi na nacaxi a ña ná candeé ini na mé á. Ta nacaja mé á ña ná nduu ndaa na nu á. Ta vaxi quiví caja mé á ña ná ndináhnu ndihi na cán xihín á.

<sup>31</sup> Ndía cachí sahá ña yóho. Ni in túhún ñaha a cúu caní táhan xoho ta ni a cúu quee vaha xoho jáchí cuahan Ndióxi xoo í. <sup>32</sup> Ta coó nacajíhnda Ndióxi jahyi a jáchí nandiquiahva Ndióxi Jesucristo, jahyi a ña ná quiví a saha yo. Xihín ña yóho candaá iní ña cō ndáhvi cúu ini a quiahva tóco ndihi ñaha nu yo. <sup>33</sup> Yo já cuu chícaan cuachi jatá na nacaxi Ndióxi. Ni in ñayivi a cúu chícaan cuachi jatá na jáchí sa mé Ndióxi nandaja mé á na ñayivi ndaa nu á. <sup>34</sup> Yo já cuu jácojo cuachi jatá na cúu cuéntá mé á. Ni in ñayivi jáchí naxihí Jesucristo saha yo. Nanditacu tucu a ta ín coo a xoo cuáha Ndióxi indiví xíca tahví a nu Ndióxi saha yo. <sup>35</sup> Yo já cuu caji nuu nu Jesucristo quíhvi iní a mí. Ni in ñaha a cúu caja ña jándacoo Jesucristo ña quíhvi iní a mí. Vatí ná ndoho ndivaha iní ta vatí ná quixi ña yíhvi yo ta vatí ná ndicuita na caja xíxi na xoho ta vatí ná quixi joco ta vatí janda jáhma yo ná ndimaní ta vatí tondóho vaxi nu yo á ñayivi ndúcú cahní mí joo ni in ña yóho a cúu caji nuu a nu Jesucristo ña quíhvi iní a mí. <sup>36</sup> Já cáchí tuhun Ndióxi já:

Saha Ndióxi sácú ini ñayivi cahní na ndehe ndijáá ní quiví.

Tá quiahva cája na xihín ndicachi, rí cuhun quivi quiahva já cája na xihín nde, cáchí tuhun Ndióxi.

<sup>37</sup> Vatí ndóho í tóco ndihi ña yóho joo quee vaha tá quee vaha í caja Jesucristo jáchí quíhvi iní a mí. <sup>38</sup> Sa xíní vaha í ña ni in ñaha a cuú caja tavá mí ndáha Jesucristo, mé a quíhvi iní mí. Ta coó a caja toho a á tácu yo á sa naxihí yo. Ni tátō Ndióxi ni ña sáhdá chuun nuú ñayivi ta ni ña ndóho iní viti ni ña ndoho iní chí nuu <sup>39</sup> ta ni in ñaha ín indiví ta ni in ñaha ín tíxi ñúhu ta ni in ñaha nacavaha Ndióxi a cuú tavá mí ndáha Ndióxi, mé a quíhvi iní mí. Ta najánaha

Jesucristo, xitoho í nu yo ña quíhvi ndivaha ini Ndióxi mí.

## 9

### *Ñayivi naquixi chichi Israel cúu na nacaxi Ndióxi*

<sup>1</sup> Ña ndaa cúu ña cáhan i xihín ndó viti ta co cávaha i ña tuhún jáchi cúu u cuéntá Jesucristo. Sáhndá ínimá yii Ndióxi chuun nu xíní túní i sahá ña cán quéa co cáhan i ña tuhún. <sup>2</sup> Ín cuéha ndivaha ini i ta já táhvi ndivaha ini i sahá na Israel. <sup>3</sup> Mé a ndaa cúni yehe chindeé e na naquixi chichi nuú naquixi mí i ña ná candeé ini na Jesucristo. Ta janda ín tiahva i cacuu u da chícáan na cháhan jata tá ta xihín ña yóho cuu cacu ndaa ínimá ná. Joo a cuú caja i ña. <sup>4</sup> Mé na cán naquixi na chichi Israel ta nacaxi Ndióxi na já ná nduu na ñayivi cuéntá mé á. Najánaḥa Ndióxi nu ná ndá quiahva cáhnu cúu mé á. Ta nasahan tuhun a nu ná ña nasacu ini a caja saḥa ná. Nasahan Ndióxi ley Moisés nu ná ta najánaḥa mé á na ndaja ndítahan nu ná caja cáhnu na mé á. Nacaxi tuhun a xihín ná sahá ñamaní caja mé á xihín ná chí nuu. <sup>5</sup> Ta ñayivi Israel naquixi na chichi na nasanduu sanahá. Ta nacacu Jesucristo chichi mé na cán ta nanduu a in ñayivi. Chí anda ama cáa quívi ná caja cáhnu yó Jesucristo, mé á cúu Ndióxi, mé á cómi cuéntá saḥa tóco ndihi ñaha. Já ná coo.

<sup>6</sup> A juú cahán ndo ña coó najáxinu Ndióxi tuhun a nasahan nuú na Israel. A juú ndihi ñayivi jan cúu na cuéntá Ndióxi vatí naquixi na chichi Israel. <sup>7</sup> A juú tóco ndihi na naquixi chichi Abraham cúu ná cuéntá Ndióxi jáchi janda saḥa nacachi Ndióxi xihín dá: “Ñayivi cuaha quixi chichún cacuu na jahyi Isaac”, cáchi a xihín Abraham. <sup>8</sup> Ña yóho cúni cachi a ña ni in tuhún ñayivi co cúu ná jahyi Ndióxi sahá ña naquixi na chichi Abraham. Na cúu ndusa jahyi Ndióxi cúu ná naquixi chichi Isaac jáchi cuéntá Isaac najáxinu coo Ndióxi tuhun nasahan nu Abraham. <sup>9</sup> Sanahá ndivaha nasahan Ndióxi tuhun a nu Abraham já cáchi a já: “Xinu cuia já quixi tucu u ta cacu jahyi taa ñájhún, Sara.”

<sup>10</sup> Candehé ndo ná ndicani i nu ndo ña nayaha chága chínuu. Isaac, da cúu tásánnu jícó yo nasacuu da tátá ndíví taa valí jahyi Rebeca. <sup>11</sup> Tá cámaní cacu taa cuatí jahyi na já nasacu ini Ndióxi caxi a in a ta cacu xóo a inga vatí a ñaha caja ndíví taa valí ni ña vaha ni ña núu. Já nasacu ini a caja <sup>12</sup> ta já nacachi a xihín Rebeca: “Jahyún, da cacu chí ivi cahnda chuun nuú da cacu nu cuítí.” <sup>13</sup> Ta já cáchi tucu tuhun Ndióxi já sahá jahyi Rebeca: “Nacaxi i Jacobo, da nacacu chí ivi caja i ñamaní xihín dá joo nasacu xóo i Esaú, da nacacu nu cuítí.” Já nacaja Ndióxi jáchi já nasacu ini a caja.

<sup>14</sup> Ama ná cachi rí ña co caja ndaa Ndióxi. A cáchi toho í já. <sup>15</sup> Já nacachi Ndióxi xihín Moisés sanahá: “Tahvi ini i sahá ñayivi joo mí i caxi i yo tahvi ini i saḥa. Ta tahnda ini i sahá ñayivi, joo mí i caxi i yo tahnda ini i saḥa”, nacachi Ndióxi sanahá. <sup>16</sup> Ña cán quéa co caja Ndióxi ña cúni ñayivi ta a cúu caja ndúsa ñayivi xihín á ña ná tahnda ini a saḥa ná jáchi táhnda ini a sahá ñayivi, na cúni mé á tahnda ini a saḥa. <sup>17</sup> Já cáchi tuhun Ndióxi já xihín da cúu rey nuú nación Egipto: “Nandaja i yohó rey jáchi cúni jánaḥa i nuun ña cuu caja i tóco ndihi ñaha tá cúni já ná candaa ini tóco ndihi ñayivi ndúu ñuyíví ña cáhnu ndivaha cúu yehe”, nacachi Ndióxi. <sup>18</sup> Ña cán quéa tá cúni Ndióxi tahnda ini a sahá ñayivi já cuu tahnda ini a saḥa ná. Ta tá cúni a ndaja táhyí a ínimá ná já cuu ndaja táhyí a ña.

<sup>19</sup> Joo a cuú cachí ña co caja ndaa Ndióxi tá cáchi a ña cómi yo cuachi. Vatí sácú ini Ndióxi ña caja in in ñayivi joo co chindahá a na caja na cuachi. <sup>20</sup> Co ndítahan nuú ñayivi ndaja ndichí na Ndióxi sahá ña caja mé á. Jáchi sa xíní yo ña co ndítahan nuú in quiji cachi a xihín da cávaha ñaha: “Co catóo i coo i tá quiahva nacavaha ndó yehe.” <sup>21</sup> A cuú cachi quiji cán já jáchi mé da cávaha quiji cán, cávaha da ña tá quiahva cúni mé dá. Xihín in mbohla loho ñuhú quíji cuu cávaha da in quiji cacuu a javí á in quiji cuéntá yávi núhu.

<sup>22</sup> Ta quiahva já caja Ndióxi xihín ñayivi. Ín tiahva mé á jánaḥa nu ná ña xójo ndivaha ini a sahá cuachi na. Ta ín tiahva mé á jánaḥa nu ná ña cuu caja mé

á tóco ndihi ñaha. Joo ñacaja ndeé ini Ndióxi ta ñasandati a jándoho a ini ñayivi vatí ñanditahan nu ná ndoho ini na sahá cuachi na. <sup>23</sup> Mé a ndaa táhnda ini Ndióxi sahá ñayivi ta cúni a jánaħa nu ná ña cáhnu ndivaha cúu mé á ta cúni a jánaħa nu ná ndá quiahva quíhvı ini a na. Andá sanahá ndivaha sácú ini a jánaħa nu yo ndá quiahva cáhnu cacuu yó nu mé á. <sup>24</sup> Naçaxi a ñayivi tañu na ñaquixi chichi Israel ta ñaçaxi mé á ñayivi tañu na coó ñaquixi chichi Israel. Ta mí cúu yó na ñaçaxi a. <sup>25</sup> Já ñaçachi Ndióxi já sanahá ta já ñaçahyí Oseas ini tuhun Ndióxi:

Tandaa quıvı caxi yeħe ñayivi, na co cúu cuéntá mí i ta ndaja i na cuéntá mí i.

Ta na coó ñaquıhvı ini i jihna quıhvı ini i na viti.

<sup>26</sup> Ta sa mé nu ndúu ñayivi, na coó ñasacuu cuéntá Ndióxi,

cán cuħun mé á caxi a na ta caja ña ná nduu na cuéntá mé á jáchi cúu á in Ndióxi tácu, já cáchi tuhun mé á.

<sup>27</sup> Ta sahá na ñaquixi chichi Israel já ñaçachi Isaías: “Vatı ndıcuahá ñayivi Israel tá quiahva cuahá ñutı yuhú tañuhú joo chá va cacuu na cacu ndaa ínima. <sup>28</sup> Jáchi jonáa va jáxınu coo Ndióxi tuhun a ta anda jávi caja viı a saħa tóco ndihi ñayivi ndúu ñuyıvı”, ñaçachi Isaías. <sup>29</sup> Ta já ñaçachi tucu Isaías já sanahá:

Tá quiahva ñacaja Ndióxi najándihi a sahá ñayivi ñuu Sodoma xıhın ñuu Gomorra quiahva já caja Ndióxi jándihi a saħa yo, nduu.

Joo sahá ña ñatahvı ini Ndióxi sahá na Israel sahá ña cán quéa coó najándihi a saħa ná, já cáchi tuhun Ndióxi.

### *Nditahan nuı na Israel candeé ini na Jesucristo*

<sup>30</sup> Ña cán quéa ndıcanı i nu ndo sahá ñayivi, na coó ñaquixi chichi Israel. Co ndınducú na nduu ndaa na nu Ndióxi joo tá ñacasahá na candeé ini na Jesucristo já ñacaja Ndióxi ña ná nduu ndaa na nu mé á. <sup>31</sup> Joo ñayivi Israel cája na ña sáhnda ley Moisés xıhın ndinuhu ini na jáchi cáhan na cuu nduu ndaa na nu Ndióxi sahá ña sácú vaha na ley Moisés. Joo coó ñacuu nduu ndaa na nu Ndióxi xıhın ña yoho. <sup>32</sup> Já

ñandoho na Israel jáchi ñanditahan nu ná candeé ini na Jesucristo. Xıhın ndinuhu ini na cája na ña cáchi ley joo coó ñacuu nduu ndaa na nu Ndióxi xıhın ñaha cája na. Ña cán quéa cúu ná tátuhun in na ñaçachıhın saħa xıhın yuu cáhnu. <sup>33</sup> Jáchi cáchi tuhun Ndióxi ña cúu Jesucristo tátuhun yuu cáhnu nu cáchıhın sahá ñayivi. Já cáchi tuhun Ndióxi já:

Nasacu yeħe in yuu tóto cáhnu ñuu Sıon ta xıhın yuu cáhnu cán cuahá na cachıhın saħa.

Joo ndá na ná candeé ini mé a ñachindahá i, na cán cúu ná na a cácan nuu, já ñaçachi tuhun Ndióxi.

## 10

<sup>1</sup> Cuni joho vaha ndó, ñani i, na cúu cuéntá Jesús. Jáchi ndinuhu ini i xıca tahvı i nu Ndióxi sahá ñayivi Israel ña ná candeé ini na Jesús já ná cuu jácacu Ndióxi na nuu cuachi na. <sup>2</sup> Mé a ndaa ná caħan i xıhın ndo ña cája cáhnu na Israel Ndióxi xıhın ndinuhu ini na joo co cándaa cáxi ini na ña cúni Ndióxi caja na. <sup>3</sup> Jáchi co xıni na ndaja cája Ndióxi ña ná nduu ndaa ñayivi nu mé á sahá ña cán quéa ndúcú na nduu ndaa na nu mé á xıhın ña cája mé va na. Ta co cúni na ndiquiahva na mé ná ndáħa Ndióxi ña ná caja na ña ñasacu ini mé á caja na. <sup>4</sup> Co xıni na ña ñaquixi Jesucristo ta ñaxıhı a saħa yo já najáxınu coo a caja ña cáchi ley ña ná nduu ndaa tóco ndihi na candeé ini mé á.

<sup>5</sup> Sanahá ndivaha ñaçahyı Moisés sahá ñayivi, na cúni nduu ndaa nu Ndióxi xıhın ley Moisés. Já cáchi a já: “Ndá na co cómi cuachi nu Ndióxi, na cán cuu nduu ndaa nu mé á ta jácacu a na”, já ñaçahyı da. <sup>6</sup> Joo tá ná jácacu Ndióxi mí sahá ña candeé ini mé á já quéa co xıni ñuhú cuħun yo indivı jánuu í Jesucristo ña ná nuu a chındeé a mí jáchi sa ñacaja mé á ña. <sup>7</sup> Ta co xıni ñuhú cuħun yo nu ndúu ínima ndıi ña ná ndiquehé Jesucristo tañu na sa ñaxıhı jáchi mé Jesucristo sa ñanditacu tucu a. <sup>8</sup> Co xıni ñuhú cuħun xıca nahá yo ndınducú yo Jesucristo jáchi ín yati ndivaha mé á nu yo jáchi ín a xoho. Ta mé tuhun cáħan nde yoho cúu á tuhun cáħan saħa Jesucristo já ná candeé ini ndó mé á. <sup>9</sup> Ta tá



cachún ña cúu Jesús xitohún ta tá cándúsún xihín ndinuhu ínimun ña najánditacu Ndióxi Jesús tañu na naxihí já quéa cuu cacu ndaa ínimun. <sup>10</sup> Jáchi tá cándéé ini ñayivi Ndióxi xihín ndinuhu ini na já nduu ndaa na caja Ndióxi. Ta tá cáhan na xihín java ga ñayivi ña cándéé ini na mé á já quéa cuu cacu ndaa ínima ná.

<sup>11</sup> Já cáchi tuhun Ndióxi já: “Ndá na ná cándéé ini Jesús a xínu toho quivi cahán na ña najándahvi Ndióxi na.” <sup>12</sup> In cúu tóco ndihi ñayivi nu Ndióxi. Tá quiahva jácacu Ndióxi na naquixi chichí Israel quiahva já jácacu a na coó naquixi chichí Israel. Jáchi sa mé Ndióxi cán cúu Ndióxi nu tóco ndihi ñayivi ta co ndáhvi cúu ini a quiahva ñaha nuú na xíca tahví nu mé á. <sup>13</sup> Já cáchi tuhun Ndióxi: “Ndá na ná cacu tahví nu Ndióxi ña ná chindeé a na, na cán cacu ndaa ínima.” <sup>14</sup> Ta ndaja caja na cacu tahví na nu Jesús tá ta cámani cándéé ini na mé á. Ta ndaja caja na cándéé ini na mé á tá a ñaha cuni johu na tuhun vaha cáhan saha Jesús. Ta ndaja caja na cuni johu na tuhun vaha saha Jesús tá cámani cuhun in na caxi tuhun na ña nu ná. <sup>15</sup> Ta ndaja caja na cuhun na cáhan na tuhun Ndióxi xihín ná tá ta co ín in na chindahá na cuhun na. Já cáchi tuhun Ndióxi já: “Ndaja ñúchí chá tá xínu coo na ñéhe tuhun vaha saha Ndióxi ña ná coo vaha í xihín mé á.”

<sup>16</sup> Joo a juú ndihi ñayivi cándúsa tuhun Ndióxi. Ña yóho cúu á tá quiahva nacachi Isaías: “Ndióxi, mé ndó cúu ndó xitoho nde. Chá cuití ñayivi cándúsa tuhun nacahan nde xihín ná.” <sup>17</sup> Jáchi jihna ñúhú cáhan na tuhun vaha saha Jesucristo nuú ñayivi ta xihín ña xini johu na cán jáxinu ini na xihín á. Anda javí cásahá na cándéé ini na mé á ta cája na ña cuni a.

<sup>18</sup> Á sa naxini johu na tuhun vaha cáhan saha Jesús. Ajan. Sa naxini johu na ña. Jáchi já cáchi tuhun Ndióxi já:

Nasahan na cahan na tuhun Ndióxi nuú ñayivi,  
ta níí cúu sahá ñuyíví naxinu tuhun cáhan na, já cáchi tuhun Ndióxi.

<sup>19</sup> Á nacandaa ini ñayivi Israel ña yóho. Ajan. Cándaa vaha ini ná ña. Jáchi já nacahí Moisés sanahá:

Ndióxi quéa nacachi a: Caja i ña ná candúsa na tóho yehe já ná cahihvi ini na Israel.

Ta cojo ini na xihín na tóho sahá ña cája i ña ná candúsa mé na tóho cán yehe, nacachi tuhun Ndióxi.

<sup>20</sup> Xihín ña yóho nasahan ndeé ini Isaías cahí da ña nacachi Ndióxi tá nacachi a já: Mé na co ndínducú yehe, na cán cúu na nandiñehé yehe.

Ta najánaha i mí i nu ná vatí coó nandaca tuhun na sahá i, nacachi tuhun Ndióxi.

<sup>21</sup> Joo já nacachi Ndióxi sahá ñayivi Israel: “Níí tiempo cuni ndiquehe vaha i ñayivi Israel joo co cuni na quixi na nuú i jáchi sáa ini na ta co cuni na caja na ña cuni”, nacachi tuhun Ndióxi.

## 11

### *Cája Ndióxi ñamaní xihín ñayivi Israel*

<sup>1</sup> Ta viti ná ndaca tuhún i ndohó ña yóho: Á cáhan ndo ña najándacoo ndaha Ndióxi ñayivi Israel. A juú ña ndaa cúu á jáchi sa mé yehe cúu u da Israel, da naquixi chichí Abraham ta naquixi i chichí Benjamín, da nasacuu jahyi ñání jicó Abraham. <sup>2</sup> Janda mé saha nacachi Ndióxi ña nacaxi mé á na Israel cacuu na cuénta mé á ta co cándají a na viti. Sa xini ndó ña nacachi tuhun Ndióxi sahá da nasacuu profeta Elías. Mé da yóho tá naxica tahví da nu Ndióxi já najácojo da cuachi jatá na Israel. <sup>3</sup> Já nacachi da já: “Cándehe ndo Ndióxi, xitoho i. Sa nasahní na profeta cuénta mé ndó ta nandicaní na nu naa ndo. Ta viti nú laá in tuhún yehe cuití va cája ña sáhdá ndo. Ta ndúcú na cahní na yehe”, já nacachi Elías xihín Ndióxi. <sup>4</sup> Ta já nacachi Ndióxi xihín dá: “A juú in tálaá yóho cája ña cuni jáchi ndúu yíi va usa mil taa cája ña cuni ta coo nacaxítí na nuú tñiñu yúu Baal”, nacachi Ndióxi xihín dá. <sup>5</sup> Quiahva já ín a viti. Ndúu chá na cája ña cuni Ndióxi jáchi nacaja Ndióxi ñamaní xihín ná ta nasacu ini a jácacu a na. <sup>6</sup> Nacaxi Ndióxi na jáchi natahvi ini a saha ná. Coó nasacuu a sahá ña nacaja na jáchi tá ná cacuu a sahá ña cája na já co cúu ga ñamaní Ndióxi ta ña yóho cúu ña cuni Ndióxi caja.

7 Ña cán quéa cuahá ndivaha ñayivi Israel coó nanduu ndaa na nu Ndióxi sahá ña ñacaja na jáchi nandaja táhyí na ínima ná. Joo na ñacaxi Ndióxi, na cán cúu na nanduu ndaa nu mé á. 8 Já cáhí tuhun Ndióxi já: “Co cúní na candúsa na Ndióxi sahá ña cán quéa ñasaji Ndióxi xíní túni ná chí in ndeé. Ta quiahva já ndaa na janda víti jáchi co cándaá ini na ña cáhan Ndióxi xihín ná.” 9 Já ñacahyí David sanahá: Ná cahán na ña cuahan vaha na ichí Ndióxi sahá cuahá ñaha cómi na, ta ná ndoho ini na sahá cuachi cája na.

10 Ta ná cuaá na já ná a cúní na, ta ná nditojo jata ná ní tiempo sahá ña vee ndójo na, ñacachi David.

### *Jácaçu Ndióxi na coó ñaquixi chichi Israel*

11 Ta viti ná ndaca tuhún i ndohó ña yoho: Á cáhán ndo ña a cuú cacu ndaa ínima na Israel. A juú ña ndaa cúu á. Jáchi vatí sáá ini na Israel ta vatí co cúní na candeé ini na Jesús joo xihín ña ñacaja na yoho ñanuna nuú na tóho cuni johu na tuhun vaha saha Jesús ta já cuu cacu ndaa ínima ná nu mé á. Ta sahá ña yoho casahá na Israel cahihvi ini na xihín na tóho. 12 Ñacaja Ndióxi cuahá ñamaní xihín tóco ndihi na tóho jáchi ñacaja ña ná cuu ndihvi na íchi cuéntá mé á sahá ña najándacoo na Israel íchi cuéntá mé á. Joo cuaha chága ñamaní caja Ndióxi xihín tóco ndihí tá ná xinu quivi ndiquehe na Israel íchi cuéntá mé á.

13 Joo ín in ñaha ña cúní cahan i xihín ndo, na tóho. Ndióxi quéa ñachindahá yehe tañu ndohó, na coó ñaquixi chichi Israel ta chuun cáhnu ndivaha quéa ndójo i xíní i. 14 Jáchi ña cúní mí i quéa ná cahihvi ini na Israel xihín ndo sahá tuhun Ndióxi ta já ná ndinducú mé ná Ndióxi já ná cacu ndaa ínima na Israel nu Ndióxi jáchi mé ná cúu ná chichi nuú ñaquixi mí i. 15 Ñasacu xóo tóo Ndióxi na ñaquixi chichi Israel jáchi ñasacu ini a jándique táhan maní á tóco ndihi ñayivi ndúu ñuyíví xihín mé á. Ta tá ná xinu quivi casahá na Israel ndiquehe na tuhun Ndióxi cacuu a in ñaha ñúchí ndivaha. Cacuu a tátuhun casahá nditacu tucu na jáchi viti cúu ná tátuhun na ñaxihí jáchi coó ñaxeén na ndiquehe na tuhun Ndióxi. 16 Abraham ñasacuu da cuéntá Ndióxi ña cán quéa jahyi

da, na ñacacu chichi da cúu ná ñayivi cuéntá Ndióxi. Abraham, da cúu cuéntá mé á cúu dá tátuhun yoho in yitó olivo. Ta ñayivi ñacacu chichi da cúu ná cuéntá mé á ta cúu ná tátuhun ndaha mé yitó olivo cán.

17 Cúu á tátuhun ñasahnda Ndióxi java ndaha, dó vaha ta ñachitivi ndaa mé á ndaha yitó olivo yúcu mé nuú ñasahin ndaha cán. Ta viti quiahva dó ndeé nu ndaha yitó olivo yúcu cán ña ná catacu dó. Quiahva já ñacaja Ndióxi ñasacu xóo a na Israel ta ñacaja mé á ñamaní xihín mé ndó, na tóho já ná nduu ndó cuéntá mé á. Ta viti cája Ndióxi cuahá ñamaní xihín ndo tá quiahva cája xihín na Israel. 18 Joo ndohó, na cúu na tóho a cáhán ndo ña vaha chága mé ndó a juú ga na Israel. Co ndítahan cahán ndo já. Co cúu ndó tátuhun yoho yitó jáchi cúu ndó tátuhun ndaha do. Ta tá co yoho dá já quéa a cúu catacu ndaha do. Sahá ña cán quéa co ndítahan caja cáhnu ndó mé ndó.

19 A váha cahvi ini ndó ña náhnu chága mé ndó nu Ndióxi a juú ga na Israel sahá ña ñasacu xóo mé á na Israel ta ñasuna a íchi nu ndohó candeé ini ndó mé á. 20 Candehe ndo. Ñasacu xóo Ndióxi na Israel sahá ña coó ñacandeé ini na mé á ta ñandacaxi a ndohó sahá ña candeé ini ndó mé á ña cán quéa co ndítahan caja cáhnu ndó mé ndó. Ña ndítahan caja ndó quéa cayihvi ndo Ndióxi. 21 Xíní ñúhú ndicuhun ini ndó ña cuu jácaxoo tucu Ndióxi ndohó. Coó ñatahnda ini a jándacoo xóo a na Israel, mé na ñacaxi á. Sahá ña cán quéa cachí ga ví mé ndó, na tóho ndaa náha caja Ndióxi cacu xóo tucu a ndohó. 22 Candehe ndo jáchi táhvi ini Ndióxi sahá ñayivi tá candeé ini na mé á joo cuhe ndivaha mé á xihín na sáá ini. Ña cán quéa tá co candeé ini ndó mé á ta ní co quihvi ini ndó a já cacu xóo a ndohó tá quiahva ñacaja xihín na Israel. 23 Joo tá ná ndihvi na Israel íchi Ndióxi candeé ini na mé á já quéa ndiquehe tucu Ndióxi na jáchi cuu caja mé á tóco ndihi ñaha. 24 Ñandiquehe Ndióxi ndohó vatí ñasanduu xicá ndó nu á ta nandaja mé á ndohó cuéntá mé á vatí cúu ndó na tóho. Mé ndó cúu ndó tátuhun ndaha yitó olivo, dó yúcu, dó ñachitivi ndaa Ndióxi tóco dó vaha. Ta ña yoho quéa a cúu coo já, nduu.

Joo ñacaja Ndióxi já xihín ndo. Ta ndáa náha cuu caja tucu Ndióxi xihín na Israel ña ndiquehe tucu a na ta cacu tucu a na nu ndahá yíto olivo, dó vaha nuú nasandaa na jihna.

### *Vaxi quivi tá candeé ini na Israel Jesús*

<sup>25</sup> Ñani mí i, na cúu cuénta Jesús. Cúni ña ná candaa ini ndó ña nasacu ini Ndióxi caja chága chí nuu já ná a cája cáhnu ndó mé ndó. Cuahá na Israel nandaja táhyi na ínimá ná ta co cúni na ndiquehe na tuhun Ndióxi. Joo tá sa nandiquehe ndihi na tóho, na nasacu ini Ndióxi jácacu a anda jávi casáha na Israel ndiquehe na tuhun Ndióxi. <sup>26</sup> Anda jávi cacu ndaa ínimá ndihi na Israel. Ta já cáhí tuhun Ndióxi sahá ña yóho:

Ñuu Sión quixi in da jácacu ñayivi Israel, na ña quixi chichi Jacob ná a cája ga na cuachi.

<sup>27</sup> Ta jándoo i cuachi ñacaja na, tá quiahva ñacachi i xihín ná caja i, cáhí Ndióxi.

<sup>28</sup> Tiempo viti cuahá ndivaha na Israel co cúni na tuhun vaha saha Jesús sahá ña cán quea co cúni na Ndióxi. Joo cája na ña yóho ña ná nuná nu ndóhó, na tóho já ná cuu candeé ini ndó Ndióxi. Vatí cája na Israel ña yóho joo quíhvi ini tá quíhvi ini Ndióxi na sahá tuhun nasahan nu tásáhnu jícó na.

<sup>29</sup> Tá sahan Ndióxi ña cáhí a quiahva nu yo já quea co ndímani mé á nuú tuhun a ta co ndícó coo a cándaa ña sahan nu yo. Ta ni co ndícó coo ini a tá sa nandacaxi a mí.

<sup>30</sup> Sáa nasahjin ini ndóhó, na tóho sanahá joo viti ñacaja mé á cuahá ñamani xihín ndó sahá ña sáa ini na Israel. <sup>31</sup> Ta vatí sáa ini na Israel viti joo xihín ña yóho núna nu ndóhó, na tóho ndiquehe ndó ñamani Ndióxi. Joo vaxi quivi tá tahvi ini Ndióxi sahá na Israel tá quiahva ñatahvi ini a saha ndóhó, na tóho. <sup>32</sup> Náchicaji Ndióxi xíní túni na Israel xihín na tóho ña ná nduu na na sáa ini. Ñacaja Ndióxi ña yóho já ná cuu tahvi in nuú ini a saha tóco ndihi ñayivi.

<sup>33</sup> Cáhnu ndivaha cúu tóco ndihi ñaha Ndióxi. Ndíhí ndivaha jiní mé á ta cándaa ini a tóco ndihi ñaha. Ni in ñayivi a cuú ndicani na ña cáhvi ini Ndióxi. Ta ni in na a cuú candaa ini ña cája Ndióxi. <sup>34</sup> Já cáhí

tuhun Ndióxi já: “Ni in ñayivi a cuú candaa ini na ña cáhvi ini Ndióxi. Ta ni in ñayivi a cuú jácahan na mé á caja ña ndítahan caja. <sup>35</sup> Coó ñayivi cája ñamani xihín Ndióxi ña ná ndaca na ña nu mé á”, cáhí tuhun Ndióxi. <sup>36</sup> Jáchi Ndióxi quea ñacavaha tóco ndihi ñaha ta ndúu a saha mé á ta ndúu a cuénta mé á. Anda ama cáa quivi ná caja cáhnu í Ndióxi. Já ná coo.

## 12

### *Tácú yo caja chúun í cuénta Ndióxi*

<sup>1</sup> Ñatahvi ini Ndióxi saha ndó, ñani mí i, na cúu cuénta Jesús. Sahá ña cán quea xíca tahvi i nu ndo ña ná ndiquiahva ndó mé ndó ndáha Ndióxi já ná cacuu a tátuhun joco ndó mé ndó nu Ndióxi. Ta caja ndó tóco ndihi ña cúni Ndióxi caja ndó ña ná cajii ini a. Jáchi xihín ña yóho náha ña mé a ndaa táhyi cája cáhnu ndó Ndióxi ta ña yóho cúu á ña ndítahan nu ndó caja ndó. <sup>2</sup> A cája ga ndó ña núu ña cája ñayivi ñuyiví. Quiahva ndó ñamani nu Ndióxi ña ná ndaja víi a xíní túni ndo. Anda jávi candaa ini ndó ña cúni mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cúni mé á xihín ndinuhu ini ndó.

<sup>3</sup> Ñacaja Ndióxi ñamani xihín i tá ñacaxi a yehe. Ña cán quea cáhan i xihín ndihi ndó ña co ndítahan cáhan ndo ña cúu ndó na náhnu ndivaha joo ná cahvi ini ndó ña ndaa saha mé va ndó. Ña ndítahan caja ndó quea coto ndojó ndo mé ndó jáchi nasacu ini Ndióxi ña ná candeé ini ndó mé á já ná cuu caja ndó ña cúni a. <sup>4</sup> Candehe ndó tá quiahva ín yiquí cuñu í. In túhún cúu yiquí cuñu í joo cuahá nuú ñaha ndáca ta sa jín sa jín chuun cája in in ña ndáca yiquí cuñu í. <sup>5</sup> Quiahva já ín tóco ndihí, na cúu cuénta Jesús. Sa jín sa jín chuun cája in in í joo in va cúu yo xihín Jesucristo. Ta sa jín sa jín chuun cája in in í.

<sup>6</sup> Sa jín sa jín chuun nasahan Ndióxi nuú in in í caja í ta mé á nasacu ini a ndá chuun quea quiahva nuú in in í. Sahá ña cán quea tá nasahan Ndióxi chuun nu ndó jáyaha ndó tuhun mé á nuú ñayivi, caja ndó ña xihín ndée mé á jáchi candeé ini ndó a. <sup>7</sup> Ta tá nasahan Ndióxi chuun nu ndó ña

na chindeé ndó ñayivi já quéa ndítahan nu ndó chindeé vaha ndó na. Ta tá nasahan Ndióxi chuun nu ndó jánaha ndó ñayivi já quéa ndítahan nu ndó jánaha vaha ndó na. <sup>8</sup>Tá ta nasacu Ndióxi ini ínimá ndo quiahva ndó tuhun ndeé ini na, caja ndó ña xihín ndinuhu ini ndó. Ta ndá ñaha jásá ndo nuú ñayivi xíní ñúhú cajii ini ndó jasá ndó ña. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóo chindeé ñayivi ná cajii ini ndó chindeé ndó na.

### *Ña ndítahan caja na cúu cuéntá Jesús*

<sup>9</sup>Xihín ndinuhu ini ndó quihvi ini táhan ndó. Candají ndó ña núu ta caja ndó ña vaha xihín ndinuhu ini ndó. <sup>10</sup>Xíní ñúhú quihvi ini ndó na cúu cuéntá Jesús jáchi cúu ná tátuhun na vehe ndó ta cajii ini ndó tá caja cáhnu táhan ndó.

<sup>11</sup>Nducú ndeé ndo ta a cácuu ndó na jusá ta xihín ndinuhu ini ndó caja chúun ndó cuéntá Ndióxi, xitoho í.

<sup>12</sup>Xíní ñúhú cajii ini ndó candatí ndó xinu coo tuhun nasahan Ndióxi nu ndo. Quiahva ndeé vaha ini ndó tá ndóho ini ndó ta a jándacoo ndó ña cacá tahví ndo nu Ndióxi.

<sup>13</sup>Ndá ñaha ndímani nuú java ga na cúu cuéntá Jesús ná chindeé ndó na. Ta ndiquehe vaha ndó ñayivi xito nihni ndohó.

<sup>14</sup>Cacá tahví ndo nu Ndióxi sahá na cája xíxi xihín ndo ña ná caja Ndióxi ñamani xihín ná. Cacá tahví ndo nu Ndióxi saha ná ta a chícaan ndó cháhan jata ná.

<sup>15</sup>Cajii ini ndó xihín na cájii ini ta cuacu ndó xihín na sácu.

<sup>16</sup>In nuú quihvi ini táhan ndó. A cája ichi ini ndó. Ña ndítahan caja ndó quéa jánuu ndáha ndó mé ndó xihín ñayivi ndáhví, na co ndíñehe jícó mé. Ta a cáhan ndo ña cúu ndó na ndíchí ndivaha.

<sup>17</sup>Tá cája núu na xihín ndó, a ndícó coo ndó caja ndó ña núu xihín ná. Joo nducú ndó quiahva caja ndó ña vaha já ná a cáhan núu ñayivi saha ndo. <sup>18</sup>A ndúcú ndo cani táhan ndó xihín ñayivi ta ndihí ini ndó coo vaha ndó xihín ndihi na. <sup>19</sup>Ñani mí i, na cúu cuéntá Jesús. Tá cája xíxi na xihín ndo a ndúcú ñehe toho ndó ña núu nu ná jáchi cojo

ini Ndióxi xihín na cája já ta ndítahan nu mé á jándoho a ini na. Já cáchi tuhun Ndióxi: “Yehe ndítahan nuú jándoho i ini ñayivi, na cája ña núu”, cáchi Ndióxi. <sup>20</sup>Vaha chága ná caja ndó ña cáchi tuhun Ndióxi: “Tá cuíco ñayivi, na co cúní ndohó quiahva ndó ná cuxu na. Ta tá ichi ini na co cúní ndohó quiahva ndó ticuii nu ná coho na. Tá ná caja ndó ña yóho já quéa cacahan nuú na cán sahá ña núu cája na xihín ndó.” <sup>21</sup>A quiahva ndó ñamani quee vaha ña quini xihín ndó. Ña ndítahan caja ndó quéa caja ndó ña vaha já ná cuu quee vaha ndó cahnu ndó ña quini.

## 13

<sup>1</sup>Xíní ñúhú coo johó ndó nuú ña cáhan na jutixia xihín ndo. Jáchi sahan Ndióxi ñamani nuú na cán cahnda na chuun nuú ñayivi. Tá mé Ndióxi quéa nasacu a na.

<sup>2</sup>Ta ndá na co cúní cuni johó nu sáhdá na jutixia cúu ná na sáji nuu nu Ndióxi jáchi Ndióxi quéa nasacu a na cán. Ta ndá na co cúní caja ña sáhdá na ndoho ini na.

<sup>3</sup>Jáchi coo nasacu Ndióxi na jutixia ña ná jáyihví na ñayivi, na cája ña vaha. Nasacu Ndióxi na ña ná jáyihví na ñayivi, na cája ña núu. Tá co cúní ndó cayihví ndo na jutixia xíní ñúhú caja ndó ña vaha já ná cajii ini na jutixia xihín ndo. <sup>4</sup>Nasacu Ndióxi na jutixia ña ná chindeé na ndohó. Joo tá cája ndó ña núu já quéa xíní ñúhú cayihví ndó na jáchi mé na cán cahnda na chuun ña ná chahvi ndó sahá ña núu cája ndó. Sahá ña cán nasacu Ndióxi na ña ná jándoho na ini na cája ña núu. <sup>5</sup>Ña cán quéa ndítahan nu ndó caja ndó ña sáhdá na jutixia já ná a jándoho na ini ndó jáchi sa náha mé va xíní túní yo cahan xohó ña xíní ñúhú candúsa í ña sáhdá na jutixia nu yo. <sup>6</sup>Sahá ña cán quéa chahvi ndó jjuhún cuéntá impuesto jáchi sa xíní ndó ña ndítahan nu ndó chahvi ndó ña. Na jutixia cája chúun na cuéntá Ndióxi tá cája na ña xihín ndinuhu ini na.

<sup>7</sup>Ndiquiahva ndó nuú ñayivi ña ndítahan nu ná ndiquehe na. Chahvi ndó impuesto nuú na jataca ña. Caja cáhnu ndó ñayivi, na ndítahan caja cáhnu ndó ta coo toní ñúhú ndó xihín na ndítahan coo toní ñúhú ndó xihín. <sup>8</sup>A cáyicá ndo ñaha nuú ni in ñayivi.

Ña ndíyicá ndo quéa quíhvi ini táhan ndó. Jáchí ndá na quíhvi ini ñayivi, na cán cúu na cája ña sáhdá ley Moisés. <sup>9</sup> Jáchí tá quíhvi ini ndó ñani táhan ndó já quéa a ndiáva ini ndó cajú ndó ña núu xihín na. Ta a cáhvi ini ndó coo ndó xihín ñájíhí ñani táhan ndó. Ta a cáhni ndó ndíi. Ta a cáhvi ini ndó cajú cuíhná ndo ñaha inga na. Ta ni a ndiáva ini ndó cacomí ndo ñaha cómi inga na. Tá quíhvi ini ndó ñani táhan ndó já quéa cúni cachi a ña cája ndó ña sáhdá ley Moisés tá cáhí a já: “Quíhvi ini ndó ñani táhan ndó tá quiahva quíhvi ini ndó mé ndó.” <sup>10</sup> Ndá na quíhvi ini ñani táhan, na cán cúu na cája vaha xihín ñani táhan na. Ña cán quéa tá quíhvi ini ñani táhan í já quéa jáxinu yó nuú ña sáhdá ley Moisés.

<sup>11</sup> Saha tóco ndihi ña cáhan í xihín ndo yóho xíní ñuhú candehé ndo ndá quiahva cáa tiempo ndúú viti. Xíní ñuhú ndicáxi vaha ini ndó cajú ndó ña cúni Ndióxi jáchi viti sa nacayati chága quívi jácacu Ndióxi mí a juú ga tá jacá nacandúsa í tuhun Ndióxi. <sup>12</sup> Cúu á tátuhun ja chá cúni vaha ñuu ta casáhá tivi yaa. Ña yóho cúni cachi a ña sa nacayati quívi quixi tucu Jesucristo. Ña cán quéa xíní ñuhú jándacoo í ña núu cája í tátuhun cája ñayivi xíca nuu naá. Ta xíní ñuhú cajú í ña vaha já quéa quee vaha í xihín ña núu. <sup>13</sup> Ndísáhnú ná coo iní cajú í tóco ndihi ñaha tátuhun cúu yó na ndúu nu yehe. A cácuú ñayivi xíhi ta ni a cája í vicó lándá ndivaha. Ta ni a cáca nuu jii yo xihín ñájíhí ñani táhan í ta a ndiáva iní coo í xihín najihí. Ta a ndúcú yo caní táhan í xihín ñani táhan í ta ni a cáhíhvi iní xihín ná. <sup>14</sup> Ña ndítahan cajú í quéa cacá chága yo ndée yo nu Jesucristo, xitoho í já ná cacuu a tátuhun candixí in jahmá caa ña sándixi da cáni táhan. Ta coto a quiahva ndó ñamaní nuú yiquí cuñu ndó cajú ña núu.

## 14

### *Có ndítahan candehé ndaa táhan í*

<sup>1</sup> Ndiqeehe vaha ndó na cúu cuéntá Jesús vatí co cánda vaha ini na ña jánaħa tuhun Ndióxi. Ta a cáni táhan yúħu ndó xihín ná sahá ña cándúsa na. <sup>2</sup> Ín java na cúu cuéntá Jesús cáhan na ña cuu cuxu na cuñu, ña najoco na nuú yoco. Joo java na cúu cuéntá

Jesús, na saá xihín tuhun Ndióxi cáhan na ña a cúu toho cuxu na cuñu, ña najoco na nuú yoco sahá ña cán quéa co xíxi na ña. <sup>3</sup> Na xíxi mé cuñu cán co ndítahan nu ná candehé ndaa na na co xíxi ña ta na co xíxi cuñu cán co ndítahan nu ná candehé ndaa na na xíxi ña. Jáchí ndíqeehe vaha Ndióxi ndíví na cán vatí sa jii cáhan na. <sup>4</sup> Ta quiahva já co ndítahan nu ndó candehé ndaa ndó mozo ñani táhan ndó á cája vaha da á co cája vaha da nuú xitoho da. Vaha ri cajú vaha da tá vaha ri co cája vaha da jáchi mé va xitoho da cán xíní sahá ña cán. Joo cuu cajú Ndióxi ña ná candoo vaha mozo cán nuú xitoho da.

<sup>5</sup> Java ñayivi cáhí na ña ín quívi náhnú chága nuú java ga quívi. Ta java na cáhí na ña in cúu tóco ndihi quívi. Ta ndítahan nuú in in na caxi na ña cáhvi ini na sahá ña yóho.

<sup>6</sup> Tá sácú ini na caxi na in quívi cajú cáhnú na Ndióxi ta vaha va cája na. Ta tá cáhan na cuu cajú cáhnú na Ndióxi ndá quívi nacuu va ta vaha ri já va. Ta vatí xíxi na cuñu, ña sa najoco na nuú yoco á co xíxi toho na ña joo ndíquiahva na ndixahvi nu Ndióxi sahá ta xihín ña yóho cája cáhnú na mé á.

<sup>7</sup> Ni in yó co tácu saħa mí ta ni in yó co xíhi saħa mí. <sup>8</sup> Ta tá tácu yo á tá naxihí yo mé a ndaa cúu yó na cómi Ndióxi cuéntá saħa ta cúu mé á xitoho í. <sup>9</sup> Sahá ña cán quéa naxihí Jesucristo ta nanditacu tucu a já nanduu a xitoho ñayivi, na tácu xihín na sa naxihí.

<sup>10</sup> Ña cán quéa a váha toho cája ndó tá sándehe ndaa ndó ñani táhan ndó. A váha cajú ndó candají ndó na jáchi vaxi quívi ndique táhan ndihí candita í nu Ndióxi ña cajú víi a saħa yo. <sup>11</sup> Jáchí já cáhí tuhun Ndióxi já:

Yóho ín í cáhí í xihín ndo ña xinu quívi ndica xítí tóco ndihi ñayivi nuú í, ta casáhá na cajú cáhnú na yehe, ña cúu Ndióxi, cáhí Ndióxi, xitoho í.

<sup>12</sup> Jáchí ndítahan nuú in in í ndiquiahva í cuéntá sahá ña nacaja í nu Ndióxi.

*A cája ndó ñaha ña cuu jándicava ñayivi nuú cuachi*

<sup>13</sup> Sahá ña cán quéa co ndítahan candehé ndaa táhan í. A cácu ini ndó cajú ndó ñaha, ña cuu jándacava na cúu cuéntá Jesús nuú cuachi ta já ná jándacoo na ña cándeé ini

na Ndióxi. <sup>14</sup> Sahá ña cándeé ini i Jesús, xitoho i sahá ña cán quéa cándaá vaha ini i ña co cája i cuachi tá xíxi i ña najoco na nuú yoco. Joo tá ndúu na cáhán ña a váha toho cuxu na ña já quéa co ndítahan cuxu na ña jáchi cuu candojo na cuachi sahá tá ná cuxu na ña. <sup>15</sup> Joo tá ndíhivi ñanún, na cúu cuéntá Jesús sahá ñaha xísún já quéa cúni cachi a ña cándajún na. Cuéntá coún ná a cájún ña ndicava na cán nuú cuachi sahá ña xísún jáchi cúu ná na naxihí Jesucristo saha. <sup>16</sup> Vatí cándaá ini ndó ña cuu cuxu ndó ña najoco na nuú yoco joo a cúxu toho ndó ña tá ná cahan núu ñayivi sahá ña cája ndó. <sup>17</sup> Jáchi a juú sahá ña xíxi ni sahá ña xíhí cacomí Ndióxi cuéntá saha yo. Ña cúni Ndióxi caja í quéa ná canduu ndaa yo nu mé á ta ná coo vaha ini xihín ñayivi ta ná cajii ini. Tóco ndihi ña yóho cúu á ña quixi nu ínimá yii Ndióxi. <sup>18</sup> Tá ná caja ndó ña yóho já quéa caja cáhnu ndó Jesucristo ta cajii ini Ndióxi caja ndó ta candoo vaha ndó nuú ñayivi.

<sup>19</sup> Ña cán quéa xíní ñúhú ndinducú yo tóco ndihi ñaha, ña cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi. <sup>20</sup> Nasacu ini Ndióxi jácaacu a ñayivi sahá ña cán quéa coto a cáji nuu ndó nuú ña cúni Ndióxi caja sahá ñaha xíxi ndó. Mé a ndaa tóco ndihi ñaha cúu á ña vaha cuxú. Ña co váha quéa jándacava í ñayivi nuú cuachi sahá ña xíxi. <sup>21</sup> Vaha chága ná a cúxu ndó cuñu ta ni a cóho ndó vino ta ni a cája ndó inga ñaha ña cuu jándacava ñani táhan ndó nuú cuachi. <sup>22</sup> Tá ta cándaá cáxi ini ndó ña co cája ndó cuachi nu Ndióxi, a ndícani ndó ña nuú java ga ñayivi. Jáchi tahví ñacuu ñayivi tá xíní na co cája na cuachi nu Ndióxi. <sup>23</sup> Joo ndá na ndúcú cuxu in ñaha ta cáhvi ivi joho ini na xihín á tá xíxi na ña já quéa xínu cuachi jatá ná. Jáchi ndá ñaha ñacuu ná caja í ta tá ta cándúsa yó ña cúu á cuachi já quéa xínu a cacuu a cuachi nu yo.

## 15

### *Chindeé ndó na cáhvi ivi joho ini*

<sup>1</sup> Tá ndacú cuahan yó xihín tuhun Ndióxi já quéa co ndítahan cacu xóo í na vitá xihín tuhun Ndióxi. A ndúcú ndo caja ndó ña

jándivaha ini mé cuití va ndó. <sup>2</sup> Tóco ndihi xíní ñúhú caja í ñaha ña táhan ini ñani táhan í xihín. Ta xíní ñúhú caja í ña já ná chindeé yó na ña ná canduu vaha na ta já ná cuu cuahnu chága na xihín tuhun Ndióxi. <sup>3</sup> Jáchi mé Jesucristo coo ñanducú a caja ña táhan ini mé cuití a. Ña ñacaja mé á quéa najaxinu coo a nuú tuhun Ndióxi tá ñacachi a já: “Tuhun núu ña najácana na nu mé ndó naxinu ri a jatá yehe viti.” <sup>4</sup> Tóco ndihi ña ñacahyi nuú tuhun Ndióxi sanahá ñacahyi a já ná jánaña nu yo ña co ndítahan ndicani ini. Ta, náha ña ndítahan quiahva tuhun ndeé ini ñani ndátí jáxinu Ndióxi tuhun ñasahan nu yo. <sup>5</sup> Ndióxi quéa sahan ndeé nu yo ña ná coo cáhnu ini ta sa mé á sahan tuhun ndeé ini. Ña cúni Ndióxi quéa chindeé a ndohó caja ndó tá quiahva ñacaja Jesucristo ta já in ná nduu xihín táhan ndó. <sup>6</sup> Ta já in ná jándique táhan ndihí caja cáhnu í Ndióxi, mé a cúu tátá Jesucristo, xitoho í.

### *Xíni joho na coo ñaquixi chichi Israel tuhun vaha saha Jesús*

<sup>7</sup> Ndiqhehe vaha ndó tóco ndihi na cúu cuéntá Jesús tá quiahva ñandiquehe vaha Jesucristo ndohó já ná ndicáhnu Ndióxi. <sup>8</sup> Ndítahan ndicuhun ini ndó ña ñaquixi Jesucristo chindeé a ñayivi Israel. Ta ñaquixi a jánaña nu ná ña mé a ndaa táhyí jáxinu coo Ndióxi tóco ndihi nuú tuhun ña ñasahan nuú tásáhnu jícó yo jáchi co ndímaní Ndióxi nuú tuhun a. <sup>9</sup> Ta ñaquixi a jácaacu a ñayivi, na coo ñaquixi chichi Israel ña ná caja cáhnu na mé á sahá ñamaní ñacaja mé á xihín ná. Jáchi já cáhí tuhun Ndióxi:

Yehe xihín na coo ñaquixi chichi Israel caja cáhnu nde ndohó, Ndióxi,

ta yehe cata i nu ndo caja cáhnu i quivi ndo.

<sup>10</sup> Ta íin inga tucu nu cáhí a já:

Ndohó, na coo ñaquixi chichi Israel xíní ñúhú ndique táhan ndó cajii ini ndó xihín na ñaquixi chichi Israel.

<sup>11</sup> Anda já ñacachi tucu a já:

Tóco ndihi ndó, na coo ñaquixi chichi Israel caja cáhnu ndó Ndióxi, xitoho í, ta ná a jándacoo toho ndihi ñayivi caja cáhnu na Ndióxi.

12 Tá naçahyí Isaías nuú tuhun Ndióxi já naçahyí da tuhun yóho:

Vaxi quivi cacu in da chichi Isái,  
ña ná cacomí da cuéntá sahá ñayivi, na coó  
naquixi chichi Israel.

Ta mé ñayivi yóho candeé ini na mé da  
quixi chichi Isái cán.

13 Ndióxi quéa cája ña ná candeé ini ndó  
mé á ta já cuu jácacu a ndohó. Ná caja mé  
á ña ná ndicutú ini ndó xihín ña cájii ini  
ndó ta ná caja mé á ña ná coo vaha ini ndó  
jáchi candeé ini ndó a. Xihín ndée ínima yii  
Ndióxi ná quiahva mé á cuaha ndée nu ndó  
candeé chága ini ndó a.

14 Cándehé ndó ñani i, na cúu cuéntá  
Jesús. Sa xini vaha i ña nachutú ndo xihín  
ña vaha ta cándaã vaha ini ndó tuhun  
Ndióxi. Ta xihín ña jan cuu jánaã táhan  
ndó. 15 Joo tá naçahyí i carta yóho nu ndo  
já naçaja ndeé ini i cáhyi i saha java ñaha  
jáchi co cuni ña ná ndindójó ndo ña. Cáhyi  
i ña yóho jáchi naçaja Ndióxi ñamanj xihín i  
16 cája chúun i cuéntá Jesucristo cáxi tuhun  
i tuhun vaha saha mé á nuú ñayivi, na coó  
naquixi chichi Israel. Ta cúu u tátuhun jutú  
jáchi xica i cáhan i tuhun Ndióxi xihín ná já  
ná cuu cacu ndaa ínima ná. Cúu á tátuhun  
jóco i na nu Ndióxi já ná cajii ini mé á xihín  
ná ta já ná cuu ndaja ínima yii mé á ña ná  
nduu na ñayivi vii nu mé á.

17 Ta sahá ña cándusa i Jesucristo sahá ña  
cán quéa ndivaha ini i caja chúun i cuéntá  
Ndióxi. 18 Jáchi sahan ndeé ini i cáhan i sahá  
ña naçaja Jesucristo tá naçaja chúun mé á  
yehe ña candaca i na coó naquixi chichi  
Israel ña ná caja na ña cuni Ndióxi. Ta  
sahá ña naçahan i xihín na cán já naxini  
joho na ta naçaja na ña cáchi tuhun Ndióxi.  
19 Ta sa naxini na ña xituhún xihín ña náhnu  
ndivaha naçaja i nu ná xihín ndée ínima  
yii Ndióxi. Ta quiahva já naçaxi tuhun  
i tuhun vaha saha Jesucristo nuú ñayivi  
ndúu ñuu Jerusalén xihín nu tóco ndihi na  
ndúu ndijáá ñuu anda estado Ilírico. 20 Ña  
ndúcú u caja i quéa cáhan i xihín ñayivi ña  
cuni Ndióxi jácacu a na. Ta sá cáhan i ña  
yóho nuú ñayivi, na a ñaha cuni joho saha  
Jesucristo jáchi co cuni ndiquehe e chuun ña  
sa najácava sahá inga na. 21 Cáhyi ini i ña  
vaha chága ná cuhun i nuú ñayivi, na coó

naxini joho tuhun vaha saha Jesús jáchi já  
cáchi tuhun Ndióxi já:

Vatí coó naxini joho na tuhun vaha saha  
mé á joo vaxi quivi xinu coo na  
cáhan xihín ná,

ña ná cándaã ini na ña coó naçandaã ini na  
jihna, cáchi tuhun Ndióxi.

### *Sácú ini Pablo cuhun da ñuu Roma*

22 Ta sahá chuun cája i yóho coó naçuu  
saa i coto nihni i ndohó vatí sa cuahá tañu  
nasacu ini i saa i jan. 23 Joo viti sa najándihi  
i chuun naçaja i tañu ñayivi ndúu yóho.  
Ta sa cáhyi ini i saa i coto nihni i ndohó  
anda sanahá. 24 Sahá ña cán quéa sácú  
ini i saa i coto nihni i ndohó tá ná yaha i  
cuhun i chí España. Ta tá ná ndihi cajii ini i  
cuni i ndohó anda jáví ndiquehe tucu u íchi  
cuhun i. Joo cuni ña ná chindeé ndó yehe  
já ná cuu ndiquehe tucu u íchi cuhun i.  
25 Joo viti cuhun i chí ñuu Jerusalén chindeé  
na cúu cuéntá Jesús ndúu cán. 26 Jáchi na  
cúu cuéntá Jesús ndúu estado Macedonia  
xihín na ndúu estado Acaya nasacu ini na  
játaca na jihún ta chindahá na ña nuú na  
cúu cuéntá Jesús, na cándahví ndúu ñuu  
Jerusalén. 27 Mé na tóho yóho nasacu ini  
na caja na ña ta vaha cája na jáchi cáhan  
na ña ndítahan nu ná chahvi na sahá ña  
naçaja na Israel, mé na cúu cuéntá Jesús  
ndúu ñuu Jerusalén xihín ná. Jáchi nasahan  
na Israel naçaxi tuhun na tuhun vaha saha  
Jesús nu ná. Ta viti ndúcú ñehe na tóho yóho  
ñamanj naçaja na Israel xihín ná. Ña cán  
quéa chindeé ñahá na toho xihín ña cómi  
na. 28 Ta tá sa najándihi i caja i chuun  
yóho ta tá sa nandihí ndiquiahva i jihún  
nataca na tóho nuú na cúu cuéntá Jesús  
ndúu ñuu Jerusalén anda já nuná nuú i  
cuhun i España ta já yaha i jan coto nihni  
i ndohó. 29 Ta xini vaha i ña tá ná saa i  
jan caja Jesucristo cuahá ñamanj xihín ndo  
sahá tuhun vaha cáhan i xihín ndo.

30 Xica tahví i nu ndo ñani mí i, na cúu  
cuéntá Jesús, ña in nuú ná caça tahví yo nu  
Ndióxi sahá chuun cája i. Jáchi candeé ini  
ndó Jesucristo ta quihvi ini ndo yehe naçaja  
ínima yii Ndióxi. 31 Caça tahví ndo nu á  
ña ná chindeé a yehe ná a cája ñayivi, na  
co cándusa Ndióxi ndúu estado Judea ni in  
ñaha xihín i. Ta caça tahví ndo nu Ndióxi

ña ná candúsa na cúu cuéntá Jesús ndúu ñuu Jerusalén cán ndiquehe vaha na jiuhún ñéhe cuahan i nu ná. <sup>32</sup> Já queá tá ná cúní Ndióxi já caji ini i saá i coto nihni i ndohó ta ndiquehe ndeé e nani xíto nihni i ndohó. <sup>33</sup> Ndióxi ná coo xihín ndo ta ná caja mé á ña ná coo vaha ini ndó. Já ná coo.

## 16

*Chíndahá Pablo Ndióxi coo na ndúu ñuu Roma*

<sup>1</sup> Já chá va casaá ñá naní Febe, ñá cúu cuéntá Jesús nu ndo. Mé Febe yóho ñacaja chúun ñá veñuhu Cencrea. <sup>2</sup> Caja ndó ñamaní ndiquehe vaha ndó ña sahá ña cúu ñá cuéntá Jesús, xitoho í ta já ndítahan caja na cándéé ini Jesús. Chindeé ndó ña yóho xihín ndihi ñaha ña cámaní nu ña jáchi nachindeé ña cuahá ndivaha ñayivi ta nachindeé ri ña yehe va.

<sup>3</sup> Chíndahá i Ndióxi coo Priscila xihín Aquila jáchi in cúu ná xihín i cája chúun na cuéntá Jesucristo. <sup>4</sup> Mé na yóho ñasahin tiahva na quivi na já ná cuu cacu yehe tá ñaquixi tondóhó nuú i. Ta a juú in túhún yehe ndiquiahva ndixahvi nu ná vaha. Tóco ndihi na cúu cuéntá Jesús, na coo ñaquixi chichi Israel ndiquiahva na ndixahvi nu ná. <sup>5</sup> Ta jári chíndahá i Ndióxi coo na cúu cuéntá Jesús, na ndique táhan vehe Priscila xihín Aquila. Ta cahan Ndióxi ndó xihín Epeneto jáchi quíhvi ndivaha ini i da. Mé dá ñasacuu da nu cuítí ñandihvi íchi cuéntá Jesús estado Acaya. <sup>6</sup> Ta cahan Ndióxi ndó xihín María, ña chindeé cuahá ndohó. <sup>7</sup> Ta chíndahá i Ndióxi coo Andrónico xihín Junias. Ndíví da yóho cúu dá da ñaquixi chichi nuú ñaquixi mí i. Ta in ñasañuhu nde vecaa xihín dá. Ta cúu dá da ñahnu tañu na apóstol. Ta jihna ñúhú ndíví mé da yóho ñacasahá cándúsa da Jesucristo a juú ga yehe.

<sup>8</sup> Ta cahan Ndióxi ndó xihín Amplias jáchi quíhvi ndivaha ini i da. Ta in cúu nde cuéntá Jesús. <sup>9</sup> Ta chíndahá i Ndióxi coo Urbano. In cúu mé dá xihín nde cája chúun da xihín nde cuéntá Jesucristo. Ta chíndahá i Ndióxi coo Estaquis, da quíhvi ndivaha ini i. <sup>10</sup> Ta chíndahá i Ndióxi coo Apeles jáchi cuahá tañu najánaha da nuú ñayivi ña mé a ndaa táhyí cándéé cáhnu ini da Jesucristo.

Ta quiahva já chíndahá i Ndióxi coo na vehe Aristóbulo. <sup>11</sup> Ta cahan Ndióxi ndó xihín Herodión jáchi in ñaquixi nde chichi Israel. Ta cahan Ndióxi ndó xihín na vehe Narciso jáchi cándúsa na Jesús, xitoho í. <sup>12</sup> Ta cahan Ndióxi ndó xihín Trifena ta xihín Trifosa, na cája chúun cuéntá Jesucristo, xitoho í. Ta cahan Ndióxi ndó xihín Pérsida, jáchi quíhvi ndivaha ini i ña ta cuahá ndivaha ñacaja chúun ña cuéntá Jesucristo, xitoho í. <sup>13</sup> Ta cahan Ndióxi ndó xihín Rufo jáchi cúu dá da cáhnu ndivaha tañu na cúu cuéntá Jesús. Ta cahan Ndióxi ndó xihín náná da jáchi cúu ña tátuhun náná mí i viti. <sup>14</sup> Ta chíndahá i Ndióxi coo Asíncrito xihín Flegonte xihín Hermas xihín Patrobas xihín Hermes. Ta chíndahá i Ndióxi coo tóco ndihi na cúu cuéntá Jesús ndúu xihín na cán. <sup>15</sup> Ta cahan Ndióxi ndó xihín Filólogo xihín Julia xihín Nereo ta xihín quiahva da. Ta cahan Ndióxi ndó xihín Olimpás ta xihín tóco ndihi na cúu cuéntá Jesús ndúu xihín na cán.

<sup>16</sup> Ña cúní queá ná cahan Ndióxi xihín táhan ndó ta ná tatí yúhu táhan ndó ta yíi caja ndó ña. Tóco ndihi na cúu cuéntá Jesús, na táca veñuhu yóho chíndahá na Ndióxi coo ndihi ndó.

<sup>17</sup> Cándehé ndó ñani mí i, na cúu cuéntá Jesús. Xíca tahví i nu ndo ña ná coo cuéntá ndó xihín na catóo ndicahnda ñayivi, na cúu cuéntá Jesús jáchi sáji nuu na nuú na cája ña cúní Ndióxi. Ña cája na ñan queá cáxoo na nuú ña najánaha nde nu ndo. Coto a catáhan ndó xihín ná. <sup>18</sup> Jáchi mé na yóho co cúu ná na cája chúun cuéntá Jesucristo, xitoho í. Ña cája na queá ndúcú na ña vaha mé cuití va na. Ta xihín tuhun ñúchí ta xihín tuhun víi jándahvi na ñayivi, na co tácu vaha ini. <sup>19</sup> Tóco ndihi ñayivi xíní na ña cája ndó ña cúní Ndióxi ña cán queá caji ndivaha ini i. Ña cúní queá ná ñaha ndó ña ndíchí jini ndo xihín ña vaha cája ndó. Ta a cáñuhu ini ndó caja ndó ña núu. <sup>20</sup> Yachi chá jándihi Ndióxi sahá Satanás, rí cúu tiñahá sacuaña ta já cuu cañu ndó ri xihín ndeé Ndióxi. Cacuu a tátuhun chiníhni saha ndó ri. Ná caja Ndióxi ña ná coo vaha ini ndó. Ta ná caja cuahá Jesucristo, xitoho í ñamaní xihín ndihi ndo.



<sup>21</sup> Chíndahá Timoteo Ndióxi coo ndó ta in cúú dá cája chúun da xihín i. Ta chíndahá ri Lucio xihín Jasón xihín Sosípater Ndióxi coo ndó. Tóco ndihi da yóho naquixi da chichi Israel nuú naquixi mí i.

<sup>22</sup> Yehe naní Tercio ta cáhyí i carta yóho ta chíndahá ri yehe va Ndióxi coo ndó cuéntá Jesucristo, xitoho í.

<sup>23</sup> Chíndahá Gayo Ndióxi coo ndó. Vehe mé dá ín i ta sa mé yóho táca na cúú cuéntá Jesús. Ta chíndahá ri da naní Erasto Ndióxi coo ndó. Mé Erasto cómi da cuéntá sahá jjuhún ñuu yóho. Ta chíndahá ri Cuarto, da cúú cuéntá Jesús Ndióxi coo ndó.

<sup>24</sup> Ná caja cuahá Jesucristo, xitoho í ñamaní xihín ndihi ndó. Já ná coo.

#### *Cája cáhnu Pablo Ndióxi*

<sup>25</sup> Coho caja cáhnu í Ndióxi jáchi mé á cuu ndaja ndacú a ndohó xihín tuhun vaha saha Jesús ña jánaha nde nu ndo. Anda sanahá tá cámani cava sahá saha ñuyíví nasacu ini Ndióxi jácaacu a ndohó ta viti naxinu quíví jánaha mé á ña nu ndo. Nahá ndivaha nasahin jehé tuhun vaha saha Jesús. <sup>26</sup> Ta viti cándaá iní ña nacahan Ndióxi saha Jesús nuú na profeta ta na yóho nacahyí na ña nuú tutu. Ta nasahnda Ndióxi chuun nuú na cúú cuéntá mé á ña ná cuhun na caxi tuhun na ña nu tóco ndihi ñayivi ndúu ñuyíví. Ta xihín mé ña yóho nacaja Ndióxi ña ná cuu candeé ini ñayivi mé á ta já ná caja na ña cúni a, mé a tácu anda ama cáa quívi.

<sup>27</sup> Ta mé cuití va cúú Ndióxi ta mé cuití va ndichí jiní sahá ña cán queá ndítahan caja cáhnu yó a anda ama cáa quívi sahá ña nacaja Jesucristo, xitoho í. Já ná coo.

## Carta nu cuití nacahyí Pablo nuú na cúu cuéntá Jesús ndúu ñuu Corinto

*Cáhan Ndióxi Pablo xihín na cúu cuéntá  
Jesús ndúu ñuu Corinto*

<sup>1</sup> Yehe cúu Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani Sóstenes <sup>2</sup> chindahá nde Ndióxi coo ndó, na cúu cuéntá Jesús ndúu ñuu Corinto jan jáchi in cúu ndó xihín Jesucristo. Mé Ndióxi nacaxi a ndohó cacuu ndó ñayivi yí, na nandiquiahva mé ná ndáha mé á. Ta quiahva já nacaxi ri a java ga na ndúu ndijáá ñuu cacuu na cuéntá mé á, na cája cáhnu Jesucristo, xitoho í jáchi cúu ri a xitoho mé ná. <sup>3</sup> Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

*Ñamaní cája Ndióxi xoho sahá ña cándeé  
iní Jesucristo*

<sup>4</sup> Níi tiempo ndíquiahva i ndixahvi nu Ndióxi jáchi nacaja mé á cuahá ñamaní xihín ndo sahá ña cándeé ini ndó Jesucristo. <sup>5</sup> Ta sahá ña in nanduu ndó xihín mé á sahá ña cán queá nacaja Ndióxi cuahá ñamaní xihín ndo já ná cuu cahán vaha ndó sahá mé á. Ta já nasuná a xíní túni ndo já ná candaa vaha ini ndó sahá mé á. <sup>6</sup> Ta ña nacachi i xihín ndó sahá Jesucristo naxinu a ini ndó ta viti cája ndó ña cúní mé á caja ndó. <sup>7</sup> Ta viti nani ndáti ndó quiví quixi tucu Jesucristo, xitoho í ñuyiví yóho ni in túhún toho ñaha a ndímaní nu ndo ña ná caja ndó ña cúní Ndióxi jáchi nasahan mé á tóco ndihi ñaha nu ndo. <sup>8</sup> Mé Ndióxi chindeé a ndohó já ná caca tuun ndó íchi cuéntá mé á janda quiví nu ndíhí. Ta já ná a cúu chícáan ñayivi cuachi jata ndo tá ná xinu coo quiví quixi tucu Jesucristo, xitoho í ñuyiví yóho. <sup>9</sup> Jáchi cája tá cája Ndióxi ña sahan mé á tuhun a caja. Ta mé á queá nacaxi a mí ña ná in cacuu xihín Jesucristo, xitoho í ña cúu in túhún jiní já jahyi mé á.

*Tává xoo java na cúu cuéntá Jesús mé ná*

<sup>10</sup> Candehé ndo, ñani mí i, na cúu cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan víi tuhun ndihi ndó ta a cáhndá táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jiní ndihi ndó. <sup>11</sup> Candehé ndo, ñani mí i, na cúu cuéntá Jesús. Cáhan i ña yóho xihín ndo jáchi nacaxi tuhun na vehe Cloé xihín i ña ndaja mé ndó cáni táhan ndó. <sup>12</sup> Jáchi nañehé e tuhun ña java ndó cáchi ndo ña cúu ndó cuéntá yehe, da cúu Pablo. Ta java ndó cáchi ndo ña cúu ndó cuéntá Apolos. Ta java ndó cáchi ndo cúu ndó cuéntá Pedro. Ta java ndó cáchi ndo cúu ndó cuéntá Jesucristo. <sup>13</sup> Ta xihín ña yóho ña cája ndó queá sáhndá java táhan ndó. Candehé ndo. Coó naxihí i, da cúu Pablo ndica crúxu saha ndo já ná jácacu u ndohó. Ta ni coó nacandúta ndó cuéntá mí i. <sup>14</sup> Ndixahvi Ndióxi coó najácandúta i ndohó. Jáchi ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihín Gayo cuití va. <sup>15</sup> Ña cán queá ni in túhún ndó a cúu cachi ndó ña nacandúta ndó cuéntá mí i jáchi coó najácandúta toho i ndohó. <sup>16</sup> Ta ndícuñun ini i ña najácandúta ri na vehe Estéfanos. Na yóho cuití cúu na ñúhu ini i najácandúta i. <sup>17</sup> Jáchi coó nachindahá toho Jesucristo yehe ña ná caca nuu i jácandúta i ñayivi. Nachindahá mé á yehe ña ná caca nuu i cahán i tuhun vaha saha mé á xihín ñayivi já ná cuu cacu ndaa ínima ná. Ta coó toho tuhun ndíhí cáhan i xihín ná jáchi co cúní jánuu ndáha i xihín tuhun cahán i yóho tóco ndihi ña nacaja Jesucristo tá naxihí a ndica crúxu saha yo.

*Ndíhí jiní Jesucristo ta ún ndéé mé á quíxi  
nu Ndióxi*

<sup>18</sup> Ñayivi, na xíca cuahán ndihi saha ná ini indayá, mé na cán cáhán na ña cúu yó na tachí tá cahán yó ña naxihí Jesucristo ndica crúxu já ná cacu ndaa ínima ná. Joo nu mí, na nasacu ini Ndióxi jácacu a cávatá yo cándaa iní ña xihín ndéé Ndióxi naxinu tuhun mé á nu yo. <sup>19</sup> Já cáchi tuhun Ndióxi já:

Jándihi i sahá ña ndíhí jiní ñayivi ñuyiví,

ta a quéhe e cuénta sahá ña cánda ini ñayivi, já nacahyi a nuú tuhun Ndióxi.

<sup>20</sup> Sahá ña cán quéa coó saha toho ñaha ñuyiví yóho nu Ndióxi vatí da ndíchí jini xihín da tácu ini cáhán da ña cúu dá da ndíchí ndivaha sahá ña xini da cahan da sahá ñaha ñuyiví yóho. Joo nacaja Ndióxi ña ná cacuu a ña coó saha. <sup>21</sup> Sahá ña ndíchí jini Ndióxi, co cúni mé á ña ná cuu candaa ini ñayivi saha mé á xihín ña ndíchí quixi jini ñayivi ñuyiví. Ña nacaja mé á quéa nachindahá a java ñayivi ña ná cahan na tuhun vaha saha mé á já quéa ndá na cándusa ña ta cándeé ini na Ndióxi já cuu cacu ndaa ínima ná. Ta ña yóho cúu á in ña tachí ndivaha nuú ñayivi ñuyiví.

<sup>22</sup> Jáchí ñayivi Israel cáhí na ña ndúsa cuni na ña xituhún ndivaha já cuu candúsa na tuhun vaha saha Jesús. Ta na tóho, na ñuu Grecia cúni na ña ná cahan ndíchí ndivaha ñayivi xihín ná já cuu candúsa na ña. <sup>23</sup> Joo mé nde xica nuu nde cáxi tuhun nde nuú ñayivi sahá Jesucristo, mé a naxihí ndica crúxu sahá ñayivi. Joo tá xini johó na Israel ña yóho já ndíhíhvi na. Ta tá xini johó na tóho ña yóho já cáhán na ña cúu á ña tóntó ndivaha. <sup>24</sup> Joo tóco ndihi na nacaxi Ndióxi cacuu na cuénta mé á, á cúu ná na tóho á cúu ná na Israel, cánda ini na ña cahan nde sahá Jesucristo, ña ín ndée mé á jácacu a ñayivi. Ta xini vaha na ña ndíchí ndivaha jini mé á nacaja Ndióxi. <sup>25</sup> Nuú ñayivi ñuyiví ña cája Ndióxi cúu á ña tóntó ndivaha. Joo ña cája Ndióxi cúu á ña ndíchí chága nu ndíhi ñaha cája ñayivi ñuyiví. Ta vatí cáhí ñayivi ña co ndíyahvi ña naxihí Jesucristo ndica crúxu joo yahvi chága ña yóho a juú ga inga ñaha cuu caja ñayivi. <sup>26</sup> Candehé ndo, ñani i, na cúu cuénta Jesús. Nacaxi Ndióxi ndohó cacuu ndó cuénta mé á vatí chá cuití ndó cúu ndó na ndíchí jini nuú ñayivi ñuyiví. Ta chá ndó cúu ndó na náhnu nuú ñayivi ta chá cuití ndo cúu ndó na cuicá. <sup>27</sup> Joo nacaxi Ndióxi ñayivi, na cáhí ñayivi ñuyiví cúu ná na tóntó jini já quéa ná cacahan nuú na ndíchí jini. Mé Ndióxi nacaxi a ñayivi vitá ná cacuu na cuénta mé á já ná cacahan nuú na náhnu ndúu ñuyiví yóho. <sup>28</sup> Ñayivi, na coó saha

ñuyiví yóho, na quéhe núu ñayivi saha, na cán cúu na nacaxi Ndióxi. Ta nacaxi a na co ndáyahvi toho ñuyiví yóho ña ná nuu ndáha na náhnu cuénta ñuyiví yóho. <sup>29</sup> Ta xihín ña yóho cánda ini ñayivi ña a cúu ndiñehe jícó na mé ná nu Ndióxi. <sup>30</sup> Mé Ndióxi quéa nacaja ña ná in nduú xihín Jesucristo. Ta nacaja mé á ña ná ndindíchí jini yo. Ta nacaja mé á ña ná canduu ndaa yó nu Ndióxi. Nacaja mé á ña ná nduú ñayivi yii, na cúu cuénta mé á. Ta mé á najácacu a mí nuú cuachi. <sup>31</sup> Ta já cáhí tuhun Ndióxi já: “Ndá na cúni caja lánda, xini ñúhú caja lánda na sahá ña náhnu nacaja Ndióxi saha ná.”

## 2

*Cáxi tuhun Pablo ña naxihí Jesucristo ndica crúxu sahá cuachi ñayivi*

<sup>1</sup> Candehé ndó, ñani i, na cúu cuénta Jesús. Tá nasahan i nacahan i ña ndaa cuénta Ndióxi nu ndo, coó nacahan i ña xihín tuhun ndíchí ñuyiví yóho. <sup>2</sup> Joo nasacu ini i cahan i sahá Jesucristo cuití va tañu ndó, mé a naxihí ndica crúxu. <sup>3</sup> Tá nasahin i tañu ndó, coó nandiñehe jícó i mí i. Ña nacaja i quéa yíhvi yíhvi cúu u anda quíji ninu i. <sup>4</sup> Ta tá nacasahá i cáxi tuhun i tuhun vaha sahá Jesucristo nu ndo, coó toho tuhun ndíchí nacahan i xihín ndo ña ná cava i jini ndó xihín á, vaha. Ña nacaja i quéa nacahan i xihín ndo xihín ndée ínima yii Ndióxi ta mé a najáxinu a ini ndó xihín ndée mé á. <sup>5</sup> Já quéa ná candaa ini ndó ña Ndióxi quéa cája ña ná candee ini ndó mé á xihín ndée mé á. Ta co cúu á sahá ña ndíchí quíxi jini ñayivi ñuyiví yóho.

*Ínima yii Ndióxi cája ña ná candaa ini ñayivi saha mé á*

<sup>6</sup> Joo tá ndítuhún nde xihín na sa cánda vaha ini ñaha Ndióxi já cahan nde tuhun ndíchí xihín ná. Joo co cahan nde tátuhun cahan ta ndíchí ndúu ñuyiví yóho. Ta ni co cúu á tátuhun ña cahan da ndíchí, da cómi cuénta sahá ñuyiví yóho. Jáchí yachí ndihi sahá na cán. <sup>7</sup> Ña cahan nde cúu á ña ndíchí cuénta Ndióxi. Ta cúu á ña nasahin jehé, ña co xini ñayivi saha janda tá cámani cava sahá saha ñuyiví. Jáchí janda mé tiempo já nasacu ini Ndióxi ndá quiahva caja jácacu a mí anda ama cá quivi. <sup>8</sup> Ta ni in túhún

na náhnu cómí cuéntá sahá ñuyíví yóho có cándaꝯ ini na ña ñasacu ini Ndióxi jácꝯcu a mí. Jáchi tá ná candúsa na ña já queá a cáta caa toho na Jesucristo, xitoho índica crúxu, nduu. Jáchi mé Jesucristo cúú á ña cáhnu ndivaha. <sup>9</sup> Ta já cáchí tuhun Ndióxi já:

Ni in túhún ñayivi a ñaha cuni na ta a ñaha cuni johu na,

ta ni a ñaha cahvi ini na,

ndá quiahva ín ña náhnu sácú ini Ndióxi quiahva nuú ñayivi tá quíhvi ini na mé á, cáchí tuhun Ndióxi.

<sup>10</sup> Nacaja ínimá yíi Ndióxi ña ná candaa iní tóco ndihi ña yóho. Jáchi ínimá yíi mé á sándehe a tóco ndihi ñaha ta xíní a janda ña cáhvi ini mé Ndióxi.

<sup>11</sup> Ni in túhún ñayivi có xíní na ña cáhvi ini inga na. Ínimá in in na cuití va xíní a ña cáhvi ini in in na. Quiahva já ín ri xihín Ndióxi va. In túhún ínimá yíi mé á xíní ndía cáhvi ini a. <sup>12</sup> Nasahan Ndióxi ínimá yíi mé á nu yo ta có cúú á tátuhun ínimá ñayivi ñuyíví. Ta nacaja mé á ña ná candaa iní ndaja ín ña náhnu sahan mé á nu yo. <sup>13</sup> Ta tá cahan nde sahá ña yóho, cahan nde tá quiahva najanaha ínimá yíi Ndióxi nuú nde. Ta có cahan nde ña xihín tuhun ndíchí nacatiahva nde ñuyíví yóho. Quiahva já ndícani nde ñaha Ndióxi xihín na ñúhu ínimá yíi Ndióxi ini.

<sup>14</sup> Tóco ndihi ña yóho cúú á ña tóntó ndivaha nuú ñayivi, na có ñúhu ínimá yíi Ndióxi ini. Có ndíquehe vaha na ña ta ni a cúú candaa ini na ndaja ín a jáchi na ñúhu ínimá yíi Ndióxi ini, na cán cúú ndusa na cándaꝯ ini ñaha Ndióxi. <sup>15</sup> Joo na ñúhu ínimá yíi Ndióxi ini, na cán cúú na cándaꝯ ini ndá ñaha cúú ña vaha ta ndá ñaha có cúú toho ña vaha. Ta xihín ña yóho cántóntó ñayivi ñuyíví jáchi có cándaꝯ ini na ña cúú cuéntá Ndióxi. <sup>16</sup> Jáchi cáchí tuhun Ndióxi: “Ni in túhún ñayivi a cúú candaa ini na ña cáhvi ini Ndióxi, xitoho í. Ta ni in túhún na a cúú cachi xihín mé á ña ndítahan nu á caja”, cáchí tuhun Ndióxi. Joo mí, na cúú cuéntá Jesús, cáhvi iní tá quiahva cáhvi ini Jesucristo jáchi ñúhu ínimá yíi Ndióxi ini mí, na cúú cuéntá mé á.

### 3

#### *Na cája chúun cuéntá Ndióxi*

<sup>1</sup> Candehé ndó, ñani í, na cúú cuéntá Jesús. Cóo nacuu cahan í xihín ndo tá quiahva cahan í xihín na nachutú ndaa xihín ínimá yíi Ndióxi. Jáchi mé ndó cúú ndó tátuhun lee loho ña chíchí jáchi a ñaha cuahnu ndó xihín tuhun Ndióxi jáchi cája ndó ña xíca ini yiquí cuñu ndó caja tá quiahva cája ñayivi ñuyíví. <sup>2</sup> Sahá ña cán queá tá najanaha í tuhun Ndióxi nu ndo, cóo nacuu janaha í ña ihvi chága nu ndo jáchi a cúú candaa ini ndó ña. Ña nacaja í xihín ndo queá nasahan í tátuhun leche nu ndo jáchi cúú ndó tátuhun na valí chíchí sahá ña a cúú cuxu ndó ñaha vee. Ta janda viti có ín tiahva ndó jácuaha ndó ña ihvi chága cuéntá tuhun Ndióxi. <sup>3</sup> Jáchi cúú yíi va ndó tátuhun ñayivi ñuyíví. Ndaja táhan mé ndó cáhíhvi ini xihín táhan ndó ta caní táhan ndó ta sáhdá java táhan ndó. Ta xihín ña yóho cája ndó ña cúni mé cuití ndo tá quiahva cája ñayivi ñuyíví. <sup>4</sup> Java ndó cáchí ndo ña cúú ndó cuéntá yehe, da cúú Pablo. Ta java ndó cáchí ndo ña cúú ndó cuéntá Apolos. Ta xihín ña yóho sáhdá java táhan ndó ta náha ndó ña cája ndó tá quiahva cája ñayivi ñuyíví.

<sup>5</sup> Ndá da cúú Apolos xihín yehe ña ná caní táhan ndó sahá nde. Có ndítahan caja ndó já jáchi mé nde cúú nde da xíca nuu cája chúun cuéntá Jesucristo, xitoho í cuití va. Ta sahá chuun cája nde yóho nacuu nacandúsa ndó mé á. Ta ña yóho cúú chuun nanaha Jesucristo, xitoho í nuú yehe xihín nu Apolos caja nde. <sup>6</sup> Ña nacaja nde cúú á tátuhun ña cája na tá xútu na. Ta yehe cúú u tátuhun da nachihin tata jáchi nacaxi tuhun í tuhun Ndióxi nu ndo. Ta Apolos cúú dá tátuhun da naxojo ticuí nuú a cán jáchi najanaha chága da tuhun Ndióxi nu ndo. Joo Ndióxi queá nacaja ña ná cuahnu a jáchi cája mé á ña ná cuu cuahnu ndó xihín tuhun mé á. <sup>7</sup> Sahá ña cán queá vatí yehe cúú u da naxutu ta Apolos cúú dá da naxojo ticuí joo ni in túhún nde cóo saha. Cáhnu cúú Ndióxi jáchi mé á queá nacaja ña ná cuahnu mé tata naxutu nde cán. <sup>8</sup> Xíní ñúhú candaa ini ndó ña in cúú va na chíhin tata xihín na xójo ticuí nu á. Ta tá

in tá in chuun ñacaja in in ña cán quehe na yahvi saha. <sup>9</sup>Yehe xihin Apolos in cúu nde cajú chún nde cuéntá Ndióxi. Ta mé ndó cúu ndó tátuhun in yójo nuú nasacu Ndióxi ndehe cajú chún nde cuéntá mé á.

Ta jári cúu ndó tátuhun in vehe ña cávaha Ndióxi. <sup>10</sup>Ta yehe cúu u tátuhun da cávaha mé vehe yóho. Ta mé Ndióxi quea nasahan ñamaní nuú i ña ná taán i yuu ndúhu sahá ta ná jácava sahá i ña. Ta inga na xíní ñúhú cajú chún xihin á. Joo ndítahan candehe vaha na ndaja cajú na chuun yóho. <sup>11</sup>Jáchí in túhún Jesucristo cúu á tátuhun yuu ndúhu sahá vehe yóho. Ta ni in na a cúu tavá xóo na ña ta já cacu na inga ñaha. <sup>12</sup>Mé ña cávaha vehe nuú yuu ndúhu yóho cuu jáxinu na ña xihín jjuhún cuáán ta cuu cajú na ña xihín jjuhún cúxú ta cuu cajú ri na ña xihín yuu ñúchí. Ta jári cuu cajú na ña xihín yító ta cuu cajú ri na ña xihín xehe ndíyoho ta janda xihín toñamá cuu cajú na ña. <sup>13</sup>Joo vaxi quivi quixi tucu Jesucristo coto ndojó mé á chuun ñacaja in in ñayivi cuéntá mé á. Cacu a tátuhun coto ndojó a ña xihín ñuhú cáyi já quea ná ñaha nu á, á ndihi sahá, á co ndíhi sahá. Ta xihín ña yóho ñaha nu á, á vaha ñacaja chún ñayivi cuéntá mé á, á a váha toho ñacaja na. <sup>14</sup>Ta tá coó nandíhi sahá ña ñacaja na cán já quea chahvi Ndióxi na sahá chuun ñacaja na. <sup>15</sup>Joo tá ná cáyi ña ñacavaha na cán já ndíhi saha tóco ndíhi chuun ñacaja na vatí mé ná cacu ndaa ínimá ná. Ta ña yóho cacu a tátuhun tá jácacu in dataa mé dá tá quéta da ini in vehe tá cáyi a xihín ñúhu ita.

<sup>16</sup>Á co xíní ndó ña cúu ndó tátuhun veñuhu Ndióxi tá ndacaan ínimá yíí mé á ini ínimá in in ndó. <sup>17</sup>Ta ndá ña ná jándíhi na sahá veñuhu Ndióxi yóho já quea jándíhi Ndióxi sahá na cán. Jáchí yíí ndivaha veñuhu Ndióxi. Ta mé ndó cúu ndó tátuhun veñuhu Ndióxi cáhan i saha jan.

<sup>18</sup>Candehe ndo. Ndá ndó cáhán ña cúu ndó ña ndíchí jiní sahá ña xíní ndó ñaha ñuyiví yóho, xíní ñúhú candaa ini ndó ña cúu á tátuhun jándahvi ndó mé ndó. Xíní ñúhú ndaja ndó mé ndó tátuhun ña co xíní já quea ná nuná nu Ndióxi jánaa nu ndo ndaa cúu ndusa ña ndíchí jiní. <sup>19</sup>Jáchí ña ndíchí quíxi jiní ñayivi ñuyiví cúu á ña

tóntó ndivaha nu Ndióxi. Já cáchí tuhun Ndióxi já: “Ña cajú mé á quea ná cachihin saha ná xihín ña ndíchí quíxi jiní mé va na.” <sup>20</sup>Quiahva já cáchí ri tuhun Ndióxi: “Cándaá cáxi ini Ndióxi ña coó sahá ña cáhvi jiní ña ndíchí ndúu ñuyiví yóho”, já cáchí tuhun Ndióxi. <sup>21</sup>Sahá ña cán quea ni in túhún ñayivi co ndítahan ndínehe jíco ña mé ná sahá ña tiahva in ñayivi ñuyiví yóho cajú na. Xíní ñúhú ndicuhun ini ndó ña nasahan Ndióxi tóco ndíhi ñaha nu ndo. <sup>22</sup>Nandiquiahva mé á ndehe, da cúu Pablo xihín Apolos xihín Pedro nu mé ndó já ná cuu jánaa nde tuhun Ndióxi nu ndo. Nasahan mé á ñuyiví yóho nu ndo já ná cuu catacu ndó. Ta nasacu ini mé á quivi quivi ndó ta já tandaa quivi cuhun ndó coo ndó xihín mé á. Tóco ndíhi ña yóho nasahan Ndióxi nu ndo. <sup>23</sup>Ta mé ndó cúu ndó cuéntá Jesucristo ta Jesucristo cúu á cuéntá Ndióxi.

## 4

### *Ndicani Pablo ndaja in chuun cajú na apóstol*

<sup>1</sup>Co ndítahan toho ndaja cáhnu ndó ndehe. Xíní ñúhú quehe ndó cuéntá ña ñatahnda chuun nuú nde cajú chún nde cuéntá Jesucristo jánaa nde ña coó nasaxíní ñayivi jihna, ña nasacu ini Ndióxi cajú. <sup>2</sup>Ta ndá da ndíquehe in chuun, xíní ñúhú ñaha da ña mé a ndaa cuu candeé ini na da, ña mé a ndaa cajú tá cajú da chuun ñatahnda nu dá cajú da. <sup>3</sup>Ta cajú i cuéntá ñacaja vaha i chuun nasahnda Ndióxi nuú i cajú i. Sahá ña cán quea co sáhní toho i mí i tá chícaan ndó cuachi jatá i. Ta co ndicani ini i tá java ga ñayivi chícaan na cuachi jatá i. Jáchí cajú i cuéntá coó toho cuachi ñacaja i. <sup>4</sup>Tá ná cachi i xihín ndo ña coó toho cuachi ñacaja i, co cúní cachí i ña mé a ndaa co ndójo ga i cuachi. Jáchí xíní vaha Jesucristo, xitoho i á ñacaja vaha i á coó ñacaja vaha i. <sup>5</sup>Sahá ña cán quea co xíní ñúhú ndíhi ini ndó candehe ndaa ndó ñayivi. Xíní ñúhú candati ndó janda quiahva ná quixi Jesucristo cajú vií mé á sahá ñayivi já ná ndítivi ña ñúhu ínimá in in ñayivi. Ta xihín ña yóho cuni tóco ndíhi ñayivi ña cáhvi ini na. Anda jáví ndaja cáhnu Ndióxi na ñacaja vaha.

<sup>6</sup> Candehé ndo ñani i, na cúu cuéntá Jesús. Sahá ña cúni nde ña ná candaa ini ndó ndía ndítahan caja ndo sahá ña cán queá ndicani i nu ndo saha Apolos xihín saha mí i. Jáchí ín in tuhun ta cáchí a ña co ndítahan nu ndó caja cáhnu ndó in ñayivi nani quehe núu ndó inga na. Ta xihín ña yóho cuu candaa ini ndó ña co ndítahan ndiñehe jícó ndo mé ndó sahá ña cúu ndó cuéntá in da jáchí xihín ña yóho jánuu ndáha ndó inga na táhan nde. <sup>7</sup> Jáchí ni in ndó co cúu ndó na náhnu chága a juú ga inga na. Xíní ñúhú candaa ini ndó ña tóco ndihi ña cómi ndo cúu á ña nasahan Ndióxi nu ndo. Sahá ña cán queá co ndítahan caja cáhnu ndó mé ndó sahá ña nañehe táhvi ndo nu Ndióxi.

<sup>8</sup> Cáhán ndo ña ni in ñaha co ndímaní nu ndo joo co cúu á ña ndaa. Cáhán ndo ña cúu ndó na cuicá joo co cúu á ña ndaa. Ta cáhán ndo cúu ndó na cómi cuéntá sahá ñayivi joo co cúu á ña ndaa. Caja ndó tátuhun co xíní ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá saha ná xihín ndo. <sup>9</sup> Cúu á tátuhun nasacu Ndióxi ndehe, na cúu apóstol janda nu ndíhí. Cúu nde tátuhun na ndícuíta yíco cuhun quivi. Ta janda johó sándehe ñayivi ñuyíví ndehe ta sácu ndaa na ndehe. Ta janda mé táto Ndióxi sándehe na ndehe cuahan nde. <sup>10</sup> Sahá ña quíhvi ini nde Jesucristo cúu nde tátuhun ñayivi tóntó ndivaha nuú ñayivi ñuyíví. Joo mé ndó nandaja ndó mé ndó tátuhun na xíní ndivaha saha mé á. Mé nde cúu nde tátuhun ñayivi vitá nuú ñayivi ñuyíví joo caja ndó tátuhun na ndacú ini. Ndája cáhnu ñayivi ñuyíví mé ndó nani quehe núu na ndehe. <sup>11</sup> Ta janda viti ndóho tá ndóho ini nde. Java tañu coó ña cuxu nde ta coó ticuú coho nde ta ni jáhma candixi nde coó. Ta janda johó caja xíxi ñayivi xihín nde. Ta ni vehe nde coó. <sup>12</sup> Ta a juú quiahva ndúcú ndeé nde caja chúun nde catacu nde. Ta tá chícān ñayivi cuachi jatá nde já xíca táhvi nde nu Ndióxi ña ná caja mé á ñamani xihín ná. Ta caja ndeé ini nde tá caja xíxi na xihín nde. <sup>13</sup> Ta vitá cahan nde tá ndúcú ñehe nde tuhun nuú ñayivi vatí cahan núu na sahá nde. Mé nde cúu nde tátuhun xehe nuú ñayivi ñuyíví. Ta caja na xihín nde tá quiahva caja na xihín ñaha coó saha, ña

naçandoo cuhun cuíta. Ta quiahva já caja na xihín nde janda viti.

<sup>14</sup> Xíní ñúhú candaa ini ndó ña co cáhyí i ña yóho nu ndo sahá ña cúni jácacahan i nu ndo. Cáhyí i ña nu ndo jáchí cúu ndó tátuhun jahyi i. Ta jánaha i ña nu ndo tá quiahva caja in dataa xihín jahyi da jáchí quíhvi ini i ndohó. <sup>15</sup> Jáchí vatí ná coo uxu mil ñayivi jánaha na ndohó sahá Jesucristo joo in tuhún yehe cúu tátuhun tátá ndo. Jáchí yehe cúu u da naçahan tuhun vaha sahá Jesucristo nu ndó nu cuítí ta já naçandeé ini ndó mé á. <sup>16</sup> Sahá ña cán queá xíca táhvi i nu ndó ña ná caja ndó tá quiahva caja i.

<sup>17</sup> Sahá ña cán queá chindahá i Timoteo nu ndo jáchí cúu dá tátuhun jahyi maní i ta caja chúun da cuéntá Jesucristo, xitoho í xihín ndinuhu ini da. Ta jándicuhun ini da ndohó ndá quiahva caja i tañu na cúu cuéntá Jesús ta ndá quiahva jánaha i nu ná ndijáá veñuhu nu xíca i cuahan i. <sup>18</sup> Java ndó naçasáhá ndo caja lándá ndó jáchí cáhán ndo ña a sáa ga i coto nihni i ndohó. <sup>19</sup> Joo yachi saa i coto nihni i ndohó tá cúni Ndióxi. Anda já candehé e, á mé a ndaa ín ndeé Ndióxi ini na xíca caja lándá jan á yúhu uun na cahan na. <sup>20</sup> Tá mé a ndaa cómi Ndióxi cuéntá sahá in ñayivi já queá ín ndeé mé á ini na caja na ña cúni mé á. Ta coó saha toho a á tiahva ndivaha na cahan na. <sup>21</sup> Ta viti cachí ndó xihín i ndía queá catóo chága ndo. Á catóo chága ndo ña ná saa i jánani i ndohó sahá ña caja ndó ña núu. Á catóo chága ndó ña ná saa i ta vií vií cahan i xihín ndo jáchí najándacoo ndó ña núu caja ndó. Ndía cúni ndó.

## 5

*Cahan Pablo sahá in da ín xihín náná queén da*

<sup>1</sup> Sa nañehe e tuhun ña ín in da cúu cuéntá Jesús tañu ndó jan ta ín da xihín náná queén da. Ta ña yóho cúu á in cuachi cáhnu ndivaha. Ta ni ñayivi ñuyíví co caja ña yóho. <sup>2</sup> Ta vatí ín cuachi cáhnu yóho tañu ndó joo caa ga ri ndohó caja cáhnu ndó mé ndó. Xíní ñúhú cacuéha ini ndó sahá ña yóho. Ta xíní ñúhú tavá ndó da caja cuachi yóho tañu ndó jan. <sup>3</sup> Vatí co ín i xihín ndo

jan joo ndícani ndivaha ini i sahá ña cúu jan. Ta cúu á tátuhun ín i xihín ndó jan ña cán quea sa nasacu ini i ña xíní ñúhú caja ndó xihín da cája cuachi jan. <sup>4</sup> Játaca táhan ndihi ndó na cúu cuéntá Jesucristo, xitoho í. Ta mé a cán quiahva ndée á nu ndo caja ndó ña cúní mé á. Ta cacuu a tátuhun coo i xihín ndó jan. <sup>5</sup> Anda já xíní ñúhú ndiquiahva ndó da jan ndáha tiñáhá sacuahá já ná jándoho rí ini yiquí cuñu da viti ta já ná cuu cacu ndaa ínima dá tá ná xinu coo quiví quixi tucu Jesucristo.

<sup>6</sup> Co ndítahan caja lándá ndo sahá ña cája ndó. Xíní ñúhú ndicuhun ini ndó in tuhun ña cáchí já: “Chá cuití yúsa naxaa játiví ndihi a java yúsa ña ín vaha.” <sup>7</sup> Xíní ñúhú tavá ndo da jan tañu ndó jáchi cúu dá tátuhun yusá naxaa, ña játiví ña ín vaha. Ta xihín ña yóho quee ña núu veñuhu nu táca ndó jan jáchi sahá da jan cuu caquini inga na ta caja na cuachi. Xíní ñúhú canduu vií ndo tátuhun mé pan xíxi na vicó pascua jáchi coo yusá naxaa ñúhu xihín á. Ta Jesucristo nasacuu a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihí a ndica crúxu sahá cuachi já ná cuu cacu ndaa ínima yo. <sup>8</sup> Sahá ña cán quea ndítahan cajji ini sahá ña nacaja Jesucristo. Xíní ñúhú jándacoo í ña núu sa nacaja í jihna, ña cúu tátuhun pan naxaa. Ta xíní ñúhú caja í ña ndaa xihín ndinuhu ini. Ta ña yóho cúu á tátuhun pan ña coo nacava táhan yusá naxaa xihín.

<sup>9</sup> Nu carta nachindahá i nu ndó jihna ga, nacachi i xihín ndo ña ná a catáhan ndó xihín ñayivi, na ndúu xihín na coo cúu yí ná á ñájihí na. <sup>10</sup> Tá nacachi i ña yóho xihín ndo coo cúní cachi a ña xíní ñúhú tavá xóo ndó mé ndó chí in ndée nuú ñayivi ñuyiví yóho jáchi a cuú quee ndó ñuyiví yóho cuhun ndo. Ta mé a ndaa ndúu cuahá na ñuyiví yóho cája na cuahá cuachi xihín yiquí cuñu na ta catóo ndivaha na jiuhún ta cája cuíhná na ta cája cáhnu na yoco. <sup>11</sup> Ña cúní cachi i xihín ndo quea coo ndítahan catáhan ndó xihín na cáchí cúu cuéntá Jesús nani cája na ña núu xihín yiquí cuñu na, á tá cúu ná na catóo ndivaha jiuhún, á tá cúu ná na cája cáhnu yoco, á tá cúu ná na tuhún, á tá cúu ná na xíhi, á tá cúu ná na

cuihná. Ta ni a cácco ndó cuxu ndó xihín ná tá cája na ña yóho. <sup>12</sup> Co cáhan i sahá ñayivi ñuyiví jáchi coo ndítahan nuú i caja vií i saha ná. Joo ndítahan nu ndó candehé ndo ndaja cája na cúu cuéntá Jesús ndúu tañu ndó jan. <sup>13</sup> Jáchi mé Ndióxi quea caja vií a sahá cuachi ñayivi ñuyiví. Ña cán quea ndítahan nu ndó tavá ndó da cája cuachi tañu ndó jan.

## 6

### *Tá sácú saha táhan na cúu cuéntá Jesús nuú na jutixia*

<sup>1</sup> Tá co táhan ini ndó xihín ña cája ñani ndó, na cúu cuéntá Jesús coo ndítahan nu ndó cuhun ndó cacu ndó saha ná nuú na jutixia, na coo cúu cuéntá Jesús. Ña ndítahan caja ndó quea cáhan ndó xihín mé na cúu cuéntá Jesús ña ná caja vií na sahá ña coo táhan ini ndó xihín jan. <sup>2</sup> Á co xíní ndó tandaa quiví caja vií na cúu cuéntá Jesús saha tóco ndihi ñayivi ñuyiví. Ta tá mé ndó cacuu ndó na caja vií saha tóco ndihi ñayivi ñuyiví, nda cuéntá quea coo cúní ndó caja vií ndó sahá ña válí cúu tañu mé ndó jan. <sup>3</sup> Ña xíní ñúhú caja ndó quea nducú ndo caja vií ndo sahá ña cúu tañu ndó jan. Jáchi xíní ñúhú ndicuhun ini ndó ña janda táto Ndióxi caja vií yo saha. <sup>4</sup> Sahá ña cán quea tá cáni táhan ndó sahá ñaha válí ñuyiví yóho coo xíní ñúhú toho cuhun ndó cavií saha ndó nuú na coo cúu cuéntá Jesús. <sup>5</sup> Candehé ndó. Cáhan i ña yóho xihín ndo já ná cacahan nuu ndo. Á co ín in da tácu ini tañu ndó jan ña ná caja vií da saha ndó, vaha. Xíní ñúhú ndindita in da tácu ini já ná cuu caja vií da saha ña cúu tañu ndó jan. <sup>6</sup> Joo ña cája ndó quea cáni táhan ndaja táhan mé ndó ta já ndaca táhan ndó cuahan ndó cavií saha ndó nuú na coo cúu cuéntá Jesús. Coo ndítahan toho caja ndó já.

<sup>7</sup> Sa cuachi cáhnu ndivaha quea cája ndó tá cáni táhan ndaja táhan mé ndó jan. Vaha ná caja ndeé ini ndó tá coo cája vaha in na xihín ndo. Vaha ná caja ndeé ini ndó tá ná caja cuíhná na ñaha ndó. Jáchi coo ndítahan cacu saha táhan ndó nuú na coo cúu cuéntá Jesús. <sup>8</sup> Joo ña cája ndó quea ña núu xihín ñani táhan ndó ta janda cája cuíhná ndo ñaha ñani ndó, na cúu cuéntá Jesús.

<sup>9</sup> Xíní ñúhú candaa ini ndó ña coó saha toho ñayivi cája ña núu jan cuhun na nuú cacomí Ndióxi cuéntá saha ná. A jándahvi ndó mé ndó jáchi na ndúu xihín na co cúu yíi ná á ñájíhí na a cuhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yíi á ñájíhí inga na ta ni da cúu taa líhi a cuhun toho na nu Ndióxi. <sup>10</sup> Ta ni na cuíhná ta ni na cátoó ndivaha jiuhún ta ni na xihí ta ni na ndahnda yúhu ta ni na jándahvi ñahá ta ni in táhan na yóho a cuhun toho na nuú cacomí Ndióxi cuéntá saha ná. <sup>11</sup> Ta táhan na yóho nasacuu ri java ndóhó va, nduu. Joo viti sa nandaja vii Ndióxi ndohó ta nacaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña nacaja Jesucristo, xitoho í ta sahá ña cája ínimá yíi Ndióxi.

*Xíní ñúhú candaa í yiquí cuñu í jáchi cúu á ña yíi*

<sup>12</sup> Ndúu java ñayivi ta cáchi na ña núná nu ná caja na ña cúni mé va na. Vatí mé a ndaa núná nu ná caja na ña cúni mé ná joo xíní ñúhú candehé na á vaha, á a vaha ña cája na. Jáchi mé a ndaa núná nu yo caja í ña cúni mí joo co ndítahan quiahva í ñamaní ña ná cahnu ña núu yiquí cuñu í. <sup>13</sup> Ta cáchi na ña íin tíxi yó sahá ña cán queá xíní ñúhú cuxú. Ta cáchi na ña xíní ñúhú cuxú jáchi íin tíxi. Joo vaxi quívi jándihi Ndióxi sahá ndívi ña yóho. Ta coó nasahan Ndióxi yiquí cuñu í nu yo ña ná caja í cuachi xihín á tátuhun ña ná coo í xihín na co cúu ñájíhí yo á yíi yo. Nasahan Ndióxi yiquí cuñu í nu yo já ná caja í ña cúni mé á. Ta nacaja mé á ña ná cacomí a cuéntá saha yo. <sup>14</sup> Ta tá quiahva nacaja Ndióxi najánditacu a Jesucristo, xitoho í quiahva já caja ri a jánditacu a yiquí cuñu í xihín ndée mé á.

<sup>15</sup> Xíní ñúhú candaa ini ndó ña in cúu ndó xihín Jesucristo. Ta tá cuahan ndó cája ndó cuachi xihín najihí xíca jii, cúu á tátuhun ñehe ndó Jesucristo cuahan cája ña núu. Co ndítahan caja ndó já. <sup>16</sup> Sa xíni vaha ndó ña tá quíhvi nuu in dataa xihín najihí xíca jii já queá ndúu na tátuhun in víxi ñayivi. Jáchi cáchi tuhun Ndióxi já: “Tá ná ndique táhan in dataa xihín in ñáñáha já queá ndúu na tátuhun in víxi ñayivi.”

<sup>17</sup> Ndá na ndiquiahva mé ndáha Jesucristo, xitoho í já queá in ndúu na xihín mé á jáchi ñúhu ínimá yíi Ndióxi ini na.

<sup>18</sup> Cama caxoo ndó nu tóco ndihi ña núu xíca ini yiquí cuñu ndó caja. Co ndítahan coo ndó xihín na co cúu ñájíhí ndo á yíi ndo jáchi ni in túhún toho cuachi co cája quini nahá xihín yiquí cuñu ñayivi tátuhun cuachi yóho. Jáchi ndá na íin xihín na co cúu yíi ná á ñájíhí na já queá cája na cuachi nuú yiquí cuñu mé va na. <sup>19</sup> Xíní ñúhú ndicuhun ini ndó ña mé yiquí cuñu ndó jan cúu á tátuhun in veñuhu nu ndacaan ínimá yíi Ndióxi, mé a nasahan Ndióxi nu ndo. Ta viti yiquí cuñu ndó a juú ñaha mé ndó cúu á jáchi cúu á ñaha Ndióxi. <sup>20</sup> Jáchi yahvi ndivaha nachahvi Ndióxi sahá ndo tá naxihí Jesucristo ndica crúxu. Sahá ña cán queá ndítahan caja cáhnu ndó Ndióxi xihín yiquí cuñu ndó ta jári xihín ínimá ndo jáchi ndívi a cúu á cuéntá Ndióxi.

## 7

*Tá tándaha ñayivi*

<sup>1</sup> Ta viti cúni nducú ñehé e tuhun nu ndo sahá ña nandaca tuhún ndó yehe nu carta nachindahá ndó nuú í. Cáchi í xihín ndó sahá da cámani tandaha ña vaha cája da tá ná coo tacú da. <sup>2</sup> Joo sahá cuachi cája ñayivi tá ndúu na xihín na co cúu ñájíhí na á yíi ná sahá ña cán queá vaha chága ná tandaha ná já ná coo ñájíhí in in taa ta jári najihí va ná coo yíi in in na. <sup>3</sup> Ta in dataa ndítahan ndiquiahva da mé dá nu ñájíhí da ta jári ñáñáha ndítahan ndiquiahva ña mé ña nu yíi ña jáchi quiahva já sáhdá a coo a. <sup>4</sup> Jáchi in ñáñáha, ña natandaha co cómi ga ña cuéntá saha mé ña jáchi yíi ña cúu da cómi cuéntá saha yiquí cuñu ña. Ta ni in dataa, da natandaha co cómi ga da cuéntá sahá yiquí cuñu da. Ñájíhí da cúu ña cómi cuéntá sahá yiquí cuñu da. <sup>5</sup> Sahá ña cán queá ndítahan ndiquiahva nu táhan ndó ta a cándají táhan ndó. Ta tá co cúni ndó cuju xitáhan ndó xíní ñúhú cacuu a sahá ña sa najándique táhan tuhun ndó ña a cúju xitáhan ndo sahá ña cúni ndó caa tahví ndó nu Ndióxi chá tiempo. Joo tá nandihí xíní ñúhú ndique táhan tucu ndó jáchi tiahva náa jácahan Satanás, mé tiñáhá



sacuaḥa ndohó ña ná caja ndó cuachi sahá ña a cuú cañu ndó nuú ña xíca ini yiquí cuñu ndó caja.

<sup>6</sup> Tóco ndihi ña cáhan i xihín ndo yóho co cúni cachi a ña xíní ñúhú tándaḥa ndo vatí cuu tandaha ndo tá cúni ndo. <sup>7</sup> Vatí mé a ndaa cáji iní i tá ná canduu tacú ndihi ndó tátuhun yehe. Joo sa jíin sa jíin nacaja Ndióxi xihín in in í. Java na ñéhe táhvi ná tandaha na ta java na ñéhe táhvi na canduu tacú na.

<sup>8</sup> Ndá na ndúu tacú xihín ndá na ndúu cuáan, ña vaha chága quea ná a tándaḥa ná ta ná canduu na tátuhun yehe. <sup>9</sup> Joo tá co ndeé ini na cañu na yiquí cuñu na, vaha chága ná tandaha ná jáchi vaha chága ná tandaha ñayivi a juú ga ña ná ndiava iní na coo na xihín na coo cúu yí ná á ñájíhí na.

<sup>10</sup> Ta nu ndohó, na sa ín yí á ñájíhí, sáhdá i chuun nu ndó ña ná a jándacoo táhan ndó. Ta ña sáhdá i nu ndo yóho co cúu á ña naquixi jini mí i. Cúu á ña sáhdá Ndióxi caja ndó. Co ndítahan nuú in ñáñáha jándacoo ná yí ña. <sup>11</sup> Ta tá ná jándacoo ná da, co ndítahan nu ña tandaha ña xihín inga da. Á tá coo ta ña ndítahan caja ña quea ndique táhan maní tucu ña xihín yí ña. Ta jári in dataa co ndítahan nu dá jándacoo da ñájíhí da.

<sup>12</sup> In java ga ñaha cúni cahan i xihín ndo. Mí i cáhan i ña vaha caja ndó ña vatí mé a ndaa coo cúu á ña nasahnda Ndióxi nuú i jánaḥa i nu ndo. Ta ña yóho quea ña cahan xihín ndo: Tá ín in da cúu cuéntá Jesús ta ín ñájíhí da, ná coo cúu cuéntá Jesús. Ta tá cáji ini ña coo ná xihín dá já quea co ndítahan nu dá jándacoo da ña. <sup>13</sup> Ta tá ín in ña cúu cuéntá Jesús ta ín yí ña, da coo cúu cuéntá Jesús. Ta tá cáji ini da coo da xihín ña já quea co ndítahan jándacoo ná da.

<sup>14</sup> Jáchi cája yí Ndióxi in dataa sahá ña ín da xihín ñájíhí da, ña cúu cuéntá Jesús. Ta jári cája yí Ndióxi in ñáñáha sahá ña ín ña xihín yí ña, da cúu cuéntá Jesús. Jári cája yí Ndióxi jahyi na yóho ná a cacuu na tátuhun na coo xíní Ndióxi. Ta xihín ña yóho cuu candaa ini na ndaja ín íchi cuéntá Jesús. <sup>15</sup> Joo tá cúni yí ndo á ñájíhí ndo, na coo cúu cuéntá Jesús jan, quee na cuhun na já quea quiahva ndó ñamaní nu ná caja na ña. Jáchi

co ndítahan nu ndó caja ndúsa ndó xihín na coo xíní Ndióxi cán ña ná coo na xihín ndo. Jáchi cúni Ndióxi ña ná canduu vií ndo. <sup>16</sup> Ta ni coo xíní ndo á ndiquehe yí ndó á ñájíhí ndo íchi cuéntá Jesús, á a ndiquehe na ña.

<sup>17</sup> Ta cáxi tuhun i nu tóco ndihi na cúu cuéntá Jesús ndúu ndijáá veñuhu ña ndítahan coo na tá quiahva nasahin na tá nandihvi na íchi cuéntá Jesús jáchi quiahva já cúni Ndióxi. <sup>18</sup> Ta tá naquihvi ndó íchi cuéntá Jesús ta sa ndacaan marca yiquí cuñu ndó coo caja toho a. Joo tá coo marca jan yiquí cuñu ndó co ndítahan chícacoo ndó ña yiquí cuñu ndó. <sup>19</sup> Jáchi coo caja toho a á ín marca yiquí cuñu ndó á coo a. Ña cúni Ndióxi quea ná caja ndó ña sáhdá mé á nu ndo caja ndó xihín ndinuhu ini ndó.

<sup>20</sup> Ta ndítahan coo ndó tá quiahva nasahin ndó tá nandiquehe ndó íchi cuéntá Jesús. <sup>21</sup> Ta tá nasacoo ndó na naxeen xitoho ndó caja chúun ndó tá nandiquehe ndó íchi cuéntá Jesús já quea co ndítahan ndicani ini ndó sahá. Joo tá ná quiahva xitoho ndó íchi nu ndó ña ná quee ndó cuhun ndo já quea caja ndó ña. <sup>22</sup> Jáchi da cúu cuéntá Jesús cúu dá da najaní Ndióxi nuú cuachi da vatí cándo da cája chúun da cuéntá xitoho da, da naxeen ñahá. Ta da naxica núná mé tá nandiquehe da íchi cuéntá Jesús cúu dá mozo cuéntá Jesucristo. <sup>23</sup> Jáchi yahvi ndivaha nachahvi Ndióxi saha ndo tá naxihí Jesucristo ndica cruxu ña ná cacomí a cuéntá saha ndo. Saha ña cán quea a ndiquiahva toho ndó mé ndó ndáha ñayivi ña ná cañu na ndohó. <sup>24</sup> Candehé ndo ñani mí i, na cúu cuéntá Jesús. Ndítahan coo ndó tá quiahva nasahin ndó tá nacana Ndióxi ndohó cacuu ndó cuéntá mé á jáchi ín mé á xihín ndo.

<sup>25</sup> Ta viti cúni cahan i sahá na tacú, na camaní tandaha. Coo nacachi toho Ndióxi xihín i sahá ña yóho ña cán quea cahan i ña cáhvi ini mí i sahá. Ta cuu candúsa ndó ña cáhan i xihín ndo jáchi nacaja Ndióxi ñamaní xihín i ña cúu u in da tácu ini. <sup>26</sup> Ta cáhan i ña ndítahan coo tacú in dataa jáchi ihvi ndivaha cáa tiempo ndúu viti. <sup>27</sup> Joo tá ín ñájíhí ndo, a jándacoo ndó ña. Ta tá coo ñájíhí ndo, a ndúcú ndó ña. <sup>28</sup> Joo a juú cuachi quea cája ndó tá ná tandaha ndo. Ta ni a juú cuachi quea cája in ña tacú tá

na tandaha ña. Joo mé a ndaa ná cahan i xihin ndo, yancá a tá ná tandaha ñayivi jáchi cuahá ndivaha ndoho ini na. Ta co cúni ña ná ndoho ini ndó já sahá ña cán queá cahan i ña yóho xihin ndo.

<sup>29</sup> Candehé ndo ñani i, na cúu cuéntá Jesús. Ña cúni cachi i cúu ña yóho: Sa nacayati tiempo quixi Jesucristo. Sahá ña cán queá na íin ñájíhí xini ñúhú ndihi ini na caja chúun na cuéntá mé á tá quiahva cája chúun na tacú cuéntá mé á. <sup>30</sup> Ta ndá na ndúu cuéha ndivaha ndítahan caja na tátuhun na cájii ini. Ta na cájii ini ndítahan caja na tátuhun na ndúu cuéha ndivaha ini. Ta na xéen ñaha ñuyíví yóho ndítahan caja na tátuhun naxeen na ña co cúu ñaha na. <sup>31</sup> Ta na cómí ñaha ñuyíví yóho, xini ñúhú ndindójó na sahá ñaha cán. Jáchi vaxi quivi ndihi saha ñuyíví yóho xihin tóco ndihi ñaha íin nu á.

<sup>32</sup> Ña cúni yehe queá ña ná a ndícani nahá ini ndó sahá ñaha ñuyíví yóho. Jáchi tá camani tandaha in dataa já queá núná nu dá caja chúun da cuéntá Ndióxi xihin nd-inuhu ini da. Ta ndúcú da ndá quiahva caja da ña cájii ini Ndióxi xihin. <sup>33</sup> Joo da sa natandaha ndítahan caja chúun da ñuyíví yóho já ná cana ña cuxu na vehe da. Ta cája da ña cájii ini ñájíhí da xihin. <sup>34</sup> In da natandaha co xini da ndía ndihi chága ini da saha, á Ndióxi á ñájíhí da. Ta jári najihí tá cúu ná na tacú ndihi ini na caja na ña cúni Ndióxi jáchi ndiquiahva na mé ná ndáha Ndióxi ña ná cacomí a cuéntá saha yiquí cuñu na ta sahá ínima ná. Joo najihí ndúu yíi ndihi ini na sahá chuun vehe na jáchi cúni na ña ná tahan ini yíi ná xihin ná.

<sup>35</sup> Cahan i ña yóho xihin ndo jáchi cúni chindeé e ndohó ta co cahan i ña sahá ña co cúni ña ná tandaha ndo. Ña cúni queá ná núná nu ndó caja chúun ndó cuéntá Ndióxi xihin ndinuhu ini ndó ta ná a cájii nuu ni in ñaha nu ndó caja ndó ña cúni Ndióxi.

<sup>36</sup> Ta ndá da íin jahyi jíhí ta cahan da ña ndítahan tandaha ña jáchi sa cuahá cuia ña já cuu quiahva da ña ña ná tandaha ña tá cúni da. A juú toho cuachi cúu ña yóho. <sup>37</sup> Ta tá cahan ndo ña co ndítahan toho tandaha jahyi ndó ta cahan ndo ña cájii ini ñá ña coo mé ñá já queá vaha va cája ndó

tá co cája ndúsa ndó xihin ñá ná tandaha ña. <sup>38</sup> Vaha cája in dataa tá sahan da ñamani nuú jahyi jíhí da ña ná tandaha ña. Joo vaha chága cája da tá co cája ndúsa dá xihin ña ña ná tandaha ña.

<sup>39</sup> Ta a cúu tandaha in ñañáha xihin inga dataa nani tácu yíi ña. Joo tá naxihi yíi ña já queá candoo núná nu ña tandaha tucu ñá. Joo ndítahan tandaha ña xihin da cúu cuéntá Jesús. <sup>40</sup> Vatí cahan i ña cajii chága ini ñá tá ná a tandaha tucu ñá. Ña yóho queá cahi ini i sahá ña yóho. Ta ínima yii Ndióxi queá jácahan yehe cachi i ña yóho xihin ndo.

## 8

### *Cahan Pablo saha ña najoco ñayivi nuú yoco*

<sup>1</sup> Ta viti cúni ndicani i nu ndo sahá ña ndítahan caja ndó xihin ña najoco na nuú yoco. Vatí cúu á ña ndaa tá cachi java na ña xini vaha na sahá ña yóho joo tá cahan yo cúu yó na xini vaha já queá casahá yo ndínehe jícó yo mí. Joo tá quihvi ini ñani táhan í já ndindacú chága yó xihin ñaha Ndióxi. <sup>2</sup> Tá ndúu java na tañu ndó ta cahan na ña sa xini na ndaja táhan ñaha, na yóho náha ña camani cándaq ini na ña ndítahan cándaq ini na. <sup>3</sup> Jáchi mé a ndaa xini vaha Ndióxi ndá na cúu na quihvi ini mé á.

<sup>4</sup> Ta viti cahan i xihin ndo sahá ña najoco na nuú yoco. Cándaq cáxi ini ña coo a cúu toho yoco ndúu ñuyíví. Ta cándaq cáxi ini ña in tálaá Ndióxi cúu ndusa Ndióxi. <sup>5</sup> Vatí cachi ñayivi ña ndúu cuahá ndióxi ta ndúu cuahá xitoho indivi xihin ñuyíví <sup>6</sup> joo mí cándaq vaha ini ña íin in túhún Ndióxi, mé a cúu tátá yo. Ta mé á queá nacavaha tóco ndihi ñaha. Ta nacavaha mé á mí ña ná caja cáhnu í mé á. Ta íin in túhún xitoho í ña cúu Jesucristo. Ta mé á queá cája ña ná coo tóco ndihi ñaha ta cája ña ná catacu mí viti.

<sup>7</sup> Joo a juú tóco ndihi na cúu cuéntá Jesús xini ña yóho. Jáchi java táhan na sa cája cáhnu yoco sanahá cán tá xixi na ña najoco ñayivi nuú yoco cahan na ña cúu á ña najoco na nuú java ndióxi. Ta xihin ña yóho cahan na ña cúu ná na sa nayuxu sahá ña naxixi na ña najoco ñayivi nuú yoco. Ta co xini na á ndítahan cuxu na ña á co ndítahan cuxu na ña. <sup>8</sup> Candehé ndo. Co ndíquehe

toho Ndióxi mí sahá ña xíxi. Jáchi co cúu yó na ín chága saha tá xíxi in ñaha. Ta ni co cúu yó na coó saha tá co xíxi ñaha. <sup>9</sup> Joo xíni ñúhú candehé ndo ña ná a jándicava ndó inga na nuú cuachi sahá ña cája ndó jan. Jáchi vatí xíni vaha ndó ña cuu cuxu ndó ña cán joo ndúu java na vitá cuahan íchi cuéntá Jesús. <sup>10</sup> Cúu á tátuhun sácoo ndó cuxu ndó nu cáyahvi ña najoco na nuú yoco jáchi sa xíni ndo sahá ña yóho. Ta nani ín ndó xíxi ndó jan yáha in da cúu cuéntá Jesús, da vitá xihín ñaha Ndióxi. Ta sahá ña xíni da ndohó já quíhvi da jan xíxi da xihín ndo vatí cáhan da cúu á cuachi. <sup>11</sup> Xihín ña cája ndó jan cuu jándicava ndó da vitá xihín ñaha Ndióxi cán nuú cuachi vatí xíni vaha ndó ña co cája ndó cuachi tá ná cuxu ndó ña najoco na nuú yoco. Xíni ñúhú ndicuhun ini ndó ña naxihí Jesucristo sahá da jan. <sup>12</sup> Tá jándicava ndó ñani ndó, da vitá xihín ñaha Ndióxi cán nuú cuachi já quea cája ndó cuachi nuú Jesucristo viti. <sup>13</sup> Sahá ña cán quea tá ná jándicava i ñani i nuú cuachi sahá ña xíxi i cuñu, ña najoco na nuú yoco cája i cuéntá a cúxu ga i ña já ná a jándicava i inga da nuú cuachi.

## 9

### *Ña núná nuú in na apóstol caja*

<sup>1</sup> Mé a ndaa yehe cúu u in apóstol cuéntá Jesucristo sahá ña cán quea núná nuú i caja i ña cája in apóstol. Jáchi mí i sa naxini i xihín nuú i Jesucristo, xitoho í. Ta mé ndó nandiquehe ndó íchi cuéntá mé á sahá chuun nacaja i ta ña yóho náha ña mé a ndaa cája chúun i cuéntá mé á. <sup>2</sup> Cája i cuéntá ndúu java na ta co ndiquehe na yehe tátuhun in apóstol cuéntá Jesucristo. Joo ndohó ndítahan ndiquehe ndó yehe jáchi nanduu ndó cuéntá mé á sahá chuun nacaja i. Ta xihín ña yóho náha ña mé a ndaa cúu u in apóstol cuéntá mé á.

<sup>3</sup> Ta ña yóho cúu tuhun ndúcú ñehe e nuú na cáhan núu sahá i jan: <sup>4</sup> Ín sahá i ña ná coto ndó yehe. <sup>5</sup> Ta tá ná coo ñájíhí i, ña cúu cuéntá Jesús ín sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í. <sup>6</sup> Á cáhan ndo ña in túhún yehe xihín Bernabé cúu nde da coó saha ña ná coto

na cúu cuéntá Jesús ndehe, vaha. <sup>7</sup> Jáchi ni in túhún toho soldado co quéhe da jiuhún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchi já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchi já cáni a coo a. <sup>8</sup> Ta a juú cahán ndo ña cáhan i ña quíxi jini mé cuití vi jáchi cáchi ley mé Moisés ña yóho viti. <sup>9</sup> Já cáchi a já: “A chícayun ñunu yuhú tindiquí nani cája chúun rí sání rí trigo. Joo xíni ñúhú quiahvún ñamaní nu rí caxí rí a”, cáchi tuhun Ndióxi. Joo co ndíhi ini Ndióxi sahá tindiquí cuití va. <sup>10</sup> Saha mí ví nacahyí Moisés ña yóho ta saha mí ví cáhan ña yóho tá cáchi a já. Cúu á tátuhun cája da xútu tátí xihín da jáquee tátí jáchi ndáti ndíví da ndiquehe da táhan nuní cán sahá ña nacaja chúun da xihín á. <sup>11</sup> Tá nacahan nde tuhun Ndióxi xihín ndó já cúu á tátuhun nachihin nde tata cuéntá Ndióxi ini ínimá ndo. Sahá ña cán quea ndítahan nu ndo chindeé loho ndó ndehe xihín ña cómi ndo jáchi najánahe nde tuhun Ndióxi nu ndo. <sup>12</sup> Ta mé a ndaa ín chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coó nacaja ndúsa nde xihín ndo ña ná caja ndó ña. Ta cuahá tañu cája ndeé ini nde jáchi co cúní nde caji nuu nde ña ná ndicuíta nuu tuhun vaha sahá Jesucristo. <sup>13</sup> Mé ndó sa cándaá vaha ini ndó ña núná nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu náa Ndióxi veñuhu núná nu ná cuxu na cuñu quítí, rí najoco ñayivi nu Ndióxi. <sup>14</sup> Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúu cuéntá mé á ndehe sahá chuun cája nde. <sup>15</sup> Joo ni in túhún tañu coó nacaja ndúsa i xihín ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchi mé a ndaa ín vaha ini i cáhan i tuhun Ndióxi xihín ndo ta coó caja toho a ña ná quivi i joco.

<sup>16</sup> Yehe co ndíñehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchi cúu á chuun ndítahan nuú i caja i. Ta ndáhví nahá nacuu u tá ná caja

sáa ini i caxi tuhun i ña. <sup>17</sup> Tá ná cája i chuun yóho sahá ña cúní mí i cuití va já queá cuu quehe e yahvi sahá. Joo co cája toho i já jáchi nacaxi Ndióxi yehe cahan i tuhun mé á sahá ña cán queá ndúsa cája i ña. <sup>18</sup> Ta sa mé yahvi quehe e sahá chuun cája i queá cáji ini i tá cahan i tuhun vaha sahá Jesús nuú ñayivi ta co cháhvi na sahá. Ta cáji ini i jáchi co cája ndúsa i xihín ndo ña ná coto ndo yehe tá quiahva cája ndó xihín java ga na cahan tuhun Ndióxi xihín ndo.

<sup>19</sup> Vatí mí i co cúu u mozo ñayivi joo cája chúun i mí i tátuhun mozo saha tóco ndihi ñayivi. Jáchi caxi tuhun i tuhun vaha sahá Jesucristo nu ná já ná cuu ndicuaḥa chága na cúu cuénta Jesús. <sup>20</sup> Tá xíca nuu i tañu na Israel ndája i mí i tátuhun in da Israel jáchi ña cúní queá ná ndiquehe na íchi cuénta Jesús. Ña cúní cachi i queá tá ín i tañu na cája ley Moisés in cája i xihín ná vatí co ndíco i íchi cuénta ley Moisés viti. Joo cája i ña sahá ña cúní i ña ná ndiquehe na íchi cuénta Jesús. <sup>21</sup> Ta tá xíca nuu i tañu na co cája ña sáhdá ley Moisés já cája i tá quiahva cája mé ná jáchi cúní ña ná ndiquehe na íchi cuénta Jesús. Joo co cája i cuachi tá quiahva cája na cán jáchi sáhdá ley Ndióxi chuun nuú i viti ta cája i ña cúní Jesucristo cuití va. <sup>22</sup> Ta tá xíca nuu i tañu na vitá xihín ñaha Ndióxi já queá jánuu ndáha i mí i jáchi cúní ña ná ndindacú na xihín tuhun mé á. Ña cúní cachi i xihín ndo queá ndája i mí i tátuhun ndá na nacuu va jáchi cúní quee vaha i xihín ná já ná ndihvi na íchi cuénta Jesús ña ná cacu ndaa ínima ná. <sup>23</sup> Cája i tóco ndihi ña yóho já queá ná ndicujta nuu tuhun vaha cahan sahá Jesucristo. Jáchi xihín ña yóho caja cuaha Ndióxi ñamaní xihín i.

<sup>24</sup> Candehé ndo. Sa xini vaha ndó ña tá jáquehe táhan java ta tuhun da ña ná cunu da, mé a ndaa tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xini ñuhú nducú ndo cuhun vaha ndó íchi cuénta Jesús janda quiahva ná xinu coo ndó janda nu ndíhi cuíi já ná quiahva Ndióxi nu ndo ña ndítahan ndiquehe ndó. <sup>25</sup> Tóco ndihi ñayivi tá cája tiaḥva na mé ná

ñá ná cuhun na cunu na, co cúní na caja na ndá ña nacuu jáchi ndáa na mé ná. Tóco ndihi ña yóho cája na sahá ña cúní na quee vaha na ña ná ñeḥe ná in tiyivi ita sánúu jini ná vatí cama chá íchi ita cán. Joo mí ndúcú ndéé yo cuahan yó íchi cuénta Jesús jáchi ña ndátí mí quiahva Ndióxi nu yo co ndíhi saha anda ama cáa quivi. <sup>26</sup> Joo co cúu u in da xínu cuáa. Ta ni co cúu u tátuhun in da jácana yiquí nuú tachí. Jáchi ndúcú ndéé e quee vaha i já ná ndiquehe e ña quiahva Ndióxi nuú i. <sup>27</sup> Ña cája i queá cája ndúsa i xihín yiquí cuñu i ña ná caja i ña cúní Ndióxi. Jáchi a juú tiaḥva náa jándacoo Ndióxi yehe vatí mí i cúu u da najánaḥa tuhun Ndióxi nuú ñayivi.

## 10

### *Cáhan Pablo ña co ndítahan caja cáhnu na yoco*

<sup>1</sup> Candehé ndo ñani i, na cúu cuénta Jesús. Co cúní ña ná ndindójo ndo ndá quiahva nacaja Ndióxi sanahá xihín tásáhnu jícó yo tá nasandaca mé á na yucú íchi cán. Nacaja mé á ña ná xinu in vico núhú xoo nuú cuahan na ña ná candaca a na. Ta nachindeé a na ña ná cuu cojo cava na tañuhú nani tañuhú cuahá. <sup>2</sup> Ta tóco ndihi na cán in nanduu ndihi na xihín Moisés tá nayaha na tañuhú nani ndáca vico núhú na. Nasacuu a tátuhun nacandúta ná ña ná cacomí Moisés cuénta saha ná. <sup>3</sup> Ta tóco ndihi na cán naxixi na ña nachindahá Ndióxi, ña naquixi a nu ná chí indiví. <sup>4</sup> Ta quiahva já tóco ndihi na cán naxihi na ticuú, dó nasahan mé á nu ná coho na. Mé ticuú cán cúu dó dó nacana tixi in tóto. Ta mé tóto cán cúu á tátuhun yuhú nuú Jesucristo, mé a nasahiin xihín ná nani naxica nuu na yucú íchi cán. <sup>5</sup> Joo cuahá ndivaha táhan na cán nacaja na ña núu ña co cáji iní Ndióxi xihín. Sahá ña cán queá naxihí na mé yucú íchi nu xíca na cuahan na cán.

<sup>6</sup> Tóco ndihi ña nayaha yóho jánaḥa nu mí ña co ndítahan ndiava iní ña co táhan ini Ndióxi xihín tá quiahva nacaja na cán. <sup>7</sup> Sahá ña cán queá coto a juú caja cáhnu ndó yoco tá quiahva nacaja java na cán jáchi já cáchi tuhun Ndióxi já: “Tóco ndihi ñayivi cán nasacanduu na xíxi na ta xíhi

na ta já nandicuïta na xíta sáhá ña ña cája cáhnu na yoco”, já ñacaja na cáchí tuhun Ndióxi. <sup>8</sup> Joo mí xíní ñúhú candaa í mí já ná a cája í cuachi ña quihvi nuu í xihín inga najihí á xihín inga ñataa tá quiahva ñacaja java na cán. Ta sahá cuachi ñacaja na cán naxihí oco uní mil na in túhún quivi. <sup>9</sup> Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í. Jáchi quiahva já ñacaja java na cán va ta sahá ña cán naxihí na ñacaja cuahá coo. <sup>10</sup> Coto a cáhan cuéhé ndó saha Ndióxi tá quiahva ñacaja java tásáhnu jícó yo cán. Jáchi sahá ña ñacaja na naxihí na ñacaja tátó Ndióxi, mé a xíca sáhní ñahá.

<sup>11</sup> Tóco ndihi ña nayaha xihín tásáhnu jícó yo cúu á ña náha nu yo ña co ndítahan quehe núu í Ndióxi. Ta ñacayí a nuú tuhun Ndióxi já ná cuni mí, yó ndúu tiempo yóho ña co ndítahan caja í tá quiahva ñacaja na cán jáchi sa ñacayati quivi ndihi saha ñuyiví. <sup>12</sup> Ña cán quéa tá cáhan ndo cuahan vaha ndó íchi cuéntá Ndióxi já quéa xíní ñúhú candaa vaha ndó mé ndó já ná a ndícava ndó nuú cuachi. <sup>13</sup> Candehé ndo. Xíní ñúhú ndicuhun ini ndó ña a juú mé ndó cuití quixi tondóhó nuu jáchi quixi tondóhó ñan nu tóco ndihi java ga ñayivi. Ta ndítahan candee ini ndó Ndióxi jáchi a quiahva toho mé á ñamani ña ná quixi tondóhó náhnu nu ndo ña co cándee ndó xihín. Ña cája Ndióxi quéa chindee a ndohó tá ná quixi tondóhó nu ndo já ná cuu caja ndee ini ndó tá ná ndoho ndó ña.

<sup>14</sup> Candehé ndo ñani i, na cúu cuéntá Jesús. Xíní ñúhú jándacoo vaha ndó ña cája cáhnu ndó yoco. <sup>15</sup> Tá quiahva cáhan i xihín ñayivi tácu ini quiahva já cáhan i xihín ndo. Ta mé ndó cándaa vaha ini ndó á ndaa á a ndaa quéa cáhan i xihín ndo. <sup>16</sup> Ná ndiquiahva í ndixahvi nu Ndióxi tá ndicuhun iní sahá ña ñacaja Jesucristo tá naxihí a saha yo. Jáchi tá xihí vino ña yíi já cúni cachi a ña in nanduú xihín mé á sahá ña naxita ñi mé á ndica crúxu saha yo. Ta jári tá xixí pan ña yíi ña sáhdá java nu táhan í cúni cachi a ña in nanduú xihín mé á jáchi nandiquiahva yiquí cuñu a saha yo. <sup>17</sup> Ta vatí cuahá ndivaha cúu yó joo in túhún pan

sáhdá java í xixí jáchi xihín ña yóho náha ña in cúu ndihí xihín Jesucristo.

<sup>18</sup> Xíní ñúhú candehé ndo ndá quiahva cája na Israel jáchi tá sáxi na cuñu quítí, rí najoco inga na nu náa cán já cúu á tátuhun mé ná nasahní na mé quítí cán ta najoco na rí. Quiahva já yáha xihín mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña. <sup>19</sup> Joo xíní ñúhú ndicuhun ini ndó tá cáchí i ña yóho xihín ndo co cúni cachi i ña in sahá yoco. Ta ni co cúni cachi i ña in chága sahá cuñu najoco na nuú yoco a juú ga inga cuñu. <sup>20</sup> Ña cúni cachi i xihín ndo quéa tá ná joco ñayivi, na co xíní Ndióxi ñan in quítí nuú yoco cúu á tátuhun jóco na ñan rí nuú tiñahá va. Ta co cája toho na ña nu Ndióxi. Ta cáxi tuhun i ña yóho xihín ndo já ná a cáxi ndó cuñu ñan jáchi tá ná caxí ndó ña cacuu a tátuhun najoco rí ndohó va ña nuú tiñahá. <sup>21</sup> Jáchi a cúu cuhun ndo coho ndó ña najoco na nuú rí quini ta já quixi ndó coho ndó ña yíi cuéntá Jesucristo, xitoho í. Ta ni a cúu cuxu ndó ña najoco na nuú rí quini ta já cuxu ndó ña yíi, ña xixi na tá ndicuhun ini na ña naxihí Jesucristo, xitoho í. <sup>22</sup> A cája ndó ña yóho jáchi cúu á tátuhun cúni ndó jácojo ndó ini Ndióxi. Xíní ñúhú ndicuhun ini ndó ña co cúu ndó na ndacú chága a juú ga Ndióxi.

*Sahá ña quihvi iní ñani táhan í co ndítahan caja í ndá ña nacuu cúni mí caja í*

<sup>23</sup> Ndúu java na ta cáchí na já: “Núná nu yo caja í ndá ña cúni mí caja í.” Vatí ña yóho cúu á ña ndaa joo a juú ndihi ña cája í cája vaha xoho. Mé a ndaa núná nu yo caja í ndá ña cúni mí joo co chindee a mí cuahnu í xihín ñaha Ndióxi. <sup>24</sup> Co ndítahan nu yo nducú yó ña vaha mí cuití yo. Ndítahan ndihi iní caja í ña vaha sahá ñani táhan í.

<sup>25</sup> Cuu caxí ndó ndijáa cuñu cáyahvi nuú yahvi ta a ndaca tuhún ndo ndájá ñaquixi a já ná a cáhvi ivi joho ini ndó xihín á. <sup>26</sup> Jáchi ñaha Ndióxi, xitoho í cúu ñuyiví yóho xihín tóco ndihi ña in nu á.

<sup>27</sup> Candehé ndo. Tá ná cana in na co cúu cuéntá Jesús ndohó ña ná cuhun ndó cuxu ndó xihín ná, cuahán ndo tá cúni ndo ta cuxu ndó tóco ndihi ña sácú na nu ndó cuxu ndó. Ta a ndaca tuhún ndó na á ñaquixi a nuú yoco. Cuxu ndó ña jáchi tá ná ndaca

tuhún ndo na já cuu casáhá ndicani ini ndó xihín á. <sup>28</sup> Joo tá sa naçaxi tuhun yachi na xihín ndo ña cúu á cuñu najoco na nuú yoco já quea a cúxu toho ndó ña. Jáchi tá ná cuxu ndó ña já quea caja ndó ña ná a váha cuu ini mé na cán. <sup>29</sup> Cáhan i ña yóho jáchi cúni ña ná caja váha ndó sahá inga na. Co cáhan i ña saha mé ndó.

Mé a ndaa ndúu java ndó ta cáhán ndo ña co ndítahan ndihi ini ndó sahá ña cáhvi ini inga na jáchi cáhán ndo ña núná nu ndó caja ndó ña cúni ndo. <sup>30</sup> Ta java ndó cáhán ndo ña tá sa nandiquiahva ndó ndixahvi nu Ndióxi sahá ña xixi ndó já quea a cuú cahan núu ñayivi sahá ña cája ndó. <sup>31</sup> Joo cáchi i xihín ndó ña xíní ñúhú candehé váha í ña cája í ná a jándicava í inga na nuú cuachi. Jáchi janda xihín ña xixi ta xihín ña xihí, xíní ñúhú caja cáhnu í Ndióxi. <sup>32</sup> Co ndítahan cacuú na jándicava inga ñayivi nuú cuachi jáchi tá cája í já cúu yó tátuhun yuu cándúhu jácachihin sahá ñayivi. A cája ndó já xihín na Israel ta ni xihín na tóho ta ni xihín na cúu cuéntá Jesús. <sup>33</sup> Ta tóco ndihi ña cája i, cája i ña ná cajii ini ndihi ñayivi xihín. Ta co ndúcú u ña váha mí i jáchi ndúcú u ña ná cajii ini ñayivi já ná cuu cacu ndaa ínimá ná.

## 11

<sup>1</sup> Xíní ñúhú caja ndó tá quiahva cája yehe jáchi quiahva já cája i ña naçaja Jesucristo, xitoho í.

*Ña ndítahan nuú najihí caja na tá cája cáhnu na Ndióxi*

<sup>2</sup> Cájii íní i xihín ndo, ñani i, na cúu cuéntá Jesús. Jáchi níi tiempo ñúhu ini ndó sahá i ta cája ta cája ndó ña najánaha i nu ndo. <sup>3</sup> Joo cúni ña ná candaá ini ndó ña cúu Jesucristo jini nuú in in taa. Ta quiahva já in in taa cúu dá jini nu ñájihí da. Ta quiahva já Ndióxi cúu á jini nuú Jesucristo. <sup>4</sup> Sahá ña cán quea tá co candaá in dataa yijini dá nani xíca tahví da nu Ndióxi á nani cáhan da tuhun Ndióxi nu táca ñayivi já quea náha ña co cája cáhnu da Jesucristo, mé a cúu jini nu mé dá. <sup>5</sup> Ta in ñáñáha tá co chíjahvi ña jini ña nani xíca tahví ña nu Ndióxi á nani cáhan ña tuhun Ndióxi nuú ñayivi veñuhu já quea náha ña quehe núu ña yíi ña, da cúu jini nu mé ñá. Cúu á tátuhun najatá ña jini

ña. <sup>6</sup> Jáchi tá co chíjahvi in ñáñáha jini ña janda váha chága ví ná jatá táhyí ña jini ña. Joo tá cáhán ña ña quini canáha jini ña tá ná jatá táhyí ña jini ña já quea xíní ñúhú chíjahvi ña jini ña. <sup>7</sup> Co ndítahan toho nuú in dataa chíjahvi da jini dá veñuhu jáchi mé dá cúu dá da naçavaha Ndióxi xihín yuhú nuú mé á. Ta mé dá cúu dá da náha ndá quiahva cáhnu cúu Ndióxi. Ta náha in ñáñáha ña yíi ña cúu da jini nu ña. <sup>8</sup> Jáchi xíní ñúhú ndicuhun ini ndó ña coo natavá toho Ndióxi lásá yiquí ndícá ñáñáha já naçavaha mé á dataa, váha. Ña naçaja mé á quea natavá a lásá yiquí ndícá dataa ta já naçavaha mé á ñáñáha. <sup>9</sup> Jihna ñúhú naçavaha Ndióxi dataa ta já naçavaha mé á in ñáñáha chindeé ná da. <sup>10</sup> Ta sahá ña jihna ñúhú ga naçavaha Ndióxi dataa sahá ña cán quea ndítahan nuú in ñáñáha chíjahvi ña jini ña ná náha ña nu táto Ndióxi ña mé a ndaa cája cáhnu ña yíi ña. <sup>11</sup> Joo mí, na cúu cuéntá Jesús ndítahan candaá iní ña xíní ñúhú táhan taa xihín náha. <sup>12</sup> Vatí naçavaha Ndióxi ñáñáha nu cuítí xihín lásá yiquí ndícá dataa joo vití tóco ndihi dataa cácu da ñuyíví yóho cája najihí. Joo tóco ndihi ñayivi tácu na jáchi já cúni Ndióxi.

<sup>13</sup> Mé ndó xíní ñúhú candehé ndo á váha á a váha toho ña ná a chíjahvi in ñáñáha jini ña nani xíca tahví ña nu Ndióxi veñuhu. <sup>14</sup> Jáchi sa candaá váha iní ña a váha toho cája dataa tá lín nani ijí jini dá. <sup>15</sup> Joo ndisáhnu náha ñáñáha tá lín nani ijí jini ña jáchi Ndióxi nasahan ijí jini ña nu ña já ná chíjahvi a jini ña. <sup>16</sup> Joo tá ndúu java na ta co táhán ini na xihín ña cáhan i yóho já quea co cúni toho i ndituhún ihvi i xihín ná sahá ña yóho. Jáchi xíní ñúhú candaá ini na ña ndijáa java ga na cúu cuéntá Jesús cája na tá quiahva cáchi i yóho tá táca na veñuhu.

*Jánani Pablo na cúu cuéntá Jesús jáchi co cája ndisáhnu na tá táca na cajini na ña yíi cuéntá Jesús*

<sup>17</sup> Ta lín inga náha cúni cahan i xihín ndó saha ta co táhán ini i xihín á. Jáchi nañehé e tuhun ña co cája váha ndó tá táca ndo veñuhu. <sup>18</sup> Candehé ndo. Sa nañehé e tuhun ña sáhdá java táhan ndó tá táca ndo cája cáhnu ndó Ndióxi. Ta cája i cuéntá

cándusa i ña cáchí na saha ndo. <sup>19</sup> Vati mé a ndaa náha xicá a ña ndítahan cahnda táhan ndó já ná cuu cuni ñayivi ndá ndó cúu ndusa cuéntá Jesús ta ndá ndó co cúu cuéntá Jesús. <sup>20</sup> Ta sahá ña sáhdá táhan ndó nu táca ndó jan, náha ña quehe núu ndó ña yii xijini ndó ta xihín ña yóho co cúu ga ña cuéntá Jesucristo, xitoho í. <sup>21</sup> Jáchi tá ndíndaa hora cajini ndó tá in tá in ndó sa jihna ñuhú ndo ndáva ndó cuahan ndó quehe ndó ña cajini mé cuití ndo. Ta java ndó ni co ñehe ndó ña cuxu ndó. Joo java ndó xíhi ndó janda jáxini ndó mé ndó. <sup>22</sup> Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a váha cája ndó jáchi co ñehe na ndahví ña cuxu na cája ndó ta xihín ña yóho cácahan nu ná. A cándati toho ndó ña cajii íni i xihín ña cája ndó yóho jáchi a juú ña vaha queá cája ndó.

*Ña ndítahan caja na cúu cuéntá Jesús tá xijini na ña yii cuéntá Jesús*

*(Mt. 26:26-29; Mr. 14:22-25; Lc 22:14-20)*

<sup>23</sup> Ña jánaha i nu ndo yóho cúu ña najánaha Jesucristo, xitoho í nuú i. Jáchi mé ñuu tá cámaní ndiquiahva na mé á ndáha na ihvi a já natiin a in pan. <sup>24</sup> Tá nandihí nandiquiahva ndixahví nu Ndióxi já nasahnda java ña ta já nacachi a já xihín ná: “Mé pan yóho cúu á tátuhun yiquí cuñu i ña ndiquiahva i saha mé ndó. Xíni ñuhú caja ndó ña yóho ña ná ndicuhun ini ndó ña naxihí i saha ndo”, nacachi Jesús. <sup>25</sup> Ta tá nandihí naxijini na cán já natiin a in vaso nu ñuhu tó uva. Ta já nacachi a já: “Dó ñuhu ini vaso yóho cúu dó tátuhun níi i, dó cuíta saha ndó. Ta xihín dó yóho xinu coo nuú tuhun nasahan Ndióxi nuú ñayivi sanahá tá nacachi a jácau a ñayivi. Ndijáa tañu tá ná coho ndó mé tó uva, dó yii ndítahan ndicuhun ini ndó ña naxihí i saha ndo”, nacachi Jesús. <sup>26</sup> Sahá ña cán queá ndijáa tañu tá táca ndo xíxi ndó pan ta xíhi ndó tó uva yóho cúni cachi a ña ndicuhun ini ndó ña naxihí Jesucristo, xitoho í saha ndo. Ta xíni ñuhú caja ndó ña janda quiahva ná quixi tucu mé á ñuyívi yóho.

<sup>27</sup> Candehé ndo. Tá ná cuxu ndó pan ta tá ná coho ndó tó uva, ña yii cuéntá Jesucristo,

xitoho í ta co íin vii ínima ndo já queá cája ndó cuachi nu mé á ta quehe núu ndó ña naxihí a ndica crúxu saha ndo. <sup>28</sup> Sahá ña cán queá tá cámaní casahá cajini ndó ña yii cuéntá Jesús xíni ñuhú coto ndojó jihna ndó mé ndó á vii ínima ndo nu Ndióxi á coó vii a. <sup>29</sup> Jáchi tá ná cuxu ndaja nacuu ndó ña yii cuéntá Jesús já queá náha ña quehe núu ndó mé á. Jáchi ña xíxi ndó jan cúu á tátuhun yiquí cuñu mé á ta dó xíhi ndó jan cúu dó tátuhun níi á. Ta tá ná quehe núu ndó ña já quixi ña ndoho ini ndó caja Ndióxi. <sup>30</sup> Sahá ña cája ndó jan cuaha táhan ndó quíhvi ta cuaha ndó cávitá ndó ta anda java na sa naxihí ná sahá ña naquehe núu na ña yii cuéntá Jesús. <sup>31</sup> Joo tá ná coto ndojó yo mí ña á íin vii ínima yo nu Ndióxi já queá a ndítahan toho nu mé a cúu xitoho í caja vii a sahá cuachí. <sup>32</sup> Joo tá jándoho mé á ini mí cúu á sahá ña co cúni a ña ná ndoho iní xihín ñayivi ñuyívi tá ná xinu coo quívi caja vii mé a cúu xitoho í sahá cuachi nacaja na cán.

<sup>33</sup> Candehé ndo, ñani i, na cúu cuéntá Jesús. Ña ndítahan caja ndó cúu ña yóho. Tá ná nditaca ndó cajini ndó ña yii cuéntá Jesús xíni ñuhú candati táhan ndó janda quiahva ná taca tóco ndihi ndó. <sup>34</sup> Ta tá cuico ndó já queá xíni ñuhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajini ndó ña yii jan. Ta caja vii i sahá java ga ñaha tá ná saa i coto nihni i ndohó jan.

## 12

*Ña ñehe táhvi ñayivi nu ínima yii Ndióxi*

<sup>1</sup> Candehé ndó, ñani i, na cúu cuéntá Jesús. Cáhyi i ña yóho nu ndo jáchi cúni ña ná candaa ini ndó ndaja íin ña sahan ínima yii Ndióxi nu yo.

<sup>2</sup> Mé ndó sa cándaa vaha ini ndó ña tá cámaní ndiquehe ndó íchi cuéntá Jesús já nasacuu ndó tátuhun ñayivi cuáa jáchi nasanduu ndó ndáha tá nuú yoco, ña coo tachi cáhan. <sup>3</sup> Ta viti cúni caxi tuhún i xihín ndo ña ni in ñayivi a cuú chicaan na chahan jata Jesús tá ta ínima yii Ndióxi queá sahan tuhun nu ná cahan na. Ta tá cáchí na xihín ndinuhu ini na ña Jesús cúu xitoho na já

quéa náha ña ínimā yīi Ndióxi quéa sáhan tūhun nū ná caḥan na.

<sup>4</sup> Cuahá nuú ñaha ñéhe táhvi ñayivi caja na cuéntá Ndióxi ta in tūhún ínimā yīi Ndióxi sáhan ña nū ná. <sup>5</sup> Cuahá nuú chuun cuu caja ñayivi cuéntá Ndióxi ta tóco ndihí cája chúun í cuéntá mé a cúu xitoho í. <sup>6</sup> Ta sa jíin sa jíin cája in in í chuun naṣahan Ndióxi nū yó caja í. Joo in tūhún mé á quéa sáhan ña yóho nuú in in í caja í. <sup>7</sup> Ta sáhan Ndióxi in ñaha nuú in in í já náha ña ñúhu ínimā yīi Ndióxi iní ta xihín ña yóho cuu chindeé yo tóco ndihi na cúu cuéntá Jesús. <sup>8</sup> Ínimā yīi Ndióxi yóho quéa cája ña ná cuu candaa ini java ñayivi ndaja íin ña vaha xihín ña a váha ta já ndicani na ña nuú ñayivi. Ta sa mé ínimā yīi Ndióxi quéa cája ña ná cuu caḥan ñayivi ña ndíchí ndivaha. <sup>9</sup> Ta cája mé ínimā yīi Ndióxi yóho xihín java na ña ná candee cáhnu ini na mé á. Ta sáhan mé ínimā yīi Ndióxi nuú java na ña ná cuu ndaja vaha na na quíhvi. <sup>10</sup> Java na ñéhe táhvi ná caja na ña xitúhún. Ta java na ñéhe táhvi ná jáyaha na tūhun naṣahan Ndióxi xihín ná nuú ñayivi. Ta java na ñéhe táhvi ná ndicuni na ndá na cúu na cája chúun cuéntá ínimā yīi Ndióxi ta ndá na co cája chúun toho cuéntá mé á. Ta java na ñéhe táhvi ná caḥan na tūhun ña coo naṣatiahva na. Ta java na ñéhe táhvi ná nducú ñehe na ña cúni cachi tūhun cáhan na cán nuú ñayivi. <sup>11</sup> Ta sa mé ínimā yīi Ndióxi cája tóco ndihi ña yóho ta in tūhún mé á sáhan nuú in in ñayivi ña sácú ini a caja chúun vaha na xihín.

*In cúu tóco ndihi na cúu cuéntá Jesús saḥá ña candee ini na mé á*

<sup>12</sup> Candehé ndo. Cuahá ndivaha nū ndáca yiquí cuñu í joo in víxí cúu á. Quiahva já íin xihín na cúu cuéntá Jesús. <sup>13</sup> Ta quiahva já yáha xihín tóco ndihi mí, coo caja toho a á cúu yó na Israel á coo cúu yó na Israel. Ta coo caja toho a á cúu yó na cómi in xitoho cuéntá saḥa, á cúu yó na xíca núná mé. Jáchi cája ínimā yīi Ndióxi ña cúu yó tátuhun in víxí ñayivi saḥá ña in nanduú xihín Jesucristo tá naṣandúta yó cuéntá mé á. Ta in tūhún ínimā yīi mé á naṣacu a ini ínimā in in í.

<sup>14</sup> Xíní ñúhú ndicuhun iní ña a juú in víxí nū ndáca yiquí cuñu í jáchi cuahá ndivaha

nū ndáca yiquí cuñu ñayivi. <sup>15</sup> Candehé ndo. Cúu á tátuhun tá ná caḥan in xoo saḥa yo já cáchi a já: “Yehe coo cúu toho í ndáha ñayivi saḥá ña cán quéa coo chuun toho í nuú yiquí cuñu na”, cáchi a. Joo coo cája toho ña caḥan saḥa yo yóho jáchi cúu á cuéntá yiquí cuñu í. <sup>16</sup> Ta cúu á tátuhun tá ná cachi in johó í já cáchi a já: “Yehe coo cúu toho í nduchú núu ñayivi saḥá ña cán quéa coo chuun toho í nuú yiquí cuñu na”, cáchi a. Joo coo cája toho ña caḥan johó í yóho jáchi cúu á cuéntá yiquí cuñu í. <sup>17</sup> Jáchi caja mé ndó cuéntá ndaja caja í cuni johó í tá níí cúu yiquí cuñu í ná cacuu a nduchú núu yo. Ta ndaja caja í tahmí ñaha tá níí cúu yiquí cuñu í ná cacuu a johó í. <sup>18</sup> Joo in in ña ndáca yiquí cuñu í yóho naṣacu Ndióxi ña mé nū ndítahan coo a jáchi já naṣacu ini a caja. <sup>19</sup> Xíní ñúhú caja ndó cuéntá tá in víxí johó ná candaca níí cúu yiquí cuñu í já quéa coo íin ndihi toho yiquí cuñu í. <sup>20</sup> Ta vatí cuahá ndivaha nū ndáca yiquí cuñu in in í joo in víxí cúu yiquí cuñu í. Ta quiahva já íin a xihín na cúu cuéntá Jesús.

<sup>21</sup> Candehé ndo jáchi sácú u in quiahva nū ndo: Nduchú núu yo a cúu cachi a xihín ndáha yo ña coo xíní ñúhú a ña. Ta ni yiquí jíní yo a cúu cachi a xihín saḥa yo ña coo xíní ñúhú a ña. <sup>22</sup> Ña yáha xihín yiquí cuñu í cúu ña yóho. Java tañu cáhan yo ña vitá in ñaha ndáca yiquí cuñu í joo ña jan xíní ñúhú chága yó ña. <sup>23</sup> Ta mé xoo yiquí cuñu í ña cáhan yo coo cuahá saḥa, ña coo cúni yo ña ná candehé ñayivi, ña cán cúu ña chijahví vaha í <sup>24</sup> vatí coo xíní ñúhú caja í já xihín ñaha ña cuu candehé ñayivi. Xihín ña yóho cuu candaa iní ndá quiahva naṣavaha Ndióxi in in xoo yiquí cuñu í ta cuu candaa iní ndaja candaa vaha chága yó ña cáhan yo coo cuahá saḥa. <sup>25</sup> Ta xihín ña yóho coo sáhdá java táhan yiquí cuñu í jáchi in in xoo yiquí cuñu í ndihi ini a saḥá java ga xoo yiquí cuñu í. <sup>26</sup> Ña cán quéa tá ndicuehe in xoo yiquí cuñu í ndijáa java ga ña cán ndíhíhvi a saḥá ña ndóho in xoo yiquí cuñu í. Joo tá víí cája na xihín in xoo yiquí cuñu í já quéa cáji ini java ga xoo yiquí cuñu í.

<sup>27</sup> Ta tóco ndihi ndó, na cúu cuéntá Jesús cúu ndó tátuhun yiquí cuñu Jesucristo jáchi



in nanduu ndihi ndó xihín á ta in in ndó cúu ndó tátuhun in xoo yiquí cuñu a. <sup>28</sup> Ta tá quiahva ín chuun cajú in in xoo yiquí cuñu í quiahva já ín chuun cajú in in na cúu cuéntá Jesús. Jihna ñúhú ñacaxi Ndióxi na apóstol ta já ñacaxi a na jáyaha tuhun Ndióxi nuú ñayivi ta já ñacaxi a na jánaha tuhun Ndióxi nuú ñayivi ta já ñacaxi a na cajú ña xitúhún. Ta já ñacaxi a na ndája vaha na quíhvi xihín na chindeé ñayivi xihín na sáhdá chuun nuú java ga ñayivi xihín na cáhan tuhun ña coó nasatiahva na. <sup>29</sup> Joo a juú ndihi na cán cúu apóstol. Ta ni a juú ndihi na cúu ná na jáyaha tuhun cáhan Ndióxi nuú ñayivi. Ta ni a juú ndihi na jánaha ñayivi. Ta ni a juú ndihi na cajú ña xitúhún. <sup>30</sup> Ta ni a juú ndihi na ndája vaha na na quíhvi. Ta ni a juú ndihi na cáhan tuhun ña coó nasatiahva na. Ta ni a juú ndihi na tiahva nducú ñehe ña cúní cachi tuhun cáhan na cán. <sup>31</sup> Joo mé ndó xíní ñúhú ndinducú ndo ña ná quiahva Ndióxi in ña vaha chága nu ndo. Ta viti cúní jánaha í ña cúu ña vaha chága nu ndo.

## 13

### *Ña ndítahan cajú í tá quíhvi iní ñayivi*

<sup>1</sup> Tá ná cuu cahan í tá nuú tuhun cáhan ñayivi ndúu ñuyívi yóho ta tá ná cuu cahan í tuhun cáhan tátó Ndióxi joo tá co quíhvi iní í ñayivi já queá coó saha toho ña cáhan í. Jáchi xihín ña jan cúu u tátuhun in caa jácasá na, á tátuhun in caa xoo tá jácasá na ña. Quiahva já ín í tá co quíhvi iní í ñayivi. <sup>2</sup> Ta ni coó sahá ña ná cacuu u in da jáyaha tuhun cáhan Ndióxi nuú ñayivi tá co quíhvi iní í ñani táhan í. Jáchi tá co quíhvi iní í ñayivi coó cajú toho ña ná cuu candaá iní í tóco ndihi ñaha ta ni coó cajú toho a tá xíní tóco ndihi ña xíní da ndichí ta ni coó saha toho tá cándéé cáhnu ndivaha iní í Ndióxi janda quiahva cuu cahan í xihín in yucu ña ná ndicanda ña. Coó saha toho tóco ndihi ña yóho tá co quíhvi iní í ñani táhan í. <sup>3</sup> Ta vatí ná ndicahnda í tóco ndihi ña cómí í ta já quiahva í ña nuú na ndahví coó sahá toho ña cajú í tá co quíhvi iní í ñayivi. Ta ni coó cajú toho ña ná ndiquiahva í yiquí cuñu í ña ná cayí a sahá ña cáhan í tuhun Ndióxi tá co quíhvi iní í ñayivi.

<sup>4</sup> Jáchi tá mé a ndaa táhyí quíhvi iní ñayivi co ndihi iní xihín ná. Ta tá quíhvi iní na táhvi iní saha ná ta co cáhvi toho iní xihín ná. Ta ni co cajú lándá yo nu ná ta ni co cajú cáhnu í mí nu ná. <sup>5</sup> Tá quíhvi iní ñayivi ín toní ñúhú yo xihín ná ta co cájihnda yo ñaha nu ná jáchi co nducú yo ña vaha mé cuití yo. Ta ni co xójo iní xihín ná. Ta ni co quehé cuéntá sahá ña núu cajú na xihín yo tá quíhvi iní na. <sup>6</sup> Ta tá quíhvi iní ñayivi co cáji toho iní tá cajú núu na joo cáji iní tá cajú na ña ndaa. <sup>7</sup> Tá quíhvi iní ñayivi ín tiahva í ndoho iní saha ná ta cáhvi iní ña vaha cuití va saha ná. Ta cándusa í ña cajú na ña ndaa. Ta sahan ndeé iní xihín tóco ndihi ñaha.

<sup>8</sup> Tá mé a ndaa quíhvi iní ñani táhan í já queá anda ama cáa quívi a ndihi sahá ña quíhvi iní na. Joo vaxi quívi a jáyaha ga ñayivi tuhun cáhan Ndióxi xihín ná nuú ñayivi jáchi vaxi quívi ndihi sahá. Ta a cáhan ga na tuhun ña coó nasatiahva na. Ta vaxi quívi ndihi sahá ña ndichí jini ñayivi. Joo a ndihi toho saha ña quíhvi iní táhan í. <sup>9</sup> Jáchi chá cuití xíní yo saha Ndióxi ta chá cuití tiahva í jáyaha í tuhun cáhan Ndióxi nuú ñayivi. <sup>10</sup> Joo tá ná xinu coo quívi ndaja Ndióxi ña ná nduú ñayivi víi já queá a cúní ñúhú ga yo ña tóco ndihi java ga ña ndihi saha cán jáchi sa nanduu ñayivi víi nu mé á.

<sup>11</sup> Candehé ndo. Tá nasacuu u in taa loho nacahan í tá quiahva cáhan na valí ta quiahva já nahvi iní í ta quiahva já nacaja í. Joo tá nasahnu í najándacoo í ña cajú na valí. <sup>12</sup> Viti co candaá vaha iní ndá quiahva cáa Ndióxi. Cúu á tátuhun tá sándehe yo nuú in yutátá ña co jíñu vaha ga. Joo vaxi quívi cuní mé á tá quiahva cáa. Viti cuahá ñaha co candaá iní saha mé á. Joo vaxi quívi candaá iní saha mé á tá quiahva xíní mé á mí viti. <sup>13</sup> Ín uní nuú ñaha ña a ndihi sahá. Ta ña yóho cúu á: ña cándéé iní Ndióxi, ta inga cúu ña ndatí casaa, ta inga cúu ña quíhvi iní Ndióxi xihín ñani táhan í. Ta cúní Ndióxi ña ná cajú í ndihuní ña yóho joo ña cáhnu chága cúu ña quíhvi iní Ndióxi xihín ñani táhan í.

## 14

*Tá cáhan ñayivi tuhun ña coó ñacatiahva na*

<sup>1</sup> Xíní ñúhú ndíhi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sáhan ínimá yíi Ndióxi nu yo. Ña xíní ñúhú ndíhi chága ini ndó ndinducú ndo cúu ña ná cuu jáyaha ndó tuhun cáhan Ndióxi xihín ndó nuú ñayivi. <sup>2</sup> Jáchí ndá na ñacuu cáhan tuhun ña coó ñacatiahva na já quéa cáhan na xihín Ndióxi joo co cáhan na xihín ñayivi jáchi co cándaá ini ñayivi ña cáhan na. Ña cáhan na cúu ña ñaquixi cuéntá ínimá yíi Ndióxi ta cúu á ña co xíní ndíhi ga ñayivi. <sup>3</sup> Joo ñayivi tiahva jáyaha tuhun cáhan Ndióxi xihín ná nuú ñayivi cája na ña ná cuu cuahnu chága na cúu cuéntá Jesús xihín tuhun cáhan Ndióxi. Ta sáhan na tuhun ndeé ini ñayivi ta quiahva já jáxinu chága na ini na cán. <sup>4</sup> Ta na ñehe táhvi cáhan tuhun ña coó ñacatiahva na sáhnú mé cuití va na xihín tuhun sáhan Ndióxi nu ná cahan na. Joo na tiahva jáyaha tuhun cáhan Ndióxi nuú ñayivi chindeé na na cúu cuéntá Jesús ña ná cuahnu chága na xihín ñaha cuéntá Ndióxi.

<sup>5</sup> Mí i cájii íni i tá ná cuu cahan ndíhi ndó tuhun ña coó ñacatiahva ndó. Joo cájii chága ini i tá ná jáyaha ndó tuhun cáhan Ndióxi xihín ndó nuú ñayivi jáchi xíní ñúhú chága ña yóho a juú ga ña ná cahan ndó tuhun ña coó ñacatiahva ndó. Vaha cája ndó ña ná cahan ndó tuhun ña coó ñacatiahva ndó tá íni in na tiahva nducú ñehe ña cúni cachi tuhun cáhan ndo nuú ñayivi já quéa ná cuu cuahnu na cúu cuéntá Jesús xihín mé tuhun cán. <sup>6</sup> Xíní ñúhú candehé vaha ndó ña cáhan i xihín ndo, ñani mí i na cúu cuéntá Jesús. Coó saha toho ña cája i tá ná saa i coto nihni i ndohó ta já casahá i cahan i inga tuhun ña co cándaá ini ndó. Tá ná caja i já ndaja caja ndó candaa ini ndó tuhun Ndióxi. Ña ndítahan caja i quéa cahan i xihín ndo ña najánaha Ndióxi nuú i. Ta ndítahan cahan i ña ndíchi cuéntá Ndióxi. Ta ndítahan cahan i tuhun nasahan Ndióxi nuú i jáyaha i ña nu ndo. Ta ndítahan jánaha i ña ndaa cuéntá Ndióxi nu ndo.

<sup>7</sup> Sácú u in quiahva nu ndó saha in tóyoo xihín dó jácaha. Ndaja caja ñayivi candaa ini na ndá yaa tiví yo tá co tiáhva í tiví vaha í, á tá co tiáhva í jácaha vaha í. <sup>8</sup> Ta ndaja

caja na soldado cacu tiahva na mé ná ña ná cuhun na caní táhan na tá ta co tiáhva vaha da tiví trompeta tiví da do. <sup>9</sup> Quiahva já yaha ri xihín mé ndó jáchi tá co cáhan ndó tuhun ña cuu candaa ini ñayivi ndaja caja ri na cán candaa ini na ña cáchi ndo. Cúu á tátuhun cáhan ndó nu táchi cuití va. <sup>10</sup> Cája i cuéntá íni cuahá ndivaha nuú tuhun cáhan ñayivi ndijáá ñuyíví. Joo ndijáá tuhun yóho cáxi cáhan nuú ñayivi cáhan na mé tuhun yóho. <sup>11</sup> Joo tá co cándaá ini i ña cáhan inga ñayivi xihín i já cúu u tátuhun in da tóho nu mé ná. Ta na cán cacuu na tátuhun in na tóho nu mí i sahá ña co cándaá ini i tuhun cáhan na. <sup>12</sup> Sahá ña cán quéa tá mé a ndaa cúni ndó ndiquehe ndó ña sáhan ínimá yíi Ndióxi nu ndo já quéa xíní ñúhú ndinducú ndó ña ná cuu chindeé ndó na cúu cuéntá Jesús ná cuahnu chága na xihín tuhun Ndióxi.

<sup>13</sup> Ña cán quéa ndá ndó ñehe táhvi cáhan ndó tuhun ña coó ñacatiahva ndó já quéa xíní ñúhú caça ndó nu Ndióxi ña ná cuu ndicani ndó ña cúni cachi a nuú ñayivi. <sup>14</sup> Jáchí tá ná casahá cáhan i tuhun ña coó ñacatiahva i nani xíca tahví i nu Ndióxi já quéa mé a ndaa cája cáhnú i Ndióxi xihín ínimá i joo co cája i ña xihín xíní túni i jáchi co cándaá ini i ña cáhan i. <sup>15</sup> Ndía caja i. Ña xíní ñúhú caja i quéa caça tahví i nu Ndióxi xihín ínimá i ta xihín xíní túni i. Ta quiahva já xíní ñúhú cata i xihín ínimá i ta xihín xíní túni i viti. <sup>16</sup> Candehé ndó. Ná caja í cuéntá tá ndúu ndó veñuhu ta casahá ndo cáhan ndó tuhun ña coó ñacatiahva ndó nani cája cáhnú ndó Ndióxi xihín ínimá ndo ta ndaja coo quíhvi in ñayivi ini veñuhu, na co cándaá cuahá ini sahá ñaha cuéntá Ndióxi. Ta xíní johó na ña cáhan ndo joo a cúu caja na ndiquiahva na ndixahvi nu Ndióxi in nuú xihín ndo jáchi co cándaá ini na tuhun cáhan ndo. <sup>17</sup> Vatí ndató ndivaha cáhan ndo ndiquiahva ndó ndixahvi nu Ndióxi joo co chindeé a na cán ná cuahnu na xihín tuhun Ndióxi jáchi co cándaá ini na tuhun cáhan ndo. <sup>18</sup> Ndiquiahva i ndixahvi nu Ndióxi jáchi cáhan cuaha chága i tuhun ña coó ñacatiahva i a juú ga ndohó. <sup>19</sup> Joo nani jánaha i ndohó ini veñuhu cájii chága íni i cahan chá cuití va i tuhun já ná cuu candaa cáxi ini ndó ña cáhan i. Jáchí ndá chuun

quéa ná caħan cuahá nahá i tuħun ña co cándaä ini ndó.

<sup>20</sup> Candehé ndo ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája na valí, na co cája cuachi. <sup>21</sup> Xíní ñúhú ndicuhun ini ndó ndaja cáchi ley naçahyi Moisés sanahá tá naçachi Ndióxi já: “Vatí ná chindahá i na cáħan java tuħun tóħo nuú ñayivi Israel joo a cuni johó na nuú caħan na tóħo cán jáchi sáa ini na Israel”, naçachi Ndióxi. <sup>22</sup> Tá cáħan ndó tuħun ña coó naçatiahva ndó nani cája cáħnu ndó Ndióxi co chindeé cuahá ña yóho na cúu cuéntá Jesús cuahnu na xihín tuħun Ndióxi vatí mé a ndaa na co xíní tuħun Ndióxi cátoñtó na xihín ña yóho. Joo tá jáyaha ndó tuħun cáħan Ndióxi xihín ndó nuú na cúu cuéntá Jesús já cuu cuahnu chága na xihín tuħun Ndióxi vatí co chindeé cuahá ña yóho na cámaní ndihvi íchi cuéntá Jesús. <sup>23</sup> Caja mé ndó cuéntá tá ná taca cuahá na cúu cuéntá Jesús ta casahá cáħan ndó tuħun ña coó naçatiahva ndó nani cája cáħnu ndó Ndióxi ta ndaja coo quíhvi na co xíní tuħun Ndióxi nu ndúu ndó jan. Ta tá ná cuni na ña sa jín tuħun cáħan ndihí ndó já quéa caħán na ña cúu ndó na tachí. <sup>24</sup> Joo tá ná jáyaha tóco ndihí ndó tuħun cáħan Ndióxi nuú ñayivi ta ndaja coo quíhvi in na co xíní tuħun Ndióxi. Ta tá ná cuni johó na ña cáħan ndó já quéa tahnda ini na sahá cuachi na ta já casahá ndícani ini na sahá ña núu cája na. <sup>25</sup> Ta já nahma na cuachi na nuú ñayivi ta já ndicava xítí na caja cáħnu na Ndióxi. Ta xihín ña yóho candaä ini na ña mé a ndaa táhyí ín Ndióxi tañu ndó.

*Tóco ndihí ña cája ndó cuéntá Ndióxi xíní ñúhú caja ndó ña xihín toní ñúhú*

<sup>26</sup> Candehé ndó, ñani i, na cúu cuéntá Jesús. Tá ná nditaca ndihí ndó caja cáħnu ndó Ndióxi ndítahan nuú java ndó cata ndó salmo ta java ndó jánaħa ndó nuú ñayivi. Ta ndítahan nuú java ndó jáyaha ndó tuħun cáħan Ndióxi xihín ndó nuú ñayivi ta java ndó caħan ndó tuħun ña coó naçatiahva ndó. Ta ndítahan nuú java ndó nducú ñehe ndó ña cuni cachi tuħun cáħan na cán. Tóco ndihí ña cája ndó xíní ñúhú chindeé

a ndohó ná cuahnu chága ndó xihín tuħun Ndióxi. <sup>27</sup> Ta ndítahan nuú ivi á uní ñayivi cuití va caħan na tuħun ña coó naçatiahva na. Joo tá in tá in na caja na ña. Ta ndítahan canduu na tiahva nducú ñehe na ña cuni cachi tuħun cáħan na jan. <sup>28</sup> Ta nu táca ndó tá coó ni in na tiahva nducú ñehe ña cuni cachi tuħun cáħan na jan já quéa vaha chága ná a cáħan na tuħun ña coó naçatiahva na. Ña vaha chága quéa ná caħan yaá na ña ná cuni johó mé ná xihín Ndióxi cuití va. <sup>29</sup> Ta quiahva já tá jáyaha na tuħun cáħan Ndióxi xihín ná nuú ñayivi ná caħan ivi á uní na cuití va. Ta xíní ñúhú caħan na nani ndúu tútu java ga na veñuhu sándehe na á mé a ndaa cáħan na cuéntá Ndióxi. <sup>30</sup> Cája i cuéntá nani jáyaha in na tuħun cáħan Ndióxi xihín ná nuú ñayivi ta jácaħan Ndióxi ini inga na ña ná jáyaha na tuħun cáħan Ndióxi xihín na nuú ñayivi já quéa xíní ñúhú cacoo na nu cuití cán. <sup>31</sup> Xihín ña yóho tá in tá in ndó cuu jáyaha ndó tuħun cáħan Ndióxi xihín ndó nuú ñayivi. Já cuu catiahva na xíní johó ña yóho ña ná ndindeé chága ini na xihín tuħun Ndióxi. <sup>32</sup> Na jáyaha tuħun Ndióxi nuú ñayivi xíní ñúhú cañehe na quiahva xihín ña cája na nani ndáti na jáyaha na tuħun cán. <sup>33</sup> Jáchi cuni Ndióxi ña ná coo vaha iní caja í tóco ndihí ñaha ta ná a jána í nuú cája í ña.

Ta cáji ini mé á tá cája vaha ndó tá quiahva cája java ga na cúu cuéntá Jesús ndúu ndijáa ga ñuu. <sup>34</sup> Nani táca ndo veñuhu co ndítahan nuú najihí caħan na jáchi co cáni a nu ná caħan na. Ta co ndítahan nu ná cacomí na cuéntá sahá na veñuhu jáchi quiahva já sáħndá ley Moisés. <sup>35</sup> Ta tá cuni na candaä ini na sahá ña jánaħa na veñuhu xíní ñúhú ndaça tuħun na yí ná sahá tá cásaä na vehe na. Jáchi co náħa vaha tá cáħan in ñañáħa nani táca na veñuhu.

<sup>36</sup> Xíní ñúhú ndicuhun ini ndó ña a juú ndohó cúu na nandiquehe tuħun Ndióxi nu cuití. Ta a juú ndohó cuití xíní tuħun Ndióxi, vaha. <sup>37</sup> Ta ndá na cáħán ña naçhutú ndaa ínima ná xihín ínima yí Ndióxi ña ná jáyaha na tuħun cáħan Ndióxi xihín ná nuú ñayivi, mé na cán ndítahan nu ná ndicuni na ña cáħan i ña sáħndá Ndióxi

nuú i cahan i. <sup>38</sup> Joo tá co cúni na cán cuni johó na ña cahan i cuéntá Ndióxi já quea a cúni johó ndó ña cahan na cán.

<sup>39</sup> Candehé ndo, ñani i, na cúu cuéntá Jesús. Xíní ñúhú ndihi ini ndó nducú ndó ña ná jáyaha ndó tuhun cahan Ndióxi xihin ndó nuú ñayivi. Ta a cáji nuu ndó nuú na cúu cuéntá Jesús tá ñéhe táhvi ná nu Ndióxi cahan na tuhun ña coó nasatiahva na. <sup>40</sup> Joo tóco ndihi ña cája ndó xíní ñúhú caha ndó ña xihin toni ñúhú já ná a jána ndó nu cája ndó ña.

## 15

### *Ndicani Pablo sahá quivi tá nanditacu Jesús*

<sup>1</sup> Candehé ndó, ñani i, na cúu cuéntá Jesús. Viti cúni ña ná ndicuhun ini ndó tuhun vaha sahá Jesús ña najánaha i nu ndó. Mé tuhun vaha yóho sa nandiquehe vaha ndó ña ta candeé vaha ini ndó a janda viti. <sup>2</sup> Ta jivi saha mé tuhun vaha najánaha i nu ndó yóho cuu cacu ndaa ínima ndó tá ná caha ndó ña najánaha i nu ndó xihin ndinuhu ini ndó. Joo tá ná a cája ndó ña já quea mé a uun va quea nacandúsa ndó ña.

<sup>3</sup> Candehé ndó. Ña jihna ñúhú nacaja i quea najánaha i ndohó ña nacatiahva mí i cuéntá Jesucristo, mé a naxihi ndica cruxu sahá cuachi tá quiahva cáchi tuhun Ndióxi. <sup>4</sup> Ta najánaha i ndohó ña najánduxu na mé a joo tá naxinu quivi uní já nanditacu tucu a tá quiahva cáchi tuhun Ndióxi coo. <sup>5</sup> Ta já nanaha mé a nu Pedro xihin nuú java ga táhan da uxu ivi naxica tuun xihin a cán. <sup>6</sup> Ta tá nandihí já nanaha mé a nu yáha ga nuú uhun ciento na cúu cuéntá mé á. Ta in naxini tocó ndihi na mé á. Ta cuaha táhan na naxini ñahá cán tácu yii va na vatí java na sa naxihi na. <sup>7</sup> Ta tá nandihí já nanaha mé a nu Jacobo ta anda já nanaha mé a nu tóco ndihi na naxica tuun xihin á.

<sup>8</sup> Ta tá nu ndihí já nanaha ri Jesús mé a nuú i vatí cúu u da nacacu tá sa nayaha mé tiempo tá naxica nuu Jesús ñuyiví yóho. <sup>9</sup> Yehe cúu u in apóstol joo ín chága saha tóco ndihi java ga na apóstol a juú ga yehe. Ta ni coó sahá i cahan na apóstol xihin i jáchi naxica nuu i nacaja xíxi i xihin na cúu cuéntá Ndióxi jihna. <sup>10</sup> Joo mé a ndaa cúu u

in apóstol jáchi nacamáni Ndióxi yehe. Ta a juú ña uun cúu ñamaní nacaja Ndióxi xihin i jáchi cuahá ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun i xihin ndée mí i. Sahá ña táhvi ini Ndióxi sahá i sahá ña cán quea chindeé a yehe cája i chuun mé á yóho. <sup>11</sup> Joo co cája toho a á yehe á na java apóstol cán cája chúun chága. Ña vaha quea tóco ndihi nde jánaha nde sahá Jesucristo ta mé ndó sa nacandúsa ndó ña najánaha nde nu ndo.

### *Vaxi quivi nditacu tóco ndihi ndii*

<sup>12</sup> Tá nacahan nde tuhun Ndióxi xihin ndo najánaha nde ndohó ña nanditacu tucu Jesucristo ta nacandúsa ndó ña. Joo viti java ndó cáchi ndo ña co nditacu toho na sa naxihi. <sup>13</sup> Joo tá cáchi ndo ña co nditacu toho na sa naxihi cúu á tátuhun co cándúsa ndó ña nanditacu tucu Jesucristo. <sup>14</sup> Ta tá co cándúsa ndó ña nanditacu tucu Jesucristo já quea coó saha toho tuhun Ndióxi ña xica nde jánaha nde nuú ñayivi. Ta xihin ña yóho mé a uun va candeé ini ndó mé á. <sup>15</sup> Ta tá mé a ndaa coó nanditacu Jesucristo já quea cúu nde na cahan ña tuhun saha Ndióxi jáchi cáchi nde xihin ndo ña mé Ndióxi najánditacu a Jesucristo. Joo tá co nditacu toho ndii ta ndehe cáchi nde ña nanditacu Jesucristo já quea cúu nde na tuhun. <sup>16</sup> Jáchi tá co nditacu ndii já quea cúni cachi a ña coó nanditacu toho Jesucristo. <sup>17</sup> Ta tá coó nanditacu Jesucristo já quea coó saha toho ña candeé ini ndó mé á ta cómi yii va cuachi cuéntá saha ndó. <sup>18</sup> Ta xihin ña yóho cúni cachi a ña a cacu ndaa toho ínima na cúu cuéntá Jesús tá ná quivi na. <sup>19</sup> Tá ndiyahvi ña cúu yó cuéntá Jesús nani tácu yo ñuyiví yóho cuití va já quea ndáhví nahá nacuu.

<sup>20</sup> Joo mé a ndaa nanditacu ndusa Jesucristo. Ta mé a cúu á ña nu cuití nanditacu. Ta vaxi quivi nditacu tóco ndihi yó, na cúu cuéntá mé á. <sup>21</sup> Candehé ndo. Naquihvi cuachi ñuyiví sahá ña nacaja Adán, da nasacuu taa nu cuití ta sahá cuachi yóho nacasahá xíhi ñayivi. Ta jivi sahá ña nacaja Jesucristo tá naxihi a ndica cruxu cuu nditacu tóco ndihi na sa naxihi. <sup>22</sup> Xíhi ñayivi sahá ña naquixi na chichi Adán ta cája na ña núu tá quiahva nacaja Adán sanahá. Ta

viti sahá ña cúu yó cuéntá Jesucristo catacú anda ama cáa quivi sahá ña ñacaja mé á. <sup>23</sup> Ta tá ná ndindaa nuú in in na nditacu na já nditacu na caja Ndióxi. Mé Jesucristo quea ñanditacu nu cuítí. Ta tá ná ndicó coo tucu mé á ñuyívi yóho já caja mé á ña ná nditacu tóco ndihi na cúu cuéntá mé á. <sup>24</sup> Anda já ndihi saha tóco ndihi ñaha ñuyívi yóho jáchi jándihi Jesucristo saha tóco ndihi na cómi cuéntá sahá ñayivi ñuyívi yóho. Ta ndiquiahva tóco ndihi na cúu cuéntá mé á ndáha Ndióxi, tátá a já ná cacomí a cuéntá saha ná. <sup>25</sup> Jáchi Jesucristo quea ndítahan nu cacomí cuéntá sahá na cúu cuéntá mé á janda quiahva ná xinu coo quivi jándihi Ndióxi saha tóco ndihi na coo cúní ñahá. <sup>26</sup> Ta janda nu ndíhí jándihi mé á sahá ña ná quivi ñayivi. Ta xihín ña yóho a quivi ga ñayivi. <sup>27</sup> Jáchi mé Ndióxi ñandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchi tuhun Ndióxi ña cómi Jesucristo cuéntá saha tóco ndihi ñaha, coo cúní cachi a ña cómi a cuéntá saha Ndióxi viti jáchi mé Ndióxi quea ñandiquiahva tóco ndihi ñaha ndáha mé á ña ná cacomí a cuéntá sahá. <sup>28</sup> Ta tá sa cómi Jesucristo cuéntá saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchi cúu á in túhún jiní já jahyi Ndióxi ta mé Ndióxi quea ñandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

<sup>29</sup> Ndúu java ñayivi ta cándúta ná sahá na sa ñaxihí já ná cacu ndaa ínima ná. Joo cáchi na coo cándúsa toho na ña ndítacu ndii. Ta ndá sahá quea cája na já tá coo cándúsa na nditacu ndii. Joo xini vaha í ña nditacu ndii.

<sup>30</sup> Ndá chuun quea chícaan yo mí ndijáá ní quivi nuú tondóhó nuú cuu cahní na mí tá coo cándúsa í ña nditacu tucu ndii. <sup>31</sup> Candehé ndo, ñani i, na cúu cuéntá Jesús. Ndjáá ní quivi vaxi tondóhó nuú i. Ta jalóho cúní quivi i. Mé ndó cándaa vaha ini ndó ña cáji ini i sahá in ñandu ndó xihín Jesucristo, xitoho í. Saha ña cán quea ndítahan nu ndo candúsa ndó ña cáhan i xihín ndo. <sup>32</sup> Cuahá tañu ñaquihvi táhan i xihín ñayivi quini ñuu Efeso. Mé na cán cúu ná tátuhun quití yúcu. Joo coo saha toho ña ndóho ini i yóho tá mé a ndaa coo ndítacu

toho ndii. Jáchi tá coo ndítacu toho ndii já quea cuu cohó caja í tá quiahva cáchi java ñayivi tá cáchi na já: “Cóho cuxu vaha í ta coho vaha í jáchi yó quivi itaan á iajá cúu yó.”

<sup>33</sup> A quiahva ndó ñamaní jándahvi inga na ndohó. Xini ñuhú ndicuhun ini ndó in tuhun ña cáchi já: “Tá cátahan í xihín ñayivi, na coo cája vaha já quea játiví na mí.” <sup>34</sup> Xini ñuhú ndicaxí vaha ini ndó ta a cája ndó cuachi jáchi ndúu java ndó ta coo xini toho ndó Ndióxi. Cáhan i ña yóho xihín ndo já ná cacahan nu ndo sahá ña núu cája ndó.

### *Ndaja coo tá ná nditacu ndii*

<sup>35</sup> Cája i cuéntá ña ndúu java ndó ta ndícani ini ndó já cáhan ndo já: “Ndaja caja Ndióxi jánditacu a na sa ñaxihí. Ndá yiquí cuñu ndiquehe na caja Ndióxi.” Já ndáca tuhún java ndó ndícani ini ndó. <sup>36</sup> Joo ña ndícani ini ndó saha jan cúu á ña tóntó ndivaha. Xini ñuhú candehé ndo ndá quiahva yaha xihín in tata tá chíhin na ña. Mé tata yóho xini ñuhú quivi a já ná nduta utu loho nu á. <sup>37</sup> Tá xútu ñayivi, coo xútu toho na in yucu. Ña xútu na cúu mé tata ta coo cája toho a á cúu á trigo á inga nuú tata. <sup>38</sup> Ta mé Ndióxi quea cája ña ná ñehe táhvi in in a cán ndá quiahva coo a ta ndá javí cañehe in in a. <sup>39</sup> Ta a juú in javí ñehe tóco ndihi ñaha. Sa jín sa jín javí in in a. Tátuhun yiquí cuñu in dataa, sa jín in yiquí cuñu da xihín yiquí cuñu quití. Ta yiquí cuñu laa sa jín in a xihín yiquí cuñu tiyacá. Sa jín ñacaja Ndióxi xihín in in ña ñacavaha mé á. <sup>40</sup> Ta quiahva já ñacavaha Ndióxi ña ndúu indiví ta jín va ndaa a. Ta jín yiquí cuñu ñayivi ñuyívi yóho. Ta sa jín quiahva ndató ña in indiví ta sa jín quiahva ndató ña in ñuyívi. <sup>41</sup> Jín ñacaja Ndióxi ña ná yehe candii ta jín ñacaja mé á ña ná yehe yoo. Ta jín ñacaja mé á ña ná yehe quimi ta in java quimi sa jín sa jín yehe rí nuú inga rí. <sup>42</sup> Quiahva já vaha ri xihín ñayivi tá ná xinu coo quivi jánditacu Ndióxi na. Jáchi yiquí cuñu yó ña jánduxu na tixi ñuhú cúu á ña ndihi saha. Joo tá ná nditacu tucu já a ndíhi ga saha yo anda ama cáa quivi. <sup>43</sup> Mé yiquí cuñu í jánduxu na tixi ñuhú yóho cúu á tátuhun in ña núu ndivaha jáchi ndihi sahá. Joo tá ná xinu

coo quiví ndicoo tucu a caja Ndióxi já cacuu a ña ndató ndivaha jáchi a ndíhi sahá. Ña jánduxu na tixi ñúhu cúu á ña vitá ndivaha joo ña nditacu tucu cacuu a ña ndacú vaha. <sup>44</sup> Jáchi tá ná jánduxu na mí tixi ñúhu, ña jánduxu na cúu yiquí cuñu cuéntá ñuyíví yóho. Joo tá ná nditacu tucú já ñehe yó inga yiquí cuñu, ña cúu cuéntá indiví. Jáchi tá íin yiquí cuñu cuéntá ñuyíví, ña ndíhi sahá ta já íin ri yiquí cuñu cuéntá indiví, ña a cuú ndíhi sahá.

<sup>45</sup> CÁCHI tuhun Ndióxi ña tá nacavaha Ndióxi Adán, da nasacuu taa nu cuítí já nacaja mé á ña ná catacu da. Joo cáhnu chága Jesucristo a juú ga Adán jáchi mé á cajú ña ná catacu ñayivi anda ama cúa quiví. <sup>46</sup> Ña jihna ñúhú sahan Ndióxi nu yó cúu yiquí cuñu í, ña ndíhi yachi sahá. Ta tá nu ndíhi já sahan mé á inga yiquí cuñu nu yó cuéntá indiví ta ña cán cúu á ña co ndíhi sahá. <sup>47</sup> Mé Adán, da nacavaha Ndióxi nu cuítí nasacuu da da nacavaha mé á xihín ñundáhyi ta cúu dá da ñuyíví yóho. Ta Jesucristo, xitoho í, cúu á inga táhan dataa joo cúu á ña naquixi chí indiví. <sup>48</sup> Tá in tá in ñayivi ñehe na yiquí cuñu tátuhun yiquí cuñu Adán jáchi cúu á ña nacavaha Ndióxi xihín ñundáhyi. Joo ñayivi, na ndiquiahva mé ndáha Jesucristo vaxi quiví ndiquehe na inga yiquí cuñu cuéntá indiví, ña co ndíhi sahá. <sup>49</sup> Ta viti íin yiquí cuñu í tátuhun yiquí cuñu Adán joo vaxi quiví ndiquehé inga yiquí cuñu í cuéntá indiví ta cacuu a tátuhun yiquí cuñu Jesucristo.

<sup>50</sup> Candehé ndo, ñani í, na cúu cuéntá Jesús. Cúni caxi tuhun í xihín ndo ña a cúu toho cahun yiquí cuñu í yóho indiví ña ná cacomí Ndióxi cuéntá sahá jáchi mé yiquí cuñu í yóho co cúu á ña cuu catacu anda ama cúa quiví. Joo ña inga, ña quiahva mé á nu yó cán, a ndíhi toho sahá. <sup>51</sup> Ta viti cúni caxi tuhun í nu ndo sahá in ñaha nasahjin jehé nuú ñayivi ta ña yóho quéa: A juú ndíhi toho í quiví jáchi tá ná xinu coo quiví quixi tucu Jesucristo ñuyíví yóho anda jáví ndijama ndíhi tá quiahva ndáa í ta mé Ndióxi quiahva inga yiquí cuñu nu yó. <sup>52</sup> Ta in náa cuítí yaha ña yóho jáchi cacuu a tátuhun in ndicuani nu yó ta já ndahyi trompeta, mé dó ndahyi nu ndíhi

cuí cán já nditacu tóco ndíhi na sa naxihí ta a ndíco coo ga na quivi na. Ta mí, tá tácu yó, ña caja Ndióxi xihín yó quéa ndijama yiquí cuñu í. <sup>53</sup> Jáchi mé yiquí cuñu í ña ndíhi sahá yóho a cuú toho nduu a tátuhun yiquí cuñu ña quiahva Ndióxi nu yó. Sahá ña cán quéa xíní ñúhú ndijama mé á yiquí cuñu í yóho já ná cuu cohó coo í xihín mé á anda ama cúa quiví. <sup>54</sup> Ta tá sa nandijama yiquí cuñu í ta nanduu a ña co ndíhi sahá anda ama cúa quiví já quéa xinu coo nuú tuhun ña nacachi na profeta sanahá: “Vaxi quiví ndíhi sahá ña xihí ñayivi jáchi nacandee Jesucristo nasahnu a nuú ña xihí na. <sup>55</sup> Ta xihín ña yóho cajú cáhnu í mé á jáchi a quiví ga ñayivi sahá ña naquee vaha Jesucristo”, cÁCHI tuhun Ndióxi. <sup>56</sup> Tá cajú ñayivi cuachi já quivi tá quivi na sahá ña cajú na. Ta cúu á tátuhun tá tén líhma na jáchi ndóho ini na sahá cuachi na. Anda sanahá ndivaha sahdá ley Moisés ña quivi ñayivi sahá cuachi na jáchi ñehe íni cuachi caja ña ná quivi ñayivi. <sup>57</sup> Joo ndixahvi Ndióxi jáchi chindee a mí ña ná cuu quee vaha í sahá ña nacaja Jesucristo, xitoho í sahá yó.

<sup>58</sup> Sahá ña cán quéa ndítahan nu ndó, ñani máni í, na cúu cuéntá Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándee ini ndó mé á. Ta ndítahan nu ndó ndíhi ini ndó caja chúun ndó cuéntá mé á jáchi sa cándaq vaha ini ndó ña a juú ña uun cúu toho chuun cajú ndó jáchi íin Jesucristo, xitoho í xihín ndo.

## 16

*Tá ndítaca jiuhún ña jasá na nuú na cúu cuéntá Jesús*

<sup>1</sup> Ta viti cúni ndicani í nu ndo ndá quiahva ndítahan caja ndó tá jánditaca ndó jiuhún ña jasá ndo nuú na cúu cuéntá Jesús ndúu ñuu Jerusalén. Xíní ñúhú caja ndó tá quiahva najánaa í nuú na cúu cuéntá Jesús ndúu estado Galacia. <sup>2</sup> Ña ndítahan caja ndó quéa: tá in in domingo xíní ñúhú tavá xóo ndó táhan jiuhún ña sácú ini ndó jasá ndo jatá ña nandiquehe ndó sahá chuun nacaja ndó. A cándati toho ndó janda quiahva ná saa í jan jáchi xíní ñúhú jánditaca cuéé ndó ña. <sup>3</sup> Ta caxi mé ndó ndá na cúni ndó cañehe jiuhún jan ñuu

Jerusalén. Ta tá ná xinu coo i jan chindahá i na ña ná cuhun ñehe na jiuhún ñuu cán. Ta chindahá i in carta xihin ná ña ná quiahva na ña xihin jiuhún jan nuú na cúu cuéntá Jesús ndúu mé cán. <sup>4</sup> Ta tá cuni Ndióxi já cuhun ri yehe va xihin na jan anda ñuu Jerusalén.

*Sácú ini Pablo cuhun da coto nihni da na cúu cuéntá Jesús ndúu java ga ñuu*

<sup>5</sup> Saa i coto nihni i ndohó cuni. Joo jihna ñuhú yaha i coto nihni i na cúu cuéntá Jesús ndúu estado Macedonia. Ta anda jáví saa i ñuu Corinto jan. <sup>6</sup> Ta tá cuni Ndióxi candoo nahá chá i xihin ndo. Á tá coo ta coo i ní tiempo vixi xihin ndó jan. Ta tá sa ná quee e cuhun i inga ñuu já cuu chindeé ndó yehe. <sup>7</sup> Co cuni toho i coto nihni númí i ndohó. Ña cuni quéa candoo too i coo nahá chá i xihin ndo jan tá cuni Ndióxi. <sup>8</sup> Joo candoo too i coo i ñuu Efeso yóho janda quiahva ná yaha vicó Pentecostés. <sup>9</sup> Jáchi mé a ndaa núná nuú i cája chúun i cuéntá Ndióxi yóho jáchi cuahá ndivaha na ndiquehe vaha na tuhun Ndióxi vatí ndúu cuahá na co cuni yehe sahá chuun cája i yóho.

<sup>10</sup> Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná cajii íni da coo da xihin ndo. Jáchi cája chúun da cuéntá Jesucristo, xitoho í tá quiahva cája chúun yehe. <sup>11</sup> A cándají ndó da. Ña ndítahan caja ndó quéa chindeé ndó da já ná coo vaha ini da quixi da nuú i. Jáchi yehe xihin java ga na cúu cuéntá Jesús ndáti nde xinu coo da nu ndúu nde yóho.

<sup>12</sup> Ta viti cuni ndicani loho i nu ndó sahá ñani, da naní Apolos. Mí i naxica tahví ndivaha i nu dá ña ná saa da xihin java ga na cúu cuéntá Jesús coto nihni da ndohó. Joo co cuni da caja da ña viti. Cája i cuéntá tá ná nuná nu dá já saa da coto nihni da ndohó.

*Ndíndayí Pablo na cúu cuéntá Jesús ndúu ñuu Corinto*

<sup>13</sup> Cuéntá vaha coo ndó. Xíní ñuhú ndacú coo ini ndó jáchi cándéé ini ndó Jesús. A yíhví toho ndó. Canduu ndacú ndó íchi cuéntá Jesús. <sup>14</sup> Xíní ñuhú caja ndó tóco ndihi ñaha sahá ña quíhvi ini ndó ñani táhan ndó.

<sup>15</sup> Candehé ndo ñani i, na cúu cuéntá Jesús. Sa xíní vaha ndó sahá na vehe Estéfanos, mé na nu cuítí nandihvi íchi cuéntá Jesús estado Acaya. Sa nandiquiahva na mé ná chindeé na na cúu cuéntá Jesús. <sup>16</sup> Ña cuni caca i nu ndo cúu ña ná cuni johó ndó ña sáhdá na cán nu ndó caja ndó. Ta xíní ñuhú caja ndó tá quiahva cuni ndihi na cán jáchi chindeé na ñayivi ta cája chúun vaha na cuéntá Jesús. <sup>17</sup> Cájii ini i jáchi naxinu coo Estéfanos xihin Fortunato xihin Acaico nu íin i ta nachindeé na yehe. Ta vatí a cuú quixi mé ndó nuú i <sup>18</sup> joo na yóho sahan na tuhun ndéé ini i xihin ñaha cuéntá Ndióxi tá quiahva nacaja na xihin mé ndó. Mé a ndaa ndítahan nu yo caja cáhnu í na cája tátuhun na yóho.

<sup>19</sup> Na cúu cuéntá Jesús ndúu estado Asia chindahá na Ndióxi coo ndó. Ta jári Aquila xihin Priscila chindahá na Ndióxi coo ndó. Ta jári na cúu cuéntá Jesús táca cája cáhnu Ndióxi vehe na cán chindahá na Ndióxi coo ndó. <sup>20</sup> Tóco ndihi na cúu cuéntá Jesús ndúu chóho chindahá na Ndióxi coo ndó. Ta xíní ñuhú cahan Ndióxi xihin táhan ndó ta tatí yuhu táhan ndó ta yii caja ndó ña.

<sup>21</sup> Yehe cúu Pablo ta xihin ndáha mí i cáhyí i ña yóho nu ndó ta chindahá i Ndióxi coo ndó.

<sup>22</sup> Ta ndá na co quíhvi ini Jesucristo já ná cuhun cháhan jatá ná. Cama chá ná quixi Jesucristo, xitoho í.

<sup>23</sup> Ña cuni quéa ná caja cuaha Jesucristo, xitoho í ñamani xihin ndo. <sup>24</sup> Quíhvi ini i tóco ndihi ndó jáchi tóco ndihí cúu yó cuéntá Jesucristo, xitoho í. Já ná coo.

## Carta chí ivi nacahyí Pablo nuú na cúu cuéntá Jesús ndúu ñuu Corinto

*Cáhan Ndióxi Pablo xihín na cúu cuéntá  
Jesús ndúu ñuu Corinto*

<sup>1</sup> Yehe cúu Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani, Timoteo cáhyí nde carta yóho nu ndóhó, na cúu cuéntá Ndióxi ndúu ñuu Corinto ta nu tóco ndihi na cúu cuéntá Ndióxi ndúu estado Acaya. <sup>2</sup> Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

*Ndóho ini Pablo*

<sup>3</sup> Cóho caja cáhnu í Ndióxi, mé a cúu tátá xitoho í, Jesucristo. Jáchi Ndióxi cúu á tátá yo, mé á sá tahví ini saha yo ta cúu á Ndióxi ña chindeé mí tá ndóho ini. <sup>4</sup> Mé a cán sahan tuhun ndeé ini nu tóco ndihi ña ndóho ini já queá ná cuu caja ri mé ví quiahva í tuhun ndeé ini ñayivi tá ndóho ini na. Tá quiahva cája mé á xoho quiahva já ndítahan caja í xihín ñayivi. <sup>5</sup> Jáchi tá quiahva ndóho ndivaha ini saha Jesucristo ta sa mé quiahva já sahan cuahá ndivaha mé á tuhun ndeé ini tá ndóho ini. <sup>6</sup> Tá ndóho ini mé nde já cuu quixi tuhun ndeé ini mé ndó ta já cuu cacu ndaa ínimá ndo. Tá sahan Ndióxi tuhun ndeé ini nde já queá sahan ri mé á tuhun ndeé ini mé ndó viti. Ta xihín ña yóho cuu coo ndacú vaha ini ndó tá ná quixi ña ndoho ini ndó tá quiahva ndóho ini mé nde. <sup>7</sup> Cándéé ini nde ña a jándacoo ndó tuhun Ndióxi jáchi cándaá cáxí ini nde ña tá quiahva ndóho ini quiahva já sahan Ndióxi tuhun ndeé ini.

<sup>8</sup> Candehé ndó, ñani i, na cúu cuéntá Jesús. Cúní nde caxi tuhun nde nu ndo tá quiahva nandoho ini nde estado Asia. Nasacuu a tondóhó chíchánu nuú nde ta chí a cándéé ga ini nde nacahán nde, nduu. Ta chí nasahnda ini nde: “Yóho quiví”, nacahán nde. <sup>9</sup> Nacahán nde ña jándá ndáti cuití nde quivi nde joo nachindeé ña yóho ndehe jáchi náha nuú nde ña co

ndítahan cándéé ini nde mé nde. Jáchi ña ndítahan cándéé ini nde cúu Ndióxi, mé a jánditacu tucu ndii. <sup>10</sup> Najácacu Ndióxi ndehe tañu tondóhó ná a quiví toho nde. Ta mé á queá jácacu a ndehe nuú ndihi tondóhó vaxi chága chí nuu. Jáchi cándéé ini nde mé á ña chindeé tá chindeé a ndehe nuú ndihi tondóhó. <sup>11</sup> Ta mé ndó chindeé ndó ndehe tá xíca tahví ndó nu Ndióxi sahá nde. Jáchi tá ná cacá tahví cuahá ñayivi nu Ndióxi sahá nde, sa mé quiahva já ndiquiahva cuahá ñayivi ndixahvi nu Ndióxi sahá ñamaní cája Ndióxi xihín nde.

*Ndicani Pablo ndá saha queá coo  
nasahan da ñuu Corinto*

<sup>12</sup> Ín java ñaha cája ña ná coo vaha ini nde ta cúu á ña yóho: cándaá cáxí ini nde ña co cája nde ña núu ta tóco ndihi ña cája nde ñuyiví yóho cája nde ña xihín ndinuhu ini nde. Ta xihín ndinuhu chága ini nde cája nde ña cán tañu mé ndó. Ta ni in ña cája nde co cája nde ña sahá ña ndíchí quixi jiní mé nde jáchi mé Ndióxi queá táhvi ini sahá nde ta chindeé a ndehe cája vaha nde. <sup>13</sup> Tá nacahyí nde carta nu ndo jihna coo nacahyí nde tuhun ña a cúu cándaá ini ndó jáchi ndacú ndacú cáhan nde xihín ndo nu carta cáhyí nde. Jáchi cúní nde ña ná cándaá vaha ini ndó <sup>14</sup> ña co cándaá cuahá ini ndó viti. Ta cúní nde ña ná cajji ini ndó saha mé nde tá quiahva cajji ini nde saha ndo tá ná tandaa quiví quixi tucu Jesucristo ñuyiví yóho.

<sup>15</sup> Sahá ña cándéé ini i ndohó sahá ña cán queá nasacu ini i coto nihni jihna ñuhú i ndohó ña ná cajji ndivaha ini ndó tá ná cuni ndó yehe ivi tañu. <sup>16</sup> Jáchi nasacu ini i coto nihni i ndohó tá ná yaha i cuhun i chí estado Macedonia ta já coto nihni tucu u ndohó tá ná ndicó coo i cán. Anda já cuu chindeé ndó yehe quehé e íchi cuhun i chí estado Judea. <sup>17</sup> Coto a cáhán ndo ña nacahvi ivi johó ini i tá nasacu ini i caja i ña yóho. Ta ni a cáhán ndo ña sácú ivi johó ini i xihín ña cája i tá quiahva cája ñayivi ñuyiví jáchi ndá chuun queá cáhí i jivi a tá a juú a. <sup>18</sup> Sándehé cáxí Ndióxi ña co jándahvi nde ndohó jáchi co cáhí nde xihín ndo “ajan” tá cúní cachi nde “uhun.” <sup>19</sup> Jáchi co cája Jesucristo já. Co cáhí a



“ajan” tá cúni a cachi a “uhun.” Ndinuhu ña ndaa quéa cáhan Jesucristo jáchi mé á cúu á in túhún jiní já jahyi Ndióxi, mé a cáhan Timoteo xihín Silvano xihín yehe sahá nu ndo. <sup>20</sup> Jáchi xihín Jesucristo jáxinu coo Ndióxi tóco ndihi tuhun nasahan mé á nu yo. Sahá ña cán quéa tá cajú cáhnu í Ndióxi cuu cachi yó “Já ná coo.” Ta tá cáchi yo “Já ná coo” cúu á sahá ña nacaja Jesucristo. <sup>21</sup> Ta mé Ndióxi nandaja ndacú a ndehe ta nandaja ndacú a ndohó. Ta nacaxi a mí cacuu ñayivi cuénta mé á. <sup>22</sup> Jáchi mé á cúu á xitoho mí ta cómi a cuénta saha yo. Ta nasacu a ínima yii mé á ini ínima yo já ná candaa vaha ini ndá quiahva ín ñamani caja Ndióxi xihín yo chí nuu.

<sup>23</sup> Sándehé cáxi Ndióxi ña mé a ndaa táhyi cáhan i xihín ndo. A ñáha saa i ñuu Corinto jan tá quiahva nasacu ini i caja i jáchi coo cúni jácacuéha i ini ndó. <sup>24</sup> Coo cúu á sahá ña cúni nde caja ndúsa nde sahá ña ndítahan candúsa ndó. Jáchi sa xini nde ña sa ndúu ndacú ndó cándéé ini ndó Jesucristo. Ña cúni nde quéa chindeé táhan nde xihín ndo já ná cajii ini ndó.

## 2

<sup>1</sup> Sahá ña cán quéa nasacu ini i ña ná a cühun tucu u coto nihni i ndohó já ná a cacuéha ini ndó. <sup>2</sup> Jáchi tá ná jácacuéha yehe ini ndó a cúu caja ndó jácajii ndó ini i jáchi mé ndó cúu na jácajii ini i. Joo ndaja caja ndó jácajii ndó ini i tá sa najácacuéha i ini ndó. A cuu caja ndó ña. <sup>3</sup> Sahá ña cán quéa nacahyí i in carta ña nachindahá i nu ndo cán jáchi coo cúni xinu i jan ta jácacuéha ndó ini i sahá ña cajú ndó. Jáchi ndítahan jácajii ndó ini i nani ín i xihín ndo. Jáchi xini vaha i ña tá cájii ini i já cájii ini ri ndohó va. <sup>4</sup> Joo nani nacahyí i mé carta cán já nacasáhá táhvi ini i ta ndícani ini i janda quiahva nacasáhá sácu u. Coo nacahyí i ña sahá ña cúni ña ná catati ini ndó xihín á joo cúni ña ná candaa ini ndó ndá quiahva quihvi ndivaha ini i ndohó.

*Ndítahan caja cáhnu ini na ndúu ñuu Corinto sahá in da nacaja cuachi*

<sup>5</sup> Ta mé da nacaja cuéha ini i cán coo nacaja cuéha da ini in túhún yehe tá nacaja da cuachi. Joo cúu á tátuhun nacaja cuéha

ri da ini ndihi ndó. Cáhan i ña yóho xihín ndo ña ná a janani ndivaha ndó da. <sup>6</sup> Jáchi cuaha ndó sa najánani ndó da cán. Vati já va caja xixi ndó xihín dá. Ndáhví da. <sup>7</sup> Ña ndítahan caja ndó quéa caja cáhnu ini ndó saha dá viti ta quiahva ndó tuhun ndeé ini da jáchi a juú tiahva náa cacuéha ini da xihín ña cajú ndó xihín dá. <sup>8</sup> Sahá ña cán quéa xica táhvi tucu u nu ndo ña ná janaha ndó nu dá ña mé a ndaa quihvi ini ndó da. <sup>9</sup> Sa nacahyí vi in carta nu ndo nu ndícani i sahá ña yóho. Nacahyí i ña sahá ña nasacu ini i coto ndojó i ndohó á mé a ndaa táhyi cajú ndó tá ín nacachi i xihín ndo. <sup>10</sup> Ña cán quéa ndá na ná caja cáhnu ini ndó saha já caja cáhnu ri ini yehe va saha ná. Ta tá ín in ñaha ndítahan caja cáhnu ini i saha já quéa cajú i ña saha mé ndó. Ta sándehé cáxi Jesucristo ña cajú i. <sup>11</sup> Jáchi tá ná a cajú i ña já quéa cándéé tiñáhá sacuaaha xihín yo jáchi sa xini vaha i ña cúni rí jándahvi rí ñayivi.

*Ndícani ini Pablo nani ín da ñuu Troas*

<sup>12</sup> Tá naxinu coo i ñuu Troas ña caxi tuhun i tuhun vaha saha Jesucristo já nanuná nuú i caja chúun vaha i cuénta mé á cúu xitoho í. <sup>13</sup> Joo coo nasahin vaha ini i jáchi coo nañehé e ñaní Tito. Sahá ña cán quéa nandindayí i ñaní, na ndúu ñuu Troas já naquee e cuahan i chí estado Macedonia ndinducú u da.

*Sáhan Jesucristo ndéé á nu yó quee vaha í*

<sup>14</sup> Ndíquiahva i ndixahvi nu Ndióxi jáchi sahá ña nacaja Jesucristo quée vaha í níi tiempo. Tá quiahva ndícuíta nuu in jico támi sahan quiahva já ndícuíta nuu tuhun Ndióxi cajú nde já quéa ná cuu candaa ini ñayivi tuhun vaha saha Jesucristo. <sup>15</sup> Jáchi mí cúu yó tátuhun jusa vaha ña támi sahan ña jóco Jesucristo nu Ndióxi. Ta ndícuíta nuu a tañu na jácacu Ndióxi sahá ña cándéé ini na mé á. Ta jari ndícuíta nuu a tañu na cühun indayá sahá ña coo nacandúsa na mé á. <sup>16</sup> Mí cúu yó tátuhun jusa támi sahan nuú na sa candaa ini tuhun Ndióxi jáchi xini na ñehe yó tuhun ña cuu jácacu ínima ná. Ta nuú na coo xini tuhun Ndióxi cúu yó tátuhun in ña quini ndivaha sahan jáchi cühun na indayá. Ndá na cúu caja jáxinu ini ñayivi, da já. <sup>17</sup> Jáchi xini Ndióxi

ñã mé nde co xíca nuu nde cáhan nde tuhun Ndióxi sahá jjuhún ta co jáma nde ñã tá quiahva cája cuahá ñayivi. Ñã cája nde queá cáhan nde xihín ñayivi xihín ndinuhu ini nde ñã sahan Ndióxi nuú nde cahan nde. Jáchi mé nde cúu nde na nachindahá Ndióxi ta cája chúun nde saha Jesucristo.

### 3

*Cáxi tuhun Pablo sahá tuhun saá ñã sahan Ndióxi nuú ñayivi*

<sup>1</sup> Co cáhan nde ñã yóho xihín ndo sahá ñã cúní nde caja cáhnu nde mé nde. Jáchi co xíní ñúhú nde caça nde in tutu ñã cáchí cúu nde ñayivi ndísáhnu ini nu ndo tá quiahva cája java na. <sup>2</sup> Mé va ndó cuu quiahva ndó tuhun vaha sahá nde jáchi tá ná cuni ñayivi tá quiahva nandijama Ndióxi ínima ndo xihín tuhun naçahan nde xihín ndo já candaã ini na ñã naçaja vaha nde tá naçaja chúun nde tañu mé ndó. <sup>3</sup> Jáchi náha cáxi táhyí a ñã cúu ndó tátuhun in carta naçahyí Jesucristo ta mé nde jánaha nde ñã nuú ñayivi. Co cúu á in carta naçahyí nuú tutu. Cúu á ñã naçahyí ínima yíi Ndióxi, mé a tácu indiví. Ta cúu á in carta ñã coo naçahyí nuú yuu jáchi cúu á tátuhun naçahyí a ini ínima ñayivi.

<sup>4</sup> Ta cáhan nde ñã yóho jáchi cándéé cáhnu ini nde Ndióxi sahá ñã naçaja Jesucristo. <sup>5</sup> Co cúu á sahá ñã quíxi jini mé nde cája nde ñã. Jáchi Ndióxi queá sahan ndeé á nuú nde caja nde chuun yóho. <sup>6</sup> Ta mé á queá chindeé ndehe caja chúun nde cuéntá mé á xihín cuéntá tuhun saá nasahan nu yo. Co cája chúun nde saha ley naçahyí nuú tutu joo cája chúun nde saha ínima yíi Ndióxi. Mé ley cája ñã ná quivi ñayivi joo cája ínima yíi Ndióxi ñã ná catacu ñayivi anda ama cá quivi.

<sup>7</sup> Tá naçahyí ley Moisés nuú yuu, já nandiyehé ndivaha nuu Moisés janda quiahva coo naçuu ga candehe na Israel nuu dá. Joo nuú nandiyehé nahá cán naçasahá ndáhva ñã janda quiahva ndáhva ñã. Candehe ndó. Vatí nandiyehé ndivaha nuú naquixi mé ley, ñã cuu chindahá ñayivi cuhun na indayá <sup>8</sup> joo ndaja ga ví ndiyehé chága nuú quixi tuhun vaha cáhan saha Jesús nuú ñayivi

jáchi sahan ínima yíi Ndióxi tuhun yóho nu yo. <sup>9</sup> Candehe ndo. Vatí ndató nasahin tá naquixi mé ley ñã cuu chindahá ñayivi indayá joo ndaja ga ví ndató coo tá cáxi tuhun í xihín ñayivi ñã coo ga cuachi na nu Ndióxi. <sup>10</sup> Jáchi coo sahá ga ñã ndató mé ley naquixi jihna cán tá ná jácatáhan í ñã xihín ñã ndató chága nasahan Ndióxi nu yo viti. <sup>11</sup> Ta tá ndató nasahin nuú naquixi ñã nandihí saha cán ndaja ga ví ndató chága coo ñã sahan Ndióxi nu yo yóho jáchi a ndihí toho sahá.

<sup>12</sup> Ta sahá ñã ndátí tiahva nde coo ñã yóho sahá ñã cán queá co yíhvi nde cáhan nde ñã xihín ñayivi. <sup>13</sup> Co cája nde tá quiahva naçaja Moisés tá nachijahvi da nuu dá xihín in jáhma ñã ná a cúní na Israel ñã sa cuahan ndáhva ñã nandiyehé nuu dá cán. <sup>14</sup> Joo mé na Israel cán coo naçandaã ini na ndá cuéntá queá nachijahvi Moisés nuu dá. Ta janda viti ndájí yíi xíní túni ná jáchi vatí cáhvi na tuhun Ndióxi ñã naçahyí sanahá joo co candaã ini na ñã jáchi najahvi xíní túni na ta a cúu nuná. Jesucristo cuití va cuu jándinuna xíní túni ná tá cándéé ini na mé á. <sup>15</sup> Mé na Israel ndájí yíi xíní túni ná janda viti jáchi tá cáhvi na ñã naçahyí Moisés co candaã ini na ñã. Cúu ná tátuhun in na jáhvi jáhma nuu. <sup>16</sup> Joo tá ná ndicó coo ini ñayivi nu Ndióxi já ndinuna xíní túni ná. Cúu á tátuhun ndicava jáhma nasandaji nuu ná. <sup>17</sup> Jáchi ínima yíi Ndióxi cúu á xitoho í. Ta nu ín mé á, cán núná xíní túni ñayivi. <sup>18</sup> Ta viti cúu yó tátuhun in yutátá nuu cuu cuni ñayivi tá quiahva cáhnu cúu Ndióxi. Jáchi co ndájí ga xíní túni yo viti sahá ñã naçasahá ndíjama Ndióxi mí viti ná nduú tá quiahva cá Jesucristo. Ta tá quiahva cáhnu cúu mé á quiahva já loho loho nduu cáhnu yó tá quiahva cá mé á. Já cája xitoho í, mé a cúu ínima yíi Ndióxi.

### 4

<sup>1</sup> Sahá ñã cán queá ín ndacú ini nde cáhan nde tuhun Ndióxi xihín ñayivi jáchi sahá ñã natahvi ini Ndióxi sahá nde sahá ñã cán queá nasahan mé á chuun yóho nuú nde. <sup>2</sup> Mé nde nasacu xóo nde tóco ndihí ñã núu cája jehé ñayivi. Ta co sácú ini nde jándahvi nde ñayivi tá cáhan nde tuhun Ndióxi xihín

ná. Ña cája nde quea cáhan nde ndinuhu ña ndaa ta xihín ña yóho sándehe cáxi Ndióxi tá quiahva náha nde nuú ñayivi ña cája nde ña vaha. <sup>3</sup> Tá co cánda iní ñayivi tuhun vaha sahá Jesús ña cáhan nde xihín ná, cúu á sahá ña xíca na íchi cuahan indayá. <sup>4</sup> Jáchi sahá ña co cándusa na ña cáhan nde xihín ná sahá ña cán quea nandaji xíní túni ná nacaja tiñahá, mé rí cúu xitoho ñuyívi yóho ña ná a cúní na ndá quiahva ndató ndíyehé tuhun vaha cáhan saha Jesucristo, mé a cáhnu ndivaha, mé a cúu á yuhú nuu Ndióxi. <sup>5</sup> Mé nde co xíca nuu nde cáhan nde saha mé va nde. Ña cája nde quea xíca nuu nde cáhan nde saha Jesucristo, mé á cúu xitoho í. Ta cáhan nde xihín ndo ña cája chúun nde nu ndo sahá ña cúní nde Jesús. <sup>6</sup> Jáchi nasahnda Ndióxi chuun ña ná queta ña yéhe tañu ña naá cán. Ta mé a cán quea nacaja ña ná ndíyehé ínima yo xihín tuhun Ndióxi já quea ná cuu candehé yo ndá quiahva yéhe nuu Jesucristo, ña náha ndá quiahva cáhnu cúu Ndióxi.

### *Ndá quiahva cuu canduú tá cándé iní Jesucristo*

<sup>7</sup> Joo tóco ndihi ña ndáyahvi ña nasahan Ndióxi nu yo yóho cúu á ña ndácaan yiquí cuñu í vatí yiquí cuñu í cúu á tátuhun in quiji ndahyi. Nasahan Ndióxi ña ndáyahvi nu yo já quea ná cuu cuni ñayivi ña ín ndée Ndióxi cája tóco ndihi ñaha ta co cúu á ndée mí. <sup>8</sup> Ta vatí vaxi cuahá tondóho nu yo joo jáyaha tá jáyaha Ndióxi mí. Ta vatí ndicani ndivaha iní joo co jándihi nahá yo mí. <sup>9</sup> Ta vatí ndícuíta ñee na mí joo co jándacoo ndáha toho Ndióxi mí. Ta vatí jándicava na mí joo co jándihi na sahá yo chí uun. <sup>10</sup> Ta ndá nacuu nu xíca nuu í a íhvi toho cahni na mí tá quiahva nacaja na xihín Jesús. Ta xihín ña ndóho yiquí cuñu í náha ña tácu yíi va Jesucristo ta ín a xoho. <sup>11</sup> Jáchi ndijáá níi quívi ndúcú na cahni na mí sahá Jesucristo. Joo xihín ña yóho núná nu yo jánaña í nuú ñayivi ña ndácaan ndée mé á iní yiquí cuñu í nani ndúú ñuyívi yóho. <sup>12</sup> Ta sahá ña xíca nuu nde cáhan nde tuhun Ndióxi xihín ndo sahá ña cán quea ndúcú na cahni na ndehe. Joo sahá ña ndóho iní nde yóho cuu cacu ndaa ínima ndóho anda ama cáa quívi.

<sup>13</sup> Jáchi já cáchi tuhun Ndióxi: “Sahá ña nacandee iní iní Ndióxi sahá ña cán quea nacahan iní cuéntá mé á.” Ta quiahva já cája ri ndehe va sahá ña cándé iní nde Ndióxi. Ña cán quea co yíhvi nde cahan nde saha mé á nuú ñayivi. <sup>14</sup> Jáchi cánda cáxi iní nde ña tá quiahva najánditacu Ndióxi Jesucristo, xitoho í quiahva já jánditacu a mí coo í xihín mé á. Ta já ndóho xihín ndehe xinu coo í nu ín mé á. <sup>15</sup> Nasacu iní Ndióxi ndoho iní nde tóco ndihi ña yóho saha mé ndó. Ña cán quea tá ná caja Ndióxi cuahá ñamaní xihín cuaha chága ñayivi já nduu cuahá na ndiquiahva ndixahvi nu á ña ná ndicáhnu mé á.

<sup>16</sup> Sahá ña cán quea co cáta iní xihín ña ndóho í vatí sa cáyatá yiquí cuñu í. Joo ndíyuta iní in in quívi yáha. <sup>17</sup> Cama chá yáha tóco ndihi ña válí ndóho iní ñuyívi yóho joo tá nandíhi nandoho iní já vaxi cuahá ndivaha ña náhnu chága cuéntá mé á nu yo ta anda ama cáa quívi a ndíhi sahá. <sup>18</sup> Ta co ndítahan nu yo quehé cuéntá sahá ña sándehe yó viti. Ña ndítahan caja í quea cahvi iní sahá ña a cuú cuní xihín nuu yo. Jáchi vaxi quívi ndihi saha tóco ndihi ña sándehe yo viti joo ña a cuú cuní coo a anda ama cáa quívi.

## 5

<sup>1</sup> Jáchi sa cánda iní ña cúu yiquí cuñu í tátuhun vehe nu ndácaan ínima yo. Mé vehe nu ndácaan ínima yo yóho cúu á ña vaxi quívi ndihi sahá. Ta anda jáví nasacu iní Ndióxi quiahva nu yo inga yiquí cuñu nuú coo ínima yó indiví. Ta mé nuú coo ínima yó cán a ndíhi sahá anda ama cáa quívi jáchi nacavaha Ndióxi ña. <sup>2</sup> Nani ndácaan ínima yó yiquí cuñu í yóho já ndóho iní ta tána í jáchi xíca quíi iní ndiquehé inga tucu yiquí cuñu saá cuéntá indiví. <sup>3</sup> Jáchi jácandixi Ndióxi mí xihín yiquí cuñu saá cuéntá indiví já ná a cácuú tátuhun na coo jáhma. <sup>4</sup> Jáchi nani ndácaan ínima yo iní yiquí cuñu í yóho tána í ta táhnda iní vatí co cúu á sahá ña cúní yo jándacoo í yiquí cuñu í. Cúu á sahá ña ndiáva cáhnu iní coo ínima yo iní in yiquí cuñu saá. Anda jáví jándacoo í yiquí cuñu í ña ndíhi saha ta ndiquehé yiquí cuñu saá ña cuu cañehé anda ama cáa

quívī. <sup>5</sup> Jáchī mé Ndióxi quéa nasacu tiahva mí ndiquehé in yiquí cuñu saá jáchī mé á quéa nasahan ínima yī á nu yō já ná candaa vaha iní ndá quiahva ín ña sácú ini Ndióxi quiahva nu yō chí nuu.

<sup>6</sup> Sahá ña cán quéa ín ndeé iní jáchī cándaá iní ña nani ndácaan ínima yó yiquí cuñu í yóho ndúu xíca yō nu Jesucristo, xitoho í. <sup>7</sup> Ta vatí cō xíní yō mé á joo xíca í íchī cuéntá mé á sahá ña cándeé iní mé á. <sup>8</sup> Ta cō yíhvī ga yó quívī viti jáchī cúnī chága í jándacoo í yiquí cuñu í yóho já ná cuu cohó coo í xihīn Jesucristo, xitoho í indiví. <sup>9</sup> Sahá ña cán quéa ní tiempo ndúcú yó caja í ña táhán iní mé á xihīn. Vatí tácu yō á naxihī yō cúnī tá cúnī yó caja í ña táhán iní mé á xihīn. <sup>10</sup> Jáchī vaxi quívī tá ná ndique táhan ndihí candita í nuú Jesucristo ndiquiahva tá in tá in í cuéntá nu mé á sahá ña ñacaja í xihīn yiquí cuñu í ñuyívī yóho, á cúu á ña vaha á cúu á ña núu.

*Nandique táhan mánī yó xihīn Ndióxi sahá ña ñacaja Jesucristo*

<sup>11</sup> Caja cáhnu í Jesucristo xihīn ndinuhu iní ta cándaá iní ña vaxi quívī cohó candita í nu mé á. Sahá ña cán quéa ndíhi iní nde jácahan nde ñayivi ña ná ndicó coo ini na. Ta xínī vaha Ndióxi ña caja nde ta cúnī nde ña ná candaá ini ri mé va ndó ña. <sup>12</sup> Ña cáhan nde yóho cō cúu á sahá ña cúnī tucu nde ndiñehe jícó nde mé nde. Ña cúnī nde quéa ná coo vaha ini ndó xihīn ña caja nde já ná cuu nducú ñehe ndó tuhun nuú na xíca ndíñehe jícó mé, na xíca cáhan lándá ta cō ña vaha quíxi ínima ná. <sup>13</sup> Vatí cúu nde na tachī nuú ñayivi joo cúu á sahá ña caja nde chuun Ndióxi. Ta tá cō cúu nde na tachī já quéa cúu á sahá ña vaha mé ndó. <sup>14</sup> Ta sahá ña quíhvī ini Jesucristo ndehe sahá ña cán quéa ndúsa caja nde ña cúnī mé á. Jáchī cándaá cáxí ini nde ña naxihī Jesucristo saha tóco ndihī ñayivi ta in nanduú xihīn Jesucristo tá naxihī a. <sup>15</sup> Naxihī Jesucristo saha tóco ndihí ña ná a catacú ga í saha mé cuití yō. Joo cúnī a ña ná catacú saha mé a naxihī saha yō ta tá nandihī nanditacu tucu a. <sup>16</sup> Sahá ña cán quéa cō sándehe ndaa ga nde ñayivi tá quiahva caja ñayivi ñuyívī. Vatí ñacahan núu nde saha Jesucristo sanahá joo cō caja

ga nde já viti. <sup>17</sup> Jáchī tá in nanduú xihīn Jesucristo já nanduú tátuhun ñayivi saá. Ña cán quéa nandihī sahá ña yatá ta nanduú ñayivi saá ñacaja Ndióxi.

<sup>18</sup> Ta tóco ndihī ña yóho cúu á ña caja Ndióxi jáchī najándique táhan mánī á mí xihīn mé á sahá ña ñacaja Jesucristo. Ta najándacoo a chuun yóho nuú nde ña ná jándique táhan mánī nde tóco ndihī ñayivi xihīn mé á. <sup>19</sup> Ta nasahan ñamanī nuú ñayivi ndique táhan mánī ná xihīn á sahá ña ñacaja Jesucristo. Ta cō ñaquehe Ndióxi cuéntá sahá cuachi ñacaja na. Ta ña yóho cúu chuun natahnda nuú nde ñacaja Ndióxi ña ná caxi tuhun nde nuú ñayivi ña cúnī mé á ndique táhan mánī á xihīn ná. <sup>20</sup> Mé nde cúu nde na nachindahá Jesucristo ta xíca nde cáhan nde saha mé á. Ta viti cúu á tátuhun xíca tahví Ndióxi nu ndo tá cáhan mé nde. Ta viti xíca tahví nde nu ndó saha Jesucristo ña ná ndique táhan mánī ndó xihīn mé á. <sup>21</sup> Mé Jesucristo cō ñacaja ni in cuachi joo sahá mí ñacaja Ndióxi ña ná ndoho Jesucristo tátuhun in da ñacaja cuachi. Ta sahá ña ñacaja mé á cō quéhe ga Ndióxi cuéntá sahá cuachi ñacaja í ta nanduú ñayivi ndaa nu mé á tátuhun cúnī mé á.

## 6

<sup>1</sup> Ta sahá ña in cúu ndó xihīn nde caja chúun yó cuéntá Ndióxi sahá ña cán quéa xíca tahví nde nu ndo ña ná a quéhe núu ndó ñamanī caja Ndióxi xihīn ndo. <sup>2</sup> Jáchī já cáhī tuhun Ndióxi já:

Tá natandaa tiempo caja í ñamanī xuhun já naxini johó í nuú ñacahun. Ta tá naxinu quívī jácacu u yohó já nachindeé e yohó, cáhī tuhun Ndióxi.

Candehé vaha ndó. Viti ñúhú cúnī Ndióxi caja cuahá ñamanī xihīn ndo. Ta viti ñúhú cúnī a jácacu a ndohó.

<sup>3</sup> Ta ni in túhún ña núu cō caja nde já ná a cáhan núu ñayivi sahá chuun caja nde.

<sup>4</sup> Ña caja nde quéa jánaha nde nuú ñayivi ní tiempo ña cúu nde na caja chúun cuéntá Ndióxi. Jáchī sahan ndeé ini nde tá ndóho ini nde. Ta tá ndímanī ñaha nuú nde ta tá vaxi tondóho nuú nde cō ndíhi ini nde. <sup>5</sup> Jáchī ñacani na ndehe ta nataán ná ndehe vecaa

ta ndíva a na xoo nde. Ta a juú quiahva najácaja chúun na ndehe ta java tañu cō quíji nde ta java tañu vaxi joco nuú nde. <sup>6</sup> Joo jánaħa nde nuú ñayivi ña cúu nde ñayivi cuéntá Ndióxi jáchi ndúu vií nde ta cánda a ini nde ña ndaa ta ín cáhnu ini nde xihín ñayivi ta cúu nde na vaħa ini. Ta saħá ña ndáca a ĩnima yii Ndióxi ini nde ta saħá ña quíhvi ini ndusa nde ndohó <sup>7</sup> ta saħá ña cáħan nde ña ndaa xihín ndée na saħan mé á nuú nde saħá ña cán jánaħa nde nuú ñayivi ña cája chúun nde cuéntá mé á. Ta saħá ña cúu nde ñayivi ndaa nu Ndióxi saħá ña cán quéa quíhvi nuu nde cáni táħan nde xihín rí quini tá cúnj rí caja xíxi rí xihín nde. <sup>8</sup> Java tañu cája cáhnu ñayivi ndehe ta java tañu cáħan ihvi na xihín nde. Java tañu cáħan vaħa na saħá nde ta java tañu cáħan núu na saħá nde. Ta java tañu tá quiahva cája na xihín na tuħún quiahva já cája na xihín nde vatí cáħan nde ña ndaa. <sup>9</sup> Ta java tañu cája na tátuħun cō xínj na ndehe vatí xínj vaħa na ndehe. Ta mé a ndaa cúu nde tátuħun na sa xíhi vatí tácu yii va nde. Cája xíxi na xihín nde joo cō sáħní na ndehe. <sup>10</sup> Ta java tañu ndúu cuéħa ini nde joo níi tiempo cájij ini nde. Ta java tañu cándaħví ndivaha nde joo já cuahá ndivaha na cúu ná tátuħun na cuicá viti jáchi na caxi tuħun nde tuħun Ndióxi nu ná. Ta ndaa nde tátuħun na cōó ñaha nuu joo ín ndihi ñaha cuéntá Ndióxi nuú nde.

<sup>11</sup> Ñani mí j, na ndúu ñuu Corinto jan. Tá cáħan nde xihín ndo cō chíjehé tuħun nde nu ndo jáchi quíhvi ini nde ndohó xihín ndinuhu ini nde. <sup>12</sup> Vatí cō quíhvi ini ndó ndehe tá quiahva quíhvi ini nde ndohó joo cō jándacoo nde ña quíhvi ini nde ndohó. <sup>13</sup> Saħá ña cán quéa xíca taħví j nu ndo tá quiahva cája in dataa tá xíca taħví da nuú jahyi da. Ña cúnj quéa ña ná quíhvi vaħa ini ndó yeħe tá quiahva quíhvi ndivaha ini j ndohó.

*Cō ndítahan quíhvi nuu na cúu cuéntá Jesús xihín ñayivi cuéntá ñuyívi*

<sup>14</sup> Cuéntá coo ndó ná a ndíque táħan ndó xihín na cō cúu cuéntá Jesús jáchi cōó in cúu na xihín ndo. Jáchi ndaja cuu ndique táħan ña vaħa xihín ña núu. Ta ndaja cuu ndique táħan ña yeħe xihín ña naá. Ni in ña yóho a

cúu coo já. <sup>15</sup> Ta ama cuéħé Jesucristo coo a xihín Satanás, mé rí quini. Ta quiahva já ama ná cuu ndique táħan in na ndíco íchi cuéntá Jesús xihín in na cō cúu cuéntá mé á. <sup>16</sup> Ta ama ná cuu cachi ndó ña in cuu nu cája cáhnu na Ndióxi xihín nu cája cáhnu na yoco. Jáchi mí cúu yó tátuħun veñuhu Ndióxi, mé á tácu indivi. Ta já na cachi a já: Ndaca a ĩnima na cúu cuéntá mé j ta caca nuu j xihín ná.

Yeħe cacuu u Ndióxi ña caja cáhnu na, ta mé ná cacuu na ñayivi, na cacomí j cuéntá saħa, cáchí Ndióxi.

<sup>17</sup> Saħá ña cán quéa já na cachi Ndióxi, xitoho í já xihín ná:

Tavá ndo mé ndó tañu ñayivi quini jan.

Caxoo ndó nu ná ta a cája ndó ña núu ña cája na já ná cuu ndiquehe vaħa j ndohó.

<sup>18</sup> Ta já yeħe cacuu u táta ndo, ta mé ndó cacuu jahyi ta a j xihín jahyi jíhí j, cáchí Ndióxi, mé a cúu cája tóco ndihi ñaha.

## 7

<sup>1</sup> Candehé ndó ñani máni, na cúu cuéntá Jesús. Ña yóho cúu tuħun na saħan Ndióxi nu yo. Saħá ña cán quéa cō ndítahan nu yo caja í in ña núu ña cuu jácaquini yiquí cuñu í á ĩnima yo. Ña ndítahan caja í quéa cayihví yo Ndióxi ta cacu iní ndaja vií yo mí já ndiquiahva í mí ndáħa mé á.

*Cájij ini Pablo jáchi na ndicó cōo ini na ndúu ñuu Corinto*

<sup>2</sup> Xíca taħví nde nu ndo ña ná a cájij nuu ga ndó nu ĩnima ndo ta ná quíhvi ini ndó ndehe. Jáchi ni in ndó cōó na caja xíxi nde xihín ta ni in ndó cōó najátiví nde ta ni in ndó cōó najándahvi nde. <sup>3</sup> Cō cáħan j ña yóho xihín ndo saħá ña cúnj candehé ndaa j ndohó, vaħa. Jáchi janda jihna va na cachi j xihín ndo ña ñúhu ndó ĩnima j. Ta vaħa ri catacu u ta vaħa ri quivi j joo quíhvi ini tá quíhvi ini j ndohó. <sup>4</sup> Mé a ndaa cándeé cáhnu ndivaha ini j ndohó ta cájij ini j xihín ña cája ndó. Ta tá ndícuħun ini j saħa ndo já ndíndacú ini j ta ndícutú ndaa ini j xihín ña cájij ini j vatí ndóho ini j.

<sup>5</sup> Janda naní na xinu nde estado Macedonia chí a cuú canduu vaħa nde jáchi ndáchí na cuu ndáca náħa tondóho nuú nde. Jáchi

ndijáá quixi ñaha jáquihvi ndehe janda quiahva yíhvi nde ndúu nde yóho. <sup>6</sup> Joo sáhan Ndióxi tuhun ndeé ini ñayivi ndúu cuéha ini. Ña cán quéa nasahan tuhun ndeé ini nde jáchi naxinu Tito nu ndúu nde yóho. <sup>7</sup> Ta a juú sahá ña naxinu da yóho cuití va, vaha. Nandihvi tuhun ndeé ini nde jáchi nacajji ndivaha ini mé dá nacaja ndóhó. Ta nandicani da nuú nde ña xica ndivaha ini ndó cuni ndó ndehe ta anda quiahva táhnda ini ndó sahá nde. Ta nacachi da xihín i ndá quiahva ndicani ini ndó sahá i ta xihín ña yóho nacajji chága ví ini i.

<sup>8</sup> Vatí nacacuéha ini ndó xihín carta nacahyí i nu ndo joo viti co táhnda toho ini i ña nachindahá i ña nu ndo. Vatí natahnda ini i tá naxini i ña nacacuéha ini ndó tixi chá tiempo <sup>9</sup> joo cájii ini i viti. Co cúu á sahá ña nacaja cuéha carta cán ndohó. Cájii ini i jáchi tóco ndihi ña nacaja cuéha ini ndó cán nanducú ñehe a ndohó nu Ndióxi. Mé ndó nacaja ndeé ini ndó tá quiahva cuni Ndióxi. Sahá ña cán quéa cándaá ini nde ña coo nacaja núu nde xihín ndo. <sup>10</sup> Jáchi tá cácuéha ini ta tá cája ndeé ini tá quiahva cuni Ndióxi caja í já quéa chindeé a mí ndicó coo ini. Ta xihín ña yóho jácacu a mí ta coo ñaha ndítahan táhnda ini saha. Joo tá cácuéha ini ñayivi ñuyívi co ndicó coo ini na sahá ña cán quéa ndihi saha ná indayá. <sup>11</sup> Cándehé ndó ndaja nacaja ndeé ini ndó tá nacacuéha ini ndó tá quiahva cuni Ndióxi. Joo tá coo ña yóho ná yaha ta a jándacoo toho ndó cuachi nasacaja ndó, nduu. Joo viti a juú quiahva naxojo ini ndó saha mé cuachi ta nayihvi ndo saha. Ta tá nandihvi já naxica ini ndó cuni ndó yehe ña ná chindeé e ndohó. Ta anda já nasahin tiahva ndó jándoho ndó ini da nacaja cuachi cán. Ta xihín ña yóho náha ña co táhan ini ndó xihín cuachi nacaja da cán. <sup>12</sup> Ña cán quéa tá nacahyí i carta cán nu ndo coo nacaja i ña sahá da nacaja cuachi cán. Ta ni coo nacaja i ña sahá ñayivi nandoho ini sahá cuachi nacaja da. Nacahyí i ña jáchi xihín ña yóho cuu jánaha ndó nu Ndióxi ndá quiahva quíhvi ini ndó ndehe. <sup>13</sup> Ta ña yóho quéa sáhan tuhun ndeé ini nde.

Joo nandindeé chága ví ini nde ta nacajji

ini nde tá naxini nde ña cájii ini Tito. Jáchi mé ndó nachindeé ndó da ña ná ndivaha ini da. <sup>14</sup> Jáchi mí i sa nacachi i xihín Tito ña cájii ini i xihín ña cája ndó ta coo nacandoo núu i nu Tito xihín ña nacachi i xihín dá saha ndo. Joho nacandoo vaha johó i nu dá jáchi tá quiahva cáhan nde ña ndaa xihín ndo quiahva já nacahan ndaa nde xihín mé dá. Ta ña cáchi nde quéa cájii ini nde xihín ña cája ndó. <sup>15</sup> Ta cásahá quíhvi ini chága da ndohó tá ndicuhun ini da ña nacaja ndó ña cuni mé dá. Ta nasahin toni ñuhú ndó xihín dá ta nandiquehe ndó da xihín ndinuhu ini ndó. <sup>16</sup> Ta cájii ndivaha ini i jáchi cuu candeé ini i ndohó sahá ña cája vaha ndó.

## 8

### *Játaca na jiuhún quiahva na nuú na ndahví*

<sup>1</sup> Ta viti cuni nde ndicani nde nu ndóhó, ñani i ndá quiahva cája Ndióxi ñamaní xihín na cúu cuéntá Jesús ndúu estado Macedonia. <sup>2</sup> Vatí a juú quiahva cuahá tondóhó quíxi nu ná joo cájii tá cájii ndivaha ini na. Ta vatí cúu ná ñayivi cándahví ndivaha joo ín vaha ndivaha ini na jóco ná jiuhún tátuhun na cuicá. <sup>3</sup> Cáhan ndaa i nu ndo ña cájii ini na jásá na ña ín nu ná ta janda java na coo cuahá nu ná sáhdá java na ña. <sup>4</sup> Ta xihín ndinuhu ini na naxica tahví na nuú nde ña ná quiahva nde ñamaní nu ná ñehe táhvi ná chindeé na na cúu cuéntá Jesús ndúu Jerusalén. <sup>5</sup> Chí nayaha quiahva najasá na ñaha na chí coo nacahan nde caja na já. Jáchi jihna ñuhú nandiquiahva na mé ná ndáha Ndióxi, xitoho í ña ná caja na ña cuni mé á. Anda já nandiquiahva na mé ná ndáha mé nde ná chindeé na ndehe. <sup>6</sup> Sahá ña cán quéa naxica tahví nde nu Tito ña ná saa tucu da nu ndó jan já ná jáxinu coo da nuú chuun nacasahá cája da jihna ña játaca da ña jóco maní uun ndó. <sup>7</sup> Jáchi mé ndó yójó johó ndó nu ndíhi ña cája ndó. Yójó ndó xihín ña candeé ini ndó Ndióxi. Ta yójó ndó xihín tuhun cáhan ndo cuéntá Ndióxi. Ta yójó ndó xihín ña xini ndo. Ta yójó ndó xihín ña ndíhi ini ndó cája ndó ña vaha xihín ñayivi. Ta quiahva já yójó ndó xihín ña quíhvi ini ndó ndehe. Ta quiahva

já ndítahan cayojó ndo nuú ña jásá ndo nuú na ndahví.

<sup>8</sup> Ña cáhan i xihín ndo yóho co cúu á in chuun sáhdá i nu ndo. Ña cúni quea ná candaa ini ndó ndá quiahva chindeé na cán ñayivi xihín ndinuhu ini na. Ta tá cája ndó tá quiahva cája na cán já quea jánaħa ndó ña mé a ndaa quíhvi ini ndó ñayivi. <sup>9</sup> Jáchi sa cándaħa vaħa ini ndó ña natahvi ini Jesucristo, xitoho í saħa yo. Ta vatí nařacomí a tóco ndihi ñaha joo najándacoo a ña ta nandaja ndahví a mé á ña ná cuu nduu ndó tátuhun na cuicá ndivaha. Ta nařaja mé á ña yóho jáchi quíhvi ndivaha ini a ndohó.

<sup>10</sup> Cája i cuénta ña vaħa chága ná jáxinu coo ndó ña nařasáhá cája ndó ava. Jáchi jihna ñúhú mé ndó nařasáhá ndó játaħa ndó jiuħún ĵan ta nařaja ndó ña xihín ndinuhu ini ndó. <sup>11</sup> Candehé ndo. Xíní ñúhú jáxinu coo ndó ña nařasáhá cája ndó ĵan. Ta ná caja ndó ña xihín ndinuhu ini ndó tá quiahva nařaja ndó ĵanda tá mé saħa. Ta xíní ñúhú quiahva ndó ña cuu jásá ndo <sup>12</sup> jáchi ndá na cúni jásá ñaha já ndíquehe vaħa Ndióxi ndá ña cuu jásá na. Saħa ña cán quea xíní ñúhú quiahva ndó ña cuu quiahva ndó jáchi co xíca Ndióxi nu yo quiahva í ña co cómi yo.

<sup>13</sup> A cáhan ndo ña co ndítahan nuú na cán caja chún na nani cája chún mé ndó ña ná chindeé ndó na. <sup>14</sup> Ña cúni Ndióxi quea ná a ndímaní ni in ñaha nu táhan ndó. Jáchi ña ndímaní nuú na cán, ín cuahá nu ndóhó viti ña ná cuu chindeé ndó na. Joo inga tañu ña ndímaní nu ndóhó, coo a nuú na cán ta já cuu chindeé na cán ndohó. Ta quiahva já canduu in nuú xihín táhan ndó. <sup>15</sup> Já cáchi tuhun Ndióxi já: “Ni coo nařayojó a nuú na najátaca cuahá. Ta ni coo nandimaní á nuú na najátaca chá ña.”

### *Tito xihín na xíca xihín dá*

<sup>16</sup> Ndíquiahva i ndixahvi nu Ndióxi jáchi nařaja mé á ña ná ndihi ini Tito saħa ndo tá quiahva ndíhi ini mí i saħa ndo. <sup>17</sup> Jáchi nařandúsa da caja da ña nařahnda i nu dá. Ta sa ndícani ini ri mé dá saħa ndo ta saħa ña cán quea cúni da coto nihni da ndohó cuénta mé dá viti.

<sup>18</sup> Ta chíndahá i in dataa, da cúu cuénta Jesús saħa da xihín Tito ĵan. Ta tóco ndihi ñayivi ndúu java ga veñuhu cáhan vaħa na saħa da cán ta saħa ña cája chún vaħa da cáxi tuhun da tuhun vaħa saħa Jesús nuú ñayivi. <sup>19</sup> Ta mé na cúu cuénta Jesús, na táca ndijáa veñuhu yóho nandacaxi na da ña ná caca da xihín nde cañehe nde jiuħún cuħun nde ñuu Jerusalén. Ta tá cája nde ñamaní xihín ñayivi cán já quea jánaħa nde ña mé a ndaa táhyí cúni nde chindeé nde na. Ta xihín ña yóho cája cáħnu nde Ndióxi. <sup>20</sup> Jáchi co cúni nde ña ná cáhan nuú ñayivi saħa ña cája nde xihín jiuħún cuahá cán, ña najátaca ndó. <sup>21</sup> Saħa ña cán quea ndíhi ini nde cája nde ña vaħa. Ta a juú nu Ndióxi cuití va ndíhi ini nde cája nde ña vaħa jáchi cúni nde caja nde ña vaħa nuú ñayivi viti.

<sup>22</sup> Ta xihín mé ñaní, da chíndahá i nu ndó ĵan chíndahá i inga tucu da cúu cuénta Jesús. Mé da yóho cuahá ndivaha tañu naħaħa da ña ín ini da caja da ña vaħa xihín ñayivi. Ta viti xíca chága ini da caja da ña jáchi cándeé ini da ña a jándacoo nuú ndó da. <sup>23</sup> Ta ndá na ná ndaça tuhún ndohó saħa Tito ndítahan cáhan ndó xihín ná ña cúu dá da xíca xihín mí i. Ta cáhan ndó ña in nuú cája chún da xihín i chindeé nde ndohó. Ta tá ná ndaça tuhún na ndohó saħa java ga na cúu cuénta Jesús cuahán xihín dá ndítahan cáhan ndó ña cúu ná na nachindahá na cúu cuénta Jesús táca veñuhu chóho. Ta cáhan ndó xihín ná ña cúu ná na cája cáħnu Jesucristo. <sup>24</sup> Ta xíní ñúhú jánaħa ndó nuú na cán ña mé a ndaa táhyí quíhvi ini ndó na já ná candaa ini na táca veñuhu cán ña ín saħa nde cáji ini nde xihín ndo.

## 9

### *Sa natataca jiuħún cuħun nuú na cúu cuénta Jesús*

<sup>1</sup> Co xíní ñúhú cahyí chága i nu ndo saħa jiuħún ña játaħa ndó chindeé ndó na cúu cuénta Jesús ñuu Jerusalén. <sup>2</sup> Jáchi sa xíní vti ña ín vaħa ini ndó caja ndó ña. Ta ndivaha ini i tá cáxi tuhun i nuú na ndúu estado Macedonia ña mé ndó, na ndúu estado Acaya ĵan nařacu ini ndó chindeé ndó ñayivi ĵanda ava. Ta cuahá na ndúu estado Macedonia nandindeé ini na chindeé na

ñayivi sahá ña vaha ini mé ndó. <sup>3</sup> Joo chin-dahá i na cúu cuéntá Jesús yóho nu ndo já queá ná a cándo nuu i jáchi naçahan vaha i saha ndo nuú na yóho. Ta ña cuni queá ña ná coo tiahvá ndó ndiquiahva ndó jiuhún ña najátaca ndó jan tá quiahva naçachi i xihín ná. <sup>4</sup> Jáchi tiahvá náá java na ndúu estado Macedonia saa na xihín i ta cuni na ña co ndúu tiahvá ndó xihín mé jiuhún. Tá ná yaha ña yóho ta já cacahan ndivaha nuú nde caja ndó xihín ña jan sahá ña nasandee cáhnu ini i ndohó ta sa mé quiahva já cacahan ri nuu ndohó va. <sup>5</sup> Ta saha mé ña jan queá naçahan i ña xini ñuhú caça i ñamaní nuú na cúu cuéntá Jesús yóho ña ná cuhun na coto nihni jihna ñuhú na ndohó. Ta já ná chindee na ndohó nu játaca ndó jiuhún ña nasahan ndó tuhun ndó quiahva ndó jan. Já queá ná coo tiahvá jiuhún cán tá ná saa i ña ná nahá ña sahan ndó jiuhún jan sahá ña ín maní ini ndó ta co sahan ndó ña xihín ña ndúsa.

<sup>6</sup> Xini ñuhú ndicuhun ini ndó ña yóho: Da xútu loho, chá va jáquee da. Da xútu cuaha, cuaha jáquee da. <sup>7</sup> Tá in tá in ndó xini ñuhú quiahva ndó tá quiahva nasacu ini ndó quiahva ndó. A quiahva cajihnda johó ini ndó ñaha ta ni a quiahva ndó ña xihín ña ndúsa. Jáchi quihvi ini Ndióxi na cájji ini jasá ñaha. <sup>8</sup> Ta cuu quiahva Ndióxi cuahá ndivaha nuú ña vaha nu ndó já queá ná a ndímaní ni in ñaha nu ndo. Jáchi johó cayojó johó a nu ndo já ná cuu chindee ndó na ndímaní ñaha nuu nani ná cacuu a nuú ña vaha. <sup>9</sup> Jáchi já cáchi tuhun Ndióxi já: Cuahá ndivaha ñaha jasá Ndióxi nuú na ndahví, ta já coo ña vaha cája mé á xihín ñayivi anda ama cáa quivi, cáchi tuhun Ndióxi.

<sup>10</sup> Jáchi Ndióxi queá sahan tata nuú in dataa já ná cutu da ña. Ta mé a cán sahan ña cuxu da viti. Ta quiahva já caja Ndióxi xihín ndo. Quiahva mé á ña xini ñuhú ndo já ná cuu chindee chága ví ndó ñayivi. Ta já queá ñehe táhvi ndó canduu vaha ndó sahá ñamaní cája ndó. <sup>11</sup> Ta já xinu ndó cacomí ndo cuahá ndivaha nuú ña cuicá ta xihín ña yóho cuu chindee cuaha ndó ñayivi xihín á. Ta mé jiuhún játaca ndó jan tá ndiquiahva nde ña nuú na ñuu Jerusalén já queá ndiquiahva na cán ndixahvi nu

Ndióxi sahá. <sup>12</sup> Jáchi mé jiuhún játaca ndó cán tá ná ndiquiahva nde ña nuú na cúu cuéntá Jesús cán já queá chindee a na xihín ña ndímaní nu ná. Ta xihín ña yóho ndiquiahva ndivaha na cán ndixahvi nu Ndióxi. <sup>13</sup> Ta já caja cáhnu na Ndióxi jáchi xihín ña cája ndó yóho náha ña co quehe núu ndó tuhun vaha cáhan sahá Jesucristo. Jári caja cáhnu na Ndióxi sahá ña vaha ín ini ndó xihín ná. Jáchi chindee ndó na xihín ña jasá ndó nu ná ta chindee ri ndó java ga ñayivi. <sup>14</sup> Ta ndiquiahva na ndixahvi nu Ndióxi saha ndo jáchi xihín ña cája ndó náha cáxi a ña cája cuaha Ndióxi ñamaní xihín ñayivi. <sup>15</sup> Ndixahvi Ndióxi jáchi najasá mé á in ña cáhnu ndivaha nu yo ta ni co ñehe yó tuhun ndá quiahva ndicaní ña.

## 10

### *Cáhan Pablo saha mé dá*

<sup>1</sup> Yehe cúu Pablo ta cuni caça i ñamaní nu ndo. Joo cuni cahan vii i ña nu ndo tá quiahva cáhan vii Jesucristo xoho. Ndúu java na tañu ndó ta cáchi na ña tá ín i tañu ndohó já cúu u in taá uun ini. Joo cáchi na tá ín xicá i já cúu u da co yíhvi cahan ndacú xihín ndo. <sup>2</sup> Ta viti xica táhvi i nu ndo ña ná a cája ndó ni in ñaha ña cuu jánani i ndohó saha. Tá ná saa i coto nihni i ndohó jan co cuni jánani i java ndó, na jácojo cuachi jatá nde, na cáchi ña cája nde tóco ndihi ñaha tá quiahva cája ñayivi ñuyiví. Jáchi mé a ndaa sácú ini i saa i quihvi táhan i xihín na jan. <sup>3</sup> Vatí cúu yó ñayivi ndúu ñuyiví joo co cája nde tá quiahva cája ñayivi ñuyiví. <sup>4</sup> Jáchi ña chindee ndehe co cúu á ña chindee ñayivi ñuyiví. Joo ña chindee ndehe cúu ndee Ndióxi ña sahan mé á nuú nde já ná cuu jándihi nde sahá ña cája tiñahá sacuaha. <sup>5</sup> Ta quiahva já jándihi nde sahá ña cája ihvi xihín Ndióxi ta xihín ndee mé á jándihi nde sahá ña cáhan ñayivi, na cája cáhnu mé jáchi co xini na Ndióxi. Ta tóco ndihi ña cáhvi ini nde ndiquiahva nde ña ndáha mé á já ná caja nde tóco ndihi ña cuni Jesucristo. <sup>6</sup> Ña cán queá tá ná nahá ña ín tiahvá ndó caja ndó tóco ndihi ña nasahnda nde nu ndó já queá cacu ini nde jánani nde ndá na nacuu, na co cuni caja ña sáhdá Jesucristo.



7 Mé ndó cō xíní ndó ndá quiahva cáa ínima ñayivi jáchi sándehe ndó ña cáa chí jata cuití va. Joo tá mé a ndaa táhyí cáhán java ndó ña cómí Jesucristo cuéntá saha ndo xíní ñúhú quehe ndó cuéntá ña cúu ri ndehe va na cómí Jesucristo cuéntá saha. 8 Cō cáchan nuú i caja cáhnu loho i mí i sahá chuun nasahan Ndióxi nuú i. Jáchi nacaja mé á ña ná cahnda i chuun nu ndo jáchi mé Jesucristo, xitoho í nasahan chuun nuú i ña ná jácuahnu i ndohó tá quiahva cúni mé á. Ta cō cúni a ña ná jándihi i saha ndo. 9 Cō cúni ña ná cahán ndo ña jáyihví i ndohó xihín carta chindahá i nu ndo. 10 Ndúu java na ta cáchí na ndacú ndivaha yuhú u cahán i nu carta cáhyí i. Joo tá ín i xihín ndo cō náha i ña cúu u da jáyihví ndohó jáchi tá cásahá cáhan i xihín ndo cō náha i ña cúu u da ndítahan coo toni ñúhú ñayivi xihín. 11 Joo na xíca cáhan ña yóho xíní ñúhú candaa ini na ña tá quiahva ndacú yuhú i tá cáhan i xihín carta tá ín xíca i quiahva já caja i tá ná xinu cōo i tañu ndó jan.

12 Mé a ndaa cō sahan i ínima i jácatáhan i mí i xihín na cája cáhnu mé jan. Joo ndía cáa mé cája na jan tá jácatáhan ndaja táhan mé va na ta xihín ña yóho náha ña tóntó ndivaha cája na. 13 Cō cája cáhnu i mí i jáchi cō ndítahan nuú i caja i ña. Cáhan cuití va i sahá chuun nasahan Ndióxi nuú i caja i cuéntá mé á ta mé á quea nachindahá yehe saa i anda nu ndúu ndó jan. 14 Cō cája cáhnu i mí i tá cáhan i sahá chuun nasahan Ndióxi nuú i caja i. Jáchi mé nde cúu nde na nu cuití nasahan nacahan nde tuhun vaha saha Jesucristo nu ndo. 15 Sahá ña cán quea cándaa vaha ini ndó ña cō cáhan nde sahá chuun najacava sáhá inga na. Ta ni cō yáha nde cája cáhnu nde mé nde sahá chuun cája nde yóho. Ña cúni nde quea ná candeé chága ini ndó Jesucristo nani caja chúun chága nde tañu ndó tá cúni Ndióxi. 16 Ta cúni nde cahán nde tuhun vaha saha Jesús nuú ñayivi, na ndúu xíca chága nuú ñuu Corinto jan. Joo cō cúni nde quihvi nuu nde nuú sa nacaja chúun inga na já ná a cája lándá nde sahá chuun nacaja inga na.

17 Ta já cáchí tuhun Ndióxi já: “Ndá na cúni caja lándá, xíní ñúhú caja lándá na sahá ña náhnu nacaja Ndióxi xihín ná.” 18 Jáchi

cō táhán ini Ndióxi xihín na ndíñehe jícó mé joo ndíñehe jícó Ndióxi ñayivi tá táhán ini a xihín ña cája na.

## 11

### *Cáhan Pablo sahá na cō cúu apóstol*

1 Xíca tahví i nu ndo ña ná a quehe ndó cuéntá sahá ña cája i tá ná caja i tátuhun in taa tachí. Caja ndó ñamaní xihín i. 2 Ndióxi quea nacaja ña ná quihvi ndivaha ini i ndohó sahá ña cán quea cō cúni ña ná jándacoo ndó íchi cuéntá mé á. Cája i tátuhun cája da cuíñú jáchi nasacu ini i ndiquiahva víi i ndohó ndáha Jesucristo tátuhun cája in dataa ndiquiahva da jahyi jíhí da, ña cúu ña tacú ndinuhu nuú da cacuu yíi ña. 3 Á cō ndícuhun ini ndó ndaja nacaja tiñahá sacuaaha tá najándahvi rí ña nani Eva sanahá. Ta viti yíhví i ña ná jándahvi java ñayivi ndohó tá quiahva najándahvi rí mé ña. Jáchi viti candeé ini ndó Jesús ta cája cáhnu ndó mé á xihín ndinuhu ini ndó. Joo yíhví i jándacoo ndó ña jan. 4 Jáchi mé ndó sahan ndó ñamaní ña ná saa ndá ñayivi nacuu va vatí jánaaha na ña tuhún saha Jesucristo. Cō jánaaha na ndohó tá quiahva najánaaha mé nde nu ndo jáchi jíin va cáhan na saha ínima yíi Ndióxi ta jíin va cáchí na jácau Ndióxi ñayivi. Joo nandiquehe vaha ndó na. 5 Ta cáhán ndo ña cúu ná na apóstol, na náhnu ndivaha joo xíní vaha i ña cō cúu ná na vaha chága a juú ga yehe. 6 Vatí cō tiahva i cahán víi i joo ín vaha xíní túní i jánaaha i tuhun Ndióxi nu ndo. Ta xíní vaha ndó ña yóho jáchi cuahá tañu najánaaha vaha i tuhun Ndióxi nu ndo.

7 Java tañu cáhán i ña coo nacaja vaha i jáchi coo naquehe e yahvi nu ndo tá nacahan i tuhun Ndióxi xihín ndo. Ta java tañu cáhán i ña coo nacaja vaha i tá najánuu i mí i já ná cuu ndindita jícó ndohó. 8 Mé a ndaa cúu á tátuhun nacandaa joho i jjuhún nuú java na cúu cuéntá Jesús ta naquehe e yahvi i nuú na cán ña ná quixi i caja chúun i tañu mé ndo. 9 Ta tá naxini ñúhú i in ñaha tá nasahin tañu ndó jan coo najáquihvi toho i ndohó sahá ña naxini ñúhú i. Jáchi mé na cúu cuéntá Jesús, na naquixi Macedonia nasahan na nuú i ña naxini ñúhú i catacu u. Mí i coo naxeen

toho i jáquihvi i ndohó. Ta a cája toho i ña viti. <sup>10</sup> Cáhan i ña ndaa xihín ndo jáchi ín Jesucristo xihín i. Ta ni in ñaha a cáji nuu toho nuú i cahan i ña yóho nuú na ndúu estado Acaya. <sup>11</sup> Coto a cáhán ndo ña co quíhvi ini i ndohó sahá ña cáhan i quiahva já xihín ndo. Jáchi xíní vaha Ndióxi ña quíhvi ndivaha ini i ndohó.

<sup>12</sup> Joo a jándacoo toho i caja i ña cája i yóho já ná a quiahva i ñamaní nuú na cán ndíñehe jícó na mé ná. Jáchi cáchí na cája chúun na cuéntá Ndióxi tá quiahva cája ndehe. Joo co cúu á ña ndaa. <sup>13</sup> Mé a ndaa co cúu toho na jan apóstol cuéntá Jesucristo vatí ndája na mé ná tátuhun apóstol. Ta jándahvi na ñayivi tá cáchí na ña cúu ná na apóstol. <sup>14</sup> Joo co ndítahan catóntó yo sahá ña yóho jáchi janda Satanás, mé tiñáhá sacuahá ndája rí mé rí tátuhun in tátó Ndióxi, ña yehe ndivaha. <sup>15</sup> Ta jári na ndíco jata rí cán co yáncá toho na ndája na mé ná tátuhun ñayivi cája ña vaha. Joo vaxi quiví ndiquehe na yahvi sahá ñaha ñacaja na.

### *Ndóho ini Pablo sahá ña cúu dá apóstol*

<sup>16</sup> Ta ná cahan tucu u ña yóho xihín ndo: coto a cáhán ndo ña cúu u da ñacatachi. Joo tá cáhán ndo ña cúu u da ñacatachí i quiahva loho ndó ñamaní nuú i ña ná cahan i xihín ndó tátuhun in da tachí já ná cuu ndíñehe jícó loho i mí i. <sup>17</sup> Tá cáhan lándá i yóho co cúu á tuhun ñasahan Ndióxi nuú i. Cáhan i ña tátuhun in da ñacatachí cuití va. <sup>18</sup> Ta sahá ña ndúu cuahá na cátoó ndíñehe jícó mé sahá ña cája na ñuyiví yóho sahá ña cán quéa ná caja ri yehe va quiahva já. <sup>19</sup> Mé ndó cáhán ndo cúu ndó ñayivi ndíchí ndivaha jini joo cájii ini ndó táa johó ndó nu cáhan ñayivi tachí cán xihín ndo. <sup>20</sup> Ta ni co sáhní ndo mé ndó tá cája ndúsa na cán xihín ndo caja ndíví ndó nu ná vatí quéhe na ñaha cómi ndo. Ta jándahvi na ndohó ta quéhe núu na ndohó janda cáni na jahndá nuu ndo. <sup>21</sup> Á cáhán ndo ña ndítahan cacahan nuú i sahá ña coó ñasahan ndeé toho ini nde caja nde tá quiahva cája na jan xihín ndo.

Joo tá co sáhní na jan mé ná cája lándá na, caja ri yehe va já vatí cáhan i ña yóho tátuhun in da tachí. <sup>22</sup> Ta tá cáhan lándá

na jan ña cúu ná na hebreo, mé a ndaa da hebreo cúu ri yehe va. Ta tá cáhan lándá na jan ña cúu ná na Israel, mé a ndaa da Israel cúu ri yehe va. Ta tá cáhan lándá na jan ña ñaquixi na chichi Abraham, mé a ndaa da ñaquixi chichi Abraham cúu ri yehe va. <sup>23</sup> Ta tá cáhan lándá na jan ña cúu ná na cája chúun cuéntá Jesucristo, mé a ndaa yehe cúu da cája chúun chága cuéntá mé á. Vatí cáhan i tátuhun in da tachí joo mé a ndaa cuahá chága cája chúun yehe a juú ga na jan. Cuahá chága tañu ñachicaan na yehe vecaa a juú ga na jan. Ta cuahá chága tañu ñacaja xíxi na xihín yehe a juú ga na jan. Ta cuahá ndivaha tañu sa yáti quivi i a juú ga na jan. <sup>24</sup> Ta uhun tañu najácaxáhan na Israel yehe xihín churú. Ta in tá in táhndá cán najáxinu na churú jata i oco sahun comi tañu. <sup>25</sup> Ta uní tañu najácaxáhan na yehe xihín vara ta in tañu ñacati na ñacuun na yuú yehe. Ta sa uní tañu ñasacoo barco, mé dó cuahan i cán cahá tañuhú. Ta ñasanúu i nuú tañuhú in ñuú ta in ndiví. <sup>26</sup> Ta ndóho ndivaha ini i nu xíca nuu i jáchi cuahá tañu ndúcú tani i xihín yuta. Ta janda taa cuíhna a íhvi queta nuú i. Ta ñaxíca iyo i tañu na ñuu i xihín tañu na tóho. Ta tá ín i ñuu náhnu á ín i yúcu á ín i tañuhú já vaxi tá vaxi tondóho nuú i. Ta janda tañu na cáchí cúu cuéntá Jesús vatí co cúu na ñaquixi tondóho nuú i. <sup>27</sup> Ta cánaa i cája chúun i janda ndíhíhvi ndivaha i. Ta cuahá tañu co quíji vaha i. Ta cuahá tañu ñaquixi joco nuú i ta ñaquixi ña íchí ini i ticuúj ta janda ínima uun i ín i jáchi co ñehe e ña cuxu u. Ta cuahá tañu ndóho ini i sahá ña vixi xíní i jáchi coó jáhma candixi i.

<sup>28</sup> Ta vatí ndóho i ña yóho xihín java ga ñaha joo ndícani tá ndícani ini i saha tóco ndíhi na cúu cuéntá Jesús, na táca ndijáa veñuhu. <sup>29</sup> Jáchi tá cuítá ini ñayivi já cúu á tátuhun cuítá ri ini yehe va xihín ná. Ta tá ndícava in na nuú cuachi cája inga na já quéa xójo ndivaha ini i xihín na najándicava ñahá cán. <sup>30</sup> Ta tá ín in ñaha ña cuu cahan lándá i saha já ná cahan lándá i sahá ña náha ña coó cuahá ndeé mí i. <sup>31</sup> Ta Ndióxi, tátá Jesucristo, xitoho í, mé a ndítahan caja cáhnu í anda ama cáa quiví xíní vaha ña cáhan i ña ndaa xihín ndo. <sup>32</sup> Jáchi in tañu

naſah̄iin i ñuu Damasco ta ndaja coo da cúu gobernador, da naçaja chúun nu rey Aretas naſahnda da chuun ña ná chicaji na yéhe ñuu cán já ná cuu tiin na yehe. <sup>33</sup> Joo java na cúu cuéntá Jesús najánuu na yehe ini in toyicá chí ventana mé corra yuu ndájí ñuu cán já naçuu najáçacu na yehe.

## 12

### *Ña naxini Pablo naçaja Ndióxi*

<sup>1</sup> Ni in ñaha co ñehe e tá ndíñehe jícó i mí i. Joo já ndítahan nuú i ndicani i nu ndo sahá ña naxini i cuéntá indiví, ña najánaha Ndióxi nuú i ta sahá ña naçachi mé á xihín i coo. <sup>2</sup> Sa ín uxu comí cuiã nayaha ña yóho. Najándaa Ndióxi yehe, da cándéé ini i Jesucristo naſahan i indiví uní nu ín mé á. Co xini yehe á nandaa yiquí cuñu i xihín i á naçandoo a ñuyíví yóho. In túhún Ndióxi xini. <sup>3</sup> Joo xini vaaha i ña yehe cúu da naſahan cán vatí co xini i á nandaa yiquí cuñu i á naçandoo a ñuyíví yóho. Ndióxi cuití va xini. <sup>4</sup> Joo xini vaaha i ña naſahan i nu ndató ndivaha indiví. Ta mé cán naxini joño i tuhun, ña co ndíñehé e ndaja ndicani i ña nuú ñayivi ta ni co sáhan Ndióxi ñamañi nuú i ndicani i ña nu ná. <sup>5</sup> Cuu ndíñehe jícó i mí i sahá ña naxini i yóho joo a cája toho i ña. Vaaha chága ná caja lándá i sahá ña coó toho ndéé mí i. <sup>6</sup> Ta tá ná cacu ini i ndíñehe jícó i mí i já queá a cacuu toho i da tachí jáchi ña ndaa táhyí cacuu tuhun çahan i. Joo co cája toho i ña jáchi cuni ña ná çahán ñayivi ña ndaa cuití va sahá i ta sahá ña naçaja i xihín sahá ña naçahan i.

<sup>7</sup> Ta sahá ña co cuni Ndióxi ña ná caja cáhnu i mí i sahá ña naxini i sahá ña cán queá naquixi in ña ndóho i. Cúu á tátuhun in ínñu sa cáñee nuú yiquí cuñu i xini i, ña quixi nuú tiñáhá sacuaaha cája xíxi rí xihín i já ná a cája cáhnu i mí i. <sup>8</sup> Ta sa uní tañu naxica tahví i nu Ndióxi, xitoho í ña ná tavá a ña ndóho i yóho. <sup>9</sup> Joo nanducú ñehe mé á tuhun nuú i já naçachi a já: “Sa quiahva cúu mé a quíhvi ini i yohó jan va jáchi ña cúu cája i xihín ñayivi náha cáxi chága tá co ndéé ná”, naçachi Ndióxi. Ña cán queá cájii ini i cúu u in da cámaní ndéé já queá náha ña xihín ndéé Jesucristo cája i tóco ndihi ñaha. <sup>10</sup> Sahá ña quíhvi ini i Jesucristo, cájii tá cájii

ini i tá cávitá ini i, á tá cánahá na xihín i, á tá cámaní ñaha nuú i, á tá ndúcú na yehe ña caja xíxi na xihín i. Jáchi tá cávitá ini i já ndíndacú chága i xihín ndéé Ndióxi.

### *Ndícani ini Pablo sahá na cúu cuéntá Jesús ndúu ñuu Corinto*

<sup>11</sup> Tá quiahva cája da tachí já cája i joo ndóhó cúu na naçaja ndúsa xihín i caja i ña. Jáchi mé ndó cúu na ndítahan çahan vaaha sahá i, nduu. Joo já coó toho chága sahá na cáhán ndó cúu apóstol jan a juú ga yehe vatí mé a ndaa nu Ndióxi coó saha toho i. <sup>12</sup> Jáchi xihín ña nãhnu naçaja i nu ndo jan ta xihín ña xitúhún naxini ndó naçaja i jan najánaha i nu ndo ña mé a ndaa táhyí cúu u in apóstol. Coó nandíhi ini i tá naçaja i ña xitúhún jan nu ndo. <sup>13</sup> Ta tá quiahva naçaja i xihín java ga na cúu cuéntá Jesús quiahva já naçaja rí xihín ndóhó va. In túhún ña coó naçaja i xihín ndó queá coó najáquihvi toho i ndohó sahá ña xini ñuhú i catacu u tá quiahva naçaja i xihín java ga na cúu cuéntá Jesús. Á cáhán ndo ña vaaha chága ná caja ndúsa i xihín ndó quiahva ndó nuú i ña xini ñuhú i.

<sup>14</sup> Ta viti sa ín tiahva i saa i coto nihni i ndohó ña chí uní. Ta ni viti a jáquihvi toho i ndohó jáchi co xica toho ini i quehe e ña comí ndo. Ña cuni queá ná quíhvi ini ndó yehe tá quiahva quíhvi ini i ndohó. Jáchi mé ndó cúu ndó tátuhun jahyi i sahá ña najánaha i tuhun Ndióxi nu ndo. Ta ndá naçuu na valí co xito na tátá na joo mé tátá na cúu na xito mé na valí. <sup>15</sup> Ta cájii ini i jándihi i tóco ndihi ñaha comí i já ná chindeé e ndohó. Ta jandá ndiquiahva i mí i já ná cacu ndaa ínima ndo. Cája i cuéntá tá quíhvi chága ini i ndohó já co cúu chága ini ndó xihín i.

<sup>16</sup> Mé a ndaa coó najáquihvi toho i ndohó. Joo ndúu java na tañu ndó ta cáhí na ña naçaja ndúsa i xihín ndo já najándahvi tá najándahvi i ndohó. <sup>17</sup> Á cáhán ndó ña najándahvi i ndohó tá nachindahá i java ñayivi nu ndo jan. A juú a já. <sup>18</sup> Jáchi naxica tahví i nu Tito ña ná saa da coto nihni da ndohó jan. Ta nachindahá i inga da cúu cuéntá Jesús xihín dá. Á najándahvi da ndohó, vaaha. Sa xini vaaha i ña coó najándahvi da ndohó. Ta tá quiahva cája

Tito quiahva já cajú ri yehe va jáchi in ínima ñehe nde xihín dá.

19 Á cáhan ndo ña sa ñacasáhá cáhan chíjín tucu nde xihín ndo viti. Co cúu á já. Jáchi sándehe cáxí Ndióxi ña cáhan nde ña yóho xihín ndo tá quiahva cúni Jesucristo. Ta cajú nde tóco ndihi ña yóho jáchi quíhvi ini nde ndohó ta cúni nde ña ná cuahnu chága ndó xihín tuhun Ndióxi. 20 Yíhvi i jáchi tá ná saa i coto nihni i ndohó co cúni i ndiñehé e ndohó cajú ndó ña núu, ña co cátóo i. Ta sa mé quiahva já yíhvi i ña cuni ndó yehe cajú i ña co cátóo ndo. Yíhvi i jáchi tiahva náa cani táhan ndó, á cahíhvi ini xihín táhan ndó, á cojo ini xihín táhan ndó, á ndacahnda táhan ndó, á cáhan ndó ña tuhún sahá ñani táhan ndó, á candehe ndaa táhan ndó, á ndiñehe jícó ndo mé ndó, á sa jín sa jín cajú in in ndó. 21 Ta yíhvi i ña tá ná saa i coto nihni i ndohó jan cajú Ndióxi ña ná cacahan nuú i sahá tóco ndihi ña cajú ndó jan. Ta yíhvi i cuacu u sahá cuahá na cajú cuachi, na sa janda jihna ñacasáhá cajú cuachi ña a ñaha jándacoo na cajú na xihín yiquí cuñu na. Ta cuacu u jáchi a ñaha jándacoo na ña ndúu na xihín na co cúu ñájíhí na á yí ná. Ta ni a ñaha jándacoo na tóco ndihi ña núu, ña xíca ini yiquí cuñu na cajú.

## 13

*Jáxinu coo Pablo tuhun cáhan da xihín na ñuu Corinto*

1 Ta xihín ña yóho xinu uní táhnda saa i coto nihni i ndohó. Ta xíní ñuhú ndicuhun ini ndó ña sáhnda tuhun Ndióxi chuun nu yo ta cáhí a ña tá ná cáhan ivi á uní testigo sahá cuachi ñacaja in ñayivi anda jávi candaa ini ndó ña mé a ndaa in cuachi na. 2 Tá quiahva ñacahan i xihín ndo tá ñaxito nihni i ndohó ña chí ivi quiahva já cáhan i xihín ndo viti vatí in xíca i. Ta tá quiahva ñacahan i xihín na ñacaja cuachi jihna jan quiahva já cáhan i xihín ndihi ndó viti. Ta tá ná casaa tucu u coto nihni i ndohó jan já queá a táhnda ga ini i sahá ndo sahá cuachi cajú ndó. 3 Ta xihín ña yóho candaa ini ndó ña mé a ndaa táhyí cáhan i ña sáhnda Jesucristo cáhan i. Cúni ña ná candaa ini ndó ña co cáhan chíjín toho Jesucristo xihín

ndo. Ña cajú mé á xihín ndo queá náha nu ndo ña in ndée mé á cajú ña cúni a. 4 Mé Jesucristo queá ñacata caa na ndica crúxu tátuhun in da co ndée. Joo viti tácu mé á sahá ndée Ndióxi. Ta tá quiahva vitá ñasahin yiquí cuñu a quiahva já vitá ndúu yó viti. Joo sahá ña in ñanduú xihín mé á já cuu catacú xihín ndée a. Ta xihín ña yóho cajú chúun nde tañu mé ndó.

5 Xíní ñuhú candehe vaha ndó mé ndó á mé a ndaa táhyí candeé cáhnu ini ndó Ndióxi. Xíní ñuhú coto ndojó ndó mé ndó. Ta tá mé a ndaa táhyí cúu ndó cuénta Jesús xíní ñuhú ndicuhun ini ndó ña ndacaa Jesucristo ini ínima ndo á tá coo yúhu uun va ndó cúu ndó cuénta Jesús. 6 Ta ndati i xinu quivi candaa ini ndó ña coo najándahvi nde ndohó. 7 Xíca tahví nde nu Ndióxi ña ná a cajú ndó ni in ña núu. Ta co cúu á sahá ña cúni nde cáhan vaha ñayivi sahá nde, vaha. Ña cúni nde queá ná a jándacoo ndó cajú ndó ña vaha vatí ná cáhan ñayivi ña coo ñacaja vaha nde xihín ña najánaha nde nu ndo. 8 Co xíní ñuhú nde jánani nde ndohó nani cajú ndó ña ndaa joo tá cajú ndó ña núu já queá xíní ñuhú jánani nde ndohó. 9 Ta cájii ini nde tá ndaa nde tá quiahva ndaa na vitá ini tá cúu á sahá ña ndacú ini mé ndó cuénta Ndióxi. Ta a jándacoo toho nde caça tahví nde nu Ndióxi sahá ndo ña ná xinu coo ndó cacuu ndó ñayivi coo cuachi nu mé á. 10 Jihna ñuhú cáhyí i carta yóho nu ndo já saa i coto nihni tucu u ndohó. Jáchi tá ná saa i jan co cúni cáhan ihvi nahá i xihín ndo vatí ñasahan Ndióxi chuun yóho nuú i. Ta coo ñasahan mé á ña nuú i ña ná jándihi i sahá ndo. ñasahan mé á chuun yóho nuú i já ná cuu ndaja ndacú u ndohó cuénta mé á.

11 Candehe ndo, ñani i, na cúu cuénta Jesús. Xihín tuhun yóho jáxinu coo i tuhun cáhan i xihín ndo. Ná coo Ndióxi xihín ndó. Ta ná ndindacú chága ndó já ná nduu ndó ñayivi ndaa. Ta quiahva tuhun ndée ini táhan ndó. Coo vaha ndó xihín ñani táhan ndó já queá coo Ndióxi xihín ndo. Mé a cán quíhvi ini a ndohó ta cúni a ña ná coo vaha ini ndó. 12 Cáhan Ndióxi xihín táhan ndó ta tatí yúhu táhan ndó ta yí cajú ndó ña. 13 Tóco ndihi na cúu cuénta Jesús chíndahá na Ndióxi coo ndó.

<sup>14</sup> Ná tahvi ini Jesucristo, xitoho í saha ndo jáchi quíhvi ini Ndióxi ndohó. Ta ná coo tuun ínima yji mé á xihin ndo. Ña yóho quéa cúni ña ná caja Ndióxi xihin ndo. Já ná coo.

## Carta nachindahá Pablo nuú na cúu cuéntá Jesús ndúu ñundáhyi Galacia

*Chíndahá Pablo Ndióxi coo na cúu cuéntá Jesús ndúu ñundáhyi Galacia*

<sup>1</sup> Yehe cúu Pablo, da cáhyi carta yóho nu ndo. Naçaxi Ndióxi yehe cacuu u in apóstol ta a juú toho ñayivi naçaxi yehe. Ta ni coó nachindahá ñayivi yehe jáchi Jesucristo xihín Ndióxi, tátá yo, mé a najánditacu Jesucristo, mé a cán quea naçaxi a yehe cacuu u in apóstol. <sup>2</sup> Yehe xihín tóco ndihi java ga na cúu cuéntá Jesús ndúu xihín i yóho, chíndahá nde carta yóho nu ndóho, na ndúu ñundáhyi cuéntá Galacia jan. <sup>3</sup> Ña cuni nde quea ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó. <sup>4</sup> Xíni ñuhú ndicuhun ini ndó ña nandiquiahva Jesucristo mé á quivi a saha cuachi cája í ta xihín ña yóho najáçacu a mí nuú ña núu cája ñayivi ñuyívi. Ta nayaha ña yóho jáchi já cuni Ndióxi, tátá yo. <sup>5</sup> Cáhnu ndivaha ná cacuu Ndióxi anda ama cáa quivi. Já ná coo.

*Coó ga inga tuhun cáhan sahá Jesucristo ña cuu jáçacu a mí*

<sup>6</sup> Mé a ndaa naçatontó ndivaha i jáchi cama chá naçasáhá ndo cáxoo ndó nu Ndióxi, mé a naçana ndóho cacuu ndó cuéntá mé á sahá ña quíhvi ini Jesucristo ndóho. Ta viti naçasáhá ndo xini joho ndó inga tuhun ña cáchi ñayivi cuu jáçacu a ndóho. <sup>7</sup> Mé a ndaa coó toho inga tuhun ña cuu jáçacu a ñayivi. In túhún va cúu tuhun Ndióxi ta cáhan sahá Jesucristo. Joo ndúu java ñayivi ta cuni na jájana na jini ndo ta cuni na ndijama na tuhun vaha cáhan sahá Jesucristo, mé a jáçacu mí. <sup>8</sup> Joo tá vaxi in na ta jánaña na inga tuhun ña cáchi na cuu jáçacu a ndóho ta coo cúu á tuhun vaha ña najánaña nde nu ndó já quea ná cuhun cháhan jata ná ta coo caja toho a ndá ñayivi cúu ná janda mí i á janda in tátó Ndióxi ná quixi indivi. <sup>9</sup> Sa naçachi i ña yóho xihín ndó jihna ta viti ndicó coo tucu u cahan i ña

xihín ndo: tá jánaña in ñayivi inga tuhun ña cáchi na cuu jáçacu a ndóho ta coo cúu á tuhun najánaña nde nu ndo já quea ná cuhun cháhan jata ná.

<sup>10</sup> Co ndúcú u candoo vaha i nuú ñayivi. Ña cuni quea candoo vaha i nu Ndióxi jáchi tá cuni candoo vaha i nuú ñayivi já cuni cachi a ña coo cúu ga i da cája chúun cuéntá Jesucristo xihín ndinuhu ini i.

*Ndicani Pablo ndaja nanduu da apóstol*

<sup>11</sup> Candehé ndó ñani mí i, na cúu cuéntá Jesús. Mé tuhun naçahan i xihín ndó coo naquixi a jini ñayivi ñuyívi. <sup>12</sup> Ta coo nandiquehe e ña nuú ñayivi. Ta ni in túhún toho ñayivi coo najánaña na ña nuú i jáchi Jesucristo quea najánaña ña nuú i. <sup>13</sup> Cája i cuéntá sa naxini joho ndó sahá ña naçaja i jihna tá nasandico i costumbre na Israel. Jáchi naxojo ndivaha ini i xihín na cúu cuéntá Jesús mé tiempo cán. Ta naçaja xixi ndivaha i xihín ná ta nasacu ini i jándihi i saha ná. <sup>14</sup> Ta mí i nasacuu u da naçayojó chága cája costumbre na Israel nuú ndihi na ñuu i, na nasahnu xihín i. Jáchi nasativi i xihín ndinuhu ini i costumbre tásahnu jícó nde. <sup>15</sup> Joo Ndióxi naçaxi a yehe janda tá cámaní cacuu u ñuyívi yóho ta sahá ña cuni a caja ñamaní xihín i sahá ña cán quea naçana mé á yehe. Ta tá naxinu coo quivi nasacu ini mé á <sup>16</sup> já najánaña Ndióxi Jesucristo, jahyi a nuú i já ná cuu caxi tuhun i tuhun vaha saha mé á nuú na coo naquixi chichi Israel. Ta mé tiempo cán coo nasahan i cahan i xihín ni in ñayivi sahá ña najánaña Ndióxi nuú i. <sup>17</sup> Ta ni coo nasahan i ñuu Jerusalén cahan i xihín na cúu apóstol nu cuítí a juú ga yehe. Ña naçaja i quea ivi laá naquee nasahan i ñundáhyi cuéntá Arabia. Ta tá nandihí nandicó coo i chí ñuu Damasco.

<sup>18</sup> Ta tá sa nayaha uni cuia já nasahan i ñuu Jerusalén ndicuni táhan i xihín Pedro ta nasahin i sahun quivi xihín dá. <sup>19</sup> Ta cán naxini ri da cúu Jacobo, ñani Jesucristo joo coo naxini toho i na java ga cúu apóstol cán. <sup>20</sup> Sándehé cáxi Ndióxi ña coo jándahvi toho i ndóho. Ña ndaa quea cáhyi i nu ndó yóho.

<sup>21</sup> Tá nandihí já naquee e cuahan i chí ñundáhyi cuéntá Siria xihín Cilicia. <sup>22</sup> Joo

mé tiempo cán na cúu cuéntá Jesús ndúu estado Judea a ñáha cuni na yehe, nduu. <sup>23</sup> Joo naxini johu na ña cáhan java ñayivi sahá i: “Da ñacaja xíxi xihín yo jihna, da cán cúu da xíca nuu cáhan tuhun Ndióxi xihín ñayivi viti. Da ñacúni jándihi sahá tuhun Ndióxi jihna, da cán cúu da jánaħa ñayivi cándeé ini na mé á”, cáchí na. <sup>24</sup> Ta viti cája cáhnu na Ndióxi sahá ña ñandijama mé á yehe.

## 2

### *Na apóstol ndíquehe vaha na Pablo.*

<sup>1</sup> Tá sa ñayaha uxu comí cuja já ñasahan tucu u ñuu Jerusalén. Ñasahan Bernabé xihín i ta ñasañehe ri i Tito ñasahan da xihín nde. <sup>2</sup> Ta ñasahan i jáchi ñanaħa Ndióxi nuú i ña ndítahan cuhun i. Ta tá ñataca jíin ndihi na náhnu, na comí cuéntá sahá na cúu cuéntá Jesús ñuu Jerusalén cán, já ñacasáhá i ndícani i nu ná ndaja cáa tuhun vaha saħa Jesús ña jánaħa i nuú na coó ñaquixi chichi Israel. Ñacaja i ña yóho jáchi coó ñacúni ña ná cachi na náhnu cán ña coó saħa toho ña jánaħa i. <sup>3</sup> Ta ñandiquehe vaha na ndeħe ta ni coó ñacaja ndúsa na xihín Tito, da ñasahin xihín i ña ná chican da marca yiquí cuñu da vatí co cúu dá da ñaquixi chichi Israel. <sup>4</sup> Joo java na, na co xíca ndaa íchi cuéntá Jesús, ñandihvi jehé na tañu nde ña ná candeħe na ndá quiahva núna nuú nde cája cáhnu nde Ndióxi sahá ña cándeé ini nde Jesús. Jáchi ñanducú na cája ndúsa na xihín nde ña ná ndicó coo nde caja nde tóco ndihi ña sáhndá ley Moisés. <sup>5</sup> Joo coó ñacandúsa toho nde tuhun cáhan na xihín nde jáchi cúni nde cándaä ini ndó ña ndaa cáhan saħa Jesucristo, ña cuu jácaacu ndaa ínima ndó tá ná candeé ini ndó mé á.

<sup>6</sup> Joo mé na náhnu, na comí cuéntá sahá na cúu cuéntá Jesús cán coó ñacachi na xihín i ña ná ndijama i ña jánaħa i nuú ñayivi. Cáchí i ña cúu ná na náhnu vatí co cája toho a nuú i ndá quiahva náhnu chuun ndójo na jáchi in cúu tóco ndihí nu Ndióxi. <sup>7</sup> Táhán ini na náhnu cán xihín ña cája i jáchi ñandicuni na ña mé Ndióxi queá ñasahan chuun yóho nuú i ña caca nuu i cáhan i tuhun vaha saħá Jesús nuú na coó

ñaquixi chichi Israel. Ta sa mé Ndióxi queá ñasahan chuun nu Pedro ña ná cuhun da cáhan da tuhun vaha saħá Jesús nuú na ñaquixi chichi Israel. <sup>8</sup> Ta sa mé Ndióxi, mé a ñachindahá Pedro cáhan da tuhun mé á nuú na ñaquixi chichi Israel, mé a yóho cúu ri ña ñachindahá yehe cáhan i tuhun mé á nuú na coó ñaquixi chichi Israel.

<sup>9</sup> Jacobo xihín Pedro xihín Juan cúu ná na náhnu comí cuéntá sahá na cúu cuéntá Jesús ñuu Jerusalén cán. Ta ñandicuni na cán ña ñacaja Ndióxi cuahá ñamaní xihín i tá ñasahan mé á chuun yóho nuú i. Sahá ña cán queá ñatiin na ndahá yehe xihín ndáħa Bernabé ta xihín ña yóho náħa ña in cúu nde cája chúun nde xihín tuhun Ndióxi. Ña cája na cán queá cája chúun na xihín na ñaquixi chichi Israel nani ndeħe cája chúun nde xihín na coó ñaquixi chichi Israel. <sup>10</sup> Ta in tuhún ñamaní ñaxíca na nuú nde caja nde queá ña ná a ndíndójó nde chindeé nde na ndahví. Ta ña yóho cúu ndusa ña ndíhi ini i cája i.

### *Pablo jánaħi da Pedro ñuu Antioquía*

<sup>11</sup> Joo tá ñandique táhan i xihín Pedro ñuu Antioquía já nu táhyí da najánani i da jáchi coó ñacaja vaha da. <sup>12</sup> Ña ñacaja da queá ñaxixi da xihín na coó ñaquixi chichi Israel tá cámaní xinu coo java na Israel, na ñachindahá Jacobo. Joo tá ñaxinu coo na Israel cán já ñacasáhá táva jíin Pedro mé dá nuú na coó ñaquixi chichi Israel ta ni co xíxi ga da xihín ná. Jáchi ñayihví da ndía cachi na Israel, na jánaħa ña co ndítahan cuxu na xihín na co cúu na Israel. <sup>13</sup> Ta xihín ña yóho ñachijehé Pedro ña cáhvi ini da saħá na cán. Ta java na cúu cuéntá Jesús, na ñaquixi chichi Israel cán ñacasáhá cája na tá quiahva cája Pedro. Ta janda Bernabé ñacaja da tá quiahva cája na cán. <sup>14</sup> Anda já ñaxini i ña co xíca na íchi cuéntá ña ndaa xihín ndinuhu ini na tá quiahva sáhndá tuhun Ndióxi cája na saħá ña cán queá najánani i Pedro nu táhyí tóco ndihi ñayivi ndúu cán. Já ñacachi i já xihín dá: “Yóho cúun da Israel joo ñacasáhá cájún tá quiahva cája na coó ñaquixi chichi Israel jáchi co cájún ña sáhndá ley Moisés viti. Sahá ña cán queá co ndítahan nuún caja ndúsa tohún xihín na coó ñaquixi chichi

Israel ña ná caja na ña sáhná ley Moisés”, ñacachi i xihin dá.

*Jácaçu Ndióxi ñayivi sahá ña cándéé ini na mé á*

<sup>15</sup> Janda quivi ñacacú cúu yó na Israel ta cō cúu yó tátuhun na tóho, ña cáchi yō cája cuachi sahá ña cō cája na ña sáhná ley Moisés. <sup>16</sup> Joo sa cándaá vaha iní ña cō ndúu ndaa ñayivi nu Ndióxi sahá ña cája na ña sáhná ley Moisés. Jáchi nduu ndaa na nu Ndióxi sahá ña cándéé ini na Jesucristo cuití va. Ta sa saha mé ña cán ñacandéé iní Jesucristo já nanduu ndaa yó nu Ndióxi ta cō cúu á sahá ña cája í ña sáhná ley Moisés jáchi ni in na a cuú nduu ndaa na nu Ndióxi sahá ña cája na ña sáhná ley Moisés.

<sup>17</sup> Cándehé ndo. Sahá ña cūni yō canduu ndaa yō nu Ndióxi sahá ña cándéé iní Jesucristo cuití va sahá ña cán quéa cō cája ga í ña sáhná ley Moisés. Joo cáchi java ñayivi ña ndójo í cuachi sahá ña cō cája í ña cáchi mé ley. Vatí cō cája í ña cáchi ley Moisés, cō cūni cachi ña yóho ña jácahan Jesucristo mí caja í cuachi. Ña yóho cō cúu á ña ndaa jáchi cō jácahan Jesucristo mí caja í cuachi.

<sup>18</sup> Joo mé a ndaa caja í cuachi tá ná casahá tucu candeé iní ley Moisés ña ná jácaçu a mí jáchi sa najándacoo í ña tá ñacandéé iní Jesucristo. <sup>19</sup> Ta viti cúu á tátuhun ñaxihí yehe cuéntá ley jáchi cō cómi ga ley cuéntá sahá i jáchi sahá ña cándéé ini i Jesucristo sahá ña cán jácaçu Ndióxi yehe ña ná catacu u cuéntá mé á. <sup>20</sup> Cúu á tátuhun ñaxihí i ndica crúxu xihín Jesucristo tá ñaxihí a. Sahá ña cán quéa cō cája i tá quiahva cūni mé vi jáchi Jesucristo quéa ndicaan ini i ta mé a cán quéa ndaca yehe. Ta viti tóco ndihi ña cája i ñuyiví yóho cája i ña jáchi cándéé ini i Jesucristo, jahyi Ndióxi, mé á ñaxihí ndica crúxu sahá i sahá ña quíhvi ini a yehe.

<sup>21</sup> Ta cō cūni quehe núu i ñamaní cája Ndióxi xihín i jáchi tá ná cuu nduu ndaa yō nu Ndióxi sahá ña cája í ña sáhná ley Moisés já quéa mé a uun va quéa ñaxihí Jesucristo, nduu.

### 3

*Vaha chága candeé iní Jesús a juú ga cándéé iní ña sáhná ley Moisés*

<sup>1</sup> Á jána va jini ndó, na ndúu ñundáhyi Galacia. Yo já najándahvi ndohó ña ná jándacoo ndó ña ndaa. Jáchi tá ñacahan nde tuhun Ndióxi xihín ndo já ñandicani cáxi nde nu ndo ndá quiahva ñaxihí Jesucristo sahá cuachi. <sup>2</sup> Cuni johó ndó ná ndaca tuhún i ndohó: Á ñandihvi ínima yii Ndióxi ini ínima ndo sahá ña ñacaja ndó ña sáhná ley Moisés. Cō cúu toho a já. Ñasacuu a sahá ña ñacandúsa ndó tuhun vaha sahá Jesucristo ña ñacahan nde xihín ndo. <sup>3</sup> Mé a ndaa táhyí cúu ndó na najana jini. Jáchi tá ñacasahá ndó xíca ndó íchi cuéntá Jesús já ñasandaca ínima yii Ndióxi ndohó. Ta viti cūni ndó ndicó cō ndó caja ndó ña sáhná ley Moisés jáchi cáhan ndo ña cuu xinu cō ndó cacuu ndó ñayivi ndaa nu Ndióxi sahá ña cája ndó. Joo a cuú toho a. <sup>4</sup> Xíni ñúhú ndicuhun ini ndo ndá quiahva ñandoho nahá ini ndó sahá tuhun Ndióxi. Á mé a uun va ñasacuu ña ñandoho ndó jan. Cája i cuéntá uhun. <sup>5</sup> Jáchi sahan Ndióxi ínima yii mé á nu ndó ta cuahá ndivaha ña náhnu cája mé á tañu ndó ta cō cúu á sahá ña cája ndó ña sáhná ley Moisés. Cúu á sahá ña cándéé ini ndó mé á.

<sup>6</sup> Cáchi tuhun Ndióxi ña nanduu Abraham ta ndaa nu mé á sahá ña ñacandéé ini da Ndióxi. <sup>7</sup> Sahá ña cán quéa nditahan candaá ini ndó ña ndá na cándéé ini Ndióxi, mé na cán cúu ndusa na tátuhun na ñaquixi chichi Abraham. <sup>8</sup> Jáchi sa janda jihna ñacachi tuhun Ndióxi ña vaxi quivi casahá Ndióxi jácaçu a ñayivi, na cō ñaquixi chichi Israel tá ná candeé ini na mé á. Ña cán quéa ñacahan Ndióxi tuhun vaha yóho xihín Abraham já ñacachi a já: “Saha mún tandaa tiempo caja cuahá i ñamaní xihín ñayivi canduu ndijáá ñuyiví”, cáchi a. <sup>9</sup> Sahá ña cán quéa tá quiahva ñacaja Ndióxi cuahá ñamaní xihín Abraham quiahva já cája ri a xihín tóco ndihi ñayivi tá cándéé ini na mé á tá quiahva ñacaja Abraham.

<sup>10</sup> Joo ndá ñayivi ndúcú nduu ndaa nu Ndióxi sahá ña cája na ña cáchi ley Moisés já quéa cuahan cháhan jata ná. Jáchi cáchi tuhun Ndióxi já: “Cháhan va cuahan jata tóco ndihi na cō xinu cō cája tóco ndihi cuí ña cáchi ley ña ñacahyí Moisés.” <sup>11</sup> Ta cáxi



táhyí cáhan ña yóho xihín yo ña a cuú nduu ndaa ñayivi nu Ndióxi sahá ña sácú vaha na ley Moisés. Já cáhí tuhun Ndióxi já: “Ndá na cúú ñayivi ndaa nu Ndióxi catacu na sahá ña cándéé ini na mé á”, cáhí a. <sup>12</sup> Joo jíin va cáhí ley Moisés jáchi cáhí a ña tá cúni na nduu ndaa na nu Ndióxi saha ley Moisés xíní ñúhú caja na tóco ndihi cuíí ña cáhí mé ley. Ta co cáhan mé ley sahá ña cándéé ini na Ndióxi.

<sup>13</sup> Joo najáca cu Jesucristo mí já ná a xínu coo cháhan jata yo caja ley. Jáchi naquixi cháhan jata mé á saha mí tá naxihí a ndica crúxu. Jáchi cáhí tuhun Ndióxi: “Cháhan cuahan jata ndihi na xihí ndica crúxu.” <sup>14</sup> Ta sahá ña nacaja Jesucristo tá naxihí a ndica crúxu sahá ña cán queá tóco ndihí vatí cúú yó na Israel á na co cúú na Israel, ñehe táhvi yo ñamaní Ndióxi tá cándéé ini mé á. Jáchi já nasahan Ndióxi tuhun a nu Abraham jihna. Ta viti quiahva mé á ínimá yíí á nu yo tá cándéé ini mé á jáchi já nasahan Ndióxi tuhun a nu yo.

### *Ña cáhí ley Moisés xihín ña cáhí tuhun nasahan Ndióxi nuú Abraham*

<sup>15</sup> Ñani mí i, na cúú cuéntá Jesús, candehé ndo ná cahan i xihín ndo ndá quiahva cája ñayivi tá sahan na tuhun na nuú inga ñayivi. Tá cávaha na in tutu ta tá nandihí nacañhi na quívi ná nu á já queá ni in túhún toho ñayivi a cuú ndijama na ña sa nacañhi cán ta a cuú chícaan chága na tuhun nuú mé tutu. <sup>16</sup> Cándehé ndo. Nasahan Ndióxi tuhun a nuú Abraham ta nuú in da quixi chichi da. Joo coo nacañhi Ndióxi sahá cuahá ñayivi quixi chichi da. Nacañhi Ndióxi sahá in talaá jahyi da ta mé a cán cúú á Jesucristo. <sup>17</sup> Ña cúni cachi i queá: Nasahan Ndióxi tuhun a nuú Abraham ta nasacuu a tátuhun nacañhi Ndióxi quívi á nuú in tutu. Sahá ña cán queá a cuú jándihí ley Moisés sahá tuhun nasahan Ndióxi nuú Abraham. Jáchi jihna ñúhú nasahan Ndióxi tuhun a nuú Abraham ta tá sa nayaha comi ciento oco uxu cuia já nasahan Ndióxi ley nuú Moisés. Ta mé ley yóho a cuú toho ndijama tuhun nasahan Ndióxi nuú Abraham. Ta mé ley a cuú ndaja núu a tuhun nasahan Ndióxi nu dá jihna. <sup>18</sup> Joo ña sahan Ndióxi nuú ñayivi co quíxi a sahá ña sácú vaha na

ley Moisés. Jáchi tá ná quixi a quiahva já co cúú ga sahá ña nasahan Ndióxi tuhun a ña caja mé á ña. Ña nayaha queá nacañhi Ndióxi caja ñamaní uun xihín Abraham ta coo nasacuu a sahá ña nasacu vaha da ley Moisés.

<sup>19</sup> Ta viti, á ndaca tuhún ndó ndá saha nasahan Ndióxi ley nuú Moisés. Nasahan Ndióxi ña jáchi cúni a ña ná candaa ini ñayivi ndá quiahva saá ini na caja na ña cúni Ndióxi. Ta nasacu ini a candoo ley janda quiahva ná xínu coo mé a quixi chichi Abraham cán. Jáchi mé a cán queá nasahan Ndióxi tuhun a quixi. Ta táto Ndióxi queá nacañhi ley yóho xihín Moisés ta najayaha da ña nuú ñayivi. <sup>20</sup> Joo tá nasahan Ndióxi tuhun a nuú Abraham coo naxini ñúhú toho a ñayivi jáyaha na ña. Ta coo nacaja chúun a táto mé á jáchi in túhún Ndióxi nacaja mé á ña.

### *Ña cúni ley caja í*

<sup>21</sup> Jihna ñúhú nasahan Ndióxi tuhun a nuú Abraham anda jáví nasahan ley nuú Moisés. Á cúni cachi ña yóho ña co ndique táhan ley Moisés xihín tuhun nasahan Ndióxi nuú Abraham. Co cúú a já. Jáchi tá ná cuu jáca cu ley Moisés ñayivi já queá cuu nduu ndaa na nu Ndióxi sahá ña sácú vaha na ña sáhdá mé ley. Joo co cúú a já. <sup>22</sup> Jáchi cáhí tuhun Ndióxi ña mé cuachi cándihí a tóco ndihi ñayivi. Joo tá ná cándéé ini Jesucristo já cuu ndiquehé ña nasahan Ndióxi tuhun a quiahva nu tóco ndihi ñayivi sahá ña cándéé ini na mé á.

<sup>23</sup> Tá cámaní quixi Jesucristo já nasacomí ley cuéntá saha yo ta nasandaca mí janda quiahva naxínu quívi nanaha Ndióxi nu yo ña ndítahan cándéé ini Jesucristo. <sup>24</sup> Nasandaca ley mí tá quiahva cája in dataa xihín jahyi válí da anda quiahva naquixi Jesucristo, mé á nacaja ña ná canduu ndaa yo nu Ndióxi sahá ña cándéé ini mé á. <sup>25</sup> Ta viti co cómí ga ley cuéntá saha yo jáchi cómí Jesucristo cuéntá saha yo tá cándusa í mé á.

<sup>26</sup> Ta in nanduu ndó xihín Jesucristo sahá ña cándéé ini ndó mé á ta já nanduu ndó jahyi Ndióxi. <sup>27</sup> Ta tá nacandúta ndo já in nanduu ndó xihín Jesucristo ta nanduu ndó tá quiahva íin mé á. <sup>28</sup> Ta co cája toho

a tá cúú ndó na naquixi chichi Israel, á co cúú toho ndó na. Ta co cája toho a á cúú ndó na naxeen ñayivi caja chúun nu ná, á co cúú toho ndó na. Ta co cája toho a á cúú ndó taa á ñáha. Jáchi tá nacandúsa ndó Jesucristo já in nanduu tóco ndihi ndó jáchi in nanduu ndó xihin mé á. <sup>29</sup> Ta sahá ña cómi Jesucristo cuéntá saha ndo sahá ña cán quea cúú ndó tátuhun na naquixi chichi Abraham. Ta sahá ña cán quea ñehe táhvi ndó ña nacachi Ndióxi quiahva nuú da cán tá nasahan tuhun a nuú Abraham sanahá.

#### 4

<sup>1</sup> Ña cúní cáchí i cúú ña yóho: Cúú á tátuhun tá sahan in dataa tóco ndihi ña cómi da nuú jahyi da. Joo nani cúú dá taa loho já a cuú cacomí da cuéntá saha ña nandiquehe da ndáha tátá da. Cúú dá tátuhun mozo vatí tandaa quivi cacomí da cuéntá saha tóco ndihi ñaha tátá da. <sup>2</sup> Jáchi ndúu java ñayivi, na cómi tóo cuéntá saha mé dá ta saha tóco ndihi ña najándacoo tátá da nu dá janda quiahva ná xinu coo quivi nasacu ini tátá da. <sup>3</sup> Quiahva já yáha ri xihin mé ví. Jáchi jihna nasacuú tátuhun navalí. Nasacomí ley na Israel cuéntá saha yo tátuhun cája xitoho xihin mozo da. <sup>4</sup> Joo tá naxinu coo quivi nasacu ini Ndióxi já nachindahá mé á Jesucristo, jahyi a. Ta in ñañáha ñuyiví yóho nasacuu ña najácacu ñahá. Ta nacaja mé á ña sáhdá ley Moisés. <sup>5</sup> Ta naxihí a ndica crúxu já ná cuu chahvi a saha cuachí ña ná janí yó nu ley ña nasacomí cuéntá saha yo. Ta xihin ña yóho nacuu nanduu jahyi Ndióxi.

<sup>6</sup> Ta sahá ña nanduu jahyi mé á sahá ña cán quea nachindahá Ndióxi ínima jahyi a ña ná ndicaan mé á ini ínima yo já quea ná cuu cahan yó xihin Ndióxi já cachí yó já: “Tátá maní i.” <sup>7</sup> Ta viti co cúú ga yó tátuhun mozo jáchi co cómi ga ley cuéntá saha yo ta nanduu jahyi Ndióxi viti. Ta viti cuu ñehe táhvi yó quehé ña nasacu ini mé á quiahva nuú na cúú cuéntá mé á sahá ña nacaja Jesucristo.

*Ndicani ini Pablo sahá na cúú cuéntá Jesús ñundáhyi Galacia*

<sup>8</sup> Jihna ga tá coo nacandaa ini ndó saha Ndióxi já nacaja cáhnu ndó java ga ndiόxi ña co cúú toho ndiόxi joo nasacomí a cuéntá saha ndo. <sup>9</sup> Ta viti sa xini ndó Ndiόxi joo vaha chága ná cachi i ña sa xini Ndiόxi ndohó. Ta ndivaha cúní ndó ndicó coo tucu ndó caja ndó tá quiahva nacaja ndó jihna. Jáchi co ndiyahvi toho ña nacaja ndó cán ta ni a cuú chindee a ndohó. <sup>10</sup> Joo cája tucu ndó víco ta xihin ña yóho cája cáhnu ndó java quivi xihin yo xihin cuia. <sup>11</sup> Ndicani ndivaha ini i saha ña cája ndó jan. Jáchi viti co cánda ini i á mé a uun va nasacuu chuun nacaja i tañu ndó jan.

<sup>12</sup> Candehé ndó, ñani mí i, na cúú cuéntá Jesús. Xíca tahví i nu ndo ña ná caja ndó tá quiahva cája i viti. Jáchi najándacoo i cája i ña sáhdá ley tá nandihvi i íchi cuéntá Jesús. Vaha ndivaha nacaja ndó xihin i tá nasahiin i xihin ndó jan. <sup>13</sup> Ta cája i cuéntá ndicuhun ini ndó ña quihvi ndivaha i tá nu cuítí nasahan i caxi tuhun i tuhun vaha sahá Jesús tañu ndó jan. <sup>14</sup> Ta sahá cuehe nandoho i nacuu candají ndó yehe, nduu. Joo coo nacaja ndó ña. Ña nacaja ndó quea nandiquehe vaha ndó yehe ta nacaja ndó xihin i tá quiahva ná caja ndó xihin in táto Ndiόxi á xihin Jesucristo. <sup>15</sup> Ta nacajii ndivaha ini ndó mé tiempo cán. Jáchi xini vaha i ña nasahiin tiahva ndó tavá ndó nduchú núú ndo quiahva ndó ña nuú i, nduu tá ná cuu caja ña ná ndivaha i. <sup>16</sup> Joo viti nanduu u tátuhun in da ihvi ndo sahá ña cahan i ña ndaa sahá Jesucristo xihin ndo.

<sup>17</sup> Ndúu java ñayivi tañu ndó jan ta co jánaha na ña ndaa nu ndo. Cája cuaha ná ñamaní xihin ndo joo a juú ña vaha quea cúní na xihin ndo. Ña cúní na quea ná jácaxoo táhan í ta ná ndihi ini ndó saha ña jánaha mé ná. <sup>18</sup> Co cúní cachi i ña a váha toho ndihi ini sahá ñayivi. Vaha va ná caja í ña ní tiempo ta xihin ndinuhu ini. Joo ñayivi jan ndíhi ini na saha ndó tá ín yehe tañu ndó cuítí va. <sup>19</sup> Candehé ndó, jahyi a. Nacasahá ndihihvi tucu ini i saha ndo. Tá quiahva ndihihvi in ñañáha tá sáhdá a tixi ña cácu jahyi ña quiahva já ndihihvi ini i saha ndo. Ta ndoho tá ndoho chága ini i saha ndo janda quiahva ná caja ndó ña

cúni Jesucristo. <sup>20</sup> Viti ñúhú cúu ini i coo i jan já ná cuu caḥan vaḥa chága i xihín ndo jáchi janda nu ín i yóho ndícani ndivaha ini i saḥa ndo.

*Ña naçaja Agar xihín ña naçaja Sara sanahá*

<sup>21</sup> Candehé ndo. Mé ndó, na cúni ndiquiahva tucu ndáha ley Moisés, xini ñúhú candehé vaḥa ndó ña cáchi mé ley cán. <sup>22</sup> Cáchi a ña naçacu ivi jahyi ta Abraham. In jahyi da naçacu xihín Agar, ña cúu mozo ñájihí da ta inga jahyi da naçacu xihín Sara, ña cúu ñájihí vaḥa da. <sup>23</sup> Tá naçacu jahyi ta Abraham xihín Agar cán, naçacu a tá quiahva cácu tóco ndihi ñayivi. Joo jahyi ta da, da naçacu xihín ñájihí vaḥa da, ña naní Sara cán naçacu a jáchi naṣahan Ndióxi tuhun a nu dá ña ná cacu a. <sup>24</sup> Candehé ndo ña náha ña yóho nu yo. Ndívi najihí yóho cúu ná tátuhun ivi tuhun naṣahan Ndióxi nu yo. In táhan tuhun yóho cúu á ley naṣahan Ndióxi nuú Moisés jini yucu naní Sinaí cán. Ta Agar cúu yuhú nuú ley yóho. Ta jahyi ña cán tá naçacu a nanduú a mozo. Ta na ndíco ley cúu ná tátuhun jahyi Agar jáchi cómi ley cuénta saḥa ná. <sup>25</sup> Ta Agar cúu ña yuhú nuú ley ña naṣahan Ndióxi nuú Moisés yucu naní Sinaí, ña ndácaan chí ñundáhyi Arabia cán. Ta jári mé ña cúu ña yuhú nuú Jerusalén, ña cúu jini nu tóco ndihi na cája ña sáhdá ley Moisés. Ta mé ña xihín na ndúu cán cúu ná tátuhun mozo jáchi cómi ley cuénta saḥa ná. <sup>26</sup> Joo ín inga ñuu Jerusalén, ña ín indivi cán. Ta ñayivi ndúu cán co cúu toho na mozo jáchi cúu ná tátuhun jahyi Sara, ñájihí vaḥa Abraham. Ta mí cúu yó tátuhun na ndúu ñuu cán jáchi cándeé iní Jesucristo. <sup>27</sup> Já cáchi tuhun Ndióxi já: Xini ñúhú cajji ini ndó najihí, na a cuú cacu jahyi.

Cayuhú ndó xihín ña cajji iní ndo, vatí a náha caḥnda tixi ndó cacu jahyi ndó. Jáchi najihí, na najándacoo too yí canduu chága jahyi na a juú ga najihí ndúu yí, cáchi tuhun Ndióxi.

<sup>28</sup> Candehé ndo, ñani i, na cúu cuénta Jesús. Cúu yó tátuhun Isaac, jahyi Sara cán saḥa ña cándeé iní Jesús jáchi cúu yó jahyi naṣahan Ndióxi tuhun a quiahva nuú

Abraham. <sup>29</sup> Joo tá quiahva naçaja da cúu jahyi Agar sanahá tá naçasáhá da cája xíxi da xihín da cúu jahyi Sara quiahva já ín a viti jáchi na sácú vaḥa ley Moisés cája xíxi na xihín na cándeé ini Jesucristo. <sup>30</sup> Joo cuni johó ndó ña cáchi tuhun Ndióxi tá naçahan Ndióxi xihín Abraham: “Tavá ña cúu mozo jan ná quee ña cuhun ña xihín jahyi ña. Jáchi da cúu jahyi mozo jan a cúu ñeḥe táhvi dá ndiquehe da ña quiahva i nuú da cúu jahyi ñájihí vahún jan”, naçachi Ndióxi sanahá. <sup>31</sup> Candehé ndó, ñani i, na cúu cuénta Jesús. Co cúu yó tátuhun jahyi ña cúu mozo jan jáchi co cómi ga ley cuénta saḥa yo. Viti cúu yó tátuhun jahyi Sara, ña cúu ñájihí vaḥa Abraham cán jáchi co ndúu ga yó ndáha ley Moisés saḥa ña cándeé iní Jesucristo.

## 5

*Sa najani yo ndáha ley Moisés naçaja Jesucristo*

<sup>1</sup> Co ndúu ga yó ndáha ley Moisés saḥa ña naçaja Jesucristo. Ta viti cándeé ini ndó mé á saḥa ña cán quéa xini ñúhú canduu ndacú ndo ta co ndítahan nu ndó ndíco coo ndó caja ndó ña sáhdá mé ley cán.

<sup>2</sup> Cuni johó ndó ña caḥan i xihín ndo. Tá ná cándeé ini ndó ña cuu nduu ndaa ndó nu Ndióxi saḥa ña chícaan na marca yiquí cuñu ndó já quéa cúni cachi a ña quéhe núu ndó ña naçaja Jesucristo tá nañihí a ndíca crúxu saḥa ndo. <sup>3</sup> Candehé ndó ná caḥan tucu u xihín ndo. Tá cúni ndó canduu ndaa ndó nu Ndióxi saḥa ña chícaan ndó marca yiquí cuñu ndó já quéa ndítahan nu ndó caja ndó tóco ndihi cuí ña sáhdá ley Moisés. <sup>4</sup> Mé ndó cúu ndó na cúni canduu ndaa nu Ndióxi saḥa ña sácú vaḥa ndó ley Moisés. Ta viti naçaxoo ndó nu Jesucristo ta naçaxoo ndó nuú ñamaní cúni Ndióxi caja xihín ndo. <sup>5</sup> Joo mé nde xini vaḥa nde ndúu ndaa nde nu Ndióxi saḥa ña cándeé ini nde Jesucristo. Ta ndáti tiaḥva nde jáchi chindeé ínima yii Ndióxi ndeḥe. <sup>6</sup> Jáchi tá in nanduú xihín Jesucristo já quéa coo caja toho a á naquihvi marca yiquí cuñu í á coo a. Ña ndíyahvi ndusa quéa ña cándeé iní Jesucristo jáchi xihín ña yóho cuu quihvi iní ñani táhan í.

<sup>7</sup> Sa vaha ndivaha va cuahan ndó xihín ña cándéé ini ndó Jesús. Yo já nandijama jiní ndo ña ná a cándúsa ga ndó ña ndaa. <sup>8</sup> A juú toho Ndióxi nandijama jiní ndo jáchi mé a cán quéa nacana ndohó ña ná cacuu ndó cuéntá mé á. <sup>9</sup> Xíní ñúhú ndicuhun ini ndó in tuhun ta já cáchí a “Vatí loho yusá naxaa ná cava táhan í xihín yusá cuaha cán játiví ñahá a.” Quiahva já cája na cúní ndijama jiní ndó jan. <sup>10</sup> Joo cándéé ini í Jesucristo, xitoho í sahá ña cán quéa xíní vaha í ña a cándúsa ndó na jan ta ndicó coo ndó cahvi ini ndó tá quiahva cáhvi ini yehe. Ta jándoho Ndióxi ini na xíca jájaca xíní túni ndó jan ta coo caja toho a ndá na cúu ná.

<sup>11</sup> Joo yehe jána ha í nuú na cúu cuéntá Jesús ña co ndítahan ga chícáan na marca yiquí cuñu na ta sahá ña cán quéa ndicuita na Israel xihín í. Tá ná jána ha í nuú ñayivi ña ndítahan chícáan na marca yiquí cuñu na já quéa a ndicuita ga na cán xihín í. Joo mé a ndaa cándají na cán yehe jáchi jána ha í nuú ñayivi ña cuu cacu ndaa ínima ná sahá ña cándéé ini na Jesucristo cuití va, mé a naxihí ndica crúxu saha yo. <sup>12</sup> Sahá ña cúní na cán caja ndúsa na xihín ndó chícáan ndó marca yiquí cuñu ndó sahá ña cán quéa cája í cuéntá vaha chága ná chitúhun ndihi mé ná yiquí cuñu na ta ná jándacoo táji ná ndohó.

<sup>13</sup> Candehé ndó, ñani í. Co ndúu ga ndó ndáha ley Moisés nacaja Jesucristo. Joo co cúní cachi ña yóho ña najani ndo já ná cuu caja ndó ndá ña núu ña xíca ini yiquí cuñu ndó caja. Jáchi nacana Ndióxi ndohó ña ná quihvi ini táhan ndó ta ná chindeé táhan ndó. <sup>14</sup> Joo tóco ndihi ña cúu ley Moisés in cáchí ndihi a tá cáchí a já: “Quihvi inún ñani táhún tá quiahva quihvi inún mún.” <sup>15</sup> Joo cuéntá coo ndó jáchi tá cásahá ndo cája xíxi xihín táhan ndó ta cája quini xihín táhan ndó já quéa xinu quiví jándihi saha táhan ndó.

*Ña cúní ínima yij Ndióxi caja í xihín ña cúní yiquí cuñu í caja í*

<sup>16</sup> Candehé ndo, ñani í. Ndítahan caja ndó ña cúní ínima yij Ndióxi ta co ndítahan caja ndó ña xíca ini yiquí cuñu ndó caja. <sup>17</sup> Jáchi tóco ndihi ña núu ña cúní yiquí cuñu yó caja í cání táhan xihín ña vaha ña cúní ínima yij

Ndióxi caja í. Ta a cuú cuni táhan ínima yij Ndióxi xihín ña núu jáchi co ndíque táhan vaha ña núu xihín ña vaha sahá ña cán quéa a cuú caja í ndá ña nacuu cúní yó caja í. <sup>18</sup> Ta tá ná ndiquiahva ndó mé ndó ña ná candaca ínima yij Ndióxi ndohó já quéa a cácomí ga ley Moisés cuéntá saha ndo.

<sup>19</sup> Ta co yáncá toho ndícuní ndá na cúu na cája ña núu ña cúní mé ná caja na. Jáchi ña cája na cúu ña yóho: ndúu na xihín na co cúu ñájihí na á yij ná ta cája na tá nuú ña núu xihín yiquí cuñu na. Ta ndicají ini na cuju na xihín ñaha á ta. <sup>20</sup> Cája cáhnu na yoco xihín tiniñu yúu ta cája na ña tají. Ta cándají táhan na. Ta cání táhan na ta ndácaan ña cuiñú jiní ná. Ta cama chá jáa xihín táhan na. Ta cáhvi ini na saha mé cuití va na. Ta cátóo na jácani táhan na ñayivi já ná canduu jín na. Ta xihín ña yóho sáhdá táhan na ñayivi. <sup>21</sup> Cúu ná ñayivi ihvi ini ta cúu ná na sáhní ndii ta cúu ná na xihí. Ta a juú quiahva ndehé na ta cuahá ndivaha java ga táhan ña yóho cája na. Joo mé ndó cuni johó ndó ná cahan tucu u ña sa nacachi í jihna xihín ndo: Ndá na cája já a ñehé táhvi toho na cacomí Ndióxi cuéntá saha ná.

<sup>22</sup> Joo tá ndícaan ínima yij Ndióxi iní já quéa cája mé á ña ná quihvi ini táhan í ta cája ña ná cajii iní ta cája ña ná coo vaha iní ta cája ña ná a cójo cama iní ta cája ña ná chindeé yó ñayivi ta cája ña ná cacuu ñayivi vaha ini ta cája ínima yij Ndióxi yóho ña ná cacuu ñayivi, na co cáhvi ivi johó ini. <sup>23</sup> Ta cája ña ná cacuu ñayivi, na co ndínehe jícó mé, na cúu sáhnú mé. Ta ni in túhún toho ley a cuú chícáan cuachi jatá ñayivi tá sácú vaha na tóco ndihi ña cáchí tuhun yóho. <sup>24</sup> Tóco ndihi na cómí Jesucristo cuéntá saha, sa najándacoo na ña núu nasacahvi ini na caja na xihín yiquí cuñu na. Ta cúu ná tátuhun na sa naxihí nuú cuachi nasacaja na. <sup>25</sup> Co cája ga yó cuachi nacaja í jihna sahá ña ndácaan ínima yij Ndióxi iní. Ta xíní ñúhú quiahva í ñamaní nu mé á ña ná candaca a mí nuú ndihi ña caja í.

<sup>26</sup> Ta co ndítahan ndínehe jícó yo mí ta ni co ndítahan jácani táhan í ñayivi ta ni co ndítahan cahihvi ini xihín táhan í.

## 6

### *Ndítahan nuú na cúú cuéntá Jesús chindeé táhan na*

<sup>1</sup> Candehé ndó, ñani i. Tá naxini ndó nandicava in na cúú cuéntá Jesús nuú cuachi já queá ndítahan nu ndóhó, na nachutú ndaa ínima xihin ínima yii Ndióxi, chindeé ndó na já ná ndicaca vaha na íchi cuéntá Jesús. Joo vii vii cahan ndó xihin ná jáchi ndítahan cahvi ini ndó ña vaxi quivi tá cuu ndicava ri ndóhó va nuú cuachi. <sup>2</sup> Xíni ñúhú chindeé táhan ndó tá ndóho ini ndó. Ta xihin ña yóho jáxinu coo ndó ña sáhdá Jesucristo nu ndó caja ndó.

<sup>3</sup> Tá ndúu java na tañu ndó ta cáhán na cúú ná na náhnu ndivaha vatí coo cúú á ña ndaa já queá jándahvi na mé va na. <sup>4</sup> Tá in tá in ndó ndítahan candehé ndó ndá quiahva cája ndó já ná cuu cajii ini ndó tá cája vaha ndó. Ta coo ndítahan ndiñehe jícó ndó mé ndó sahá ña cáhán ndó ña vaha chága cája mé ndó a juú ga inga ga na. <sup>5</sup> Jáchi tá in tá in ndó ndítahan nu ndó candehé ndó ña cája ndó, á cúú á ña vaha á cúú á ña núu.

<sup>6</sup> Tóco ndihi ndó, na jácuaha tuhun Ndióxi ndítahan nu ndó chindeé ndó na jánañha ndóhó xihin ña cómi ndó.

<sup>7</sup> Jándahvi ndó mé ndó tá cáhán ndó ña cuu jándahvi ndó Ndióxi jáchi a cuú jándahvi ñayivi Ndióxi. Sa xini ndó tá xutu ndó in tata nu ñúhú já queá vaxi quivi tá jáquee ndó mé ñaha naxutu ndó. <sup>8</sup> Tá cája ñayivi ña núu ña cúni mé cuití na já queá vaxi quivi cuhun na indayá sahá ña núu nacaja na. Joo tá cája na ña vaha ña cájii ini ínima yii Ndióxi xihin já queá ñeñe táhvi na cuhun na coo na xihin Ndióxi anda ama cáa quivi, caja ínima yii Ndióxi. <sup>9</sup> Sahá ña cán queá a cánaa yó cája í ña vaha jáchi tá ná a jándacoo í cája í ña cúni Ndióxi já queá vaxi quivi quiahva Ndióxi nu yo ña ndítahan ndiquehé sahá ña táhan ini mé á xihin ña nacaja í. <sup>10</sup> Sahá ña cán queá tá núná nu yó caja vaha í xihin tóco ndihi ñayivi cóho caja í ña. Ta cachí ga ví tá cúú ná na cándéé ini Jesús.

### *Ndíndayí Pablo na cúú cuéntá Jesús*

<sup>11</sup> Candehé ndó ndaja náhnu letra cáhyí i nu ndó xihin ndáha mí i viti. <sup>12</sup> Cúni ña ná candaa ini ndó sahá java ga ñayivi, na cúni caja ndúsa xihin ndó ña ná chicaan ndó

marca yiquí cuñu ndó. Cája na ña yóho jáchi cúni na candoo vaha na nuú na Israel. Ta yihví na ndicuita ñayivi xihin ná sahá ña cándúsa na Jesucristo, mé a naxihí ndica crúxu sahá cuachi. <sup>13</sup> Joo mé na chicaan marca yiquí cuñu cán coo sácú vaha na tóco ndihi ña sáhdá ley Moisés. Joo cúni na ña ná chicaan ndó marca yiquí cuñu ndó já ná cuu cahan lándá na nuú na Israel sahá ña nacaja ndúsa ná xihin ndó. <sup>14</sup> Joo yeñe, ni in túhún toho ñaha coo cúni cahan lándá i saha. Ña cúni caja i queá cahan i sahá Jesucristo, mé á naxihí ndica crúxu. Ta sahá ña cándéé ini i Jesucristo sahá ña cán queá cúú á tátuhun naxihí i nuú ña núu ñuyiví yóho. Coo cúni ga i cája i ña cája ñayivi ñuyiví ta coo cúni na cán catáhan na xihin i. <sup>15</sup> Ta coo ndiyahvi nu Ndióxi á naquihvi marca yiquí cuñu í á coo a. Ña ndiyahvi ndusa queá ña nanduú ñayivi saá sahá ña cándéé ini Jesucristo. <sup>16</sup> Cúni ña ná coo vaha ini ndó, na cája ña cáhan i yóho. Ta ná caja Ndióxi cuahá ñamaní xihin ndó ta xihin tóco ndihi na cúú cuéntá mé á.

<sup>17</sup> Ta viti xihin chinuu coo cúni ga i ña ná jáquihvi ga ñayivi yeñe. Jáchi tóco ndihi yanda ndáa a nu yiquí cuñu i náha ña mé a ndaa cúú u da cája chúun cuéntá Jesucristo.

<sup>18</sup> Ñani i na cúú cuéntá Jesús, ña cúni queá ná caja Jesucristo, xitoho í cuahá ñamaní xihin ndihi ndó. Já ná coo.

## Carta nacahyí Pablo nuú na cúu cuéntá Jesús ndúu ñuu Efeso

*Chíndahá Pablo Ndióxi coo na cúu cuéntá Jesús ndúu ñuu Efeso*

<sup>1</sup> Yehe cúu Pablo, da nacaxi Ndióxi cacuu apóstol cuéntá Jesucristo. Cáhyíi carta yóho nuú na cúu cuéntá Ndióxi ndúu ñuu Efeso, na cándeé ini Jesucristo. <sup>2</sup> Ña cúní quea ná caja Ndióxi, tátá yo xihín Jesucristo, xitoho í cuahá ñamaní xihín ndó ta ná caja mé á ña ná coo vaha ini ndó.

*Ñehē táhvi yó cuahá ñamaní cája Ndióxi sahá ña cándeé ini Jesucristo*

<sup>3</sup> Cóho caja cáhnu í Ndióxi, mé a cúu tátá Jesucristo, xitoho í. Cóho caja cáhnu í mé á jáchi cuahá ndivaha ñamaní nacaja xoho. Ta tá nuú ña vaha quíxi indiví nasahan ndihi mé á nu yo jáchi in cúu yo xihín Jesucristo. <sup>4</sup> Janda tá camaní cava sahá saha ñuyíví já nacaxi Ndióxi mí ña ná cacuu cuéntá mé á sahá ña nacaja Jesucristo. Ta nasacu ini a ndaja mí ña ná cacuu ñayivi yíi, na coo ga cuachi nu mé á. <sup>5</sup> Quíhvi ndivaha ini a mí sahá ña cán quea sa nasacu ini mé á ña ná quivi Jesucristo saha yo já ná nduú jahyí mé á. Já nacaja jáchi já cúní a coo. <sup>6</sup> Sahá ña cán quea ndítahan nu yo caja cáhnu í Ndióxi ní tiempo jáchi cuahá ndivaha ñamaní cája mé á xihín yo tá nacaja mé á ña in nanduú xihín Jesucristo, jahyí maní á. <sup>7</sup> Nacaja Ndióxi ñamaní cáhnu xihín yo tá naxita ñi Jesucristo ndica crúxu saha yo. Anda javí cuu jácacu a mí ta cuu caja cáhnu ini a sahá cuachí. <sup>8</sup> Mé a ndaa nacaja cuahá ndivaha Ndióxi ñamaní xihín yo. Nacaja mé á ña ná ndindichí jini yo já ná candaa ini tuhun mé á. <sup>9</sup> Ta nasahan ñamaní nu yo ña ná candaa ini ña nasacu ini mé á caja jáchi janda sanahá nasahin jehé a nu yo joo viti sa candaa ini ndá saha nachindahá mé á Jesucristo. <sup>10</sup> Ta vaxi quivi coo ña nasacu ini mé á coo. Ta mé quivi cán caja Ndióxi ña ná cacomí Jesucristo cuéntá saha tóco ndihi ñaha ndúu ñuyíví xihín ña ndúu indiví

jáchi tóco ndihi ñaha xinu a canduu a ndáha Jesucristo.

<sup>11</sup> Ta coo tá quiahva nasacu ini Ndióxi coo jáchi cája mé á tóco ndihi ña sácú ini a caja. Janda sanahá ndivaha nasacu ini a caxi a mí cacuu ñayivi ñehē táhvi ndiquehé ña vaha, ña quíxi nu in mé á sahá ña in nanduú xihín Jesucristo. <sup>12</sup> Sahá ña cán quea ndítahan nuú nde caja cáhnu nde Ndióxi ña ná ñaha ndaja cáhnu cúu mé á jáchi jihna ñuhú nde nacahá cándeé ini nde Jesucristo. <sup>13</sup> Ta quiahva já nacaja ri ndóhó va jáchi tá naxini johó ndó ña ndaa sahá Jesucristo já nacandeé ini ndó mé á. Mé tuhun yóho najánaha nu ndo ndá quiahva najáca cu mé á ndohó. Ta tá nacandúsa ndó a já in nanduú ndó xihín á ta cúu á tátuhun nanani marca Ndióxi ndohó ña náha ña mé a ndaa cúu ndó cuéntá mé á. Ta mé marca yóho cúu ínimá yíi mé á ña nasahan tuhun a nu ndó quiahva nu ndo. <sup>14</sup> Ta ndacaan ínimá yíi mé á ini ínimá yo sahá ña cán quea candaa vaha ini ña vaxi quivi ndiquehé ña vaha, ña quiahva Ndióxi nu yo jáchi sa nasahan mé á tuhun a caja ña. Ta sa já ndacaan ínimá yíi mé á ini ínimá yo janda quiahva ná xinu quivi jácacu a mí nuú cuachí. Sahá ña cán quea cóho caja cáhnu í mé á ña ná ñaha ndaja cáhnu cúu mé á.

*Xíca tahví Pablo nu Ndióxi ña ná quiahva mé á ña ndichí jini na cúu cuéntá Jesús*

<sup>15</sup> Ta sahá ña sa candaa vaha ini i ña cándeé ini ndó Jesucristo, xitoho í ta sahá ña sa candaa ini i ña quíhvi ini ndó tóco ndihi na cúu cuéntá Ndióxi <sup>16</sup> sahá ña cán quea co jándacoo i ña ndiquiahva i ndixahvi nu Ndióxi saha ndo. Ta co ndíndójó i caca tahví i nu Ndióxi saha ndo. <sup>17</sup> Ta tá xíca tahví i nu Ndióxi, mé a cúu tátá Jesucristo, xitoho í, mé a cúu Ndióxi cáhnu ndivaha já xíca tahví i nu á ña ná quiahva ínimá yíi mé á nu ndó. Anda já caja mé á ña ná ndindichí jini ndo já ná ñaha ndaja cáa Jesucristo. Ta xihín ña yóho candaa vaha chága ini ndó saha mé á. <sup>18</sup> Ta xíca tahví i nu Ndióxi ña ná jándiyehé a xíní túni ndo já ná candaa ini ndó sahá ña vaha caja mé á chága chí nuu xihín ndo. Ta ñúchí ndivaha coo tá ná xinu quivi ndiquehe

Ndióxi ndohó cūhun ndó coo ndó xihin mé á anda ama cáa quivi sahá ña cúu ndó cuéntá mé á. <sup>19</sup> Ta xíca tahví i nu á ña ná candaa ini ndó ña co vāja xinu coo nu ndíhi ndée Ndióxi jáchi íin ndivaha ndée mé á. Ta íin mé ndée yóho tañu mí, na cúu cuéntá mé á. Ta sa mé ndée yóho quéa nacaja chuun Ndióxi <sup>20</sup> tá najánditacu a Jesucristo. Anda jávi nasacu coo a ña xoo cuáha mé á indiví. <sup>21</sup> Ta nacaja Ndióxi ña ná nduu Jesucristo jiní nu tóco ndíhi na íin ndée cahnda chuun ñuyíví yóho xihín na íin ndée cahnda chuun indiví. Sáhnda Jesucristo chuun nu tóco ndíhi na cán vatí cúu ná na ndúu tiempo viti á cúu ná na vaxi chága chí nuu. <sup>22</sup> Tóco ndíhi ñaha ndúu indiví xihín ñuyíví nandiquiahva Ndióxi ña ndáha Jesucristo ña ná cacomí mé á cuéntá sahá. Ta sa mé á cúu á jiní nu tóco ndíhi na cándéé ini mé á. <sup>23</sup> Ta tóco ndíhi na cúu cuéntá Jesucristo cúu ná tátuhun yiquí cuñu mé á sahá ña nandicutú ndaa ínima ná xihín mé á. Ta mé a cán jáchutú a tóco ndíhi na ndúu ñuyíví xihín indiví.

## 2

### *Najácacu Ndióxi mí jáchi quíhvi ini a mí*

<sup>1</sup> Ta jihna nasacuu ndó tátuhun na sa naxihí jáchi nasacaja ndó cuahá cuachi. Joo viti cúu ndó tátuhun na nanditacu tucu jáchi Ndióxi najácacu ndohó. <sup>2</sup> Ta nasacaja ndó tá quiahva cája ñayivi ñuyíví yóho. Ta nasacaja ndó ña cúní tiñáhá sacuaña, rí cúu jiní nu tóco ndíhi rí quini. Ta mé rí cán cómi rí cuéntá sahá ñayivi, na co cája ña cúní Ndióxi. <sup>3</sup> Ta quiahva já nasanduú jihna jáchi nasacaja í ña xíca ini mí ví ta nasacaja í tóco ndíhi ña núu, ña nasacahvi iní caja í. Ta saha tóco ndíhi ña núu nacaja í yóho nanditahan nu yo jándoho ndivaha Ndióxi iní tá quiahva cája mé á xihín java ga na co cúní candúsa mé á. <sup>4</sup> Joo natahvi ndivaha ini Ndióxi saha yo ta naquihvi ini ndivaha mé á mí. <sup>5</sup> Ta vatí nasacuú tátuhun ndii ta coo nacuu ndique táhan máni yó xihín Ndióxi sahá cuachi nasacaja í joo natahvi ini Ndióxi saha yó sahá ña cán quéa najácacu a mí sahá ña nacaja Jesucristo. <sup>6</sup> Vatí nasacuú tátuhun ndii sahá cuachi nasacaja í joo tá nanditacu Jesucristo já

nasacuu a tátuhun nanditacu yó xihín mé á nacaja Ndióxi. Ta nacaja mé á ña ná cacoo í xihín Jesucristo tá ná xinu coo í indiví. <sup>7</sup> Nacaja Ndióxi ña yóho jáchi nasacu ini a jánaha nu yo viti xihín chága chí nuu ña quíhvi ndivaha ini a mí ta táhvi ndivaha ini a saha yo sahá ña nacaja Jesucristo. <sup>8</sup> Ta sahá ña natahvi ini Ndióxi saha ndo ñañehe táhvi ndó cacu ndaa ínima ndo jáchi cándéé ini ndó mé á. Ta co cúu á sahá ña cája mé ndó jáchi cúu á ñamaní nacaja Ndióxi xihín ndo. <sup>9</sup> Ta coo najácacu a ndohó sahá ña vaha cája ndó jáchi co cúní a ña ná caja cáhnu ndó mé ndó. <sup>10</sup> Jáchi nacavaha Ndióxi mí tá quiahva cúní a ña in ná nduú xihín Jesucristo já ná caja í ndinuhu ña vaha, ña nasacu ini a caja í anda jihna.

### *Íin vaha iní sahá ña nacaja Jesucristo xoho*

<sup>11</sup> Candehé ndó, na tóho, na cúu cuéntá Jesús. Ná ndicuhun ini ndó ndaja nasacuu ndó jihna. Nacachi na Israel saha ndó ña coo yahvi toho ndó jáchi coo nachicaan na marca yiquí cuñu ndó. <sup>12</sup> Ndítahan ndicuhun ini ndó ña mé tiempo cán co xini toho ndó Jesucristo. Ta ni coo nasacuu ndó na Israel, na nacaxi Ndióxi. Ta ni coo nasacuu ndó ñayivi nasahan Ndióxi tuhun a nuu. Nasanduú uun ndó ñuyíví yóho jáchi coo nasaxini ndo Ndióxi ta ni coo nacaán ndo cūhun ndó indiví. <sup>13</sup> Vatí coo nasacuu ndó na cúu cuéntá Ndióxi joo viti nacayati ndó nu á ta já in nanduu ndó xihín Jesucristo sahá ña naxihí a ndica crúxu saha ndo. <sup>14</sup> Ta nacaja Jesucristo ña ná coo vaha ini na Israel xihín na tóho. Ta nacaja ña in nanduu na cuéntá mé á. Jáchi najándihi á sahá ña nasaji nuu nuú na cán ña ná ndique táhan máni xihín táhan na. <sup>15</sup> Ta tá naxihí Jesucristo najáxinu coo a nu ley ña nasahnda chuun nu yo sahá ña nanditahan caja í. Ta nandaja mé á ña in nanduu na Israel xihín na coo naquixi chichi Israel. Ta tá nandíhi já nandaja mé á ña nanduu na cuéntá mé á já nanduu vaha ini xihín táhan na. <sup>16</sup> Tá naxihí Jesucristo ndica crúxu já nacaja mé á ña ná ndique táhan máni xihín táhan na ta já nandíhi sahá ña cáni táhan na. Anda já

najándique táhan máni á na xihin Ndióxi ta já in nanduu na.

<sup>17</sup> Ta naquixi Jesucristo caxi tuhun a tuhun vaha nu yo ña ná coo vaha iní xihin Ndióxi. Ta coo caja toho a á cúu ná na tóho, na nasacuu xíca nu á tátuhun mé ndó, á cúu ná na Israel, na nasanduu yati nu á tátuhun mé nde jáchi nasahan mé á tuhun vaha nu tóco ndihí. <sup>18</sup> Ta sahá ña nacaja Jesucristo cuu cayatí nu Ndióxi viti. Coo caja toho a á cúu yó na naquixi chichi Israel á coo cúu yó na naquixi chichi Israel jáchi ínima yii mé á quea chindeé a mí cayatí nu Ndióxi. <sup>19</sup> Sahá ña cán quea coo cúu ga ndó na tóho, na naquixi xíca jáchi in nanduu ndó xihín na cúu cuénta Ndióxi viti ta cúu ndó na vehe mé á. <sup>20</sup> Ta viti tóco ndihí, na cúu cuénta mé á cúu yó tátuhun in vehe. Ta na apóstol xihín na profeta cúu ná tátuhun yuu ndúhu sahá vehe jan jáchi najánaha na tuhun Ndióxi nu ndó nu cuítí. Ta Jesucristo cúu á tátuhun yuu ndúhu cuahan titó vehe jan ña sahan ndée vehe jan. <sup>21</sup> Ta nacaja Jesucristo ña nandique táhan vaha tóco ndihi na cúu cuénta mé á. Ta nandaja mé a mí ña loho loho ná nduú tátuhun in veñuhu yii nu sá ndacaan Ndióxi, xitoho í. <sup>22</sup> Sahá ña in nanduu ndó xihín Jesucristo sahá ña cán quea nandique táhan máni xihín táhan ndó. Ta nacaja Ndióxi ña ná nduu ndó tátuhun in vehe nu ín Ndióxi jáchi ndacaan ínima yii mé á chí ini ndó.

### 3

*Nachindahá Ndióxi Pablo cahan da tuhun mé á nuú na coo naquixi chichi Israel*

<sup>1</sup> Yehe cúu Pablo ta sahá ña xíca nuu i cahan i tuhun vaha sahá Jesucristo nuú na coo naquixi chichi Israel saha ña cán quea ndacaan i vecaa viti. <sup>2</sup> Ta sa candaa ini ndó ña sahá ña natahvi ini Ndióxi saha ndó sahá ña cán quea nasahan mé á chuun yóho nuú i ña ná cahan i tuhun Ndióxi xihín ndo. <sup>3</sup> Jihna nachijehé Ndióxi ña nasacu ini a caja joo viti najánaha mé á nuú i ña nasacu ini a caja. Ta sa nacahan chá i sahá ña jan tá nacahyí i carta nu ndo. <sup>4</sup> Tá ná cahvi tucu ndó ña já cuni ndó ña mé a ndaa táhyí sa candaa ini i ña nasahin jehé sahá Jesucristo. <sup>5</sup> Coo nacandaa ini ñayivi ña yóho jáchi nasahin jehé ña. Joo viti

nacaja ínima yii Ndióxi ña ná candaa ini na apóstol xihín na profeta, na cúu cuénta mé á sahá ña yóho. <sup>6</sup> Ta ña nasahin jehé jihna cúu ña yóho: xihín ña nacaja Jesucristo ña in nanduu na cúu chichi Israel xihín na coo cúu chichi Israel já ná ñehe ná ña vaha ña nasacu ini Ndióxi quiahva nuú na cúu jahyi mé á. Jáchi in nanduu na Israel xihín na tóho ta in cúu ná ndati na ñehe ná ña nacachi Ndióxi quiahva nu ná sahá ña nacaja Jesucristo.

<sup>7</sup> Joo nacaja Ndióxi ñamaní xihín i ta xihín ndée mé á xíca nuu i cahan i tuhun vaha saha mé á nuú ñayivi. <sup>8</sup> Nacaja Ndióxi ñamaní xihín i jáchi nasahan mé á chuun yóho nuú i ña ná cahan i tuhun vaha sahá Jesucristo nuú na coo naquixi chichi Israel. Vati cúu u tátuhun in da coo saha tañu na cúu cuénta Jesús joo nacaja mé á ñamaní xihín i ña ná ndicani i nuú na tóho ndá quiahva náhnu nahá cája Jesucristo xihín ná. <sup>9</sup> Ta nasahan Ndióxi chuun nuú i ña ná jánaha i tuhun vaha ña nasahin jehé nuú ndihi ñayivi. Ta anda sanahá nasahin jehé a nacaja Ndióxi, mé a nacavaha tóco ndihi ñaha. <sup>10</sup> Nacaja Ndióxi ña yóho jáchi sahá ña in nanduu na Israel xihín na tóho anda javí náha nu tóco ndihi na sáhdá chuun nuú na ndúu indiví ndá quiahva ndichí ndivaha jini mé á. <sup>11</sup> Sanahá ndivaha nasacu ini Ndióxi ña yaha chága chí nuu. Ta viti xihín ña nacaja Jesucristo, xitoho í naxinu coo nuú ña nasacu ini mé á coo anda ama caa quivi. <sup>12</sup> Ta sahá ña in nanduu xihín Jesucristo sahá ña cán quea coo yíhvi ga í cayatí nu Ndióxi. Ta xini vaha í ña ndiquehe mé á mí jáchi candeé iní mé á. <sup>13</sup> Sahá ña cán quea xíca tahvi i nu ndo ña ná a cávita ini ndó sahá ña ndóho ini i. Jáchi sahá ña nacahan i tuhun Ndióxi nu ndo sahá ña cán quea ndóho ini i viti já ná cuu canduu vaha mé ndó. Ta xini ñuhú cajji ini ndó sahá ña cája i saha ndo.

*Quíhvi ini Jesucristo ñayivi*

<sup>14</sup> Sahá ña cán quea ndaca xítí i nu Ndióxi, mé a cúu tátá Jesucristo, xitoho í tá cahvi ini i ndá quiahva náhnu cája mé á. <sup>15</sup> Jáchi mé á cúu tátá tóco ndihi na ndúu indiví xihín tóco ndihi na ndúu ñuyiví yóho sahá ña cúu ná na vehe mé á. <sup>16</sup> Ta cuni mé á



caja cuahá ndivaha ñamaní xihin yo sahá ña cán queá xíca tahví i nu á ña ná chindahá ínimá yíi á nu ndo já ná quiahva tuhun ndeé ini ndó ta já ná coo ndacú ini ndó. <sup>17</sup> Ta xíca tahví i nu Ndióxi ña ná ndacaan Jesucristo ínimá ndo sahá ña cándéé ini ndó mé á ta ná coo ndeé ini ndó sahá ña quíhvi ini a ndohó. Ta tá quiahva tín yohó yíto ñundáhyi quiahva já ndítahan coo ndó xihin Jesucristo. <sup>18</sup> Ta anda jáví mé ndó xihin tóco ndihi na cúu cuéntá Jesús cuu candaá ini ndó ndá quiahva quíhvi ini a ndohó. <sup>19</sup> Ta xíca tahví i nu Ndióxi ña ná candaá ini ndó ndá quiahva quíhvi ini Jesucristo ndohó já queá ná ndicutú ndaa ínimá ndó xihin Ndióxi. Joo mé a ndaa a cúu xinu coo ndó candaá ini ndó ndá quiahva quíhvi ini a ndohó.

<sup>20</sup> Ta viti cáhnu nahá ná cacuu Ndióxi, mé a íin ndivaha ndéé cája cuahá nuú ñaha jáchi cája cuaha chága mé á ñamaní xihin yó a juú ga nuú ña cáhvi iní caca yó nu á jáchi chindeé Ndióxi mí xihin ndéé mé á. <sup>21</sup> Cóho ndihí, na cúu cuéntá Jesús ña ná caja cáhnu í Ndióxi sahá ña nacaja Jesucristo. Viti xihin ndijáá níi quívi ta anda ama cáa quívi ná caja cáhnu í mé á. Já ná coo.

## 4

### *Cája ínimá yíi Ndióxi ña in nanduu tóco ndihi na cúu cuéntá Jesús*

<sup>1</sup> Yehe ndácaan i vecaa sahá ña cája chúun i cuéntá Jesucristo, xitoho í. Sahá ña cán queá xíca tahví i nu ndo ña ná caja ndó ña cúni Ndióxi caja na cúu cuéntá mé á. Jáchi nacaxi a ndohó sahá ña cán queá ndítahan caja ndó tá quiahva cúni mé á. <sup>2</sup> Coto a cája cáhnu ndó mé ndó. Vii caja ndó xihin ñayivi. A cójo cama ini ndó xihin ná. Ta tá yáha nu cája xihin táhan ndó caja cáhnu ini saha táhan ndó jáchi quíhvi ini táhan ndó. <sup>3</sup> Xíni ñuhú ndinducú ndo in ná nduu ndó jáchi chindeé ínimá yíi Ndióxi ndohó caja ndó ña. Ta coto a ndácahnda táhan ndó já ná coo vaha ini xihin táhan ndó. <sup>4</sup> Tóco ndihi mí, na cúu cuéntá Jesús naxinu coo í cúu yó tátuhun in túhún ñayivi. Jáchi íin in túhún ínimá yíi Ndióxi iní ta in túhún cúu ri ña ndátí quiahva Ndióxi nu yo sahá ña nacaxi a mí ndiquehé ña. <sup>5</sup> In túhún jini

Jesucristo, xitoho í queá íin. Ta in túhún jini mé á ndítahan cándéé iní jáchi in nacandúta yo cuéntá mé á. <sup>6</sup> Ta íin in túhún Ndióxi, mé a cúu á tátá tóco ndihí. Ta mé a cán cómi a cuéntá saha tóco ndihí. Ta sahan mé á ndéé yó caja í ña cúni a. Ta ndácaan ínimá mé á ini tóco ndihi ñayivi cuéntá mé á.

<sup>7</sup> Joo tá in tá in mí nañehe táhvi yo nasacu ini Jesucristo quiahva nu yo. <sup>8</sup> Sahá ña cán queá cáchi tuhun Ndióxi já:

Naquee vaha mé á xihin na ihvi a ta nasandaca mé á na tá nandicó coo a nandaa indiví.

Anda já nasahan tahvi nuú in in ñayivi, nacachi tuhun Ndióxi.

<sup>9</sup> Tá cáchi a ña nandaa Jesucristo indiví já cúni cachi a ña nu cuítí nanuu a indiví anda ñuyívi yóho. <sup>10</sup> Ta mé Jesucristo, mé á naquee indiví cán ta nanuu a ñuyívi yóho nandaa tucu a cuahan janda nu jícó cuíi indiví ta já najándicutú a ñuyívi xihin indiví xihin ña nacaja mé á. <sup>11</sup> Ta tá nasahan tahvi nuú in in ñayivi já nañehe táhvi java na cacuu na apóstol ta java na cacuu na profeta ta java na caca nuu na cahan na tuhun Ndióxi ña cuu jácacu ñayivi. Ta java na nañehe táhvi ná cacuu na na cómi cuéntá sahá na cúu cuéntá mé á ta java na cacuu na na jánaha tuhun Ndióxi nuú ñayivi. <sup>12</sup> Já nacaja Ndióxi xihin na cán já ná canduu tiahva na caja chúun na cuéntá mé á ta já ná cuu caja na jácuahnu na na cúu cuéntá Jesús. <sup>13</sup> Já queá ná xinu coo ndihí in canduu xihin na cúu cuéntá Jesús sahá ña cándéé iní mé á. Já ná cuu xinu coo í candaá vaha chága iní sahá Jesucristo, mé a cúu in túhún jini já jahyi Ndióxi. Ta xihin ña yóho cuu ndindacú yo cuéntá mé á janda quiahva cuahnu vaha í jáxinu coo í ndicutú ndaa yó xihin mé á. <sup>14</sup> Ná a cacuu ga í tátuhun na valí, na co tácu ini, na ndijama jini tá tóo. Ta tá nandihí ndíco na jatá ña jánaha inga na janda quiahva jándahvi na na. Ta mé na jándahvi ñahá yóho xini vaha na ndá quiahva cája na cañehe na na cuhun na in íchi ña co cúu ichi vaha. <sup>15</sup> Ña ndítahan caja í queá cahan ndaa xihin táhan í xihin ndinuhu iní sahá ña quíhvi ini táhan í ta já cuahnu í xihin Jesucristo, mé a cúu jini nu tóco ndihi na cúu cuéntá mé á

janda quiahva ná nduú tá quiahva cáa mé á. <sup>16</sup> Sahá ña cúu mé á jiní nu yo sahá ña cán quea cuu ndique táhan vaha í xihín java ga na cúu cuénta Jesús. Ta ñúchí ndivaha ndique táhan na cúu cuénta mé á tá cajú in in na ña cúní mé á. Ta xihín ña yóho cuu canduu vaha í ta cuu ndindacú chága yo cuénta mé á ta já cuu quihvi ini táhan í.

### *Ña saá cajú í viti*

<sup>17</sup> Ña yóho quea cáxi tuhun í xihín ndo. Xíca tahví i nu ndó cuénta Jesucristo, xitoho í ña ná a cajú ga ndó cuachi tá quiahva cajú ñayivi ñuyivi jáchi coo yahvi toho tá nuú ña núu cáhvi ini na cajú na. <sup>18</sup> Mé na cán nandaji xíní túni ná. Ta co cúu ná na jácacu Ndióxi jáchi nachicaji na xíní túni ná nu mé á ta nandaja táhyí na ínima ná. <sup>19</sup> Co cácahan nuu ná jáchi nayaha va quiahva cajú na ña núu xihín ndinuhu ini na. Ta co sáji nuu na nuú yiquí cuñu na tá cúní a cajú tá nuú ña núu. <sup>20</sup> Joo tá nandiquehe ndó íchi cuénta Jesús já najánaña nde ndohó ña ná caxoo ndó nuú cuachi tátuhun ña yóho. <sup>21</sup> Jáchi naxini johó ndó saha mé á ta nandiquehe ndó tuhun ndaa, ña najánaña nde nu ndo, ña cáhan saha mé á. <sup>22</sup> Sahá ña cán quea ndítahan nu ndó jácaxoo ndó nu tóco ndihi ña núu nasacaja ndó jihna. Jáchi cuachi quea nacaja ndusa xihín ndó ña ná cajú ndó ña núu ta játiví a ndohó sahá ña nandiava íni ndo cajú ndó ña núu, ña jándahvi ndohó. <sup>23</sup> Xíní ñúhú cacuu ndó na nanduu saá ínima xihín xíní túni sahá ña cúu ndó cuénta Jesús. <sup>24</sup> Ta xihín ña yóho cuu xinu coo ndó cacuu ndó tátuhun ñayivi saá, na cáa tá quiahva cáa mé á. Ta náha ña mé a ndaa táhyí cúu ndó ñayivi ndaa, na nandivií nu mé á.

<sup>25</sup> Sahá ña cán quea a cáhan ga ndó ña tuhún. Ña ndítahan nu ndó cajú ndó quea cáhan ndó ña ndaa xihín ñani táhan ndó jáchi in nanduu ndihí cuénta Jesucristo.

<sup>26</sup> Ta tá jáa ndo xihín ñayivi coto a cajú ndó cuachi jáchi xíní ñúhú yaha yachi ña xójo ini ndó xihín ná. Ta tá sa nahini sa co ndítahan ndacaan ga ña xójo ini ndó xihín ná. <sup>27</sup> Ta a quiahva ndó ñamaní nuú tiháha sacuaña ña ná cajú rí ña cúní rí xihín ndo.

<sup>28</sup> Ndá na nasacaja cuíhna jihna coto ná a cajú cuíhna ga na viti. Ndítahan cajú chún vaha na ña ná cuu chindee na na cámaní ñaha nuu.

<sup>29</sup> A cáhan ga ndó tuhun núu. Ña ndítahan nu ndó quea chindee ndo ñayivi xihín tuhun cáhan ndó. Ta já cuu cuahnu na xihín á ña ná ñehe ná ñamaní nu Ndióxi. <sup>30</sup> A cajú ndó ña ná cacuéha ínima yíi Ndióxi xihín ndo jáchi mé ínima yíi Ndióxi cán quea náha ña mé a ndaa cúu ndó cuénta mé á. Cúu á tátuhun nanani marca Ndióxi ndohó ña náha ña a jándacoo toho a ndohó janda quiahva ná xinu coo quivi tá chí in ndeé va jácacu Ndióxi ndohó.

<sup>31</sup> Xíní ñúhú tavá xóo ndó tóco ndihi ña núu, ña co sahan ñamaní nu ndó canduu vaha xihín táhan ndó. Ta co ndítahan ja ndo xihín ñayivi ta ni co ndítahan cojo ini ndó. Ta co ndítahan cayuhú nu táhan ndó ta ni a cáhá ndó xihín ná. Ña ndítahan cajú ndó quea tavá xóo ndó mé ndó nu tóco ndihi ña núu. <sup>32</sup> Ña ndítahan cajú ndó quea ná cajú vaha xihín táhan ndó ta candahvi ini táhan ndó. Ta cajú cáhnu ini saha táhan ndó tá quiahva nacaja cáhnu ini Ndióxi saha ndó sahá ña nacaja Jesucristo saha ndo.

## 5

### *Ña ndítahan cajú na cúu jahyi Ndióxi*

<sup>1</sup> Mé ndó cúu ndó jahyi mání Ndióxi sahá ña cán quea ndítahan ndihi ini ndó cajú ndó tá quiahva cajú mé á. <sup>2</sup> Xíní ñúhú quihvi ini ndó ñani táhan ndó tá quiahva nacaja Jesucristo. Naquihvi ini a mí ta nandiquiahva mé á quivi a ndica crúxu saha yo tátuhun in quítí, rí nasahní na joco na nu Ndióxi. Ta mé a ndaa nasacuu a ña nacajii ini Ndióxi xihín.

<sup>3</sup> Co cúní cuni johó í ña cajú ndó cuachi tátuhun tá íin in ñayivi xihín ñájíhí á yíi ñani táhan na á tá cajú na ña núu xihín yiquí cuñu na á tá chínúu na ínima ná jatá jihún na. Co ndítahan nu ndó cajú ndó ña yóho jáchi cúu ndó na cúu cuénta Ndióxi viti. <sup>4</sup> Coto a cáhan ndó ña núu ña coo saha. Ta ni a ndítuhún jiquí xihín táhan ndó xihín tuhún núu. Jáchi co cajú vaha toho ña yóho xohó. Ña ndítahan cajú ndó quea ndiquiahva ndó

ndixahvi nu Ndióxi. <sup>5</sup> Jáchi sa cánda ini ndó ña ndá na ndúu xihín na co cúu ñájíhí na á yíi ná, á tá cajú na ña núu xihín yiquí cuñu na á tá cúu ná na chínúu ínimá jatá jjuhún, mé na cán a ñéhe táhvi toho na cacomí Jesucristo xihín Ndióxi cuénta saha ná. Jáchi na chínúu ínimá jatá jjuhún cúu ná tátuhun na cajú cáhnu yoco. <sup>6</sup> A cándusa ndó cajú ndó cuachi cajú na jan jáchi cúni na jándahvi na ndohó xihín ña tuhún. Jáchi cúu ná ñayivi sáa ini, na jácojo ini Ndióxi. Ta tandaa quivi jándoho a ini na cán. <sup>7</sup> Sahá ña cán queá co ndítahan ndique táhan ndó cajú ndó ña núu xihín na jan.

<sup>8</sup> Mé ndó nasanduu ndó nuú naá ndivaha jihna joo sahá ña in nanduu ndó xihín Jesucristo ndúu ndó nu yehe viti. Sahá ña cán queá ndítahan cajú vaha ndó já ná nahá ña mé a ndaa cúu ndó ñayivi mé á, na xíca nu yehe. <sup>9</sup> Jáchi tóco ndihi na ndúu nu yehe cajú na ndinuhu ña vaha ta xíca ndacú na íchi cuénta ña ndaa. <sup>10</sup> Xíní ñúhú jácuaha ndó cajú ndó ña cájii ini Ndióxi xihín. <sup>11</sup> A catáhan ndó xihín ñayivi ndúu nuú naá yávi ta a cajú ndó ña núu xihín ná, ña co ndáyahvi. Ña ndítahan cajú ndó queá jánani ndó na ta nahá tuhun ndó sahá ña núu cajú na. <sup>12</sup> Jáchi chínúu cacahan nuu yo nditúhún yo sahá ña cajú jehé na jan. <sup>13</sup> Joo tá ná xinu quivi canáha ndihi ña cajú na jan já canda ini tóco ndihi ñayivi ña nacaja jehé na. Jáchi tóco ndihi ña ñúhu jehé quee ndihi a nu yehe. <sup>14</sup> Sahá ña cán queá já cáchi tuhun Ndióxi já:

Xíní ñúhú ndicaxí inún jáchi cúun tátuhun da quíji tañu na naxihí.

Ta tá ná ndicaxí inún já jándiyehé Jesucristo ínimun já ná a cájún cuachi, cáchi tuhun Ndióxi.

<sup>15</sup> Xíní ñúhú candehé vaha ndó nda quiahva ndítahan cajú ndó. A cajú ndó tá quiahva cajú ñayivi co xíní túni. Ndítahan cacuu ndó ñayivi ndichí jini. <sup>16</sup> Xíní ñúhú ndihi ini ndó cajú ndó ña cúni Ndióxi jáchi quini ndivaha cáa tiempo viti. <sup>17</sup> Coto a cajú ndó ña tóntó. Xíní ñúhú ndicani vaha ini ndó sahá ña cúni Ndióxi, xitoho í cajú ndó. <sup>18</sup> A jáxini ndó mé ndó jáchi co cajú vaha ña jan xihín ndo. Ña ndítahan cajú ndó queá quiahva ndó ñamani nu Ndióxi ña ná

jándicutú a ínimá ndo xihín ínimá yíi mé á. <sup>19</sup> Ta tá ná nditúhún ndo xíní ñúhú ndinuhu ini ndó cajú cáhnu ndó Ndióxi, xitoho ndó xihín tuhun cáhan ndó. Xíní ñúhú cata ndó salmo xihín himno xihín canto, ña sahan ínimá yíi Ndióxi nu ndo. Joo xíní ñúhú cacuu a ña quíxi ínimá ndó cajú cáhnu ndó Ndióxi. <sup>20</sup> Níi tiempo ndítahan ndiquiahva ndó ndixahvi nu Ndióxi, tátá yo saha tóco ndihi ñaha. Ta cahan ndó quivi Jesucristo, xitoho í tá ná cajú ndó ña.

### *Ña ndítahan cajú na sa natandaha*

<sup>21</sup> Ndítahan nu ndó candúsa táhan ndó já ná cuu ndicáhnu Ndióxi sahá ña cajú ndó.

<sup>22</sup> Ndóhó, najihí ndúu yíi ndítahan candúsa ndó yíi ndo tá quiahva cándusa ndó Jesucristo, xitoho í. <sup>23</sup> Jáchi yíi ndó cúu da cómi cuénta saha ndo tá quiahva cómi Jesucristo cuénta sahá na ndico íchi mé á. Ta tóco ndihi na cúu cuénta mé á cúu ná na ndáca tátuhun yiquí cuñu mé á. Ta mé á queá jácacu a na nuú cuachi. <sup>24</sup> Tá quiahva cajú na cúu cuénta Jesús cándusa na ña sáhdá mé á nu ná quiahva já ndítahan cajú najihí ndúu yíi. Xíní ñúhú cajú ndihi na ña cúni yíi na cajú na.

<sup>25</sup> Ta ndóhó, da ndúu ñájíhí, xíní ñúhú quihvi ini ndó na tá quiahva naquihvi ini Jesucristo na cúu cuénta mé á tá naxihí a saha ná. <sup>26</sup> Nacaja Jesucristo ña yóho jáchi cúni mé á ña ná nduu na cúu cuénta mé á ñayivi víi sahá ña nandoo na xihín ticuí ta sahá ña sácú vaha na ña cáchi tuhun Ndióxi. <sup>27</sup> Sahá ña cán queá cuu cayati na nu Ndióxi sahá ña cúu ná ñayivi víi cuénta mé á, na naquee vaha xihín ña núu, na co jácaquini mé xihín cuachi. Ta viti cúu ná ñayivi yíi nu mé á jáchi co cajú ga na cuachi. <sup>28</sup> Ndítahan nuú in dataa quihvi ini da ñájíhí da tá quiahva quihvi ini da yiquí cuñu da jáchi in nanduu na. Tá quihvi ini da ñájíhí da já queá quihvi ini da mé dá. <sup>29</sup> Jáchi ni in tuhún toho ñayivi co cándají na yiquí cuñu na. Ña cajú na queá sahan na ña cuxu a ta ndáa vaha na ña ta quiahva já ndáa Jesucristo na cúu cuénta mé á. <sup>30</sup> Jáchi tóco ndihí mí, na cúu cuénta Jesús cúu yó java na ndáca yiquí cuñu mé á. <sup>31</sup> Sahá ña cán queá cáchi tuhun Ndióxi já: “Tá ná tandaha in dataa já ndítahan quee xóo da nu tátá

náná da já ná ndique táhan da coo da xihín ñájíhí da. Ta já ná nduu ndíví nā tátuhun in túhún jini ñayivi”, cáchí tuhun Ndióxi. <sup>32</sup> Mé a ndaa yancá ndivaha cándaá ini tóco ndihi ña yóho. Joo náha nu yo ndá quiahva cúu yó tátuhun yiquí cuñu Jesucristo tá in nanduú xihín á. <sup>33</sup> Xíní ñúhú ndicuhun ini ndó ña ndítahan quihvi ini in in ndó ñájíhí ndo tá quiahva quihvi ini ndó mé ndó. Ta jári ndóhó, najihí xíní ñúhú caja cáhnu ndó yí ndo.

## 6

<sup>1</sup> Ndóhó, nā valí xihín nā tacú, xíní ñúhú coo johó ndó nu sáhdá tátá náná ndo chuun nu ndo. Jáchi ña yóho quea cuni Ndióxi caja ndó. <sup>2</sup> Xíní ñúhú caja cáhnu ndó tátá ndo ta caja cáhnu ndó náná ndo jáchi jihna ñúhú nasahnda Ndióxi ña yóho nu yó caja í. Ta jatá ña yóho nasahan mé á tuhun a nu yo tá cáchí a já: <sup>3</sup> “Tá ná cajún ña yóho já cuahnu yatún ta quixi cuahá ña vaha nuun.”

<sup>4</sup> Ta ndóhó, nā ndúu jahyi, a jácojo ndó ini jahyi ndó. Ña ndítahan caja ndó quea jánaha vaha ndó nu ná ña ndítahan caja na. Ta jánaha ndó nu ná ndá quiahva caca na íchi cuéntá Ndióxi, xitoho í.

<sup>5</sup> Ta ndóhó, nā naxeen nā caja chúun nu ná xíní ñúhú coo johó ndó nu cáhan xitoho ndó, nā cómi cuéntá saha ndo ñuyíví yóho. Ta ndítahan caja cáhnu ndó nā ta cayihví ndó nā. Joo xíní ñúhú caja ndó ña xihín ndinuhu ini ndó jáchi cúu á tátuhun cája chúun ndó nuú Jesucristo.

<sup>6</sup> Ndítahan nu ndó caja chúun vaha ndó nu ná ta a juú tá ndíta cuití nā sádehé nā nu cája chúun ndó sahá ña cuni ndó candoo vaha ndó nuú nā cán, vaha. Ndítahan caja chúun ndó xihín ndinuhu ini ndó nuú xitoho ndó jáchi cúu á tátuhun cája chúun ndó nuú Jesucristo. Sahá ña cán quea ndítahan caja ndó ña cuni Ndióxi xihín ndinuhu ini ndó. <sup>7</sup> Xíní ñúhú cajii ini ndó ta ndinuhu ini ndó tá cája chúun ndó. Ta ndítahan caja ndó cuéntá ña cája chúun ndó nu Ndióxi ta co cája chúun ndó nuú ñayivi cuití va. <sup>8</sup> Jáchi sa cándaá ini ndó ña vaxi quivi xinu yó nuú Jesucristo, xitoho í ndiquehé yahvi sahá ña vaha nācája í ñuyíví yóho. Ta coo caja toho

a á cúu yó xitoho á cúu yó nā cája chúun nuú xitoho.

<sup>9</sup> Ta jári ndóhó va, nā cúu xitoho mozo naxeen ndó jan ndítahan nu ndó caja vaha ndó xihín ná ta co ndítahan jáyihví ndó nā xihín tuhun cáhan ndó xihín ná. Ndítahan ndicuhun ini ndó ña in Jesucristo indiví ta cúu á xitoho mé ndó ta sa mé á cán cúu xitoho nā cája chúun xihín ndo. Ta co sáhní toho a cán mé á saha ndá ñayivi in chága saha a juú ga inga na jáchi in cúu ndihí nu mé á.

### *Ndaja caja í quee vaha í xihín ña quini*

<sup>10</sup> Ta viti xíní ñúhú caja ndacú ndo mé ndó xihín ndée cáhnu Jesucristo, xitoho í jáchi in nanduú ndó xihín mé á viti. <sup>11</sup> Xíní ñúhú caja chúun ndó xihín tóco ndihi ndée sahan Ndióxi nu ndo já ná cuu quee vaha ndó xihín tiñáhá sacuaḥa tá cuni rí jándahvi rí ndohó. <sup>12</sup> Jáchi a juú xihín ñayivi, nā in yiquí cuñu cáni táhan í, vaha. Ña cáni táhan í xihín cúu táto tiñáhá sacuaḥa, rí xíca nuu nu táchi indiví ta rí cán cúu rí rí cómi cuéntá sahá ñayivi ndúu nuú naá yávi ñuyíví yóho.

<sup>13</sup> Sahá ña cán quea xíní ñúhú caja chúun ndó xihín tóco ndihi ndée sahan Ndióxi nu ndó já quea ná cuu quee vaha ndó xihín rí quini tá ná xinu rí caní táhan rí xihín ndo. Ta xihín ña yóho cuu candita ndacú ndó tá sa nandihí nacani táhan ndó xihín rí. <sup>14</sup> Ta candita ndacú ndó xihín ña ndaa ña sahan Ndióxi nu ndo jáchi cúu á tátuhun in cinturón pañi tixi sahan ndée ndacaan tóco ndo. Ndicuhun ini ndó ña cúu ndó ñayivi ndaa nu Ndióxi. Sahá ña cán quea cúu á tátuhun ndíxi ndó cotó caa. <sup>15</sup> Xíní ñúhú canduu tiaḥva ndó cahan ndó tuhun vaha sahá Jesús xihín ñayivi jáchi tuhun yóho quea cája ña ná coo vaha ini na xihín Ndióxi. Sahá ña cán quea cúu á tátuhun yíhi ndó tuhun Ndióxi. <sup>16</sup> Xíní ñúhú candeé ini ndó Ndióxi já quea ná cuu quee vaha ndó caji nuu ndó nuú ña núu cuni tiñáhá sacuaḥa chindahá rí nu ndo. Sahá ña cán quea cúu á tátuhun ñéhe ndó in caa jáhdá ña chícáji a ndohó. Ta xihín mé ña yóho cuu candaji nuu nu ndo nuú ña ñéhe ñuhú ita jácana mé rí cán nu ndo. <sup>17</sup> Ndicuhun ini ndó ña najacacu Ndióxi ndohó nuú cuachi sahá ña cán quea cúu á tátuhun ñuhu ndó yíjini caa. Tá ná cahan cáxi ndó tuhun

sáhan ínimá yíi Ndióxi nū ndó já quéa cúu á tátuhun ñéhe ndó machiti, ña cúu tuhun Ndióxi. <sup>18</sup> A jándacoo ndó caca tahví ndó nū Ndióxi. Níi tiempo xíní ñúhú caca tahví ndó nū mé á. Joo ndítahan caca ndó ña jánaħa ínimá yíi mé á nū ndo caca ndo. Xíní ñúhú canduu tiaħva ndó ta a cáva ini ndó ta xíní ñúhú caca tahví ndó saħa tóco ndihi na cúu cuénta Ndióxi. <sup>19</sup> Ta caca tahví ndó nū Ndióxi saħa mí i viti já ná chindeé Ndióxi yeħe caħan i xihín ñayivi tuhun mé á ta caca tahví ndó nū á ña ná quiaħva mé á ndéa a nuú i já ná cuu caħan i tuhun mé á ña coo naħaxíni na jihna, nduu. Jáchi ña yóho quéa cuu jácacu a na nuú cuachi. <sup>20</sup> Ndióxi quéa naħindahá a yeħe cuħun i caħan i tuhun yóho ta saħa ña xíca i caħan i tuhun yóho ndácaan i vecaa viti. Caca tahví ndó saħa i já ná a cáyhvi i caħan i saħa Jesús nuú ñayivi ndúu yóho tá quiaħva ndítahan nuú i caja i.

*Ndíndayí Pablo ñayivi, na cúu cuénta Jesús*

<sup>21</sup> Ñani máni yo, da naní Tíquico mé a ndaa cúu dá da chindeé táhan xihín i chuun Jesucristo, xitoho í. Ta mé dá cán cañeħe da tuhun saħa i tá ná saa da nū ndo já ná candaa ini ndó ndátahvi yáha i. <sup>22</sup> Saħa ña cán chindahá i da nū ndo já ná caxi tuhun da nū ndó ndá quiaħva yáha nde ndúu nde yóho ta xihín ña yóho ná cuu quiaħva da tuhun ndeé ini ndó.

<sup>23</sup> Ña cúni quéa ná caja Ndióxi, tátá yo xihín Jesucristo, xitoho í ña ná coo vaħa ini tóco ndihi ndó, na cúu cuénta Jesús. Ta ná caja mé á ña ná quihvi ini táhan ndó saħa ña cándéé ini ndó mé á. <sup>24</sup> Ta ná jándicutú ndaa mé á ñamaní jata tóco ndihi na quihvi ini Jesucristo, xitoho í xihín ndinuhu ini na. Já ná coo.

## Carta nachindahá Pablo nuú na cúu cuéntá Jesús ndúu ñuu Filipos

*Carta naçahyí Pablo nuú na cúu cuéntá Jesús ndúu ñuu Filipos nani nasandacaan da vecaa*

<sup>1</sup> Yehe cúu Pablo ta cája chúun i xihín Timoteo cuéntá Jesucristo. Ta cáhyí nde carta yóho nu tóco ndihi na cúu cuéntá Jesús, na ndúu ñuu Filipos jáchi in nanduu na xihín Jesucristo. Ta cáhyí ri nde carta yóho nuú na sacuaḥa nuú na cúu cuéntá Jesús xihín nuú na chíndeé mé na sacuaḥa veñuhu. <sup>2</sup> Xíca tahví i nu Ndióxi, tátá yo xihín nuú Jesucristo, xitoho í ña ná caja cuahá mé á ñamaní xihín ndo ta ná caja mé á ña ná coo vaha ini ndó.

*Xíca tahví Pablo nu Ndióxi sahá na cúu cuéntá Jesús*

<sup>3</sup> Ndíquiahva ndivaha i ndixahvi nu Ndióxi tá ndícuḥun ini i saḥa ndo. <sup>4</sup> Níi tiempo tá xíca tahví i nu Ndióxi saḥa ndihi ndo cájii ini i. <sup>5</sup> Jáchi janda tá nandiquehe ndó íchi cuéntá Jesús ta janda viti nachindeé ndó yehe cáhan i tuhun Ndióxi xihín ñayivi. <sup>6</sup> Naçasáhá Ndióxi cája ña ná nduu ndó ñayivi ndaa nu mé á ta xini vaha i ña jáxinu coo a ña janda quiahva ná xinu coo quiví quixi tucu Jesucristo ñuyiví yóho. <sup>7</sup> Cája i cuéntá vaha ndivaha va ndíquiahva i ndixahvi nu Ndióxi saḥa ndo jáchi mé a ndaa quíhvi ndivaha ini i ndohó. Tá quiahva cája Ndióxi ñamaní xihín i quiahva já cája ri a ñamaní xihín mé ndó. Ta coo caja toho a tá ndácaan i vecaa. Ta coo caja toho a tá ná ndiquehe vaha i saḥa tuhun Ndióxi nuú na jutixia á tá caxi tuhun i xihín ñayivi ña mé a ndaa cúu á tuhun Ndióxi, ña cúu jácaacu ñayivi. <sup>8</sup> Ta cándaá cáxi ini Ndióxi ña quíhvi ndivaha ini i ndohó tá quiahva quíhvi ini Jesucristo ndohó. <sup>9</sup> Xíca tahví i nu Ndióxi ña ná xinu ini ndó quíhvi chága ini ndó ñayivi. Ta ná ndindíchi chága jiní ndó ta ná coo chága xini túni ndo. <sup>10</sup> Já ná cuu caxi ndó ña vaha chága níi tiempo ta xihín ña yóho cacuu ndó

ñayivi ndaa, na co ndójo cuachi tá ná xinu quiví quixi tucu Jesucristo. <sup>11</sup> Ndítahan caja ndó ña vaha xihín ndinuhu ini ndó jáchi xihín ña yóho jánaḥa ndó nuú ñayivi ña mé a ndaa cúu ndó cuéntá Jesús ta xihín ña yóho ndicáhnú ndivaha Ndióxi.

*Ná caja í ña cúni Jesucristo xihín ndinuhu ini i*

<sup>12</sup> Candehé ndó, ñani mí i, na cúu cuéntá Jesús. Cúni ña ná candaa ini ndó ña ndóho i vecaa yóho. Mé a ndaa saḥa ña ndácaan i vecaa yóho naḥini johu cuahá chága ñayivi tuhun vaha saḥa Jesucristo. <sup>13</sup> Tóco ndihi soldado, na ndúu vehe rey yóho xihín java ga ñayivi sa cándaá ndihi ini na ña ndácaan i vecaa saḥa ña ndíco i íchi cuéntá Jesucristo. <sup>14</sup> Ta saḥa ña naçandaa ini cuahá na cúu cuéntá Jesús ña ndácaan i vecaa yóho, nandindeé ini na caca nuu na caḥan na tuhun Ndióxi xihín ñayivi ta co yíhvi na caja na ña jáchi cándeé cáhnú chága ini na Ndióxi viti.

<sup>15</sup> Mé a ndaa ndúu java na xíca nuu cáhan tuhun Ndióxi nuú ñayivi saḥa ña cáhíhvi cuití ini na. Ta java na cája na ña jáchi cúni na cayojó na nuú i. Joo mé a ndaa java na cáhan na tuhun Ndióxi saḥa ña cúni na caja na ña vaha. <sup>16</sup> Joo java na cáhan na tuhun Ndióxi saḥa ña vaha mé cuití va na ta co cája na ña xihín ndinuhu ini na. Ña cúni na caja na quea jáquihvi chága na yehe nani ndácaan i vecaa yóho. <sup>17</sup> Joo mé a ndaa java na cáhan na saḥa Jesucristo jáchi quíhvi ndusa ini na yehe ta sa cándaá ini na ña nasacu Ndióxi yehe yóho ña ná ndiquehe e saḥa tuhun vaha cáhan saḥa Jesucristo. <sup>18</sup> Joo co sáhní toho i mí i ndá saḥa cája na ña jáchi cájii ini i tá cáhan na saḥa Jesucristo nuú ñayivi. Ta cájii chága ini i <sup>19</sup> jáchi cándaá ini i ña quee vaha i nu tóco ndihi ña ndóho i yóho saḥa ña chíndeé ínima Jesucristo yehe ta saḥa ña xíca tahví ndó nu Ndióxi saḥa i. <sup>20</sup> Cándéé ini i ña a cándoó núu i. Ta ndátí tiahva i chíndeé Ndióxi yehe já ná cuu cáhan i saḥa Jesucristo nuú ñayivi. Xihín ña cáhan i yóho jánaḥa i ndá quiahva cáhnú cúu Jesucristo. Ta co cája toho a á tácu u á naḥihí i jáchi caja cáhnú tá caja cáhnú i Jesucristo. <sup>21</sup> Ta nani tácu u ín i ñuyiví yóho cája cáhnú i Jesucristo xihín ndinuhu

ini i. Ta tá ná quivi i já vaha chága ví jáchi cuhun i coo i xihín mé á. <sup>22</sup> Ta cō cándaā ini i ndía vaha chága jáchi tá ná catacu u já cuu ñehe chága íní i cahan i sahá Jesucristo xihín ñayivi. <sup>23</sup> Ivi joho cáhvi ini i ña á vaha chága ná catacu u á vaha chága ná quivi i. Jáchi tá ná quivi i ivi laá xinu coo i coo i xihín Jesucristo. Ta vaha chága ná cuhun i coo i cán a juú ga ña ná coo i ñuyíví yóho. <sup>24</sup> Joo saha mé ndó xíní ñúhú coo tóo chága i ñuyíví yóho. <sup>25</sup> Ta viti cándaā vaha ini i ña coo chága i ñuyíví yóho ña ná chindeé e ndohó catiahva chága ndó tuhun Ndióxi já ná cajji chága ini ndó sahá ña cándéé ini ndó mé á. <sup>26</sup> Sahá ña cán quea cuu cajji ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

<sup>27</sup> Cúni ña ná ndihi ini ndó caja ndó tá quiahva cáchi tuhun vaha cahan sahá Jesucristo. Já quea tá ná saa i á tá ná a saa toho i coto nihni i ndohó cúni ñehé e tuhun ña in cúu ndihi ndó ta ndúu ndacú ndó cuéntá Ndióxi. Ta cúni ñehé e tuhun ña in cúu ndó ndúcú ndéé ndó cahan ndó tuhun vaha sahá Jesucristo nuú ñayivi ña ná cándéé ini na mé á. <sup>28</sup> Ta coto a quiahva ndó ñamani nuú na ihvi ndó jan ña ná jáyihví na ndohó. Jáchi xihín ña yóho cándaā ini na cán ña xíca na cuahan na nuú ndihi saha ná. Joo mé ndó cándaā ini ndó ña xíca ndó íchi nuú cacu ndaa ínimā ndó caja Ndióxi. <sup>29</sup> Jáchi sahá ña ñacaja Jesucristo ñehe táhvi ndó cándéé ini ndó mé á. Ta quiahva já ñehe táhvi ri ndó ndóho ini ndó sahá ña cándéé ini ndó mé á. <sup>30</sup> In nuú ndóho ini sahá Jesucristo. Sa naxini ndó ndá quiahva nandoho ini i jihna. Ta sa ñehe ndó tuhun ndá quiahva ndóho ini i viti.

## 2

### *Nanduu Jesucristo ñayivi vatí cúu á Ndióxi*

<sup>1</sup> Xíní vaha i ña sahan Jesucristo tuhun ndéé ini ndó ta quíhvi ini a ndohó. Xíní vaha i ña in nanduu ndó jáchi ndácaan ínimā yii Ndióxi ini ínimā ndó. Xíní vaha i ña quíhvi ini táhan ndó ta táhnda ini saha táhan ndó. <sup>2</sup> Sahá ña cán quea ndítahan caja ndó ña ná cajji ndivaha ini i sahá ña in cúu ndihi ndó ta sahá ña quíhvi chága ini táhan

ndó. Ta sahá ña in nanduu ndó ñacaja ínimā yii Ndióxi já in nanduu xíní túni ndó nuú ña cúni ndó caja ndó. <sup>3</sup> Coto a ndúcú cuachi xihín táhan ndó. Ta coto a ndíñehe jícó ndó mé ndó. Ndítahan coo ndísáhnu ini ndó. Ta ndítahan cahan ndó ña cáhnu chága inga ñayivi a juú ga mé ndó. <sup>4</sup> Ta cō ndítahan ndihi ini ndó sahá ña vaha mé ndó cuití va. Xíní ñúhú ndihi ri ini ndó sahá ña vaha inga na.

<sup>5</sup> Xíní ñúhú cahvi ini ndó tá quiahva ñasacahvi ini Jesucristo. <sup>6</sup> Jáchi tá quiahva íin Ndióxi quiahva já íin Jesucristo. Ta vatí cúu á Ndióxi joo coo nandaja cáhnu a mé á vatí cuu caja ña, nduu. <sup>7</sup> Ña ñacaja Jesucristo quea ñasacu xóo a tóco ndihi ña cáhnu cúu mé á cán ta ñaquixi a ñacacu a ñuyíví yóho tá quiahva cácu ñayivi. Ta ñasacuu a in dataa, da cája chúun cuéntá xitoho da. <sup>8</sup> Tá nandihí nanduu a ñayivi já najánuu a mé á janda quiahva ñasahan mé á quivi a ndica crúxu nuú naxihí a tátuhun da cája cuachi quini. <sup>9</sup> Sahá ña cán quea najándindita jícó ndivaha Ndióxi Jesucristo ta ñasahan in quivi á nu á ta quivi Jesucristo yóho quea cáhnu chága nu tóco ndihi quivi. <sup>10</sup> Sahá ña cán quea tóco ndihi na ndúu indiví xihín na ndúu ñuyíví cuni joho na quivi Jesucristo ta já ndaca xítí na nu á. Ta janda na ndúu tixi ñúhu ndaca xítí na nuú Jesucristo ña caja cáhnu na mé á. <sup>11</sup> Anda jáví cahan in in na cán ña cúu Jesucristo xitoho na ta xihín ña yóho ndicáhnu ndivaha Ndióxi, tátá yo.

### *Na cúu cuéntá Jesús cúu ná tátuhun ñúhu, ña jándiyehé ñuyíví yóho*

<sup>12</sup> Candehé ndó ñani mí i, na cúu cuéntá Jesús. Tá quiahva ñacandúsa ndó caja ndó ña ñasahnda i nu ndó tá ñasahin i tañu ndó jan quiahva já ndítahan candúsa chága ndó yehe viti nani íin xíca i nu ndó. Xíní ñúhú ndihi ini ndó caja ndó ña cúni Ndióxi jáchi najácaacu a ndohó. Ta xíní ñúhú cayihví ndó Ndióxi nani cája cáhnu ndó a xihín ndinuhu ini ndó. <sup>13</sup> Jáchi Ndióxi quea cája ña xíca ini ndó cája ndó ña vaha ta chindeé a ndohó cája ndó ña táhan ini mé á xihín.

<sup>14</sup> Ta a cahan cuachi ndó saha tóco ndihi ña cája ndó. Ta ni a ndítuhún ihvi xihín táhan ndó. <sup>15</sup> Já ná ñaha ña cúu ndó ñayivi

vií, na coó cuachi. Ndítahan caja ndó tá quiahva cája na cúu jahyi Ndióxi, na co cáquini xihín cuachi ña cája ñayivi quini cuéntá ñuyíví yóho. Cúu á tátuhun ndíyihvi ndaa ndó xihín ña vaha cája ndó tá quiahva ndíyihvi ndaa quimi indiví. <sup>16</sup> Jáchí cáhan ndó tuhun vaha sahá Jesucristo nuú ñayivi já ná cuu catacu na anda ama cáa quívi. Tá ná caja ndó ña yóho já queá cajii ini i xihín ndó tá ná xinu quívi quixi tucu Jesucristo. Jáchí xihín ña yóho candaá ini i ña a juú ña uun nasacuu chuun nacaja i. <sup>17</sup> Ta vatí ná ndiquiahva i mí i quivi i saha ndo joo cajii tá cajii ini i. Jáchí tá ná quivi i cúu á tátuhun cátahan i xihín ña joço ndó nu Ndióxi sahá ña cándeé ini ndó mé á. Ta sahá ña yóho cajii ini i ta in nuú cajii ini ndihí. <sup>18</sup> Sahá ña cán queá ndítahan cajii ini mé va ndó já ná cajii ini ndihí.

#### *Sácú ini Pablo chindahá da Timoteo xihín Epafrodito nuú na ñuu Filipos*

<sup>19</sup> Ta cúni Jesucristo, xitoho í chindahá yachi i Timoteo nu ndo ña ná cañehe da tuhun saha ndó nuú i. Anda jáví cajii ini i tá ná candaá ini i saha ndo. <sup>20</sup> Mé a ndaa quíhvi ini da ndohó ta coó ga inga da ñúhu ini saha ndo tá quiahva ñúhu ini yehe saha ndo. <sup>21</sup> Jáchí java ga na cúu cuéntá Jesús ndícani ini na sahá ñaha mé va na ta co ndícani ini na sahá ñaha cuéntá Jesucristo. <sup>22</sup> Joo sa xini ndó ña cúu Timoteo ta vaha ndivaha ta sa candaá ini ndó ndá quiahva chindeé da yehe nu xica i cáhan i tuhun Ndióxi xihín ñayivi. Cúu dá tátuhun jahyi i jáchí chindeé cuahá da yehe. <sup>23</sup> Sahá ña cán queá sácú ini i chindahá i da nu ndo tá sa nacandaá ini i ndaja cáa sahá i. <sup>24</sup> Ta cándeé ini i ña quiahva Ndióxi ñamaní nuú i saa yachi mé vi coto nihni i ndohó jan.

<sup>25</sup> Cája i cuéntá xini ñúhú chindahá i ñani Epafrodito ña ná ndicó coo tucu da nu ndo jáchí mé ndó nachindahá ndó da nuú i ña ná chindeé da yehe. Ta mé a ndaa cuahá ndivaha nachindeé da yehe janda quiahva nandoho ini da xihín i. <sup>26</sup> Joo viti xica ndivaha ini da cuni ndihi da ndohó. Ndícani ini da saha ndo jáchí nañehé ndó tuhun ña sa naquihvi da. <sup>27</sup> Ta mé a ndaa nandoho da cuehe ta jalóho quivi da, nduu. Joo nacaja Ndióxi ñamaní xihín da ta já

nandivaha da. Ta xihín ña yóho nacaja ri mé á ñamaní xihín yehe ña ná a cácuéha chága ví ini i jáchí sa ín cuaha ña ndóho i viti. <sup>28</sup> Sahá ña cán queá chindahá númí i da ña ná saa quíi dá nu ndo já ná cajii ini ndó cuni tucu ndó da ta xihín ña yóho ndivaha ri ini yehe va. <sup>29</sup> Ndítahan cajii ini ndó ndiquehe ndó da jáchí cúu dá ñani ndó da cúu cuéntá Jesús. Ta ndítahan coo toní ñúhú ndó xihín tóco ndihi na cája tá quiahva cája mé dá. <sup>30</sup> Jáchí mé a ndaa jalóho quivi da sahá chuun nacaja da cuéntá Jesucristo. Cuahá ndivaha tondohó naquixi nu dá sahá ña nachindeé da yehe jáchí nacaja mé dá ña a cúu caja mé ndó yóho sahá i.

### 3

#### *Ña ín chága saha nu Ndióxi*

<sup>1</sup> Candehé ndó ñani mí i, na cúu cuéntá Jesús. Xini ñúhú cajii ini ndó xihín ña cája Ndióxi. Co cája toho a nu mí i cáhyí i tucu u ña sa nacahyí i nu ndó jihna jáchí chindeé a ndohó. <sup>2</sup> Cuéntá coo ndó xihín ñayivi quini, na xica cája ña núu jan. Jáchí jánaha na ña ndítahan cahnda ndó yiquí cuñu ndó ña ná chícaan ndó marca yiquí cuñu ndó já ná cacuu ndó cuéntá Ndióxi. <sup>3</sup> Joo mí co cándúsa í ña cúu yó cuéntá Ndióxi sahá ña sáhdá yo yiquí cuñu í vatí mé a ndaa cúu yó tátuhun na naquihvi marca yiquí cuñu sahá ña cája cáhnu í Ndióxi jáchí ndacaan ínima yii mé á ini ínima yo. Ta viti cájii ini yo sahá ña cúu yó cuéntá Jesucristo. Co cándeé ini ña cája í <sup>4</sup> vatí mí i cuu cachi i ña cándeé ini i ñaha nacaja i, nduu. Jáchí nasacaja i ña cáchí ley xihín ndinuhu chága ini i a juú ga inga na. <sup>5</sup> Jáchí tá naxinu una quívi nacacu u já nachicaan na marca jan yiquí cuñu i. Ta mí i cúu u da Israel, da naquixi chichi Benjamín. Ta tátá náná i naquixi na chichi Israel ta cáhan nde tuhun hebreo. Ta nasandico i táhan da cúu fariseo, da sácú vaha ley Moisés. Ta nacaja i tóco ndihi ña nasahnda ley Moisés. <sup>6</sup> Nasandico cáhnu ndivaha i íchí cuéntá na fariseo cán sahá ña cán queá nacasahá nandicuíta i cája xixi i xihín na cúu cuéntá Jesús. Xihín ndinuhu ini i nacaja i tóco ndihi ña cáchí ley sahá ña cán queá ni in na coo nacuu chícaan na cuachi jatá i saha ley Moisés. <sup>7</sup> Tóco ndihi



ña yóho nasacuu a ña náhnu ndivaha nuú i. Joo viti coó sahá ga ña cán nuú i jáchi nasasáhá cándéé ini i Jesucristo. <sup>8</sup> Ta mé a ndaa yahvi chága ña cándéé ini i Jesucristo a juú ga tóco ndihi ña nacaja i jihna. Sahá ña cúní candaá chága ini i sahá Jesucristo, xitoho i sahá ña cán queá najándacoo i tóco ndihi ña nacaja i cán. Ta tóco ndihi ña cán cúú á tátuhun xehe ta coó sahá toho a nuú i viti jáchi cúní candico chága i Jesús. <sup>9</sup> Ta cúní cacuu u in da in ná nduu xihín Jesucristo. Joo co ndáti i nduu ndaa i nu mé á sahá ña sácú vaha i ley Moisés jáchi xíní vaha i ña cája Ndióxi ña ná nduu ndaa i nu mé á sahá ña cándéé ini i Jesucristo cuití va. <sup>10</sup> Ña cúní queá candaá chága ini i sahá Jesucristo. Ta cúní ña ná chutú ndaa ínima i xihín ndée Ndióxi, mé ndée ña nacaja ña nanditacu tucu Jesucristo. Ta cúní ndoho ini i tá quiahva nandoho ini mé á tá naxihí a ndica crúxu. <sup>11</sup> Já queá ndáti i xinú coo quiví nditacu u tá ná nditacu na sa naxihí.

*Ndítahan nducú ndéé yo janda quiahva ná xinú coo í ndiquehé ña quiahva Ndióxi nu yo*

<sup>12</sup> Co cúní cachi i ña sa naquee vaha vi. Ni co cúní cachi i ña sa naxinú coo i cúú u in ta ndaa tátuhun cúní Ndióxi. Ña cája i queá ndíhi ini i jáxinú coo i cacuu u in da cája tá quiahva cúní Jesucristo jáchi sahá ña cán najácau a yehe. <sup>13</sup> Candehé ndo ñani i, na cúú cuéntá Jesús. Co cúní cachi i ña sa nanduu u tá quiahva cúní mé á. Ña cája ndusa i queá ndíndójó i sahá ña nasacaja i jihna ta ndíhi ini i jáxinú coo i cája i ña sácú ini Ndióxi caja i. <sup>14</sup> Já caja i janda quiahva ná xinú coo i ndiquehe e ña sácú ini Ndióxi quiahva nuú i sahá ña nacaja Jesucristo. Jáchi cána Ndióxi yehe cuhun i coo i indiví xihín mé á.

<sup>15</sup> Tóco ndihi mé ndó, na sa nandindacú xihín ña cándéé ini ndó Ndióxi, xíní ñúhú cahvi ini ndó tá quiahva cáhvi ini yehe. Ta tá co cáhvi ini ndó tá quiahva cáhvi ini yehe já queá jándiyéhe Ndióxi xíní túní ndo ña ná cajii ini ndó xihín á. <sup>16</sup> Joo ndítahan nu yo caja i ña ndaa, ña coó najándacoo í cája í anda viti.

<sup>17</sup> Candehé ndo ñani i, na cúú cuéntá Jesús. Ndítahan candehé ndo ndá quiahva cája yehe ña ná caja ndó ña. Ta ndítahan

candehé ndo ndá quiahva cája java ga na sa najánaha nde jáchi nacatiahva na cája na tá quiahva cája mé nde. <sup>18</sup> Sa cuahá ndivaha tañu nacachi i ña yóho xihín ndó ta viti táhvi ticuú nuú i cáhan tucu u ña xihín ndo. Ndúu cuahá ñayivi ta cáhí na cúú ná cuéntá Jesús joo cája na tátuhun na co cándusa ña naxihí Jesucristo ndica crúxu. <sup>19</sup> Joo vaxi quiví ndihi saha ná anda ama cáa quiví sahá ña núu cája na jáchi a juú quiahva ndíhi ini ná sahá ña xíxi na. Ta ndíñehe jícó na mé ná sahá ña núu cája na ta chí coó a cácahan nuu ná. Ñaha ñuyiví yóho cuití va cáhvi ini na saha. <sup>20</sup> Joo mí cúú yó ñayivi cuéntá Ndióxi, na canduu indiví xihín mé á. Ta ndáti tiahva i ña quixi Jesucristo, xitoho í chí indiví, mé á jácau mí. <sup>21</sup> Ta ndijama mé á yiquí cuñu í, ña nacavitá já ná nduu a tátuhun yiquí cuñu mé á jáchi cáhnu ndivaha cúú á. Ta ndijama mé á mí xihín ndée a jáchi mé á sáhdá chuun nu tóco ndihi ñaha xihín ndée á.

## 4

*Xíní ñúhú cajii ini ndó xihín ña cája Ndióxi xihín ndo*

<sup>1</sup> Candehé ndo ñani mí i, na cúú cuéntá Jesús. Xíca ndivaha ini i cuni i ndohó jáchi quíhvi ini i ndohó. Ta cajii ndivaha ini i xihín ndo jáchi co cácahan nuu i saha ndo. Cúní ña ná candico ndacú ndo íchi cuéntá Jesucristo, xitoho í.

<sup>2</sup> Xíca tahví i nu Evodia xihín nu Síntique ña ná ndique táhan vaha na jáchi in quíhvi cúú ná cuéntá Jesús. <sup>3</sup> Ta xíca tahví i nu mún, da cája chúun tuun xihín i ña ná cajún ñamaní cahún xihín ndíví quiahva i jan ña ná ndique táhan máni ná. Jáchi ndíví na jan nachindeé cuahá na yehe tá naxica nuu i nacahan i tuhun Ndióxi, mé tuhun cúú jácau ñayivi. Ta quiahva já nachindeé ri ñaní, da naní Clemente yehe. Ta java ga da cúú cuéntá Jesús nachindeé táhan na xihín i. Sa ndaa va quiví ná nu libro nu ndaa quiví tóco ndihi na catacu anda ama cáa quiví.

<sup>4</sup> Níi tiempo ndítahan cajii ini ndó xihín ña cája Ndióxi xihín ndo. Á sa xíní joho ndó. Níi tiempo ndítahan cajii ini ndó. <sup>5</sup> Ta xihín ña yóho candaá ini tóco ndihi ñayivi ña cúú

ndó ñayivi vaha ini. Sa nacayati quivi quixi tucu Jesucristo, xitoho í.

<sup>6</sup> A ndícani nahá ini ndó sahá ni in ñaha. Ña ndítahan caja ndó quéa caca tahví ndo nu Ndióxi ní tiempo ta ndicani ndó nu mé á ndaja cáa ña ndóho ndó. Caca tahví ndó nu á ta a ndíndójó ndo ndiquiahva ndó ndixahvi nu mé á. <sup>7</sup> Anda já caja Ndióxi ña ná coo vaha ini ndó ta cáhnu chága ña yóho a juú ga tóco ndihi ña cuu candaa ini ñayivi. Ta tá ná caja Ndióxi ña ná coo vaha ini ndó já quéa chindeé a ndohó já ná ndindacú ínima ndo xihín xíní túní ndo sahá ña in nanduu ndó xihín Jesucristo.

*Xíní ñúhú cahvi ini ndó caja ndó ndinuhu ña vaha*

<sup>8</sup> Jandá ña yóho cuití va cúni cahan i xihín ndo, ñani i, na cúu cuéntá Jesús. Xíní ñúhú cahvi ini ndó sahá ña ndaa ta sahá ña cuu coo toní ñúhú ndó xihín. Ta xíní ñúhú cahvi ini ndó sahá ndaja caja ndó ña ndaa. Ta xíní ñúhú cahvi ini ndó sahá ñaha vií. Ta xíní ñúhú cahvi ini ndó sahá ñaha cuu cajji íní ñayivi xihín, ña cuu cahan vaha na saha. Ta xíní ñúhú cahvi ini ndó sahá ña vaha cuu caja ndó ña ná cuu caja cáhnu ñayivi Ndióxi saha.

<sup>9</sup> Caja ndó tóco ndihi ña najánaha i nu ndó caja ndó. Ndítahan caja ndó ña naxini johó ndó nacahan i xihín ña naxini ndó nacaja i. Ta ná coo Ndióxi xihín ndo ta mé á quéa caja ña ná coo vaha ini ndó.

*Na cúu cuéntá Jesús ndúu ñuu Filipos chindeé na Pablo*

<sup>10</sup> Cájji ndivaha ini i ta ndíquiahva i ndixahvi nu Jesucristo, xitoho í jáchi nandicuhun tucu ini ndó sahá i. Co cúni cachi i ña sa nandindójó ndó sahá i, vaha. Ña cúni i cachi i quéa co núná nu ndo chindeé ndó yehe. <sup>11</sup> Co cahan i ña yóho xihín ndó sahá ña ndímaní ñaha nuú i jáchi sa nacatiahva i cájji íní i xihín ña ín nuú i. <sup>12</sup> Sa xíní coo ndáhví ndivaha i ta sa xíní i coo cuahá ndivaha ñaha nuú i. Nacatiahva i coo ndéé ini i nu tóco ndihi ña quixi nuú i. Sahá ña cán quéa ín vaha ini i vatí ín cuahá ña cuxu u á coó a. Ta vatí yójó ñaha nuú i á ndímaní ña nuú i ín vaha ini i. <sup>13</sup> Sahan ndéé ini i nu tóco ndihi ña quixi nuú i jáchi Jesucristo quéa chindeé a yehe caja i ña.

<sup>14</sup> Joo vaha nacaja ndó jáchi nachindeé ndó yehe tá nandoho ini i sahá ña nandimaní nuú i.

<sup>15</sup> Sa xíní ndó ña in túhún mé ndó, na cúu cuéntá Jesús ndúu ñuu Filipos jan cúu ndó na nachindeé yehe tá naquee e cuahan i chí Macedonia cahan i tuhun Ndióxi, ña cuu jácacu ñayivi. Ta nacaja ndó ña yóho jáchi nacamaní ndó yehe sahá ña nachindeé e ndohó xihín tuhun Ndióxi. <sup>16</sup> Jáchi tá nasahiin i ñuu Tesalónica cán já nachindahá ta nachindahá ndó ñaha nandimaní nuú i. Ta a juú in tañu cuití va nacaja ndó ña. <sup>17</sup> Co cahan i ña yóho xihín ndo sahá ña cúni ñehe cuití vi ñaha. Ña cúni quéa ná chahvi Ndióxi sahá ñamaní nacaja ndó. <sup>18</sup> Ta viti coó ga ñaha ndímaní nuú i. Jandá yójó johó a nuú i viti xihín tóco ndihi ña nachindahá ndó xihín Epafrodito ñehe da naquixi da nuú i yóho. Tóco ndihi ña nachindahá ndó nuú i yóho cúu á ña cájji ndivaha ini Ndióxi xihín. Cúu á tátuhun jóco ndó in ña támi sahan nu mé á. <sup>19</sup> Ta Ndióxi, mé a cája cáhnu i chindeé a ndohó ná a ndímaní ga ni in ñaha nu ndo. Jáchi cuahá ndivaha ña cuicá cómi Ndióxi ta quiahva mé á ña nu ndo sahá ña cúu ndó cuéntá Jesucristo. <sup>20</sup> Cáhnu ná cacuu Ndióxi, tátá yo anda ama cáa quivi. Já ná coo.

*Ndíndayí Pablo na cúu cuéntá Jesús*

<sup>21</sup> Sahá ña in cúu yó cuéntá Jesucristo chindahá i Ndióxi coo tóco ndihi na cúu cuéntá mé á cán. Ta ñaní, na cúu cuéntá Jesús ndúu xihín i yóho chindahá na Ndióxi coo ndó. <sup>22</sup> Ta jári java ga na cúu cuéntá Ndióxi ndúu chí yóho chindahá na Ndióxi coo ndó. Ta na chindahá chága ví Ndióxi coo ndó cúu na cája chúun vehe da cómi cuéntá sahá ñuu Roma.

<sup>23</sup> Ná caja Jesucristo, xitoho í cuahá ñamaní xihín tóco ndihi ndó. Já ná coo.

## Carta nachindahá Pablo nuú na cúu cuéntá Jesús ñuu Colosas

*Chindahá Pablo Ndióxi coo na cúu cuéntá Jesús ñuu Colosas*

<sup>1</sup> Yehe cúu Pablo, da nandicaxi Ndióxi cacuu u apóstol cuéntá Jesucristo. Ta yóho íin Timoteo, ñaní, da cúu cuéntá Jesús. <sup>2</sup> Chindahá nde carta yóho nu ndo, na cúu cuéntá Ndióxi ndúu ñuu Colosas jan. Jáchi cúu ndó na cúu cuéntá Jesucristo, na cándeé cáhnu ini mé á. Ña cúní nde queá ná caja cuaha Ndióxi, tátá yo ñamaní xihín ndo ta ná caja ña ná coo vaha ínimá ndo.

*Xíca tahví Pablo sahá na cúu cuéntá Jesús cán*

<sup>3</sup> Ní tiempo ndíquiahva nde ndixahvi nu Ndióxi, mé a cúu tátá Jesucristo, xitoho í tá xíca tahví nde nu mé á saha ndo. <sup>4</sup> Jáchi sa ñañehé nde tuhun ña cándeé ini ndó Jesucristo ta ñañehé nde tuhun ña quíhvi ini ndó tóco ndihi na cúu cuéntá mé á. <sup>5</sup> Ta cája ndó ña yóho jáchi sa ñacandaa ini ndó ña ndaa sahá Jesucristo ta ndáti ndó ndiquehe ndó ña quiahva Ndióxi nu ndó indiví. Ta janda naní naxini johó ndó tuhun vaha cáhan sahá Jesucristo já ñacasáhá cúní ndó cuhun ndó indiví. <sup>6</sup> Mé tuhun vaha naxini johó ndó sahá Jesucristo yóho ñacasáhá ndícuíta nuu a nuú ñayivi ta cuahá na sa cándúsa ña ndijáá ní cúu saha ñuyíví. Ta tóco ndihi na cán cája na tá quiahva ñacaja mé ndó tá naxini johó ndó ña quíhvi ini Ndióxi ndohó ta já ñacandaa ini ndó ña mé a ndaa táhyí quíhvi ini Ndióxi ndohó. <sup>7</sup> Ña yóho queá najánaha da naní Epafra nu ndo. Mé a ndaa quíhvi ini nde da jáchi in cúu da cája chúun da xihín nde ta mé a ndaa ñacaja chúun da nu mé ndó xihín ndinuhu ini da tá najánaha da ndohó tuhun Ndióxi. <sup>8</sup> Ta tá ñaxixi da yóho já ñacaxi tuhun da xihín nde ña cája ínimá yíi Ndióxi ña quíhvi ini ndó na cúu cuéntá Jesús.

<sup>9</sup> Ta janda naní ñacandaa ini nde sahá ña cája ndó já ñacasáhá xíca tahví nde nu Ndióxi saha ndó ndijáá ní quívi. Ta xíca

tahví nde nu á ña ná naha nu ndo ña cúní mé á caja ndó. Ta xíca tahví nde nu á ña ná quiahva mé á ndaja táhan ña ndíchí nu ndo ta ná caja mé á ña ná candaa ini ndó tóco ndihi ñaha cuéntá mé á. <sup>10</sup> Já queá ná cuu caja ndó tá quiahva ndítahan caja ndó jáchi cúu ndó ñayivi cómí Ndióxi cuéntá saha. Ní tiempo xíní ñuhú caja ndó ña cáji ini mé á xihín. Ta quiahva já xíní ñuhú ñaha ndó ña cája tá cája ndó ña vaha xihín ñayivi ta quiahva já xíní ñuhú candaa chága ini ndó saha Ndióxi. <sup>11</sup> Ta quiahva já xíca tahví nde nu Ndióxi ña ná ndaja ndacu a ndohó xihín ndeé cáhnu ndivaha mé á já queá cuu caja ndeé ini ndó ta já a ndíhi ini ndó tá ná quixi cuahá tondohó nu ndo. Ta cáji ini ndó <sup>12</sup> ndiquiahva ndó ndixahvi nu Ndióxi jáchi ñasacu tiahva mé á ndohó ña ná ndiquehe ndó ña ñasacu ini mé á quiahva nu tóco ndihi na cúu cuéntá mé á tá ná xinu coo na nu yehe ndivaha nuú cacomí mé á cuéntá saha ná. <sup>13</sup> Ñasanduu yó nuú ñaá ndivaha ta cán ñatavá Ndióxi mí ndáha ña quini ta nandiquiahva mé a mí ndáha Jesucristo, jahyi máni á ña ná cacomí a cuéntá saha yo. <sup>14</sup> Ta mé Jesucristo najácacu a mí tá ñaxihí a ndíca crúxu ta ñacaja cáhnu ini a sahá cuachí.

*Jesucristo cúu á jini nu tóco ndihi ñaha*

<sup>15</sup> Ta Jesucristo cúu yuhú nuu Ndióxi, ña a cúu cuní tívi ta janda tá cámaní casáhá cavaha Ndióxi ñuyíví yóho sa íin jahyi a, Jesucristo. <sup>16</sup> Ta sa mé Jesucristo ñacavaha tóco ndihi ñaha ndúu ñuyíví yóho xihín ña ndúu indiví. Ta mé á ñacavaha tóco ndihi ña xíní xihín nuu yo xihín ña a cúu cuní. Ta ñacavaha mé á tátó Ndióxi, ña cómí chuun cuéntá Ndióxi ta ñacavaha java ga tátó a, na íin cuaha ndeé cahnda chuun. Tóco ndihi ña yóho ñacavaha Jesucristo ña ná cacuu a ñaha mé á. <sup>17</sup> Ta sa íin va mé á tá cámaní cavá sahá saha tóco ndihi ñaha ta cája mé á ña ná cuu canduu tóco ndihi ñaha indiví xihín ñuyíví. <sup>18</sup> Ta cúu á jini nu tóco ndihi na cúu cuéntá mé á, na cúu tátuhun yiquí cuñu a. Ta mé a cán caja ña ná ndíhvi ñayivi íchi mé á catacu na xihín ndeé a jáchi anda saha ñasahjin mé á ta jihna ñuhú nanditacu tucu a tañu na sa ñaxihí. Ta xihín ña yóho ñaxinu coo a ñanduu a jini nu

tóco ndihi ñaha. <sup>19</sup> Tá quiahva cáa Ndióxi quiahva cáa ri Jesucristo jáchi já cúní Ndióxi coo. <sup>20</sup> Ta cúní ri Ndióxi ndique táhan máni tucu a xihín tóco ndihi ña nacavaha. Ña cán queá naxihí Jesucristo ndica crúxu já ná cuu ndique táhan máni tóco ndihi ña ndúu ñuyíví xihín indiví xihín Ndióxi.

<sup>21</sup> Mé ndó nasanduu xíca ndo nu Ndióxi ta naxini ihví ndó a jáchi ndinuhu ña núu nasacahvi ini ndó caja ndó, nduu. Joo viti najándique táhan máni Ndióxi ndohó xihín mé á <sup>22</sup> sahá ña nacaja Jesucristo, jahyi a tá naxihí yiquí cuñu a ndica crúxu. Já nacaja mé á ña ná cuu xinú ndó canduu vií ndó nu á. Ta nandiquiahva mé á ndohó ndáha Ndióxi já ná cacuu ndó ñayivi vií, na coo ga cuachi nu á. <sup>23</sup> Joo xíní ñúhú candeé cáhnu ini ndó Jesús ta a jándacoo xóo ndó ña ndáti ndó quiahva Ndióxi nu ndo. Jáchi tá naxini johó ndó tuhun vaha sahá Jesucristo já nacandaa ini ndó ña cuu jácaacu a ndohó. Ta sa mé tuhun yóho ndícuíta nuu ndijáá níí cúu sahá ñuyíví ta yehe cúu da chindeé táhan jándicuíta nuu a nuú ñayivi.

### *Cája chúun Pablo cuénta na cúu cuénta Jesús*

<sup>24</sup> Ta viti cájii ini i jáchi ndóho ini i sahá ndo ta ña cája i queá jáxinu coo i ña nasacu ini Jesucristo ndoho i sahá na cúu cuénta mé á, na cúu tátuhun yiquí cuñu a. <sup>25</sup> Nandaja Ndióxi yehe ña ná nduu u in da caja chúun nuú na cúu cuénta Jesús. Jáchi nasahan mé á chuun yóho nuú i ña ná chindeé e ndohó sahá ña jánaha cáxi i tuhun Ndióxi nu ndo. <sup>26</sup> Ta janda tá nacava sahá sahá ñuyíví nasahiin jehé a nuú ñayivi joo viti najánaha Ndióxi nuú na cúu cuénta mé á ña nasahiin jehé jihna. <sup>27</sup> Ta viti sácú ini Ndióxi nahá nuú na cúu cuénta mé á ndá quiahva náhnu ñamaní cúní caja mé á xihín na tóho. Ta ña nasahiin jehé cúu ña yóho: ndácaan Jesucristo ini ínimá ndo ta xihín ña yóho vaxi quívi ndicáhnu ndó xihín mé á.

<sup>28</sup> Cáxi tuhun nde nuú ndihi ñayivi sahá Jesucristo. Ta jácahan nde na ña ná a cája na cuachi. Ta xihín ndinuhu ini nde jánaha nde nu ná ña ndítahan caja na já ná nduu na ñayivi ndaa nu Ndióxi sahá ña nacaja Jesucristo. <sup>29</sup> Ta ña yóho cúu chuun ndúcú ndéé

e caja i xihín ndéé cáhnu sahan Jesucristo nuú i.

## 2

<sup>1</sup> Cúní ña ná candaa ini ndó ña ndúcú ndéé e xíca tahví i nu Ndióxi sahá ndó xihín sahá na cúu cuénta Jesús ndúu ñuu Laodicea. Ta quiahva já ndúcú ndéé e xíca tahví i nu Ndióxi sahá na cúu cuénta Jesús, na a ñaha cuni táhan xihín i. <sup>2</sup> Ndúcú ndéé e xíca tahví i nu Ndióxi sahá ná já ná ndihvi ndéé Ndióxi ini ínimá na ta in ná nduu na sahá ña quíhvi ini táhan na. Ta xíca tahví i nu Ndióxi ña ná candaa vaha ini ná ña ndaa sahá Jesucristo, ña mé a ndaa ndiyahvi ndivaha. Jáchi ña nasahiin jehé jihna najánaha Ndióxi nu ná viti ta ña yóho cúu Jesucristo. <sup>3</sup> Ta mé Jesucristo cándaa ini a tóco ndihi ñaha. Cándaa ini a ndía queá ña núu ta ndía queá ña vaha ta cúní mé á ña ná candaa ri ini mé ví ña jan. <sup>4</sup> Cáxi tuhun i ña yóho xihín ndó ná a jándahvi inga na ndohó jáchi ndúu java na ta ndató ndivaha cáhan na joo cúu ná na jándahvi ñayivi. <sup>5</sup> Ta vatí coo íin mí i xihín ndo nu ndúu ndó jan joo ñúhu ini i sahá ndo níí tiempo. Ta cájii ini i tá xíní i ña ndúu vií xihín táhan ndó. Ta cájii ini i sándehe e ña coo jándacoo ndó ña candeé ini ndó Jesucristo.

<sup>6</sup> Tá nandiquehe ndó íchi cuénta Jesús já nanduu mé á xitoho ndó. Ta viti ndítahan nu ndó caca nuu ndó xihín á ndijáá níí quívi. <sup>7</sup> Xíní ñúhú cativi tuun ndó Jesucristo já ná quiahva mé á ndéé á nu ndo. Xihín tuhun Ndióxi ña najánaha nde nu ndó jan ndítahan candeé chága ini ndó Jesucristo. Ta ná a jándacoo ndó ña ndíquiahva ndó ndixahvi nu mé á.

### *Íchi saá xíca í viti*

<sup>8</sup> Cuénta coo ndó ná a jándahvi na ndohó xihín ña tuhún cúní na jánaha na nu ndo. Jáchi nahá ña quíxi a nu Ndióxi joo cúu á ña quíxi jiní mé va na cuití va. Ta cáhan na sahá ña jánaha ñayivi ñuyíví ta coo cúu á ña jánaha Jesucristo nu yo.

<sup>9</sup> Tá quiahva cáa Ndióxi quiahva já cáa Jesucristo vatí nanduu a in ñayivi. <sup>10</sup> Ta nandicutú ndaa mé ndó xihín mé á jáchi in nanduu ndó xihín Jesucristo, mé a sáhdá chuun nu tóco ndihi na cómi cuénta sahá

indiví xihín ñuyiví yóho. <sup>11</sup> Ta sahá ña in nanduu ndó xihín Jesucristo sahá ña cán quea nanduu ndó ñayivi cuéntá mé á ta cúu á tátuhun nachicaan Ndióxi marca ndohó ta co cúu á tátuhun marca chicaan ñayivi yiquí cuñu na. Ña cája Jesucristo quea jácaxoo a mí nuú cuachí já quea ná a cája ga yó ña. <sup>12</sup> Jáchi tá nacandúta ndo cuéntá Jesucristo já nasacuu a tátuhun naxihí ndó ta nanduxu ndó xihín Jesucristo jáchi najándacoo ndó cuachi nacaja ndó. Ta tá nanditacu mé á nasacuu a tátuhun nanditacu ri mé va ndó xihín á sahá ña cán quea cúu ndó ñayivi saá viti jáchi nacandee ini ndó ña íin ndée Ndióxi caja ña ná nditacu Jesucristo. <sup>13</sup> Jihna nasacuu ndó tátuhun ndii sahá cuahá cuachi nacaja ndó ta sahá ña coó naxeen ndó caja ndó ña sáhdá Ndióxi. Ta nasacaja ndó tá quiahva cúni mé va ndó jáchi nasacomí cuachi cuéntá saha ndo. Joo viti nacaja Ndióxi ña ná ñehe táhvi ndó catacu ndó xihín Jesucristo ta nacaja cáhnu ini a saha tóco ndihi cuachi ndó. <sup>14</sup> Nasacomí yo cuachi nu Ndióxi jáchi naquehe núu í ña nasahnda mé á caja í. Ta ndacaan cuachi jata yó nacaja ley joo najándoo Ndióxi cuachí tá naxihí Jesucristo ndica crúxu saha yo. <sup>15</sup> Ta tá naxihí a ndica crúxu já naquee vaha mé á xihín tiñahá sacuahá ta naquee vaha mé á xihín rí quini, rí sáhdá chuun nuú ñayivi ñuyiví. Ta sahá ña najacacahan Jesús nuu ri nuú ñayivi sahá ña cán quea a cuú chinúu ga rí cuachi jata yó viti. Xihín ña nacaja Jesucristo yóho najánaña Ndióxi nu yo ña a cuú ga caja tiñahá sacuahá ni in ñaha xoho.

### *Ndítahan ndinducú yo ñaha íin indiví*

<sup>16</sup> A quehe ndó cuéntá sahá ñayivi tá ná candehé ndaa na ndohó sahá ña xíxi ndó á sahá ña xíxi ndó. Ta ni a quehe ndó cuéntá tá sáhdé ndaa na ndohó sahá ña co cája ndó víco cája mé ná ta ni sahá ña co cája ndó víco quiví cája cáhnu na yoó saá. Ta ni a quehe ndó cuéntá tá sáhdé ndaa na ndohó sahá ña co cája cáhnu ndó quivi ndiquehe ndee na. <sup>17</sup> Sanahá tá cámaní cacu Jesucristo já nasahnda Ndióxi chuun nuú ñayivi ña ná caja na ley Moisés joo coó chuun a viti jáchi sa najáxinu coo Jesucristo tóco ndihi ña nasahnda ley Moisés. <sup>18</sup> A

cándúsa ndó ñayivi tá cáchí na xihín ndó ña cuhun ndó indayá sahá ña co cája ndó ña cáchí mé ná. Caja cáhnu na táto Ndióxi ta sahá ña jan ndája tohó ndivaha na mé ná. Ta cáchí na nacahan tívi Ndióxi xihín ná sahá ña cán quea ndíñehe jícó ndivaha na mé ná. Xíní túni na yóho cúu á xíní túni ñayivi ñuyiví cuití va. <sup>19</sup> Jáchi co xíca tuun na jan xihín Jesucristo, mé a cúu jiní nu mí. Mé á sahan ndee á nu yo cuahnu í ta jándique táhan mé á mí xihín á tá quiahva nasacu ini Ndióxi.

<sup>20</sup> Tá naxihí Jesucristo ndica crúxu já cúu á tátuhun naxihí ndó nuú cuachi, jáchi co cómi ga ñaha ñuyiví yóho cuéntá saha ndó viti. Sahá ña cán quea co ndítahan nu ndó caja ndó tá quiahva cája ñayivi ñuyiví yóho. Co ndítahan caja ndó ña cáchí na xihín ndo tátuhun ña yóho: <sup>21</sup> “A tীন toho ndó ña jan. A cáxi toho ndó ña cáa. A cáni ndaa ndáha ndó ña yóho”, cáchí na xihín ndó. <sup>22</sup> Tóco ndihi ña yóho ndihi saha. Tóco ndihi ña cája na yóho cúu á ña sáhdá ñayivi ñuyiví cuití va ta co cúu á ña naquixi nu Ndióxi. <sup>23</sup> Jáchi tóco ndihi ña jánaña na jan cúu á ña quíxi jiní mé va na vatí ndáa na tátuhun na ndíchí jiní. Ta jánaña na ña ndítahan caja cáhnu ñayivi Ndióxi xihín costumbre nacavaha mé va na. Ta náha na tátuhun ñayivi tohó joo ndíñehe jícó na mé ná. Ta jánaña na ña xíní ñúhú jándoho í yiquí cuñu í joo coó saha toho ña yóho jáchi co chindee a mí jándihi sahá ña xíca ini yiquí cuñu í caja.

## 3

<sup>1</sup> Tá nanditacu Jesucristo tañu na sa naxihí cúu á tátuhun nanditacu ndó xihín mé á. Sahá ña cán quea xíní ñúhú ndinducú ndo ñaha cúu cuéntá Ndióxi, mé ñaha quíxi indiví nu íin coo Jesucristo xoo cuaha Ndióxi. <sup>2</sup> Xíní ñúhú cáhvi ini ndó sahá ñaha cúu cuéntá Ndióxi ta co xíní ñúhú ndicani ini ndó sahá ñaha ñuyiví yóho. <sup>3</sup> Jáchi mé ndó cúu ndó tátuhun na sa naxihí tá naxihí Jesucristo. Sahá ña cán quea co xíní ñúhú ndiava ini ndó cacomí ndó ñaha ñuyiví yóho jáchi cuhun ndó coo ndó xihín Jesucristo indiví nu íin Ndióxi. <sup>4</sup> Ta sahá ña nacaja Jesucristo sahá ña cán quea tácu yo viti ta tá ná canáha nuu Jesucristo ñuyiví yóho já ndacanáha nuu ndó xihín á. Tá

quiahva ndiyehe ndivaha mé á quiahva já ndiyehe ri ndóhó va ta ndicáhnu ndó xihín mé á.

*Jihna naxica í ichí cuachi joo viti xica í ichí saá*

<sup>5</sup> Ndítahan jácaxoo ndó nuú cuachi, ña cajú ñayivi ñuyíví. Coto a cóo ndó xihín ñayivi, na co cúu ñájíhí ndó á yíi ndó. Ta ni a cajú ndó ña núu xihín yiquí cuñu ndó ta ni a cajú ndó ña núu, ña xica ini yiquí cuñu ndó cajú. Ta ni a chínúu ndó ínima ndó jatá jjuhún ndó jáchi cúu ndó tátuhun na cajú cáhnu yoco tá cajú ndó já. <sup>6</sup> Jáchi vaxi quíví jándoho Ndióxi ini na cajú ña yóho sahá ña co xéén na cajú na ña cúní Ndióxi. <sup>7</sup> Ta janda mé ndó tá naxica nuu ndó ichí cuachi já nacaja ndó ña jan. <sup>8</sup> Joo viti xíní ñúhú jándacoo ndó tóco ndihi ña jan: a cójo ga ini ndó xihín ñayivi ta ni a cajú ga ndó ña xica ini yiquí cuñu ndó cajú ta a cajú ga ndó ña núu ta ni a cáhahá ga ndó xihín ñani táhan ndó ta a cáhan ga ndó tuhun quini. <sup>9</sup> Ta a cáhan túhún xihín táhan ndó jáchi co cúu ga ndó na nasacuu ndó jihna ta tóco ndihi ña núu nasacaja ndó jihna jan co cómí ga cuéntá saha ndó viti. <sup>10</sup> Jáchi viti sa nanduu ndó ñayivi saá, na loho loho ndivií chága ínima na cajú Ndióxi janda quiahva ná xinu coo ndó nduu ndó tá quiahva cáa Jesucristo ta já candaá vaha chága ini ndó a. <sup>11</sup> Jáchi viti coó sahá ga á tá cúu yó na Israel á tá co cúu yó na Israel, á tá cúu yó na naquihvi marca yiquí cuñu í á tá coó naquihvi marca yiquí cuñu í, á tá cúu yó na toho á tá co cúu toho í na. Ta ni coó saha toho a á tá cúu yó na yucú ñúhú ta ni coó saha toho a á tá cúu yó na cómí xitoho cuéntá saha, á tá cúu yó na xica núná mé. Joo ña ín saha queá tá ná ndiquiahva ndó mé ndó ndáha Jesucristo ña ná cacomí a cuéntá saha ndó jáchi tóco ndihi na cán cúu ná na ndácaan Jesucristo ínima.

<sup>12</sup> Quíhvi ini Ndióxi ndohó ta nacaxi a ndohó ña ná cacuu ndó ñayivi cuéntá mé á. Ta tá quiahva natahnda ini Ndióxi saha ndó quiahva já xíní ñúhú tahnda ini ndó sahá ñayivi. Xíní ñúhú cajú vaha ndó xihín ná. Coto a cajú cáhnu ndó mé ndó. Xíní ñúhú coo víi ini ndó xihín ñayivi ta a ndihi ini ndó xihín ná. <sup>13</sup> Xíní ñúhú coo cáhnu ini xihín táhan ndó. Ta cajú cáhnu ini saha táhan ndó

tá yaha nu cajú xihín táhan ndó. Tá quiahva nacaja Jesucristo, xitoho í tá nacaja cáhnu ini a saha ndó quiahva já ndítahan cajú cáhnu ini saha táhan ndó. <sup>14</sup> Xíní ñúhú ndicutú ndaa ndó xihín ña quíhvi ini táhan ndó já queá ná cuu canduu in nuú xihín táhan ndó ta já a cúu cahnda java táhan ndó. <sup>15</sup> Ta ná cajú Ndióxi ña ná coo vaha ini xihín táhan ndó já ná cajú ndaa ndó xihín ná. Jáchi nasacu ini mé á ña ná cajú ndó já ta nacaxi a ndohó nduu ndó tátuhun yiquí cuñu a. Ta ndítahan ndiquiahva ndó ndixahvi nu Ndióxi ní tiempo.

<sup>16</sup> Ta ná ndicutú ndaa ínima ndó xihín tuhun vaha cáhan sahá Jesucristo. Ta xihín tuhun yóho xíní ñúhú jánahá táhan ndó ta xíní ñúhú quiahva tuhun ndeé ini táhan ndó ña ná candaá vaha ini ndó ña. Ta xihín ndinuhu ini ndó xíní ñúhú ndiquiahva ndó ndixahvi nu Ndióxi. Cata ndó salmo xihín himno xihín canto ña sahan ínima yíi Ndióxi nu ndó. <sup>17</sup> Ta tóco ndihi ña cajú ndó xíní ñúhú cajú ndó ña cuéntá Jesucristo, xitoho í. Ta xíní ñúhú ndiquiahva ndó ndixahvi nu Ndióxi, tátá yo sahá ña nacaja Jesucristo, xitoho í.

*Ndá quiahva ndítahan canduu na cúu cuéntá Jesús*

<sup>18</sup> Ndóhó, najihí ndúu yíi, xíní ñúhú coo johó ndó nu cáhan yíi ndó xihín ndó jáchi já ndítahan cajú najihí, na cúu cuéntá Jesús. <sup>19</sup> Ta jári ndóhó, dataa, xíní ñúhú quíhvi ini ndó ñájíhí ndó ta co ndítahan cajú ndó ndaja nacuu xihín ná. <sup>20</sup> Ta jári ndóhó va, na valí xíní ñúhú taa johó ndó tóco ndihi ña sáhdá tátá náná ndó nu ndó jáchi ña yóho queá cáji ini Ndióxi xihín. <sup>21</sup> Ta jári ndóhó va, na ndúu jahyi, a jácojo quini ndó ini jahyi ndó já queá ná a cávitá ini na cajú na ña vaha. <sup>22</sup> Ta ndóhó, na naxeen xitoho cajú chún un va ndó, xíní ñúhú cajú ndó tóco ndihi ña sáhdá xitoho ndó, na ndúu ñuyíví yóho nu ndó. Ta a juú tá ndíta cuití na sádehé na nu cajú chún ndó sahá ña cúní ndó candoo vaha ndó nuú na cúu xitoho ndó cán. Ña xíní ñúhú cajú ndó queá cajú chún ndó xihín ndinuhu ini ndó nu ná jáchi cúu ndó na cajú cáhnu Ndióxi. <sup>23</sup> Ndítahan cajii ini ndó cajú ndó tóco ndihi ñaha. Ta ndicuhun ini ndó ña nu Ndióxi

caja ndó ña ta co cúu á nuú ñayivi cuití va. <sup>24</sup> Jáchi sa cándaã ini ndó ña चाहवि Jesucristo nu ndó saha tóco ndihi ña caja ndó. Ta ñehe táhvi ndo cuhun ndo indivi jáchi cája cáhnu ndó Jesucristo, mé á cúu ndusa xitoho ndó. <sup>25</sup> Joo ndá na cája ña núu tandaa quivi ndoho ini na sahá ña núu naçaja na jáchi caja Ndióxi ña ná चाहवि in in na sahá ña naçaja na.

#### 4

<sup>1</sup> Ta jári ndóhó va, na cúu xitoho co ndítahan jándoho nahá ndó na naxeen ndó caja chúun nu ndó jan. Ndítahan caja vaha ndó xihin ná jáchi vaxi quivi ndiquiahva ri ndóhó va cuéntá nuú Ndióxi, xitoho ndó, ña in indivi.

<sup>2</sup> A jándacoo ndó caça tahví ndó nu Ndióxi xihin ndinuhu ini ndó. Ta ndítahan co tiahva vaha ndó ndiquiahva ndó ndixahvi nu mé á. <sup>3</sup> Caça tahví ndó nu Ndióxi sahá nde ña ná cuná mé á íchi nuú nde cahan nde tuhun vaha sahá Jesucristo, mé tuhun nasahin jehé anda viti. Ta saha mé ña yóho ndácaan i vecaa viti. <sup>4</sup> Caça tahví ndó nu Ndióxi ña ná cuu cahan cáxi i tuhun Ndióxi nuú ñayivi tá quiahva ndítahan nuú i caja i.

<sup>5</sup> Co ndítahan caja ndó ña yóho á ña cá nuú na co cúu cuéntá Jesús. Ta xini núhú ndihi ini ndó cahan ndó tuhun Ndióxi xihin ná. <sup>6</sup> Tóco ndihi ña cahan ndó xini núhú cacuu a ña vaha, ña cuu cajii ini Ndióxi xihin. Ta xini núhú candaã ini ndó ndaja caja ndó nducú ñehe vaha ndó tuhun nuú ñayivi.

#### *Ndíndayí Pablo na ndúu ñuu Colosas*

<sup>7</sup> Chindahá i da naní Tíquico nu ndó jan já ndicani da sahá i nu ndó. Mé da cúu ñani máni yo ta xihin ndinuhu ini da in cúu dá caja chúun da xihin i. <sup>8</sup> Chindahá i da saa da nu ndo já ná çaxi tuhun da xihin ndo ndá quiahva ndóho nde yóho. Ta chindahá i da já ná quiahva da tuhun ndeé ini ndó. <sup>9</sup> Ta chindahá ri ñani máni yo Onésimo, da ndíco cáhnu íchi cuéntá Jesús cuahan xihin dá ta mé Onésimo yóho cúu da ñuu ndó jan. Ta mé dá xihin Tíquico çaxi tuhun da nu ndó ndaja cándo nde janda viti.

<sup>10</sup> Aristarco, da ndácaan vecaa xihin i chindahá da Ndióxi coo ndó. Ta jári Marcos, da cúu ñani cuachí Bernabé chindahá

da Ndióxi coo ndó. Ta sa naçaxi tuhun i xihin ndo ndá quiahva ndítahan caja ndó xihin Marcos tá ná saa da coto nihni da ndóhó. Xini núhú ndiquehe vaha ndó da.

<sup>11</sup> Ta jári da naní Jesús, da naní tucu Justo chindahá da Ndióxi coo ndó. Janda ndihuni na yóho cuití va cúu na cuéntá Jesús, na naquixi chichi Israel caja chúun na xihin i tá xica nuu nde cahan nde nuú ñayivi ña cómi Ndióxi cuéntá saha ná. Ta mé a ndaa nachindeé cuaha ndihuni na cán yehe. <sup>12</sup> Ta jári Epafras, da ñuu ndó jan chindahá da Ndióxi coo ndó. Mé da cán cúu dá da caja chúun cuéntá Jesucristo. Ta ní tiempo xica tahví da nu Ndióxi saha ndó xihin ndinuhu ini da já ná candita ndacú ndó ta ná ndiquiahva ní ndo mé ndó caja ndó ña cuni Ndióxi. <sup>13</sup> Ta xini i xihin nuú i ndá quiahva ndihi ini Epafras xica tahví da nu Ndióxi saha ndo ta sahá na cúu cuéntá Jesús ndúu ñuu Laodicea xihin na ndúu ñuu Hierápolis viti. <sup>14</sup> Lucas, da cúu doctor maní yo chindahá da Ndióxi coo ndó. Ta jári Demas chindahá da Ndióxi coo ndó.

<sup>15</sup> Caahan Ndióxi ndó xihin na cúu cuéntá Jesús, na ndúu ñuu Laodicea ta cahan Ndióxi ndó xihin ña naní Ninfas ta xihin tóco ndihi na cúu cuéntá Jesús táca vehe ña. <sup>16</sup> Ta tá nandihí naçahvi ndó carta yóho caja ndó ñamaní chindahá ndó ña ná cuhun a nuú na cúu cuéntá Jesús, na ndúu ñuu Laodicea ña ná cahvi ri na cán va ña. Ta jári ndítahan nu ndó cahvi ndó carta ña nachindahá i nuú na cán. <sup>17</sup> Ta caja ndó ñamaní çaxi tuhun ndó nu Arquipo ña xini núhú ndihi ini da caja chúun vaha da chuun nasahan Ndióxi nu dá caja da.

<sup>18</sup> Ta yehe, da cúu Pablo cáhyi i java tuhun yóho nu ndó xihin ndahá i ña ná chindahá i Ndióxi coo ndó. Xini núhú ndicuhun ini ndó ña ndácaan i vecaa. Ta ña cuni quea ná caja cuaha Ndióxi ñamaní xihin ndo. Já ná coo.

## Carta nu cuití naçahyí Pablo nuú na cúu cuéntá Jesús ñuu Tesalónica

*Pablo xihín da xíca xihín dá chíndahá da Ndióxi coo na cúu cuéntá Jesús ñuu Tesalónica*

<sup>1</sup> Yehe cúu Pablo, da cáhyí carta yóho xihín Silvano xihín Timoteo ta chíndahá i ña nuú ndihi ndó, na cúu cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. Ná caja Ndióxi, tátá yo xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaha ini ndó.

*Cándeé cáhnu ini na Tesalónica Jesús*

<sup>2</sup> Já cuití ndíquiahva nde ndixahvi nu Ndióxi sahá ndihi ndó. Ta co ndíndójó nde xíca tahví nde nu mé á saha ndo. <sup>3</sup> Ndíquiahva nde ndixahvi nu Ndióxi, tátá yo saha ndo jáchi cándeé cáhnu ini ndó mé á. Ta sahá ña quíhvi ini ndó mé á sahá ña cán queá cája chúun vaha ndó cuéntá mé á. Sahá ña cándeé ini ndó Jesucristo ña quixi tucu a ñuyiví yóho sahá ña cán queá cája ndeé ini ndó tá ndóho ini ndó. <sup>4</sup> Cuni johó vaha ndó, ñani mí i, na cúu cuéntá Jesús. Sa xíní nde ña quíhvi ini Ndióxi ndohó ta naçaxi a ndohó cacuu ndó cuéntá mé á. <sup>5</sup> Tá naçaxi tuhun nde tuhun vaha sahá Jesús nu ndo a juú tuhun uun naçahan nde xihín ndo. Naçahan nde mé tuhun xihín ndeé ña naçahan ínimá yíi Ndióxi nuú nde. Ña cán queá sa xíní ndo ña ndaa cuití va naçahan nde xihín ndo. Ta sa xíní vaha ndó ña naçaja ndaa nde tá naçanduu nde xihín ndo jáchi cúní nde chindeé nde ndohó.

<sup>6</sup> Andá javí naçasahá ndó cája ndó ña naçaja mé nde xihín ña naçaja Jesucristo. Jáchi nandiquehe vaha ndó ña najánaha nde nu ndo. Ta vatí nandoho ndivaha ini ndó joo naçavatá ndo naçaja ínimá yíi Ndióxi. <sup>7</sup> Ta tá nandihí nanduu ndó na jánaha nu tóco ndihí na cúu cuéntá Jesús, na ndúu estado Macedonia xihín estado Acaya ña ndítahan caja na. <sup>8</sup> Ta a juú Macedonia xihín Acaya cuití va vaha jáchi ndijáá

ñuu nandicuita nuu tuhun vaha sahá Jesús naçaja ndó. Ña cán queá sa xíní tóco ndihí ñayivi ña cándeé cáhnu ini ndó Ndióxi. Ña cán queá ndá ñuu cása nde cáxi tuhun na cán nuú nde saha ndo chí co xíní ñuhú ga nde cahan nde saha ndo nu ná. <sup>9</sup> Ta viti tóco ndihí na cán cáxi tuhun na nuú nde ndaja nandiquehe vaha ndó tuhun naçahan nde xihín ndo tá naçanduu nde xihín ndó ñuu Tesalónica cán. Ta cáxi tuhun na ndaja nandijama ndó tá nandicoo ndó ña cája cáhnu ndó yoco jáchi viti cája cáhnu ndó Ndióxi cuití va. Ta cáxi tuhun na ndaja nandicoo coo ini ndó ta naçasahá ndo cája chúun ndó cuéntá Ndióxi, mé a cája ña ndaa cuití va, ña tácu a íin a indiví viti. <sup>10</sup> Ta cáxi tuhun na nuú nde ndá quiahva ndátí ndó ndicó coo Jesucristo quixi a indiví, mé a cúu jahyi Ndióxi. Ta Ndióxi najánditacu a Jesús, mé á jácaacu mí ná a ndóho ini tá ná xínu quiví caja víi Ndióxi sahá cuachi ñayivi.

## 2

*Chuun naçaja Pablo tá naçahiin da ñuu Tesalónica*

<sup>1</sup> Ta sa xíní ndihí ndó, ñani mí i, na cúu cuéntá Jesús ña coo naçasa uun va nde ñuu Tesalónica jan jáchi nandiquehe vaha ndó tuhun Ndióxi. <sup>2</sup> Joo tá cámani saa nde ñuu ndó jan sa xíní ndo ndaja naçaja xíxi na ñuu Filipos xihín nde ta naçanahá na xihín nde. Joo tá naçasa nde ñuu ndó naçahan ndeé ini nde naçaja Ndióxi já naçaxi tuhun nde tuhun vaha saha Jesús nu ndo vatí ndúu cuahá na co cúní ndehe. <sup>3</sup> Ta coo naçahan nde ña tuhún xihín ndo jáchi tuhun ndaa cuití va cúu ña najánaha nde nu ndo. Ta coo naçahvi núu ini nde ta coo najándahvi nde ndohó. <sup>4</sup> Joo naçaxi Ndióxi ndehe ta naçahnda mé á chuun nuú nde ña ná caxi tuhun nde tuhun vaha saha Jesús nuú ñayivi. Ta vatí co táhán ini ñayivi xihín ña cáhan nde joo coo nandijama toho nde ña. Jáchi Ndióxi queá sándehe ínimá yo ta táhán ini a xihín ña cáhan nde. <sup>5</sup> Sa xíní vaha ndó naçahan ndaa nde xihín ndo ta coo naçahan chíjín nde xihín ndo. Ta coo najándahvi nde ndohó sahá jihún. Joo xíní ndaa táhyí Ndióxi ña ndaa cuití va naçahan nde xihín ndo. <sup>6</sup> Ta sa xíní



vaha ndó ña ni tañu mé ndó ta ni tañu java ga ñayivi coó nandinducú nde ña ná caja cáhnu ñayivi ndehe vatí ín saha nde cahnda nde chuun nu ndo jáchi cúu nde na apóstol nachindahá Ndióxi nu ndo. <sup>7</sup> Joo nacaja vii nde xihin ndo tá quiahva ndáa vaha in ñañaáha jahyi ná. <sup>8</sup> Ta cúni ndivaha nde ndohó ña cán quéa nacaxi tuhun nde tuhun vaha sahá Jesús nu ndo. Ta ín tiahva nde quivi nde saha ndo jáchi quíhvi ini nde ndohó. <sup>9</sup> Ñani nde, na cúu cuénta Jesús, á co ndícuhun ini ndó ndá quiahva nacaja nde tá nasanduu nde xihin ndo cán. Ñuu tá ndiví nacaja chúun nde já ná cuu चाहvi nde sahá ña xíxi nde. Jáchi co cúni nde jáquihvi nde ndohó nani cáxi tuhun nde tuhun vaha sahá Jesús nu ndo.

<sup>10</sup> Ta sa xíni ndaa táhyi ndihi ndó, na cúu cuénta Jesús ña nacaja vaha nde xihin ndo ta cuu cahán ndó saha nde. Ta xíni táhyi Ndióxi ña nacaja ndaa nde xihin ndo ta nacaja vii nde xihin ndo ña cán quéa a cuú chicaan ñayivi cuachi jatá nde. <sup>11</sup> Sa xíni vaha ndó ndaja najacahan nde in in ndó ta ndaja nasahan nde tuhun ndeé ini ndó ña ná candico cáhnu ndó íchi cuénta Jesús. Tátuhun cája in dataa xihin jahyi da já nacaja nde xihin ndo. <sup>12</sup> Ta nasahnda nde chuun nu ndo caja ndó ña cúni Ndióxi jáchi cúu ndó cuénta mé á. Mé Ndióxi, mé a sáhdá chuun indiví, mé a cán quéa nacaxi a ndohó cahnda ndó chuun xihin á. Mé á cúu á in Ndióxi cáhnu ndivaha ta ndaja cáhnu mé á ndohó xihin á.

<sup>13</sup> Ña cán quéa níi tiempo ndíquiahva nde ndixahvi nu Ndióxi jáchi nandiquehe vaha ndó tuhun Ndióxi ña nacaxi tuhun nde nu ndo. Tá naxini johó ndó ña já nacandaa ini ndó ña cúu á tuhun Ndióxi ta co cúu á tuhun ñayivi ñuyívi. Ta mé a ndaa cúu á tuhun Ndióxi jáchi tá naxini johó ndó ña já quéa najándicoo ndó cuachi cája ndó sahá ña cándéé ini ndó Jesús. <sup>14</sup> Anda javí mé ñayivi ñuu ndó nacasahá na jándoho na ini ndóhó, ñani mí i ta nacaja xíxi na xihin ndó. Ta quiahva já ndoho na cúu cuénta Jesús estado Judea. Jáchi na Israel, na ndúu estado Judea nacaja xíxi na xihin ná. <sup>15</sup> Jihna nasahní java na Israel na profeta cuénta Ndióxi. Ta quiahva já nasahní

java ri na Israel Jesucristo, xitoho í. Ta viti java na Israel cája xíxi na xihin nde ta nataxí na ndehe veñuhu. Co cájii ini Ndióxi xihin ná jáchi cándají na tóco ndihi ñayivi. <sup>16</sup> Ta coó nasahan na ñamaní nuú nde caxi tuhun nde tuhun vaha sahá Jesús nuú ñayivi, na coó naquixi chichi Israel ña ná jácacu Ndióxi na. Ta sahá ña yóho nandicuahá cuachi na nu Ndióxi ta sahá ña cán quéa xójo ini a xihin ná ta viti naxinu coo hora jándoho a ini na.

### *Cúni Pablo coto nihni tucu da ñayivi ñuu Tesalónica*

<sup>17</sup> Ñani mí i, na cúu cuénta Jesús, tá nandihí naquee nde ñuu ndó jan já nandicuhun ini nde saha ndo. Ñuhu ini nde saha ndo vatí co xíni nde ndohó xihin nuú nde. Ta ndiáva ini nde ndicó coo nde ñuu ndó coto nihni nde ndohó. <sup>18</sup> Nasacu ini nde saa nde nu ndo. Ta yehe, da cúu Pablo cuahá tañu nacacúni saa i ñuu ndó joo tiñahá sacuahá nasaji nuu ri nuú i sahá ña cán quéa coó nacuu saa i jan. <sup>19</sup> Ndá saha quéa cándéé ini nde ndohó ta ndá saha quéa cájii ini nde ta ndá saha quéa coo vaha ini nde tá tandaa quívi quixi tucu Jesucristo ñuyívi yóho. Sahá ña ndico ndo íchi cuénta Jesucristo, xitoho í sahá ña cán quéa cájii ini nde. <sup>20</sup> Mé a ndaa ín vaha ini nde ta cájii ini nde cája ndó.

## 3

<sup>1</sup> Ta sahá ña cúni ndivaha i candaa ini i ndaja ndúu ndó cán sahá ña cán quéa nasacu ini i candoo in tálaá mí i ñuu Atenas. <sup>2</sup> Ta nachindahá i ñaní Timoteo, mé da cája chúun xihin nde cuénta Ndióxi cáxi tuhun da tuhun vaha sahá Jesucristo nuú ñayivi. Nachindahá i da saa da coto nihni da ndohó já quéa jácahan da ndohó ña ná coo ndacú chága ínima ndó nu Ndióxi ta ná chindeé da ndohó cándéé cáhnu chága ini ndó Ndióxi. <sup>3</sup> Jáchi cúni nde ña ná coo ndacú ini ndó ná a jándicoo ndó íchi cuénta Jesús vatí cája xíxi ñayivi xihin ndo. Jáchi sa xíni vaha ndó ña ndítahan nu yo ndóho tá ndóho ini sahá Jesucristo. <sup>4</sup> Á co ndícuhun ini ndó tá nasanduu nde xihin ndo nacaxi tuhun nde nu ndo ña vaxi quívi ndoho ini saha mé á. Ta viti sa xíni ndó ña nayaha

ñā naçahan nde xihin ndo. <sup>5</sup> Sahá ñā coó nañehé e tuhun saha ndo sahá ñā cán quea nachindahá i Timoteo nu ndo ná cañehe da tuhun saha ndó quixi a nuú i já ná candaa ini i á mé a ndaa táhyí ndíco cáhnu ndó íchi cuéntá Jesús. Jáchi nayihví i ñā jándahvi tiñahá sacuaḥa ndohó. Ta tá ná quee vaha tiñahá sacuaḥa xihin ndo, nduu já quea mé a uun quea naçahan nde tuhun Ndióxi xihin ndo.

<sup>6</sup> Joo viti chá va naquixi Timoteo yóho tá nandihí naxito nihni da ndohó jan. Ta nañeḥe dá tuhun vaha saha ndo ñā cándéé ini ndó Jesucristo ta quihví ini táhan ndó. Ta cáchi da ñā ñúhu ndivaha ini ndó sahá nde. Ta xíca ndivaha ini ndó cuni ndó ndeḥe tá quiahva xíca ndivaha ini nde cuni nde ndohó. <sup>7</sup> Cándehé ndó, ñani i. Vatí ndóho ndivaha ini nde yóho joo nasahan ndeé ini nde jáchi nañehé nde tuhun ñā cándéé cáhnu ini ndó Jesús ta ndíco cáhnu ndó íchi cuéntá mé á. <sup>8</sup> Ta nandivaha ini nde jáchi cándaa ini nde ñā ndacú ín ini ndó xihín Jesucristo, xitoho í. <sup>9</sup> Ta co ñeḥe ga nde ndá quiahva ndiquiahva nde ndixahvi nu Ndióxi saha mé ndó jáchi cájii ndivaha ini nde naçaja ndó. <sup>10</sup> Chí ñuú ta ndiví xíca tahví nde nu Ndióxi ñā ná quiahva ñamaní nuú nde saa nde coto nihni nde ndohó jáchi cúni nde xinu coo nde jánaḥa chága nde tuhun Ndióxi nu ndo já ná cándéé cáhnu chága ini ndó mé á.

<sup>11</sup> Ñā cán quea xíca tahví nde nu Ndióxi, tátá yo xihin Jesucristo, xitoho í ñā ná chindeé a ndeḥe saa nde nu ndo coto nihni nde ndohó. <sup>12</sup> Ta ná caja Ndióxi ñā ná quihví chága ini táhan ndó. Ta ná chutú ndaa ini ndó xihín ñā quihví ini ndó tóco ndihí ñayivi tá quiahva quihví ini nde ndohó. <sup>13</sup> Ta ná caja Ndióxi ñā ná coo ndacú ínima ndo nu mé á. Ta ná jándoo a ínima ndo já ná coo víi a nu mé á tá ná quixi tucu Jesucristo ñuyiví xihín ndihí na cúu cuéntá mé á.

## 4

*Ñā ndítahan nu yo caja í já ná tahan ini Ndióxi xihin yo*

<sup>1</sup> Cuni johó vaha ndó ñani mí i, na cúu cuéntá Jesús. Jihna najánaḥa nde ndohó ndaja ndítahan caja ndó já ná tahan ini

Ndióxi xihin ndo. Ta xíni nde já caja ndó anda viti. Xihin ndéé sahan Jesucristo nuú nde xíca tahví nde nu ndo ta sáhdá nde chuun nu ndo ñā ná a jándicoo ndó caja ndó ñā najánaḥa nde nu ndo.

<sup>2</sup> Sa xíni vaha ndó ñā sáhdá nde chuun nu ndó jáchi nasahnda Jesucristo, xitoho í chuun nuú nde çahan nde ñā yóho xihin ndo. <sup>3</sup> Ñā cúni Ndióxi quea ná coo víi ínima ndó nu mé á ta ná a caja ndó cuachi ñā coo ndó xihín najihí á taa, na coo cúu ñájihí ndo á yíi ndo. <sup>4</sup> Ñā cúni Ndióxi quea ná tandaha ndó xihín in talaá ñañaḥa. Ta ná coo víi ndó xihin ñā ta ná caja cáhnu ndó ñā. <sup>5</sup> Ta ná a ndiáva ini ndó caja núu ndó xihin ñā tá quiahva caja ñayivi, na coo xíni Ndióxi. <sup>6</sup> Co ndítahan caja ndó cuachi xihin ñájihí ñani táhan ndó jáchi xihín ñā yóho jándahvi ndó yíi ñā. Ta jándoho ndivaha Ndióxi ini tóco ndihí na caja já. Ta sa xíni vaha ndó ñā yóho jáchi naçaxi tuhun nde ñā nu ndó jihna. <sup>7</sup> Jáchi coo naçana Ndióxi mí ñā ná caja í cuachi. Naçana mé á mí jáchi cúni a ñā ná cacuú ñayivi yíi, na ín víi ínima. <sup>8</sup> Ta ndá na coo cúni cuni johó ñā jánaḥa nde já quea cándaa ini ndó ñā a juú ndeḥe cuití va cándají na. Jáchi quehe núu na Ndióxi sahá ñā coo caja na ñā cúni mé á. Ta Ndióxi quea nasahan ínima yíi mé á nu yo cañuhu a iní.

<sup>9</sup> Sa najánaḥa va Ndióxi ndohó ndá quiahva ndítahan quihví ini táhan ndó, na cúu cuéntá Jesús. Sahá ñā cán quea nu carta yóho coo ndítahan çahví tucu u ñā nu ndo. <sup>10</sup> Ta sa xíni víi ñā mé a ndaa quihví ini ndó tóco ndihí na cúu cuéntá Jesús ndúu estado Macedonia. Joo xíca tahví i nu ndó, ñani mí i ñā ná quihví chága ini ndó na. <sup>11</sup> Xíni ñúhú nducú ndo coo vaha ini ndó xihín ndihí ñayivi. Ta nducú ndo coo ndisáhnu ini ndó. Ta ndítahan nu in in ndó caja ndó chuun mé ndó jáchi já najánaḥa nde nu ndó jihna. <sup>12</sup> Ta tá ná caja chúun vaha ndó já quea çahan vaha ñayivi, na coo cúu cuéntá Jesús saha ndo. Ta tá ná caja chúun vaha ndó já quea a ndímaní ni in ñaha nu ndo catacu ndó.

*Vaxi quiví quixi tucu Jesucristo ñuyiví yóho*

<sup>13</sup> Ta viti cúni nde ndicani nde nu ndó, ñani i, na cúu cuéntá Jesús ñā ná candaa

vaha ini ndó ña ndaa sahá ñayivi, na sa naxihí. A cácuéha ini ndó saha ná tá quiahva cája ñayivi, na co cándeé ini Ndióxi. <sup>14</sup> Tá quiahva cándusa nde ña naxihí Jesucristo ta nanditacu tucu a quiahva já cándusa nde ña jánditacu tucu Ndióxi na sa naxihí, na nasandeeé ini mé á tá nasatacu na. Caja Ndióxi ña ná quixi na cán xihín Jesús tá ná quixi tucu a ñuyiví yóho.

<sup>15</sup> Ña cán quéa cáhan nde ña yóho xihín ndo ta cúu á ña najánaha Jesucristo, xitoho í nuú nde. Tá ná quixi tucu mé á ñuyiví yóho ndiquehe a mí já quéa a cúhun toho jihna ñúhú na tácu ñuyiví yóho jáchi jihna ñúhú ndindita na sa naxihí. <sup>16</sup> Jihna ñúhú nuu Jesucristo quixi tucu a ñuyiví yóho. Ta mé já cayuhú a cahnda a chuun nuú ndihi ñayivi. Já cayuhú tátó sacuahá Ndióxi ta ndahyi trompeta Ndióxi. Já nditacu nu cúu tá na sa naxihí, na cándusa Jesucristo. <sup>17</sup> Anda jáví tóco ndihi mí, na tácu ndique táhan í xihín na nanditacu nu cúu tá cañehe Ndióxi mí tañu víco. Já ndique táhan í xihín Jesucristo, xitoho í nu táchi ta já coo í xihín mé á anda ama cáa quivi. <sup>18</sup> Sahá ña cán quéa ndítahan nu ndó quiahva tuhun ndeé ini táhan ndó xihín tuhun yóho.

## 5

<sup>1</sup> Candehé ndo, ñani í, na cúu cuéntá Jesús. Co xini ñúhú cahyí í nu ndo saha ndá ama quixi tucu Jesucristo ñuyiví yóho. <sup>2</sup> Jáchi cándaá vaha ini ndó ña mé quivi co cáhan yo quixi Jesucristo ñuyiví yóho já quixi mé á. Tá quiahva jonáa cúu tá va xinu in da cuíhna tá ñuú quiahva já jonáa xinu Jesucristo ñuyiví yóho. <sup>3</sup> Tá ná cáhan ñayivi sa ndúu vaha ndivaha na ta ni in ñaha a cúu yihví na anda jáví jonáa xinu ña ndoho ndivaha ini na. Tá quiahva jonáa xinu ña sáhdá a tixi in ñañáha tá cúu cacu jahyi ña quiahva já xinu quivi ndihi saha ná. Ta ni in na a cúu cacu toho. <sup>4</sup> Joo mé ndó, ñani mí í, na cúu cuéntá Jesús co ndúu ga ndó nuú naá sahá ña cándaá ini ndó ña quixi tucu Jesucristo ñuyiví yóho. Ta vatí catóntó ndo tá ná xinu in da cuíhna nu ndo joo co ndítahan catóntó ndo tá ná quixi tucu Jesucristo. <sup>5</sup> Jáchi tóco ndihi ndó, na cándeé ini Jesucristo ndúu ndó nu yéhe sahá ña xica ndó íchi cuéntá Jesús. Co

xica toho ndó íchi nuú naá nu xica ñayivi ñuyiví, na co cándeé ini Jesucristo. <sup>6</sup> Sahá ña cán quéa ndítahan coo tiahva í candatí quixi Jesucristo ta a cúu yo tá quiahva cája java ga ñayivi. Ña ndítahan caja í quéa cañuhu táhyí ini xihín tóco ndihi xini túni yo candatí xinu Jesucristo. <sup>7</sup> Jáchi na quiji, quiji na tá ñuú ta na xihí, xihí na tá ñuú. <sup>8</sup> Joo mí sa xica í nu yéhe ta ndítahan cañuhu táhyí ini. Ndítahan nu yo chindeé yo mí. Tá cándeé ini Jesucristo ta tá quihví ini táhan í já cúu á tátuhun ndixi yo cotó caa. Tá ndatí quixi tucu Jesucristo jácacu a mí já cúu á tátuhun ñúhu ndó yijini caa. <sup>9</sup> Jáchi coo nacaxi Ndióxi mí ndicuehe a xihín yo jáchi naxihí Jesucristo, xitoho í sahá cuachí sahá ña cúu a jácacu a mí ná a cúhun yo indayá. <sup>10</sup> Naxihí Jesucristo saha yo ta tá tácu yo á sa naxihí yo mé quivi quixi tucu a ñuyiví yóho já quéa cañehe a mí cohó coo í xihín mé á anda ama cáa quivi. <sup>11</sup> Ña cán quéa quiahva tuhun ndeé ini táhan ndó ta chindeé táhan ndó tá quiahva sa cája ndó.

### *Ndicani Pablo nuú na cúu cuéntá Jesús ña ndítahan caja na*

<sup>12</sup> Ta viti xica tahví nde nu mé ndó, na cúu cuéntá Jesús ña ná caja cáhnu ndó ñayivi, na caja chúun tañu ndó jáchi ndáca na ndohó íchi cuéntá Jesucristo, xitoho í ta jánaha na tuhun Ndióxi nu ndo. <sup>13</sup> Ndítahan coo toní ñúhú ndo xihín ná ta quihví ini ndó na xihín ndinuhu ini ndó jáchi cája chúun na cuéntá Ndióxi tañu ndó. Co vaha ini ndó xihín ñani táhan ndó.

<sup>14</sup> Xica tahví nde nu ndó ña ná jánani ndó ndá na co cúu caja chúun. Quiahva ndó tuhun ndeé ini ndá na cácuéha ini. Chindeé ndó ñayivi, na vitá ini xihín tuhun Ndióxi. Ta coo cáhnu ini ndó xihín ndihi ñayivi.

<sup>15</sup> Candehé ndo. A ndúcú ñehe ndó ña núu cája inga na xihín ndo. Ta ndinducú ndo caja vaha xihín táhan ndó ní tiempo ta quiahva já caja ndó ña vaha xihín tóco ndihi ñayivi.

<sup>16</sup> Ná coo vatá ini ndó ní tiempo. <sup>17</sup> Ta caça tahví ndó nu Ndióxi ní tiempo. <sup>18</sup> Ndá nacuu ña ndóho ndó ndítahan nu ndo ndiquiahva ndó ndixahvi nu Ndióxi sahá jáchi ña yóho cúu Ndióxi caja mé ndó, na cúu cuéntá Jesús.

<sup>19</sup> A cáji nuu ndó nuú ña cúni ínima yii Ndióxi caja xihin ndo. <sup>20</sup> A quéhe núu ndó ñayivi, na jáyaha tuhun, ña nasahan Ndióxi nu ná cahan na xihin ndo. <sup>21</sup> Coto ndojó ndo tóco ndihi ña cahan na xihin ndo. Caxi ndó ña vaha <sup>22</sup> ta caxoo ndó nu tóco ndihi ña núu.

<sup>23</sup> Ta Ndióxi, mé a cája ña coo vaha ini ndó, ná caja yii ndihi a ndohó. Ná caja yii á ínima ndo xihín yiquí cuñu ndó já ná coo vií ndo tá ná xinu quiví quixi tucu Jesucristo, xitoho í. <sup>24</sup> Jáchi sa naçaxi Ndióxi mí ta a jándicoo a mí anda quiahva jáxinu coo a tóco ndihi ña nacachi a.

*Jáxinu coo Pablo ña cahan da ta ndíndayí da na*

<sup>25</sup> Ñani mí i, na cúu cuéntá Jesús, caça tahví ndo nu Ndióxi sahá nde.

<sup>26</sup> Cahán Ndióxi ndó xihín ndihi na cúu cuéntá Jesús ta tatí yúhu táhan ndó ta yii caja ndó ña.

<sup>27</sup> Candehé ndo, ñani i, na cúu cuéntá Jesús. Sáhndá i chuun nu ndó cuéntá Jesucristo, xitoho í ña ná cahvi ndó carta yóho nuú ndihi na cúu cuéntá Jesús ndúu xihin ndó jan.

<sup>28</sup> Ná caja Jesucristo, xitoho í cuahá ñamani xihin ndo. Já ná coo.

## Carta chí ivi nacahyí Pablo nuú na cúú cuéntá Jesús ñuu Tesalónica

*Pablo xihín da xíca xihín da chíndahá da Ndióxi coo na cúú cuéntá Jesús ñuu Tesalónica*

<sup>1</sup> Yehe cúú Pablo, da cáhyí carta yóho xihín Silvano xihín Timoteo ta chíndahá i ña nuú ndihi ndó, na cúú cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. <sup>2</sup> Ná caja Ndióxi, tátá yo xihín Jesucristo, xitoho í cuahá ñamani xihín ndihi ndó ta ná caja mé á ña ná coo vaha ini ndó.

*Caja víi Ndióxi sahá na cája cuachi tá ná quixi tucu Jesucristo ñuyíví yóho*

<sup>3</sup> Ndijáá níi quivi ndítahan nuú nde ndiquiahva nde ndixahvi nu Ndióxi saha ndóhó, na cúú cuéntá Jesús. Ta íin saha cája nde já jáchi nini quivi cándeé chága ini ndó Jesús ta quíhvi chága ini táhan ndó na cúú cuéntá Jesús. <sup>4</sup> Sahá ña cán queá cáji ini nde cáhan nde saha ndo nuú java ga na cúú cuéntá Jesús ndá nacuu nu táca na jáchi cándeé ini ndó Jesús ta sahan ndeé ini ndó tá ndóho ini ndó sahá ña cája xíxi ñayivi xihín ndo. <sup>5</sup> Jánaha Ndióxi nu yo ña ndaa cája mé á tá cája víi a saha yo. Ta sahá ña yóho sácú tiahva mé á ndohó cuhun ndó indiví cacomí a cuéntá saha ndó jáchi ndóho ini ndó cuéntá mé á viti.

<sup>6</sup> Ta ndaa cája Ndióxi tá jándoho a ini ñayivi, na cája xíxi xihín ndó viti. <sup>7</sup> Ta sahá ña ndóho ini ndó ná caja mé á ña ná ndiquehe ndée ndo tá quiahva caja mé á ña ná ndiquehe ndée ri ndehe va mé quivi quixi tucu Jesucristo ñuyíví yóho. Ta quixi a xihín tátó ndée mé á ta cuni yó a ña quixi a indiví tañu ñúhu ita. <sup>8</sup> Quixi a jándoho a ini na coo cándeé ini Ndióxi ta ni coo cándúsa na tuhun vaha sahá Jesús, xitoho í, mé a cuu jáca cu mí. <sup>9</sup> Ta ndá na coo cándeé ini Jesucristo já queá ndoho ndivaha ini na anda ama cáa quivi ini indayá ta a cóo ga na nu Ndióxi. Ta tavá jín Ndióxi na já ná a cúni ga na nuu á anda ama cáa quivi. Ta a

cúni ga na ña náhnu cája Ndióxi xihín ndée mé á. <sup>10</sup> Tá ná quixi tucu Jesucristo ñuyíví yóho já caja cáhnu ndivaha tóco ndihi na cúú cuéntá Jesús mé á nuú quixi a. Ta já catóntó ndivaha tóco ndihi na sahá ña náhnu ndivaha caja Jesucristo. Ta quiahva já caja cáhnu ri ndóhó va Jesucristo mé quivi cán jáchi cándeé ini ndó tuhun vaha sahá Jesús ña nacahan nde xihín ndo.

<sup>11</sup> Ña cán queá ndijáá níi quivi xíca tahví nde nu Ndióxi saha ndo ña ná cacuu ndó ñayivi ndaa tá quiahva cúni mé á jáchi sahá ña yóho nandicaxi a ndohó. Ta xíca tahví nde nu Ndióxi saha ndo ña ná quiahva mé á ndée á nu ndo já ná cuu jáxinu coo ndó ña vaha ña cúni ndó caja ndó nani cája chúun ndó cuéntá mé á sahá ña cándeé ini ndó mé á. <sup>12</sup> Ta sahá ña vaha cája ndó, caja cáhnu ñayivi Jesucristo. Anda jáví ndiñehe jícó Jesucristo ndohó jáchi cúú ndó cuéntá mé á ta cája ndó ña cúni mé á. Mé a ndaa cúni Ndióxi xihín Jesucristo, xitoho í caja cuahá ñamani xihín yo.

## 2

*Cáhan Pablo sahá da ihvi Jesucristo, mé da quixi chí nuu*

<sup>1</sup> Cuni johó vaha ndó, ñani mí i, na cúú cuéntá Jesús jáchi cáxi tuhun i xihín ndo saha mé quivi quixi tucu Jesucristo ñuyíví játa mé a mí ndique táhan í xihín á. Xíca tahví i nu ndó <sup>2</sup> ña ná a cándúsa ndó java ñayivi tá cáchi na ña sa naxinu quivi ndicó coo Jesucristo ñuyíví. A ndicani ga ini ndó sahá ña cáchi na jáchi a juú ña ndaa cúú á. Tá ná cachi na cán ña nacahan Ndióxi xihín ná á tá ná cachi na ña nacachi mé nde ña nandindaa mé quivi cán á tá ná cachi na cán ña nacahyí nde in carta nu ná já queá a cándúsa toho ndó na jáchi a juú ña ndaa cúú á. <sup>3</sup> A cándúsa ndó ña cáchi na cán jáchi cúni na jándahvi na ndohó. Ta viti cáhan nde ña ndaa xihín ndo saha mé quivi quixi tucu Jesucristo. Jáchi jihna ñúhú casahá cuahá ndivaha ñayivi nduu na na ihvi Ndióxi ta jándicoo na íchi cuéntá mé á. Anda jáví casa in da quini, da cája cuahá ndivaha nuú cuachi. Joo vaxi quivi tá jándihi Ndióxi saha dá ini indayá. <sup>4</sup> Ta mé da quini yóho, da cúú da ihvi Ndióxi cándají da mé á ta

cándají da tóco ndihi ña cúu cuéntá mé á. Anda jáví casaá da veñuhu cáhnu ndácaan ñuu Jerusalén cacao da cán tátuhun Ndióxi. Ta cachi da xihín ñayivi ña cúu dá Ndióxi.

<sup>5</sup> Á co ndícuñun ini ndó tá nasahin i xihin ndo já cuití naçahan i ña yóho xihin ndo. <sup>6</sup> Ta viti sa cándaá ini ndó ndía sáji nuu nuú da ihvi cán ña ná a xinu coo da mé quivi ña co ndítahan nu dá xinu da. <sup>7</sup> Vatí cámani jánaħa da ihvi mé dá nuú ñayivi joo cája chúun jehé da viti ñúhú jándihi da saħá ñaha Ndióxi cúni da. Ta viti in in a sáji nuu nuú da ihvi ta co sahan ñamani jánaħa da ihvi mé dá nuú ñayivi. Joo vaxi quivi caxoo ña sáji nuu nuú da ihvi cán. <sup>8</sup> Ta anda jáví jánaħa da mé dá nuú ñayivi. Ta cahni Jesucristo mé da ihvi cán xihín tachí yúhu a tá ná quixi a ñuyiví yóho. Ta jándihi a saħa dá xihín ña ndiyihvi ndaa nuú quixi a. <sup>9</sup> Tá cámani quixi tucu Jesucristo ñuyiví já casaá mé da ihvi xihín cuahá ndivaha ndée ña nasahan tiñáhá sacuaħa nu dá. Ta jándahvi da ñayivi jáchi caja da cuahá ñaha náhnu, ña co cúu ña ndaa. <sup>10</sup> Ta caja da tóco ndihi nuú cuachi jáchi cúni da jándahvi da ñayivi, mé na xica íchi cuahan indayá. Cuhun na indayá jáchi coo naxeen na candúsa na ña ndaa saħa Jesucristo ta coo naxeen na quihvi ini na ña ndaa, ña cuu jácacu ñahá. <sup>11</sup> Ña cán queá quiahva Ndióxi ñamani jándahvi da ihvi cán na já ná candúsa na ña tuhún. <sup>12</sup> Já queá jándoho Ndióxi ini tóco ndihi na cán jáchi coo naçandúsa na ña ndaa ta ndinuhu cuachi naçatoo na cája na.

### *Naçaxi Ndióxi ndohó ña ná jácacu a ndohó*

<sup>13</sup> Ta ndijáá ní quivi ndítahan nuú nde ndiquiahva nde ndixahvi nu Ndióxi saħa ndó, na cúu ñani nde cuéntá Jesús saħá ña quihvi ini a ndohó. Jáchi janda tá cámani cava saħa saħa ñuyiví naçaxi Ndióxi ndohó ña ná jácacu a ndohó. Jáchi nandaja vii ínima yii mé á ínima ndo saħá ña candeé ini ndó ña ndaa saħa Jesús. <sup>14</sup> Cúni Ndióxi ña ná candeé ini ndó mé á ña cán queá nachindahá a ndehe çaxi tuhun nde tuhun vaha saħa Jesucristo nu ndo. Naçaxi

Ndióxi ndohó ña ná in nduu ndó xihin Jesucristo, xitoho í. Cáhnu ndivaha cúu mé á ta ndaja cáhnu a mí xihin á.

<sup>15</sup> Ñani mí i, na cúu cuéntá Jesús coo ndacú ini ndó xihín ña candeé ini ndó Jesucristo. A ndíndójó ndo tiin tuun ndó ña ndaa ña najánaħa nde nu ndo tá nasanduu nde xihin ndó. Ta tiin tuun ndó ña naçahví nde nu ndó viti. <sup>16</sup> Jesucristo, xitoho í xihin Ndióxi, tátá yo, mé a quihvi ini mí ná quiahva tuhun ndeé ini ta anda ama cá quivi a ndíhi saħá. Ta viti ndátí tiahva caja Ndióxi cuahá ñamani xihin yo. <sup>17</sup> Ta xica tahví nde nu Ndióxi ña ná jachutú a ínima ndó xihin ndée mé á. Ta ná chindeé a ndohó çahan ndó tuhun vaha ta caja ndó ña vaha cuití va.

## 3

### *Cúni Pablo ña ná çaca tahví na nu Ndióxi saħa dá*

<sup>1</sup> Candehé ndó, ñani i, na cúu cuéntá Jesús. Nu ndíhi çahan i tuhun yóho xihin ndo. Çaca tahví ndo nu Ndióxi saħá nde. Ta çaca tahví ndo nu mé á ña ná ndicuita nuu yachi tuhun vaha saħa Jesús ndijáá ñuu ta ná ndiquehe vaha ñayivi mé tuhun vaha tá quiahva nandiquehe ndó ña. <sup>2</sup> Ta çaca tahví ndó nu Ndióxi saħá nde ña ná jácacu a ndehe ndahá ñayivi quini. Vatí nduu cuahá na co candeé ini Jesucristo <sup>3</sup> joo jáxinu coo Ndióxi tuhun mé á. Já queá quiahva mé á tuhun ndeé ini ndó ta candaa mé á ndohó já ná a cája tiñáhá sacuaħa ña núu xihin ndo. <sup>4</sup> Candeé ini nde Jesucristo ta candeé ini nde ndohó ña cája tá cája ndó ña najánaħa nde nu ndo. <sup>5</sup> Ná chindeé Ndióxi ndohó candaa ini ndó ndá quiahva quihvi ini á ndohó. Ta ná chindeé a ndohó caja ndeé ini ndó tá ndóho ini ndó tá quiahva naçaja ndeé ini Jesucristo tá nandoho ini a.

### *Xíni ñúhú caja chúun í catacú*

<sup>6</sup> Cuni joho vaha ndó, ñani mí i, na cúu cuéntá Jesús. Nasahnda Jesucristo chuun nu yo saħá ña cán queá saħndá nde chuun nu ndo ña ná caxoo ndó nuú na cúu cuéntá Jesús tá cájúsá na caja chúun na tá quiahva najánaħa nde nu ndó. <sup>7</sup> Ta sa xini ndó ña ndítahan nu ndó caja ndó tá quiahva naçaja mé nde tá nasanduu nde

xih̄in ndo jáchi coó n̄acajúsá nde caja chúun nde. <sup>8</sup> N̄achah̄vi nde sahá ña naxixi nde cán. N̄acaja chúun vaha nde ñuú ta ndiví já nañehé nde jiūh̄un catacu nde já ná a ndóho ni in ndó sahá ña naxito ndó ndeh̄e. <sup>9</sup> Vatí íin sahá nde cachi nde xih̄in ndo ña ná coto uun ndó ndeh̄e joo coó n̄acaja nde já. Ña n̄acaja nde quéa n̄acaja chúun vaha nde já najánāha nde nu ndo ndá quiah̄va ndítahan nu ndó caja ndó. <sup>10</sup> Á co ndícuh̄un ini ndó chuun nāsah̄nda nde nu ndo tá nāsanduu nde xih̄in ndo. Já n̄acachi nde já: Ndá na co cúni caja chúun, ná a cúxu toho na, n̄acachi nde. <sup>11</sup> Jáchi nañehé nde tuh̄un ña ndúu java na jusá tañu ndó ta co cúni na caja chúun na ta xíca nuu na játāca na tuh̄un sahá ñayivi. <sup>12</sup> Ta sáhnda nde chuun nuú na jan ta jácahan nde na xih̄in nde nāsahan Jesucristo, xitoho í nuú nde ña ná caja chúun ndísáhnu na já ná ñeh̄e ná ña cuxu na.

<sup>13</sup> Candehé ndo, ñani i, na cúu cuéntá Jesús. A cánaá ndó caja ndó ña vaha. <sup>14</sup> Tá ná canduu java na tañu ndó ta co cúni na caja na ña cáchi nde xih̄in carta yóho já quéa xíní ñúhú candehé vaha ndó ndá na cúu ná ta a cáca nuu ga ndó xih̄in ná já ná cacahan nuu ná sahá ña cája na. <sup>15</sup> Joo a cája ndó cuéntá ña cúu ná na ih̄vi Jesucristo. Xíní ñúhú jácahan ndó na ña ná caja vaha na jáchi cúu ná ñani ndó, na cúu cuéntá Jesús.

*Ndíndayí Pablo ñayivi Tesalónica*

<sup>16</sup> Ta Jesucristo, xitoho í, mé a íin vaha ini ná quiah̄va mé á nu ndo ña ná coo vaha ini ndó ndaja táhan quiví. Ta ná coo vaha ini ndó xih̄in ndá ñaha n̄acuu vaxi nu ndo. Ná coo Jesucristo, xitoho í xih̄in ndih̄i ndó.

<sup>17</sup> Yehe cúu Pablo ta chíndahá i Ndióxi coo ndó ta cáhyí i quiví i xih̄in ndáha i já ná candaa vaha ini ndó ña mé a ndaa yehe cúu da n̄acah̄yí i ña yóho nu ndo. <sup>18</sup> Ná caja Jesucristo, xitoho í cuahá ñaman̄i xih̄in ndo. Já ná coo.

## Carta nu cuití nacahyí Pablo nuú Timoteo

### *Chíndahá Pablo Ndióxi coo Timoteo*

<sup>1</sup>Yehe cúú Pablo, da cúú in apóstol cuéntá Jesucristo sahá ña nasahnda Ndióxi xihín Jesucristo chuun yóho nuú i. Ta Ndióxi cúú á ña jácacu mí ta Jesucristo cúú á ña ndátí quixi. <sup>2</sup>Cáhyí i carta yóho nu mún, Timoteo jáchi cúún tátuhun jahyi maní i sahá ña cándéé inún Jesucristo. Ta cúni ña ná caja Ndióxi, tátá yo xihín Jesucristo, xitoho í cuahá ñamaní xuhun. Ta ná tahvi ini a sahun ta ná caja ña ná coo vaha inún.

### *Ndícani Pablo sahá na co jánaha ña ndaa*

<sup>3</sup>Tá jalóho cámaní quee e ñuu Efeso quixi i estado Macedonia yóho já naxica tahvi i nuun ña ná candoún ñuu Efeso jan. Ta viti xica tahvi tucu u nuun ña ná coún cán. Jáchi ndúu java ñayivi cán ta jánaha na ña tuhún nuú ñayivi. Ta ndítahan nu mún cahndún chuun nu ná ña ná a jánaha ga na ña tuhún. <sup>4</sup>Ta ná a táa johó na cuento nání, ña cáhan sahá chichi naquixi tásáhnú jícó yo. Jáchi ndítuhún uun va na sahá ña yóho ta co chindeé a na cándéé ini na Ndióxi, mé á nasacu ini jácacu a mí.

<sup>5</sup>Ndítahan cahún ña yóho xihín ná jáchi cúni Ndióxi ña ná quihvi ini táhan í xihín ndihi ínimá yo ta cúni a ña ná caja í ña vaha cuití va ta cúni a ña ná cándéé ini mé á xihín ndinuhu ini. <sup>6</sup>Joo java ñayivi najándicoo na ña ndaa ta najátivi na ña cája na jáchi ña quihvi cuití va ndítuhún xihín táhan na. <sup>7</sup>Vatí cúni na cán jánaha na ley Moisés joo co cándaá ini na ña jánaha na ta ni co cándaá ini na ña cáhan mé ley.

<sup>8</sup>Joo sa xini yo ña mé ley Moisés cúú á ña vaha tá ná caja chúun vaha í ña tá quiahva cúni Ndióxi. <sup>9</sup>Xini ñúhú ndícuhun ini ña ni in ley co chícaan cuachi jatá ñayivi vaha. Joo chícaan cuachi jatá ñayivi quini, na sáá ini jáchi co cája na ña cúni Ndióxi. Ta chícaan cuachi jatá ñayivi núu, na cája cuahá nuú cuachi. Ta chícaan cuachi jatá ñayivi co cája cáhnú Ndióxi, na cánahá xihín mé á. Ta chícaan cuachi jatá ñayivi sáhnú

tátá náná na xihín jatá tóco ndihi na sáhnú ndii. <sup>10</sup>Ta chícaan cuachi jatá ñayivi ndúu xihín taá á ñáha, na co cúú yí ná á ñájíhí na. Ta chícaan cuachi jatá taá líhi, da quihvi nuu xihín inga taá. Ta chícaan cuachi jatá na cája cuíhná ñayivi sahá ña cúni na jícó ñahá na. Ta chícaan cuachi jatá ñayivi cáhan ña tuhún, mé na janda quivi Ndióxi tává na tá cáhan na ña tuhún. Ta chícaan cuachi jatá tóco ndihi ñayivi tá co cája na ña ndaa, ña jánaha Ndióxi nu yó caja í. <sup>11</sup>Ta nasahnda Ndióxi chuun nuú i ña ná jánaha i ña ndaa yóho nu ndo jáchi cúni a jácacu a tóco ndihi ñayivi. Cáhnú ndivaha cúú mé á ta ndítahan caja cáhnú í mé á.

### *Ndíquiahva Pablo ndixahvi nu Ndióxi jáchi táhnú ini a saha dá*

<sup>12</sup>Ndíquiahva i ndixahvi nu Jesucristo, xitoho í jáchi nacaxi a yehe caja chúun i cuéntá mé á ta nasahan mé á tuhun ndée ini i ña ná caja i ña xihín ndinuhu ini i. <sup>13</sup>Vatí jihna nacahan ihvi i saha Ndióxi ta nacaja xixi i xihín á ta nacannahá i xihín á joo nacaxi a yehe. Ta natahnú ini a sahá i tá cámaní cándéé ini i Jesucristo jáchi coo nacandaá ini i ña nacaja i. <sup>14</sup>Nacaja Ndióxi cuahá ñamaní xihín i tá nacaja ña ná cándéé ini i mé á. Ta nacaja mé á ña nachutú ndaa ini i xihín ña quihvi ini i na cúú cuéntá mé á sahá ña in nanduu u xihín mé á.

<sup>15</sup>Ña yóho cúú á ña ndaa ta ndítahan nuú ndihi ñayivi candúsa na ña cáchi i yóho: naquixi Jesucristo ñuyivi yóho jácacu a ñayivi, na cája cuachi. Ta yehe cúú u da yójó nu ndíhi na cája cuachi. <sup>16</sup>Ta sahá ña yóho natahvi ini Ndióxi sahá i já ná cuu nahá Jesucristo ndaja cáhnú coo ini mé á. Ta vatí nacaja cuaha chága i cuachi a juú ga java ga ñayivi joo já nasacuu u yuhú nuú tóco ndihi na vaxi chága chí nuu ña ná cándéé ini na mé á ta já coo na xihín mé á anda ama cáa quivi. <sup>17</sup>Ña cán queá cóho caja cáhnú í Ndióxi anda ama cáa quivi jáchi mé á cómi a cuéntá saha yo anda ama cáa quivi. Ta mé Ndióxi a cuú quivi a ta ndíchi ndivaha jini á ta ín a indivi vatí a cuú cuni a. Cáhnú ndivaha cúú mé á. Já ná coo.

<sup>18</sup>Candehún Timoteo, da cúú tátuhun jahyi mí i. Jándacoo i chuun yóho nu mún



jáchi quiahva já nacachi profeta sahún jihna. Ta xíní ñúhú quiahva ndeé inún cajún ña jáchi cúú á tátuhun cáni táhún xihín ña núu. <sup>19</sup> A jándacoún ña cándéé inún Jesucristo ta xihín ndinuhu inún cajún ña ndaa. Jáchi java ñayivi coó nacaja na ña xíní na cúní Ndióxi caja na ta chí nandihí sahá ña cándéé ini na Jesucristo. <sup>20</sup> Ivi táhan da cán cúú Himeneo xihín Alejandro. Nandiquiahva i da cán ndáha tiñáhá sacuahá va já ná candaa ini da ña a cuú quehe núu da Ndióxi xihín tuhun cáhan da.

## 2

### *Ndaja caja í cacá tahví yo nu Ndióxi*

<sup>1</sup> Ña xíní ñúhú chága caja ndó queá cacá tahví ndó nu Ndióxi sahá ndihí ñayivi ña ná tahví ini a saha ná. Ndiquiahva ndó ndixahvi nu Ndióxi sahá ñamaní cája mé á xihín ndó. <sup>2</sup> Ta sa mé quiahva já ndítahan cacá tahví ndó nu Ndióxi saha tóco ndihí na cómi cuéntá saha yo. Jáchi tá cája í ña yóho já cuu coo vaha iní xihín ndihí ñayivi ta já coo toní ñúhú xihín táhan í. Ta já nuná nu yo caja cáhnu í Ndióxi. <sup>3</sup> Tá xíca tahví yo nu Ndióxi sahá ndihí ñayivi já queá cája í ña vaha ta cájii ini Ndióxi, mé á jácacu mí. <sup>4</sup> Jáchi cúní a jácacu a tóco ndihí ñayivi ña ná candaa ini na ña ndaa saha mé á. <sup>5</sup> Jáchi íin in táláá Ndióxi. Ta íin in táláá Jesucristo, mé á cúú á taa ta cája mé á ña ná ndique táhan máni ñayivi xihín Ndióxi. <sup>6</sup> Ta nandiquiahva Jesucristo mé á quivi a sahá cuachi tóco ndihí ñayivi. Xihín ña yóho náha Ndióxi nu yo ña nandindaa tiempo tá cúní a jácacu a tóco ndihí ñayivi. <sup>7</sup> Sahá ña cán queá nacaxi Ndióxi yehe cacuu u apóstol ña ná caxi tuhun i tuhun vaha sahá Jesús nuú na tóho, na coo cúú na Israel. Jáchi cúní Ndióxi ña ná candaa ini na ña ndaa já ná cuu cándéé ini na Jesús. Cáhan i ndinuhu ña ndaa xihín ndo ta coo cáhan i ña tuhún xihín ndo.

<sup>8</sup> Ña cúní queá ná cacá tahví nataa nu Ndióxi tóco ndihí nu táca ndo. Ta ndítahan nu ná coo víi ínimá ná já ná cuu ndíñehe na ndáha ná nu Ndióxi. Ta ndítahan nu ná jándicoo na ña xójo ini na ta ná a cáni táhan yúhu ná. <sup>9</sup> Jári coo ndítahan nuú najihí candixi na jahmá lándá. Ta ná a cája lándá

na xihín ijí jini ná. Ta ná a ndíhi ini na caja cutú na mé ná xihín ñaha jiuuhun cuáán á xihín jíqui yahvi tátuhun perla. Ta ná a cándixi na jahmá yahvi ña cája lándá ná xihín. <sup>10</sup> Vaha chága ná caja na ndinuhu ña vaha tá quiahva ndítahan nuú najihí, na cúú cuéntá Jesús caja na. <sup>11</sup> Ndítahan nuú najihí canduu táji ná cuni johó na tuhun Ndióxi ta coto ná a ndíñehe jíco na mé ná. <sup>12</sup> Ta coo sahan i ñamaní nuú najihí ña ná jánaha na nu táca ñayivi. Ta ni coo sahan i ñamaní nu ná ña ná cacomí na cuéntá sahá dataa. Joo ndítahan nu ná coo táji ná. <sup>13</sup> Jáchi jihna ñúhú nacavaha Ndióxi Adan ta anda jávi nacavaha mé á Eva. <sup>14</sup> Ta a juú Adan cúú da najándahvi tiñáhá sacuahá, vaha. Joo najándahvi tiñáhá sacuahá Eva ta já nandicava ña nuú cuachi. <sup>15</sup> Sahá ña cán queá nacaja Ndióxi xihín najihí ña ná ndoho ini na tá cacu jahyi na. Joo jácacu Ndióxi na tá ná a jándacoo na ña cándéé ini na mé á. Ta já ndítahan nu ná quihvi ini na ñayivi. Ta ná a cája lándá ná ta ná ndiquiahva víi na mé ná ndáha Ndióxi.

## 3

### *Ndaja ndítahan caja na sacuahá nuú na cúú cuéntá Jesús*

<sup>1</sup> Ta ña ndaa cúú tuhun yóho: ndá da cúní cacuu da sacuahá nuú na cúú cuéntá Jesús, ña vaha queá cúní da. <sup>2</sup> Jáchi ndítahan nuú da sacuahá caja da ndinuhu ña ndaa já ná a ñehe iní ñayivi cahan núu na saha dá. Ta in tuhún ñájihí da ndítahan coo. Ta ndítahan cacuu da da tácu ini ta ndítahan nu dá cañehe vaha da quiahva ta ndítahan cacuu da da íin toní ñúhú ñayivi xihín. Ta ndítahan nu dá cajii ini da ndiquehe vaha da ñayivi vehe da. Ta xíní ñúhú cacuu da da tiaha vaha jánaha da ñayivi. <sup>3</sup> Coo ndítahan cacuu da da xihí ta coo ndítahan cacuu da da ndúcú cuachi xihín ñayivi. Joo ndítahan coo víi da xihín ñayivi ta ná a cáni táhan da xihín ná. Ta coo ndítahan cacuu da da ndiáva ini quehe cuahá da jiuuhún. <sup>4</sup> Ta ndítahan nuú da sacuahá cacomí vaha da cuéntá saha na vehe da. Ta ndítahan nuú jahyi da coo johó na nu cáhan tátá na xihín ná ta ná coo toní ñúhú na xihín dá. <sup>5</sup> Jáchi tá ta a cúú cañehe vaha da cuéntá sahá na

vehe da já quéa a cúu caja da cacomí da cuéntá sahá na cúu cuéntá Jesús. <sup>6</sup> Ta mé da sacuaḥa co ndítahan cacuu da da jacá nandihvi íchi cuéntá Jesús. Jáchi tiahva ná casáhá da ndiñehe jícó da mé dá ta sahá ña yóho jándoho Ndióxi ini da tá quiahva nacaja mé á xihín tiñáhá sacuaḥa. <sup>7</sup> Mé da sacuaḥa nuú na cúu cuéntá Jesús yóho ndítahan cacuu da da ín toní ñuhú ñayivi, na co cúu cuéntá Jesús xihín. Jáchi tiahva náá ndicava da ndáha tiñáhá sacuaḥa ta xihín ña yóho caḥan núu ñayivi ñuyiví saḥa dá.

#### *Ndaja ndítahan caja na tá ná chindeé na na sacuaḥa veñuhu*

<sup>8</sup> Ta ndá da cúni cacuu da chindeé na sacuaḥa veñuhu ndítahan nu dá cacuu da da ín toní ñuhú ñayivi xihín. Ta xini ñuhú cacuu da da cáhan ndinuhu ña ndaa. Co ndítahan cacuu da da xihí ta co ndítahan nu dá cacuu da da ndiáva ini coo cuahá jjuhún nuu. <sup>9</sup> Ta xini ñuhú tiin tuun da ña ndaa ña nanaha Ndióxi nu yo ta ña yóho cúu á ña ndítahan candeé ini mé á. Ta ná a cáhvi ivi joho ini da. <sup>10</sup> Jihna ñuhú xini ñuhú coto ndojó ndo mé da cúni chindeé na sacuaḥa veñuhu. Ta tá co cája da cuachi nu Ndióxi já quéa cuu chindeé da na sacuaḥa veñuhu. <sup>11</sup> Ta jári najihí viti ndítahan cacuu na na ín toní ñuhú ñayivi xihín. Co ndítahan cacuu na na ndahnda yuhu. Ná cacuu na na ndísáhnú ini ta ná caja chúun na xihín ndinuhu ini na. <sup>12</sup> Ta mé da chindeé na sacuaḥa veñuhu ndítahan nu dá cacuu da da coo inga ñaha xihín ta in túhún ñájihí da ndítahan coo. Ta ndítahan nu dá cacomí vaha da cuéntá sahá jahyi da xihín sahá ndihi na vehe da. <sup>13</sup> Jáchi tá ná chindeé vaha da yóho na sacuaḥa veñuhu já casáhá cahvi vaha ini ñayivi saḥa dá ta xihín ña yóho ñeḥe ini da caḥan chága da sahá ña candeé ini da Jesucristo.

#### *Cáhan Pablo saḥa ndá a cúu mé Jesucristo*

<sup>14</sup> Vatí ndúcú u saa yachi i jan joo cáhyi i carta yóho nuun. <sup>15</sup> Jáchi tá ná cacuáchi loho i saa i jan já quéa sa cándaá inún xihín carta yóho ndaja ndítahan caja mí, na cúu na vehe Ndióxi. Mé a ndaa cúu yó cuéntá Ndióxi, mé á tácu ta ndítahan nu yo

quiahva ndeé ini ndiquehé sahá ña ndaa cáhan saḥa Jesucristo. <sup>16</sup> Jáchi mé a ndaa cáhnú ndivaha cúu ña náha Ndióxi nu yo: Naquixi Jesucristo ñuyiví yóho ta nasacuu a ñayivi.

Ta nacahan ínima yii Ndióxi saḥa mé á ña coo nacaja ni in cuachi.

Ta naxini táto Ndióxi Jesús.

Ta ndijáá ñuyiví nacaxi tuhun na tuhun vaha saḥa mé á ta cuahá ndivaha ñayivi nacandeé ini na mé á ta tá nandihí nandaa cuahán indiví.

## 4

### *Cáhan Pablo sahá na co jánaha ña ndaa*

<sup>1</sup> Cáhan cáxi ínima yii Ndióxi ña vaxi quivi jándacoo java ñayivi ña candeé ini na Jesús. Ta casáhá na candico na na jándahvi ñahá, na jánaha ña naquixi nuú tiñáhá sacuaḥa. <sup>2</sup> Ta mé na jánaha ña tuhún yóho co cúu ná tá quiahva ndaa na. Jáchi cúu ná ñayivi túhún, na nandaji xini túni xihín ña núu. <sup>3</sup> Ta jánaha na yóho ña a cuú tandaha ñayivi ta jánaha na ña a cuú cuxu ñayivi java ñaha, ña nacavaha Ndióxi cuxú. Joo cúni Ndióxi ña ná cuxú ña jan tá ná ndiquiahva í ndixahvi nu mé á sahá jáchi candeé ini mé á ta xini vaha í ña ndaa. <sup>4</sup> Jáchi tóco ndihi ña nacavaha Ndióxi cúu á ña vaha ta ni in ñaha co ndítahan candají yo. Joo ná ndiquehe vaha í ña ta ná ndiquiahva í ndixahvi nu Ndióxi sahá. <sup>5</sup> Jáchi tá ná caça tahví yo nu Ndióxi já caja yii mé á ña xihín tuhun mé á.

### *Ña ndítahan caja da cája chúun vaha cuéntá Jesucristo*

<sup>6</sup> Tá ná jánahún ña yóho nuú na cúu cuéntá Jesús já quéa caja chúun vahún cuéntá mé á. Ta quiahva ndeé inún tá jácuaha chágún ña ndaa sahá Jesucristo já ná candico cáhnú chágún íchi cuéntá mé á. <sup>7</sup> Coto a táa johún cuento ña cáhan ñayivi ñuyiví jáchi coo saḥa toho ña jan. Ña ndítahan cajún quéa jácuaha chágún nda quiahva caja cáhnún Ndióxi. <sup>8</sup> Tá ná caja chúun cuahá í xihín yiquí cuñu í já quéa chindeé a mí ñuyiví yóho cuití va. Joo tá ná caja cáhnú í Ndióxi já quéa chindeé chága yó mí jáchi xihín ña yóho cuu coo vaha ini ñuyiví yóho ta sa xihín mé ña yóho cuu coo

vaha í xihín Ndióxi tá ná cuhun yó coo í xihín mé á. <sup>9</sup> Ta ña yóho cúú á ña ndaa ta xíní ñúhú candúsa í ña. <sup>10</sup> Ta sa saha mé ña ndaa yóho cája chúun vaha í jáchi cándéé iní Ndióxi, mé á tácu. Mé a cán cúní a jácacu a tóco ndihi ñayivi ta mé a ndaa jácacu a tóco ndihi na cándéé ini mé á.

<sup>11</sup> Ta xíní ñúhú jánahún nuú ñayivi tóco ndihi ña cáhí í xuhun yóho ta xíní ñúhú cahndún chuun nu ná ña ná caja na ña. <sup>12</sup> Coto a quiáhvún ñamaní nuú ñayivi quehe núu na yohó sahá ña cúún da yúta. Joo xihín ña cájún xíní ñúhú jánahún nuú na cúú cuéntá Jesús ndá quiahva ndítahan caja na ta ndá quiahva ndítahan cahan na. Ta xíní ñúhú jánahún nu ná ndá quiahva ndítahan quihvi ini na ñayivi ta ndá quiahva ndítahan cándéé ini na Ndióxi. Ta víi uun cajún tóco ndihi ñaha já ná a cáhvi núu ini ñayivi sahun. <sup>13</sup> Nani ndátún saa í jan xíní ñúhú cahvún tuhun Ndióxi nuú na cúú cuéntá Jesús nu tácu na. Ta quiahvún tuhun ndéé ini na ta jánahún na. <sup>14</sup> Coto a ndíndójún sahá ña nasahan Ndióxi nuun tá naxica tahví na cúú profeta nu mé á sahun tá nachojó na sacuaḥa ndáha ná jinun.

<sup>15</sup> Xihín ndinuhu inún caja chúún cuéntá Ndióxi já ná cuu cuni tóco ndihi ñayivi ndá quiahva xica vahún xihín ñaha Ndióxi. <sup>16</sup> Cuéntá vaha coún xihín mún ta cuéntá vaha coún xihín ña jánahún nuú ñayivi. Ta xíní ñúhú coo ndacú inún xihín ndihi ña cajún. Jáchi tá ná cajún ña yóho já quea cacu ndaa ínimun ta jári cacu ndaa ínimā na xíní johu nu cáhun.

## 5

### *Jánaḥa Pablo nu Timoteo ndaja ndítahan caja da xihín na cúú cuéntá Jesús*

<sup>1</sup> Co ndítahan jánanún da sáhnú. Ña ndítahan cajún quea jácahun dá tá quiahva cáhun xihín tátún. Ta xíní ñúhú cajún xihín da yúta chága tá quiahva cájún xihín ñanún. <sup>2</sup> Ta xihín na sáhnú xíní ñúhú cajún tá quiahva cájún xihín nánún. Ta xihín na tacú xíní ñúhú cajún tá quiahva cájún xihín quiahvún. Víi uun cajún xihín ná ta a cáhvi núu inún saha ná.

<sup>3</sup> Xíní ñúhú chindeé ndó na cuáan tá co ndíní cúu na tá ta coo na vehe na. <sup>4</sup> Joo tá ín in ña cuáan ta ndúu jahyi ñá á ndúu jahyi ñání ña já quea ndítahan nuú na cán chindeé na ña. Jáchi táhan ini Ndióxi xihín ñayivi tá chindeé na tátá náná na ta xihín ña yóho chahvi na ñamaní nacaja tátá na xihín ná tá najacuahnu ñahá na. <sup>5</sup> Jáchi mé ña cuáan ña mé a ndaa coo na vehe ña chindeé na ña mé ña cán cúú ña cándéé chága ini ña Ndióxi. Ta ñuú ta ndiví xica tahví ña nu mé á ña ná chindeé a ña. <sup>6</sup> Joo ña cuáan, ña cája ña núu ña cúní mé cuití ña, ña cán cúú ña tátuhun ndii vatí tácu ña. <sup>7</sup> Ña cúní quea ná cahndún chuun yóho nuú na cán já ná a ñéhe iní yo jánaní na. <sup>8</sup> Jáchi ndá na co chindeé na táhan na ta ni co chindeé na na vehe na já quea náha cáxi a ña co cándéé ini na Jesucristo ta jandá núu chága cája na a juú ga na co cúú cuéntá Jesús.

<sup>9</sup> Tá ndúu na cuáan ta tá cúní na chindeé na na sacuaḥa veñuhu já quea cahyún quiví ná nuú tutu. Xíní ñúhú cacuu na na naxinu uní jícó cuia á chága ta xíní ñúhú cacuu na na nasahin xihín in tuhún yí. <sup>10</sup> Mé na yóho xíní ñúhú cacuu na na cahan vaha ñayivi sahá ña vaha cája na. Tátuhun tá nasandaa vaha na jahyi na á tá nandiquehe vaha na ñayivi xínu coo vehe na. Ta xíní ñúhú cacuu na na cája ndiví nuú na cúú cuéntá Jesús. Ta ndítahan coo tiahva na chindeé na ñayivi tá ndóho ini na. Tá cája na ña yóho xihín java ga ñaha vaha já cuu quehe ndó na ná chindeé na na sacuaḥa veñuhu.

<sup>11</sup> Joo a cáhyí tohún nuú tutu jan quiví na cuáan, na yúta chá jáchi tiahva náa casáhá ndiava ini na tandaha tucu na ta anda javí jándicoo na chuun cája na cuéntá Jesucristo. <sup>12</sup> Ta xihín ña yóho cája na cuachi nu Ndióxi jáchi coo najaxinu coo na tuhun nasahan na nu Ndióxi. <sup>13</sup> Ta jári casáhá xica nuu na tá vehe tá vehe ta ndúu na na jusá. Ta a juú ña cán cuití va vaha jáchi casáhá na ndahnda yuhu ná ta quihvi nuu na nuú co ndítahan coo na ta casáhá cahan na ña co ndítahan cahan na. <sup>14</sup> Sahá ña cán quea cáhí í xuhun ña vaha chága ná tandahá najihí cuáan, na yúta ta ná cacu jahyi na ta ná candaa vaha na vehe na. Ta xihín ña yóho a quiahva toho na ñamaní nuú na ihvi yo cahan núu na

saha ná. <sup>15</sup> Jáchí ndúu java najihí cuáan ta sa nacaxoo na nu íchi cuéntá Jesús ta nacasáhá na ndíco na tiñáhá sacuaḥa.

<sup>16</sup> Joo ndóhó, na cúu cuéntá Jesús tá íin ña cuáan nu ndo ndítahan chindeé mé ndó ña já queá ná nuná nuú java ga na cúu cuéntá Jesús chindeé na na cuáan, na coó na vehe.

<sup>17</sup> Na sacuaḥa, na cája chúun vaha na veñuhu ta cómí na cuéntá saḥá na cúu cuéntá Jesús, na cán cúu na ndítahan ndiquehe cuahá chága yahvi saḥá chuun cája na. Ta chága ví tá xíca nuu na jánaha na tuhun Ndióxi nuú ñayivi. <sup>18</sup> Jáchí já cáchí tuhun Ndióxi já: “A chícáun ñúnu yuhú tindiquí nani cája chúun rí sání rí trigo. Joo xíní ñúhú quiahvún ñamaní nu rí caxí rí ña.” Ta íin inga tucu nu cáchí a: “Da cája chúun ndítahan quehe da yahvi saḥá chuun cája da.”

<sup>19</sup> A cándúsa tohún na chícáan cuachi jatá in da sacuaḥa veñuhu tá ta co ndúu iví á uní testigo na sahan tuhun saḥá ña nacaja da cán. <sup>20</sup> Joo ndá na co cúni jándacoo cuachi cája na já queá xíní ñúhú jananún na nu táhyí ndíhi na cúu cuéntá Jesús já queá ná cayihví na java cán caja na cuachi. <sup>21</sup> Nu Ndióxi ta xihín nu Jesucristo xitoho í ta xihín nu táto Ndióxi sáhdá i chuun nu mún Timoteo ña ná cajún ña nacahyí i yóho. Tá jananún in da cúu cuéntá Jesús saḥá cuachi cája da xíní ñúhú jananún da vatí cúu dá da xíní táhan vaha xuhun. <sup>22</sup> Coto a chójó yachún ndáhún jiní in da cúni cacuu da sacuaḥa nuú na cúu cuéntá Jesús. Jáchí nu cuítí xíní ñúhú ndicani vaha inún saḥá ña cájún. Jáchí tá ná caja da cán cuachi já queá cahán java ñayivi ña íin vaha inún xihín cuachi cája da. Coto a cájún ña núu.

<sup>23</sup> Ta saḥá ña já cuítí quíhvi tisún saḥá ña cán co ndítahan cohún ticuú uun va. Joo ndítahan coho lohún vino.

<sup>24</sup> Ndúu java ñayivi ta náha cáxí táhyí cuachi cája na nuú ñayivi vatí camaní nahma na ña. Joo ndúu java ga ñayivi ta ñúhu jehé cuachi na joo vaxi quívi tá ndacanáha cuachi na. <sup>25</sup> Ta sa mé quiahva já ndacanáha cáxí táhyí ña vaha cája java ñayivi. Ta vatí ná caja jehé na ña vaha joo vaxi quívi ndacanáha nuú ña vaha nacaja na.

## 6

<sup>1</sup> Ta ndúu na cúu cuéntá Jesús ta cómí xitoho na cuéntá saḥá ná já queá xíní ñúhú caja cáhnu na xitoho na xihín ndinuhu ini na já ná a cáhan núu ñayivi saḥá quívi Ndióxi ta ni ná a quehe núu na ña jánaha nde. <sup>2</sup> Ta tá ndúu java na ta xitoho na cúu dá cuéntá Jesús já queá xíní ñúhú caja cáhnu na xitoho na saḥá ña cúu da cán da candeé ini Jesús. Ña ndítahan caja na cán queá caja ndíví vaha chága na nu sáhdá xitoho na caja na jáchí xíní ñúhú ndicuhun ini na ña tá cája ndíví vaha na nuú da cán já queá cája ndíví vaha na nuú ñani máni ná, da cúu cuéntá Jesús. Ña yóho queá xíní ñúhú jánahún nuú ñayivi ta xíní ñúhú cahndún chuun nu ná ña ná caja na ña.

### *Ñayivi, na jánaha ña co cúu ña ndaa*

<sup>3</sup> Ta ndá ñayivi tá jánaha na ña co cúu ña ndaa, ña co ndíque táhan vaha xihín tuhun nacahan Jesucristo, xitoho í nu yó ta ni co ndíque táhan vaha xihín tuhun Ndióxi <sup>4</sup> já queá na cán cúu ná na ndínehe jícó ndivaha mé ta co xíní na ni in ñaha. Ndiáva ini na cani táhan yúhu ná ta casáhá cáhíhvi ini na xihín ñayivi ta ndícuehe xihín táhan na. Cánahá na xihín ñayivi ta co candeé ini táhan na. <sup>5</sup> Ta co jándacoo na ña cáni táhan na saḥá ña najaca xíní túni na ta nandindójó na ña ndaa. Ta cúni na ndicuicá na xihín ña jánaha na nuú ñayivi saḥá Jesús. Candehún. Xíní ñúhú caxóun nuú na cán. <sup>6</sup> Vatí mé a ndaa tá ndíco yó íchi cuéntá Jesús cúu yó na cuicá ndivaha nani íin vaha iní xihín ña cómí yo. <sup>7</sup> Jáchí coó ñaha ñéhé tá naquixí ñuyiví yóho ta ni coó ñaha cuu cañehé cohó tá ná quiví. <sup>8</sup> Saḥá ña cán queá tá íin ña cuxú ta tá íin ña candixí já queá ndítahan coo vaha iní. <sup>9</sup> Joo na cúni ndicuicá co candeé na cahnu na nuú ña cúni yiquí cuñu na ta já ndícava na nuú cuachi. Ta xihín ña yóho casáhá ndicají ini na caja na cuahá nuú ña núu. Ta cája ña yóho ña ná ndíhi saḥa ná. <sup>10</sup> Ta saḥá ña cátóo ndivaha ñayivi jjuhún saḥá ña cán queá quixi cuahá ña núu jiní ná. Ndúu java na najándacoo na ña candeé ini na Jesús saḥá ña cátóo na jjuhún. Ta saḥá ña yóho nacasáhá ndóho ini na janda nuú co ndéé ga ini na.

*Ndítahan nuú na cúu cuéntá Jesús candico cáhnu na mé á*

<sup>11</sup> Candehún, Timoteo, da cúu cuéntá Ndióxi. Xíní ñúhú caxóun nuú tóco ndihi ña núu já ná candico cáhnún íchi cuéntá ña ndaa. Cajún ña vaha, ña cúni Ndióxi ta candeé inún Jesús. Xíní ñúhú quihvi inún ñani táhún. Quiahva ndeé inún tá ndóho inún ta vii cajún tóco ndihi ñaha. <sup>12</sup> Xíní ñúhú candico cáhnún íchi ña candeé inún Jesús. Coto a jándacoún íchi ña cañehe yohó cuhún coún indivi xihín Ndióxi. Jáchi saha mé ña jan nacana Ndióxi yohó tá nacaxi tuhún nuú cuahá ñayivi ña candeé inún Jesucristo. <sup>13</sup> Nu Ndióxi, mé á cája ña tácu tóco ndihi ñaha ndúu ñuyíví, xihín nu Jesucristo, mé á coó nayihví cahan ña ndaa tá nasandichi a nu Poncio Pilato, nu ndíví a cán sáhdá i chuun nu mún, Timoteo <sup>14</sup> ña ná cajún xihín ndinuhu inún tóco ndihi ña sáhdá Ndióxi nuun. Ta coto a ndíjama tohún ña jáchi quiahva já ñehe íni ñayivi jananí na yohó. Ta xíní ñúhú cajún ña yóho janda quiahva ná tandaa quivi quixi tucu Jesucristo, xitoho í. <sup>15</sup> Ta tá ná xinu coo quivi nasacu ini Ndióxi já caja mé á ña ná coo tóco ndihi ña yóho. Jáchi in tuhún Ndióxi cúu á ña yii ta cúu á xitoho nu tóco ndihi ñaha. Ta mé á cúu á jini nuú in in da cómi cuéntá sahá ñayivi ndúu ñuyíví. Ta mé á cúu á xitoho nuú ndihi da cúu xitoho nuú ñayivi ndúu ñuyíví. <sup>16</sup> Mé á cúu á in tuhún jini Ndióxi, ña a cúu quivi. Ta ni in ñayivi a cúu cativi yati nu íni mé á jáchi yéhe ndivaha nu íni mé á. Ta ni in ñayivi ndúu ñuyíví coó naxini na mé á jáchi a cuú cuni ñayivi Ndióxi. Ndítahan caja cáhnu í mé á anda ama cáa quivi jáchi a ndíhi toho sahá ña sáhdá mé á chuun. Já ná coo.

<sup>17</sup> Ndítahan nu mún, Timoteo cahndún chuun nuú na cómi cuahá ñaha cuicá ñuyíví yóho ña ná a cácuu na ñayivi catóo ndíñehe jícó mé. Ta xíní ñúhú cahndún chuun nu ná ña ná a candeé ini na ñaha cuicá cómi na jáchi cuu ndihi saha tóco ndihi ñaha cómi na. Ña ndítahan caja na quea candeé ini na Ndióxi, mé á quiahva tóco ndihi ñaha nu yo já ná cajii íni yo. <sup>18</sup> Cahndún chuun nu ná ña ná caja vaha na ta ná cayojó joho ña vaha cája na. Ta xíní ñúhú coo tiahva na cahnda java na ña cómi na xihín java

ga ñayivi. <sup>19</sup> Jáchi xihín ña yóho ñehe táhvi ná coo cuahá ñaha cuicá na indivi tá ná tandaa quivi cuhun na coo na xihín Ndióxi anda ama cáa quivi.

<sup>20</sup> Candehún Timoteo. Xíní ñúhú quehe cuéntá vahún ña jánaha i nuun. Coto a cúni johún tuhún ña cahan ñayivi ñuyíví jáchi coó saha toho a ta ni co xini na ña cahan na saha. <sup>21</sup> Jáchi java na cán cáchí na xini ndivaha na joo najándacoo na ña candeé ini na Ndióxi.

Ná caja Ndióxi cuahá ñamaní xihín ndihi ndó. Já ná coo.

## Carta ivi nacahyí Pablo nuú Timoteo

### *Chíndahá Pablo Ndióxi coo Timoteo*

<sup>1</sup> Yehe cúu Pablo ta cúu u da apóstol, da cája chúun cuéntá Jesucristo. Nacaxi Ndióxi yehe ta nachindahá mé á yehe caxi tuhun i tuhun vaha sahá Jesucristo nuú ñayivi. Jári nasahan Ndióxi tuhun a nuú ñayivi ña cán quéa tá cándéé ini na mé á já quéa cuhun na coo na xihin mé á anda ama cáa quivi. <sup>2</sup> Cáhyi i carta yóho nu mún, Timoteo jáchi cúun tátuhun jahyi mí i ta quihvi ndivaha ini i yohó. Ná caja cuaha Ndióxi, tátá yo xihin Jesucristo, xitoho í ñamaní xuhun ta ná tahnda ini a sahun ta ná caja mé á ña ná coo vaha inún.

### *Jácahan Pablo Timoteo ña ná ndicani da nuú ñayivi sahá Jesucristo*

<sup>3</sup> Ndiquiahva i ndixahvi nu Ndióxi saha mún, Timoteo jáchi ndicuhun ini i yohó tá xíca tahví i nu Ndióxi ñuú ta ndivi. Cája chúun vaha i cuéntá mé á tátuhun nacaja chúun tásahnu jícó i sanahá. Ta xini ña iin vaha ínimá i nu Ndióxi. <sup>4</sup> Ndicuhun ini i ndaja nasacu ndivahún ta natahnda inún sahá i tá naquee e cán vaxi i yóho. Jári yehe va cuni ndivaha i cuni tucu u yohó já ná chutú ndaa ini i xihin ña cáji ndivaha ini i. <sup>5</sup> Ndiquiahva i ndixahvi nu Ndióxi tá ndicuhun ini i ña mé a ndaa cándéé inún Jesucristo. Nu cuítí nacandéé cáhnu ini ná chéhun, Loida xihin nánún, Eunice Jesucristo ta quiahva já xini vaha i ña cándéé cáhnu inún mé á.

<sup>6</sup> Ña cán quéa jácahan i yohó ña ná ndicuhun inún caja chúun chágun xihin ña nañehe táhvun nu Ndióxi tá nachinúu i ndahá i jinun. <sup>7</sup> Jáchi co cuni Ndióxi ña ná cayihví yo. Já quéa nasahan ínimá yí á nu yo já ná nduu ndeé ini ta ná quihvi ini táhan í ta ná cahnu yo mí cañehe vaha í quiahva xihin á. <sup>8</sup> A cácahan toho nuun cahun tuhun vaha sahá Jesucristo, xitoho í. Ta a cácahan nuun saha mí i vatí ndácaan i vecaa sahá Jesucristo. Joo ña ndítahan cajún quéa quiahva ndeé inún tá ná ndoho inún sahá Jesucristo jáchi sahan Ndióxi ndeé mé á

nuun. <sup>9</sup> Najácaacu Ndióxi mí ta nacaxi a mí ña ná cacuu ñayivi yí cuéntá mé á. Ta a juú sahá ña nacaja vaha í joo nacaxi a mí jáchi nasacu ini a caja ñamaní xohó anda tá cámaní cava sahá saha ñuyiví. Sahá ña cán quéa nachindahá a Jesucristo quivi a sahá cuachí. <sup>10</sup> Ta anda viti naxinu coo ña nasacu ini a jáchi naquixi Jesucristo ñuyiví yóho ta naxihi a ndica crúxu. Ta sahá ña nacaja mé á co ndítahan yihví yo quivi jáchi cuhun i coo í xihin mé á anda ama cáa quivi tá ná cándéé ini tuhun vaha cáhan sahá Jesucristo.

<sup>11</sup> Nacaxi Ndióxi yehe ná cacuu u in apóstol cuéntá mé á ña ná jánaha i tuhun vaha sahá Jesús nuú ñayivi, na coo naquixi chichi Israel. <sup>12</sup> Ta vatí ndóho ini i sahá ña yóho joo co cácahan toho nuú i jáchi xini vaha i yo cúu Jesucristo, mé a cándéé ini i. Nandiquiahva i mí i ndaha mé á ta xini vaha i ña candaa mé á yehe anda quiahva ná tandaa quivi quixi tucu a ñuyiví yóho.

<sup>13</sup> Ta jácahan i yohó ña ná candico cáhnún ichi ndaa, ña najánaha i nuun. A jándicoún ña cándéé inún Jesucristo ta a jándicoún ña quihvi inún ñayivi jáchi in nanduú xihin Jesucristo sahá ña cándéé ini mé á. <sup>14</sup> Sahá ña ndácaan ínimá yí Ndióxi ini in in yó ta sahá ña chindeé a mí sahá ña cán quéa xini ñuhú cacu vahún ña nasahan Ndióxi nuun.

<sup>15</sup> Sa xini vahún ña najándicoo tóco ndihi na cúu cuéntá Jesús nduu estado Asia yehe. Tañu mé na cán ndácaan Figelo xihin Hermógenes. <sup>16</sup> Cuni ña ná tahvi ini Ndióxi sahá Onesíforo xihin na vehe da jáchi cuahá tañu nachindeé da yehe ta já nandivaha ini i. Ta coo nacacahan nu da sahá ña ndácaan i vecaa. <sup>17</sup> Ña nacaja da quéa nandinducú da yehe tá nasaa da ñuu Roma yóho ta coo nandiquehe ndeé da anda quiahva nandinehe dá yehe. <sup>18</sup> Ná tahvi ini Ndióxi sahá da cán tá ná ndindaa quivi quixi tucu Jesucristo ñuyiví yóho. Ta sa xini vahún ña nachindeé da yehe tá nasahin i ñuu Efeso.

## 2

*Ná quiahva ndeé ini tá ndóho ini sahá Jesucristo*

1 Ta mún, Timoteo cúun tátuhun jahyi mí i ña cán quea jácahan i yohó ña ná coo ndacú inún xihín ndée ña nasahan Jesucristo nuun. 2 Sa xini johún tuhun vaha naçaxi tuhun i nuú cuahá ñayivi. Ta viti ndítahan nu mún jánahún ña cán nuú java ñayivi, na cúu ñayivi ndísáhnú ini já ná cúu jánahá ná ña nuú java ga ñayivi.

3 Quiahva ndeé inún tá ndóho inún sahá Jesucristo jáchi cúun tátuhun in soldado vaha cuéntá mé á. 4 Jáchi in soldado cája cuití da ña sáhdá jefe da nu dá ta co cája da inga ga ñaha jáchi cúni da ña ná tahan ini jefe da sahá ña cája da. Tá quiahva cája mé soldado yóho quiahva já ndítahan nu yo caja í. 5 Jári sa xini vaha ndó ndaja cája da sájíquí pelota. Tá co sájíquí vií da já quea a cuú quee vaha da. Quiahva já cúu á xihín mí jáchi tá co cája í ña cúni Ndióxi já quea a cuú quee vaha í. 6 Tá ndíhi ini in da xútu já quea ndítahan nu dá jáquee da nu cuítí ñaha naxutu da. Ta quiahva já ndítahan ndíhi ini caja chúun í cuéntá Jesucristo já quea cuu ndiquehé ña quiahva Ndióxi nu yo. 7 Ndicaní vaha inún saha tóco ndíhi ña naçahan i xuhun ta já chindeé Ndióxi yohó candaa vaha inún tóco ndíhi ña cáchi i xuhun.

8 Xini ñúhú ndicuhun inún Jesucristo, mé á naquixi chichi David. Najánditacu Ndióxi mé á tá naxihí a. Ta viti cáxi tuhun i tuhun vaha saha mé á nuú ñayivi. 9 Ta ndóho ndivaha ini i sahá tuhun cáhan i nuú ñayivi. Nacató na yehe xihín cadena ta nachicaan na yehe vecaa tá quiahva cája na xihín in da quini. Joo a cuú caja na ña yóho xihín tuhun Ndióxi jáchi cuaha chaga ñayivi cáhan na sahá Jesús viti. 10 Ña cán quea ín tiaha i ndoho ini i sahá ñayivi, na naçaxi Ndióxi cacuu na cuéntá mé á. Jáchi cúni Jesucristo jácaçu a ndíhi na cándéé ini mé á já ná coo na xihín mé á anda ama cáa quivi. Ta ñúchí ndivaha cán. 11 Ña cáchi mé ña yóho cúu á ña ndaa:

Tá ná quiví sahá Jesucristo já quea cuu canduú xihín mé á anda ama cáa quivi.

12 Tá ná caja ndeé ini ña ndóho ini sahá Jesucristo já quea vaxi quivi cahnda í chuun xihín mé á.

Tá ná cachí ña co cúu yo cuéntá Jesucristo já quea cachi mé á ña co xini toho a mí.

13 Vatí ná ndindójó yo sahá Jesucristo joo a ndíndójó toho mé á saha yo,

jáchi mé a ndaa jáxinu coo mé á tuhun sahan nu yó caja.

*Táhán ini Ndióxi xihín da cája chúun vaha cuéntá mé á*

14 Ña yóho ndítahan jándicuhun inún ñayivi. Cahndún chuun nu ná ña ná a cáni táhan yuhu ná saha ndá tuhun cúu ña vaha chaga jáchi coo saha cúu á. Joo ña cája na cán quea játiví na xini túni mé ñayivi xini johó ña cán. 15 Ndinuhu inún caja chúun vahún cuéntá Ndióxi já ná tahan ini mé á xuhun. Tá ná cajún ña yóho já quea a cácahan nuun jáchi ndinuhu ña ndaa najánahún nuú ñayivi. 16 A quíhvi nuún ndituhún xihín ñayivi tá ndituhún quíhvi na jáchi quéta nuu chaga na tañu cuachi tá ndituhún quíhvi na. 17 Ta java tañu ña cáhan xihín táhan na jan jándihíhvi a ñani táhan na jáchi tá quiahva jándíhi cuehe táhyi sahá yiquí cuñu ñayivi quiahva já jándíhi tuhun cáhan na sahá ñayivi. Já nandoho Himeneo xihín Fileto. 18 Nacaxoo ndíví da nu íchi ña ndaa ta viti jánahá da ña tuhún jáchi cáchi da ña sa nayaha va quivi tá nditacu tucu na sa naxihí. Jájana da jiní java ñayivi ña ná a cándéé ga ini na Jesús. 19 Joo Ndióxi cáhan ña ndaa ta a cuú ndijama mé á ña naçahan. Ta já cáchi tuhun Ndióxi sahá ñayivi cuéntá mé á: “Xini Ndióxi ndá na cúu na cuéntá mé á.” Já cáchi tucu tuhun Ndióxi já: “Tá ná cachí ñayivi ña cándéé ini na Jesucristo, xitoho na já quea ndítahan nu ná jándicoo na cuachi cája na”, cáchi tuhun Ndióxi.

20 Ta viti ná cacu u in quiahva nuun: ini in vehe cáhnu ín ñaha jihun cuáan xihín ñaha jihun cúxú. Jári ñúhu ri ñaha naçavaha xihín yito ta ñúhu ri ñaha naçavaha xihín ndahyi. Ta java ña cán ín javí a ta java ña cán ín chuun a ndijáá ní quivi. 21 Tá najándicoo í cuachi cája í já quea cacuú ñayivi vií nu Ndióxi. Ta cacuú tátuhun in coho vaha jáchi cuu caja chúun í cuéntá Ndióxi ta já cuu coo tiaha í caja í tóco ndíhi ña vaha.

<sup>22</sup> Cama chá caxoún nuú cuachi ña ndiáva ini da tacú caja da. Ta candico cáhnún íchi cuéntá ña ndaa ta candeé inún Ndióxi ta quihvi inún ñayivi ta coo vaha inún xihin ná. Tá ná cajún ña yóho in cacuún xihin tóco ndihi na cúu cuéntá Jesús, na ín vií ínimá nu Ndióxi jáchi xíca na nu Ndióxi ña ná chindeé a na. <sup>23</sup> A quihvi nuún nditúhún quihvún xihín ñayivi jáchi tá ná cajún ña yóho já queá vaxi quivi tá casáhá caní táhan na xuhun. <sup>24</sup> Ta ndá da ndíco íchi cuéntá Jesús co ndítahan nu dá nducú da cuachi xihín ñayivi. Ña ndítahan caja da queá caja vaha da xihin tóco ndihi ñayivi ta ná cacuu da in da tiahva jánaḥa vaha ñayivi ta ná coo cáhnu ini da xihin ná. <sup>25</sup> Ta co ndítahan nu dá ndiñehe jíco da mé dá nani jánaḥa da nuú ñayivi, na sáá ini xihín tuhun Ndióxi jáchi tiahva náá caja Ndióxi ña ná ndicó coo ini na ta já candaa ini na ña ndaa sahá Jesucristo. <sup>26</sup> Jáchi tá ná ndicó coo ini na já queá janí ná ndáḥa tiñáhá sacuaḥa jáchi nasacomí mé rí cuéntá saḥa ná ña ná caja na ña cúni mé rí.

### 3

#### *Ña tandaa caja ñayivi tá jalóho cúni ndihi sahá ñuyívi*

<sup>1</sup> Ta ndítahan candaa vaha inún, Timoteo ña tá ná cayati quivi quixi tucu Jesucristo ñuyívi yóho já queá ndoho ndivaha ini na cúu cuéntá Jesús. <sup>2</sup> Jáchi vaxi quivi tá caja ñayivi cuahá ndivaha cuachi. Cuahá ñayivi cajihnda ná ta quihvi ndivaha ini na jjuhún na. Ta já caja cáhnu na mé ná ta ichi ndivaha coo ini na ta candají na Ndióxi ta a cúni johó na nuú caḥan tátá náná na xihin ná. Ta ni ndixahvi a ndiquiahva na nu Ndióxi ta ni a cája cáhnu na mé á. <sup>3</sup> Ta a quihvi ini táhan na ta ni a cája cáhnu ini saḥa táhan na. Ta caḥan jíquí na saḥa java ga ñayivi ta catúhún na. Ta a cuú caḥnu na nuú ña xíca ini na caja na. Xíxi coo ini na xihin ñayivi ta candají na tóco ndihi ña vaha. <sup>4</sup> Jíco túhún táhan na. Ta cacuu na ñayivi cama jiní. Ta caja ichi ndivaha ini na. Catóo chága na cájii ini na xihin ñaha ñuyívi yóho a juú ga xihín ñaha Ndióxi. <sup>5</sup> Ta caja na tá quiahva cája na cúu cuéntá Ndióxi joo chijehé tuhun na saḥa Ndióxi,

mé á sahan ndée nu ná caja na ña cúni mé á.

Caxoún nuú ndihi na cája cuachi yóho. <sup>6</sup> Jáchi tañu na jan ndúu java ñayivi, na quihvi vehe tá vehe jándahvi na najihí quihvi xihín ña jánaḥa na. Ta mé najihí yóho ndójo cuahá ndivaha na cuachi jáchi nayaha quiahva cája na tá nuú ña núu xíca ini na caja na. <sup>7</sup> Ta mé najihí yóho jácuaha ta jácuaha na joo co xínu coo nu ná candaa ini na ña ndaa. <sup>8</sup> Saḥahá ndivaha nasanduu ivi da tají. In da naní da Janes ta inga da naní da Jambres. Tá quiahva nasaji nuu da cán nuú Moisés quiahva já sáji nuu java ñayivi nuú ña ndaa viti. Ña núu ndácaan xíní túni na ta coó naxeen na candeé ini na Jesucristo. <sup>9</sup> Joo vaxi quivi tá a cúu ga jándahvi na ñayivi jáchi mé quivi cán candaa cáxi ini ñayivi ndaja tóntó nacaja na cán. Já nandoho Janes xihin Jambres saḥahá jáchi nacandaa cáxi ini ñayivi ña nacaja núu da xihin Moisés.

#### *Sáhdá tucu Pablo chuun nuú Timoteo*

<sup>10</sup> Joo sa xíni vahún tá quiahva nacaja i tá najánaḥa i nuun. Ta sa xínun ña cája i catacu u xihín ña nasacu ini i caja i chága chí nuu. Ta sa xínun ndaja candeé ini i Jesús. Ta sa mé quiahva já xíni vahún ña co xójo ini i xihin ñayivi. Ta sa xíni vahún ña quihvi ini i tóco ndihi ñayivi. Ta xínun ndaja nasahan ndeé ini i <sup>11</sup> tá nacaja xíxi na xihin i ta ndaja najándoho na ini i tá nasahin i ñuu Antioquía xihin ñuu Iconio xihin ñuu Listra. Joo nachindeé Ndióxi yehe ta natavá mé á yehe nu tóco ndihi ña nandoho i. <sup>12</sup> Ta mé a ndaa ndoho tá ndoho ini ñayivi tá cúni na candico cáhnu na íchi cuéntá Jesús. <sup>13</sup> Ta ñayivi quini, mé na jándahvi ñayivi cája chága ví na cuachi ta co xíni na ndájá xínu coo nuú ndihi cuachi cája na. Xíca na jándahvi na ñayivi ta janda mé na cán najándahvi ñayivi.

<sup>14</sup> Joo jácaḥan i yohó, Timoteo ña ná a jándicoún ña ndaa, ña nacatiahvún tá najácuahún xihin nde jáchi xíni vahún ña cúu á ña ndaa. Ta sa xíni vahún ndá ñayivi cúu nde. <sup>15</sup> Ta cándaa vaha inún tuhun Ndióxi jáchi anda tá lohún najácuahún ña. Ta mé tuhun Ndióxi cuu jánaḥa yohó cajún ña cúni mé á ta cuu jácacu a yohó



jáchi cándeé inún Jesucristo. <sup>16</sup> Nacahyí ñayivi tóco ndihi tuhun Ndióxi yóho jáchi najácahan Ndióxi inima ná ña ná caja na ña. Ta mé tuhun Ndióxi yóho chindeé a mí jáchi jánaha mí caja í ña cuni Ndióxi ta jánani ri a mé ví tá co cája vaha í. Ta jándicaca vaha mí tá co xíca vaha í íchi cuéntá Ndióxi. Ta sa mé quiahva já jánaha mí ña ná cacuú ñayivi ndaa, na co cája cuachi. <sup>17</sup> Já queá ná cuu nduu ndacú chága ini na cándeé ini Ndióxi xihín tuhun mé á ta xihín ña yóho cuu coo tiahva na caja na tá nuú ña vaha.

#### 4

<sup>1</sup> Vaxi quivi quixi tucu Jesucristo ñuyiví yóho cacomí a cuéntá sahá yo ta mé já caja vií a sahá na tácu xihín sahá na sa naxihi. Sahá ña cán queá nu Ndióxi xihín nuú Jesucristo, xitoho í sáhdá i chuun nu mún, Timoteo <sup>2</sup> ña ná coo tiahvún cahun tuhun Ndióxi nuú ñayivi ní tiempo tá núná nuún á tá coó. Ta ndítahan nuun cavún jiní na cája cuachi ta jácahún na ña ná caja na ña cuni Ndióxi. Ta ndítahan quiahvún tuhun ndeé ini na. Ta vií vií jánahún tuhun Ndióxi nu ná ní tiempo. <sup>3</sup> Jáchi vaxi quivi tá a cándusa ga ñayivi cuni johó na tuhun ña ndaa. Joo ndihi ini na nducú cuahá na maestro, da jánaha ña xíca ini mé ná taa johó na. <sup>4</sup> Ta a cándusa na taa johó na ña ndaa jáchi cájji chága ini na taa johó na ña tuhún cuéntá ñayivi ñuyiví. <sup>5</sup> Sahá ña cán queá sáhdá i chuun nu mún, Timoteo ña ná cañehe vahún quiahva xihín ña cajún. Ta quiahva ndeé inún tá ná ndoho inún. Caxi tuhún tuhun vaha sahá Jesús nuú ñayivi xihín nd-inuhu inún. Ta xíní ñuhú jáxinu coún tóco ndihi chuun nasahan Ndióxi nuun cajún.

<sup>6</sup> Sa íin tiahva i joco i mí i nu Ndióxi. Sa xíní vi ña sa nacayati quivi quivi vi. <sup>7</sup> Nacaja chúun vaha i cuéntá Ndióxi tátuhun cája chúun vaha in soldado nu jefe da. Najáxinu coo ndihi i chuun nasahan Ndióxi nuú i tátuhun cája in da xínu tá sa naquee vaha da. Ta nandico cáhnu i íchi ña cándeé ini i Jesús. <sup>8</sup> Ta viti ndáti i casaa quivi caja vií Jesucristo, xitoho í saha tóco ndihi ñayivi. Mé tiempo cán ndiquehe e ña quiahva mé á nuú i sahá ña nacaja i ña ndaa. Ta quiahva já caja Jesucristo, mé á cúu ña ndaa xihín java ga ñayivi, mé na

cájji ini ndáti na casaa quivi quixi tucu a ñuyiví.

#### *Cáhan Pablo cuéntá mé da viti*

<sup>9</sup> Ndihi inún quixi camún coto nihnún yehe. <sup>10</sup> Najándicoo Demas yehe jáchi nacatoo chága da ñaha ñuyiví yóho ta cuahan da ñuu Tesalónica viti. Ta naquee Crescente cuahan da estado Galacia ta já naquee Tito cuahan da chí estado Dalma-cia. <sup>11</sup> In túhún Lucas íin da xihín i. Ndin-ducún Marcos ná quixi da xuhun tá ná quisún yóho jáchi cuu chindeé vaha da yehe xihín chuun cája i yóho. <sup>12</sup> Sa nachindahá i Tiquico ñuu Efeso. <sup>13</sup> Tá ná quisún yóho cajún ñamaní cañehún cotó ndeé e ña najándicoo i ñuu Troas vehe Carpo. Ta jári libro va cañehún ña quisún yóho. Ta a ndíndójún cañehún ní quiti ña nacahyí i nuun.

<sup>14</sup> Á co ndícuhun inún Alejandro, da cája chúun cáni caa. Cuahá ndivaha ña núu nacaja da xihín i joo vaxi quivi tá chahvi da sahá, caja Jesucristo, xitoho í. <sup>15</sup> Cuéntá coún xihín dá jáchi cándají ndivaha da tuhun Ndióxi, ña jánaha yó nuú ñayivi.

<sup>16</sup> Tá nandiquehe e sahá i nu cuítí nuú na jutixia ni in ñayivi coo nachindeé yehe. Tóco ndihi na najándicoo na yehe. Ná caja cáhnu ini Ndióxi sahá ña nacaja na cán. <sup>17</sup> Joo Ndióxi queá nachindeé a yehe ta nasahan ndeé á nuú i ña ná cuu caxi tuhun i tuhun vaha sahá Jesús ná cuni johó tóco ndihi na coo naquixi chichi Israel. Tá nachindeé Ndióxi yehe já cúu á tátuhun nacacu yehe yuhú león. <sup>18</sup> Ta cándeé ini i ña jácacu a yehe nuú ndihi ña núu. Ta candaa vaha Ndióxi yehe anda quivi cuhun i indivi coo i xihín mé á nu cahnda Ndióxi chuun anda ama cáa quivi. Cóho caja cáhnu í mé á anda ama cáa quivi. Já ná coo.

#### *Ndíndayí Pablo na cúu cuéntá Jesús*

<sup>19</sup> Chindahá i Ndióxi coo Prisca xihín Aquila xihín na vehe Onesíforo. <sup>20</sup> Nacandoo Erasto ñuu Corinto. Ta nacandoo Trófimo ñuu Mileto jáchi quihvi da. <sup>21</sup> Ndihi inún quisún yóho tá camaní xinu coo tiempo vixi. Eubulo xihín Pudente xihín Lino xihín Claudia chindahá na Ndióxi coún. Ta jári ndihi na cúu cuéntá Jesús ñuu yóho chindahá na Ndióxi coún.

<sup>22</sup> Ná coo Jesucristo, xitoho í xuhun. Ná  
caja Ndióxi cuahá ñamanj xihín ndihi ndó.

## Carta nachindahá Pablo nu Tito

### *Cáhan Ndióxi Pablo xihin Tito*

<sup>1</sup> Yehe cúu u Pablo, da caja chúun cuéntá Ndióxi ta cúu u in apóstol cuéntá Jesucristo. Nachindahá Ndióxi yehe caxi tuhun i tuhun vaha saha mé á nuú ñayivi ña ná candeé ini na mé á. Ta já ná candaá ini na ña ndaa saha mé á jáchi nandicaxi a na. <sup>2</sup> Ta ndáti tiahva na cuhun na coo na xihin mé á anda ama cáa quivi jáchi já nasahan Ndióxi tuhun a nu yó tá cámani cava sáhá saha ñuyivi. Ta co cáhan Ndióxi ña tuhun. <sup>3</sup> Ta viti naxinu coo quivi nasacu ini Ndióxi jána ha nuú ñayivi ndá quiahva cuu candeé ini na mé á. Ta viti ndójo i chuun ña nasahnda Ndióxi nuú i ña ná caxi tuhun i tuhun vaha saha Jesucristo nuú ñayivi, mé a jácacu mí. <sup>4</sup> Chindahá i tutu yóho nu mún, Tito, da cúu tátuhun jahyi mí i jáchi in nuú candeé ini Jesucristo. Ta xíca tahvi i nu Ndióxi, tátá yo xihin nuú Jesucristo, xitoho í, mé a jácacu mí ña ná caja cuahá ñamaní xuhun ta ná caja ña ná coo vaha inún.

### *Chuun nacaja Tito isla Creta*

<sup>5</sup> Najándicoo i yohó isla Creta jan ña ná jáxinu coun chuun ña najándicoo ñahñu i jan. Ndítahan ndicasún na sacuahá nuú na cúu cuéntá Jesús in in ñuu tá quiahva nandicani i nuun cajún. <sup>6</sup> Ta mé da sacuahá yóho ndítahan cacuu da ñayivi vaha, da a cúu ñehe ini ñayivi jánani na sahá ña caja da. Ta ndítahan nu dá cacuu da da coo inga ñaha xihin ta in túhún ñájihí da ndítahan coo. Ta ndítahan nuú jahyi da candeé ini na Ndióxi. Ta co ndítahan nuú jahyi da caja na ña núu joo ndítahan nu ná candúsa na caja na ña cáchi náná tátá na já ná a cúu chícáan ñayivi cuachi jata ná. <sup>7</sup> Jáchi ndá da cúu da sacuahá cája chúun da cuéntá Ndióxi sahá ña cán queá ndítahan cacuu da in ñayivi ndaa. Ta co ndítahan nu dá caja ichi ini da ta ni co ndítahan nu dá caja cama ini da xihin ñayivi. Ta ni ná a cacuu da da xihí ta ni ná a cátóo da caní táhan da xihin ñayivi

ta ni ná a cátóo da ñehe cuaha dá jiuhún. <sup>8</sup> Ña ndítahan nu dá caja da queá caji ini da ndiquehe vaha da ñayivi vehe da ta ná caja da ña vaha cuití va ta ná cacuu da da ndísáhnú ini, da cañehe vaha quiahva. Ta ndítahan nu dá caja da ña ndaa cuití va ta ná candico cáhnú da ichi cuéntá Ndióxi ta ná candaca vií da yiquí cuñu da ná a caja da cuachi. <sup>9</sup> Ta ndítahan nu dá cativi tuun da ña ndaa sahá Jesucristo, ña nacatiahva da já queá cuu chindeé da ñayivi xihin ña ndaa jána ha da nu na. Ta xihin mé tuhun vaha yóho cuu jáxinu da ini java ga ñayivi, na cáhan núu sahá tuhun Ndióxi.

<sup>10</sup> Jáchi cuahá ñayivi co cuni na caja na ña cáchi tuhun Ndióxi. Ta tañu na yóho ndúu cuahá na Israel. Coó saha toho tuhun cáhan na ta xihin ña yóho jándahvi na ñayivi. <sup>11</sup> Yuhú na yóho ndítahan chicají jáchi xíca na jájaca na jiní ñayivi ta janda tóco ndihi na ndúu vehe nacava na jiní ná xihin ña co cúu ña ndaa já ná ñehe cuahá na jiuhún jata ñayivi jándahvi ñaha na.

<sup>12</sup> Ta tañu na yóho nasahin in profeta ta já nacachi da já sahá ñayivi ñuu da, na ndúu isla Creta cán: “Na ndúu Creta cáhan na ña tuhún ní tiempo. Yucú na ta ndehé na ta júsá ndivaha na caja chúun na”, nacachi da. <sup>13</sup> Ta ña ndaa cúu ña nacahan da cán saha ná. Ña cán queá ndítahan nuun jánani vahún na ña ná candeé cáhnú ini na Jesús <sup>14</sup> ta ná a táa johó na cuéntó ña ndícani ñayivi Israel nu ná jáchi ña quixi jiní mé va na queá. Ta ná a táa johó na nu cáhan ñayivi, na nacaxoo nuú ña ndaa.

<sup>15</sup> Ta tá ndácaan vií xini túni ñayivi já queá tóco ndihi ñaha cúu á ñaha vií nu ná. Joo tá co cándúsa ñayivi Ndióxi ta ndácaan ña núu xini túni na já queá tóco ndihi ñaha cúu á ña núu nu ná jáchi co in vií inima ná xihin xini túni na. <sup>16</sup> Vatí cáchi na yóho ña candeé ini na Ndióxi joo xihin ña núu caja na náha ña mé a ndaa co candeé ini na mé á. Sáa ndivaha ini na ta a xeén toho na caja na ña ndaa sahá ña cán queá ni in ñaha vaha a cuú caja na.

## 2

*Ndítahan jána ha yo tuhun vaha sahá Jesús nuú ñayivi*

<sup>1</sup> Ta ndítahan nu mún, Tito jánahún ñayivi ndaja caja na ña ndaa, ña cáchí tuhun Ndióxi caja na. <sup>2</sup> Jánahún na sacuahá ña ndítahan cacuu na ñayivi ndisáhnú ini, na ín toní ñúhú ñayivi xihín, na ñéhe vaha quiahva xihín ñaha. Ta ndítahan candeé vaha ini na Ndióxi ta ndítahan quihvi ini na ñayivi ta ndítahan coo ndacú ini na já ná cuu candeé ini na tá ná ndoho ini na. <sup>3</sup> Ta quiahva já ndítahan coo toní ñúhú najihí sacuahá xihín ñayivi. Ta co ndítahan cacuu na najihí tuhún ta ni ná a cacuu na na xihí. Jáchi ndítahan nu ná cacuu na na ín toní ñúhú ñayivi xihín sahá ña vaha cája na. <sup>4</sup> Ta ndítahan jánahá na najihí yúta ña ná quihvi ini na yí ná xihín jahyi na. <sup>5</sup> Ta ndítahan cahnu na mé ná ta ndítahan cacuu na ñayivi vii ta ná candaa vaha na vehe na ta ná caja na ña vaha cuití va. Ta ndítahan candúsa na caja na ña sáhná yí ná nu ná. Tá cája na tóco ndihi ña yóho já queá a ñéhe ini ñayivi cahan núu na saha tuhun Ndióxi.

<sup>6</sup> Ta quiahva já ndítahan jácahún da tacú ná coo ndisáhnú ini da. <sup>7</sup> Xihín ña cájún jánahún nu ná ndaja caja na ña vaha. Ta xini ñúhú jánahá ndisáhnú ña yóho nu ná ta ná cajún ña xihín ndinuhu inún. <sup>8</sup> Ta ná cahún ña vaha cuití va já queá a cúu chican ñayivi cuachi jatun. Ta xihín ña yóho cacahan nu na co cúní yohó jáchi a cúu cahan ihvi ná saha ndihi ndó, na cúu cuéntá Jesús.

<sup>9</sup> Ta jácahún ndá na cája chúun xihín xitoho na ña ná caja na tóco ndihi ña sáhná xitoho na nu ná jáchi xini ñúhú coo toní ñúhú na xihín ná ta ná a ndúcú ñéhe ichi na tuhun nuú xitoho na. <sup>10</sup> Ta ná a cája cuíhná na nu ná joo ná cacuu na ndinuhu ñayivi ndaa. Ta xihín ña yóho náha ndá quiahva ndató ndivaha cúu tuhun Ndióxi, ña cahan saha mé á jácaacu a mí.

<sup>11</sup> Najánañá Ndióxi mí ña cúní a caja cuahá ñamaní xihín ñayivi ta ín tiañva mé á jácaacu a tóco ndihi ñayivi. <sup>12</sup> Ta jánahá mé á nu yo ña ndítahan jándicoo í tóco ndihi ña núu, ña xica ini caja í ñuyiví yóho. Jáchi ndítahan nu yo cahnu í mí ta ná caja í ña ndaa cuití va ta ná candico cáhnú í ichi cuéntá Ndióxi. <sup>13</sup> Ta cáji ini nani ndátí tiañva í xinú coo quivi ndicó coo tucu Jesucristo xihín ndéé á. Ta cúu á Ndióxi cáhnú

ta jácaacu a mí. <sup>14</sup> Nandiquiahva Jesucristo mé á quivi a sahá ndihí jáchi cúní a jácaacu a mí ná a cája ga yo ña núu. Ta cúní a jándoo a tóco ndihi cuachí já ná nduú ñayivi cuéntá mé á ña ná ndihi ini caja í ña vaha.

<sup>15</sup> Ndítahan jánahún tóco ndihi ña yóho nuú ñayivi ta jácahún na ña ná caja na ña naçahyí yóho. Ta ndítahan nu mún jánanún ñayivi cája cuachi jáchi ín sahnú cahdún chuun nu ná. Coto a quiahvún ñamaní nuú ñayivi quehe núu na yohó.

### 3

#### *Ña ndítahan caja na cúu cuéntá Jesús*

<sup>1</sup> Xini ñúhú jándicuhún inún na cúu cuéntá Jesús ña ná coo johó na nu sáhná na jutixia nu ná. Ta ná coo tiañva na caja na ndá ña naçuu nani cúu á ña vaha. <sup>2</sup> Ta xini ñúhú cahún xihín ná ña ná a cahan núu na sahá inga ñayivi ta ná a cáni táhan na xihín inga na joo vii caja na xihín ná. Ta ná a ndíñehe jícó na mé ná nuú ndihi ñayivi.

<sup>3</sup> Jáchi ndítahan ndicuhún ini ña tá cámaní ndihví ichi cuéntá Jesús já naçaja í cuahá nuú cuachi. Quihví naçajaja í ta coo naçaja í ña cúní Ndióxi. Naçandúsa í ña tuhún, ña naçachi na jándahvi mí. Ta naçajaja í ta nuú ña núu jáchi nandiava ini yo caja í ña ta mé cuachi naçahnda chuun nu yo. Tóco ndihi quivi naçajaja í ña núu ta naçacuú ñayivi ihvi ini. Naçandají ñayivi mí ta ndaja mí naçandají táhan í viti. <sup>4</sup> Anda jáví Ndióxi, mé a jácaacu mí najánañá nu yo ña táhvi ini a saha yo ta quihvi ini a mí. <sup>5</sup> Sahá ña cán queá najácaacu a mí. Ta coo naçajaja ña sahá ña vaha naçajaja í. Joo najácaacu a mí jáchi táhnda ini a saha yo. Najándoo a cuachí ta xihín ña yóho naçajaja ínima yí Ndióxi ña nanduú ñayivi saá, na xica ichi saá viti. <sup>6</sup> Naxihí Jesucristo saha yo ña ná jácaacu a mí ta xihín ña yóho naçhutú ndaa ínima yo xihín ínima yí mé á. <sup>7</sup> Naçajaja Ndióxi ñamaní uun xihín yo ña ná canduu ndaa yó nu mé á sahá ña cán queá ndátí tiañva í cuhún yo coo í xihín mé á anda ama cáa quivi.

<sup>8</sup> Ta tóco ndihi ña cáhyí yóho cúu á ña ndaa. Sahá ña cán queá cúní ña ná ndinuhu inún jánahún ña yóho nuú ñayivi, na cúu cuéntá Jesús ña ná ndihi ini na caja na ña

vaha. Jáchi ña ñacahyí i yóho cúú á ña vaha ta cuu chindeé a tóco ndihi ñayivi. <sup>9</sup> Joo coto a quíhvi nuún nditúhún xihín ñayivi cáhan tuhun quíhvi, ña ndícani sahá chichi tásáhnú jícó yó. Ta a ndíhvi ndó caní táhan yúhu ndó xihín ná saha ley Moisés jáchi coó saha toho ña yóho ta mé a uun va quéa caní táhan ndó xihín ná.

<sup>10</sup> Tá ín ín na cúú cuéntá Jesús ta tá cúní na caní táhan na xihín java ga na cúú cuéntá Jesús, xíní ñúhú jánanún na ña ná a cája ga na ña yóho. In á ivi tañu cuití va cahún xihín na ta tá co cúní na cuni johó na ña cáhun xihín ná já quéa tavún na ña ná cuhun na.

<sup>11</sup> Jáchi sa xíní vahún ña nandeta nuu ña núu xíní túní ná ta sa xíní vaha na ña cája na cuachi.

#### *Sáhdá Pablo chuun nu Tito*

<sup>12</sup> Tá ná chindahá i Artemas á Tíquico nuun já quéa ndíhi inún cuhun ñuu Nicópolis jáchi cán cája i cuéntá coo i tiempo vixi. <sup>13</sup> Xíní ñúhú ndinducún ndaja cuu chindeún Apolos xihín Zenas, mé da tiahva ley. Quiahvún ñaha nu ná já ná a ndímaní ñaha tá ná quee na cuhun na viaje na.

<sup>14</sup> Ta ndítahan nu ndíhi na cúú cuéntá Jesús jácuaha na ndaja caja na ña vaha xihín java ga ñayivi. Ta ndítahan nu ná chindeé na ndá ñayivi nacuu na ndímaní ñaha nu. Tá ná caja na ña yóho já quéa a cóo uun va na ñuyíví yóho.

#### *Ndíndayí Pablo Tito*

<sup>15</sup> Tóco ndíhi na ndúu xihín i chindahá na Ndióxi coún ta chindahá nde Ndióxi coo ndíhi na cúú cuéntá Jesús cán jáchi xíní vaha i ña quíhvi ini na ndehe sahá ña cándeé iní Jesús. Ná caja Ndióxi cuahá ñamaní xihín ndíhi ndó. Já ná coo.

## Carta nacahyí Pablo nuú Filemón

### *Chíndahá Pablo Ndióxi coo Filemón*

<sup>1</sup> Yehe cúú u Pablo ta ndácaan i vecaa yóho saha ña cúú u cuéntá Jesucristo. Yehe xihín Timoteo, ñani í, da cúú cuéntá Jesús cáhyí nde carta yóho nu mún, Filemón. Quíhvi ini nde yohó ta in cúún xihín nde sahá ña cája chúun cuéntá Jesucristo. <sup>2</sup> Ta jári cáhyí nde carta yóho nuú na cúú cuéntá Jesús táca vehún jan xihín nu Apia, ña cúú quiahva í sahá ña cándeé ini ñá Jesús. Ta quiahva já cáhyí nde carta yóho nu Arquipo jáchi in cúú da ndóho ini da cája chúun da cuéntá Jesucristo. <sup>3</sup> Ndióxi, tátá yo xihín Jesucristo, xitoho í ná caja cuahá ñamaní xihín ndo ta ná caja ña ná coo vaha ini ndó.

### *Cándeé cáhnu ini Filemón Jesucristo*

<sup>4</sup> Tá xíca tahví i nu Ndióxi sahan co ndíndójó i ndiquiahva i ndixahvi nu mé á saha mún. <sup>5</sup> Jáchi nañehé e tuhun ña cándeé inún Jesucristo, xitoho í ta quíhvi inún mé á xihín ndihi na cúú cuéntá mé á. <sup>6</sup> Ta xíca tahví i nu Ndióxi ña ná ndicanún nuú java ñayivi ndá quiahva cándeé inún mé á. Ta xihín ña yóho cuu candaá vaha ini na ndaja náhnu ñamaní cája Ndióxi xihín tóco ndihi mí, na cándeé ini Jesucristo. <sup>7</sup> Cájji ini i ñani mí i ta sahan tuhun ndeé ini i jáchi quíhvi inún na cúú cuéntá Jesús. Ta jári sahan tuhun ndeé ini cuahá na cúú cuéntá Jesús jáchi quíhvi inún na.

*Xíca Pablo ñamaní nu Filemón saha Onésimo, da naxeen Filemón caja chúun nu dá*

<sup>8</sup> Yehe cúú u in apóstol Jesucristo ña cán queá ín sahá i cahnda i chuun nuun cajún ña ndítahan nuun cajún. <sup>9</sup> Joo co cája i ña. Ña cája i queá xíca i ñamaní nuun jáchi quíhvi ini i yohó. Xíní ñúhú ndicuhun inún ña cúú u Pablo, da sahanu, da ndácaan vecaa saha Jesucristo. <sup>10</sup> Ta viti xíca i ñamaní nuun saha Onésimo, da nanduu tátuhun jahyí mí i cuéntá Jesús nani ndácaan i vecaa yóho.

<sup>11</sup> Jihna ga nasacuu Onésimo da coo chuun nuun joo viti ín chuun da nu ndívi

yo. <sup>12</sup> Ta viti chíndahá i da nuun. Ndiqehé vahún da saha mí i jáchi quíhvi ndivaha ini i da. <sup>13</sup> Cúni ña ná candoo da yóho xihín i já ná cuu chindeé da yehe nu mún. Jáchi ndácaan i vecaa yóho sahá ña cáhan i tuhun vaha sahá Jesucristo nuú ñayivi. <sup>14</sup> Joo nasacu ini i chíndahá i da nuun jáchi tiahvah náá a váha cúú inún xihín i tá ná candoo da yóho xihín i. Jáchi tá ná cajún ñamaní xihín i cúni ña ná cájji inún cajún ña ta co cúni caja ndúsa i xuhun. <sup>15</sup> Cája i cuéntá nacaxoo too Onésimo nuun joo viti ndicó coo da ná coo da níi tiempo xuhun. <sup>16</sup> A cája gaún cuéntá ña cúú dá da naxeún. Joo vaha chága viti jáchi cúú da ñani máni yohó cuéntá Jesucristo. Quíhvi ndivaha ini i da joo xíní ñúhú quíhvi ini chágun da jáchi cája chúun da nuun ta cúú da ñanún cuéntá Jesús viti.

<sup>17</sup> Ta tá mé a ndaa quíhvi inún yehe já queá ndiquehe vahún da tá quiahva ndiquehe vahún yehe tá ná xinu coo i nu iún jan. <sup>18</sup> Ta tá nacaja da in cuachi nuun á tá yíca da nuun já queá ndacún ña nuú i ta já chahvi i sahá. <sup>19</sup> Yehe cúú u Pablo ta cáhyí i ña yóho xihín ndáha i já ná candaá inún ña sahan i tuhun i nuun ña chahvi i ña. Xíní ñúhú ndicuhun inún ña yícun nuú i jáchi nandihvún íchi cuéntá Jesús sahá tuhun nacahan i xuhun. <sup>20</sup> Inga tucu xíca i ñamaní nuun ña ná ndiquehe vahún Onésimo jáchi cúún ñani mí i, da cúú cuéntá Jesús. Tá ná cajún ña yóho sahá ña cándeé inún mé á já queá quiahvún tuhun ndeé ini i.

<sup>21</sup> Cándaa vaha ini i ña cajún ña xíca i nuun cajún sahá ña cán queá cáhyí i carta yóho nuun ta candaá ini i ña yaha chága cajún nuú ña xíca i nuun. <sup>22</sup> Inga tucu xíca i ñamaní nuun ña ná caja tiahvún in vehe loho nuú coo i. Jáchi sahá ña xíca tahví ndihi ndó nu Ndióxi ña ná saa i coto nihni i ndohó sahá ña cán queá cája i cuéntá caja mé á ñamaní xihín i saa i jan.

### *Ndíndayí Pablo Filemón*

<sup>23</sup> In da naní Epafras, da ndácaan vecaa xihín i saha Jesucristo chíndahá da Ndióxi coún. <sup>24</sup> Chíndahá Marcos xihín Aristarco xihín Demas xihín Lucas Ndióxi coún. Mé

na yóho cája chúun na xihín i cuéntá Jesucristo.

<sup>25</sup> Ná caja Jesucristo, xitoho í cuahá ñamaní xihín ndihi ndó, na ndúu jan. Já ná coo.

## Hebreos, mé carta cuahan nuú na Israel

*Nachindahá Ndióxi Jesucristo ña ná quixi  
a jáyaha tuhun Ndióxi nu yo*

<sup>1</sup> Cuahá ndivaha tañu naçahan Ndióxi sanahá xihín tásáñnu jíco yo. Ta cuahá ndivaha nuú naçahan xihín ná tá najáyaha na profeta tuhun cáhan mé á nuú ñayivi. <sup>2</sup> Joo tiempo nu ndihí yóho nachindahá mé á Jesucristo, in túhún jiní já jahyi a ña ná jáyaha tuhun Ndióxi nu yo viti. Ta naçaja Ndióxi ña naçavaña Jesucristo ndijáá ñaha ñuyiví xihín ñaha indiví. Ta najándacoo Ndióxi tóco ndihi ñaha yóho ndáha mé á. <sup>3</sup> Ta mé á quéa náha ndá quiahva cáñnu cúu Ndióxi jáchi yehe a tá quiahva yehe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tuhun cáhan yúhu mé á cómi a cuéntá saha tóco ndihi ñaha jáchi in ndivaha ndée tuhun mé á. Ta nandaja vií mé a mí nuú ndihi cuachí ta já nasacoo a indiví xoo cuáha Ndióxi, tátá a.

*Cáñnu chága Jesucristo a juú ga tátó  
Ndióxi*

<sup>4</sup> Ta Jesucristo, mé jahyi Ndióxi naxinu a nanduu a ña cáñnu chága a juú ga tátó Ndióxi. Ta naçaja Ndióxi ña ná ñehe táhvi á ña cáñnu chága quivi naní a a juú ga quivi tátó mé á. <sup>5</sup> Jáchi a ñaha cachi Ndióxi xihín ni in túhún toho tátó mé á tá quiahva naçachi a xihín jahyi a já: Jahyi yehe cúu yóho, ta viti cáchi i ña nanduu u tátún, cáchi a. Ta ni coo naçachi Ndióxi xihín ni in túhún toho tátó á tá quiahva naçachi a xihín jahyi a já: Yehe cacuu u tátún, ta yóho cacuún in túhún jiní já jahyi yehe, cáchi a.

<sup>6</sup> Joo tá jalóho cúni chindahá Ndióxi Jesucristo, jahyi a ñuyiví yóho já naçachi a já: Ndítahan nu tóco ndihi tátó mí i caja cáñnu na jahyi i, naçachi a.

<sup>7</sup> Já naçachi Ndióxi já saha tátó mé á: Tá quiahva cama chá xíco tachí quiahva já cama chá cuahan tátó mí i.

Ta yehe na tá quiahva yehe ñuhú cáyi ita, já naçachi Ndióxi.

<sup>8</sup> Joo tá naçahan Ndióxi sahá jahyi a já naçachi a já:

Yóho cúun Ndióxi ta cacomún cuéntá sahá ñayivi anda ama cáa quivi, ta cáñdún chuun xihín ña ndaa.

<sup>9</sup> Ta a juú quiahva cátóun ña vaha ta naçandajún ña núu.

Sahá ña cán quéa naçaxi i yóho jáchi yehe cúu u Ndióxi ta cúu u tátún.

Ta najácutú ndaa i yóho xihín ña cájii inún já ná cajii chága inún a juú ga na xíca xuhun, naçachi a.

<sup>10</sup> Ta jári já naçachi a já xihín jahyi a:

Naçavahún tóco ndihi ñaha tá naçava sahá saha ñuyiví ta cúun xitoho nuú ña cán.

Ta xihín ndáñun naçavahún indiví.

<sup>11</sup> Ta vaxi quivi tá ndihi saha tóco ndihi ña yóho joo mún coo tá coún anda ama cáa quivi.

Ta tóco ndihi ña jan cayatá ña tá quiahva cayatá jáhma ndíxi na.

<sup>12</sup> Tá quiahva sáñnu ñayivi jáhma quiahva já chicanún ñuyiví xihín indiví.

Ta tá quiahva ndíjama ñayivi jáhma ndíxi na quiahva já ndíjama ña jan cajún.

Joo mún a ndíjama tohún jáchi coo tá coún anda ama cáa quivi,

ta a ndíjama tohún ta a ndíhi toho sañun, naçachi Ndióxi xihín Jesucristo.

<sup>13</sup> A ñaha cachi Ndióxi xihín ni in túhún toho tátó mé á tá quiahva naçachi a xihín jahyi a já:

Naha quíi cacuún xoo cuáha i yóho, janda quiahva ná cañnu i nu tóco ndihi na coo cúni yóho ta janda ná chinduu u na sañun jan, naçachi Ndióxi xihín Jesucristo.

<sup>14</sup> Jáchi tóco ndihi tátó Ndióxi cúu ná na tácu ta ín ínima ná joo coo toho yiquí cuñu na. Cája chúun na cuéntá Ndióxi ta mé á chindahá a na ñuyiví ña ná chindeé na ñayivi, na naçaxi Ndióxi cacu ndaa ínima.

## 2

*Naquixi Jesucristo jácacu a mí*

<sup>1</sup> Sahá ña cán quéa ndítahan nu yó taa joho í ña ndaa, ña naxini joho í já ná a cáxoo í íchi cuéntá Ndióxi. <sup>2</sup> Naçahan tátó Ndióxi



tuhun nasahan mé á nu ná ta cúu á ña ndaa joo coó naxeen ñayivi cacu vaha na ña. Sahá ña cán quéa najándoho Ndióxi ini na tá quiahva ndítahan ndoho ini na sahá cuachi nacaja na. <sup>3</sup>Joo mí, ndaja caja í cacu ndaa ínima yo tá ta coo táa johó í tuhun cáhan sahá Jesús, mé a jácacu mí. Ta ña yóho cúu á ña cáhnu ndivaha jáchi jihna ñúhú ga mé Jesucristo, xitoho í nacaxi tuhun a ña yóho nuú ñayivi. Ta na nataa johó nu cáhan mé á, na cán sahan na tuhun na nu yo ña cúu á ña ndaa. <sup>4</sup>Ta náha Ndióxi ña cúu á ña ndaa jáchi cája mé á cuahá ndivaha ña náhnu xihín ña xítuhún ndivaha. Ta nachindahá Ndióxi ínima yii mé á nuú na cúu cuéntá Jesús ña ná caja na ña xítuhún tá quiahva nasacu ini mé á caja na.

### *Nanduu Jesucristo in ñayivi*

<sup>5</sup>Coó nasahan toho Ndióxi ñamaní nu tátó mé á ña ná cacomí na cuéntá sahá ñuyiví saá, ña vaxi chága chí nuu. <sup>6</sup>Jáchi já cáchi tuhun Ndióxi já:

Tátá Ndióxi, coó saha toho ñayivi ta coó ña náha cúu ná.

Joo mé ndó ñúhu ini ndó saha ná ta ndíhi ini ndó saha ná.

<sup>7</sup>Tá nacavaha ndó ñayivi nandaja ndó na nanduu na ña náhnu ndivaha.

Ta tátó mé ndó cuití va cúu ná nasayojó loho nu ná tixi chá tiempo.

Ta tóco ndíhi ña nacavaha ndó nandiquiahva ndó ña ndahá ñayivi,

<sup>8</sup>já ná cacomí na cuéntá sahá, cáchi tuhun Ndióxi.

Ta mé a ndaa ni in ñaha coó nacandoo xóo jáchi nasacu ini Ndióxi cacomí ñayivi cuéntá saha tóco ndíhi ñaha joo cámani yii va xinu coo mé quiví cán. <sup>9</sup>Vatí cámani yaha ña yóho joo xini yo ña nandoho Jesús. Tixi chá tiempo nacaja Ndióxi ña ná nuu ndáha chága mé á nu tátó Ndióxi jáchi sahá ña quihvi ini Ndióxi mí sahá ña cán quéa nasacu ini a ña ná quivi Jesucristo sahá ndíhi ñayivi. Ta viti nandindita mé á nanduu a ña cáhnu ndivaha sahá ña nandoho a tá naxihí a ndica crúxu.

<sup>10</sup>Tóco ndíhi ñaha ña nacavaha Ndióxi cúu á cuéntá mé á sahá ña nacachi mé á ña ná coo a. Ta nasacu ini a ña ná ndoho ini Jesucristo quivi a saha yo. Ta xihín ña yóho najáxinu coo a nuú chuun natahnda nu á

ñá ná jácacu a mí. Jáchi ña cúni Ndióxi cúu ña ná canduu ndíhi, na cúu cuéntá mé á nu ín a. <sup>11</sup>Nandaja víi Jesucristo mí ta sahá ña yóho cúu yó jahyi Ndióxi. Ta viti Ndióxi cúu tátá ndíhi ta cúu á tátá Jesucristo. Ña cán quéa coo cáchan toho nuú Jesucristo cáhan ñani a mí ta cáhan quiahva mí viti. <sup>12</sup>Jáchi nacahyi ini tuhun Ndióxi ña nacahan Jesús xihín tátá a. Ta nacachi a já:

Ndicani i nuú ñani i saha mé ndó.

Ta nu ndítutú na cata i caja cáhnu i ndohó, cáchi Jesús.

<sup>13</sup>Ta cáchi tucu a já:

Yehe cándéé ini i Ndióxi, tátá i.

Ta cáchi tucu a já xihín Ndióxi:

Yóho ín i xihín ndíhi jahyi ndó, na nasahan mé ndó nuú i cacomí i cuéntá saha, cáchi Jesús.

<sup>14</sup>Sahá ña ín yiquí cuñu ñayivi, na cúu jahyi Ndióxi sahá ña cán quéa nanduu Jesús in ñayivi ta nasahin yiquí cuñu a tátuhun mí. Ta tá naxihí yiquí cuñu a já nacandéé a nasahnu a nuú tiñhá sacuaña, rí cája ña xihí ñayivi. <sup>15</sup>Ta xihín ña yóho najácacu a tóco ndíhi na nasayihví quivi jáchi ní tiempo nasanduu na ndáha tiñhá sacuaña sahá ña yíhví na. <sup>16</sup>Jáchi mé a ndaa coo naquixi Jesucristo ña ná chindeé a na cúu tátó Ndióxi. Ña naquixi mé á caja quéa chindeé a ñayivi, na cándéé ini Ndióxi tá quiahva nacandéé ini Abraham Ndióxi.

<sup>17</sup>Ña cán quéa naxini ñúhú Jesús nduu a in ñayivi cacu ñuyiví yóho tátuhun mí. Ta xihín ña nandoho a naxinu a nanduu a in jutú sacuaña nu Ndióxi indiví. Ta naxihí a ndica crúxu sahá cuachí jáchi cája ndaa mé á tóco ndíhi ñaha ta táhvi ini a saha yo. Ta xihín ña yóho nacaja cáhnu ini a sahá cuachí. <sup>18</sup>Ta sahá ña nandoho ini mé á ta sahá ña naxito ndojó rí quini mé á sahá ña cán quéa xini a ndá quiahva ndóho ini. Ña cán quéa cuu chindeé a ndaja táhan na ndóho ini, na xito ndojó tiñhá sacuaña.

## 3

### *Cáhnu chága Jesús a juú ga Moisés*

<sup>1</sup>Candehé ndo, ñani i, na cúu cuéntá Jesús. Mé ndó cúu ndó na nacaxi Ndióxi cacomí a cuéntá saha. Candehé ndó Jesucristo, mé á cúu á tátuhun apóstol, ña

nachindahá Ndióxi cacuu jutū sacuahā saha yo nū Ndióxi sahá ña cāndeé iní mé á. <sup>2</sup> Ta xihín ndinuhu ini a ñacaja chúun a cuéntá Ndióxi, mé a ñacaxi ñahá. Jáchí tá quiahva ñacaja Moisés tóco ndihi ña cūni Ndióxi tañu na cúu cuéntá mé á quiahva já ñacaja Jesús tóco ndihi ña cūni Ndióxi, tátá a. <sup>3</sup> Joo ndítahan ndicáhnu chága Jesús a juú ga Moisés jáchí cáhnu chága Jesús a juú ga Moisés. Cúu á tátuhun tá cávaha in dataa in vehe ta ndítahan ndicáhnu chága mé dá a juú ga vehe da. <sup>4</sup> Ndúsa coo in da cávaha vehe já cuu cavaha ña joo tóco ndihi ñaha ín a jáchí ñacavaha Ndióxi ña. <sup>5</sup> Ña cán quéa ñacaja chúun Moisés cuéntá Ndióxi xihín ndinuhu ini da tañu ñayivi mé á. Ta chuun ñacaja da quéa cáxi tuhun jini da xihín ná ña cūni Ndióxi cahan xihín ná chága chí nuu. <sup>6</sup> Joo jín va chuun ñacaja Jesús, mé á cúu in túhún jini já jahyi Ndióxi jáchí cómi a cuéntá sahá na cúu cuéntá mé á xihín ndinuhu ini a. Cuéntá mé á cúu mí tá ndacú coo ínima yó ta tá ná cāndeé iní mé á. Ta xíní ñúhú cajji iní candatí anda quixi mé á.

*Cūni Ndióxi ña ná ndihvi na cúu cuéntá mé á nuú ndiquehe ndée ná*

<sup>7</sup> Candehé ndó ndá quiahva cáchí ínima yii Ndióxi ini tuhun mé á tá cáchí a já:

Tá ná cuni johó ndó ña cáhan Ndióxi xihín ndó quivi víti,

<sup>8</sup> a cája sáa ini ndó xihín á tá quiahva ñacaja na Israel tá naxica nuu na yucú íchí cán.

Jáchí nandiñehe yúhu ná nu Ndióxi ta ihvi ndivaha nasacuu ini na xihín Ndióxi.

<sup>9</sup> Ta já cáchí Ndióxi já:

“Mé yucú íchí jan naxito ndojó tásáhnu jícó ndó yehé,

vati naxini na ña náhnu ndivaha ñacaja i tixi ivi jico cuia.

<sup>10</sup> Sahá ña cán quéa naxojó ini i xihín tóco ndihi na cán,

ta ñacachi i saha ná ña cúu ná na cáhvi ivi, johó ini,

ta sáa ini na caca na íchí cuéntá mí i.

<sup>11</sup> Sahá ña cán quéa naxojó ini i xihín ná, ta nasahan i tuhun i ña a quiahva toho i ñamaní nu ná

ndihvi na nuú ndiquehe ndée na xihín i”, ñacachi Ndióxi xihín na Israel.

<sup>12</sup> Ña cán quéa cuéntá vaha coo ndó, ñani i já ná a cáñehe ndó ínima quini ña jácaxoo ndó nu Ndióxi, ña tácu, sahá ña co cūni ndó candúsa ndó mé á. <sup>13</sup> Ña ndítahan caja ndó quéa quiahva tuhun ndeé ini táhan ndó nini quivi. Ta a quiahva ndó ñamaní yaha quivi víti tá núná nu ndó caja ndó ña cūni Ndióxi. Jáchí co cūni a ña ná jándahvi ña núu ñuyiví yóho ndohó ta já ná ndisáa ini ndó nu Ndióxi. <sup>14</sup> Jáchí tá ná cāndeé ndusa iní mé á janda quiahva ná xinu quivi nu ndihí cuí tá quiahva ñacaja í janda saha já quéa cūni cachi a ña in nanduú xihín Jesucristo.

<sup>15</sup> Jáchí quiahva já cáchí tuhun Ndióxi: Tá xini johó ndó ña cáhan Ndióxi xihín ndo quivi víti,

a cája sáa ini ndó xihín á tá quiahva ñacaja na Israel tá nandiñehe yúhu ná nu Ndióxi yucú íchí cán, cáchí a.

<sup>16</sup> Jáchí sa xini ndó ndá na nandiñehe yúhu nu Ndióxi tá naxini johó na ña nasahnda mé á nu ná. Na cán cúu na tóco ndihi na nasandaca Moisés tá ñaqueta na nación Egipto. <sup>17</sup> Ta xihín mé na cán naxojó ini Ndióxi tixi ivi jico cuia jáchí ñacaja na cuachi nu mé á ta sahá ña cán quéa ñacuyu na naxihí na yucú íchí cán. <sup>18</sup> Ta sahá ña coo naxeen na caja na ña cūni Ndióxi sahá ña cán quéa nasahan Ndióxi tuhun a ña a quiahva toho a ñamaní nu ná canduu na nuú ndiquehe ndée na xihín á. <sup>19</sup> Ta mé a ndaa cándaa iní ña coo ñacuu ndihvi na nuú nasacu ini Ndióxi coo na sahá ña co naxeen na candúsa na mé á.

## 4

<sup>1</sup> Sahá ña cán quéa viti sahan yii va Ndióxi ñamaní nu yó yaha í nuú nasacu ini mé á ndiquehe ndée yo xihín á. Joo xíní ñúhú cuéntá vaha coo ndó jáchí tiahva náa a xinu coo java ndó ndihvi ndó cán. <sup>2</sup> Jáchí tá quiahva naxini johó na Israel tuhun Ndióxi quiahva já naxini johó í tuhun mé á, ña cáchí a cūni jácacu Ndióxi ñayivi. Joo coo ñacandúsa na cán ña sahá ña cán quéa coo chuun a nu ná. <sup>3</sup> Joo mí cúu yó na cāndeé ini Ndióxi ta sahá ña yóho tandaa quivi xinu coo í ndihvi nuú ndiquehe ndée yó xihín á. Ta já cáchí Ndióxi já sahá ña yóho:

Naxojo ini i xihín na co cándusa yehe, sahá ña cán quéa nasahan i tuhun i ña ná a ndíhvi toho na nuú nasacu ini i ndiquehe ndée ná xihín i, cáchí a.

Nacachi Ndióxi ña yóho vatí sa nacaja tiahva mé á nuú ndíhvi na ndiquehe ndée na anda tá nacava sahá saha ñuyívi. <sup>4</sup> Ndáa ini tuhun Ndióxi ña nacaja mé á quívi usa. Já cáchí a já:

Quívi usa nandiquehe ndée Ndióxi nuú chuun nacaja tá nacavaha tóco ndihi ñaha, cáchí tuhun Ndióxi.

<sup>5</sup> Ta já cáchí tucu a já sahá na co cándusa Ndióxi:

A ndíhvi toho na canduu na nuú ndiquehe ndée ná xihín i, nacachi a.

<sup>6</sup> Ta coo nandíhvi toho na nacahan Ndióxi xihín nu cuítí cán jáchí coo naxeen na candúsa na mé á. Joo núna yí va nuú java ñayivi ndíhvi na ndiquehe ndée ná xihín mé á. <sup>7</sup> Jáchí nasacu Ndióxi inga quívi ta cúu á quívi víti ta já cuu ndíhvi ñayivi ndiquehe ndée na xihín mé á. Sanahá ndivaha nacahan Ndióxi xihín rey David sahá ña yóho ta nacahyí da ña ta já cáchí a já:

Tá xíní johó ndó ña cáhan Ndióxi xihín ndó quívi víti a cája sáa ini ndó xihín á, cáchí tuhun Ndióxi.

<sup>8</sup> Ta sa xíní yo ña coo najándíhvi Josué ñayivi nu ndíquehe ndée na xihín Ndióxi jáchí nacahan Ndióxi sahá inga quívi vaxi chága chinuu. <sup>9</sup> Sahá ña cán quéa sa xíní yo ña cámani xinuu coo quívi ndiquehe ndée na cúu cuénta mé á tá quiahva nandiquehe ndée mé á quívi usa. <sup>10</sup> Jáchí ndá na ná ndíhvi ndiquehe ndée nu íin mé á cán já quéa ndíquehe ndée ná nuú chuun nacaja na tá quiahva nandiquehe ndée Ndióxi nuú chuun nacaja mé á. <sup>11</sup> Sahá ña cán quéa ndítahan ndíhi ini ndíhvi nuú ndiquehe ndée yo cán. Ta ná a cája í tá quiahva nacaja na Israel cán tá coo naxeen na candúsa na nuú nacahan mé á xihín ná.

<sup>12</sup> Íin cuaha ndée tuhun Ndióxi ta cúu á tátuhun ña tácu. Ta íin chága ndée tuhun Ndióxi a juú ga in yúchu ña ívi yúhu. Ta tá quiahva quíhvi yúchu ña ívi yúhu tá sáhdá yiquí cuñu quiahva já quíhvi tuhun Ndióxi janda maá ini ínima ñayivi xihín xíní túni ná ta já xínú a ini na. Ta náha ndá quiahva

cáhvi ini na. <sup>13</sup> Jáchí xíní Ndióxi tóco ndíhi ñaha ta a cúu chijehé yo ña cáhvi ini jáchí sánehé mé á tóco ndíhi ñaha nacavaha mé á. Ta vaxi quívi nahma yo nu mé á tóco ndíhi ña nacaja í.

### *Jesús cúu á jutú sacuaḥa nuú ndíhi indivi*

<sup>14</sup> Mé Jesús cúu á jutú sacuaḥa nuú ndíhi sahá ña cán quéa co ndítahan jándacoo í ña cándeé iní Jesús, mé a cúu in tuhún jini já jahyi Ndióxi. Ta nandíhvi a indivi nu íin Ndióxi. <sup>15</sup> Ta cándahví ini Jesús mí jáchí cúu á jutú sacuaḥa nu yo ta cánda ini a ña cúu yó ñayivi vitá ndivaha ini. Jáchí tá naxica nuu a ñuyívi yóho naxito ndojó tiñahá sacuaḥa mé á xihín tá nuú ñaha tá quiahva cája rí xihín mí joo ní in tuhún cuachi coo nacaja mé á. <sup>16</sup> Ña cán quéa a cáyhvi toho í cayatí nu íin coo Ndióxi, mé a quíhvi ini a mí jáchí táhvi ini a saha yo ta chindeé a mí tá ná caca i ñamani nu á.

## 5

<sup>1</sup> Tóco ndíhi da cúu jutú sacuaḥa chága nu ndíhi jutú cúu dá da sá caxi na tañu ñayivi Israel já ná cahan cuachí da sahá ñayivi nu Ndióxi. Ta jári jóco da ñaha nu Ndióxi ta sáhní da quítí nu náa sahá cuachi na. <sup>2</sup> Ta sahá ña cúu dá da vitá ini, da ñuyívi yóho sahá ña cán quéa cuu candahví ini da ñayivi, na co xíní ña sáhdá Ndióxi. Ta cuu candahví ini da na cája cuachi. <sup>3</sup> Ta sahá ña vitá ini da sahá ña cán quéa ndítahan cahní da quítí jóco da rí nu Ndióxi sahá cuachi mé dá xihín sahá cuachi ñayivi víti.

<sup>4</sup> Ta ni in da cán a cúu chinuu da mé dá cacuu da jutú sacuaḥa chága nu ndíhi jutú. Jáchí xíní ñuhú cacuu da da nacana Ndióxi caja chúun cuénta mé á tá quiahva nacaja Ndióxi sanahá tá nacana mé á Aarón ña ná caja chúun da cuénta mé á. <sup>5</sup> Quiahva já nayaha xihín Jesucristo jáchí coo nachinuu a mé á ña ná nduu a jutú sacuaḥa. Ndióxi quéa nachinuu ñahá tá nandaja cáhnu a Jesús. Ta já nacachi Ndióxi já xihín á:

Jahyi yehe cúu yóhó,

ta víti cáchí i ña nanduu u tátún, cáchí a.

<sup>6</sup> Ta inga nu cáhan tuhun Ndióxi já cáchí a já:

Anda ama cáa quívi cacuún jutú,

ta cajún tá quiahva ñacaja in jutú, da ñasananí Melquisedec sanahá, cáchí a.

<sup>7</sup> Nani ñasahiin Jesucristo ñuyíví yóho a juú quiahva ñaxica tahví a nu Ndióxi. Ta java tañu ñasacu a ta java tañu ñacayuhú a nu Ndióxi, mé a cúu chindeé ñahá ña ná a quíví toho a. Ta sahá ña ñasacaja Jesús tóco ndihi ña sáhdá Ndióxi, tátá a sahá ña cán queá ñaxini johó Ndióxi nu cáhan mé á. <sup>8</sup> Ta vatí cúu Jesucristo in túhún jini já jahyi Ndióxi joo xihín ña ñandoho ini a ñuyíví yóho ñacatiahva coo johó a nu cáhan Ndióxi, tátá a xihín á. <sup>9</sup> Ta xihín ña yóho najáxi nu coo mé á ñacaja tóco ndihi ña ñatahnda nu á caja. Janda javí ñacuu jácacu a mí ña ná coo í xihín mé á anda ama cáa quivi tá ná caja í ña sáhdá mé á. <sup>10</sup> Ta ñandicojo a chuun ñacaja Ndióxi ña ná nduu a jutú sacuahá tátuhun mé jutú, da ñasananí Melquisedec.

*Cuénta coo ndó ná a jándacoo ndó ña cándéé ini ndó Jesús*

<sup>11</sup> In cuahá ndivaha ñaha cúni ndicani i nu ndo sahá ña yóho joo yáncá ndivaha ndicani i ña nu ndo jáchi coo cúni ndo taa johó ndó nu cáhan i. <sup>12</sup> Anda jihna ñandihvi ndó íchi cuénta Jesús ta viti sa ndítahan nu ndó jánahá ndó tuhun Ndióxi nuú ñayivi. Joo coo cája ndó já jáchi ñacavitá ndo ta tucu tucu jácuaha ndó ña coo íhvi toho. Ta viti cúu á tátuhun coo ndeé ini ndó cuxu ndó ña xíxi ñayivi náhnu joo ña cája ndó queá xíxi yíi va ndó leche tátuhun na valí va. <sup>13</sup> Ta tá quiahva xíxi na valí leche quiahva já cája ri na coo tiáhva ndícuni ndía cúu ña vaha ta ndía cúu ña núu. <sup>14</sup> Joo ñayivi, na cándaá vaha ini tuhun Ndióxi cúu ná tátuhun ñayivi náhnu, na tácu ini, na xíxi cuñu va jáchi sá tiahva na ndícuni na ndía cúu ña vaha ta ndía cúu ña núu.

## 6

<sup>1</sup> Sahá ña cán queá ña ndítahan caja í queá ndindacú chága yo xihín ñaha Ndióxi janda quiahva ná xinu coo í cacuu ñayivi tácu ini xihín ñaha Ndióxi. Co ndítahan jácuaha tucu ña najácuaha í tá jacá ñandihví íchi cuénta Jesús jáchi ndítahan catiahva í ña jan. Ndítahan cándaá ini ña cacu ndaa ínimá yo

sahá ña cándéé ini Jesucristo cuití va ta coo cúu á sahá ña cája í ña vaha. <sup>2</sup> Ta sa cándaá ini ña ndítahan candúta na cúu cuénta Jesús. Ta sa cándaá ini ndaja cája í chinúu ndáha yó jini ñayivi tá xica tahví yó nu Ndióxi saha ná. Ta sa cándaá ini ña vaxi quivi nditacutucu tóco ndihi ndii ña ná caja vii Ndióxi saha ná. <sup>3</sup> Sahá ña cán queá cáchí i xihín ndó: Coho ndindacú chága yó xihín ñaha Ndióxi, tá ná quiahva Ndióxi ñamaní nu yo.

<sup>4</sup> Ta a cuú ga ndicó coo ñayivi nu Ndióxi tá sa najándacoo na ña ñasandéé ini na mé á. Jáchi sa najándiyéhe Ndióxi ínimá ná ña ná cándaá ini na saha mé á ta sa xini na ndá quiahva in ñaha Ndióxi. Ta janda ínimá yíi Ndióxi sa ñandacaan ínimá ná. <sup>5</sup> Ta sa ñacandaá ini na tuhun vaha cáhan sahá Jesucristo ta sa ñacandaá ini na ndá quiahva náhnu caja Ndióxi chága chí nuu. <sup>6</sup> Joo tá ná jándacoo na jan ña cándéé ini na Ndióxi já queá a cuú ga ndicó coo na nu mé á jáchi xihín ña cája na cúu á tátuhun cata caa tucu na Jesucristo, jahyi Ndióxi ndica crúxu ta já sácu ndaa na mé á nuú ñayivi. <sup>7</sup> Jáchi sa xini ndo ndaja in ñundáhyi nu cúun vaha javi ta ndíndáhyi a. Ta tá ná cana cuahá ñaha nuú ñaxutu ñayivi cán já queá cúni cachi a ña cája Ndióxi ñamaní xihín ñundáhyi cán. <sup>8</sup> Joo tá ná nana tohínú xihín tochihmá nu ñúhu cán já queá coo saha toho a ta ña yóho cúni cachi a ña coo cája toho Ndióxi ñamaní xihín á ta vaxi quivi cayi a caja Ndióxi.

*Vaxi quivi coo í xihín Ndióxi tá coo jándacoo í íchi cuénta mé á*

<sup>9</sup> Candehé ndó, ñani maníi, na cúu cuénta Jesús. Vatí cáhan nde ña yóho xihín ndo joo cándéé ini nde ndohó ña cája tá cája ndó ña vaha ña ndítahan caja na cándéé ini Jesús. <sup>10</sup> Ta xini nde ña cája Ndióxi ña ndaa cuití va ta a ndíndójo toho mé á sahá ña vaha ñacaja ndó tá ñachindeé ndó na cúu cuénta Jesús jáchi xihín ña yóho náha ña quíhvi ini ndusa ndó mé á. Ta mé a ndaa janda viti chindeé ndó na cán. <sup>11</sup> Ta a juú quiahva cúni nde ña ná ndihi ini in in ndó chindeé ndo na cúu cuénta Jesús anda quivi nu ndíhí. Ta xihín ña yóho vaxi quivi tá quiahva Ndióxi nu ndo tóco ndihi ña ndáti ndó quiahva mé á nu ndo. <sup>12</sup> Coo cúni nde ña ná cajúsá ndo caca ndó íchi cuénta Jesús. Ña cúni nde

queá ná ndíhi ini ndó caja ndó tá quiahva cája ná cándeé ini Ndióxi, ná coó najándacoo ña cándeé ini na mé á ta xihín ña yóho ñehe táhvi ná ña nasahan Ndióxi tuhun a quiahva nu ná.

13 Tá nasahan Ndióxi tuhun a nu Abraham sanahá já natavá a quivi mé á tátuhun testigo jáchi coó inga ga ña cáhnu chága a juú ga mé á. 14 Ta tá nasahan mé á tuhun a nu dá já nacachi a já xihín dá: “Mé a ndaa caja cuahá i ñamani xuhun ta caja i ña ná ndicuahá ndivaha na quixi chichún.” Já nacachi Ndióxi xihín Abraham tá nasahan tuhun a nu dá. 15 Ta coó nandíhi ini Abraham nani nasandati da jáxinu coo Ndióxi tuhun a ta chí nañehe dá ña nasahan Ndióxi tuhun a quiahva nu dá. 16 Tá sahan ñayivi tuhun na nuú inga ñayivi já tává na quivi in na cáhnu chága a juú ga mé ná ña ná cacuu na testigo. Jáchi cája ndúsa in testigo xihín ná jáxinu coo na ña nasahan na tuhun na caja na. 17 Sahá ña cán queá natavá Ndióxi quivi mé á jáchi cúni a janaha cáxi a nuú ñayivi ña a ndijama toho a tuhun nasahan nu ná ta ndúsa jáxinu coo a tuhun a nuú na ñehe táhvi ndiquehe a. 18 Ta cándaá iní ña nasahan Ndióxi tuhun a nu yó ta natavá a quivi á cacuu a testigo ta xihín ndívi ña yóho sa xini ví ña a cuú ndijama Ndióxi ta ni a cuú cahan mé á ña tuhún. Ta xihín ña yóho sahan mé á tuhun ndeé iní jáchi cándeé iní mé á ta sa nandiquiahva í mí ndáha mé á ña ná jácacu a mí. 19 Sahá ña cán queá cátivi tuun í xihín Ndióxi ta cándeé iní ña quiahva mé á nu yo ña sahan tuhun a quiahva nu yo. Ta sahá ña cándeé cáhnu iní mé á sahá ña cán queá co yíhvi toho í cayatí nu mé á jáchi sa nandíhvi Jesús nuú yii ndivaha indiví. 20 Ta cúni Jesús chindeé a mí ña ná xinu coo í nu in a cán sahá ña cán queá nandíhvi jihna ñúhú ga cán a juú ga mí. Ta cuu caja Jesús ña yóho jáchi nanduu a jutú sacuahá nu Ndióxi ta anda ama cáa quivi cája mé á chuun yóho tá quiahva nacaja da naní Melquisedec sanahá ndivaha.

## 7

### *Chuun nacaja Melquisedec sanahá*

1 Mé Melquisedec yóho nasacuu da rey nuú ñayivi ñuu Salem ta nasacuu da jutú nu Ndióxi, mé á cúu ña cáhnu chága a juú ga inga ga. In tañu tá nandicó coo Abraham nasahan da nacani táhan da xihín java rey ta najándihi da sahá na cán já naqueta Melquisedec íchi nuú vaxi Abraham ta já nacaja yii dá Abraham. 2 Ta mé Abraham nandaja da uxu táhnda tóco ndíhi ña nacandaa da ndáha java rey tá naquee vaha da xihín na cán. Ta já nasahan da in táhnda nuú Melquisedec. Ta quivi Melquisedec yóho cúni cachi a rey, da cája ña ndaa. Ta sahá ña cómi da cuénta sahá ñuu Salem, ña cúni cachi a nuú in vaha ini ñayivi sahá ña cán queá cúu dá rey, da cája ña ná coo vaha ini ñayivi. 3 Ta ni in ñayivi co xini na saha tátá náná mé Melquisedec yóho ta co ndaa nuú tutu quivi tásáhnu jícó da. Ta co xini na ndá tañu nacacu da ta ni co xini na ndá tañu naxihi da. Joo ña xini na queá cúu dá jutú anda ama cáa quivi tá quiahva cúu Jesucristo jutú anda ama cáa quivi, mé a cúu in túhún jini já jahyi Ndióxi.

4 Ta viti cuu candehé ndó ndaja cáhnu nasacuu Melquisedec jáchi janda mé Abraham, da nasacuu tásáhnu jícó yo nasahan da nuú Melquisedec in táhnda nuú uxu táhnda ñaha ña nacandaa da ndáha rey, da naquee vaha da xihín cán. 5 Ta sa xini ndo ña cáchi ley Moisés ña in saha nuú jutú, na naquixi chichi Leví ndiquehe na in táhnda nuú uxu táhnda ña cómi na Israel. Jáchi mé jutú cán cája chuun na nu Ndióxi cuénta táhan na na Israel vatí in cúu tóco ndíhi na sahá ña naquixi ndíhi na chichi Abraham. 6 Vatí coo naquixi Melquisedec yóho chichi Leví joo naqueehe tá naqueehe da in táhnda nuú uxu táhnda ñaha nu Abraham, da nasahan Ndióxi tuhun a nuú ña caja cuahá ñamani xihín. Tá nacaja yii Melquisedec Abraham 7 náha ña mé a ndaa cáhnu chága da cája yii ñayivi a juú ga na nacayii cán. Ta ni in na a cuú cachi na ña co cúu ña yóho ña ndaa. 8 Ta sa xini yo ña cáhnu chága Melquisedec a juú ga jutú, na naquixi chichi Leví, na quehe in táhnda nuú uxu ñaha jáchi cúu ná ñayivi, na ndíhi saha. Joo cahan tuhun Ndióxi sahá Melquisedec tátuhun tácu yii va da. 9 Ta náha ña cáhnu chága Melquisedec a juú ga

Leví, da cúú tásáhnú jícó tóco ndihi jutú, na quéhe in táhndá nuú uxu a cán. Jáchí cúú á tátuhun nachahvi Leví in táhndá nuú uxu a tá nachahvi Abraham ña nu Melquisedec. <sup>10</sup> Jáchí tá naquehe Melquisedec in táhndá nuú uxu ñaha nu Abraham, cúú á tátuhun nasanehe Abraham tóco ndihi na vaxi chichi da ini yiquí cuñu da jáchí cámaní yí cacu na mé tiempo já.

<sup>11</sup> Ta tóco ndihi jutú, na naquixi chichi Aarón, naquixi na chichi Leví viti. Ta vatí nacaja na chuun Ndióxi ña jáyaha na ley Moisés nuú ñayivi joo a cuú nduu ndaa ñayivi nu Ndióxi xihín mé ley. Sahá ña cán quéa nachindahá Ndióxi Jesucristo ñuyívi yóho já ná cacuu a inga jutú, ña ná caja tá quiahva nacaja Melquisedec sanahá. Ta coó nacaja mé á tá quiahva nacaja Aarón, da nasacuu tásáhnú jícó jutú cán. <sup>12</sup> Ta tá nachindahá Ndióxi in jutú saá xíní ñúhú a ndijama ri a ley va. <sup>13</sup> Ta mé jutú saá cúú Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi Leví ta ni coó naquixi a chichi Aarón. Jíin va chichi naquixi a ta ni in da taa naquixi chichi cán a ñaha cacuu da jutú. <sup>14</sup> Joo cándaá vaha ini ñayivi ña naquixi Jesucristo chichi Judá ta coó cúú á chichi nu sá cana jutú ta ni coó nacahan Moisés sahá na quíxi chichi Judá tá nacahan da sahá na cacuu jutú.

<sup>15</sup> Ta cándaá vaha chága iní ña yóho jáchí sa xíní yo ña mé jutú saá ña cúú Jesucristo nandiquehe a chuun tátuhun nacaja Melquisedec sanahá. <sup>16</sup> Ta coó nanduu a jutú sahá ña nacacu a chichi Leví nu sá cacu jutú. Joo nanduu a jutú sahá ña cúú caja tóco ndihi ñaha ta sahá ña tácu a anda ama cáa quívi. <sup>17</sup> Jáchí tá cáhan Ndióxi saha Jesucristo já cáhí a já:

Yóho cúún jutú anda ama cáa quívi, tátuhun mé jutú, da nasananí Melquisedec jáchí cájún chuun tá quiahva nacaja mé dá, cáhí tuhun Ndióxi.

<sup>18</sup> Sahá ña cán quéa nacandoo xoo ley Moisés jáchí coó chuun a ta a cuú chindeé a ñayivi. <sup>19</sup> Ta ni coó nacuu caja mé ley Moisés ña ná nduu ndaa ñayivi nu Ndióxi. Joo viti cájii iní jáchí xihín ña nacaja Jesucristo já cuu nduu ndaa yó nu Ndióxi tá já

cuu cayatí nu mé á.

<sup>20</sup> Ta tá nacaja Ndióxi ña nanduu Jesucristo jutú já nasahan tuhun a ta nasacu a mé á cúú á testigo sahá. <sup>21</sup> Joo tá nanduu na naquixi chichi Leví cán jutú coó nasahan Ndióxi tuhun a saha ná tá quiahva nacaja xihín Jesucristo tá nanduu a jutú. Ta já nacachi Ndióxi ini tuhun mé á:

Yehe cúú Ndióxi ta nasahan i tuhun i nu yóho ta a ndijama toho i tuhun cáhan i:

“Nachínúu i yóho cacuún jutú anda ama cáa quívi.

Ta cajún chuun tá quiahva nacaja Melquisedec sanahá”, cáhí Ndióxi.

<sup>22</sup> Sahá ña nandicojo Jesucristo chuun nasahan Ndióxi nu á sahá ña cán quéa cándeé iní ña jáxinu coo Ndióxi tuhun nasahan nu yo. Ta vaha chága ña yóho a juú ga ley Moisés. <sup>23</sup> Ta ndaja coo nasanduu cuahá jutú, na naquixi chichi Leví cán jáchí naxihí ndihi na ta nacandoo chuun na nuú inga na. <sup>24</sup> Joo tácu Jesucristo anda ama cáa quívi ña cán quéa a jándacoo toho a chuun a nuú inga ga. <sup>25</sup> Ña cán quéa anda ama cáa quívi in tiahva Jesucristo jácacu a mí tá ná cayatí nu Ndióxi sahá ña nacaja Jesucristo tá naxihí a ndica crúxu. Ta íin mé á nu Ndióxi xíca tahví a nu mé á sahá na cándeé iní mé á.

<sup>26</sup> Mé a ndaa xíní ñúhú yo Jesucristo ña ná cacuu a jutú sacuahá nu Ndióxi saha yo. Jáchí mé á cúú á ña yíi ndivaha ta ni in cuachi coó nacaja mé á ta ni in cuachi a cúu chícaan yó jatá. Ta coó xíca nuu ga mé á tañu na caja cuachi jáchí íin a indiví nu ndicáhnú ndivaha mé á. <sup>27</sup> Coó xíní ñúhú caja Jesucristo tá quiahva nacaja java ga jutú sacuahá, na naquixi chichi Leví. Jáchí nini quívi nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jáví nacaja na ña sahá cuachi ñayivi. Joo jíin va nacaja Jesucristo jáchí in túhún tañu cuítí va najoco a mé á tá naxihí a ndica crúxu sahá cuachi tóco ndihi ñayivi. <sup>28</sup> Tá nacaja na ña cáhí ley Moisés já nasacu na in dataa, da caja cuachi ña ná cacuu da jutú sacuahá. Joo tá nandihí já nachínúu Ndióxi Jesucristo, jahyí a ña ná cacuu a jutú sacuahá, ña caja ña ndaa anda ama cáa

quivi. Ta nasahan Ndióxi tuhun a nu yo ña jaxinu coo a tóco ndihi ña cáchi a.

## 8

### *Jesús cúu á jutu sacuahá saha yo indivi*

<sup>1</sup> Nacachi nde ña yóho ña ná candaá ini ndó ña cúu Jesucristo jutu sacuahá saha yo nu Ndióxi ta íin coo a xoo cuáha Ndióxi indivi nu ndicáhu ndivaha mé á. <sup>2</sup> Cúu á jutu sacuahá cája ndivi a veñuhu indivi ña nacavaha Ndióxi ta co cúu á ña nacavaha ñayivi. <sup>3</sup> Ndítahan nu tóco ndihi na cúu jutu sacuahá cahní na quíti nu Ndióxi ta joco na ñaha nu á. Ña cán queá ndítahan ri nu Jesucristo joco a ñaha nu Ndióxi. <sup>4</sup> Tá ná caca nuu Jesucristo ñuyíví yóho, nduu já queá a cacuu toho a jutu, nduu. Jáchi sa ndúu cuahá ndivaha jutu ñuyíví yóho ta joco na ñaha nu Ndióxi tá quiahva sáhdá ley Moisés. <sup>5</sup> Joo ña cája mé ndihi jutu ñuyíví yóho cúu á tátuhun yuhú nuu ña cája Jesucristo indivi. Ta candaá ini ña cúu á tátuhun yuhú nuu ña íin indivi jáchi sanahá ndivaha tá nasahnda Ndióxi chuun nu Moisés ña ná cavaha da veñuhu xihin ní quíti já nacachi Ndióxi já xihin da: “Cuéntá coún ndaja cavahún veñuhu xihin ní quíti jan. Jáchi xíní ñuhú coo a tá quiahva cá ña nanaha i nuún jiní yucu cán”, nacachi Ndióxi xihin Moisés. <sup>6</sup> Joo Jesucristo, mé á cúu jutu sacuahá saha yo indivi nandicojo a in chuun ña vaha chága a juú ga chuun cája jutu ñuyíví. Vaha chága ña nacaja Jesucristo a juú ga ley Moisés jáchi jándique táhan máni a mí xihin Ndióxi ta xihin ña yóho xínu coo tuhun nasahan Ndióxi nu yó jihna.

<sup>7</sup> Tá ná cuu caja ley Moisés ña jácacu a mí ná a cahun toho í indayá, nduu já queá co xíní ñuhú quivi Jesucristo jándique táhan máni a mí xihin Ndióxi, nduu. <sup>8</sup> Joo xíní vaha Ndióxi ña mé ley Moisés a cuú jácacu a ñayivi sahá ña cán queá já nacachi a já:

Vaxi quivi tá quiahva i tuhun saá nuú ñayivi Israel ta nuú na naquixi chichi Judá.

<sup>9</sup> Jíin va cúu tuhun saá quiahva i nu ná, jáchi co cúu toho a tuhun nasahan i nu tásahnu jícó na sanahá ndivaha,

tá natiin ndahá i na ta natavá i na nuú nasanduu na nación Egipto.

Ta sahá ña coo najaxinu coo na tóco ndihi ña nasahnda i nu ná caja na sahá ña cán queá najandacoo i na.

<sup>10</sup> Ta vaxi quivi tá quiahva i tuhun saá nuú ñayivi Israel.

Ta caja i ña ná candaá vaha ini na ley mí i ta cañuhu a ini ínimá ná ña ná caja na ña cúní mí i.

Ta yehe cacuu Ndióxi caja cahnú na, ta mé na cán cacuu ñayivi cacomí i cuéntá saha.

<sup>11</sup> Ta a cúní ñuhú ga na janaha ñani táhan mé ná ña ná candaá ini na saha Ndióxi, jáchi tóco ndihi ñayivi anda na valí anda na sáhnú candaá ini na yo cúu yehe.

<sup>12</sup> Ta caja cahnú ini i saha ndaja táhan ña núu nacaja na, ta a ndicuhun ga ini i sahá cuachi na, cáchi Ndióxi.

<sup>13</sup> Tá nacahan Ndióxi sahá tuhun saá ña quiahva mé á nuú ñayivi já queá náha ña coo chuun ga mé tuhun nasahan nu ná jihna ta cama chá ndihi sahá.

## 9

### *Veñuhu ñuyíví xihin veñuhu indivi*

<sup>1</sup> Tá nasahan Ndióxi tuhun a nuú na Israel sanahá ndivaha já nasahnda chuun sahá ndaja caja cahnú na mé á ini veñuhu ña cavaha na ñuyíví yóho. <sup>2</sup> Ta ndacaan ivi cuarto ini mé veñuhu cán. Ta ña ndacaan ini cuarto nu cuítí cúu in candelero xihin in mesa nu cándójó pan yii. Ta mé cuarto nu cuítí yóho naní a in nuú yii. <sup>3</sup> Ta íin in jahmá ndeé ña ndájí nuu táhan tañu ndívi cuarto yóho. Ta cuarto ndacaan maá naní a nuú yii ndivaha. <sup>4</sup> Ta mé cán íin in nu ná ña nacavaha xihin jiuhun cuáán nu chíníhmá jutu jusa vaha. Ta jári cán íin sató arca ñaha Ndióxi ta tóco ndihi jata mé sató arca nandicuchu xihin jiuhun cuáán. Ta chí ini sató cán ndacaan in tindojo jiuhun cuáán nu ñuhu maná ña naxixi na Israel tá naxica nuu na yucú íchí cán. Ta jári ndacaan mé yító ñaha Aarón, dó nasaa núma sanahá. Ta chí ini arca cán ndacaan ri ivi yuu jáhdá nu ndáa ley nasahan Ndióxi nuú Moisés. <sup>5</sup> Ta jiní mé sató arca cán ndíndójó ña cúu yuhú nuu tátó Ndióxi naní a querubines.

Cándójó a cán ña ná ndicuhun ini ñayivi ña ín Ndióxi cán cája cáhnu ini a sahá cuachi na. Ta mé táto Ndióxi cán ndicaa ndixi a cándójó a jata arca. Joo a cúu ndicani chága yo sahá ña yóho viti.

6 Já nasahin tiahva tóco ndihi ñaha veñuhu. Ta ndijáa níi quivi nandihvi jutú cuarto nu cuití cán cája ndívi na ñaha caja cáhnu na Ndióxi. 7 Joo in tañu tá nu cuía in túhún da cúu jutú sacuahá naquihvi da cuarto maá cán. Ta ñéhe da níi quítí ña joco da nu Ndióxi sahá cuachi mé dá xihín sahá cuachi ñayivi. 8 Ta xihín ña yóho jánaha ínima yii Ndióxi nu yo ña a cuú ndihvi ndá ñayivi nacuu cuarto maá nuú yii ndivaha jáchi sa ín va cuarto nu cuití. 9 Ta tóco ndihi ña yóho cúu á tátuhun yuhú nuú nuú ña ín tiempo viti. Ta sa xini yo ña a cuú ndaja vii ñayivi ínima ná xihín ña joco na nu Ndióxi tá sáhní na quítí ña quiahva na níi rí nu mé á. 10 Jáchi tóco ndihi ña nacaja na cán nasacuu a cuénta ña sáxi na xihín ña xihí na ta nasacuu a cuénta ndaja nandaja vii na mé ná xihín ticuú. Joo já nanditahan cája na janda quiahva tandaa quivi ndijama Ndióxi tóco ndihi ñaha jáchi a cúu ndaja vii na ínima ná xihín ña yóho.

11 Ta ndaja coo naquixi Jesucristo ñuyívi yóho ta nanduu a jutú, da sacuahá chága nu yo. Naquixi a ña ná quiahva mé á ña vaha Ndióxi nu yo. Joo viti ín a indiví cája chúun a tátuhun jutú veñuhu ña vaha chága cán. Cúu á veñuhu ña coo nacavaha ñayivi ta coo cúu á ñaha ñuyívi. 12 In tañu cuití va nandihvi a nuú yii ndivaha ta coo nasañehe a níi tijúhu ni níi chélo ña joco a nu Ndióxi. Nii mé á cúu dó naxita ndica crúxu saha yo ña ná cacu ndaa ínima yo anda ama cáa quivi. 13 Jihna nacaja ñayivi ña nacachi ley Moisés ta nu yiquí cuñu na naxihnu ndaa jutú níi tindiquí á níi tijúhu ta naxihnu ndaa ri da na xihín yaá chélo, rí nasahmi na nu náa. Ta xihín ña yóho nandivií yiquí cuñu na nu Ndióxi. 14 Joo ndiyahvi chága nii Jesucristo a juú ga nii quítí. Jáchi tá naxihí Jesucristo já nandivií ínima yo já ná a cája ga yo ña coo ndiyahvi cán ta ná caja í tóco ndihí ña cúni Ndióxi. Nacaja ínima yii Ndióxi, mé a tácu a anda ama cáa quivi ña ná ndiquiahva Jesucristo

mé á ndáha Ndióxi já naxihí a ndica crúxu saha cuachi vatí coo toho cuachi mé á.

15 Ta sahá tuhun saá nasahan Ndióxi nu yo sahá ña cán quéa cáhan Jesucristo xoo mí nu Ndióxi. Ta sahá ña nacaja Jesucristo tá naxihí a ndica crúxu cája cáhnu ini Ndióxi sahá cuachi nacaja í tá nasandico yó ley Moisés. Ta nandacaxi Ndióxi ñayivi, na cúni candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná. 16 Cúu á tátuhun tá cávaha in dataa tutu cuénta ña ñehe táhvi ná candoo ñaha nu ná. Joo xini ñúhú candaa ini na ña mé a ndaa naxihí da jándacoo ñaha cán anda jávi ndiyahvi mé tutu cán. 17 Jáchi nani tácu da coo ndiyahvi toho tutu nacavaha da sahá ñaha ndicoo táhvi da. Janda quiahva ná quivi da já ndiyahvi a. 18 Ña cán quéa tá nu cuití nasahan Ndióxi tuhun a nuú ñayivi nacaja mé á ña ná quivi quítí ta xihín níi rí cán nandoo cuachi ñayivi. 19 Jáchi tá nandihí nacahan Moisés ley nasahan Ndióxi nuú ñayivi Israel já natiin da in yito, dó nani hisopo ta nacató da loho cachí cuahá nu do. Ta nachindaxi da dó cán xihín níi chélo xihín níi tijúhu, dó nacava táhan xihín ticuú. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel. 20 Anda já nacachi da já xihín na Israel: “Xihín níi quítí yóho jáxinu coo Ndióxi tuhun a ña nasahnda nu ndó caja ndó”, nacachi Moisés. 21 Ta quiahva já naxihnu ndaa Moisés níi quítí nuú veñuhu níi quítí xihín nuú tóco ndihi ñaha ñúhu cán ña cája chúun na cája cáhnu na Ndióxi. 22 Jáchi cáchí ley Moisés ña xihín níi cuití va ndivií ndaja táhan ñaha, vatí a juú ndihi a. Ta janda quiahva ná cuita níi já cuu caja cáhnu ini Ndióxi sahá cuachi ñayivi.

### *Nandoo cuachí xihín níi Jesucristo*

23 Sahá ña cán quéa nanditahan nu Moisés ndaja vii da ñaha veñuhu ñuyívi yóho xihín níi quítí. Ta mé ñaha cán cúu á yuhú nuú ña ín indiví. Joo ñaha ín indiví ndivií a xihín níi, dó vaha chága a juú ga níi quítí. 24 Ta veñuhu ñuyívi cúu á yuhú nuú cuití va ña ín indiví. Coo nandihvi Jesucristo nuú yii ndivaha veñuhu, ña nacavaha ñayivi. Joo nandihvi



mé á indiví ta cán ín a viti ta cáhan mé á xoo mí nu Ndióxi. <sup>25</sup> Jáchi da cúu jutú sacuaḥa nandihvi da tá nu cuía nuú yíi ndivaha veñuhu joco da níi quítí nu Ndióxi. Joo ña nacaja Jesucristo quea nandiquiahva a mé á quivi a saḥa yo ta in tañu cuití va naxita níi á ndica crúxu. <sup>26</sup> Jáchi tá ná nditahan nuú Jesucristo quivi a cuahá tañu já quea janda mé saḥa tá nacava sahá saḥa ñuyívi casahá quivi a, nduu. Joo a juú a já jáchi tá jalóho cúní ndihi saḥa tiempo viti já nacasaḥa Jesucristo ñuyívi yóho ta in tañu cuití va naxihí a sahá cuachi ñayivi. <sup>27</sup> Quiahva já yáha xihín ñayivi jáchi in tálaá tañu quivi na ta anda jáví nditahan candichi na nu Ndióxi caja víi mé á sahá ña nacaja na tá nasandu na ñuyívi yóho. <sup>28</sup> Ta quiahva já in tañu cuití va naxihí Jesucristo ndica crúxu jándoo a cuachi cuahá ñayivi. Ta tandaa quívi quixi tucu mé á ñuyívi yóho joo a quívi ga ña jáchi quixi a ndiquehe a na ndáti tiaḥva cuḥun coo xihín mé á indiví.

## 10

<sup>1</sup> Ta mé ley nacahyí Moisés yóho nasacuu a tátuhun in candahvi mé ña ndaa ña coo chága chínuu. Nasacuu a yuhú nuú uun ña vaha ña vaxi nu yo. Jáchi mé ley yóho coo nacuu caja ndaja víi a ínima ñayivi vatí ná cayati na nu Ndióxi tá nu cuía sá sáhní na quítí joco na nu Ndióxi. <sup>2</sup> Jáchi tá ná cuu ndivií ínima ná sahá ña cája na ña cáchí ley Moisés já quea in tañu cuití va joco na níi quítí nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu. <sup>3</sup> Joo tá nu cuía tá sá sáhní na quítí joco na níi rí nu Ndióxi já quea ndicuhun ini na ña cómi na cuachi nu Ndióxi. <sup>4</sup> Jáchi a cuú jándoo na cuachi na xihín níi tindiquí á xihín níi tijúhu.

<sup>5</sup> Ña cán quea tá jalóho cúní casaa Jesucristo ñuyívi yóho já nacachi a já xihín Ndióxi, tátá a:

Có cúní ndó ña ná cahní ñayivi quítí joco na rí nu ndo ta ni có cúní ndo ña ná joco na java ga ñaha nu ndo.

Sahá ña cán quea nasahan ndó in yiquí cuñu nuú i já ná ndiquiahva i ña nu ndo.

<sup>6</sup> Có cájii ini ndó tá ná cahmi na quítí nu náa joco na rí nu ndo. Ta ni có táhan

ini ndó tá ná joco na java ga ñaha nu ndo ña ná jándoo na cuachi na.

<sup>7</sup> Sahá ña cán quea já nacachi i já xihín ndo: “Tátá Ndióxi, yóho ín i ta ín tiaḥva vi caja i ndá ña nacuu cúní ndo.

Jáchi quiahva já ndaa ini tuhun mé ndó sahá i”, nacachi Jesucristo.

<sup>8</sup> Nu cuití nacachi Jesucristo ña có cúní Ndióxi ña ná cahní ñayivi quítí quiahva na níi rí nu á. Ta ni có táhan ini a tá ná cahmi na quítí nu náa ña ná ndivií ínima ná. Ta nacachi a ña yóho vatí sahná ley Moisés caja ñayivi já. <sup>9</sup> Joo tá nandihí nacachi Jesucristo já xihín Ndióxi: “Yóho ín i ta ín tiaḥva vi caja i ndá ña nacuu cúní ndo”, nacachi a. Ña cán quea nasacu xoo Ndióxi ña nacaja na jihna ta viti ndiquehe vaha mé á ñayivi sahá ña naxihí Jesucristo ndica crúxu. <sup>10</sup> Nacaja Jesucristo ña nasacu ini Ndióxi caja sahá ña cán quea nacandoo víi uun tóco ndihi mí jáchi in tálaá tañu nandiquiahva Jesucristo yiquí cuñu a tá naxihí a sahá cuachí.

<sup>11</sup> Jihna ga ña nacaja ndihi jutú cúu á ña nini quívi sándita da nu náa joco da quítí nu Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho.

<sup>12</sup> Joo in tañu cuití va naxihí Jesucristo sahá cuachi tóco ndihi ñayivi já ná cuu cacu ndaa ínima ná anda ama cáa quívi. Anda jáví nasacoo a xoo cuaha Ndióxi, tátá a indiví. <sup>13</sup> Ta cán ín coo a viti cándati a janda quiahva ná cacu Ndióxi na cándají mé á tíxi sahá. <sup>14</sup> Jáchi in tálaá tañu naxihí Jesucristo ndica crúxu ta xihín ña yóho nandaja víi a ínima ñayivi, na nacaxi mé á. <sup>15</sup> Ta sa xini yo ña cúu ña yóho ña ndaa jáchi já cáchí ínima yíi Ndióxi já:

<sup>16</sup> Vaxi quívi tá quiahva i tuhun saá nuú ñayivi Israel ta quiahva johu coo a.

Caja i ña ná candaa vaha ini na ley mí i ta caja i ña cañuhu a ini ínima ná.

<sup>17</sup> Ta já cáchí tucu a já:

Caja cáhnu ini i sahá ndaja táhan ña núu nacaja na ta a ndicuhun ga ini i sahá cuachi na, cáchí tuhun Ndióxi.

<sup>18</sup> Ta sahá ña nacaja cáhnu ini Ndióxi sahá cuachi ñayivi sahá ña cán quea có xini ñuhú ga cahní na quítí ña joco na rí nu mé á sahá cuachi na.

### *Xíni ñúhú cayatí nu Ndióxi*

19 Candehé ndo, ñani i, na cúu cuénta Jesús. A cáyihví toho í viti ndihví nu íin Ndióxi, mé nuú yíi ndivaha jáchi naxihí Jesucristo sahá cuachi. 20 Ta tá nandiquiahva mé á yiquí cuñu a já naxihí a ta xihín ña yóho nasuná a íchi saá já ná cuu cayatí nu íin mé á. 21 Ta mé Jesús cúu á jutú sacuahá saha yo nu Ndióxi jáchi cómi a cuénta sahá ndihí, na cúu cuénta mé á. 22 Ña cán quéa xíni ñúhú cayatí nu íin Ndióxi xihín ndinuhu iní jáchi cándéé iní mé á. Cúu á tátuhun nandoo yiquí cuñu í tá naxihí Jesucristo ndica crúxu. Ta viti co ndítahan ndicani iní sahá cuachi nacaja í jáchi najándoo mé á cuachi. 23 A jándacoo í ña cándéé iní Ndióxi ta ná candati tiahva í janda ná yaha ña cáchi mé á jáchi xíni vaha í ña jáxinu coo Ndióxi tuhun nasahan nu yo. 24 Ta ndítahan nu yo ndinducú yo ndaja caja í chindeé táhan í já ná quihví chága iní ñani táhan í. Ta ndítahan caja chága yó ña vaha. 25 Co ndítahan toho caja í tá quiahva cája java na cúu cuénta Jesús, na co cuni nditaca xihín ndihi java ga na cúu cuénta Jesús. Ña ndítahan caja í quéa jácahan chága táhan í ña ná taca í xihín java ga na cúu cuénta Jesús jáchi sa xíni yo ña vaxi quivi quixi tucu Jesucristo ñuyívi yóho.

26 Tá sa cándaá vaha iní ña co ndítahan caja í cuachi ta chínee tucú mí cuahan í cája í cuachi vatí sa cándaá iní ña ndaa, a cúu ga ndoo cuachi nu Ndióxi. 27 Ta cáyihví yo candati janda quiahva ndoho ndivaha iní caja Ndióxi. Jáchi jácana mé á ñayivi nu ñúhu cáyi ita, mé nu ndihi sahá na ihví mé á. 28 Jáchi ndá na Israel, na co cuni caja ña sáhdá ley Moisés já quéa ndítahan quivi na tá ná cacu ivi á uní testigo sahá na nu juéxe. Ta ni in na a cándahví iní ñahá. 29 Joo ndaja ga ví ndítahan ndoho iní na quéhe núu Jesús, mé in túhún jini já jahyi Ndióxi. Jáchi cúu á tátuhun sáni nihni na a ta co sáhní toho na mé ná ña naxihí a jándoo a cuachi na tá quiahva nasahan Ndióxi tuhun a caja. Cánahá na xihín ínimá yíi Ndióxi, mé a cája cuahá ñamaní xoho. 30 Cándaa vaha iní yo cúu mé a nacachi ña yóho: “Yehe jándoho í iní ñayivi, na cája cuachi. Ta caja í ña ná chahvi na sahá cuachi na”, cáchi a. Ta já

cáchi tucu Ndióxi, xitoho í já: “Yehe caja víi í sahá na cúu cuénta mí í”, cáchi a. 31 Mé a ndaa ndahví nahá nacuu tá ná tiin Ndióxi mí ña ná chahví sahá cuachi jáchi mé á cúu á Ndióxi, ña tácu indiví.

32 Ndítahan ndicuhun ini ndó ña nayaha tá jacá nacandeeé ini ndó Jesús. Vatí nandoho ndivaha ini ndó nacaja java ñayivi joo nasahan ndeé ini ndó. 33 Java tañu nasacu ndaa ichi na ndohó nuú ñayivi ta java tañu nacaja xíxi na xihín ndo ta java tañu nacatáhan ndó xihín java ga na tá nandoho ri ini na sahá Jesús. 34 Ta táhnda ini ndó sahá na cúu cuénta Jesús ñúhu vecaa. Ta coo nacahan cuachi ndo ta janda cájii ini ndó vatí nacaja cuíhná na ñaha ndó jáchi cándaá vaha ini ndó ña cómi ndó ña vaha chága indiví ta a ndihi toho sahá ña cán. 35 Ña cán quéa a jándacoo ndó ña cándéé ini ndó Jesús jáchi tandaa quivi quiahva cuahá Ndióxi ña vaha nu ndo tá cándéé ini ndó mé á. 36 Ndítahan nu ndó quiahva ndeé ini ndó caja ndó ña cuni Ndióxi já quéa ndiquehe ndó ña vaha nasahan mé á tuhun a quiahva nu ndo. 37 Jáchi já cáchi tuhun Ndióxi já:

Jalóho cuni ta já quixi mé a ndítahan nu quixi ta a cáyancá toho a.

38 Joo ndá na cúu ñayivi ndaa nu mí i catacu na sahá ña cándéé ini na yehe.

Ta tá co cuni ga na cándéé ini na yehe ta já ndicó coo na caja na cuachi já quéa a cájii iní i xihín ná, já cáchi Ndióxi.

39 Joo a cája toho í tá quiahva cája java ñayivi jáchi co cuni na cándéé ga iní na Jesús ta tandaa quivi cuhun na indayá. Joo mí cúu yó na cándéé iní Jesús ta tandaa quivi coo í nu íin mé á.

## 11

### *Ndítahan nu yó cándéé iní Ndióxi*

1 Tá ná cándéé iní Ndióxi já quéa cuni cachi a ña sa xíni vaha í ña yaha tá yaha ña ndátí yó yaha. Ta vatí co xíni yó ña ndátí joo cándéé iní ña já coo. 2 Jáchi sahá ña nacandeeé ini tásáhnú jícó yo Ndióxi sanahá ndivaha sahá ña cán quéa cájii ini Ndióxi xihín ná.

3 Ta sahá ña cándéé iní Ndióxi sahá ña cán quéa cándaá vaha iní ña nacahan Ndióxi ta

já nacavaha mé á ñuyiví xihín indiví. Jihna coó nasahiin ni in ñaha joo viti náha nuú ña nacavaha mé á.

<sup>4</sup> Ta sahá ña nacandeeé ini da naní Abel Ndióxi sahá ña cán queá natahan ini Ndióxi xihín ña nacaja da tá najocó da ñaha nu á. Ta coó natahan ini a xihín ña najocó da naní Caín, da cúu ñani Abel jáchi coó nacandeeé ini Caín mé á. Sahá ña cán queá nandiquehe Ndióxi ña najoco Abel nu á ta xihín ña yóho nanduu da da ndaa nu á. Ta vatí naxihí Abel joo xihín ña nacaja da sanahá jánaha da nu yo ndaja ndítahan nu yó candeeé ini Ndióxi.

<sup>5</sup> Ta sahá ña nacandeeé ini da naní Enoc Ndióxi sahá ña cán queá coó naxihí toho da. Joo nasañehe Ndióxi da indiví ta coó nacuu ndiñehé ñayivi mé dá jáchi nandaa da cuahan da indiví nacaja Ndióxi. Ta cáchi tuhun Ndióxi já nacaja mé á jáchi táhán ini a xihín ña nacaja Enoc nani nasahiin da ñuyiví yóho. <sup>6</sup> Tá coó candeeé ini Ndióxi já queá coó táhán ini Ndióxi xoho. Jáchi ndá na cúni cayati nu Ndióxi xini ñuhú cándusa na ña íin mé á indiví ta xini ñuhú cándusa na ña quiahva mé á ña vaha nuú ñayivi tá ndinducú na mé á.

<sup>7</sup> Ta sahá ña nacandeeé ini da naní Noé Ndióxi sahá ña cán queá nataa johó da tá nacaxi tuhun Ndióxi xihín dá ña ndoho ini ñayivi chága chí nuú vatí coó nasanaha nu á. Nacandúsa Noé Ndióxi ta chí nacasáhá da cávaha da in barco cáhnu nuú cuu cacu ndaa mé dá xihín na vehe da. Ta sahá ña nacandeeé ini da Ndióxi sahá ña cán queá nanduu da taa ndaa nu mé á. Ta xihín ña nacaja da najácojo da cuachi jatá ñayivi ñuyiví jáchi náha cáxi a ña coó nacandúsa na caja na ña cáchi Ndióxi.

<sup>8</sup> Ta sahá ña nacandeeé ini da naní Abraham Ndióxi sahá ña cán queá nacandúsa da ña nacahan Ndióxi xihín dá. Ta chí naquee da ñuu da ta cuahan da in ñundáhyi, ña nasahan Ndióxi tuhun a quiahva nu dá. Najándacoo da ñuu da vatí coó nasaxini da ndaja naní mé ñuu nuú cuhun da. <sup>9</sup> Ta sahá ña candeeé ini Abraham Ndióxi sahá ña cán queá naxinu coo da ñundáhyi ña nasahan Ndióxi tuhun a quiahva nu dá. Joo nandíñehe dá java ñayivi ndúu cán chí nasahiin da tá quiahva ndúu na tóho. Vehe

tienda nasahiin da xihín na vehe da. Ta quiahva já nasahiin Isaac xihín Jacob jáchi nasahan Ndióxi tuhun a nu mé dá xihín nuú na vehe da. <sup>10</sup> Nacaja Abraham ña yóho jáchi ndáti da coo da in ñuu ña íin indiví, ña nacavaha Ndióxi nuú coo a anda ama cáa quivi.

<sup>11</sup> Ta jári nacandeeé ini Sara, mé ñájíhí Abraham Ndióxi sahá ña cán queá nacaja Ndióxi ña nacuu quee jahyi ñá vatí sa nacayatá ña. Ta tá nandihí já nacacu jahyi ñá ta nasacuu a sahá ña nacandeeé ini ñá jáxinu coo Ndióxi tuhun nasahan nu ña. <sup>12</sup> Sahá ña cán queá vatí nacayatá ndivaha Abraham ta nacayati quivi quivi da joo nacacu jahyi da xihín ña ta nanduu da tásáhnú jicó na Israel. Ta cuahá ndivaha na cúu chichi da janda a cuú candahvi na. Cúu á tátuhun quimi ña íin indiví á tátuhun ñuti yuhú tañuhú jáchi a cuú candahvi a.

<sup>13</sup> Tóco ndihi na naquixi chichi Abraham yóho vatí naxihí na joo nacandeeé tá nacandeeé ini na Ndióxi. Ta vatí coó naxini na ña nasahan mé á tuhun a quiahva nu ná joo nasacuu a tátuhun naxini na ña. Jáchi nacandeeé ini na ña nacachi Ndióxi xihín ná ta nacajii ini na. Ña cán queá nacachi na ña ndúu tóo cuití na ñuyiví yóho ta cúu ná tátuhun na tóho jáchi coó ñuu na ñuyiví yóho. <sup>14</sup> Cándaa ini ña ndá na cáchi já cúni cachi a ña ndinducú na inga ñuu nuú canduu na. <sup>15</sup> Ta coó nataknda ini na sahá ñuu naquee na cán jáchi cuu ndicó coo na, nduu joo coó nacacúni na caja na ña. <sup>16</sup> Joo ña nducú na cúu in ñuu ña vaha chága, ña íin indiví. Ta nacaja tiahva Ndióxi mé ñuu indiví nuú cuu coo na já queá a cácan nuú mé á cachi a ña cúu ná cuéntá mé á.

<sup>17</sup> Ta sahá ña nacandeeé ini Abraham Ndióxi sahá ña cán queá nasahiin tiahva da cahní da Isaac, jahyi da joco ñahá da nu Ndióxi tá naxito ndojó Ndióxi da. Já nacaja Abraham vatí nasahiin in túhún jini jahyi da ta sa nasahan Ndióxi tuhun a nu Abraham <sup>18</sup> tá nacachi a já xihín dá: “Cacu jahyún, da cananí Isaac ta xihín da cán ndicuhá ndivaha chichún chága chí nuú”, nacachi Ndióxi. <sup>19</sup> Sa nacandaa vaha ini Abraham ña cuu caja Ndióxi ña ná nditacu tucu Isaac tá sa naxihí da. Ta vatí coó nasahní toho Abraham Isaac joo cúu

á tátuhun naxihí da ta nanditacu tucu da jáchi nasahin tiahva da cahní da da sahá ña ñacandeeé ini da Ndióxi.

<sup>20</sup> Ta sahá ña ñacandeeé ini Isaac Ndióxi sahá ña cán queá nasahan da tuhun da nu ndíví jahyi da, da naní Jacob xihín da naní Esaú ña caja cuaha Ndióxi ñamaní xihín ndíví da chága chí nuu. <sup>21</sup> Ta sahá ña ñacandeeé ini Jacob Ndióxi sahá ña cán queá tá jalóho cúní quivi da já queá ñacachi da ña caja cuaha Ndióxi ñamaní xihín ivi jahyi ñání da, da cúu jahyi da naní José. Anda javí ñacaja cáhnu da Ndióxi naní tii ndaa da garrote da. <sup>22</sup> Ta sahá ña ñacandeeé ini José Ndióxi sahá ña cán queá tá jalóho cúní quivi da ñacahan da xihín na Israel sahá mé quivi tá ná quee na nación Egipto cuhun na. Ta nasahnda da chuun nu ná ña ná cañehe na lasa yiquí cuñu mé dá cuhun ña xihín ná.

<sup>23</sup> Ta sahá ña ñacandeeé ini náná tátá Moisés Ndióxi sahá ña cán queá tá nandihí ñacacu da já nachicaan jehé na da tañu uní yoo. Náha ña cúu dá in lee ñúchí ndivaha ta chí coó nayihví toho na tuhun ñacahan rey cán tá nasahnda da chuun ña quivi ndihí tavalí jacá ñacacu nuu na Israel. <sup>24</sup> Ta sahá ña ñacandeeé ini Moisés Ndióxi sahá ña cán queá tá nasahnu da najándacoo da vehe rey Egipto vatí najácuahnu ña cúu jahyi jíhí rey cán da tátuhun jahyi ñá. <sup>25</sup> Ta ña ñacaja da queá nasahan da nandoho ini da xihín na cúu cuéntá Ndióxi. Jáchi co cúní da cájii ini da cája da cuachi vatí chá tiempo. <sup>26</sup> Ta ñacahan da ña vaha chága ná ndoho ini da sahá Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuahá ñaha cuicá nación Egipto cán. Jáchi ñacahvi ini da sahá ñamaní caja Ndióxi xihín da chága chí nuu. <sup>27</sup> Ta sahá ña ñacandeeé ini Moisés Ndióxi sahá ña cán queá najándacoo da nación Egipto ta coó nayihví da ña ná ndicuehe rey Egipto cán xihín dá. Ta nasahan ndeeé ini da jáchi ñaxica da tátuhun in da xica xihín Ndióxi vatí coó ñaxini da mé á.

<sup>28</sup> Ta sahá ña ñacandeeé ini Moisés Ndióxi sahá ña cán queá nasahnda da chuun ña ná caja na Israel vicó pascua. Nasahnda da chuun ña ná cahní na ndicachi ta já cuihna ndaa na ñii rí yuyéhé vehe na Israel

ña ná a quiví jahyi ña na, da ñacacu nu cuítí tá ná yaha tátó Ndióxi, mé a cája ña ná quivi ñayivi. <sup>29</sup> Ta sahá ña ñacandeeé ini na Israel Ndióxi sahá ña cán queá nayaha na mahñú ndaa tañuhú naní tañuhú cuahá. Nasacuu a tátuhun xica na nu ñundáhyi íchí uun. Joo tá ñacasahá na Egipto yaha na mé tañuhú cán já queá coó ñacuu caja na ña. ñacandaa na ini ticuúí ta já naxihí ndihí na.

<sup>30</sup> Ta sahá ña ñacandeeé ini na Israel Ndióxi sahá ña cán queá ñacava nuu na ñuu Jericó tañu usa quivi ta já ñacuyú ndihí náma ñuu cán. <sup>31</sup> Ta sahá ña ñacandeeé ini ña xica jii naní Rahab cán Ndióxi sahá ña cán queá coó naxihí ña xihín ndihí ñayivi ñuu Jericó, na coó ñacandúsa Ndióxi. Najácaacu Ndióxi Rahab cán jáchi sa nandiquehe vaha ña java ña Israel tá ñacasa da nu cuítí sándehe da ñuu cán.

<sup>32</sup> Ndá chága cahan i xihín ndo. Sa ñacahan cuahá i xihín ndo joo cámaní cahan i sahá da naní Gedeón xihín da naní Barac xihín da naní Sansón xihín da naní Jefe xihín da naní David xihín da naní Samuel xihín java ga na nasacuu profeta.

<sup>33</sup> Sahá ña ñacandeeé ini na cán Ndióxi sahá ña cán queá ñacuee vaha na tá ñacani táhan na xihín java nación ta nasacomí vaha na cuéntá sahá ñayivi ta nandiquehe na ña vaha nasahan Ndióxi tuhun a quiahva nu ná. Java na nachicaji na yuhu león.

<sup>34</sup> Ta java na nandahva na ñuhu cáyi ña ná a cáyi toho na. Ta java na ñacacu na ndahá ñayivi, na ñacacúní cahní ñahá xihín machiti. Ta java na vatí vitá ini na joo nandihvi ndée ná. Ta java na ñacuee vaha na tá ñacani táhan na xihín na ihvi na. <sup>35</sup> Ta java najihí ñacandeeé ini na Ndióxi ta sahá ña cán queá ñaxini na ña nanditacu tucu na vehe na ñacaja Ndióxi.

Joo java na nandoho ndivaha ini na janda quiahva naxihí na. Ta coó ñacandúsa na cacu xoo na Ndióxi jáchi ñacandaa vaha ini na ña cuhun na coo na in ñuu vaha chága nu in mé á. <sup>36</sup> Java na nandoho ini na tá nasacu ndaa íchí ñahá na ta ñacani ñahá na. Ta java na nasandico na xihín cadena ta nachicaan na na vecaa. <sup>37</sup> Ta java na naxihí na jáchi ñacuun ñayivi yuu ná ta java na naxihí na tá nasahnda tuhun ñahá na. Ta java na

naxito ndojó ñayivi na ña ná caja na cuachi. Ta java na naxihí xihín machiti. Ta java na nasandíxi na xihín níí ndicachi xihín níí tujúhu cuití va jáchi coó toho jjuhún na. Nacaja xíxi ñayivi xihín ná ta najándoho na ini na. <sup>38</sup> Naxica ndáhví na nu íchí ndivaha ta naxica nuu na yucú ñúhú ta nasanduu na tixi cáva xihín yávi nu ñúhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyíví yóho. <sup>39</sup> Ta cájii ini Ndióxi xihín tóco ndihi na cán jáchi nacandeé ini na mé á. Joo cámani ndiquehe na ña nasahan mé á tuhun a quiahva nu ná. <sup>40</sup> Jáchi cúni Ndióxi ña ná candati na cán anda tandaa quivi ndiquehe tóco ndihí ña vaha chága quiahva Ndióxi nu yo.

## 12

### *Ná candee ini Jesús cuití va*

<sup>1</sup> Mé ñayivi cuaha cán naquee vaha na jáchi nacandeé ini na Ndióxi. Ta jánaha na nu yo ndaja caja í ña ná quiahva ndeé ini tá ná ndoho ini. Ña cán quéa ná jándacoo í tóco ndihi cuachi cája í, ña tíin tuun mí. Ta ná jácaxoo í tóco ndihi ña sáji nuu nu yo caja í ña cúni Ndióxi. Ta ná candico yó íchí Ndióxi xihín ndinuhu ini tá quiahva ndítahan caja í. <sup>2</sup> Ta ná candehé cáxi yo nuu Jesús jáchi mé á cán cája ña ná casahá candeé ini Ndióxi ta cája ña ná candee ini mé á anda tandaa quiví quiví. Nandoho ini Jesús tá naxihí a ndica crúxu ta coó nacacahan nuu á vatí cacahan nuu ñayivi quiví na quiahva já. Jáchi nacandaa ini a ña tá ná ndihi ndoho ini a já tandaa quiví cajii ndivaha ini a. Ta viti íin coo a xoo cuáha Ndióxi indiví.

<sup>3</sup> Xíní ñúhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán quéa a jándacoo ndó ña candeé ini ndó Jesús ta a cácuitá ínimá ndó tá ndóho ini ndó. <sup>4</sup> Jáchi cámani yii va cahní na cája cuachi ndohó sahá ña co xeén ndó caja ndó cuachi. <sup>5</sup> Á nandindójó ndó tuhun nacahan Ndióxi xihín ndo sahá ña cúu ndó jahyi mé á. Já cáchí tuhun Ndióxi já:

Jahyi maní i, a quéhe núu ndó Ndióxi tá jándoho a ini ndó ña ná ndacaca vaha ndó.

Ta a cáva ivi joho ini ndó tá jánani mé á ndohó.

<sup>6</sup> Jáchi já cája Ndióxi xihín na quíhvi ini a. Jándoho a ini na já ná jándacoo na ña núu ta já nduu na jahyi mé á, cáchí tuhun Ndióxi.

<sup>7</sup> Quiahva ndeé ini ndó tá cája Ndióxi ña ná ndoho ini ndó. Jáchi tá quiahva cája in da taa xihín jahyi da quiahva já cája mé á xihín ndo. Jáchi tóco ndihi dataa jácaxáhan da jahyi da já ná ndacaca vaha da. <sup>8</sup> Ta tá co jándoho Ndióxi ini ndó já quéa co cúu ndó jahyi mé á. Cúu ndó tátuhun jahyi ndáhví na. Joo tá ná jándoho Ndióxi ini ndó já cándaa ini ndó ña mé a ndaa cúu ndó jahyi mé á. <sup>9</sup> Tá nasacuú na valí nacaja cáhnu yó tátá yo vatí najácaxáhan na mí. Joo íin chága saha caja cáhnu í Ndióxi, tátá yo, mé á íin indiví vatí jándoho a ini mí jáchi xihín ña yóho cuu coo í xihín mé á anda ama cáa quivi. <sup>10</sup> Tá valí yo najándacaca vaha tátá yo mí tá najánani na mí jáchi já vaha xíní na vatí mé ñuyíví yóho cúu á nu ndúu tóo cuití ví. Joo tá jánani Ndióxi, tátá yo, mí cúu á ña vaha chága jáchi xihín ña yóho ndaja yii á mí tá quiahva íin yii mé á. <sup>11</sup> Mé a ndaa co táhán ini tá jánani na mí jáchi cáhíhvi yo xihín á. Joo tá nandihí já coo vaha ini jáchi nacatiahva í ndaja caca vaha í sahá ña nandoho ini ta xihín ña yóho cacuú ñayivi ndaa nu mé á.

### *Ndítahan nu yó taa joho í nu cáhan Ndióxi*

<sup>12</sup> Ña cán quéa ndicuíta ndó ta a jándacoo ndó mé ndó. <sup>13</sup> Ta ndinducú ndó íchí ndacú já ná cuu chindeé ndó ñayivi, na cáva ivi joho ini ña ná a ndicó coo na nuu cuachi.

<sup>14</sup> Xíní ñúhú ndinducú ndó ndaja caja ndó coo vaha ini ndó xihín tóco ndihi ñayivi. Jándacoo ndó cuachi cája ndó ta ndinuhu ini ndó caja ndó ña cúni Ndióxi já ná cuu coo ndó nu íin mé á. <sup>15</sup> Cuéntá coo ndó ná a jándacoo ni in ndó íchí cuéntá Ndióxi jáchi cúni a caja cuahá ñamani xihín ndo. Cuéntá coo ndó ná a cácuu ndó tátuhun in yucu ova ña jativí ña xíxi na jáchi na cája cuachi cája quini na ta jativí na java ga na cúu cuéntá Ndióxi. <sup>16</sup> Coto a quíhvi nuu ndó coo ndó xihín in na coo cúu yii ndo á ñajlíhí ndo. Coto a quéhe núu ndó ñaha Ndióxi tá quiahva nacaja Esaú. Jáchi in quivi cuíco

ndivaha da ta najicó da tóco ndihi ñaha ndítahan ndiquehe da nu tátá da sahá ña ná cuxu da in coho cuití va. <sup>17</sup> Joo cándaá ini ña tá nandindaa nu dá ndiquehe da ñaha ndáha tátá da coó nacuu ndiquehe da ni in ñaha. Jáchí najicó da ña nuú ñani da sahá ña ná cuxu da in coho. Ta vatí nasacu ndivaha da joo coó nacuu caja da ndijama da tuhun da ña sa nasahan da nuú ñani da.

<sup>18</sup> Ta mé ndó coó nacayati ndó nu Ndióxi tá quiahva nacaja na Israel sanahá. Mé na cán nataca na saha in yucu naní Sinai xihín da naní Moisés. Ta nacayi ñuhu cán ta nanaá ndivaha ta naxicó ndivaha tachí naxini na. <sup>19</sup> Ta naxini johó na nativi trompeta ta nacahan Ndióxi xihín ná. A juú quiahva nayihví na tá naxini johó na nu cáhan Ndióxi chí naxica tahví na nu á ña ná a cáhan ga xihín ná. <sup>20</sup> Jáchí coó nacandee ini na táa johó na ña sáhdá Ndióxi nu ná tá nacachi a já: “Tá ná cani ndaa in ñayivi á in quítí yucu Sinai yóho já queá xíní ñúhú cuun ndó yuu ná á tuxú ndó na xihín póyá anda ná quivi na”, cáchí Ndióxi. <sup>21</sup> Ta a juú quiahva nayihví na sahá ña naxini na cán. Ta anda Moisés viti nayihví ndivaha da ta já nacachi da já: “Quíji ninu i xihín ña yíhvi i”, cáchí da.

<sup>22</sup> Joo ña nacaja mé ndó queá sa nacayati ndó in nuú naní Sión, mé nu ín Ndióxi, mé a tácu indiví. Mé ñuu cán cúu á tátuhun inga Jerusalén, ña ín indiví ta ndúu cuaha mil tátó Ndióxi cán. <sup>23</sup> Sa nataca ndó cán caja cáhnu ndó Ndióxi xihín tóco ndihi ñayivi, na mé a ndaa cúu jahyi Ndióxi, mé na ndaa quivi nu libro Ndióxi indiví. Ta sa nacasaá ndó nu Ndióxi, mé a cája vii saha tóco ndihi ñayivi. Ta nataca ndó xihín tóco ndihi ñayivi, na sa naxihí sanahá, mé na sa nanduu ndaa nu Ndióxi nacaja mé á. <sup>24</sup> Ta sa nacayati ndó nuú Jesús, mé a cáhan xoo mí nu Ndióxi. Jáchí sahá ña nacaja Jesús tá naxita nji á ndica crúxu sahá ña cán queá nasahan Ndióxi tuhun a nu yo ña ná ndoo cuachí. Joo jíin va nacaja Ndióxi tá naxita nji Abel sanahá ndivaha jáchí najándoho a ini ñani da, da naní Caín sahá ña nasahní ñahá da.

<sup>25</sup> Cuéntá coo ndó já ná a quehe núu ndó nu cáhan Ndióxi xihín yo. Jáchí ñayivi cán, na coó naxeen cája ña cáchí Ndióxi

nachahvi na sahá ña núu nacaja na mé ñuyiví yóho. Ta já caja ri Ndióxi xihín mí tá ná quehe núu í tuhun mé á jáchí janda indiví ín mé á cáhan xoho. <sup>26</sup> Mé tiempo cán najátan Ndióxi ñuyiví yóho tá nacahan mé á. Joo já cáchí a já viti: “Vaxi quivi ta jatan tucu i ñuyiví ta mé tiempo cán jáquiji nuu i indiví viti”, cáchí a. <sup>27</sup> Tá nacachi Ndióxi ña inga tucu jatan mé á ñuyiví yóho já cándaá ini ña ndihi sahá ñaha nacavaha mé á. Ta tóco ndihi ñaha, ña a cuú quiji nuu, ña cán coo a anda ama cáa quivi. <sup>28</sup> Ñehe táhvi yo coo í nuú cacomí Ndióxi cuéntá saha yo ta mé cán a cuú quiji nuu a. Sahá ña cán queá ná ndiquiahva í ndixahvi nu Ndióxi ta ná caja cáhnu í mé á xihín ndinuhu ini jáchí cájii ini mé á xihín ña yóho. <sup>29</sup> Jáchí mé a ndaa Ndióxi cúu á tátuhun ñuhu ña cáyi ña jándihi sahá ñaha. Ña cán queá caja mé á ña ná ndihi saha tóco ndihi cuachi.

## 13

### *Ná caja í ña táhan ini Ndióxi xihín*

<sup>1</sup> A jándacoo ndó ña quíhvi ini ndó na cúu cuéntá Jesús jáchí cúu ná tátuhun ñani ndó á quiahva ndó. <sup>2</sup> A ndíndójó ndó ndiquehe vaha ndó na tóho tá ná casaá na vehe ndó jáchí xihín ña yóho java na nandiquehe vaha na tátó Ndióxi vatí coó nacandaá ini na ña.

<sup>3</sup> A ndíndójó ndó sahá ñayivi ñuhu vecaa ta xíní ñúhú tahnda ini ndó xihín ná jáchí xíní ñúhú cacuu a tátuhun ndacaan mé ndó vecaa xihín ná. Ta a ndíndójó ndó sahá ñayivi, na cája xíxi na xihín ta xíní ñúhú tahnda ini ndó xihín ná jáchí cuu ndoho ini ri ndóhó va tá quiahva ndóho ini na cán.

<sup>4</sup> Vaha va cája ndó tá tándaha ndó ta xíní ñúhú caja cáhnu ndó yí ndó á ñájihí ndó. Ta a ndúcú toho ndó coo ndó xihín inga na jáchí jándoho Ndióxi ini ndá na quíhvi nuu coo xihín na coo cúu yí na á ñájihí na.

<sup>5</sup> A ndiáva ini ndó cacomí ndó cuaha jiuhún. Ndítahan cajii ini ndó xihín ña cómi ndó jáchí já cáchí Ndióxi já: “A jándacoo toho i ndóhó ta ni a ndíndójó i saha ndó”, cáchí a.

<sup>6</sup> Sahá ña cán queá cuu candeé ini Ndióxi ta cuu cachí já:

Mé á cúu Ndióxi, xitoho i ta chindeé a yehe.

Ta a cáyihví toho i ndá ñaha ndúcú ñayivi caja na xihín i.

<sup>7</sup> A ndíndójó ndo sahá na nasacomí cuénta saha ndo ta ni sahá na naçaxi tuhun tuhun Ndióxi nu ndo. Candehé ndó ndaja naçaja na ñuyíví yóho jáchi naçandeé ini na Ndióxi anda quiahva naxihi na. Ta ndítahan nu mé ndó candeé ini ndó a tá quiahva naçaja na cân.

<sup>8</sup> Co ndíjama toho Jesucristo. Tá quiahva naçacuu a sanahá ndivaha quiahva já cúu ri a anda viti ta quiahva já coo a anda ama cáa quivi. <sup>9</sup> A quiahva toho ndó ñamani nuú ñayivi ña ná jándahvi na ndohó xihín ña jánaña na nu ndo. Jáchi cúu á sahá ñamani cája Ndióxi xohó ña ndíndacú ínima yo. Ta co cúu á sahá ña jánaña java ñayivi tá cáchi na ña a cúu cuxú java ñaha ña ná nduu ndaa ínima yo. Mé a ndaa ña yóho co chindeé a mí.

<sup>10</sup> Tá naxihi Jesucristo ndica crúxu já najoco a mé á nu Ndióxi saha yo. Joo jiin va naçaja jutú cuénta na Israel sanahá tá najoco na quíti nu Ndióxi. <sup>11</sup> Jáchi da cúu jutú sacuaña nasañehe da nii rí naxihi cân ini veñuhu nuú yii ndivaha ta já najoco da dó nu Ndióxi sahá cuachi ñayivi. Joo natavá da yiquí cuñu rí jatá ñuu nu sáhmi na ri. <sup>12</sup> Ta quiahva já naxihi Jesús jatá ñuu Jerusalén. Ta naxita nii a ña ná jándoo a cuachi ñayivi. <sup>13</sup> Ña cân quéa cóho nuú Jesús. Cúu á tátuhun cuhun í jatá ñuu ta a cáchan nuú yó ndoho iní xihín mé á. <sup>14</sup> Jáchi ñuyíví yóho coó toho ni in nuú cuu coo í anda ama cáa quivi. Joo ndínducú yo inga ñuu nuú cuu coo í chága chí nuu. <sup>15</sup> Cóho caja cáhnu í Ndióxi ní tiempo ta chindeé Jesús mí caja í ña. Ta ña yóho cúu á tátuhun ña jóco yo nu mé á sahá ña naçaja tá naxihi a ndica crúxu. Cóho caja cáhnu í mé á xihín yúhu yo jáchi cúu yó cuénta mé á. <sup>16</sup> A ndíndójó ndo caja vaha ndó ta ná chindeé ndo ñani táhan ndó xihín ña cómi ndo. Jáchi ña yóho cúu á tátuhun ñaha jóco ndo nu Ndióxi ta cájii ini mé á xihín á.

<sup>17</sup> Candúsa ndó na cómi cuénta saha ndo ta caja ndó ña cúni na. Jáchi naçahan Ndióxi chuun yóho nu ná. Ta tandaa quivi ndítahan ndicani na nu Ndióxi sahá ña naçaja na. Caja ndó ña cúni na já ná cajii ini na ta

na a cóo cuéha ini na jáchi a cuú quee vaha ndó já.

<sup>18</sup> Caça tahví ndo nu Ndióxi sahá nde jáchi nandivií ínima nde ta cúni nde caja vaha nde ní tiempo. <sup>19</sup> Caja ndó ñamani caça tahví ndo sahá i ña ná quiahva Ndióxi ñamani nuú i saa yachi i nu ndó coto nihni i ndohó.

### *Xihín tuhun yóho ndihi carta yóho*

<sup>20</sup> Ña cúni quéa ná quiahva Ndióxi ña ná coo vaha iní. Mé a cân najánditacu tucu a Jesucristo, mé a cúu xitoho í. Ta sahá ña naçaja Jesucristo tá naxita nii a ndica crúxu sahá ña cân quéa naçahan Ndióxi tuhun a nu yo ta a ndihi toho sahá. Ta mé Jesús cómi a cuénta saha yo tá quiahva in pastó cómi da cuénta sahá ndicachi jana dá. <sup>21</sup> Ta ná caja Ndióxi ña ná ndíndacú ínima ndó já ná cuu caja ndó tóco ndihi ña cúni a. Ta sahá ña naçaja Jesucristo ná caja Ndióxi xihín yo ndá ña naçuu ña táhan ini mé á xihín. Ná caja cáhnu í Jesucristo anda ama cáa quivi. Já ná coo.

<sup>22</sup> Xíca tahví i nu ndo ña ná coo cáhnu ini ndó xihín tuhun cáhan i xihín ndo, ñani i, na cúu cuénta Jesús. Jáchi carta loho cuití va naçahyí i nu ndo já ná ndíndacú ínima ndo. <sup>23</sup> Ta cáxi tuhun i xihín ndo sahá Timoteo, mé da naçandacaan vecaa joo sa najani dá viti. Tá ná casaá yachi da yóho já saa da xihín i coto nihni nde ndohó.

<sup>24</sup> Cañan Ndióxi ndó xihín tóco ndihi na jánaña tuhun Ndióxi nuú ñayivi ta cañan Ndióxi ndó xihín tóco ndihi na cúu cuénta Jesús. Tóco ndihi na cúu cuénta Jesús, na ndúu nación Italia yóho chíndahá na Ndióxi coo ndó.

<sup>25</sup> Ná caja cuaha Ndióxi ñamani xihín tóco ndihi ndó. Já ná coo.

## Carta nacahyí Santiago nuú na cúú cuéntá Jesús

### *Cáhan Ndióxi Santiago xihín na cúú cuéntá Jesús*

<sup>1</sup> Yehé cúú Santiago, da cája chúun cuéntá Ndióxi ta cája chúun i cuéntá Jesucristo, xitoho í. Chíndahá i Ndióxi coo na Israel, na cúú cuéntá Jesús, mé na nandicuíta nuu ndúu níi cúú ñuyíví.

### *Ndaja caja í candaq iní ña cúní Ndióxi caja í*

<sup>2</sup> Cuni johó vaha ndó, ñani mí i, na cúú cuéntá Jesús. Ndítahan cájii ini ndó tá vaxi tá nuú ña ndóho ini ndó. <sup>3</sup> Jáchí sa xíní ndo ña tá ndóho ini ndó sahá ña cándéé ini ndó Jesucristo já queá catiahva chága ndó quiahva ndeé ini ndó sahá ña ndóho ini ndó. <sup>4</sup> Quiahva ndeé ini ndó tá ndóho ini ndó anda quiahva ná xinu coo ña cúní Ndióxi já queá cacuu ndó ñayivi ndaa nu mé á. Ta cuahnu vaha ndó xihín tuhun a ta ni in ñaha a cámani ga nu ndo.

<sup>5</sup> Tá co candaq ini ndó ña cúní Ndióxi caja ndó já queá xíní ñuhú caça tahví ndó nu mé á ta quiahva mé á cuahá ña candaq ini ndó. Jáchí co ndáhví cúu ini a quiahva ña nuú ndihi ñayivi. <sup>6</sup> Joo tá xíca tahví ndo nu Ndióxi xíní ñuhú candeé ini ndó mé á ta a cáhvi ivi johó ini ndó jáchí mé na cáhvi ivi johó ini, na cán cúú na tátuhun tañuhú tá ndácojo do cája tachí. Ta co ín táji do jáchí xíca dó tá xoo yóho tá xoo cáa cája tachí. <sup>7</sup> Jáchí tá ná cahvi ivi johó ini na já queá a cáhán na ña quiahva Ndióxi ñaha nu ná. <sup>8</sup> Mé na cáhvi ivi johó ini co xíca ndaa na ta tucu tucu ndíjama na íchi nu xíca na.

<sup>9</sup> Ta na cúú cuéntá Jesús tá cúú ná na ndáhví ndítahan cájii ini na jáchí na náhnu cúú ná nu Ndióxi. <sup>10</sup> Ta na cuicá, na cúú cuéntá Jesús ndítahan cajii ini na jáchí co yáhví toho jjuhún na nu Ndióxi. Jáchí tá quiahva ín itá yucu yachi íchi a ta ndicava ña quiahva já yachi quivi na cuicá. <sup>11</sup> Jáchí tá naxinu coo candii ta nacahihní já queá cama ndivaha íchi mé yucu ta ndicava ita nu á. Já ndihi va ña ñúchí ndaa jáchí

nandihí sahá. Quiahva já ndoho na cuicá jáchí jonáá va ndihi saha ná ta jándicoo na ña cája na.

### *Tá ndóho ndó tondóho*

<sup>12</sup> Ndaja tahví nacuu na sahan ndeé ini tá ndóho ini na jáchí tá nandihí nasahan ndeé ini na já queá ñehé táhví ná coo na xihín Ndióxi anda ama cáa quivi. Jáchí nasahan Ndióxi tuhun a nu yo ña tá cúní yo mé á já queá coo i xihín á anda ama cáa quivi. <sup>13</sup> Tá ná ndicají ini ndó caja ndó ña núu já queá a cáhán ndo ña xito ndojó Ndióxi ndohó. Jáchí a cúu caja Ndióxi ña núu ta co cúní a ña ná caja ñayivi ña núu. <sup>14</sup> Joo tá cája ndó ña núu cúú á sahá ña xíca ini ndó caja ndó ña ta xihín ña yóho ndicava ndó nuú cuachi. <sup>15</sup> Jáchí sahá ña núu xíca ini ñayivi caja na sahá ña cán cásahá na cája na cuachi. Ta tá sa nandicuahá cuachi na já queá cuhun na चाहvi na sahá ña cája na ini indayá anda ama cáa quivi.

<sup>16</sup> Cúní ndivaha i ndohó, ñani mí i na cúú cuéntá Jesús. A jándahvi ndó mé ndó. <sup>17</sup> Jáchí tóco ndihi ña vaha quíxi a indiví nu ín Ndióxi ta mé á sahan ña vaha nu yo. Já ín va Ndióxi jáchí cája tá cája ña vaha cuití va. Ta co ndíjama toho Ndióxi. Ta mé Ndióxi, tátá yo nacavaha ña ndiyéhe ín indiví. Ta ndá tañu ndíjama táhan ña ín indiví joo Ndióxi co ndíjama toho a. <sup>18</sup> Jáchí cúní Ndióxi jácacu a mí sahá ña cándúsa í tuhun mé á ña cúú ña ndaa. Jáchí cúní Ndióxi ña ná cacuu na nu cuítí tañu tóco ndihi ñaha nacavaha mé á.

### *Ndaja caja í ndiquehe vaha í tuhun vaha cáhan sahá Jesús*

<sup>19</sup> A ndíndójó ndo ña cáhan i xihín ndo jáchí cúní ndivaha i ndohó, na cúú cuéntá Jesús. Ndítahan nu ndó cuni johó vaha ndó tá cáhan inga na xihín ndo. Ta a cácana ini ndó nducú ñehé ndó tuhun ña cáhan inga na xihín ndo. Ta a cójo ini ndó xihín ná. <sup>20</sup> Jáchí tá xójo ini ndó xihín inga na já queá cája ndó ña co cúní Ndióxi. <sup>21</sup> Ña cán queá cacu xoo ndó ndihi ña núu ta jándicoo ndó ndihi cuachi cája ndó jáchí ndúu cuahá na cája tá nuú cuachi tañu ndó. Joo xíní ñuhú jánuu ndáha ndó mé ndó nu Ndióxi ta ndiquehe vaha ndó tuhun mé á ña nacahan na xihín ndo jáchí tá



ná candúsa ndó ña já quea jácacu Ndióxi ndohó.

<sup>22</sup> Xíni ñúhú candúsa ndó caja ndó tuhun Ndióxi jáchi co yáhi toho a tá xini johu uun va ndó ña. Ta xihín ña yóho jándahvi ndó mé ndó. <sup>23</sup> Ndá na co candúsa caja ña cáchi tuhun Ndióxi cúu ná tátuhun in da sándehe nuu nuú yutátá. <sup>24</sup> Tá nandihí nasandehé da nuu dá já quee da cuahan da ta cama chá ndindójó da ndaja cáa nuu dá. <sup>25</sup> Joo mé ñayivi tá jácuaha na tuhun Ndióxi ta co ndindójó na caja na ña cáchi a já quea caja yii Ndióxi tóco ndihí ña cája na jáchi ña ndaa cúu tuhun Ndióxi. Tá cája í ña sáhdá tuhun Ndióxi nu yó caja í já quea co sáhdá ga cuachi chuun nu yó ta já ndinuhu iní caja í ña cuni Ndióxi.

<sup>26</sup> Cúu á tátuhun tá íin in dataa tañu ndó ta cáhan da cája da ña cuni Ndióxi joo co ndáa da yúhu dá tá cáhan da sahá ñani táhan da já quea jándahvi da mé va da ta coo saha toho ña cája da nu Ndióxi jáchi co cája da ña cáchi tuhun Ndióxi. <sup>27</sup> Jáchi tá mé a ndaa nandihvi in da íchi cuéntá Jesús já cúu dá taa ndaa nu Ndióxi, tátá yó. Ta chindee da na cuaan ta chindee da na sánchó tá ndóho iní na. Ta cándéé ini da Ndióxi ta tává da mé dá nuu cuachi jáchi co cája da ña núu tá quiahva cája ñayivi ñuyíví.

## 2

### *A cája ichi ini ndó xihín na ndahví*

<sup>1</sup> Cuni johu vaha ndó, ñani mí i, na cúu cuéntá Jesús. Mé ndó cándéé ini ndó Jesucristo, xitoho í, mé a cúu ña cáhnu ndivaha. Ndítahan quihvi ini ndó na ndahví tá quiahva quihvi ini ndó na cuicá.

<sup>2</sup> Ña ndítahan caja ndó cúu ña yóho: Tá ná taca ndó caja cáhnu ndó Ndióxi ta vaxi in da cuicá ndihvi da nu táca ndo ta ndíxi da jáhma vaha ndivaha ta ndácaan jéhe jiuhun cuaan nducu ndáha dá. Ta mé tañu já vaxi in da ndahví, da ndíxi jáhma núu ña yatá.

<sup>3</sup> Ta ndíquehe vaha ndó mé da cuicá ta cáchi ndó xihín dá: “Silleta vaha coo ndó”, cáchi ndó xihín da cuicá. Joo xihín da ndahví cáchi ndó já: “Candichi ndó jan á coo ndó nu ñúhu yóho”, cáchi ndó xihín da ndahví.

<sup>4</sup> Tá cája ndó ña yóho já quea cája ichi ini ndó xihín da ndahví ta cája cáhnu ndó da cuicá

sahá jiuhun da. Ta cáhvi núu ini ndó jáchi cáhan ndo ña íin chága sahá da cuicá a juú ga da ndahví.

<sup>5</sup> Cuni ndivaha i ndohó, ñani i, na cúu cuéntá Jesús. Ña cán quea cuni ña ná candaa vaha ini ndó ña nacaxi Ndióxi na ndahví ndúu ñuyíví yóho ná cacuu na na náhnu nu Ndióxi tá cándéé ini na mé á. Jáchi nasahan Ndióxi tuhun a nuú ndihí na cán ña ná cacuni na mé á já quea ñehe táhvi ná cuhun na indiví coo na xihín mé á anda ama cáa quivi. <sup>6</sup> Joo mé ndó cája ichi ini ndó xihín na ndahví. Á co ndícuhun ini ndó ña mé na cuicá cúu ná na cája xixi xihín ndó ta ñúhu na ndohó cuahan na nuú na jutixia chicaan na cuachi jata ndo. <sup>7</sup> Jáchi mé na cuicá cáhan núu na saha Jesucristo ta mé ndó cúu ndó cuéntá mé á.

<sup>8</sup> Sáhdá tuhun Ndióxi chuun nu yó já cáchi a já: “Tá quiahva quihvi ini ndó mé ndó quiahva já ndítahan quihvi ini ndó ñani táhan ndó”, cáchi tuhun Ndióxi. Tá ná caja ndó ña cáchi a yóho já quea cája vaha ndó jáchi ña yóho cúu á ley cáhnu nu Ndióxi. <sup>9</sup> Joo cája ndó cuachi nu Ndióxi tá ndíquehe vaha chága ndó na cuicá a juú ga na ndahví. Ta xihín ña yóho chicaan ley Moisés cuachi jata ndo. <sup>10</sup> Jáchi vatí nasacu vaha in ñayivi ndihí ley Moisés joo sahá in ñaha coo nacaja na sahá ña cán quea ndójo na cuachi saha tóco ndihí ley. <sup>11</sup> Jáchi sa mé Ndióxi cáchi a já: “A quihvi nuu ndó xihín ñájihí ñani táhan ndó”, ta já cáchi tucu a já: “A cáhni ndó ndii”, cáchi a. Ña cán quea cája ndó cuachi nu Ndióxi tá sáhní ndo ñayivi vatí co quihvi nuu ndó coo ndó xihín ñájihí ñani táhan ndó. <sup>12</sup> Ndítahan caja vaha cuití va ndó ta cahan ndaa cuití va ndó jáchi vaxi quivi caja víi Ndióxi saha yó xihín ley mé á ña jácacu mí. <sup>13</sup> Tá co táhnda ini ndó sahá ñayivi já quea a táhnda ini Ndióxi saha ndó tá ná casa quivi caja víi a sahá cuachi nacaja ndó. Joo tá natahnda ini ndó sahá ñayivi já quea quee vaha ndó tá ná caja víi Ndióxi sahá ña nacaja ndó ñuyíví yóho.

### *Tá cándéé ini Ndióxi já cája í ña cuni mé á*

<sup>14</sup> Cuni johu vaha ndó, ñani mí i, na cúu cuéntá Jesús. Tá cáchi ndo cándéé ini ndó Jesucristo joo co cája ndó ña vaha já quea co yáhi toho nu Ndióxi ña cándéé ini ndó mé

á. Ta sahá ña yóho a cúu toho jácaacu Ndióxi ndohó. <sup>15</sup> Cúu á tátuhun tá íin in na cúu cuéntá Jesús ta cámaní jáhma candixi na ta cámaní ña cuxu na quivi víti. <sup>16</sup> Ta cáchí ndo xihín na cán já: “Ná coo vahún ta ná candixi vahún ta ná cuxu vahún”, cáchí ndó xihín ná. Joo co sahan ndó jáhma candixi na ta ni ña cuxu na co sahan ndó nu ná ña cán queá coo chuun cúu ña cáhan ndo xihín ná. <sup>17</sup> Ña cán queá tá cáchí ndo cándéé ini ndó Jesucristo joo co cúni ndó caja ndó ña vaha, ña cúni Ndióxi caja ndó já queá mé a uun cándúsa ndó Jesucristo.

<sup>18</sup> Tá íin in da cúu cuéntá Jesús ta co cúni da caja da ña cúni Ndióxi já queá co jánaha da nuú ñayivi ña mé a ndaa cándéé ini da Jesucristo. Tá íin inga da ta cája tá cája da ña cúni Ndióxi já queá jánaha da nuú ñayivi ña mé a ndaa cándéé ini da Jesucristo. <sup>19</sup> Tá cándúsa ndó ña íin in táláá cuití Ndióxi já queá vaha cája ndó. Jári rí quini cándúsa rí ña íin in táláá cuití Ndióxi. Joo co cándúsa rí caja rí ña cúni Ndióxi ta yíhvi ndivaha rí mé á janda quíji ninu rí. <sup>20</sup> Á nacatontó jini ndo. Candehé vaha ndó. Tá cáchí ndo cándéé ini ndó Ndióxi joo co náha ndó xihín ña cája ndó ña mé a ndaa cándéé ini ndó mé á já queá coo saha mé va ña cája ndó. <sup>21</sup> Á co ndicuhun ini ndó Abraham, tásáhnú jícó yo. Nandiquehe vaha Ndióxi Abraham sahá ña nacaja da ta cáchí Ndióxi ña cúu dá ta ndaa nu mé á jáchí nacandúsa mé Abraham cahni da Isaac, jahyi da, ña joco ñahá da nu mé á. <sup>22</sup> Candehé ndo. Tá nacandúsa Abraham joco da jahyi da nu Ndióxi já jánaha da nuú ndihi ñayivi ña cándéé ini da Ndióxi. Ta sahá ña nacaja da já naxinu coo da cándéé cáhnu ini da Ndióxi. <sup>23</sup> Játá ña nacaja Abraham naxinu coo tuhun Ndióxi tá cáchí a já: “Nacandéé ini Abraham Ndióxi ña cán queá nanduu da ta ndaa nu mé á”, cáchí tuhun Ndióxi. Nacachi na sahá Abraham ña cúu dá da nandique táhan máni xihín Ndióxi.

<sup>24</sup> Ña cán queá cándaa vaha ini ña nduu ndaa yo nu Ndióxi sahá ña cándéé ini Ndióxi anda quiahva cándúsa í caja í ña cúni mé á. <sup>25</sup> Já nayaha xihín Rahab, mé ña naxica jii sanahá ndivaha. Nanduu ndaa ña nu Ndióxi sahá ña nacaja ña xihín

ñayivi Israel jáchí nandiquehe vaha ña java dataa nachindahá Josué ñuu Jericó. Ta nachindeé ña da ña ná ndijama da íchí nuú cuhun da. <sup>26</sup> Ña cán queá tá cáchí yo cándúsa í Ndióxi joo co cája í ña cúni mé á já queá cúu yó tátuhun ñayivi sa naxihi, na sa cuahan inima.

### 3

<sup>1</sup> Cuni johu vaha ndó, ñani mí i, na cúu cuéntá Jesús. A ndúcu cuaha ndó cacuu ndó na jánaha tuhun Ndióxi nuú ñayivi jáchí cándaa vaha ini ndó ña tá co jánaha ndó ña ndaa já queá jándoho chága Ndióxi ini ndó a juú ga java ga ñayivi. <sup>2</sup> Tóco ndihí cája cuaha yo cuachi. Joo ndá na cuu cahnda chuun nu yúhu ná ña ná a cáhan quini a já queá cuu cahnda na chuun nuú yiquí cuñu na viti ña ná a cája na cuachi ta já xinu coo na cacuu na ñayivi ndaa nu Ndióxi. <sup>3</sup> Á co ndicuhun ini ndó ndaja chícáan na in freno yúhu cuáyi ña ná candaca na ri. Vatí loho ndivaha cúu mé freno joo cuu cañehe na rí nu cúni mé ná cuhun na. <sup>4</sup> Candehé ndó in barco. Vatí cáhnu ndivaha cúu dó ta vaxi tachí ndeé ndivaha joo mé da ñehe dó cuu candaca da do xihín in timon loho ta cuu cañehe da do cuhun dó nu cúni mé dá. <sup>5</sup> Tá quiahva sáhdá na chuun nu cuáyi xihín barco quiahva já cája í xihín yúhu yo. Vatí loho ndivaha cúu mé yúhu yo joo xihín mé yúhu yó cuu caja cáhnu í mé ví. Candehé ndo ndaja náhnu yúcu jáquihvi ñúhu in titó loho tá ndicava dó nu á ta chícáyi yúcu anda quiahva ndihi sahá. <sup>6</sup> Tátuhun in ñuhú cáyi cúu yúhu yo. Cúu á in ña núu ndivaha ndacaan tañu yiquí cuñu í ta játiví ndihi a mí. Ta cúu á tátuhun ña sa mé indayá sahan chága ví a ñúhu nu á ña ná caja quini a ta jándihi a saha yo. <sup>7</sup> Vatí ñayivi cándéé na sáhnú na nu tóco ndihí quítí xihín laa xihín coo xihín quítí ñúhu tañuhú ta cúu sáhdá na chuun nu ri. <sup>8</sup> Joo ni in ñayivi a cuú cahnu na yúhu na jáchí co sáji yo yúhu yo tá cáhan quini sahá ñayivi. Cúu á tá quiahva cája coo tá tীন rí ñayivi chícáan rí veneno rí na já sáhní rí na. <sup>9</sup> Xihín mé yúhu yo cuahá tañu cája cáhnu í Ndióxi ta sa xihín mé yúhu yo yóho cánahá yo xihín ñayivi, na nacavaha Ndióxi yuhú nu mé

á. <sup>10</sup> Ndá tañu cáhan vaha í xihín yúhu yo ta java tañu quini cáhan yo xihín mé yúhu yo. Candehé ndó, ñani mí í, na cúu cuéntá Jesús. Co ndítahan toho caja í ña yóho. <sup>11</sup> Jáchí cúu á tátuhun in chichoho nu cána ticuúí. A cuú cana ticuúí viji xihín ticuúí ova ini in chichoho. <sup>12</sup> Ta sa xini vaha ndó, ñani mí í ña in titó ñuhú co sáhan dó aceituna jáchí cúu dó titó ñuhú va. Já in yucu uva co sáhan toho a titó ñuhú jáchí cúu á yucu mé uva va. Ña cán queá sa xini vaha ndó ña co ñuhu ticuúí viji xihín ticuúí ova ini in chichoho.

### *Ndaja ín na ndíchí jini cuéntá Ndióxi*

<sup>13</sup> Tá ín in taa ndíchí, da tácu ini tañu ndó já queá ndítahan caja vaha da ta xihín ña yóho jánaħa da nuú ñayivi ña cúu dá taa ndíchí. Tá co cája lánħa da saħá ña cája da já queá jánaħa da nuú ñayivi ña mé a ndaa cúu dá taa ndíchí. <sup>14</sup> Tá ná ndicutú ndaa ini ndó xihín ña ihvi ini ndó já queá a cáħan ndo cúu ndó na ndíchí. Ta tá ná caja ndó ñaha saħá ña cúni ndó ndiñehe jícó ndo mé ndó já queá a cáħan ndo ña cúu ndó na ndíchí. Jáchí mé da ndíchí co cája cáħnu da mé dá ta co cáħan túhún da jáchí mé a ndaa cúu dá taa ndíchí. <sup>15</sup> Joo tá cája cáħnu da mé dá já queá cándaħ ini ndó ña co ndíchí jini dá nu Ndióxi jáchí tuhun cáħan da coo naquixi a indiví nu ín Ndióxi. Cáħan da tuhun ñayivi ñuyíví yóho va ta jini mé va da vaxi a. Ta tuhun cáħan da cúu á tuhun núu, ña quixi nuú tiñáħa sacuaħa. <sup>16</sup> Jáchí nu ndúu na ihvi ini mé cán ndúu na co cúni táhan ta sa mé cán cáni táhan na ta cája na tóco ndihi nuú cuachi. <sup>17</sup> Joo na ndíchí jini cáħan na tuhun quíxi indiví nu ín Ndióxi. Ndinuhu ña vaha cája na ta co xójo ini na xihín ñayivi. Cája cáħnu ini na saħá ñayivi. Co xíxi ini na xihín ñayivi jáchí táħnda ini na saħa ná. Cája na ña vaha cuití va. Cáħan na ña ndaa cuití va ta co jándaħvi na ñayivi. <sup>18</sup> Vatí cúni ñayivi cáni táhan na xihín na ndíchí joo ndúcú na coo vaha ini na xihín ndihi ñayivi ta já cúu ná ñayivi ndaa nu Ndióxi.

## 4

### *A cándico toho ndó ichi cuéntá na ñuyíví*

<sup>1</sup> Ndávaha ri cáni táhan ndó ta já quihvi ndó tondóħo tañu ñayivi. Cáni táhan ndó

saħá ña ndicají ini ndó caja ndó cuahá nuú cuachi ña xíca ínima ndo. Ta cúu á tátuhun cáni táhan ña vaha xihín ña núu ini ínima ndo <sup>2</sup> jáchí xíca ini ndó coo cuahá ñaha nu ndo joo a cuú ñeħe ndó a. Ña cán queá sáħní ndó ñayivi já ñeħe ndó ña cúni ndo. Cáħihvi ini ndó tá xini ndo ñaha inga na ta a cuú ñeħe ndó a, ña cán queá cáni táhan ndó xihín ná. Joo co ñeħe ndó ña cúni ndo jáchí co xíca tahví ndo nu Ndióxi saħá ñaha cámaní nu ndo. <sup>3</sup> Tá xíca ndo ñaha nu Ndióxi ta co sáhan mé á ñaha nu ndo já queá cándaħ vaha ini ndó ña co ín vaha ínima ndó nu Ndióxi jáchí nasacu ini ndó caja ndó ña cúni mé cuití ndo. <sup>4</sup> Tá quiahva cája ñañáħa tá jándaħvi ña yí ña xihín inga dataa quiahva já cája ndó cuachi ña co táħán ini Ndióxi xihín. A co cándaħ ini ndó ña tá ná caja í tá quiahva cája ñayivi ñuyíví yóho já queá nduú na co cúni táhan xihín Ndióxi. Ta a cuú ndique táhan máni yó xihín mé á tá ná caja í ña núu ñuyíví yóho. <sup>5</sup> Jáchí sa xini vaha ndó ña ín saħa cáħan tuhun Ndióxi tá cáħí a já: “Nachicaħan Ndióxi ínima yíi mé á ini in in í jáchí cúni ndivaha mé a mí ta chí táħvi ndivaha ini a saħa yo.” <sup>6</sup> Joo cája Ndióxi cuahá ga ñamaní xihín yo ta chíndeé a mí. Já cáħí tuhun Ndióxi já: “Co táħán ini Ndióxi xihín ñayivi, na ndiñehe jícó mé. Joo chíndeé Ndióxi ñayivi vaha, mé na co ndiñehe jícó mé”, cáħí tuhun Ndióxi. <sup>7</sup> Ndiquiahva ndó mé ndó ndáħa Ndióxi ta chicají ndó ínima ndo nuú tiñáħa sacuaħa ná a cája ndó ña cúni ri. Anda jáví cunu rí cuħun ri. <sup>8</sup> Cayati ndó nu Ndióxi ta já cayati Ndióxi nu ndo. Jándicoo ndó cuachi cája ndó ta ndaja víi ndó ínima ndo ña ná cándico ndó in túhún ichi cuéntá Jesús cuití va. <sup>9</sup> Cajuchú ini ndó ta ndahyi cóħo ndo saħá cuachi cája ndó. Ndiĵama ndó ña cájji ini ndó ta ná nduu a ña cacuéħa ini ndó saħá cuachi ndó. <sup>10</sup> A ndiñehe jícó ndo mé ndó nu Ndióxi já queá ndiñehe jícó Ndióxi ndohó.

### *A cáħan núu ndó saħa inga na*

<sup>11</sup> Candehé ndo, ñani mí í, na cúu cuéntá Jesús. A cáħan núu saħa táhan ndó ta a cándehé ndaa táhan ndó. Jáchí ndá da cáħan núu saħá inga na já cáħan núu da saħa ley Ndióxi ta sájí nuu da nu ley. Co ndítahan nu

yo caji nuu í nu ley Ndióxi jáchi tá cája í já já queá quehe núu í ley Ndióxi ta sándehe ndaa í ña. Ña ndítahan nu yo caja í queá candúsa í ña ta caja í ña. <sup>12</sup> Jáchi in túhún Ndióxi nasahan ley nu yo. Ta mé Ndióxi cúu á juéxe cáhnu nuú ndihi ñayivi ta mé á cuu caja víi a sahá cuachi. Ndióxi cuití va cuu jácacu mí ta sa mé Ndióxi cuu chindahá mí indayá. Ña cán queá co ndítahan nu yo candehé ndaa táhan í.

### *Tá cahan í sahá ña caja í itaan*

<sup>13</sup> Ndúu java na tañu ndó ta cáchi na: “Viti á itaan cuhun tá cuhun nde in ñuu cáhnu ta cán canduu nde in cuiá caja chúun nde ta ñehe cuahá nde jiuhún”, já cáchi java na. Tá cahan ndo já ndítahan cuni johu vaha ndó ña cahan í xihin ndo. <sup>14</sup> Co xini toho ndó ndia ndoho ndó itaan. Co xini toho ndó ndá quivi quivi ndó. Cúu ndó tátuhun in vico ña íin too loho ta tá nandihí sa coó a. <sup>15</sup> Vaha chaga ná cachi ndó já: “Catacu nde quivi itaan tá cuni Ndióxi. Ta caja nde ña jan á ña yóho tá cuni Ndióxi”, já cachi ndó. <sup>16</sup> Joo cája cáhnu ndó mé ndó tá cáchi ndó ña cánda iní ndó ndia ndoho ndó quivi itaan. Ta núu ndivaha cája ndó tá cája cáhnu ndó mé ndó. <sup>17</sup> Cuachi ndacaan nuú na tiahva caja ña vaha ta co cája na ña.

## 5

### *Cahan Santiago nuú na cuicá*

<sup>1</sup> Cuni johu vaha ndó na cuicá. Ndítahan nu ndó ndahyi cóhó ndo ta tahnda iní ndó jáchi vaxi quivi ndoho iní ndó. <sup>2</sup> Nacasahá táhyi tóco ndihi ñaha najátaca ndó ta nasaxi ndihi tiquijí jáhma ndo. <sup>3</sup> Nacuju ndihi jiuhun cuáan xihín jiuhun cúxú ña najátaca ndó catacu vaha ndó quivi chaga chí nuu. Joo co yáhví ga viti jáchi vaxi quivi tá naha ña nacajihnda ndivaha ndó xihín jiuhún ndó. Tá quiahva jándihí ñuhú cáyi sahá tutu quiahva já ndihi saha ndó tá chínúu ndó ínimá ndó jatá jiuhún ndó. <sup>4</sup> Candehé ndó. Mé ndó coo nachahvi ndó mozo ndo tá najácaja chúun ndó na nuú utu ndó. Ta viti sácu cóhó na ndaca na cuénta nu ndo. Ta tá xica tahví na nu ndo já queá anda nu Ndióxi, mé á cáhnu ndivaha, xinu coo ña cahan na xihin ndo. <sup>5</sup> Mé ñuyiví yóho ndúu vaha ndó xihín ña cuicá ndo ta cája ndó

ña xica ini cuití va ndó. Xíxahan vaha ndó ta viti nandaha ndó tátuhun tindiqui, rí najándaha chuun na cahní na. <sup>6</sup> Ta chícaan ndó cuachi jatá ñayivi ndaa ta ndá tañu sahní ndó ñayivi vaha, mé na a cuú chindeé mé.

### *A cándati númi ndó quivi quixi tucu Jesucristo*

<sup>7</sup> Candehé ndo, ñani mí i, na cúu cuénta Jesús. A ndíhi iní ndó ta cuéé coo ini ndó candati ndó quivi quixi tucu Jesucristo, mé a cúu xitoho í. Tá quiahva ndati in dataa jáquee da nuú utu da quiahva já ndítahan candati Jesucristo ña quixi tucu a. Jáchi sa xini ndo ndaja cája in dataa tá ndati da cuun vaha javi nuú tata ña nachihin da. Joo co ndati númi dá ña ná jáquee da nu á. <sup>8</sup> Quiahva já ndítahan cuéé coo ini ndó candati ndó quivi quixi tucu Jesucristo. Cacú ndacú ndó ínimá ndo jáchi jalóho cuni ndinda quivi quixi tucu Jesucristo. <sup>9</sup> Candehé ndo, ñani mí i. A cahan cuachi nu táhan ndó ná a jándoho Ndióxi iní ndó. Ta viti jalóho cuni quixi Ndióxi, ña cúu juéxe cáhnu caja víi a sahá cuachi ñayivi. <sup>10</sup> Á co ndicuhun iní ndó, ñani mí i. Sanahá ndivaha mé na profeta Ndióxi nacahan na tuhun Ndióxi nuú ñayivi. Tá quiahva nasahan ndeé iní na tá nandoho iní na quiahva já ndítahan nu mí quiahva ndeé iní tá ná casaa quivi ndoho iní. <sup>11</sup> Ta ñehe táhví mé profeta ña cájii iní na viti jáchi nasahan ndeé iní na tá nandoho iní na. Á coo naxini johu ndó saha in da naní Job. Vati nandoho ndivaha iní da joo nasahan ndeé iní da tá nandoho iní da já queá nacaja cuahá Ndióxi ñamaní xihin dá. Xihín ña yóho cánda iní ña táhnda iní Ndióxi sahá ñayivi jáchi quíhví iní a na. <sup>12</sup> Cuni johu vaha ndo, ñani mí i jáchi cáhnu chaga tuhun yóho nuú ndihi tuhun. Co ndítahan tává ndo quivi indiví ni quivi ñuyiví ni quivi inga ñaha. Jáchi ndítahan cahan ndó ña ndaa cuití va. Ta tá ndúcú ñehe ndó tuhun já cáchi ndó já: “ajan”, á tá coo já cáchi ndó: “uhun.” Já cuití va cachi ndó ná a jándoho Ndióxi iní ndó.

<sup>13</sup> Tá íin in na ndóho iní tañu ndó, ndítahan nu ná caca tahví na nu Ndióxi sahá ña ndóho iní na. Tá íin in na cájii iní tañu ndó, ndítahan nu ná cata na nu

Ndióxi já ná caja cáhnu na mé á. <sup>14</sup> Tá ín in na quíhvi tañu ndó já quéa ndítahan nu ná caca na ñamani nuú na sacua ha veñuhu ña ná quixi na caca tahví na nu Ndióxi saha ná. Ta ná cuyu na sítí jiní na quíhvi ña ná ndivaha na. <sup>15</sup> Ndítahan nu ndó candeé ini ndó Ndióxi tá ná caca tahví ndo nu á sahá na quíhvi já quéa ndivaha na quíhvi caja Ndióxi. Ta tá nacaja na cuachi já quéa caja cáhnu ini Ndióxi sahá cuachi na. <sup>16</sup> Ña cán quéa ndítahan nu ndó nahma nu táhan ndó cuachi ndó. Ta ndítahan nu ndo caca tahví ndo nu Ndióxi sahá ndaja táhan ndo já quéa ndaja vaha Ndióxi ndohó tá quíhvi ndo. Jáchi chindeé Ndióxi ñayivi vaha tá xihín ndinuhu ínimá ná xica tahví na nu mé á. <sup>17</sup> Á co ndícu hun ini ndó da naní Elías, da nasacuu profeta sanahá. Nasacuu da ñayivi tátuhun mí. Ta xihín ndinuhu ini da naxica tahví da nu Ndióxi ña ná a cúun javi. Ña cán quéa tañu uní cuia java coo nacuun toho javi. <sup>18</sup> Ta tá nandihí cán naxica tahví tucu da nu Ndióxi ña ná casahá cuun tucu javi. Ña cán quéa nacasahá cúun tucu javi chí nanana ndihí yucu cuí ñundáhyi cán.

<sup>19</sup> Candehé vaha ndó, ñani mí i, na cúu cuéntá Jesús. Tá ín in na tañu ndó ta najándicoo na íchi cuéntá ña ndaa ta tá in ndó najándicó coo ndó na cán ña ná caca tucu na íchi cuéntá Jesús <sup>20</sup> já quéa najáca cu ndó mé na cán ña ná a cúhun toho na in-dayá. Ta já caja cáhnu ini Ndióxi sahá cuahá cuachi nacaja na.

## Cártá nacahyí Pedro nu cuítí

### *Cáhan Ndióxi Pedro xihín na cúu cuéntá Jesús*

<sup>1</sup> Yehe cúu Pedro ta cúu u in apóstol cuéntá Jesucristo. Ta chindahá i Ndióxi coo ndó, na nacaxi mé á jáchi cúu ndó na tóho ñuu jan sahá ña nataxí ñayivi ndohó ñuu ndó. Ta viti nandicuita nuu ndó ndúu ndó estado Ponto xihín estado Galacia xihín estado Capadocia xihín estado Asia xihín estado Bitinia. <sup>2</sup> Cúu ndó na nacaxi Ndióxi, tátá yo jáchi janda saha nasacu ini mé á caja já xihín ndo. Ta xihín ínimá yji mé á nandaja ndohó ña ná nduu ndó cuéntá mé á já ná caja ndó ña sáhdá a nu ndó caja ndó. Ta nacaxi a ndohó já ná ndivií ndo xihín ni Jesucristo. Ná caja cuahá ndivaha Ndióxi ñamaní xihín ndo ta ná caja mé á ña ná coo vaha ndivaha ini ndó.

### *Jácaçu Ndióxi ñayivi*

<sup>3</sup> Ná caja cáhnu yó Ndióxi, mé á cúu tátá Jesucristo, xitoho í jáchi táhdá ndivaha ini mé á saha yo ta nacaja ña tácu yó cuéntá mé á viti. Já nacaja jáchi nanditacu tucu Jesucristo ta mé á ndaa cándaá vaha ini ña jáxinu coo Ndióxi tuhun a nasahan nu yo. <sup>4</sup> Ta nasacu ini a quiahva cuahá ndivaha ña vaha ín indiví cán nu ndo. Mé ña vaha ín cán a cuú ndihi sahá ta ni co íchi a ta a cáyatá toho ña. Ta nasacu vaha Ndióxi mé ña vaha ín indiví cán anda tandaa quiví saa ndó cán. <sup>5</sup> Cándéé ini ndó Ndióxi sahá ña cán quéa xihín ndéé mé á chindeé a ndohó nuú ña ihvi vaxi nu ndo anda xinu coo quiví nu ndíhí. Janda javí cuni ndó ndá quiahva jácaçu a ndohó.

<sup>6</sup> Ña cán quéa ndítahan nu ndó cajji ndivaha ini ndó viti vatí vaxi quiví ndoho ini ndó sahá tondóho quixi nu ndo. <sup>7</sup> Tá ná candéé cáhnu ini ndó Ndióxi cúu á tátuhun jiuhun cuáán. Ta tá quiahva cája in dataa tá jáyaha da jiuhun cuáán nu ñuhú cáyi ña xító ndojó da ña quiahva já cája ri Ndióxi coto ndojó a ndohó ña ná nahá ña mé a ndaa cándéé cáhnu ini ndó mé á. Ta ndíyahvi chága ña cándéé ini ndó mé á a juú ga

jiuhun cuáán, ña ndihi saha. Ña cán quéa tá ná quixi tucu Jesucristo já cahán vaha mé á sahá ña nacaja ndó ta já ndaja cáhnu a ndohó jáchi nacandéé ini ndó mé á.

<sup>8</sup> Quíhvi ini ndó Jesucristo ta cándéé ini ndó a vatí a ñaha cuni ndó a. Ña cán quéa nacaan ndó cájji ini ndó ta ña yóho cúu á ña cáhnu ndivaha nu mé á. Ta ni co ñéhe ndó tuhun ndá quiahva ndicani ndó ña yóho nuú ñayivi. <sup>9</sup> Cájji ini ndó jáchi cándaá ini ndó ña jácaçu Ndióxi ndohó sahá ña cándéé ini ndó mé á.

<sup>10</sup> Anda sanahá ndivaha najáyaha na profeta tuhun nacahan Ndióxi xihín ná nuú ñayivi. Ta cáchi na ña vaxi quiví caja cuahá Ndióxi ñamaní xihín ñayivi ña jácaçu a na nuú cuachi na. Ta vatí najácuaha na tuhun mé á joo coo nacandaá ini na ndaja caja Ndióxi jácaçu a ñayivi. <sup>11</sup> Ta ñúhu ínimá yji Jesucristo ini ínimá na profeta ta nacaja mé á ña ná cahyí na nuú tutu ña nacahan mé á xihín ná. Ta nacahyí na ña vaxi quiví ndoho ndivaha ini Jesucristo joo tá nandihí já ndicáhnu ndivaha mé á. Ta nanducú na cán candaá ini na yo cacuu Jesucristo ta ndá tiempo cacu a. <sup>12</sup> Nacaja Ndióxi ña ná candaá ini na profeta ña a yáha yachi toho ña nacahyí na nuú tutu jáchi cacuu a ña coo tiempo vaxi chí nuú. Jáchi saha mé ndó nacahyí na ña nuú tutu ta java ñayivi sa nacaxi tuhun na mé tuhun vaha saha Jesucristo nu ndo. Ta nachindahá Ndióxi mé ínimá yji mé á ña ná quixi a indiví ta nachindeé a na ña ná cahán na tuhun vaha saha Jesucristo nu ndó. Ta janda mé tátó Ndióxi cúni na candaá ini na ña yóho.

### *Ndítahan nu yo caja í tá quiahva cája Ndióxi*

<sup>13</sup> Ña cán quéa caja tiahva ndó xíní túní ndo ña ná caja ndó ña cúni Ndióxi. Cahnu ndó xíní túní ndo ta coo tiahva ndó candati ndó ná jáxinu coo Ndióxi tuhun a ña caja cuaha mé á ñamaní xihín ndo tá ná xinu quiví quixi tucu Jesucristo. <sup>14</sup> A cacuu ndó ñayivi sáá ini jáchi cúu ndó jahyi Ndióxi. Co ndítahan ga cája ndó ña núu ña naxica ini ndó caja ndó tá cámaní candaá ini ndó tuhun Ndióxi. <sup>15</sup> Ña ndítahan caja ndó quéa caja ndó ña cúni Ndióxi xihín ndinuhu ini

ndó já ná cacuu ndó ñayivi yii. Jáchi Ndióxi, mé á naçaxi ndohó cúú á ña yii. <sup>16</sup> Jáchi já cáchi tũhun Ndióxi: “Ndítahan cacuu ndó ñayivi yii jáchi yehe cúú ũ Ndióxi yii.”

<sup>17</sup> Ta tá ná cachi ndó “tátá Ndióxi” já ndítahan caja cáhnu ndó a nani ndúu ndó ñuyíví yóho. Jáchi mé á cája vií a sahá ña cája in in ñayivi ta co sáhní toho a mé á ndá ñayivi cúú ná. In nuú cája mé á xihín ndihi na. <sup>18</sup> Jáchi mé Ndióxi najáçacu a ndohó nuú ndihi ña núu naçaja ndó sanahá. Ta ña yóho cúú ña naçatiahva ndó naçaja tásáhnu jícó ndo. Ta sa cándaã vaaha ini ndó ña coo naçahvi Jesucristo sahá cuachi ndó jan xihín jiuahun cuáán á xihín jiuahun cúxú, ña ndihi saha. <sup>19</sup> Ña naçaja mé á quea naçahvi a sahá cuachi ndó xihín nii mé á, dó yahvi ndivaha. Naxita do cán tá naxihi a ndica crúxu vatí coo naçaja mé á cuachi. Najoco a mé á nu Ndióxi sahá cuachi tá quiahva nasacaja ñayivi tá najoco na in ndicachi vií nu Ndióxi sanahá sahá cuachi na. <sup>20</sup> Tá cámani cava sahá saha ñuyíví já nasacu ini Ndióxi quivi Jesucristo sahá cuachi ñayivi. Tá naxinu tiempo já naquixi a ñuyíví ña ná chindee a ndohó. <sup>21</sup> Xihín ña naçaja Jesucristo candeé ini ndó Ndióxi viti, mé á najánditacu a Jesús ta naçaja cáhnu ndivaha Ndióxi Jesús. Sahá ña naçaja Ndióxi candeé ini ndó mé á ta ndáti ndó xinu quivi quiahva mé á ña vaaha, ña íin indivi nu ndó.

<sup>22</sup> Ta viti naçasahá ndo cája ndó ña ndaa já nandaja vií ndó ínima ndo ña ná quihvi ini ndó na cúú cuéntá Jesús. Sahá ña cán quea xini ñuhú quihvi ini ndó na xihín ndinuhu ini ndó. <sup>23</sup> Cúú á tátuhun naçacu tucu ndó joo a juú ñayivi naçaja ña naçacu tucu ndó. Jáchi cúú á sahá ña candeé ini ndó tũhun Ndióxi, ña co ndíhi saha anda ama cáa quivi. Sahá ña cán quea cúú á tátuhun naçacu tucu ndó naçaja tũhun Ndióxi. <sup>24</sup> Jáchi já cáchi tũhun Ndióxi:

Tócó ndihi ñayivi cúú ná tátuhun yucu cuí ña cáa yucu ña ndíhi yachi saha.

Ta tóco ndihi ña náhnu cája na cúú á tátuhun in ita cánúu nuú yucu cán.

Jáchi mé yucu cán ichi a ta ndicava ita nu á ta quiahva já ndíhi ri sahá ña cája na cán.

<sup>25</sup> Joo tũhun Ndióxi, xitoho í a ndíhi sahá anda ama cáa quivi.

Ta mé tũhun yóho cúú á ña sa naçaxi tũhun i xihín ndo. Ta cúú á tũhun vaaha cáhan sahá Jesucristo.

## 2

<sup>1</sup> Xini ñuhú jándacoo ndó tóco ndihi ña núu cája ndó ta a jándahvi ga ndó ñayivi. Ndítahan cacuu ndó tá quiahva ndaa ndó ta a cáhivi ga ini ndó ta a cacuu ga ndó ñayivi ndahnda yuhu. <sup>2</sup> Tá quiahva cája na valí ndúcú na chichí na quiahva já ndítahan ndinducú ndó candaã ini ndó tũhun Ndióxi já ná cuu cuahnu ndó xihín á ña ná jáçacu Ndióxi ndohó. <sup>3</sup> Tá ná caja ndó já jánaha ndó ña mé a ndaa táhyí naçandaã ini ndó ña vaaha ndivaha ini Ndióxi, xitoho í.

*Jesús cúú á tátuhun in yuu cáhnu ndacaan titó vehe*

<sup>4</sup> Cayati ndó nuú Jesucristo, xitoho í jáchi tácu va mé á ta cúú á tátuhun yuu ndúhu ña naçandají da cávaha vehe. Joo nu Ndióxi cúú Jesucristo tátuhun in yuu vaaha ndivaha ña naçaxi a. <sup>5</sup> Ta caja Ndióxi xihín ndohó ña ná cacuu ndó tátuhun yuu tácu ta cavaaha Ndióxi veñuhu mé á xihín ndihi ndó. Ta sa cúú ndó jutú yii nu á. Ta sahá ña naçaja Jesucristo xihín ndó cuu joco ndó mé ndó caja ndó ña cúni mé cuití va jáchi ña jan quea cáji ini Ndióxi xihín. <sup>6</sup> Sahá ña cán quea cáchi tũhun Ndióxi tá cáhan sahá Jesús já cáchi a já:

Yehe nasacu ũ in a ñuu Sión ta cúú á tátuhun in yuu ndúhu ta mé yuu yóho cúú á ña naçaxi mí i ta cúú á ña yahvi ndivaha.

Ta ndá na ná candeé ini mé á a cándo nuú toho na caja i, cáchi tũhun Ndióxi.

<sup>7</sup> Mé yuu cáhan Ndióxi saha yóho cúú á Jesucristo ta ndiyahvi ndivaha nu mé ndó jáchi candeé ini ndó a. Joo na co candeé ini Jesús na cán cúú na jáxinu nuú tũhun Ndióxi tá naçachi a já:

Mé yuu ndúhu, ña naçandají da cávaha vehe,

nandu a yuu ña íin chága saha.

<sup>8</sup> Ta íin inga tucu nu cáchi a sahá Jesús:

Cúú á tátuhun in yuu cáhnu nuú cachihin saha ná ta jándicava a na, cáchi tũhun Ndióxi.

Ta mé na cán cáchihin saha ná jáchi co cuni na cuni johu na tuhun vaha cahan saha Jesucristo. Ta janda saha nasacu ini Ndióxi ndoho na.

### *Ñayivi, na cúu cuéntá mé á*

<sup>9</sup> Joo mé ndó cúu ndó na nacaxi Ndióxi ña ná nduu ndó na vehe mé á. Ta nanduu ndó jutú cuéntá mé á ta mé á cúu á rey. Ta cúu ndó in táhnda cáhnu ñayivi yí ndácaan ndó in ñuu ña nandiquehe Ndióxi cacomí a cuéntá saha. Ta nacaxi Ndióxi ndóhó ña ná cahan ndó xihín ñayivi ndaja ndáa ña náhnu cája Ndióxi. Mé a nacana ndóhó tá nasanduu ndó nuú naá cán já ná quixi ndó nuú ndató ndivaha yéhe nu ín a. <sup>10</sup> Coó nasacuu toho ndó ñayivi cuéntá Ndióxi jihna joo viti cúu ndó cuéntá mé á. Coó natahvi ini Ndióxi saha ndó jihna joo viti táhvi ini a saha ndo.

### *Xíní ñúhú caja í ña cúní Ndióxi*

<sup>11</sup> Candehé ndo, ñani i. Xíca tahvi i nu ndó, na cúu tátuhun na ndúu ñuu toho jáchi indivi cúu ñuu ndó. Saha ña quihvi ini i ndóhó saha ña cán quea xíca i ñamaní nu ndo ña ná a cája ndó ña xíca ini yiquí cuñu ndó caja. Jáchi cúu á tátuhun cani táhan yiquí cuñu ndó xihín ínima ndo. <sup>12</sup> Mé ndó ndúu ndó tañu ñayivi ñuyíví, na co xíca íchi cuéntá Ndióxi. Xíní ñúhú caja vaha ndó já ná cuni na jan ndá quiahva cája ndó. Vatí viti cahan núu na saha ndo ta cáchí na ña cúu ndó na quini joo tá ná cuni na ña vaha cája ndó já quea caja cáhnu na Ndióxi tá ná xinu quívi caja víí mé á saha tóco ndihi ñayivi.

<sup>13</sup> Saha ña cája cáhnu ndó Jesucristo, xitoho í xíní ñúhú coo johu ndó nu sáhnda na jutixia ndúu ñuyíví yóho nu ndo. Coo johu ndó nu cahan presidente, da ndójo chuun cáhnu chága. <sup>14</sup> Ta coo johu ndó nu sáhnda da cúu gobernador jáchi mé presidente cúu da sáhnda chuun nuú gobernador ña ná caja víí da saha na co cája vaha. Ta ndítahan nu dá cahan vaha da saha na cája vaha. <sup>15</sup> Cúní Ndióxi ña ná caja vaha ndó. Já quea na tóntó jiní, na co xíca íchi cuéntá Ndióxi cuni na ña vaha cája ndó já ná a ñéhe íni na cahan núu na saha ndo.

<sup>16</sup> Vatí najaní ndó ndáha ley Moisés ña nasacomí cuéntá saha ndó jihna joo co cuni

cachi a ña núná nu ndó caja ndó ndá cuachi cúu ndo. Jáchi xíní ñúhú ndicuhun ini ndó ña cúu ndó na cája chúun cuéntá Ndióxi viti. <sup>17</sup> Xíní ñúhú coo toni ñúhú ndo xihín tóco ndihi ñayivi. Ta ndítahan quihvi ini ndó na cúu cuéntá Jesús. Ta ndítahan nu ndó caja cáhnu ndó Ndióxi. Ta ndítahan coo toni ñúhú ndó xihín da cómí chuun ñuyíví yóho.

### *Coó nacahan núu Jesús xihín na nacaja xíxi xihín á ta quiahva já nditahan caja ri mé ví*

<sup>18</sup> Ndóhó, na cómí xitoho cuéntá saha xíní ñúhú caja ndó xihín ndinuhu ini ndó ña sáhnda xitoho ndó nu ndo. Ta a ndíñehe yúhu ndó nu ná. Coó a caja toho a á cúu ná ñayivi xíxi ini xihín ndo á cúu ná na quihvi ini ndóhó, na co jándoho nahá ini ndó. <sup>19</sup> Sa xíní ndó ña cúní Ndióxi caja ndó. Saha ña cán quea caja ndeé ini ndó tá cája xíxi na xihín ndó saha in ñaha coó nacaja ndó. Jáchi saha ña yóho cají ini Ndióxi xihín ndó. <sup>20</sup> Vatí cája ndeé ini ndó tá ndóho ini ndó saha cuachi nacaja ndó, co ñéhe táhvi toho ndó ñamaní nu Ndióxi. Joo tá cája ndeé ini ndó tá ndóho ini ndó saha ña vaha cája ndó já quea cají ini Ndióxi xihín ndo. <sup>21</sup> Jáchi saha ña yóho nacana mé á ndóhó. Ta najánaña Jesucristo ña yóho nu ndo tá nandoho ini mé á saha ndo vatí coó nacaja mé á cuachi. Ta ña yóho cúu in quiahva nasacu a caja ndó. <sup>22</sup> Ni in túhún toho tañu coó nacaja mé á cuachi ta ni in túhún tañu coó najándahvi a ñayivi. <sup>23</sup> Tá nacasahá na cánahá quini na xihín á coó nanducú ñehe mé á tuhun quini nu na. Ta tá najándoho na ini a coó nasacu ini a caja núu a xihín na cán. Ña nacaja mé á quea nasacu ndihi a ña ndáha Ndióxi, mé a cája víí ndaa saha tóco ndihi ñaha. <sup>24</sup> Mé Jesucristo nandicojo a cuachí jatá yiquí cuñu a cahan tá naxihí a ndica crúxu. Ta cúu á tátuhun naxihí yó nuú cuachí ña ná cuu catacú cuéntá mé á tá ná caja í ña vaha cuití va. Najándicuehe na Jesucristo ña ná cuu ndivaha mé ndó. <sup>25</sup> Jáchi mé ndó naxica nuu ndó ñuyíví yóho tá quiahva xíca nuu in ndicachi, rí nandiñúhú nuú xitoho. Joo viti nandico coo ndó nu Jesucristo ta mé a cán ndáa a ndóhó tá quiahva ndáa in dataa



ndicachi jana dá. Ta co jándacoo ndáha mé á ndohó.

### 3

#### *Ña ndítahan caja na sa natandaha*

<sup>1</sup> Candehé ndó, najihí, na ndúu yí. Xíní ñúhú caja ndó ña sáhdá yí ndó nu ndo. Já quea tá co cándusa da tuhun Ndióxi cuu xinu ini da candúsa da ña sahá ña cája ndó ta a juú ga sahá ña cáhan ndó xihín dá. <sup>2</sup> Jáchi tá ná cuni yí ndó ña cája vaha ndó ta cáhan toni ñúhú ndó xihín dá já quea cuu jáxinu ndó ini da xihín ña cája ndó. <sup>3</sup> A ndíhi nahá ini ndó caja cutú ndó mé ndó xihín ñaha ña cuu canaha lándá ndó xihín, tátuhun ña chuhun lándá ndó yutu jini ndo á tátuhun ña cañuhu lándá jíqui jico ndo. Ta a ndíhi ini ndó cañuhu lándá jéhe ndáha ndo. Ta a ndíhi ini ndó candixi ndó jáhma lándá. A ndíhi ini ndó saha tóco ndihi ña yóho. <sup>4</sup> Ña ndítahan ndihi ini ndó sahá cúu ña ndiyahvi nu Ndióxi. Ta ña yóho cúu in ínima ña nandicutú xihín ña vaha já ná coo vií ini ndó. Tóco ndihi ña yóho cúu ña co ndíhi saha. <sup>5</sup> Jáchi quiahva já ñúchí ndivaha nasacaja najihí yí, na nasacuu cuéntá Ndióxi sanahá. Nacandee ini na Ndióxi ta nacaja na chuun nasahnda yí ná nu ná. <sup>6</sup> Quiahva já ñúchí ndivaha nacaja ña nasananí Sara tá nacandúsa ña yí ñá, da nasananí Abraham. Ta mé ña cán nacachi ña sahá Abraham ña cúu dá xitoho ñá. Ta viti mé ndó cúu ndó tátuhun jahyi mé Sara cán tá cája ndó ña vaha ta tá co yihví ndo ni in ñaha.

<sup>7</sup> Ta jári ndóhó va dataa, da in ñájihí, a cája ndivaha ndó xihín ñájihí ndo. Coo toni ñúhú ndó xihín ña jáchi cúu ñá ña chíjín chága nu mé ndó. Ta ñamani, ña nasacu ini Ndióxi quiahva nu ndóhó, dataa, nasacu ini mé á quiahva ri a nuú ña cán va. Sahá ña cán quea ndítahan caja vaha ndó xihín ñájihí ndo já ná cuni johó Ndióxi ña xíca tahví ndó nu á.

#### *Ndóho ini java na sahá ña vaha cája na*

<sup>8</sup> Candehé ndo. In ndítahan cacuu ndihi ndó. Co ndítahan cahnda táhan ndó. Ndítahan quihvi ini táhan ndó tátuhun in cúu tátá ndihi ndó. Ta ndítahan candahví ini ndó ñayivi. Ta coto a ndínehe jícó ndo

mé ndó. <sup>9</sup> Tá ná caja núu ñayivi xihín ndo a ndícó coo ndó caja ndó já xihín ná. Ta ni tá ná canahá na xihín ndo a ndícó coo ndó canahá ndó xihín ná. Vaha chága ná caça tahví ndó nu Ndióxi ña ná caja vaha mé á xihín na cán. Ta nacana Ndióxi ndohó ña ná caja mé á ñamani xihín ndo. <sup>10</sup> Jáchi já cáchi tuhun Ndióxi já:

Ndá na cuni canduu nahá ñuyiví yóho ta co cuni na quixi tondóhó nu ná nani ín na yóho,

já quea ndítahan nu ná candaa na yuhu ná já ná a cáhan quini na.

Ta quiahva já ndítahan candaa na yuhu ná já ná a cáhan na ña tuhún.

<sup>11</sup> Ndítahan caxoo na nu tóco ndihi ña núu ta caja na ña vaha cuití va.

Ta ndítahan ndinducú na ña coo vaha ini na xihín ñayivi ta a jándacoo na caja na ña.

<sup>12</sup> Jáchi ndáa Ndióxi na cája ndaa, ta táa johó a nu cáhan na tá xíca tahví na nu mé á.

Joo xójo ini a xihín ñayivi cája cuachi, já cáchi tuhun Ndióxi.

<sup>13</sup> Ni in ñayivi a cuú ndusa caja xíxi xihín ndó tá ná ndihi ini ndó caja ndó ña vaha.

<sup>14</sup> Joo tá cája xíxi na xihín ndó vatí cája ndó ña vaha, tahví nahá nacuu ndó. A cáyhví toho ndó ñayivi ta a ndícani toho ini ndó.

<sup>15</sup> Ña ndítahan caja ndó quea caja cáhnu ndó Jesucristo, xitoho í xihín ndinuhu ínima ndo. Ta xíní ñúhú coo tiahva ndó nducú ñehe vií ndó tuhun nuú ñayivi, na cuni candaa ini sahá ña candeé ini ndó Jesús. Ta ná coo toni ñúhú ndó xihín ná ta a ndínehe jícó ndo mé ndó nani ndícani ndó tuhun Ndióxi nuú na cán. <sup>16</sup> Ndítahan caja ndó ña vaha já ná a cáchan nuú ndo. Ta tá cáhan núu na saha ndo sahá ña cúu ndó cuéntá Jesús já quea cacahan nuú mé na cán sahá tuhun núu cáhan na saha ndó. <sup>17</sup> Ta tá mé Ndióxi quea cuni ña ná ndoho ini ndó já quea vaha chága ná ndoho ini ndó sahá ña vaha cája ndó a juú ga sahá ña núu.

<sup>18</sup> Ta in túhún tañu cuití va naxihí Jesucristo sahá cuachí. Ni in túhún toho cuachi coo nacaja mé á joo nandoho ini a sahá ñayivi quini já ná cuu ndihvi ndihí íchi cuéntá Ndióxi. Ta sahá ña nasacomí a in yiquí cuñu ñayivi naxihí a joo mé á

cúu á ña ñaquixi indivi sahá ña cán queá nanditacu tucu a ta tácu yíi va ínimá mé á. <sup>19</sup> Ta ñasahan ínimá mé á nu ndájí ínimá ndíi ta cán ñacahan mé á tuhun Ndióxi xihín na. <sup>20</sup> Mé ínimá ndíi cán ñasacuu na ña cóo ñaxeen cuni johó tuhun Ndióxi sanahá ndivaha. Tá ñasatacu Noé já ñasandatí Ndióxi ña ná cava ini ña cán nani cávaha Noé mé barco cáhnu, dó jácacu ñahá. Joo chá cuití ñasacuu ña ñacacu. Una víxí laá ña ñacacu nuú ticuúí cán. <sup>21</sup> Ta viti tá cándúta yo xihín ticuúí já cacu ínimá yó tá quiahva ñacacu ña cán ini barco sanahá. Tá cándúta yo xihín ticuúí có ndóo cuachí sahá ña ñandoo yiquí cuñu í xihín ticuúí cán. Ñacacú nuú cuachí jáchi cándeé ini Jesucristo ta cúni yó ña ná ndaja víi mé á ínimá yo. Ta náha ña ñacacú nuú indayá tá nanditacu tucu Jesucristo <sup>22</sup> ta sa ñandaa mé á indivi ta íin a xoo cuáha Ndióxi. Ta sáhdá mé á chuun nuú táto Ndióxi xihín nuú ña cómi cuéntá sahá ña ndúu indivi.

#### 4

*Náha Ndióxi nu yo ndá quiahva ndítahan nu yo caja chúun í ña ná ñehe táhvi yó nu mé á*

<sup>1</sup> Tá quiahva ñandoho yiquí cuñu Jesús quiahva já ndítahan canduu tiahva ri ndóhó va ndoho ini ndó. Jáchi ndá ña ndóhó ini yiquí cuñu, ña cán cúu ña có cája cuachi ndaja ñacuu. <sup>2</sup> Ta viti có cája ga yiquí cuñu ndó ña núu cuéntá ñuyíví yóho. Ta ní tiempo ndúcú ndó caja ndó ña cúni Ndióxi. <sup>3</sup> Jáchi sa ñayaha ndivaha quiahva ñacaja ndó ña núu jihna tá quiahva cája ñayivi, ña có xini Ndióxi. Mé tiempo tá cámani candaa ini ndó saha íchi cuéntá Jesús já ñasacaja ndó tá nuú ña núu tátuhun ña xica ini ndó caja ndó xihín yiquí cuñu ndó. Ta ñasacuu ndó ñayivi xihí. Ta ñacatóo ndó cája ndó vicó lándá ndivaha. Ta chí najayaha quini ndivaha ndó ña ñasaxihi ndó. Ta ñacaja cáhnu ndó yoco ña ñacachi Ndióxi có ndítahan caja cáhnu ndó. <sup>4</sup> Ta ñacasahá cáhan núu ñayivi ñasátahan xihín ndó tá ñasacaja ndó ña núu jihna. Jáchi viti có xica nuu ga ndó cája ndó tá nuú ña núu xihín ná. Ta viti sa ñacasahá ndíhi ini na ndáti na ndicó cóo ndó xihín ná. <sup>5</sup> Joo vaxi quíví cuhun ña cán cavií saha ná nu

Ndióxi, mé a íin tiahva caja víi sahá ña tácu xihín sahá ña sa ñaxihí. <sup>6</sup> Jáchi sa ñaxini johó va ñayivi, ña sa ñaxihí cán tuhun vaha sahá Jesús tá ñasatacu na. Ñaxini johó na tuhun vaha sahá Jesús ña ná cuu catacu ínimá ná tá quiahva tácu Ndióxi vatí ñacavií saha ná ñuyíví yóho tá quiahva cávií saha tóco ndihi ñayivi.

<sup>7</sup> Jalóho cúni xinu cóo quíví ndihi saha tóco ndihi ñaha. Saha ña cán queá ndítahan nu ndó cóo cáxi táhyí ini ndó ta xihín ndínuhu ini ndó ndítahan caça táhvi ndó nu Ndióxi. <sup>8</sup> Ña cúni queá ná quíhvi ini táhan ndó jáchi tá quíhvi ini táhan ndó já cája cáhnu ini saha táhan ndó tá ná yaha xihín táhan ndó. <sup>9</sup> Ta a cójo ini ndó tá xinu cóo ñani táhan ndó xito nihni na ndóhó vehe ndó jáchi ndítahan ndiquehe vaha ndó ña. <sup>10</sup> Ñasahan Ndióxi nuú in in ndó ña ná ñehe táhvi ndó in in ñamani mé á. Ta ndítahan caja chúun ndó a ña ná chindeé ndó ña cúu cuéntá Jesús. Ta ndítahan caja ndó ña tá quiahva sahan Ndióxi ndée ndó caja ndó ña. <sup>11</sup> Ta ndá tuhun ná cahan ndó xihín ñani táhan ndó, ná cacuu a tuhun yíi tátuhun ña cáhan Ndióxi. Ta ndá ndó cája ñamani xihín inga na, ná caja ndó ña xihín ndée sahan Ndióxi nu ndó. Jáchi tóco ndihi ña cája ndó ndítahan cacuu a ña cuu caja cáhnu í Ndióxi xihín. Ta cája Jesucristo ña ná cuu caja cáhnu í Ndióxi. Cáhnu ndivaha cúu a ta sáhdá a chuun nuú tóco ndihi ñaha anda ama cáa quíví. Já ná coo.

*Ndóho ini jáchi cándeé ini Jesús*

<sup>12</sup> Candehé ndó, ñani í. Coto a cátóntó nahá ndó tá quíxi tondóhó náhnu nu ndó. A cája ndó tátuhun ña có xini quixi tondóhó nuu. <sup>13</sup> Ña ndítahan caja ndó queá cajii ini ndó jáchi xihín ña yóho cándaá ini ndó ndá quiahva ñandoho ini Jesús. Ta xihín ña yóho cajii ndivaha ini ndó tá ná cuni ndó ndá quiahva cáhnu cúu mé á tá ná quixi tucu a. <sup>14</sup> Tá cánahá ñayivi xihín ndó saha ña cándeé ini ndó Jesucristo, táhvi ñacuu ndó. Jáchi sa ñandicutú ndaa ínimá in in ndó xihín ínimá yíi Ndióxi ta mé á cúu á ña cáhnu ndivaha. Mé ñayivi cán cáhan núu na saha joo mé ndó cája cáhnu ndó a. <sup>15</sup> Tá ñacasahá cája xixi na xihín ndó cóo ndítahan cacuu a saha ña cúu ndó ta sáhní

ndii. Ta ni co ndítahan cacuu a sahá ña cája cuíhná ndo. Ta ni co ndítahan cacuu a sahá ña a váha toho ñacaja ndó. Ta ni co ndítahan cacuu a sahá ña ñaquihvi nuu ndó nuú co ndítahan nu ndo. <sup>16</sup> Joo tá ndóho ini ndó sahá ña cúu ndó cuéntá Jesucristo co ndítahan cácahan nuu ndo. Ña ndítahan caja ndó queá caja cáhnu ndó Ndióxi jáchi ñañehe táhvi ndó cacuu ndó cuéntá Jesús.

<sup>17</sup> Viti sa ñaxinu coo tiempo casahá Ndióxi caja vii a sahá ña cúu cuéntá mé á. Ta jihna mé yó, ña cúu cuéntá mé á caja vii a saha. Ta a juú quiahva jándoho a ini java ga ñayivi, ña co cuni coo joho nuú ña sáhdá mé á nu ná caja na. <sup>18</sup> Jáchi cáchi tuhun Ndióxi ña janda mí, ña cúu ñayivi ndaa nu Ndióxi ta ihvi cáa saha yo jácacu Ndióxi mí. Ndaja ga ví caja Ndióxi xihín ñayivi sáá ini, ña co cuni jándacoo cuachi. <sup>19</sup> Sahá ña cán queá tá ndóho ini ndó tá quiahva cuni Ndióxi, ndítahan nu ndó caja vaha ndó. Ta jári ndítahan nu ndó ndiquiahva ndó mé ndó ndáha Ndióxi, mé á ñacavaha ndóho. Ta cája mé Ndióxi ña sáhan tuhun a caja.

## 5

*Ndicani Pedro nuú ña cúu cuéntá Jesús ndia ndítahan nu ná caja na*

<sup>1</sup> Ta viti cuni cahan loho i xihín ña sacuaña nuú ña cúu cuéntá Jesús ndúu tañu ndó ñan jáchi ña sacuaña cúu ri yehe va. Ta cúu u in ña ñaxini xihín nuú i tá quiahva ñandoho ini Jesucristo. Ta tá quiahva cuni ña sacuaña ndaja cáhnu cacuu na nu Ndióxi tá cuhun ña coo na xihín mé á quiahva já caja ri Ndióxi xihín yehe va tá ná xinu coo quivi nu ndíhi. <sup>2</sup> Xíca tahvi i nu ndó ña ná cacomí vaha ndó cuéntá sahá ña cúu cuéntá Jesús. Caja ndó ña xihín ndinuhu ini ndó jáchi mé Ndióxi najándicoo a na ndáha ndo. Sahá ña cán queá xini ñúhu coo cuéntá vaha ndó xihín ná tá quiahva cuni Ndióxi. Ta coto a cája ndó ña xihín ña ndúsa. Ta ni a cája ndó ña sahá jjuhún. Ña ndítahan caja ndó queá cajii ini ndó xihín chuun yóho. <sup>3</sup> Ta co ndítahan cahvi ini ndo ña cúu ndó xitoho ña cúu cuéntá Jesús ñan jáchi ña ñan cúu ná ña najándacoo Ndióxi nu ndó candaa ndó. Xini ñúhu caja vaha ndó já ná cuni ri ña ñan va caja na ña. Jáchi ña

ñan cúu ná tátuhun ndicachi ta ndóho cúu ndó tátuhun ña ndáa ñahá. <sup>4</sup> Ña cán queá tá ná quixi Jesucristo, mé á cúu ña sacuaña nuú ndihi ña ndáa ña cúu cuéntá mé á ña ña ndiquiahva mé á ña ndítahan ndiquehe ndó sahá chuun ñacaja ndó yóho. Ta ña quiahva mé á nu ndó a cacuu toho a in ñaha ña ndihi saha.

<sup>5</sup> Ta viti cahan ri xihín ndóho, ña tacú. Xini ñúhu coo joho ndó nu sáhdá ña sacuaña nu ndo. Tóco ndihi ndó ndítahan candúsa táhan ndó ta co ndítahan nu ndó ndiñehe jícó ndo mé ndó jáchi já cáchi tuhun Ndióxi:

Xójo ini Ndióxi xihín ña cátóo ndiñehe jícó mé,

joo cája ñamaní xihín ña jánuu ndáha mé.

<sup>6</sup> Ña cán queá ndítahan jánuu ndáha ndó mé ndó nu Ndióxi jáchi sa cándaq ini ndó ña cáhnu ndivaha cúu mé á. Vaxi quivi jándiñehe jícó mé á ndóho sahá ña najánuu ndáha ndó mé ndó. <sup>7</sup> Tá ndicani ndivaha ini ndó ndítahan caça tahvi ndó nu Ndióxi ña ná chindee a ndóho jáchi ñúhu ini a saha ndo.

<sup>8</sup> Cuéntá coo ndó ta coto a ná ini ndó jáchi tiñahá sacuaña cúu ri ri ihvi yo ta xíca nuu ri tañu mí yóho. Ta tá quiahva cája in león ndáhyi ri ndúcú ri yo caxi ri quiahva já cája tiñahá sacuaña yóho jándicava ri ñayivi nuú cuachi. <sup>9</sup> Xini ñúhu coo ndacú ini ndó ta candeé ndusa ini ndó Ndióxi já cuu quee vaha ndó xihín ri. Ta ndítahan ndicuhun ini ndó ña tá quiahva ndóho ini ndó quiahva já ndóho ri java ga ña cúu cuéntá Jesús ndúu ndijáá ñuyivi. <sup>10</sup> Ta tá sa ñayaha chá tiempo ndóho ini ndó ña jávi caja Ndióxi ña ná ndoo cuachi ndó ta jándihvi mé á ndee a ini ínimá ndo. Nii tiempo cacuu ndó ñayivi ndacú ini xihín tuhun Ndióxi ta xihín ña yóho candeé ndusa ini ndó Ndióxi. Mé á cán cája cuahá ñamaní xihín yo. Ta ñacana mé á mí ña ná cohó coo í indivi ña ná ndaja cáhnu Ndióxi mí ña ña ama cáa quivi sahá ña in ñanduú xihín Jesucristo. <sup>11</sup> Cáhnu ná cacuu mé á ta in ndee a cája tóco ndihi ña cuni a ña ña ama cáa quivi. Já ná coo.

*Ndindayi Pedro ña cáhyi ña carta nuú cán*

<sup>12</sup> Chindee Silvano yehe cáhyi i carta yóho ta chindahá i ña nu ndo. Ta cája i cuéntá mé

Silvano yóho cája chúun da cuéntá Ndióxi xihín ndinuhu ini da. Naçahyí i mé carta loho nu ndo jáchi cúní ndicani i ña ndaa nu ndó ña cája tá cája Ndióxi ñamaní xihín ndo. Xíní ñúhú coo ndacú ini ndó ta a ndíndójó ndó tóco ndihi ña naçachi i xihín ndó yóho.

<sup>13</sup> Na cúu cuéntá Jesús ndúu ñuu Babilonia chíndahá na Ndióxi coo ndó. Ta tá quiahva nandacaxi Ndióxi ndohó quiahva já nandacaxi ri á na cán va. Ta jári Marcos, da cúu tátuhun jahyi i chíndahá da Ndióxi coo ndó. <sup>14</sup> Cañan Ndióxi xihín táhan ndó ta tatí yúhu sajóho táhan ndó jáchi quiahva já ndítahan caha ndó sahá ña quíhvi ini táhan ndó.

Ta ña cúní quéa ná coo vaha ini ndihi ndó, na cúu cuéntá Jesucristo. Já ná coo.

## Carta nacahyí Pedro chí ivi

*Cáhyí tucu Pedro inga carta nuú na cúu cuéntá Jesús*

1 Yehe cúu Simón Pedro ta cája chúun i cuéntá Jesucristo ta cúu u in apóstol nachindahá mé á ña ná cahan i sahá tuhun a. Cáhyí i carta yóho nu ndóhó, na nañehe táhvi candeé ini Ndióxi tá quiahva candeé ini ndehe mé á. Jáchí cája ndaa Jesucristo tóco ndihi ñaha ta mé á cúu Ndióxi cája cáhnu í. Ta mé á quea jácau mí. 2 Ña cúní quea ná caja cuaha Ndióxi ñamaní xihín ndo ta ná caja mé á ña ná coo vaha ini ndó sahá ña xíní ndó yo cúu Ndióxi ta sahá ña xíní ndo yo cúu Jesús, xitoho í.

*Jáxinu Ndióxi ini ña ná caja i ña cúní mé á*

3 Xihín ndée Ndióxi nacaja ña ná a ndímaní ñaha nu yo catacú ñuyívi yóho. Ta náha mé á nu yo ndá quiahva caja cáhnu í mé á xihín ña cája í. Jáchí nacaja mé á ña ná candaá ini saha Jesucristo. Ta xihín ndée mé á ta xihín tóco ndihi ña náhnu cája mé á nacaxi a mí candeé ini mé á. 4 Ta sahá ña yóho nasahan tuhun a nu yo. Ta náhnu ndivaha cúu tuhun nasahan mé á nu yo ta ndiyahvi ndivaha ña. Jáchí xihín tuhun nasahan mé á nu yó já cuu xinu coo í coo í tá quiahva ín mé á. Ta xihín ña yóho cuu caxoo í nuú ña núu xíca ini yiquí cuñu í caja ñuyívi yóho. 5 Sahá ña cán quea tá cúní ndó ñehe táhvi ndó ñamaní nu Ndióxi xíní ñúhú candeé ini ndó Jesús. Ta vatí sa candeé ini ndó Jesús joo xíní ñúhú caja vaha ndó. Ta vatí sa cája vaha ndó joo xíní ñúhú candaá vaha ini ndó tuhun Ndióxi. 6 Ta vatí sa candaá ini ndó tuhun Ndióxi joo xíní ñúhú cahnu ndó nuú ña núu ña xíca ini yiquí cuñu ndó caja. Ta vatí sa sáhnú ndó nuú ña xíca ini yiquí cuñu ndó caja joo ndítahan coo cáhnu ini ndó. Ta vatí sa ín cáhnu ini ndó joo ndítahan ndinducú ndo caja ndó ña cúní Ndióxi. 7 Ta vatí sa cája ndó ña cúní Ndióxi joo ndítahan quihvi ini ndó ñani táhan ndó, na cúu cuéntá Jesús. Ta xihín ña yóho cuu quihvi ini ndó tóco ndihi ñayivi.

8 Tá cája ndó tóco ndihi ña yóho ta tá ndihi ini ndó cuahnu ndó xihín á, a cácuu toho ndó ñayivi coo chúun nu Ndióxi. Ta tá ná xinu coo ndó candaá ini ndó saha Jesucristo, xitoho í já quea a cácuu a ña uun. 9 Joo ndá na coo cája tóco ndihi ña nacachi i xihín ndo cúu ná tátuhun in na cuaá, in na a cuú candehe vaha. Jáchí nandindójó na ña najándoo Ndióxi cuachi nacaja na sanahá. 10 Sahá ña cán quea ndítahan nu mé ndó, ñani i, na cúu cuéntá Jesús ndihi ini ndó nahá ndo nuú ñayivi ña mé a ndaa táhyí cúu ndó na nacana Ndióxi cacomí a cuéntá saha. Jáchí tá ná caja ndó tóco ndihi ña vaha nacachi i xihín ndo yóho a ndícava toho ndó nuú cuachi. 11 Ta xihín ña yóho núna nu ndó cuhun ndo indiví nu ín Jesucristo, xitoho í, mé á jácau mí ta cacomí a cuéntá saha yó anda ama cá quivi.

12 Sahá ña cán quea cahan tá cahan i sahá ña yóho nu ndo vatí sa xíní va ndó ña ta vatí sa candeé ini ndó ña ndaa, ña najánaha i nu ndo yóho. 13 Cája i ña yóho jáchí cáhán i ña ndítahan caja i ña nani tácu u ñuyívi yóho. Jáchí xíní ñúhú ndicani i nu ndo ndía quea vaha ta ndía quea a váha. 14 Jáchí sa nacaja Jesucristo, xitoho í ña ná candaá ini i ña sa nacayati quivi quivi i ta jándacoo i ñuyívi yóho. 15 Joo ndúcú ndée e ndinducú u ndá quiahva caja i já ná a ndíndójó ndó saha tóco ndihi ña yóho tá sa naxihí i.

*Ndicani Pedro ña naxini da ndá quiahva cáhnu cúu Jesús*

16 Tá najánaha nde ndohó ña ín cuahá ndée Jesucristo, xitoho í ta tá nacachi nde xihín ndo quixi tucu mé á, coo nasacuu a tuhun nacana jiní mé nde ña jándahvi nde ndohó vaha. Jáchí naxini xihín nuu mé nde ndá quiahva cáhnu cúu Jesucristo, xitoho í.

17 Naxini nde xihín nuú nde tá nandaja cáhnu Ndióxi, tátá yo Jesucristo já nandicáhnú ndivaha mé á. Ta ñúhí ndivaha nasahin tá naxini johó nde nacachi Ndióxi já: “Mé a yóho cúu jahyí maní i ta cájii ndivaha ini i xihín tóco ndihi ña cája”, nacachi Ndióxi sahá Jesús. 18 Ta mé nde naxini johó nde nacahan Ndióxi chí indiví jáchí nasanduu nde xihín Jesús jiní mé yucu yí cán.

19 Ta íin inga tucu ñaha cáhan ndá quiahva cáhnu cúu Jesús ta ña cán cúu ña ñacahyí na profeta sanahá. Ta sa xini vaha yó cúu á ña ndaa. Vaha cája ndó táa johó ndó ña ñacahyí na profeta cán jáchi cúu á tátuhun in lámpara ña jándiyéhe nuú naá janda quiahva ná quixi Jesucristo. Ta mé á cúu á tátuhun quimi cáhnu, rí quéta tá nativi jáchi jándiyéhe a ínima ñayivi. 20 Joo coto a ndíndójó ndo ña ni in túhún toho na a cuú nducú ñehe ña cáchi tuhun Ndióxi nuú inga na sahá ña cána jini mé va na. 21 Jáchi ni in profeta coó ñacahyí na ña nasacu ini mé ná cahyí. Ña ñacaja na quea nandiquiahva na mé ná ndáha ínima yíi Ndióxi ta mé Ndióxi nasahan tóco ndihi ña ñacahan na.

## 2

### *Na xica jánaha ña tuhún (Judas 4-13)*

1 Joo mé tiempo já nasanduu ri profeta túhún tañu na Israel cán. Quiahva já canduu ri na jánaha ña tuhún tañu ndóhó. Ta na cán casahá na jácahan jehé na ñayivi sahá ña cáhvi jini mé va na. Joo jáquihvi ndivaha na ñayivi xihin á. Ta xihin ña yóho a ndícuni na ña najácaacu Jesús na ta casahá na cácahan nuu ná sahá ña ñacaja mé á saha ná. Ta ña yóho quea caja ña ná ndihi yachi chága sahá na cán. 2 Cuahá ndivaha ñayivi casahá candico na jatá na cán ta casahá na cája na ña núu xihin na. Ta sahá ña núu cája na cán casahá ñayivi cahan núu na saha tuhun vaha cáhan saha Jesús vatí cúu á íchi ndaa. 3 Ta sahá ña catóo ndivaha na jiuhún sahá ña cán quea nducú na tavá na jiuhún xihin ndo xihin mé ña tuhún jánaha na cán. Ta xini Ndióxi ña cája na ña cán quea ndihi tá ndihi saha ná. Jáchi sa janda sanahá nasacu ini mé á taán a ñayivi jan ini indayá.

4 Coó ñacaja cáhnu toho ini Ndióxi saha tátó mé á tá ñacaja na cuachi nu mé á. Ña ñacaja mé á quea nachindahá a na indayá. Ta najándicoo a na nuú naá ndivaha ta ñacató a na xihin cadena ndúu na ndáti na xinu coo quivi caja víi Ndióxi saha ná. 5 Ta ni coó ñacaja cáhnu ini Ndióxi sahá ñayivi nasanduu sanahá ndivaha. Ña ñacaja mé á quea najácuun ndeé ndivaha javi já naxihi

ndihi ñayivi quini cán. Ta in túhún da naní Noé xihin ndihusa na vehe da najácaacu a. Najácaacu Ndióxi Noé jáchi ñacandúsa da mé á ta najácahan da ñayivi ña ná caja vaha na. 6 Ta quiahva já najándihi ri Ndióxi sahá ñayivi nasanduu ñuu Sodoma xihin ñuu Gomorra. Nachicaan ñuhu a na janda quiahva nanduu na yaá uun. Ñacaja Ndióxi ña yóho já ná cuni ñayivi vaxi chága chí nuu ña quiahva já caja Ndióxi jándihi a sahá ñayivi quini. 7 Joo najácaacu Ndióxi in da naní Lot jáchi nasacu da in ta vaha ta mé Lot yóho natahvi ndivaha ini da saha tóco ndihi cuachi nasacaja ñayivi quini nasanduu tiempo cán. 8 Ndijáa ní quivi ñacacuéha ini Lot cán sahá cuachi ñayivi cán jáchi quini nasacahan na ta quini nasacaja na. 9 Ta tá quiahva ñacaja Ndióxi xihin Lot quiahva já cuu caja mé á jácaacu a ñayivi, na ndíquiahva mé ndáha mé á. Ta chindeé a na tá casahá ndóho ini na. Joo sácú xoo mé á ñayivi quini já ná canduu xoo na candati na xinu quivi caja víi a sahá cuachi na.

10 Mé Ndióxi jándoho a ini tóco ndihi na catóo caja ña xica ini yiquí cuñu na jáchi cándají na caja na ña sáhdá Ndióxi nu ná. Cúu ná na ñihi ini ta ni co sáhní na mé ná ta ni co yíhvi na canahá na xihin na ndójo chuun náhnu 11 jáchi ni mé tátó Ndióxi, na ndúu nu íin mé á vatí íin chága ndeé ná a juú ga ñayivi, na cánahá xihin mé na ndójo chuun cán. Joo co sahan ndeé ini mé tátó Ndióxi chicaan na cháhan jatá na náhnu sáhdá chuun cán.

12 Joo ñayivi quini jan cúu ná tátuhun quítí, rí co xini túni. Ñacacu rí ñuyívi yóho ta tíin táhan rí ta sáhní táhan rí. Ta quiahva já cája na cán jáchi cája na ndá ña xinu ini na caja na ta cáhan núu na sahá ñaha, ña co cándaq ini na saha. Ta tá quiahva xíhi quítí já quivi na cán. 13 Tá quiahva jándoho na ini ñayivi quiahva já ndoho ini mé ná. Cáhan na ña ndató ndivaha ndúu na jáchi tá yéhe candii xica nuu na cája na ña núu. Ta tá ndúu na xihin ndó in víco catóo na ndítati na, chínuú cácahan nuu ndo quea cája na. Cáji ndivaha ini na xihin ña cája na joo jándahvi uun na mé ná.

14 Ta tá xini uun na najihí ivi laá casahá cáhvi núu ini na xihin ná. Chí co cánaá

loho na cája na cuachi. Ta jándahvi na na coó ndacú cuahan íchi cuéntá Ndióxi ta xini vaha na ndaja caja na quehe na ña cuni na. Na jan cúu ná ñayivi natavi cháhan jata, na cuhun indayá. <sup>15</sup> Mé na jan nandiñuhú na jáchi najándacoo na íchi cuéntá ña ndaa. Cája na tá quiahva nacaja da naní Balaam, jahyi Beor sanahá, da nacacuni ñehe cuahá jiuñun jata ña núu nacaja da. <sup>16</sup> Joo nanani da sahá cuachi da nacaja in búro jhí jáchi tá quiahva cahan ñayivi quiahva já nacahan rí cán xihin dá ta nasaji nuu rí nu dá ña ná a cája ga da ña núu.

<sup>17</sup> Tóco ndihi taa, na jánaha ña tuhún yóho cúu ná tátuhun chicoño nuú co ñúhu ticuú jáchi coó chuun na. Ta cúu ná tátuhun vico jácuico tachí xoo nu cuni a ta viti ña ñañehe ná quea cuhun na coo na nuú naá yávi anda ama cáa quivi. <sup>18</sup> Jáchi tuhun cahan na cúu á ña jándindita jícó na mé ná xihin joo tóco ndihi ña cahan na cúu á ña coó saha. Ta xihin ña núu, ña xica ini yiquí cuñu na caja, xihin ña jan jándahvi na na jacá nacaxoo nuú cuachi. <sup>19</sup> Mé na jánaha ña tuhún yóho jacahan ná ñayivi ña núná nu ná caja na ña cuni mé va na. Joo mé na cán cúu ná tátuhun mozo nuú cuachi jáchi cómi tá cómi cuachi cuéntá saha ná. Núhu ñayivi ndahá ña tín ñahá jáchi sáhdá a chuun nu ná. <sup>20</sup> Ta ndá ñayivi nacaxoo nuú ña núu ñuyívi yóho sahá ña nacandaa ini na yo cúu Jesucristo, xitoho í, mé á jacacu mí joo tá nandihí casáhá tucu na cája na ña núu ta ndiquiahva na mé ná ndáha ña núu cán já quea ndiquini chága ví na a juú ga tá cámani ndiquehe na íchi cuéntá Jesús. <sup>21</sup> Janda vaha chága ná a ndíhví na íchi cuéntá Jesucristo, nduu. Jáchi a váha toho tá sa xini na ña cúu á ña yí ña nasahan Ndióxi nu ná ta tá nandihí já jándacoo na ña. <sup>22</sup> Joo xihin ña cája na yóho xinu nuú tuhun ña cáchi: “Ndíco coo tucu tina sáxi rí ña sa nandusa rí. Ta cóhí, rí jacá nandihí najácuchu na ndíco coo tucu rí chiníhni rí mé rí nuú ndahyi.”

### 3

#### *Vaxi tucu Jesucristo, xitoho í*

<sup>1</sup> Candehé ndo, ñani máni. Xihin ña yóho xinu carta ivi chindahá i nu ndo. Ta nu ndívi

carta ndícani i nu ndo ndá quea ndítahan caja ndó já ná ndicani ini ndó ndinuhu ña vaha. <sup>2</sup> Ndítahan ndicuhun ini ndó ña nacachi na profeta yí Ndióxi sanahá ta ndítahan ndicuhun ini ndó ña nacachi Jesucristo, xitoho í, mé á jacacu mí jáchi cúu á ña najánaha na apóstol nu ndo.

<sup>3</sup> Nu cuítí cuni ña ná candaa ini ndó ña tá sa nacayati quívi quixi tucu Jesucristo já queta ñayivi ta casáhá na cuacu ndaa na tóco ndihi ña yí cuéntá Ndióxi. Ta caja na tóco ndihi ña núu, ña xica ini yiquí cuñu na caja. <sup>4</sup> Ta casáhá na ndaca tuhún ichi na já cachi na já: “Nasahan Jesucristo tuhun a quixi tucu a ta ndá cuéntá quea a ñaha quixi a. Jáchi janda tá nasatacu tásahnu jícó yo, tá cáa ñuyívi yóho anda saha já cáa yí va.” <sup>5</sup> Ta cachi na ña yóho jáchi co cuni na candúsa na ña sa janda sanahá ndivaha va nacahan Ndióxi ta já nacavaha indivi xihin ñuyívi. Ta mé Ndióxi quea nasahnda chuun ña ná ndinuna ticuú cán já ná canáha nuú ñundáhyi ta ín ticuú tóco ndihi xoo ñundáhyi viti. <sup>6</sup> Ta xihin ticuú najánaa a saha ñayivi ñuyívi sanahá tá najácuun mé á javi quini. <sup>7</sup> Joo indivi xihin ñuyívi ña ín viti yóho, ndúu a ndáti a xinu quívi chican ñúhu Ndióxi ña já ná ndihi sahá. Cája Ndióxi ña yóho já ná ndoho ini ñayivi quini cán ta jándihí a saha ná quívi caja víi Ndióxi sahá ñayivi quini cán.

<sup>8</sup> Ta viti candehé ndo, ñani maní i. In quívi cúu á tátuhun in mil cuja nu Ndióxi ta in mil cuja cúu á tátuhun in quívi nu Ndióxi. A ndíndójó ndó ña yóho. <sup>9</sup> A cahan ndo ña cácuáchi Jesús jáxinu coo a nuú tuhun a tá nacachi a ña quixi tucu a tá quiahva cahan java na. Joo a ñaha quixi Jesucristo jáchi táhvi ndivaha ini mé á sahá ñayivi. Ta co cuni mé á ña ná cuhun ni in tuhún na indayá ndihi saha ná. Ña cuni mé á quea ná ndíco coo ini na ña ná jándacoo na cuachi cája na.

<sup>10</sup> Mé quívi co cahan na quixi Jesucristo já quixi mé á. Tá quiahva cája taa cuíhna tá xinu coo da ñuú ta ni in na co xini na ña xinu da cája cuíhna da ñaha na quiahva já coo nuú quixi rí Jesucristo va. Ta mé quívi cán in cuítí cuni johó ñayivi ñhi ndivaha indivi ta já casáhá ña ndítani a. Ta já cayi

ñuyíví yóho xih̄in tóco ndihi ñaha ín nu á. Ta já cayi ñaha ndúu nu táchi indivi ta ndihi saha tóco ndihi ñaha.

<sup>11</sup> Mé a ndaa vaxi quivi coo tóco ndihi ña yóho sahá ña cán quéa ndítahan nu ndó caca vaha ndó íchi cuéntá Ndióxi ta caja ndó ña cuni mé á xih̄in ndinuhu ini ndó. <sup>12</sup> Candati ndó xinu quivi quixi tucu Jesucristo ñuyíví yóho. Ta nducú ndéé ndo cája chúun ndó cuéntá mé á já ná xinu yachi quivi cán. Tá ná xinu quivi cán já jándihi Ndióxi sahá indivi xih̄in ñúhu ita. Ta tóco ndihi ñuyíví jándutu mé á ña xih̄in ñúhu cáyi. <sup>13</sup> Joo mí, yó cúu cuéntá Jesús ndátí inga indivi saá xih̄in in ñuyíví saá jáchi nasahan Ndióxi tuhun a nu yo ña quiahva ña nu yo. Ta cán tóco ndihi ñaha cacuu a ña vaha ta ndinuhu ña ndaa coo cán.

<sup>14</sup> Ñani i, quihvi ndivaha ini i ndohó sahá ña cán quéa cáhan i ña yóho xih̄in ndo. Nani camani xinu quivi caja Ndióxi tóco ndihi ña cán, ndítahan ndihi ini ndó caja ndó ña vaha já quéa ná cuni Ndióxi ña ín vaha ini ndó xih̄in mé á ta já ná cuni a ña coo cuachi ndó.

<sup>15</sup> Ta a ndíndójó ndo ña ndátí yii Jesucristo quixi tucu a ñuyíví yóho jáchi táhvi ndivaha ini mé á saha yo ta cuni a jáca cu a mí. Ta tá quiahva cáhyi yehe nu ndo yóho quiahva já nacahyí ri ñani maní yo, da cúu Pablo carta nachindahá da nu ndo jáchi nacaja Ndióxi ña ná candaa ini da cán ña cuni mé á.

<sup>16</sup> Nu tóco ndihi carta nacahyí Pablo nu ndo cáhan da xih̄in ndo saha tóco ndihi ña yóho. Java ña yóho cúu á ña yáncá ndivaha candaa ini saha. Ta na co candaa ini xih̄in na co candeé vaha ini Ndióxi nacasáhá ndíjama na ña nacahyí da. Quiahva já cája na ndíjama na java ga ña cáchi tuhun Ndióxi joo ndihi saha tóco ndihi na cán.

<sup>17</sup> Candehé ndo, ñani maní i. Sahá ña sa xini vaha ndó saha tóco ndihi ña nandicani i nu ndo yóho, xini ñúhú candaa vaha ndó mé ndó já ná a jándahvi ñayivi quini ndohó já ná a ndácava ndó nuú cuachi vatí cuahan vaha ndó íchi cuéntá Ndióxi viti. <sup>18</sup> Xini ñúhú candaa vaha chága ini ndó yo cúu Jesucristo, xitoho í jáchi mé á quéa jáca cu mí. Ta xini ñúhú candaa vaha chága ini ndó ña cája Ndióxi cuahá ñamani xoho. Cáhnu ná cacuu Jesucristo anda ama cáa quivi. Já ná coo.



## Carta nu cuití nacahyí Juan nuú na cúu cuéntá Jesús

*Cáxi tuhun Juan nuú ñayivi sahá Jesucristo*

<sup>1</sup> Cáhyí nde carta yóho nu ndó sahá Jesucristo, mé á nasahin janda tá camaní cava sahá saha ñuyivi. Mé nde naxini johó nde ña nacahan mé á ta chí naxini xihín nuú nde mé á. Nasandehé nde a ta nacani ndaa ndahá nde a. Cahan nde sahá Jesucristo mé á cúu tuhun Ndióxi, ña cája ña ná catacu ñayivi anda ama cáa quivi. <sup>2</sup> Najánaña mé á nuú ñayivi ta mé nde naxini nde a sahá ña cán quea cáxi tuhun nde nuú ñayivi saha mé á. Ta ndicani nde nu mé ndó viti saha Jesucristo, mé á sa janda ama cáa quivi in a xihín Ndióxi, tátá a ta co ndíhi toho sahá. Viti naquixi a najánaña mé á nu yo. <sup>3</sup> Ta cáxi tuhun nde nu ndo ña naxini nde xihín ña naxini johó nde já ná cuu in canduu ndó xihín mé nde. Jáchi in nanduu yó xihín Ndióxi, tátá yo ta xihín Jesucristo, mé a cúu in túhún jiní já jahyi Ndióxi. <sup>4</sup> Ta cáhyí nde ña yóho nu ndo já ná ndicutú ndaa ínima yo xihín ña cajii íni yo.

*Jándiyehé ndaa Ndióxi nu in a*

<sup>5</sup> Ña najánaña Jesucristo nuú nde cúu á ña jánaña nde nu ndó viti: Jándiyehé ndaa Ndióxi nu in a ta ni loho ña naá co in nu in mé á. <sup>6</sup> Tá ná cachi yó ña in nanduu xihín Jesucristo nani cája í cuachi já quea cúu á tátuhun ndúu yíi yó nuú naá jáchi catúhún yo ta co cája í ña ndaa. <sup>7</sup> Joo tá ndúu yó nu yéhe tá quiahva in Ndióxi nuú ña yéhe já quea in nduu ndihí. Ta Jesucristo, mé a cúu in túhún jiní já jahyi Ndióxi jándoo ndihí a cuachí jáchi naxita nii á saha yo tá naxihí a ndica crúxu.

<sup>8</sup> Ta tá ná cachi yó ña coó toho cuachi cája í já quea jándahví mé ví ta co ndacaan ña ndaa iní. <sup>9</sup> Joo tá ná nahma yó cuachí nu Ndióxi já quea cuu candeé iní ña caja ndaa Ndióxi xihín yo jáchi caja cáhnu ini a sahá cuachí ta ndaja víi a mí nu tóco ndihí ña núu. <sup>10</sup> Joo tá ná cachí ña ni in túhún toho

cuachi coó nacaja í já quea ndája túhún yo Ndióxi ta xihín ña yóho náha ña mé a ndaa táhyí coó nandiquehe vaha í tuhun vaha cahan saha mé á.

## 2

*Jesucristo quea cahan cuachí a saha yó nu Ndióxi*

<sup>1</sup> Candehé ndó. Mé ndó cúu ndó tátuhun jahyi válí i ta cáhyí i ña yóho nu ndo ña ná a cája ndó cuachi. Ta vatí ná caja ndó cuachi joo in Jesucristo cahan cuachí a saha yó nu Ndióxi, tátá a. Ta cája mé á ña ndaa cuití va. <sup>2</sup> Jáchi nachahvi Jesucristo sahá cuachí tá naxihí a ndica crúxu. Já quea xihín ña yóho cuu caja cáhnu ini Ndióxi sahá cuachí. Ta a juú sahá cuachi mé cuití yo, vaha jáchi naxihí rí a sahá cuachi ndaja táhan na ndúu ñuyivi.

<sup>3</sup> Jáchi tá cája í ña sáhdá Ndióxi já quea náha ña mé a ndaa táhyí xini yo mé á. <sup>4</sup> Joo tá cachí in na ña xini na Ndióxi nani co cája na ña sáhdá mé á já quea cúu ná na tuhún ta co ndacaan ña ndaa ini na. <sup>5</sup> Joo na cája ña sáhdá Ndióxi, náha ña mé a ndaa táhyí quihvi ini na mé á ta xihín ña yóho cándaa ini yó ña in nanduu na xihín mé á. <sup>6</sup> Ta ndá na cachí ña in nanduu na xihín Ndióxi, xini ñuhú caja na tá quiahva nacaja Jesucristo tá nasahin a ñuyivi yóho.

*Sáhdá Ndióxi chuun ña ná quihvi ini táhan í*

<sup>7</sup> Candehé ndó ñani i, na cúu cuéntá Jesús. Co cáhyí i nu ndó in chuun saá ña nasahnda Ndióxi caja ndó. Cúu á mé chuun natahnda nu ndó caja ndó janda mé saha tá nandihvi ndó íchi cuéntá Jesús. Ta cúu á ña sa naxini johó ndó anda mé cán. <sup>8</sup> Joo mé a ndaa ña cáhyí i yóho cúu á chuun saá jáchi sáhdá Ndióxi ña ná quihvi ini táhan í. Ta tá cája í ña sáhdá Ndióxi já quea quee ndihí ña naá cuahan ta mé a ndaa jándiyehé Jesucristo ínima yo jáchi quihvi ini táhan í tá quiahva nacaja mé á.

<sup>9</sup> Ta ndá na ná cachi ña sa nandiyehé ínima ná nacaja Jesucristo nani cándají na ñani na, na cúu cuéntá Jesús já quea cuni cachi a ña ndúu yíi ná nuú naá ndivaha. <sup>10</sup> Ta ndá na quihvi ndusa ini ñani na já quea cuni cachi a ña mé a ndaa jándiyehé

Jesucristo ínimã ná ta ni in ñaha a cúu caja ña ná ndacava na nuú cuachi. <sup>11</sup> Joo ndá na cándají ñani na já queá ndúu na nuú naá ta xíca na nuú naá yáve. Ta ni co xíní na ndáchí xíca na jáchi cúu ná tátuhun na cuaá jáchi ndúu na nuú naá.

<sup>12</sup> Mé ndó cúu ndó tátuhun jahyi i ta cáhyí i carta yóho nu ndo jáchi sahá ña nacaja Jesucristo nacaja cáhnu ini Ndióxi sahá cuachi. <sup>13</sup> Ta cáhyí i carta yóho nu ndó, naṭaa, na cúu tátá jáchi nacandaa ini ndó sahá Jesucristo, mé a sa íin janda tá nacava sáhá saha ñuyíví. Ta cáhyí ri carta yóho nu ndó, ṭaa yúta jáchi nacandeeé ndó nasahnu ndó nuú tiñáhá sacuahá.

Candehé ndo. Mé ndó cúu ndó tátuhun jahyi i ta cáhyí i carta yóho nu ndo jáchi nacandaa ini ndó yo cúu Ndióxi, tátá yo. <sup>14</sup> Ta cáhyí ri carta yóho nu ndó, na cúu tátá jáchi nacandaa ini ndó sahá Jesucristo, mé a sa íin janda tá nacava sáhá saha ñuyíví. Ta cáhyí ri carta yóho nu ndó, ṭaa yúta jáchi sahan ndeé ini ndó ta ndacaan tuhun Ndióxi ini ínimã ndo ta nacandeeé ndó nasahnu ndó nuú tiñáhá sacuahá.

<sup>15</sup> Ta coto a catóo ndó ña cúu cuéntá ñuyíví yóho ta ni a ndiáva ini ndo cacomí ndó ña ndúu ñuyíví yóho. Jáchi ndá na cúní ñaha ñuyíví yóho já queá cúní cachi a ña co cúní na Ndióxi, tátá yo. <sup>16</sup> Jáchi ni in ña núu ndúu ñuyíví yóho coó vaxi a cuéntá Ndióxi, tátá yo. Ta ña yóho cúu á ña a váha toho cáhvi ini ñayivi caja na ta jári ndiáva ini na cacomí na ña xíní na xihín nuu ná ta jári ndiñehe jícó ndivaha na mé ná sahá ña comí na. Ndijáá ña yóho cúu á ña núu quíxi mé ñuyíví yóho. <sup>17</sup> Vaxi quiví ndihi saha tóco ndihi ña ndiáva ini ñayivi ta janda mé ñuyíví yóho ndihi sahá joo ndá na cája ña sáhndá Ndióxi, na cán cúu na catacu nu íin mé a anda ama cáa quiví.

### *Na co cúní táhan xihín Jesucristo*

<sup>18</sup> Candehé ndo jáchi cúu ndó tátuhun jahyi i. Jalóho cúní ndihi saha ñuyíví ta sa xíní joho ndó sahá in da vaxi caja ihvi xihín Jesucristo. Ta mé tiempo yóho sa naqueta cuahá na co cúní táhan xihín mé á. Sahá ña yóho sa cándaq ini yó ña sa nacayati quiví ndihi sahá ñuyíví yóho. <sup>19</sup> Mé na co cúní táhan xihín Jesucristo yóho nasañúhu

na tañu mí. Joo a juú toho na cuéntá mí nasacuu na. Jáchi tá ná cacuu na cuéntá mí já canduu na tañu mí, nduu. Joo naqueta na cuahan na já ná ñaha ña mé a ndaa co cúu ná cuéntá mí.

<sup>20</sup> Joo nu mé ndó nasahan Jesucristo ínimã yii mé á sahá ña cán queá tóco ndihi ndó cúu ndó ñayivi xíní ña ndaa. <sup>21</sup> Tá cáhyí i carta yóho nu ndo, co cúu á sahá ña co xíní ndó ña ndaa. Joo cúu á sahá ña sa xíní ndó ña ndaa ta sa xíní ndo ña ni in túhún ña túhún a cúu quixi tañu ña ndaa.

<sup>22</sup> Na túhún cúu ná na co cúní ndicuni ña cúu Jesucristo mé á nachindahá Ndióxi jácacu a ñayivi. Mé na túhún yóho cúu ná na co cúní táhan xihín Jesucristo jáchi co cúní na ndicuni na Ndióxi, tátá yo ta ni co cúní na ndicuni na Jesucristo, mé a cúu in túhún jiní já jahyi Ndióxi. <sup>23</sup> Jáchi ndá na chíjehé tuhun ña xíní na Jesucristo, jahyi Ndióxi já cúní cachi a ña coó in nanduu na xihín Ndióxi, tátá yo. Joo na cuahan xoo Jesucristo, jahyi Ndióxi in nanduu na xihín Ndióxi, tátá yo.

<sup>24</sup> Sahá ña cán queá xíní ñúhú cacu vaha ndó tuhun Ndióxi ini ínimã ndó, jáchi cúu á ña naxini joho ndó janda mé saha tá nandiquehe ndó íchi cuéntá Jesús. Ta tá mé a ndaa ndicaan ña naxini joho ndó ini ínimã ndo já queá anda ama cáa quiví in nduu ndó xihín Ndióxi, tátá yo ta in nduu ndó xihín Jesucristo, mé a cúu in túhún jiní já jahyi Ndióxi. <sup>25</sup> Ta nasahan Jesucristo tuhun a nu yo ña catacú xihín mé á anda ama cáa quiví.

<sup>26</sup> Cáhyí i ña yóho nu ndo já ná candaq ini ndó sahá na cúní jándahvi ndohó. <sup>27</sup> Joo ndacaan ínimã yii Ndióxi ini ndó, mé a nasahan Jesucristo nu ndo. Sahá ña cán queá co xíní ñúhú toho ndó inga na jánaha na ndohó jáchi mé ínimã yii Ndióxi, ña ndacaan ini ndó jan jánaha tóco ndihi ñaha nu ndo. Ta ña jánaha mé á nu ndó cúu á ña ndaa ta co cúu á ña túhún. Sahá ña cán queá xíní ñúhú catáhan tuun ndó xihín Jesucristo tá quiahva sácaja ndó jáchi quiahva já najánaha ínimã yii Ndióxi nu ndo.

<sup>28</sup> Candehé ndo jáchi cúu ndó tátuhun jahyi i. Xíní ñúhú catáhan tuun í xihín Jesucristo já ná cuu candeeé ini mé á tá ná

canáha mé á quixi a ta já ná a cácahan nuu yo tá ná cuní mé á. <sup>29</sup> Mé ndó sa cándaá ini ndó ña cája Jesucristo ndinuhu ña ndaa cuití va. Ta tá cája mé ndó ña ndaa já queá jánaha ndó ña mé a ndaa cúu ndó jahyi Ndióxi.

### 3

#### *Ná cúu jahyi Ndióxi*

<sup>1</sup> Candehé ndó. A juú quiahva quíhvi ini Ndióxi, tátá yo mí anda nasahan ñamani nu yo cananí yo jahyi Ndióxi ta mé a ndaa cúu yó jahyi mé á. Joo ñayivi ñuyíví co xíní na Ndióxi sahá ña cán queá co ndícuni na ña cúu yó jahyi mé á. <sup>2</sup> Candehé ndo, ñani máni, na cúu cuéntá Jesús. Sa cúu yó jahyi Ndióxi vatí viti ñúhú co cándaá ini ndá quiahva nduú. Joo cándaá vaha iní ña tá ná quixi Jesucristo já nduú tá quiahva cáa mé á jáchi cuní mé á tá quiahva cáa tá ín a. <sup>3</sup> Ta tóco ndihi na ndáti nduu na tá quiahva cáa mé á já queá ndaja víi na mé ná jáchi cúni na coo víi na tá quiahva ín víi Jesucristo.

<sup>4</sup> Tóco ndihi na cája cuachi sáhnú na nu ley Ndióxi jáchi tóco ndihi ña núu cúu á cuachi nu ley Ndióxi. <sup>5</sup> Mé ndó sa cándaá ini ndó ña naquixi Jesucristo ñuyíví yóho ta naxihí a já ná cuu ndoo cuachi ñayivi. Ta coó ni in túhún toho cuachi mé á. <sup>6</sup> Sahá ña cán queá tóco ndihi na cáti tuun xihín mé á co xíca nuu ga na cája na cuachi. Joo na xíca cája cuachi jánaha na ña co xíní toho na mé á ta jánaha na ña co cúu na cuéntá mé á. <sup>7</sup> Candehé ndó jáchi cúu ndó tátuhun jahyi i. Cuéntá coo ndó ná a jándahvi ni in na ndohó. Jáchi ñayivi ndaa cája ndaa na tá quiahva cája Jesucristo. <sup>8</sup> Joo na xíca nuu cája cuachi cúu ná cuéntá tiñáhá sacuaaha jáchi janda mé saha nacaja rí cuachi. Sahá ña cán queá naxinu Jesucristo ñuyíví yóho, mé á cúu in túhún jiní já jahyi Ndióxi ta naquixi a jándihi a sahá ña núu cája tiñáhá sacuaaha.

<sup>9</sup> Ni in túhún toho na cúu jahyi Ndióxi co xíca na cája na cuachi jáchi viti nanduu na tá quiahva ín mé á. Ta co cúni ga na caca nuu na caja na cuachi jáchi cúu ná jahyi Ndióxi. <sup>10</sup> A ihvi toho ndicuní ndá na cúu jahyi Ndióxi ta ndá na cúu jahyi tiñáhá sacuaaha. Jáchi na co cája ña ndaa ta na co

quíhvi ini ñani táhan na cán cúu ná jánaha ña co cúu ná cuéntá Ndióxi.

#### *Ndítahan nu yo quíhvi ini táhan í*

<sup>11</sup> Janda mé saha tá nandiquehe ndó íchi cuéntá Jesús já naxini johó ndó ña cáchi tuhun Ndióxi ña ndítahan quíhvi ini táhan í. <sup>12</sup> Co ndítahan caja í tá quiahva nacaja Caín sanahá jáchi nasacuu da cuéntá tiñáhá sacuaaha. Ta nasahní da ñani da jáchi mé Caín nasacaja da ña núu cuití va ta nandicuni da ña vaha cuití va nasacaja ñani da.

<sup>13</sup> Candehé ndó, ñani mí i, na cúu cuéntá Jesús. A cántóto ndo tá cándají ñayivi ñuyíví ndohó. <sup>14</sup> Tá quíhvi ini na cúu cuéntá Jesús já queá sa xíní yo sa najáca cu mé á mí ná a cühun toho í indayá joo cühun í coo í nu ín mé á indiví. Joo ndá na co quíhvi ini ñani táhan na, cúu ná tátuhun in ndii. <sup>15</sup> Ta tóco ndihi na cándají ñani táhan cúu ná tátuhun in na sáhní ndii jáchi sáhní na ñani táhan na iní ínima na. Ta mé ndó sa cándaá ini ndó ña ni in na sáhní ndii co núná nu ná cühun na indiví catacu na anda ama cáa quívi. <sup>16</sup> Mé Jesucristo najánaha nu yo ndá quiahva cája ndusa in na quíhvi ini ñani táhan jáchi naxihí a saha yo. Quiahva já ndítahan rí nu mí ví coo tiahva í quívi sahá ñani táhan í, na cúu cuéntá Jesús. <sup>17</sup> Joo tá ín in na ta ín cuahá ndivaha ñaha nu ná ta co cúni na chindeé na na cúu cuéntá Jesús, na ndímaní ñaha nuu já queá a cuú cachi na ña quíhvi ini na Ndióxi. <sup>18</sup> Mé ndó cúu ndó tátuhun jahyi i sahá ña cán queá cáhan i xihín ndo ña xíní ñúhú jánaha yó xihín ña cája í ña quíhvi ini ñani táhan í ta a juú xihín yuhú ñinu un í cuití va.

#### *Co ndítahan cayihví yo Ndióxi tá cája í ña sáhdá a*

<sup>19</sup> Tá cája í ña ndaa, ña cúni Ndióxi já queá cándaá iní ña cúu yó cuéntá mé á ta ín vaha iní xihín mé á. <sup>20</sup> Ta vatí cáhvi iní ña coo nacaja vaha í joo xíní vaha chága Ndióxi á mé a ndaa nacaja núu í á coo a jáchi xíní mé á tóco ndihi ñaha. <sup>21</sup> Candehé ndó ñani máni, na cúu cuéntá Jesús. Tá xíní vaha í ña ndacaan ña vaha ínima yo já queá co yíhvi toho í cáhan í xihín á. <sup>22</sup> Ta mé Ndióxi queá quiahva tóco ndihi ña xíca yó nu á jáchi mé a ndaa cája í ña sáhdá a nu yo ta cáji iní mé

á xihín ña cajú í. <sup>23</sup> Ta ña sáhdá Ndióxi nu yo cúu á ña ná candeeé iní Jesucristo, mé a cúu in túhún jini já jahyi mé á. Ta sáhdá a nu yo ña ná quihvi ini táhan í tá quiahva ñatahdá chuun nu yó cajú í. <sup>24</sup> Ta na cajú ña sáhdá Ndióxi in nanduu na xihín mé á ta in nanduu mé á xihín na. Ta sahá ña nasacu Ndióxi ínimá yii mé á ini in in í sahá ña cán queá náha ña in nanduu yó xihín mé á.

## 4

*Ínimá yii Ndióxi co ndíque táhan xihín ínimá quini ña ndácaan ini na co cúni táhan xihín Jesucristo*

<sup>1</sup> Candehé ndo, ñani mí i, na cúu cuéntá Jesús. A cándusa ndó tóco ndihi na cáchi ña cúu ná cuéntá Ndióxi jáchi cuaha ná cúu ná na tuhún. Ña xini ñuhú cajú ndó queá coto ndojó ndó na já ná candaa ini ndó á mé a ndaa ndácaan ínimá yii Ndióxi ini na á coó a. Jáchi cuahá ndivaha na tuhún nandicuita nuu na ñuyivi yóho jándahvi na ñayivi vatí cáchi na cáhan na cuéntá Ndióxi. <sup>2</sup> Xihín ña yóho cuu candaa ini ndó ndá na cúu na ñuhu ínimá yii Ndióxi ini jáchi tóco ndihi na cándusa ña nanduu Jesucristo in ñayivi ñuyivi yóho na cán cúu ná na ñuhu ínimá yii Ndióxi ini. <sup>3</sup> Joo na co cándusa ña nanduu Jesucristo in ñayivi ñuyivi yóho, na cán cúu ná na co ñuhu ínimá yii Ndióxi ini jáchi ña ndácaan ini na cán cúu ínimá quini, ña co cúni táhan xihín Jesucristo. Sa naxini joho ndó ña quixi tá quixi mé ínimá quini, ña co cúni táhan xihín Jesucristo ta sa íin a ñuyivi yóho viti.

<sup>4</sup> Candehé ndo jáchi cúu ndó tátuhun jahyi i ta cúu ndó cuéntá Ndióxi. Nacandeeé ndó nasahnu ndó nuú na jánaña ña tuhún jan jáchi tóyíí chága ínimá yii Ndióxi ndácaan ínimá ndo a juú ga ínimá quini ndácaan ínimá ñayivi ñuyivi. <sup>5</sup> Mé na jan cúu ná cuéntá ña núu ñuyivi yóho ta ñaha ñuyivi yóho cuití cáhan na saha. Ta ñayivi ñuyivi táa joho na ña cáhan na. <sup>6</sup> Joo mí cúu yó cuéntá Ndióxi. Sahá ña cán queá na cúu cuéntá Ndióxi xini joho na ña cáhan yo. Joo na co cúu cuéntá Ndióxi co xini joho na ña cáhan yo. Ta xihín ña yóho cuu ndicuni ndá na cúu na ndácaan ínimá yii Ndióxi ini ta

ndá na cúu na ndácaan ínimá quini ini. Jáchi ña ndaa cúu ínimá yii Ndióxi ta ínimá quini cúu á ña tuhún.

*Quihvi ini ndusa Ndióxi ñayivi*

<sup>7</sup> Candehé ndo, ñani máni, na cúu cuéntá Jesús. Xini ñuhú quihvi ini táhan í jáchi ña yóho quixi a cuéntá Ndióxi. Tóco ndihi na quihvi ini ñani táhan cúu ná jahyi Ndióxi ta xini na yo cúu Ndióxi. <sup>8</sup> Na co quihvi ini ñani táhan jánaña na ña co xini na Ndióxi jáchi Ndióxi queá sahan nu yo ña ná quihvi ini táhan í. <sup>9</sup> Ta nachindahá Ndióxi Jesucristo, mé in túhún jini já jahyi a ñuyivi yóho ña ná quivi a saha yo já ná catacú anda ama cáa quivi. Xihín ña yóho najánaña Ndióxi ndá quiahva quihvi ini a mí. <sup>10</sup> Candehé ndo ndá quiahva quihvi ini Ndióxi mí. A juú jihna ñuhú mí naquihvi ini Ndióxi jáchi jihna ñuhú ga Ndióxi naquihvi ini a mí. Ta nachindahá a Jesucristo, mé in túhún jini já jahyi a ña ná chahvi mé Jesús sahá ndihi cuachí tá naxihí a ndica crúxu.

<sup>11</sup> Candehé ndo, ñani máni, na cúu cuéntá Jesús. Tá ta quiahva joho nacaja Ndióxi sahá ña quihvi ini a mí já queá ndítahan ri nu mí ví quihvi ini táhan í. <sup>12</sup> Ni in ñayivi coó naxini xihín nuu ná Ndióxi. Joo ñuhú mé á ini tá quihvi ini táhan í. Ta xihín ña yóho jáxinu coo í ña quihvi ndusa ini ñani táhan í. <sup>13</sup> Ta sahá ña nasacu Ndióxi ínimá yii mé á ini in in yó sahá ña cán queá náha ña in nanduu xihín mé á ta in nanduu mé á xihín yo. <sup>14</sup> Ta mé nde naxini nde a xihín nuu nde ta cáxi tuhun nde xihín ndaja táhan ñayivi ña nachindahá Ndióxi, tátá yo Jesucristo, mé a cúu in túhún jini já jahyi a ña ná jaca cu a ndaja táhan na ndúu ñuyivi. <sup>15</sup> Ndá na cándusa ña cúu Jesucristo in túhún jini já jahyi Ndióxi, na jan cúu na in nanduu xihín Ndióxi ta in nanduu Ndióxi xihín ná.

<sup>16</sup> Ta viti sa nacandaa ini ta cándusa í ña mé a ndaa quihvi ini Ndióxi mí. Ta ndá na quihvi ini Ndióxi já in nanduu na xihín Ndióxi ta in nanduu Ndióxi xihín ná. <sup>17</sup> Ta xihín ña yóho jáxinu coo í ña quihvi ini ñani táhan í xihín ndinuhu ini. Sahá ña cán queá tá ná xinu coo quivi cajú víí Ndióxi sahá ñayivi já queá a cáchan nuu yo tá candichí nu Ndióxi. Jáchi tá quiahva nasacaja Jesucristo tá nasahin a ñuyivi yóho quiahva já

cája í viti. <sup>18</sup> Mé a ndaa quíhvi ini Ndióxi mí ña cán quea co yíhvi toho í mé á. Jáchi tá ná cahán yo jándoho Ndióxi iní já quea cayíhvi yo mé á. Joo tá ná candaa vaha iní ña mé a ndaa quíhvi ndusa ini Ndióxi mí já quea a cáyihvi toho í mé á. Ña cán quea tá yíhvi yo mé á já quea co xíni yo ña quíhvi ndusa ini a mí.

<sup>19</sup> Quíhvi iní Ndióxi jáchi jihna ñúhú ga mé á naquíhvi ini a mí. <sup>20</sup> Joo tá in in na ta cáchi na quíhvi ini na Ndióxi joo cándají na ñani táhan na já quea jánahá na ña cúu ná na tuhún. Jáchi tá co quíhvi ini na ñani táhan na, da sándehe na xihín nuu ná ndaja caja na cachi na quíhvi ini na Ndióxi, ña a cúu cuni tívi na. <sup>21</sup> Nasahnda Jesucristo chuun yóho nu yo: Ndá na quíhvi ini Ndióxi já ndítahan nu ná quíhvi ri ini na ñani táhan na viti.

## 5

### *Ndaja caja í quee vaha í xihín ña núu ndúu ñuyívi yóho*

<sup>1</sup> Tóco ndihi na cándúsa ña cúu Jesús mé á nachindahá Ndióxi cacomí a cuénta sahá ñayivi, na jan cúu ndusa jahyi Ndióxi. Ta ndá na quíhvi ini Ndióxi, tátá yo, xíni ñúhú quíhvi ri ini na tóco ndihi na cúu jahyi mé á. <sup>2</sup> Tá quíhvi iní Ndióxi ta tá cája í ña sáhdá mé á nu yó cája í, xihín ña yóho cándaa cáxi iní ña quíhvi ini na cúu jahyi Ndióxi. <sup>3</sup> Ta na cája ña sáhdá Ndióxi, na cán cúu na jánahá ña mé a ndaa táhyi quíhvi ini na mé á ta chuun sáhdá mé á nu yo co cúu á in ñaha ña a cúu candeé yó xihín. <sup>4</sup> Ta tóco ndihi na cúu ndusa jahyi Ndióxi candeé na sáhnú na nuú ña núu ñuyívi yóho. Sahá ña cán quea tá candeé iní Jesucristo já quea quee vaha í xihín ña núu ndúu ñuyívi yóho. <sup>5</sup> Ndá na cándúsa ña cúu Jesucristo in tuhún jini já jahyi Ndióxi, na cán cúu na candeé sáhnú nuú ña núu ndúu ñuyívi yóho.

### *Sáhan ínimá yii Ndióxi tuhun sahá Jesús ña cúu á in tuhún jini já jahyi Ndióxi*

<sup>6</sup> Tá naquixi Jesucristo ñuyívi yóho já nacandúta mé á xihín ticuí. Ta jári naxita nii á tá naxihi a ndica crúxu sahá yo. Nacaja Jesucristo ndívi ña yóho: nacandúta xihín ticuí ta naxita nii á tá naxihi a ndica crúxu. Ta mé ínimá yii Ndióxi sáhan tuhun

sahá ña yóho ta ña cáhan mé á cúu á ña ndaa. <sup>7</sup> Ndúu uní testigo indivi ta sáhan tuhun sahá Jesús ña cúu á in tuhún jini já jahyi Ndióxi: In testigo cúu Ndióxi, tátá yo ta inga testigo cúu tuhun Ndióxi ta inga testigo cúu ínimá yii Ndióxi. Ta in cúu ndíhuni a sáhan tuhun sahá Jesús. <sup>8</sup> Ta ndúu uní testigo ñuyívi yóho. Ta in testigo cúu á ínimá yii Ndióxi ta inga testigo cúu á tá nacandúta Jesús ta testigo cáhuni cúu á tá naxita nii Jesús ndica crúxu. Ta ndíhuni testigo yóho sáhan tuhun a sahá Jesús ña cúu á in tuhún jini já jahyi Ndióxi. <sup>9</sup> Ín tiahva í cándúsa í ña cáhan ñayivi xihín yo tá sáhan na tuhun sahá in ñaha. Ña cán quea ama ná a cándúsa í ña cáhan Ndióxi xihín yo jáchi ña cája mé á quea sáhan tuhun sahá Jesucristo, jahyi a ta ña yóho cúu á ña ndíyahvi chága a juú ga ña cáhan ñayivi. <sup>10</sup> Ta tá cándúsa í ña cúu Jesucristo in tuhún jini já jahyi Ndióxi já cúu á tátuhun ndiquehe vaha í ña cáchi mé á ini ínimá yo. Joo na co cándúsa ña yóho ndája na ña ná nduu Ndióxi ña tuhún jáchi co cándúsa na ña cáhan mé á sahá Jesucristo, jahyi a. <sup>11</sup> Ta tuhun sáhan Ndióxi cúu ña yóho: Nasahan mé á ñamaní catacú anda ama cáa quívi. Ta Jesucristo, jahyi mé á quea cája ña ná catacú indivi anda ama cáa quívi. <sup>12</sup> Ta ndá na nandiquiahva mé ndáha Jesucristo, mé á cúu in tuhún jini já jahyi Ndióxi, na jan cúu na catacu na anda ama cáa quívi nu in mé á. Joo ndá na coo naxeen ndiquiahva mé ndáha mé á a cúu catacu na anda ama cáa quívi xihín mé á.

### *Cáhyi chága Juan sahá ña ndítahan caja í*

<sup>13</sup> Cáhyi í ña yóho nu ndóhó, na candeé ini Jesucristo, jahyi Ndióxi já ná candaa ini ndó ña catacu ndó indivi anda ama cáa quívi.

<sup>14</sup> Ta co yíhvi toho í xíca í nu mé á in ñaha, ña cúní a quiahva nu yo jáchi cándaa cáxi iní ña xíni johó a nu cáhan yo. <sup>15</sup> Ta tá cándaa iní ña xíni johó Ndióxi nu cáhan yo já quea candeé iní ña quiahva tá quiahva mé á ña nu yo.

<sup>16</sup> Tá ná cuni ndó ñani ndó, na cúu cuénta Jesús ta caja na cuachi ña cuu caja cáhnú ini Ndióxi sahá já quea ndítahan caça tahví ndó nu Ndióxi sahá na cán. Ta xihín ña yóho caja cáhnú ini Ndióxi sahá na jan já ná catacu

na anda ama cáa quivi. Joo íin cuachi ña cañehe ñahá cuhun indayá ta co ndítahan caca tahví yo nu Ndióxi sahá ña jan. <sup>17</sup> Tóco ndihi ña núu cája í ñuyíví yóho cúú á cuachi nu Ndióxi joo cuahá ndivaha cuachi cája cáhnu ini Ndióxi saha.

<sup>18</sup> Ta cándaá ini ña tóco ndihi na cúú jahyi Ndióxi co xíca ga na nuú cuachi jáchi ndáá Jesucristo mé ná, mé á cúú in túhún jini já jahyi Ndióxi já ná a cája tiñahá sacuahá ni in ña núu xihin ná.

<sup>19</sup> Cándaá vaha ini ña cómi Ndióxi cuénta saha yo joo tóco ndihi ñayivi cuénta ñuyíví ñúhu na ndahá tiñahá sacuahá ta cómi rí cuénta saha ná.

<sup>20</sup> Ta cándaá cáxi ini ña naquixi Jesucristo, mé á cúú jahyi Ndióxi ta najándiyehé a xini túni yo já quéa ná candaá ini ña cúú mé á ña ndaa. Ta viti in nanduú xihin mé á jáchi in nanduú xihin Jesucristo, mé a cúú in túhún jini já jahyi Ndióxi. Mé a yóho cúú ndusa Ndióxi ta cúú á ña cája ña ná catacú anda ama cáa quivi. <sup>21</sup> Candehé ndo. Mé ndó cúú ndó tátuhun jahyi i ña cán quéa cáhan i ña yóho xihin ndo. Coto a cája cáhnu ndó ni in yoco ta ni a cája cáhnu ndó ni in ñaha tá co cúú á Ndióxi. Já ná coo.

## Carta chí ivi nacahyí Juan nuú na cúú cuéntá Jesús

### *Cáhan Ndióxi Juan xihín na cúú cuéntá Jesús*

<sup>1</sup> Yehe cúú u in da sacuaḥa ta cáhyí i carta yóho nu ndóhó, quiahva i na cúú cuéntá Jesús jáchi nacaxi Ndióxi ndohó. Tá jári cáhyí i carta yóho nuú jahyi ndó jáchi mé a ndaa quihvi ndivaha ini i ndihi ndó. Ta a juú yehe cuití va jáchi tóco ndihi na nacandaḥa ini ña ndaa quihvi ini na ndohó. <sup>2</sup> Quihvi ini i ndohó jáchi ndacaan ña ndaa ini ínimā ndihí ta anda ama cáa quivi coo a xihín yó. <sup>3</sup> Ña cuni quéa ña ná caja Ndióxi, tátá yó xihín Jesucristo, jahyi mé á cuahá ñamaní xihín yó. Ta ná tahnda ini mé á saḥa yó ta ná caja mé á ña ná coo vaha iní. Ta cuu caja mé á ña yóho jáchi cúú á ña ndaa ta quihvi ini a mí.

<sup>4</sup> Cájii ndivaha ini i jáchi nanditahan i java jahyi ndó ta cája na ña ndaa tá quiahva naḥanda Ndióxi, tátá yó caja í. <sup>5</sup> Candehé ndo quiahva i, na cúú cuéntá Jesús. Xíca tahví i nu ndó ña ná quihvi ini táhan í. Ta ña cáhyí i yóho co cúú á chuun saá jáchi cúú á ña sa naxini johó í janda mé saḥa tá nandiquehé íchi cuéntá Jesús. <sup>6</sup> Ta tá mé a ndaa quihvi iní Ndióxi náha ña mé a ndaa cája í ña sáhdá Ndióxi caja í. Ta ña naḥanda Ndióxi caja í janda mé saḥa cúú á ña ná quihvi ini táhan í.

### *Na xíca nuu jándahvi na cúú cuéntá Jesús*

<sup>7</sup> Níi cúú ñuyíví nandicuḥta cuahá na xíca nuu jándahvi na na cúú cuéntá Jesús. Ta na cán co cuni na ndicuni na ña nanduu Jesucristo in ñayivi ñuyíví yóho. Ta na cán cúú ná na tuhún ta cúú ná na co cuni táhan xihín Jesucristo. <sup>8</sup> Cuéntá coo ndó ná a jándahvi na ndohó já ná a tívi chuun nacaja ndó saḥa Jesucristo. Xiní ñúhú jáxinu coo ndó chuun cája ndó cuéntá mé á já ná cuu quiahva mé á tóco ndihi ña ndítahan nu ndó ndiquehe ndó saḥa mé chuun nacaja ndó.

<sup>9</sup> Ta ndá na quéta xoo nuú ña najánaḥa Jesucristo ta co xíca ndacú na íchi cuéntá mé á, na cán náha ña coo in nanduu na

xihín Ndióxi. Joo ndá na xíca na cája na ña najánaḥa Jesucristo, na cán cúú na in nanduu xihín Ndióxi, tátá yó ta in nanduu na xihín Jesucristo, jahyi mé á. <sup>10</sup> Ta ndá na vaxi nu ndo ta co jánaḥa na ña najánaḥa Jesucristo nu ndo já quéa a ndiquehe ndó na cán vehe ndó ta ni a cáhan Ndióxi ndó xihín ná. <sup>11</sup> Jáchi tá ná jáyaha ndó na cán vehe ndó já quéa in nanduu ri mé ndó xihín na ta catáhan ndó xihín ña núu cája na.

### *Ndindyí Juan na cúú cuéntá Jesús*

<sup>12</sup> Íin cuahá ndivaha ñaha cuni cahan i xihín ndo joo co cuni cáhyí i ña nu ndo. Jáchi ña cuni quéa saá i coto nihni i ndohó já ná cuu ndituhún yó ña ná cavatá ndivaha ini ndihí.

<sup>13</sup> Ta na cúú jahyi quihvi ndo chindahá na Ndióxi coo ndó jáchi mé ña cúú ña ña nacaxi Ndióxi viti. Já ná coo.

## Carta chí uní nacaḥyí Juan nuú na cúú cuéntá Jesús

### *Cáḥan Ndióxi Juan xihín in da naní Gayo*

<sup>1</sup> Yeḥe cúú u in da sacuaḥa ta cáhyi i carta yóho nu mún ñani máni, da naní Gayo. Ta mé a ndaa quíhvī ndusa ini i yohó.

<sup>2</sup> Candehé, ñani máni, da cúú cuéntá Jesús. Xíca ṭahví i nu Ndióxi ña ná quiahva mé á tá nuú ña vaḥa nuun. Ta ná caja mé á ña ná a quíhvun ta já coo vaḥa inún tá quiahva in vaḥa inún xihín Ndióxi. <sup>3</sup> A juú quiahva ná cajii iní i tá naquixi java na cúú cuéntá Jesús yóho ta nandicani na nuú i ña coo cáxoun nuú ña ndaa jáchi cája tá cájún ña. <sup>4</sup> A juú quiahva cajii iní i tá ñéhé e tuhun ña xíca ndó íchi cuéntá ña ndaa jáchi mé ndó cúú ndó tátuhun jahyi i.

<sup>5</sup> Candehé, ñani máni. Vaḥa ndivaha cájún jáchi xihín ndinuhu inún chindeún na cúú cuéntá Jesús tá saa na jan vatí cúú ná na quíxi ñuu tóho. <sup>6</sup> Ta nu tóco ndihi na táca veñuhu yóho ndícani mé na tóho ndá quiahva quíhvī ndivaha inún na. Ña cán quéa xíca i ñamaní nu yohó, Gayo ña ná chindeún na tá ná saa tucu na cán ta ná quiahvún ña ndímaní nu ná cañeḥe na íchi cūhun na jáchi ña yóho cúú á ña cajii ini Ndióxi xihín. <sup>7</sup> Ndítahan chindeún na jáchi naqueta na xíca nuu na cája na chuun cuéntá Jesucristo ta coo cúni na caça na ñaha catacu na nuú na coo cúú cuéntá Jesús. <sup>8</sup> Sahá ña cán quéa ndítahan nu mí, na cúú cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cáḥan na ña ndaa xihín ñayivi.

### *Cuachi cája in da naní Diótreres*

<sup>9</sup> Sa nachindahá i in carta nu tóco ndihi na cúú cuéntá Jesús nduu jan joo Diótreres coo naxeen da cándusa da ña cáchi nde. Jáchi cája cáhnu da mé dá ta cúni da cacuu da jiní nu tóco ndihi na cúú cuéntá Jesús nduu jan. <sup>10</sup> Sahá ña cán quéa tá ná saa i jan caxi tuhun i nuun saḥá ña cája da jáchi xíca nuu da cáḥan ndivaha da ña tuhún saḥá nde. Ta a juú ña yóho cuití cája da,

vaḥa jáchi ni coo cúni da ndiquehe da na cúú cuéntá Jesús xínu coo jan. Ta sáji nuu da nuú na cúni ndiquehe vaḥa ñahá ta janda táxi da na veñuhu.

<sup>11</sup> Candehé, ñani máni. A cájún ña núu tá quiahva cája Diótreres jan. Xíni ñúhú cájún ndinuhu ña vaḥa jáchi da cája ña vaḥa cúú dá cuéntá Ndióxi joo da cája quini coo xíni da Ndióxi.

### *Ña vaḥa cája Demetrio*

<sup>12</sup> Joo tóco ndihi na cúú cuéntá Jesús cáḥan vaḥa na saḥá da naní Demetrio jáchi ña ndaa cuití va cája da. Ta quiahva já cáḥan vaḥa ri ndeḥe va saḥá dá ta cándaḥ inún ña cáḥan nde ña ndaa.

### *Ndíndayí Juan Gayo*

<sup>13</sup> Mé a ndaa in cuahá ndivaha ñaha cúni caḥan i xuhun joo coo cúni cáhyi i ña nuú tutu yóho <sup>14</sup> jáchi cúni cuni yachi i yohó já ná nditúhún yúhu mí i xuhun.

<sup>15</sup> Ña xíca i nu Ndióxi quéa ná caja mé á ña ná coo vaḥa inún. Na cúú cuéntá Jesús nduu yóho chindahá na Ndióxi coún. Ta cájún ñamaní caḥan Ndióxi lohún xihín in in na cúú cuéntá Jesús nduu jan.



## Carta nacahyí Judas nuú na cúu cuéntá Jesús

*Cáhyí Judas carta nuú na nacaxi Ndióxi cacuu na cuéntá mé á*

<sup>1</sup> Yehé cúu Judas, da cája chúun cuéntá Jesucristo ta cúu u ñani Jacobo. Cáhyí i carta yóho nu ndóhó jáchi cúu ndó na nacana Ndióxi, tátá yo. Cúu ndó na quíhvi ini mé á ta cúu ndó na ndáá Jesucristo jáchi in nanduu ndó xihín mé á. <sup>2</sup> Ña xíca tahví i nu Ndióxi queá ña ná tahnda ndivaha ini mé á saha ndo. Ta ná caja mé á ña ná coo vaha ndivaha ini ndó. Ta ná chutú ndaa ini ndó xihín ña quíhvi ini a ndohó.

*Cáhan Judas sahá na jánaha ña tuhún (2 Pedro 2:1-17)*

<sup>3</sup> Candehé ndo, ñani mí i, na cúu cuéntá Jesús. A juú quiahva naxinu ini i cáhyí i nu ndo saha ndá quiahva najacacu Ndióxi ndihí. Joo viti ndíhi ini i cáhyí i carta yóho nu ndo ná caca tahví i nu ndo ña ná a jándacoo ndó ña candeé ini ndó Jesucristo jáchi ña yóho cúu á ña in tañu cuití va nasahan Ndióxi nu yo, na cúu cuéntá mé á. <sup>4</sup> Jáchi java ñayivi nandaja na mé ná tátuhun na cúu cuéntá Jesús ta naquihvi nuu na tañu ndó jan. Mé ñayivi yóho cúu ná na sa cáhan tuhun Ndióxi saha janda jihna ndivaha ta cáchi a ndítahan nu ná cuhun na indayá. Cúu ná ñayivi quini jáchi jánaha na ña tá sa nacaja cáhnu ini Ndióxi sahá cuachi na já cuu caja na tá nuú cuachi ña cúní mé ná. Ta xihín ña yóho náha ña co xéen na candúsa na Ndióxi, mé á cómí cuéntá saha tóco ndihi ñaha. Ta jári náha ña co cúu ná cuéntá Jesucristo, xitoho í.

<sup>5</sup> Sa xíní ndo ña nandoho na Israel tá natavá Ndióxi na ñundáhyi Egipto sanahá. Ta viti jándicuhun ini i ndohó ña vatí natavá Ndióxi tóco ndihi na Israel cán Egipto joo tá nandihí najándihí a sahá na coó naxeen candúsa ñahá. <sup>6</sup> Ta quiahva já nacaja ri mé á xihín na nasacuu tátó mé á jáchi coó naxeen na caja na ña cúní Ndióxi ta najándacoo na nuú nasanduu na. Sahá ña cán queá nachicaji Ndióxi na nu naá ndivaha nu ñúhu na anda ama cáa quivi.

Ta ndáti na cán xinu quivi caja vií mé á saha ná. <sup>7</sup> Ta tá quiahva nacaja Ndióxi xihín mé tátó cán quiahva já nacaja ri a xihín ñayivi ñuu Sodoma xihín na ñuu Gomorra ta xihín na nanduu ñuu ñéhe táhan xihín ndívi ñuu yóho. Najándihí Ndióxi saha ná jáchi nandiquiahva na yiquí cuñu na ña ná caja na tá nuú cuachi. Ta ndaja táhan mé taa nacaja cuachi xihín táhan da. Sahá ña cán queá najacuyu Ndióxi ñúhu cáyi jata ná. Ta quiahva já ndoho na anda ama cáa quivi. Ta xihín ña yóho jánaha Ndióxi nu yo ña quiahva já cuu ndoho ri mé ví tá co cája i ña cúní mé á.

<sup>8</sup> Tá quiahva nacaja ñayivi sanahá quiahva já cája ri na jándahvi ndohó viti. Jáchi cúu ná ñayivi quini, na cája cuachi ta tá xíní na cája na in cuachi já cuahan na cája ná ña. Mé na cán cája na ña núu xihín yiquí cuñu na ta quehe núu na Ndióxi jáchi co quehe na cuéntá nu cáhan mé á xihín ná ta co yíhvi na cánahá na xihín tátó Ndióxi indiví, mé á lin ndéé cája cuahá ñaha. <sup>9</sup> Ta janda mé á cúu sacuaha nu tóco ndihi tátó Ndióxi naní a Miguel ni coó nacanahá a xihín tiñahá sacuaha. Ta ni co naxeen a cahan núu a xihín rí tá nacani táhan mé á xihín rí sahá yiquí cuñu Moisés. Ña nacachi a xihín rí queá: “Ndióxi ná janani a yohó”, nacachi a xihín rí. <sup>10</sup> Joo ñayivi quini, na xíca jándahvi na cúu cuéntá Jesús yóho, co yíhvi na cánahá na xihín ña co cándaa ini na saha. Joo cája na ña xíca ini yiquí cuñu jáchi cúu ná tátuhun quítí, rí co xíní túní ta ña núu cája na yóho jándihí a saha ná.

<sup>11</sup> Ndáhví ndivaha nacuu na jan jáchi cája na tá quiahva nacaja Caín, da nasahní ñani sanahá ndivaha. Ta jatá jjuhún cuití va cája na ñaha tá quiahva nacaja Balaam sanahá. Ta cája ri na tá quiahva nacaja Coré sanahá tá nandínehe yúhu dá nu Ndióxi. Ta sahá ña yóho ndihi saha ná. <sup>12</sup> Jáchi na jándahvi ndóhó jan jácacahan na nuu ndo tá táca ndo xíxi ndó xihín java na cúu cuéntá Jesús. Jáchi yáha ndivaha ña xíxi na jan ta coó toní ñúhú na xihín ña cája na. Ta saha mé cuití va na ndíhi ini na. Cúu ná tátuhun vico núhú, ña xíca nuu cája tachi ña co ndójo javí. Ta cúu ná tátuhun yító cuíhi, do co cún ñaha nuu tá ndítahan cuun cuíhi nu do. Cúu

na tátuhun yíto, dó natuhun na janda yóho dó jáchi coo nacuun cuihi nu do. Ta cúu ná tátuhun na nandihí saha chí in ndeé. <sup>13</sup> Ña cajú na jan cúu á tátuhun yáco cándo nuu chíquiñu tañuhú tá ndícojo do jáchi ña cácahan nuu yo cúu ña cajú na jan. Cúu ná tátuhun quimi, rí najana ta co ndíñehe rí nuú nasahin rí. Ta sahá ña cajú na cañuhu na nuú naá ndivaha anda ama cáa quivi cajú Ndióxi.

<sup>14</sup> Ta janda sanahá da naní Enoc, da nasacuu da usa nuú chichi Adán najáyaha da tuhun nacahan Ndióxi sahá ña núu cajú na jándahvi ndohó cán. Ta já nacachi da já: “Candehé ndó. Sa vaxi Jesucristo, xitoho í xihín cuaha mil tát yí mé á <sup>15</sup> ña ná cajú vií a saha tóco ndihí na ndúu ñuyiví. Ta jándoho a ini tóco ndihí ñayivi sahá ndihí ña núu nacaja na. Ta quiahva já jándoho a ini na saha tóco ndihí tuhun ihvi nacahan na saha mé á”, nacachi Enoc saha ná. <sup>16</sup> Mé ñayivi quini yóho ni in ñaha co táhan ini na xihin ta cáhan núu na saha tóco ndihí ñaha. Ta ní tiempo cajú na ña xíca yiquí cuñu na cuití va. Ta ndíñehe jíco ndivaha na mé ná tá cáhan na nuú ñayivi. Ta cáhan vaha na sahá ñayivi ña ná nuná nuu ná jándahvi ñahá na.

#### *Jácahan Judas na cúu cuénta Jesús ña ná candé cáhnu ini na Ndióxi*

<sup>17</sup> Candehé ndo, ñani máni, na cúu cuénta Jesús. Xíní ñuhú ndicuhun ini ndó ña nacachi na apóstol cuénta Jesucristo, xitoho í xihin ndo sanahá. <sup>18</sup> Mé na cán nacachi na xihin ndó já: “Tá ná cayati quivi ndihí sahá ñuyiví yóho já quea cacu nuu ñayivi cuacu ndaa na Ndióxi. Ta cajú na tá nuú ña núu ña xíca ini mé ná cajú na”, nacachi na cán. <sup>19</sup> Mé ñayivi quini yóho cúu ná na xíca sáhdá java táhan na cúu cuénta Jesús. Ta cajú na ña núu ña cáhvi ini na cajú na ta co ndácaan ínimá yí Ndióxi ini na.

<sup>20</sup> Joo mé ndó, ñani máni, na cúu cuénta Jesús xíní ñuhú coo ndacú ini ndo xihin ña cándé ini ndó Jesús jáchi ña jan cúu á ña yí ndivaha. Ta xíní ñuhú caça tahví ndo nu Ndióxi xihin ndé ña sáhan ínimá yí mé á nu ndo. <sup>21</sup> A cáxoo ndó nu Ndióxi jáchi quíhvi ini a ndohó. Ta candati tiahva ndó xinu coo quivi cajú Jesucristo, xitoho í ña ná catacú

anda ama cáa quivi jáchi mé a ndaa táhvi ini a saha yo.

<sup>22</sup> Ta ndítahan candáhví ini ndó ndá na cáhvi ivi johó ini saha Jesús. <sup>23</sup> Já quea jácacu Ndióxi na ña ná a cahun toho na indayá. Xíní ñuhú candáhví ini ndó na. Joo cuénta coo ndó xihin ná já ná a casahá ndo cajú ndó cuachi tá quiahva cajú mé ná jáchi na cán cuu jácaquini na ndohó.

#### *Cájá cáhnu Judas Ndióxi*

<sup>24</sup> Mé Ndióxi quea íin tóco ndihí ndéé chindeé a mí ña ná a ndácava í nuú cuachi já ná cuu coo vií yo tá ná xinu coo í nu íin mé á. Ta cajú mé á ña ná chutú ndaa yo xihin ña cáji ini tá ná xinu coo í nu íin mé á ta a juú quiahva ndató cáa cán. <sup>25</sup> In túhún jini mé á cúu Ndióxi, mé á jácacu mí sahá ña nacaja Jesucristo, xitoho í. Cóho cajú cáhnu í Ndióxi jáchi yéhe ndivaha mé á ta cáhnu ndivaha cúu á ta íin cuahá ndéé á ta mé á quea cómi cuénta saha tóco ndihí ñaha. Cáhnu cúu mé á viti ta anda saha ta anda ama cáa quivi cáhnu cúu mé á. Já ná coo.

## Ña najánaḥa Jesucristo nu Juan

### Tá nanaḥa Jesucristo mé á nu Juan

<sup>1</sup> Ña yóho cúú ña nanaḥa Ndióxi nuú Jesucristo ña ná cuu jánaḥa mé á ña nuú na cúú cuéntá mé á. Ta naḥindahá Jesucristo in tátō mé á nuú yeḥe, da cúú Juan, da cája chúun cuéntá mé á já ná caxi tuhun tátō mé á xihín i ndá a queá yaḥa chága chí nuu. Ta cúú á ña sa cáyati vaḥi. <sup>2</sup> Ta ndícani ndaa ndihi i sahá ña naxini i xihín nuú i ta naḥahyí i tóco ndihi ña yóho. Ta naḥaḥan Jesucristo tuhun a nuú i ña cúú á ña ndaa.

<sup>3</sup> Cajii ini ñayivi tá cáhvi na ña naḥahyí i yóho ta cajii ini na xini johō na ña yóho nani cáhvi inga na ña jáchi cúú á ña naquixi cuéntá Ndióxi. Cajii ini ñayivi tá cája na ña cáhí a jáchi sa naḥayati quiví coo tóco ndihi ña yóho.

### Cáhyí Juan ña yóho nu ndihusa ñuu nu ndítaca na cúú cuéntá Jesús

<sup>4</sup> Yeḥe cúú Juan ta cáhyí i carta yóho nuú ndihusa ñuu nu ndúu na cúú cuéntá Jesús estado Asia. Ña cúní queá ná caja cuaḥa Ndióxi ñamaní xihín ndó ta ná caja mé á ña ná coo vaḥa ini ndó. Mé Ndióxi ín a viti ta naḥahin a janda tá cámaní cava sáhá saḥa ñuyiví ta quixi a ñuyiví yóho. Ta cúní ña ná caja cuaḥá ínima yii Ndióxi ñamaní xihín ndo. Mé a cán cáa tátuhun usa ínima yii ta ndúu na nu Ndióxi, mé nu ín coo a cómí a cuéntá sahá indiví cán. <sup>5</sup> Ta cúní ña ná caja cuaḥá Jesucristo ñamaní xihín ndo, mé á cáhan ña ndaa sahá ña naxini a. Ta mé á naḥacuú ña nu cuítí nanditacu tañu na sa naxihí. Ta cómí a cuéntá saḥa tóco ndihi rey, na cómí cuéntá sahá ñayivi ñuyiví yóho. Ta quíhvi ini Jesucristo mí ta najándoo a cuachí tá naxita nji á ndica crúxu. <sup>6</sup> Ta tóco ndihi mí, na cándeé ini mé á najándique táhan mé á mí já ná cacomí a cuéntá saḥa yo. Ta nandaja mé á mí nanduú tátuhun jutū ña ná caja cáhnu yó Ndióxi, mé a cúú tátá Jesucristo. Cáhnu ná cacuu mé á anda ama cáa quiví jáchi ín ndée mé á caja tóco ndihi ñaha anda ama cáa quiví. Já ná coo.

<sup>7</sup> Sa naḥayati quiví quixi Jesucristo tañu vico. Ta tóco ndihi ñayivi cuni ñahá ta janda na naḥahni ñahá cán cuni na a. Ta tóco ndihi ñayivi ndúu ndijáá ñuu níí cúú saḥa ñuyiví canduu cuéḥa ndivaha ini na saḥa mé á. Já ná coo.

<sup>8</sup> Ta já cáhí Jesucristo, xitoho í saḥa mé á: “Yeḥe cúú mé a nu cuítí ta yeḥe cúú mé a nu ndihí jáchi janda tá cámaní cava sáhá saḥa tóco ndihi ñaha sa ín va yeḥe ta coo tá coo i vatí ná ndihi saḥá”, cáhí a. Mé a cúú Ndióxi, ña ín ndée cája tóco ndihi ñaha. Ta mé á ín a viti ta naḥahin a janda tá cámaní cava sáhá saḥa ñuyiví ta quixi a ñuyiví yóho.

### Náḥa Jesucristo nu Juan ndá quiaḥva cáhnu cúú mé á

<sup>9</sup> Yeḥe cúú Juan ta cúú u ñani ndó, na cúú cuéntá Jesús. Ta saḥá ña cándeé ini i Jesús saḥá ña cán queá nañeḥe táhvi i xihín mé ndó cacomí Ndióxi cuéntá saḥa ndihí. Ta coo caja toho ña ná ndoho ini ñuyiví yóho jáchi sahan Ndióxi tuhun ndée ini já ná cuu caja ndeé ini tá ndóho ini. Naḥava xoo na yeḥe ta naḥaḥan ñeḥe na yeḥe isla naní Patmos saḥá ña naxica nuu i naḥaḥan i tuhun Ndióxi, ña cúú ña ndaa, ña najánaḥa Jesucristo nuú i. <sup>10</sup> Ta ndaja coo nandindaa quiví coo ña naḥacu ini Jesucristo, xitoho í ta mé tañu já naḥatú ndaa ínima i xihín ínima yii Ndióxi ta já naxini johō i cáhan cóhó in a chí jatá i ta naḥacuú a tátuhun tá tívi na trompeta. <sup>11</sup> Ta mé tuhun naxini johō i cán naḥachi a já xihín i:

—Yeḥe cúú mé a nu cuítí ta yeḥe cúú mé a nu ndihí jáchi janda tá cámaní cava sáhá saḥa tóco ndihi ñaha sa ín va yeḥe ta coo tá coo i vatí ná ndihi saḥá. Tóco ndihi ña ná cunún yóho xini ñuhú cahyún ña nuú in libro. Ta já chindahún ña nuú ndihusa ñuu estado Asia nu ndúu na cúú cuéntá mí i. Chindahún ña nuú na ndúu ñuu Efeso xihín nuú na ndúu ñuu Esmirna xihín nuú na ndúu ñuu Pérgamo xihín nuú na ndúu ñuu Tiatira xihín nuú na ndúu ñuu Sardis xihín nuú na ndúu ñuu Filadelfia xihín nuú na ndúu ñuu Laodicea viti —naḥachi a xihín i.

<sup>12</sup> Tá naxini johō i ña yóho já nandicoto nihni jatá i sándeḥé e yo cáhan xihín i. Ta já naxini i usa ña juhun cuáán nu sándójó ña tūn. <sup>13</sup> Ta tañu ña cán naxini i in a cúní

coo tá cún̄i coo ñayivi ta ndíxi a in jáhma cáni ña janda sahá xínu coo a xihín quiahva cáni á. Ta naxini i ndacaan in cinturón ña jiuñun cuáán tóco á ta cáni a janda yati yicá ndicá a. <sup>14</sup> Ta ijí jin̄i á cúú á ña yaa cachi tátuhun yaa yucú yáhvá. Ta nduchú núú a cúú á tátuhun ñúhu ita. <sup>15</sup> Ta tá quiahva yéhe caa ña jándutu na ini horno quiahva já yéhe sahá. Ta nihi ndivaha cáhan mé á ta cúú á tátuhun tá xójo cúyu ticuú yuta tañu cáva. <sup>16</sup> Ta naxini i ñúhu usa quimi ini ndahá cuáha mé á. Ta ini yúhu a naxini i quéta in yuchú cáni ña jeen ndíví xoo yúhu. Ta naxini i yéhe ndivaha nuu á tá quiahva yéhe candii caxivi ndaa.

<sup>17</sup> Tá naxini i mé á já nandicava i sahá tátuhun in ndii. Joo mé á naxinuú a ndahá cuáha jatá i já nacachi a já xihín i:

—A cáyhívi tohún. Yehe cúú mé á nu cuítí ta cúú u mé a nu ndíhí. <sup>18</sup> Tá cú tá tá cú va yehe. Mé a ndaa nasacuu u ndii joo viti tá cú u ta catacu u anda ama cáa quivi. Ta yehe naquee vaha i tá nanditacu tucu u tañu ndii ta viti cómí i cuéntá sahá nu ndúu ínima na sa naxihí. <sup>19</sup> Xíní ñúhú cahyún ña naxinún. Ta xíní ñúhú cahyún sahá ña cúu viti ta já cahyún sahá ña coo chága chí nuu. <sup>20</sup> Ña yóho quea cún̄i cachi ndihusa quimi naxinún ñúhu ini ndahá cuáha i xihín ndihusa ña jiuñun cuáán nu sándójó ña túun. Ndhusa quimi cán cúú rí yuhú nuu in in na cómí cuéntá sahá usa veñuhu nu táca na cúú cuéntá Jesús. Ta ndihusa nu sándójó ña túun cán cúú á yuhú nuu usa veñuhu. Ta ña yóho coo naxini ñayivi jáchi nasacuu a ña jehé.

## 2

### *Ña nacachi Jesús xihín na cúú cuéntá mé á ndúu ñuu Efeso*

<sup>1</sup> Cahyún in carta nuú da cómí cuéntá sahá na cúú cuéntá mí i ndúu ñuu Efeso. Ta ña cahyún cúú ña yóho: “Ña yóho cúu tuñun cáhan Jesús, mé a ñúhu usa quimi ini ndahá cuáha, mé a xíca nuu tañu usa ña jiuñun cuáán nu sándójó ña túun. Ta ña yóho quea cáhan Jesús xihín ndó, na ñuu Efeso: <sup>2</sup> Sa cándaa ndihi ini i ndá quiahva cája ndó. Cándaa vaha ini i ña ndúcú ndéé ndo cája chúun ndó cuéntá mí i. Ta co

jándacoo ndó chuun cája ndó cuéntá mí i. Ta sa cándaa vaha ini i ña co ndéé ini ndó xihín ña cája ñayivi quini. Ta sa cándaa ini i ña sa naxito ndojó ndó na cáchí cúú apóstol cuéntá Ndióxi joo co cúú toho na apóstol jáchi cúú ná na tuñun cuití va. <sup>3</sup> Ta sa cándaa cáxí ini i ña co jándacoo ndó cája chúun ndó cuéntá mí i. Ta cuahá ndivaha tañu ndóho ini ndó sahá i. Ta co cánaá ndó xihín ña yóho. <sup>4</sup> Joo ín in ñaha cáhan cuachí i nu ndó saha: Ta ña cún̄i cáhan i saha cán quea co cún̄i ga ndó yehe tá quiahva nacacún̄i ndó yehe janda mé saha. <sup>5</sup> Ña cán quea ndítahan ndicuhun ini ndó ndá quiahva nacacún̄i ndó yehe jihna. Ta ndítahan nu ndó ndicó coo ini ndó ta caja ndó tá quiahva nacaja ndó janda mé saha. Á tá coo ta xínu yachi i nu ndo ta tavá i ña cándójó, ña túun nu ndo. Caja i ña yóho xihín ndo tá ná a ndicó coo ini ndó. <sup>6</sup> Joo mé a ndaa cáji ini i xihín ndo jáchi cándají ndó ña núu cája na xíca cuéntá nicolaítas jan. Jáchi co táhan ri ini yehe xihín ña núu cája na jan. <sup>7</sup> Cuni johó vaha ndó, na vaha johó ña cáhan ínima yii Ndióxi xihín na cúú cuéntá mí i, na táca veñuhu: Ndá na ná quee vaha tañu tóco ndihi ña núu ñuyíví yóho, na cán cúú na quiahva i ñaman̄i nuu caxí cuñi cúun nu yíto, dó cája ña ná catacu ñayivi anda ama cáa quivi. Mé yíto cán cándichi dó nu ín Ndióxi.”

### *Carta cuahán nuú na cúú cuéntá Jesús ndúu ñuu Esmirna*

<sup>8</sup> Cahyún inga carta cuñun nuú da cómí cuéntá sahá na cúú cuéntá mí i ndúu ñuu Esmirna. Ta ña cahyún nu ná cúú ña yóho: “Ña yóho quea cáchí Jesús, mé a cúú á nu cuítí ta cúú á nu ndíhí, mé á sa naxihí ta já nanditacu tucu a. Ta já cáchí a já xihín ndó, na ñuu Esmirna: <sup>9</sup> Sa xín̄i vaha i ndá quiahva ndóho ini ndó. Ta xín̄i ndá quiahva cándahví ndo. Joo mé a ndaa cúú ndó na cuicá nu Ndióxi. Ta sa xín̄i ndá quiahva cáhan núu na saha ndo jáchi cáchí na cúú ná na Israel joo a juú na. Cúú ná in táhdá na cája cáhnu Satanás, mé tiñáhá sacuaña va. <sup>10</sup> A cáyhívi toho ndó sahá ña vaxi nu ndó ndoho ini ndó. Jáchi ñayivi quini, na cúú cuéntá tiñáhá sacuaña taán na java ndohó vecaa já coto ndojó na

ndohó. Ta tixi uxu quivi ndoho ini ndó. Ta xini ñuhú cándéé tá cándéé ini ndó yehe vatí ná cahní na ndohó ta já ná caja i ña ñehe táhvi ndó catacu ndó anda ama cáa quivi. <sup>11</sup> Cuni johó vaha ndó, na vaha johó ña cáhan ínimá yíi Ndióxi xihín na cúu cuéntá mí i, na táca veñuhu: Ndá na ná quee vaha nu tóco ndihi ña núu ñuyivi yóho, na cán cúu na a cahun toho na ndoho ini na indayá. Jáchi tá ndóho ini ñayivi indayá cúu á tátuhun xíhi na chí ivi.”

### *Carta cuahan nuú na cúu cuéntá Jesús ndúu ñuu Pérgamo*

<sup>12</sup> Cahyún inga carta cahun nuú da cómi cuéntá sahá na cúu cuéntá mí i ndúu ñuu Pérgamo. Ta já cachún já nu carta jan: “Jesús, mé a ñehe yúchu cáni ña jeen ndívi xoo yúhu cán quéa cáchi já: <sup>13</sup> Sa xini vaha i ña íin ndó ñuu Pérgamo nu cája Satanás, mé tiñáhá sacuahá ña cúni mé rí xihín ñayivi. Joo xihín ndinuhu ini ndó cája ndó ña táhan ini i xihín. Ta coó najándacoo ndó ña cándéé ini ndó yehe vatí naxini ndó ndá quiahva nacaja na xihín Antipas, mé da nacandéé cáhnu ini yehe cán. Jáchi nasahni na da mé ñuu jan nu cómi Satanás, mé tiñáhá sacuahá cuéntá sahá ñayivi. <sup>14</sup> Joo íin in ñaha cáhan cuachí i nu ndó saha. Jáchi sahan ndó ñamaní nuú java ñayivi cán ña ná candico cáhnu na ña najánaḥa Balaam. Mé Balaam jan cúu dá da najánaḥa Balac ndaja caja da jácahan da na Israel caja na cuachi tátuhun ná cuxu na ña najoco ñayivi nuú yoco ta ná cuju xihín táhan ñayivi vatí co cúu ná yíi ná á ñájíhi na. <sup>15</sup> Ta co íin vaha ini i xihín ndó, na ñuu Pérgamo jáchi sahan ndó ñamaní nuú java ñayivi ña ná candico na jatá na nicolaítas. Ta cándají ndivaha i ña jánaḥa na jan. <sup>16</sup> Xini ñuhú ndicó coo ini ndó ta caca vaha ndó íchi cuéntá mí i. Á tá coo ta saa yachi nu ndúu ndó jan. Ta xihín tuhun cahan i caní táhan i xihín na cája cuachi jan. Ta mé tuhun cahan i cacuu a tátuhun yúchu cáni ña cana yuhú u. <sup>17</sup> Cuni johó vaha ndó, na vaha johó ña cáhan ínimá yíi Ndióxi xihín na cúu cuéntá mí i, na táca veñuhu: Ndá na ná quee vaha nuú ña núu já quéa quiahva i ñamaní nu ná cuxu na pan yíi, ña cúu tátuhun maná, ña naquixi indiví. Ta ña yóho cúu á ña nasahin jehé

nuú ñayivi. Ta já quiahva ri in yuú yaa nuú in in ñayivi nu ndáa quivi saá na. In túhún na ná ndiquehe yuú yaa cán cúu na xini yo quivi quéa ndáa nu á.”

### *Carta cuahan nuú na cúu cuéntá Jesús ndúu ñuu Tiatira*

<sup>18</sup> Cahyún inga tucu carta ná cahun a nuú da cómi cuéntá sahá na cúu cuéntá mí i ndúu ñuu Tiatira. Ta já cachún já xihín ná: “Ña yóho quéa cáchi Jesús, mé a cúu in túhún jiní já jahyi Ndióxi. Ta mé á quéa yehe nduchú núu a tátuhun ñuhú ita ta yehe saha tá quiahva yehe caa, ña jándutu na ini horno. Ta mé á cáchi a já xihín ndóhó, na ñuu Tiatira: <sup>19</sup> Sa xini vaha i tóco ndihi ña cája ndó. Xini vaha i ña cúni ndó yehe. Ta xini vaha i ña cándéé cáhnu ini ndó yehe. Ta sa xini vaha i ña co jándacoo ndó cája ndó ña cájii íni i xihín. Ta sa cándaḥa vaha ini i ña ndíhi chága ini ndó cája chúun ndó cuéntá mí i a juú ga tá nacasáhá ndo cándéé ini ndó yehe. <sup>20</sup> Joo íin in ñaha ña cúni cahan cuachí i xihín ndó saha. Jáchi co cúni ndó jánani ndó ña naní Jezabel, ña íin tañu ndó jan. Vatí cáchi ña ña cáhan ña cuéntá Ndióxi joo xihín ña quixi jini mé ña jándahvi ña na cúu cuéntá mí i. Jáchi jácahan ña na ná cuju xihín táhan na, na co cúu yíi ná á ñájíhi na. Ta jánaḥa ña na ña ná cuxu na ña najoco ñayivi nuú yoco. <sup>21</sup> Sa nasandati ndivaha i ña ná ndicó coo ini ña sahá cuachi cája ña joo co cúni ña jándacoo ña ña quíji ña xihín na co cúu yíi ña. <sup>22</sup> Sahá ña cán quéa caja i ña ná quihvi ndeé ña candúhu ña xito ña. Ta caja i ña ná ndoho ndivaha ini ndihi da quíji xihín ña tá ná a jándacoo da cuachi cája da xihín ña jáchi ña jan cúu ña najánaḥa ña nu dá caja da. <sup>23</sup> Ta caja i ña ná quivi ndihi jahyi ña. Ta xihín tóco ndihi ña yóho cuni na cúu cuéntá mí i, na ndúu ndijáá ñuu ña mé a ndaa xini vaha i ña cáhvi ini ñayivi ta xini ndaja íin ínimá ná. Ta quiahva i nuú in in ndó ña ndítahan quehe ndó sahá ña nacaja ndó. <sup>24</sup> Ta viti cúni cahan i xihín java ga ndó, na cúu cuéntá mí i ndúu ñuu Tiatira jan. Jáchi co ndicó ndo jatá ña jánaḥa ña cán ta co ndicó ndó jatá ña cáchi ñayivi cúu ña ndíchi ndivaha cuéntá Satanás, mé tiñáhá sacuahá. Ña cúni cachi i xihín mé ndó quéa coo ga inga chuun sáhdá i nu ndo.

25 Joo xíní ñúhú candita ndacú ndo janda quiahva ná saa i nu ndúu ndó jan. 26 Ta ndá na ná quee vaha nuú ña núu ñuyíví yóho ta cája na ña cúní yehe xihín ndinuhu ini na janda quiví nu ndíhí já quea caja i ña ná ñehe táhví ná cahnda na chuun nuú ndijáá ñayivi ndúu ñuyíví. 27 Tá quiahva ñacaja Ndióxi, tátá i xihín i tá nasahan mé á ndée á nuú i quiahva já caja i xihín na cándéé ini yehe. Ñehe táhví ná cacomí na cuéntá sahá ñayivi ñuyíví ta cuu caja na tá quiahva cúní mé ná. Ta cuu jándihi na saha mé ñayivi ñuyíví tá quiahva cája ñayivi tá táhví na quiji ndahyi. 28 Ta quiahva ri yehe ñamaní nuú na cúu cuéntá mí i ña ná cacomí na quimi cáhnu, rí quéta tá nativi. 29 Cuni johó vaha ndó, na vaha johó ña cáhan ínimá yii Ndióxi xihín na cúu cuéntá mí i, na táca veñuhu.”

### 3

#### *Carta cuahan nuú na cúu cuéntá Jesús ndúu ñuu Sardis*

1 Cahyún inga tucu carta cuhun nuú da cómí cuéntá sahá na cúu cuéntá mí i ndúu ñuu Sardis ta já cachún já xihín dá: “Ña yóho quea cáhí Jesús, mé a ñúhu ínimá yii Ndióxi ini, ña cúu ndíhusa yuhú nuu ínimá yii mé á. Ta mé á cómí a ndíhusa quimi ta ña yóho quea cáhí a xihín ndó, na ñuu Sardis jan: Xíní vaha i tóco ndihi ña cája ndó. Ta sa xíní vaha i ña cáhan ñayivi ña cája ndó tátuhun ñayivi tácu vatí mé a ndaa cúu ndó tátuhun ndii. 2 Xíní ñúhú ndícaxi vaha ini ndó ta a jándacoo ndó ña vaha cája ndó jan jáchi jalóho cúní ndihi sahá. Sándéhe vaha i ña co cája ndó ña ndaa nu Ndióxi, tátá i. 3 Xíní ñúhú ndicuhun ini ndó ña ñacatiahva ndó cuéntá mí i ta a jándacoo ndó caja ndó ña. Ta xíní ñúhú ndicó coo ndó nu Ndióxi ta ndicáxi vaha ini ndó. Á tá coo ta jonáá cuití xinu coo i nu ndo já caja vií i saha ndo. Mé quiví co cáhan ndo xinu coo i nu ndo tá quiahva jonáá xinu da cuihná. 4 Joo mé a ndaa ndúu java ndó mé Sardis jan, na coo ñacaja quini mé xihín cuachi. Sahá ña cán quea cuu candixi na jahmá yaa ta já cuu caca tuun na xihín i jáchi íin sahá caja na já. 5 Jáchi ndá na ná quee vaha nuú ña núu ñuyíví yóho já quea candixi na jahmá yaa.

Ta a jándoo i quiví ná nu libro, mé nu ndaa quiví tóco ndihi na catacu anda ama cáa quiví. Ta nu Ndióxi, tátá i xihín nu tátó mé á cáhan cáxi i ña jivi ndusa cúu ná cuéntá mí i. 6 Cuni johó vaha ndó, na vaha johó ña cáhan ínimá yii Ndióxi xihín na cúu cuéntá mí i, na táca veñuhu.”

#### *Carta cuahan nuú na cúu cuéntá Jesús ndúu ñuu Filadelfia*

7 Cahyún inga tucu carta cuhun nuú da cómí cuéntá sahá na cúu cuéntá mí i ndúu ñuu Filadelfia ta já cachún já xihín dá: “Ña yóho quea cáhí Jesús, mé á cúu ña yii ndivaha ta cúu á ña ndaa. Ta nu mé á íin yáví, ña nasacomí rey David. Ta tá súná mé á in yéhe ni in na a cuú chicaji ña. Ta tá chícaji mé á in yéhe ni in na a cuú cuná ña. Ta ña yóho quea cáhí a xihín ndó, na ndúu ñuu Filadelfia jan: 8 Xíní vaha i tóco ndihi ña cája ndó. Nasuná i yéhe nu ndo ta ni in túhún na a cuú chicaji ña. Ta cándaa vaha ini i ña cája tá cája ndó ña nasahnda i nu ndo caja ndó vatí coo cuaha ndée ndó. Ta co chíjehé tuhun ndó ña xíní ndó yehe. 9 Cándéhe ndo ña caja i xihín na tuhún, na cája cáhnu Satanás, mé tiñáhá sacuaaha sahá ña cáhí na cúu ná na Israel joo a juú toho na. Caja i ña ná caxítí na nu ndo já ná ndicuni na ña mé a ndaa quíhví ini i ndohó. 10 Coó najándacoo ndó cája ndó ña nasahnda i nu ndó caja ndó ta nasahan ndeé ini ndó sahá ña cán quea chindeé vi ndohó ná a ndóho toho ndó ña núu vaxi jatá ñayivi ñuyíví yóho. Jáchi tá ná cayati mé hora já casáhá coto ndojó i tóco ndihi ñayivi ndúu ñuyíví. 11 Yachi saa i nu ndo. Ta coto a jándacoo ndó ña cándéé ini ndó yehe já quea ná a ndiquiahva i nuú inga na ña sácú vaha i quiahva i nu mé ndó. 12 Ta ndá na ná quee vaha nu tóco ndihi ña núu ñuyíví yóho, ndaja i na cán ná cacuu na tátuhun jihin, dó cúu ndée veñuhu Ndióxi, tátá i. Ta cán canduu na anda ama cáa quiví. Ta jata mé ná cahyí i quiví Ndióxi, tátá i. Ta sa mé yóho cahyí i quiví ñuu nu íin Ndióxi. Mé ñuu yóho cúu á inga Jerusalén, ña saá, ña vaxi chí indiví nu íin Ndióxi. Ta jivi jata mé ná cahyí i inga quiví saá i. 13 Cuni johó vaha ndó, na vaha johó ña cáhan ínimá yii Ndióxi xihín na cúu cuéntá mí i, na táca veñuhu.”

*Carta cuahān nuú na cúu cuéntá Jesús ndúu ñuu Laodicea*

14' Cahyún inga tucu carta cūhun nuú da cómi cuéntá sahá na cúu cuéntá mí i ndúu ñuu Laodicea ta já cachún já xihín dá: “Ña yóho queá cáhí Jesús, mé a cúu ña ndaa. Mé a cáhan ña ndaa sahá ña naxini a xihín nuu á ta sahan tuhun a sahá. Ta mé á cúu á ña nacavaha tóco ndihi ñaha, ña sácú ini Ndióxi coo. Ta ña yóho queá cáhí a xihín ndó, na ñuu Laodicea: 15 Xíni vaha i tóco ndihi ña cája ndó. Ta xíni vaha i ña mé ndó co cúu ndó tátuhun in ñaha ihní ndinuhu. Ta ni co cúu ndó tátuhun in ñaha vixi ndinuhu jáchi co cája cáhnu ndó yehe xihín ndinuhu ini ndó. Vaha ná ndinuhu ña vixi ná cacuu ndó á tá ndinuhu ña ihní ná cacuu ndó. 16 Joo mé ndó ín java uun ndó jáchi in ivi ndacaan ínima ndo ta sahá ña cán queá tavá xoo i ndohó nuú i. 17 Jáchi mé ndó cáhí ndo ña cúu ndó na cuicá ndivaha. Ta cáhí ndo ña vaha ndivaha quehe ndó jáchi ñehe cuaha ndó jjuhún. Ta cáhí ndo ña ni in ñaha co ndímaní nu ndo. Joo mé ndó cúu ndó tátuhun na cuaá ndáhvi ndivaha jáchi a ñaha cuni ndó ña co ñehe táhvi ndó nu Ndióxi. Cúu ndó na ndáhvi ndivaha ta cúu ndó tátuhun na cuaá xíca lahla. 18 Sahá ña cán queá cúni jácahan i ndohó ña ná quixi ndó nuú i cueen ndó jjuhun cuáan nuú i ña sa naxito ndojó na nu ñúhu ita ta já queá ná cacuu ndusa ndó na cuicá. Ta quiahva já ndítahan nu ndo cueen ndó jahmá yaa cachi nuú i candixi ndó já ná chijahví ndó mé ndó jáchi cacahan nuu ndó sahá ña xíca lahla uun va ndó. Ta sa mé nuú yehe ndítahan cueen ndó tata chicaan ndó nduchú nuú ndo já queá ná cuu candehé vaha ndó. 19 Jáchi jánani i tóco ndihi ñayivi, na quíhvi ini i ta jándoho i ini na ña ná caja vaha na. Sahá ña cán queá xihín ndinuhu ini ndó ndítahan ndicó coo ini ndó caja ndó ña cúni Ndióxi. 20 Candehé ndo. Yehe cúu u tátuhun in da cándichi cáni ndáha yéhe vehe ndó ta cána i ndohó. Ta ndá na xíni johu nu cáhan i ta súná na yéhe vehe na nuú i já quíhvi i vehe na ta cajíni i xihín ná ta mé ná cajíni na xihín i. 21 Ta ndá na ná quee vaha nu tóco ndihi ña núu ñuyiví yóho, caja i ña ná cuu cacoo na xihín i indiví nuú cacomí i cuéntá saha ná indiví. Jáchi quiahva já

naquee vaha i nuú ña núu ta viti ín coo i xihín Ndióxi, tátá i nu ín coo mé á sáhdá chuun indiví. 22 Cuni johu vaha ndó, na vaha johu ña cáhan ínima yíi Ndióxi xihín na cúu cuéntá mí i, na táca veñuhu” —nacachi a.

## 4

*Tá cája cáhnu na Ndióxi indiví*

1 Tá sa nayaha tóco ndihi ña yóho já naxini i núná in yéhe indiví. Ta mé a naxini johu i nu cuítí ña cáhan tátuhun trompeta ta nacahan tucu a jatá i já nacachi a já:

—Cuáhán ndaa xoo chóho já ná nahá i nuun ndá queá coo chága chí nuu —já nacachi a já xihín i.

2 Chí mé hora já nandeta nuu ínima yíi Ndióxi ini i. Já naxini i mé indiví cán in nu sácoo rey ta ín coo in a cán. 3 Ta mé a ín coo cán nasayéhe nuu á tátuhun yehe in yuu naní jaspe xihín yuu naní cornalina. Ta naxini i nacava nuu in coyánquí nu ín coo a. Ta mé coyánquí cán yehe ri tá quiahva yehe yuu cuí naní esmeralda. 4 Ta nu ín coo mé a cán naxini i nacava tiyivi inga oco comi táyi vaha nu sácoo na cómi chuun. Ta naxini i oco comi na sacuaaha, in in na ín coo nuú in in táyi vaha cán. Ta ndíhoco comi mé na sacuaaha cán ndíxi na jahmá yaa cachi. Ta cándójó in tiyivi jjuhun cuáan jini in in na cán. 5 Ta naxini i ña quéta tasa nu ín coo mé a cán. Ta sa mé cán cáhndi tátuhun tá cána javi ta yati mé cán cáyi usa ití xihín ñuhú ita. Ta ña yóho cúu á ndíhusa yuhú nuu ínima yíi Ndióxi. 6 Ta yati mé cán naxini i in ñaha ta náha tátuhun in tañuhu, ña yehe tátuhun in yutátá.

Ta yati jín nu ín coo a cán nacava tiyivi comi ña tácu. Ta chí a juú quiahva cuaha nduchú nuú a chí nuu á ta chí jatá. 7 Ta in táhan mé ña tácu cán, ña nu cuítí cán cáa tá quiahva cáa in león. Ta ña inga cán ña chí ivi cáa tá quiahva cáa tindiqui. Ta nuú ña cáhuni cán cúni coo a tá quiahva cúni coo nuú ñayivi. Ta ña comi cán cáa tá quiahva cáa in tiyaha tá ndáchí ri. 8 Ta in in mé ña tácu yóho nasahin iñu ndixi a. Ta nuu á ta jatá nachutú ndaa ña xihín nducú nuú. Ta ni ñuu ta ni ndiví coo jándacoo ndícomi ña cán cáhan já cáhí a já:

Yii ndivaha cúu mé ndó, Ndióxi, xitoho nde.

Ta cuu caja ndó tóco ndihi ñaha.

Mé ndó sa já ín va ndó tá ñacava sahá saha ñuyívi.

Ta sa já ín ndó viti ta já coo tá coo ndó anda ama cáa quívi —ñacachi ndícomi ña tácu cán.

<sup>9</sup> Ta tá cáhan mé ña tácu cán já cája cáhnu a Ndióxi ta ndíquiahva ndixahvi nu mé a ín coo nu sácoo rey, mé a tácu anda ama cáa quívi. Ta tá cáhan mé ña tácu cán <sup>10</sup> já ndíaxítí ndíhoco comí na sacuahá cán cája cáhnu na Ndióxi, mé a tácu anda ama cáa quívi. Ta já tiiin na tiyivi cándójo jini na jáxinu na ña nu ín coo Ndióxi cán ta já cáchi na já:

<sup>11</sup> Ndióxi maní nde, cúu ndó xitoho nde ta ndítahan nuú nde caja cáhnu nde ndohó jáchi mé ndó ndítahan ndicáhnu ndivaha.

Íin ndée ndo caja ndó tóco ndihi ñaha ta ndítahan caja cáhnu nde ndohó.

Jáchi ñacavaha ndó tóco ndihi ñaha, ta ndúu ndihi ñaha jáchi cúni mé ndó ña ná canduu a.

Ta ndúu a jáchi cúni mé ndó cavaha ndó ña, já ñacachi ndíhoco comí na sacuahá cán cája cáhnu na Ndióxi.

## 5

### *Tá naxini Juan in libro xihín in ndicachi*

<sup>1</sup> Tá nandihí já naxini i in libro indiví ini ndáha cuáha mé a ín coo nu sácoo rey. Ta mé libro cán cúu á tutu ñatívi tuun a ta ñachyi ndívi xoo nu á. Ta ndájí tuun a xihín usa sello. <sup>2</sup> Ta já naxini i in táto Ndióxi, ña ín ndivaha ndée a. Ta naxini johó i cáhan cóhó a ta ndáca tuhún a já cáchi a já:

—Ndá na cúu na ín saha cahnda ndíhusa sello yóho já ná cuná na mé libro ña ñatívi tuun cán —ñacachi mé táto Ndióxi cán.

<sup>3</sup> Joo coó ñañehe ná ni in na ín saha cahnda ndíhusa sello cán. Ni indiví ni ñuyívi ni nu ndúu na naxihí coó nandíñehe ná ni in na cuu cahnda ndíhusa sello cán ña ná candehé na ña ndáa nu mé libro cán. <sup>4</sup> Ta já ñacasáhá sácu ndivaha i jáchi coó nandíñehe ná ni in tuhún na ín saha cahnda ndíhusa sello cán ña candehé na ini

mé libro cán cahvi na ña ndáa nu á. <sup>5</sup> Joo in táhan na sacuahá cán ñacachi a já xihín i:

—A cuácu gaún jáchi Jesús, mé á cúu tátuhun león, ña ñaquixi chichi Judá ta ñaquixi a chichi rey David, mé a cán ñaquee vaha ta ñasahnu a nu tóco ndihi ña núu ñuyívi. Sahá ña cán quéa cuu cahnda ndíhusa sello ta já cuná mé á libro cán —ñacachi a xihín i.

<sup>6</sup> Ta naxini i cándichi Jesús, mé á cúu tátuhun ndicachi loho tañu na sacuahá ta tañu ndícomí ña tácu cán. Ta mé a cúu tátuhun ndicachi loho cán cándichi a nu sácoo rey ta náha xicá ña najándicuehe na mé á tá ñasahní ñahá na. Ta naxini i ín usa ndíqui a xihín usa nduchú núu a. Ta ña yóho cúu á ndíhusa yuhú nuu ínima yii Ndióxi, ña ñachindahá mé á níi cúu sahá ñuyívi. <sup>7</sup> Ta mé á cúu tátuhun ndicachi loho cán naxinu a ta ñatiin a mé libro cán ndahá cuáha mé á ín coo nu sácoo rey.

<sup>8</sup> Ta tá ñatiin a mé libro ña ñatívi tuun cán já nandíca xítí ndícomí ña tácu cán xihín ndíhoco comí na sacuahá cán nu mé a cúu tátuhun ndicachi loho cán. Ta tóco ndihi na cán cáñee arpa ndáha ná jácaha na. Ta cáñee coho chíñíh má, ña jiihun cuáan ndáha ná ta ñachutú ndáa ña xihín jusa támi sahan. Ta ña cán cúu yuhú nuu tuhún ña xicá tahví na cúu cuéntá Ndióxi nu á. <sup>9</sup> Ta xihín ña saá xíta na cája cáhnu na mé á já cáchi na já:

Nu mé ndó cáni ndiquehe ndó mé libro ñan ta cahnda ndó sello ña ná cuná ndó ña.

Jáchi mé ndó naxihí ndó ñacaja ñayivi.

Ta tá naxita nii ndo já ñaxeen ndó ñayivi ná cacuu na cuéntá Ndióxi.

Ta mé ndó ñachahvi ndó sahá na ñaquixi ndijáa chichi xihín na cáhan tá nuú tuhún xihín na ndúu ndijáa ñuu xihín ndijáa nación.

<sup>10</sup> Ta mé ndó ñandaja ndó ñayivi yóho cacuu na tátuhun jutú já ná caja cáhnu na Ndióxi.

Ta mé na cán cacomí na cuéntá sahá ñayívi ndúu ñuyívi, cáchi na cája cáhnu na mé a cúu tátuhun ndicachi loho cán.

<sup>11</sup> Tá nandihí já ñasandehé tucu u. Anda já naxini johó i cáhan cuhá ndivaha millón táto Ndióxi cája cáhnu na mé á ín coo nu sácoo rey. Ñacava tiyivi na ndúu na jatá



ndícomi mé ña tácu cán xihín jatá ndíhoco comi na sacuahá cán. <sup>12</sup> Ta já cáhan cóhó tóco ndihi mé táto Ndióxi cán já cáchí ña já: Mé Jesús, mé a cúu tátuhun ndicachi loho, rí naxihi nacaja ñayivi, íin sahá caja tóco ndihi ñaha xihín ndée á.

Ta íin sahá ndiquehe a tóco ndihi ña cuíca ta íin sahá ndiquehe ndihi a ña ndichí ta íin sahá ndiquehe a tóco ndihi ndée.

Ta íin sahá ña ná ndiñehe jícó ñayivi mé á.

Ta íin sahá caja cáhnu na mé á ta íin sahá ña ná cata na nu mé á, cáchí tóco ndihi na cán caja cáhnu na mé á.

<sup>13</sup> Ta quiahva já naxini johó rí cáhan tóco ndihi ñaha ña nacavaha Ndióxi ndúu indivi xihín ña ndúu ñuyíví xihín ña ndúu tixi ñundáhyi ta xihín ña ñúhu ini tañuhú. Tóco ndihi ña nacavaha Ndióxi yóho cája cáhnu a mé á ta já cáchí a já:

Ná ndicáhnu ndivaha Ndióxi, mé á íin coo nu sácoo rey.

Ta ná ndicáhnu ndivaha Jesús, mé á cúu tátuhun ndicachi loho.

Ná caja cáhnu í mé á ta ná ndiñehe jícó ñayivi mé á jáchí mé á queá íin ndée caja tóco ndihi ñaha.

Ná caja cáhnu yó mé á anda ama cáa quivi, já cáchí tóco ndihi na cán.

<sup>14</sup> Já nanducú ñehe ndícomi mé ña tácu cán tuhun já cáchí a já:

—Já ná coo.

Ta tá nacachi a ña yóho já nacaxítí ndíhoco comi na sacuahá cán cája cáhnu na Ndióxi, mé á tácu anda ama cáa quivi.

## 6

### *Tá nasahnda Jesucristo ndíhusa sello*

<sup>1</sup> Tá nandihí já naxini í nasahnda Jesús, mé á cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá nandihí já naxini johó í cáhan in táhan ndícomi mé ña tácu cán xihín í ta tachí yúhu a cúu á tátuhun tá cána javi. Ta já nacachi a já xihín í:

—Naha quí, candehún yóho —nacachi a xihín í.

<sup>2</sup> Anda já nasandehé e ta já naxini í in cuáyí cúxú ta naxini í cánúu in dataa jata rí. Ta ndáha da cán naxini í cáñee in arco. Ta naxini í ña ñañehe dá in tiyivi cánúu jini

dá. Ta cájii íní da naqueta da jáchí cúu dá da sa ñaquee vaha ta ñeñe táhvi dá quee vaha tucu da.

<sup>3</sup> Ta anda já naxini í nasahnda Jesús, mé a cúu tátuhun ndicachi loho cán inga sello, ña cáhivi cán. Já naxini johó í ña nacahan inga tucu táhan ndícomi mé a tácu cán xihín í. Já cáchí a já xihín í:

—Naha quí, candehún yóho —nacachi a xihín í.

<sup>4</sup> Ta já naxini í naqueta inga cuáyí ta cúu rí rí cuáhá. Ta mé da cánúu jata rí cán ñañeñe táhvi dá jácani táhan da ñayivi ndúu ñuyíví. Ta ñañeñe táhvi dá caja da ña ná cahní ndaja táhan mé ñayivi ndúu ñuyíví. Ta naxini í ñañeñe dá in yuchú cáni ña cáhnu cáñee a ndáha dá.

<sup>5</sup> Ta tá nasahnda Jesús, mé a cúu tátuhun ndicachi loho inga sello, ña cáhuni já naxini johó í nacahan mé ña tácu, ña cáhuni cán xihín í já nacachi a já:

—Naha quí candehún yóho —nacachi a xihín í.

Ta tá nasandehé e já naxini í in cuáyí ndáhyí tuun ta já naxini í ña cáñee in ña sácuita ñaha ndáha mé da cánúu jata rí cán.

<sup>6</sup> Ta tañu ndícomi mé ña tácu cán naxini johó í cáhan in a ta já cáchí a já:

—Ndiví yaa xíní ñúhú caja chúun í já cuu cueén in túhún laá kilo trigo. Ta in quivi níí xíní ñúhú caja chúun í já cuu cueén uní kilo cebada. Joo a quiahva ndó ñamaní ña ná tiví sítí xihín vino —nacachi a.

<sup>7</sup> Ta tá nasahnda Jesús, mé a cúu tátuhun ndicachi loho inga sello, ña cácomi cán já naxini johó í nacahan mé ña tácu, ña cácomi cán xihín í já nacachi a já:

—Naha quí candehún yóho —nacachi a xihín í.

<sup>8</sup> Ta tá nasandehé e já naxini í in cuáyí cuáán johó. Ta da cánúu jata rí cája ña ná quivi ñayivi. Ta jata mé da cán naxini í ndíco da sáhdá chuun sahá nu ndúu ndii. Ta ñañeñe táhvi ndívi da cavaha da tondóhó ñuyíví já ná caja da ña ná cahní táhan cuahá ndivaha ñayivi ndúu ñuyíví. Ta jári nasahní da na xihín tama ndeé ta xihín cuehe ta xihín ndijáá quití yúcú ndúu ñuyíví janda quiahva naxihí in táhdá nuú comi táhdá ñayivi ndúu níí cúu saha ñuyíví.

<sup>9</sup> Ta tá nasahnda Jesús, mé a cúu tátuhun ndicachi loho cán inga sello, ña cáhuhun já naxini i in nu náa ta tixi mé cán ndúu ínima ñayivi, na naxihí sahá ña naçaxi tuhun na tuhun Ndióxi nuú ñayivi xihín ndinuhu ini na. <sup>10</sup> Ta cáyuhú cóhó na já cáchí na já:

—Tátá Ndióxi, mé ndó cúu ndó ña yii ndivaha ta cája ndó ña ndaa cuití va. Ta cuu caja ndó tóco ndihi ñaha. Ndaja cáa chá quiví caja vii ndó sahá ñayivi ndúu ñuyiví. Ta já caja ndó ña ná चाहvi na sahá ña naçaja na nasahní na ndehe —cáchí na ndúu tixi náa cán.

<sup>11</sup> Anda já nañehe ná jahmá yaa candixi na ta natahnda chuun nu ná ña ná candati tóo chága na janda quiahva ná xinu coo nuú java ga na cúu cuénta Jesús quivi na caja ñayivi ñuyiví sahá ña cája chúun na cuénta Jesucristo. Ta janda quiahva ná quivi ndihi na yóho já cavií sahá ñayivi naçaja quini xihín ná.

<sup>12</sup> Tá nandihí já naxini i nasahnda Jesús, mé a cúu tátuhun ndicachi loho inga sello, ña cáhiñu cán. Já naxini i nataan ndivaha ta naxini i nanduu tuún candii tátuhun in jáhma tuún sá ndíxi na ndúu ndií. Ta níi cúu yoo naxinu cuahá níi rí. <sup>13</sup> Ta ndijáa quimi naquee rí indiví ta naçayu rí nu ñúhu. Cúu á tátuhun tá quíji nihni tachí ndeé ndivaha titó ñúhu ta já cuyu cuihi, rí cuij nu ñúhu. <sup>14</sup> Nandihí sahá indiví ta nandacoo vaha ña tátuhun tá ndítivi in yívi ña co xíní ñúhu ga na. Ta tóco ndihi yúcu xihín tóco ndihi isla mahñú tañuhú nandijama ndihi ña ta co ndúu ga ña nuú nasanduu a. <sup>15</sup> Ta tóco ndihi na cómi cuénta sahá ñuyiví nandacoo jehé na tañu cáva. Ta nachihé na tañu tóto chí yúcu cuahan na. Ta cán nachijehé ri na sáhdá chuun nu soldado xihín tóco ndihi na cuicá xihín tóco ndihi na ín ndée cája ña náhnu ñuyiví yóho. Ta jári tóco ndihi na cómi in xitoho cuénta sahá xihín tóco ndihi na xíca núná mé nandacoo jehé na tañu cáva xihín tañu tóto cán. <sup>16</sup> Ta cáchí na cáhan na xihín yúcu ta cáhan na xihín cáva ña ná cuyu a jata ná ta ná chijehé a na ña ná a cuni mé a ín coo nu sácoo rey cán na. Ta yíhví na Jesús, mé á cúu tátuhun ndicachi loho cán jáchí sa naçojo ini a ta vaxi a jándihí a sahá ná. <sup>17</sup> Jáchí sa naxinu coo quiví jándoho mé á ini na ta ni in na co ndée ini.

## 7

### *Ndiçaxi Ndióxi in táhdá na Israel*

<sup>1</sup> Tá sa nayaha tóco ndihi ña yóho já naxini i ndíta comi táto Ndióxi ndícomi xoo nu quíxi tachí nu ndícomi xoo níi cúu saha ñuyiví. Ta tiiin a tachí já ná a cuicó ga tachí jatá ñuyiví ta ná a cuicó ga tachí nuú tañuhú ta ni nuú ni in yíto. <sup>2</sup> Ta já naxini i naquixi inga táto Ndióxi xoo nu quéta candii. Ta mé táto Ndióxi yóho naxini i ñehe a sello Ndióxi, mé á tácu indiví. Ta já naxini johó i naçayuhú mé táto Ndióxi yóho nuú ndícomi java ga táto Ndióxi, mé na nañehe táhví caja ña núu xihín ñuyiví ta xihín tañuhú viti ta já naçachi a já xihín ná:

<sup>3</sup> —Candati ndó. A cája núu ndó xihín ñuyiví ta ni xihín tañuhú ta ni xihín ni in yíto. Jáchí jihna ñúhu xíní ñúhu cacú in sello taan na cúu cuénta Ndióxi, mé a cája cáhnu mí —naçachi a.

<sup>4</sup> Ta naxini johó i cáhan in a ndaja cúu ñayivi nanani sello yóho taan na. Cúu ná in ciento ivi jico comi mil ñayivi Israel ta cúu ná na naquixi ndíhuxu ivi chichi na Israel. <sup>5</sup> In táhdá cúu uxu ivi mil na naquixi chichi Judá ta nanani sello taan na cán. Ta inga uxu ivi mil na naquixi chichi Rubén naquehe sello taan na. Ta quiahva já naquihvi ri sello taan uxu ivi mil na naquixi chichi Gad <sup>6</sup> xihín uxu ivi mil na naquixi chichi Aser xihín uxu ivi mil na naquixi chichi Neftalí xihín uxu ivi mil na naquixi chichi Manasés <sup>7</sup> xihín uxu ivi mil na naquixi chichi Simeón xihín uxu ivi mil na naquixi chichi Leví xihín uxu ivi mil na naquixi chichi Isacar <sup>8</sup> xihín uxu ivi mil na naquixi chichi Zabulón xihín uxu ivi mil na naquixi chichi José xihín uxu ivi mil na naquixi chichi Bejamín nanani sello taan na.

### *Tá naxini Juan cuahá ndivaha ñayivi ndíxi jahmá yaa*

<sup>9</sup> Tá nandihí já nasandehé e já naxini i cuahá ndivaha ñayivi. Ta ni in na a cuú cahvi ñahá sahá ña cuaha cúu ná. Ta cúu ná na naquixi ndijáa chichi ñayivi ndúu ñuyiví. Ta cúu ná na cáhan tá nuú tuhun. Ta cúu ná na ndúu ndijáa ñuu xihín ndijáa nación ñuyiví. Ta naxini i ndíta na nu Ndióxi, mé a ín coo nu sácoo rey. Ta ndíta

na nu Jesús, mé a cúu tátuhun ndicachi loho cán. Ta tóco ndihi na ndíxi na jahmá yaa cachi ta cáñee ñuu ndáha ná. <sup>10</sup> Ta tóco ndihi na cáyuhú cóhó na já cáchí na já:

Ndióxi, mé a íin coo nu sácoo rey xihin Jesús,  
mé a cúu tátuhun ndicachi loho cán najácau a mí, cáchí na.

<sup>11</sup> Ta naxini i ndíta tóco ndihi tátō Ndióxi cája cáhnu na mé á íin coo nu sácoo rey. Ta nacava tiyivi na ndúu na jatá na sacuahá cán xihín jatá ndícomi mé ña tácu cán. Ta já nacaxítí tóco ndihi na janda quiahva nacani ndaa taan na nu ñúhu ta já nacasáhá na cája cáhnu na Ndióxi. <sup>12</sup> Já cáchí na já:

Já ná coo. Cája cáhnu nde ndohó ta ndíñehe jíc nde quivi mé ndó.

Jáchi ndíchí ndivaha jini ndo ta ndiquiahva nde ndixahvi nu ndo.

Ta ndítahan coo toni ñúhú nde xihin ndo jáchi mé ndó cúu ndó ña íin ndée cája tóco ndihi ñaha.

Ta já ná coo tóco ndihi ña yóho nu mé ndó anda ama cáa quivi. Já ná coo, nacachi na cán cája cáhnu na Ndióxi.

<sup>13</sup> Anda já naxinu in táhan na sacuahá cán nuú i já nandaca tuhún na yehe já nacachi na já xihín i:

—Á co xínun ndá na cúu na ndíxi jahmá yaa yóho ta ndá naquixi na —nacachi na xihín i.

<sup>14</sup> Já nanducú ñehe e tuhun nu ná já nacachi i já xihin ná:

—Yehe co xini toho i joo mé ndó sa xini vaha ndó ndá na cúu ñayivi yóho —nacachi i xihin ná.

Ta já nacachi na já xihín i:

—Na ndíxi jahmá yaa yóho cúu ná na nayaha nuú cuahá ndivaha tondóhó mé quivi tá nandoho ndivaha ini na. Ta viti sa nandoo cuachi na xihín nii Jesús, mé a cúu tátuhun ndicachi loho. <sup>15</sup> Sahá ña cán quea ndíta na nu Ndióxi, mé á íin coo nu sácoo rey. Ta ñuú ta ndivi cája ndívi na nu mé á ini veñuhu a. Ta mé Ndióxi, mé a íin coo nu sácoo rey cán ndáa vaha mé á na jáchi íin tuun a xihin ná. <sup>16</sup> Ta coó ga joco quixi nu ná ta ni a íchi ga ini na ticuii ta ni a cáyi ga na cája candii ta ni a ndíhi ga ini na sahá ña ihní. <sup>17</sup> Jáchi Jesús, mé

a cúu tátuhun ndicachi loho cán ndácaan mahnú nu sácoo rey cán ta candaa mé á na tá quiahva ndáa in pastó ndicachi jana dá. Ta candaca mé á na cuhun na nu cána ticuii, dó cája ña ná catacu na anda ama cáa quivi. Ta yacó Ndióxi ticuii nuú tóco ndihi na sácu —nacachi na sacuahá cán xihín i.

## 8

*Tá nasahnda Jesús, mé a cúu tátuhun ndicachi loho cán inga sello, ña cáhusa*

<sup>1</sup> Tá nasahnda Jesús, mé a cúu tátuhun ndicachi loho cán inga sello, ña cáhusa já nacatáji ní tóco ndihi ñaha indivi tátuhun tixi java hora. <sup>2</sup> Tá nandihí já naxini i ndíta usa tátō Ndióxi nu á. Ta in in mé tátō Ndióxi cán nañehe ná in in trompeta. <sup>3</sup> Já naxinu inga tátō Ndióxi candichi a nu náa ña íin yati nu íin coo Ndióxi nu sácoo rey cán. Ta cáñee in cohó chíñíhmá ndáha á, ña jiuhun cuáán. Ta nañehe á cuahá ndivaha jusa, ña joco a ña nu náa, ña nacavaha xihin jiuhun cuáán. Ta quiahva já joco ri a nu náa cán ña xica tahvi na cúu cuéntá Jesús nu Ndióxi. <sup>4</sup> Ta mé ñihma nacana nuú cohó chíñíhmá cáñee ndáha tátō Ndióxi cán nandindita cuahan nu Ndióxi tá quiahva ndíndita ña xica tahvi na cúu cuéntá mé á nu á. <sup>5</sup> Anda já natiin tátō Ndióxi cán cohó chíñíhmá ta já najácutú a ña xihin titi ñúhu, ña naquehe a nu náa cán. Ta já nacuihna ña jatá ñuyivi. Anda já nacasáhá cáhndi tátuhun tá cána javi. Ta jandá johó xójo cúu ta cána tasa ta naquixi in nditáan ndeé ndivaha jatá ñuyivi.

*Tá nativi ndíhusa tátō Ndióxi trompeta*

<sup>6</sup> Tá nandihí já nasacanduu tiavha ndíhusa tátō Ndióxi tiví na trompeta ña cáñee ndáha na.

<sup>7</sup> Ta in táhan ndíhusa tátō Ndióxi cán nacasáhá nativi a mé trompeta cán. Ta já nacuyu ñúhu cáyi xihín níi ña nacava táhan xihín nii jatá ñuyivi. Ta chí nacayi in táhndá nuú uní táhndá ñuyivi yóho ta jári naquihvi ñúhu in táhndá nuú uní táhndá yító ndíta yucu ta jári yucu cuí nacayi ndihí a.

<sup>8</sup> Tá nandihí já nativi tátō Ndióxi ña cáhivi cán inga trompeta. Ta naxini i najani tátuhun in yucu cándaha xihin ñúhu cuahan ndicava nuú tañuhú. Ta in táhndá nuú uní

táhn<sup>da</sup> tañuhú cán nanduu dó n<sup>ii</sup>. <sup>9</sup> Ta in táhn<sup>da</sup> nuú un<sup>i</sup> táhn<sup>da</sup> tóco ndi<sup>hi</sup> ñaha ñúhu ini tañuhú naxi<sup>hi</sup> a. Ta quiahva já nandi<sup>hi</sup> saha in táhn<sup>da</sup> nuú un<sup>i</sup> táhn<sup>da</sup> barco nasandoj<sup>o</sup> nuú tañuhú cán.

<sup>10</sup> Ta táto Ndióxi ña cáhun<sup>i</sup> cán nativ<sup>i</sup> a inga trompeta ta já naxini i naquee in quimi cáhnu cándaha xih<sup>in</sup> ñúhu ita vaxi rí ndícava rí ñuyív<sup>i</sup>. Naquee rí indiv<sup>i</sup> ta nandicava rí nu ñúhu nuú in táhn<sup>da</sup> nuú un<sup>i</sup> táhn<sup>da</sup> yuta xih<sup>in</sup> chichoh<sup>o</sup> nu cána ticu<sup>í</sup>. <sup>11</sup> Ta mé quimi cán naní rí ña ova. Ta ñajaja rí ña ñacahova in táhn<sup>da</sup> nuú un<sup>i</sup> táhn<sup>da</sup> ticu<sup>í</sup>. Ta naxi<sup>hi</sup> cuahá ndivaha ñayivi tá naxi<sup>hi</sup> na dó ova cán.

<sup>12</sup> Tá nandi<sup>hi</sup> já nativ<sup>i</sup> táto Ndióxi ña cácom<sup>i</sup> cán inga trompeta já nanaá in táhn<sup>da</sup> nuú un<sup>i</sup> táhn<sup>da</sup> nuú candii cán. Ta quiahva já ñajaja rí a xih<sup>in</sup> yoo ta xih<sup>in</sup> quimi. Saha ña cán queá coo ñacuu tuun vaha candii xih<sup>in</sup> yoo xih<sup>in</sup> quimi cán. Ña cán queá ñacamaní tátuhun in táhn<sup>da</sup> nuú un<sup>i</sup> táhn<sup>da</sup> tuun candii cán jatá ñuyív<sup>i</sup>. Ta quiahva já ñacamaní tuun yoo xih<sup>in</sup> quimi ñuú.

<sup>13</sup> Tá nandi<sup>hi</sup> já nasandehé e ta já naxini joh<sup>o</sup> i cáti ndixi in táto Ndióxi ndách<sup>i</sup> a mahñú indiv<sup>i</sup>. Ta cáyuhú cóh<sup>o</sup> a já cách<sup>i</sup> a já:

—Ay, ay, ay ndáhv<sup>i</sup> nahá ñacuu ñayivi ndúu ñuyív<sup>i</sup> jáchi ndaj<sup>i</sup> ndoho ini na tá ná tiv<sup>i</sup> un<sup>i</sup> ga táto Ndióxi trompeta —cách<sup>i</sup> a.

## 9

<sup>1</sup> Tá nandi<sup>hi</sup> já naxini i nativ<sup>i</sup> táto Ndióxi ña cáhun<sup>i</sup> cán inga trompeta. Ta naxini i naquee in quimi indiv<sup>i</sup> ta nandicava rí jatá ñuyív<sup>i</sup>. Ta ñañehe táhv<sup>i</sup> rí cacom<sup>i</sup> rí yáv<sup>i</sup> ña cuu cuná r<sup>i</sup> yáv<sup>i</sup> cuná ndivaha, ña co xinu nu ndi<sup>hi</sup> nuu. <sup>2</sup> Ta mé quimi nasuná r<sup>i</sup> yuyéhé mé yáv<sup>i</sup> cuná já nandindita ñihma tátuhun ña ndíndita yúhu horno cáy<sup>i</sup>. Ta mé ñihma ñacana cán najánaá nuú candii xih<sup>in</sup> nuú tach<sup>i</sup> viti. <sup>3</sup> Ta tañu ñihma cán ñaqueta cuahá ndivaha tica, rí nandicuita nuu ní cúu ñuyív<sup>i</sup>. Ta ñañehe táhv<sup>i</sup> rí cacuu rí rí cuehe tá quiahva cuehe líhma. <sup>4</sup> Ta ñatahnda chuun nu rí ña ná a jándi<sup>hi</sup> toho rí sahá yucu ni sahá ñaha cuí ni sahá yitó cuí ñuyív<sup>i</sup> yóho. Jáchi ñatahnda chuun nu rí ña ná tiin rí ñayivi cuití va, na co cándaa

marca Ndióxi taan. <sup>5</sup> Joo coo ñañehe rí ñamaní cahní rí na. Ña ñajaja rí xih<sup>in</sup> ná queá ná tiin rí na ña ná cahma na tixi uhun yoo. Ta tá quiahva cáhma na tá tiin líhma na quiahva já cáhma na tiin rí na. <sup>6</sup> Mé quivi já nducú ñayivi quivi vaha na joo a cúu quivi na. Vatí cúni quivi na joo a cúu quivi na.

<sup>7</sup> Mé tica tiin ñahá cán ndáa rí tá quiahva ndáa cuáy<sup>i</sup>, rí ndúu tiahva cahun cani táhan. Ta tá quiahva cúni coo t<sup>i</sup>yivi, ña jiu<sup>h</sup>un cuáán sándój<sup>o</sup> j<sup>i</sup>ni rey quiahva já cúni coo ña cándój<sup>o</sup> j<sup>i</sup>ni rí cán. Ta tá quiahva cúni coo nuú ñayivi quiahva já cúni coo nuu r<sup>i</sup>. <sup>8</sup> Ta tá quiahva iin ij<sup>i</sup> j<sup>i</sup>ni najihí quiahva já iin ij<sup>i</sup> j<sup>i</sup>ni r<sup>i</sup>. Ta tá quiahva ndáa nuhu león quiahva já ndáa nuhu rí. <sup>9</sup> Ta jáhv<sup>i</sup> yicá ndicá mé tica cán xih<sup>in</sup> jahmá caa, ña sándixi soldado cáni táhan na. Ta tá cáhma cáti ndixi r<sup>i</sup> cúu á tátuhun tá cáti saha cuaha cuáy<sup>i</sup> tá ñúhu rí carreta xinu rí cuahan rí can<sup>i</sup> táhan rí. <sup>10</sup> Ta iin iñu ndoh<sup>o</sup> r<sup>i</sup> ña tiin tátuhun ndohó líhma. Ta xih<sup>in</sup> ña cán ñañehe táhv<sup>i</sup> rí tiin rí ñayivi ña ná cahma na tixi uhun yoo. <sup>11</sup> Ta mé da cómi cuéntá saha mé tica cán naní da Abadón tuhun hebreo ta naní da Apolión tuhun griego. Ta quivi dá cúni cach<sup>i</sup> a da jándi<sup>hi</sup> saha tóco ndi<sup>hi</sup> ñaha. Ta da cán cúu da cómi cuéntá saha yáv<sup>i</sup>, ña co xinu nu ndi<sup>hi</sup> nuu cán.

<sup>12</sup> Sa ñayaha in tondohó cáhnu joo cáman<sup>i</sup> ivi chága ña quixi.

<sup>13</sup> Tá nandi<sup>hi</sup> já nativ<sup>i</sup> táto Ndióxi ña cáhñu cán inga trompeta ta já naxini joh<sup>o</sup> i cáhan in a ñaqueta tañu ndícom<sup>i</sup> ndíqui queta in in xoo t<sup>i</sup>to nu náa, ña jiu<sup>h</sup>un cuáán, ña cándichi nu iin Ndióxi cán. <sup>14</sup> Ta já ñacachi mé a cán já xih<sup>in</sup> mé táto Ndióxi cáhñu, ña ñéhe trompeta cán:

—Janí ndícom<sup>i</sup> táto ña ndíco yuhú yuta cáhnu naní Eufrates jan —ñacachi a.

<sup>15</sup> Tá nandi<sup>hi</sup> já naxini i najani ndícom<sup>i</sup> táto nasandico cán ña ná cahní na in táhn<sup>da</sup> nuú un<sup>i</sup> táhn<sup>da</sup> ñayivi ndúu ñuyív<sup>i</sup>. Jáchi sa ñaquee jini va na chuun ña caja na ña yóho. Ta sa xini na ndá hora ta ndá quivi ta ndá yoo ta ndá cuia caja na ña. <sup>16</sup> Ta naxini joh<sup>o</sup> i cáhan in a ndaja cúu na soldado cándój<sup>o</sup> cuáy<sup>i</sup> cuahan cán. Ta cúu ná ivi ciento millón soldado.

<sup>17</sup> Ta cúni ndicani i nu ndo ndaja ndáa cuáy<sup>i</sup> jana ná, rí naxini i cán. Naxini i

ña yóho tátuhun in sani joo co quiji toho i. Ta naxini i mé da cándójó cuayi cán naxijahvi da yicá ndicá da xihín in caa, ña cúu á color cuahá ñi xihín color ndihí ticayi xihín color cuáán ita. Ta ndaa jini cuayi tá quiahva ndaa jini león ta yuhu ri quéta ñuhu ita xihín ñihma xihín azufre. <sup>18</sup> Ta in táhnda nuú uni táhnda ñayivi naxihi na nacaja uni nuú tondóhó naquixi jatá ñuyivi yóho. Naxihi na xihín ñuhu cáyi ta xihín ñihma ta xihín azufre, ña naqueta yuhú cuayi. <sup>19</sup> Jachi yuhu mé cuayi cán xihín ndóho ri cúu nu ndacaan ndée ri. Tá quiahva ndaa coo quiahva já ndaa ndóho ri. Ta xihín mé yiquí jini coo cán cája quini ri xihín ñayivi.

<sup>20</sup> Tóco ndihi java ga ñayivi, na coo nandihí saha xihín tondóhó naquixi jata ñuyivi, na cán nacaja yii va na ña núu nasacaja na. Ta nacaja cáhnu yii va na ña quini. Ta coo najándacoo na cája cáhnu na yoco, ña nacavaha na xihín jjuhun cuáán ta xihín jjuhun cúxú ta xihín caa cuáán ta xihín yuu ta janda ña nacavaha na xihín yito viti. Ta mé yoco yóho a cuú candehé a ta ni coo tácu johó a ta ni a cuú caca nuu a. Joo nacaja cáhnu tá nacaja cáhnu na ña. <sup>21</sup> Ta ni coo najándacoo na ña sáhní na ndii. Ta ni coo najándacoo na ña tají cája na. Ta ni coo najándacoo na ña ndúu na xihín na coo cúu yíi ná á ñájihí na. Ta ni coo najándacoo na ña cája cuíhna na.

## 10

*Tá naxini Juan ña cáñee in libro loho ini ndáha inga táto Ndióxi*

<sup>1</sup> Anda já naxini i inga táto Ndióxi, ña in cuahá ndivaha ndée. Nanuu a indivi naquee a vaxi a tañu in vico ta cánúu in coo yánqui jini á. Ta yéhe nuu á tá quiahva yéhe candii. Ta sahá cúu á tátuhun ivi jihin cándaha xihín ñuhu. <sup>2</sup> Ta ini ndáha mé á naxini i cáñee in libro loho ña nativi tátuhun yivi joo nandindica ña. Ta nachinúu mé á saha cuaha nuú tañuhú ta nachinúu a saha íti a nuú ñuhu. <sup>3</sup> Ta nacayuhú cóhó a tátuhun tá ndáhyi león. Ta tá nacayuhú a já naxini johó i ña nacahan cóhó usa tasa tá nacana ña. <sup>4</sup> Tá nandihí nacahan ndihusa tasa cán já nanducú u

cahyi i ña nacachi a joo naxini johó i cáhan in a naquixi chí indivi ta já cáhí a já xihín i:

—A cáhyún ña nacachi ndihusa tasa nacana jan. Xini ñuhú coo jehé a —nacachi mé a cán xihín i.

<sup>5</sup> Anda já naxini i mé táto Ndióxi ña cánúu in sahá nuú tañuhú ta inga sahá nuú ñuhu cán, nandinehe a ndahá cuaha indivi. <sup>6</sup> Ta já nacahan mé á quivi Ndióxi ta já nasahan tuhun a jachi Ndióxi tácu a anda ama caa quivi, mé á nacavaha indivi xihín ñuyivi xihín tañuhú xihín tóco ndihi ñaha in nuu á. Ta já nacachi mé táto Ndióxi já:

—A cáyancá ga <sup>7</sup> jachi tá ná casahá tiví táto Ndióxi ña cáhusa cán trompeta já xinu coo nuú tóco ndihi ña nasacu ini Ndióxi coo jehé janda sanahá. Jachi sa naxi tuhun mé á xihín profeta cuénta mé á ña ná cahan na sahá ña yóho nuú ñayivi —cáhí táto Ndióxi.

<sup>8</sup> Anda jáví naxini johó i nacahan tucu mé táto Ndióxi indivi já nacachi a já xihín i:

—Cuahán quehe libro loho núna nuu cán. Ndi quehe a ndáha táto Ndióxi, mé a cánúu in saha nuú tañuhú ta inga sahá nuú ñuhu jan —nacachi a.

<sup>9</sup> Tá nasaa i nuú táto Ndióxi cán já naxica i nuú á ña ná quiahva libro loho cán nuú i. Ta já nanducú ñehe táto Ndióxi cán tuhun nuú i já nacachi a já xihín i:

—Yóho in libro loho joo xini ñuhú casún ña. Vatí mé a ndaa tá ná casún ña cacuu a tátuhun tá casún ñuñu jachi caviji ndivaha yuhun caja ña. Joo tá nandihí nduu a ña ova ini tisún —nacachi a xihín i.

<sup>10</sup> Tá nandihí já natiin i mé libro loho ndáha táto Ndióxi cán ta já nasaxi i ña. Ta nacaviji yuhú u xihín á tátuhun ñuñu. Joo tá sa nacocó i ña já nacahova ña ini tixi i.

<sup>11</sup> Anda já natahnda chuun nuú i já nacachi a já xihín i:

—Ndítahan nuun caxi tuhun tucún xihín ñayivi ña cáhan Ndióxi sahá cuahá ndivaha ñuu xihín cuahá ndivaha nación nuú cáhan na ndijáa tuhun. Ta xini ñuhú caxi tuhun ña nuú ndijáa na cómi cuénta sahá ñuyivi —nacachi a xihín i.

## 11

*Ivi na cúu testigo*

1 Tá nandihí já nasahan na in yító vara, dó chiquiahvá nuú i. Ta tá cúní coo ndoo já cúní coo mé vara cán. Ta já nacachi na já xihín i:

—Candichi ta chiquiahvún veñuhu cáhnu Ndióxi. Ta ndítahan chiquiahvún nu náa Ndióxi viti. Ta ndítahan cahvún ndaja cúu na cája cáhnu Ndióxi mé jan. 2 Joo coto a chíquiahvún ñundáhyi, ña cáva nuu ndícomí tito yéhe veñuhu cán. Jáchi sa nandíquiahva Ndióxi ña yóho nuú ñayivi tóho ña ná caja tá quiahva cúní mé ná xihín Jerusalén, ña cúu ñuu yí ñaha Ndióxi tixi ivi jico ivi yoo. 3 Ta já chindahá yehe ivi testigo, na candixi jahmá ndáhyí, ña ndíxi ñayivi tá cándií ini na. Ta cūhun na cahan na sahá yehe tixi in mil ivi ciento uní jico quivi —nacachi na.

4 Ta naxini i ivi yitó olivo xihín ivi nu sándójó íti, dó cúu yuhú nuu testigo ndíta nu Ndióxi, mé a sáhdá chuun nuú ñuyívi. 5 Ta ni in na a cúu caja ni in ñaha xihín ndíví testigo Ndióxi yóho jáchi cuu caja na ña ná cana ñúhu ita ini yúhu ná ta cuu chicaan ñúhu na já ná jándihí na sahá na ihvi na. Ta quiahva já quivi ndá na ná nducú caja xíxi xihín ná. 6 Ndíví mé testigo Ndióxi yóho íin ndée ná chicaji na indiví já ná a cúun javi nani cahan na cuénta Ndióxi nuú ñayivi. Ta íin ndée ná ndaja na ticuú ña ná nduu dó nji. Ta íin ndée ná chicaan na ndá cuehe cúní mé ná chicaan na jatá ñuyívi yóho. Ta núná nu ná caja na ña ndaja tañu cúní mé ná. 7 Joo tá sa nandihí nacahan ndíví testigo yóho xihín ñayivi janda jáví quixi in quití quini, rí queta tañu yávi, ña co xínu nu ndíhi nuu cán. Ta já caní táhan rí xihín ndíví na cán ta quee vaha rí xihín ná ta cahní rí na. 8 Ta já canduu yiquí cuñu ndíví na cán mahñú java ndaa cáyé ñuu Jerusalén nuú nasahní na Jesucristo, mé á cúu xitoho í. Ta mé ñuu Jerusalén yóho cúu á yuhú nuu ñuu Sodoma xihín nación Egipto sahá cuachi cuahá cája ñayivi ndúu cán. 9 Ta ñayivi ndúu ndijáá ñuu xihín ndijáá nación xihín na cahan tá nuú tuhun xihín na naquixi ndijáá chichi cuni na yiquí cuñu mé testigo Ndióxi yóho tixi uní quivi java. Ta a quiahva toho na ñamaní jánduxu na ndíví testigo Ndióxi yóho. 10 Ta ñayivi ndúu ñuyívi cají ndivaha ini na sahá ña naxihí ndíví testigo

Ndióxi yóho. Ta cávatá na janda quiahva jasá ñaha nu táhan johó na sahá ña naxihí ndíví testigo Ndióxi, na najándoho ndivaha ini ñayivi ñuyívi xihín ña nacahan na. 11 Joo tá sa nayaha uní quivi java chí jánditacu Ndióxi ndíví testigo cán já ná ndacoo tucu na. Ta tá ná cuni ñayivi ña yóho casahá quiji ninu na xihín ña yihví na. 12 Anda já cuni johó ndíví testigo cán in a cahan cóhó indiví. Ta já cachi a já xihín ná:

—Cuánda ndó chóho —cachi a já xihín ná.

Já ndaa na indiví tañu in vico nuú ndihí na ihvi na. 13 Ta mé hora já taan ndee ndivaha. Ta jándihí a in táhdá nuú uxu táhdá mé ñuu cáhnu cán ta já quivi usa mil ñayivi. Ta na coo naxihí cán chutú ndaa na xihín ña yihví na ta já casahá na caja cáhnu na Ndióxi, mé a íin indiví.

14 Sa nayaha va tondóhó cáhivi. Joo sa cátivi tondóhó cáhuni vaxi a.

#### *Tá nativí táto Ndióxi trompeta cáhusa*

15 Ta táto Ndióxi ña cáhusa cán nativí a inga trompeta. Ta tá nativí a do já naxini johó i cahan cóhó cuaha ná indiví. Já cáchi na já:

Ta viti nandindaa hora sáhdá Ndióxi, xitoho í xihín Jesucristo chuun.

Ta mé á quea nachindahá Ndióxi cacomí a cuénta sahá ñayivi.

Ta íin ndée a cahnda chuun nuú ñuyívi yóho anda ama cá quivi, nacachi cuaha ná mé indiví.

16 Ta ndíhoco comí na sacuaaha, na nacava tixivi nasanduu coo nu táyi vaha yati nu íin coo Ndióxi cán, nacaxítí na janda quiahva nacani ndaa taan na nu ñúhu ta nacaja cáhnu na Ndióxi. 17 Já nacachi na já xihín á:

Ndíquiahva nde ndixahvi nu ndóhó, Ndióxi, xitoho nde, mé a íin ndée caja tóco ndihí ñaha.

Janda tá camaní cava sahá saha ñuyívi nasahjin va mé ndó.

Ta sa já íin ndó viti ta quixi tucu ndó.

Ndáha mé ndó íin ndihí ndée viti sahá ña cán quea nacasahá ndo sáhdá ndo chuun nuú ñayivi.

18 Ta ñayivi ndúu níi cúu ñuyívi nacasahá na xójo ndivaha ini na.

Joo viti naxinu coo quivi caja xíxi ndó xihín na cán.

Ta viti naxinu coo hora caja vií ndó sahá na sa naxihi.

Ta sa naxinu coo hora chahvi ndó nuú na profeta, na cáhan cuéntá mé ndó.

Já naxinu coo hora chahvi ndó nuú na cúu cuéntá mé ndó, na cāja cáhnu mé ndó,

ta coo caja toho a á cúu ná na náhnu á cúu ná na válí.

Ta naxinu coo hora jándihi ndó sahá ñayivi quini, na cāja ña núu xihín ñuyíví yóho, cáhí na cán cāja cáhnu na Ndióxi.

<sup>19</sup> Tá nandihí já naxini i nanuna yéhe veñuhu Ndióxi, ña íin indiví. Ta cán tívi ndácaan sató arca ñaha Ndióxi. Ta já nacasáhá cána tasa. Ta naxini joho i jándá joho vaa cúu tácu cáhan na. Ta nacasáhá cána javi ta táan ndeé ndivaha ta cúun ndivaha ñíí.

## 12

*Naxini Juan ña ndúcú in coo quini caja xíxi rí xihín in ñáñáha*

<sup>1</sup> Tá nandihí já naxini i nayaha in ña xitúhún ndivaha indiví. Naqueta in ñáñáha, ña cáti ví jáhma ña cúu candii. Ta cándichi ña jatá yoo. Ta cánúu in tijivi jini ña, ña nacacutú xihín uxu ivi quimi. <sup>2</sup> Ta sa víxi ña cacu jahyi ña. Ta ndáhví ndáhyi ña jáchi ndóho ndivaha ini ña janda quiahva ná cacu jahyi ña. <sup>3</sup> Tá nandihí já nayaha inga ñaha cáhnu indiví. Naxini i in coo quini, rí cuahá. Ta íin usa jini ri xihín uxu ndíqui ri. Ta cánúu in tijivi jatá in in yiquí jini ri cán. <sup>4</sup> Ta mé coo quini cán nañuhu rí in táhndá nuú uni táhndá quimi ndúu indiví xihín ndóho ri. Ta já najaní ri mé quimi cán jatá ñuyíví. Ta mé coo quini cán nandaca ndichi rí yati nu íin ñáñáha cacu jahyi cán jáchi cúni rí caxí rí jahyi ña tá ná cacu a. <sup>5</sup> Tá nandihí já nacacu in ta jahyi ña, da cahnda ndeé chuun saha tóco ndihi ñayivi ñuyíví. Joo nasañehe Ndióxi a ninu nu íin coo mé á. <sup>6</sup> Ta naxinu ñáñáha cán cuahan ña chí xoo yucú íhí jáchi mé cán sa nasacu tiahva Ndióxi nuú cuu coo ña coto ñahá tixi in mil ivi ciento uni jico quivi.

<sup>7</sup> Tá nandihí já nacasáhá cúu tondóhó indiví. Ta naxini i Miguel xihín táto Ndióxi nacani táhan na xihín coo quini cán ta xihín

táto mé rí. <sup>8</sup> Joo coo nacuu quee vaha coo quini cán xihín táto Ndióxi ña cán quea coo nacuu canduu chága rí cán indiví. <sup>9</sup> Ña cán quea najácana Ndióxi mé rí cán janda ñuyíví yóho. Mé rí nasahiin rí janda sanahá ndivaha. Ta naní rí Satanás, mé tiñahá sacuaha, rí jándahvi tóco ndihi ñayivi ndúu ñuyíví. Mé rí xihín tóco ndihi táto rí ndíco jata ri najácana Ndióxi ri janda ñuyíví yóho.

<sup>10</sup> Tá nandihí já naxini joho i cáhan cóho in a indiví já cáhí a já:

—Sa naxinu coo quivi cacu ndaa ínima ñayivi jáchi cómi Ndióxi cuéntá saha ná xihín ndeé mé á. Ta sa naxinu coo quivi cahnda Jesucristo chuun, mé a nachindahá Ndióxi cacomí cuéntá sahá ñayivi. Saha ña cán quea sa nataxi Ndióxi tiñahá sacuaha nu íin mé á jáchi ñuú ta ndiví nasahiin rí nu mé á chicaan rí cuachi jata na cúu cuéntá Jesús. <sup>11</sup> Mé na cúu cuéntá Jesús naquee vaha na xihín ri sahá ña nacaja Jesús, mé a cúu tátuhun ndicachi loho tá naxita nii á ndica crúxu saha ná. Ta naquee vaha na xihín ri jáchi coo najándacoo na cáhan na ña ndaa sahá Jesús. Ta co yíhví toho na quivi na saha mé á. <sup>12</sup> Tóco ndihi ndó, na ndúu indiví xini ñuhú cajii ini ndó. Joo ndáhví nahá nacuu na ndúu ñuyíví xihín na ndúu ini tañuhú. Jáchi xójo ndivaha ini tiñahá sacuaha ta nanuu rí caja xíxi rí xihín ndó jáchi cánda vaha ini rí ña sa ja chá cuití cúni ndihi saha ri —nacachi a indiví.

<sup>13</sup> Tá nacanda ini mé coo quini cán ña najácana Ndióxi rí ñuyíví já nacasáhá ri ndicuítá ñee rí ñáñáha, ña nacacu jahyi cán.

<sup>14</sup> Joo nañehe ña ivi ndixi náhnu ndivaha, ña cúu tátuhun ndixi tíyaha. Saha ña cán quea nandachí xíca ña nu mé coo quini cán cuahan ña yucú íhí nuú nasahiin ña. Ta cán coto na ña tixi uni cuía java.

<sup>15</sup> Tá nandihí já nacaja mé coo quini cán ña ná queta cuahá ndivaha ticuítí yúhu ri. Ta já nacavaha rí in yuta jáchi cúni rí jatañu rí mé ñáñáha cán.

<sup>16</sup> Joo nachindee ñundáhyi ñáñáha cán jáchi nandata ta naxihi ndihi a ticuítí nacana yúhu mé rí cán.

<sup>17</sup> Ta xihín ña yóho ví ga ví naxojo ini coo quini cán xihín ñáñáha. Saha ña cán quea naquee rí cuahan rí cani táhan rí xihín java ga táhan

na naquixi chichi mé ñá. Mé na yóho cúu ná na cája ña sáhdá tuhun Ndióxi ta co jándacoo na cája na ña ndaa ña najánaha Jesucristo nu ná.

## 13

### *Tá naxini Juan ivi quití quini*

<sup>1</sup> Tá cándichi i nuú ñutí yuhú tañuhú já naxini i naqueta in quití quini tañu tañuhú cán. Ta nasahin usa yiquí jíní rí xihín uxu ndíqui rí. Ta cánúu in tiyivi jatá in in ndíqui rí. Ta ndaa tuhun ña cáhahá xihin Ndióxi nuú in in yiquí jíní rí. <sup>2</sup> Mé quití quini naxini i yóho, cáa rí tá quiahva cáa ndicaha. Ta saha rí ndaa ña tá quiahva ndaa saha oso. Ta yuhu rí cúu á tátuhun yuhu león. Ta mé coo quini cán nasahan rí ndée rí nu mé quití quini, rí naqueta ini tañuhú yóho ña ná cuu cacomí rí cuéntá sahá ña cómí mé coo quini cán cuéntá saha. Ta cúu cája rí ña cúu cája mé coo quini. <sup>3</sup> Ta in táhan ndihusa yiquí jíní mé quití quini cán nandicuehe cáhvi ña. Joo tá nandihí já nandivaha ña. Sahá ña cán quea ndaja táhan ñayivi ndúu ñuyiví nacatontó ndivaha na. Ta já nacasáhá na ndico na jata mé quití quini cán. <sup>4</sup> Ta nacaja cáhnu ñayivi coo quini cán jáchi nasahan rí ndée rí nuú quití quini cán. Ta quiahva já nacaja cáhnu na mé quití quini cán já cáhí na já:

—Coo ga inga rí cáhnu chága nu quití quini yóho. Ta ni in rí a cúu quihvi cani táhan xihin rí —cáhí na cája cáhnu na mé quití quini cán.

<sup>5</sup> Ta mé quití quini cán nañehe rí ñamaní ña ná cahán rí tuhun quini ndivaha, ña jándihihvi rí Ndióxi. Ta nañehe rí ñamaní cahnda rí chuun tixi ivi jico ivi yoo. <sup>6</sup> Sahá ña cán quea nacasáhá cahán quini rí saha Ndióxi ta jándihihvi rí mé á xihín ña núu cahán rí. Ta cahán núu rí saha mé nu íin Ndióxi cán xihín saha tóco ndihi na ndúu indiví. <sup>7</sup> Ta nañehe rí ñamaní cani táhan rí xihín na cúu cuéntá Ndióxi janda quiahva quee vaha rí xihin ná. Ta nañehe rí ñamaní cahnda rí chuun sahá ndaja táhan ñayivi naquixi ndijáá chichi xihín na cahán tá nuú tuhun xihín na ndúu ndijáá ñuu xihín ndijáá nación. <sup>8</sup> Tóco ndihi ñayivi ñuyiví caha cáhnu na quití quini cán jáchi janda tá

cámaní cava sahá saha ñuyiví coo nacahyi toho quivi ná nu libro nu ndaa quivi tóco ndihi na catacu anda ama cáa quivi. Mé libro yóho íin a nu Jesús, mé á cúu tátuhun ndicachi loho, rí naxihí ndica crúxu.

<sup>9</sup> Cuni johó vaha ndó, na vaha johó. <sup>10</sup> Ndá na ná chicao in na vecaa, cuhun rí mé va na vecaa. Ta ndá na ná cahní inga na xihin yuchú cáni, xihin yuchú cáni quivi rí mé va na. Sahá ña cán quea xíní ñuhú quiahva ndee ini na cúu cuéntá Ndióxi ta xíní ñuhú candeé cáhnu ini na mé á.

<sup>11</sup> Tá nandihí já naxini i inga tucu quití quini, rí naqueta nuú ñundáhyi. Ta nasahin ivi ndíqui rí ta ndaa ña tá quiahva ndaa ndíqui ndicachi. Joo cahán rí tátuhun cahán in coo quini. <sup>12</sup> Ta nacaja chuun rí tóco ndihi ndee mé quití quini nu cuítí cán nu íin mé rí. Nacaja rí ña ná caha cáhnu tóco ndihi ñayivi ndúu ñuyiví mé rí naqueta nu cuítí cán. Jáchi nandicuehe cáhvi jini rí nu cuítí cán joo nandivaha rí. <sup>13</sup> Mé inga quití quini cáhivi cán nacaja cuhá ndivaha rí ñaha xituhún. Nacaja rí ña ná quixi ñuhu cáyi chí indiví ta naxinu a nacuyu a ñuyiví nu tóco ndihi ñayivi. <sup>14</sup> Ta najándahvi rí ñayivi ndúu ñuyiví xihin tóco ndihi ña xituhún, ña nañehe rí ñamaní caha rí yóho nu mé rí nu cuítí cán. Ta nasahnda mé inga rí cán chuun nuú ñayivi ñuyiví ña ná cavaha na in tiniñu yúu quití quini nu cuítí cán. Mé rí nandicuehe quini ndivaha rí xihin yuchú cáni joo nandivaha rí. <sup>15</sup> Ta mé rí cáhivi cán nañehe rí ñamaní ña jánditacu rí tiniñu yúu mé rí nu cuítí cán já ná cuu cahán rí. Ta já ná cuu cahnda rí chuun ña ná cahní rí ñayivi, na coo cúni caha cáhnu mé rí quini cán. <sup>16</sup> Ta mé rí cáhivi cán nacaja rí ña ná quihvi marca ndahá cuhá ñayivi á taan na. Ta coo caha toho a á cúu ná na valí á na náhnu, á cúu ná na cuicá á na ndahvi. Ta ni coo caha toho a á cúu ná na xica núná, á cúu ná na cómí xitoho cuéntá saha. Nu tóco ndihi ñayivi naquihvi marca nacaja mé rí cán. <sup>17</sup> Ta ni in ñayivi a cuú cueen na ñaha ta ni a cuú jico na ñaha tá coo nanani mé marca cán na. Ta tá coo cándaa quivi mé quití quini, rí nu cuítí cán taan na á tá coo número mé rí cándaa taan na já quea a cuú cueen na ñaha jáchi número yóho náha ndaja naní mé rí nu cuítí cán.



18 Xihín ña yóho cuu candaa ini ndó ndá na cúu na ndíchí jini. Ndá ndó, na cándaa ini xíní ñuhú jitá ndo cuéntá xihín numero ña cúu quivi mé rí nu cuítí cán jáchi cúu á tátuhun quivi ñayivi. Ta numero yóho cúu á ñnu ciento uní jico ñnu.

## 14

*Tá xíta in ciento ivi jico comi mil ñayivi cája cáhnu na Ndióxi*

1 Tá nandihí já naxini i Jesús, mé á cúu tátuhun ndicachi loho cándichi a jata yúcu naní Sión. Ta xihín mé á ndíta in ciento ivi jico comi mil ñayivi, na ndaa quivi Jesús taan, mé á cúu tátuhun ndicachi loho cán. Ta quiahva já ndaa quivi Ndióxi, tátá a taan na. 2 Ta naxini johó i in a cáhan chí indiví. Ta tá cáhan mé á cán cúu á tátuhun tá níhi cúyu ticuítí tañu tóto. Ta níhi a tátuhun tasa tá cána. Ta tácu a tá quiahva tácu nu jácaha cuahá ndivaha na arpa. 3 Ta naxini johó i ña saá xíta mé in ciento ivi jico comi mil ñayivi nu ín coo Ndióxi cán xihín nuú comi mé ña tácu cán xihín nuú na sacuahá cán. Mé na xíta cán cuítí va cúu na cuu catiahva cata na ña jáchi cúu ná na naçaxi Ndióxi jácacu a tañu ñayivi ndúu ñuyíví. 4 Ta na yóho cúu ná na vií, na coó naçaja quini mé jáchi coó nasanduu na xihín najihí. Cúu ná na nasandico níi tiempo jata Jesús, mé á cúu tátuhun ndicachi loho. Cúu ná na naçaxi Ndióxi jácacu a nu cuítí ña ná joco a na nu mé á xihín nu Jesús, mé á cúu tátuhun ndicachi loho. 5 Ta ni in talaá ña tuhún coó naçahan na. Ta ni in na coó naçuu ñeñe ín chícaan cuachi jata ná.

*Tá cáhan uní tátó Ndióxi tuhun vaha saha Jesucristo nuú ñayivi ndúu ñuyíví*

6 Tá nandihí já naxini i inga tátó Ndióxi ndáchí a mahñú ndaa indiví. Ta ñeñe a tuhun vaha sahá Jesucristo ña ín anda ama cáa quivi çaxi tuhun a ña nuú ñayivi ndúu ñuyíví, mé na naquixi ndijáá chíchi xihín na cáhan tá nuú tuhun xihín na ndúu ndijáá ñuu xihín ndijáá nación. 7 Ta já cáyuhú mé tátó Ndióxi cán já cáhí a já:

—Xíní ñuhú cayihví ndó Ndióxi ta xíní ñuhú caja cáhnu ndó mé á jáchi sa naxinu coo quivi caja vií mé á sahá ñayivi. Xíní ñuhú caja cáhnu ndó mé á jáchi mé á

quéa naçavaha indiví xihín ñuyíví ta mé á quéa naçavaha tañuhú xihín ndijáá nu cána ticuítí —cáhí tátó Ndióxi cán.

8 Tá nandihí já naxini i inga tátó Ndióxi ta já naçachi a já:

—Ay, ay, sa nandihí va sahá ñuu cáhnu naní Babilonia xihín sahá ñayivi nasanduu jan. Ta na jan naçacuu na na najánaħa ichí quini nuú ñayivi ndúu ñuyíví já ná caja na tá nuú ña núu. Joo viti sa nandicava va mé Babilonia —cáhí tátó Ndióxi, ña cáhivi cán.

9 Tá nandihí já naxini i naçqueta inga tátó Ndióxi, ña cáhuni. Ta naçasáhá cáyuhú cóhó a já cáhí a já:

—Ndá na ná caja cáhnu quití quini xihín tiniñu yúu ri ta sahan na ñamaní ña ná nani marca mé rí cán taan na á ndáħa na 10 já quéa ndoho ndivaha ini na caja Ndióxi jáchi xójo ndivaha ini mé á xihín ñayivi quini. Jácana Ndióxi na nu cándaha ñuhu cáyi xihín azufre ta candehé tóco ndihí tátó Ndióxi ta candehé Jesús, mé á cúu tátuhun ndicachi loho cán ña ndóho na. 11 Ta cána ñihma ini nu ñuhu mé na ndóho ini cán anda ama cáa quivi. Ta ni ñuu ni ndiví co ndiquehe ndée ná nu ndóho ini na jáchi naçaja cáhnu na quití quini cán xihín tiniñu yúu ri ta sahan na ñamaní ña nanani marca quivi rí cán yiquí cuñu na. 12 Xíní ñuhú quiahva ndeé ini na cúu cuéntá Ndióxi, mé na cája tóco ndihí ña sahdá Ndióxi ta co jándacoo na ña cája cáhnu na Jesús —cáhí tátó Ndióxi cáhuni.

13 Tá nandihí já naxini johó i naquixi in a cáhan chí indiví já naçachi a já xihín i:

—Cahyún ña ná cahan i xuhun yóho: “Viti ta chí nuu cajii ini na naxihí, na cándeé ini Jesús, xitoho na” —cáhí a.

Ta já cáhí ínima yii Ndióxi já:

—Mé a ndaa cajii ini na cán jáchi ndiquehe ndée ná sahá ña naçaja chúun vaha na cuéntá mí i. Ta ña vaha naçaja na cán coo a níi tiempo xihín ná —cáhí ínima yii Ndióxi.

*Tá jándoho Ndióxi ini ñayivi*

14 Tá nandihí já nasandehé e ta já naxini i in viço yaa. Ta cánuu in da cáa tá quiahva cáa in ñayivi jata mé viço. Ta cánuu in tiyivi jiuħun cuáan yiquí jíní da ta cáñee in machiti tojo jeen ndáħa dá. 15 Tá nandihí já

naqueta inga tátō Ndióxi ini veñuhu Ndióxi cán ta já cáyuhú cóhó a já cáchí a já xihín mé da ín coo jatá vico cán:

—Xíní ñúhú casáhún jáqueún ña ín ñuyíví xihín machiti tojo ñéhún jan jáchi sa naxinu coo va hora jáqueún ña ín jatá ñuyíví jáchi sa nachichi va viti —nacachi a.

<sup>16</sup> Anda já naxini i nacasáhá mé da nasanúu jatá vico cán jáquihvi da machiti tojo da jatá ñuyíví ta já najáquee da ñaha jatá ñundáhyi.

<sup>17</sup> Tá nandihí já naxini i naqueta inga tucu tátō Ndióxi ini veñuhu ín indiví cán ta quiahva já cáñee inga machiti tojo jeen ndahá a. <sup>18</sup> Ta nu ín nu náa mé veñuhu cán naqueta inga tátō Ndióxi, mé a cómí cuéntá saha ñúhu ita ña cáyi. Ta já nacahan cóhó a xihín mé tátō Ndióxi nu cuítí cán, ña cáñee machiti tojo jeen ndáhá cán já nacachi a já:

—Xíní ñúhú jáquihvún machiti tojo jeen cáñee ndáhun jan ta casáhá cahndún uva cúun nu dó uva ndúu ñuyíví jáchi sa nachichi uva nu do —nacachi a.

<sup>19</sup> Anda já jáyaha tátō Ndióxi cán machiti tojo nuú ñundáhyi ta já nasahnda ndihí a uva nu tó uva cán ta nataán a uva cán ini in pila cáhnu ña ná cuhní ri. Ta ña yóho náha ndá quiahva quini ndoho ini ñayivi caja Ndióxi jáchi xójo ndivaha ini a xihín ná sahá cuachi cája na. <sup>20</sup> Ta tá nasuhní uva cán ini mé pila cáhnu yuhú ñuu cán já nacana nij, dó cúu tátuhun yuta cúná janda quiahva cani ndaa dó yati yuhú in cuáyi. Ta tá quiahva cáni xíca dó cuahan do cúu á tátuhun uní ciento kilómetro.

## 15

*Tá xínu coo tátō Ndióxi xihín usa chága tondóhó quixi jatá ñuyíví*

<sup>1</sup> Tá nandihí já naxini i inga tucu ña cáhnu chí indiví ta chí nacatontó i. Ta ña naxini i cúu usa tátō Ndióxi ta in in ña yóho ñéhe a chága tondóhó quixi jatá ñuyíví ña ná jándihí a ña xójo ini Ndióxi.

<sup>2</sup> Ta naxini i in ñaha ta náha tátuhun in tañuhú ta tá quiahva ín nuú yutátá quiahva já ín nuu do joo cúu dó dó cáva táhan xihín ñúhu cáyi. Ta yati jín mé tañuhú náha tátuhun yutátá cán ndíta ñayivi, na nacandee nasahnu nu tóco ndihí ña núu sahá ña coo nacaja cáhnu na quití

quini xihín tiniñu yúu ri. Ta ni coo naquehe na túni ña cúu numero mé rí quini cán. Ta mé na ndíta cán cáñee arpa ndáha na, dó nasahan Ndióxi nu ná. <sup>3</sup> Ta xíta na ña naxita Moisés, mé da nacaja chúun cuéntá Ndióxi. Ta xíta na ña naxita Jesús, mé a cúu tátuhun ndicachi loho cán ta já cáchí na já:

Cátontó nde tá xíní nde tóco ndihí ña nacavaha mé ndó, Ndióxi, xitoho nde,

jáchi ín ndée ndó caja ndó tóco ndihí ñaha. Íchi cuéntá mé ndó cúu á íchi ndacu ta cúu á íchi cuéntá ña ndaa.

Ta mé ndó cúu ndó ña cómí cuéntá saha ndaja táhan nación ndúu ñuyíví yóho.

<sup>4</sup> Tóco ndihí ñayivi yíhvi na ndohó, mé a cúu xitoho nde ta cáhan na ndaja cáhnu cúu mé ndó.

Jáchi in túhún mé ndó cúu ndó Ndióxi yii. Ta tóco ndihí ñayivi ndúu ndijáá nación xinu na caja cáhnu na mé ndó, jáchi náha ndá quiahva cája ndó ña ndaa, cáchí na xíta na.

<sup>5</sup> Ta tá sa nayaha ña yóho já nasandehé ta naxini i nanuna veñuhu indiví, ña nacavaha na xihín ñíi quití. Ta nasañuhu ley Moisés cán. <sup>6</sup> Ta ini mé veñuhu indiví naqueta ndíhusa tátō Ndióxi, mé a ñéhe usa nuú tondóhó quixi jatá ñuyíví. Ta ndíxi tátō Ndióxi cán jahmá vií, ña lino, ña ndató ndivaha yéhe. Ta ndacaan in cinturón ña jjuhun cuáan tóco á ta cáni a janda yati yicá ndíca a. <sup>7</sup> Ta in táhan ndícomí mé ña tácu cán nasahan in in cóhó, ña jjuhun cuáan nuú in in táhan ndíhusa tátō Ndióxi cán. Ta ini in in cóhó cán ñúhu ndaja táhan tondóhó ña vaxi jatá ñayivi ndúu ñuyíví caja Ndióxi, mé a tácu anda ama cáa quivi. <sup>8</sup> Ta nachutú ndaa veñuhu cán xihín ñihma, ña náha ndá quiahva cáhnu cúu Ndióxi xihín ndá quiahva cáhnu cúu ndée mé á. Ta ni in na coo nañehé ñamaní quihvi ini veñuhu cán janda quiahva naxinu ndíhusa tondóhó, ña ñéhe ndíhusa tátō Ndióxi cán.

## 16

*Usa coho ña ñúhu usa tondóhó*

<sup>1</sup> Tá nandihí já naxini johó i nacahan cóhó in a tañu veñuhu indiví cán. Ta já cáchí a xihín ndíhusa tátō Ndióxi cán já:

—Cuáhán ndó cuyu ndó ndíhusa coho jan jata ñuyívi. In in a cán cúú á in tondóhó chindahá Ndióxi jata ñuyívi ta ndoho ndivaha ini ñayivi xihín á —cáchi a.

<sup>2</sup> Anda já in tátō Ndióxi, mé a nu cuítí nasahan nacuyu a ña ñúhu ini coho ñéhe a cán jata ñuyívi. Ta já naxinu cuehe táhyi, ña ihvi ndivaha yiquí cuñu ñayivi, na ñaquehe marca quití quini cán, mé na ñacaja cáhnu tinñu yúu ri.

<sup>3</sup> Tá nandihí já inga tátō Ndióxi ña cáhivi cán nacuyu a ña ñúhu ini coho ñéhe a jata tañuhú. Ta tóco ndihí dó nanduu dó nij tátuhun nij ndii. Ta tóco ndihí ña tácu ini tañuhú cán naxihí ndihí a.

<sup>4</sup> Ta tá nandihí já nacuyu tátō Ndióxi ña cáhuni cán ña ñúhu ini coho ñéhe a jata ndijáa yuta xihín ndijáa nu cána ticuú ta nanduu dó nij. <sup>5</sup> Tá nandihí já naxini johó i cáhan in tátō Ndióxi, mé a cómi cuénta sahá ticuú cán já cáchi a já:

—Tátá Ndióxi, mé ndó cája ndó ña ndaa jáchi ñacaja vií ndó sahá ñayivi jan. Yii ndivaha cúú ndó ta íin ndó viti ta janda saha nasahin ndó. <sup>6</sup> Najándoho ndó ini ñayivi jan jáchi nasata na nij na cúú cuénta mé ndó xihín nij na profeta tá nasahni ñahá na. Joo viti ñacaja ndó xihín ná ña ná coho na nij já ná ndoho ini na. Ta quiahva já cáni a coo a —ñacachi tátō Ndióxi cán.

<sup>7</sup> Tá nandihí já naxini johó i in a cáhan nu náa Ndióxi cán já cáchi a já:

—Tátá Ndióxi, mé ndó cúú ndó xitoho nde ta íin ndée ndó caja ndó tóco ndihí ñaha. Ta ñacaja ndó ña ndaa tá ñacaja vií ndó sahá ñayivi —cáchi a.

<sup>8</sup> Tá nandihí já naxini i inga tátō Ndióxi ña cácomi cán ta nacuyu a ña ñúhu ini coho ñéhe a jata candii. Ta xihín ña yóho ñañehé candii cán ndée á chican ñúhu a ñayivi xihín ñúhu cáyi. <sup>9</sup> Ta já ñacayí quini ndivaha tóco ndihí ñayivi. Joo coó naxeen na ndicó coo ini na ta ni coó ñacaja cáhnu na Ndióxi. Ña ñacaja na quéa ñacasahá na cánahá ndivaha na xihín Ndióxi, mé a íin ndée nu tóco ndihí tondóhó quíxi jata ñuyívi yóho.

<sup>10</sup> Tá nandihí já naxini i inga tátō Ndióxi, ña cáhuhun cán ta nacuyu a ña ñúhu ini coho ñéhe a jata táyi nu íin coo quití quini

cán. Ta já naxini i ñacanaá yávi mé nu ndúu na sáhdá ri chuun nu cán. Ta já ñacasahá mé na cán sáxi yihí na yáa ná jáchi ñacasahá ndóho ndivaha ini na. <sup>11</sup> Joo coó najándacoo na ña núu cája na. Ta sahá ña ñacahihvi ndivaha yiquí cuñu na cán xihín cuehe ndóho na já ñacanahá ndivaha na xihín Ndióxi, mé a íin indiví.

<sup>12</sup> Tá nandihí já naxini i inga tátō Ndióxi, ña cáhñu cán ta nacuyu a ña ñúhu ini coho ñéhe a jata in yuta cáhnu naní Eufrates. Ta já ñahíchi ndihí ticuú nasañuhu ini yuta cáhnu cán ta já ñanuná nuú yaha na cúú rey, na ñaquixi chí xoo nu cána candii.

<sup>13</sup> Tá nandihí já naxini i ñaqueta uní ínima quini. In rí ñaqueta yúhu coo quini ta inga rí ñaqueta yúhu da cúú profeta túhún cán. Ta mé ínima quini cán ndaa tá quiahva ndaa láhva cúhdó. <sup>14</sup> Ta rí cán cúú ínima rí quini, rí ñacaja ña xitúhún nuú ñayivi. Ta cúú rí rí queta cuahan jataca ndaja táhan rey sáhdá chuun nuú ñayivi ndúu ñuyívi já ná caní táhan na xihín Ndióxi. Jáchi sa ñacayati quívi ñaha ndá quiahva cáhnu cúú Ndióxi jáchi mé á quéa íin ndée cája tóco ndihí ñaha. <sup>15</sup> Anda já ñacachi Ndióxi já: “Cuénta coo ndó jáchi tá quiahva jonáa xinu da cuíhna quiahva já jonáa xinu i nu ndó. Íin saha cáji ini ndá na sa ndáti tiahva saa i jáchi cúú ná tátuhun na nasandíxi tiahva jáhma. Já quéa ná a cácan nuú ná tá ndaa lahla na nuú ñayivi”, cáchi a. <sup>16</sup> Ta rí quini cán najátaca rí tóco ndihí rey sáhdá chuun nuú ñayivi in nuú naní Armagedón tuhun hebreo.

<sup>17</sup> Tá nandihí já inga tátō Ndióxi ña cáhusa cán nacuyu a ña ñúhu ini coho ñéhe a nu táchi. Ta já naxini johó i cáhan in a ini veñuhu indiví nu íin coo Ndióxi nu sácoo rey cán. Ta cáhan cóhó á já cáchi a já:

—Sa ñayaha tóco ndihí ña ndítahan coo —ñacachi a.

<sup>18</sup> Tá nandihí já naxini i ñacasahá cána tasa. Ta naxini johó i jandá vaá johó cúu tácu cáhan na. Ta naxini johó i jandá johó cána javi. Ta ñacasahá quíji ñinu ñundáhyi jáchi ñacasahá táan ndeé ndivaha. Ta mé ndítáan yóho nasacuu a ña ndeé chága nu tóco ndihí ña táan jáchi janda quívi

nasacu Ndióxi ñayivi ñuyíví coó naquixi inga nditáan ndeé tátuhun ña yóho. <sup>19</sup> Ta mé ñuu cáhnu ndivaha cán nandata uní ña. Ta ndijáa ga ñuu náhnu ndúu ñuyíví nacuyu ndihi a. Ta nandicuhun ini Ndióxi sahá ñuu cáhnu naní Babilonia cán ta najándoho mé á ini na ndúu cán jáchi xójo ndivaha ini a xihín ná. Ta ña ndóho na cúu á tátuhun xíhi na vino cuéntá tondóho. <sup>20</sup> Ta tóco ndihi isla ñúhu ini tañuhú xihín ndijáa java ga yúcu ndúu jata ñundáhyi nandihí sahá. <sup>21</sup> Ta naxini i nacuun ñíí náhnu ña vee ndivaha tátuhun ivi jico kilo in in a. Ta janda indivi naquee a nacuyu a jata ñayivi ndúu ñuyíví. Ta nacasáha na canahá na xihín Ndióxi sahá ña najácuyu a ñíí yóho jata ná. Jáchi mé a ndaa ña yóho nasacuu a in tondóho cáhnu ndivaha naquixi nu ná nacaja Ndióxi.

## 17

### *Tá jándihí Ndióxi saha ñá xíca jii*

<sup>1</sup> In táhan ndíhusa tátó Ndióxi ña cáñee in táhan usa cohó ndáha cán naxinu a nuú i já nacachi a já xihín i:

—Naha quíi yóho jáchi cúni jánaha i nuun ndá quiahva ndoho ini ñá xíca jii, ñá cáhnu, ñá íin coo nuú cuahá ticuí. <sup>2</sup> Tóco ndihi na cúu rey ndúu ñuyíví yóho naquiji na xihín ñá cán. Najáxini ñá tóco ndihi ñayivi ñuyíví xihín ña núu nacaja ñá tá naquiji ñá xihín na coo cúu yíi ña —nacachi tátó Ndióxi cán xihín i.

<sup>3</sup> Anda já nacaja ínima yii Ndióxi xihín i ña ndáca tátó Ndióxi yehe nasahan i yucú íchí xihín á. Ta cán naxini i in ñáñáha cánúu jata in quití quini, rí cuahá. Ta níí cúu rí nacacutú xihín tuhun quini ña canahá xihín Ndióxi. Ta naxini i íin usa yiquí jíní rí xihín uxu ndíqui rí. <sup>4</sup> Ta mé ñá cánúu jata rí cán ndíxi ñá jáhma ndíhi ticayí, ña nacava táhan xihín ña cuahá. Ta nacacutú ña xihín jiuahun cuáan xihín yuu yáhví ndivaha xihín perla. Ta naxini i cáñee in cohó jiuahun cuáan ndáha ña. Ta nachutú ndaa cohó cán xihín ña núu ta xihín ña tiquíni nacaja ñá xihín dataa. <sup>5</sup> Ta ndáa in tuhun taan ñá, ña coo cándaa ini ñayivi. Ta já cúni cachi mé tuhun cán: “Ñuu Babilonia cúu ñuu cáhnu ta cúu á tátuhun náná tóco ndihi najihí xíca jii. Ta cúu á

tátuhun náná ndaja táhan ga ña núu ndúu ñuyíví yóho.” <sup>6</sup> Tá nandihí já náha ña naxini ndivaha mé ñáñáha jáchi naxihí ñá níí na cúu cuéntá Ndióxi, na naxihí sahá ña coo najándacoo na cáhan na saha Jesús. Ta tá naxini i ña yóho já nacatóntó ndivaha i. <sup>7</sup> Ta já nacachi tátó Ndióxi cán já xihín i:

—Ndá cuéntá quéa catóntó nahún. Xíni ñúhú cuni johó vahún ña cahan i xuhun jáchi ndicani i nuun ndía cúni cachi ña íin jehé saha ñáñáha yóho. Ta jári ndicani i nuun ndía cúni cachi quití quini, mé rí cánúu ñá, rí íin usa yiquí jíní xihín uxu ndíqui cán. <sup>8</sup> Mé quití quini naxinún yóho nasatacu rí sanahá joo viti coo tácu ga rí. Joo vaxi quivi ndindita rí ta queta rí tañu yávi, ña coo xínu nu ndíhi nuu cán. Ta tá nandihí já cuhun rí ndihi saha rí chí uun. Ta catóntó ndivaha tóco ndíhi ñayivi ndúu ñuyíví, na coo nacahyi quivi janda tá camaní cava sahá saha ñuyíví nu libro nu ndáa quivi tóco ndíhi na catacu anda ama caa quivi. Catóntó ndivaha na tá ná cuni na mé quití quini yóho, rí nasahin sanahá ta coo tácu ga rí viti joo nditacu tucu rí nu ná.

<sup>9</sup> “Ta ndá ndó, na ndíhí jini, cuu candaa ini ndó ña yóho: Ndíhusa yiquí jíní quití quini cán cúu á yuhú nuú usa yúcu nu íin coo mé ñáñáha xíca jii cán. <sup>10</sup> Ta jári cúu á yuhú nuú usa rey. Ta uahun táhan rey yóho sa nandihí va saha. Ta inga táhan rey yóho sáhdá da chuun nuú ñayivi viti ñúhú. Ta inga ga rey ña cáhusa cán camaní xínu coo. Joo tá ná xínu coo da yóho já a coo nahá toho da cahnda da chuun nuú ñayivi. <sup>11</sup> Ta quití quini, rí nasatacu sanahá ta viti sa coo ga rí, rí cán cúu rí yuhú nuu rey, da cáhuna cán. Vatí cúu dá táhan java ndíhusa rey cán joo tá nandihí cahnda da chuun cuhun da ndíhi saha dá chí uun.

<sup>12</sup> “Ta ndíhuxu ndíqui naxinún yóho cúu á yuhú nuú uxu rey, mé na camaní casahá cahnda chuun nuú ñayivi ndúu ñuyíví. Joo in tálaá hora ñehe táhvi na cahnda na chuun xihín mé quití quini cán nuú ñayivi tátuhun rey. <sup>13</sup> Ta ndíhuxu rey yóho jándique táhan na tuhun na ña ná quiahva na ndée ná nu mé quití quini já ná cahnda rí chuun. <sup>14</sup> Ta caní táhan ndíhusa na cán xihín Jesús, mé a cúu tátuhun ndicachi loho

cán. Joo quee vaha Jesús xihín ná jáchi cúu á xitoho na náhnu ndúu ñuyívi yóho ta cúu á rey nuú ndaja táhan rey. Ta xoo Jesús cán canduu na ñacana Ndióxi, mé na ñacaxi a cacomí a cuénta saha. Cúu ná na coo najándacoo ña cándéé ini na mé á —ñacachi tátō Ndióxi xihín i.

<sup>15</sup> Tá nandihí já ñacachi tucu tátō Ndióxi cán já xihín i:

—Ticuií, dó ñaxinún nu íin coo ñá xíca jii ñan cúu dó yuhú nuu ndijáá ñuu xihín ndijáá nacióñ xihín ndijáá ñayivi, na cáhan tá nuú tuhun. <sup>16</sup> Ta ndíhuxu ndíqui ñaxinún nuú quití quini ñan cúu á yuhú nuu mé uxu rey, na candají ñá xíca jii ñan. Ta jándacoo na ña ta já caca lahla ñá. Ta caxí ndáá na yiquí cuñu ñá. Ta chicaoñ ñúhu ná ña xihín ñúhu cáyi. <sup>17</sup> Jáchi jáxinu Ndióxi ini na cán ña ná cajana ña cuni mé á. Ta jándique táhan na cán tuhun na ña ná ndiquiahva na chuun ndójo na nu mé quití quini cán ña ná cacuu rí tátuhun rey janda quiahva ná xinu coo nuú ña ñacachi Ndióxi coo. <sup>18</sup> Ta ñáñáha ñaxinún cán cúu ñá yuhú nuu ñuu cáhnu cán ña sáhdá chuun nuú ndaja táhan na cúu rey —cáchi tátō Ndióxi cán.

## 18

### *Tá jándihí Ndióxi sahá ñuu Babilonia*

<sup>1</sup> Tá sa ñayaha tóco ndihí ña yóho já ñaxini i inga tátō Ndióxi, ña ndójo chuun cáhnu ta ñanuu a chí indiví. Ta chí ñandiyihvi ndaa jatá ñuyívi xihín quiahva yehe mé tátō Ndióxi cán. <sup>2</sup> Tá já ñacasáhá cáyuhú cóhó a já cáchi a já:

—Ay, ay, sa nandihí va sahá ñuu cáhnu Babilonia cán ta ñanduu a tátuhun cavá tiñáhá. Cúu á tátuhun nuú ñandicutú ndaa ínimá quini ñúhu rí. Ta ñanduu a tátuhun in choho nu ñúhu tá nuú laa quini, rí cándají ñayivi. <sup>3</sup> Nandihí sahá ñuu Babilonia yóho, mé a cúu tátuhun in ñáñáha xíca jii. Jáchi najáxiní ñá ndaja táhan ñayivi ndúu ñuyívi ta najácahan ñá na ña ná caja na tá nuú ña núu ña xíca ini na caja na. Ta mé na ñuu Babilonia ñan ñasahan na ñamaní ña ná xinu coo ndaja táhan da náhnu sáhdá chuun nuú nacióñ ña ná xinu da ñuu Babilonia ñan cuju da xihín ñá xíca jii ñan. Ta na cája ndahvi ndicuícá na xihín tá nuú ña

núu caja ñá jáchi sátá johó ñá ña cuícá ña —cáchi tátō Ndióxi cán.

<sup>4</sup> Tá nandihí já ñaxini johó i inga cáhan chí indiví ta já cáchi a já:

—Ndóhó, na cúu cuénta mí i, cuáqueta ndó jatá ñuu ñan já ná a cája ndó cuachi cája na ñuu ñan. Ta já ná a xinu coo tondóhó vaxi nuú na ñuu ñan jatá ndo. <sup>5</sup> Jáchi sa ñacacuahá ndivaha cuachi na ta janda indiví xinu coo cuachi na. Ta co ndíndójo Ndióxi sahá cuachi cája na. <sup>6</sup> Tá tá quiahva ñacaja na ñan xihín inga ñayivi quiahva já ndítahan caja ndó xihín ná viti. Ta janda ivi táhdá chága ví ndicó coo ndó caja ndó xihín ná. Ta tá quiahva najácoho na ñan inga ñayivi quiahva já ivi táhdá chága ví ndítahan quiahva ndó nu ná coho na. <sup>7</sup> Nandínehe jícó ndivaha na mé ná sahá ña cán quéa ndítahan jándoho ndivaha ndó ini na viti. A juú quiahva ñanduu cuícá na sahá ña cán quéa ndítahan caja xíxi ndó xihín ná viti. Cáhan na ña cahnda na chuun nuú in nacióñ. Ta cáhan na ña a ndóho toho ini na. Ta cáhan na ña coo cúu ná tátuhun in ña cuáñ. <sup>8</sup> Sahá ña cán quéa tixi in talaá quivi quixi tá nuú ña núu nu ná. Já casáhá quivi na ta cacuéha ndivaha ini na ta xinu joco nu ná. Tá já chicaoñ Ndióxi na nu ñúhu cáyi jáchi jándihí Ndióxi, xitoho í saha ná, mé a íin ndéé cája tóco ndihí ñaha —cáchi a.

<sup>9</sup> Tá já casáhá cuacu ndijáá rey, na sáhdá chuun nuú ñayivi ndúu ñuyívi. Ta táhdá ini na tá ná cuni na ñihma cána ñuu Babilonia cán. Jáchi mé na náhnu yóho ñaquihvi nuu na xihín ñá xíca jii cán ta najátiví na jiuñun na xihín ña. <sup>10</sup> Tá xíca xíca ñasacandichí na jáchi yíhvi na sahá ndá quiahva quini ndóho ini ña cúu yuhú nuu ñuu Babilonia cán. Tá já casáhá cáchi mé rey cán já:

—Ay, ay, ndáhví ñahá ñacuu ndó, ñuu Babilonia jáchi vatí cúu ndó ñuu cáhnu ndivaha joo in too johó ñaxinu hora ndóho ini ndó —cáchi na cán.

<sup>11</sup> Tá ndijáá na cája ndahvi ndúu ñuyívi cuacu ri na cán va ta táhdá ndivaha ini na sahá ñuu Babilonia ñan jáchi a cóo ga na cueen ñaha ndójo na xinu coo na. <sup>12</sup> Tá ña sádojo na cán quixi na jícó na cúu jiuñun cuáñ xihín jiuñun cúxú xihín yuu yahvi ndivaha xihín perla vaha xihín jahmá

vaha ndivaha ña cávaha xihín yahva nani lino xihín jahmá seda xihín jáhma ndíhí ticayí xihín jáhma cuáhá ñii xihín ndijáá nuú yító támi sáhan xihín ñaha cávaha xihín nuhu yócó elefante xihín ndijáá yitó yahvi ndivaha xihín ndijáá ñaha cávaha xihín caa cuáán xihín ña cávaha xihín caa uun ta jári ñaha cávaha xihín yuu nani mármol. <sup>13</sup> Ta quiahva já sáñehe na canela xinu coo na xihín ndijáá ñaha támi sáhan. Ta ñehe na jusa xihín mirra xihín perfume viti. Ta quiahva já ñehe ri na vino xihín aceite xihín harina vaha xihín trigo. Ta quiahva já sáñehe ri na quití xójo xihín ndicachi xihín cuáyí xihín carreta. Ta janda ñayivi xéen na caja chúun nu ná sáñehe na. Ña yóho sádojo na quíxi na joo ni in na a cuéen ga ñaha na. <sup>14</sup> Ndjáá na cája ndahvi cán cahan na xihín ñuu Babilonia cán já cachi na já:

—Coó ga cuihi vaha, rí catóo nahá ndó caxí ndó. Ta viti sa nandihí saha tóco ndihí ña lándá xihín ña cuicá nasanduu nu ndó jan —cáchi na.

<sup>15</sup> Ta na ñacaja ndahvi xihín tóco ndihí ñaha yóho nandicuicá ndivaha na xihín ndahvi ñacaja na xihín na ñuu Babilonia cán. Ta xicá xicá candita na candehé na ñuu Babilonia cán jáchi yíhvi na ndoho na tá quiahva ndóho ini na cán. Ta cuacu ndivaha na ta táhnda ndivaha ini na. <sup>16</sup> Ta já cáchi na já:

—Ay, ay, ndáhvi nahá ñacuu ñuu cáhnu Babilonia jan. Ndató ndivaha nasanaha ñuu yóho tátuhun in ñañáha ndíxi jahmá lino vaha ndivaha xihín jahmá ndíhí ticayí xihín jahmá cuáhá ñii. Ta ñacacutú ña xihín jiuhun cuáán ta xihín yuú yahvi ndivaha ta xihín perla. <sup>17</sup> Joo in too johó nandihí saha tóco ndihí ña cuicá nasacomí mé ñuu Babilonia jan —ñacachi na.

Ta ndijáá na sáhnda chuun nuú na ñehe barco, xihín ndijáá na cándójó xica xihín ndijáá na cája chúun ini mé barco cán xihín ndaja táhan na cája ndahvi xihín ña quixi chí tañuhú cán nasandita xicá na sáñehe na. <sup>18</sup> Ta tá ñaxini na ndíndita ñihma ña cáyi ñuu cán já ñacayuhú na já ñacachi na já:

—Ni in túhun toho inga ga ñuu co queé táhan xihín ñuu Babilonia ña cáhnu yóho —ñacachi na.

<sup>19</sup> Ta xihín ña táhnda ini na ñachojó na ña yacá jiní ná. Ta ñacasahá sacú ndivaha na já cáyuhú na já cáchi na já:

—Ay, ay, ndáhvi nahá ñacuu ñayivi nasanduu ñuu cáhnu jan jáchi xihín ña cuicá nasacomí na najácacuicá na ndijáá da xica nuú tañuhú xihín barco. Joo in too johó nandihí saha ña jan —cáchi na cán sacú na.

<sup>20</sup> Ta ndítahan cajji ini na ndúu indiví saha ña ñandoho ñuu cáhnu yóho. Ta quiahva já ndítahan cajji ri ini ndijáá na cúu cuéntá Ndióxi xihín na cúu apóstol xihín na cúu profeta. Jáchi xihín ña ñacaja Ndióxi xihín ñuu Babilonia yóho nandiquehe a cuéntá saha ña núu ñacaja mé na cán xihín ndó, na cúu cuéntá Ndióxi.

<sup>21</sup> Tá nandihí já ñaxini i in tátó Ndióxi, ña ín cuaha ndé. Ndíñehe a in yuu cáhnu ña cúu á tátuhun in yuú yojó. Ta najácana a ña ini tañuhú ta já ñacachi a já:

—Tá quiahva najácana i yuú yojó yóho ini tañuhú ta nasacoo a cahá tañuhú cuahan quiahva já vaha ri xihín ñuu Babilonia. Vatí cúu a in ñuu cáhnu ndivaha joo anda ama cáa quivi a ndíco coo ga ñayivi cuni na ña. <sup>22</sup> Ta ni música a tácu ga mé ñuu jan ta ni a cáha ga arpa ni tóyoó ni trompeta. Ta ni in ga ñayivi a cája chúun ga ñuu jan jáchi ni in túhun toho ndahvi a cája na. Ta ni a tácu ga yuú yojó ña ndíco najihí. <sup>23</sup> Ta janda ni in íti loho a túun ga ñuu jan. Ta ni a cahan ga ñayivi vicó tándaha jáchi coo ga ña jan coo. Jáchi na najicó ñaha cán nasacuu na na náhnu ndúu ñuyiví ta najándahvi na ndaja táhan ñayivi ndúu ñuyiví xihín ña tají ñacaja na —cáchi tátó Ndióxi.

<sup>24</sup> Ta ndoho ini na jáchi mé ñayivi ñuu Babilonia jan nasahní na na profeta xihín na cúu cuéntá Jesús ta anda cuahá ñayivi ndijáá ñuu ñuyiví nasahní nahá na.

## 19

<sup>1</sup> Tá sa ñayaha tóco ndihí ña yóho já ñaxini johó i cahan cóho cuahá ndivaha ñayivi indiví ta já cáchi na já:

Cáhnu cúu Ndióxi jáchi in túhun mé á queá jácacu mí.

Ta ín ndéé mé á caja tóco ndihí ñaha ta cáni nu yó caja cáhnu ndivaha í mé á.

<sup>2</sup> Jáchi ndaa cája ndihí mé á ñaha tá cája víi a saha ñayivi.

Ta ndaa ñacaja mé á tá nasacu ini a jándihi a sahá ñuu Babilonia jan jáchi nasacuu a tátuhun ñá xíca jii.

Jáchi xihín tóco ndihi ña núu nasacaja ñá ña quíji ñá xihín na co cúu yíi ña najátivi ndihi ñá ñayivi ndúu ñuyívi.

Sahá ña cán quéa najándihi Ndióxi saha ña ta já natahnda cuénta sahá ña ñacaja ñá tá nasahní ñá na cúu cuénta Ndióxi, cáchi na cáhan indiví cán.

<sup>3</sup> Tá nandihí já ñacasáhá tucu na cán cáhan na já cáchi na já:

—Cáhnú cúu Ndióxi jáchi ñacaja mé á ña cáyi ñuu cán ta anda ama cáa quívi ndíndita ñihma ña —já cáchi na indiví cán.

<sup>4</sup> Ta ndíhoco comí na sacuahá ndúu cán xihín ndícomí mé ña tácu cán ñacaxítí na janda quiahva ñacani ndaa taan na nu ñúhu ta já ñacaja cáhnú na Ndióxi, mé a íin coo nu sácco rey cán. Ta tá cája cáhnú na Ndióxi já cáchi na já:

—Já ná coo. Cáhnú cúu Ndióxi —cáchi na.

<sup>5</sup> Ta janda nu íin coo Ndióxi cán ñaxini johó i cáhan in a ta já ñacachi a já:

—Tóco ndihi ndó, na cája chúun cuénta mé á xíní ñúhú caja cáhnú ndó Ndióxi, mé a cája cáhnú í. Coó caja toho a á cúu ndó na náhnú á na valí jáchi cája ndó ña sáhdá mé á —cáchi a.

*Tá coo víco indiví sahá ña ndiquehe Jesucristo na cúu cuénta mé á*

<sup>6</sup> Tá nandihí já ñaxini johó tucu u ña tácu tátuhun tá cáhan cuahá ndivaha ñayivi. Ta tácu ña tátuhun tá cáha cúyu ticuú tañu cáva ta tácu ña tátuhun tá cána tasa. Ta já cáchi na já:

Cáhnú cúu Ndióxi, xitoho í, mé á cája cáhnú í jáchi sa ñacasáhá mé á comí a cuénta sahá ñayivi viti.

Ta íin ndée mé á caja tóco ndihi ñaha.

<sup>7</sup> Xíní ñúhú cavatá yo ta xíní ñúhú cajii ndivaha iní caja cáhnú ndivaha í mé á.

Jáchi sa ñaxinu coo quívi ndiquehe Jesucristo, mé a cúu tátuhun ndicachi loho, na cúu cuénta mé á.

Cacuu a tátuhun tándaha Jesucristo xihín na cúu cuénta mé á, na sa ndúu tiáhva na tándaha na xihín mé á.

<sup>8</sup> Ta ñehé táhvi ná candixi na jahmá vaha ndivaha, ña naní lino ta cúu á ña víi

ndivaha ta ndató ndíyihvi a, cáchi na.

Jáchi mé jahmá víi ña naní lino cán náha ña naxica vaha na cán íchi cuénta Ndióxi.

<sup>9</sup> Tá nandihí já ñacachi mé táto Ndióxi já xihín i:

—Cahyún ña yóho. Cajii ini ñayivi, na ñacana Ndióxi cuhun indiví tá ná xinu coo quívi ndiquehe Jesucristo, mé a cúu tátuhun ndicachi loho cán, na cúu cuénta mé á —ñacachi táto Ndióxi cán xihín i.

Ta ñacachi tucu a já:

—Mé a ndaa ndinuhu tuhun Ndióxi cúu ña yóho —ñacachi a xihín i.

<sup>10</sup> Anda já ñacaxítí i nu táto Ndióxi cán ña ná caja cáhnú i ña. Joo já ñacachi a já xihín i:

—A cáxítí tohún nuú yehé jáchi ndítahan caja cáhnún Ndióxi. Jáchi yehé cúu u da cája chúun nu Ndióxi tá quiahva cája chúun yóho xihín java ga na cúu cuénta Jesús, na cúu ñanún, na co jándacoo cáhan ña ndaa, ña najánaha Jesús nuú ñayivi. Caja cáhnún Ndióxi —cáchi a.

Jáchi na cúu profeta cándéé ini na ña jánaha Jesús ña ndaa sahá ña cán quéa cáhan na ña nuú ñayivi.

*Tá ñaxini Juan in a cánúu cuáyí yaa*

<sup>11</sup> Tá nandihí já ñaxini i ñanuna indiví ta ñaqueta in cuáyí yaa. Ta mé a cánúu rí cán naní a: mé a co cáva ivi johó ini. Ta naní tucu a: ña ndaa. Jáchi ndaa cája víi a sahá ñayivi ta ndaa cája mé á tá quíhvi táhan cáni táhan xihín ná. <sup>12</sup> Ta tá quiahva yehé nu cándaa ñúhu cáyi quiahva já yehé nduchú núu a. Ta cándojó cuahá ndivaha tiyivi jini á. Ta ndaa in quívi taan mé á joo in túhún mé á xíní ndá quívi quéa ndaa taan. <sup>13</sup> Ta nandaxi jáhma mé á xihín nii. Ta naní a: tuhun Ndióxi. <sup>14</sup> Ta ñaxini i ndíco in táhdá cáhnú soldado cuénta indiví jatá cuahan na xihín á. Ta ndíxi na jahmá vaha ña naní lino. Ta cúu á jahmá yaa cachi, ña ndató víi ña. Ta in in na cán cánúu cuáyí yaa cásahan na xihín á. <sup>15</sup> Ta yúhu mé á ña cúu tuhun Ndióxi cán quéta in yúchu cáni ña jeen ndivaha. Ta xihín mé yúchu jeen cán jándicuehe quini ndivaha mé á ndijáá ñayivi ndúu ñuyívi. Ta cahnda ndéé mé á chuun saha ná. Ta cája víi a saha ná tá quiahva cája da sáni nihni jata uva ini pila

ña ná cuhn̄i r̄i. Ta mé Ndióxi cúú á jándoho ndivaha ini ñayivi jáchi xójo ndivaha ini mé á xih̄in ná ta mé á cúú á Ndióxi ña ín ndée caja tóco ndihi ñaha. <sup>16</sup> Ta jat̄a jáhma ndíxi mé a cán xih̄in nu jíhin a ndáa java tuhun já cáchi ña já: “Yehe cúú rey nuú ndaja táhan rey ta cúú u xitoho nuú na náhnu ndúu ñuyíví”, cáchi a.

<sup>17</sup> Tá nandih̄i já naxini i in tát̄o Ndióxi cándichi a jat̄a cándii. Ta já nacayuhú cóhó a nuú ndijáa laa, rí ndáchí nu táchi. Ta já nacachi a já xih̄in r̄i:

—Naha ndihi ndó taca ndó cajini ndó ña quiahva Ndióxi nu ndo. <sup>18</sup> Ta ña caxí ndo cacuu a yiquí cuñu na náhnu, na sáhdá chuun nuú ñayivi. Ta caxí ndo yiquí cuñu na cúú sacuaḥa nu soldado xih̄in yiquí cuñu na ndacú. Ta caxí ndó yiquí cuñu cuáyí xih̄in yiquí cuñu da cándójó jat̄a r̄i. Ta caxí ndó yiquí cuñu na xica núná mé xih̄in na cómí xitoho cuéntá saḥa. Ta quiahva já caxí ndó yiquí cuñu na valí xih̄in na náhnu viti —cáchi a.

<sup>19</sup> Tá nandih̄i já naxini i rí cúú quití quini cán nat̄aca rí xih̄in na náhnu, na sáhdá chuun nuú ñayivi ndúu ñuyíví ta xih̄in soldado na. Nat̄aca na caní táhan na xih̄in mé a cánúu jat̄a cuáyí yaa cán xih̄in soldado mé á. <sup>20</sup> Ta natiin mé á quití quini cán xih̄in da cúú profeta túhún, mé da nacaja ña xitúhún nu mé rí cúú quití quini cán. Jáchi xih̄in ña xitúhún nasacaja mé profeta túhún cán najándahvi da ñayivi ta najácahan da na ña ná nani marca mé rí quini cán yiquí cuñu na. Ta já nacaja cáhnu na tiniñu yúu r̄i. Ta naxini i najácana tácu Ndióxi mé quití quini cán xih̄in profeta túhún cán ini indayá, ña cúú tátuhun in m̄ini nu cándaha ñúhu cáyi xih̄in azufre. <sup>21</sup> Ta na java ga cán naxih̄i na xih̄in yúchu caní ña naqueta yúhu mé a cánúu jat̄a cuáyí yaa cán. Ta ndijáa laa nat̄aca ndihi rí caxí rí yiquí cuñu na janda quiahva nandivaha ini rí.

## 20

*Cáhan Juan saḥa in mil cuiá tá ná candico ndaa tiñáhá sacuaḥa*

<sup>1</sup> Tá nandih̄i já naxini i nanuu in tát̄o Ndióxi chí indiví ta ñehe a yáví ña súná yuhú yáví cúná, ña co xinu nu ndihi nuu

cán. Ta cáñee in cadena ndeé ndáha á. <sup>2</sup> Ta natiin mé á coo quini, rí cúú tiñáhá sacuaḥa naní Satanás, rí nasah̄in janda saḥa. Ta nat̄at̄o a r̄i xih̄in cadena cán t̄ixi in mil cuiá. <sup>3</sup> Ta najácana a r̄i ini yáví cúná nuú nachicaji a r̄i. Ta nasacu a in sello yuhú yéhe nu ndácaan r̄i já ná a quéta rí jándahvi rí ñayivi ñuyíví janda quiahva ná yaha mé in mil cuiá. Ta tá sa nayaha in mil cuiá já jan̄i tucu rí caca nuu rí t̄ixi chá tiempo cuítí va.

<sup>4</sup> Tá nandih̄i já naxini i ndíta cuaha táyi vaha nu ndúu coo na candojo chuun ña caja vií na saḥa ñayivi. Ta quiahva já naxini r̄i cán ndúu ínima na nachitúhun na yiquí jini na jáchi nacahan na tuhun Ndióxi, ña ndaa najánaḥa Jesús nuú ñayivi. Ta cúú ná na coo nacaja cáhnu quití quini cán xih̄in tiniñu yúu r̄i. Ta ni coo nasahan na ñamaní nani marca r̄i taan na ni ndáha ná. Ta naxini i nanditacu tucu mé na cán ta anda jáví mé ná xih̄in Jesús nasacomí na cuéntá saḥa ñayivi t̄ixi in mil cuiá. <sup>5</sup> Ta na yóho cacuu na nu cuítí nditacu tucu. Joo java ga na naxih̄i cán camaní nditacu na jáchi ndítahan nu ná candati na janda quiahva ná yaha in mil cuiá. <sup>6</sup> Cajii ini ñayivi, na nditacu tañu na jánditacu Ndióxi nu cuítí cán jáchi cúú ná na nandicaxi mé á. Jáchi a cūhun toho na indayá nu ndoho ini ñayivi quini. Ña cán cacuu a tátuhun quivi na chí ivi. Ña yaha xih̄in ná quéa nduu na jut̄u caja ndíví na nu Ndióxi xih̄in nuú Jesucristo. Ta xih̄in mé á cacomí na cuéntá saḥa ñayivi t̄ixi in mil cuiá.

<sup>7</sup> Ta tá sa ná yaha in mil cuiá cán já jan̄i Satanás, mé tiñáhá sacuaḥa nu ndácaan rí ndájí r̄i cán. <sup>8</sup> Ta já queta rí jándahvi rí ndijáa ñayivi ndúu ñuyíví. Ta jándahvi rí ñayivi ndúu ñuu naní Gog xih̄in ñuu naní Magog ña ná taca na caní táhan na. Ta na soldado taca cán cacuu na tátuhun ñutí ndúu yuhú tañuhú xih̄in ña cuaha cúú ná. <sup>9</sup> Ta ndicujta nuu ñayivi ndijáa ñuu ñuyíví ta cava yiví na jat̄a tóco ndihi na cúú cuéntá Ndióxi. Ta quiahva já cava yiví na jat̄a ñuu Jerusalén, mé ñuu ña quihvi ini Ndióxi. Joo jácuuyu Ndióxi ñúhu cáyi indiví ta jándih̄i a saḥa ná. <sup>10</sup> Ta mé tiñáhá sacuaḥa, mé rí najándahvi ñahá cán jácana Ndióxi r̄i ini in m̄ini nu cándaha ñúhu cáyi xih̄in azufre. Ta



sa mé cán cúu nu jácana mé á quití quini xihín da cúu profeta túhún. Ta cán cañuhu na ndoho ini na ñuu ta ndiví anda ama cáa quivi.

### *Tá cája vii Ndióxi sahá ñayivi*

<sup>11</sup> Tá nandihí já naxini i in táyi cáhnu, dó yaa cachí nu sácoo Ndióxi. Ta nuu mé á nandihúhú tóco ndihí ñuyívi xihín indivi ta chí a vája ga cuu cuní ña. <sup>12</sup> Ta naxini i ndijáa na sa naxihí, na válí xihín na náhnu ndíta na nu ín coo Ndióxi. Tá nandihí já naxini i nanuna nuú java libro. Ta nanuna inga libro nu ndáa quivi tóco ndihí na catacu anda ama cáa quivi. Ta já nacavií sahá ña nacaja in in na sa naxihí cán jáchi ini mé libro cán ndáa tóco ndihí ña nacaja in in ñayivi. <sup>13</sup> Ta nandindita tóco ndihí na naxihí ini tañuhú xihín na nanduxu já ná caja vii Ndióxi sahá ndihí na tá quiahva cáa nacaja in in na cán. <sup>14</sup> Janda jávi a quivi ga ñayivi ta a cuhun ga ínimá na nuú nataca ínimá na naxihí. Joo najácana Ndióxi ñayivi quini ini mé mini nu cándaha ñuhu cáyi. Mé mini cán cúu á indayá nuú ndoho ini ñayivi ta cúu á tátuhun quivi na chí ivi. <sup>15</sup> Ta mé cán cúu nuú najácana Ndióxi tóco ndihí na co ndáa quivi nu mé libro nu ndáa quivi ñayivi catacu anda ama cáa quivi.

## 21

### *Tá naxini Juan indivi saá xihín ñuyívi saá*

<sup>1</sup> Tá nandihí já naxini i indivi saá xihín ñuyívi saá. Jáchi sa nandihí va sahá indivi xihín ñuyívi ña nu cuítí cán. Ta jári tañuhú sa coo ga dó ñuhu viti. <sup>2</sup> Ta yehe, da cúu Juan naxini i nanuu ñuu Jerusalén saá, ña yí ta naquixi a chí indivi nu ín Ndióxi. Ta tá quiahva ndató cacutú in ñáñáha tándaha ndiquehe ná yí ña quiahva já ndató nacacutú ñuu Jerusalén cán. <sup>3</sup> Tá nandihí já naxini johó i nacayuhú cóhó a chí indivi ta já cáchi a já:

—Ndióxi ín a tañu ñayivi viti jáchi cúu ná cuéntá mé á. Ta coo a xihín ná jáchi cúu á Ndióxi, mé á cája cáhnu na. <sup>4</sup> Ta mé á yacó ndihí a ticuítí nuu ná ña nasacu na. Ta a quivi ga na. Ta ni a cuácu ga na. Ta ni a táhnda ga ini na. Ta ni a ndihíhvi ga na. Jáchi sa najándihí Ndióxi sahá tóco ndihí ña cán, ña nasahin jihna —cáchi a.

<sup>5</sup> Ta mé a ín coo nu sácoo rey nacahan ta já nacachi a já:

—Candehé. Yehe ndája saá i tóco ndihí ñaha.

Ta já nacachi tucu a já:

—Cahyún tóco ndihí ña cáhan i xuhun yóho jáchi cúu á ña ndaa ta cuu candeé ini ndó ña —cáchi a.

<sup>6</sup> Tá nandihí já nacachi tucu a já xihín i:

—Sa najaxinu coo i tóco ndihí ñaha. Yehe cúu u nu cuítí ta yehe cúu u nu ndihí jáchi janda tá cámaní cava sahá sahá tóco ndihí ñaha sa ín va yehe ta coo tá coo i vatí ná ndihí sahá. Ta ndá na cuní candaa chága ini sahá yehe já caja i ña ná cuu candaa ini na sahá i. Ta cúu á tátuhun íchi ini na ticuítí, dó cája ña ná catacu na anda ama cáa quivi. Ta coo toho yahvi quehe e nu ná saha do. <sup>7</sup> Ta ndá na ná cana vaha nu tóco ndihí ña núu ñehe táhvi na ndiquehe na tóco ndihí ña yóho nuú i. Ta yehe cacuu u Ndióxi, mé á caja cáhnu na ta mé ná cacuu na jahyi i. <sup>8</sup> Joo na láhá xihín na co cuní candúsa tuhun Ndióxi xihín na cándají na cúu cuéntá Ndióxi, mé ná cán cuhun na indayá nu cándaha ñuhu cáyi xihín azufre. Ta cán cuhun ri na sáhní ndii xihín ndijáa na ndúu xihín na co cúu yí á ñájíhí na. Ta cán cuhun ndijáa na caja tá nuú ña tají xihín na caja cáhnu yoco xihín na cáhan ña tuhún. Ña yóho cacuu a tátuhun quivi na chí ivi jáchi ndoho ndivaha ini na ini indayá nu cándaha ñuhu cáyi xihín azufre —cáchi a.

### *Cáhan Juan sahá ñuu Jerusalén saá*

<sup>9</sup> Ta ndaja coo in táhan ndihusa táto Ndióxi ña ñehe usa coho nu ñuhu usa ña núu quixi jatá ñuyívi naxinu a nuú i ta já nacachi a já xihín i:

—Naha quí yóho candehún. Jáchi jánaha i nuun na cúu cuéntá mé a cúu tátuhun ndicachi loho. Na yóho cúu ná tátuhun in ña tándaha ta Jesucristo cúu á tátuhun yí ña —cáchi a.

<sup>10</sup> Anda já nacaja ínimá yí Ndióxi xihín i ña ndáca táto Ndióxi yehe já nasahan i in yucu jícó ña cáhnu. Ta cán naxini i ñuu Jerusalén ña yí, ña nanuu chí indivi nu ín Ndióxi cán. <sup>11</sup> Ta mé ñuu cán ndató ndivaha yehe ña jáchi caja mé á ña ná ndiyehé ña. Ta jíñu ña tá quiahva jíñu yuu yahvi ndivaha

tátuhun yuu jaspe. Ta cúú á tátuhun yutátá jáchi cuu candehé yó chíhini a janda inga xoo a. <sup>12</sup> Ta jata mé ñuu cán ñacava nuu in náma yuu cáhnu ta jícó ndivaha. Ta ñasahin uxu ivi yéhe a nu ndíta in in tátó Ndióxi in in yéhe a. Ta ndica yéhe cán ndáa quiví ndihuxu ivi táhndá na ñaquixi chichi Israel. <sup>13</sup> Ta uní yéhe sándehe nu xoo cána candii. Ta uní yéhe sándehe nu chí norte. Ta uní yéhe sándehe nu chí sur. Ta uní yéhe sándehe nu xoo quéta nuu candii. <sup>14</sup> Náma yuu ñuu Jerusalén cán ñasahin uxu ivi yuu ndúhu saha. Ta jata yuu cán ndáa quiví ndihuxu ivi na apóstol, na ñaxica tuun xihin Jesús, mé a cúú tátuhun ndicachi loho cán.

<sup>15</sup> Mé tátó Ndióxi ña cáhan xihin i cán cánee in tóyoó jiuhun cuáan ndaha ña ná chiquiahvá mé á ñuu cáhnu xihin yéhe a xihin náma yuu ña ndájí jata. <sup>16</sup> Ta ñachiquiahvá a ña xihin tóyoó cán ta in quiahva ndáa ndicomí xoo mé ñuu cán ta chí in quiahva cáni a ta in quiahva ndica ña. Ta quiahva ñehe a cúú á ivi mil ivi ciento kilómetro. Quiahva já cáni ña ta quiahva já jícó ña ta quiahva já ndica ña. <sup>17</sup> Tá ñandihí já ñachiquiahvá tátó Ndióxi cán náma yuu ndájí jata ñuu cáhnu cán. Ta quiahva ñehe a cúú uní jico comí metro. Ta metro cája chúun tátó Ndióxi cán cúú dó tátuhun dó chíquiahvá ñayivi ndúu ñuyiví ñaha.

<sup>18</sup> Ta mé náma yuu ndájí jata ñuu cáhnu cán ñacavaha ña xihin yuu jaspe. Ta mé ñuu cáhnu cán ñacavaha ña xihin jiuhun cuáan, ña cúú tátuhun yutátá ña vií ndivaha nuu. <sup>19</sup> Ta mé yuu ndúhu ña ñacana saha mé náma yuu cán ñacacutú a xihin tá nuú yuu yahvi ndivaha. Yuu ndúhu nu cuítí cán ñacacutú a xihin yuu naní jaspe. Ta ña cáhivi cán ñacacutú a xihin yuu naní zafiro. Ta ña cáhuni cán ñacacutú a xihin yuu naní ágata. Ta ña cácomí cán ñacacutú a xihin yuu naní esmeralda. <sup>20</sup> Ta ña cáhuhun cán ñacacutú a xihin yuu naní ónice. Ta ña cáhñu cán ñacacutú a xihin yuu naní cornalina. Ta ña cáhusa cán ñacacutú a xihin yuu naní crisólito. Ta ña cáhuna cán ñacacutú a xihin yuu naní berilo. Ta ña cáhñu cán ñacacutú a xihin yuu naní topacio. Ta ña cáhuxu cán

ñacacutú a xihin yuu naní crisoprasa. Ta ña cáhuxu in cán ñacacutú a xihin yuu naní jacinto. Ta ña cáhuxu ivi cán ñacacutú a xihin yuu naní amatista. <sup>21</sup> Ta ndihuxu ivi yéhe ini ñuu cáhnu cán cúú á uxu ivi perla. Ta tá in tá in yéhe cán ñacavaha xihin in tálaá perla ní. Ta mé cáyé cáhnu ñuu cán cúú á ña ñacavaha xihin ndinuhu jiuhun cuáan, ña cúú tátuhun yutátá jáchi janda inga xoo a tívi.

<sup>22</sup> Ta ni in túhún veñuhu coó ñaxini i ini mé ñuu cáhnu cán. Jáchi mé Ndióxi, xitoho í, mé a íin ndée cája tóco ndihí ñaha cúú á tátuhun veñuhu na. Ta jári Jesús, mé a cúú tátuhun ndicachi loho cán cúú á tátuhun veñuhu na. <sup>23</sup> Ta mé ñuu cáhnu cán co xini ñúhú toho a candii ni yoo ña ná jándiyehé ñahá jáchi xihin quiahva yéhe Ndióxi cán jándiyehé a mé ñuu cán. Ta Jesús, mé a cúú tátuhun ndicachi loho cán cúú á tátuhun lámpara jándiyehé a ñuu cán. <sup>24</sup> Ndijáa ñayivi, na ñaquixi ndijáa nación ñuyiví caca nuu na ini ñuu cáhnu cán xihin quiahva yéhe a. Ta ndijáa na sáhndá chuun nuú ñayivi ñuyiví xinu na ñuu cán ta ndiquiahva na tóco ndihí ña cuicá comí na nu mé ñuu cán. <sup>25</sup> Ta a cándaji toho yéhe a tá ndivi ta coó toho ña ñuu coo cán. <sup>26</sup> Ndijáa ña cuicá xihin ña náhnu cuénta ñayivi ñuyiví yóho cañehe na ña nu mé ñuu cán. <sup>27</sup> Joo ni in túhún ña quini a quihvi toho ini ñuu cán. Ta ni in na cája ñaha cándají Ndióxi a quihvi cán. Ta ni na cátoó jándahvi ñayivi a quihvi cán. Na ndihvi cán cuití va cúú ná na ndáa quivi nu libro nu ndáa quivi tóco ndihí na catacu anda ama cáa quivi. Mé libro yóho íin a nuú Jesús, mé a cúú tátuhun ndicachi loho.

## 22

<sup>1</sup> Tá ñandihí já najánahta tátó Ndióxi cán in yuta vií nuú i nu ñúhu ticuítí, dó cája ña ná catacu ñayivi anda ama cáa quivi. Ta tá quiahva yéhe yutátá quiahva já yéhe nuu do. Ta cána dó chí xoo nu íin coo Ndióxi xihin Jesús, mé a cúú tátuhun ndicachi loho cán. <sup>2</sup> Ta yáha dó mé mahñú ndaa íchi cáhnu mé ñuu cán. Ta in in xoo yuta cán sáhnu yíto, dó cája ña ná catacu ñayivi anda ama cáa quivi. Ta tá yoo tá yoo cúun cuíhi nu dó cán. Ta uxu ivi tañu cúun cuíhi nu do

nu cuía. Ta ndáha do cája ña ná ndivaha ñayivi ñuyiví. <sup>3</sup> Ta cán ni in ga ñaha a cúhun chahan jata. Ta Ndióxi xihín Jesucristo, mé a cúu tátuhun ndicachi loho cán coo a nu sácoo rey mé ñuu cáhnu cán. Ta na cúu cuénta Ndióxi caja cáhnu na mé a cán. <sup>4</sup> Ta cuni táhyí na nuu mé á ta candaa quivi mé á taan na. <sup>5</sup> Ta cán coo toho ñuu coo. Ña cán quea na canduu cán a cuni ñúhú ga na ñúhú lámpara ta ni a cuni ñúhú ga na ña ná yehe candii jáchi mé Ndióxi, xitoho na jándiyehé a nu ná. Ta cahnda na chuun tátuhun rey anda ama cáa quivi.

### *Sa cáyati quivi quixi Jesucristo*

<sup>6</sup> Tá nandihí já nacachi tátō Ndióxi cán já xihín i:

—Tuhun yóho cúu á ña ndaa ta cuu can-deé inún ña. Jáchi mé Ndióxi, xitoho í, mé a cája ña ná cahan profeta, mé a cán quea nachindahá a tátō mé á já ná caxi tuhun a nuu na cúu cuénta mé á ña yachi quixi tóco ndihí ña yóho —nacachi a.

<sup>7</sup> Ta já cáhí Jesús já:

—Sa saa yachi va yehe. Cajji ini na cándúsa tuhun cáhan sahá ña yaha chí nuu, ña ndaa nu libro yóho —cáhi a.

<sup>8</sup> Yehe, da cúu Juan naxini johó i ta naxini ndihí i ña yóho. Ta tá nandihí naxini johó i ña ta tá nandihí naxini i ña já nacaxítí i nu tátō Ndióxi ña caja cáhnu i ña jáchi mé a najánaña ña yóho nuu i. <sup>9</sup> Joo nacahan tátō Ndióxi cán xihín i já nacachi a já:

—A cáxítí tohún nuu yehe jáchi ndítahan caja cáhnún Ndióxi. Jáchi yehe cúu u da cája chúun nu Ndióxi tá quiahva cája chúun mún xihín ñanún, na cúu profeta cuénta Ndióxi xihín na cándúsa ña cáhan libro Ndióxi yóho —nacachi tátō Ndióxi cán xihín i.

<sup>10</sup> Tá nandihí já nacachi tucu a já xihín i:

—A chíjehé tuhún sahá tuhun Ndióxi, ña ndaa nu libro yóho jáchi sa nacayati tiempo xinu nuu á coo a. <sup>11</sup> Joo ndá da cája quini ná caja quini chága da tá cuni da. Ta ndá da coo víi ná caca tiqúini mé dá tá cuni da. Joo ndá da vaha ná ndihí ini da caja da ña vaha. Ta ndá da nandiquiahva vaha mé ndáha Ndióxi ná ndihí ini da caca ndacú da íchi cuénta mé á —cáhi tátō Ndióxi xihín i.

<sup>12</sup> Ta já nacachi Jesús já xihín i:

—Candehé. Sa saa yachi vi. Ta vaxi i ñéhe e yahvi quehe in in ñayivi. Ta ndiquiahva i nuu in in na ña ndítahan quehe na sahá ña nacaja na. <sup>13</sup> Yehe cúu u nu cuítí ta yehe cúu u nu ndihí jáchi jándá tá camaní cava sahá saha tóco ndihí ñaha sa in va yehe ta coo tá coo i vatí ná ndihí sahá —cáhi a.

<sup>14</sup> Cajji ini ñayivi, na nandaja víi ínima jáchi cúu á tátuhun ndícata na jáhma ná já ná cuu ñehe táhvi na caxí na cuíhi nuu yitó cuíhi, dó cája ña ná catacu ñayivi anda ama cáa quivi. Jáchi xihín ña yóho cuu quíhvi na chí yéhe ñuu cáhnu cán. <sup>15</sup> Joo chí jata mé ñuu cán candoo tóco ndihí na nacaa cája ña núu xihín tóco ndihí na cája ña tají xihín ndijáa na ndúu xihín na coo cúu yíi ná á ñájihí na. Ta jata ñuu cán candoo ri na sáhní ndii xihín na cája cáhnu yoco xihín na cáhan ña tuhún xihín na jándahvi ñani táhan.

<sup>16</sup> —Yehe cúu Jesús ta nachindahá i tátō mí i já ná caxi tuhun a ña yóho xihín ndijáa na cúu cuénta mí i, na ndítaca ndijáa veñuhu. Yehe nacaja i ña nacacu rey David ta naquixi i chíchi mé David. Cúu u tátuhun quimi cáhnu, rí quéta tá nativi —cáhi Jesús.

<sup>17</sup> Mé ínima yii Ndióxi xihín na cúu cuénta Jesús cana na Jesús ña ná quixi a ta já cachi na já:

—Naha quíi ndo.

Ta ndá na xini johó ña yóho xini ñúhú cachi ri na cán va:

—Naha quíi ndo.

Ta ndá na íchi ini ticuíi, na cuni coho dó ná quixi na nu mé á já quiahva ticuíi nu ná, dó caja ña ná catacu na anda ama cáa quivi. Ta coo toho yahvi quehe mé á nu ná saha do.

<sup>18</sup> Ta ña yóho quea cuni cachi i xihín tóco ndihí ndó, na xini johó ña ndaa nu libro yóho: Ta ndá na ná chinúu chága tuhun jata ña sa cáhan libro yóho já quea chinúu ri Ndióxi tondóhó, ña ndaa nu libro yóho jata ná. <sup>19</sup> Ta ndá na ná tavá tuhun cáhan Ndióxi, ña ndaa nu libro yóho já quea tavá Ndióxi quivi ná ña ndaa nu libro mé nu ndaa quivi tóco ndihí ñayivi catacu anda ama cáa quivi. Ta mé na cán a cuu quíhvi na ñuu yii ndivaha cán ta ni a quiahva Ndióxi nu ná ñaha cáhan mé libro yóho saha.

<sup>20</sup>Ta sáhan Jesús tuhun saha tóco ndihi ña nde.  
yóho já cáchí a já:

—Mé a ndaa sa saa yachi vi —cáchí a.

Já ná coo. Naha quíi ndó Jesús, xitoho

<sup>21</sup>Ña cúni quéa ná caja cuahá Jesucristo,  
xitoho í ñamaní xihín ndihi ndó. Já ná coo.